


Topẽ vĩ rá



New Testament in Kaingang (BR:kgp:Kaingang)

Topẽ vĩ rá

New Testament in Kaingang (BR:kgp:Kaingang)

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-05-05

PDF generated using Haiola and XeLaTeX on 4 Mar 2019 from source files dated 14 Dec 2018

16af52c8-0e45-5e91-b36c-cd314d36d7fc

Contents

MATEUS	1
MARCOS	55
LUCAS	86
JOÃO	144
HAN KÃME	181
ROMA	228
1 CORINTO	251
2 CORINTO	273
GALÁCIA	286
ÉFESO	294
FILIPOS	302
COLOSSOS	307
1 TESSALÔNICA	312
2 TESSALÔNICA	317
1 TIMÓTEO	320
2 TIMÓTEO	326
TITO	330
FILEMOM	333
HEBREU	335
TIAGO	352
1 PEDRO	359
2 PEDRO	365
1 JOÃO	369
2 JOÃO	375
3 JOÃO	376
JUDAS	377
NÉN VENH KE	379

MATEUS TỠ RÁ

Jesus jóg'jóg ve ag

(Lc 3.23-28)

¹ Jesus Cristo jóg'jóg ve ag rán ke vë. Jesus Cristo vỹ tỹ Davi krë'krë nĩ, kỹ Davi vỹ tỹ Abraão krë'krë nĩ. ² Abraão vỹ Isaque han. Kỹ Isaque vỹ Jacó han. Kỹ Jacó vỹ Judá han, ti mré ke ag ke gé. ³ Kỹ Judá vỹ Peres han. Zera ti ke gé. Ā prũ tỹ Tamar fi ki tóg ag hyn han, Judá ti. Kỹ Peres vỹ Esrom han. Kỹ Esrom vỹ Arão han. ⁴ Kỹ Arão vỹ Aminadabe han. Kỹ Aminadabe vỹ Nasom han. Kỹ Nasom vỹ Salmom han. ⁵ Kỹ Salmom vỹ Boaz han, Ā prũ tỹ Raabe fi ki. Kỹ Boaz vỹ Obede han, Ā prũ tỹ Rute fi ki. Kỹ Obede vỹ Jessé han. ⁶ Kỹ Jessé vỹ pã'i mág tỹ Davi ên han.

Kỹ pã'i mág tỹ Davi vỹ Salomão han, Ā prũ ên fi ki, ũ tỹ Urias prũ ja nĩ ên fi ki. ⁷ Kỹ Salomão vỹ Roboão han. Kỹ Roboão vỹ Abias han. Kỹ Abias vỹ Asa han. ⁸ Kỹ Asa vỹ Josafá han. Kỹ Josafá vỹ Jorão han. Kỹ Jorão vỹ Uzias han. ⁹ Kỹ Uzias vỹ Jotão han. Kỹ Jotão vỹ Acáz han. Kỹ Acáz vỹ Ezequias han. ¹⁰ Kỹ Ezequias vỹ Manassés han. Kỹ Manassés vỹ Amom han. Kỹ Amom vỹ Josias han. ¹¹ Kỹ Josias vỹ Jeconias han, ti jãvy ag ke gé. Israel ag tỹ cidade Babilônia ra mũ ên kã tóg ag hyn han, Israel ag tỹ sigse kỹ mũ ên kã.

¹² Ag tỹ cidade ên tá vỹnvỹn ke kar kỹ Jeconias vỹ Salatiel han. Kỹ Salatiel vỹ Zorobabel han. ¹³ Kỹ Zorobabel vỹ Abiúde han. Kỹ Abiúde vỹ Eliaquim han. Kỹ Eliaquim vỹ Azor han. ¹⁴ Kỹ Azor vỹ Sadoque han. Kỹ Sadoque vỹ Aquim han. Kỹ Aquim vỹ Eliúde han. ¹⁵ Kỹ Eliúde vỹ Eleazar han. Kỹ Eleazar vỹ Matã han. Kỹ Matã vỹ Jacó han. ¹⁶ Kỹ Jacó vỹ José han, Maria fi mén ên ti. Maria ên fi ki Jesus tóg mur ja nĩ, hã vỹ: Cristo, he mũ.

¹⁷ Hã kỹ ag tóg 14 (ke) nỹtĩ, Abraão krë'krë ag, Davi mré nĩgrén kỹ. Kỹ Davi krë'krë ag tóg 14 (ke) nỹtĩ gé, ag tỹ ag sigse kỹ nỹtĩ tá ag nĩgrén kỹ, ag tỹ cidade tỹ Babilônia tá sigse kỹ nỹtĩ tá ag nĩgrén kỹ. Tag pãte ag krë'krë vỹ 14 (ke) nỹtĩ gé, Cristo mré nĩgrén kỹ. Cristo jóg'jóg ve ag hã vë.

Jesus Cristo mur

(Lc 2.1-7)

¹⁸ Jesus Cristo mur vỹ ge nĩ, ha mẽ. Ti mỹnh fi vỹ tỹ José prũnh ke fi nĩ, hã ra fag tóg ver jagnë mré nỹ ja tũ nĩ. Ên kã fi tóg kufy nĩ ha. Topë kuprĩg tỹ fi mỹ gĩr han jan hã vë. ¹⁹ Kỹ José tóg mễg mũ sir, fi tỹ kufy nĩ ti, kỹ tóg ti mỹ e tĩ. Ũn jykré kuryj vë mỹr, José ti, hã kỹ tóg fi mỹ'ăg han sór tũ nĩ, kỹ tóg fi to vĩ tũ nĩ sir. Hã ra tóg fi pin kỹ fi mỹ: “kỹ inh hỹn Ā tỹ prũ nĩnh ke tũ nĩ ha.” he sór mũ sir.

²⁰ Ti tỹ ver fi tovãnh to jykrén kỹ Topë tỹ jënë jafã tóg ti mỹ vënh ven mũ sir, ti vënh péti kỹ. Kỹ tóg ti mỹ: “José,” he mũ. “Tỹ Ā Davi krë'krë ag kã ũ nĩ,” he tóg. “Maria fi to jykrén kónãnh tũg nĩ. Jatun mỹ fi tỹ prũg nĩ, fi tovãnh tũg nĩ. Ũ tũ pijé', fi kósin ti. Topë kuprĩg tỹ fi mỹ han ja vë. ²¹ Ti mur kỹ tóg gré nỹnh mũ, ha vemnĩ. Kỹ ti mỹ: Jesus, hemnĩ. Ā povo krenkren han jé tóg ke mũ, ag tỹ Topë vĩ mranh mũ ra,” he tóg, José mỹ, Topë tỹ jënë jafã ti.

²² Hã ra Topë vỹ vãsỹ Ā vĩ tó tĩ ũ mỹ tag tó ja nĩ, ha mẽ. ²³ “Ũn mén ja tũ fi vỹ kufy nĩnh mũ,” he ja tóg nĩ. “Fi kósin fi ki mur ken kỹ ag tóg ti to: Emanuel, henh ke mũ,” he ja tóg nĩ, Topë vỹ tỹ rán kỹ nĩ ki. Emanuel to ke vë, hã vỹ: “Topë vỹ ěg ki rĩr há han mũ,” he mũ, ěg vĩ ki, hã vỹ: Emanuel, he mũ. José vỹ Topë vỹ tag ve ja nĩ.

²⁴ Kỹ José tóg rĩr mũ sir, ti vënh péti kar kỹ. Kỹ tóg Topë tỹ jënë jafã ên vĩ ki króm mũ sir. Vënh prũg han tóg mũ, Maria fi mré. ²⁵ Hã ra tóg ver fi mré nỹ tũ nĩgtĩ. Kejën fi tóg Ā kósin vëg mũ. Kỹ José tóg ti jijin kỹ ti mỹ: Jesus, he mũ. Fi tỹ ti ve kar kỹ tóg vãhã fi mré nỹ mũ sir.

¹ Fi tỹ Jesus ve ẽn kã fag tóg cidade tỹ Belém tá nỹtĩ, ga tỹ Judéia tá. Herodes vỹ tỹ pã'i tỹ rei nĩ, fi tỹ ti ve ja ẽn kurã ki. Kỹ kejẽn ù ag tóg Jerusalém tá junjun mũ. Kuvar há tá ag tóg kãmũ ja nĩ, rã jur ja tá, ãjag jamã tá. Ûn estudo mág han mũ ag vẽ, krĩg to ag tóg estudar he mág han tĩ. ² Ag tỹ Jerusalém tá junjun kỹ ag tóg sir: “ũ tỹ ùri mur mũ vỹ tỹ Israel ag pã'i mág nĩnh mũ,” he mũ. “Ti kri ẽg krĩg vé, ẽg tỹ ẽg jamã tá nỹtĩn kỹ, rã jur ja tá nỹtĩn kỹ. Ẽg tỹ ti venh kãmũ vẽ, ẽg tỹ ti mỹ nẽn ù há vin sór vẽ. Ẽg hỹn hẽ tá ti venh ke mũ?” he ag tóg, ù tỹ kuvar há tá kãmũ mũ ẽn ag.

³ Ag vỹ tag vỹ pã'i tỹ Herodes mỹ e tĩ, kỹ tóg krĩ kufy nĩ sir. Jerusalém tá ke kar ag mỹ tóg e tĩ gé. ⁴ Kỹ Herodes tóg Topẽ tũ ki rĩr tĩ to pã'i ag jé prẽr mũ sir, Topẽ vỹ to professor ag ke gé. Kỹ tóg ag mỹ: “Cristo hỹn hẽ tá mur ke mũ nẽji?” he mũ. ⁵ Kỹ ag tóg ti mỹ: “Belém tá ke nẽji, ga tỹ Judéia tá,” he mũ. “Topẽ vỹ tó tĩ ù vỹ vãsỹ ti to tag rán ja nĩ, ha mẽ,” he ag tóg. ⁶ “Sĩ ti nĩ, cidade tỹ Belém ti, ga tỹ Judéia tá, he ja tóg nĩ. Ti sĩ nĩ ra tóg cidade mág ag kar kãfór kar nĩ, pã'i mág ẽn tỹ tá mur kenh ke tugrĩn. Pã'i mág ẽn vỹ tỹ ẽg povo tỹ Israel kri pã'i mág jẽnh ke mũ, ù tỹ Belém tá mur ke mũ ẽn ti, he ja tóg nĩ, Topẽ vỹ tỹ rán kỹ nĩ ki,” he ag tóg, professor ag, Herodes mỹ. “Hã kỹ tóg Belém tá mur ke mũ, Cristo ti,” he ag tóg, professor ag.

⁷ Kỹ Herodes tóg vẽn h pẽju kỹ fóg ẽn ag mré vẽnẽn mũ sir, ù tỹ krĩg to estudo mág han mũ ẽn ag mré. Kỹ tóg ag mỹ: “kurã tỹ hẽ ki ãjag krĩg ẽn ve vén?” he mũ. ⁸ Ag tỹ ti mỹ kurã tó kỹ tóg Belém ra ag jẽgnẽg mũ sir. “Ãjag tỹ tá junjun kỹ ti jãvãnh nĩ,” he tóg. “Vẽn h kar ki ti jẽmẽnĩ. ãjag tỹ ti ve kỹ inh mỹ tónh kãmũmnĩ. Kỹ sóg ti venh tĩg sór mũ gé, sỹ ti mỹ nẽn ù há nĩm jé,” he tóg, Herodes ti.

⁹ Ag tỹ pã'i ẽn vỹ mẽ kar kỹ ag tóg mũ mũ sir, Belém ra. Ag mũ ẽn ki ag tóg krĩg ẽn ve mãn mũ gé sir, ag tỹ rã jur ja tá krĩg vég mũ ẽn. Krĩg ẽn vỹ ag jo tĩ mũ. Ag tỹ Belém tá junjun kỹ krĩg tóg ùn sĩ nĩgia kri hã sa nĩ sir. ¹⁰ Ag tỹ krĩg ẽn ve kỹ ag fe tóg mrin ke mũ sir. ¹¹ Ìn kãra ge kỹ ag tóg ùn sĩ ti vég mũ, ti mỹnh fi ke gé. Kỹ ag tóg ti krẽm grĩnhgrĩnh ke mũ, ti mỹ: “tỹ ã Topẽ kósin nĩ,” he jé. Kỹ ag tóg sir ti mỹ ãjag tũ ti vin mũ, ouro ti, ka jẽnjo tỹ incenso ti ke gé, ẽg tỹ ti pũn kỹ ger há han jafã ẽn, kar kỹ ka tỹ mirra jẽnjo ke gé, ẽg tỹ ti pũn kỹ ger há han jafã ù vẽ gé.

¹² Hã ra Topẽ tóg, ag vẽn h pẽti ki (tóg) ag mỹ: “Herodes mỹ tó tũg nĩ,” he mũ sir. Hã kỹ ag tóg ẽpry ù jagma mũ mũ, ẽmĩn ù jagma mũ kỹ ag tóg ãjag jamã ra vỹnvỹn ke mũ sir, rã jur ja ra.

José fag tỹ vẽn h pigju

¹³ Ag mũ kar kỹ José tóg kejẽn Topẽ tỹ jẽnẽ jafã vég mũ, ti vẽn h pẽti kỹ. Kỹ Topẽ tỹ jẽnẽ jafã tóg ti mỹ: “nĩ ra,” he mũ. “Ûn sĩ va tĩg, ga tỹ Egito ra, ti mỹnh fi mré. Herodes vỹ ùn sĩ tag tén sór mũ. Hã kỹ vẽn h pẽju kỹ Egito ra tĩg. Kejẽn sóg ã mỹ: ha vỹn ké, henh ke mũ. Egito tá inh vỹ jãvãnh nĩ,” he tóg, Topẽ tỹ jẽnẽ jafã ti, José mỹ. Ti vẽn h pẽti kỹ tóg ti mỹ ke mũ.

¹⁴ Kỹ José tóg kuty ẽn kã jẽgnẽ kỹ fag tatĩn tĩ mũ sir, ga tỹ Egito ra, vẽn h pẽju jé. ¹⁵ Tá tóg nĩ nĩ. Herodes tỹ kejẽn ter kỹ tóg tá vỹn ke mũ. Hã ra ti tĩg ja tag vỹ rán kỹ nĩ gé. Vãsỹ Topẽ tóg ã vỹ tó tĩ ù mỹ: “tag rán ra,” he ja nĩ, hã vỹ: “ga tỹ Egito ra sóg vẽn h vỹ jẽnẽ, inh kósin tỹ tá vỹn ke jé,” he mũ.

Herodes tỹ gĩr ag kygrẽn

¹⁶ Hã ra Herodes tóg fagrĩnh mỹ fóg ẽn ag jãvãnh ja nĩ, ùn estudo mág han mũ ẽn ag. Vãhã tóg: “ag tỹ inh mỹ tó tũg hỹn,” he mũ. Kỹ ti fe tóg gỹm ke mũ sir. Kỹ tóg ã pã'i ag mỹ: “ha mũ jẽg, Belém ra,” he mũ. “Tã gĩr ag kygrẽn kãn nĩ, ùn gré ag, ùn kri prỹg tỹ 2 anos tá krỹg tũ ẽn ag,” he tóg, ag mỹ. Ag mỹ tóg 2 anos tó, fóg ag tỹ ti mỹ: “1 ano kãfór ti nĩ ha, ẽg tỹ ti kri krĩg ve ja ti,” hen kỹ. Kỹ polícia ag tóg gĩr ag kãgtén mũ mũ sir.

¹⁷ Hã ra tag tóg rán kỹ nĩ gé. Vãsỹ Topẽ vỹ tó tĩ tóg tag rán ja nĩgtĩ, ti jiji hã vỹ: Jeremias, he mũ. Ẽn tóg tag rán ja nĩ, ha mẽ: ¹⁸ “cidade tỹ Ramá tá ẽg tóg vẽn h kygfỹ mẽg mũ, vẽn sỹrẻnh mág ke gé. Raquel fi vỹ vẽn sỹrẻnh mũ, fi krẽ ag jé. Ag tỹ fi mỹ: fỹ tũg nĩ, he mũ

ra fi tóg vēsyrénh mũ. Fi kré ag vỹ tũ' he kãn, hã kỹ fi tóg fỹ mũ, vēsyrénh mũ,” he ja tóg nĩ, Jeremias ti. Hã ra tóg tag ri ke nĩ, polícia ag tỹ gĩr ag kygrèn mũ ti.

José fag tỹ Egito tá vỹn ke

¹⁹ Kejèn Herodes ên vỹ ter mũ gé sir, pã'i ti. Kỹ Topê tỹ jẽnê jafã vỹ José mỹ vènh ven mũ, ti vènh péti kỹ. Ga tỹ Egito tá tóg ti mỹ venh ven mũ. Tá fag tóg nỹtĩ nĩ, ga tỹ Egito tá. Tá tóg ti mỹ vènh ven mũ, José mỹ, Topê tỹ jẽnê jafã ti. ²⁰ Kỹ tóg ti mỹ: “nĩ ra,” he mũ. “Gĩr va tĩg, ti mỹnh fi pére tĩg gé, ga tỹ Israel ra. Û tỹ fi kósin tén sór mũ ên vỹ hur ter,” he tóg, Topê tỹ jẽnê jafã ti, José mỹ.

²¹ Kỹ tóg jègnê kỹ tĩ mũ sir. Gĩr va tóg tĩ mũ, ti mỹnh fi pére tóg tĩ mũ gé. Kỹ fag tóg Israel ag ga ra mũ mũ sir. ²² Tá jun kỹ tóg pã'i mág tãg jyjy jêmêg mũ, José ti. Hã ra tóg tỹ Arquelau nĩ. Ti panh tỹ Herodes ri kén tóg tỹ pã'i tỹ rei nĩ, ga tỹ Judéia tá. Kỹ tóg ti kamêg mũ. Kỹ Topê tóg ti vènh péti kỹ ti mỹ: “ga tỹ Judéia tá nĩ mãn sór tũg,” he mũ. Kỹ tóg tĩg mãn kỹ ga tỹ Galiléia ra tĩ mũ sir. ²³ Kỹ tóg cidade tỹ Nazaré tá jamãn mũ sir. Hã ra tóg rán kỹ nĩ gé, Nazaré ti. Vãsỹ Topê vỹ tó tĩ ù tóg tag rán ja nĩ gé, kỹ tóg: “ti to ag tóg: Nazaré tá ke vè, henh ke mũ,” he ja tóg nĩ, Topê vỹ tỹ rán kỹ nĩ ki, Jesus to. Hã ra tóg ge nĩ.

3

João Batista tỹ ag jyvèn

(Mc 1.1-8; Lc 3.1-18; Jo 1.19-28)

¹ Kejèn João tóg êmã tũg ja ra tĩ mũ, ga tỹ Judéia tá ga kórég ra. João Batista ên vè. Ga kórég tá jè kỹ tóg ag jyvèn mũ sir. ² “Ájag jykre tovãnh nĩ, ù tỹ kanhkã tá nĩ ên tỹ tỹ ájag pã'i nĩ jé,” he tóg, João ti. ³ João ên to tóg tag rán ja nĩ, vãsỹ Topê vỹ tó tĩ ên ti, Isaías he mũ ên, ha mẽ. “Êmã tũg ja tá tóg jènh ke mũ, ga kórég tá,” he ja tóg nĩ. “Tá tóg ag mỹ jamã hár(a) ke mũ sir. “Êg Senhor kãtĩg ke jo vènh jãnhkrigkrig nĩ,” he jé tóg ke mũ. “Êpry kurég ájag tóg tĩ, êmĩn kurynh ájag tóg tĩ gé, ájag pã'i mág jun ken kỹ. Kỹ tag ri ke han nĩ, ájag jykre pãno togvãnh nĩ, êg Senhor kãtĩg ken jo,” he jé tóg ke mũ,” he ja tóg nĩ, Isaías ti, João to.

⁴ Jo João ên kur tóg tỹ cavalo pãnĩ sór kyki tỹ há nĩ. Nén ù fár tỹ tóg vèsógfĩn ja han tĩ gé. Ópã hã ko ti tĩ, mỹg mré hã, João ti.

⁵ Kỹ ag tóg ti tá junjun kãn mũ sir, cidade tỹ Jerusalém tá kãmũ kỹ, ga tỹ Judéia kar tá kãmũ kỹ, goj tỹ Jordão tá ke kar ag ke gé. João tá ag tóg junjun kãn mũ sir. ⁶ Kỹ tóg ag kygpég mũ sir, goj tỹ Jordão ki, ag tỹ: “Topê vỹ mranh ja sóg nĩgtĩ,” hen kỹ.

⁷ Kỹ ù tỹ Fariseu he mũ ag vỹ ti tá junjun mũ gé sir, ù tỹ Saduceu he mũ ag ke gé, pã'i ag. Ón kỹ ag tóg ti to kãmũ mũ, ti tỹ ag kygpe jé. Kỹ tóg ag jyvèn tar han mũ sir, João ti. “Pỹn ri ke ájag tóg nỹtĩ, ájag jykre pãno tãvĩ nĩn kỹ,” he tóg ag mỹ. “Û nỹ ájag mỹ: “Topê jũ venh ke tũ ájag nĩ,” he tĩ? ⁸ Ájag jykre si tovãnh nĩ, ájag tỹ ti jũ ve jãvãnh tĩn kỹ. Vènh jykre há han nĩ, êg tỹ ájag jykre tãg hã ve jé. ⁹ Hã ra ájag tóg jagnê mỹ: “Abraão vỹ tỹ êg jóg'jóg ve nĩ, kỹ Topê hỹn tóg êg to jũnh ke tũ nĩ, êg tỹ tỹ Abraão krê'krê nỹtĩn tugrĩn,” he tĩ. Ke tũ vè hã ra. Ájag jykre kórég ên to ájag tóg jagtar ke mũ, ha vemnĩ. Topê vỹ Abraão krê'krê hyn han ki kanhró nĩ, pó tag tỹ mỹr, ti tỹ Abraão krê'krê ve sór kỹ, Topê ti. ¹⁰ Hã ra tóg ájag tỹ tũ' henh ke mũ, ájag tỹ ájag jykre kórég tovãnh tũ nĩn kỹ. Êg tỹ ka gỹn ri ke tóg nĩ. Ti kanên vãnh kỹ êg tóg ti gỹn tĩ, ti tỹ pĩ han jé. Ri ke han jé tóg ke mũ, Topê ti, ájag tỹ vènh jykre há han sór tũ nĩn kỹ. Kỹ tóg pĩ ki ájag vãm ke mũ, Topê ti,” he tóg ag mỹ, João ti, Fariseu ag mỹ, Saduceu ag mỹ ke gé.

¹¹ Kỹ João tóg vènh kar mỹ: “goj hã tỹ sóg ájag kygpég tĩ, ájag tỹ ájag jykre tovãnh kỹ,” he mũ. “Inh nón tóg kãtĩg mũ hã ra, Cristo ti. Inh kãfór ti nĩ. Tỹ sóg ti camarada nĩ jãvãnh nĩ, sỹ tỹ ti krêm ke pẽ jèn kỹ. Êg camarada ag vỹ êg pèn né gé mũgtĩ, êg pèn to ró ti. Sỹ ti mỹ gé tĩg ke vè vè, hã ra sóg tỹ ti krêm ke pẽ nĩ, ti tỹ inh kãfór nĩn kỹ. Ên hã tóg Topê kuprĩg tỹ ájag jagrê han ke mũ. Kỹ tóg tỹ pĩ nĩ ve nĩ. Ti tỹ ájag kygpenh ken hã vè,” he tóg, João ti, Jesus to.

¹² “Ti kätig vỹ ãg tỹ rãgró rên ri ke nĩ. Ti rên kar kỹ ãg tóg ti fár pũn tĩ. Ti kanẽ hã vin han ãg tóg tĩ. Cristo kätig ken kỹ tóg ge nĩnh mũ. Ti to há nỹtĩ ag mỹ tóg: “ha kãmũ jẽg,” henh ke mũ. Ti to há nỹtĩ tũ ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti.

João tỹ Jesus kypé

(Mc 1.9-11; Lc 3.21-22)

¹³ Ën kã kejẽn Jesus tóg João tá jun mũ gé sir, goj tỹ Jordão tá. Ga tỹ Galiléia tá tóg kätĩ mũ. Kỹ tóg João mỹ: “ha inh kypé gé,” he mũ sir. ¹⁴ Hã ra tóg João mỹ e tĩ, kỹ tóg ti mỹ: “ã hã tỹ inh kypenh ke vẽ vẽ,” he mũ. “Inh mỹ tóg e tĩ, ã tỹ inh mỹ: ha inh kypé, hen kỹ,” he tóg mũ, João ti, Jesus mỹ. ¹⁵ Hã ra Jesus tóg ti mỹ: “hỹ,” he mũ. Hã ra tóg isỹ vẽn h jykre kuryj han kãn há tĩ,” he tóg, João mỹ. Kỹ tóg ti kypég mũ sir.

¹⁶ Ti tỹ Jesus kype kar kỹ ag tóg goj kátá kãpa mũ sir. Kỹ Jesus tóg kanhkã nor nĩ ãn vég mũ, ha mẽ, kỹ tóg Topẽ kuprĩg kátère ãn vég mũ. Sórãg ri ke tóg nĩ, ti kátère ti. Jesus kri tóg kátère mũ. ¹⁷ Kỹ vẽn hĩ tóg mẽ há tĩ, kanhkã tá, kỹ tóg: “inh kósin pir vëgtĩ,” he mũ. “Inh fe pẽ vëgtĩ,” he tóg, ù tỹ kanhkã tá vĩ mũ ti.

4

Japo tỹ Jesus krĩn kónãn sór

(Mc 1.12-13; Lc 4.1-13)

¹ Kỹ Topẽ kuprĩg vỹ Jesus mỹ: “ẽmã tũgja ra tĩg,” he mũ. Kỹ tóg tĩ mũ. Ëmã tũgja tá nĩn kỹ Japo vỹ ti tỹ ã jóg vĩ mranh han sór mũ, hã ra Jesus tóg ke jãvãnh nĩ. ² Kurã tỹ 40 (ke) han tóg, ẽmã tũgja tá nĩn ki. Kỹ tóg jẽg tũ nĩ, kurã tỹ 40 (ke) ãn ki, kuty mré ke gé. Kar kỹ tóg sir kókĩr mũ, vëjẽn tũ nĩn kỹ. ³ Kỹ Japo tóg ti to kätĩ mũ sir, ù tỹ ãg tỹ Topẽ vĩ mranh han sór mũ ãn ti. Kỹ tóg Jesus mỹ: “Topẽ kósin vỹ tỹ ã nĩ,” he mũ. “Ã tỹ tỹ Topẽ kósin nĩn kỹ pó tag tỹ ẽmĩ han, ã tỹ kon jé,” he tóg ti mỹ, Nén-Kórég ti, Jesus mỹ. ⁴ Kỹ Jesus tóg ti mỹ: “hã ra tag tóg rán kỹ nĩ, ha mẽ,” he mũ. “Ëg pi(jé) ẽmĩ tãvĩ jamẽn kỹ rĩnrĩr mũgtĩ’, hã ra ãg tóg Topẽ vĩ hã jamẽn kỹ rĩnrĩr mũgtĩ, he tóg, Topẽ vĩ tỹ rán kỹ nĩ ki. Kỹ tóg isỹ ti vĩ mranh jãvãnh tĩ, ẽmĩ to,” he tóg, Jesus ti, Nén-Kórég mỹ.

⁵ Kỹ Japo vỹ ti pére tĩ mũ, Jerusalém ra, cidade mág ãn ra. Tá ag tóg Topẽ jo ãn kri nỹtĩnh mũ mũ. Hã ra kãgnó tóg tá nĩ, Topẽ jo ãn mã tá. ⁶ Kỹ Japo tóg Jesus mỹ: “ã hã ne tóg tỹ Topẽ kósin nĩ,” he mũ. “Ha kema ki hũm,” he tóg. “Topẽ vĩ ki tag tóg rán kỹ nĩ, hã vỹ: ã tỹ jëgnẽ jafã ag mỹ tóg tónh mũ, Topẽ ti, kỹ ag tóg ã jy nĩgãnh mũ, he mũ. Kỹ ã tóg rỹj ke tũ nĩ. ã pẽn vỹ rỹj ke tũ nĩ, ag tỹ ã ki rĩr kỹ, he tóg, Topẽ vĩ tỹ rán kỹ nĩ ki. Kỹ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topẽ kósin nĩn kỹ,” he tóg, Nén-Kórég ti, Jesus mỹ. ⁷ Kỹ Jesus tóg ti mỹ: “kỹ tag vỹ rán kỹ nĩ gé, ha mẽ,” he mũ. “Topẽ mỹ: ã mỹ ã tỹ tó ja ãn han mũ vỹ? he tũg nĩ, he tóg mũ gé, Topẽ vĩ tỹ rán kỹ nĩ ki. Hã kỹ sóg ti tỹ inh mỹ nén to: “han ra,” he mũ ãn hã han tĩ, kỹ sóg hũm ke tũ nĩ,” he tóg, Jesus ti, Nén-Kórég mỹ.

⁸ Kỹ Japo tóg ti mré tĩg mãnh mũ. Pãnónh téj ra ag tóg mũ mũ sir. Kỹ Japo tóg ti mỹ ga kar ven kãn mũ, ga kri mũ kar ag ke gé. Ti sĩnvĩ kar ãn ven tóg ti mỹ. ⁹ Kỹ tóg ti mỹ ke mũ. “Isũ vẽ, tag kar ti,” he tóg. “Hã ra sóg ã mỹ tovãnh kãn sór mũ, ã tỹ ã jakrĩ tỹ krỹ’ hen kỹ, inh krẽm, inh mỹ: Topẽ vỹ tỹ ã nĩ, he jé,” he tóg, Nén-Kórég ti, Jesus mỹ. ¹⁰ Kỹ Jesus tóg ti mỹ: “ha tĩg, Satanás,” he mũ. “Ëg pã’i tỹ Topẽ hã krẽm ãg tóg ãg jakrĩ tỹ krỹ’ he tĩ, ti hã to ãg tóg: Topẽ vẽ, he tĩ, hã kỹ tóg rán kỹ nĩ, Topẽ vĩ tỹ rán kỹ nĩ ki,” he tóg, Jesus ti, Nén-Kórég mỹ.

¹¹ Kỹ Japo vỹ tóg sir tĩ mũ, ti tovãnh kỹ. Kỹ Topẽ tỹ jëgnẽ jafã ag tóg sir ti tá junjun mũ, Jesus ki rĩr jé. ã jóg vĩ mranh ja tũ tóg nĩ.

Jesus tỹ Galiléia tá Topẽ vĩ tó

(Mc 1.14-15; Lc 4.14-15)

¹² Kejẽn ag tóg João ség mũ sir, kỹ Jesus tóg mẽg mũ, ag tỹ ti se ti. Kỹ tóg ga tỹ Galiléia ra tĩ mũ, vẽn h pēju jé. ¹³ Cidade tỹ Nazaré tá kãkutẽ kỹ tóg cidade tỹ Cafarnaum ra tĩ mũ,

tá nĩ jé, goj nig tá, Zebulom ag jamã tá, Naftali ag jamã tá. ¹⁴ Hã ra tag tóg rán kũ nĩ gé. Vãsỹ Topẽ vĩ tó tĩ tóg tag rán ja nĩ, Isaías ti, kũ tóg: ¹⁵ “Zebulom ag jamã tá ti nĩnh mũ, Naftali ag jamã tá, goj nig tá, goj tỹ Jordão mã tá. Fóg ag jamã tá ti nĩnh mũ, Israel tũ ag jamã tá, ù tỹ Topẽ ki kagtĩg ag jamã tá, goj nig tỹ Galiléia fyr ki. ¹⁶ Tá ag tóg Topẽ ki kagtĩg nỹtĩ, hã kũ tóg tá ag kri kuty ri ke nĩ. Ti tỹ tá jun kũ tóg ag kri kurãg ên ri ke han mũ, ag kanhrãn kũ. Ag kãgter ke vë vë, hã ra tóg ag kanhrãn mũ ag krenkren jé,” he tóg, Topẽ vĩ rán ki. Kũ tóg ge nĩ, Jesus tỹ tá nĩn kũ. ¹⁷ Ga ên tá nĩ kũ tóg ag jyvën mũ, kũ tóg ag mỹ: “ãjag jykre si tovãnh ra,” he mũ, “ãjag tỹ ùri ù tỹ kanhkã tá nĩ ên tỹ tỹ êg pã'i nĩ ve jé,” he tóg, Jesus ti. Ti tỹ ù tỹ ki kagtĩg ag mỹ Topẽ vĩ tón hã vë.

Jesus tỹ ã mré mũ tĩ ag jé prër
(Mc 1.16-20; Lc 5.1-11)

¹⁸ Kũ tóg kejën goj nig tỹ Galiléia ên fyr jagma tĩ mũ. Kũ tóg tá ùn régre ag vég mũ. Û vỹ tỹ Simão nĩ, ag tỹ ù to: Pedro, he mũ tag ti. Kũ ti jãvy vỹ tỹ André nĩ. Kur tỹ pirã kugmĩ jafã tỹ ag tóg goj kãki fón mũ, pirã kugmĩ jé. Ag rãnhraj vë, pirã kugmĩg tĩ ag vë. ¹⁹ Kũ Jesus tóg ag ve kũ (tóg) ag to tĩ mũ sir. Kũ tóg ag mré vĩ mũ. “Inh mré kãmũjêg,” he tóg mũ ag mỹ. “Pirã kugmĩ há ãjag nỹtĩ. ãjag kanhrãn jé sóg ke mũ, ãjag tỹ êprã ke ag tỹ inh ki ge han jé,” he tóg ag mỹ, Jesus ti. ²⁰ Kũ ag tóg vësỹmér ãjag tỹ nén tovãnh kũ mũ mũ, ti mré, Pedro ti, André ti ke gé.

²¹ Kũ ag tóg mũ mũ, goj fyr jagma. Ag mũ sĩ han mũ ra Jesus tóg ùn régre ù ag ve mãn mũ gé. Tỹ ti Tiago nĩ, Zebedeu kósin, kũ ti jãvy vỹ tỹ João nĩ gé. Canoa kãki ag nỹtĩ, kur tỹ pirã kugmĩ jafã ki ag tóg han nỹtĩ nĩ. Ag panh vỹ ag mré nĩ nĩ. Kũ Jesus tóg ag jé prër mũ sir. ²² Kũ ag tóg vësỹmér (ag tóg) ãjag tỹ nén tovãnh kũ ti to kãmũ mũ, canoa tovãnh kũ, ãjag panh ti tovãnh kũ ke gé. Jesus mré ag tóg mũ mũ, Tiago ti, ti jãvy tỹ João ti ke gé.

Jesus tỹ ag tỹ há' he
(Lc 6.17-19)

²³ Kũ Jesus tóg ga tỹ Galiléia kar mĩ tĩ mũ sir, ag mré. Judeu ag vënh kanhrãn jafã krëm tóg ag kanhrãn mũ. Ag mỹ tóg Topẽ vĩ sér tó mũ, ù tỹ kanhkã tá nĩ tỹ tỹ êg pã'i nĩ tĩ. Ûn kagyga kar ag hyn han tóg, fag kar ke gé, gĩr kar ke gé. ²⁴ Hã kũ ti kãme tóg vënh kar kri rũm mũ sir, ga tỹ Síria tá ke kar kri. Kũ ag tóg sir ùn kagyga ag tatĩn kãmũ mũ, ti to, vënh kaga vënhmỹ han mũ ag mré hã, kũ tóg ag tỹ há' he kãn mũ sir. Vënh jagrê kórég ag pan kãn tóg mũ gé. Û tỹ ter tĩ han mũ ag tỹ hághá' he tóg mũ gé, ùn grĩngrĩn kũ nỹtĩ ag tỹ ke gé, fag kar tỹ ke gé. ²⁵ Hã kũ ùn tỹ hën ri ke ag tóg ti mré mũ mũ sir. Û ag tóg ga tỹ Galiléia tá kãmũ mũ, kũ ù ag tóg cidade tỹ Decápolis tá kãmũ mũ gé, cidade tỹ Jerusalém tá ke gé, ga tỹ Judéia tá ke gé, goj tỹ Jordão mã tá ke gé.

5

Jesus tỹ ag kanhrãn
(Lc 6.20-23)

¹ Ûn e ag tỹ Jesus venh kãmũ kũ tóg ag mré pãnónh ra tãpny mũ. Tá tóg nĩ mũ, kũ ti mré mũ tĩ ag tóg ti mré nĩgnĩ mũ, ti rã hã. ² Kũ tóg sir ag kanhrãn mũ, ag mỹ kãmén kũ. Kũ tóg ag mỹ tag tó mũ, ha mẽ.

³ “Topẽ vỹ ãjag ve há han mũ, ãjag tỹ: kórég inh nĩ, hen kũ. Sỹ Topẽ kuprĩg tỹ jagrën kũ nĩ tũ nĩ ra sóg tỹ ùn kórég nĩnh mũ vë, hemnĩ. Kũ Topẽ vỹ ãjag ve há han mũ. Kũ ãjag tóg ti tỹ tỹ êg pã'i nĩ venh ke mũ, kanhkã tá,” he tóg, Jesus ti.

⁴ “Topẽ vỹ ãjag ve há han mũ, ãjag fỹn kũ. Kũ tóg ãjag fỹ ên tỹ tũ' henh ke mũ,” he tóg.

⁵ “Topẽ vỹ ãjag ve há han mũ, ãjag tỹ vënh kar mỹ komër hã vĩn kũ. Kũ ãjag tóg ga kar kri tỹ pã'i nỹtĩnh ke mũ, ùn mág pë,” he tóg.

⁶ “Topẽ vỹ ãjag ve há han mũ, ãjag tỹ vënh jykre kuryj ve sór nỹtĩn kũ, ti tỹ ãjag mỹ ãjag kókĩr ri ke tĩn kũ, ãjag tỹ vënh jykre kuryj ve sór nĩn kũ. Kũ ãjag tóg venh ke mũ,” he tóg.

⁷ “Topě vỹ ājag ve há han mū, ājag tỹ jagně jagāgtān kỹ. Kỹ Topě vỹ ājag jagāgtān ke mū gé,” he tóg.

⁸ “Topě vỹ ājag ve há han mū, ājag jānhkri nýtīn kỹ. Kỹ ājag tóg Topě venh mū, ājag jānhkri nýtīn kỹ,” he tóg.

⁹ “Topě vỹ ājag ve há han mū, ājag tỹ jagně krī tỹ kānhvy' hen kỹ. Kỹ Topě tóg ājag to: “inh krē ag vē,” henh ke mū, ājag tỹ jagně krī tỹ kānhvy' hen kỹ,” he tóg.

¹⁰ “Topě vỹ ājag ve há han mū, ag tỹ vėnh jykre kuryj to ājag vóg kónān mū ra. Topě vỹ tỹ kanhkā tá ājag pā'i nīnh mū, ag tỹ ti tugrīn ājag vóg kónān mū ra,” he tóg.

¹¹ “Topě vỹ ājag ve há han mū, ag tỹ isugrīn ājag mỹ vī kónān mū ra, ag tỹ ājag vóg kónān mū ra. Ag tỹ ón kỹ ājag to vī vī he kỹ tóg há tī, ag tỹ ón kỹ ājag jykre pāno tó mū ra, isugrīn. ¹² Mỹ sér nýtīmñī, ājag fe tỹ há' hemñī, ag tỹ ón kỹ ājag kato vīn kỹ. Kanhkā tá ājag tóg nén kar há venh ke mū, vėnh kato. Ge ja ag tóg nīgtī vāsỹ, Topě vī tó tī ag mỹ, ājag jo ke ag mỹ. Ag ri kén ājag tóg tag venh ke mū,” he tóg, Jesus ti.

Sa to comparação

(Mc 9.50; Lc 14.34-35)

¹³ “Sa ri ke ājag nýtī, ājag tỹ ga kri mūn kỹ. Sa kāhór nīn kỹ ěg tóg ti tỹ sa há han mñ ki kagtīg nýtī. Kórég ti nīgtī, ti kāhór nīn kỹ. Kỹ ěg tóg ti vām tī sir, kỹ tóg tū' he tī sir,” he tóg, Jesus ti. Ti tỹ ěg tỹ ti jykre tovānh ke tū kāmén hā vē.

Jēngrē kāme

(Mc 4.21-23; Lc 8.16-17)

¹⁴ “Ga kri mūn kỹ ājag tóg jēngrē ri ke nýtī, ājag tỹ vėnh jykre há han kỹ, ag tỹ ājag ki ve jé, Topě jykre há ti. Cidade mág vỹ ve há tīgtī, kuvar há tá jě kỹ, ti tỹ pānónh kri nỹn kỹ. Ti pi(jé) vėnh péju kỹ nỹ'. ¹⁵ Ri ke ti nī, néj gru ti. ěg tỹ ti grug kỹ ěg pi(jé) lata krēm ti fėg tī'. Ti fėg jafā kri ěg tóg ti fėg tī. Kỹ vėnh kar tóg ěn vég tī sir, ĩn kātā nýtī kar ěn ti. ¹⁶ Gemñī, néj gru ri ke nýtīmñī. Topě jykre han nī, vėnh kar tỹ ājag ki ve jé, ājag jykre há ti. Hā kỹ ag tóg ěg jóg tỹ Topě mỹ vī há han mū, ěg jóg tỹ kanhkā tá nī ěn mỹ,” he tóg, Jesus ti.

Topě tỹ Moisés mỹ vėnh jykre nīv

¹⁷ “Ājag hỹn iso: ti hā ne tóg Moisés tỹ ěg mỹ nén tó ja tỹ tū' he sór mū', he mū, ti hā ne tóg Topě jykre ěn tỹ tū' he sór mū', he ājag hỹn tī. Vāsỹ Topě vī tó tī ag vỹ ěg mỹ tó ja nīgtī, Topě jykre ěn ti, hā ra tóg tỹ tū' he sór mū', he ājag hỹn tī iso. Hā tū vē. Sỹ ki króm kñ sór vē, Moisés tỹ nén tó ja ěn ki, sỹ ki króm kỹ sóg tỹ ājag kanhrānrñ kñ ke mū,” he tóg. ¹⁸ “Topě vỹ ā jykre ěn tỹ tū' henh ke tū nī, ha mē. Ga tỹ ver kanhkā mré nỹn kỹ tóg ā jykre tỹ tū' henh ke tū nī, ga tỹ ver tū' he tū nīn kỹ. Sỹ ki króm kñ ke vē, kỹ tóg ki krov kñ kỹ nỹnh mū, Topě jykre kar ti mỹr, ha mē,” he tóg. ¹⁹ “Kỹ ājag tỹ tỹ tū' he sór kỹ tóg kórég nỹ, ājag tỹ ti vī pir tỹ tū' he sór kỹ. Ājag tỹ ti vī pir to ũ mỹ: han tūg nī, hen kỹ ājag tóg tỹ ũn kāsir nýtīnh mū, vėnh kar krēm, kanhkā ki. Ājag tỹ hā ra han kñ kỹ ājag tóg tỹ ũn mág nýtīnh mū, ājag tỹ vėnh kar mỹ: “ki króm kñ sórmñī,” hen kỹ. Kỹ ājag tóg tỹ ũn mág nýtīnh mū, kanhkā tá,” he tóg, Jesus ti.

²⁰ “Fariseu ag ri ke nýtī sór tūg nī. Topě vī to professor ag ri ke nýtī sór tūg nī gé. Ón kỹ ag tóg Topě vī ki króm tī, hā ra ag tóg ki króm há han tū nīgtī. Ag jykre pi(jé) kuryj nỹ'. Ājag tỹ kanhkā ve sór nýtīn kỹ vėnh jykre kuryj han nī,” he tóg, Jesus ti.

Ěg tỹ jagně to há nýtīnh ke to vėnh jykre

²¹ “Topě tỹ vāsỹ ěg si ag jyvėn mē ājag huri, hā vỹ: ũ tén tūg nī, he mū. Ā tỹ ũ tén kỹ ag tóg ā senh ke mū, ā tỹ ti mré ter jé, he ja tóg nī, Topě vī tỹ rán kỹ nī ki. ²² Sỹ ũri ājag jyvėn hā vē, ha mē. Ā régre to ā fe tỹ gỹm ke tūg nī. Ā tỹ ā régre to ā fe tỹ gỹm ke kỹ tóg ā tỹ ti tén ri ke nī. Kỹ tóg inh mỹ há tīnh mū, ag tỹ tag to ā se kỹ. Kỹ ā régre mỹ vī kónān tūg nī gé. Ā tỹ ā régre mỹ vī kónān kỹ tóg inh mỹ há tīnh mū, ag tỹ tag to pā'i mág mỹ ā ven kỹ. Kỹ ā régre mỹ fėfén tūg nī gé. Ā tỹ ā régre mỹ fėfén kỹ ā tóg nūgme ki kutėnh ke mū, inferno ki, pī ěn ki,” he tóg, Jesus ti.

²³ “Tag to jykrén nĩ, ã tỹ Topẽ mỹ nén ù pũn sór kỹ. Topẽ jo ìn krẽm. ã tỹ tá jẽn kỹ ã régre kar mĩ ãkrén nĩ. “Û mỹ iso jykrén kónãn tũ nĩ vỹ?” he jé ã tóg ke mũ. “Inh mỹ ù jũ han tũ nĩ vỹ?” he jé ã tóg ke mũ. ²⁴ Û tỹ ã to jykrén kónãn kỹ ti venh tĩg nĩ ver, Topẽ mỹ nén ù pũn tovãnh nĩ ver. ã régre ên mỹ: “inh mỹ vẽn pãte fón nĩ,” hemnĩ ver. Kar kỹ Topẽ mỹ nén ù pũn sórmnĩ sir, ã tỹ ã régre mré vĩ kar kỹ,” he tóg, Jesus ti.

²⁵ “Kejẽn ã tóg ã mré ke ù mỹ név(e) jẽ, kỹ tóg pã'i ag mỹ ã kãmén tĩg ke mũ. Ti tỹ pã'i ag mỹ tónh tĩg ke mũ ên ti to hã ti mré vĩmnĩ, ti mỹ: “kajãm jé sóg ke mũ,” hemnĩ. Ke tũ nĩ (mũ) ra pã'i vỹ ã jykre pãno venh ke mũ, kỹ tóg polícia mỹ: “ti se ra,” henh ke mũ sir, kỹ tóg sir ã senh mũ. ²⁶ Ha mẽ, ki hã sóg tó mũ. Tá ã kãnhmar kãkutẽ mãn ke tũ nĩ. ã tỹ kajãm kãn kar ã tóg kãkutẽ mãn mũ, tá, hẽn ri ke mũn,” he tóg, Jesus ti.

Ã prũ tũ fi mré nỹ tũ to vẽnh jykre

²⁷ “Topẽ tỹ êg si ag jyvẽn ù tag mẽ ãjag huri, ke gé, hã vỹ: “ã prũ tũ fi mré nỹ tũg nĩ,” he mũ. ²⁸ Sỹ ùri ãjag jyvẽn hã vẽ, ha mẽ: ã tỹ ùn tỹtã ù fi ki vẽ'i kỹ tóg ã tỹ fi mré nỹ sỹ han ên ri ke nĩ sir, ã tỹ fi ki vẽ' i mũ ti. ã tỹ ùn tỹtã ù fi mrẽ nũr sór kỹ tóg ã tỹ fi mrẽ nũr ri ke nĩ sir, ã tỹ fi to én mũ ti. Ke tũg nĩ. ²⁹ ã tỹ nén ù ki vẽ'i tugrĩn Topẽ vĩ mranh kỹ ã kanẽ tỹ nám kemnĩ, ã tỹ ki vẽ'i jagy han mãn tũ nĩ jé. ã kyvó nĩn kỹ tóg jagy tĩ gé vẽ vẽ. ã tỹ hã ra nũgme ki kutẽ kỹ tóg jagy kãfór nĩ. Jagy pẽ ti nĩ, ã tỹ inferno ki kutẽ ti. Kỹ tag hã ve sór tũg nĩ. ³⁰ ã tỹ ã nĩgé tỹ nén ù kórég han kỹ ã nĩgnó kym nĩ, ã tỹ ke mãn tũ nĩ jé. ã nĩgnó pir nĩn kỹ tóg jagy tĩ gé. ã tỹ hã ra nũgme ki kutẽ kỹ tóg jagy kãfór nĩ sir, kỹ tag hã kamẽg nĩ,” he tóg, Jesus ti.

Ã prũ fón tũ to vẽnh jykre

(Mt 19.9; Mc 10.11-12; Lc 16.18)

³¹ “Tope tỹ êg si ag jyvẽn ù hã vỹ nỹ gé, hã vỹ: “ã tỹ ã prũ fi fón sór nĩn kỹ tóg há tũ nỹ,” he mũ. “ã tỹ ge ra fi fón sór nĩn kỹ fi mỹ vẽn rán kỹ nĩm nĩ, fi tỹ vẽn rán ma tĩg jé,” he ja tóg nĩ. ³² Sỹ ùri ãjag jyvẽn hã vẽ, ha mẽ: ãjag prũ fón tũg nĩ. ã tỹ fi fón kỹ fi tỹ ù mré nỹ mãn kỹ fi tóg ã tugrĩn Topẽ vĩ mranh mũ sir, ã tỹ tỹ fi mén pẽ ra. Fi tỹ ã jãvo vėsóg ki ù mré nỹ ja nĩn kỹ tóg há sĩ nỹ, ã tỹ fi mỹ: ha tĩg, hen kỹ. Kỹ fi mén tỹ fi fón kỹ fi tỹ prũg sór tũg nĩ gé. ã prũ tũ fi vẽ, fi mén tỹ fi fón ja nĩn kỹ,” he tóg, Jesus ti.

Jagnẽ to ón ke tũ to vẽnh jykre

³³ “Vãsỹ Topẽ tỹ êg si ag jyvẽn ù tag mẽ ãjag tóg huri ke gé, hã vỹ: “jagnẽ mỹ ón tũg nĩ,” he mũ. “ã tỹ ù mỹ: Topẽ vỹ ki kanhró nĩ, hen kỹ ti mỹ ón sór tũg nĩ. Kỹ hã han nĩ gé, ã tỹ Topẽ mỹ: tag hã han jé sóg ke mũ, hen kỹ. Ón kỹ vĩ tũg nĩ,” he ja tóg nĩ, êg si ag mỹ, Topẽ ti. ³⁴ Sỹ ùri ãjag jyvẽn hã vẽ, ha mẽ: “Topẽ vỹ ki kanhró nĩ,” he sór tũg nĩ, ón kỹ. “Û tỹ kanhkã tá nĩ ên vỹ ki kanhró nĩ,” he sór tũg nĩ gé, ón kỹ. Topẽ nĩgja vẽ, kanhkã tá, kỹ ón kỹ tag tó sór tũg nĩ. ³⁵ Kỹ: “ù tỹ ga kri ke ên vỹ ki kanhró nĩ,” he tũg nĩ gé. Topẽ tũ vẽ, ga ti, hã kỹ ón kỹ tag tó sór tũg nĩ. Kỹ: “ù tỹ Jerusalém tá ke ag ki rĩr tĩ ên vỹ ki kanhró nĩ,” he tũg nĩ gé. Êg pã'i mág tũ vẽ mỹr, Jerusalém ti, hã kỹ ón kỹ tag tó sór tũg nĩ. ³⁶ Kỹ: “ù tỹ inh krĩ han mũ ên vỹ ki kanhró nĩ,” he tũg nĩ gé. ã tỹ ã gãnh kuprig sór mũ ra ã tóg ã tỹ nén tỹ ã gãnh kuprig ke mũ ên ki kagtĩg nĩ, ã tỹ ã gãnh sãn sór mũ ra ã tóg ã tỹ nén tỹ sãn ke mũ ên ki kagtĩg nĩ gé. Hã kỹ ón kỹ tag tó sór tũg nĩ gé. ³⁷ Ki hã tómnĩ, jagnẽ mỹ, ón sór tũg nĩ. Ón kỹ Topẽ jiji tó sór tũg nĩ gé. Û tỹ ã mỹ ki hã tó kỹ: hỹ, hemnĩ. Ti tỹ ki hã ke tũ nĩn kỹ: vó, hemnĩ gé. ã tỹ han ke nĩn kỹ: hej, hemnĩ. ã tỹ han ke tũ nĩn kỹ: neje, hemnĩ. Ki hã tómnĩ, jagnẽ mỹ. ã tỹ ón sór kỹ ã tóg Nén-Kórég jykre hã han ke mũ. Ke tũg nĩ,” he tóg, Jesus ti.

Êg tỹ vẽnh kajãm ke tũ to vẽnh jykre

(Lc 6.29-30)

³⁸ “Topẽ tỹ êg si ag jyvẽn ù tag mẽ ãjag huri, hã vỹ: “ù tỹ ã kanẽ pir ki tãnh kỹ vẽnh kato ti kanẽ pir ù ki tãnh nĩ gé,” he ja tóg nĩ. “Û tỹ ã jã pir ki tãnh kỹ mranh kỹ vẽnh kato ti jã pir ki tãnh kỹ mranh nĩ gé. Pãtén tũg nĩ,” he ja tóg nĩ, Topẽ ti. ³⁹ Sỹ ùri ãjag jyvẽn

mũn hã vễ, ha mẽ: ù tỹ ã vóg mũ ra ti vóg tũg nĩ. Ti tỹ ã jamẽ ki tãnh kỹ ti mỹ ã jamẽ ù ti ven nĩ, ti tỹ ã mỹ ki tãnh jé gé. ⁴⁰ Ti tỹ ã palitó mãn sór kỹ ti mỹ ã camisa mré nĩm nĩ gé. ⁴¹ Ti tỹ ã mỹ: “mũ nỹ, tag tá, kakó ja tá inh fón nĩ,” hen kỹ ti mré tĩg nĩ, hã ra ti mỹ: “kór há tá inh ã fón tĩg mũ ha,” hemnĩ. ⁴² Ti tỹ ã mỹ nén ù to: “inh mỹ nĩm,” hen kỹ ti mỹ nĩm nĩ. Ti tỹ ã mỹ: “inh mỹ prestar hemnĩ,” hen kỹ ti mỹ: vó, he tũg nĩ,” he tóg, Jesus ti.

Ëg tỹ ã kato vãsãn mũ ag tó há nỹtĩnh ke

(Lc 6.27-28, 32-36)

⁴³ “Topẽ tỹ ã si ag jyvẽn ù mẽ ãjag huri, hã vỹ: “ã mré ke ag to há nĩmnĩ, kỹ ù tỹ ã kato vãsãnsãn mũ ag to jũ nĩmnĩ gé,” he ja tóg nĩ, Topẽ ti. ⁴⁴ Isỹ ùri ãjag jyvẽn hã vễ, ha mẽ: ù tỹ ãjag kato vãsãnsãn mũ ag to há nỹtĩmnĩ, ù tỹ ãjag vóg kónãn mũ ag to Topẽ mré vĩmnĩ. ⁴⁵ Hã ki ãjag tóg tỹ Topẽ krẽ nỹtĩ, ti ri ke han kỹ, ãjag jóg tỹ kanhkã tá nĩ ên ri ke han kỹ. Ti hã ne tóg rã han', ti tỹ vẽn kar kri jẽngrêg kỹ san jé, ùn jykre kuryj ag kri, ùn jykre pãno ag kri ke gé. Ta han ti ke gé, ti tỹ vẽn kar há han jé, ùn jykre kuryj ag, ùn jykre pãno ag ke gé. Ver tóg vẽn kar to há nĩ, Topẽ ti,” he tóg, Jesus ti.

⁴⁶ “Ãjag mré ke ù ag tóg ãjag to há nỹtĩ. ãjag tỹ tag ag hã to há nỹtĩnh kỹ tóg tỹ nén ù tũ tĩ ver. ùn jykre kórég ag vỹ ge nỹtĩgtĩ gé, governo mỹ jãnkamy mäg tĩ ag. ù tỹ ãjag to há nỹtĩ ag hã to ag tóg há nỹtĩ, vẽn kato. Há ti nĩ, hã ra tóg tỹ nén ù tũ nĩ ver. ⁴⁷ Kỹ ãjag tỹ ãjag mré ke ag hã mỹ: ã mỹ há? hen kỹ tóg tỹ nén ù tũ nĩ gé ver. ù tỹ Topẽ vĩ ki kagtĩg ag vỹ ge nỹtĩgtĩ gé. ãjag mré ke ag hã mỹ ag tóg: ã mỹ há? he tĩ gé, hã ra tóg tỹ nén ù tũ nĩ ver. ⁴⁸ Hã kỹ vẽn kar to vẽn jykre kuryj han kỹ nỹtĩmnĩ, ù tỹ ãjag kato vãsãnsãn mũ ag mré hã, ãjag jóg tỹ kanhkã tá nĩ ên ri ke han nĩ. Ti hã ne tóg vẽn kar to vẽn jykre kuryj han kỹ nĩ nĩ'. Ti ri ke han nĩ,” he tóg, Jesus ti.

6

Ëg tỹ ù jagãgtãn ke to vẽn jykre

¹ “Kỹ ãjag tỹ Topẽ jykre han sór kỹ ù tỹ vẽn jykre pãno han mũ ag jykre ri ke han tũg nĩ. Ón kỹ ag tóg vẽn kar rĩnve Topẽ jykre han sór tĩ, vẽn kar tỹ ag ve jé, ag tỹ Topẽ jykre han mũ ên ti. Kar kỹ ag tóg hã ra hã tũ han tĩ sir. Kỹ ag ri ke han tũg nĩ, ke tũ nĩ (mũ) ra ãjag jóg tỹ kanhkã tá nĩ ên vỹ tóg ãjag mỹ ven ke tũ nĩ, ãjag tỹ ãjag jóg jykre han mũ ên kaja ti,” he tóg. ² “Hã kỹ ãjag tỹ ùn jagãgtar ag jagãgtãn kỹ ù mỹ: “ag jagãgtãn inh tĩ,” he tũg nĩ. ù tỹ vẽn jykre régre han mũ ag jykre ri ke han tũg nĩ. Ag tỹ ón kỹ ù jagãgtãn kỹ ag tóg ãjag jagma mũ kỹ (ag tóg) vẽn kar mỹ: “ag jagãgtãn inh tĩ,” he tĩ. Ëg vẽn kanhrãn jafã jo ãn krêm ag tóg tag tó tĩ gé. Ag tỹ ãjag ke ag tỹ ag mỹ vĩ há han ve sór vễ, hã jé ag tóg ón kỹ ùn jagtar ag jagãgtãn tĩ. Ag ganho hã vễ, ãjag ke ag tỹ ag mỹ vẽn vĩ há tó mũ ên ti. Kanhkã tá ag ganho ù ve mãn ke tũ nĩ ha. ãjag mỹ sóg ki hã tó mũ, ha mẽ,” he tóg, Jesus ti.

³ “Ag ri ke han tũg nĩ. ùn jagtar ag jagãgtãn nĩ. ù mỹ tó tũg nĩ, ãjag tỹ ùn jagãgtãn mũ ên ti, ãjag mré ke fag mỹ tó tũg nĩ gé. ⁴ Kỹ ãjag tỹ ag jagãgtãn kỹ ãjag jóg tỹ kanhkã tá nĩ ên tóg ãjag vég mũ sir, kỹ tóg ãjag mỹ nĩm ke mũ sir, ãjag ganho ti. Ëg tỹ vẽn vatãnh tá nén han mũ ên ve kãn tóg tĩ (mỹr), Topẽ ti,” he tóg, Jesus ti.

Ëg tỹ Topẽ mré vēmén to vẽn jykre

(Lc 11.2-4)

⁵ “Kỹ ãjag tỹ Topẽ mré vēmén kỹ ù tỹ vẽn jykre régre han mũ ên ag jykre ri ke han tũg nĩ gé. Ag tỹ ón kỹ Topẽ mré vĩ kỹ ag tóg ãjag vẽn kanhrãn jafã jo ãn kãki jẽg jẽ kỹ nỹtĩ, ke tũ nĩ kỹ ãmĩn kri, ãn to hã. Kỹ vẽn kar vỹ ag tỹ Topẽ mré vĩ mũ tag vég mũ sir. Kanhkã tá ag tóg ganho ù ve mãn ke tũ nĩ ha. ãjag mỹ sóg ki hã tó mũ, ha mẽ. ⁶ Ag jãvo ãjag tỹ Topẽ mré vēmén kỹ ãjag ãn kãra gemnĩ. Kỹ jãnkã nĩfénh nĩ. Kỹ tá Topẽ mré vĩmnĩ sir, ãjag jóg mré, ãjag tỹ ùn vég tũ ên mré. Kỹ tóg kanhkã tá ãjag mỹ nĩm ke mũ, ãjag ganho ti. Ëg tỹ vẽn vatãnh tá nén han mũ ên vég tóg tĩ (mỹr), Topẽ ti,” he tóg, Jesus ti.

⁷ “Ājag tỹ ti mré vēmén kỹ fagrĩnh mỹ ti mré vēmén mág han tũg nĩ. Ũ tỹ Topě vĩ ki kagtĩg ag ri ke han tũg nĩ. Ājag jãnjãnh kỹ ag tóg ón kỹ vĩ mág han tĩ. “Ēg tỹ vĩ mág han kỹ ti hỹn ěg vĩ mĕg mũ,” he ag tóg tĩ, ón kỹ. ⁸ Ag ri ke han tũg nĩ. Ēg jóg vỹ nén kar ki kanhró nĩ, ājag tỹ ti mỹ tó tũ ra tóg ki kanhró nĩ,” he tóg.

⁹ “Ājag tỹ Topě mré vĩ kỹ tag tómnĩ, ha mĕ:

“Ēg jóg mág, kanhkã tá ã tóg nĩ nĩ.

Ā jiji tó ěg tóg tĩ, kỹ vĕnh kar jé ã tỹ tỹ ũn mág nĩ vé.

¹⁰ Ēg jé kãnhmar ã tỹ tỹ ěg pã'i nĩ vé.

Vĕnh kar jé ã tỹ nén to jykrén mũ ěn han sór, ga tá ke kar, ag jé kanhkã tá ke kar ag ri ke han.

¹¹ Ēg mỹ ũri ěg jĕn ti nĩm, ěg tỹ kurã kar ki ko tĩ ěn.

¹² Kỹ ěg mỹ vĕnh pãte fón nĩ, ěg tỹ ã vĩ mranh ja ti.

Hã jé ěg tóg ěg tỹ jagnĕ to jũ tỹ jagnĕ mỹ vĕnh pãte fón ke mũ gé.

¹³ Kỹ ěg tỹ ã vĩ mranh sór kỹ ěg kren han nĩ, ěg tỹn mranh tũ nĩ jé.

Nén-Kórég jo ěg vemnĩ.

Ā hã ne tóg tar nĩ'.

Ā hã ne tóg mág nĩ inhhã'.

Ā jykre tóg tũ' henh ke tũ nĩ,”

hemnĩ, Topě mỹ,” he tóg, Jesus ti.

¹⁴ “Hỹ, ge ti nĩ,” he tóg. “Ũ tỹ ājag to jũ kỹ ti mỹ vĕnh pãte fón nĩ. Ũ tỹ ājag mỹ vĩ kónãnh kỹ ti mỹ vĕnh pãte fón nĩ gé. Ājag tỹ gen kỹ ěg jóg vỹ ājag mỹ vĕnh pãte fón ke mũ gé. ¹⁵ Ājag tỹ tag han tũ nĩn kỹ, kỹ ěg jóg tóg ājag mỹ vĕnh pãte fón ke tũ nĩ gé, ājag tỹ ti vĩ mranh ja ti,” he tóg, Jesus ti.

Ēg vãkre to vĕnh jykre

¹⁶ “Kỹ ājag vãkre kỹ fe ũ nỹtĩ tũg nĩ, ājag tỹ Topě mỹ há nỹtĩ jé jĕg tũ nỹtĩn kỹ. Vãkre ki ũ tỹ vĕnh jykre régre han mũ ag jykre ri ke han tũg nĩ. Ag tỹ ón kỹ vãkre kỹ ag tóg fe ũ nỹtĩnh mũ sir, vĕnh kar tỹ ag vãkre ve jé. Ag ganho hã vĕ. Kanhkã tá ag tóg ganho ũ vĕnh ke tũ nĩ ha. Ājag mỹ sóg ki hã tó mũ, ha mĕ. ¹⁷ Ājag vãkre kỹ ājag gãnh tãg nĩ, ājag jamĕ kupemnĩ, festa han nỹtĩ ve nĩmnĩ, ājag vãkren kỹ. ¹⁸ Hã kỹ ag tóg vég tũ nĩ, ājag vãkrég mũ ti. Ēg jóg hã ne vég mũ inhhã', ěg tỹ ũn vég tũ ěn hã vỹ vég mũ. Kỹ tóg kanhkã tá ājag mỹ nĩm ke mũ, ājag ganho ti. Ēg tỹ vĕnh vatãnh tá nén han mũ vég tóg tĩ (mỹr), Topě tĩ,” he tóg, Jesus ti.

Ēg rico to vĕnh jykre

(Lc 12.33-34)

¹⁹ “Ga kri mũn kỹ ricon ke to vãsãnh sór tũg nĩ. Ga vỹ ājag tỹ nén kar ti konh ke mũ, ājag tỹ rico hã to vãsãnh mũ ra. Kỹ ājag jãnkamy vỹ vĕso jãgfanh ke mũ gé sir, ti e nỹtĩn kỹ. Kỹ ag tóg pigju kỹ ma mũnh ke mũ gé sir, ājag tỹ nén ti, ti e nỹtĩn kỹ. ²⁰ Ājag tỹ inhhã kanhkã tá tũ mág pĕ nỹtĩn kỹ tóg inhhã ājag mỹ há tĩnh mũ. Tá ti pi(jé) tỹ ga nĩ', ājag tũ ti, tá ti pi(jé) vĕso jãgfanh mũ'. Tá ag pi(jé) péju kỹ ma mũnh mũ'. Hã kỹ tá ājag tũ vin han sórmnĩ. ²¹ Ājag tỹ ga kri tỹ nén ũ mág nỹtĩn kỹ ājag tóg ga kri mũ mág sór mũ. Ājag tỹ hã ra kanhkã tá tỹ nén ũ mág nỹtĩn kỹ ājag tóg kanhkã ra mũ sór mũ, kỹ tag hã ne há nĩ',” he tóg, Jesus ti.

Ēg kanĕ tỹ ěg mỹ kurã han

(Lc 11.34-36)

²² “Ēg kanĕ tỹ ěg vég tĩ. Kỹ tóg tỹ ěg mỹ kurã ri ke nĩ, ěg kanĕ ti, ti há nĩn kỹ. Tỹ ěg tóg kurã ve há han tĩ, ěg kanĕ há nĩn kỹ. ²³ Ēg kanĕ kórég nỹtĩn kỹ tóg ěg mỹ kuty tĩnh mũ. Kỹ tóg ěg mỹ kurã vég tĩ ěn mỹ (tóg) kuty nĩ sir, kỹ kuty tag vỹ kuty kar kãfór nĩ. Ge ti nĩ, ěg jykre kórég nĩn kỹ. Ēg kanĕ kórég ri ke vĕ sir, ěg jykre kórég ti,” he tóg, Jesus ti.

Ēg tỹ ga kri rico to vāsān sór ke tũ
(Lc 16.13; 12.22-31)

²⁴ “Ā jagrē régre nĩn kỹ tóg vėnhmỹ tĩ. Ā tỹ Topē hā tỹ jagrē nĩn kỹ jānkamy tān ěn tỹ jagrē nĩ sór tũg nĩ. Ā tỹ jānkamy e ve sór kỹ ti hā mĩ ěkrén kỹ ti hā vỹ tỹ ā jagrē nĩnh mũ. Kỹ ěg tóg Topē tỹ ěg mỹ nén tó mũ ěn to jykrén há han tũ nĩgtĩ. Ā tỹ Topē to há nĩn kỹ ā tóg sir ga kri rico to vāsān sór ke tũ nĩ. Ā tỹ ga kri rico nĩ sór kỹ ā tóg Topē mĩ ěkrég tũ nĩ, hā vemnĩ,” he tóg, Jesus ti. ²⁵ “Hā kỹ sóg ājag mỹ tó mũ. Ājag tỹ nén ve sór mág mũ to krĩ kufy han tũg nĩ. “Inh hỹn ũri ne konh mũ', inh hỹn ne tunh mũ'?” he tũg nĩ. Topē tỹ ěg han ja vē mỹr, ěg tỹ ga kri mũ jé. Hā kỹ tóg ěg mỹ ěg jėn ki rĩr mũ gé sir, ěg kur ki ke gé, Topē ti. ²⁶ Sėsi to jykrén nĩ. Ag mỹ ěkrān tĩ? Vó. Ag mỹ pājó krėm vin tĩ? Vó, ke tũ ag tóg nĩgtĩ. Ge ra ěg jóg tỹ kanhkā tá nĩ ěn tóg ag ki rĩr nĩ nĩ. Ājag mỹ jėsi káfór tũ nỹtĩ', Topē mỹ'? Vó, sėsi káfór ājag tóg nỹtĩ. ²⁷ Topē tỹ ěg kã ũ jé prėr kỹ ěg tóg ter ke mũ, ěg ter sór tũ ra. Ter jé ěg tóg ke mũ gé, ěg tỹ to krĩ kufy han mũ ra. Ēg krĩ kufy ěn pi(jé) ěg kren han mũ'.

²⁸ Kỹ kur to krĩ kufy han tũg nĩ gé. Ka fej hā to jykrén nĩ. Jatun mỹ tóg mog tĩ. Rānhraj tũ tóg nĩgtĩ, kur han tũ tóg nĩgtĩ. ²⁹ Hā ra tóg sĩnvĩ nỹtĩ, ka fej ti. Kỹ pā'i mág tỹ Salomāo kur tóg ri ke tũ nĩgtĩ, ti sĩnvĩ ra, vėnh kar kur sĩnvĩ káfór ti nĩ, Salomāo kur ti. Hā ra tóg ka fej sĩnvĩ ri ke tũ nĩ. Ki hā sóg tó mũ mỹr. ³⁰ Topē hā ne ka fej sĩnvĩ han, tỹ tóg kur sĩnvĩ ri ke nĩ, ka fej ti. Hā ra tóg kānhmar kāgter tĩ, ka fej ti, ti sĩnvĩ ra. Ũri tóg há nỹtĩ. Kỹ tóg vaj kỹ kógungun kỹ pũr mũ sir, re mré. Hā kỹ Topē tóg ājag ki rĩr káfór han mũ, ājag kur mré hā. Hā kỹ Topē ki ge kỹ nỹtĩmnĩ, ti vĩ kri fi kỹ. ³¹ Krĩ kufy han tũg nĩ. “Inh hỹn ne konh mũ? Inh hỹn ne kron mũ'? Inh hỹn ne tunh mũ'?” he tũg nĩ. ³² Ũ tỹ Topē vĩ ki kagtĩg ag vỹ tag to jykrén mág tĩ, hā ra ěg jóg tỹ Topē vỹ ěg vėg tĩ, ěg tỹ nén ve sór mág mũ ti. Kỹ to krĩ kufy han tũg nĩ. Ti hā ne ěg vėg mũ, ěg jóg tỹ Topē ti. ³³ Topē tỹ tỹ ěg pā'i nĩ ěn hā ve sórnmĩ. Kỹ tag hā to vāsān nĩ. Ti jykre kuryj tag hā to vāsān nĩ. Kỹ tóg ājag mỹ ājag tỹ nén ve sór mág mũ ěn tỹ ājag mỹ vin ke mũ sir. ³⁴ Hā kỹ ājag tỹ vaj kỹ nén venh ke to krĩ kufy han tũg nĩ. Vaj kỹ ājag tóg venh ke mũ, kỹ ājag tóg to jykrén ke mũ sir. Ũri ājag tỹ nén tỹ ũri vėg mũ hā to jykrén há han nĩ. Ājag tỹ ũri nén ũ jagy vėg mũ vỹ há nĩ, kỹ ājag tỹ vaj kỹ nén venh ke to jykrén tũg nĩ, ũri,” he tóg, Jesus ti.

7

Ēg tỹ ũ to jykrén kónān ke tũ
(Lc 6.37-38, 41-42)

¹ “Ā régre to jykrén kónān tũg nĩ, ti jykre kórég ra. Kỹ Topē vỹ ā to jykrén kónān ke tũ nĩ gé. ² Ā tỹ ũ to jykrén mũ ěn ri ke han jé tóg ke mũ, Topē ti, ā mỹ. Ā tỹ ũ mỹ kāmun mũ ri ke han jé tóg ke mũ, ā mỹ, Topē ti. ³ Jykre kórég mág ā tóg nĩ gé, hā ra ā régre jykre pāno sĩ ěn ne ā mỹ kórég nỹ'. ⁴ Kỹ ā hā ne tóg ā régre mỹ: ā jykre kórég kurynh jé sóg ke mũ, he mũ', ā tỹ ā jykre pāno tāvĩ ěn kurynh jāvānh (hā) ra'. ⁵ Ke tũg nĩ. Ke tũ nĩ (mũ) ra ā tóg jykre régre nỹtĩ. Ā jykre kurynh vén nĩ. Kar kỹ ā tóg sir ā régre jykre kurynh há han mũ,” he tóg, Jesus ti.

⁶ “Hā ra cachorro jykre ri ke ag mỹ Topē jykre sĩnvĩ tó tũg nĩ. Porco jykre ri ke ag mỹ Topē jykre sĩnvĩ ěn tó tũg nĩ gé. Jykre kavėj ag nỹtĩ, hā kỹ ag tóg Topē jykre to é henh ke mũ. Ti tỹ tũ' he sór ag tóg tĩ, ti sān kỹ, Topē jykre sĩnvĩ ěn ti. Kar kỹ ag tóg sir ā mré vėnh génh sór mũ gé, ha vemnĩ, ā tỹ ag mỹ Topē jykre sĩnvĩ ěn tó kỹ,” he tóg, Jesus ti.

Topē tỹ tỹ ũn vĩ há nĩ
(Lc 11.9-13)

⁷ “Topē mỹ nén kar to vĩmnĩ, kỹ tóg ājag mỹ han mũ. Ājag tỹ ti mỹ nén ũ to vĩ mũ ěn jāvānh nĩ, kỹ ājag tóg venh ke mũ. Ti mré vĩ kỹ ěg tỹ ti jānkā tỹ tórón tórón ke ěn ri ke han nĩ. Kỹ tóg ājag mỹ nón ri ke han mũ sir, ti tỹ ājag mỹ ājag tỹ nén to vĩ mũ ěn han kỹ. ⁸ Hỹ, hā vē. Ājag tỹ ti mỹ nén (ũ) to vĩn kỹ tóg ājag mỹ han mũ sir. Ājag tỹ ti jāvānh kỹ

ājag tóg ti venh mũ sir. Ājag tỹ ěg tỹ jänkã tỹ tórón tórón ke ri ke han kỹ tóg ājag mỹ nón ri ke han mũ sir,” he tóg.

⁹ “Kejẽn ājag kósín tóg ājag mỹ ěmĩ to vĩ mũ. Kỹ ājag pi(jé) ti mỹ pó nĩm ke mũ'. Ti mỹ ājag tóg ěmĩ hã nĩm ke mũ. ¹⁰ Ājag kósín tỹ ājag mỹ pirã to vĩn kỹ, kỹ ājag pi(jé) ti mỹ pỹn nĩm ke mũ'. Pirã hã nĩm jé ājag tóg ke mũ. ¹¹ Jykre pãno ājag nỹtĩ. Ge ra ājag tóg ājag krẽ mỹ nén ũ há vĩn tĩ. Ge ti nĩ gé, ājag tỹ Topẽ mỹ nén ũ to vĩn kỹ. Nén ũ há hã nĩm jé tóg ke mũ. Hã ra tóg ājag kãfór han tĩ, ěg jóg tỹ kanhkã tá nĩ ti. Ājag tỹ ti mỹ nén (ũ) to vĩn kỹ tóg ājag mỹ nén ũ há tãvĩ han tĩ mỹr,” he tóg.

¹² “Ājag tỹ ājag mré ke ũ to: “ti tỹ ěg mỹ tag han há tóg tĩ vē,” he mũ ra ěg hã tóg ti mỹ han ke mũ. Moisés tỹ ěg jyvẽn hã vē, Topẽ vĩ tó tĩ ag tỹ ěg jyvẽn hã vē,” he tóg, Jesus ti.

Jänkã régre

(Lc 13.24)

¹³ “Ũ tỹ inh ki rã mũ vỹ tỹ jänkã sĩ fĩn rãm ke ri ke nĩ. Jänkã sĩ fĩn rãm jé ěg tóg vãsãn tĩ. Ri ke ti nĩ, ũ tỹ inh ki rãnh ke mũ ti. Jänkã mág vỹ nĩ gé. Hã ra ũ tỹ fĩn rãm ke mũ ag vỹ kãgter pẽ han ke mũ. Ājag tỹ jänkã mág ěn fĩn rãm sór kỹ tóg ver jagy tũ nĩ, fĩn rãm há tóg tĩ. Kỹ nũgme to ěpry jagma tĩg, pĩ to ěmĩn jagma tĩg pi(jé) jagy tĩ', ti mág pẽ nĩn kỹ. Hã kỹ ũ tỹ hẽn ri ke ag vỹ jagma mũ mũ. Kar kỹ ag tóg kãgter pẽ han mũ sir, pĩ ki vár kỹ. ¹⁴ Ag jãvo jänkã sĩ ěn fĩn rãm nĩ, ājag tỹ rĩr krỹg ja tũ ve jé. Sĩ ti nĩ, kanhkã to ěpry ti, kanhkã to ěmĩn ti. Ũn pipir ag vỹ jagma mũnh mũ. Ā sĩ san kỹ tóg vég tũ sag tĩ, hã kỹ ũ tỹ jagma mũnh ke mũ ag vỹ pipir nỹtĩ,” he tóg, Jesus ti.

Ón kỹ Topẽ vĩ tó tĩ ag

(Lc 6.43-44)

¹⁵ “Ón kỹ Topẽ vĩ tó tĩ ěn ag vĩ kri fig tũg nĩ. Há nỹtĩ ve ag tóg nỹtĩ, hã ra ag tóg ājag kókén sór nỹtĩ. Ājag kókén sór to ag tóg mĩg jũ ěn ri ke nỹtĩ, mỹr, ha mẽ. ¹⁶ Ājag tỹ ag jykre tugnỹm kỹ ājag tóg ag tỹ Topẽ vĩ mranh mũ ěn ki kanhró nỹtĩ. Ha vé, vãnħ tỹ jóhó ki ěg tóg uva vég tũ nĩgtĩ mỹr. Kỹ ěg tóg sónh ki pẽnva vég tũ nĩgtĩ gé. ¹⁷ Ka vỹ ge nỹgtĩ. Ti há nĩn kỹ tóg kanẽ há han tĩ, kỹ ěg tóg ko tĩ. Ti kórég nĩn kỹ tóg kanẽ kórég han tĩ, kỹ ěg pi(jé) ko tĩ'. ¹⁸ Ka há vỹ kanẽn kónãn ki kagtĩg nĩ, kỹ ka kórég vỹ kanẽ há han ki kagtĩg nĩ gé. ¹⁹ Kỹ ěg tóg ka kórég ěn gỹn tĩ, tỹ ěg pĩ han tĩ. Ka tỹ kanẽ há han vãnħ ěn tỹ ěg pĩnh ti. ²⁰ Ge ti nĩgtĩ, ón kỹ Topẽ vĩ tó tĩ ag tỹ. Ag tỹ Topẽ vĩ mrynhmranh kỹ ag tóg ón kỹ Topẽ vĩ tó tĩ. Ag tỹ nén han mũ ki ěg tóg ag jykre kórég vég mũ,” he tóg, Jesus ti.

Ěg tỹ Topẽ vĩ ki króm ke

(Lc 13.25-27)

²¹ “Vẽnħ kar tóg iso: “pã'i vē, pã'i vē,” he tĩ. Hã ra ũ ag tóg Topẽ tỹ nén tó mũ ěn han vãnħ nỹtĩgtĩ. Hã kỹ ag tóg Topẽ tỹ tỹ ěg pã'i mág nĩ venh ke tũ nĩ. Ũ tỹ inh jóg vĩ han mũ ěn ag hã vỹ Topẽ tỹ tỹ ěg pã'i nĩ venh ke mũ. ²² Kurã ěn kã, isỹ vẽnħ kar jykre tugnỹm ke kurã ěn kã ag tóg inh mỹ tag tónh mũ, ha mẽ. “Senhor, Senhor, ã jykre tó ěg mỹr,” he jé ag tóg ke mũ. “Ā jykre hã ki ěkrén kỹ ěg tóg ěg tỹ nén han vãnħ han ja nĩgtĩ mỹr. Ā jykre hã tỹ ěg tóg vẽnħ jagrẽ kórég pan mỹr,” he jé ag tóg ke mũ, inh mỹ. ²³ Hã ra sóg ag mỹ: “ājag pi(jé) tỹ inh mré ke nỹtĩ,” henh ke mũ. “Ājag ki kagtĩg sóg nĩ mỹr. Ha mũ jęg. Jykre kórég ājag tóg nỹtĩ,” he jé sóg ke mũ, ũ tỹ inh panh vĩ han vãnħ ag mỹ,” he tóg, Jesus ti.

Īn nũna gunh gunh kãme

(Lc 6.47-49)

²⁴ “Ha mẽ, inh vĩ mẽg ājag tóg nỹtĩ,” he tóg. “Ājag tỹ inh vĩ ki króm kỹ ājag tóg sir ũn há ri ke nỹtĩ. Īn han ken kỹ tóg to jykrén mũ. To jykrén há nĩn kỹ tóg ga kũm kỹ pãró kri ĩn nũna ka fęg mũ sir. ²⁵ Kỹ vãhã ta tóg kutẽ mũ, kỹ goj vỹ var mũ sir. Kóho jũ vỹ kãtĩ mũ, ĩn to, hã ra tóg kutẽ tũ nĩ sir, ĩn ti. Pãró kri tóg nỹtĩ, ti nũna ti, hã kỹ tóg kutẽ tũ nĩ. Ge ti nĩ, ājag tỹ inh vĩ kri fi kỹ. ²⁶ Ājag tỹ inh vĩ mẽg mũ ra ki króm tũ nĩn kỹ ājag tóg ũn jykre kórég ri ke nỹtĩ. Īn han ken kỹ tóg to jykrén kónãn mũ, kỹ tóg ga tỹ rỹnhryj hã ki

ka fêg mũ, krīg mý, ãn nũna ti. ²⁷ Kĩ ta tóg kutẽ mũ, kĩ goj vỹ var mũ sir. Kóho jũ vỹ kãtĩ mũ gé, ãn to, kĩ ãn tóg vom ke tére kĩ kutẽ mũ sir. Mráj kãn tóg mũ sir, ãn ti. Ge ti nĩ, ãjag tỹ inh vỹ kri fig tũ nĩn kũ,” he tóg, Jesus ti.

Jesus vỹ tỹ vãnh kar vỹ kãfór nĩ

²⁸ Hã ki Jesus tóg krỹg he mũ sir, ag kanhrãn ki. Kĩ tóg vãnh kar mý e tĩ sir, ti vỹ ti. ²⁹ Ti vỹ tóg vãnh kar vỹ kãfór nĩ, Topẽ vỹ to professor ag vỹ kãfór ti nĩ, kĩ tóg pã'i vỹ kãfór pẽ nĩ gé, ti vỹ ti. Hã kũ tóg ki hã tó mũ. Kĩ tóg ag mý e tĩ sir.

8

Jesus tỹ ãn kaga kren vãnh tỹ há' he

(Mc 1.40-45; Lc 5.12-16)

¹ Jesus tỹ ag mý tó kãn kũ tóg pãnónh ãn to tére mũ sir. Kĩ ãn e ãn ag tóg ti nón mũ mũ sir. ² Kĩ vãhã ã tóg ti tá jun mũ. Vãnh kaga kren vãnh han kũ tóg nĩ, vãnh kaga tỹ lepra he mũ ãn, ã tỹ tá jun mũ ti. Kĩ tóg ti krēm grĩnh ke kũ ã jakrĩ tỹ jẽ nĩ, kũ tóg ti mý: “Senhor,” he mũ. “Ã mý isỹ há' he sór tũ nĩ? ã hã tóg isỹ há henh mũ, ã tỹ isỹ há' he sór kũ,” he tóg ti mý.

³ Kĩ Jesus tóg ti mý: “hej,” he mũ. “To há sóg nĩ, há' he ja há ã tóg nĩ,” he tóg ti mý, Jesus ti. Kĩ tóg ti kaga kren vãnh ãn tỹ kren han mũ vėsýmér. Jãnhkri tóg nĩ, ti fár ti. ⁴ Kĩ Jesus tóg ti mý: “ker ã mý tó hẽ', ã han tag ti,” he mũ. “Ha tĩg, Topẽ tũ ki rĩr tĩ to. Ti hã mý tómnĩ. Kĩ ti mý nén ã nĩm nĩ, ti tỹ Topẽ mý pũn jé, Moisés tỹ vãsỹ ãg mý nén tó ja ãn ti. Hã tugrĩn vãnh kar vỹ ã tỹ há' he mũ tag ki kanhrãn mũ,” he tóg ti mý, Jesus ti. Kĩ tóg tĩ mũ, há' hen kũ.

Jesus tỹ pã'i mág camarada tỹ há' he

(Lc 7.1-10)

⁵ Kĩ Jesus tóg kejẽn cidade tỹ Cafarnaum tá jun mũ. Kĩ fóg tỹ capitão tóg ti venh kãtĩ mũ, ti mý nén ã to vỹ jé. ⁶ Kĩ tóg ti mý: “Senhor,” he mũ. “Inh camarada tóg nỹ nĩ, inh ãn tá. Kãnhgrĩn kãn kũ tóg nỹ nĩ, hã ra tóg kaga jagy nỹ,” he tóg ti mý, capitão ti, Jesus mý. ⁷ Kĩ Jesus tóg ti mý: “kũ inh hỹn tóg ti venh tĩg ha, ã mré, sỹ ã mý ti han jé,” he mũ. ⁸ Hã ra capitão tóg Jesus mý ke mãn mũ. “Ã mýn hỹn jagy nĩ, ã tỹ inh ãn kãki sãn ke ti, isỹ tỹ fóg nĩn kũ,” he tóg ti mý. “Ã vỹ pir ki inh camarada vỹ há' henh mũ. ã vỹ hã tỹ ã tóg ti tỹ há' henh ke mũ,” he tóg, capitão ti. ⁹ “Ha vé, tỹ sóg pã'i krēm ke nĩ gé, kũ soldado ag tóg tỹ inh krēm ke nỹtĩ gé. Hã kũ sóg pã'i jykre ki kanhró nĩ. Isỹ soldado ã mý: kutĩg, hen kũ tóg tĩ mũ. Sỹ ti mý: kunĩg, hen kũ tóg kãtĩ mũ gé. Isỹ inh camarada mý: tag han ra, hen kũ tóg han mũ. Inh vỹ tỹ sóg ag jẽgnẽg tĩ. Hã kũ sóg ki kanhró nĩ. ã vỹ tỹ ã tóg inh camarada tỹ há' he há nĩ,” he tóg, capitão ti, Jesus mý. ¹⁰ Kĩ tóg Jesus mý e tĩ, ti vỹ tag ti. Kĩ tóg ã mré mũ ag mý: “ha mẽ, Israel ag vỹ ti ri ke tũ nỹtĩ,” he mũ. “Ki kanhró tóg nĩ (mýr), kũ tóg inh ki rã kũ jẽ. Ge ve ja tũ sóg nĩ,” he tóg. ¹¹ “Ha vé, ã tỹ hẽn ri ke ag vỹ kãmũnh ke mũ, rã jur ja tá ag kãmũnh mũ, rã pur ja tá ke gé. Abraão mré ag tóg ã tỹ kãnhkã tá nĩ ãn tỹ tỹ ãg pã'i nĩ venh ke mũ, Isaque mré, Jacó mré ke gé, Topẽ tóg ag ki rĩr ke mũ. ¹² Ag jãvo Israel krẽ'krẽ ag tóg kuty ki vár ke mũ. Ag tỹ ã tỹ kãnhkã tá nĩ ãn tỹ tỹ ãg pã'i nĩ venh ke vỹ vỹ, hã ra ag tóg venh ke tũ nĩ. Kĩ ag tóg vėsýrénh ke mũ, ãjag jã tỹ ag gángán ke mũ, tỹ gangan ke mũ, vėsó jũn kũ,” he tóg, Jesus ti. ã mré nỹtĩ ag mý tóg ke mũ.

¹³ Kĩ tóg capitão mý: “ha tĩg ge,” he mũ. “Inh ki rã kũ ã tóg jẽ nĩ, hã kũ ã tóg venh ke mũ sir, ã tỹ nén ve sór mũ ti. ã camarada tỹ inh hur há' hẽ,” he tóg, Jesus ti, capitão mý. Kĩ tóg tĩ mũ sir. Hã ra ti camarada tóg há' he mũ. Hora ãn ki tóg há' he mũ, Jesus tỹ hora ki tó mũ ãn ki.

Jesus tỹ ãn kagyga ag tỹ hághá' he

(Mc 1.29-34; Lc 4.38-41)

¹⁴ Kĩ Jesus tóg sir Pedro ãn kãra rã mũ. Kĩ tóg ti prũ fi mýnh fi vég mũ. Kaga fi tóg nỹ nĩ, rỹg kũ. ¹⁵ Kĩ tóg fi nĩgé mẽg mũ sir. Kĩ fi rỹg ãn tóg tũ' he mũ sir. Kĩ fi tóg nĩ kũ ag

ki rĩr mũ sir. ¹⁶ Kutý ěn kã ag tóg ũn jagrẽ kórég ag tatĩn kãmũ mũ ti to. Kĩ tóg ag mũ vĩ mũ, kĩ ag tóg pa kãn mũ sir, vẽnĥ jagrẽ kórég ag. Ũn kagyga ag hyn han tóg mũ gé sir, Jesus ti. ¹⁷ Hã ra tag tóg rán kĩ nĩ gé. Vãsỹ Topẽ vĩ tó tĩ tỹ Isaiás vĩ tag rán ja nĩ, ha mẽ: “ĕg kaga nỹtĩn kĩ tóg ĕg han, kĩ ĕg tóg há' he kãn mũ, ti tỹ ĕg jagfỹ jagtar tugrĩn,” he ja tóg nĩ, Isaiás ti. Hã ra tóg ge nĩ.

*Ũ tỹ Jesus mré mũ sór mũ ag
(Lc 9.57-62)*

¹⁸ Kejëñ ag tóg Jesus pẽnĩn e nỹtĩ, kĩ Jesus tóg ag ve kĩ: “mũ jé ha,” he mũ, ã mré mũ tĩ ag mũ. “Goj kafã ũ ra ĕg mũnh mũ,” he tóg.

¹⁹ Ag mũnh ke to hã Topẽ vĩ to professor ũ tóg ti mré vĩnh kãtĩ mũ. “Senhor,” he tóg. “Sỹ ã mré tĩg há tóg tĩ. Ā tỹ ĥẽ ra tĩg kĩ sóg ã mré tĩ mũ,” he tóg. ²⁰ Hã ra Jesus tóg ti mũ: “hã ra tóg jagy tĩ,” he mũ. “Īn tũ sóg nĩ,” he tóg. “Mĩg vĩ kré nỹtĩgtĩ. Sēsĩ vĩ jagfẽ nỹtĩgtĩ gé. Ag jãvo isỹ ĥẽ tá nũr ke tóg tũ tĩ. Tỹ sóg ĕprã ke fi kósin nĩ,” he tóg, Jesus ti.

²¹ Kĩ Jesus mré tĩ ũ tóg Jesus mũ vĩ mũ gé. “Ā mré sóg tĩ mũ, hã ra sóg ver inh panh tỹ ga ki ti fón sór mũ,” he tóg, Jesus mũ. ²² Kĩ Jesus tóg ti mũ: “vó,” he mũ. “Ti kénĥ tĩ tũg,” he tóg. “Inh mré kãtĩg,” he tóg. “Inh ki ge tũ ag vĩ ã panh ti kej han mũnh mũ. Ā tỹ inĥã inh mré kãtĩg há tóg tĩ,” he tóg, Jesus ti. ²³ Kĩ tóg sir canoa kãki rã mũ. Kĩ ti mré mũ tĩ ag tóg ti mré ki ge mũ gé sir, goj kafã ũ ra mũ jé.

*Jesus tỹ kóho jũ tỹ tũ' he
(Mc 4.35-41; Lc 8.22-25)*

²⁴ Ag tỹ goj kãmĩ mũ (hã) ra kóho jũ tóg sir krog he mũ, ha mẽ. Kỹ goj tóg canoa kãki krém krém ke mũ, ti fãn sór tóg mũ. Hã ra Jesus tóg nũr kĩ nỹ nĩ. ²⁵ Kĩ ag tóg ti rĩn kĩ ti mũ: “Senhor,” he mũ. “ĕg kren han nĩ,” he ag tóg. “ĕg kãgter ha mẽ tóg tĩ,” he ag tóg.

²⁶ Kĩ Jesus tóg ag mũ: “ãjag tỹ nejë mũmĕgmĕg nẽ?” he mũ. “Ājag mũ inh ki ge há han tũ'?” he tóg. Kĩ tóg nĩ kĩ jĕgnẽ mũ sir, kĩ tóg goj mũ vĩ mũ sir, kóho mũ. Kĩ tóg tũ' he mũ sir. Katy' he tóg mũ, katy tãvĩ tóg tĩ mũr, ha mẽ. ²⁷ Kĩ tóg vẽnĥ kar mũ e tĩ. “Ti jykre tóg ĕg mũ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

*Jesus tỹ vẽnĥ jagrẽ kórég pan
(Mc 5.1-20; Lc 8.26-39)*

²⁸ Kĩ tóg goj fĩn rãm kĩ nig kafã ũ tá jun mũ sir, Gadara tá, Jesus ti, ti mré mũ tĩ ag ke gé. Kỹ ũn rĕgre ag tóg ti kato tĕgtẽ mũ, ũn jagrẽ kórég ag. Vẽnĥ kej tá ag tóg kãmũ mũ. Ag jamã vĕ, vẽnĥ kej ti. Jũ mẽ ag tóg nỹtĩ, kĩ ũ ag tóg ĥẽn ra mũ vãnĥ nỹtĩ, ag kamĕg kĩ.

²⁹ Jesus kato ag tóg kãmũ mũ, ũn jagrẽ kórég ĕn ag. Ti ve kĩ ag tóg sir prĕr mũ, ha mẽ. “!..Ā ĥỹn ĕg tỹ ĥẽ ri kenh mũ ha, Topẽ kósin'..!” he ag tóg mũ. “!..Ā mũ ĕg vóg kónãn sór mũ ha, ĕg kurã to hã..!” he ag tóg. Jesus mũ.

³⁰ Hã ra porco tóg ki e nỹtĩ. Kakó tá ag tóg jĕg nỹtĩ. ³¹ Kĩ Nĕn-Kórég ag tóg Jesus mũ: “ã tỹ ĕg pan kĩ ã tỹ porco to ĕg jĕgnĕnh há tóg tĩ,” he mũ. ³² Kĩ tóg ag mũ: “ĥej,” he mũ. “Ha mũ jĕg ge,” he tóg. Kĩ ag tóg ĕn ag togvãnĥ kĩ porco ki ge mũ sir, Nĕn-Kórég ag. Kĩ vãhã porco ag tóg rán ki re kãn mũ sir, goj nig ki ag tóg vár kãn mũ. Nãgnãr kãn ag tóg mũ sir, tũ' he ag tóg mũ sir, porco ĕn ag, mũr, ha mẽ. ³³ Kĩ porco ki rĩr tĩ ag tóg pĕtẽ kãn mũ sir, cidade ra, kamĕg kĩ. Tá ag tóg kãmĕn kãn mũ. Nĕn-Kórég tỹ jagrẽ ja ĕn ag tó ag tóg mũ sir, Jesus tỹ ag pan ĕn ti.

³⁴ Kĩ vãhã cidade tá ke kar ag tóg sir Jesus venĥ kãmũ mũ. Kãmũ kãn ag tóg mũ. Kĩ ag tóg tá junjun kĩ (ag tóg) Jesus mũ to vĩ mũ, ti tỹ tá kutẽ jé, ti tỹ ag rã hã nĩ tũ nĩ jé, hã kĩ tóg tĩ mũ.

*Jesus tỹ ũn kãnhgrĩn kĩ nỹ tỹ há' he
(Mc 2.1-12; Lc 5.17-26)*

¹ Kÿ Jesus tóg canoa ki rã kÿ goj nig kafã ù ra tÿg mãn mÿ. Kÿ tóg ã jamã tá jun mÿ. ² Ti tÿ ã jamã tá jun kÿ vãhã ag tóg ti mÿ ù vyn kÿ junjun mÿ, ùn kónhgrÿn kÿ nÿ ãn, ha mẽ. Æ cama kri tóg nÿ nÿ. Kÿ Jesus tóg ag tÿ ti ki ge mÿ vég mÿ sir. Hã kÿ tóg ùn kãnhgrÿ mÿ: “inh kósin’,” he mÿ. “Æ fe tÿ há’ hé. Æ tÿ Topê vÿ mranh ja ãn tÿ tÿ’ hen hã vë ha,” he tóg, ti mÿ, ùn kónhgrÿ mÿ.

³ Hã ra Topê vÿ to professor ag vÿ tá nÿtÿ gé. Ti vÿ mẽ kÿ ag tóg to jykrén mÿ. “Topê to vÿ kónãn tóg mÿ mÿr. Vësÿ tóg Topê han mÿ mÿr,” he ag tóg mÿ, Jesus to, ti tÿ ti mÿ: “ã tÿ Topê vÿ mranh ja ãn tÿ tÿ’ hen hã vë,” hen kÿ. Kÿ tóg ag mÿ tÿ ù nÿ, ti jykre ti.

⁴ Hã ra Jesus tóg ki kanhró nÿ, ag tÿ nén to jykrén mÿn ki. Kÿ tóg ag mÿ: “ãjag ne tog nén ù vënhmÿ to jykrén mÿ,” he mÿ. ⁵ “Ne nÿ ãjag mÿ vënhmÿ nÿ?” he tóg. “Ûn tÿg vãnh tag mÿ sóg: “ã tÿ Topê vÿ mranh ja ãn tÿ tÿ’ hen hã vë ha,” he mÿ mÿr. Kÿn mÿ ãjag mÿ vënhmÿ?” he tóg. “Sÿ ti mÿ: “nÿ ra, tÿg ra,” henh ke vë gé. Kÿn mÿ ãjag mÿ vënhmÿ ke gé?” he tóg. ⁶ “Hã ra isÿ ãjag mÿ inh jykre ven sór vë. Tÿ sóg ëprã ke fi kósin nÿ. Tá sóg krÿg ke mÿ, Topê vÿ mranh tÿ vënh pãte fón ke tá, ùn kãnhgrÿ tag mÿ. Sÿ tá krÿg mÿ ven jé sóg ke mÿ, ãjag mÿ,” he tóg.

Hã kÿ tóg ùn kónhgrÿ mÿ: “nÿ ra, jëg ra, ã kur gé (g) tÿg ra, ã ãn ra,” he mÿ. ⁷ Kÿ tóg vym ke nÿ mÿ, kÿ tóg sir jëgnë kÿ tÿ mÿ. Æ ãn ra tóg tÿ mÿ (mÿr) sir, ha mẽ. ⁸ Kÿ vënh kar ag tóg vég mÿ. Kÿ tóg ag mÿ e tãvÿ tÿ. Topê mÿ ag tóg vÿ há han mÿ, ti tÿ Jesus mÿ vënh jykre há nÿm kÿ. Æg mré ke vë mÿr, Jesus ti, ëprã ke, hã ra Topê tóg ti tar han, hã kÿ tóg ti tÿ há’ he mÿ.

Jesus tÿ Mateus mré vÿ

(Mc 2.13-17; Lc 5.27-32)

⁹ Kÿ Jesus tóg ã jamã tá kã kutë kÿ tÿ mÿ sir. Kÿ tóg Mateus vég mÿ sir. Governo mÿ tóg jãnkamy mãg tÿ, imposto kaja ti, kÿ tóg ã rãnhraj han kÿ nÿ nÿ. Kÿ Jesus tóg ti mÿ: “inh mré kãtig,” he mÿ, Mateus mÿ. Kÿ tóg jëgnë kÿ ti mré tÿ mÿ sir.

¹⁰ Kÿ tóg kejën ti mré jëg mÿ, Jesus ti. Kÿ ù tÿ hën ri ke ag tóg tá vënh mãn mÿ, ti ãn krëm, governo mÿ jãnkamy mãg tÿ ag, Topê vÿ mranh tÿ ag. Jesus mré ag tóg jëgjëg mÿ, Jesus mré mÿ tÿ ag mré ke gé. ¹¹ Kÿ Fariseu ag tóg vég mÿ. Kÿ ag tóg ti mré mÿ tÿ ag mÿ vÿ mÿ. “Ajag pã’i ne tóg ag mré jëg mÿ’, governo mÿ jãnkamy mãg tÿ ag mré. Topê vÿ mranh tÿ ag mré hã tóg jëg mÿ’,” he ag tóg, Fariseu ag, Jesus mré mÿ tÿ ag mÿ.

¹² Hã ra Jesus tóg mëg mÿ, ag vÿ ti. Kÿ tóg ag mÿ kãmén mÿ, ha mẽ. “Ûn kagyga tÿ ag vÿ médoco venh mÿ tÿ nÿgtÿ,” he tóg. “Hã ra ùn kagyga ag hã vÿ ti venh mÿ tÿ,” he tóg. ¹³ “Ha vé, tag to jykrén, Topê vÿ tag to, ha mẽ. “Ajag tÿ jagnë jagãgtãn kÿ tóg inh mÿ há tÿ inhhã,” he tóg, Topê ti. “Ajag tÿ inh mÿ nén ù pÿn kãfór tóg nÿ, ãjag tÿ jagnë jagãgtãn mÿ tÿ,” he tóg, Topê ti. Hã kÿ jagnë jagãgtãn nÿ, ag to vÿ tÿg nÿ,” he tóg, Jesus ti. “Inh pi(jé) ù tÿ vënh jykre kuryj han mÿ ag mÿ: “ãjag jykre tovãnh nÿ,” he sór tÿ’. Û tÿ Topê vÿ mranh ja nÿ ãn ag hã mÿ sóg: “ãjag jykre kórég tovãnh nÿ,” he sór tÿ. Hã jé sóg ãjag mÿ vënh ven,” he tóg, Jesus ti.

Jesus tÿ ëg vãkre kãmén

(Mc 2.18-22; Lc 5.33-39)

¹⁴ Kÿ João mré mÿ tÿ ag tóg ti tá junjun mÿ sir, Jesus tá. Kÿ ag tóg ti ki jëmëg mÿ. “Ëg hã ne tóg vãkrég tÿ’, Fariseu mré ke ag ke gé. Æg jãvo ã mré mÿ tÿ ag tóg vãkre vãnh nÿtÿgtÿ. Hë ri ke jé?” he ag tóg, Jesus mÿ, João mré mÿ tÿ ag.

¹⁵ Kÿ Jesus tóg ag mÿ: “hÿ,” he mÿ. “Vënh kyprÿg to kãmÿ ag pi(jé) vãkrég tÿ’,” he tóg. “Festa vë mÿr, vënh prÿgprÿg ti, kÿ ti mré ke ag tóg ùn prÿg mÿ ãn venh kãmÿ tÿ. Hã ra sóg ùn prÿg mÿ ãn ri ke nÿ, hã kÿ tóg inh mré mÿ tÿ ag mÿ sér tÿ ver,” he tóg. “Vãhã tóg jun mÿ, inh kurã ti. Kÿ hã ag tóg inh pére mÿnh mÿ. Æn kã hã ag tóg ãjag vãkrenh ke venh mÿ, kurã ãn kã, inh mré mÿ tÿ ag,” he tóg, Jesus ti.

¹⁶ “Ti si fag pi(jé) vãfe kygnej tÿ tÿ kur si jar ki hyn han tÿ ja nÿtÿgtÿ’. Ûn kygnej tÿ tÿ ki hyn han mÿ ra tóg jaran kenh mÿ. Kÿ kur si jar ãn tóg mág mÿ. Ûn kygnej hã tÿ fag

tóg ki han han tĩ, kŷ tóg jaran ke tũ nĩ,” he tóg, Jesus ti. Ti tŷ ã jykre tãg tón hã vë, hã ra tóg kur kygnej ja tũ ri ke nĩ.

¹⁷ Kŷ tóg ag mŷ: “kŷ vinho vŷ ge nĩgtĩ gé,” he mũ gé. “Ëg pi(jé) vinho kajãg mũ tŷ ti fãr si tŷ sacco ki kujëg tĩ. Ke tũ nĩ (mũ) ra tóg kunãnh kŷ jaran ke mũ, kógnãj kŷ. Kŷ vinho ën tóg tũ! he mũ, sacco ke gé. Vinho kajã tŷ ti fãr tãg tŷ ki kujën ke vë mŷr’,” he tóg, Jesus ti. Ti tŷ ã jykre tãg tó vë, hã ra tóg vinho kajãg mũ ri ke nĩ gé.

Jesus tŷ ùn kagyga fag tŷ há' he

(Mc 5.21-43; Lc 8.40-56)

¹⁸ Ti tŷ ver ag mré vëmén kŷ pã'i ù tóg tá jun mũ, ha mẽ. Ti krëm tóg grĩnh ke mũ. Kŷ tóg ti mŷ: “ha vé,” he mũ. “Inh kósin fi tóg ter ke mũ. Fi venh kãtĩg. ã tŷ ã nĩgé tŷ fi mẽ kŷ fi fe tóg mrin kenh ke mũ, ha vemnĩ,” he tóg, pã'i ti, Jesus mŷ. ¹⁹ Kŷ Jesus tóg jëgnë kŷ ti mré tĩ mũ sir. Jesus mré mũ tĩ ag vŷ ti mré mũ mũ gé sir. ²⁰ Ti tŷ ti mré tĩg mũ ra ù fi tóg ti tá jun mũ, ùn kaga ù fi. Kyvénh krŷg ja tũ han kŷ fi tóg nĩ, prŷg tŷ 12 (ke) ki. Jesus vatãnh tá fi tóg ti kur mëg mũ sir, ti kur mráj ki. ²¹ “Sŷ hën ri ke mũn ti kur mẽ kŷ inh hŷn han mũ,” he fi tóg, to jykrén kŷ. Hã kŷ fi tóg ti kur mënh kãtĩ mũ. ²² Hã ra Jesus tóg vĩrĩn ke kŷ fi vég mũ. Kŷ tóg fi mŷ: “inh kósin’,” he mũ. “Kamëg tũg nĩ,” he tóg mũ. “ã tŷ inh ki rà hã kŷ ã tóg há' he mũ,” he tóg. Kŷ fi tóg há' he mũ sir vësŷmér, ha mẽ.

²³ Kŷ tóg tĩg mãn mũ, Jesus ti. Kŷ ag tóg pã'i ën ìn tá junjun mũ sir. Kŷ tóg tá fór nĩ, ùn kygfŷ mũ fag tŷ, ag tŷ ëg jënky tŷ vãkyr ën kynkyn tĩ ag tŷ ke gé, ti kósin fi ter kŷ. Kŷ Jesus tóg fag vég mũ. ²⁴ Kŷ tóg: “ha mũ jëg,” he mũ. “Gĩr sĩ fi vŷ ter tũ nĩ. Nũr fi nŷ nĩ,” he tóg. Hã ra fag tóg ti nyg mũ. ²⁵ Hã ra tóg fag pan kãn mũ sir. Kŷ tóg gĩr fi nĩgé kãgmĩg mũ sir. Kŷ fi tóg nĩ mũ sir. ²⁶ Kŷ tag kãme tóg vënh kar kri rũm ke mũ, ga ën kar mĩ hã, Jesus tŷ fi rĩn mãn mũ ti.

Jesus tŷ ùn kyvó ag tŷ ëvãnh há hyn han

²⁷ Kŷ Jesus tóg tá kãkutë mũ sir. Kŷ ùn kyvó régre ag tóg ti nón mũ mũ. Ti nón mũ kŷ ag tóg ti jé prër mũ: “!..Davi kósin'..!” he ag tóg. “!..Ëg jagãgtãn ra..!” he ag tóg, prënprër kŷ.

²⁸ Kŷ Jesus tóg ìn kãra rà mũ sir. Kŷ ùn kyvó ën ag tóg ti nón ge mũ gé sir, ìn kãra. Kŷ Jesus tóg ag mŷ: “inh mŷ ãjag mŷ ãjag hyn han há nĩ?” he mũ. Kŷ ag tóg ti mŷ: “hŷ,” he mũ. ²⁹ Kŷ Jesus tóg ag kanë mëg mũ sir, ã nĩgé tŷ. Kŷ tóg ag mŷ: “ãjag tŷ inh ki ge kŷ nŷtĩn kŷ ãjag tóg há' henh mũ,” he mũ. ³⁰ Kŷ ag kanë tóg mrin ke mũ sir. Ëvãnh há' he ag tóg mũ. Kŷ Jesus tóg ag mŷ vĩ tar han mũ. “Ker ù mŷ tó hë’,” he tóg ag mŷ. ³¹ Hã ra ag tóg mũ kŷ (ag tóg) vënh kar mŷ tugtó mũ. Kŷ ti kãme ën tóg vënh kar kri rũm ke mũ sir.

Jesus tŷ ùn vĩ vãnh vĩn

³² Kŷ ag mũ kŷ ù tóg ti tá jun mũ gé, ùn jagrë kórég. Ti jagrë tóg ti vĩ vãnh han. ³³ Kŷ Jesus tóg ti jagrë kórég kutëm mũ sir. Ti tŷ ti kutëm kŷ tóg sir vĩ há han mũ sir, ùn vĩ vãnh ja ën ti. Kŷ tóg vënh kar mŷ e tĩ. “Ge ve ja tũ ëg tóg nŷtĩ, ëg povo tŷ Israel kãmĩ,” he ag tóg mũ.

³⁴ Hã ra Fariseu ag tóg mëg mũ. Kŷ ag tóg ón kŷ Jesus to vĩ kónãn mũ. “Vënh jagrë kórég pan há tóg nĩgtĩ. Hã ra tóg vënh jagrë kórég ag pã'i jykre tŷ ag pan tĩ nĩ, ti tŷ tŷ Japo mré ke nĩn kŷ,” he ag tóg, ón kŷ, Fariseu ag. Ag tŷ Jesus to ón hã vë.

Jesus mŷ ùn jagtar ag

³⁵ Kŷ Jesus tóg cidade kar mĩ tĩ mũ, ëmã kar ën mĩ. Ëg vënh kanhrãn jafã krëm tóg ag kanhrãn tĩ. Ag mŷ tóg ù tŷ kanhkã tá nĩ ën tŷ tŷ ëg pã'i nĩ ën tó tĩ sir. Kŷ tóg ùn kagyga ag hyn han tĩ gé sir. ³⁶ Vënh e ën tóg ti mŷ jagãgtar nŷtĩ. Ù tŷ ag ki rĩr há han ke tóg tũ tĩgtĩ, jo ag tóg vënh ki rĩr há han ki kagtĩg nŷtĩ gé. Ti tŷ ag ve kŷ tóg carneiro tŷ mëg mĩ ëkrég mũ sir. Ù tŷ carneiro tŷ mëg ki rĩr tũ nĩn kŷ ag tóg véké mũgtĩ. Tag ri ke ag tóg nŷtĩ, Jesus mŷ, ùn e ën ag. ³⁷ Kŷ tóg ã mré mũ tĩ ag mŷ: “sŷ ag ve kŷ sóg ëg jakré mĩ ëkrég tĩ,” he mũ. “Ti e nĩn kŷ ëg tóg kejën kre kãn tũ nĩgtĩ, ëg pir nŷtĩn kŷ. Ge ti nĩgtĩ. Ùn e ag

tóg inh ki ge to há nýtí, há ra tóg ver ũ tỹ ag mỹ tónh ke tóg tũ tĩ,” he tóg, Jesus ti. ³⁸ “Hã kỹ Topẽ mré vĩ, ti tỹ ũ jěgně jé, ag tỹ ag mỹ ti vĩ tó jé,” he tóg, Jesus ti, ã mré mũ tĩ ag mỹ.

10

Jesus tỹ apóstolo ag kupręg mũ

(Mc 3.13-16; Lc 6.12-16)

¹ Kỹ Jesus tóg ũn tỹ 12 (ke) ag jé prěr mũ sir, ti mré mũ tĩ ěn ag jé. Kỹ tóg ag mỹ vėnh jykre nĩm mũ, ag tỹ vėnh jagrě kórég pan jé, ag tỹ ũn kagyga ag hyn han jé ke gé. Vėnh kaga kar tỹ ag tóg hě ri ke mũ sir, ti tỹ ag mỹ tag to vėnh jykre nĩm kỹ. ² ũ tỹ 12 (ke) ag jijin há vė, ha mẽ, Jesus tỹ ũn vin mũ ag jygyjn há vė, ha mẽ. ũn ve vỹ tỹ Simão nĩ, kỹ ti jiji ũ há vỹ: Pedro, he mũ. Kar kỹ ti jāvỹ vỹ nĩ gé, há vỹ: André, he mũ, Tiago ke gé, Zebedeu kósin tag ti, ti jāvỹ tỹ João ke gé, ³ Filipe ke gé, Bartolomeu ke gé, Tomás ke gé, Mateus ke gé, governo mỹ jänkamy mǎg tĩ tag ti, Tiago ũ ke gé, Alfeu kósin tag ti, Tadeu ke gé, ⁴ Simão ke gé, ag tỹ ũ to: Zelote, he mũ tag ti, kar kỹ Judas Iscariotes ke gé, Jesus vatánh tá pǎ'i ag mỹ ti kǎmėn ke tag ti.

Jesus tỹ apóstolo ag jěgně

(Mc 6.7-13; Lc 9.1-6)

⁵ ěn ag jěgněg tóg mũ sir, Jesus ti, ag tỹ vėnh kar mỹ Topẽ kǎmėn jé. ũ tỹ 12 (ke) ěn ag jěgněg tóg mũ, Jesus tỹ ũn kupręg ja ěn ag. Kỹ tóg ag mỹ: “ver fóg ag mỹ inh kǎmėn mũ tũg nĩ, kanhgág ag mỹ kǎmėn tũg nĩ gé ver,” he mũ. “Kỹ Samaria tá ke ag jamǎ ki ge tũg nĩ gé,” he tóg. ⁶ “Israel ag tǎvĩ mỹ tómnĩ inhhǎ. Topẽ mỹ ag tóg tỹ carneiro vǎfor ri ke nýtĩ, kỹ ag há mỹ tómnĩ ver,” he tóg. ⁷ “ǎjag tỹ ag mỹ tó kỹ tag tómnĩ, ha mẽ. ũ tỹ kanhkǎ tá nĩ ěn tỹ tỹ ǎjag pǎ'i nĩnh ke vė ũri, hemnĩ, ag mỹ. ⁸ ũn kagyga ag hyn han nĩ gé. ũn kǎgter mũ ag rĩnrĩn mǎn nĩ. ũn kaga kren vǎnh ěn kren han nĩ. Vėnh jagrě kórég ag pan nĩ. ǎjag mỹ sóg ge ra inh jykre nĩm mũ, kỹ ge ra ag mỹ han nĩ gé. Ag mỹ: inh mỹ kajǎm, he tũg nĩ. ⁹ Kỹ jänkamy ma mũ tũg nĩ, jänkamy mǎg, jänkamy sí ke gé. ¹⁰ Kỹ saco ma mũ tũg nĩ gé, bolso ěn. Kur tỹ vėnh kri rĩnh tũg nĩ, pėn né ũ gé mũ tũg nĩ gé, pėn to ró ěn. Kỹ vǎtó vyn tũg nĩ gé, kǎtó ti. Inh rǎnhraj han ǎjag tóg mũ. Kỹ ag tóg to ǎjag jėn ke mũ, vėnh kato, ha vemnĩ,” he tóg, Jesus ti.

¹¹ “Kỹ ǎjag tóg kejėn ěmǎ ũ tá junjun ke mũ. Tá ũn jykre há jǎvǎnh nĩ. Kỹ ěn ĩn ra gemnĩ. ěn ĩn krēm ǎjag tỹ kurǎ ki kǎ panh ke ěn tá krỹg nĩ. ¹² Kỹ ĩn ěn krēm nýtĩ fag mỹ: “Topẽ jé ǎjag ki rĩr, kỹ ǎjag jé jatun mỹ nýtĩ nĩ,” hemnĩ. ¹³ Fag tỹ ǎjag mỹ vĩ há han kỹ fag tóg jatun mỹ nýtĩ. Fag tỹ ǎjag mỹ vĩ há han tũ nĩn kỹ fag tóg jatun mỹ nýtĩ tũ nĩ. Fag javo ǎjag tóg jatun mỹ nýtĩ. ¹⁴ Kejėn ũ tóg ǎjag mỹ: “kǎge jěg ra,” henh ke tũ nĩ, ěmǎ ũ tá. Kỹ tá kǎpamnĩ, ag tỹ ǎjag vĩ mẽ jǎvǎnh nýtĩn kỹ. Tá kǎpa kỹ ǎjag pėn há kykũnh nĩ. Kỹ ag tóg ki kanhró nýtĩ, Topẽ tỹ ag to kórég nĩ ti. ¹⁵ Ha mẽ, ki há sóg tó mũ. Kurǎ tỹ ěgno ki, isỹ vėnh kar jykre tugnỹm ke kurǎ ěn ki ag tóg jagǎgtar nýtĩnh mũ sir, ag tỹ ǎjag vĩ mẽ jǎvǎnh nýtĩn kỹ. Cidade tỹ Sodoma tá ke ag tóg jykre pǎno nýtĩ ja nĩgtĩ, cidade tỹ Gomorra tá ke ag ke gé. Kỹ ag tóg jagǎgtar nýtĩnh mũ gé, kurǎ ěn kǎ. Há ra ũn tỹ ǎjag vĩ mẽ jǎvǎnh ěn ag tóg ag jagǎgtar kǎfór han ke mũ (mỹr), ha mẽ,” he tóg, Jesus ti.

Ag tỹ Jesus tigrĩn ěg to jũnh ke

(Mc 13.9-13; Lc 21.12-17; 12.11-12)

¹⁶ “Carneiro vỹ vėnh jy nĩgǎn han ki kagtĩg nýtĩ, mĩg tỹ ag mǎn sór nĩn kỹ. Carneiro ri ke ǎjag nýtĩ, há ra sóg ǎjag jěgněg mũ, ũ tỹ mĩg ri ke ag to, kỹ Topẽ há tóg ǎjag jy nĩgǎn ke mũ sir. Há kỹ vėnh ki rĩr há han nĩ. Pỹn jykre han nĩ. Vǎjig ti tĩ, pỹn ti, kỹ ěg tóg kǎnhmar ti tỹ hě ri ke tũ nĩgtĩ. Pỹn ri ke han nĩ. Kỹ sórǎg jykre han nĩ gé. Jũ vǎnh pė ti nĩ, nén ũ vėnhmỹ han tũ ti nĩ. Kỹ sórǎg ri ke han nĩ gé. ¹⁷ ěprǎ ke ag tóg ǎjag vóg kónǎn ke mũ, isugrĩn. ǎjag pǎ'i ag mỹ ag tóg ǎjag kǎmėn ke mũ, ag tỹ ǎjag vóg kónǎn jé. ǎjag vėnh kanhrǎnrǎn jǎfǎ krēm ag tóg ǎjag mrǎnmrǎn ke mũ. Há kỹ vėnh ki rĩr há han nĩ. ¹⁸ Fóg tỹ pǎ'i mǎg mỹ ag tóg ǎjag ven ke mũ, pǎ'i mǎg ũ ag mỹ ke gé. Isugrĩn ǎjag tóg vėnh jagtar tag venh ke mũ, ǎjag tỹ ag mỹ inh vĩ ti tó jé, fóg ag kar mỹ ke gé, kanhgág ag

mỹ ke gé. ¹⁹ Pã'i ag tỹ ãjag jé ke kỹ to jykrén tũg nĩ, ãjag tỹ ag mỹ nén tónh ke mũ ên ti to. Topẽ kuprĩg hã ne ãjag krĩn ke mũ', kỹ ãjag tóg ti tỹ ãjag mỹ nén tó mũ ên hã tónh ke mũ, hora ên kã. ²⁰ Hã kỹ ãjag tỹ tó tũ vè sir. Ëg jóg kuprĩg tỹ ãjag tỹ vēmén hã vè," he tóg.

²¹ "Hã ra ù ag tóg ãjag mré pafa mũ fag kãmén ke mũ, pã'i ag mỹ, ag tỹ fag kãgtén jé. Kỹ ù ag tóg ãjag krẽ kãmén ke mũ gé. Kỹ ù ag tóg ãjag han mũ fag kãmén ke mũ gé, pã'i ag mỹ, ag tỹ fag kãgtén jé, mỹr, ha mẽ. ²² Vẽnh kar vỹ ãjag to jũ kỹ ãjag vóg sór nỹtĩ, isugrĩn. Hã ra ù tỹ isovãnh tũ ên hã krenkren ke mũ, kurã tỹ ãgno ki," he tóg, Jesus ti.

²³ "Ag tỹ cidade ù tá ãjag vóg kónãnh kỹ, kỹ cidade ù ra pètẽmnĩ. Ki hã sóg tó mũ, ha mẽ. Israel ag cidade fĩn rãm kãn ke tũ ãjag nĩ, kurã ên kã. Sĩ ti nĩ, ag tỹ ãjag vóg kónãnh ke kurã ti. Kãtĩg jé sóg ke mũ, ag tỹ ge kỹ ãjag vóg kỹ, mỹr, ha mẽ. Tỹ sóg ãprã ke fi kósĩn nĩ, mỹr, ha mẽ. ²⁴ Aluno pi(jé) ã professor kãfór nĩ'. Ûn camarada pi(jé) ã patrão kãfór nĩ'. ²⁵ Aluno tỹ ã professor ri ke nĩn kỹ tóg há tĩ. Ûn camarada tỹ ã patrão ri ke nĩn kỹ tóg há tĩ gé. Iso ag tóg: Belzebu, he ja nĩgtĩ, inh kato vãsãnsãn mũ ag, hã vỹ: Japo, he mũ, hã vỹ: Belzebu, he mũ. Tỹ sóg ãjag professor ri ke nĩ, ãjag patrão ri ke. Ag tỹ iso: Japo, hen kỹ ag tóg ãjag to vĩ kónãnh ke mũ gé, ha vemnĩ, ãjag tỹ inh jykre hã han ti kỹ," he tóg, Jesus ti.

Ëg tỹ Topẽ hã kamẽg ke
(Lc 12.2-7)

²⁶ "Ge ra ag kamẽg tũg nĩ, pã'i ag. Ëg tỹ péju kỹ nén han mũ tóg vẽn ven kãn ke mũ, ãg tỹ vẽn kar vatãnh tá nén to jykrén mũ tóg vẽn ven kãn ke mũ. ²⁷ Isỹ vẽn kar vatãnh tá ãjag mỹ nén tó mũ tag tỹ vẽn kar mỹ tó kãn nĩ. Isỹ komẽr hã ãjag mỹ nén tó mũ tag tỹ vẽn kar mỹ jamã há ra tómnĩ. ²⁸ Mũmẽg tũg nĩ, ag kamẽg tũg nĩ, pã'i ag. Ëg tén há ag nỹtĩ, hã ra ag tóg nũgme ki ãg vãm ke kãgtĩg nỹtĩ, pã'i ag. Ûn pir kamẽg nĩ, hã vỹ: Topẽ, he mũ. Ti hã ne ãg tén kar kỹ nũgme ki ãg vãm ki kanhró nĩ', inferno ki, kỹ ti hã kamẽg nĩ. ²⁹ Ha vé. Sẽsĩ vender he ag tĩ, jãnkamy to, kỹ ag tóg ùn régre to jãnkamy pir mãg tĩ. Hã ra Topẽ tóg jẽsĩ ag ki rĩr tĩgtĩ. Ti tỹ: "hej," hen kỹ ãg tóg ag pin tĩ, ke tũ nĩn kỹ ãg tóg ag krenkren tĩ. ³⁰ Hã ki Topẽ tóg ag ki rĩr tĩgtĩ, sãsĩ ag ki. Ëg ki rĩr tóg tĩ gé, Topẽ ti. Ëg tỹ nén vэг mũ kar ki kanhró tóg nĩ. Hã kỹ tóg ãg gãnh kar nĩgkrén ja nĩ gé, Topẽ ti. ³¹ Hã kỹ pã'i ag kamẽg tũg nĩ. Jẽsĩ kãfór ãjag tóg nỹtĩ, Topẽ mỹ. ãjag kãmĩ ùn pir tóg sãsĩ e kãfór nĩ, ti mỹ," he tóg, Jesus ti.

Ëg tỹ Jesus kãmén ke
(Lc 12.8-9)

³² "Hã kỹ inh kãmén nĩ, ãprã ke ag mỹ. ãjag tỹ ag kamẽg tũ nĩn kỹ ag mỹ inh kãmén kỹ sóg inh jóg tỹ kanhkã tá nĩ ên mỹ ãjag kãmén ke mũ gé, kurã ên kã. ³³ ãjag tỹ hã ra inh kãmén tũ nĩn kỹ sóg inh jóg tỹ kanhkã tá nĩ ên mỹ ãjag kãmén ke tũ nĩ gé, kurã ên kã, ãjag tỹ iso: "ti ki kãgtĩg sóg nĩ," hen kỹ," he tóg, Jesus ti.

Ëg tỹ ãg jykre finh ke
(Lc 12.51-53; 14.26-27)

³⁴ "ãjag hỹn iso: "vẽn kar tỹ jagnẽ to há han jé tóg ke mũ," he tĩ. Hã tũ vè, ù tỹ hẽn ri ke tỹ jagnẽ to jũ han jé sóg ke mũ, ha vemnĩ. ³⁵ Hã kỹ ù tóg ã panh kato tẽn mũ, kỹ ù fi tóg ã mỹnh fi kato tẽn mũ gé. Kỹ ù fi tóg ã má fi kato tẽn mũ gé, mỹr, ha mẽ. ³⁶ Ti mré ke ag vỹ tỹ ti kato vãsãnsãn mũ ag nỹtĩnh mũ, kỹ fi mré ke fag tóg fi kato vãsãn ke mũ gé, ha mẽ. ³⁷ Iso há kãfór nỹtĩmnĩ, ãjag han mũ fag kri, ke tũ nĩ (mũ) ra ãjag tóg inh mỹ há tũ nỹtĩ. Iso há kãfór nỹtĩmnĩ, ãjag krẽ kri, ke tũ nĩ (mũ) ra ãjag tóg inh mỹ há tũ nỹtĩ. ³⁸ Isỹ inh cruz va tĩg ri ke han nĩ gé, isỹ tá ter ke ti, hã vỹ: iser ên ri ke han sór mũ, he mũ. Ke tũ nĩ (mũ) ra ãjag tóg inh mỹ há tũ nỹtĩ. ³⁹ ãjag tỹ iser ri ke han sór tũ nỹtĩn kỹ ãjag tóg nũgme ki kutẽn mũ, ãjag tỹ ãjag jykre tovãnh sór tũ nỹtĩn kỹ. ãjag tỹ isugrĩn kãgter sór kỹ ãjag tóg rĩr krỹg ja tũ ên venh ke mũ, ãjag tỹ ãjag jykre tovãnh kỹ," he tóg, Jesus ti.

*Topê tỹ êg mỹ nén ù há tónh ke
(Mc 9.41)*

⁴⁰ “Û tỹ ãjag mỹ: hej, hen kỹ tóg inh mỹ: hej, he mũ gé sir, kỹ tóg inh ki rã mũ sir. Ti tỹ inh ki rã kỹ tóg ù tỹ inh jênêg mũ ên ki rã mũ gé sir, hã vỹ: Topê, he mũ. ⁴¹ Û tóg Topê vỹ tó tĩ ag mỹ: “ha kãrã,” he tĩ, ag tỹ Topê vỹ tó tĩ tugrĩn. Ti tỹ ag mỹ vỹ há han kỹ tóg Topê mỹ há nĩ sir. Kỹ tóg kejên ti mỹ nén ù há tónh ke mũ, Topê ti, ù tỹ ti vỹ tó tĩ ag mỹ: “ha kãrã,” he mũ ên mỹ. Û tóg ùn jykre kuryj ag mỹ: “ha kãrã,” he tĩ, ag jykre kuryj nỹtĩ tugrĩn. Ên mỹ tóg nén ù há tónh ke mũ gé, Topê ti. ⁴² Û tóg kejên ùn sĩ mỹ nén ù nĩm tĩ, goj hên ri ke mũn. Ûn sĩ tỹ inh ki rã nĩ tugrĩn tóg ti mỹ nén ù nĩm tĩ. Ên mỹ tóg nén ù há tónh ke mũ gé, Topê ti. Ti pi(jé) to nén ù há venh ke tũ nĩ,” he tóg, Jesus ti.

11

*João Batista tỹ Jesus ki jêmẽ
(Lc 7.18-35)*

¹ Jesus tỹ ã mré mũ tĩ ag mỹ tó kãn kỹ tóg tá kãkutẽ mũ sir, ù tỹ 12 (ke) ag mré. Kỹ tóg cidade kar mũ tĩ mũ sir, vênh kar kanhrãn kỹ, ag mỹ Topê vỹ tón kỹ. ² Kỹ kejên João tóg ti kãme mêng mũ. Se kỹ tóg nĩ nĩ, João ti, hã ra tóg Jesus tỹ nén han mũ mêng mũ sir. Kỹ tóg Jesus mỹ vênh vỹ jênêg mũ, ã mré mũ tĩ ag tỹ, João ti. ³ Kỹ tóg Jesus mỹ: “ã hã mỹ?” he mũ. “Êg tỹ ùn jãvãnh mũ mỹ tỹ ã nĩ? Topê tỹ ùn jênêg mũ hã mỹ tỹ ã nĩ?” he tóg. “Êg mỹ ù jãvãnh mãn ke tũ nĩ ha’, ã pãte’?” he tóg, João Batista ti, Jesus mỹ.

⁴ Kỹ Jesus tóg ti mỹ vênh vỹ jênêg mũ gé sir. “Ha João mỹ ãjag tỹ nén vэг mũ tag ti tómnĩ, ãjag tỹ nén mêng mũ tag ti, ha mẽ,” he tóg. ⁵ “Tag han inh tĩ, ha mẽ: ùn kyvó ag vỹ isugrĩn êvãnh há nỹtĩ. Ûn kãnhgrĩ ag vỹ mũ há han mũ, ù tỹ vênh kaga kren vãnh han mũ ên ag krenkren han inh tĩ, lepra han mũ ag. Ûn kutu ag vỹ êmẽ há nỹtĩ ha, ùn kãgter mũ ag vỹ rĩnrĩr mãn nỹtĩ. Ûn jagãgtar ag vỹ Topê vỹ mêng tĩ, ù tỹ kãnhkã tá nĩ ên tỹ tỹ êg pã’i nĩnh ke to. ⁶ Kỹ tóg ti tỹ iso jykrén kónãn tũ nĩn kỹ há’ he mũ. Kỹ Topê tóg ti ve há han mũ. Tag tómnĩ, João mỹ,” he tóg, Jesus ti. ⁷ Kỹ ag tóg sir mũ mũ, João mỹ tó jé, ti mré mũ tĩ ag.

Ag mũn kỹ Jesus tóg vênh e ag mỹ João kãmén mũ. “Ãjag tỹ êmã tũg ja ra mũn kỹ, ti ve jé, kỹ ti jykre hỹn ne ri ke nĩ, ãjag mỹ?” he tóg. “Kejên kãka tóg goj jagma krã tỹ man man ke tĩ. João jykre mỹ ãjag mỹ tag ri ke tũ nĩ? Hỹ, ri ke tũ ti nĩ. ⁸ Kỹ ti jykre hỹn ne ri ke nĩ, ãjag mỹ? Ti mỹ ãjag mỹ ùn kur sĩnvĩ ag jykre ri ke nĩ? Vó, ùn kur sĩnvĩ ag vỹ cidade mág tá nỹtĩ, pã’i mág ìn krêm. ⁹ Kỹ ti jykre hỹn ne ri ke nĩ, ãjag mỹ? Ti jykre mỹ ãjag mỹ Topê vỹ tó tĩ jykre ri ke nĩ? Hỹ, Topê vỹ tó tĩ vè mỹr. Hã ra tóg Topê vỹ tó tĩ ag kãfór kar nĩ, João ti. ¹⁰ Topê vỹ João jênê, ti tỹ ijo tĩg jé. Hã kỹ tag tóg ti to rán kỹ nĩ, Topê vỹ ki, ha mẽ. “Ha vé, ã jo sóg ù jênênh mũ, ti tỹ vênh kar jykre tỹ há’ hen jé, ã tĩg ken jo,” he ja tóg nĩ, Topê ti, João to, iso ke gé,” he tóg, Jesus ti. “Ag jyvên jé tóg ke mũ, kỹ tóg êpny kure ri ke nĩ, êmĩn kurynh ri ke,” he ja tóg nĩ, Topê vỹ tỹ rán kỹ nĩ ki, João to. ¹¹ Ki hã sóg tó mũ, hã kỹ sóg ke mũ, ha mẽ. Êprã ke ag kãfór kar ti nĩ, João ti, Topê vỹ tón ki. Û tỹ ga kri mũ ag kãfór kar ti nĩ. Hã ra ù tỹ hên ri ke ag tóg ù tỹ kãnhkã tá nĩ ên tỹ tỹ êg pã’i nĩnh ke ên venh ke mũ. Ag tỹ venh ke mũ (hã) ra ag tóg kãsir nỹtĩnh mũ. Ûn kãsir ên ag tỹ êgno pẽ ên tóg João kãfór nĩnh mũ, hã ra,” he tóg, Jesus ti.

¹² “João Batista kãtĩg kar kỹ êg tóg vãsã kỹ (êg tóg) ù tỹ kãnhkã tá nĩ ên tỹ tỹ êg pã’i nĩ venh ke mũ. Êg vãsã kỹ êg tóg venh ke mũ. ¹³ Topê vỹ tó tĩ ag kar vỹ Topê vỹ tó ja nĩgtĩ. Kỹ tóg rán kỹ nĩ gé, Topê tỹ êg jyvên mũ ti. Kỹ João tóg tó ja nĩ, ag nón. ¹⁴ João vỹ Elias ri ke nĩ. Tag to jykrén. Rãn kỹ tóg nĩ, Topê vỹ tỹ rán kỹ nĩ ki, Elias kãtĩg mãn ke ti, Cristo kãtĩg ken jo. Ti hã vè, João hã vè, Elias kãtĩg mãn ên ti. ¹⁵ Û nĩgrêg nỹtĩ tỹ tỹ jêmẽ jé, to jykrén jé,” he tóg, Jesus ti.

¹⁶ “Ûri ke ag vỹ ge nỹtĩ gé, ha mẽ. Gĩr ag ri ke ag tóg nỹtĩ. Gĩr ag vỹ jagnê mré kãnhinnhir mũgtĩ. Kỹ ag tóg ãjag mré ke ag jé prêr tĩgtĩ, “mũ nỹ, kãnhinnhir jé,” hen kỹ. Kỹ ag tóg kejên jũgũ tĩ. ¹⁷ “Ãjag mỹ êg tóg vãkyn, kãnhinnhir kỹ, hã ra ãjag ne vênh

gringrén jāvānh nýtī', he ag tóg tī, gīr ag, jagnē mý. "Ājag vēnh gringrén jāvānh nýtīn ký ěg tóg vēsýrénh mū sir, ěg kanhinnhir ký, hā ra ājag tóg ěg mré fý jāvānh nýtī gé," he ag tóg tī gé, ón ký jagnē to jū ký, gīr ag. ¹⁸ Gīr tag ag ri ke ājag nýtī, João to, iso ke gé. João vý vākře ja nýtī, jēn mág tū, kron tū. Ký ājag tóg ti to: "jagrē kórég ti nī," he ja nýtī, ti vākře to. ¹⁹ Ti jāvo sóg vākřég tū nýtī, jěg sóg nýtī, kron sóg nýtī, ký ājag tóg iso: "ti hā ne jēn mág nýtī', ti hā ne kronkron nýtī', ti hā ne governo mý jānkamy mág tī ag to há nýtī', ti hā ne Topě vī mranh tī ag hā to há nýtī'," he ājag tóg sir, iso, ěprā ke fi kósín to. Ký João jykře tóg ājag mý kórég ný, ti vākře to. Jāvo inh jykře tóg ājag mý kórég ný gé, inh vākřég tū to. Hā ra ěg tý ũ jykře tugným ký ěg tóg ti jykře há ěn ki kanhró nýtī sir. Ký tóg tý Topě krě nī sir, ũn jykře há ti, ký ěg tóg ti ki Topě jykře ki kanhró nýtī sir," he tóg, Jesus ti. Ti tý ag mý João kāmén hā vē.

Jesus tý cidade ũ tá ke ag mý vī kónān
(Lc 10.13-15)

²⁰ Ký Jesus tóg cidade tá ke ag mý vī kónān mū sir. Cidade tý hěn ri ke ki tóg ěg tý něn han vānh hyn han ja nýtī, milagre ti, hā ra ag tóg ājag jykře tovānh sór ja tū nýtī, ti ki ag tóg ge sór ja tū nýtī. Hā ký tóg sir ag to vī kónān ja nī, ha mě. ²¹ "Sý cidade tý Corazim ki ke ag mý tag tó sór mū, ha mě," he tóg. "Kórég ve jé ājag tóg ke mū," he tóg. "Sý cidade tý Betsaida ki ke ag mý tag tó sór mū, ha mě," he tóg. "Kórég ve jé ājag tóg ke mū gé," he tóg. "Milagre tý hěn ri ke hyn han isóg ājag mý, hā ra ājag tóg ājag jykře tovānh sór tū nýtī," he tóg. "Cidade tý Tiro tá, cidade tý Sidom tá sóg ěg tý něn han vānh ěn hyn han ja tū nī. Sý tá milagre ěn hyn han mū ra ag tóg ājag jykře tovānh mū vē, vāsý," he tóg. "Kýg fý ag mū vē, ājag mý e tīn ký, ag jykře pāno ěn, sý ag mý tó (hā) ra. Ag jāvo ājag tóg tovānh sór tū nī, to jykřén sór tū nī," he tóg. ²² "Tiro tá ke ag vý vēsýrénh ke mū, kurā tý ěgno ěn ki, Sidom tá ke ag ke gé, ag jykře pāno to. Hā ra ājag tóg ag vēsýrénh káfór han ke mū, ha vemní, ājag tý inh vég mū ra inh ki ge sór ja tū nīn ký. Ki hā sóg tó mū," he tóg, Jesus ti.

²³ "Sý cidade tý Cafarnaum ki ke ag mý tag tó sór mū, ha mě," he tóg. "Ūri tóg ver ājag mý sér tī," he tóg. "Ājag tý kanhkā jykře vég nýtī ra ājag tóg to jykřén tū nī, hā ký ājag tóg nūgme ki vār ke kān mū. Cidade tý Sodoma tá ke ag vý ājag jykře pāno to kągter. Ag tý sý ājag mý něn han mū vég mū ra ag vāsý to jykřén mū vē, ký ag kągter ke tū nī vē. Ký ěg tý ũri ag jamā ve vē vē. ²⁴ Kurā tý ěgno ki ag tóg vēsýrénh ke mū, Sodoma tá ke ag. Hā ra ājag tóg ag vēsýrénh káfór han ke mū, sý vēnh kar jykře tugným ke kurā ěn kā, ājag tý inh vég mū ra inh ki ge sór tū nýtīn ký," he tóg, Jesus ti.

Jesus tý ěg krī tý kānhvy' hěnh ke
(Lc 10.21-22)

²⁵ Ký Jesus tóg tag tó mū gé, ha mě. "Jóg'," he tóg. "Tý ā tóg kanhkā tān ag káfór kar nī, kar ā tóg tý ěprā ke ag káfór kar nī gé," he tóg. "Inh mý tóg há tī, ā tý něn han mū ti. Ū tý: "ki kanhró mág inh nī," he mū ag mý ā tóg ā jykře ven ja tū nī. Ag mý ā tóg kāmén ja tū nī. Ū tý gīr ri ke ki kagtīg ag hā mý ā tóg ven ja nī, ā jykře ti," he tóg.

²⁶ "Hý, hā vē. Ā tý něn to jykřén mūn hā vē, hā ký ā tóg ag hā mý ā jykře ti nīm. Hā ra tóg há tāvī nī, jóg'," he tóg, Jesus ti.

²⁷ Ký tóg ag mý: "inh jóg tóg inh mý tovānh kān, ā tý něn han ja kar ti," he mū. "Ký ũ pi(jé) ti kósín ki kanhró nī'. Inh jóg hā ne inh ki kanhró nī'. Ký ũ pi(jé) inh jóg ki kanhró nī gé'. Inh hā ne ti ki kanhró nī', isý tý ti kósín nīn ký. Hā ra sóg ājag mý ti kāmén jé kātī mū, inh jóg ti. Isý tag to ũn kupřěg mū ag hā mý sóg ti kāmén tī, inh jóg ti," he tóg.

²⁸ "Ājag jagāgtar nýtīn ký, ājag tý Topě vī ki króm ki kagtīg nýtī tugrīn jagtar nýtīn ký iso kāmū jěg. Něn ũ tý ājag mý jagy tīn ký iso kāmū jěg. Ājag krī tý sóg kānhvy' hěnh mū mýr, ha mě," he tóg. ²⁹ "Inh mré kāmū jěg. Ājag kanhrān jé sóg ke mū. Koměr hā sóg vī tī. Inh pi(jé) vēsý ũn mág han tī', vī tar han vānh sóg nýtī. Ājag tý iso kāmū ký ājag krī tóg há' hěnh mū, ha vemní. Kupřā' he jé tóg ke mū, ājag krī ti, ha vemní," he tóg. ³⁰ "Inh

jykre pi(jé) kufy nĩ', ãjag mÿ'. Isÿ ãjag mÿ nén tó mÿ pi(jé) han kórég nĩ',” he tóg, Jesus ti.

12

Jesus tÿ vènhkán ke kurã to pã'i

(Mc 2.23-28; Lc 6.1-5)

¹ Kejën Jesus tóg trigo jo ëpÿ mĩ tĩ mÿ, ti mré mÿ tĩ ag tóg ti mré mÿ mÿ. Vènhkán ke kurã ki ke vë, hã ra ag tóg kókĩnkĩr mÿ, vëjën vég tũ nĩn kÿ. Hã kÿ ag tóg trigo mó ën tÿ kam ke kÿ ko mÿ sir. ² Kÿ Fariseu ag tóg ag vég mÿ. Kÿ ag tóg Jesus mÿ vĩ mÿ. “Ha vé,” he ag tóg mÿ ti mÿ. “Ã mré mÿ tĩ ag ne tóg ãjag tÿ nén han ke tũ han mÿ ha', vènhkán ke kurã ki'. Vènh rãnhraj vë mÿr, ag tÿ trigo tÿ kam ke ti,” he ag tóg, Jesus, mÿ.

³ Hã ra Jesus tóg ag mÿ: “vó,” he mÿ. “Davi tÿ nén han mÿ to jykrén nĩ,” he tóg. “Ti kókĩr nĩn kÿ tóg ã tÿ nén han ke tũ han gé, ti mré mÿ tĩ ag mré, hã ra Topë pi(jé) ti to jũ mÿ', ti tÿ ã tÿ nén han ke tũ han mÿ ra. ⁴ Tag han ja ti nĩ, ha mẽ. Topë jo ïn kãra rã kÿ tóg tá Topë jamĩ ën kó, tÿ ã tÿ konh ke tũ ra. Kÿ tóg ã mré mÿ tĩ ag mÿ vin gé, Topë jamĩ ën. Topë tũ ki rĩr tĩ ag tÿ konh ke ja vë vë, Topë jamĩ ën, hã ra tóg ko ja nĩ, ti tÿ tÿ Topë tũ ki rĩr tĩ tũ ra, Davi ti. Hã kÿ tóg rán kÿ nĩ, Topë vĩ tÿ rán kÿ nĩ ki,” he tóg, Jesus ti.

⁵ “Kÿ Topë tũ ki rĩr tĩ ag jykre to jykrén nĩ gé. Tÿ vènhkán ke kurã ra ag tóg rãnhraj mÿgtĩ, Topë jo ïn krëm, hã ra ag tóg Topë tũ ki rĩr tĩ. Hã kÿ ag tóg tÿ vènhkán ke kurã ra ki vènhkán tũ nĩgtĩ gé, ge ra ag jykre tóg há nĩ, Topë mÿ. Hã kÿ tóg rán kÿ nĩ gé, Topë vĩ tÿ rán kÿ nĩ ki. ⁶ Ha mẽ, Topë jo ïn vÿ tÿ Topë tũ nĩ. Kÿ ag tóg ti tũ ki rĩr tĩ, tÿ vènhkán ke kurã ra. Hã ra sóg Topë jo ïn kãfór nĩ, Topë mÿ. Hã kÿ ïnh mré mÿ tĩ ag tóg Topë mÿ há nÿtĩ, ag tÿ vènhkán ke kurã ki vènhkán tũ ra,” he tóg, Jesus ti.

⁷ “Kÿ Topë vĩ tag to jykrén nĩ gé, ha mẽ. “Ãjag tÿ jagnë jagãgtãn kÿ tóg ïnh mÿ há tĩ,” he ja tóg nĩ. Topë ti. “Kÿ tag tóg ïnh mÿ ãjag tÿ ïnh mÿ nén ù pũn kãfór nĩ, ãjag tÿ jagnë jagãgtãn tag ti,” he ja tóg nĩ. Topë ti. ãjag tÿ tag to jykrén mÿ ra ãjag tóg ïnh mré ke ag to jũnh ke tũ nĩ vë. Ag kókĩr vë mÿr. Nén ù kórég han ja tũ ag tóg nĩ,” he tóg, Jesus ti. ⁸ “Hã ra sóg tÿ vènhkán ke kurã to pã'i nĩ. Tÿ sóg ëprã ke fi kósin nĩ” he tóg, Jesus ti, Fariseu ag mÿ.

Jesus tÿ ùn nĩgé tóg tÿ há' he

(Mc 3.1-6; Lc 6.6-11)

⁹ Kÿ tóg ëmã ën tá kutë kÿ ëmã ù ra tĩ mÿ, kÿ tóg ëg vènh kanhrãn jafã kãra rã mÿ sir. ¹⁰ Tã ù tóg nĩ nĩ, ti nĩgé tóg tóg ja nĩ. Kÿ ag tóg Jesus mÿ: “mÿ há nÿ vÿ, ëg tÿ vènhkán ke kurã ki ù kygtãg ke ti?” he mÿ. Hã ra ag tóg pã'i ag mÿ: “vènhkán ke kurã ki tóg Topë vĩ mranh tĩ, ù kygtãg kÿ,” he sór mÿ. Hã kÿ ag tóg ti ki jëmëg mÿ. Ag mÿ tóg tÿ vènh rãnhraj nĩ, ù kygtãg ti. Vènhkán ke kurã ki ëg nëji ù kygtãg ke tũ nĩ.

¹¹ Hã ra Jesus tóg ag mÿ: “ãjag mëg tÿ vènhkán ke kurã ki kãgnó ki kutë kÿ, ãjag mÿ ti kunũnh ke tũ nĩ, tÿ vènhkán ke kurã nĩn kÿ?” he mÿ. “Ti kunũnh jé ãjag tóg ke mÿ. Kÿ to jykrén nĩ. ¹² Ëg mré ke vÿ ëg mëg kãfór nĩ,” he tóg. “Kÿ tóg há nĩ, ëg tÿ ëg mré ke kygtãg kÿ, tÿ vènhkán ke kurã ra,” he tóg.

¹³ Kÿ tóg ùn nĩgé tóg ën mÿ: “ã nĩgé tÿ krÿg' hé,” he mÿ. Kÿ tóg tÿ krÿg' he mÿ sir. Hã ra tóg há' he mÿ. Ti nĩgé há ën hã ri ke tóg nĩ, ti nĩgé kórég ja ti.

¹⁴ Kÿ Fariseu ag tóg jũgjũ kÿ pa mÿ sir, ïn ën ki. “Ëg hÿn hë ri kenh mÿ, ti tén jé?” he ag tóg mÿ, Jesus to. ¹⁵ Hã ra Jesus tóg ki kanhró nĩ, ag tÿ ti tén sór mÿ ti. Kÿ tóg sir tá kãkutë mÿ, ëmã ù ra tĩg jé.

Isaías tÿ Jesus kãmén ja

Ti tĩg kÿ ùn tÿ hën ri ke ag tóg ti nón mÿ mÿ sir, ùn kagyga ag ke gé, fag ke gé. Kÿ tóg ag tÿ há' he kãn mÿ sir, fag tÿ ke gé, Jesus ti. ¹⁶ Kÿ tóg ag mÿ: “ker isÿ ãjag tÿ há' he kãmén hë',” he mÿ. ¹⁷ Hã ra tóg rán kÿ nĩ gé, ti tÿ ag tÿ há' he mÿ tag ti. Isaías ti, ù tÿ vãsÿ Topë vĩ rán tĩ ën hã vÿ Jesus to tag rán ja nĩ, ti tÿ Topë vĩ tó kÿ. ¹⁸ Topë vĩ tag tó ja ti nĩ, ha mẽ: “ha vé, sÿ ùn kuprëg mÿ ën,” he tóg, Topë ti,” he ja tóg nĩ, Isaías ti. “Ënh camarada ri ke

ti nĩ, ti tỹ isỹ nén tó mũ ěn ki króm há han kỹ. Inh fe pẽ vęgtĩ, sỹ ti ve kỹ tóg inh mỹ sér tĩ. Ti hã mỹ sóg inh kuprĩg jĕnĕnh mũ, kỹ tóg inh vĩ tónh mũ sir. Fóg ag mỹ tóg tónh mũ, kanhgág ag mỹ ke gé, isỹ ag jykre tugnỹm ke ti,” he tóg, Topẽ ti,” he ja tóg nĩ, Isaías ti. ¹⁹ “Vĩ jũ han ke tũ ti nĩ, jũ kỹ vĩ tar han ke tũ ti nĩ gé. Re tá ag tóg ti vĩ mĕnh ke tũ nĩ gé. Komĕr hã tóg vĭnh mũ,” he tóg, Topẽ ti. ²⁰ “Ĕprã ke ag tỹ inh vĩ mranh kỹ ag tóg vãn tỹ ã tỹ tóg' he kỹ kam ke ěn ri ke nỹtĩ. Hã ra ti pi(jé) ag tỹ kam ke kãn ke mũ', isỹ ũ to: inh fe, he mũ ěn ti. Nĕj gru tỹ nhyn ke sór ri ke ag nỹtĩ gé. Ti pi(jé) ag tỹ nhyn kenh ke mũ', hã ra'. Ag mỹ tóg vĩ há han ke mũ. Tag kar kỹ sóg kejĕn vĕnh kar jykre tugnỹm ke mũ. ²¹ Ĕn kã ũ tỹ ti ki ge kỹ nỹtĩ ag hã vĩ krenkren ke mũ, fóg ag mré hã, kanhgág ag mré hã,” he tóg, Topẽ ti,” he ja tóg nĩ, Isaías ti, Jesus to. Hã ra tóg ge nỹgtĩ.

Jesus tỹ Japo jykre tó

(Mc 3.20-30; Lc 11.14-23)

²² Kejĕn ag tóg Jesus to ũ pére kãmũ mũ, ũn kyvó. Vĩ vãn h tóg nĩ gé. Hã ra tóg jagrĕ kórég nĩ gé, hã kỹ tóg ge nĩgtĩ. Kỹ Jesus tóg ti tỹ há' he mũ sir. Kỹ tóg vĩ há' he mũ sir. Ve há' he tóg mũ gé sir. ²³ Kỹ tóg vĕnh kar mỹ e tãvĩ tĩ. Kỹ ag tóg jagnĕ mỹ: “Davi kósin ěn tũ mỹ'?” he mũ sir, Jesus to. “Ũ tỹ vãsỹ rán kỹ nĩ ěn tũ mỹ'?” he ag tóg mũ. Ag mỹ tóg ti hã nĩ ve nĩ.

²⁴ Kỹ Fariseu ag tóg mĕg mũ sir, Jesus tỹ ti tỹ há' he mũ ti. Hã ra ag tóg Jesus to: “jagrĕ kórég ti nĩ,” he mũ. “Nĕn-Kórég ag pã'i tỹ ti jagrĕ nĩ, Belzebu ěn tỹ,” he ag tóg mũ. “Hã kỹ tóg Nĕn-Kórég ag pan tĩ, hã kỹ tóg ag jagrĕ kórég ag pan tĩ. Nĕn-Kórég ag pã'i jykre tỹ tóg ag pan tĩ,” he ag tóg, Fariseu ag.

²⁵ Hã ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “pã'i pir krĕm ke ag tỹ jagnĕ kato tĕgtĕn kỹ ag tóg jagnĕ kãgtĕn kãn ke mũ,” he mũ. “Ĕmã pir ki ke ag tỹ jagnĕ kato tĕgtĕ kỹ, ĩn pir krĕm ke fag tỹ jagnĕ kato tĕgtĕ kỹ fag tóg vĕnh kãpãm kỹ nỹtĭnh mũ, kỹ fag tóg jagnĕ kãgtĕn kãn ke mũ. ²⁶ Ge ti nĩ gé, Nĕn-Kórég ag. Nĕn-Kórég tỹ Nĕn-Kórég ũ kutĕm kỹ tóg Nĕn-Kórég ag tỹ jagnĕ kato tĕgtĕ han mũ sir. Kỹ ag tóg jagnĕ tỹ tũ' hĕnh ke mũ gé, Satanás ag. ²⁷ “Belzebu tỹ tóg Nĕn-Kórég ag pan tĩ,” he ãjag tóg tĩ iso. Jãvo ãjag mré ke ag hỹn vĕnh jykre tỹ ne tỹ vĕnh jagrĕ kórég ag pan tĩ? Ag mỹ Nĕn-Kórég ag jykre ki ag pan mũ gé', Topẽ jykre ki mỹ vó? Topẽ jykre ki ag tóg ag pan tĩ. Ājag tỹ tag to jykrén kỹ ãjag tóg inh jykre há ki kanhrãn ke mũ vĕ,” he tóg ag mỹ, Jesus ti. ²⁸ “Topẽ kuprĩg jykre tỹ sóg Japo ag pan tĩ mỹr. Topẽ kuprĩg tỹ Japo ag pan kãn kỹ Topẽ tóg tỹ ĕg pã'i nĩ vĕ mỹr. Tag to jykrén nĩ,” he tóg, Jesus ti.

²⁹ mãn sór kỹ, ti ĩn tá, kỹ ĕg tóg ti se vén tĩ, ke tũ nĩ (mũ) ra tóg ã tũ ki rĩr ke mũ, kỹ ĕg tóg ti tũ mãn tỹ hĕ ri kenh ke tũ nĩgtĩ, ti tar nĩn kỹ. Ĕg tỹ ti se kar kỹ ĕg tóg ti tũ mäg mũ sir,” he tóg. “Ge ti nĩgtĩ, sỹ nĕn han mũ ti. Tar ti nĩ, Japo ti. Hã ra sóg hur ti sé, hã kỹ sóg ti tũ ag kygvãn ke mũ sir. Ag jagrĕ kórég pan sóg mũ sir,” he tóg, Jesus ti.

³⁰ “Ājag tỹ tỹ inh mré ke tũ nỹtĭn kỹ ãjag tóg inh kato tĕgtĕ mũ. Ājag tỹ inh mré ĕprã ke ag tỹ Topẽ to kãmũ han tũ nĩn kỹ ãjag tóg ag kãmũ kamĕg mũ,” he tóg.

³¹ “Hã kỹ sóg ãjag mỹ tó mũ. Ājag tỹ Topẽ vĩ mranh mũ ra tóg ãjag mỹ vĕnh pãte fón sór mũ, Topẽ ti. Ājag tỹ Topẽ to vĩ kónãn mũ ra tóg ãjag mỹ vĕnh pãte fón sór mũ gé. Ājag tỹ hã ra Topẽ kuprĩg to: “Japo tỹ ĕg jagrĕ vĕ,” ĕn kỹ tóg ãjag mỹ vĕnh pãte fón mãn ke tũ nĩ ha sir, Topẽ ti,” he tóg, Jesus ti. ³² “Ājag tỹ iso vĩ kónãn mũ. Ājag tỹ hã ra Topẽ kuprĩg to vĩ kónãn kỹ tóg ãjag mỹ vĕnh pãte fón mãn ke tũ nĩ ha. Ājag tỹ ga kri mũn kỹ tóg ãjag mỹ vĕnh pãte fón mãn ke tũ nĩ, Topẽ ti, ãjag ter kar kỹ tóg ãjag mỹ vĕnh pãte fón mãn ke tũ nĩ gé,” he tóg, Jesus ti.

Ka to comparação

(Lc 6.43-45)

³³ “Ĕg tỹ ka kanĕ ko há krãn kỹ ti kanĕ vĩ ko há nĩ, ĕg tỹ ka kanĕ ko vãn krãn kỹ ti kanĕ vĩ ko kórég nĩ gé. Ĕg tỹ ti kanĕ ve kỹ ĕg tóg: “ũn kanĕ ko vãn ja vĕ,” ĕnh ke mũ. Ge ti nĩgtĩ, ĕg jykre ti. ũn jykre há tóg há nĩ, ũn jykre kórég tóg kórég nĩ gé. ³⁴ Pỹn ri ke ãjag nỹtĩ. Kórég tãvĩ ãjag nỹtĩ, hã ra ãjag tóg ón kỹ nĕn ũ há tó sór tĩ. Ĕg jĕnky ki tóg kutĕ

tī, ěg tỹ nén to jykrén mũ ti. ěg jykre kórég tävĩ nĩn kỹ ěg tóg nén ũ kórég tävĩ tó tĩ. Hã kỹ ājag pi(jé) tó há han tĩ'. ³⁵ Ũn jykre há vỹ nén ũ há kar to jykrén tĩ, kỹ tóg ěg mỹ tó há han tĩ gé sir, Ũn jykre kórég vỹ nén ũ kórég kar to jykrén tĩ, kỹ tóg ěg mỹ tó kónān tĩ gé sir," he tóg, Jesus ti.

³⁶ "Ki hã sóg tó mũ ājag mỹ, hã kỹ sóg ke mũ kurā tỹ ěgno ki, sỹ vėnh kar jykre tugnỹm ke kurā ěn ki sóg ājag vỹ tugnỹm ke mũ. Kỹ ājag tỹ ón kỹ vỹ ja nĩn kỹ sóg ěn venh ke mũ gé. Ājag tỹ nén tó ja kar tugnỹm jé sóg ke mũ, ha vemnĩ," he tóg, Jesus ti. ³⁷ "Ājag tỹ vỹ há han ja nĩn kỹ ājag tóg inh mỹ há nỹtĩ gé. Ājag tỹ vỹ kórég han ja nĩn kỹ ājag tóg inh mỹ kórég nỹtĩ. Kỹ ā kato tẽ mũ ag mỹ Topẽ jykre tón hã vẽ.

Ag tỹ milagre ve sór

(Mc 8.11-12; Lc 11.29-32)

³⁸ Kỹ Topẽ vỹ to professor ũ ag tóg Fariseu ũ ag mré Jesus mỹ: "Senhor," he mũ. "Ěg tỹ ā tỹ milagre han venh há tóg tĩ," he ag tóg mũ, Jesus mỹ.

³⁹ Kỹ Jesus tóg ag mỹ: "kórég ājag nỹtĩ," he mũ. "Topẽ ki ge sór vānh ājag tóg nỹtĩ," he tóg. "Ājag tỹ milagre ve sór mũ tag venh ke tũ ājag tóg nĩ. Nén pir hã ve jé ājag tóg ke mũ, hã vỹ: Jonas tỹ nén ve ja ěn ri ke, he mũ, vāsỹ Topẽ vỹ tó tĩ ěn tỹ nén ve ja ěn ri ke.

⁴⁰ Jonas ěn vỹ goj tǎn nug kākā nĩ ja nĩ, kurā tāgtũ ki, kuty tāgtũ ki ke gé. Tag ri ke ve jé sóg ke mũ gé. Ga krēm sóg nỹnh mũ, kurā tāgtũ ki, kuty tāgtũ ki ke gé. Tỹ sóg ěprā ke fi kósin nĩ," he tóg, Jesus ti.

⁴¹ "Kỹ Nínive tá ke ag vỹ ājag kato vĩnh ke mũ sir, kurā tỹ ěgno ki, ha vemnĩ. Ag tỹ Jonas vỹ mẽ kỹ ag tóg ājag jykre kórég tovānh, Nínive tá ke ag. Tỹ sóg Jonas kǎfór nĩ, hã ra ājag tóg ājag jykre kórég tovānh sór tũ nĩ, sỹ Nínive tá ke ag jāvo ājag mỹ tó mũ ra. Hã kỹ ag tóg ājag jykre kórég tónh ke mũ, kurā ěn kǎ, ha vemnĩ. ⁴² Kỹ pǎ'i mǎg ěn fi, pǎ'i tỹ rainha ěn fi, ũ tỹ kanhkā fyn ja tá kǎtĩg ja ěn fi vỹ nĩnh ke mũ gé, kurā tỹ ěgno kǎ. Ājag mré fi tóg jėnh ke mũ, kỹ fi tóg ājag to vỹ kónān ke mũ gé. Kanhkā fyn ja tá fi tóg kǎtĩg ja nĩ, vāsỹ, fi tỹ Salomāo vỹ mẽ jé. Salomāo kǎfór vỹ tỹ inh nĩ, hã ra ājag tóg inh vỹ jėmẽ jāvānh nỹtĩ," he tóg, Jesus ti.

Vėnh jagrẽ kórég jykre

(Mc 11.24-26)

⁴³ "Kejėn sóg vėnh jagrẽ kórég ũ kutēm mũ. Kỹ sóg ga kórég mĩ tĩ mũ, ti jagrẽ ěn ti. Goj venh ke tũ tóg nĩ tá. Vėnhkán ke tũ tóg nĩ gé, ti tỹ hẽ ri ken kỹ vėnhkán ke tũ tĩn kỹ.

⁴⁴ Kỹ tóg vāhā to jykrén mũ sir. "Inh hỹn ěn ra tĩg mǎn ha, sỹ ũ tá kǎkutẽ ja ěn ra. Inh mỹ tóg tỹ ĩn ri ke ja nĩ. Kỹ inh hỹn tóg ti kǎra rǎ mǎn ha," he tóg mũ sir, ti jagrẽ ja ěn ti. Kỹ tóg ti venh tĩ mũ sir. Hã ra tóg sir krĩ há nĩ, kỹ tóg ti mỹ ĩn há ri ke nĩ sir, in prur, ĩn kuprā, ĩn sĩnvĩ ri ke. ⁴⁵ Kỹ tóg Nén-Kórég tỹ 7 (ke) ag mỹ tónh tĩ mũ sir. "Ha kǎmũ jėg he tóg mũ sir. Hã ra ag jykre pāno tóg ti jykre pāno kǎfór nĩ. Kỹ ag kar tóg ũ ěn kǎge mũ, tỹ ag ti jagrẽ nỹtĩ, isỹ ũn mỹ ti jagrẽ pir kutēm ja ěn ti. Hã kỹ to, kórég tävĩ nĩ sir. Ti jagrẽ pir kutēm inh nĩ vẽ, hã ra tỹ 8 (ke) ag tóg sir tỹ ti jagrẽ nỹtĩ, ti tỹ inh ki rǎ tũ nĩn kỹ. Ājag mỹ tóg ge nĩnh mũ, kurā tỹ ěgno ki. Ũri ājag jykre vỹ pāno nỹ. Hã ra kurā ěn ki tóg sir pāno kǎfór nỹnh mũ. Kỹ ājag tóg sir to jagtar tävĩ nỹtĩnh mũ," he tóg, Jesus ti.

Jesus mré ke pẽ fag

(Mc 3.31-35; Lc 8.19-21)

⁴⁶ Ti tỹ ver tỹ vėmėn kỹ ti mỹnh fi tóg tá jun mũ sir, ti jāvy ag mré. Ti mỹ fag tóg vėnh vỹ jėnėg mũ, fag tỹ ti mré vėmėn jé. ⁴⁷ Kỹ ũ tóg ti mỹ tónh kǎtĩ mũ. "Ā mỹnh fi vỹ re tá jė, ā jāvy ag mré. Fag tỹ ā mré vėmėn ke nėji," he tóg, Jesus mỹ. ⁴⁸ Kỹ tóg ũ tỹ ti mỹ tó mũ ěn mỹ: "inh mỹnh fi mỹ inh ve sór mũ', inh jāvy ag mré?" he mũ. "Inh mỹnh pẽ fi pijé', inh jāvy pẽ ag pijé'," he tóg. ⁴⁹ Kỹ tóg ti mỹ ā mré mũ tĩ ag ven mũ sir, ā nĩgė tỹ. Kỹ tóg ti mỹ: "inh mỹnh pẽ fi hã vẽ, inh jāvy pẽ ag hã vẽ," he mũ, ā mré mũ tĩ ag to. ⁵⁰ "Ũ tỹ inh panh tỹ kanhkā tá nĩ ěn vỹ ki króm mũ vỹ tỹ inh jāvy pẽ ag nỹtĩnh mũ, inh ve pẽ fag ke ge, inh mỹnh pẽ fi ke gé," he tóg, Jesus ti.

13

*Nén fy to comparação**(Mc 4.1-9; Lc 8.4-8)*

¹ Kurã ên kã Jesus tóg ãn tá kãkutê mũ, kÿ tóg goj nig ra tĩ mũ. Tá tóg nĩ nĩ sir. ² Kÿ ù tÿ hên ri ke ag vÿ tá vênh mãn mũ sir, ti rã hã, kÿ tóg canoa kãkã nĩ mũ sir, jo ùn e ên ag tóg nig fyr tá nÿtĩ. ³ Kÿ tóg ag kanhrãn mũ sir. Ag mÿ tóg comparação tÿ hên ri ke hyn han mũ. Kÿ tóg ag mÿ: “ù tÿ Topê vĩ tó mũ vÿ ge nÿtĩnh mũ, ha mẽ,” he mũ. “Kejên ù tóg nén ù fy vãvãm tĩ mũ,” he tóg. ⁴ “Ti tÿ vãvãm kÿ ti fy ù tóg êpry kri, êmĩn kri kutê mũ, kÿ sēsĩ tóg ti ko mũ sir. ⁵ Ti fy ù tóg pãró kri kutê mũ, ga e tũ ki. Kÿ tóg kãnhmar mur mũ vê, ga sĩ ên ki. ⁶ Hã ra rã tóg ã tÿ êg nĩno kã sa kÿ (tóg) ti pũn mũ. Ti jãre han tũ nĩn kÿ tóg tóg mũ. ⁷ Ti fy ù tóg sónh kãki kutê mũ, kÿ sónh tóg ti mré mur mũ, kÿ tóg ti kri rũm mũ. Kÿ tóg tũ' he mũ sir. ⁸ Ti fy ù tóg ga há kri kutê mũ, kÿ tóg mur há han mũ, mog há han tóg mũ, kanê há han tóg mũ gé. Û tóg kanê tÿ 100 (ke) han, jo ù vÿ tóg kanê tÿ 60 (ke) han, jo ù vÿ tóg kanê tÿ 30 (ke) han. ⁹ Ûn nĩgrêg nÿtĩ tÿ tÿ jêmê jé,” he tóg, Jesus ti.

Êg tÿ comparação to vênh kanhrãn ke

(Mc 4.10-12; Lc 8.9-10)

¹⁰ Kÿ ti mré mũ tĩ ag tóg ti to kãmũ mũ, kÿ ag tóg ti mÿ: “ã tÿ ne tó nê?” he mũ.

¹¹ Kÿ Jesus tóg ag mÿ: “ãjag hã ne ù tÿ kanhkã tá nĩ ên tÿ tÿ êg pã'i nĩ ên ki kanhró nÿtĩnh mũ,” he mũ, “ù tÿ ãn jo nén tó ja tũ ên ti,” he tóg mũ. “Hã ra ùn e ên ag vÿ ki kanhrãn kãn ke tũ nĩ,” he tóg. ¹² “Hã kÿ tóg ge nĩ. Û tÿ nén to jykrén há han kÿ tóg ù to jykrén mãn', ù to jykrén mãn' he mũ. Komêr hã tóg to jykrén kãn ke mũ. Û tÿ nén to jykrén tũ nĩn kÿ tóg ti mÿ tũ' he mũ, ti tÿ to jykrén sĩ han kÿ. ¹³ Hã kÿ sóg ùn e ên ag mÿ comparação han mũ, ag tÿ mẽ há han sór tũ nÿtĩn kÿ. Kÿ ag tóg ón kÿ mēg mũ ra ki kagtĩg nÿtĩ, to jykrén tũ ag nÿtĩ sir. ¹⁴ Hã ra tóg rán kÿ nĩ gé. Isaías tÿ vãsÿ Topê vĩ tó kÿ tóg tag tó ja nĩ, ha mẽ. “Mê jé ãjag tóg ke mũ ón kÿ, hã ra ãjag tóg to jykrén tũ nĩnh mũ, kÿ ãjag tóg ki kagtĩg nÿtĩnh mũ. ¹⁵ Povo tag ag vÿ krĩ tũ nÿtĩ, nĩgrêg kutu ag tóg nÿtĩ gé, kanê kyvó ag tóg nÿtĩ gé, ag tÿ nén ù ve sór tũ nÿtĩn kÿ, ag tÿ jêmê sór tũ nÿtĩn kÿ, ag tÿ to jykrén sór tũ nÿtĩn kÿ ke gé. Hã kÿ ag tóg ãn ki ge sór tũ nÿtĩ gé, kÿ sóg ag tÿ há' henh ke tũ nĩ gé,” he ja tóg nĩ, Isaías ti, povo tag to,” he tóg, Jesus ti.

¹⁶ “Ag jãvo ãjag hã vÿ nĩgrêg há nÿtĩ, hã kÿ ãjag tóg ag jãvo jêmê há han mũ. ¹⁷ Ha mẽ, ù tÿ hên ri ke ag vÿ ãn ve sór e ja nĩgtĩ, vãsÿ, ãjag tÿ ùri vég mũ tag ti. Hã ra ag tóg ãn kãtĩg ke jo kãgter. Topê vĩ tó tĩ ag vê. Jykre kuryj ag nÿtĩ ja nĩ, hã kÿ ag tóg ãjag tÿ nén vég mũ tag ve sór e ja nĩgtĩ. Hã ra ag tóg ve ja tũ nĩgtĩ, mẽ ja tũ ag nĩgtĩ, ãjag tÿ ùri nén mēg mũ ti. Ag tÿ vég tũ ra ag tóg kãgter. ãjag hã ne mẽg mũ', ãnhã',” he tóg, Jesus ti. Ti mré mũ tĩ ag mÿ tóg ke mũ.

Jesus tÿ nén fy to comparação kãmén

(Mc 4.13-20; Lc 8.11-15)

¹⁸ “Kÿ sóg ãjag mÿ kãmén mũ, nén fy kanê tag ti, ha mẽ. ¹⁹ Û tóg kejên ón kÿ Topê vĩ mẽg mũ, ti tÿ tÿ êg pã'i nĩ ti. Hã ra tóg to jykrén tũ nĩ, ã tÿ ón kÿ mēn kÿ. Kÿ Nén-Kórég vÿ ti mÿ tÿ tũ' he mũ sir, ti tÿ mẽ ja ti tÿ. Kã jatu tóg nĩ sir. Êpry kri, êmĩn kri kutê mũ ên hã vê. ²⁰ Kÿ ti fy ù tóg pãró kri kutê mũ. Û vê gé. Topê vĩ mẽg tóg mũ gé. Kÿ tóg kãnhmar: “hej,” he mũ sir. Ti mÿ tóg sér tĩ. ²¹ Hã ra tóg tÿ nén kré jãre tũ ri ke nĩ mÿr. Kÿ tóg tĩg sĩ han mũ, Topê mré. Nén ù jagy kutê kÿ tóg Topê tovãnh mũ sir, ù tÿ Topê vĩ tugrĩn ti kato tẽ kÿ. Kãnhmar tóg tovãnh mũ. ²² Ti fy ù tóg sónh kãki kutê mũ. Û vê gé. Topê vĩ mẽg tóg mũ gé. Hã ra tóg ã rãnhraj hã mĩ êkrég mũ sir. Nén kar to éntóg mũ sir, ón kÿ rico nĩ sór jé. Hã kÿ Topê vĩ tóg ti mÿ katy tĩ sir. Kÿ tóg han tũ nĩ sir, kanê ti. ²³ Ti fy ù tóg ga há kri kutê mũ. Û vê gé. Topê vĩ mẽg tóg mũ gé. Mē kÿ tóg to jykrén mũ sir. Kÿ tóg kanê han mũ sir. Kÿ ù vÿ tóg kanê tÿ 100 (ke) han, jo ù vÿ tóg kanê tÿ 60 (ke) han, jo ù vÿ tóg kanê tÿ 30 (ke) han,” he tóg, Jesus ti.

Vãnh to comparação

²⁴ Kĩ tóg comparação ù han kÿ: “Nén-Kórég tÿ inh rãnrãj kókén sór mũ vÿ ge nÿnh mũ, ha mẽ,” he mũ. Kĩ tóg: “ù tÿ kanhkã tá nĩ ãn tÿ tÿ ãg pã'i nĩ vÿ ge nĩ, ha mẽ,” he mũ. “Kejën ù tóg nén fy vãvãm mũ, ti japÿ tá, tÿ ti jakré nÿ jé. ²⁵ Kĩ tóg nÿr tĩ mũ, ti camarada ag ke gé. Kĩ ti kato tẽ mũ ãn tóg kutyg kÿ ra tĩ mũ, ti japÿ ãn ra, kÿ tóg vãnħ fy vãvãm mũ, trigo fy ãn kãmĩ. Kĩ tóg tĩ mũ sir, vãnħ fy ãn vãvãm kar kÿ. ²⁶ Kĩ trigo tóg mur mũ, mog tóg mũ, kanẽ han tóg mũ sir. Hã ra vãnħ tóg ti mré mur mũ gé. ²⁷ Kĩ ti camarada ag tóg ãjag patrão mÿ tónħ mũ mũ. “Trigo fy vãvãm ãg tóg mũ vẽ, hã ra vãnħ tóg ti mré mur mũ. Ne nẽ hÿn?” he ag tóg ti mÿ.

²⁸ Kĩ tóg ag mÿ: “ãg kato tẽ mũ ãn rãnrãj hã vẽ,” he mũ. “ãn hã ne isũ kókég',” he tóg. Kĩ ag tóg ti mÿ: “kÿ ãg mÿ vãnħ ãn kunÿnh ke tũ nĩ?” he mũ.

²⁹ Kĩ tóg ag mÿ: “hÿ,” he mũ. “ãjag tÿ vãnħ ù kunÿnh kÿ tóg ãjag tÿ ti pẽn ù kunÿnh ha mẽ tĩ, vãnħ mré. Kÿ kunÿnh tũg nĩ. ³⁰ Vãnħ hÿn tóg trigo mré mog mũ gé. Kÿ ãg tÿ kre kÿ sóg ù tÿ krég mũ mÿ tónħ ke mũ. “Vãnħ kre vén nĩ,” he jé sóg ke mũ. “Ti kre kar kÿ ti tógfĩ, ãg tÿ ti pũn jé. Kar kÿ ãjag tóg trigo krenħ ke mũ, sÿ pãjô krêm vin han jé,” he jé sóg ke mũ,” he tóg, ag patrão ti,” he tóg, Jesus ti. Ti tÿ ù tÿ ón kÿ Topẽ ki ge kÿ nÿtĩ ãn ag tó jan hã vẽ.

Mostarda fy to comparação

(Mc 4.30-32; Lc 13.18-19)

³¹ Kĩ tóg ag mÿ nén ù tó mũ gé sir. “Ù tÿ kanhkã tá nĩ tÿ tÿ ãg pã'i nĩ vÿ ge nÿnh mũ, ha mẽ,” he tóg. “Ka tÿ mostarda fy ri ke tóg nĩ. Ti krãn ãg tóg tĩ, ãg japÿ ki, ka tÿ mostarda fy ti. ³² Kãsir ti nÿtĩ, ti fy ti. ù fy vÿ ti sí ri ke tũ nĩ. Ti krãn kar kÿ tóg mog mũ. Kĩ tóg ãgóho ag kãfór nĩ. Pẽ mág ti nÿtĩ, hã kÿ sēsĩ ag vÿ kri krég tĩ, ti pẽ kri,” he tóg, Jesus ti. Ti tÿ ãg tÿ ti vĩ tó vén kar kÿ vãnħ kar kri rũm ke mũ kãmén hã vẽ.

Fermento to comparação

(Lc 13.20-21)

³³ Kĩ tóg ag mÿ comparação ù tó mũ gé sir, kÿ tóg: “Topẽ tÿ tÿ ãg pã'i nĩ vÿ tag ri ke nÿnh mũ, ha mẽ,” he mũ. “Ûn tÿtã fag tóg pão han tĩ. Pão han jé fag tóg pão jëgja jafã tÿ fermento ãn tÿ farĩnh mré jëgjãg tĩ. Fermento sĩ ãn tÿ pão kar ãn tóg són ke kãn tĩ,” he tóg, Jesus ti. Ti vĩ tÿ vãnħ kar kri rũm ke kãmén hã vẽ.

Jesus tÿ comparação tÿ ãg kanhrãn

(Mc 4.33-34)

³⁴ Comparação tÿ ge han tóg tĩ, Jesus ti, vãnħ kar mÿ. “Topẽ tÿ tÿ ãg pã'i nÿnh ke mũ vÿ ge nÿnh mũ,” he tãvĩ han tóg tĩ ag mÿ. ³⁵ Hã ra tóg rán kÿ nĩ gé, Jesus tÿ comparação han ke mũ ti. Vãsÿ Topẽ vĩ tó tĩ ù tóg Jesus kãmén kÿ tag tó ja nĩ ti to, ha mẽ. “Comparação han jé sóg ke mũ. Inh jo tó ja tũ ãn tó jé sóg ke mũ. ù vÿ tag mẽ ja tũ nĩ ver, sÿ tónħ ke mũ tag,” he ja tóg nĩ, Topẽ vĩ tó tĩ ãn, Jesus to. Hã ra tóg hã tó tĩ, Jesus ti.

Jesus tÿ vãnħ to comparação kãmén

³⁶ Ag mÿ kãmén kãn kar Jesus tóg vãnħ e ãn ré kÿ ãn kãra rã mũ. Kÿ ti mré mũ tĩ ag tóg ti to kãmũ mũ, ti ki jẽmẽ jé. “ãg mÿ ã tÿ ag mÿ kãmén ja ãn ti tó mãn nĩ, ã tÿ ag mÿ trigo mré vãnħ tó ja ãn ti. ãg tÿ ver to jykrén tũ tóg tĩ,” he ag tóg mũ, Jesus mÿ.

³⁷ Kĩ tóg ag mÿ kãmén mũ. “ãprã ke fi kósĩn vÿ trigo fy vãvãm mũ. Inh hã vẽ,” he tóg mũ. ³⁸ “Ga hã to sóg: ãpÿ, he mũ. Kÿ trigo ãn vÿ Topẽ krẽ ag ri ke nÿtĩ, kÿ vãnħ vÿ Nén-Kórég krẽ ag ri ke nÿtĩ. ³⁹ ù tÿ ag han mũ vÿ tÿ Japo ti nĩ, Nén-Kórég ãn krẽ ag. Ti colher ke kurã hã vÿ: kurã tÿ ãgno, he mũ. ù tÿ trigo colher ke mũ ag vÿ tÿ Topẽ tÿ jëgnẽ jafã ag nÿtĩ. ⁴⁰ Kurã tÿ ãgno ki ag tóg ãg tÿ vãnħ pũn ãn ri ke han ke mũ, Japo tũ ag tÿ.

⁴¹ ãprã ke fi kósĩn ãn, inh hã vÿ isÿ jëgnẽ jafã ãn ag jëgnẽnh ke mũ sir, kÿ ag tóg ù tÿ vãnħ jykre pãno han mũ kar ag génh kãn ke mũ, ù tÿ ù ag mÿ: “ha jatun mÿ Topẽ vĩ mranħ,” he mũ kar ag ke gé. ⁴² Ag génh kÿ ag tóg pĩ gru mág ãn ki ag vãm ke mũ sir. Tá ag tóg vësÿrénħ tãvĩ han tĩ. ãjag jã tÿ ag tóg gyngyn henħ ke mũ, gangan ke jé ag tóg ke mũ, jũ kÿ, vësÿrénħ kÿ ke gé. ⁴³ Kÿ ùn jykre kuryj ag vÿ há pẽ nÿtĩnh mũ, sĩnvĩ, kókov, rã gru ri

ke, ag tỹ ãjag jóg tá nỹtĩnh ken kỹ sir, ag tỹ ù tỹ kanhkã tá nĩ ãn tỹ tỹ ãg pã'i nĩ ven kỹ. Ûn nĩrẽg nỹtĩ tỹ tỹ jẽmẽ jé,” he tóg, Jesus ti.

Ëpỹ ki jãnkamy to comparação

⁴⁴ “Kỹ ãg tỹ ù tỹ kanhkã tá tỹ ãg pã'i nĩ venh ke vỹ tag ri ke nĩ gé, ha mẽ. Û tỹ ã patrão japỹ tá jãnkamy ne kunũnh kỹ péju mãn kỹ nĩm ri ke tóg nĩ. Ti péju mãn kỹ tóg ã tỹ nén kar fón kãn mũ sir, ti kaja to ãpỹ ãn vyn jé sir. Ëpỹ ãn vyn kar kỹ jãnkamy ãn vỹ tỹ ti tũ nĩ sir,” he tóg, Jesus ti. Ti tỹ ãg mỹ ãg tỹ ti ki rã sór kỹ ãg tũ vãm kãn tón hã vẽ.

Pérola to comparação

⁴⁵ “Ëg tỹ ù tỹ kanhkã tá nĩ ãn tỹ tỹ ãg pã'i nĩ venh ke vỹ tag ri ke nĩ gé, ha mẽ,” he tóg mũ gé. “Negociante ù tóg jãnka han jafã tỹ negociar he tĩ, pérola tỹ. Hã kỹ tóg ùn há kuprẽg tĩgtĩ. ⁴⁶ Kejẽn tóg ùn há pẽ ù vég mũ sir, ùn kaja e. Kỹ tóg ã tũ vãm kãn mũ sir, ã tỹ ùn sĩnvĩ pẽ ãn kajãm jé, ti tỹ tỹ tũ nĩ jé,” he tóg, Jesus ti. Ti tỹ ãg mỹ ãg tỹ ti ki rã sór kỹ ãg tũ vãm kãn tó mãn hã vẽ gé.

Rede to comparação

⁴⁷ “Ëg tỹ ù tỹ kanhkã tá nĩ ãn tỹ tỹ ãg pã'i nĩ venh ke to comparação vẽ gé, ha mẽ,” he tóg mũ gé. “Rede ri ke tóg nĩ, ãg tỹ tỹ pirã kugmĩ jafã ãn. Ti fig ãg tóg tĩ, goj kãkã, ãg tỹ pirã kugmĩ jé, kãkofár ke gé. ⁴⁸ Ki ti fón kar kỹ ãg tóg nỹgnỹn mũ sir, goj ki ãg tóg pirã mré kãkofár gég tĩ. Génh kỹ ãg tóg ùn mág ag hã kuprẽg tĩ, ma mũ jé. Ûn kãsir ãn togvãnh ãg tóg tĩ. ⁴⁹ Ge ti nĩgtĩ, kurã tỹ ãgno ki. Topẽ tỹ jẽgnẽ jafã ag tóg ùn jykre kuryj ag kuprẽg ke mũ, Topẽ mỹ. ⁵⁰ Ûn jykre pãno ag vãvãm jé ag tóg ke mũ, pĩ gru mág ãn ki. Tá ag vësýrénh vẽ sir. ãjag jã tỹ ag tóg gyngyn henh ke mũ, tỹ ag gangan kej ke mũ, jũ kỹ, vësýrénh kỹ,” he tóg, Jesus ti. Ti tỹ ag mỹ ãg tỹ ti ki rã sór jé kãmén hã vẽ.

Ëg panh to comparação

⁵¹ Kỹ tóg ã mré mũ tĩ ag mỹ: “ãjag mỹ tag to jykrén kãn mũ, sỹ ãjag mỹ nén kãmén mũ tag ti?” he mũ. Kỹ ag tóg ti mỹ: “hỹ,” he mũ sir.

⁵² Kỹ tóg ag mỹ: “kỹ tóg há tĩ,” he mũ. “Û tỹ Topẽ vĩ to professor ãn, ti tỹ kanhkã tá nĩ ãn jykre ki rãn kỹ tóg ge nĩ, ha mẽ,” he tóg. “Ëg panh ri ke tóg nĩ, ti tỹ tỹ nén ù mág nĩn kỹ. Ëg panh tóg kejẽn ãg mỹ ã tỹ nén sĩnvĩ ven tĩ, ti tỹ ùri mág mũ ti, ti tỹ vãsý mãn ja ãn ke gé,” he tóg, Jesus ti. Ti tỹ ãg mỹ ãg tỹ Topẽ vĩ ki kanhrãn ke tó vẽ. Ëg tỹ to estudo han kỹ ãg tóg vãsý rán kỹ nĩ ãn tónh ke mũ, kỹ ãg tóg ù tỹ ùri tó mũ tag tónh ke mũ gé. Jesus tỹ tag to ãg mỹ comparación han hã vẽ.

Jesus tỹ Nazaré ra vỹn ke

(Mc 6.1-6; Lc 4.16-30)

⁵³ Ag mỹ kãmén kãn kar kỹ tóg tá kãkutẽ mũ sir. ⁵⁴ Kỹ tóg ã jamã ra tĩ mũ sir. Tá jun kỹ tóg ãg vẽnhanhrãn jafã ki ag kanhrãn mũ. Kỹ tóg ag mỹ e tĩ, ti vĩ ti. Kỹ ag tóg ti to vĩ kónãn mũ. “Hẽn tán hỹn ki kanhrãn, vẽnhan jykre tag ki? Û nỹ hỹn ti kanhrãn, ti tỹ nén han vãnhan tag hyn han jé?” he ag tóg ti to. ⁵⁵ “Ín han tĩ ãn kósin vẽ mỹr,” he ag tóg. “Ti mỹnh fi vỹ tỹ Maria fi nĩ, kỹ ti jãvy ag vỹ ki nỹtĩ, Tiago, José, Simão, Judas. ⁵⁶ Kỹ ti ve fag vỹ tag ki nỹtĩ gé, ãg mré. Ti tỹ ne jé ãg kãfór nĩ sór nẽ hỹn?” he ag tóg mũ sir, Jesus to.

⁵⁷ Kỹ tóg ag mỹ tỹ ù nỹ. Kỹ Jesus tóg ag mỹ: “ẽmã ù tá ke ag tóg Topẽ vĩ tó tĩ to é he tũ nĩgtĩ mỹr,” he mũ. “Ti jamã tá ke ag tóg ti to é he tĩ jãvo, ti mré ke ag, ti kanhkã ag,” he tóg.

⁵⁸ Kỹ tóg tá milagre e hyn han tũ nĩ. Ûn kaga nỹtĩ pir ag tỹ há' he tóg, ùn e tỹ há' he tũ ti nĩ, ag tỹ ti ki ge jãvãnh nỹtĩn kỹ.

¹ Kÿ kejën pã'i mág tÿ governador tÿ Herodes vÿ mæg mÿ, Jesus kãme ti. ² Kÿ tóg ã camarada ag mÿ: “João Batista vë hÿn, ãjag tÿ inh mÿ ù tó mÿ ti,” he mÿ. “Ti hÿn tóg rÿr mãn, sÿ ti tén kar kÿ, hã kÿ tóg milagre tÿ hën ri ke hÿn han tÿgti,” he tóg, Herodes ti, ã camarada ag mÿ, Jesus to.

³ Herodes vÿ João se ja nÿ, vëse ja kãki tóg ti fón ja nÿ, Herodias fi tugnÿn. Ti jãvy tÿ Filipe prÿ fi ja vë, hã ra tóg fi kunÿnh kÿ fi tÿ prÿg mÿ, Herodes ti. Kÿ João tóg ti mÿ. ⁴ “ã hã ne tóg ã mrë ke prÿ fi tÿ prÿg mÿ,” he ja nÿ. “Fi ki ã tóg Topë vÿ mranh mÿ,” he tóg, João ti, Herodes mÿ.

⁵ Kÿ Herodes tóg ti tén sór mÿ, hã ra tóg vënh kar kamæg mÿ. Vënh kar tóg João to: “Topë vÿ tó tÿ ù vë,” he tÿ. Kÿ Herodes vÿ ag kamæg mÿ. ⁶ Hã ra tóg kejën Herodes mur ja kurã tá krÿg mÿ. Kÿ festa ên kã Herodias fi kósin fi vÿ ag jo vënh grén mÿ sir, ti mré jæg mÿ ag jo. Kÿ tóg Herodes mÿ sÿnvÿ tÿ. ⁷ Kÿ tóg fi mÿ: “ã tÿ nén to vÿ kar nÿm jé sóg ke mÿ ã mÿ, sÿ ke há vë,” he mÿ, Herodes ti.

⁸ Kÿ fi tóg ã mÿnh fi mÿ ke mÿ. Kÿ fi mÿnh fi tóg fi krÿn mÿ, fi tÿ João krÿ to vÿ jé. Kÿ fi tóg to vÿ mÿ sir. “Inh mÿ ùri João Batista krÿ tÿ pénky kãkã nÿm,” he fi tóg mÿ, Herodes mÿ.

⁹ Kÿ tóg ti mÿ e tÿ sir, ti tÿ ti tén jé. Hã ra tóg fi mÿ: “sÿ ke há vë,” he ja nÿ, kÿ ti mré jæg mÿ ag vÿ mÿ kãn ja nÿ. Kÿ tóg fi mÿ: “hej,” he mÿ sir. ¹⁰ Kÿ tóg soldado jënæg mÿ sir, ti tÿ João krÿ kÿm jé. Hã ra João tóg vëse ja kãkã nÿ nÿ. ¹¹ Kÿ tóg ti krÿ kÿm mÿ sir. Pénky kãkã nÿm kÿ tóg fi mÿ nÿm mÿ, tátãg fi mÿ, ti krÿ ti. Kÿ fi tóg fi mÿnh fi mÿ ma tÿ mÿ. ¹² Kÿ ti mré mÿ tÿ ag tóg mÿ kÿ ti vÿn kãmÿ mÿ, vënh kej tá ti fón jé. Ti fón kar kÿ ag tóg Jesus mÿ tónh kãmÿ mÿ.

Jesus tÿ ùn e jën

(Mc 6.30-44; Lc 9.10-17; Jo 6.1-14)

¹³ Jesus tÿ João ter mÿ kÿ tóg tá kãkutë mÿ, canoa kãmÿ. Kÿ tóg êmã tÿg ja ra tÿ mÿ sir, ã pir mÿ nÿ jé. Hã ra vënh e ên tóg ti tÿg mæg mÿ. Kÿ ag tóg ti nón mÿ mÿ, ãjag pën kã, êmã kar tá kãmÿ kÿ. ¹⁴ Kÿ Jesus tóg kafã ù tá vag ke mÿ, kÿ tóg tá ùn e ên ag vëg mÿ sir, ti nón kãmÿ mÿ ag. Kÿ ag tóg ti mÿ jagãgtar nÿtÿ. Ag jagãgtãn kÿ tóg ùn kagyga ag tÿ há' he mÿ sir.

¹⁵ Ti tÿ ùn e tÿ hághá' hen kÿ tóg rãké nÿ sir, ti tÿ ag kanhrãn ki. Kÿ ti mré mÿ tÿ ag tóg ti mÿ tó jé kãmÿ mÿ. “Rãké ti nÿ ha,” he ag tóg mÿ, ti mÿ. “Tag mÿ tóg êmã tÿ tÿ. Kÿ tóg ã tÿ ag jëgnënh há tÿ, ag tÿ êmã ù ra mÿ jé, vëjën comprar he jé,” he ag tóg mÿ, Jesus mÿ.

¹⁶ Hã ra Jesus tóg ag mÿ: “ha inhhã ag jën, kÿ ag tóg hë ra mÿnh ke tÿ nÿ.” he mÿ.

¹⁷ Kÿ ag tóg ti mÿ: “hã ra tóg tÿ tÿ, vëjën tÿ,” he mÿ. “Pão tÿ 5 (ke) vÿ ki nÿtÿ, pirã régre ke gé,” he ag tóg.

¹⁸ Kÿ tóg ag mÿ: “inh mÿ ma kãmÿ jæg ge,” he mÿ. ¹⁹ Kÿ tóg ùn e ên ag mÿ tó mÿ, ag tÿ re tá nÿgnÿ kÿ nÿtÿ jé. Kÿ tóg pão tÿ 5 (ke) ên mæg mÿ, pirã régre ên ke gé. Kÿ tóg kanhkã ki êvãnh mÿ sir, vëjën ên to tóg Topë mré vÿ mÿ sir. Kÿ tóg pão kénh kÿ ã mré mÿ tÿ ag mÿ vin mÿ sir, ag tÿ vënh ken jé sir, ùn e ên ag mÿ. ²⁰ Kÿ vënh kar tóg ko kãn kÿ funfór mÿ sir. Hã ra tóg kén mÿ. Këj tÿ 12 (ke) fãn ag tóg mÿ, ti ke tÿ. ²¹ Pão ko mÿ ên ag tóg tÿ mil tÿ 5 (ke) nÿtÿ, ùn tÿtã mré tó tÿ, fag krë mré tó tÿ, hã ra fag tóg tá e nÿtÿ gé mÿr, ha mÿ.

Jesus tÿ goj kri tÿg

(Mc 6.45-52; Jo 6.15-21)

²² Kÿ tóg ã mré mÿ tÿ ag mÿ tó mÿ, ag tÿ canoa kãmÿ mÿ jé, ag tÿ ti jo kafã ù ra mÿ jé. “Isÿ ver ùn e tag ag mÿ: ha mÿjæg, henh ke vë,” he tóg ag mÿ. ²³ Kÿ tóg ùn e ag mÿ: “ha mÿjæg,” he mÿ sir. Kÿ tóg pãnónh to tãprÿ mÿ, Topë mré vÿ jé. ã pir mÿ tóg tá nÿ nÿ. Kÿ tóg kutÿg mÿ sir. Hã ra Jesus tóg pãnónh tá nÿ nÿ. ²⁴ Kÿ canoa tóg nig kãmÿ tÿ mÿ sir, kafã ù ra. Nig fyr tóg kór gy nÿ sir, kuvar gy ti nÿ ha. Kÿ goj tóg krém krém ke sa nÿ, kÿ tóg ag kutãn kÿ nÿ nÿ, goj ti. Kãka vÿ ag kato tÿ mÿ, hã kÿ ag tóg mÿ kónãn mÿ. ²⁵ Kÿ kurã ke ra Jesus tóg ag to kãtÿ mÿ, goj kri tÿg kÿ, ã pën kã. ²⁶ Kÿ ti mré mÿ tÿ ag tóg ti vëg mÿ, ti

tỹ goj kri tĩg kỹ, kỹ ag fe tóg jūrũn ke mũ. “Vẽnh kuprĩg vễ,” he ag tóg mũ. Kamẽg kỹ ag tóg vễkrẽnrẽr mũ sir. ²⁷ Hã ra Jesus tóg ag mré vễmẽn mũ sir. “Kamẽg tũg nĩ, inh hã vễ,” he tóg. “Jūrũn ke tũg nĩ,” he tóg.

²⁸ Kỹ Pedro tóg ti mỹ: “ã hã mỹ?” he mũ. “Kỹ inh mỹ tó, isỹ ã to tĩg jé, goj kri tĩg kỹ,” he tóg, Pedro ti, Jesus mỹ.

²⁹ Kỹ Jesus tóg ti mỹ: “kunĩg ge,” he mũ. Kỹ Pedro tóg canoa ki kutẽ kỹ goj kri tĩ mũ sir, Jesus to. ³⁰ Goj kri tĩg kỹ tóg vãhã kãka ki ẽvãnh mũ, kỹ tóg kamẽg mũ sir. Kamẽg kỹ tóg goj ki pun ke mũ. Kỹ tóg prẽr mũ. “Senhor, inh kren han nĩ,” he tóg mũ, prẽr kỹ.

³¹ Kỹ Jesus tóg vễsỹmẻr ti kãgmĩg mũ. Kỹ tóg ti mỹ: “inh ki rã há han tũ ã tóg nĩ, vỹ,” he mũ. “ã hã ne tóg: inh mỹ tá jun mũ vỹ? he mũ, hã kỹ ã tóg ki pun ke kren mũ,” he tóg, Jesus ti, Pedro mỹ.

³² Kỹ ag tóg canoa kãki ge mũ sir. Ag tỹ ki ge kỹ kãka tóg tũ' he mũ, kóho ẽn. ³³ Kỹ tóg ag mỹ há tĩ, canoa kãki nỹtĩ ag mỹ. Kỹ ag tóg Jesus ki ge há han kỹ ti mỹ vĩ há han mũ sir. “Topẽ kósin vỹ tỹ ã nĩ, mỹr,” he ag tóg mũ sir ti mỹ.

Jesus tỹ Genesaré tá jun

(Mc 6.53-56)

³⁴ Kỹ ag tóg kafã ù tá junjun kỹ (ag tóg) vag ke mũ sir, ẽmã tỹ Genesaré tá. ³⁵ Tá ke ag tóg ãjag tỹ Jesus ve kỹ ti ki kanhrãn mũ. Kỹ ag tóg ti to vễnh vĩ jẽnẽg mũ sir, vễnh kar mỹ, ga kar ẽn mĩ hã. Kỹ ag tóg ùn kagyga ag tatĩ kãmũ mũ, Jesus to. ³⁶ Kỹ ag tóg Jesus mỹ to vĩ mũ, ag tỹ hẽn ri ke mũn ti kur mráj mẽ jé. Kỹ ag tóg há' há' he kãn mũ sir, ag tỹ ti kur mẽn kỹ.

15

Judeu ag jykre si

(Mc 7.1-13)

¹ Kỹ kejẽn Fariseu ù ag tóg Jerusalém tá junjun mũ, Jesus tá, Topẽ vĩ to professor ag mré hã. Jesus mỹ ag tóg vĩ mũ. ² “ã mré mũ tĩ ag ne tóg ẽg jykre si mranh tĩ,” he ag tóg. “ẽg jykre si ki ẽg tóg nĩgpẻg tĩ, ẽg jẽn ke jo, hã ra ag tóg nĩgpẻg tũ ra jẻg tĩ,” he ag tóg.

³ Kỹ Jesus tóg ag mỹ: “ãjag hã vỹ Topẽ vĩ mranh tĩ, ãjag tỹ ãjag jykre si han kỹ,” he mũ. ⁴ “Topẽ tỹ ẽg mỹ tón hã vễ, ha mẽ: “ã mỹnh fi mré ã panh kamẽg nĩ, fag jagãgtãn nĩ,” he ja tóg nĩ. Kỹ tóg tag tó gé, ha mẽ: “ũ tỹ ã han mũ fag mỹ vĩ kónãn mũ ẽn tén jé ã tóg ke mũ,” he ja tóg nĩ gé, Topẽ ti. ⁵ Ti jãvo ãjag tóg tag tó tĩ, ha mẽ: “ã panh mỹ nẻn ù nĩm tũg nĩ, ã mỹnh fi mỹ nẻn ù nĩm tũg nĩ, ã tỹ fag mỹ: “sỹ ãjag mỹ nẻn ù nĩm ke vễ vễ, hã ra sóg Topẽ mỹ nĩm sór mũ,” hen kỹ. ù tỹ tag han kỹ tóg há tĩ,” he ãjag tóg tĩ. ⁶ Hã kỹ ãjag tóg Topẽ vĩ tỹ tũ' he tĩ, ãjag tỹ ãjag jykre si hã han kỹ,” he tóg, Jesus ti.

⁷ “Krĩ rẻgre ãjag nỹtĩ, ha mẽ. Hã kỹ Isaías vỹ ãjag to vĩ ja nĩgtĩ, ti tỹ tag tó kỹ, ha mẽ. ⁸ “Povo tag vỹ ãjag nũnẻ hã tỹ inh mỹ vĩ há han tĩ, hã ra ag jykre pi(jé) tỹ inh jykre nỹ',” he ja tóg nĩ. ⁹ “Fagrĩnh mỹ ag tóg iso grĩnh ke tĩ, hã ra ag tóg ẽprã ke ag jykre to: Topẽ tỹ tón hã vễ, he tĩ,” he ja tóg nĩgtĩ, Isaías ti,” he tóg, Jesus ti. “Ki hã tó ja tóg nĩ, ãjag to, ãjag krĩ rẻgre nỹtĩn kỹ,” he tóg, Jesus ti.

Ne tỹ ẽg kavẻnh

(Mc 7.14-23)

¹⁰ Kỹ tóg vễnh kar jé prẻr mũ sir, ag tỹ ti rã hã nỹtĩ jé, ti vĩ jẻmẻ há han jé. Kỹ tóg ag mỹ: “ha mẽ, sỹ nẻn tó mũ ti, kỹ to jykrẻn nĩ gé,” he mũ. ¹¹ “ẽg jẽn pi(jé) ẽg kavẻnh tĩ,” he tóg. “ẽg jẻnky kã ra ẽg tóg rãg tĩ, vẻjẻn ti. Nẻn ù tỹ ẽg ki kãpa hã vỹ ẽg kavẻnh tĩ, ha mẽ,” he tóg.

¹² Kỹ ti mrẻ mũ tĩ ag ti to kãmũ kỹ ti mỹ: “ha mẽ,” he mũ. “Fariseu ag vỹ ã to jũ nỹtĩ, ã tỹ ag mỹ: vẻjẻn pi(jé) ẽg kavẻnh tĩ, hen kỹ,” he ag tóg ti mỹ.

¹³ Kỹ tóg ag mỹ: “ẽg jóg mág tỹ nẻn krãn ja tũ vãm kỹ nĩ kãn ke vễ, ẽg jóg tỹ kanhkã tá nĩ tỹ nẻn krãn ja tũ ẽn ti,” he mũ. “Ag pi(jé) tỹ Topẽ krẻ nỹtĩ, Fariseu ẽn ag, hã kỹ tóg ag vãm ke mũ,” he tóg. ¹⁴ “Hã kỹ ag to jykrẻn tũg nĩ. ùn kyvó ag mỹ ag tóg: “sỹ ã jãmĩ tĩg

ke vë,” he tĩ, hã ra ag tóg ti kóm kyvó nýtĩ gé, kÿ ùn kyvó tÿ ùn kyvó jãmĩ tĩg kÿ ag tóg kãgnó ki vár ke mũ, ha vemnĩ,” he tóg, Jesus ti. Ag tÿ nũgme ki vár to ken hã vë, hã vÿ: kãgnó ki vár ke mũ, he mũ.

¹⁵ Kÿ Pedro tóg ti mÿ: “ëg mÿ kãmén há han nĩ, ã ví tag,” he mũ. ¹⁶ Kÿ Jesus tóg ti mÿ: “kÿ ãjag mÿ ver ki kanhrãn tũ nýtĩ?” he mũ. ¹⁷ “Mÿ ãjag tÿ to jykrén tũ tĩ?” he tóg. “Ha vé, ëg tÿ ëg jën tÿ ëg jënky kãra rãg kÿ tóg ëg nug kãra rã mũ, kar ëg tóg gón mũ sir. ¹⁸ Nén ù tÿ ëg ki kãpa vÿ tÿ ëg jykre nĩ, hã kÿ tóg ëg kavénh tĩ. ¹⁹ Nén ù tÿ ëg ki kãpa hã vë, ha mẽ: jykrén kónãn, ù tén, ã prũ tũ fi mré nÿ, ã mén tũ mré nÿ, ùn mén tũ fag to én, nén ù péju, ù to ón, ù to ví kónãn. ²⁰ Nén ù tÿ ëg ki kãpa hã vë, ëg kavénh tĩn hã vë. Ëg tÿ nĩgpég tũ ra jën kÿ ti pi(jé) ëg kavénh tĩ,” he tóg, Jesus ti.

Canaã tá ke fi tÿ Jesus mré vëmén

(Mc 7.24-30)

²¹ Kÿ Jesus tóg tá kutë kÿ (tóg) ga ù ra tĩ mũ, cidade tÿ Tiro ra, cidade tÿ Sidom ra. ²² Ti tÿ tá jun kÿ ù fi tóg ti venh kãtĩ mũ. Ga tÿ Canaã tá ke fi vë. Kÿ fi tóg Jesus tá jun mũ, kÿ fi tóg prër mũ. “!..Senhor, Davi kósin..!” he fi tóg. “!..Inh jagãgtãn ra..!” he fi tóg. “!..Inh kósin fi vÿ jagrë kórég tãví nĩ, ã tÿ inh mÿ ti kutëm há tóg te..!” he fi tóg, prër kÿ.

²³ Hã ra Jesus tóg fi mÿ ví tũ nĩ. Kÿ ti mré mũ tĩ ag tóg ti to kãmũ kÿ ti mÿ: “ã mÿ fi ve sór tũ nĩ, fi tÿ kar kÿ ã ãn ra tĩg jé?” he mũ. “Ëg nón fi tóg ëg jé prër mũ, kÿ tóg ëg mÿ e tĩ,” he ag tóg, Jesus mÿ.

²⁴ Hã ra tóg ag mÿ: “vó,” he mũ. “Topë vÿ inh jënë, sÿ Israel ag tÿ há’ he jé inhhã, ù tÿ Israel kãmĩ Topë ví mranh mũ ag tÿ,” he tóg, Jesus ti. Hã ra fi tóg tÿ fóg nĩ, hã kÿ tóg fi ve sór tũ nĩ.

²⁵ Kÿ fi tóg ti tá jun mũ sir. Ti krëm fi tóg grĩnh ke mũ. Kÿ fi tóg ti mÿ: “Senhor,” he mũ. “Á mÿ inh jagãgtãn ke tũ?” he fi tóg.

²⁶ Hã ra Jesus tóg fi mÿ: “há tũ tóg nĩ, ã tÿ nén to ví mũ ti,” he mũ. “Ëg krë jamĩ vÿ tÿ ëg krë tũ nĩ, kÿ ëg tóg cachorro mÿ fón vanh nĩgtĩ, ëg krë jamĩ ti,” he tóg, Jesus ti.

²⁷ Kÿ fi tóg ti mÿ: “hÿ,” he mũ. “Hã ra cachorro sĩ ag tóg ãmĩ mru ên ko tĩ, mesa krëm,” he fi tóg, Jesus mÿ. “Hã kÿ inh kósin fi tÿ há’ hemnĩ, ëg tÿ tÿ cachorro ên ri ke nýtĩ kÿ,” he fi tóg, Jesus mÿ.

²⁸ Kÿ tóg ùn tÿtã ên fi mÿ: “inh ki rã tãví han ja ã tóg nĩ,” he mũ. “Hã kÿ sóg ã mÿ han mũ, ã tÿ inh mÿ nén to ví mũ tag,” he tóg fi mÿ. Ti tÿ tag tó kÿ fi kósin fi tóg há’ he mũ, hora ên kã.

Jesus tÿ ùn e ag tÿ há’ he

²⁹ Kÿ Jesus tóg cidade tá kãkutë kÿ (tóg) goj nig fyr jagma tĩ mũ, nig tÿ Galiléia ên fyr jagma. Kÿ tóg pãnónh to tãpry mũ, kÿ tóg nĩ mũ. ³⁰ Kÿ ùn tÿ hën ri ke ag vÿ junjun mũ, ùn kagyga ag ke gé, ùn kãnhgrĩ ag ke gé, ùn tĩg vanh ag ke gé, ùn kaga ù ag ke gé. Ti ki ag tóg junjun mũ, kÿ tóg ag tÿ hághá’ he kãn mũ. ³¹ Kÿ tóg venh kar ên mÿ e tĩ, ag tÿ tag ven kÿ. Ûn ví vanh ag tóg ví há nýtĩ, ùn kónhgrĩ ag tóg mũ há nýtĩ, ùn kyvó ag tóg ëvãnh há nýtĩ. Kÿ ag tóg Topë mÿ ví há han mũ sir, Israel ag.

Jesus tÿ ùn e ù jën mãn

(Mc 8.1-10)

³² Kÿ Jesus tóg ã mré mũ tĩ ag jé prër mũ. Kÿ tóg ag mÿ: “inh mÿ ag tóg jagãgtar nýtĩ, ùn e tag ag,” he mũ. “Kurã tãgtũ han ag tóg mũ ëg mré. Hã ra ag tóg vëjën ve ja tũ nĩgtĩ. Kÿ tóg sÿ ag jëg tũ ra ag jëgnë jãvãnh tĩ, ag jamã ra. Ag mũn kÿ ù ag hÿn kãgter ke mũ, kókĩnkĩr kÿ,” he tóg.

³³ Kÿ ti mré mũ tĩ ag tóg ti mÿ: “ki ti ãmã tũ nĩ, ki ti ga kórég nĩ,” he mũ. “Ëg hÿn hë tá vëjën venh mũ, ëg tÿ ùn e tag ag jën jé?” he ag tóg ti mÿ.

³⁴ Kÿ Jesus tóg ag mÿ: “ãmĩ tÿ hë ri ke nÿ ki nýtĩ ge?” he mũ. Kÿ ag tóg: “ù tÿ 7 (ke) vë, kãkufár pipir ke gé,” he mũ.

³⁵ Kÿ tóg ùn e ag mÿ tó, ag tÿ nĩgnĩ kÿ nýtĩ jé, ga kri. ³⁶ Kÿ tóg ãmĩ tÿ 7 (ke) mãg mũ, pirã mré, kÿ tóg to Topë mré ví mũ. Kÿ tóg venh kãkénh mũ, ãmĩ ti. Kÿ tóg ã mré mũ tĩ

ag mǝ vin mũ, ag tǝ vĕnh kar mǝ kǎ vĕnh ken jé. Kǝ ag tóg kǎ vĕnh ken mũ mũ. ³⁷ Kǝ ag tóg ko kǎn mũ, funfór ag tóg mũ, hǎ ra tóg kén mũ. Kre tǝ 7 (ke) ěn fǎn tóg mũ sir, ěmĩ kén ti, Jesus mré mũ tǝ ag tǝ génh kǝ. ³⁸ Ũ tǝ ko mũ ag vǝ ũ tǝ 4 mil (ke) nǝtĩ, ag tǎvĩ, ũn tǝtǎ mré tó tũ, ag krĕ mré tó tũ. Hǎ ra fag tóg tá e nǝtĩ gé.

³⁹ Kǝ Jesus tóg ag jĕgnĕg mũ sir, ag jamǎ ra. Kǝ tóg canoa ki rǎ mũ sir, ěmǎ tǝ Magadǎ tá ga ra tǝg jé, ǎ mré mũ tǝ ag mré.

16

Ag tǝ Jesus mǝ milagre to vĩ
(Mc 8.11-13; Lc 12.54-56)

¹ Kǝ Fariseu ũ ag tóg Jesus tá junjun mũ, Saduceu ag mré hǎ. Ag tǝ ón kǝ ti ki jĕmĕ sór vĕ, ag tǝ kar ti kato vĩ jé. Kǝ ag tóg ti mǝ milagre to vĩ mũ. Ag tǝ ti jykre to: “Topĕ jykre mǝ vǝ?” he sór vĕ. ² Hǎ ra Jesus tóg ag mǝ: “ta to jykrĕn há ǎjag nǝtĩ, ěmé to ke gé,” he mũ. “Rǎkǎnh kǝ ǎjag tóg kanhkǎ ki ěvǎnh tĩ. Rǎren kǝ ǎjag tóg: “ěmǎn ke vĕ,” he tĩ. ³ Kǝ kusǎ ki ǎjag tóg kanhkǎ ki ěvǎnh tĩ gé. Kanhkǎ pũr kǝ ǎjag tóg sir: “ta vǝ kutĕnh mũ, kanhkǎ vǝ pũr mũ,” he tĩ. Tó há han ǎjag tóg tĩ, rǎre ve kǝ, kanhkǎ pũr ven kǝ ke gé. Hǎ ra ǎjag tóg inh ki kagtǝg nǝtĩ, ǎjag tǝ sǝ nĕn han mũ vég mũ ra. Hǎ kǝ ǎjag tóg: “Topĕ jykre mǝ vǝ?” he tĩ. ⁴ Kórég ǎjag nǝtĩ, ǎjag tǝ Topĕ ki ge jǎvǎnh nǝtĩn kǝ. Ũri ke kar vǝ ǎjag ri ke kórég nǝtĩ. Milagre venh ke tũ ǎjag tóg nĩ. Vǎsǝ Topĕ vĩ tó tĩ ũ tóg nĩgtĩ, hǎ vǝ: Jonas, he mũ. Jonas tǝ nĕn ve ja ri ke hǎ ve jé ǎjag tóg ke mũ, ũri,” he tóg, Jesus ti. Kǝ tóg ag ré kǝ tĩ mũ sir.

Fermento to comparação ũ
(Mc 8.14-21)

⁵ Kǝ tóg ǎ mré mũ tǝ ag mré tĩ mũ, goj nig kafǎ ũ ra. Ag tǝ kafǎ ũ tá junjun kǝ ag tóg ěmĩ to jykrĕn mũ sir, Jesus mré mũ tǝ ag. Kǎ jatun kǝ ag tóg nǝtĩ ja nĩ, kǝ tóg tũ tĩ sir, ěmĩ ti. ⁶ Kǝ Jesus tóg ag kanhrǎn mũ. “Fariseu ag tǝ fermento há(r) kamĕg nĩ, Saduceu ag tǝ fermento há(r) ke gé,” he tóg mũ, Jesus ti.

⁷ Kǝ ag tóg jagnĕ mré vĩ mũ sir, Jesus vĩ tag to. “Ti tǝ ěg tǝ pǎo mǎg tũ ěn tó hĕn,” he ag tóg mũ, jagnĕ mǝ.

⁸ Hǎ ra Jesus tóg ki kanhró nĩ, ag tǝ nĕn tó mũn ki. Kǝ tóg ag mǝ tó mǎn mũ. “Inh ki ge há han tũ ǎjag tóg nĩ ver,” he tóg. “Hǎ kǝ ǎjag tóg jagnĕ mǝ: pǎo tũ, he mũ. ⁹ Ver tóg ǎjag tǝ to jykrĕn tũ tĩ. Pǎo tǝ 5 (ke) ěn mĩ ěkrĕn nĩ. Ũ tǝ mil tǝ 5 (ke) ag tóg ko kǎn, hǎ ra tóg kén, ag kar tǝ ko mũ ra. Ti ke hĕn kĕj tǝ hĕ ri ke fǎn?” he tóg. Kǝ ag tóg ti mǝ tó mũ sir. ¹⁰ Kǝ tóg ag mǝ: “jo pǎo tǝ 7 (ke) ěn ti. Ũ tǝ mil tǝ 4 (ke) ag vǝ kó, hǎ ra tóg kén, ag kar tǝ ko mũ ra. Ti ke hĕn kĕj tǝ hĕ ri ke fǎn?” he tóg. Kǝ ag tóg ti mǝ tó mũ gé sir. ¹¹ Kǝ tóg ag mǝ: “kǝ inh vĩ to jykrĕn nĩ,” he mũ. “Pǎo tó tũ sóg nĩ. Fermento pĕ tó tũ sóg nĩ. To jykrĕn há han nĩ, ha mĕ. Fariseu ag tǝ fermento há(r) kamĕg nĩ, Saduceu ag tǝ fermento há(r) kamĕg nĩ gé, he sóg mũ ǎjag mǝ,” he tóg, Jesus ti.

¹² Kǝ ag tóg to jykrĕn há han mũ sir vǎhǎ. Ti tǝ fermento pĕ tó pijé. Ti tǝ Fariseu ag jykre tó ja vĕ, Saduceu ag jykre ke gé. Ag jykre hǎ to tóg: “ěn kamĕg nĩ,” he ja nĩ, Jesus ti.

Pedro tǝ Jesus kǎmĕn
(Mc 8.27-30; Lc 9.18-21)

¹³ Kǝ Jesus tóg cidade tǝ Cesaréia Filipe tá ga ra tĩ mũ, ti mré mũ tǝ ag mré. Kǝ tóg ag mǝ: “tǝ sóg ěprǎ ke fi kósin nĩ,” he mũ. “Kǝ ag iso hĕ ri ke tĩ?” he tóg mũ, ag mǝ.

¹⁴ Kǝ ag tóg ti mǝ. “ũ ag tóg ǎ to: João Batista vĕ, he tĩ,” he mũ. “Jǎvo ũ ag tóg: Elias vĕ, he tĩ, ǎ to. Jǎvo ũ ag tóg: Jeremias vĕ, he tĩ gé, jǎvo ũ ag tóg: Topĕ vĩ tó tĩ ũ vĕ, he tĩ gé, ǎ to,” he ag tóg, Jesus mǝ.

¹⁵ Kǝ tóg ag mǝ: “ag jǎvo ǎjag hĕ ri ke tĩ, iso?” he mũ.

¹⁶ Kǝ Simão Pedro tóg ti mǝ: “tǝ ǎ Cristo nĩ,” he mũ. “Topĕ kósin vǝ tǝ ǎ nĩ. Topĕ vǝ rĩr nĩ, kǝ ǎ hǎ vǝ tǝ ti kósin nĩ,” he tóg, Pedro ti, Jesus mǝ.

¹⁷ Kĩ Jesus tóg ti mĩ: “Simão’,” he mũ, “João kósini’,” he tóg. “Èprã ke tĩ ã mĩ tó pijé’,” he tóg. “Inh jóg tĩ kanhkã tá nĩ ã tĩ ã mĩ tó vè, isĩ tĩ ti kósini nĩ ti. Hã kĩ tóg ã ve há han mũ, Topê ti,” he tóg, Pedro mĩ. ¹⁸ “Ha mẽ, tĩ ã Pedro nĩ, hã vỹ: pó, he mũ. Pãró tag kri sóg isũ han mũ, tĩ ã ri ke ãn, hã vỹ: ã tĩ ag mĩ inh vĩ tó tũgrĩn ag tóg inh ki genh ke mũ, he mũ. Kĩ ù tĩ inh ki ge kĩ nĩtĩ ag vỹ tĩ igreja ri ke nĩtĩ. Ag fãr tĩ tũ’ he mũ ra ag tóg rĩnrĩr mãn ke mũ. Tũ’ henh ke tũ ag nĩ. ¹⁹ Èprã ke ag vỹ kanhkã ra mũnh mũ, ã vĩ ki. Jãnkã ri ke ti nĩ, kanhkã ra ge jafã ti, kĩ sóg ã hã mĩ ti nón jafã ti fig mũ sir, ti chave ti. Kĩ ã tĩ ù mĩ: “kanhkã ra tĩg ke tũ ã tóg nĩ,” hen kĩ tóg ra tĩg ke tũ nĩ. Kĩ ã tĩ ù mĩ: “kanhkã ra ã tóg tĩg ke mũ,” hen kĩ tóg ra tĩg ke mũ,” he tóg, Jesus ti, Pedro mĩ.

²⁰ Kĩ tóg ã mré mũ tĩ ag mĩ tó mũ, ag tĩ ti kãmén tũ nĩ jé ver. “Ker ù mĩ sỹ tĩ Cristo nĩ tó hẽ!” he tóg mũ ag mĩ.

*Jesus tĩ ã ter ke tó vén
(Mc 8.31-9.1; Lc 9.22-27)*

²¹ Kĩ tóg ag mĩ ã jagtar ke kãmén nĩ nĩ. ã mré mũ tĩ ag mĩ tóg komẽr hã tó mũ. “Kãnhmar sóg Jerusalém ra tĩg mũ ha,” he tóg mũ. “Tá sóg hã ra jagtar ke mũ. Kófa ag vỹ iso kórég nĩtĩnh mũ, ha vemnĩ, Topê tũ ki rĩr tĩ to pã’i ag, Topê vĩ to professor ag ke gé. Ag tĩ isén ke vè, kĩ sỹ kurã tãgtũ ki rĩr mãn ke vè,” he tóg, Jesus ti.

²² Kĩ Pedro tóg ti pin kĩ ti mré vĩ mũ, ti tĩ tag to jykrén tũ nĩ jé. “Senhor,” he tóg, “Topê jé ã jy nĩgãn, ã tĩ ã jagtar ke tag vég tũ nĩ jé,” he tóg, Pedro ti, Jesus mĩ.

²³ Hã ra Jesus tóg vèsỹjãm èvãnh kĩ ti mĩ vĩ tar han mũ sir, ti to jũ kĩ. “Kutĩg, Satanás,” he tóg, Pedro mĩ. “Isỹ Topê vĩ mranh han sór ã tóg mũ,” he tóg. “Á pi(jé) Topê jykre tó mũ’. Èprã ke jykre vè, ã tĩ inh mĩ nén tó mũ tag ti,” he tóg, Jesus ti, Pedro mĩ.

²⁴ Kĩ tóg ã mré mũ tĩ ag mĩ vĩ mãn mũ. “Ájag tĩ inh mré kãmũ kĩ tóg há tĩnh mũ,” he tóg. “Kĩ ájag jykre tovãnh nĩ, ájag tĩ isũ tãvĩ hã han jé. Ha vé, ag tĩ inh cruz tĩ inh kri fi kĩ sóg tĩg ke mũ, ag tĩ to isa kĩ isén jé, ha vemnĩ. Vẽnh nenh ke tũ sóg nĩ. Isỹ tag han ri ke han nĩ, ájag tĩ inh mré mũ sór nĩtĩn kĩ,” he tóg. ²⁵ “Ájag tĩ ájag jykre hã han kĩ ájag tĩ nũgme ki vár ke vè. Jãvo ájag tĩ isũgrĩn ájag jykre tovãnh kĩ ájag krenkren ke vè, ájag kãgter ke mũ (hã) ra. ²⁶ Hẽn ri ke mũn ájag hỹn mundo ki nén ù kar ganhar henh ke mũ, hã ra ájag kuprĩg vỹ vãfor ke mũ. Kĩ tóg kórég nỹ. Èg tĩ ne tĩ èg kuprĩg kajãm ke tóg tũ tĩ, èg tĩ ti ve mãn jé,” he tóg. ²⁷ “Tĩ sóg èprã ke fi kósini nĩ. Kãtĩg mãn jé sóg ke mũ, kanhkã tá, isỹ jègnè jafã ag mré, inh jóg tĩ isỹ ùn mág han ti kĩ. Kĩ sóg vènh kar mĩ ájag tĩ nén han ja kaja ãn ven ke mũ. ²⁸ Ha vé, ki hã sóg tó mũ. Ájag kãmĩ ù ag tóg Topê tĩ tĩ èg pã’i nĩ venh ke mũ, ájag ter ke to hã, tag ki èg mré nĩtĩ ù ag. Èprã ke fi kósini ãn ve jé ag tóg ke mũ, ti tĩ tĩ pã’i nĩ ti. Inh hã vè,” he tóg, Jesus ti.

17

*Jesus tĩ Moisés mré Elias mré vēmén
(Mc 9.2-13; Lc 9.28-36)*

¹ Kar kurã tĩ 6 (ke) tũg kĩ Jesus tóg ag mĩ: “mũ nỹ, vyr mĩ,” he mũ. Pedro mĩ tóg ke mũ. Tiago mĩ ke gé, ti jãvy tĩ João mĩ ke gé. Ag hã mré tóg tĩ mũ, pãnónh ra. ² Kĩ tóg ag jo vènh ve ù han mũ sir, kĩ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kópréj nĩ gé, jèngrẽ ri ke. ³ Kĩ vãhã Moisés tóg ag mĩ vènh ven mũ sir, Elias ti ke gé. Jesus mré ag tóg vēmén mũ. ⁴ Kĩ Pedro tóg Jesus mĩ: “Senhor,” he mũ. “Tag ki tóg sér tĩ,” he tóg. “Èg mĩ pãjõ tãgtũ han mũ’, ã mĩ’, Moisés mĩ’, Elias mĩ’ ke gé?” he tóg, Pedro ti, Jesus mĩ.

⁵ Pedro tĩ ver vēmén mũ ra kanhkã góg kókov tóg ag kri rũm ke mũ. Kĩ vènh vĩ tóg mẽ há’ he mũ, kanhkã góg kãtã, kĩ tóg: “inh kósini pir hã vè,” he mũ. “Ti vĩ jēmẽ ra,” he tóg, Topê ti.

⁶ Kĩ Jesus mré mũ tĩ ag tóg mẽg mũ, kĩ tóg ag mĩ e tĩ. Ag mĩ e tĩn kĩ ag tóg mũg ke mũ sir. ⁷ Kĩ Jesus tóg ag to kãtĩg kĩ ag mẽg mũ sir, ã nĩgé tĩ, kĩ tóg ag mĩ: “nĩgnĩ ra,” he mũ. “Mũmẽg tũg nĩ,” he tóg mũ.

⁸ Kÿ ag tóg mĩ ěvãnh mũ, hã ra ag tóg Jesus hã vég mũ. Ti mré vēmén mũ ag ve mãn tũ ag tóg nĩ, kanhkã tá kãmũ ěn ag.

⁹ Kÿ ag tóg pãnónh tá kãre mũ sir. Ag mũn kÿ Jesus tóg ag mÿ: “ker ũ mÿ tó hẽ,” he mũ. “Ājag tÿ ũri nén vég mũ tag tó tũg nĩ ver,” he tóg. “Sÿ iser ja tá vÿn ke kar hã kãmén nĩ,” he tóg, Jesus ti.

¹⁰ Kÿ ti mré mũ tĩ ag tóg ti mÿ: “hã ra Topẽ vĩ to professor ag tóg Elias tó tĩ,” he mũ. “Kãtĩg jé tóg ke mũ nẽji, Cristo kãtĩg ke to hã, Elias ti. Hã mÿ?” he ag tóg mũ, Jesus mÿ.

¹¹ Kÿ tóg ag mÿ: “hÿ,” he mũ. “Kãtĩg jé tóg ke mũ mÿr, nén kar han mãn jé, Elias ti. ¹² Ha mẽ, kãtĩg ti huri. Hã ra ag tóg ti ki kagtĩg ja nÿtĩgtĩ. Hã kÿ ag tóg ti vóg kónãn ja nĩgtĩ, ag tÿ ti vóg kónãn sór kÿ. Hã kÿ ěprã ke fi kósin ěn tóg, inh hã tóg ag tigrĩn jagtar ke mũ gé, ag tÿ inh vóg kónãn ken kÿ,” he tóg, Jesus ti.

¹³ Kÿ ag tóg vãhã ti tÿ nén tó mũ to jykrén mũ, ti mré mũ tĩ ag. “João Batista to ke ja vẽ, ěg kygpég tĩ ěn to ke ja vẽ, hã vÿ: Elias, he mũ, ti tÿ Elias ěn ri ke ja nĩn kÿ,” he ag tóg mũ sir, Jesus mré mũ tĩ ag.

Jesus tÿ kyrũ tÿ há' he

(Mc 9.14-29; Lc 9.37-43a)

¹⁴ Kÿ ag tóg vėnh e ěn tá junjun mũ sir. Kÿ ũ tóg Jesus to kãtĩ mũ, ag kãmĩ ũ. Ti krēm tóg grĩnh ke mũ, ã jakrĩ tÿ, kÿ tóg ti mÿ: ¹⁵ “Senhor,” he mũ. “Inh kósin jagãgtãn nĩ,” he tóg. “Ter tĩ tóg nĩgtĩ, to tóg jagtar tãvĩn tĩ. Kejėn tóg pĩ ki kutẽ tĩ, ter tĩ ěn han kÿ, kejėn tóg goj ki kutẽ tĩ,” he tóg. ¹⁶ “Kÿ sóg ã mré mũ tĩ ag mÿ ti ven ja nĩgtĩ, ag tÿ ti tÿ há' he jé, hã ra ag tóg ti tÿ hẽ ri ke tũ nĩ,” he tóg, Jesus mÿ.

¹⁷ Kÿ Jesus tóg ti mÿ: “ãjag ne tóg inh ki rã há han tũ nĩgtĩ,” he mũ. “Jykre pãno ãjag tóg nÿtĩ,” he tóg. “Kysã tÿ hėn ri ke ki inh hÿn ãjag mré tĩnh ke mũ? Kysã tÿ hėn ri ke ki inh hÿn ãjag to fe tĩnh mũ?” he tóg. “Inh mÿ ti pėre kãtĩg,” he tóg, Jesus ti, ti panh mÿ.

¹⁸ Ag tÿ ti mré kãmũ kÿ Jesus tóg ti jagrẽ mÿ vĩ jũ han mũ sir, ti tÿ ti tovãnh jé. Kÿ tóg vėsÿmėr ti ki kãkutẽ mũ sir, kÿ tóg há' he mũ vãhã, kyrũ ti.

¹⁹ Kÿ Jesus mré mũ tĩ ag tóg ti ki jēmẽ sór mũ. Vyr mÿ ag tóg Jesus mÿ: “ěg ne tóg ti tÿ há' he ja tũ nĩ,” he mũ. “Hẽ ri ken kÿ hÿn?” he ag tóg mũ, Jesus mÿ.

²⁰ Kÿ tóg ag mÿ: “ãjag tÿ inh ki ge tũ nÿtĩ tugnĩn ke vẽ, ãjag tÿ inh vĩ kri fig tũ tigrĩn ke vẽ,” he mũ. “Ha mẽ, ãjag tÿ inh ki ge sĩ han kÿ nÿtĩ ra ãjag tóg pãnónh tag mÿ: “ha tag ra tĩg,” he há nÿtĩnh mũ vẽ. Ājag tÿ pãnónh mré vĩ kÿ tóg tĩg ke mũ vẽ, ha mẽ, ãjag tÿ inh ki ge sĩ nÿtĩ ra. Ka tÿ mostarda fy vÿ sĩ tãvĩ nĩ. Ājag tÿ inh ki ge sĩ nÿtĩ ra, ka tÿ mostarda fy sĩ ěn ri ke nÿtĩ ra tóg há tĩnh mũ vẽ. Kÿ ãjag tóg pãnónh tĩn há nÿtĩnh mũ vẽ. Nén kar han há ãjag nÿtĩnh mũ vẽ, ãjag tÿ inh ki ge kÿ nÿtĩ ra. ²¹ Hã ra vėnh jagrẽ kórég tÿ ge kutēm tóg jagy nĩ. Topẽ mré ěg tóg vĩnh ke mũ, kÿ ěg tóg ti mré vĩ kÿ vãkrenh ke mũ gé, nén ũ ko tũ jé ěg tóg ke mũ, kÿ tóg vãhã kutėnh mũ, vėnh jagrẽ kórég tÿ ge ti,” he tóg, Jesus ti.

Jesus tÿ ã ter ke tó mãn

(Mc 9.30-32; Lc 9.43b-45)

²² Tag kar kÿ ag tóg ga tÿ Galilėia tá nÿtĩ. Kÿ Jesus tóg ag mÿ: “ěprã ke fi kósin vÿ jagtar nĩnh mũ. Inh hã vẽ,” he mãn mũ. “Ěprã ke ag vÿ ãjag tÿ isÿ nén han sór mũ ěn han ke mũ. ²³ Ag tÿ isén ke vẽ. Ag tÿ isén kar kÿ sóg hã ra rĩr mãn mũ, kurã tãgtũ tũg kÿ,” he tóg, Jesus ti. Ag tÿ ti vĩ tag mẽ kÿ tóg ag mÿ e tãvĩ tĩ sir. Fe kaj ag tóg mũ sir, ti mré mũ tĩ ag.

Jesus tÿ imposto kajãm

²⁴ Kÿ ag tóg mũ mãn kÿ (ag tóg) cidade tÿ Cafarnaum tá junjun mũ sir. Kÿ imposto kaja mãg tĩ ag tóg Pedro mÿ vĩ mũ, Topẽ jo ĩn jé imposto mãg tĩ ag. Imposto ěn kaja hã vÿ: jãnkamy régre, he mũ. Pedro mÿ ag tóg: “ãjag Senhor mÿ kajãm tũ nĩgtĩ?” he mũ.

²⁵ Kÿ tóg ag mÿ: “vó, kajãm ti tĩ,” he mũ. Kÿ tóg ã ĩn tá jun mũ sir, Pedro ti. Kÿ Jesus tóg ti mÿ vĩ mũ, imposto to, hã ra Pedro tóg ti mÿ nén ũ tó ja tũ nĩ ver. Kÿ Jesus tóg ti mÿ: “Simão,” he mũ. “Pã'i ag mÿ ã mÿ: “ha imposto kajãm,” he ja tũ nĩ?” he tóg, Jesus

ti. “Tag to jykrén, ha mẽ. Ag mÿ ãjag krẽ mÿ: “kajãm nĩ,” henh ke mũ', ãjag mré ke tũ ag mÿ, vó?” he tóg, Jesus ti, Pedro mÿ. ²⁶ Kÿ Pedro tóg ti mÿ: “ãjag mré ke tũ ag mÿ ag tóg: “kajãm nĩ,” he tĩ,” he mũ. Kÿ Jesus tóg ti mÿ: “hÿ, hã vẽ,” he mũ. “Kÿ ag krẽ hÿn kajãm ke tũ nĩ vẽ. ²⁷ Hã ra ag tóg ãg to jykrén kónãn sór mũ, ãg tÿ kajãm tũ to, ãg tÿ tÿ Topẽ mré ke nÿtĩ ra. Ag tÿ ãg to jykrén kónãn sór kÿ ãg hÿn tóg kajãm ke mũ, Topẽ jo ãn jé imposto ãn, ãg tÿ tÿ Topẽ krẽ nÿtĩ ra, Israel krẽ ke gé. Hã kÿ pirã sygsam tĩg, nig ãn tá. Sygsam kÿ jẽ kÿ ã tóg pirã kãgmĩnh mũ. ã tÿ ãn kãgmĩ vén mũ ãn jẽnky tugnÿm nĩ. Jãnkamy vÿ kãkã nĩ, ti jẽnky kãkã, ã tÿ ãg jo kajãm jé, ã jo, ijo ke gé,” he tóg, Jesus ti. Kÿ Pedro tóg tĩ mũ sir. Jãnkamy vég tóg mũ sir. Kÿ tóg tÿ imposto kajãm tĩ mũ, Pedro ti.

18

Û tÿ ãg kãfór nĩ

(Mc 9.33-37; Lc 9.46-48)

¹ Kejẽn Jesus mré mũ tĩ ag tóg ti mÿ vĩ mũ, kÿ ag tóg: “kejẽn ãg tóg Topẽ tÿ tÿ ãg pã'i nĩ venh ke mũ,” he mũ. “Ëg tÿ ti ve kÿ ã tÿ hẽ nÿ hÿn ãg kãfór kar nĩ?” he ag tóg, Jesus mÿ. ² Kÿ Jesus tóg gĩr ã jé prẽr mũ, kÿ tóg ag kuju kã ti fẽg mũ, gĩr ti. ³ Kÿ tóg ag mÿ tag tó mũ, ha mẽ. “Gĩr ri ke han nĩ, ãjag tÿ Topẽ tÿ tÿ ãg pã'i nĩ ve sór kÿ, ke tũ nĩ (mũ) ra ãjag tóg venh ke tũ nĩ. Hã kÿ ãjag jykre tovãnh nĩ, gĩr jykre han jé,” he tóg. ⁴ “Gĩr pi(jé) ãn sanh kãfór sór nĩ'. Kÿ ti ri ke han nĩ. Jagnẽ kãfór nĩ sór tũg nĩ. “Ûn sĩ vÿ tÿ inh nĩ, gĩr ri ke vÿ tÿ inh nĩ,” hemnĩ, ãjag tÿ kar kÿ tÿ ãn mág kãfór kar nÿtĩ jé, Topẽ tÿ tÿ ãg pã'i nĩn kÿ,” he tóg. ⁵ “ãjag hã vÿ tÿ inh mré ke nÿtĩ. ãjag tÿ inh mré ke nÿtĩn tugnĩn gĩr tÿ ge jẽ'ÿn nĩ, to há nÿtĩmnĩ, isugrĩn. ãjag tÿ isugrĩn ã tÿ ge to há nÿtĩn kÿ ãjag tóg iso há nÿtĩ gé,” he tóg, Jesus ti.

Inferno ki kutẽ mũ vÿ jagy pẽ nĩ

(Mc 9.42-48; Lc 17.1-2)

⁶ “Ûn sĩ tag tóg inh ki rã kÿ jé. Kejẽn ã tóg ãn sĩ tÿ inh vĩ mranh han sór mũ. Ën jykre vÿ kórég tãvĩ nĩ. Ën hã mÿ tóg há nÿnh mũ vẽ, ã tÿ pó mág tÿ ti nunh to sa kÿ goj nig ki ti fón jé, ti tÿ goj ki ter jé. Jagy tãvĩ tóg tĩ, ã tÿ gĩr tÿ isovãnh han kÿ,” he tóg, Jesus ti. ⁷ “Topẽ vÿ ag ve kónãn pẽ han ke mũ, ag tÿ ã tÿ iso há nÿtĩ ag krĩn kónãn kÿ. Ag tÿ ag krĩn kónãn kÿ tóg ag tÿ inh vĩ mranh ha mẽ tĩ. Û tÿ hẽn ri ke ag tóg ag krĩn kónãn tĩ. Hã ra ag tóg to jagãgtar tãvĩ han ke mũ gé. Topẽ vÿ ag ve kónãn pẽ han ke mũ, ag tÿ ã krĩn kónãn kÿ,” he tóg, Jesus ti.

⁸ “ã tÿ nén ã vóg kÿ Topẽ vĩ mranh kÿ ã nĩgnó kym nĩ, ã tÿ ke mãn tũg jé. ã tÿ hẽ kã tá tĩg kÿ Topẽ vĩ mranh kÿ ã pẽn kym nĩ, ã tÿ ke mãn tũg jé. Jagy ti nÿ, ã nĩgnó pir ti, ã tĩg vãnh ti ke gé. ã tÿ nĩgnó régre ra nũgme ki kutẽ kÿ tóg jagy kãfór nĩ, ã tÿ pẽn régre ra inferno ki kutẽ kÿ, pĩ nhyr vãnh ãn ki kutẽ kÿ mÿr. ã tÿ rĩr krÿg ja tũ venh ke tóg hã ra há tĩ,” he tóg. ⁹ “ã tÿ nén ã ki vẽ'i kÿ Topẽ vĩ mranh kÿ ã kanẽ ã nám nĩ, ã tÿ ke mãn tũg jé. Jagy ti nÿ, ã kyvó ti. ã tÿ kanẽ régre ra nũgme ki kutẽ kÿ tóg jagy kãfór nĩ, ã tÿ inferno ki kutẽ kÿ, ã tÿ pĩ nhyr vãnh ãn ki kutẽ kÿ. ã tÿ rĩr krÿg ja tũ ãn ve kÿ tóg hã ra há tĩ,” he tóg, Jesus ti.

Carneiro vãfor to comparação

(Lc 15.3-7)

¹⁰ “Hã kÿ gĩr to é he tũg nĩ. Û tÿ ag ki rĩr mũ ag vÿ kanhkã tá nÿtĩ, mÿr, ha mẽ. Topẽ tÿ jẽnẽ jafã ã ag vẽ, ã tÿ gĩr ag ki rĩr mũ ag. Inh jóg mré ag tóg nÿtĩ, ti vég ag tóg nÿtĩ, ã tÿ gĩr ag ki rĩr mũ ag. Hã kÿ gĩr ag to é he tũg nĩ. ¹¹ Tÿ sóg ãprã ke fi kósin nĩ. Ûn vãgfor mũ ãn ag krenkren han hã jé sóg jun ja nĩ, mÿr, ha mẽ,” he tóg, Jesus ti.

¹² “Tag to jykrén nĩ. Û tóg carneiro tÿ 100 (ke) tÿ mẽg nĩ. Kejẽn ti mẽg pir tóg vãfor ja nĩ. Kÿ tóg ãn pir ãn kanẽnh tĩ mũ sir, ti jãvãnh tĩ tóg mũ sir. Ti mẽg e ãn tóg pãnónh tá nÿtĩ. Ag ré kÿ tóg tĩ mũ sir, ãn vãfor mũ ãn jãvãnh jé, ãn pir ãn ti. ¹³ Kÿ tóg ti vég mũ sir. Kÿ tóg ti mÿ sér pẽ tĩ sir, ha mẽ. Ti mẽg e ãn tóg ti mÿ há nÿtĩ, ã tÿ 99 (ke) ãn. Hã ra ti

tỹ ùn pir ên ve măn kỹ tóg ti mỹ há tãvĩ nĩ sir, ùn e ên tỹ ti mỹ há nỹtĩ kãfór. Kỹ ti fe tóg mrin ke mũ. ¹⁴ Hã kỹ tóg Topẽ mỹ kórég nĩ, ùn sĩ pir vãfor kỹ, ti kren tũ nĩn kỹ, gĩr sĩ pir mỹr. Topẽ pi(jé) tag to há nĩ', inh jóg tỹ kanhkã tá nĩ ti," he tóg, Jesus ti.

Ëg mré ke ù tỹ Topẽ vĩ mranh

¹⁵ “Kejẽn ã régre vỹ Topẽ vĩ mranh mũ. Kỹ ti venh tĩg nĩ, ã tỹ ti mré vēmén jé, to. Vyrmy ti mré vēmén vén nĩ. Hẽn ri ke mũn tóg ã vỹ jẽmẽnh mũ, kỹ ã tóg ti kren han mũ sir, ã régre ti. ¹⁶ Ti tỹ ã vỹ jẽmẽ sór tũ nĩn kỹ ù mỹ: inh mré ti jyvẽn tĩg, hemnĩ, ùn pir mỹ, ke tũ nĩ kỹ ùn régre ag mỹ. Kỹ ti mré vēmén măn nĩ, ag rĩnve, ag tỹ ã tỹ ti mré vỹ mẽ jé. ¹⁷ Ti tỹ ãjag vỹ mẽ sór tũ nĩn kỹ vẽn kar mỹ tómnĩ sir, inh mré ke kar ag mỹ. Ti tỹ vẽn kar vỹ mẽ sór tũ nĩn kỹ ti mré vỹ măn tũg nĩ sir. “Topẽ vỹ ki kagtĩg ti nĩ, fóg kórég ag ri ke ti nĩ,” hemnĩ ti to. “Topẽ vỹ mranh sór ti mũ, governo mỹ jãnkamy mäg tĩ ag ri ke,” hemnĩ ti to. ¹⁸ Ki hã sóg tó mũ, hã kỹ sóg ãjag mỹ ke mũ, ha mẽ. ãjag tỹ tag ki ù mỹ: “kanhkã venh ke tũ ã tóg nĩ,” hen kỹ tóg venh ke tũ nĩ. ãjag tỹ ù mỹ: “kanhkã ve jé ã tóg ke mũ,” hen kỹ tóg venh ke mũ,” he tóg, Jesus ti.

¹⁹ “Ha mẽ, sỹ ãjag mỹ nén tónh ke mũ ti. Kejẽn ãjag kãmĩ ùn régre ag tóg nén ù to jykrén, ag tỹ Topẽ mỹ nén to vỹ jé. Kỹ ag tóg ti mỹ nén to vỹ mũ sir. Tỹ ag êprã ke nỹtĩ, hã ra ag tóg Topẽ mỹ nén ù to vỹ mũ. Kỹ inh jóg tỹ kanhkã tá nĩ tóg ag mỹ han ke mũ, ag tỹ nén to vỹ mũ ên ti,” he tóg. ²⁰ “Kejẽn ãjag kãmĩ ùn régre ag vỹ iso vēmén tĩ, kejẽn ùn tãgtũ ag. Inh jiji tó jé ag tóg vẽnhmãn kỹ nỹtĩ. Kỹ sóg ag mré nĩ nĩ sir, ag tỹ inh vég tũ ra. Hã kỹ Topẽ tóg ag mỹ han ke mũ, ag tỹ ti mỹ nén to vỹ mũ ti,” he tóg, Jesus ti.

Û camarada kórég to comparação

²¹ Kỹ Pedro tóg ti to kãtĩg kỹ ti mỹ: “Senhor,” he mũ. “Kejẽn inh régre tóg vẽn jykre pãno han ja nĩ. Kỹ inh mỹ ti mỹ vẽn pãte fón e han mũ? Vẽn pãte fón tỹ hẽ ri ke nỹ hỹn há nĩnh mũ? Ke tỹ 7 (ke) mỹ há nĩ?” he tóg, Pedro ti, Jesus mỹ.

²² Kỹ Jesus tóg ti mỹ: “vó,” he mũ. “Vẽn pãte fón tỹ 7 (ke) vỹ pir nĩ,” he tóg. “Vẽn pãte fón tỹ 70 tỹ 7 (ke) vỹ pãgsĩ nĩ,” he tóg. ²³ “Ha vé, ù tỹ kanhkã tá nĩ ên tỹ tỹ ãg pã'i nĩ to comparação ù vỹ, sỹ tónh ke tag, ha mẽ. Pã'i mág ri ke ti nĩ. Camarada e ti nĩ, pã'i mág ên ti. Kỹ tóg kejẽn ag tũ ve sór mũ, ag tỹ ti mỹ név(e) ti. ²⁴ Kỹ tóg vég mũ. Hã ra ti camarada ù tóg ti mỹ név(e) mág jẽ, hã vỹ: 10 mil (ke), he mũ. ²⁵ Hã ra ti tỹ ne tỹ kajãm ke tóg tũ tĩ, kỹ ti patrão vỹ ti fón sór mũ, jãnkamy to, ti prũ fi ke gé, ti krẽ ke gé, ti tũ kar mỹr, ti tỹ ã kaja to ã név(e) kajãm jé. ²⁶ Hã ra tóg ti mỹ jagy tĩ, kỹ tóg ti krẽm grĩnh ke kỹ ã jakrĩ tỹ jẽ mũ. Ti krẽm grĩnh ke kỹ tóg ti mỹ: “Senhor,” he mũ. “Ver isovãnh sĩ han, kajãm jé sóg (ke) mũ vãhã,” he tóg.

²⁷ Kỹ ti patrão tóg ti jagãgtãn mũ sir, ã camarada ti, kỹ tóg ti tovãnh mũ. Ti mỹ tóg ti név(e) tỹ tũ' he mũ. “Ha tĩg, jatun mỹ,” he tóg mũ sir. ²⁸ Kỹ ti camarada ên tóg tĩ mũ sir. Kỹ tóg ã mré camarada ù vég mũ sir. Ti ki tóg név(e) sĩ jẽ, cruzeiro pir mỹr. Kỹ tóg ti mäg mũ sir. Ti nunh kã tóg ti kãgũg mũ, kỹ tóg ti mỹ: “inh mỹ kajãm, ã név(e) ti,” he mũ, ùn név(e) mág ja ên ti, ù tỹ ã mỹ név(e) sĩ ên mỹ.

²⁹ Kỹ tóg ti krẽm grĩnh ke kỹ ã jakrĩ tỹ jẽ mũ. Kỹ tóg ti mỹ: “ver isovãnh, vãhã sóg kajãm kãn ke mũ ha,” he mũ.

³⁰ Hã ra tóg mẽ jãvãnh nĩ. Kỹ tóg vỹse jafã kãtã ti fón mũ sir, ti tỹ ti mỹ kajãm jé, ti név(e) ti. ³¹ Hã ra ti mré camarada ù ag vỹ vég mũ, kỹ tóg ag mỹ e tĩ. Kỹ ag tóg ãjag patrão mỹ tó kãn mũ sir, ti tỹ nén han mũ ti. ³² Kỹ ti patrão tóg ti jé prẽr mũ sir. Kỹ tóg ti to jũ mũ. “Jykre kórég pẽ han ã,” he tóg. “Ã név(e) mág tỹ sóg tũ' he vỹ, ã tỹ inh mỹ to vĩn kỹ. ³³ Kỹ ã tỹ ã mré camarada ên jagãgtãn ke vỹ vỹ, isỹ ã jagãgtãn ri ke,” he tóg. ³⁴ Kỹ tóg ti to jũ mág han mũ sir, ti patrão ti. Kỹ tóg ti ség mũ. Ag mỹ tóg: “ha ti vóg kónãn,” he mũ gé, ti tỹ ã patrão mỹ kajãm kãn jé, ti név(e) mág ên ti,” he tóg, Jesus ti.

³⁵ “Hã han jé tóg ke mũ, inh jóg tỹ kanhkã tá nĩ ti, ãjag tỹ ãjag régre ag mỹ vẽn pãte fón pẽ han sór tũ nĩn kỹ, ag tỹ kygnẽ ja ti,” he tóg, Jesus ti.

19

Ĕg tỹ ěg prũ fón ke tũ

(Mc 10.1-12)

¹ Kĩ Jesus tóg tó kãn ja nĩ, ti tỹ ag mỹ nén tó sór mũ ti. Kĩ tóg Galiléia tá kãkutẽ kỹ goj tỹ Jordão mãra tĩ mũ sir. Israel ag jamã ù vẽ gé. ² Kĩ ùn e ag tóg ti nón mũ mũ. Kĩ tóg tá ag kytãg kãn mũ sir.

³ Kĩ Fariseu ag tóg ti tá junjun mũ gé sir. Ag tỹ ón kỹ ti vême mẽ sór vễ, vênh prũ ke fón to. Kĩ ag tóg ti mỹ: “mỹ ěg tỹ nén ù ù to ěg prũ fag fón jé há nĩ?” he mũ.

⁴⁻⁵ Kĩ tóg ag mỹ kãmén mũ. “Topẽ vĩ rá ki vemnĩ,” he tóg. “Tá tóg rán kỹ nĩ, Topẽ tỹ nén han mũ ti. Ti tỹ nén kar han ve ki tóg ti mré fi han. Hã kỹ tóg tag tó mũ, ha mẽ. “Hã kỹ ùn gré tóg ã prũ fi to ã panh ré kỹ tĩnh mũ, ã mỹnh fi ré kỹ ke gé. ã prũ fi mré tóg tĩnh mũ. Fi mré tóg tỹ ùn pir nĩ sir, ã prũ fi mré,” he tóg, Topẽ ti. ⁶ Hã kỹ fag tóg tỹ ùn pir nỹtĩ. Fag pi(jé) tỹ ùn régre nỹtĩ'. Hã kỹ fag tỹ vênh kãpãm tũg nĩ. Topẽ tỹ fag tỹ ùn pir han vễ mỹr,” he tóg, Jesus ti.

⁷ Kĩ ag tóg ti mỹ ke mãn mũ. “Hã ra Moisés tóg ěg mỹ: “fi mỹ vênh rá nĩm kar kỹ fi fón nĩ,” he ja nĩ. Ti tỹ ne jé ěg mỹ tag tó ja nẽ?” he ag tóg mũ, Jesus mỹ.

⁸ Kĩ tóg ag mỹ: “hỹ,” he mũ. “Tag tó ja ti nĩ, ãjag mỹ, ãjag tỹ vênh kanhrãn sór tũ nỹtĩn kỹ, hã kỹ tóg ãjag mỹ: ha fi fón ge, he ja nĩ. Hã ra Topẽ tóg tag han ja tũ nĩ, ti tỹ nén kar han ve ki. ⁹ Hã kỹ sóg ãjag mỹ ke mũ. ãjag tỹ ãjag prũ fi fón kỹ ù fi tỹ prũg mãn kỹ ãjag prũ tũ fi vễ sir, ha mẽ. ãjag tỹ fi tỹ ù mré nỹ tũgrĩn fi fón kỹ tag hã ne pãgsĩ nỹ,” he tóg, Jesus ti.

¹⁰ Kĩ ti mré mũ tĩ ag mỹ tóg e tĩ, ti vĩ tag, hã kỹ ag tóg ti mỹ: “ge nĩn kỹ tóg tỹ ù nỹ, ěg prũg kỹ,” he mũ. “Ĕg tỹ ěg prũ fi fón sór mũ ra fi fón tũ nĩn kỹ tóg vênhmỹ nỹ, kỹ ěg hỹn prũg sór tũ nĩ,” he ag tóg.

¹¹ Kĩ tóg ag mỹ: “ùn pipir ag tóg tag han ke mũ,” he mũ. “Topẽ tóg ù ag mỹ: ha prũg tũg, henh ke mũ, ěn ag hã vĩ prũg ke tũ nĩ,” he tóg. ¹² “Û ag tóg kurĩ nỹtĩ, ag mur mũ kã. Kỹ ù ag tóg kurĩ nỹtĩ gé, ag tỹ ag grãfy kym kỹ. Kỹ ù ag tóg kurĩ ri ke nỹtĩ gé, ag tỹ Topẽ to jykrén kỹ, ag tỹ ù tỹ kanhkã tá nĩ ěn tũgrĩn prũg sór tũ nỹtĩn kỹ. Û tỹ to jykrén mũ ěn jé to jykrén,” he tóg, Jesus ti.

Jesus tỹ gĩr ag to há nĩ

(Mc 10.13-16; Lc 18.15-17)

¹³ Kĩ fag tóg gĩr tatĩ kãmũ mũ, ti tỹ ã nĩgé tỹ ag mẽ jé, ti tỹ ag to Topẽ mré vĩ jé. Hã ra Jesus mré mũ tĩ ag tóg fag to jũ mũ, ù tỹ ag tatĩ kãmũ mũ fag to. ¹⁴ Hã ra Jesus tóg ag mỹ: “vĩ tũg nĩ, gĩr ag mỹ,” he mũ, “gĩr ag tỹ iso kãmũ kamẽg tũg nĩ,” he tóg. “Û tỹ ge hã vĩ ù tỹ kanhkã tá nĩ ěn tỹ tỹ pã'i nĩ ěn krẽm nỹtĩ nĩ,” he tóg. ¹⁵ Kĩ tóg ag mẽgmẽ kãn mũ sir, ã nĩgé tỹ. Ag mẽgmẽ kãn kỹ tóg tá kãkutẽ mũ sir.

Kyrũ rico kãme

(Mc 10.17-31; Lc 18.18-30)

¹⁶ Kĩ vãhã ù tóg ti tá jun mũ sir. Kĩ tóg ti mỹ: “Senhor,” he mũ. “Hã ã tóg jẽ,” he tóg. “Sỹ inh rĩr krỹg ja tũ venh há tóg tĩ. Ti ve jé inh hỹn vênh jykre há tỹ hẽ ri ke han ke mũ?” he tóg.

¹⁷ Kĩ Jesus tóg ti mỹ: “ã tỹ ne jé inh ki vênh jykre há jẽmẽ sór nẽ?” he mũ. “Ûn pir tóg há nĩ, ha mẽ. Ti tỹ ěg jyvẽn ěn ki króm nĩ, ã tỹ rĩr krỹg ja tũ ve sór kỹ,” he tóg.

¹⁸ Kĩ tóg ti mỹ: “ti tỹ ěg jyvẽn tỹ hẽ ri ke nẽ?” he mũ. Kĩ Jesus tóg ti mỹ: “ti tỹ ěg jyvẽn tag hã vễ, ha mẽ: ù tén tũg nĩ, ã prũ tũ fi mré nỹ tũg nĩ, nén ù péju(g) tũg nĩ, ù to ón tũg nĩ, ¹⁹ ã nỹ mré ã jóg kamẽg nĩ, ã régre ki rĩr há han nĩ, ã tỹ vênh ki rĩr há ri ke han nĩ, ã régre ki,” he tóg, Jesus ti.

²⁰ Kĩ kyrũ tóg ti mỹ: “tag kar ki sóg króm tĩ,” he mũ. “Kỹ ne nỹ hỹn ver inh mỹ tũ tĩ'?” he tóg. ²¹ Kĩ Jesus tóg ti mỹ: “ã tỹ vênh jykre há han sór kỹ tag han nĩ, ha mẽ,” he mũ. “Ã tũ kar vãm tĩg. Kỹ ùn jagãgtar ag mỹ vin, jãnkamy ti, kỹ ã tóg kanhkã tá tũ mág nĩ sir.

Kar kätig nĩ, ã tỹ inh mré tĩg jé,” he tóg, Jesus ti. ²² Kyrũ ên tỹ ti vĩ tag mẽ kỹ tóg fe jag han kỹ tĩ mũ sir. Ti tũ vỹ e nỹtĩ, hã kỹ tóg ti mẽ vẽnhmỹ tĩ.

²³ Kỹ Jesus tóg ã mré mũ tĩ ag mẽ kãmén mũ sir. “Sỹ ke há vễ, hã kỹ sóg ke mũ. Jagy ti nỹ, ùn rico tỹ ù tỹ kanhkã tá nĩ ên tỹ tỹ êg pã'i nĩ venh ke ti,” he tóg. ²⁴ “Hã kỹ sóg ãjag mẽ ke măn mũ. Cavalo pãnĩ sór vỹ prėj nor fĩn kutẽ tũ nĩ mỹr,” he tóg. “Ti tỹ fĩn kutẽ há nĩ ra tóg ver jagy tĩ vễ, ùn rico tỹ ù tỹ kanhkã tá nĩ ên tỹ tỹ êg pã'i nĩ venh ke ti,” he tóg, Jesus ti.

²⁵ Kỹ tóg ti mré mũ tĩ ag mẽ e tĩ, ti vĩ tag. Kỹ ag kanẽ tóg jur mũ. “Kỹ ù hỹn kren ke tũ nĩ,” he ag tóg. ²⁶ Kỹ Jesus tóg ag ki êvãnh mũ, kỹ tóg ag mẽ: “êprã ke ag vỹ vėsóg ki tá jun ke tũ nĩ,” he mũ. “Topẽ hã tóg ãjag tỹ tá jun han ki kanhró nĩ, ti tỹ nén ù kar tỹ hẽ ri ken há nĩn kỹ,” he tóg, Jesus ti.

²⁷ Kỹ Pedro tóg ti mẽ: “ha vé,” he mũ. “Nén kar ré kỹ êg mũ mũ, ã mré. Tag to êg hỹn ne venh ke mũ?” he tóg.

²⁸ Kỹ Jesus tóg ag mẽ: “sỹ ke há vễ, hã kỹ sóg tó mũ,” he mũ. “Inh mré ãjag tóg mũ mũ. Tỹ sóg êprã ke fi kósın nĩ. Kejẽn sóg inh nĩgia kri nĩnh mũ, isỹ vẽn kar jykre tugnỹm jé. Sĩnvĩ inh nĩnh mũ, kurã ên kã. Nén kar han măn jé sóg ke mũ, kurã ên kã. Kỹ ãjag tóg ãjag nĩgia kri nĩgnĩg kỹ nỹtĩnh mũ gé, nĩgia tỹ 12 (ke) kri, ãjag tỹ povo tỹ Israel kar jykre tugnỹm jé, povo tỹ 12 (ke) tag ag jykre,” he tóg. ²⁹ “Jó ù tóg isugrĩn ã jamã ré kỹ tĩ mũ, ã kãke, ã jãvy, ã ve, ã panh, ã mỹnh, ã japỹ ré kỹ tóg tĩ mũ, inh jykre tigrĩn. Ên vỹ tóg vẽn kato ã tỹ êprã ré kỹ tĩg ja ên e ri ke venh ke mũ, tag ki, êprã. Kỹ tóg rĩr krỹg ja tũ ên venh ke mũ gé,” he tóg. ³⁰ “Jãvo tag ki ùn mág ù ag kãsir nỹtĩnh ke vễ, tá tére kỹ, kỹ tag ki ùn kãsir ù ag tỹ tỹ ùn mág nỹtĩnh ke vễ, tá tỹ pã'i nĩnh ke vễ,” he tóg, Jesus ti. Ti tỹ ag mẽ kanhkã jykre tó vễ.

20

Uva ki rãnrãj tĩ ag to comparação

¹ Kỹ Jesus tóg ag mẽ: “ù tỹ kanhkã tá nĩ ên tỹ tỹ êg pã'i nĩ vỹ ge nĩ, ha mẽ,” he mũ, to comparación han kỹ. “Patrão ri ke tóg nĩ. Kusã ki tóg tĩ mũ, 6 horas ki, camarada ag jãvãnh jé, ag tỹ ti jakré ki rĩr jé. ² Kỹ tóg ù ag vэг mũ sir. Ag mré tóg vẽn rãnrãj kaja to jykren mũ, hã vỹ: jãnkamy pir, he mũ, por dia kaja ti. Kỹ tóg ag mẽ: “ha ki rĩr mũjêg,” he mũ sir. ³ Kỹ ag tóg mũ mũ. Hora tãgtũ tũg kỹ, 9 horas ki tóg tĩg măn mũ, ù ag jãvãnh jé gé. Kỹ tóg ù ag vэг mũ gé sir. Véké ag tóg êmã kaju tá nỹtĩ, rãnrãj tũ kỹ. ⁴ Kỹ tóg ag mẽ: “inh mẽ inh jakré ki rĩr mũjêg,” he mũ gé. “Kajãm jé sóg ke mũ, ti kaja tỹ,” he tóg. ⁵ Kỹ ag tóg mũ mũ.

Hora tãgtũ ù tũg kỹ, meio dia ki tóg ù ag jãvãnh tĩg măn mũ, 3 horas ki tóg tĩg măn mũ gé. Ag ve kỹ tóg ag mẽ ke mũ gé, kỹ ag tóg mũ mũ gé, ti jakré ki rĩr jé. ⁶ Vãhã tóg rãkãnh mũ sir. 5 horas ki tĩg măn kỹ tóg ù ag vэг mũ gé, véké jêgiê kỹ nỹtĩ ag. Kỹ tóg ag mẽ: “ãjag tỹ ne jé rãnrãj tũ nĩ nê?” he mũ. “Kurã kar ki ãjag tóg ki nỹtĩ, rãnrãj tũ nỹtĩ ra,” he tóg ag mẽ. ⁷ Kỹ ag tóg ti mẽ: “hã ra ù tóg êg mẽ: ha inh rãnrãj han, he ja tũ nĩ,” he mũ. Kỹ tóg ag mẽ: “ha inh jakré ki rĩr mũjêg ge,” he mũ sir. Kỹ ag tóg mũ mũ gé.

⁸ Kutỹ kỹ ag patrão tóg ã tũ ki rĩr tĩ ên mẽ: “ha ag jé prěr,” he mũ, 6 horas da tarde ki. “Ag mẽ ti kaja ti nĩm,” he tóg. “Ùn tỹ rãkãnh kỹ kãmũ mũ ag mẽ nĩm vén, kar kỹ ù tỹ kusã ki kãmũ mũ ag mẽ nĩm rén,” he tóg ti mẽ. Kỹ tóg ke mũ, ti tũ ki rĩr tĩ ti.

⁹ Kỹ ù tỹ rãkãnh kỹ junjun mũ ag vỹ ãjag kaja ti măn mũ, hã vỹ: jãnkamy pir, he mũ. Ag rãnrãj sĩ ra ag tóg por dia kaja vэг mũ sir. ¹⁰ Kỹ ù tỹ kusã ki rãnrãj mũ ag tóg to jykren mũ. “Ti hỹn êg mẽ ti kaja kãfór han ke mũ, êg tỹ kurã kar ki rãnrãj kỹ,” he ag tóg mũ, to jykren kỹ. Hã ra tóg ag mẽ jãnkamy pir ên nĩm mũ gé sir, por dia kaja ên. ¹¹ Ag tỹ jãnkamy ên măn kỹ ag tóg ti to jũ mũ, ãjag patrão to. ¹² Kỹ ag tóg ti mẽ vĩ mũ. “Tag ag vỹ hora pir ki rãnrãj, jãvo ã tóg ag mẽ êg kaja ri ke han. Kurã kar ki êg tóg rãnrãj mỹr, to êg ron, ti rỹ jagy ra êg tóg to krónh ke ja tũ nĩ,” he ag tóg, ãjag patrão mẽ.

¹³ Kỹ tóg ag kãmĩ ù mẽ ke mũ, ag patrão ti. “Sỹ ã ki kygnê pijé’,” he tóg. “Inh mré ã tóg jãnkamy pir to jykren ja nĩ, hã kỹ sóg ã mẽ nĩm mũ, jãnkamy pir ti. ¹⁴ Kỹ ã tũ măn

kỹ tĩg. Hã ra sóg ag mĩ nĩm sór mũ gé, sỹ ã mĩ nĩm ja ẽn ri ke. ¹⁵ Isũ vễ mỹr, jãnkamy ti, kỹ sóg sỹ tỹ nén han sór mũ ẽn han mũ. ã mĩ jũ', isỹ ag mĩ vĩ há han to?" he tóg ti mỹ, patrão ti.

¹⁶ Hã kỹ ẽgno tá kãmũ ag vĩ ùn kãmũ vén mũ ag ri ke nỹtĩnh mũ, tãpry kỹ, jãvo ùn kãmũ vén mũ ag vĩ ẽgno tá kãmũ mũ ag ri ke nỹtĩnh mũ gé," he tóg, Jesus ti.

Jesus tỹ ã ter ke tó mãn

(Mc 10.32-34; Lc 18.31-34)

¹⁷ Kỹ Jesus tóg Jerusalém ra tĩg sór mũ. Kỹ tóg vurmỹ ù tỹ 12 (ke) ẽn ag mré vēmén mũ. Ag tỹ ã mré ẽpry jagma mũn kỹ tóg ag mré vēmén mũ, ag tỹ ẽmĩn jagma mũn kỹ. ¹⁸ "Ha vé," he tóg. "Jerusalém ra ẽg tóg mũ mũ," he tóg. "Èprã ke fi kósin ẽn vĩ jagtar ke mũ. Inh hã vễ. Topẽ tũ ki rĩr tĩ to pã'i ag tóg ãjag tỹ isỹ nén han sór mũ ẽn han ke mũ, Topẽ vĩ to professor ag ke gé. Ag tỹ iso: "ter jé tóg ke mũ," henh ke vễ. ¹⁹ Kỹ ag tóg fóg ag mỹ inh fẽg ke mũ sir, ẽn ag tỹ iso é he jé, ag tỹ inh mrãnmrãn jé, ag tỹ ka to isa jé. Kurã tãgtũ ki sóg hã ra rĩr mãn ke mũ," he tóg, Jesus ti.

Ûn régre ag tỹ tỹ ùn mág nỹtĩ sór

(Mc 10.35-45)

²⁰ Kỹ Zebedeu krẽ ag mỹnh fi tóg Jesus venh kãtĩ mũ, fi krẽ ag mré. Ti krẽm fi tóg mũg ke mũ, fi tỹ ti mỹ nén (ũ) to vĩ sór kỹ. ²¹ Kỹ tóg fi mỹ: "ã tỹ ne to vĩ sór nẽ?" he mũ. Kỹ fi tóg ti mỹ: "kejẽn ã tóg tỹ pã'i nĩnh mũ," he mũ. "Kỹ inh krẽ tag ag tỹ ã rã hã nỹtĩnh há tóg tĩ, ù tỹ ã pẽgja tá nĩ jé, kỹ ù tỹ ã jakãnh tá nĩ jé," he fi tóg, ti mỹ.

²² Kỹ Jesus tóg ag mỹ: "ãjag tỹ nén to vĩ mũ ki kagtĩg ãjag tóg nỹtĩ," he mũ. "Jagy ti nỹ. ãjag mỹ inh ri kén jagtar sór mũ'? ãjag mỹ tovãnh ke tũ nĩ'?" he tóg. Kỹ ag tóg ti mỹ: "hỹ," he mũ. "Tovãnh ke tũ ẽg nĩ," he ag tóg, ti mỹ. ²³ Kỹ tóg ag mỹ: "hỹ, jagãgtar jé ãjag tóg ke mũ, inh ri kén," he mũ. "Hã ra isũ tũ vễ, sỹ ãjag mỹ: hej, he ti," he tóg. "Ha inh pẽgja tá nĩ, henh ke tũ sóg nĩ. Ha inh jakãnh tá nĩ, henh ke tũ sóg nĩ gé, isũ tũ vễ. Topẽ tỹ ùn mỹ: ha ti rã hã nỹtĩ, henh ke mũ ẽn ag hã tỹ inh rã hã nỹtĩnh ke vễ," he tóg, Jesus ti.

²⁴ Hã ra ù tỹ 10 (ke) ag tóg mễg mũ, ùn régre ag tỹ Jesus mỹ tag to vĩ ja ti. Kỹ ag tóg ag to jũ mũ. ²⁵ Hã ra Jesus tóg ag jé prẽr kãn mũ, kỹ tóg ag mỹ: "fóg ag pã'i ag jykre ki kanhró ãjag tóg nỹtĩ," he mũ. "Vẽn kar jẽgnẽg ag tóg tĩ mỹr, kỹ ag mág ag tóg vẽn kar mỹ: gemnĩ, ge tũg nĩ, he tĩ, vĩ tar han kỹ," he tóg. ²⁶ "Ag ri ke han tũg nĩ. ãjag mỹ tỹ ùn mág nỹtĩ sór mũ'? Kỹ tỹ jagnẽ camarada ri ke nỹtĩmĩ, jagnẽ tũ ki rĩr kỹ. ²⁷ ãjag mỹ tỹ pã'i nỹtĩ sór mũ'? Kỹ tỹ jagnẽ krẽm ke nỹtĩmĩ, tỹ ùn kãsir nỹtĩmĩ. ²⁸ Hã kỹ sóg camarada tũ nĩ gé. Sỹ tỹ camarada nĩ jé sóg kãtĩg, sỹ ãjag ki rĩr jé. Tỹ sóg ẽprã ke fi kósin nĩ. Hã kỹ sóg vẽn kar jagfy ter ke mũ, sỹ ag krenkren han jé," he tóg, Jesus ti.

Jesus tỹ ùn kyvó ag tỹ há' he

(Mc 10.46-52; Lc 18.35-43)

²⁹ Hã ki ag tóg Jerusalém ra mũ mũ. Kejẽn ag tóg cidade tỹ Jericó fĩn rãm kỹ ag tóg tá pa mũ, hã ra ù tỹ hẽn ri ke ag tóg Jesus nón mũ mũ. ³⁰ Ẽpry ẽn tá, ẽmĩn ẽn tá ùn kyvó ag tóg nĩgnĩ kỹ nỹtĩ nĩ, ùn régre ag. Vãhã ag tóg Jesus tỹ jagma tĩg mễg mũ. Kỹ ag tóg ti jé prẽr mũ. "!.Senhor.!" he ag tóg. "!.Davi kósin', ẽg jagãgtãn ra..!" he ag tóg. ³¹ Kỹ ag tóg ag to jũgũ mũ, ti nón mũ ù ag. "Mẽ kã nỹtĩ," he ag tóg mũ. Hã ra ag tóg prẽr mãn', prẽr mãn' he mũ, jamã hár(a). "!.Senhor, Davi kósin', ẽg jagãgtãn ra..!" he ag tóg mũ.

³² Kỹ Jesus tóg krỹg he mũ, kỹ tóg ag jé prẽr mũ. Kỹ tóg ag mỹ: "ne to ãjag vĩ, sỹ ãjag mỹ han jé?" he mũ. ³³ Kỹ ag tóg ti mỹ: "ẽg tỹ ẽvãnh há tóg tĩ," he mũ. ³⁴ Kỹ Jesus tóg ag jagãgtãn mũ sir. Ag kanẽ mễgmễg tóg mũ sir. Kỹ ag tóg ẽvãnh há han mũ sir. Ti nón ag tóg mũ mũ sir.

Jesus tỹ Jerusalém tá jun

(Mc 11.1-11; Lc 19.28-40; Jo 12.12-19)

¹ Ag mün ky ag tóg Jerusalém kakó tá junjun mü, emã tÿ Betfagé tá, krĩ tÿ Oliveiras tá. Ky Jesus tóg ã mré mü tĩ régre ag jëgnëg mü, emã ên ra. ² Ky tóg ag mÿ: “emã ên ra mÿjëg, êg jo emã nĩ ên ra,” he mü. “Tá ãjag tóg burrica fi venh mü. Se ky fi jë. Fi kósin vÿ fi mré jë nĩ. Ên fi kavãn ky fi pére kãmümnĩ. ³ Hën ri ke mün ag tóg ãjag mÿ vĩ sór mü, fi to. Ky ag mÿ: “êg Senhor vÿ fi ve sĩ han sór mü. Kãnhmar tóg fi jënë mãn mü,” hemnĩ,” he tóg, Jesus ti.

⁴ Hã ra tóg rán ky nĩ gé, tag. Topë vĩ tó tĩ tóg tag rán ja nĩ, ha mẽ. ⁵ “Sião tá ke fag mÿ tag tómnĩ, ha mẽ. Hã vé, ã pã'i tÿ rei tóg ã ki jun ke mü, hemnĩ. Vënh kar to tóg fe há nĩ, jũ vãnh nĩn ky, ã Senhor ti. Burrica kri tóg nĩ nĩ, fi kósin kri, êg tu tĩ ên fi kósin kri mÿr,” he tóg, Topë vĩ tÿ rán ky nĩ ki. Hã ra tóg ge nĩ.

⁶ Ky ti mré mü tĩ ag tóg mü mü, burrica fi mãn jé. ⁷ Fi pére ag tóg kãmü mü, fi kósin mré. Ky ag tóg ãjag kur tÿ kri vãm mü, ky tóg kri nĩ mü. ⁸ Ky vënh e ên ag tóg ãjag kur tÿ êpry kri kugién mü, emĩn kri. Ky ù ag tóg ka féj kre ky êpry kri vãm mü sir. Ag tÿ ti jamĩn sĩnvĩ han sór vë. ⁹ Ky ù ag tóg ti jãmĩ mü mü, jo ù ag ti nón mü mü. Ên ag tóg prënprër mü sir. “!..Viva, Davi kósin..!” he ag tóg mü. “!..Sér tóg tĩ, pã'i vÿ êg tá jun, êg Senhor mág tÿ ti jënë ky..! !..Topë tá tóg kãtig, ù tÿ kynhmÿ nĩ ên tá, viva..!” he ag tóg, prënprër ky.

¹⁰ Hã ki ag tóg Jerusalém tá junjun mü. Ky tá ke kar ag vÿ ti venh kãmü mü. Ag mÿ tóg e tĩ, ky ag tóg ti to: “ũ nê?” he mü. ¹¹ Ky ti mré kãmü mü ag vÿ ag mÿ: “Topë vĩ tó tĩ ên vë,” he mü. “Jesus vë, Nazaré tá ke ên vë, Galiléia tá ke ên,” he ag tóg mü sir.

Jesus tÿ Topë jo ãn krëm ag pan

(Mc 11.15-19; Lc 19.45-48; Jo 2.13-22)

¹² Ky Jesus tóg Topë jo ãn kãra rã mü. Ky tóg tá ke ag pan kãn mü sir, nén vender he tĩ ag, nén comprar he tĩ ag ke gé. Topë jo ãn krëm ag tóg negociar he tĩ, jãnkamy trocar he ag tóg tĩ gé. Ag tÿ nén kri vin jafã tÿ tóg vyryn ke mü sir. Sórag vender he tĩ ag nĩgnĩ jafã tÿ tóg vyryn ke mü gé sir. ¹³ Ag mÿ tóg: “Topë vĩ rá to jykrén nĩ,” he mü. “Tag vÿ rán ky nĩ, ha mẽ. “Inh ãn jiji vÿ tÿ Topë mré vĩ jafã nĩ,” he tóg, Topë vĩ rá ki. Hã ra ãjag tóg Topë mré vĩ jafã tag krëm nén kar pigu(g) mügtĩ, ky tóg bandido ag jamã ri ke nĩ sir,” he tóg, Jesus ti. Ag pan ky tóg ke mü, Jesus ti.

¹⁴ Ky ùn kyvó ag tóg ti to junjun mü sir, ùn kónhgrĩ ag ke gé, ti tÿ Topë jo ãn krëm jën ky. Ky tóg ag tÿ há' he kãn mü sir. ¹⁵ Hã ra Topë tũ ki rĩr tĩ ag tóg tá nÿtĩ, Topë vĩ to professor ag ke gé. Ti tÿ ag tÿ há' he vég ag tóg mü. Gĩr ag vĩ mëg ag tóg mü gé. Topë jo ãn krëm ag tóg nÿtĩ, gĩr ag, ky ag tóg Jesus mÿ prënprër mü. “!..Viva, Davi kósin..!” he ag tóg mü, prënprër ky. Ky pã'i ag tóg jügjũ mü, Jesus to. ¹⁶ Hã ky ag tóg ti mÿ vĩ mü. “Ã mÿ ag prënprër mëg tũ?” he ag tóg. Ky Jesus tóg ag mÿ: “vó,” he mü. “Hã ra Topë vĩ rá to jykrén nĩ,” he tóg. “Ûn kãsir ag vÿ iso vĩ há han tĩ,” he tóg, Topë vĩ ki. “Ûn pafa mü ag vÿ inh mÿ vĩ há pë han tĩ. Ã hã ne tag han', ùn kãsir ag tÿ inh mÿ vĩ há han jé,” he tóg, Topë mÿ, Topë vĩ tÿ rán ky nĩ ki,” he tóg, Jesus ti.

¹⁷ Tag tó ky tóg ag ré ky tĩ mü sir. Cidade tá tóg kãkutë mü, emã tÿ Betfagé ra tĩg jé. Tá tóg sir nũr mü.

Ka tÿ figueira tóg

(Mc 11.12-14, 20-24)

¹⁸ Tÿ vaj ky kusã ki tóg cidade ra tĩg mãn mü. Ã tĩg ky tóg kókĩr mü. ¹⁹ Ky tóg ka tÿ figueira vég mü sir, ky tóg ra tĩ mü, ti kanë ko jé. Hã ra tóg kanë tũ nĩ. Féj tãvĩ tóg jë, ky tóg ti mÿ vĩ mü. “Kanë han mãn ke tũ ã nĩ ha,” he tóg mü. Ky tóg tóg mü sir vësÿmér, ka ti. ²⁰ Ky ti mré mü tĩ ag tóg vég mü sir, ti tóg mü ti. Ky tóg ag mÿ e tĩ. “Vësÿmér tóg tóg ja nĩ,” he ag tóg. “Ti hë ri ké?” he ag tóg.

²¹ Ky Jesus tóg ag mÿ kãmén mü sir. “Ki hã sóg tó mü, hã ky sóg ke mü,” he tóg. “Inh ri ke han jé ãjag tóg ke mü. Isÿ ka tÿ figueira mÿ: “tóg ra,” hen ky tóg tóg ja nĩ. Inh vĩ tag ri ke han jé ãjag tóg ke mü, ãjag tÿ inh ki ge há han ky. Hã ra to: “Topë mÿ inh vĩ mëg mü vÿ?” he tóg nĩ. “Hÿ mÿ vÿ?” he tüg nĩ. Ky ãjag tÿ kejën pãnónh mÿ: ha kutë, goj nig

ki, hen kŷ tóg kutê mũ, ãjag tŷ ti kutênh ke to: “hŷ mŷ vŷ?” he tũ nĩn kŷ. ²² Kŷ ãjag tŷ Topê mŷ nén ù to vĩn kŷ to: “han jé tóg ke mũ,” hemnĩ. Kŷ tóg ãjag mŷ han mũ, ãjag tŷ ti mŷ nén to vĩ mũ ên ti,” he tóg, Jesus ti.

Jesus tŷ ù tŷ ã jêñêg mũ tó tũg

(Mc 11.27-33; Lc 20.1-8)

²³ Kŷ tóg cidade tá jun kŷ (tóg) Topê jo ìn kàra rã mãn mũ sir. Kŷ Topê tũ ki rĩr tĩ to pã'i ag vŷ ti to kãmũ mũ, kófa ag mré hã. Ag tŷ ti ki jêmê sór vê, hã kŷ ag tóg ti mŷ: “ù nŷ ã mŷ: tag han nĩ, hé?” he mũ. “Û nŷ ã jêñê?” he ag tóg mũ, Jesus mŷ.

²⁴ Kŷ Jesus tóg ag mŷ: “ãjag ki sóg jêmênh ke mũ gé, vênh kato,” he mũ. “Ãjag tŷ inh mŷ tó há han kŷ sóg ãjag mŷ ù tŷ inh jêñêg mũ tónh ke mũ gé,” he tóg. ²⁵ “João vŷ ag kygpég tĩ ja nĩgtĩ. Kŷ ti mŷ kanhkã tá vênh jykre han ja nĩgtĩ, êprã vênh jykre vó? Û nŷ ti jêñê?” he tóg, Jesus ti.

Kŷ ag tóg ti vĩ to jykrén mũ jagnê mré. “Ëg tŷ ti mŷ: Topê tŷ ti jêñê ja vê, hen kŷ tóg êg mŷ: kŷ ãjag tŷ ne jé ti vĩ kri fig tũ nĩ nê? henh ke mũ. ²⁶ Ëg tŷ hã ra ti mŷ: êprã ke jykre ja vê, hen kŷ êg tóg vênh kar kato tê mũ sir. Ag kar vŷ João to: Topê vĩ tó tĩ pã ja vê, he tĩ. Kŷ êg tóg ag kamêg mũ, vênh e ên,” he ag tóg mũ, jagnê mŷ, pã'i ag. ²⁷ To jykrén kŷ ag tóg Jesus mŷ: “êg pi(jé) João jykre ki kanhró nŷtĩ,” he mũ. Ón kŷ ag tóg ke mũ. Kŷ tóg ag mŷ: “kŷ sóg ãjag mŷ tónh ke tũ nĩ gé, ù tŷ inh jêñêg mũ ti,” he mũ. Á kato tê mũ ag mŷ tóg ke mũ, Jesus ti.

Ûn krê régre to comparação

²⁸ Kŷ tóg ag kanhrãn kŷ ag mŷ: “tag to jykrén nĩ, ha mẽ,” he mũ sir. “Û tóg kósin régre nĩ. Kejên tóg ùn sanh to tĩg kŷ ti mŷ: “inh kósin,” he mũ. “Ûri inh jakré tugnŷgnŷm tĩg,” he tóg. ²⁹ Kŷ tóg ã panh ti mŷ: “vó,” he mũ. Kar kŷ tóg to jykrén mãn kŷ (tóg) tĩ mũ sir, êpŷ ra. ³⁰ Kŷ ti panh tóg ti jãvy mŷ ke mũ gé sir. “Ûri inh jakré tugnŷgnŷm tĩg,” he tóg mũ gé. Kŷ ti jãvy tóg: “hej,” he mũ, ã panh ti mŷ. Hã ra tóg tĩ tũ nĩ. ³¹ Kŷ ù tŷ hê nŷ ti panh vĩ ki króm hŷn?” he tóg, Jesus ti. Kŷ ag tóg ti mŷ: “ùn sanh ti,” he mũ. Kŷ Jesus tóg ag mŷ: “hŷ, hã vê,” he mũ. “Hã kŷ sóg ãjag mŷ ke mũ. Û tŷ governo mŷ jãnkamy mäg tĩ ù ag vŷ Topê vĩ mranh, hã ra ag tóg to jykrén mãn kŷ (ag tóg) ãjag jykre tovãnh. Kŷ ùn mén e ù fag vŷ ãjag jykre kórég tovãnh gé. Hã kŷ ag tóg Topê tŷ tŷ êg pã'i nĩ venh ke mũ, fag ke gé. Ti kósin sanh ri ke ag hã vê. Ag jãvo ãjag tóg kanhkã venh ke tũ nĩ, ãjag tŷ ón kŷ Topê mŷ: “hej,” he mũ ra. ³² João vŷ ãjag mŷ Topê vĩ tó ja nĩgtĩ, ãjag tŷ ti jykre kuryj jagma mũ jé. Hã ra ãjag tóg ti vĩ kri nĩm ja tũ nĩ. ãjag jãvo ù tŷ governo mŷ jãnkamy mäg tĩ ag vŷ ti vĩ kri fi ja nĩ, ùn mén e fag ke gé. Tag ve ãjag mŷr. Ge ra ãjag tóg ãjag jykre tovãnh tũ nĩ, João vĩ kri nĩm tũ ãjag nĩ,” he tóg, Jesus ti.

Ûn camarada kórég ag to comparação

(Mc 12.1-12; Lc 20.9-19)

³³ Kŷ Jesus tóg ag mŷ: “sŷ ãjag mŷ ãjag tŷ Topê tovãnh to comparação han mãn ke vê, ha mẽ,” he mũ. “Kejên ù tóg nĩgtĩ. Uva krãn tóg nĩgtĩ, nén kanê tŷ vinho han jafã ên. Á jakré tag to tóg rón mũ. Kŷ tóg kũm kŷ uva jêgmĩ jafã han mũ. Kŷ tóg ki pãjó han mũ gé. Kŷ tóg ù tŷ ki rĩr tĩ ag mŷ tovãnh mũ, ag tŷ ti mré ti kanê vênh kãpãm jé. Kŷ tóg tĩ mũ, ga ù ra. ³⁴ Ti kanênh kŷ tóg ã camarada ag jêgnêg mũ, ag tŷ ag mŷ ti tũ vin jé, uva kanê ti. ³⁵ Hã ra ag tóg ag vóg kónãn mũ sir, ti camarada ag. Û mrãnmrãn ag tóg mũ, ù tén ag tóg mũ, ù pin ag tóg mũ, pó tŷ. ³⁶ Kŷ tóg ag mŷ ã camarada ù ag jêgnê mãn mũ gé sir, ùn e ag sir, hã ra ag tóg ag vóg kónãn kãn mũ. ³⁷ Vãhã tóg ag mŷ ã kósin jêñêg mũ. “Ag hŷn ti kamêg mũ, inh kósin ti,” he tóg, hã kŷ tóg ti jêñêg mũ. ³⁸ Kŷ ag tóg ti vég mũ, ti kósin ti. Kŷ ag tóg jagnê mŷ: “kejên êkré tag vŷ tŷ ti tũ nĩnh ke mũ,” he mũ. “Mũ nŷ, ti tén jé, ti tũ tag tŷ tŷ êg tũ nŷnh jé,” he ag tóg mũ, patrão kósin to. ³⁹ Kŷ ag tóg ti kãgmĩg mũ sir. Ró pãte ag tóg ti kutênh kŷ (ag tóg) ti tén mũ sir.

⁴⁰ Kejên ag patrão vŷ kãtĩg ke mũ, ù tŷ nén krãn ja ên. Kŷn hŷn hê ri kenh mũ, ã camarada ag tŷ?” he tóg, Jesus ti. ⁴¹ Kŷ ù tŷ ti vĩ mẽg mũ ag tóg ti mŷ: “vênh jykre pãno

han ag tóg mū m̄yr, uva ki r̄ir t̄i ag,” he mū. “Ag k̄agtén jé tóg ke mū, jū k̄y, ag patrão ti, k̄y tóg uva kré ên t̄y ù m̄y tovãnh ke mū, ag t̄y ti mré v̄enh k̄ãpãm jé, ti kanê ti,” he ag tóg ti m̄y. Û t̄y ti v̄i m̄eg mū ag tóg ke mū, Jesus m̄y.

⁴² K̄y tóg ag m̄y: “h̄y,” he mū. “K̄y Topê v̄i rá tag to jykrén n̄i gé, ha m̄e: pó t̄y ìn han jafã fón ag tóg, pó t̄y ìn han t̄i ag. Ag m̄y tóg kórég ja n̄i, pó ên ti. Hã ra Topê tóg pó ên hã t̄y ìn n̄una han mū. Êg Senhor mág t̄y há v̄e m̄yr, hã k̄y tóg êg m̄y e t̄i, êg t̄y ve k̄y,” he ja tóg n̄i, Topê v̄i rá ki,” he tóg, Jesus ti, v̄eso pó t̄y comparaçãõ ù han k̄y.

⁴³ “Hã k̄y sóg ãjag m̄y ke mū. ãjag t̄y Topê t̄y t̄y êg pã'i n̄i venh ke v̄e v̄e, hã ra ãjag tóg venh ke tū n̄i. Û ag v̄y venh ke mū, povo ù ag, ag t̄y inh v̄i kri fi k̄y,” he tóg. ⁴⁴ “Û t̄y h̄en ri ke ag v̄y pó tag kri vár ke mū, k̄y ag tóg kri vár k̄y tū' henh ke mū. K̄y pó tag v̄y ù t̄y h̄en ri ke ag kri kutênh ke mū gé, k̄y tóg ag t̄y námnam ke k̄an mū, ag kri kutê k̄y,” he tóg, Jesus ti. Ti t̄y ag t̄y ti ki rá tū tigr̄in n̄ugme ki vár ke tón hã v̄e.

⁴⁵ K̄y ag tóg m̄eg mū sir, Jesus v̄i ti. Topê tū ki r̄ir t̄i to pã'i ag v̄y m̄eg mū, Fariseu ag ke gé. M̄e k̄y ag tóg v̄ahã to jykrén mū sir. “Êg hã to tóg uva ki r̄ir t̄i kórég ag to comparaçãõ tag han ja n̄i,” he ag tóg mū sir, ki kanhr̄an k̄y. ⁴⁶ Hã k̄y ag tóg ti se sór mū. Hã ra ag tóg v̄enh e ên kam̄eg mū. “Topê v̄i tó t̄i p̄e v̄e,” he ag tóg, Jesus to, v̄enh e ên, hã k̄y pã'i ag tóg povo ên ag kam̄eg k̄y ti ség tū n̄i ver.

22

V̄enh pr̄üg to comparaçãõ (Lc 14.15-24)

¹ K̄y Jesus tóg ag m̄y comparaçãõ ù han m̄an mū sir. ² “Û t̄y kanhkã tá n̄i ên t̄y t̄y êg pã'i n̄i v̄y ge n̄i, ha m̄e,” he tóg. “T̄y tóg pã'i mág ri ke n̄i. Ti kósin pr̄üg ken k̄y tóg to festa mág han sór mū, pã'i mág ti. ³ Hã k̄y tóg ã camarada ag j̄egn̄eg mū, ag t̄y ti t̄y ùn m̄y tó ja ag m̄y: “ha k̄amū j̄eg, festa kon jé,” he jé. Hã ra ag tóg k̄amū j̄ävãnh n̄yt̄i. ⁴ K̄y tóg ag m̄y ã camarada ù ag j̄egn̄eg m̄an mū. “Ag m̄y: “k̄an inh huri, v̄ej̄en ti, he ti, êg patrão ti,” hemn̄i,” he tóg. “Boi k̄agtén inh huri, boi t̄agy ên mré hã. Nén kar v̄y kynkar k̄y n̄yt̄i. K̄amū j̄eg ra, inh festa to, he ti, êg patrão ti,” hemn̄i ag m̄y,” he tóg, pã'i mág ti, ã camarada ag m̄y. K̄y ag tóg mū mū.

⁵ Hã ra ag tóg k̄amū sór tū n̄i, k̄y ag tóg ti camarada ag to é he mū. Û tóg ã jap̄y ra t̄i mū, ù tóg ã negócio nón t̄i mū. ⁶ Û ag tóg hã ra ti camarada ag kugm̄i k̄y (ag tóg) ag vóg kónãn mū gé sir, ag k̄atén ag tóg mū sir. ⁷ K̄y pã'i mág tóg ag to jū mū. K̄y tóg ã kr̄em pã'i ag j̄egn̄eg k̄y ag k̄agtén mū gé sir, ù t̄y ti camarada k̄agtén ja ên ag. Ag ìn kugpr̄üg ag tóg mū sir. ⁸ K̄y tóg ã camrada ag m̄y: “inh festa v̄y kar k̄y n̄i ha,” he mū. “Hã ra ag tóg k̄amū j̄ävãnh n̄yt̄i, is̄y ùn m̄y v̄enh v̄i j̄en̄eg ja ag, ag kórég n̄yt̄in k̄y. ⁹ Ha m̄uj̄eg, êp̄ry ra, êm̄in v̄enh k̄ãpóv (ja) ra ke gé. ãjag t̄y ù ve k̄y ti m̄y: “ha festa venh k̄at̄ig,” hemn̄i,” he tóg, pã'i mág ti, ã camarada ag m̄y. ¹⁰ K̄y ag tóg mū mū. ãjag t̄y êp̄ry tá ù ve k̄y ag tóg ag m̄y ke mū. V̄enh kar m̄y ag tóg tó mū sir, ùn jyk̄re há ag m̄y, ùn jyk̄re kórég ag m̄y ke gé. Hã k̄y tóg fór mū sir, clube ti.

¹¹ K̄y pã'i mág tóg k̄arã mū sir, ag vigve jé, ù t̄y festa to k̄amū ag. K̄y ù tóg tá j̄e n̄i, hã ra tóg festa to kur tu tū n̄i. ¹² K̄y tóg ti m̄y: “festa to kur tu tū ã tóg n̄i, v̄y,” he mū. “Ã hã ne tóg kur kórég tu sór mū', inh festa ki',” he tóg, ti m̄y. Hã ra tóg v̄i tū n̄i sir. ¹³ K̄y pã'i mág tóg ã camarada ag m̄y: “ha ti mr̄inh, ti p̄en, ti n̄igé, ha ti fón, re tá,” he mū. Re tán kut̄y n̄i. Tá ag tóg jagtar t̄i. ãjag jã t̄y ag tóg gyngyn ke t̄i sir, gangan ke ag tóg t̄i sir, v̄eso j̄ugjū k̄y. ¹⁴ Ge ti n̄i. Û t̄y h̄en ri ke jé sóg pr̄er t̄i, hã ra ti pipir n̄yt̄i, ùn kupr̄eg k̄y n̄yt̄i ag,” he tóg, Jesus ti. Ti t̄y êg t̄y kanhkã tá festa venh ke tón hã v̄e.

Ag t̄y imposto to ti ki j̄em̄e (Mc 12.13-17; Lc 20.20-26)

¹⁵ K̄y Fariseu ag tóg jagn̄eg mré Jesus to jykrén mū sir. Ag t̄y ti v̄i to ti se sór v̄e. Hã k̄y ag tóg: “ti v̄i t̄y h̄e to êg h̄yn ti senh mū'?” he mū. ¹⁶ Tag to jykrén k̄y ag tóg sir Jesus m̄y ãjag mré ke ù ag j̄egn̄eg mū, Herodes mré ke ù ag mré hã, ag t̄y ón k̄y ti ki j̄em̄e jé, ag t̄y

ti ví to ti se jé. Ěn ag t̃y Jesus tá junjun k̃y ag tóg ti m̃y: “Senhor,” he m̃u. “Ā jykre kuryj ñin ki kanhró ěg tóg ñyt̃i,” he ag tóg. “Hã k̃y Ā tóg Topě to ěm̃in ki ěg kanhrãn há han t̃i. Věnh jykre pir há han Ā tóg ti. Ů t̃y věnh jykre há há han ve ñi m̃u ra Ā tóg ti jykre ki kanhró kar ñi,” he ag tóg m̃u, ón k̃y, Jesus m̃y. ¹⁷ “Hã k̃y, ěg m̃y Ā t̃y nén to jykrén m̃u tómñi. M̃y ha ñy', ěg t̃y p̃ã'i mág t̃y imperador m̃y jãnkamy ěn ñim ti', imposto kajãm jé'? Ěg m̃y h̃yn ñim m̃u', vó m̃y vó?” he ag tóg m̃u, ón k̃y ti ki jēmēn k̃y.

¹⁸ Hã ra Jesus tóg ag jykre pãno ki kanhró ñi. Hã k̃y tóg ag m̃y: “ãjag ne tóg ón k̃y inh ki jēmē sór m̃u'.” he m̃u. “Jykre régre ãjag ñyt̃i m̃y,” he tóg. ¹⁹ “Inh m̃y jãnkamy jun, imposto kajãm jafã ěn ti,” he tóg. K̃y ag tóg ti m̃y ũ jun m̃u sir, jãnkamy ti. ²⁰ K̃y tóg ag m̃y: “ũ jiji ñy kã ñi, ũ kãggrá ñy kã ñi?” he m̃u. ²¹ K̃y ag tóg ti m̃y: “p̃ã'i mág t̃y imperador kãggrá vē,” he m̃u. K̃y tóg ag m̃y: “k̃y p̃ã'i mág m̃y ti tũ ñim ñi, há ra Topě m̃y ti tũ ñim ñi gé,” he m̃u sir.

²² Ag t̃y ti ví mē k̃y ti jykre tóg ag m̃y e t̃i sir. K̃y ag tóg ti tovãnh k̃y m̃u m̃u sir.

Ěg t̃y ěg ter ja tá ṽyn kenh ke

(Mc 12.28-34; Lc 10.25-28)

²³ K̃y kejēn Saduceu ag tóg Jesus tá junjun m̃u gé, kurã ěn kã. Ag t̃y ón k̃y ti ki jēmē sór vē gé. Hã ra Saduceu ag tóg: “ěg ter ja tá ěg ṽynṽyn kenh ke tũ ñi,” he t̃i. “R̃ir m̃ãn ke tũ ěg tóg ñi,” he ag tóg t̃i. Ěn ag ṽy ón k̃y Jesus ki jēmē sór m̃u gé. ²⁴ “Senhor,” he ag tóg m̃u gé. “Moisés t̃y ěg m̃y věnh jykre ñim k̃y tóg ěg m̃y: “ã régre t̃y Ā krē tũ ra ter k̃y Ā t̃y ti pr̃u fi t̃y pr̃ug ke vē,” he m̃u. “Ā t̃y Ā régre m̃y Ā krē han ke vē, fi ki,” he ja tóg ñigt̃i, Moisés ti,” he ag tóg m̃u, Saduceu ag, Jesus m̃y. ²⁵ “K̃y ũ t̃y jagnē mré pafa ja t̃y 7 (ke) ṽy ñyt̃igt̃i. Ag kãke tóg pr̃ug m̃u, há ra tóg Ā kósin tũ ra ter m̃u. K̃y ti jãvy tóg fi t̃y pr̃ug m̃u sir. Hã ra tóg Ā kósin tũ ra ter m̃u gé. K̃y ti jãvy ũ tóg fi t̃y pr̃ug m̃u gé sir. ²⁶ Hã ra tóg Ā kósin tũ ra ter m̃u gé, ti jãvy ũ ke gé, há ki ag kar ṽy kósin tũ ra kãgter kãn m̃u sir. ²⁷ K̃y vãhã ag kar pr̃u fi tóg ter m̃u gé sir. ²⁸ K̃y fag kãgter ja tá r̃inr̃ir m̃ãn k̃y fi h̃yn mén t̃y 7 (ke) ñinh m̃u vē. Ag kar ṽy fi t̃y pr̃ug ja ñi m̃y. Hã k̃y tóg vēnhm̃y ñy, ag t̃y: r̃ir m̃ãn jé ěg tóg ke m̃u, hen k̃y,” he ag tóg, Saduceu ag, Jesus m̃y.

²⁹ Hã ra Jesus tóg ag m̃y: “kygnē ãjag huri,” he m̃u. “Ājag pi(jé) Topě ví t̃y rán k̃y ñi ki kanhró ñyt̃i', ãjag pi(jé) Topě jykre ki kanhró ñyt̃i',” he tóg. ³⁰ “Ěg r̃inr̃ir m̃ãn k̃y ěg tóg pr̃ug m̃ãn ke tũ ñi sir, k̃y ěg mén m̃ãn ke tũ ñi gé. Topě t̃y jēgnē jafã ri ke ěg ñyt̃i, kanhkã tá,” he tóg.

³¹ “K̃y Topě ví rá ũ to jykrén ñi, ti t̃y ěg ter ja tá ṽyn ke tó ti. Topě há ne t̃y vēmén ja ñi m̃y, há k̃y tóg tag tó ja ñi, ha mē. ³² “Abraão ṽy iso: Topě, he t̃i, Isaque ke gé, Jacó ke gé,” he ja tóg ñi, Topě ti. Kãgter ag huri, Abraão, Isaque, Jacó. Hã ra Topě tóg: “t̃y inh ag Topě ñi,” he ja ñigt̃i, ag ter kar k̃y. Hã k̃y ag tóg r̃inr̃ir ñyt̃i, Topě t̃y ũn r̃inr̃ir ñyt̃i ag há kri ke ñinh k̃y,” he tóg, Jesus ti. ³³ K̃y ag tóg ti ví mēg m̃u sir, k̃y ti jykre tóg ag m̃y e pē t̃i, ti ví ti.

Topě t̃y ěg jyvēn kãfór

(Mc 12.28-34; Lc 10.25-28)

³⁴ K̃y Fariseu ag tóg mēg m̃u, Jesus t̃y Saduceu ag m̃y ví há han ja ti. Ti t̃y ag m̃y ví há han k̃y ag t̃y ti m̃y hē ri ken k̃y kafãn ke tóg tũ t̃i sir. Hã mēg ag tóg m̃u, Fariseu ag. K̃y ag tóg Jesus to vēnhm̃ãn m̃u sir. ³⁵ K̃y ag kã ũ tóg ti mré ví m̃u. Topě ví to professor vē, ũ t̃y Jesus mré ví m̃u ti. K̃y tóg Jesus m̃y: ³⁶ “Senhor,” he m̃u. “Topě t̃y ěg jyvēn t̃y hē ñy h̃yn ti t̃y ěg jyvēn kar kãfór ñynh m̃u?” he tóg m̃u sir. ³⁷ K̃y Jesus tóg ti m̃y: “Topě to, ěg jóg mág to há tãṽi ñyt̃imñi, ti ki ge há han ñi, ti to jykre pir ñyt̃imñi,” he m̃u. ³⁸ “Topě t̃y ěg jyvēn kãfór kar há vē. ³⁹ K̃y ti t̃y ěg jyvēn ũ tóg há ri ke ñi gé, há ṽy: ãjag régre ki r̃ir ñyt̃imñi, ãjag t̃y věnh ki r̃ir há han ri ke, he m̃u,” he tóg. ⁴⁰ “Věnh jyvēn tag ṽy věnh jyvēn kar kãfór ñyt̃i. Régre ti ñyt̃i, Topě t̃y ěg jyvēn kãfór ñyt̃i ti. Ěg t̃y tag ki króm k̃y ěg tóg Topě jykre ki króm kãn m̃u. Ti t̃y ěg jyvēn m̃u han kãn ěg tóg m̃u, Topě ví tó t̃i t̃y ěg jyvēn m̃u mré há, ěg t̃y tag ki króm k̃y,” he tóg, Jesus ti.

Cristo tỹ tỹ Davi kósin nĩ
(Mc 12.35-37; Lc 20.41-44)

⁴¹ Hã ra Fariseu ag vỹ vênh mãn kỹ nỹtĩ, kỹ Jesus tóg ag ki jẽmẽ sór mũ gé sir. ⁴² Kỹ tóg ag mỹ: “Cristo to ãjag hẽ ri ke tĩ?” he mũ. “Ủ kósin nẽ hỹn, Cristo tĩ?” he tóg, Jesus ti. Kỹ ag tóg ti mỹ: “Davi kósin vẽ,” he mũ. ⁴³ Kỹ tóg ag mỹ: “hã ra Davi tóg ti to: inh Senhor, he ja nĩ,” he mũ. “Topẽ kuprĩg tỹ ti krĩn kỹ tóg tag tó ja nĩ, ha mẽ: ⁴⁴ “ẽg jóg tỹ Topẽ vỹ inh Senhor mỹ: “nĩ ra ver, inh pẽgja tá,” he mũ, “sỹ ã kato vãsãnsãn mũ ag tỹ ã krẽm vin ke vẽ, kỹ ag sigse vẽ sir. Tag jãvãnh nĩ ver,” he tóg mũ, Topẽ ti, inh Senhor mỹ,” he ja tóg nĩgtĩ, Davi ti,” he tóg mũ, Jesus ti. ⁴⁵ “Hã kỹ Davi tóg Cristo to: “inh Senhor,” he ja nĩ. Ti tỹ tỹ ti kósin nĩ ra ti kósin mỹ tỹ ti kri ke nĩnh mũ vẽ?” he tóg, Jesus ti. Ti tỹ Fariseu ag ki jẽmẽg mũn hã vẽ. ⁴⁶ Hã ra ag tỹ ti mỹ ne tónh ke tóg tũ tĩ, ag tỹ ti vĩ kafãn sór mũ ra. Vãhã ag tóg ti ki jẽmẽ sór mãn tũ nĩ. Ti kamẽg ag tóg mũ, hã kỹ ag tóg ti ki jẽmẽ sór mãn tũ nĩ.

23

Ón kỹ Topẽ vĩ to professor ag jykre
(Mc 12.38-39; Lc 11.43-46; 20.45-46)

¹ Kỹ Jesus tóg vênh kar kanhrãn mũ sir, ti mré mũ tĩ ag mré hã. Kỹ tóg ag mỹ: ² “Moisés vỹ ẽg jóg ag kanhrãn ja nĩgtĩ,” he mũ. “Ti nón Topẽ vĩ to professor ag tóg ẽg kanhrãn sór mũ, Fariseu ag ke gé,” he tóg. ³ “Ag tỹ ãjag mỹ nẽn tó mũ ẽn ki króm nĩ. Ag vĩ kri fimnĩ. Ag tỹ nẽn han mũ ri ke han tũg nĩ jãvo, ag jykre kórég ẽn han tũg nĩ. ãjag kanhrãn há han ag tóg tĩ, hã ra ag tóg ki króm sór tũ nĩgtĩ, ãjag vĩ há ẽn ki. ⁴ ãjag mỹ ag tóg vênh jykre kufy vin tĩ, hã ra ag hã tóg han sór tũ nĩgtĩ, vênh jykre kufy ẽn ti. ⁵ Ag tỹ nẽn ù há han kỹ ag tóg tỹ ùn mág nỹtĩ sór mũ sir, vênh kar tỹ ag vigve jé. Ag tỹ Topẽ mré vĩ jé ag tóg ti vĩ rá tỹ ãjag nĩgẽ tógfĩg tĩ, ãjag kakã ke gé. Vẽsógfĩn ja tãpér tỹ ag tóg vêsógfĩg tĩ. Topẽ jykre han jé ag tóg kur tóv mág tu tĩ gé. ⁶ Festa ki ag tóg jẽn vén sór tĩ. Vênh kanhrãn jafã krẽm ag tóg vênh kãpov kỹ nỹtĩ. ⁷ Cidade kuju ki vênh kar tóg ag mỹ: “ã mỹ há?” he tĩ, kỹ tóg ag mỹ sér tĩ. Kỹ ag tóg ag to: “Senhor,” he tĩ gé, kỹ tóg ag mỹ sér tĩ. ⁸ Ag jãvo jagnẽ mỹ: “Senhor,” he sór tũg nĩ, kỹ ag tỹ ãjag mỹ: “Senhor,” he mũ ra ag mỹ: “inh pi(jé) tỹ ùn mág nĩ,” hemnĩ. Ûn pir vỹ tỹ ãjag kri ke nĩ, hã vỹ: Topẽ, he mũ, jóg ãjag tóg tỹ jagnẽ mré ke nỹtĩ. ⁹ Kỹ ù mỹ: “ẽg jóg,” he tũg nĩ gé, ẽprã. Ûn pir vỹ tỹ ãjag jóg nĩ, hã vỹ: Topẽ, he mũ, kanhkã tá nĩ ẽn ti. ¹⁰ Kỹ ù tỹ ãjag mỹ: “ẽg kri tỹ ùn mág nĩmĩ,” he kỹ ag mỹ: “vó, kenh ke tũ inh nĩ,” hemnĩ gé. Ûn pir vỹ ãjag kri tỹ ùn mág nĩ, hã vỹ: Cristo, he mũ. ¹¹ ãjag kãmĩ ùn mág ag jé ãjag ki rĩr há han, ãjag camarada tỹ ãjag ki rĩr há han tĩ ẽn ri ke. ¹² ãjag tỹ tag ki vêsỹ tỹ ùn mág han sór nỹtĩn kỹ ãjag tóg tá térenh ke mũ, ha vemnĩ. ãjag tỹ hã ra: “tỹ inh ùn sĩ nĩ,” hen kỹ ãjag tóg tá jãpryn h ke mũ, tỹ ùn mág ãjag nỹtĩnh mũ, ha vemnĩ,” he tóg, Jesus ti.

Topẽ vĩ to professor ag jagtar ke
(Mc 12.40; Lc 11.39-42, 52; 20.47)

¹³ “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “Ủ ag tóg ù tỹ kanhkã tá nĩ ẽn tỹ tỹ ẽg pã'i nĩ ve sór nỹtĩ, hã ra ãjag tóg ag mỹ kanhkã ti nenh tĩ. Ag jãvo ãjag tóg ve sór tũ nĩgtĩ. ãjag tỹ kanhkã ve sór tũ nĩn kỹ ãjag tóg ù ag mỹ nenh tĩ gé, ag tỹ vэг tũ nĩ jé, ãjag ri ke,” he tóg, Jesus ti.

¹⁴ “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “ãjag ne tóg ùn mén ter ja fag tũ mãn kãn tĩ’. Kar kỹ ãjag tóg ón kỹ Topẽ mré vĩ téj han mũgtĩ, ẽg tỹ ãjag to: “há ag nỹtĩ,” he jé. Hã kỹ Topẽ vỹ ãjag vóg kónãn kãfór han ke mũ,” he tóg, Jesus ti.

¹⁵ “Ón kỹ Topẽ vĩ to professor’,” he tóg. “Fariseu’,” he tóg. “Jykre régre ãjag nỹtĩ,” he tóg. “Topẽ vỹ ãjag ve kónãn,” he tóg. “ãjag ne tóg kuvar há ra mũ tĩ’, ga mĩ, goj mĩ ke gé, ãjag tỹ ù tỹ Israel ag jykre han sór mũ ù jãvãnh jé. Hã jé ãjag tóg mũ mág han tĩ. Kỹ ãjag

tỹ ù ven kỹ ãjag tóg ti tỹ Japo krê han mũ sir, ti tỹ ón kỹ Topê vỹ mẽ jé, ãjag ri kén, ti tỹ nũgme ki kutê jé, inferno ên ki. Kỹ ti jykre pãno vỹ ãjag jykre pãno kãfór nỹ sir,” he tóg, Jesus ti.

¹⁶ “Topê vỹ ãjag ve kónãn mỹr,” he tóg. “Kyvó ãjag nỹtĩ, hã ra ãjag tóg ù tỹ ki kagtĩg ag tatĩn mũ sór mũ. Hã kỹ ãjag tóg kygnêg tĩ. Kỹ ãjag tóg ag kanhrãn kónãn tĩ. “Ëg tỹ ón kỹ: tag han jé sóg ke mũ, he sór kỹ ãg tóg: “Topê jo ãn krêm nĩ ên vỹ ki kanhró nĩ,” henh ke mũ,” he ãjag tóg tĩ. “Ëg tỹ hã ra: Topê jo ãn krêm ouro tân ên vỹ ki kanhró nĩ, hen kỹ ãg tóg ón ke tũ nĩ,” he ãjag tóg tĩ gé. ¹⁷ Vênhmỹ ti nĩ, ãjag vỹ tag. Krĩ tũ ãjag tóg nỹtĩ, kyvó ãjag tóg nỹtĩ. Ouro mỹ Topê jo ãn kãfór nĩ? Vó!. Ouro vỹ tỹ Topê tũ nĩ, ti tỹ Topê jo ãn krêm nĩn kỹ. Hã kỹ tóg tỹ Topê tũ kar nĩ sir, ouro ti, ti jo ãn ti ke gé. Ón kỹ: “Topê hã vỹ ki kanhró nĩ,” he tũg nĩ,” he tóg, Jesus ti. ¹⁸ “Ãjag vỹ vênhmỹ ù vỹ nĩ gé. “Ón kỹ ãg tóg: ãg tỹ mesa kri ãn mỹ nén ù pũn mũ ên vỹ ki kanhró nĩ, henh ke mũ,” he ãjag tóg tĩ gé. “Ëg tỹ hã ra: ãg tỹ ãn mỹ ãg mêng pũn tĩ ên vỹ ki kanhró nĩ, hen kỹ ãg ón ke tũ nĩ,” he ãjag tóg tĩ gé. ¹⁹ Vênhmỹ ti nĩ gé, ãjag vỹ tag ti. Kyvó ãjag nỹtĩ mỹr. Ëg tỹ Topê mỹ ãg mêng pũn mũ mỹ mesa kãfór nĩ? Vó!. Topê jo ãn krêm mesa kri ãg tóg ãg mêng ti pũn tĩ, hã kỹ tóg Topê mỹ há tĩ, ãg mêng ti, ãg tỹ ti jo ãn tá ti mỹ mesa kri ti pũn tugrĩn. ²⁰ ãjag tỹ Topê jo ãn krêm mesa tón kỹ, kỹ ãjag tóg ãg tỹ ãg mêng tỹ mesa ên kri pũn mũ ên tó tĩ gé. ²¹ ãjag tỹ Topê jo ãn tón kỹ, kỹ ãjag tóg Topê ti tó tĩ gé. ²² ãjag tỹ kanhkã tón kỹ, kỹ ãjag tóg Topê nĩgia tó tĩ gé, kỹ ãjag tóg Topê ti tó tĩ gé sir. Nén ù pir vỹ, ti kar ti. Hã kỹ ón kỹ: Topê hã vỹ ki kanhró nĩ,” he tũg nĩ,” he tóg, Jesus ti.

²³ “Ón kỹ Topê vỹ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topê vỹ ãjag ve kónãn,” he tóg. “Ón kỹ ãjag tóg Topê mỹ ãjag jakré ki dízimo vin tĩ. ãjag jakré tỹ hortelã tỹ 10 (ke) nỹtĩn kỹ ãjag tóg Topê mỹ ãn pir nĩm tĩ, ãjag jakré tỹ erva doce tỹ ke gé, ãjag jakré tỹ cominho tỹ ke gé. Há ti nĩnh mũ vỹ. Hã ra ãjag tóg ti tỹ ãg jyvên mũ ên han tũ nĩgtĩ. Vênh jykre kuryj han tũ ãjag tóg nĩgtĩ. ãn jagãgtar ag jagãgtãn tũ ãjag tóg nĩgtĩ. Topê vỹ kri fig tũ ãjag tóg nĩgtĩ. ãjag tỹ ti vỹ ki króm tag tóg inh mỹ há nĩnh mũ vỹ, ha mẽ. ãjag tỹ ti tỹ ãg jyvên ki króm mré hã ãjag jakré ki dízimo vin (hã) ra tóg inh mỹ há nĩnh mũ vỹ, ha mẽ. Hã ra ãjag tóg ki króm sór tũ nĩgtĩ. ²⁴ Kyvó ãjag nỹtĩ, hã ra ãjag tóg ag tatĩn mũ sór nỹtĩ. Topê vỹ ù ki króm sór ãjag tóg tĩ, ti tỹ Topê mỹ tỹ nén ù sĩ (hã) ra, kỹ ãjag tóg ti vỹ ù mrynhmranh tĩ, ti tỹ Topê mỹ kórég pẽ (hã) ra. Kỹ tóg goj ki ka ri ke nĩ. ãjag tỹ ka gón tũ nĩ jé ãjag tóg kur ki kujêg tĩ, kỹ tóg pan tĩ, goj ti. Hã ra ãjag tóg cavalo tỹ goj ki ter mũ ra (ãjag tóg) goj kórég ên kron tĩ,” he tóg, Jesus ti.

²⁵ “Ón kỹ Topê vỹ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topê vỹ ãjag ve kónãn,” he tóg. “Copo venja kupég ãjag tóg tĩ, pênky venja, hã ra ti kãtã tóg kavéj nĩ. Kỹ ãjag vỹ ge nỹgtĩ gé. Jykre há nĩ ve ãjag tóg nỹgtĩ gé, hã ra ãjag tóg vênh jykre pãno han tĩ, hã vỹ: jãnkamy to ag lograr he tĩ, he mũ, ãjag prũ tũ fag mré nỹ tĩ, he mũ gé. ²⁶ Kyvó ãjag nỹtĩ, ãjag tỹ tỹ Fariseu nỹtĩ ra. ãjag jykre pãno tovãnh nĩ, ãjag jãnhkri nỹtĩ jé. Kỹ vãhã vênh kar vỹ ãjag jykre há vég mũ,” he tóg, Jesus ti.

²⁷ “Ón kỹ Topê vỹ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topê vỹ ãjag ve kónãn,” he tóg. “Vênh kej sĩnvĩ ri ke ãjag nỹtĩ. Sĩnvĩ nĩ ve ti nĩ, vênh kej ti, ãg tỹ pó tỹ kri tam kỹ, kar tinta tỹ pó to tĩn kỹ. Ti sĩnvĩ nĩ ve nĩ ra ti kãtã tóg kórég nĩ. Vêser vỹ krêm nỹ nĩ, vêser vag mũ ti, ti kuka. ²⁸ Tag ri ke ãjag nỹtĩ. Há nĩ ve ãjag nỹtĩ. Jykre kuryj nĩ ve ãjag nỹtĩ, hã ra ãjag kãtã tóg kórég nĩ, ãjag jykre régre nỹtĩn kỹ, ãjag tỹ Topê vỹ ki króm sór tũ nỹtĩn kỹ mỹr, ha mẽ,” he tóg, Jesus ti.

*Ûn jykre régre ag jagãgtar ke
(Lc 11.47-51)*

²⁹ “Ón kỹ Topê vỹ to professor’,” he tóg. “Fariseu’,” he tóg. “Krĩ régre ãjag nỹtĩ, kỹ Topê vỹ ãjag ve kónãn,” he tóg. “ãjag jóg’jóg ag vỹ Topê vỹ tó tĩ ag kãgtén ja nĩgtĩ. Jãvo ãjag tóg ag kej sĩnvĩ han tĩ, ãn jykre kuryj han ja ag kej ti. ³⁰ Kỹ ãjag tóg ag to: “ãg tỹ ãg jóg’jóg ag mré ga kri mũ hã ra ãg tóg ag kãgtén ke tũ nĩ vỹ,” he ti. “Ag mré ãg ag vóg ke

tū nī vē,” he ājag tóg tī, ón ký. ³¹ Hã ki ājag tóg ājag jóg'jóg ag tó tī. “Ēg jóg'jóg ag vỹ ag kãgtén, Topẽ vỹ tó tī ag,” he ājag tóg tī. “Ū tỹ ag kãgtén mũ ag krẽ'krẽ vỹ tỹ ěg nỹtĩ,” he ājag tóg tī. ³² Kuri ājag jóg'jóg ag ri ke han nĩ, kuri ājag jóg'jóg ag tỹ ũn kãgtén ja tũ ěn ag kãgtén nĩ, ājag tỹ tỹ ājag jóg'jóg ag krẽ'krẽ nỹtĩn ký,” he tóg, Jesus ti. ³³ “Pỹn ri ke ājag nỹtĩ, mĩg ri ke ājag nỹtĩ. Ājag pi(jé) nũgme ki vár ke tũ nĩnh ke mũ', inferno ki',” he tóg. ³⁴ “Hã ký sóg ājag mỹ Topẽ vỹ tó tī ag jěgněnh ke mũ, věnh vỹ há tó mũ ag, Topẽ vỹ rán tĩ ag. Ag jěgně jé sóg ke mũ, ag tỹ ājag jyvěnh jé. Ký ājag tóg ag kãgtén ke mũ gé, ha vemnĩ. Ka to ājag tóg ag sanh ke mũ. Ag mrãnmrãn jé ājag tóg ke mũ, ājag tỹ věnh kanhrãn jafã krēm. Cidade kar ki ājag tóg ag nón mũnh mũ, ājag tỹ ag vóg kónãn jé. ³⁵ Hã ký tóg ājag tỹ ũn jykre kuryj kar kãgtén mũ ri ke nĩ. Ūn tỹ hěn ri ke ag kãgtén ag tóg huri, ěprã ke ag, hã ra tóg ājag tỹ ag kãgtén kãn ri ke nĩ sir, Abel, Abel nón ke ag mré hã, Zacarias ěn mré hã, Baraquias kósin ěn. ěn tỹ ājag tóg Topẽ jo ĩn jo ti tén ja nĩ, Topẽ mỹ nén ũ pũn jafã ěn tá ājag tóg ti tén ja nĩ, Zacarias ěn. ³⁶ Ājag mỹ sóg tó mũ, ha mē. Ājag hã to ti jũnh ke mũ, Topẽ ti, ājag jóg'jóg ag tỹ ag kãgtén tigrĩn, ājag tỹ ag kãgtén tigrĩn ke gé,” he tóg, Jesus ti.

Jesus tỹ Jerusalém tá ke ag to há nĩ

(Lc 13.34-35)

³⁷ Ký tóg Jerusalém ki ke ag to vēmén mũ. Fe kaj han tóg, ag to, ký tóg: “Jerusalém tá ke ag mỹ sóg tag tó sór mũ, ha mē,” he mũ. “Topẽ vỹ tó tī ag kãgtén ag tóg tī. Topẽ tỹ ag mỹ ũn jěgněg tĩ ag pin ag tóg tī, pó tỹ, ag tỹ ag kãgtén jé. Isỹ ag věnh mãn há tóg tĩ vě, isỹ ag ki rĩr jé, Jerusalém tá ke ag, hã ký sóg ag jé prěr tỹ hěn ri ke han mũ. Garĩnh fi jykre ri ke han sór isóg mũ vě, ag mỹ. Garĩnh fi vỹ ã krẽ kri jě nĩ, fi tỹ ag vėsỹrěnh tũ nĩ jé ke vě. ěn ri ke han sór sóg mũ vě, hã ra ag tóg ke jãvãnh nỹtĩ. ³⁸ Hã ký ag tóg ag jamã pũn kãn ke mũ, ký vãpũr vě sir. Ū vỹ kãnhmar tá nĩg mãn ke tũ nĩ ha, ag tỹ cidade kókén ja tá. ³⁹ Hã ký sóg ag mỹ ke mũ. Inh ve mãn ke tũ ag nĩ ha (mỹr). Kejěh ag tóg iso: “Topẽ tỹ ti jěně ja vě,” henh ke mũ. “Topẽ vỹ ti ve há han, ti tỹ ti jiji tó kãtĩg ký,” he jé ag tóg ke mũ iso, kejěh. ěn kã ag tóg inh ve mãn ke mũ,” he tóg, Jesus ti.

24

Topẽ jo ĩn kókén ký nĩnh ke

(Mc 13.1-2; Lc 21.5-6)

¹ Ký Jesus tóg Topẽ jo ĩn tá kãkutě ký tĩ mũ sir. Ký ti mré mũ tĩ ag tóg ti tá junjun mũ, ký ag tóg ti mỹ Topẽ jo ĩn ěn ag venven mũ sir. ² Ký Jesus tóg ag mỹ: “ājag mỹ pó tỹ ĩn mág tag ag vigvég mũ?” he mũ. “Kejěh pó tóg jagně kri nỹtĩ mãn ke tũ nĩ ha. Ag tỹ gũm ke kãn ke vě. Ki hã sóg tó mũ,” he tóg, Jesus ti.

Ēg jagtar ke

(Mc 13.3-13; Lc 21.7-19)

³ Kar ký tóg krĩ tỹ Oliveiras ra tĩ mũ sir. Ti tỹ tá nĩ ký ti mré mũ tĩ ag tóg vyr mỹ ti ki jěměnh kãmũ mũ. Ký ag tóg ti mỹ: “ěg mỹ ti kurã ti tó,” he mũ. “Ēg tỹ ne ve ký ěg ti kurã ki kanhró nỹtĩnh mũ, ã kãtĩg mãn ke kurã ěn ti, nén kar tũg ke kurã ěn ti?” he ag tóg ti mỹ. ⁴ Ký tóg ag mỹ: “ker ũ ājag lograr hé hě’,” he mũ. ⁵ “Cristo vỹ tỹ inh nĩ,” he jé ag tóg ke mũ, inh jyjy tó ký. Ū tỹ hěn ri ke ag tóg tag tónh ke mũ, ký ũ tỹ hěn ri ke ag tóg ag vỹ kri nĩm ke mũ. ⁶ Věnh génh to věme mē jé ājag tóg ke mũ, tag ki věnh génh to, kuvar há tá věnh génh to ke gé. To jũrũn ke tũg nĩ, hã ra. Věnh génh enh ke vě. Hã ra kurã tỹ ěgno to hã ke vě ver. ⁷ Nação ag tỹ jagně kato těgtěnh ke vě, pã'i krēm ke ag tỹ pã'i ũ krēm ke ag to jũnh ke vě. Ký ga tỹ ragra ke tỹ hěn ri ke han ke vě, ěmã tỹ hěn ri ke ki. Vějěh tỹ tũ' henh ke vě gé. ⁸ Hã ra ājag jagãgtar ke věnh ven vén vě ver,” he tóg, Jesus ti.

⁹ “Kar ký ājag jagtar ke mũ, ājag tỹ inh ki ge ký nỹtĩ tigrĩn. Ājag vóg kónãn jé ag tóg ke mũ, ājag kãgtén jé ag tóg ke mũ gé. Nação kar vỹ ājag to vỹ kónãn ke mũ gé, ājag tỹ inh jiji tó tigrĩn. ¹⁰ Ký ũ tỹ hěn ri ke ag vỹ isogvãnh ke mũ sir, ěn kã. Ājag mré ke fag tó jé ag tóg ke mũ, inh kato vãsãnsãn mũ ag mỹ, ký ag tóg jagně to vỹ kónãn tãvĩ han ke mũ

gé. ¹¹ Ón kÿ inh ví tó tí ag vÿ junjun ke mÿ gé, kÿ ag tóg ün e krínkrín ke mÿ sir, ag tÿ isogvãnh jé. ¹² Kÿ vënh kar vÿ vënh jykre pãno to há nÿtính mÿ, hã kÿ ù tÿ ón kÿ iso há sĩ nÿtĩ ên ag tóg isogvãnh ke mÿ gé, ün e ag. ¹³ Hã ra ù tÿ isovãnh tũ pë ên ag tóg krenkren ke mÿ. ¹⁴ Kÿ nação kar vÿ vënh ví sér mënň mÿ, ga kar mĩ hã, kÿ ag tóg Topë tÿ tÿ êg pã'i nính ke ên mënň mÿ ha. Ag tÿ mē kãn kÿ kurã tÿ êgno vë sir," he tóg, Jesus ti.

Ëg jagãgtar mág pë ti
(Mc 13.14-23; Lc 21.20-24)

¹⁵ "Kejën ãjag tóg vãhã sir ãjag tÿ nén (ù) kamëg tĩ ên venh ke mÿ, êg kavénh mÿ ên ti," he tóg. "Topë ví tó tí tÿ Daniel vÿ ti tó ja nĩgtĩ. Topë jo ïn tá tóg jënh mÿ, êg kavénh mÿ ên ti," he tóg, Jesus ti. (Û tÿ vënh rá tag to ke mÿ ên jé ki kanhró nĩ.) ¹⁶ ãjag tÿ ti ve kÿ ga tÿ Judéia ki ke kar ag jé vënh pigjunh mÿjëg, pãnónh ra, fag mré hã. ¹⁷ Û tÿ re tá nĩ ên jé kãra rá tũg nĩ, ti ïn ki, ti tũ mãn jé. ¹⁸ Kÿ ù tÿ ã japÿ tá jë ên jé vÿn ke tũg nĩ gé, ti kur mãn jé. ¹⁹ Ûn kufy fag jagtar mág ke vë, kurã ên kã, ù tÿ gĩr pygfãm mÿ fag ke gé. ²⁰ Topë mré vĩmnĩ, ti tÿ kusa kã vënh ven tũ nĩ jé, ti tÿ vënhkãn ke kurã kã vënh ven tũ nĩ jé. ²¹ Jagtar mág tÿ ge han ja tũ êg tóg nÿtĩ, Topë tÿ mundo han jãn ki. Kÿ êg ge han mãn ke tũ nĩ gé, kar kÿ. ²² Ëg tÿ kurã ki jagtar ke mÿ ên vÿ e nÿtính mÿ vë, hã ra tóg térem kÿ nÿtĩ nĩ, Topë tÿ ün kuprëg ja ên ag tugrín. Ti tÿ térem tũ nĩ (mÿ) ra ù vÿ kren ke tũ nĩ vë, ag jagtar mág ên to," he tóg, Jesus ti.

²³ "Ën kã ù tÿ ãjag mÿ: Cristo vÿ tag kã jë nĩ, he mÿ ra kri nĩm tũg nĩ, ag tÿ: tãtã ti jë nĩ, he mÿ ra. ²⁴ Ón kÿ Cristo ag vÿ vënh venven ke mÿ, ón kÿ Topë ví tó tí ag ke gé. Ëg tÿ nén han vãnh hyn han jé ag tóg ke mÿ, milagre tÿ hën ri ke ti, ón kÿ Cristo ên ag. Ag tÿ vënh kar krín kónãn sór vë, ag tÿ kygnë jé, Topë tÿ ün kuprëg ja ên ag mré hã, hën ri ke mÿn. ²⁵ ãjag mÿ sóg tó kãn mÿ, ti kutënh ke to hã," he tóg, Jesus ti.

²⁶ "Kejën ag tóg ãjag mÿ: êmã kórëg tá tóg jë, Cristo ti, henh ke mÿ. Ra ti venh mÿ tũg. Ag tÿ ãjag mÿ: ïn kãtã tóg nĩ nĩ, he mÿ ra kri fi tũg nĩ. ²⁷ Inh kãtĩg mãn ke vÿ ta tÿ kóm kóm ke ri ke nĩ. Ti tÿ kóm kóm ke kÿ êg tóg nén kar vëg tĩ, rá jur ja tá, rá pur ja tá ke gé. Inh kãtĩg mãn ke vÿ ri ke nính mÿ. Tÿ sóg ëprã ke fi kósin nĩ," he tóg, Jesus ti.

²⁸ "Nén ù ter nÿgja ri ke ti nĩ gé. Hã tá tóg vënh mãn tĩ, jãtã ti. Tag ri ke ti nính mÿ, inh kãtĩg mãn ke ti," he tóg, Jesus ti.

Topë kósin kãtĩg mãn ke
(Mc 13.24-27; Lc 21.25-28)

²⁹ "Jagtar ên kar kÿ rá vÿ nhyr ke mÿ, kÿ kysã vÿ jëngrë he mãn ke tũ nĩ gé. Krĩg vÿ vár ke mÿ gé, kanhkã krëm. Ëg tÿ kanhkã tá nén vëg tũ kar ên vÿ ragra ke kãn mÿ gé. ³⁰ Kÿ vãhã ëprã ke fi kósin vÿ vënh ven ke mÿ, kanhkã tá. Kÿ ga kri mÿ kar ag vÿ kygfÿ kãn ke mÿ sir, povo kar ti, ag tÿ inh kãtĩg ven kÿ. Kanhkã góg kãmĩ sóg térenh ke mÿ. Kÿ sóg tar pë nính mÿ, ha vemní, kÿ inh ve vÿ kókov pë nính mÿ gé. ³¹ Kÿ sóg isÿ jëgnë jafã ag jëgnënh mÿ, ag tÿ ténntén kynkyn jé, kÿ ag tóg isÿ ün kuprëg mÿ ag jé prënrë kãn ke mÿ sir, ga kar mĩ hã, kanhkã fyr mĩ hã," he tóg, Jesus ti.

Ka tÿ figueira to comparação
(Mc 13.28-31; Lc 21.29-33)

³² "Ka tÿ figueira to ki kanhrãn nĩ, to comparação han kÿ. Ka tÿ figueira pë tánh kÿ, ti féj tãg han kÿ tóg kakó tí sir, êkré tygtãnh kurã ti. ³³ Ri ke ti nĩ, ãjag tÿ inh kãtĩg mãn ke kurã ki kanhró nÿtính ke mÿ ti. ãjag tÿ isÿ ãjag mÿ nén tó mÿ tag ve kÿ tóg sir kakó tính ha, kakó tãví tóg tính ha, inh kãtĩg mãn ke ti, ên kã. ³⁴ Sÿ ke há vë, hã kÿ sóg tag tó mÿ, ha mē: ùri ün rĩnrĩr mÿ ag tÿ nén kar ên venh ke vë, ag kãgter ke to hã. ³⁵ Kanhkã vÿ tũ' henh ke mÿ, ga ti ke gé. Jãvo inh ví vÿ tũ' henh ke tũ nĩ," he tóg, Jesus ti.

Jesus kãtĩg mãn ke kurã
(Mc 13.32-37; Lc 17.26-30, 34-36)

³⁶ "Hã ra ù pi(jé) isÿ kurã ki kãtĩg mãn ke mÿ ki kanhró nĩ', hora ki ke gé. Topë tÿ jëgnë jafã ag pi(jé) ki kanhró nÿtĩ'. Inh pi(jé) ki kanhró nĩ gé. Ëg jóg mág hã vÿ ã pin kÿ ki

kanhró nĩ, kurã kã nén kutēnh ke mũ ěn ki. ³⁷ Inh kãtĩg mãn ke kurã vỹ Noé tỹ ga mĩ tĩg ja ěn ri ke nĩnh mũ. ³⁸ Ta kutē to hã ag tóg jēn ja nĩgtĩ, kron ja nĩgtĩ, jagnē tỹ prũg ja nĩgtĩ, jagnē tỹ mén ja nĩgtĩ, Noé mré ke ag. Ěn kã kejēn Noé tóg barco tỹ ĩn kãra rã mũ. ³⁹ Hã ra tóg ag mỹ tỹ nén ũ tũ tĩ, ti tỹ barco kãra rã mũ ti. Kejēn ta tóg kutē mũ, kỹ goj tóg var mũ sir. Kỹ ag tóg kãgter kãn mũ sir vãhã. Ge ti nĩnh mũ, ěprã ke fi kósin kãtĩg mãn kỹ, inh kãtĩg mãn kỹ mỹr. ⁴⁰ Ěn kã ũn régre ag vỹ ajag japy ki rãnhřãj ke mũ. Inh kãtĩg mãn kỹ sóg ũn pir jé prēr ke mũ, jãvo ti régre vỹ tá jēnh mũ sir. ⁴¹ ũn régre fag vỹ ěgtynyn nỹtĩnh mũ, jagnē mré, kurã ěn kã. Kỹ sóg ũn pir fi jé prēr ke mũ, jãvo fi régre fi vỹ tá jēnh mũ gé sir. ⁴² Vēnh ki ěmēmñĩ, nũr tũ ri ke han nĩ. Inh kãtĩg ke hora ki kagtĩg ajag tóg nỹtĩ. Ajag Senhor vỹ tỹ inh nĩ,” he tóg.

⁴³ “Kỹ tag to jykrén nĩ, ha mẽ. Ěg pi(jé) ũ tỹ ěg tỹ nén péju sór mũ kãtĩg ke ki kanhró nỹtĩ!. Ěg tỹ ti kãtĩg ke tỹ hora ki kanhró nỹtĩ ra ěg tóg to ěg tỹ nén ki rĩr mũ vē, kỹ ũ pi(jé) ěg ĩn kãra rãnh ke mũ vē!. Hã ra ěg tóg ki kagtĩg nỹtĩ. ⁴⁴ Ge ti nĩ, inh kãtĩg mãn ke ti. Ha vēnh kãn, ha vēnh ki ěmē. Ěprã ke fi kósin vỹ kãtĩg ke mũ, ajag tỹ inh kãtĩg ke to jykrén tũ ra,” he tóg, Jesus ti.

*Ũn camarada ag to comparação
(Lc 12.41-48)*

⁴⁵ Kỹ tóg ag mỹ ã kãtĩg mãn ke tó mãn mũ. “Kejēn patrão ũ tóg hē ra tĩg sór mũ,” he tóg. “Kỹ tóg ã camarada ag kã ũ tỹ pã'i han mũ, ti tỹ ti jo ã mré camarada ag ki rĩr jé. ũ tỹ ã rãnhřãj ki rĩr há han tĩ ěn kuprēg tóg mũ, ti tỹ ag mỹ vējēn ven jé, vējēn ke horan ki. ⁴⁶ Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kãtĩg mãn ken kã. ⁴⁷ Ti tỹ pã'i han jé tóg ke mũ, ti tỹ ti tũ ki rĩr kãn jé sir. Ki hã sóg tó mũ, ha mẽ. ⁴⁸ Kejēn ti camarada ũ tóg hã ra jykre pãno nĩ. Kỹ tóg tag to jykrén mũ. “Ěg patrão vỹ kãtĩg vãnh han mũ,” he tóg mũ sir, ũn jykre pãno ěn. ⁴⁹ Kỹ tóg ã mré camarada ag vóg kónãn mũ sir, ag mrãnmrãn kỹ. Kỹ tóg ũn kronkron tĩ ag mré kron mũ gé sir, jēn mág han tóg mũ gé sir. ⁵⁰ Kỹ ti patrão vỹ ti kãnhmỹ kãtĩg ke mũ sir, ti tỹ ti kãtĩg ke kurã ki kagtĩg nĩn kỹ, ti horan ke gé, ũn jykre kórég ěn ti. ⁵¹ Ā kãtĩg kỹ tóg ti kapãn ri ke han ke mũ sir, kỹ tóg ti fón ke mũ gé sir, ũn jykre régre ag mré. Tá ag tóg jagtar ke mũ, ajag jã tỹ ag tóg gyngyn ke mũ, tỹ ag tóg gangan ke mũ, jũ kỹ, ũn jykre kórég ěn ag,” he tóg, Jesus ti. Ti tỹ ũ tỹ ti rãnhřãj han kónãn mũ kãmén hã vē.

25

Tátãg tỹ 10 (ke) fag to comparação

¹ Kỹ Jesus tóg ag mỹ ã kãtĩg mãn ke ěn kãmén mãn mũ, kỹ tóg ag mỹ: “ěn kã ũ tỹ kanhkã tá nĩ ěn tỹ tỹ ěg pã'i nĩnh ke vỹ ge nĩnh mũ, ha mẽ,” he mũ. “Tátãg fag ri ke ti nĩnh mũ. ũ tỹ 10 (ke) fag vỹ nỹtĩ, tátãg fag. Vēnh kyprũg ve jé fag tóg lampião vyn kỹ mũ mũ, ũn prũg mũ ěn kato. ² Fag tỹ 5 (ke) fag vỹ jykre kórég nỹtĩ, jãvo ũ fag vỹ jykre há nỹtĩ, ũ tỹ 5 (ke) ũ fag. ³ Kỹ ũn jykre kórég fag vỹ vyrmỹ azeite ma mũ ja tũ nĩ, hã ra tóg sĩn kỹ lampião kãkã nĩ nĩ. ⁴ Fag jãvo ũn jykre há fag vỹ azeite ma mũ mũ, vyrmỹ. ⁵ Hã ra tóg kãtĩg vãnh han mũ, ũn prũg mũ ti. Kỹ tóg kejēn fag nũgnũr há tĩ sir, ti jun tũg ki, kỹ fag tóg nũgnũr kãn mũ sir. ⁶ Meia noite ki vēnh vĩ tóg mẽ há tĩ, kỹ tóg: “!..nĩgnĩ ra..!” he mũ. “!..ũn prũg mũ vỹ kãteg..!” he tóg. “!..Ha ti venh kãmũ jeg..!” he tóg. ⁷ Kỹ tátãg ěn fag vỹ nĩgnĩg kỹ fag lampião gruggrug mũ sir. ⁸ Kỹ ũn jykre kórég fag vỹ ũn jykre há fag mỹ azeite to vĩ mũ. “Ěg mỹ ajag azeite vēnh kãpãm. Nhyn ke ti nỹtĩ ha, ěg lampião ti,” he fag tóg mũ. ⁹ Hã ra ũn jykre há fag tóg fag mỹ: “vó!,” he mũ. “Ěg tỹ ajag mỹ vēnh kãpãm kỹ tóg ěg mỹ kã kyn ke mũ gé, ajag ri kén. Negócio ra mũjēg, ajag tỹ azeite ven jé,” he fag tóg mũ. ¹⁰ Kỹ fag tóg mũ mũ. Fag gunja tá tóg jun mũ sir, ũn prũg mũ ti. Kỹ fag tóg ti mré mũ mũ sir, ũn lampião gru nỹtĩ fag. Vēnh kyprũg ve jé fag tóg mũ mũ, kỹ ag tóg jãnkã ti nĩfēnh mũ sir, ũn jykre kórég fag jy. ¹¹ Kỹ vãhã tátãg ũ fag vỹ tá junjun mũ gé sir, kỹ fag tóg ti mỹ: “Senhor!, Senhor!,” he mũ sir. “Ěg mỹ nón,” he fag tóg. ¹² Hã ra tóg fag mỹ: “ajag ki kagtĩg sóg nĩ, mỹr, ha mẽ,” he mũ,” he tóg, Jesus ti. ¹³ “Hã kỹ sóg

ājag mý: věnh ki rīr, nūr tū ri ke han kŷ, he mū. Kātīg jé sóg ke mū. Hā ra ājag tóg inh kātīg ke kurā ki kagtīg nŷtī, inh hora ki ke gé. Hā kŷ inh jāvānh to krónh ke tūg nī,” he tóg, Jesus ti.

Ū camarada ag to comparação

(Lc 19.11-27)

¹⁴ Kŷ Jesus tóg: “inh kātīg mǎn ke vŷ tag ri ke nīnh mū gé, ha mē,” he mū. “Kejēn ū tóg ga ū venh tīg sór mū, kŷ tóg ā camarada ag jé prēr mū, ti tŷ ag mŷ ā tŷ nén kar věnh kǎpām jé, ā jānkamy kar. ¹⁵ Ū mŷ tóg jānkamy kāmur tŷ 5 (ke) vin mū, ū mŷ tóg ti kāmur régre vin mū, ū mŷ tóg ti kāmur pir nīm mū. Ūn krī há ěn mŷ tóg ti kāmur e vin mū, ūn krī pǎgsī ěn mŷ tóg ti kāmur pir nīm mū. ¹⁶ Kŷ ū tŷ ti kāmur tŷ 5 (ke) mǎg mū ěn vŷ tī mū. Jānkamy ěn tŷ rānhrāj mǎg han kŷ tóg kejēn ū tŷ 5 (ke) ū mǎg mū, kŷ ti tū vŷ tŷ ti kāmur tŷ 10 (ke) nŷtī sir. ¹⁷ Kŷ ū tŷ ti kāmur régre mǎg mū ěn vŷ tŷ rānhrāj mū gé. Ti kāmur régre ū mǎg tóg mū sir, ā rānhrāj to, kŷ tóg tŷ 4 (ke) nŷtī. ¹⁸ Ag jāvo ū tŷ ti kāmur pir mǎg mū ěn vŷ ā tū nég tī mū sir. Ā patrão tŷ ti mŷ jānkamy nīm ěn nég tóg mū, mŷr, ha mē.

¹⁹ Kejēn ag patrão vŷ vŷn ke mū sir, si há tī kŷ. ²⁰ Kŷ ti camarada tóg ti venh kātī mū, ū tŷ ti kāmur tŷ 5 (ke) mǎn ja ěn ti. Kŷ tóg ti mŷ ū tŷ 5 (ke) ū ěn ven mū sir, ti ganho ti, kŷ tóg ā patrão mŷ: “ū tŷ 5 (ke) vin ā tóg inh mŷ,” he mū, “hā ra sóg tŷ rānhrāj kŷ ū tŷ 5 (ke) ū mǎn ja nī,” he tóg. ²¹ Kŷ ti patrão tóg ti mŷ: “jykre há ā tóg nī,” he mū. “Ā tū ki rīr há han ā tóg nī mŷr. Nén sī ki rīr há han ja ā tóg nīgtī, kŷ sóg ā mŷ nén ū e vin sór mū, ā tŷ ki rīr jé. Ā patrão fe tŷ mrin ke ā mŷr. Hā inh mré kātīg,” he tóg, ti patrão ti. ²² Kŷ ti camarada ū tóg jun mū gé, ū tŷ ti kāmur régre mǎn ja ěn ti. Kŷ tóg ti mŷ: “inh mŷ ā tóg ti kāmur régre vin ja nī,” he mū. “Tŷ rānhrāj kŷ sóg ūn régre ū mā. Hā vē ha,” he tóg. ²³ Kŷ ti patrão tóg ti mŷ: “jykre há ā tóg nī,” he mū gé. “Ā tū ki rīr há han ā tóg nī mŷr. Nén sī ki rīr há han ja ā tóg nīgtī, kŷ sóg ā mŷ nén ū e vin sór mū, ā tŷ ki rīr jé. Ā patrão fe tŷ mrin ke ā mŷr. Ha inh mré kātīg,” he tóg, ti patrão ti.

²⁴ Kŷ ti camarada ū tóg jun mū gé sir, ū tŷ ti kāmur pir mǎn ja ěn ti. Kŷ tóg ti mŷ: “Senhor’,” he mū. “Vī tar han ā tóg tīgtī, ki kanhró sóg nī. Ā tŷ nén krān ja tū ěn mǎg ā tóg tīgtī, ā tŷ ti fy vām tū ra ā tóg ti kanē ve sór tīgtī. ²⁵ Hā kŷ sóg mūmēg kŷ ti kāmur né. Ā tū ti hā vē ha,” he tóg, ti patrão mŷ. ²⁶ Kŷ ti patrão tóg ti mŷ: “jykre kórég ā tóg nī,” he mū. “Ā tū ki rīr kónān ā tóg nī mŷr. Inh mŷ isŷ nén krān ja tū mǎg tīgtī? Inh mŷ isŷ nén ū fy vām tū ra ti kanē ve sór tīgtī? Hā ki kanhró ā mŷ nī? ²⁷ Ā tŷ ne jé inh jānkamy tŷ banco ki rānhrāj tī ag mŷ vin ja tū nī nē? Kŷ sŷ ti juro ven kŷ sóg isŷ kǎfór mǎn ke vē vē. ²⁸ Ti tū ma ra,” he tóg mū sir, polícia ag mŷ. “Inh camarada ū mŷ nīm, sŷ ti mŷ nīm ja ěn ti. Ū tŷ ti kāmur tŷ 10 (ke) mǎg mū ěn mŷ nīm, ti kāmur pir tŷ, sŷ ūn jykre kórég tag mŷ nén nīm ja ěn ti,” he tóg, ag patrão ti, polícia ag mŷ,” he tóg, Jesus ti. ²⁹ “Ge ti nī. Ūn tū mǎg vŷ mǎn mǎn mū, kŷ tóg ti mŷ tū' henh ke tū pē nī. Ūn tū tū ěn tū sī mǎn jé ag tóg ke mū, kŷ tóg tŷ tū tū nī sir,” he tóg, patrão ti. ³⁰ “Kŷ inh camarada kórég tag fón, kutyg ja ěn kākā. Tá ag tóg jagtar tī, ājag jā tŷ ag gyngyn ke tī, vēso jū kŷ,” he tóg, patrão ti,” he tóg, Jesus ti, ā tŷ ā kātīg mǎn ke kāmén kŷ.

Jesus tŷ věnh kar jykre tugnŷm ke

³¹ Kŷ Jesus tóg ag mŷ: “ěprā ke fi kósín ěn kātīg mǎn kŷn ge nīnh mū, ha mē,” he mū. “Inh kātīg mǎn kŷ sóg tar pē kātī mū, sīnvī. Isŷ jēgnē jafā ag vŷ inh mré kāmūnh ke mū. Kŷ sóg inh nīgja kri nīnh ke mū sir, kŷ inh jykre tar vŷ věnh ven ke mū. ³² Kŷ ěprā ke kar vŷ inh jo věnh mǎn kǎn ke mū sir. Kŷ sóg věnh kar věnh kǎpām ke mū sir, ha mē. Carneiro mré cabrito ki rīr tī ěn vŷ kejēn ā mēg věnh kǎpām tī. Carneiro ag tŷ tóg vŷrmŷ vin tī, cabrito ag tŷ ke gé. ³³ Kŷ tóg carneiro ag tŷ ā pēgja tá vin tī, jó tóg cabrito ag tŷ ā jakānh tá vin tī. Tag ri ke han jé sóg ke mū. ³⁴ Tŷ sóg věnh kar kri pǎ'i mǎg nīnh mū, kurā ěn kǎ. Kŷ sóg inh pēgja tá nŷtīnh ke mū ag mŷ: “ha inh mré kāmū jēg,” henh ke mū. “Inh panh vŷ ājag to vī há han mū mŷr. Topē tŷ ga tǎg mré kanhkā tǎg venh kāmū

jêg. Topê tỹ ga han kurã ên kã tóg ãjag hã kuprêg ja nĩ, ãjag tỹ ti tỹ ga tãg mré kanhkã tãg tag ve jé. ³⁵ Kejên sóg kókĩr nĩ ja nĩgtĩ, kỹ ãjag tóg inh jên. Isỹ kron há nĩn kỹ ãjag tóg inh mỹ goj jun. Isỹ ãjag ĩn tá jun kỹ ãjag tóg inh mỹ: “ha kãrã, êg mré nĩ,” he ja nĩgtĩ gé. ³⁶ Inh kur tũ nĩn kỹ ãjag tóg inh mỹ kur vin. Inh kaga nĩn kỹ ãjag tóg inh venh kãmũ ja nĩgtĩ. Ise kỹ jê kỹ ãjag tóg inh venh kãmũ ja nĩgtĩ gé,” he jé sóg ke mũ ag mỹ,” he tóg.

³⁷ “Kỹ ùn jykre kuryj tag ag vỹ inh mỹ: “Senhor,” henh ke mũ. “Êg hẽ kã ã kókĩr vé, êg tỹ ã mỹ vjêjên ven jé? Êg hẽ kã ã kron há tĩ vé, êg tỹ ã mỹ goj ven jé? ³⁸ ã hẽ kã êg ĩn tá jun, êg tỹ ã mỹ: “ha kãrã,” he jé? Êg hẽ kã ã kur tũ vé, êg tỹ ã mỹ kur vin jé? ³⁹ Êg hẽ kã ã kaga vé, êg hẽ kã ã se vé, êg tỹ ã venh kãmũ jé? Ki kagtĩg êg nỹtĩ,” he jé ag tóg ke mũ, inh mỹ.

⁴⁰ Kỹ sóg ag mỹ: “ùn jagãgtar ag jagãgtãn ja ãjag tóg nĩgtĩ, inh mré ke ag, hã ra tóg ãjag tỹ inh jagãgtãn ri ke nĩ, ãjag tỹ ag jagãgtãn ja ti, ki hã sóg tó mũ,” he jé sóg ke mũ, isỹ tỹ pã'i mág nĩn kỹ,” he tóg, Jesus ti.

⁴¹ “Kỹ sóg inh jakãnh tá nỹtĩ ag mỹ: “ha mũjêg, tãra,” henh ke mũ gé. “Inh panh vỹ ãjag mỹ vĩ kónãn. Pĩ nhyr vãn ra mũjêg. Nén-Kórég mỹ tóg kar kỹ nĩ, pĩ nhyr vãn ên ti, Nén-Kórég tỹ jêgnê jafã ag mỹ tóg kar kỹ nĩ gé. Ên ra mũjêg. ⁴² Inh kókĩr ra ãjag pi(jé) inh mỹ vjêjên ven'. Isỹ kron há ra ãjag pi(jé) inh mỹ goj jun'. ⁴³ Isỹ ãjag ĩn tá jun mũ ra ãjag pi(jé) inh mỹ: “ha kãrã,” he ja nĩgtĩ'. Isỹ kur tũ ra ãjag pi(jé) inh mỹ ù vin'. Inh kaga nỹ ra, ise kỹ jê ra ãjag pi(jé) inh venh kãmũ ja nĩgtĩ’,” he jé sóg ke mũ,” he tóg.

⁴⁴ “Kỹ ag tóg inh mỹ kenh ke mũ gé. “Senhor,” he jé ag tóg ke mũ gé. “Êg hẽ kã ã kókĩr vé, ã kron ha ti? ã hẽ kã êg ĩn tá jun'? Êg hẽ kã ã kur tũ vé', ã kaga ti', ã se ti', êg tỹ ã ki rĩr jé? Ki kagtĩg êg nỹtĩ,” he jé ag tóg ke mũ gé.

⁴⁵ Kỹ sóg ag mỹ: “ùn jagãgtar ag jagãgtãn ja tũ ãjag tóg nĩgtĩ,” henh ke mũ, “hã kỹ tóg ãjag tỹ inh jagãgtãn tũ ri ke nĩ, ki hã sóg tó mũ, mỹr, ha mẽ,” he jé sóg ke mũ. ⁴⁶ Kỹ ag tóg jagãgtar kenh ke mũ, hã ra tóg tũ' henh ke tũ nĩ, ag jagtar ke ti. Ag jãvo ùn jykre há ag vỹ rĩr krỹg ja tũ venh ke mũ,” he tóg, Jesus ti.

26

Ag tỹ Jesus tén sór

(Mc 14.1-2; Lc 22.1-2; Jo 11.45-53)

¹ Vãhã tóg tó kãn ja nĩgtĩ, ti tỹ nén tónh ke ja ti, Jesus ti. Kỹ tóg ã mré mũ tĩ ag mỹ: ² “kurã régre tũg kỹ tóg êg festa mág tỹ Páscoa nĩ,” he mũ. “Ên kã ag tóg êprã ke fi kósĩn ti senh ke mũ, kỹ ag tóg ti fêg ke mũ, ka to ti sa jé. Inh hã vẽ,” he tóg, Jesus ti.

³ Hã ra Topê tũ ki rĩr tĩ to pã'i mág ag vỹ vênh mãn mũ sir, Topê vĩ to professor ag mré hã, kófa ag mré ke gé. Pã'i mág ĩn tá ag tóg vênh mãn mũ sir, pã'i ên jijin hã vỹ: Caifás, he mũ. ⁴ Kỹ ag tóg Jesus se to jykrén mũ sir. Ag tỹ ti vatãnh tá ti kãgmĩ sór vẽ, ti se jé, ti tén jé. ⁵ Kỹ ag tóg to jykrén kỹ: “festa tag to mẽ jé êg tóg ke mũ ver,” he mũ. “Êg tỹ festa kã ti se kỹ vênh génh mág hỹn tóg kutênh mũ, ha vemnĩ,” he ag tóg mũ sir jagñê mỹ.

Jesus tỹ Betânia tá nĩ

(Mc 14.3-9; Jo 12.1-8)

⁶ Ên kã Jesus tóg kejên êmã tỹ Betânia tá nĩ nĩ, Simão ĩn krêm, vênh kaga kren vãn han ja ên ĩn krêm. ⁷ Ti jêg nĩ ra ù fi tóg tá jun mũ, garrafa mãn kỹ. Pó kupri tânãj tỹ tóg há nĩ, garrafa ti. Ti ki nĩ vỹ tỹ nén kar tãg nĩ, ger há ên, ùn kaja e ên. Ti gãnh tãg fi tóg mũ, ger há ên tỹ. ⁸ Kỹ ti mré mũ tĩ ag tóg fi vég mũ, hã ra tóg ag mỹ kórég nĩ. Fi to jũ kỹ ag tóg: “fi tỹ ne jé nén kaja e kókén nê?” he mũ. ⁹ “Êg tỹ ger há tag fón ke vẽ vẽ, kaja há to, êg tỹ ùn jagãgtar ag mỹ vin jé,” he ag tóg mũ.

¹⁰ Kỹ Jesus tóg mēg mũ, ag vĩ ti, kỹ tóg ag mỹ: “ãjag tỹ ne jé fi mỹ kaga han nê?” he mũ. “Inh jykre ki króm fi tóg. ¹¹ Inh hã tóg ver nĩ sĩ han mũ, ãjag mré, jãvo ùn jagãgtar ag vỹ kurã kar ki ãjag mré nỹtĩ nĩ. ¹² Fi tỹ inh kãn vẽ, ag tỹ vênh kej tá inh fón jé hã jé fi tóg ger há tag tỹ inh kri kujêg. ¹³ Ag tỹ vênh vĩ sér tugtón kỹ ag tóg fi tỹ nén han mũ tag

tónh ke mũ gé, ga kar mĩ hã, kÿ vãnh kar vÿ fi tÿ nén han mũ mễnh ke mũ, ha vemnĩ. Ki hã sóg tó mũ,” he tóg, Jesus ti.

Judas tÿ pã'i ag mÿ Jesus ven ke

(Mc 14.10-11; Lc 22.3-6)

¹⁴ Kar kÿ ù tÿ 12 (ke) ag kã ù tóg Topẽ tũ ki rĩr tĩ to pã'i ag venh tĩ mũ. Ûn tĩg mũ jÿjÿn hã vÿ: Judas Iscariotes, he mũ. ¹⁵ Tá jun kÿ tóg ag mÿ: “sÿ ãjag mÿ Jesus ven ke vễ, ãjag tÿ ti se jé,” he mũ. “Ãjag mÿ inh mÿ kajãm ke tũ, sÿ ãjag mÿ ti ven ke ti?” he tóg. Kÿ ag tóg ti mÿ: “vó,” he kÿ jãnkamy tÿ 30 (ke) tÿ kajãm mũ sir. ¹⁶ Ti tÿ jãnkamy ẽn mãn kar kÿ tóg to jÿkrén mũ. “Inh hÿn hẽ ri kenh mũ, isÿ vãnh kar vatánh tá ag mÿ Jesus ven jé?” he tóg mũ sir, Judas ti, ón kÿ Jesus mré tĩ mũ ẽn ti.

Jesus tÿ Páscoa ko

(Mc 14.12-21; Lc 22.7-14, 21-23; Jo 13.21-30)

¹⁷ Kejẽn tóg pão jẽgja tũ konh ke kurã tá krÿg mũ, kÿ Jesus mré mũ tĩ ag tóg ti mÿ: “ẽg hÿn hẽ tá ã mÿ carneiro sĩ tãnh mũ, ẽg tÿ kon jé?” he mũ. ¹⁸ Kÿ tóg ag mÿ: “ẽmã mág tag ra mÿjẽg,” he mũ. “Tá ù tóg nĩ nĩ. Ti mÿ: “ẽg Senhor vÿ ã mÿ vãnh vĩ jẽnẽg mũ,” hemnĩ. “Inh kurã vÿ kakó tĩ ha, kÿ sÿ ã ãn krẽm Páscoa konh há tóg tĩ, inh mré mũ tĩ ag mré,” he tóg mũ,” hemnĩ ti mÿ,” he tóg, Jesus ti. ¹⁹ Kÿ ag tóg mũ mũ sir, ti mré mũ tĩ ag. Ti tÿ ag mÿ tó mũ han ag tóg mũ sir. Cordeiro tãnh ag tóg mũ sir, ag tÿ Páscoa kã ko tĩ ẽn.

²⁰ Rã pur kar kÿ tóg tá jun kÿ ù tÿ 12 (ke) ag mré nĩ mũ sir, jẽn jé. ²¹ Ag jẽn kã tóg ag mÿ: “ãjag kãmĩ ù tóg pã'i ag mÿ inh ven ke mũ, ag tÿ ise jé, ki hã sóg tó mũ,” he mũ. ²² Kÿ tóg ag fe kaj tĩ sir, kÿ ag tóg ti mÿ: “inh mÿ vó'? Inh mÿ vó'?” he kãn mũ sir.

²³ Kÿ tóg ag mÿ: “ù tÿ inh mré pão tÿ kã punpun mũ ẽn hã vễ,” he mũ. “Û tÿ ã nĩgẽ tÿ pẽnky kãki pão tÿ kã punpun mũ ẽn hã vễ. Ẽn hã vÿ ag mÿ inh ven ke mũ,” he tóg. ²⁴ “Tĩg jé sóg ke mũ, isÿ tÿ ẽprã ke fi kósin nĩn kÿ. Hã kÿ tóg rán kÿ nĩ, isĩg ke ti. Hã ra ù tÿ ag mÿ inh ven ke mũ ẽn mÿ tóg vĩ kónãn tãvĩ han ke mũ, Topẽ ti. Ti tÿ mur ja tũ nĩ ra tóg ti mÿ há tĩ vễ,” he tóg, Jesus ti.

²⁵ Kÿ Judas tóg ti mÿ ke mũ gé sir, ù tÿ pã'i ag mÿ ti ven ke mũ ẽn ti. Ẽn tóg ti mÿ: “Senhor', inh hã mÿ'?” he mũ gé. Kÿ tóg ti mÿ: “ki hã ã tóg tó mũ,” he mũ, Jesus ti.

Santa Ceia

(Mc 14.22-26; Lc 22.15-20; 1Co 11.23-25)

²⁶ Kÿ ag tóg jẽg mũ. Ag jẽn nÿtĩ ra Jesus tóg ẽmĩ mãg mũ sir. Topẽ mré tóg vĩ mũ sir, ẽmĩ to, kÿ tóg vãnh kã kugpãn kÿ ag mÿ vãnh kãpãm mũ sir, ti mré mũ tĩ ag mÿ. Kÿ tóg: “té, ha kó,” he mũ. “Inh hã vễ,” he tóg, ẽmĩ to.

²⁷ Kar kÿ tóg copo vãg mũ gé sir, vinho tÿ ki jẽn kÿ. To tóg Topẽ mré vĩ mũ gé. Ag mÿ copo jun kÿ tóg: “ha kronkron,” he mũ. ²⁸ “Inh kyvénh hã vễ,” he tóg, vinho to. “Inh kyvénh tÿ vãnh kar jagfy kutẽn hã vễ. Sÿ vãnh e mré vãnh jÿkre tãg han to ke hã vễ, hã vÿ tÿ inh kyvénh ti nĩ. Inh kyvénh tag to Topẽ vÿ ãjag mÿ vãnh pãte fón ke mũ, ãjag tÿ ti vĩ mranh ja ti,” he tóg. ²⁹ “Ha mẽ, uva me kron mãn ke tũ inh nĩ ha. Kejẽn sóg kron mãn ke mũ, inh panh tÿ tÿ ẽg pã'i nĩnh ke kurã ẽn kã. Kÿ sóg ãjag mré kron mãn ke mũ, ha vemnĩ,” he tóg, Jesus ti.

³⁰ Kÿ ag tóg jãn mũ gé sir, ag jẽn kar kÿ. Ag tÿ Topẽ jé tó kar kÿ ag tóg krĩ tÿ Oliveiras ra mũ mũ sir.

Jesus tÿ Pedro mÿ tó

(Mc 14.27-31; Lc 22.31-34; Jo 13.36-38)

³¹ Ag tÿ ra mũn kÿ Jesus tóg ag mÿ kãmén mũ. “Kuty tag kã ãjag tóg inh fón kÿ mũ kãn ke mũ,” he tóg mũ, ã mré mũ tĩ ag mÿ. “Hã kÿ tóg rán kÿ nĩ. “Û tÿ carneiro ki rĩr tĩ ẽn tãnh jé sóg ke mũ, kÿ ti mẽg ag vÿ krig ke kãn ke mũ,” he tóg, Topẽ vĩ tÿ rán kÿ nĩ ki,” he tóg, Jesus ti. “Hã ve jé ãjag tóg ke mũ. ³² Hã ra sóg iser kar kÿ rĩr mãn ke mũ. Ẽn kã sóg ãjag jo tĩg ke mũ, ga tÿ Galiléia ra,” he tóg, Jesus ti.

³³ Kÿ Pedro tóg ti mÿ: “inh pi(jé) ã fón kÿ tĩg ke mũ', ag kar tÿ ã ré kÿ mũ mũ ra,” he mũ. ³⁴ Hã ra Jesus tóg ti mÿ: “ha vé,” he mũ. “Ûri, kuty tag kã ã tóg iso: ti ki kagtĩg sóg

nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti. ³⁵ Hã ra Pedro tóg ti mĩ: “sỹ ã mré ter ke mũ ra sóg ã to: ti ki kagtĩg sóg nĩ, henh ke tũ pẽ nĩ,” he mũ. Kĩ ti mré mũ tĩ ag tóg hã tó kãn mũ gé sir.

Getsêmani tá

(Mc 14.32-42; Lc 22.39-46)

³⁶ Kĩ Jesus tóg ka krãn ja tá jun mũ sir, ag mré, ka krãn ja ãn jijin hã vỹ: Getsêmani, he mũ. Kĩ tóg ã mré mũ tĩ ag mĩ: “ha ver nĩgnĩ, tag ki,” he mũ. “Sỹ ver Topẽ mré vĩnh ke vẽ, tãtã,” he tóg. ³⁷ Kĩ tóg Pedro mré Zebedeu krẽ ag mĩ: “inh mré kãmũ jẽg,” he mũ. Kĩ tóg fe kaj nĩ sir. Mũmẽg tóg mũ sir. ³⁸ Kĩ tóg ag mĩ: “inh fe kaj mág tóg tĩ,” he mũ, “kĩ inh fe kaj tóg inh mĩ iser ri ke nĩ,” he tóg. “Tag ki nỹtĩmnĩ, nũgnũr tũg nĩ, inh ri kén,” he tóg, Jesus ti.

³⁹ Kĩ tóg tĩg sĩ han mãn kĩ mũg ke mũ sir, Jesus ti, kĩ tóg ga kri nỹ mũ. Topẽ mré tóg vĩ mũ. “Panh’,” he tóg mũ. “Mỹ ã tỹ inh jagtar ke tag tỹ tũ' he jãvãnh?” he tóg. “Hã ra isỹ ã mĩ nén to vĩ mũ tag han tũg nĩ. ã tỹ nén han ke mũ ãn hã han nĩ,” he tóg, Jesus ti.

⁴⁰ Kar kĩ tóg ã mré mũ tĩ ag venh tĩ mũ sir, hã ra ag kar tóg nũgnũr ja nĩ. Kĩ tóg Pedro mĩ: “mỹ ãjag mĩ hora pir ki nũr tũ kórég?” he mũ. ⁴¹ “Nũr tũg nĩ, Topẽ mré vĩmnĩ, ãjag tỹ ti vĩ mranh tũ nĩ jé, ù tỹ ãjag kutãn mũ ra. ãjag tỹ mranh sór tũ vẽ vẽ, hã ra ãjag tóg to krój nỹtĩ, hã kĩ ãjag tóg mranh ke mũ,” he tóg, Jesus ti.

⁴² Kĩ tóg tĩg mãn mũ sir, kĩ tóg Topẽ mré vĩ mãn mũ. Kĩ tóg: “panh’,” he mãn mũ. “ã tỹ inh jagtar ke tag tỹ tũ' henh jãvãnh nĩn kĩ sóg jagtar ke mũ. ã tỹ isỹ nén han ke mũ ãn han nĩ,” he tóg. ⁴³ Kĩ tóg ag venh tĩg mãn mũ gé sir, hã ra ag tóg nũgnũr mãn nỹtĩ, ag nũr há pẽ tĩn kĩ. ⁴⁴ Kĩ tóg ag mĩ vĩ tũ ra tĩ mũ sir, Topẽ mré vĩ mãn jé. Ti mĩ tóg ã tỹ tó ja ãn tó mãn mũ. ⁴⁵ Kĩ tóg ã mré mũ tĩ ag venh tĩg mãn mũ gé sir, kĩ tóg ag mĩ: “ãjag ne tóg nũgnũr ja nĩ” he mũ, “vẽnhkãn ja ãjag tóg nĩ,” he tóg mũ. “Pétẽm ti huri, hora ti. Ti tỹ ag mĩ inh fẽg ke nẽ ha, Topẽ vĩ mranh tĩ ag mĩ, isỹ tỹ ãprã ke fi kósĩn nĩn kĩ,” he tóg. ⁴⁶ “Nĩgnĩ ra, mũ jé ha. ù tỹ ag mĩ inh ven mũ vỹ jun ke mũ ha,” he tóg, Jesus ti.

Ag tỹ Jesus se

(Mc 14.43-50; Lc 22.47-53; Jo 18.3-12)

⁴⁷ Ti tỹ ver tỹ vēmén jẽ ra Judas tóg jun mũ sir. ù tỹ 12 (ke) ag kã ù ãn vẽ, Judas ti. Ti mré polícia ag tóg kãmũ mũ. Rógro génh kĩ ag tóg kãmũ mũ, ka kykyv génh kĩ ke gé. Topẽ tũ ki rĩr tĩ to pã'i ag tỹ ag jẽgnẽ vẽ, kófa ag tỹ ke gé. ⁴⁸ Hã ra ù tỹ ag mĩ Jesus ven ke mũ ãn tóg ag mĩ: “ti ki sóg nhun kenh mũ,” he ja nĩ. “Sỹ ùn ki nhun ke mũ ãn hã semnĩ,” he ja tóg nĩ ag mĩ. ⁴⁹ Hã kĩ tóg vēsỹmér Jesus to grẽn ke kĩ ti mĩ: “ã mĩ há, Senhor'?” he mũ. Kĩ tóg ti ki nhun ke mũ, Judas ti. ⁵⁰ Hã ra Jesus tóg ti mĩ: “régre’,” he mũ. “ã tỹ nén han ke mũ ãn han nĩ,” he tóg.

Kĩ polícia ag tóg vēsỹmér ti to ge kĩ ti ség mũ sir, Jesus ti. ⁵¹ Kĩ Jesus mré tĩ tĩ ù tóg rógro kunũnh kĩ polícia ù nĩgrẽg kym mũ sir. Topẽ tũ ki rĩr tĩ to pã'i mág camarada vẽ, ti tỹ ùn nĩgrẽg kym mũ ãn ti. ⁵² Hã ra Jesus tóg ti mĩ: “ã rógro fẽg han ra,” he mũ. “Èg tỹ rógro tỹ ke kĩ ag tóg rógro tỹ ãg tén ke mũ gé, ha vemnĩ,” he tóg. ⁵³ “Isỹ inh panh mĩ to vĩ mũ ra tóg inh mĩ ã tỹ jẽgnẽ jãfã ag jẽgnẽnh ke mũ vẽ, ùn e ãn, 12 mil (ke) kãfór, ag tỹ ijy nĩgãn jé. ⁵⁴ Hã ra sóg ve sór mũ, nén tỹ iso rán kĩ nĩ ãn ti, hã kĩ sóg ti mĩ tag to vĩ tũ nĩ. Ve jé sóg ke mũ ha, inh jagtar ke ti,” he tóg, Jesus ti.

⁵⁵ ãn kã tóg polícia ag mĩ: “ãjag ne tóg rógro génh kĩ kãmũ mũ', ka kykyv mré', ãjag tỹ ise jé',” he mũ. “Inh pi(jé) tỹ bandido nĩ'. Kurã kar ki sóg ãjag mré jé ja nĩgtĩ, Topẽ jo ãn krẽm. Vẽnh kar kanhrãn kĩ sóg tá nĩ ja nĩgtĩ, hã ra ãjag tóg tá iség tũ nĩ vỹ mỹr,” he tóg. ⁵⁶ “Hã ra sóg nén tỹ iso rán kĩ nĩ ãn vэг mũ, Topẽ vĩ tó tĩ ag tỹ iso nén rán ja ãn ti, hã kĩ ãjag tóg ke mũ,” he tóg, Jesus ti.

Kĩ ti mré mũ tĩ ag tóg ti ré kĩ pétẽ kãn mũ sir, vẽnẽ pigju jé, mỹr, ha mẽ.

Pã'i ag tỹ Jesus ki jēmẽ

(Mc 14.53-65; Lc 22.54-55, 63-71; Jo 18.12-14, 19-24)

⁵⁷ Kĩ ù tỹ ti ség mũ ag tóg ti pére mũ mũ, Topẽ tũ ki rĩr tĩ to pã'i mág ra, hã vỹ: Caifás, he mũ. Tá ag tóg vênh măn kỹ nỹtĩ, Topẽ vĩ to professor ag, kófa ag ke gé.

⁵⁸ Hã ra Pedro tóg Jesus nón kãtĩ mũ, kuvar há tá, kỹ tóg Topẽ tũ ki rĩr tĩ to pã'i mág ãn kãra rã mũ sir. Polícia ag mré tóg tá nĩ nĩ. Ti tỹ ag tỹ Jesus tỹ hên ri kenh ke mũ ãn ve sór vẽ.

⁵⁹ Kỹ Topẽ tũ ki rĩr tĩ to pã'i ag tóg ù ag jãvãnhvãnh mũ, ag tỹ Jesus jykre kórég tó jé. Ti vĩ to ag tóg ti tén sór mũ, kófa ag, vênh jyvên tĩ kar ag. ⁶⁰ Hã ra ag tóg ù tỹ ki hã tó mũ vég tũ nĩ. Û tỹ hên ri ke ag tóg ón kỹ ti jykre kórég tó mũ, hã ra tóg ag mỹ ki krov tũ nĩ. Kỹ vãhã ùn régre ag tóg tá junjun kỹ ón kỹ ti to vĩ mũ. ⁶¹ Ën ag vỹ tóg sir: “ti vĩ vênhmỹ mẽ ãg,” he mũ. “Topẽ jo ãn kókén há inh nĩgtĩ, he ja tóg nĩ. Kókén kar sóg ù han măn ke mũ. Kurã tãgtũ ki tóg kar kỹ nĩ, ãn ti, ha vemnĩ, he ja tóg nĩ, Jesus ti,” he ag tóg mũ, ón kỹ ti to vĩ kỹ.

⁶² Kỹ Topẽ tũ ki rĩr tĩ to pã'i mág vỹ jëgnẽ mũ sir, kỹ tóg ti mỹ: “ã tỹ nén tónh ke mỹ tũ'?” he mũ. “Ag hã ne ã vĩ kónãn tag tó ja nĩ gé” he tóg. ⁶³ Hã ra Jesus tóg hun ke mũ, nén ù tó mẽ kã. Kỹ pã'i mág tóg ti mỹ: “Topẽ vỹ rĩr nĩ,” he mũ. “Ûn rĩr nĩ vỹ ãg vég mũ. Ti rĩnve sóg ã ki jëmẽg mũ. ã mỹ tỹ Cristo nĩ, ã mỹ tỹ Topẽ kósin nĩ? Ha ãg mỹ tó,” he tóg, pã'i mág ti. ⁶⁴ Kỹ Jesus tóg ti mỹ: “ki hã ã tóg tó mũ,” he mũ. “Kỹ sóg ãjag mỹ tag tó mũ gé, ha mẽ. Ëprã ke fi kósin ãn vỹ tỹ inh nĩ,” he tóg. “Kỹ ãjag tóg ù tỹ nén (ũ) kar han mũ ãn pëgja tá inh venh ke mũ. Kỹ sóg kanhkã góg kãmĩ kãtérenh ke mũ gé,” he tóg, Jesus ti.

⁶⁵ Kỹ pã'i mág ãn tóg ã kur tỹ jaran' ke mũ sir, jũ kỹ. Kỹ tóg: “Topẽ kato vĩ kónãn ti huri,” he mũ. “Mẽ kãn ãg mỹr, kỹ ãg tóg ù tỹ ti jykre kórég tónh ke ù jãvãnh măn ke tũ nĩ ha,” he tóg. ⁶⁶ “Ëg hỹn ti tỹ hẽ ri kenh mũ ha?” he tóg. Kỹ ag tóg ti mỹ: “ter jé tóg ke mũ, ti vĩ tag to,” he kãn mũ sir. ⁶⁷ Kỹ ag tóg ti kakã to sugug mũ sir, ti kakã ki tãnh ag tóg mũ gé sir. Ag kã ù tóg ti vatãnh tá ti tãnh kỹ ti mỹ: ⁶⁸ “Cristo nẽji tỹ ã jẽ, kỹ ã nẽji nén kar ki kanhró nĩ,” he mũ. “Û nỹ ã tãnh?” he tóg mũ gé. Ti tãnh kỹ tóg ke mũ. Gen kỹ ag tóg ti to é he mũ.

Pedro tỹ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vỹ re tá nĩ nĩ, ãn vãso kã. Kỹ pã'i camarada ù fi tóg ti ve jé kãkutẽ mũ, kỹ fi tóg ti mỹ: “Jesus mré ã tóg tĩg mũ gé, Galiléia tá ke ãn mré,” he mũ. ⁷⁰ Hã ra tóg: “vó,” he mũ. “ã tỹ ne tó nẽ hỹn'?” he tóg mũ, Pedro ti. Kỹ ag kar vỹ ti vĩ mẽg mũ. ⁷¹ Kỹ tóg jãnkã fĩn rãm sór mũ. Hã ra ù fi tóg ti vég mũ gé, kỹ fi tóg tá ke ag mỹ: “Jesus mré ke ù vẽ, Nazaré tá ke ãn mré ke ù vẽ,” he mũ gé. ⁷² Hã ra tóg: “vó,” he măn mũ. “Ti ki kagtĩg sóg nĩ, Topẽ vỹ ki kanhró nĩ,” he tóg, Pedro ti. ⁷³ Si há ke tũ ra ù tỹ tá nỹtĩ ag kã ù ag tóg ti venh kãmũ kỹ ti mỹ hã tó măn mũ gé. Kỹ ag tóg Pedro mỹ: “ha mẽ, ag kã ù vỹ tỹ ã nĩ,” he mũ. “ã vĩ ki ãg tóg ã ki kanhrãn mũ,” he ag tóg mũ. ⁷⁴ Hã ra tóg: “vó,” he măn mũ. “Inh pi(jé) ti ki kanhró nĩ! Inh ón mũ ra Topẽ vỹ inh vóg kónãn mũ vỹ,” he tóg, Pedro ti. Hã ra vësýmér galo tóg kyr mũ. ⁷⁵ Kỹ Pedro tóg Jesus vĩ to jykren mũ, ti tỹ ti mỹ: “iso ã tóg: ti ki kagtĩg sóg nĩ, he tãgtũ han ke mũ, galo kyr ke to hã,” he ja ãn mĩ. Tag mĩ ãkren kỹ tóg tá kãkutẽ mũ sir, hã ra tóg fỹ jagy han mũ sir, Pedro ti.

27

Ag tỹ Pilatos mỹ Jesus ven

(Mc 15.1; Lc 23.1-2; Jo 18.28-32)

¹ Tỹ vaj kỹ kusã ki ag tóg Jesus to jykren mũ sir, Topẽ tũ ki rĩr tĩ to pã'i ag, kófa ag mré hã. Ag tỹ ti tén sór vẽ. ² Kỹ ag tóg ti mrinh mũ sir. Ti pére mũn kỹ ag tóg pã'i mág tỹ governador mỹ ti fëg mũ sir, Pilatos ãn mỹ.

Judas ter

(Hk 1.16-19)

³ Hã ra Judas tóg vég mũ. Pã'i ag mý tóg Jesus ti ven ja nĩ, ag tỹ ti se jé. Kỹ tóg ag tỹ ti tén sór mũ tag vég mũ, Judas ti. Kỹ tóg to jykrén mǎn mũ sir. Vãhã tóg ti mý e tĩ. Kỹ tóg jãnkamy tỹ prata ên ma kãtĩ mũ sir, ù tỹ 30 (ke) ên. Ma kãtĩg kỹ tóg Topẽ tũ ki rĩr tĩ to pã'i ag mý ven mũ, kófa ag mý. ⁴ Kỹ tóg ag mý: “ti kórég han inh,” he mũ. “Ti pi(jé) nén ù kórég han ja nĩgtĩ', hã kỹ tóg vènhmỹ nĩ, ti tỹ inh vĩ to ter kỹ,” he tóg.

⁵ Hã ra ag tóg ti mý: “êg tũ pijé',” he mũ. “Ã tũ hã nẽ',” he ag tóg mũ. Kỹ tóg jãnkamy ên vãm mũ sir, Topẽ jo ìn krêm, kỹ tóg hèn ra tĩ mũ sir. Tá tóg ã nunh kã vènh jãján mũ sir, kỹ tóg ter mũ sir.

⁶ Kỹ Topẽ tũ ki rĩr tĩ to pã'i ag vỹ jãnkamy ên mǎn kỹ to jykrén mũ. “Êg tỹ Topẽ mý jãnkamy tag vin kỹ tóg vènhmỹ tĩ. Vènh kyvénh kajãm ja ti nĩ, hã kỹ êg tóg Topẽ mý vin sór tũ nĩ,” he ag tóg mũ sir, jãnkamy ên to. ⁷ Kỹ ag tóg to vènh mǎn kỹ to jykrén mũ. To jykrén kỹ ag tóg tỹ êpỹ kajãm mũ, ag tỹ tá go'or vég tĩ ên. Tá ag tóg fóg ag kej han sór mũ, fóg tỹ Jerusalém ra pasa tĩ ag mý. ⁸ Hã kỹ êg tóg êpỹ ên to: “êpỹ kyvénh,” he tĩ.

⁹ Hã ra Topẽ vĩ tó tĩ tỹ Jeremias vỹ Judas to tag rán ja nĩ, ha mẽ: “jãnkamy tỹ 30 (ke) tỹ ag tóg êpỹ kajãm ke mũ. Jãnkamy ên tỹ ag tóg êprã ke ù kajãm vén ke mũ, Israel ag, ti kaja tag tỹ ag mý há nỹn kỹ. ¹⁰ Êprã ke ên tỹ kajãm kar kỹ ag tóg tỹ êpỹ kajãm mũ sir, ag tỹ tá go'or vég tĩ ên. Hã tó ja tóg nĩ, inh mý, êg jóg tỹ Topẽ ti,” he ja tóg nĩgtĩ, Jeremias ti. Hã ra tóg ge nĩ.

Pilatos tỹ Jesus ve

(Mc 15.2-5; Lc 23.3-5; Jo 18.33-38)

¹¹ Hã ra Jesus tóg fóg tỹ pã'i mág rã jẽ nĩ. Kỹ pã'i mág tóg ti ki jẽmẽ sór mũ, kỹ tóg: “ã mý tỹ Judeu ag pã'i nĩ'?” he mũ. Kỹ Jesus tóg ti mý: “ki hã ã tóg tó mũ,” he mũ. ¹² Kỹ Topẽ tũ ki rĩr tĩ to pã'i ag tóg ti kato vĩ mág han mũ, kófa ag ke gé, hã ra tóg hun ke kỹ jẽ nĩ. ¹³ Kỹ Pilatos tóg ti mý: “mý ã mý tỹ nén ù tũ nĩ, ag tỹ ã kato vĩ mág han mũ tag ti?” he mũ. ¹⁴ Hã ra Jesus tóg vĩ mǎn tũ nĩ, kỹ tóg Pilatos mý e tĩ sir.

Ag tỹ Jesus to: ter jé tóg ke mũ, he

(Mc 15.6-15; Lc 23.13-25; Jo 18.39-19.16)

¹⁵ Hã ra Pilatos tóg ag mý vése ag kar kã ùn pir kavãg tĩ, festar tỹ Páscoa kar ki. Ti jykre vè. Ag tỹ ùn to vĩ mũ ên kyvãg tóg tĩ. ¹⁶ Kỹ ù tóg se kỹ jẽ nĩ, ên kã. ùn vènhmỹ vè, ù tỹ ag ri ke tũ, ti jijin hã vỹ: Barrabás, he mũ.

¹⁷ Jãvo ag tóg tá vènhmǎn kỹ nỹtĩ, Judeu kar ag. Kỹ Pilatos tóg ag mý: “inh hỹn ù kavãn ha?” he mũ. “Û nỹ ãjag mý há nĩ? Barrabás mý, Jesus mý vó, ag tỹ ù to: “Cristo vỹ tỹ ti nĩ,” he tĩ ên?” he tóg, Pilatos ti. ¹⁸ Pã'i ag tỹ véké Jesus to jũ nỹtĩn ki kanhró tóg nĩ, Pilatos ti. Ti há nĩn hã kỹ ag tóg ti to jũ mũ, hã kỹ tóg ti kavãn sór mũ, Pilatos ti.

¹⁹ Fóg tỹ pã'i ên tỹ vènh jyvèn jafã tá nĩn kỹ ti prũ fi tóg ti mý vènh vĩ jènég mũ, kỹ fi tóg ti mý: “vènh jykre kuryj han ti tĩ,” he mũ, Jesus to. “Hã kỹ ti vóg sór tũg nĩ. Kutỹ tag kã sóg ti to vènh péti kónãn, êg jagtar ke ti ve inh, inh vènh péti ki,” he fi tóg, Pilatos mý vènh vĩ jènèn kỹ, hã kỹ tóg ti kavãn sór tãvĩ han mũ, Pilatos ti. ²⁰ Hã ra Topẽ tũ ki rĩr tĩ to pã'i ag tóg vènh kar krĩn mũ sir, kófa ag mré, vènh kar ag tỹ Barrabás kavar kỹ jẽ ve sór jé, ag tỹ Jesus ter ve sór jé.

²¹ Kỹ fóg tỹ pã'i tóg ag ki jẽmẽ mǎn mũ. “Inh hỹn ùn régre tag ag kã ù tỹ hẽ kavãn mũ ha?” he tóg. Kỹ ag tóg ti mý: “Barrabás ti,” he mũ. ²² Kỹ Pilatos tóg ag mý: “kỹ inh Jesus tỹ hẽ ri kenh mũ?” he mũ. “Ag tỹ ù to: “Cristo vỹ tỹ ti nĩ,” he tĩ ên tỹ inh hẽ ri kenh mũ?” he tóg. Kỹ ag tóg ti mý: “cruz to ti sã,” he kãn mũ sir. ²³ Kỹ fóg tỹ pã'i tóg ag mý: “ti kórég tỹ ne han ti?” he mũ. Hã ra ag tóg prẽnprẽn mũ sir. “!..Cruz to ti sã..!” he ag tóg mũ sir, prẽnprẽn kỹ.

²⁴ Ag tỹ hẽ ri ke tũ tóg nĩ, Pilatos ti, hã kỹ tóg ag mý hã han sór mũ. Vènh génh kutẽ nĩ ve tóg nĩ, hã kỹ tóg goj jé prẽn mũ. Kỹ tóg kã nĩgpég mũ sir, vènh kar rĩnve, Pilatos ti, kỹ tóg ag mý: “inh jykre pijé',” he mũ. “Inh nĩgé kavénh ke tũ ti nĩ, ti kyvénh ti. ùn jykre kuryj vè, kỹ sóg ti tén jãvãnh nĩ. ãjag jykre vè,” he tóg, Pilatos ti. ²⁵ Kỹ vènh kar ag tóg ti

mỹ: “ĕg jykre vĕ,” he kĕn mŭ. “Ēg hĕ ne ti tĕn sŏr mŭ'. Kŷ Topĕ ĕg hĕ vŏg kŏnĕn ke mŭ, ĕg krĕ ag ke gĕ, ti tŷ ti ter to ũ vŏg kŏnĕn ken kŷ,” he ag tŏg, vĕnh kar ĕn ag.

²⁶ Kŷ Pilatos tŏg Barrabĕs kavĕn mŭ sir. Jesus to tŏg soldado ag mŷ: “ha ti mrĕnmrĕn,” he mŭ sir. Ag tŷ ti mrĕnmrĕn kar kŷ Pilatos tŏg ag mŷ ti fĕg, soldado ag tŷ ka to ti sa jĕ.

Soldado ag tŷ Jesus vŏg kŏnĕn

(Mc 15.16-20; Jo 19.2-3)

²⁷ Kŷ fŏg tŷ pĕ'i krĕm soldado ag tŏg Jesus pĕre mŭ mŭ, pĕ'i ĩn ra, ĩn tŷ Palĕcio do Governador ĕn ra. Kŷ ag tŏg soldado ũ ag jĕ prĕr kĕn mŭ. ²⁸ Ti kur kunŷg ag tŏg mŭ, kŷ ag tŏg kur kusŷg tŷ ti kri fŏn mŭ. ²⁹ Sŏnh pirĕn kŷ ag tŏg tŷ ti krĕ tŏgfg mŭ sir, krĕ tŏgfn ja rĕr tŷ. Vĕn tŷ ag tŏg ti nĕgĕ kĕ fĕg mŭ, ti pĕgja tĕ. Kŷ ag tŏg ti krĕm grĕnhgrĕnh ke mŭ sir, ŏn kŷ. Ti to ĕ he ag tŏg mŭ, hĕ kŷ ag tŏg: “viva, Judeu ag pĕ'i,” he mŭ. ³⁰ Kŷ ag tŏg ti to sugŷg mŭ gĕ. Vĕn ĕn tŷ ag tŏg ti krĕ mĕ mrĕnmrĕn mŭ sir.

³¹ Ag tŷ ti nyg kar kŷ ag tŏg ti ki kunŷg mŭ, kur ĕn ti. Kŷ ag tŏg ti tŭ pĕ tŷ ti kĕra rĕg mĕn mŭ sir. Kŷ ag tŏg ti pĕre mŭ mŭ, ag tŷ cruz to ti san jĕ sir.

Jesus tŷ cruz to sa

(Mc 15.21-32; Lc 23.26-43; Jo 19.17-27)

³² Ag mŭn kĕ ag tŏg ũ kato tĕ mŭ, Cirene tĕ ke ũ, ti jijin hĕ vŷ: Simĕo, he mŭ. Ēn mŷ ag tŏg vĕ tar han mŭ, ti tŷ Jesus cruz vyn jĕ ti jo, hĕ kŷ tŏg vyn kŷ tĕ mŭ.

³³ Gen kŷ ag tŏg Gŏlgota tĕ junjun mŭ sir. Gŏlgota to ĕg tŏg: vĕnh krĕ kuka, he tĕ, ĕg vĕ ki. ³⁴ Tĕ junjun kŷ ag tŏg ti mŷ vinagre ven mŭ, nĕn ũ tŷmĕ jynh mrĕ ha. Kŷ tŏg kron sĕ han mŭ, hĕ ra tŏg kron sŏr tŭ nĕ, vĕnhkagta tag. ³⁵ Kŷ ag tŏg cruz to ti sĕg mŭ sir. Ti kur tŷ ag tŏg jagnĕ mŷ vĕnh kĕpĕm mŭ sir, to ag tŏg jogar he mŭ gĕ, ti kur to, soldado ag. ³⁶ Kŷ ag tŏg nĕgnĕg kŷ nŷtĕ, ti ki rĕr jĕ, soldado ag. ³⁷ Ag tŷ nĕn tŷ ti kato vĕ mŭ vŷ rĕn kŷ nĕ, hĕ vŷ: “Jesus, Judeu ag pĕ'i tŷ rei vĕ,” he mŭ. Ti kri tŏg sa, vĕnh rĕn ti. Ti tŷ nĕji vĕsŷ pĕ'i tŷ rei han mŭ to ag tŏg ti tĕn mŭ. ³⁸ Ti kŏm ag tŏg ũn rĕgre ag tŷ cruz to sĕg mŭ gĕ, bandido ag. Kŷ ũ tŏg ti pĕgja tĕ sa, jŏ ũ tŏg ti jakĕnh tĕ sa.

³⁹ Kŷ ũ tŷ mĕ mŭ mŭ ag tŏg ti nyg' he mŭ gĕ, vŷn vŷn hen kŷ. ⁴⁰ “Ā mŷ Topĕ jo ĩn kŏkĕn sŏr mŭ'?” he ag tŏg mŭ. “Ā mŷ kurĕ tĕgtŭ ki ũ han mĕn sŏr mŭ'? Vĕnh kren han ra kema', cruz to kĕtĕre kema', ĕ tŷ tŷ Topĕ kŏsin nĕn kŷ,” he ag tŏg ti mŷ. ⁴¹ Ge ag tŏg mŭ gĕ. Topĕ tŭ ki rĕr tĕ to pĕ'i ag, Topĕ vĕ to professor ag mrĕ hĕ, kŏfa ag mrĕ hĕ. Ti nyg ag tŏg mŭ gĕ, kŷ ag tŏg jagnĕ mŷ: ⁴² “ũ ag krenkren han tŏg, hĕ ra tŏg vĕnh hĕ kren han ki kagtĕg nĕ,” he mŭ. “Israel pĕ'i tŷ rei jĕ cruz to kĕtĕre kema', ĕg tŷ ve jĕ, ĕg tŷ ti ki ge jĕ,” he ag tŏg. ⁴³ “Topĕ ki ti nĕji rĕ kŷ jĕ, kŷ Topĕ jĕ ti kren han, ti tŷ ti to hĕ nĕn kŷ. “Topĕ kŏsin vŷ tŷ inh nĕ,” he ti mŷr,” he ag tŏg ti to, ti nyg kŷ, Judeu pĕ'i ag. ⁴⁴ Kŷ bandido ag, ũ tŷ ti kŏm cruz to nŷtĕ ĕn ag tŏg ti nyg mŭ gĕ.

Jesus ter

(Mc 15.33-41; Lc 23.44-49; Jo 19.28-30)

⁴⁵ Rĕ tŷ ĕg nĕno kĕ sa ra tŏg kuty' he mŭ sir, ga kar mĕ hĕ. Kuty ĕn tŏg hora tĕgtŭ tŷg mŭ. ⁴⁶ 3 hora ki Jesus tŏg prĕr mŭ sir, kŷ tŏg: “Eli, Eli, lemĕ sabactani?” he mŭ. Ēg vĕ ki ĕg tŏg tag to: “Topĕ, Topĕ, ĕ tŷ ne jĕ isovĕnh nĕ?” he mŭ. ⁴⁷ Kŷ ũ tŷ tĕ nŷtĕ ag tŏg mĕg kŷ (ag tŏg) jagnĕ mŷ: “Elias jĕ tŏg prĕr mŭ,” he mŭ. ⁴⁸ Kŷ ũ tŏg vĕnhvĕg mŭ sir, kŷ tŏg esponja tŷ vinho prĕg mŭ, vinho kaja pir tŷ. Ka jurŷn kŷ tŏg tŷ kusŏn kŷ vinho kĕra rĕg kŷ ti mŷ ven mŭ sir, ti tŷ ki ũnh' ũnh' ke jĕ. ⁴⁹ Hĕ ra ũ ag tŏg: “toreg',” he mŭ. “Hĕn ri ke mŭn Elias kĕtĕg mŭ, ti kren han jĕ,” he ag tŏg. ⁵⁰ Hĕ ra Jesus tŏg prĕr mĕg han mĕn kŷ hun ke mŭ sir.

⁵¹ Hĕ ra Topĕ jo ĩn krĕm kur tŷ jĕnkĕ nĕfe tŏg jaran ke mŭ, ha mĕ, ti jar tŏg vĕnh kĕkym ke kĕn mŭ sir, ha mĕ. ⁵² Kŷ ga tŏg ragra ke mŭ gĕ sir, pĕrŏ vŷ gŷm ke mŭ, vĕnh kej tŷ hĕn ri ke vŷ nugnor mŭ, kŷ ũ tŷ Topĕ ki ge kŷ nŷtĕ tŷ hĕn ri ke ag tŏg rĕnrĕr mĕn mŭ gĕ, ũn kĕgter ja ag. Ājag kej tĕ ag kĕpa mŭ. ⁵³ Ēn ag vŷ Jesus rĕr mĕn kar kŷ tĕ kĕpa kŷ cidade tŷ Jerusalĕm kĕra ge mŭ, kŷ ag tŏg ũn mŷ vĕnh venven mŭ sir, kŷ ũ tŷ hĕn ri ke ag tŏg ag vĕgvĕg mŭ, Jerusalĕm tĕ ke ag.

⁵⁴ Hã ra capitão tóg soldado ag mré Jesus ki rîr jê nî. Ga tÿ ragra ke ên vég ag tóg mû, nén kar ti, Jesus ter ên kã. Kÿ tóg ag mÿ e tí. Kÿ ag tóg: “hã ja vê,” he mû. “Topê kósin ja vê mÿr,” he ag tóg mû, capitão ag.

⁵⁵ Kÿ ùn tÿtã fag vÿ tá nÿtî gé, ù tÿ hên ri ke fag. Kuvar há tá nÿtî kÿ fag tóg ti vég nÿtî nî. Ti mré fag tóg kãmû ja nî, ga tÿ Galiléia tá. Ti ki fag rîr ja nîgtî. ⁵⁶ Fag kã ù fi vÿ tóg tÿ Maria Madalena fi nî, kÿ ù fi tóg tÿ Maria fi nî gé, José mré Tiago mÿnh tag fi. Kÿ ù fi vÿ tÿ Zebedeu krê ag mÿnh fi nî gé. Fag mré ke ù fag vÿ tá nÿtî gé.

Ag tÿ vênh kej kãkã Jesus fi

(Mc 15.42-47; Lc 23.50-56; Jo 19.38-42)

⁵⁷ Rãké tóg nÿ ha, kÿ ùn há tóg tá jun mû. Arimatéia tá tóg kãtîg ja nî. Ti jijin hã vÿ: José, he mû. Jesus mré ke ù vê gé. ⁵⁸ Ên vÿ tóg Pilatos venh tí mû, kÿ tóg ti mÿ Jesus to vî mû, ti ter kar kÿ. Kÿ Pilatos tóg soldado ag mÿ: “ha ti mÿ ti fi,” he mû. ⁵⁹ Kÿ José tóg Jesus va tîg kÿ ti pãg mû sir, kur jãnhkri tÿ. ⁶⁰ Kÿ tóg ã kej kãkã ti fig mû sir. Pó kãkã tóg han ja nîgtî, vênh kej ti, hã ra tóg tãg nî. José tÿ vê, vênh kej ên ti. Ên kãkã tóg ti fig mû sir, kÿ tóg pó tãpér tîm mû, vênh kej jãnkã to, pó ên tÿ tóg ti kej nífénh mû sir, José ti. Kÿ tóg tí mû. ⁶¹ Hã ra Maria Madalena fi vÿ tá nî nî, Maria ù ên fi ke gé. Ti kej rá fag tóg nîgnî kÿ nÿtî nî.

Ag tÿ ti kej ki rîr

⁶² Tÿ vaj kÿ, festa kurã kã Topê tÿ ki rîr tí to pã'i ag tóg vênh mãn mãn mû sir, Fariseu ag mré hã. Kÿ ag tóg Pilatos venh mÿjêg. ⁶³ Ti mÿ ag tóg: “governador’,” he mû. “Vênh kar krîn kónãn tí ên tóg tag tó ja nî, ha mê: “kurã tãgtÿ ki sóg rîr mãn ke mû,” he ja ti nî. Êg tÿ tag to jykrén kÿ êg tóg ã mÿ nén ù to vî sór mû gé ver. ⁶⁴ Soldado ag tÿ ti kej ki rîr há tóg tí, kurã tãgtÿ ki. Êg mÿ tóg ti mré mû tí ag tÿ ti to nón kÿ ti péjunh ha mê tí. Êg mÿ tóg ag tÿ ti péju kar vênh kar mÿ: “rîr mãn ti, ã ter kar kÿ,” henh ha mê tí gé. Kÿ vênh ó tãg tag vÿ ti ón ja ên kãfór pê nÿnh ke mû. Hã kÿ soldado ag jêgnê, ag tÿ ti kej ki rîr jé,” he ag tóg, Pilatos mÿ. ⁶⁵ Kÿ Pilatos tóg ag mÿ: “hej,” he mû. “Vÿ nÿtî, ti kej ki rîr ke mû ag,” he tóg, soldado ù ag to. “Ti kej ki rîr há han nî, ge kÿ,” he tóg. ⁶⁶ Kÿ ag tóg mû kÿ ti kej to ag vin mû, ti kej ki rîr ti ên ag. Ti kej nífénh mû ên ség ag tóg mû gé, vãfe tÿ, pãró to. Kÿ ag tóg go'or tÿ vãfe ên kri tÿ tam ke mû, ù tÿ ti kej nífe kunûg tÿ nî jé.

28

Jesus rîr mãn

(Mc 16.1-10; Lc 24.1-12; Jo 20.1-10)

¹ Vênhkán ke kurã tÿ vaj kÿ, semana tÿ kurã ve tag ki Maria Madalena fi tóg ti kej venh tí mû, kusã ki, Maria ù ên fi mré hã. ² Hã ra ga tóg ragra ke tar han mû sir. Kÿ Topê tÿ jênê jafã tóg kanhkã tá kãtére mû. Ti kej tá jun kÿ tóg pó tÿ jãnkã nífe ên tîm mû, kÿ tóg kri nî mû sir, pó ên kri. ³ Hã ra tóg tÿ ta tÿ kóm kóm ke ve nî, anjo ên ti. Ti kur vÿ kópréj nî, kukryr kó kupri ri ke. ⁴ Kÿ soldado ag tóg jÿrÿn ke mû, kamêg kÿ ag tóg kãgter nÿtî ve nî. ⁵ Kÿ Topê tÿ jênê jafã tóg ùn tÿtã fag mÿ vî mû, kÿ tóg: “kamêg tÿg nî,” he mû. “Jesus jãvãnh ãjag nÿtî, ag tÿ cruz to ùn sãg mû ên ti. ⁶ Ki ti tú nî, rîr ti huri, hã kÿ tóg ãjag mÿ tó ja nîgtî. Ki ti nÿ ja nîgtî, ha kãge jêg, ãjag tÿ ti nÿgja ve jé,” he tóg mû, fag mÿ, anjo ti. ⁷ “Kuri, ti mré mû tí ag mÿ tónh mÿjêg, ti rîr mãn ti, ti ter kar kÿ. Ha vé, ãjag jo tóg tîg mû, Galiléia ra. Tá ãjag tóg ti venh mû, ha vemní. Inh vî kã jatu' he tÿg nî,” he tóg, Topê tÿ jênê jafã ti. ⁸ Kÿ fag tóg ti kej tá kãpa mû sir, to fÿrÿrÿn kÿ. Fag mÿ tóg e tí. Fag mÿ tóg sér pê tí, hã kÿ fag tóg pétê mû sir, fag tÿ Jesus mré mû tí ag mÿ tó jé.

⁹ Fag mû ra Jesus hã ne fag kato jun ke mû', kÿ tóg fag mÿ: “mÿ sér nÿtîmñi,” he mû. Kÿ fag tóg ti to grên ke mû, ti pên kãgmîg fag tóg mû sir. Ti krêm fag tóg mÿg ke mû gé. ¹⁰ Kÿ Jesus tóg fag mÿ: “kamêg tÿg nî,” he mû. “Ha mÿjêg, inh régre ag mÿ tónh mÿjêg, ag tÿ ga tÿ Galiléia ra mû jé. Tá ag tóg inh venh ke mû,” he tóg, Jesus ti. Kÿ fag tóg mû mû.

Soldado ag ón

¹¹ Fag mün ky soldado ên ag tóg cidade ra mũ mũ, soldado tỹ Jesus kej ki rĩr mũ ên ag. Tá junjun ky ag tóg Topê tũ ki rĩr tĩ to pã'i ag mỹ tó kãn mũ, ag tỹ nén vég mũ ên ti. Ky tóg ag mỹ e tĩ. ¹² Ky ag tóg kófa ag mré vènh mãn mũ sir, ag tỹ to jykrén jé. “Ëg hỹn hẽ ri kenh mũ, vènh kar tỹ ti rĩr mãn tag to: ag ón vè, he jé?” he ag tóg mũ jagnẽ mỹ. Ag tỹ to jykrén kar ky ag tóg soldado ag mỹ jãnkamy e ven mũ sir. ¹³ “Jãnkamy tag to vènh kar mỹ un'ón,” he ag tóg mũ, pã'i ag, soldado ag mỹ. “Un'ón ky vènh kar mỹ: êg nũgnũr mũ jãvo Jesus mré mũ tĩ ag tóg ti péju ja nĩ, kuty si há tá, hã ky tóg ki tũ nĩ ha, hemnĩ,” he ag tóg, pã'i ag, soldado ag mỹ. ¹⁴ “Hẽn ri ke mũn ãjag pã'i tỹ governador tóg mẽnũ mũ, ãjag nũgnũr ja ti. Ky êg tóg ti mré vèmén ke mũ, ti tỹ ãjag vóg kónãn tũ nĩ jé,” he ag tóg, Topê tũ ki rĩr tĩ to pã'i ag, soldado ag mỹ. ¹⁵ Ky soldado ag tóg jãnkamy ên mãn ky mũ mũ sir. Vènh kar mỹ ag tóg un'ón mũ mũ sir, Jesus mré mũ tĩ ag to. Hã ky Judeu ag tóg ver tag tó tĩ, ũnri.

Jesus tỹ ã mré mũ tĩ ag mỹ vènh ven

(Mc 16.14-18; Lc 24.36-49; Jo 20.19-23; Hk 1.6-8)

¹⁶ Hã ra ti mré mũ tĩ ag tóg ga tỹ Galiléia ra mũ mũ, pãnónh ũ ra, Jesus tỹ ag mỹ: “ên ra mũjêg,” he ja ên ra. ¹⁷ Ky ag tóg tá ti vég mũ sir, ky ag tóg ti krêm mũgmũg ke mũ sir. Hã ra ag kãmĩ ũ ag mỹ tóg vènhmỹ tĩ, ag tỹ ti vég mũ ra, ky tóg ag mỹ ki hã ke tũ nĩ. ¹⁸ Ky Jesus tóg ag rã hã jun mũ, ky tóg ag mré vèmén mũ sir. “Nén kar vỹ tỹ inh krêm ke nĩ ha, kanhkã tá ke kar, ga tá ke kar ke gé,” he tóg, Jesus ti. ¹⁹ “Hã ky mũjêg, povo kar kanhrãn jé, ag tỹ inh ki ge jé. Ag tỹ inh ki ge ky nỹtĩn ky ag kygpemnĩ gé. Inh panh jiji tómnĩ, ag kygpe ky, ky ti kósin jyjy tómnĩ gé, ky Topê kuprĩg jiji tómnĩ gé, ãjag tỹ ag kygpe ky. ²⁰ Ky isỹ ãjag mỹ nén tó mũ kãmén kãn nĩ gé, ag tỹ ki króm jé. Ha mẽ, ãjag mré sóg jẽ nĩ, kurã kar ki, ga tũg ke kurã ki ke gé. ãjag tovãnh ke tũ sóg nĩ ha,” he tóg, Jesus ti. Ti tỹ ã mré mũ tĩ ag jègnèg mũn hã vè.

MARCOS Tÿ RÁ

João Batista tÿ Jesus tó

(Mt 3.1-12; Lc 3.1-18; Jo 1.19-28)

¹ Sÿ Jesus Cristo kãme sér tónh ke vë, Topë kósin ti. ² Vãsÿ Jesus tóg rán kÿ nÿ, João ke gé, Jesus jo tÿnh ke ti. Topë ví tó tí tÿ Isaiás vÿ Jesus rán ja nÿ, kÿ tóg: “ha vé, ã jo sóg ù jënënh mü, ti tÿ vënh kar kãn jé, ã tÿg ken jo,” he ja nÿ. “Ag jyvën jé tóg ke mü, kÿ tóg ëpry prun ri ke nÿ, ëmÿn kurynh ri ke. ³ Ëmã tÿg ja tá tóg jënh ke mü, ga kórég tá. Tá tóg ag mÿ kãmén ke mü. “Ëg Senhor kãtÿg ke jo vënh jãnhkrigkrig nÿ,” he tóg mü. “Ëpry kurég ãjag tóg tÿ, ëmÿn kurynh ãjag tóg tÿ, ãjag chefe jun ken kÿ. Kÿ tag ri ke han nÿ, ãjag jykre pãno togvãnh kÿ, ëg Senhor kãtÿg ken jo,” he tóg, ã jo tÿnh ke ti,” he ja tóg nÿ, Isaiás ti, João to.

⁴ Kÿ João tóg jë mü, ëmã tÿg ja ki, ag kygpég tí ti. Ag jyvën tóg jëgtÿ, kÿ tóg: “ã kype jé sóg ke mü, ã tÿ ã jykre kórég togvãnh kÿ, Topë tÿ ã tÿ ti ví mranh tÿ ã mÿ vënh pãte fón jé,” he tóg mü sir, vënh kar mÿ.

⁵ Kÿ ag tóg ti to kãmü kãn mü sir, ga tÿ Judéia tá, cidade tÿ Jerusalém tá ke gé. Kÿ tóg ag kygpég mü sir, goj tÿ Jordão ki, ag tÿ: “Topë ví mranh sóg nÿgtÿ, tag han kÿ,” hen kÿ. ⁶ Jó João kur tóg cavalo pãní sór kyki tÿ há nÿ. Nën ù fãr tÿ tóg vësógfÿn ja han tí gé. Ópã hã ko ti tí, mÿg mré, João ti. ⁷ Kÿ tóg Jesus kãmén kÿ (tóg) ag mÿ: “ù tóg inh nón kãtÿ mü, ha më,” he mü. “Inh kãfór ti nÿ. Sÿ tÿ ti camrada nÿnh ke vë vë, sÿ ti pën né kunÿnh ke vë vë, ti pën to ró ti, hã ra sóg tÿ ti krëm ke pë jë. ⁸ Goj hã tÿ sóg ãjag kygpenh ke mü. Û tÿ inh nón kãtÿg ke ën tóg sir Topë kuprÿg tÿ ãjag jagrë han ke mü. Ti tÿ ãjag kygpenh ken hã vë,” he tóg, João ti, vënh kar mÿ.

João tÿ Jesus kype

(Mt 3.13-17; Lc 3.21-22)

⁹ Kÿ kejën Jesus tóg João tá jun mü gé. Cidade tÿ Nazaré tá tóg kãtÿ mü, ga tÿ Galiléia tá. Tá jun kÿ João tóg ti kypég mü sir, goj tÿ Jordão ki. ¹⁰ Ti tÿ goj kãtã kãkutë kÿ kanhkã vÿ nor mü sir vësÿmér. Hã ra Jesus tóg vég jë nÿ. Kÿ tóg Topë kuprÿg vég mü. Sórag ri ke ti nÿ, ti kãtére ti. Kãtére kÿ tóg Jesus kri nÿ nÿ sir. ¹¹ Kÿ tóg kanhkã tá vënh ví mëg mü gé sir, kÿ tóg: “tÿ ã inh kósin pir jë, tÿ ã inh fe pë jëgtÿ,” he mü, vënh ví tÿ më há ën ki.

Satanás tÿ Jesus krÿn kónãn sór

(Mt 4.1-11; Lc 4.1-13)

¹² Kÿ vësÿmér Topë kuprÿg tóg Jesus krÿn mü, ti tÿ ëmã tÿg ja ra tÿg jé. ¹³ Kurã tÿ 40 (ke) tÿg tóg mü, ëmã tÿg ja ki, Jesus ti. Tá nÿnh kÿ Satanás tóg ti tÿ ã jóg ví mranh han sór mü, hã ra tóg ke tÿ nÿ. Nën kãmÿ bicho ag vÿ tá mügtÿ gé, ëmã tÿg ja ki. Hã ra Topë tÿ jënë jafã ag tóg ti ki rÿr mü sir, tá.

Jesus tÿ Galiléia ra vÿn ke

(Mt 4.12-22; Lc 4.14-15; 5.1-11)

¹⁴ Kejën ag tóg João ség mü. Ag tÿ ti se kar kÿ Jesus tóg ga tÿ Galiléia ra tí mü. Tá tóg ag mÿ Topë tÿ tÿ ëg pã'i nÿnh ke kãmén mü, vënh kãme sér ën ti. ¹⁵ Kÿ tóg: “Topë vÿ tÿ pã'i nÿ,” he mü. “Pëtëm ti huri, ti kurã ti, ëg tÿ ti tÿ tÿ ëg pã'i nÿ ën ve jé. Kÿ ãjag jykre kórég togvãnh nÿ. Ti ví kri fimnÿ, ãjag tÿ ti tÿ tÿ ëg pã'i nÿ ën ve jé,” he tóg ag mÿ, Jesus ti.

¹⁶ Kejën Jesus tóg nig fyr tÿ Galiléia he mü ën jagma tí mü. ã tÿ ti fyr mÿ tí ra tóg Simão Pedro vég mü, ti jãvy tÿ André ke gé. Kur tÿ pirã kugmÿ jafã tÿ ag tóg goj kãki fón mü, rede tÿ, pirã kugmÿ jé. Ag rãnhraj hã vë.

¹⁷ Kÿ Jesus tóg ag ve kÿ ag mÿ: “inh mré kãmümnÿ,” he mü. “Pirã kugmÿ há ãjag nÿtÿ,” he tóg. “ãjag kanhrãn jé sóg ke mü, ãjag tÿ ëprã ke ag tÿ inh ki ge han jé,” he tóg ag mÿ, Jesus ti. ¹⁸ Vësÿmér ag tóg ti mré mü mü, ãjag rede togvãnh kÿ, Pedro ti, André ti ke gé.

¹⁹ Kĩ ag tóg mũ mũ, goj fyr jagma. Ag mũ sĩ han mũ ra ag tóg ùn régre ù ag vég mũ gé. Û vỹ tỹ Tiago nĩ, kỹ ù vỹ tỹ João nĩ, ti jãvy. Zebedeu krẽ ag vễ. Canoa kãki ag nỹtĩ, pirã kugmĩ jafã ki han kỹ. ²⁰ Ag ve kỹ tóg vễsỹmér ag jé prěr mũ, Jesus ti. Kỹ ag tóg ãjag panh ré kỹ mũ mũ, Zebedeu ti. Ag camarada ag vỹ ag panh mré canoa kãki nỹtĩ nĩ. Ag ré kỹ ag Jesus mré mũ mũ sir, Tiago ti, João ti ke gé.

Jesus tỹ vễnh jagrẽ kórég kutêm
(Lc 4.31-37)

²¹ Kĩ ag tóg cidade tỹ Cafarnaum ki ge mũ sir. Vễnhkán ke kurã ki tóg vễsỹmér Judeu ag vễnh kanhrãn jafã kãra rã mũ, ag kanhrãn jé, Jesus ti. ²² Ti tỹ ag kanhrãn kỹ tóg ag mỹ e tĩ, ti vỹ ti. Vễnh kar vỹ kãfór ti nĩ. Topẽ vỹ to professor ag vỹ kãfór ti nĩ gé. Hã kỹ tóg ki hã tó mũ. Kỹ tóg ag mỹ e tĩ. ²³ Hã ra ù tóg tá nĩ nĩ, Judeu ag vễnh kanhrãn jafã tá. Jagrẽ kórég ti nĩ. ²⁴ ã tỹ Jesus ve kỹ tóg prěr mũ. “ã tỹ ẽg tỹ hẽ ri ke nẽ, Nazaré tá Jesus'?” he tóg. “ã mỹ ẽg kókén sór tũ'?” ã ki kanhró sóg nĩ. Tỹ ã tóg ã pir mỹ Topẽ mré ke nĩ, ti tũ pẽ vỹ tỹ ã nĩ,” he tóg, ùn jagrẽ kórég ti.

²⁵ Hã ra Jesus tóg ti mỹ vỹ tar han mũ, kỹ tóg: “vỹ tũg ra,” he mũ. “Ti tovãnh ra,” he tóg.

²⁶ Kỹ ti jagrẽ kórég ẽn tóg ti ter tĩ han mũ sir, prěr tóg mũ sir. Kỹ tóg ti tovãnh mũ. ²⁷ Kỹ tóg vễnh kar mỹ e tĩ mỹr sir. Jagnẽ mỹ ag tóg: “ne nẽ vé'?” he mũ. “Vễnh vỹ tãg mỹ vó?” he ag tóg mũ. “Vễnh jagrẽ kórég ag mỹ tóg vỹ tĩ, kỹ ag tóg ki ke tĩ, ti kamẽg kỹ. Ag kri ke hỹn,” he ag tóg mũ, Jesus to.

²⁸ Kỹ ti vễme tóg vễnh kar kri rùm mũ, Galiléia tá ke kar kri.

Jesus tỹ Pedro má fi tỹ há' he
(Mt 8.14-15; Lc 4.38-39)

²⁹ Kar tóg Judeu ag vễnh kanhrãn jafã ki kutẽ mũ, Jesus ti, kỹ tóg Simão Pedro ãn ra rã mũ sir. André mré ti ãn vễ. Tiago vỹ João mré ra rã mũ gé. ³⁰ Hã ra Pedro prũ fi mỹnh fi vỹ kaga nỹ nĩ, rỹg nỹ fi nĩ. Kỹ ag tóg Jesus mỹ fi tó mũ. ³¹ Kỹ tóg fi venh tĩ mũ. Fi nĩgẽ kãgmĩ kỹ tóg fi nĩm mũ. Kỹ fi rỹg ẽn tóg tũ' he mũ sir. Ag ki rĩr fi tóg mũ sir, Pedro má fi.

Jesus tỹ ùn kagyga ag tỹ há' he
(Mt 8.16-17; Lc 4.40-41)

³² Kurã ẽn kã kuty tá ag tóg ùn kagyga ag tatĩ kãmũ mũ, ùn jagrẽ kórég ag mré hã. ³³ Cidade ẽn ki ke kar ag vỹ ti ãn jãnkã tá nỹtĩ mũ. ³⁴ Kỹ Jesus tóg ag tỹ há' he kãn mũ sir, fag tỹ ke gé. Vễnh jagrẽ kórég pan kãn tóg mũ gé. Kỹ ag tóg ti tó sór mũ, ag tỹ ti ki kanhró nỹtĩ kỹ. Hã ra tóg ag mỹ: “vỹ tũg nĩ,” he mũ.

Jesus tỹ ã jóg mré vỹ
(Lc 4.42-44)

³⁵ Tỹ vaj kỹ tóg kurã ke ra (tóg) rĩr mũ, Jesus ti. Kỹ tóg ẽmã tũ ra tĩ mũ sir, Topẽ mré vỹ jé. ³⁶ Kỹ Simão tóg ti kanẽg tĩ mũ, ti jãvãnh kỹ. Ti mré ke ag mré tóg tĩ mũ. ³⁷ Kỹ ag ti vég mũ sir. Kỹ ag tóg ti mỹ: “vễnh kar vỹ ã kanẽgnẽg mũ, ã jãvãnhvãnh kỹ,” he mũ. ³⁸ Kỹ Jesus tóg ag mỹ: “mũ nỹ, cidade ù ra,” he mũ, “sỹ ag mỹ Topẽ vỹ tó jé gé. Hã jé sóg kãtĩg,” he tóg mũ ag mỹ, Jesus ti.

³⁹ Kỹ tóg ga tỹ Galiléia kar mĩ tĩ mũ. Vễnh kanhrãn jafã krẽm tóg ag mỹ Topẽ vỹ tó mũ sir. Ag jagrẽ kórég pan tóg mũ gé sir.

Jesus tỹ ùn kaga kren vãnh tỹ há' he
(Mt 8.1-4; Lc 5.12-16)

⁴⁰ Kỹ kejẽn ùn kaga kren vãnh vỹ ti to kãtĩ mũ, vễnh kaga tỹ lepra he mũ ẽn han mũ ẽn. Kỹ tóg ti krẽm grĩnh ke mũ, ti mỹ nén ù to vỹ jé. Kỹ tóg: “ã mỹ isỹ há' he sór tũ nĩ'?” he mũ. “ã hã tóg isỹ há' henh mũ, ã tỹ isỹ há' he sór kỹ,” he tóg ti mỹ. ⁴¹ Kỹ tóg Jesus mỹ jagtar tĩ. Kỹ tóg ã nĩgẽ tỹ ti mẽg kỹ ti mỹ: “hej,” he mũ. “To sóg há nĩ. Há' he ja há ã tóg nĩ,” he tóg ti mỹ.

⁴² Kÿ tóg ti kaga kren vãnh ên kren han mũ sir vêsýmér. Kÿ tóg jãnhkri nĩ sir, ti fár ti. ⁴³ Kÿ Jesus tóg ti mÿ vĩ tar han mũ, ti tĩg jé. ⁴⁴ Kÿ tóg ti mÿ: “ker ù mÿ tó hẽ,” he mũ. “Ha tĩg, Topẽ tũ ki rĩr tĩ to. Ti hã mÿ tómnĩ, kÿ Topẽ mÿ nĩm nĩ, Moisés tÿ vãsÿ ãg mÿ nén tó ja ti, ã jãnhkri to. Hã tugrĩn vãnh kar vÿ ã tÿ há' he mũ tag ki kanhrãn mũ,” he tóg ti mÿ, Jesus ti.

⁴⁵ Hã ra tóg vãnh kar mÿ tó mũ sir. Kÿ vême ên vÿ vãnh kar kri rũm mũ. Hã kÿ Jesus tóg êmã ù ki rã tũ nĩgtĩ, vãnh ven jé. Êmã tũ mĩ tóg tĩgtĩ, hã ra ag tóg êmã kar tá ti to kãmũ tĩ.

2

Jesus tÿ ùn grĩngrĩn kÿ nÿ tÿ há' he

(Mt 9.1-8; Lc 5.17-26)

¹ Kãnhmar Jesus tóg kejẽn cidade tÿ Cafarnaum tá jun mãn, kÿ ag tóg mẽg mũ sir, ti tÿ tá nĩn ki, ti tÿ hẽ tá nĩ ên tá. ² Kÿ ùn e ag vÿ ti to vãnh mãn, kÿ tóg fór nĩ, jãnkãn mĩ hã. Kÿ Jesus tóg ag mÿ Topẽ vĩ tó jẽ nĩ. ³ Hã ra ù ag tóg tá junjun mũ gé sir, ùn grĩngrĩn kÿ nÿ vyn kÿ, ù tÿ 4 (ke) ag vẽ. ⁴ Hã ra ag tóg ti pètẽm tũ nĩ sir, ti tÿ ag jy fór tĩn kÿ. Kÿ ag tóg ãn kunũg mũ, ti kri. Nor ên ki ag tóg ùn grĩngrĩn kÿ nÿ ên ti térem mũ, kur kãkã nÿ ti. ⁵ Kÿ Jesus tóg ag jykre vég mũ sir, ag tÿ ti ki ge kÿ nÿtĩ ti. Kÿ tóg ùn grĩngrĩn kÿ nÿ ên mÿ: “inh kósin,” he mũ. “Á tÿ Topẽ vĩ mranh ja tÿ tũ' he vẽ ha,” he tóg ti mÿ, Jesus ti.

⁶ Hã ra Topẽ vĩ to professor ù ag vÿ tá nÿtĩ gé. Ti vĩ to ag tóg jykrén mũ sir. ⁷ “Ne nẽ hÿn', ti tÿ tó tag ti?” he ag tóg mũ, komẽr hã. “Topẽ to vĩ kónãn vẽ,” he ag tóg. “Topẽ hã ne ã pin kÿ ãg tÿ Topẽ vĩ mranh ên tÿ tũ' he há nĩnh mũ. Ti hÿn vêsÿ Topẽ han mũ,” he ag tóg mũ, ti to jykrén kÿ.

⁸ Hã ra Jesus tóg ki kanhró nĩ, ã fe tÿ, ag jykrén ki. Kÿ tóg ag mÿ: “ãjag tÿ ne to jykrén kónãn nẽ?” he mũ. ⁹ “Ne nÿ ãjag mÿ vẽnhmÿ nÿ?” he tóg. “Ùn grĩngrĩn kÿ nÿ tag mÿ sóg: ã tÿ Topẽ vĩ mranh ja ên tÿ tũ' he vẽ ha, hé,” he tóg. “Kÿn mÿ ãjag mÿ vẽnhmÿ?” he tóg. “Sÿ ti mÿ: nĩ ra, ã kur gé(g) tĩg, henh ke nẽ ha,” he tóg. “Kÿn mÿ ãjag mÿ vẽnhmÿ ke gé'?” he tóg. ¹⁰ “Hã ra isÿ ãjag mÿ inh jykre ven sór vẽ ha. Tÿ sóg ãprã ke fi kósin nĩ. Tá sóg krÿg ke mũ, Topẽ vĩ mranh tÿ vãnh pãte fón ke tá. Sÿ tá krÿg mũ ven jé sóg ke mũ, ãjag mÿ,” he tóg. Hã kÿ tóg ùn grĩngrĩn kÿ nÿ ên mÿ: ¹¹ “nĩ ra, ã kur gé(g) tĩg,” he mũ, Jesus ti.

¹² Kÿ tóg jẽgnẽ mũ sir, ã kur gég tóg mũ sir vãhã, kÿ tóg ag rĩnve tĩ mũ sir, ùn grĩngrĩn kÿ nÿ ja ên ti.

Vãnh kar mÿ tóg e tĩ, kÿ ag tóg Topẽ to: “ãg jykre kãfór ti nĩ,” he mũ. “Ge ve ja tũ ãg nÿtĩ,” he ag tóg mũ sir.

Jesus tÿ Levi jé prẽr

(Mt 9.9-13; Lc 5.27-32)

¹³ Kÿ Jesus tóg tĩg mãn mũ, goj nig tÿ Galiléia ra. Kÿ vãnh kar ag tóg ti pẽnĩn vãnh mãn mãn mũ sir. Kÿ tóg ag kanhrãn mũ gé. ¹⁴ Á tĩg mãn kÿ tóg Levi vég mũ, Alfeu kósin. Governo mÿ imposto kaja mãg ti tĩ, hã ra tóg ã rãnhraj han nĩ nĩ. Kÿ Jesus tóg ti mÿ: “inh mré kãtĩg,” he mũ. Kÿ tóg jẽgnẽ kÿ ti mré tĩ mũ sir.

¹⁵ Kÿ tóg kejẽn ti ãn krẽm jẽg mũ, Jesus ti, Levi ãn krẽm. Hã ra ti mré ag e nÿtĩ, governo mÿ jãnkamy mãg tĩ ag, Topẽ vĩ mranh tĩ ag ke gé. Jesus mré ag nĩgnĩg kÿ nÿtĩ, ti mré mũ tĩ ag mré ke gé. E tãvĩ ag nÿtĩ, ti nón mũ ag.

¹⁶ Hã ra Topẽ vĩ to professor ù ag vÿ tÿ Fariseu nÿtĩ gé. Jesus vég ag tóg mũ, ti tÿ Topẽ vĩ mranh tĩ ag mré jẽn kÿ. Kÿ ag tóg Jesus mré mũ tĩ ag mÿ vĩ mũ. “Ti hã ne tóg ag mré jẽg mũ” he ag tóg. “Governo mÿ jãnkamy mãg tĩ ag mré tóg jẽg mũ,” he ag tóg, “Topẽ vĩ mranh tĩ ag mré ke gé,” he ag tóg.

¹⁷ Hã ra Jesus tóg mẽg mũ, ag vême ên ti. Kÿ tóg ag mÿ: “ùn kagyga tũ ag vÿ médoco venh mũ tũ nĩgtĩ,” he mũ. “Hã ra ùn kagyga ag hã vÿ ti venh mũ tĩ,” he tóg ag mÿ, Jesus ti. “Inh pi(jé) ù tÿ vãnh jykre kuryj han mũ ag mÿ: “ãjag jykre tovãnh nĩ,” he sór tĩ. Û

tỹ Topê vĩ mranh ja nĩ ên ag hã mỹ sóg: “ãjag jykre kórég tovãnh nĩ,” he sór tĩ. Hã jé sóg ãjag mỹ vãnh ven,” he tóg ag mỹ, Jesus ti.

Văkre

(Mt 9.14-17; Lc 5.33-39)

¹⁸ Hã ra João mré mũ tĩ ag tóg kejên văkrég mũ, jêg tũ ag nĩ, ag tỹ Topê mỹ há nỹtĩ jé. Kỹ Fariseu ag văkrég mũ gé. Kỹ ag tóg Jesus mỹ: “João mré mũ tĩ ag vỹ tóg văkrég mũ, Fariseu mré mũ tĩ ag ke gé,” he mũ. “Jo ã mré mũ tĩ ag ne tóg văkrég tũ nĩ’. Văkre kurã vễ mỹr,” he ag tóg ti mỹ, tá nỹtĩ ù ag.

¹⁹ Kỹ Jesus tóg ag mỹ comparação han mũ. “Vãnh kyprũg to kãmũ ên ag pi(jé) văkrég tĩ’,” he tóg. “Festa vễ mỹr, vãnh prũgprũg ti, kỹ ti mré ke ag tóg ùn prũg mũ ên venh kãmũ tĩ,” he tóg. “Ge ti nĩ, inh mré mũ ag mỹ. Isỹ ag mré nĩn kỹ tóg ver ag mỹ sér tĩ,” he tóg ag mỹ, Jesus ti. ²⁰ “Vãhã tóg jun mũ, inh kurã ti, kỹ ag tóg inh pére mũnh mũ, ên kã hã ag tóg ãjag văkrenh ke venh mũ, kurã ên kã, inh mré mũ tĩ ag,” he tóg.

²¹ “Ti si fag pi(jé) văfe kygnej tũ tỹ kur si jar ki hyn han tĩ ja nỹtĩgtĩ’. Ûn kygnej tũ tỹ ki hyn han mũ ra tóg jaran kenh mũ. Kỹ kur si jar ên tóg mág mũ. Ûn kygnej hã tỹ fag tóg ki han han tĩ, kỹ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vễ, hã ra tóg kur kygnej tũ ri ke nĩ.

²² Kỹ tóg ag mỹ: “Kỹ vinho vỹ ge nĩgtĩ gé,” he mũ gé. “Ëg pi(jé) vinho kajãg mũ tỹ ti fár si tỹ sacco ki kujêg tĩ mỹr’,” he tóg. “Ke tũ nĩ (mũ) ra tóg kugnãj kỹ jar mũ, kógnãj kỹ. Kỹ vinho tóg tũ’ he mũ, sacco ti ke gé mỹr. Vinho kajã tỹ ti fár tãg tỹ ki kujên ke vễ mỹr,” he tóg. Jesus tỹ ã jykre tãg tón hã vễ.

Vễnhkán ke kurã

(Mt 12.1-8; Lc 6.1-5)

²³ Kejên Jesus tóg êpỹ mĩ tĩ mũ, trigo kré mĩ. Ti mré mũ tĩ ag tóg ti mré mũ mũ. Vễnhkán ke kurã vễ. Ag mũ kỹ ti mré mũ tĩ ag vỹ trigo mugmó tỹ kam ke mũ, ko jé. ²⁴ Kỹ Fariseu ag tóg Jesus mỹ: “ha vé,” he mũ. “Ag tỹ ne jé ãjag tỹ nén han ke tũ han nễ, vễnhkán ke kurã ki?” he ag tóg mũ. “Vãnh rãnhraj vễ mỹr, ag tỹ trigo tỹ kam ke ti,” he ag tóg, Jesus mỹ.

²⁵ Kỹ tóg ag mỹ: “vó,” he mũ. “Davi tỹ nén han mũ to jykrén nĩ,” he tóg. “Ti kókĩr nĩn kỹ tóg ã tỹ nén han ke tũ han gé, ã mré mũ tĩ ag mré, hã ra Topê pi(jé) ti to jũ mũ’, tag han tugrĩn, ha mẽ. ²⁶ Topê jo ãn kãra tóg rã, Davi ti, Abiatar tỹ Topê tũ ki rĩr tĩ to pã’i nĩn kỹ. Tá tóg Topê jamĩ ên kó, tỹ ti tỹ konh ke tũ ra, Topê tũ ki rĩr tĩ ag hã tỹ konh ke vễ vễ. Hã ra tóg kó, ti mré mũ ag mỹ tóg vãnh ken gé, Davi ti,” he tóg, Jesus ti. “Rán kỹ tóg nĩ nĩ,” he tóg.

²⁷ Kỹ Jesus tóg ag mỹ: “Topê vỹ êg mỹ vễnhkán ke kurã nĩm, êg tỹ ki vễnhkán jé,” he mũ. “Hã ra tóg tỹ kurã kórég han tũ nĩ, vễnhkán ke kurã tỹ,” he tóg. ²⁸ “Hã kỹ sóg tỹ vễnhkán ke kurã to pã’i nĩ gé. Tỹ sóg êprã ke fi kósin nĩ mỹr,” he tóg ag mỹ, Jesus ti.

3

Jesus tỹ ùn nĩgé tóg tỹ há’ he

(Mt 12.9-14; Lc 6.6-11)

¹ Kejên Jesus tóg vãnh kanhrãn jafã ra rã mãn mũ. Tá ù tóg jê nĩ, ti nĩgé tóg tóg ja nĩ. ² Kỹ ag tóg ti tugnỹm mũ sir, “kema êg tỹ ti tỹ vễnhkán ke kurã kã ti tỹ há’ he ve jé,” he ag tóg mũ sir. Hã ra ag tóg pã’i ag mỹ ti tó sór mũ, ti tỹ vễnhkán ke kurã to Topê vĩ mranh kỹ. ³ Hã ra Jesus tóg ùn nĩgé kórég ên mỹ: “kunĩg,” he mũ. ⁴ Kỹ tóg ag mỹ: “vễnhkán ke kurã ki êg hỹn ne han mũ’?” he mũ, “êg tỹ Topê vĩ ki króm jé,” he tóg. “Ëg mỹ hỹn nén ù há han mũ’?” he tóg. “Ëg tỹ ù tũ kókén kỹn mỹ kórég tũ nĩnh mũ’?” he tóg ag mỹ. “Ëg mỹ ù kren han mũ hỹn’?” he tóg. “Ëg tỹ ù tén kỹn mỹ há nĩnh mũ hỹn’?” he tóg. Hã ra ag tóg ti mỹ katy tĩ sir.

⁵ Kÿ tóg ag ki êvãnh kÿ jũ mũ sir, fe kaj tóg nĩ sir, ag krĩ tũ nÿtĩn kÿ. “Ã nĩgé tÿ krÿg' hé,” he tóg ti mÿ, ùn nĩgé tóg ên mÿ. Kÿ tóg tÿ krÿg' he mũ sir, há' he tóg mũ sir, vãhã, ùn nĩgé tóg ja ên ti.

⁶ Kÿ vãhã Fariseu ag mũ mũ sir, jagnẽ mré ti to jykrén jé, pã'i mág tÿ Herodes mré ke ag mré ke gé. “Êg hÿn hẽ ri ken kÿ ti tũg mũ?” he ag tóg mũ, Jesus ti to.

Jesus tÿ goj nig fyr tá ag kanhrãn

⁷ Hã ra Jesus tóg ti mré mũ tĩ ag mré goj nig tÿ Galiléia ra tĩ mũ, vãnh e tũg ja ra. Hã ra vãnh e ag tóg ti nón mũ mũ. Ga tÿ Galiléia tá ag tóg kãmũ mũ, ga tÿ Judéia tá ke gé, ⁸ cidade tÿ Jerusalém tá, ga tÿ Iduméia tá, goj tÿ Jordão mã tá, cidade tÿ Tiro tá, cidade tÿ Sidom tá ke gé. E tãvĩ ag nÿtĩ, e pẽ. Ti tÿ nén hyn han kar mẽ kÿ ag tóg ti to kãmũ mũ. ⁹ Kÿ Jesus tóg ti mré mũ tĩ ag mÿ tó mũ, ag tÿ ti mÿ canoa jãján jé. Ti kutãn ag tóg, vãnh kar ên ti, hã kÿ tóg canoa to vĩ mũ. ¹⁰ Û tÿ hẽn ri ke tÿ há' he ja tóg nĩ, ùn kagyga ag tÿ, fag tÿ ke gé. Hã kÿ ag tóg ti kutãn mũ. Ag tÿ ti mẽ sór vẽ, ãjag nĩgé tÿ. ¹¹ Kÿ ùn jagrẽ kórég ag vÿ tá nÿtĩ gé. Ag tÿ Jesus ve kÿ ag tóg prẽnprẽr mũ sir. “!..Tÿ ã Topẽ kósin ne..!” he ag tóg mũ, prẽnprẽr kÿ. ¹² Kÿ Jesus tóg ag mÿ vĩ tar han tĩ. “Ker inh kãmén hẽ’,” he tóg tĩ, ag mÿ.

Jesus tÿ ù tÿ 12 (ke) ag vin

(Mt 10.1-4; Lc 6.12-16)

¹³ Kejẽn tóg pãnónh ra tĩ mũ, Jesus ti. Kÿ tóg ag jé prẽr mũ, ag kuprẽg kÿ. Kÿ ag tóg ti to mũ mũ. ¹⁴ Kÿ tóg ù tÿ 12 (ke) ag vin mũ sir, ag tÿ tÿ ti mré mũ tĩ nÿtĩ jé, ti tÿ ag jẽgnẽ jé ke gé, “Topẽ vĩ tó jé,” he tóg. ¹⁵ Ag mÿ tóg vãnh jykre nĩm mũ, ag tÿ vãnh jagrẽ kórég pan jé. ¹⁶ Û tÿ 12 (ke) ag hã vẽ, ha mẽ: Simão, Jesus tÿ ti jyjy ù hã vÿ: Pedro, he mũ, ¹⁷ Tiago ke gé, ti jãvy tÿ João mré, Zebedeu krẽ tag ag. Jesus tÿ ag jiji ù hã vÿ: Boanerges, he mũ, êg vĩ ki ke hã vÿ: ta tÿ tÿrÿrÿ he ri ke ag, he mũ, ¹⁸ André ke gé, Filipe ke gé, Bartolomeu ke gé, Mateus ke gé, Tomé ke gé, Tiago ke gé, Alfeu kósin tag ti, Tadeu ke gé, Simão ke gé, ag tÿ ù to: Zelote, he mũ tag ti, ¹⁹ Judas Iscariotes ke gé, ù tÿ pã'i ag mÿ Jesus ven ke ti.

Topẽ vĩ to professor ag tÿ Jesus to vĩ kónãn

(Mt 12.22-32; Lc 11.14-23; 12.10)

²⁰ Kÿ Jesus tóg ag mré ã jamã tá jun mũ. Kÿ vãnh kar tóg sir tá vãnh mãn mũ, kÿ tóg ag jẽn ke mũ ra vẽnhmÿ tĩ, Jesus mré mũ ag. ²¹ Kÿ Jesus kanhkã fag vÿ ti vême mẽ kÿ ti kãgmĩnh kãmũ mũ. “Krĩ vẽnhmÿ nĩ ve ti nĩ,” he fag tóg, hã kÿ fag tóg ti kãgmĩ sór mũ. Hã ra tóg fag mré tĩ tũ nĩ.

²² Kÿ Topẽ vĩ to professor ag tóg tá junjun mũ gé. Jerusalém tá ag tóg kãmũ jẽg, ti ve jé. Kÿ ag tóg ti to: “jagrẽ kórég ti hÿn nĩ,” he mũ. “Hã kÿ tóg vãnh jagrẽ kórég ag pã'i ên jykre han mũ, vãnh jagrẽ kórég ag pan jé,” he ag tóg. “Belzebu jykre tÿ tóg ag pan mũ, Nén-Kórég jykre tÿ,” he ag tóg, Jesus to, Topẽ vĩ to professor ag.

²³ Kÿ Jesus tóg ag jé prẽr kÿ ag mÿ comparação han mũ, kÿ tóg: “Satanás vÿ vãnh jagrẽ kórég pan tũ nĩgtĩ mÿr,” he mũ, Jesus ti. ²⁴ “Pã'i pir krẽm ke ag tÿ jagnẽ kato tẽgtẽn kÿ ag tóg jagnẽ kãgtén kãn ke mũ,” he tóg. ²⁵ “Ïn pir kã ki ke ên fag tÿ jagnẽ kato tẽ kÿ fag tóg jagnẽ kãgtén kãn ke mũ gé,” he tóg. ²⁶ “Satanás krẽm ke ag tÿ jagnẽ kato tẽ kÿ ag tóg jagnẽ tÿ tũ' henh ke mũ gé, kÿ tóg tũ' he mũ sir, Satanás ti,” he tóg. ²⁷ “Êg tÿ ù tÿ nén ù mãn sór kÿ, ti ïn tá, kÿ êg tóg ti se vén tĩ, ke tũ nĩ (mũ) ra tóg ã tũ ki rĩr ke mũ, kÿ êg tóg ti tũ mãn tÿ hẽ ri kenh ke tũ nĩgtĩ, ti tar nĩn kÿ. Êg tÿ ti se kar kÿ êg tóg ti tũ mãn mũ sir,” he tóg. “Ge ti nĩgtĩ, sÿ nén han mũ ti. Tar ti nĩ, Japo ti, hã ra sóg hur ti sé, hã kÿ sóg ti tũ ag kygvãg mũ sir, ag jagrẽ kórég pan sóg mũ sir,” he tóg, Jesus ti.

²⁸ “Sÿ ke há vẽ, hã kÿ sóg tó mũ,” he tóg. “Topẽ vÿ ãjag mÿ vãnh pãte fón kãn mũ, ãjag tÿ ti vĩ mranh kar ên tÿ, ãjag tÿ ti kato vĩ kónãn mré hã,” he tóg. ²⁹ “Jãvo ãjag tÿ Topẽ kuprĩg kato vĩ kónãn kÿ tóg ãjag mÿ vãnh pãte fón mãn ke tũ nĩ ha, Topẽ ti,” he tóg. “Ãjag tÿ Topẽ vĩ mranh ên vÿ ãjag hã kã nĩ nĩ, kurã tũ ti nĩ,” he tóg, Jesus ti.

³⁰ Ag mÿ tóg ke mũ, Jesus ti, ag tÿ ti to: “jagrẽ kórég ti hÿn nĩ,” hen kÿ.

*Jesus mré ke pē fag**(Mt 12.46-50; Lc 8.19-21)*

³¹ Kĩ ti m̃nh fi tóg ti jāṽy ag mré ti venh kãtĩ mũ. Re kã fi jē ag mré, k̃y ag tóg ũ jēnēg mũ, ti jé prēr jé. ³² Jesus pēñn vēnh e ṽy tóg ñytĩ, ñigñg k̃y, k̃y ag tóg: “ha mē, ã m̃nh fi ṽy re kã jē, ã jāṽy ag mré,” he mũ. “Fag t̃y ã mré vēmēn sór vē. Ā jé prēr fag tóg mũ,” he ag tóg ti m̃y.

³³ Hã ra Jesus tóg: “inh m̃nh fi m̃y inh ve sór mũ', inh jāṽy ag mré'?” he mũ. “Inh m̃nh fi vē vē, inh jāṽy ag vē vē, hã ra ag tóg t̃y inh mré ke pē tũ ñytĩ,” he tóg. ³⁴ K̃y tóg ũn ñigñg k̃y ñytĩ ag ki êvãnh k̃y tóg: “inh m̃nh fi hã vē, inh jāṽy ag hã vē gé,” he mũ. ³⁵ “Ũ t̃y Topē ṽi han mũ ên ag ṽy t̃y inh jāṽy ñytĩ, inh ve fag ke gé, inh m̃nh ke gé,” he tóg ag m̃y, Jesus ti.

4

*Nén fy to comparação**(Mt 13.1-9; Lc 8.4-8)*

¹ Kejēn Jesus tóg goj nig t̃y Galiléia fyr tá ag kanhrãn mãn mũ. Hã ra vēnh e ṽy ti pēñn ñytĩ, vēnh e tãṽi, hã k̃y tóg canoa kãra rã mũ, goj kãki, k̃y tóg canoa kãkã ñi mũ, hã ra ag kar ṽy tar tá vēnh mãn k̃y ñytĩ, nig fyr tá. ² Ag m̃y tóg vēnh ṽi e tó mũ, comparação han k̃y. ³ K̃y tóg kejēn ag m̃y: “ha mē,” he mũ. “Ũ tóg nén ũ fy krigkrig tĩ mũ,” he tóg. ⁴ “Ti t̃y krigkrig k̃y ti fy ũ tóg êm̃n kri kutē mũ, êp̃ry kri. K̃y sēs̃i tóg ti ko mũ sir. ⁵ Ti fy ũ tóg pãró kri kutē mũ, ga e tũ ki, k̃y tóg kãnhmar mur mũ vē, ga s̃i ên ki. ⁶ Hã ra rã tóg ã t̃y êg ñino kã sa k̃y (tóg) ti pũn mũ. Ti jãre han tũ ñin k̃y tóg tóg mũ. ⁷ Ti fy ũ tóg sónh kãki kutē mũ, k̃y sónh tóg ti mré mur mũ, ti kri rũm tóg mũ sir k̃y tóg kanē han tũ ñi. ⁸ Ti fy ũ tóg ga há kri kutē mũ k̃y tóg mur há han mũ, mog há han tóg mũ, kanēn ha han tóg mũ gé, ũ tóg kanē t̃y 30 (ke) han, jo ũ ṽy kanē t̃y 60 (ke) han, jo ũ ṽy kanē t̃y 100 (ke) han. ⁹ Ũ ñigrēg ñytĩ t̃y t̃y jēmē jé,” he tóg, Jesus ti.

*Jesus t̃y nén fy to comparação kãmén**(Mt 13.10-23; Lc 8.9-15)*

¹⁰ Ũn e ên ag mũn kar k̃y ti mré ñytĩ ag tóg ti ki jēmēnh kãmũ mũ, nén fy kãmén ti. K̃y ag tóg ti m̃y: “ã t̃y êg m̃y ne tó nē?” he mũ.

¹¹ K̃y tóg ag m̃y: “ãjag hã tóg Topē t̃y t̃y êg pa'i ñi ki kanhró ñytĩnh mũ, ijo tó ja tũ ên ki,” he mũ. “Hã ra sóg ên ag m̃y comparação tãṽi han mũ. ¹² Ag m̃y sóg tó há han ke tũ ñi, ón k̃y mēg mũ ag m̃y, k̃y ag tóg ãjag t̃y vég mũ ra ki kagt̃ig ñytĩ, ãjag t̃y mēg mũ ra ag tóg to jykrén tũ ñytĩ, k̃y ag tóg Topē ki ge tũ ñytĩ gé, k̃y Topē tóg ag m̃y vēnh pãte fón ke tũ ñi gé,” he tóg, Jesus ti, ũ ag to.

¹³ K̃y tóg ag m̃y: “ãjag t̃y to jykrén tũ tóg tĩ',” he mũ, “s̃y ãjag m̃y nén fy kãmén k̃y,” he tóg. “K̃y ti m̃y ãjag t̃y ũ to jykrén há ñinh mũ', s̃y ãjag m̃y comparação ũ han k̃y?” he tóg.

¹⁴ K̃y tóg jamã hár(a) ag m̃y kãmén mũ. “Ũ tóg nén fy vãvãm tĩ, k̃y ti t̃y Topē ṽi tó vē, hã ṽy: vãvãm, he mũ, nén fy ri ke vē,” he tóg. ¹⁵ “Ti fy ũ ṽy êm̃n kri kutē mũ. K̃y Topē ṽi mēg mũ ũ ag ṽy êp̃ry ri ke ñytĩ,” he tóg. “Ag t̃y Topē ṽi mēg mũ ra tóg ag m̃y t̃y tũ' he mũ, Satanás ti, Topē ṽi t̃y. Vēs̃ymér tóg ag m̃y t̃y tũ' he mũ, ag m̃y Topē ṽi tó t̃y. K̃y êm̃n ri ke vē sir. ¹⁶ Hã ri ken hã vē gé, ti t̃y pãró kri vãvãm ên ti. Ag t̃y Topē ṽi mē k̃y ag tóg vēs̃ymér: hej, he mũ sir. Ag m̃y tóg sér tĩ. ¹⁷ Hã ra ag tóg nén kré jãre tũ ri ke ñytĩ, k̃y ag tóg mũ s̃i han mũ, Topē mré. Nén ũ jagy kutē k̃y ag tóg sir Topē tovãnh mũ vēs̃ymér, ũ t̃y Topē tugr̃in ag kato tē k̃y. ¹⁸ Ti t̃y sónh kãki vãm ên hã vē gé, hã ṽy t̃y Topē ṽi mēg mũ ag ñytĩ gé. ¹⁹ Hã ra ag tóg ãjag rãnhraj hã m̃i êkrég mũ, ón k̃y rico ñi sór jé. Nén ũ kar to ag én, hã k̃y Topē ṽi tóg ag m̃y katy' he mũ sir. K̃y ag tóg kanē há han tũ ñi. ²⁰ Hã ra ti t̃y ga há kri vãvãm mũ ên ṽy t̃y Topē ṽi mēg mũ ag ñytĩ gé. Hej, he ag tóg mũ sir, kanē há han ag tóg mũ, ũ tóg kanē t̃y 30 (ke) han mũ, ũ tóg kanē t̃y 60 (ke) han mũ, ũ tóg kanē t̃y 100 (ke) han mũ,” he tóg, Jesus ti, ag m̃y.

Jēngrē to comparação

(Lc 8.16-18)

²¹ Kĩ Jesus tóg ag mĩ: “ēg pi(jé) néj gru ma kāmũ kĩ kěj krēm fēg tĩ, ēg pi(jé) cama krēm fēg tĩ,” he mũ. “Ti fēg jafã kri ēg tóg fēg tĩ. ²² Hã kĩ ēg tĩ nén vég tũ ěn vĕnh ven kãn ke vĕ, hã jé tóg ver péju kĩ nĩ. Ęg tĩ nén ki kagtĩg ěn vĕnh ven kãn ke vĕ,” he tóg. ²³ “Ũn nĩgrĕg nĩtĩ tĩ tĩ jĕmĕ jé,” he tóg.

²⁴ “Hã kĩ jĕmĕ há han,” he tóg. “Ājag mré ke ag jykre tugnĩm ājag tóg tĩ, kĩ ājag tóg ag mĩ vĩ tar han tĩ. Kĩ Topĕ vỹ ājag mĩ vĩ tar han ke mũ gé, ājag tĩ ājag mré ke ag jykre ri ke nĩtĩn kĩ. Hã ra tóg ājag mĩ vĩ tar kãfór han ke mũ, ha vemnĩ,” he tóg. ²⁵ “Ũ tĩ nén ũ to jykrén há han kĩ tóg ũ to jykrén mãn', ũ to jykrén mãn', he mũ sir. Ũ tĩ nén ũ to jykrén há han tũ nĩn kĩ tóg ti mĩ tũ' he mũ sir, ti tĩ nén to jykrén sĩ han mũ ra,” he tóg, Jesus ti.

Nén kré to comparação

²⁶ Kĩ Jesus tóg ag mĩ: “Topĕ tĩ tĩ ēg pã'i nĩ vỹ ge nĩnh mũ, ha mĕ,” he mũ. “Ũ vỹ nén ũ fy vāvãm tĩg mũ, ěpỹ ki,” he tóg. ²⁷ “Ũ tĩ vāvãm mũ vỹ nũr mũ sir, kutyg kĩ, tĩ vaj kĩ tóg rĩr mãn mũ sir. Hã ra ti fy ěn vỹ mur mũ, mog tóg mũ, jo ũ tĩ vāvãm mũ tóg ki kagtĩg nĩ. “Ti hĕ ri ken kĩ mur'?” he tóg. ²⁸ Jãvo tóg vĕsóg ki mog, kar tóg mó han, kĩ vãhã ti kanĕ vĕ sir, ti mó kãki. ²⁹ Ti kanĕn kar kĩ tóg ag mĩ: “ha kre jafã va kãmũ jĕg,” he mũ sir. Kĩ ti krenh ke kurã vĕ sir. Topĕ tĩ tĩ ēg pã'i nĩ ri ken hã vĕ,” he tóg, Jesus ti, ã kãtĩg mãn ke tón kĩ.

Ka tỹ mostarda fy to comparação

(Mt 13.31-32, 35; Lc 13.18-19)

³⁰ Kĩ Jesus tóg: “inh hỹn tóg tag tónh mũ ha, sỹ Topĕ tĩ tĩ ēg pã'i nĩ kãmén jé,” he mũ. ³¹ “Ka tỹ mostarda fy ri ke ti nĩ, Topĕ tĩ tĩ ēg pã'i nĩ ti,” he tóg. “Ti krãn ēg tóg tĩ, ēg japỹ ki. Kãsir ti nĩ, ti fy ti. Ũ fy vỹ ti sĩ ri ke tũ nĩtĩ. ³² Ti krãn kar kĩ tóg mog mũ, kĩ tóg ěgóho kar kãfór nĩ. Pĕ mág ti nĩtĩ, hã kĩ sĕsĩ ag vỹ kãki krĕg tĩ, ti fĕnja ki,” he tóg, Jesus ti.

³³ Comparação tỹ hĕn ri ke hyn han tóg, ag mĩ Topĕ vĩ tón ki, ag tỹ to jykrén sór kĩ. ³⁴ “Tag vỹ ge nĩnh mũ,” he hã han tóg ag mĩ, Jesus ti. Ag mĩ tóg jamã hár(a) nén ũ tó tũ nĩ, ũn e ag mĩ. Hã ra tóg ã mré mũ tĩ ag mĩ kãmén há han mũ, ag pin kĩ.

Jesus tỹ kóho tỹ tũ' he

(Mt 8.23-27; Lc 8.22-25)

³⁵ Hã tỹ kuty tá tóg ag mĩ: “mũ nỹ, goj nig kafã ũ ra,” he mũ.

³⁶ Hã kĩ ag tóg vĕnh e ěn ré kĩ mũ mũ sir, canoa kãmĩ, Jesus tỹ kãkã nĩn kĩ. Hã ra ũ ag tóg ti mré mũ mũ gé, canoa ũ kãmĩ. ³⁷ Hã ra kãka tar tãvĩ vỹ tóg vãhã krog he mũ, kóho ti. Kĩ goj tóg canoa kãki krēm krēm ke mũ. Ti fãn sór tóg mũ sir. ³⁸ Hã ra Jesus tóg nũr nỹ, fakrĩnh kĩ, canoa nér tá. Kĩ ag tóg ti rĩn kĩ ti mĩ: “Senhor,” he mũ. “Ęg mĩ ēg kãgter ha mĕ tóg tĩ. Mỹ ã mĩ tĩ nén ũ tũ?” he ag tóg ti mĩ.

³⁹ Kĩ tóg rĩr mũ sir, kĩ tóg kóho mĩ vĩ tar han mũ, ti mĩ: “krỹg he ra,” hen kĩ. Kĩ kóho tóg tũ' he mũ, katy' he tóg mũ. ⁴⁰ Kĩ tóg ag mĩ: “ājag tỹ ne jé kanĕ jur nĕ?” he mũ. “Ājag mĩ inh ki rã há han tũ?” he tóg ag mĩ. ⁴¹ Kĩ tóg ag mĩ e (pĕ) tãvĩ tĩ sir. Jagnĕ mĩ ag tóg: “ti jykre tóg ěg mĩ e tĩ,” he mũ. “Kóho vỹ ti vĩ han, goj ti ke gé,” he ag tóg.

5

Jesus tỹ vĕnh jagrĕ kórég tỹ mil ag pan

(Mt 8.28-34; Lc 8.26-39)

¹ Kĩ ag tóg goj nig kafã ũ tá junjun mũ sir, Gerasa tá ke ag tá. ² Jesus tỹ canoa ki vag ke mũ ra ũ tóg ti kato tĕ mũ. Jagrĕ kórég ti nĩ. Vĕnh kej tá tóg kãkutĕ mũ. ³ Tá tóg ěmã nĩ, vĕnh kej tá. Ag tỹ ti ség mũ ra tóg vĕnh mỹ nĩ, ferro mré hã. ⁴ Ti se tỹ hĕn ri ke han ja ag tóg nĩgtĩ vĕ, ti nĩgé, ti pĕn ke gé, ferro tỹ. Hã ra tóg ferro tỹ kam ke ja nĩgtĩ, ã pĕn se ja ti mrynhmranh kãn ja tóg nĩgtĩ. Ag tỹ ti kanhrãn ke mũ ra ag tóg ti tỹ hĕ ri ke ja

tũ nĩgtĩ. ⁵ Kutý ki kurã mré tóg prër tĩgtĩ, vènh kej ki. Pãró ãn ki pó génh ký tóg vèsãnh tĩgtĩ. ⁶ Ti tỹ kuvar há tá Jesus ve ký tóg ti to vènhvãg tĩ mũ, ký tóg ti krêm grĩnh ke mũ.

⁷ Jamã hár(a) tóg prër mũ, ký tóg: “!..ã isỹ hẽ ri kenh mũ, Jesus'..!” he mũ, “!..kynhmỹ Topẽ kósĩn'..!” he tóg. “!..Ã mỹ sóg to vĩnh mũ, ã tỹ inh vóg kónãnh tũ nĩn jé, ký Topẽ vỹ inh vỹ mễg mo..!” he tóg. ⁸ Hã ra Jesus tóg ti mỹ: “ti tovãnh ra, Nén-Kórég',” he ja nĩ.

⁹ Ký Jesus tóg ti mỹ: “ã jyjy hẽ ri ke tĩ,” he mũ. Ký tóg: “Mil,” he mũ. “E tãvĩ ãg nỹtĩ,” he tóg, Nén-Kórég ti.

¹⁰ Ký tóg to vĩ', to vĩ', he mũ, Jesus tỹ ãmã ãn ki ti kutẽm tũ nĩ jé.

¹¹ Hã ra ag mễg tỹ porco ag tóg jẽg nỹtĩ, pãnónh ãn kri. ¹² Ký Nén-Kórég ag tóg Jesus mỹ: “ag mễg to ãg jẽgnẽ, ãg tỹ ag kãki ge jé,” he mũ.

¹³ Ký tóg ag mỹ: “hej,” he mũ. Ký Nén-Kórég ag tóg ãn ti tovãnh mũ sir, porco ag ki ge ag tóg mũ sir. Ký ag tóg re mũ sir, porco ag. Rãn ki ag tóg re mũ, ký ag tóg nỹgnỹr kãn mũ sir, goj nig ki. Kãgter kãn ag tóg mũ. Porco tỹ mil régre ag vẽ, hỹn.

¹⁴ Ký porco ki rĩr tĩ ag tóg sir pètẽ mũ, cidade ra. Tá ag tóg kãmén kãn mũ, Nén-Kórég tỹ jagrẽ ja ãn ti. Ký ag tóg Jesus to mũ kãn mũ sir, nẽn ãn ve jé. ¹⁵ Jesus tá ag tóg junjun mũ sir, ký ag tóg ùn jagrẽ kórég ja ãn vэг mũ, kur tu ký. Krĩ há' he tóg mũ, ù tỹ mil tỹ jagrẽ kórég ja ãn ti. Ký ag fe tóg jũrũn ke mũ. ¹⁶ Ký ù tỹ vэг mũ ag tóg kãmén mũ sir ag mỹ ùn jagrẽ kórég ja ti, porco ag. ¹⁷ Hã ký ag tóg Jesus mỹ to vỹ mũ, ti tỹ tá kutẽ jé, ag rã hã nĩ tũ nĩ jé.

¹⁸ Ti tỹ canoa kãki rã ký ùn jagrẽ kórég ja tóg: “nhỹ ã mré tĩg mũ,” he mũ, Jesus mỹ.

¹⁹ Hã ra tóg ti mỹ nenh. “Ha tĩg, ã ãn ra, ã tỹ ã mré ke ag mré nĩ jé,” he tóg ti mỹ. “Ag mỹ kãmén nĩ, ãg jóg mág tỹ ã tỹ há' he mũ ti, ti tỹ ã jagãgtãn mũ ti,” he tóg ti mỹ. ²⁰ Ký tóg tĩ mũ. ãmã tỹ 10 (ke) ki ga tá tóg kãmén mũ, Jesus tỹ ã tỹ há' he ti. Ký tóg ag kar mỹ e tĩ.

Jairo tỹ Jesus mỹ ã kósĩn fi to vỹ

(Mt 9.18-19; Lc 8.40-42)

²¹ Ký Jesus tóg kafã ra tĩg mãn mũ, canoa kãmĩ. Ký vènh e tóg ti jo vènh mãn mũ. Hã ra tóg goj nig fyr tá jẽ nĩ. ²² Ký ù tóg kãtĩ mũ, ti jiji hã vỹ: Jairo, he mũ. Judeu ag vènh kanhrãn jafã to tóg tỹ pã'i nĩ. Ti tỹ Jesus ve ký tóg ti krêm mũg ke mũ. ²³ Ti mỹ tóg: “inh kósĩn sĩ fi vỹ tũg sór mũ,” he mũ. “Kunĩg, ã tỹ ã nĩgẽ tỹ fi mẽ jé, fi tỹ há' he jé, fi kren jé,” he tóg. ²⁴ Ký tóg ti mré tĩ mũ. Hã ra ùn e ag tóg ti nón mũ ký ti kutãn mũ.

Ùn tỹtã kaga fi

(Mt 9.20-22; Lc 8.43-48)

²⁵ Jo ùn tỹtã ù fi tóg tá nĩgtĩ. Kyvènh krỹg tũ han ký fi tóg nĩ, prỹg tỹ 12 (ke) ki. ²⁶ Médico ag tỹ fi vèsỹrènh mág han, to fi tóg ã tỹ nẽn vãm kãn, hã ra fi tóg há' he tũ nĩ, ke han han fi tóg. ²⁷ Hã ra fi tóg Jesus kãmẽ mẽ ja nĩgtĩ, ký fi tóg vènh e kãmĩ tĩg ký ti nón ti kur mễg mũ sir. ²⁸ “Sỹ hẽn ri ke mũn ti kur mẽ ký inh hỹn han mũ,” he fi tóg.

²⁹ Fi tỹ ti kur mẽ ký fi kyvènh tóg gym ke mũ sir vãhã, ký fi tóg ki kanhró nĩ, fi kaga tỹ há' he ãn ki. ³⁰ Hã ra Jesus tóg ã fe tỹ ki kanhró nĩ, ã jykre kutẽ ãn ki. Ký tóg vènh e kãki vĩrĩn ke mũ sir. “Û nỹ inh kur mẽ?” he tóg.

³¹ Ký ti mré mũ tĩ ag tóg ti mỹ: “vènh kar tỹ ã kutãn vẽ,” he mũ. “Jo ã tóg: ù nỹ inh kur mẽ? he mũ,” he ag tóg ti mỹ. ³² Ký tóg tãmĩ ãvãnh mũ, ù tỹ ã mễg mũ fi ve jé. ³³ Hã ra ùn tỹtã fi tóg ki kanhró nĩ, fi han mũn ki. Ký fi tóg kamẽg ký, jũrũn ke ký mũg ke mũ, ti krêm. Ký fi tóg ti mỹ kãmén kãn mũ sir.

³⁴ Hã ra tóg ti mỹ: “inh kósĩn,” he mũ. “Ã tỹ inh ki rã ký ã tóg há' hé,” he tóg. “Ha tĩg, jatun mỹ, ã han vẽ ha,” he tóg, fi mỹ.

Jairo kósĩn fi rĩr mãn

(Mt 9.23-26; Lc 8.49-56)

³⁵ Ti tỹ ver fi mré vèmén jẽ ra ù ag tóg tá junjun mũ, pã'i tỹ Jairo ãn ãn tá. “Ã kósĩn fi vỹ hur ter,” he ag tóg. “Tũg ja fi tóg nĩ ha,” he ag tóg. “Hã ký ti mỹ: kunĩg, he mãn tũg nĩ, ti kutãn mãn tũg nĩ,” he ag tóg, Jairon mỹ.

³⁶ Hã ra Jesus tóg mēg mũ, kÿ tóg: “kamēg tũg nĩ, inh vĩ hã kri nĩmnĩ,” he mũ, pã'i ên mÿ. ³⁷ Kÿ tóg ùn e ag tÿ ti ãn ra mũ kamēg. “Pedro vÿ tũg mũ inh mré, Tiago ke gé,” he tóg, “Tiago jãvy tÿ João ke gé,” he tóg.

³⁸ Ag tÿ Jairo ãn tá junjun mũ ra Jesus tóg vènh e vég mũ sir, kygfÿ mũ fag, vèsÿrènh jagy han mũ fag. ³⁹ Kÿ tóg kã rã kÿ fag mÿ: “ãjag tÿ ne jé kygfÿ nẽ, ãjag tÿ ne jé vèsÿrènh nẽ?” he mũ. “Ter tũ fi nĩ, nũr fi nÿ nĩ,” he tóg.

⁴⁰ Hã ra fag tóg ti nyg mũ. Hã ra tóg fag pan mũ sir, kÿ tóg fi panh mré, fi mÿnh fi mré fi venh tĩ mũ, ti mré kãmũ mũ ag mré. ⁴¹ Fi nĩgè kãgmĩ kÿ tóg fi mÿ: “talitá cumi,” he mũ. Ëg vĩ ki ke vè, hã vÿ: nĩ ra, jÿ, he mũ.

⁴² Kÿ vãhã gĩr fi tóg nĩ mũ sir, kánè tĩ fi nĩ sir. Kri prÿg tÿ 12 (ke) fi nĩ. Kÿ tóg ag mÿ e tãvĩ tĩ. ⁴³ Hã ra tóg ag mÿ vĩ tar han, ag tÿ ù mÿ tó tũg jé. “Ha fi mÿ vèjèn ven,” he tóg. Hã ra tóg fi ter kÿ nÿ ra fi rĩn mãn.

6

Jesus jamã tá ke ag tÿ ti to é he

(Mt 13.53-58; Lc 4.16-30)

¹ Kÿ Jesus tóg tá kãkutè kÿ ã jamã tá jun mũ sir. Ti mré mũ tĩ ag tóg ti mré mũ mũ gé. ² Vènhkán ke kurã ki tóg ag vènh kanhrãn jafã ki ag kanhrãn mũ. Ag tÿ ti vĩ mẽ kÿ tóg ag mÿ e tĩ. “Hẽ tán hÿn ki kanhrãn, vènh jykre tag ti ki? Û nÿ hÿn ti kanhrãn?” he ag tóg, ti jamã tá ke ag. “Ëg tÿ nèn han vãnh hÿn han tóg tĩgtĩ,” he ag tóg. ³ “Ïn han tĩ ên vè mÿr,” he ag tóg. “Maria fi kósin vè mÿr, Tiago kãke, José, Judas, Simão kãke, kÿ ti ve fag vÿ ãg mré nÿtĩ gé mÿr. Ti tÿ ne jé tÿ ãg kãfór nĩ sór nẽ?” he ag tóg. Kÿ tóg ag mÿ tÿ ù nÿ.

⁴ Kÿ Jesus tóg ag mÿ: “ẽmã ù tá ke ag tóg Topè vĩ tó tĩ to é he tũ nĩgtĩ mÿr,” he mũ. “Ti jamã tá ke ag tóg ti to é he tĩ jãvo, ti mré ke ag, ti kanhkã ag,” he tóg. ⁵ Kÿ Jesus tóg tá nèn ù han tũ nĩ sir. Ûn kaga pipir ag hã tÿ há' he tóg, ã nĩgè tÿ ag mẽ kÿ. ⁶ Ag tÿ ti ki ge tũ tóg ti mÿ e tĩ, ti jamãn ki. Kÿ tóg ẽmã kãsir mĩ tũg kÿ ag kanhrãn tĩ nĩ sir.

Jesus tÿ ù tÿ 12 (ke) ag jègnè

(Mt 10.5-15; Lc 9.1-6)

⁷ Kÿ Jesus tóg ù tÿ 12 (ke) ag jé prèr mũ. Kÿ tóg ag mũn mũ, ùn régre tĩn', ùn régre tĩn' he tóg. Ag mÿ tóg vènh jykre nĩm mũ, ag tÿ vènh jagrè kórég pan mũ jé. ⁸ Kÿ tóg ag mÿ: “ãjag mũn kÿ pão ma mũ tũg nĩ,” he mũ, “bolsa ke gé, jãnkamy ke gé,” he tóg. ⁹ “Vãtó hã va mũmnĩ, kãtó ti, pè né ke gé, pèn to ró ti,” he tóg. ¹⁰ Kÿ tóg ag mÿ: “ãjag tÿ ẽmã ù tá jun kÿ, ãjag tÿ ãn ra rã mũ hã ki nũgnũr hemnĩ,” he mũ, “hã ki ãjag tÿ kurã ki panh ke mũ ên tá krÿgkrÿg nĩ,” he tóg. ¹¹ “Ëmã ù tá ke ag tóg kejèn ãjag mÿ: kãgemnĩ, henh ke tũ nĩ, ag tÿ ãjag vĩ mẽ jãvãnh nÿtĩn kÿ. Kÿ ãjag pèn hã kykũnh nĩ, ãjag tÿ tá pa kÿ,” he tóg, “ag tÿ ve kÿ to ki kanhró nÿtĩ jé, Topè tÿ ag mÿ: vó', he ti,” he tóg ag mÿ. “Ha mẽ, ki hã sóg tó mũ. Kurã tÿ ãgno ki, isÿ vènh kar jykre tugnÿm ke kurã ên ki ag tóg jagãgtar nÿtĩnh mũ, ag tÿ ãjag vĩ jẽmẽ jãvãnh nÿtĩn kÿ,” he tóg, Jesus ti.

¹² Kÿ ag tóg mũ mũ sir, ù tÿ 12 (ke) ag. “ãjag jykre tovãnh nĩ,” he ag tóg mũ, vènh kar mÿ. ¹³ Vènh jagrè kórég pan ag tóg mũ, ha mẽ. Ûn kagyga ag to tĩn ag tóg mũ, azeite tÿ, kÿ ag tóg tÿ há' he kãn mũ sir.

João Batista ter

(Mt 14.1-12; Lc 9.7-9)

¹⁴ Kÿ pã'i mág tÿ rei tóg Jesus kãme mẽg mũ sir. Vènh kar vÿ ti kãmén tĩ, hã kÿ tóg mẽg mũ. Pã'i mág tÿ rei ên jijin hã vÿ: Herodes, he mũ. Kÿ tóg: “João hÿn (tóg),” he mũ, “ù tÿ ag kygpég tĩ ên ti,” he tóg. “ã ter jan tán hÿn vÿn ké,” he tóg. “Hã kÿ tóg ãg tÿ nèn han vãnh kar ên hÿn han tĩ,” he tóg, Jesus to, Herodes ti.

¹⁵ Hã ra ù tóg Jesus to: “Elias vè,” he mũ. Kÿ ù tóg: “Topè vĩ tó tĩ vè, vãsÿ Topè vĩ tó tĩ ag ri ke vè,” he mũ gé.

¹⁶ Hã ra Herodes tóg ti kãme mẽ kÿ: “João hÿn ã ter ja tá vÿn ké, sÿ ùn krĩ kym ja ên ti,” he mũ.

¹⁷ Herodes vỹ João se ja nĩ, vĕse jafã kãki tóg ti fón ja nĩ, Herodias fi tugrĩn. Tỹ fi Filipe prũ fi nĩ, ti jãvy, hã ra tóg fi tỹ prũg mũ, Herodes ti.

¹⁸ Kỹ João tóg Herodes mỹ: “ã hã ne tóg ã mré ke prũ fi tỹ prũg mũ,” he ja nĩ. “Fi ki ã tóg Topĕ vĩ mranh mũ,” he ja tóg nĩ, João ti, Herodes mỹ. ¹⁹ Tag to Herodias fi tóg ti to kórég nĩ, ti tén ke to fi tóg jykrén nĩgtĩ, hã ra fi tóg ti tỹ hĕ ri ke tũ nĩ, ²⁰ Herodes tỹ ti kamĕg kỹ. João vỹ tóg tỹ ùn jykre kuryj nĩ. Topĕ jykre hã han tóg tĩ. Hã kỹ Herodes tóg ti jy nĩgãn tĩ, ti tỹ ti jykre há ki kanhró nĩn kỹ. João vỹ tóg ti mỹ vĕnhmỹ tĩ, ge ra tóg ti mỹ mĕ há tĩ, Herodes mỹ.

²¹ Kejĕn tóg fi mỹ ti tén ke ki króm ke mũ. Herodes tóg ã mur ja kurã ĕn ki festa mág han mũ, tenente ag mỹ, soldado ag pã'i ag mỹ ke gé, ùn rico ag mỹ ke gé, Galiléia tá ke ag mỹ.

²² Kỹ Herodias fi kósin fi tóg ag jo vĕnh gringrén mũ, hã ra tóg ag mỹ sĩ tãvĩ tĩ, Herodes mỹ, ti mré nỹtĩ ag mỹ ke gé, ti mré jĕg mũ ag mỹ. Kỹ tóg fi mỹ: “ã tỹ nén to vĩ mũ tỹ sóg ã mỹ nĩm mũ,” he mũ. ²³ Fi mỹ tóg: “sỹ ke há vĕ,” he mũ. “ã tỹ nén to vĩ mũ kar nĩm jé sóg ke mũ, isỹ nén kar kaju mré hã,” he tóg, tátãg fi mỹ.

²⁴ Hã ra fi tóg ã mỹnh fi to tĩ mũ sir. “Inh hỹn ne to vĩnh mũ?” he fi tóg mũ, ã mỹnh fi mỹ. Kỹ fi tóg: “João krĩ to vĩmnĩ,” he mũ, “ũ tỹ ag kygpĕg tĩ ĕn krĩ to,” he fi tóg, ã kósin fi mỹ, Herodias fi.

²⁵ Kỹ fi tóg vĕsỹmér pã'i mág ĕn to vĕnhvãg tĩ mũ. “Inh mỹ ùri João Batista krĩ nĩm, pĕnky kãkã,” he fi tóg mũ.

²⁶ Kỹ Herodes tóg fe kaj mág han mũ sir. Hã ra tóg fi mỹ: “sỹ ke há vĕ,” he ja nĩ, hã kỹ tóg fi mỹ han sór mũ, ti mré nỹtĩ ag tỹ mĕ kãn ja nĩn kỹ. ²⁷ Hã kỹ tóg polícia ù jĕnĕg mũ, ti tỹ ti krĩ ma kãtĩg jé. Kỹ tóg ti krĩ kym mũ sir, vĕse ja kãtã. ²⁸ Kỹ tóg ti krĩ ma kãtĩ mũ sir, pĕnky kãkã nĩm kỹ. Kỹ tóg fi mỹ nĩm mũ, tátãg fi mỹ. Kỹ fi tóg ã mỹnh fi mỹ ma kãtĩ mũ, Herodias fi mỹ.

²⁹ Kỹ João mré mũ tĩ ag tóg ti venh mũ mũ, ti ter mĕ kỹ. Kỹ ag tóg ti há va mũ mũ, vĕnh kej ra. Tá ag tóg ti pĕju mũ sir.

Jesus tỹ ù tỹ 5 mil (ke) ag jĕn

(Mt 14.13-21; Lc 9.10-17; Jo 6.1-14)

³⁰ Kejĕn Jesus tỹ ùn vin mũ ag tóg Jesus to vỹnvỹn ke mũ, ti mỹ kãmén jé, ag tỹ vĕnh kar mỹ nén tó ja ĕn ti, ag tỹ nén ù han mũ kar ĕn ke gé. ³¹ Kỹ tóg ag mỹ: “mũ nỹ, ĕg pir mỹ ĕmã tũg ja ra mũ jé, ĕg vĕnhkãn sĩ han jé,” he mũ. Kãmũ ag tóg nỹ nĩ, e ag tóg tĩ ha, kỹ tóg ag jĕn ke mũ ra vĕnhmỹ tĩ sir. ³² Kỹ ag tóg canoa kãmĩ mũ mũ sir, ĕmã tũg ja ra, ãjag pir mỹ.

³³ Hã ra ùn e ag tóg ag mũ ve kỹ ag ki kanhrãn mũ, kỹ ag tóg ãjag pĕn kã ag jy pĕtĕ mũ, ĕmã kar tá kãmũ kỹ. Ag jo ag tóg tá junjun mũ sir, vĕnh e ĕn ti. ³⁴ Jesus tỹ tá jun kỹ tóg sir ùn e ag vég mũ, kỹ ag tóg ti mỹ jagtar nỹtĩ. Ti mỹ ag tóg tỹ ĕg mĕg tỹ mé, ĕg mĕg tỹ carneiro ri ke nỹtĩ. ù tỹ ĕg mĕg ki rĩr tũ nĩn kỹ tóg jagãgtar nỹtĩgtĩ, ĕg mĕg ti. Tag ri ke ag nỹtĩ, ùn e ĕn ag, Jesus mỹ, ag tỹ Topĕ vĩ ki kagtĩg nỹtĩn kỹ.

³⁵ Hã ra tóg rãké nỹ sir, kỹ ti mré mũ tĩ ag tóg ti mỹ: “ki ti ĕmã tũ nĩ, rãké ti nỹ ha,” he mũ. ³⁶ “ã tỹ ag mũn kỹ tóg há tĩ vĕ. Kỹ ag tóg ĕmã kar mĩ mũnh mũ, vĕjĕn jãvãnh jé,” he ag tóg ti mỹ. ³⁷ Hã ra tóg ag mỹ: “ha inhhã ag jĕn ge,” he mũ. Hã ra ag tóg: “kỹ ĕg mỹ jãnkamy tỹ hĕn ri ke tỹ pão kajãm mũ?” he mũ, “ĕg tỹ ag jĕn jé?” he ag tóg ti mỹ.

³⁸ Kỹ tóg ag mỹ: “pão tỹ hĕ ri ke nỹ ki nỹtĩ?” he mũ. “Ha venh mũ jĕg,” he tóg. Ag tỹ ve kỹ ag tóg: “ũ tỹ 5 (ke) vĕ,” he mũ, “pirã régre ke gé,” he ag tóg.

³⁹ Kỹ tóg ag mỹ: “nĩgnĩ ra, re gỹnh tánh kri, mrugmru kri,” he mũ, “vĕnhmãn kỹ,” he tóg, vĕnh kar ĕn mỹ. ⁴⁰ Kỹ ag tóg vĕnhmãn kỹ nĩ, vĕnhmãn kỹ nĩ he mũ, ù vỹ tóg 100 (ke) nĩ he mũ, jo ù tóg 50 (ke) nĩ he mũ, ag vĕnhmãn ù. ⁴¹ Kỹ tóg pão tỹ 5 (ke) génh kỹ, pirã régre génh kỹ kanhkã ki ĕvãnh mũ, kỹ tóg Topĕ mré vĩ mũ sir, kỹ tóg pão kĕnh mũ sir, ã mré mũ tĩ ag mỹ tóg vin mũ, ag tỹ ùn e ĕn mỹ vĕnh kãpãpãm jé. Pirã régre tỹ tóg vĕnh kãpãpãm mũ gé sir. ⁴² Kỹ vĕnh kar vỹ ko kãn kỹ funfór mũ sir. ⁴³ Kĕj tỹ 12 (ke) fãn

ag tóg mū sir, pāo ke tỹ, pirā ke tỹ. ⁴⁴ Pāo ěn ko mū ag tóg tỹ 5 mil (ke) nỹtĩ, ũn tỹtá fag tó tũ.

Jesus tỹ goj kri tĩg

(Mt 14.22-33; Jo 6.15-21)

⁴⁵ Kỹ Jesus tóg vēsýmér ā mré mū tĩ ag mỹ tó mū, ag tỹ canoa kāmĩ mū jé, ag tỹ ti jo kafā ũ ra mū jé, ěmā tỹ Betsaida ra. “Isỹ ũn e tag ag mỹ: ha mũjĕg, henh ke vē ver,” he tóg ag mỹ. ⁴⁶ Kỹ tóg ag mỹ: “ha mũjĕg,” he mū sir. Ag mūn kar tóg pānónh to tāpřy mū, Topĕ mré vĩ jé. ⁴⁷ Kutỹ ěn kỹ canoa tóg ver tĩ nĩ, goj kāmĩ. Jo Jesus tóg tar tá jĕ nĩ ver, ā pir mỹ. ⁴⁸ Hā ra ag tóg canoa vóg kỹ ronron mū sir, mū kónān ag tóg mū sir, kāka tỹ ag kato tĕn kỹ. Hā ra tóg ag ronron vĕg mū sir, Jesus ti. Kỹ tóg kurā ke ra ag to kātĩ mū, goj kri tĩg kỹ, ā pĕn kā mỹr. Hā ra tóg ag tá jun mū sir, kỹ tóg ag pātĕn sór nĩ ve nĩ. ⁴⁹ Ag tỹ goj kri ti tĩg ve kỹ ag tóg: “vĕnh kupřĩg vē,” he mū. Kỹ ag tóg vĕkrĕnrĕr mū, ⁵⁰ ag tỹ jũrũn ken kỹ, ag kar tỹ ti ve kỹ. Hā ra tóg vēsýmér ag mré vĩ mū, kỹ tóg ag mỹ: “kamĕg tũg nĩ,” he mū. “Inh hā vē, jũrũn ke tũg nĩ,” he tóg.

⁵¹ Kỹ tóg canoa kākĩ rā mū sir ag mré, Jesus ti. Kỹ kāka tóg tũ' he mū sir. Kỹ tóg ag mỹ e (pĕ) tāvĩ tĩ. ⁵² Hā kỹ tóg ag tỹ to jykrĕn tũ tĩ. Ver ag tóg krĩ tũ nỹtĩ, hā kỹ ag tóg Jesus jykře ki kagtĩg nỹtĩ ver, ti tỹ pāo pir tỹ ũn e jĕn ja ra.

Jesus tỹ Genesaré mĩ tĩg

(Mt 14.34-36)

⁵³ Ag tỹ canoa kāmĩ pa kỹ ag tóg ga tỹ Genesaré tá junjun ja nĩ. Kỹ ag tóg canoa nỹgnỹn mū sir. ⁵⁴ Ag tỹ canoa kāmĩ pa kar kỹ tá ke ag tóg vēsýmér ti ki kanhrān mū, Jesus ki. ⁵⁵ Kỹ ag tóg ĩn kar mĩ pĕtĕ mū sir, kỹ ag tóg ũn kagyga ag gé kāmũ mū ti to. Kur kā ag tóg ag gé kāmũ mū. Ti jĕg jan ra ag tóg ti nón mū mū, ag tỹ ti jĕg ja mĕ kỹ. ⁵⁶ Ti tỹ ěmā ũ tá jun kỹ ag tóg vĕnh kaga gé kāmũ tĩ, kỹ ag tóg ĩn prur ki ag vin tĩ, ěmā kāsir ki, ěmā mág ki ke gé, vānh kāmĩ ke gé. “Mỹ ā mỹ há, ěg tỹ hĕn ri ke mūn ā kur mráj mĕ jé?” he ag tóg ti mỹ. Kỹ ag tóg há' há' he kān mū sir, ag tỹ ti kur mĕn kỹ.

7

Ti si ag jykře ti

(Mt 15.1-9)

¹ Kejĕn Fariseu ag tóg Jesus to vĕnhmān mū, Topĕ vĩ to professor ag mré. Jerusalém tá ag kāmũ ja nĩ. ² Hā ra ag tóg Jesus mré mū tĩ ũ ag jĕn vĕg mū. Nĩgpĕg tũ ja ag tóg nĩ, hā kỹ tóg Fariseu ag mỹ jĕggřy tĩ. ³ Fariseu ag tóg nĩgpe kar kỹ tỹ jĕg tĩ, Israel kar ag ke gé, ag tỹ ti si ag jykře han kỹ. ⁴ Ag tỹ negocio tá kāmũ kỹ ag tóg vēso tỹ kó he tĩ, goj tỹ, vēso tỹ kó he kar hā ag tóg ko tĩ. Vĕnh jykře si tỹ hĕn ri ke hyn han ag tóg tĩ, caneca kupĕg tĩ, kukřũ kupĕg tĩ, lata kupĕg tĩ ke gé. ⁵ Kỹ Fariseu ag tóg Jesus mỹ ke mū, Topĕ vĩ to professor ag mré hā. “Ā mré mū tĩ ag tỹ hĕ ri ke jé ti si ag jykře han tũ nĩ nĕ?” he ag tóg mū. “Ag tỹ ne jé ājag nĩgé jĕggřy ra jĕn nĕ?” he ag tóg mū.

⁶ Hā ra tóg ag mỹ: “Isaías vỹ ājag to vĩ ja nĩ, vāsỹ,” he mū, “kỹ tóg rān kỹ nĩ,” he tóg. “Ti vĩn hā vē, ha mĕ: povo tag vỹ ājag nũnĕ hā tỹ inh mỹ vĩ há han tĩ, hā ra ag jykře pi(jé) tỹ inh jykře nỹ'.” ⁷ Fagrĩnh mỹ ag tóg iso grĩnh ke tĩ, hā ra ag tóg ěprā ke ag jykře to: Topĕ tỹ tón hā vē, he tĩ, he ja tóg nĩgtĩ, Isaías ti,” he tóg, Jesus ti. “Hā kỹ tóg ājag to ki hā tó ja nĩ, ājag jykře rĕgre nỹtĩn kỹ,” he tóg, Jesus ti. ⁸ “Topĕ vĩ tovānh ājag tóg mū,” he tóg. “Hā ra ājag tóg ěprā ke jykře han tĩ,” he tóg, Jesus ti.

⁹ Kỹ tóg ag mỹ: “ājag hā ne tóg Topĕ vĩ mranh tĩ',” he mū, “ājag tỹ ājag jykře si hā han jé,” he tóg. “Hā ra tóg ājag mỹ há nỹ, ājag jykře si ěn ti,” he tóg, ag mỹ. ¹⁰ “Moisés tỹ ājag mỹ Topĕ vĩ tó kỹ tóg ājag mỹ: “ā mỹnh fi mré ā panh kamĕg nĩ, fag jagāgtān nĩ,” he ja nĩgtĩ. “Ū tỹ ā han mū fag mỹ vĩ kónān mū ěn tĕn jé ā tóg ke mū,” he ja tóg nĩgtĩ, Moisés ti,” he tóg, Jesus ti. ¹¹⁻¹² “Moisés jāvo ājag jykře vỹ ge nĩ, ha mĕ. Ū tóg kejĕn ā han mū fag jagāgtān sór tũ nĩ. Kỹ tóg fag mỹ ón kỹ: “Topĕ tũ vē,” he tĩ, ti tỹ fag mỹ nĩm jafā ěn to. Kỹ tóg fag ki rĩr ke tũ nĩ, kỹ tóg fag to é he mū sir. Ājag jykře kórĕg hā vē,” he tóg,

Jesus ti. ¹³ Kĩ Jesus tóg ag mĩ: “Topẽ vĩ mranh ãjag tóg tĩ, ti jẽgja kã ãjag tóg ãprã ke ag jykre hã ki króm sór tĩ. Ge tỹ hẽn ri ke han ãjag tóg tĩ,” he tóg ag mĩ, Jesus ti.

Nén tỹ ãg kavénh mũ

(Mt 15.10-20)

¹⁴ Kĩ tóg vẽn kar jé prẽr mãn kũ ag mĩ: “inh vĩ jẽmẽ ra,” he mũ, “ãjag kar tỹ ki kanhrãn jé,” he tóg. ¹⁵ “Vẽjẽn pi(jé) ãg kavénh tĩ,” he tóg, “ãg tỹn ko kũ,” he tóg. “Nén tỹ ãg ki kãpa vỹ ãg kavénh tĩ, ãg tỹ nén ù vẽnhmỹ han ẽn vỹ ãg kavénh tĩ,” he tóg. ¹⁶ “Û nĩgrẽg nỹtĩ tỹ tỹ jẽmẽ jé,” he tóg, Jesus ti.

¹⁷ Ti tỹ ã pir mĩ ãn kãra rã kũ ti mré mũ tĩ ag tóg ti ki jẽmẽg mũ. “Ëg mĩ kãmén há han nĩ, ã vĩ tag,” he ag tóg ti mĩ.

¹⁸ Kĩ tóg ag mĩ: “kũ ãjag mĩ ki kanhró tũ nỹtĩ ver?” he mũ. “Ëg jẽn tỹ ãg jẽnky kãra rã kũ tóg ãg kavénh tũ nĩgtĩ mỹr,” he tóg. ¹⁹ “Ëg nug kãra tóg rã mũ, kar ãg fón mũ. Ëg krĩ kãra tóg rã tũ nĩgtĩ,” he tóg. Hã kũ Jesus tóg vẽn kar to: “há ti nĩ,” he mũ.

²⁰ Kĩ tóg: “nén tỹ ãg ki kãpa vỹ ãg kavénh tĩ,” he mũ. ²¹ “Nén tỹ ãg ki kãpan hã vỹ, hã vỹ: jykren kónãn, he mũ, ùn mén tũ fag to én, he mũ, nén ù péju, he mũ, ù tén, he mũ, ã prũ tũ fi mré nỹ, he mũ, ã mén tũ mré nỹ, he mũ. ²² nén kar to én, he mũ, vẽn jykre pãno han, he mũ, ã tỹ nén ù nenh (ka)mẽ, he mũ, ù kato vỹ kónãn, he mũ, vẽnhmỹ inh ag kãfór kar nĩ, he tĩ, he mũ, krĩ tũ, he mũ. ²³ Nén kar kórég ẽn tóg ãg ki kãpa tĩ, hã kũ tóg ãg kavénh tĩ,” he tóg, Jesus ti.

Jesus tỹ tátãg sĩ fi jagrẽ kórég kutẽm

(Mt 15.21-28)

²⁴ Kĩ Jesus tóg tá kãkutẽ mũ sir, ga ù ra tĩg jé, cidade tỹ Tiro ra, cidade tỹ Sidom ra ke gé. Tá tóg ãn ù krẽm nĩ mũ, hã ra tóg: “ker ù inh nĩgja ki kanhrãn hẽ’,” he mũ. Ge ra ag tóg ki kanhrãn mũ. ²⁵ Kĩ vỹsýmér ùn týtã ù fi tóg kãtĩ mũ. Fi kósín fi vỹ jagrẽ kórég nĩ. Fi tỹ ti kãmẽ mẽ kũ fi tóg kãtĩ mũ. Kĩ fi tóg ti krẽm mũg ke mũ sir, ùn týtã fi. ²⁶ Hã ra fi vỹ vỹ tỹ Grego nĩ, ù tỹ Siro-Fenício krẽ vỹ tỹ fi nĩ. Kĩ fi tóg to vỹ mãn’, to vỹ mãn’, he mũ, ti tỹ fi kósín fi jagrẽ kórég ẽn kutẽm jé.

²⁷ Kĩ Jesus tóg fi mĩ: “ãg jẽn vỹ tỹ ãg krẽ tỹ ko jafã nĩ,” he mũ. “Vẽnhmỹ ti nĩ, ãg tỹ ãg krẽ pão tỹ cachorro mĩ fón kũ,” he tóg, fi mĩ.

²⁸ Hã ra fi tóg Jesus ti mĩ: “hỹ,” he mũ. “Hã ra cachorro sĩ ag tóg ãg krẽ pão vár ẽn ko tĩ, mesa krẽm,” he fi tóg ti mĩ. ²⁹ Kĩ Jesus tóg fi mĩ: “tó há han ã tóg,” he mũ. “Ha tĩg, fi jagrẽ kórég tóg hur kutẽ, ã kósín fi ki,” he tóg mũ.

³⁰ Kĩ fi tóg ã ãn ra tĩ mũ sir. Fi tỹ tá jun kũ fi kósín fi tóg nỹ mũ, cama kri, hã ra fi jagrẽ kórég ẽn vỹ kutẽ ja nĩ.

Jesus tỹ ùn vỹ vãn vãn

³¹ Kĩ Jesus tóg cidade tỹ Tiro ki ga ki kutẽ mũ, kũ tóg cidade tỹ Sidom fĩn rãm mũ gé sir, kũ tóg ga tỹ Galiléia ki goj nig ra tĩ mũ sir, cidade tỹ 10 (ke) fĩn rãm kũ. ³² Kĩ ag tóg ù pére kãmũ mũ, ti to, ùn kutu, ùn vỹ kar vãn. Kĩ ag tóg ti mĩ ti tó mũ, ti tỹ ã nĩgẽ tỹ ti mẽ jé. ³³ Hã ra Jesus tóg ti pére tĩ mũ, ti pin kũ, kũ tóg ã nĩgẽ juféj tỹ ti nĩgrẽg nor nĩgfénh mũ, kũ tóg ti nũnẽ to sug mũ sir. ³⁴ Kĩ tóg kanhkã ki ẽvãn kũ ãnh’ ãnh’ he mũ sir, kũ tóg ti mĩ: “efatã,” he mũ. Ëg vỹ ki ke hã vỹ: “ti nĩgrẽg jé nor hé,” he mũ. ³⁵ Kĩ ti nĩgrẽg tóg nor’ he mũ sir, ti nũnẽ tóg kavãr mũ sir. Vỹ tóg mũ sir, há’ he tóg mũ sir. ³⁶ Kĩ Jesus tóg ag tỹ tó kamẽg, hã ra ag tóg tugtó kãn mũ, ti tỹ: “ker tó hẽ’, ker tó hẽ’,” he mũ ra. ³⁷ Kĩ ag fe tóg hẽn ri ke mũ. “Ti tỹ nén kar há vỹ tóg há tãvĩ nỹtĩ,” he ag tóg, Jesus to. “Ûn kutu ag ẽmẽ hyn han tóg, ùn vỹ vãn ag vỹ hyn han tóg ke gé,” he ag tóg, Jesus to.

8

Jesus tỹ ù tỹ 4 mil (ke) ag jẽn

(Mt 15.32-39)

¹ Kejēn ūn e ag tóg vėnhmānmān mū, hā ra ag tỹ nén ū konh ke tóg tũ tĩ. Kỹ Jesus tóg ā mré mū tĩ ag jé prēr mū sir, kỹ tóg ag mỹ: ² “inh mỹ ag tóg jagtar nỹtĩ, ūn e tag ag,” he mū. “Kurā tāgtũ han ag tóg huri, ěg mré, hā ra ag tóg vėjēn ve ja tũ nĩgtĩ,” he tóg. ³ “Sỹ ag kókĩr ra ag mỹ: ha mũjěg, hen kỹ inh mỹ ū ag kągter ha mẽ tóg tĩ, ěmĩn kri, ěpry kri, ag tỹ ājag jamā ra vỹnvỹn ke jé,” he tóg. “Kuvar gy tóg nĩ, ū ag jamā ti,” he tóg, Jesus ti.

⁴ Kỹ ti mré mū tĩ ag tóg ti mỹ: “ěg hē ri ken kỹ pāo venh mū, ěmā tũg ja tag ti ki, ěg tỹ ag jēn jé?” he mū.

⁵ Hā ra tóg ag mỹ: “pāo tỹ hē ri ke nỹ ki nỹtĩ ge?” he mū. Kỹ ag tóg ti mỹ: “ũ tỹ 7 (ke) vỹ nĩ,” he mū.

⁶ Kỹ tóg vėnh kar mỹ: “nĩgnĩ ra, ga kri,” he mū. Kỹ tóg pāo tỹ 7 (ke) ěn mān kỹ (tóg) Topě mré vĩ mū. “Inh mỹ tóg há tĩ,” he tóg. Kỹ tóg kupāg' he mū sir, pāo ti, ā mré mū tĩ ag mỹ tóg vin mū sir, ag tỹ vėnh kar ken jé. Kỹ ag tỹ vėnh kar ken mū sir. ⁷ Kākufār pipir vỹ ki nỹtĩ gé. Kỹ tóg to Topě mré vĩ mū gé, kỹ tóg ag mỹ: “ha vėnh ken,” he mū gé, ā mré mū tĩ ag mỹ. ⁸ Kỹ ag tóg ko kān mū sir, funfór ag tóg mū, hā ra tóg kén mū sir. Kre tỹ 7 (ke) ěn fān tóg mū, ti kén ti, Jesus mré mū tĩ ag tỹ génh kỹ. ⁹ Ū tỹ 4 (ke) ag vė, hēn ri ke mūn, pāo ko mū ag.

¹⁰ Kar kỹ Jesus tóg ag mỹ: “ha mũjěg,” he mū. Kỹ tóg vėsỹmér canoa kākĩ rā mū, ti mré mū tĩ ag mré, kỹ ag tóg Dalmanuta tá ga ra mū mū.

Fariseu ag tỹ milagre ve sór

(Mt 16.1-4)

¹¹ Kỹ Fariseu ag tóg ti tá junjun mū. Ag tỹ ón kỹ ti ki jēmě sór vė, ag tỹ kar ti kato vĩ jé. Kỹ ag tóg ti mỹ to vĩ mū, ti tỹ ag mỹ kanhkā tá vėnh jykre ven jé, ti tỹ ag mỹ ěg tỹ nén han vānh han jé. Ag tỹ ti jykre to: “Topě jykre mỹ vỹ?” he sór vė.

¹² Kỹ Jesus tóg jěnger jagy han, ā fe tỹ, kỹ tóg ag mỹ: “ājag ne tóg ěg tỹ nén han vānh hā ve sór mū’,” he mū. “Sỹ ke há vė, hā kỹ sóg ke mū: venh ke tũ ājag nĩ. Ūri ke ag vỹ ěg tỹ nén han vānh venh ke tũ pě nĩ,” he tóg, ag mỹ, Jesus ti. ¹³ Kỹ tóg ag ré kỹ tĩ mū sir, canoa kākĩ tóg rā mān mū, kỹ tóg kafā ū ra tĩ mū sir.

Fermento to comparação

(Mt 16.5-12)

¹⁴ Hā ra ti mré mū tĩ ag tóg pāo mĩ ěkrén ja tũ nĩ. Pāo pir hā vỹ kã nĩ nĩ, canoa kākã.

¹⁵ Hā ra Jesus tóg ag kanhrān kỹ ag mỹ: “ha mẽ,” he mū. “Fariseu tỹ fermento há(r) kaměg nĩ,” he tóg, “Herodes tỹ fermento há(r) kaměg nĩ gé,” he tóg. ¹⁶ Kỹ ag tóg jagně mỹ: “pāo kã ěg jatun,” he mū, “hā kỹ tóg tag tó mū,” he ag tóg mū.

¹⁷ Hā ra Jesus tóg ki kanhró nĩ, kỹ tóg ag mỹ: “pāo tũ ti tĩ, he tũg nĩ,” he mū. “Inh vĩ ki kagtĩg nỹtĩ ve ājag tóg nỹtĩ, sỹ nén han mū to jykrén tũ nỹtĩ ve ājag tóg nỹtĩ,” he tóg. “Křĩ tũ nỹtĩ ve ājag tóg nỹtĩ,” he tóg. ¹⁸ “Ājag kaně ra ājag kyvó nỹtĩ ve nỹtĩ,” he tóg. “Ājag nĩgrěg ra ājag tóg kutu nỹtĩ ve nỹtĩ,” he tóg. “Mĩ ěkrén nĩ, ¹⁹ sỹ pāo tỹ 5 (ke) tỹ ūn e jěn ja ěn mĩ. Ū tỹ 5 mil (ke) ag vỹ kó, mỹr, hā ra tóg kén,” he tóg. “Ājag kěj tỹ hēn ri ke fān ti, pāo ke ti?” he tóg ag mỹ. Kỹ ag tóg: “kěj tỹ 12 (ke),” he mū.

²⁰ Kỹ tóg: “kỹ pāo tỹ 7 (ke) to jykrén nĩ gé,” he mū. “Ū tỹ 4 mil (ke) ag vỹ kó,” he tóg, “hā ra kre tỹ hē ri ke nỹ fór, ti ke tỹ?” he tóg. Kỹ ag tóg: “kre tỹ 7 (ke),” he mū.

²¹ Kỹ tóg ag mỹ: “ge ra ājag tóg ki kagtĩg nỹtĩ,” he mū. Ti tỹ ag mỹ Fariseu ag jykre tó jan hā vė, Herodes jykre ti. Ag jykre hā to tóg: ag tỹ fermento há(r), he ja nĩ.

Jesus tỹ ūn kyvó tỹ há' he

²² Kỹ tóg kafā ū tá jun mū sir, ěmā tỹ Betsaida tá, ti mré mū tĩ ag mré. Kỹ tá ke ag tóg ūn kyvó pére kāmū mū. Jesus mỹ ag tóg to vĩ mū, ti tỹ ti mẽ jé, ā nĩgé tỹ. ²³ Kỹ tóg ūn kyvó nĩgé kăgmĩ kỹ ti pére kuté mū, ěmā ki. Kỹ tóg ti mỹ: “ā mỹ nén ū vėg mū?” he mū.

²⁴ Kỹ tóg ěvānh kỹ ti mỹ: “ag ve inh,” he mū, “hā ra ag tóg inh mỹ tỹ ka mū ěn ve nỹtĩ,” he tóg.

²⁵ Kÿ tóg ã nĩgẽ tÿ ti kanẽ mẽ mãn mũ, kÿ tóg ãvãnh há han mũ sir. Há! he tóg mũ. Tãmĩ tóg ve há han kãn mũ, ùn kyvó ja ti. ²⁶ Kÿ Jesus tóg ti mÿ: “ha vèsÿmér ã jamã ra tĩg,” he mũ. “Ëmã tag ki rã tũg nĩ,” he tóg ti mÿ, Jesus ti. Kÿ tóg tĩ mũ sir.

Pedro tÿ Jesus tó

(Mt 16.13-20; Lc 9.18-21)

²⁷ Kÿ Jesus tóg ã mré mũ tĩ ag mré tĩg mãn mũ gé sir, ãmã tÿ Cesaréia Filipe tá ga ra. Ëmĩn jagma tĩg kÿ, ãpry jagma tĩg kÿ tóg ã mré mũ tĩ ag ki jẽmẽg mũ, Jesus ti. “Ag iso hẽ ri ke tĩ?” he tóg.

²⁸ Kÿ ag tóg ti mÿ ke mũ. “João Batista vẽ, he ag tóg tĩ ã to,” he ag tóg mũ sir. “Jãvo ù ag tóg: Elias vẽ, he tĩ. Jãvo ù ag tóg: Topẽ vĩ tó tĩ ù vẽ, he tĩ, ã to,” he ag tóg ti mÿ.

²⁹ Kÿ tóg ag mÿ: “ag jãvo ãjag iso hẽ ri ke tĩ?” he mũ. Kÿ Pedro tóg ti mÿ: “tÿ ã Cristo nĩ,” he mũ. ³⁰ Kÿ tóg ag jyvẽn mũ, ag tÿ ù mÿ kãmén tũ nĩ jé.

Jesus tÿ ã jagtar ke tó

(Mt 16.21-28; Lc 9.22-27)

³¹ Kÿ tóg ag kanhrãn mũ sir. “Tÿ sóg ãprã ke fi kósin nĩ,” he tóg. “Ijagtar jagy han ke vẽ,” he tóg. “Kófa ag tÿ iso: kórég ti nĩ, henh ke vẽ, Topẽ tũ ki rĩr tĩ ag ke gé, Topẽ vĩ to professor ag ke gé,” he tóg. “Ag tÿ isén ke vẽ, kurã tãgtũ tũg mũ ra sóg rĩr mãn mũ hã ra,” he tóg mũ, ã mré mũ tĩ ag mÿ. ³² Kÿ ag tóg ki kanhrãn kãn mũ, ti tÿ ag mÿ nén tó mũn ki.

Hã ra Pedro tóg ti pin kÿ ti mré vĩ mũ, kÿ tóg: “vĩ tÿ ge han tũg nĩ,” he mũ. ³³ Hã ra Jesus tóg vèsÿjãm ãvãnh kÿ ti mré mũ tĩ ag ki ãvãnh mũ. Kÿ tóg Pedro to jũ mũ. “Kutĩg, Satanás!,” he tóg. “Ã pi(jé) Topẽ jykre tó mũ!,” he tóg. “Ëprã ke jykre vẽ, ã tÿ inh mÿ nén tó mũ tag ti,” he tóg, Pedro mÿ.

³⁴ Kÿ Jesus tóg ã mré mũ tĩ ag mré vẽn kar jé prẽr mũ, kÿ tóg ag mÿ kãmén mũ. “Ãjag tÿ inh mré kãmũ kÿ tóg há tĩnh mũ,” he tóg. “Kÿ ãjag jykre tovãnh nĩ, ãjag tÿ isũ tãvĩ han jé. Ha vé, ag tÿ inh cruz tÿ inh kri fi kÿ sóg tĩg ke mũ, ag tÿ to isa kÿ isén jé, ha vemnĩ. Vẽn nhenh ke tũ sóg nĩ. Isÿ tag han ri ke han nĩ, kurã kar ki, ãjag tÿ inh mré mũ sór nÿtĩn kÿ,” he tóg. ³⁵ “Ãjag tÿ ãjag jykre hã han sór kÿ ãjag tÿ nũgme ki vár ke vẽ,” he tóg. “Jãvo ãjag tÿ isugrĩn ãjag jykre toyãnh kÿ ãjag krenkren ke vẽ,” he tóg, “ãjag tÿ vẽn vĩ sér tugrĩn kãgter ke mũ (hã) ra,” he tóg. ³⁶ “Hẽn ri ke mũn ãjag hÿn mundo ki nén ù kar ganhar henh ke mũ, hã ra ãjag kuprĩg tóg vãfor ke mũ. Kÿ tóg kórég nÿ. ³⁷ Ëg tÿ ne tÿ ãg kuprĩg kajãm ke tóg tũ tĩ, ãg tÿ ti ve mãn jé,” he tóg, Jesus ti. ³⁸ “Ûri ke ag tóg vyr mÿ Topẽ ù hÿn han tĩ, kÿ ag tóg Topẽ vĩ mranh tĩ gé,” he tóg. “Ag kãmĩ iso mÿ'ãg tũg nĩ, inh vĩ to. ãjag tÿ ùri iso mÿ'ãg kÿ sóg ãjag to mÿ'ãg ke mũ gé, inh kãtĩg mãn kÿ,” he tóg. “Ãjag to sóg mÿ'ãg ke mũ, sÿ Topẽ tÿ jẽnẽ mág ag mré kãtĩg ken kÿ. Ijóg vÿ tóg isÿ ùn mág han ke mũ, inh kãtĩg mãn ti kÿ,” he tóg. “Tÿ sóg ãprã ke fi kósin nĩ,” he tóg, Jesus ti.

9

¹ Kÿ tóg ag mÿ: “ha vé, ki hã sóg tó mũ,” he mũ. “Ãjag kãmĩ ù ag vÿ Topẽ tÿ tÿ ãg pã'i nĩ venh ke mũ, ãjag ter ke to hã, tag ki ãg mré nÿtĩ ù ag. Topẽ vÿ tar nĩ. Ti tar nĩ ve jé ag tóg ke mũ, ãjag ter ke to hã,” he tóg, Jesus ti.

Jesus tÿ vẽn ve ù han

(Mt 17.1-13; Lc 9.28-36)

² Kar kurã tÿ 6 (ke) tũg kÿ Jesus tóg ag mÿ: “mũ nÿ, vyr mÿ,” he mũ. Pedro mÿ tóg ke mũ, Tiago mÿ ke gé, João mÿ ke gé. Ag hã mré tóg pãnónh ra tĩ mũ. Kÿ tóg ag jo vẽn ve ù han mũ.

³ Ti kur vÿ tóg kókov tãvĩ nĩ sir, kópréj tãvĩ, fag tÿ kur kupri fãg mũ ãn kupri kãfór tóg nĩ, ga kar mĩ hã.

⁴ Kÿ Elias tóg sir vẽn ven mũ, Moisés ke gé. Jesus mré ag tóg vẽn mũ.

⁵ Kÿ Pedro tóg Jesus mÿ: “Senhor,” he mũ. “Tag ki tóg ha nĩ,” he tóg. “Ëg tÿ tag ki pãjóg tãgtũ han kÿn hÿn ha nĩnh mũ, ã mÿ, Moisés mÿ, Elias mÿ ke gé,” he tóg, Pedro ti.

⁶ Hã ra ag fe tỹ jũrũn ke kỹ tóg ti tỹ nén tónh ke ki kagtĩg nĩ, Pedro ti.

⁷ Kỹ kanhkã góg vỹ sir ag kri rũm ke mũ, kỹ, vãnh vĩ tóg mẽ há' he mũ, kanhkã góg kãtã, kỹ tóg: “inh kósin hã vễ,” he mũ. “Inh fe pẽ vễ,” he tóg. “Ti vĩ jẽmẽ ra,” he tóg, vãnh vĩ ti, Topẽ ti.

⁸ Kỹ vãhã ti mré mũ tĩ ag tóg ki ẽvãnh mãn mũ sir, kỹ ag tóg Jesus hã vэг mũ sir, ti mrẽ nỹtĩ ag ve mãn tũ ag tóg nĩ.

⁹ Kỹ ag tóg pãnónh tá kãre mũ sir. Kỹ Jesus tóg: “ker ù mỹ ãjag tỹ ùri nén vэг mũ tó hẽ,” he mũ. “Èprã ke fi kósin tỹ ã ter ja tá vỹn ke kar hã inh kãmén nĩ,” he tóg, Jesus ti.

¹⁰ Hã kỹ ag tóg ti vĩ han mũ sir. “Ne nẽ hỹn, ti tỹ: iser ja tá vỹn ke, he mũ tag ti?” he ag tóg mũ, jagnẽ mỹ.

¹¹ Kỹ ag tóg Jesus mỹ: “hã ra Topẽ vĩ to professor ag tóg Elias kãtĩg mãn ke tó tĩ. “Kãtĩg jé tóg ke mũ, Cristo kãtĩg ke to hã,” he ag tóg tĩ, Elias to. Hã mỹ?” he ag tóg mũ, Jesus mỹ.

¹² Kỹ tóg ag mỹ: “hỹ,” he mũ, “kãtĩg jé tóg ke mũ, Elias ti, nén kar han mãn jé,” he tóg. “Hã ra sóg rãn kỹ nĩ gé. Tỹ sóg ẽprã ke fi kósin nĩ mỹr,” he tóg. “Jagtar jagy mẽ jé sóg ke mũ. Ag tỹ iso é henh ke,” he tóg.

¹³ “Kỹ Elias vỹ hur kãtĩg gé, kỹ ag tóg ti tỹ han, ag tỹ nén han sór mũ ẽn ti,” he tóg. “Hã kỹ tóg rãn kỹ nĩ,” he tóg, Jesus ti.

Jesus tỹ kyrũ jagrẽ kórég kutẽm

(Mt 17.14-21; Lc 9.37-43a)

¹⁴ Kỹ ag tóg mũ mũ sir. Kỹ ag tóg vãhã Jesus mré mũ tĩ ù ag tá junjun mũ sir. Kỹ ag tóg vãnh e vэг mũ, ag pẽnĩn, kỹ Topẽ vĩ to professor ag tóg ag vĩ kato vĩ ù han mũ, Jesus mré mũ tĩ ag mỹ.

¹⁵ Kỹ tóg vãhã vãnh e ẽn ag mỹ e tĩ, ag tỹ ti ven kỹ. Kỹ ag tóg ti to pэтẽ kãmũ mũ sir, ti mỹ: “ã mỹ há?” he jẽ.

¹⁶ Kỹ Jesus tóg ag mỹ: “ãjag tỹ ne tỹ vēmén nẽ?” he mũ.

¹⁷ Kỹ ag kã ù tóg ti mỹ: “Senhor,” he mũ. “Inh kósin pére sóg kãtĩ, ã to,” he tóg. “Jagrẽ kórég ti nĩ, hã kỹ tóg vĩ vãnh (pẽ) nĩ,” he tóg.

¹⁸ “Ti jagrẽ kórég tỹ ti kã vyryn ke kỹ tóg kutẽ tĩ, kỹ tóg jãrãn tĩ, ã jã tỹ tóg gyngyn ke tĩ, tar' he tóg,” he tóg. “Ã mré mũ tĩ ag mỹ sóg to vĩ vễ, ag tỹ ti jagrẽ kórég kutẽm jé, hã ra ag tóg tỹ hẽ ri ke tũ nĩ,” he tóg, Jesus mỹ.

¹⁹ Kỹ Jesus tóg ag mỹ: “ãjag ne tóg inh ki rã há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tỹ hẽn ri ke ki inh hỹn ãjag mré tĩ nĩ? Kysã tỹ hẽn ri ke ki inh hỹn ãjag to fe tĩg nĩ?” he tóg. “Inh mỹ ti pére kãmũjẽg,” he tóg.

²⁰ Kỹ ag tóg ti mỹ ti pére kãmũ mũ sir. Jesus tỹ ti jagrẽ kórég vэг mũ ra tóg kyrũ kã vyryn ke mãn mũ gé, kỹ tóg kutẽ mãn mũ gé sir, vĩrĩn', vĩrĩn' ke tóg mũ gé sir, jãrãn tóg mũ gé sir.

²¹ Kỹ Jesus tóg ti panh ti mỹ: “mỹ si há tĩ ha?” he mũ. Kỹ tóg: “ã sĩ kã tóg ge nĩ,” he mũ, ti panh ti.

²² “Kejẽn ti jagrẽ kórég tóg pĩ ki ti fón mũ, goj ki ke gé, ti tỹ ti tén jé,” he tóg. “Ã tỹ hẽ ri ken há nĩn kỹ ẽg jagãgtãn nĩ, ti tỹ há' hemnĩ,” he tóg.

²³ Kỹ Jesus tóg ti mỹ: “ã tỹ hẽ ri ken hã nĩn kỹ, he tũg nĩ, inh mỹ,” he mũ. “Û tỹ Topẽ ki rã mũ ẽn tỹ hẽ ri ken há han mũ, nén kar tỹ,” he tóg, Jesus ti.

²⁴ Kỹ vễsỹmér kyrũ panh tóg: “ti ki sóg rãnh mũ,” he mũ, jamã hár(a). “Isỹ ti ki rã tũ ẽn ti tỹ inh ki tỹ tũ' hemnĩ,” he tóg.

²⁵ Hã ra Jesus tóg ù tỹ hẽn ri ke vẽnhmãn vэг mũ, kỹ tóg ti jagrẽ kórég to jũ mũ. “Vãnh jagrẽ vĩ vãnh',” he tóg, “vãnh jagrẽ kutu',” he tóg, “ha kãkutẽ, ti ki rã mãn tũg,” he tóg, Jesus ti.

²⁶ Kỹ tóg prẽr mũ sir, ti tỹ jũrũn ke han tóg mũ sir. Kỹ tóg kyrũ ki kãkutẽ mũ sir. Kỹ kyrũ tóg ter ve nĩ, kỹ ag tóg ti to: “tũg ja ti nĩ,” he mũ.

²⁷ Hã ra Jesus tóg ti nĩgẽ kãgmĩ kỹ ti nĩm mũ sir, kỹ tóg jẽgnẽ mũ sir.

²⁸ Kŷ Jesus tóg tĩ mũ. Ti tỹ ãn kãra rã kŷ ti mré mũ tĩ ag tóg ti pin kŷ ti mŷ vĩ mũ. “Ëg ne tóg ti tỹ há! he ja tũ nĩ. Hẽ ri ken kŷ, hŷn?” he ag tóg, Jesus mŷ.

²⁹ Kŷ tóg ag mŷ: “vẽnh jagrẽ kórég tỹ ge kutẽm tóg jagy nỹ ãg mŷ,” he mũ. “Topẽ mré ãg vĩ tĩ, kŷ ãg tóg mré vãkrég tĩ gé sir. Kŷ tóg vãhã kãkutẽ tĩ,” he tóg, Jesus ti.

Jesus tỹ ã ter ke tó mãn

(Mt 17.22-23; Lc 9.43b-45)

³⁰ Kŷ ag tóg tá kãpa kŷ Galiléia mĩ mũ mũ. Hã ra tóg: “ker ù ãg tỹ mĩ mũ ki kanhrãn hẽ,” he mũ.

³¹ Ti tỹ ti mré mũ tĩ ag kanhrãn sór vẽ, hã kŷ tóg ke mũ. Kŷ tóg ag mŷ: “ẽprã ke fi kósın ãn vỹ jagtar nĩnh mũ,” he mũ. “Inh hã vẽ. Ëprã ke ag vỹ ag tỹ isŷ nén han sór mũ ãn han ke mũ,” he tóg. “Ag tỹ isén ke vẽ. Ag tỹ isén kar kŷ sóg hã ra rĩr mãn mũ, kurã tãgtũ tũg kŷ,” he tóg, Jesus ti.

³² Kŷ tóg ag tỹ ti tỹ nén tó mũ tag to jykren tũ tĩ, hã ra tóg ag tỹ ti ki jẽmẽg tũ nŷtĩ, ag tỹ ti kamẽg kŷ.

Û tỹ tỹ ãn mág nĩ

(Mt 18.1-5; Lc 9.46-48)

³³ Kŷ ag tóg mũ mãn kŷ cidade tỹ Cafarnaum tá junjun mũ sir. Tá ag tóg ãn ù krẽm nŷtĩ. Ìn ãn tá junjun kŷ Jesus tóg ag mŷ: “ãjag tỹ ne tó mũ nẽ, ẽpry jagma?” he mũ.

³⁴ Hã ra ag tóg ti mŷ tó tũ nĩ. Ëmĩn jagma mũ kŷ ag tóg jagnẽ mŷ: “ù nỹ hŷn ãg kãfór kar jẽ?” he ja nŷtĩ.

³⁵ Kŷ Jesus tóg nĩ mũ, kŷ tóg ù tỹ 12 (ke) ag jé prẽr mũ sir, kŷ tóg ag mŷ: “ãjag mŷ tỹ ãn mág nŷtĩ sór mũ?” he mũ. “Kŷ vêsŷ ãn sĩ ri ke nŷtĩmĩ,” he tóg.

³⁶ Kŷ tóg gĩr sĩ mŷ: “kunĩg,” he mũ. Ag kuju kã tóg ti fẽg mũ, kŷ tóg ti jagma ã pẽ fón mũ sir, kŷ tóg ù tỹ 12 (ke) ag mŷ: “ãjag hã vỹ tỹ inh mré ke nŷtĩ,” he mũ.

³⁷ “Ajag tỹ tỹ inh mré ke nŷtĩ kŷ gĩr tỹ ge jẽ'ŷn nĩ, ti to há nŷtĩmĩ, isugrĩn. Ajag tỹ isugrĩn ti to há nŷtĩn kŷ ajag tóg iso há nŷtĩ gé,” he tóg. “Ajag tỹ iso há nŷtĩ kŷ ajag tóg ù tỹ ijẽnẽg mũ ãn to há nŷtĩ gé sir,” he tóg, Jesus ti.

Û tỹ Jesus kato tẽ tũ nĩ kŷ ti mré ke

(Lc 9.49-50)

³⁸ Kŷ João tóg Jesus mŷ: “Senhor,” he mũ. “Û ve ãg tóg, kŷ ãn tóg ã jŷy tó kŷ vẽn h jagrẽ kórég pan tĩ, ãg tỹ ãn vэг mũ ãn ti,” he tóg mũ, Jesus mŷ. “Hã ra tóg ãg mré tĩ tũ nĩgtĩ, kŷ ãg tóg ti mŷ: “vẽn h jagrẽ kórég pan sór tũg nĩ,” hé,” he tóg, João ti, Jesus mŷ.

³⁹ Hã ra Jesus tóg ti mŷ: “ti tỹ vẽn h jagrẽ kórég pan kamẽg tũg nĩ,” he mũ. “Û tỹ inh jiji tó kŷ nén han vãn h han kŷ tóg kar kŷ iso vĩ kónãn ke tũ nĩ,” he tóg.

⁴⁰ “Û tỹ ãg kato tẽ nĩ tũ nĩn kŷ ãg mré ke vẽ sir,” he tóg.

⁴¹ “Sŷ ke há vẽ, hã kŷ sóg tó mũ: kejẽn ù tóg ajag mŷ goj fẽg mũ, isugrĩn, ajag tỹ tỹ inh mré ke nŷtĩ tugrĩn. Ën tóg vẽn h kato nén ù há venh ke mũ ge,” he tóg, Jesus ti.

Ëg tỹ Topẽ vĩ mranh

(Mt 18.6-9; Lc 17.1-2)

⁴² Kŷ tóg ag mŷ ke mãn mũ. “Ûn sĩ tag vỹ inh ki rã kŷ jẽ. Kejẽn ù tóg ti tỹ inh vĩ mranh han sór mũ. Ën jykre vỹ kórég tãvĩ nỹ,” he tóg. “Ën hã mŷ tóg há nŷnh mũ vẽ, ù tỹ pó mág tỹ ti nunh to sa kŷ goj nig ki ti fón jé, ti tỹ goj ki ter jé. Jagy tãvĩ tóg tĩ, ù tỹ gĩr tỹ isovãn h han kŷ,” he tóg.

⁴³ “Ajã tỹ nén ù vóg kŷ Topẽ vĩ mranh kŷ ã nĩgnó kym nĩ, ã tỹ ke mãn tũ nĩ jé. Jagy tóg nỹ, ã nĩgnó pir ti. Jãvo tóg há nĩ, ã tỹ rĩr krŷg ja tũ venh ke mũ ti. Ajã tỹ ã nĩgnó régre ra nũgme ki kutẽn kŷ tóg jagy kãfór tĩnh mũ, inferno ki kutẽn kŷ, pĩ nhyr vãn h ki kutẽn kŷ.

⁴⁴ Tá ga ga tóg ã konh mũ gé, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé.

⁴⁵ Ajã tỹ hẽ kãtã tĩg kŷ Topẽ vĩ mranh kŷ ã pẽn kym nĩ, ã tỹ ke mãn tũ nĩ jé. Jagy ti nỹ, ã tĩg vãn h ti. Hã ra tóg há nĩ, ã tỹ rĩr krŷg ja tũ venh ke mũ ti. Ajã tỹ ã pẽn régre ra nũgme ki kutẽn kŷ tóg jagy kãfór tĩnh mũ, inferno ki kutẽn kŷ.

⁴⁶ Tá ga (ga) tóg ã konh mũ gé, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé.

⁴⁷ ã tỹ nén ũ ki v'ĩ kỹ Topẽ vĩ mranh kỹ ã kanẽ tỹ nám kemnĩ, ã tỹ ke mãn tũ nĩn jé. Jagy ti nĩ, ã kyvó ti. Jãvo tóg há nĩ, ã tỹ Topẽ tỹ tỹ ãg pã'i nĩ ven kỹ. ã tỹ ã kanẽ régre ra nũgme ki kutên kỹ tóg jagy kãfór tĩnh mũ, inferno ki kutên.

⁴⁸ Tá ga (ga) tóg ã konh mũ, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé," he tóg, Jesus ti.

Sa to comparação

(Mt 5.13-16; Lc 14.34-35)

⁴⁹ "Pĩ tỹ ãg pũn ri ke ti nĩ, ãg jagãgtar ti. Kỹ ãjag jagãgtar nỹtĩn kỹ isugrĩn, kỹ ãjag jagãgtar ãn ki ãjag jykre tóg kuryj nỹ sir. Kỹ tóg sa ri ke nĩ," he tóg.

⁵⁰ "Sa vỹ há nĩ. Hã ra sa kãhór nĩn kỹ tóg hã ra kórég nĩ, kỹ ãg tỹ ne tỹ ti tỹ kajã' henh ke tóg tũ tĩ, tỹ sa' he mãn ke tóg tũ tĩ," he tóg. "Kỹ sa há ri ke nỹtĩmnĩ. Jagnẽ to krĩ kusa nỹtĩmnĩ," he tóg, Jesus ti.

10

Ëg tỹ ãg prũ fi fón ke tũ

(Mt 19.1-12; Lc 16.18)

¹ Kỹ Jesus tóg tá kutẽ mũ, kỹ tóg ga tỹ Judéia ra tĩ mũ sir, goj tỹ Jordão mãra. Kỹ vãnh e ag tóg ti to vãnhmãmãm mũ sir, kỹ tóg ag kanhrãn mãn mũ gé. Ti tỹ nén han tĩ ãn han mãn tóg mũ. ² Kỹ Fariseu ag tóg ti tá junjun mũ gé sir. Ag tỹ ón kỹ ti ki jẽmẽ sór vễ, vãnh prũ fón ke to. Kỹ ag tóg ti mỹ: "ãg tỹ ãg prũ fi mỹ: ha tĩg, he tag mỹ kuryj nỹ?" he mũ. Ag tỹ ón kỹ ti vĩ mẽ sór vễ hã ra.

³ Kỹ tóg ag mỹ: "Moisés ãjag mỹ hẽ ri ké?" he mũ.

⁴ Kỹ ag tóg ti mỹ: "Moisés hã tóg ãg mỹ: ã tỹ ã prũ fi fón sór kỹ fi mỹ vãnh rán kỹ nĩm, fi tỹ kar kỹ tĩg jé, he ja nĩ, Moisés ti," he ag tóg.

⁵ Hã ra Jesus tóg ag mỹ: "ãjag fe kórég nỹtĩn kỹ, hã kỹ tóg ãjag mỹ tag tó ja nĩ, vãnh rán ki, Moisés ti," he mũ. ⁶ "Topẽ tỹ nén kar han ve ki tóg ti mré fi han," he tóg. ⁷ "Hã kỹ ãn gré tóg ã prũ fi to ã panh re kỹ tĩnh mũ, ã mỹnh fi ré kỹ ke gé. ã prũ fi mré tóg tĩnh mũ. ⁸ Fi mré tóg tỹ ãn pir nĩ sir, ã prũ fi mré, he tóg. Topẽ ti. Hã kỹ fag tóg tỹ ãn pir nỹtĩ. Fag pi(jé) tỹ ãn régre nỹtĩ'. ⁹ Hã kỹ fag tỹ vãnh kãpãm tũg nĩ. Topẽ tỹ fag tỹ ãn pir há(r) vễ mỹr," he tóg, Jesus ti.

¹⁰ Ag tỹ ãn kãtã nỹtĩn kỹ ti mré mũ tĩ ag tóg ti ki jẽmẽ mãn mũ, vãnh prũ fón to. ¹¹ Kỹ Jesus tóg ag mỹ: "ãjag tỹ ãjag prũ fi fón kar kỹ ũ fi tỹ prũg mãn kỹ ãjag prũ tũ fi vễ, ha mẽ," he mũ. ¹² "Kỹ fi tỹ ã mén fón kar ũ tỹ mén mãn kỹ fi mén tũ vễ gé," he tóg, Jesus ti.

Jesus tỹ gĩr mỹ vĩ há han

(Mt 19.13-15; Lc 18.15-17)

¹³ Jo fag tóg gĩr tatĩ kãmũ mũ, Jesus tỹ ã nĩgẽ tỹ ag mẽ jé. Hã ra ti mré mũ tĩ ag tóg fag to jũ mũ, ũ tỹ ag tatĩ kãmũ mũ fag to.

¹⁴ Hã ra Jesus tóg vэг mũ, kỹ tóg ã mré mũ tĩ ag to jũ mũ. Kỹ tóg ag mỹ: "vĩ tũg nĩ, gĩr ag mỹ," he mũ, "gĩr ag tỹ iso kãmũ kamẽg tũg nĩ," he tóg. "Ũ tỹ ge hã vỹ ãg Senhor tỹ Topẽ krêm nỹtĩ nĩ," he tóg. ¹⁵ "Sỹ ke há vễ, hã kỹ sóg tó mũ: gĩr ag vỹ iso há pẽ nỹtĩ. ãn kãsir tag ag ri ke nỹtĩmnĩ, ke tũ nĩ (mũ) ra ãjag tóg venh ke tũ (pẽ) nĩ, Topẽ tỹ tỹ ãg pã'i nĩ ti," he tóg.

¹⁶ Kỹ tóg gĩr jagma ã pẽ fón mũ sir, ã nĩgẽ tỹ tóg ag mẽ kãn mũ sir, ag to tóg Topẽ mré vỹ mũ sir.

Ũn rico kãmẽ

(Mt 19.16-30; Lc 18.18-30)

¹⁷ Kỹ Jesus tóg tĩg mãn mũ gé sir. Ti tỹ tĩg ke jẽ ra ũ tóg ti to vãnhvãg kãtĩ mũ, kỹ tóg ã jakrĩ tỹ jẽ mũ, kỹ tóg ti mỹ: "Senhor," he mũ. "Hã pẽ ã tóg nĩ," he tóg. "Sỹ inh rĩr krỹg ja tũ venh há tóg tĩ. Sỹ ti ve jé inh hỹn vãnh jykre há tỹ hẽ ri ke han mũ?" he tóg.

¹⁸ Kĩ Jesus tóg ti mĩ: “ã tỹ ne jé iso: há ã nĩ, he nẽ?” he mũ. “Ëg pi(jé) há nỹtĩ!” he tóg. “Topẽ hã ne ã pir mĩ há nĩ,” he tóg. ¹⁹ “Topẽ tỹ nén to ãg jyvẽn ki kanhró ã tóg nĩ, hã vỹ: ù tén tũg nĩ, he mũ, ã prũ tũ fi mré nỹ tũg nĩ, he mũ, nén ù péju(g) tũg nĩ, he mũ, ù to ón tũg nĩ, he mũ, vẽn mĩ mẽ nĩ tũg nĩ, he mũ, ã nỹ mré ã jóg kamẽg nĩ, he mũ,” he tóg ti mĩ, Jesus ti.

²⁰ Hã ra tóg Jesus ti mĩ: “tag kar ki sóg króm kãn, isĩn kã,” he mũ, kyrũ ti.

²¹ Kĩ Jesus tóg ti ki ãvãnh mũ, kĩ tóg tỹ ti fe jẽ. Kĩ tóg ti mĩ: “nén ù pir vỹ tũ nĩ ver,” he mũ. “Ã tũ kar vãm tĩg, ã tỹ ùn jagãgtar ag mỹ vin jé, jãnkamy ti. Kĩ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tĩg jé,” he tóg, Jesus ti. ²² Kĩ tóg ti mĩ vẽn mĩ tĩ, Jesus vĩ ti. Kĩ tóg fe kaj tĩ mũ sir, ti tũ e nĩn kĩ.

²³ Kĩ Jesus tóg vẽn pẽnĩn ãvãnh kĩ ã mré mũ tĩ ag mỹ ke mũ sir. “Jagy ti nỹ, ùn rico tỹ Topẽ tỹ tỹ ãg pã'i nĩ venh ke ti,” he tóg. ²⁴ Kĩ ti vĩ tóg ti mré mũ tĩ ag mỹ e tĩ. Hã ra Jesus tóg ag mỹ ke mãn mũ. “Inh krẽ’,” he tóg. “Jagy tãvĩ ti nỹ mỹr, Topẽ tỹ tỹ ãg pã'i nĩ venh ke ti,” he tóg. ²⁵ “Cavalo pãnĩ sór vỹ prėj nor fĩn kutẽ tũ nĩ,” he tóg. “Ti tỹ fĩn kutẽ há nĩn ra tóg ver jagy tĩ vỹ, ùn rico tỹ Topẽ tỹ tỹ ãg pã'i nĩ venh ke ti,” he tóg.

²⁶ Kĩ tóg ag mỹ e (pẽ) tãvĩ tĩ. “Kỹ ù hỹn kren ke tũ pẽ nĩ,” he ag tóg, jagnẽ mỹ.

²⁷ Kĩ Jesus tóg ag ki ãvãnh kĩ ag mỹ: “ẽprã ke ag vỹ vẽn krenkren han ki kagtĩg nỹtĩ,” he mũ. “Ag jãvo Topẽ tóg ãg krenkren han ki kanhró nĩ,” he tóg. “Topẽ hã tóg nén kar han ke ki kanhró nĩ inhhã,” he tóg, Jesus ti.

²⁸ Kĩ Pedro tóg ti mĩ: “ha vé,” he mũ. “Ëg tỹ nén ù kar ré kĩ ãg tóg ã mré mũ mũ,” he tóg ti mĩ.

²⁹ Kĩ Jesus tóg ag mỹ ke mãn mũ. “Sỹ ke há vỹ, hã kĩ sóg tó mũ,” he tóg mũ. “Û tóg kejẽn isugrĩn ã jamã ré kĩ tĩ mũ, ã jãvy ré kĩ tĩ mũ, ti kãke, ti ve, ti mỹnh, ti panh, ti krẽ, ti japỹ ré kĩ tĩ mũ gé, isugrĩn, vẽn vĩ sér tugrĩn,” he tóg. ³⁰ “Ën vỹ tóg sir vẽn kato ù tỹ 100 (ke) venh ke mũ, ùri hã ra, hã vỹ: ãmã kar, he mũ, jãvy kar, kãke kar, ve kar, mỹnh kar, ẽpỹ kar ve jé tóg ke mũ. Hã ra ag tóg ti vóg kónãn ke mũ gé. Kar kĩ tóg vãhã sir rĩr krỹg ja tũ venh ke mũ gé,” he tóg. ³¹ “Jãvo tag ki ùn mág ù tỹ tá tỹ ùn kãsir nỹtĩnh ke vỹ, tere kĩ, kĩ tag ki ùn kãsir ù tỹ tá tỹ ùn mág nỹtĩnh ke vỹ,” he tóg, Jesus ti.

Jesus tỹ ã jagtar ke tó mãn

(Mt 20.17-19; Lc 18.31-34)

³² Kar kĩ ag tóg mũ nĩ sir, Jerusalém ra, Jesus mré mũ tĩ ag, kĩ Jesus tóg ag jãmĩ tĩ nĩ. Hã ra tóg ag mỹ e tĩ, ti nón mũ ag tóg mũmẽg mũ sir, ag tỹ Jerusalém ra mũn kĩ. Kĩ Jesus tóg ù tỹ 12 (ke) ag mỹ vẽn kãmén mãn mũ, vyr mỹ. Ti tỹ ag mỹ ã tỹ nén venh ke ãn tó mãn sór vỹ. ³³ Kĩ tóg ag mỹ: “ha vé, Jerusalém ra ãg tóg mũ mũ,” he mũ. “Ëprã ke fi kósĩn ãn vỹ jagtar ke mũ. Inh hã vỹ. Ón kĩ Topẽ tũ ki rĩr tĩ to pã'i ag tóg ag tỹ isỹ nén han sór mũ ãn han ke mũ, Topẽ vĩ to professor ag ke gé,” he tóg. “Ag tỹ iso: ter jé tóg ke mũ, henh ke vỹ,” he tóg. “Kar kĩ ag tóg fóg ag mỹ inh fẽg ke mũ,” he tóg. ³⁴ “Kỹ ãn ag tỹ iso é henh ke vỹ, iso sug ke vỹ, inh mrãnmrãn ke vỹ gé, isén ke vỹ gé. Kar kurã tãgtũ ki sóg hã ra rĩr mãn mũ sir,” he tóg, Jesus ti.

Tiago mré João tỹ tỹ pã'i jẽ sór

(Mt 20.20-28)

³⁵ Kĩ Tiago mré João ag tóg ti kukãm mũ mũ, Zebedeu krẽ ag. “Senhor,” he ag tóg ti mĩ. “Ëg mỹ ãg tỹ nén to vĩ tag ti han,” he ag tóg, Jesus mỹ.

³⁶ Kĩ tóg ag mỹ: “ne nẽ, sỹ ãjag mỹ han ke ti?” he mũ.

³⁷ Kĩ ag tóg ti mỹ: “kejẽn ã tóg tỹ pã'i nĩnh mũ,” he mũ. “Kỹ sỹ ã pẽgja tá nĩnh há tóg tĩ vỹ,” he tóg, jo ù tóg: “sỹ ã jakãnh tá nĩnh há tóg tĩ vỹ,” he mũ gé. “Ëg tỹ ã rã hã nỹtĩnh há tóg tĩ vỹ, ã tỹ tỹ pã'i nĩn kĩ,” he ag tóg ti mỹ.

³⁸ Hã ra Jesus tóg ag mỹ: “ãjag tỹ nén to vĩ mũ ki kagtĩg ãjag tóg nỹtĩ,” he mũ. “Ãjag mỹ inh ri kén jagtar sór mũ?” he tóg. “Ãjag mỹ ãjag jagtar jagy tag to krónh kenh ke tũ nĩ vỹ?” he tóg.

³⁹ Kÿ ag tóg ti mÿ: “hÿ, ke jé ãg tóg ke mÿ,” he mÿ. Hã ra Jesus tóg ag mÿ: “hÿ, jagtar jé ãjag tóg ke mÿ, inh ri kén,” he mÿ. “Vësÿrénh jé ãjag tóg ke mÿ, inh ri kén,” he tóg. ⁴⁰ “Hã ra isÿ tÿ vë, sÿ ãjag mÿ: hej, he ti,” he tóg. “Ha inh pëgja tá nÿ, henh ke tÿ sóg nÿ,” he tóg. “Ha inh jakãnh tá nÿ, henh ke tÿ sóg nÿ gé,” he tóg. “Isÿ tÿ vë. Û tÿ inh rã nÿtÿnh ke ên ag tÿ inh rã nÿtÿnh ke vë,” he tóg.

⁴¹ Hã ra ù tÿ 10 (ke) ag tóg mëg mÿ, kÿ ag tóg ag to jÿ mÿ, João mré Tiago to.

⁴² Kÿ Jesus tóg ag jé prër kãn mÿ, kÿ tóg ag mÿ kãmén mÿ. “Fóg ag pã'i ag jykre ki kanhró ãjag tóg nÿtÿ,” he tóg. “Vënh kar jëgnëg ag tóg tÿ, kÿ ag mág ag tóg vënh kar mÿ: kemnÿ, ke tÿg nÿ, he tÿ, vÿ tar han kÿ,” he tóg. ⁴³ “Ag ri ke han tÿg nÿ. Ajag mÿ tÿ ùn mág nÿtÿ sór mÿ? Kÿ tÿ jagnë camarada ri ke nÿtÿmnÿ, jagnë tÿ ki rÿr kÿ. ⁴⁴ Ajag mÿ tÿ pã'i nÿtÿ sór mÿ? Kÿ jagnë krëm ke nÿtÿmnÿ, tÿ ùn kãsir nÿtÿmnÿ. ⁴⁵ Hã kÿ sóg camarada tÿ nÿ gé,” he tóg. “Sÿ tÿ camarada nÿ jé sóg kãtÿg, sÿ ãjag ki rÿr jé. Tÿ sóg ëprã ke fi kósin nÿ. Hã kÿ sóg vënh kar jagfy ter ke mÿ, sÿ ag krenkren han jé,” he tóg, Jesus ti.

Ûn kyvó tÿ há' he

(Mt 20.29-34; Lc 18.35-43)

⁴⁶ Kejën ag tóg ëmã tÿ Jericó tá junjun mÿ. Ag tÿ Jerusalém ra mÿ vë. Kar kÿ tóg Jericó ki kutë mÿ gé, Jesus ti. Ti mré mÿ tÿ ag tóg ti mré mÿ mÿ, vënh e kar ag ke gé. Hã ra Bartimeu tóg ëprÿ kri nÿ nÿ. Kyvó ti nÿ, hã kÿ tóg ëmÿn fyr kri nÿ kÿ: “inh mÿ nén ù nÿm,” he nÿgtÿ, Timeu kósin tag ti. ⁴⁷ Ën tóg Jesus tÿ ëprÿ jagma tÿg mëg mÿ sir, Nazaré tá Jesus ti. Kÿ tóg prër mÿ sir. “!..Jesus'..!” he tóg. “!..Davi kósin'..! !..Ijagãgtãn ra..!” he tóg.

⁴⁸ Hã ra ag tóg ti to jÿgÿ mÿ. “Më kã nÿ nÿ,” he ag tóg ti mÿ. Hã ra tóg prër mãn', prër mãn', he mÿ. “!..Davi kósin'..!” he tóg. “!..Ijagãgtãn ra..!” he tóg.

⁴⁹ Kÿ Jesus tóg ti to krÿg he mÿ. Kÿ tóg ti jé prër' he mÿ sir. Kÿ ag tóg ùn kyvó ãn jé prër mÿ sir. “ã fe tÿ há' hé, jëg ra, ã jé prër tóg mÿ,” he ag tóg ti mÿ. ⁵⁰ Kÿ tóg ã palitó fón kÿ jëgnë mÿ sir, Jesus to tóg tÿ mÿ sir.

⁵¹ Kÿ Jesus tóg ti mÿ: “inh ã tÿ hë ri kenh ke?” he mÿ. Kÿ ùn kyvó tóg: “Senhor,” he mÿ. “Sÿ venh há tóg tÿ,” he tóg. ⁵² Kÿ Jesus tóg ti mÿ: “hej,” he mÿ. “ã tÿ há' henh ke në ha,” he tóg. “ã tÿ inh ki rã kÿ ã há' henh ke mÿ,” he tóg. Kÿ tóg vësÿmér ëvãnh há' he mÿ sir, kÿ tóg ti nón tÿ mÿ sir, ëprÿ jagma.

11

Jesus tÿ Jerusalém tá jun

(Mt 21.1-11; Lc 19.28-40; Jo 12.12-19)

¹ Vãhã ag tóg cidade tÿ Jerusalém kakó tá nÿtÿ. Kÿ ag tóg ëmã tÿ Betânia tá junjun vén mÿ, ëmã tÿ Betfagé tá, krÿ tÿ Oliveiras tá ke gé. Kÿ Jesus tóg ã mré mÿ tÿ régre ag jëgnëg mÿ, ag tÿ ëmã ãn ra mÿ jé. ² “Ha ëmã ãn ra mÿjëg,” he tóg, “ëg jo ëmã nÿ ãn ra. Ajag tÿ tá jun kÿ ãjag tóg burrica fi krë venh ke mÿ. Se kÿ tóg jë,” he tóg. “Û vÿ ver ti kri nÿ ja tÿ nÿ,” he tóg. “Ti kavãn kÿ ti pére kãmÿmnÿ,” he tóg. ³ “Hën ri ke mÿn ag tóg ãjag mÿ: ãjag tÿ ne jé ti kyvãn nÿ? henh mÿ. Kÿ ag mÿ: ëg Senhor tóg ti ve sÿ han sór mÿ, hemnÿ. Kãnhmar tóg ti jënë mãn mÿ, hemnÿ,” he tóg ag mÿ, Jesus ti.

⁴ Kÿ ag tóg mÿ mÿ sir. Burrica krë vég ag tóg mÿ, jãnkã rã tóg se kÿ jë, ëmÿn kri. Kÿ ag tóg ti kavãg mÿ sir.

⁵ Kÿ ag tóg ag mÿ ke mÿ. “ãjag tÿ ne jé burrica sÿ kyvãn nÿ?” he ag tóg ag mÿ.

⁶ Kÿ ag tóg Jesus tÿ ãjag mÿ nén tó ja ãn ti tó mÿ, kÿ ag tóg: “ha ma mÿjëg ge,” he mÿ. ⁷ Kÿ ag tóg burrica krë ma mÿ mÿ sir, Jesus to. Ajag kur tÿ ag tóg ti kri kugjén mÿ sir, jumento sÿ ãn kri, kÿ tóg kri nÿ mÿ sir, Jesus ti. ⁸ Kÿ vënh kar tóg ãjag kur kugjén mÿ sir, ëprÿ kri, jo ù ag tóg ka féj krég mÿ gé, ëpÿ tá, ti jo vãvãm jé. ⁹ Kÿ ù ag tóg ti jãmÿ mÿ mÿ, jo ù ag tóg ti nón mÿ mÿ. Ën ag tóg prënprër mÿ sir. “!..Viva..!” he ag tóg, “!..pã'i vÿ ëg tá jun, ëg Senhor mág tÿ ti jënën kÿ..! ¹⁰ !..Sér tãvÿ tóg tÿ..! !..Ëg pã'i vë mÿr, ëg jóg'jóg tÿ Davi ri kén..! !..Topë tá tóg kãtÿg, ù tÿ kynhmÿ nÿ ãn tá, viva..!” he ag tóg mÿ, prënprër kÿ.

¹¹ Kĩ tóg Jerusalém ra rã mũ sir, Jesus ti. Topẽ jo ãn ra tóg rã mũ sir. Nén kar ki ãvãnh kar tóg Betânia ra tĩg mãn mũ, ù tỹ 12 (ke) ag mré, rãké ra.

Ka tỹ figueira

(Mt 21.18-19)

¹² Tỹ vaj kỹ, ag tỹ Betânia tá kãmũ kỹ tóg kókĩr mũ, Jesus ti. ¹³ Hã ra tóg ka tỹ figueira féj véj mũ sir, tãtã. Kỹ tóg to tĩ mũ sir, ti kanẽ ko jé. Tá jun kỹ tóg véj mũ, hã ra tóg féj tãvĩ jé. Ti kanẽn ke pètẽm tũ tóg nĩ ver. ¹⁴ Kỹ tóg ka tỹ figueira mỹ: “ũ tóg ã kanẽ ko mãn ke tũ nĩ ha,” he mũ. Hã ra ti mré mũ tĩ ag tóg ti vĩ mẽg mũ.

Jesus tỹ Topẽ jo ãn krẽm ag pan

(Mt 21.12-17; Lc 19.45-48; Jo 2.13-22)

¹⁵ Kỹ ag tóg mũ mãn kỹ Jerusalém tá junjun mũ sir. Topẽ jo ãn ra tóg rã mũ sir, Jesus ti, kỹ tóg tá ag pan kãn mũ sir, nén ù vender he tĩ ag, nén ù comprar he tĩ ag ke gé. Topẽ jo ãn krẽm ag tóg negociar he tĩ, jãnkamy trocar he tĩ ag ke gé. Ag mesa tỹ tóg vryrn ke mũ, Jesus ti. Sórãg vender he tĩ ag nĩgnĩ jafã tỹ tóg vryrn ke mũ gé sir. ¹⁶ Kỹ tóg ag tỹ Topẽ jo ãn fĩn nén gé mũ kamẽg mũ gé sir. ¹⁷ Kỹ tóg ag kanhrãn kỹ ag mỹ: “Topẽ vĩ rá to jykrén nĩ,” he mũ. “Inh ãn jiji vỹ: nação kar mỹ Topẽ mré vĩ jafã, he mũ, he tóg, Topẽ vĩ rá ki,” he tóg, Jesus ti. “Hã ra ãjag tóg Topẽ mré vĩ jafã tag krẽm nén kar pigju(g) mũgtĩ, kỹ tóg bandido ag jamã ri ke nĩ,” he tóg. Ag pan kỹ tóg ke mũ, Jesus ti.

¹⁸ Hã ra Topẽ tũ ki rĩr tĩ to pã'i ag vỹ Jesus vĩ mẽg mũ, Topẽ vĩ to professor ag ke gé. Kỹ ag tóg: “ẽg hỹn ti tỹ hẽn ri kenh ke mũ?” he mũ, “ẽg tỹ ti tỹ tũ' he jé?” he ag tóg mũ. Hã ra ag tóg ti kamẽg mũ. Vẽnh kar mỹ tóg há tĩ, ti tỹ ag kanhrãn kỹ. Hã kỹ ag tóg ti vóg tũ nĩ.

¹⁹ Kutyg kỹ ag tóg cidade mág ki pa mãn mũ sir, Jesus ti, ti mré mũ tĩ ag ke gé.

Ka tỹ figueira tóg

(Mt 21.20-22)

²⁰ Tỹ vaj kỹ ag tóg cidade ra mũ mãn mũ sir. Mũ kỹ ag tóg sir ka tỹ figueira ãn véj mũ, hã ra tóg tóg ja nĩ, ti jãre mré hã.

²¹ Kỹ Pedro tóg Jesus vĩ ki jykrén kỹ ti mỹ: “ha vé, Senhor,” he mũ. “Ã vĩ ja ãn hã vẽ,” he tóg. “Ã tỹ ka to vĩ kónãn ãn vỹ tóg ja nĩ, ka tỹ figueira ãn ti,” he tóg.

²² Kỹ Jesus tóg ag mỹ: “Topẽ ki ge pẽ han nĩ,” he mũ. ²³ “Sỹ ke há vẽ, hã kỹ sóg tó mũ: kejẽn ãjag tóg krĩ tag ti mỹ: ha goj nig ki kutẽ, henh ke mũ. Kỹ tóg ki kutẽnh mũ, pãnónh ti, ãjag tỹ ãjag fe tỹ: ti mỹ ki kutẽnh mũ vỹ? he tũ nĩn kỹ,” he tóg. “Inh vĩ han jé tóg ke mũ, pãnónh ti, hemnĩ, kỹ tóg kutẽnh ke mũ, ha vemnĩ,” he tóg, Jesus ti. ²⁴ “Hã kỹ sóg ãjag mỹ ke mũ,” he tóg. “Ãjag tỹ Topẽ mỹ nén ù to vĩ kỹ to: han jé tóg ke mũ, Topẽ ti, hemnĩ, kỹ ãjag tóg venh ke mũ sir, ãjag tỹ ti mỹ nén ù to vĩ mũ ti,” he tóg. ²⁵ “Ãjag tỹ kejẽn Topẽ mré vĩ jẽ ra ù tỹ ãjag to jũ mũ ãn tỹ ti mỹ vẽn pãte fón nĩ,” he tóg. “Ãjag tỹ gen kỹ tóg ãjag mỹ vẽn pãte fón ke mũ gé, ẽg jóg mág ti,” he tóg. “Ãjag tỹ ti vĩ mranh mũ ra tóg vẽn kato ãjag mỹ vẽn pãte fón ke mũ, ù tỹ kanhkã tá nĩ ti, ãjag tỹ ãjag mré ke ag mỹ vẽn pãte fón kỹ,” he tóg. ²⁶ “Ãjag tỹ hã ra ag mỹ vẽn pãte fón tũ nĩn kỹ ẽg jóg mág vỹ vẽn kato ãjag mỹ vẽn pãte fón ke tũ nĩ gé, ù tỹ kanhkã tá nĩ ti,” he tóg, Jesus ti.

Jesus tỹ ù tỹ ã jẽnẽg mũ tó tũg

(Mt 21.23-27; Lc 20.1-8)

²⁷ Kỹ ag tóg mũ mãn kỹ Jerusalém tá junjun mãn mũ sir. Topẽ jo ãn tá tóg ãvãnh tĩ mũ, Jesus ti. Kỹ Topẽ tũ ki rĩr tĩ to pã'i ag tóg ti venh kãmũ mũ, Topẽ vĩ to professor ag ke gé, kófa ag ke gé. ²⁸ “Û nỹ ã mỹ: tag han nĩ, hé?” he ag tóg, ti mỹ. “Û nỹ ã jẽnẽ?” he ag tóg.

²⁹ Kỹ Jesus tóg ag mỹ: “ãjag ki sóg jẽnẽnh ke mũ gé, vẽn kato,” he mũ. “Ãjag tỹ inh mỹ tó há han kỹ sóg ãjag mỹ ù tỹ inh jẽnẽg mũ tónh ke mũ gé,” he tóg. ³⁰ “João vỹ ag kygpég tĩ ja nĩgtĩ. Ti mỹ kanhkã tá vẽn jykre han, ãjag mỹ, ẽprã ke jykre vó? Û nỹ ti jẽnẽ?” he tóg ag mỹ, Jesus ti. “Inh mỹ tó,” he tóg.

³¹ Kÿ ag tóg jagnë mré to jykrén mü. “Ëg tÿ ti mÿ: Topë tÿ ti jënë ja vë, hen kÿ tóg ëg mÿ: ãjag tÿ ne jé ti ví kri fig tÿ ja nÿ në? henh ke mü,” he ag tóg jagnë mÿ. ³² “Ëg tÿ hã ra ti mÿ: ëprã ke jykre ja vë, hen kÿ tóg vënhmÿ nÿ gé,” he ag tóg, ag tÿ vënh kar kamëg kÿ. Vënh kar tóg João to: “Topë ví tó tí pë vë,” he tí. ³³ Hã kÿ ag tóg Jesus mÿ: “ëg pi(jé) ki kanhró nÿtí,” he mü. Ón kÿ ag tóg ke mü. Kÿ Jesus tóg ag mÿ: “kÿ sóg ãjag mÿ tónh ke tÿ nÿ gé, ù tÿ inh jënëg mü ti,” he mü. ã kato tẽ mü ag mÿ tóg ke mü.

12

Ûn camarada kórég ag to comparação

(Mt 21.33-46; Lc 20.9-19)

¹ Kÿ Jesus tóg ag kanhrãn kÿ (tóg) ag mÿ comparação ù han mü sir, kÿ tóg: “kejën ù tóg nÿgtí,” he mü. “Nén kanë tÿ uva krãn ja tóg nÿgtí,” he tóg. “Pénin tóg rón ja nÿ, kãki tóg kÿm ja nÿgtí, uva jëgmÿ jafã han jé. Ki tóg pájó han ja nÿ gé, kÿ tóg ù tÿ ki rÿr tí ag mÿ ré kÿ tÿg ja nÿ, ga ù ra. Ag mré tóg jykrén ja nÿ, ag tÿ ti mré ëkré ën kanë vënh kãpãm jé,” he tóg, Jesus tí. ² “Tÿ tÿ kejën kanën kÿ tóg ag mÿ ã camarada ù jënëg mü, ti tÿ ki rÿr tí ag mÿ, ag tÿ ti mÿ vënh kãpãm jé, uva ti.

³ Hã ra ag tóg ti kãgmÿ mü sir, ti mrãnmrãn ag tóg mü sir, kÿ ag tóg ti mÿ: “ha tÿg,” he mü sir, ti mÿ nén ù nÿm mẽ kã. ⁴ Kÿ tóg ag mÿ ã camarada ù jënë mãn mü gé sir, kÿ ag tóg ti krÿ ki tãnh mü sir, ti to é he ag tóg mü sir. ⁵ Kÿ tóg ag mÿ ù jënë mãn mü gé sir, hã ra ag tóg ti tén mü gé sir. Ti camarada kar to ag tóg jÿ mü, ù mrãnmrãn ag tóg, ù tén ag tóg.

⁶ Kÿ hã ra ù tóg kén mü, hã ra ti kósin vë, ti fe pë vë hã ra. Kÿ tóg vãhã ag mÿ ti jënëg mü sir. “Hën ri ke mÿn ag inh kósin kamëg mü,” he tóg, hã kÿ tóg ti jënëg mü.

⁷ Ti tÿ tá jun kÿ ag tóg ti to jykrén mü, jagnë mré. “Kejën ëkré kar vÿ tÿ ti tÿ nÿnh mü, ha vemñi,” he ag tóg ti to. “Mü nÿ, ti tén jé, ti tÿ tag tÿ tÿ ëg tÿ nÿnh jé,” he ag tóg, jagnë mÿ. ⁸ Kÿ ag tóg ti kãgmÿ kÿ ti tén mü sir, ró mãtã ag tóg ti fón mü sir,” he tóg, Jesus tí.

⁹ “Kÿ ëkré tÿ tÿn mü ën hë ri kenh ke mü?” he tóg. “Jun jé tóg ke mü, ã camarada ag kãgtén jé. Kÿ tóg ëkré ki rÿr tí ù ag mÿ finh ke mü, ti tÿ ti,” he tóg. Jesus tí, ag mÿ comparación han kÿ.

¹⁰ Kÿ tóg ag mÿ: “Topë ví rá tag to jykrén nÿ, ha mẽ,” he mü. “Pó tÿ ñn han jafã fón ag tóg, pó tÿ ñn han tí ag. Ag mÿ tóg kórég ja nÿ, pó ën ti. Hã ra Topë tóg po ën hã tÿ ñn nÿna han mü. ¹¹ Ëg Senhor mág tÿ há vë, hã kÿ tóg ëg mÿ e tí, ëg tÿ ven kÿ, he tóg, Topë ví tÿ rán kÿ nÿ ki,” he tóg ag mÿ, Jesus tí. Ti tÿ ã kato vãsãnsãn mü ag mÿ vënh kãmén hã vë.

¹² Kÿ ag tóg ki kanhró nÿtí, ti tÿ ag kato ví mü ti. Hã kÿ ag tóg ti se sór mü, hã ra ag tóg vënh e ën kamëg mü, kÿ ag tóg ti ség tÿ nÿ ha. Kÿ ag tóg sir mü mü, ti ré kÿ.

Ëg tÿ imposto kajãm ke

(Mt 22.15-22; Lc 20.20-26)

¹³ Hã ra ag tóg ti to ù ag jëgnëg mü sir, Fariseu ù ag, Herodes mré ke ù ag ke gé, ag tÿ ti ví to ti se jé, Jesus tí. ¹⁴ Ag tÿ ti tá junjun kÿ ag tóg ti mÿ: “Senhor,” he mü. “ã jykre kuryj nÿn ki kanhró ëg tóg nÿtí,” he ag tóg, ón kÿ. “Vënh jykre pir hã han ã tóg tí, vënh kar mÿ. Kÿ ag ve tóg ã mÿ tÿ nén ù tÿ nÿ. Hã kÿ ã tóg Topë jamÿn to, Topë japry to ã tóg ëg kanhrãn há han tí,” he ag tóg, ón kÿ, Jesus mÿ. “Mÿ há nÿ', ëg tÿ governo mÿ jãnkamy nÿm ke ti', imposto kajãm ke ti'? ¹⁵ Ëg mÿ hÿn nÿm mü', vó mÿ vó?” he ag tóg.

Hã ra Jesus tóg ki kanhró nÿ, ag jykre régre nÿtÿn ki. Kÿ tóg ag mÿ: “ãjag ne tóg ón kÿ inh ki jëmë sór mü',” he mü. “Inh mÿ jãnkamy jun, sÿ ve jé,” he tóg. ¹⁶ Kÿ ag tóg ti mÿ ù jun mü sir. Kÿ tóg: “ù jÿji nÿ kã nÿ?” he mü. “Û kãggrã nÿ kã nÿ?” he tóg. Kÿ ag tóg ti mÿ: “pã'i mág tÿ imperador kãggrã vë,” he mü.

¹⁷ Kÿ Jesus tóg ag mÿ: “kÿ pã'i mág mÿ ti tÿ nÿmñi, hã ra Topë mÿ ti tÿ nÿmñi gé,” he mü. Kÿ ti ví tóg ag mÿ e tí. Ag tÿ nén ù to ti se sór mü vég tÿ ag tóg nÿ.

Ëg tÿ ëg ter ja tá vÿn kenh ke

(Mt 22.23-33; Lc 20.27-40)

¹⁸ Kÿ Saduceu ag tóg ti tá junjun mũ gé, ti ki jëmê jé. Hã ra Saduceu ag tóg: ãg ter ja tá ãg vÿn kenh ke tũ nĩ,” he tĩ. Kÿ ag tóg Jesus tá jun kÿ ti mÿ: ¹⁹ “Senhor,” he mũ gé. “Moisés tóg ãg mÿ tag tó ja nĩ, ãg tÿ tÿ jykre nÿtĩ jé,” he ag tóg. “Ëg mÿ tóg: ã régre tÿ ã krê tũ ra ter kÿ, ã tÿ ti prũ fi tÿ prũg ke vë, he mũ. ã tÿ ã régre mÿ ã krê han ke vë, fi ki, he ja tóg nĩ, Moisés ti,” he ag tóg, Jesus mÿ, Saduceu ag. ²⁰ “Kÿ ù tÿ jagnê mré pafa ja tÿ 7 (ke) ag vÿ nÿtĩ ja nĩgtĩ,” he ag tóg. “Ag kãke tóg prũg mũ, hã ra tóg ã kósin tũ ra ter mũ sir,” he ag tóg. ²¹ “Kÿ ti jãvy tóg fi tÿ prũg mũ, hã ra tóg ã kósin tũ ra ter mũ gé sir. Kÿ ti jãvy ù vÿ fi tÿ prũg mũ gé,” he ag tóg. ²² “Hã ra ag kar tóg fi kósin tũ ra kãgter kãn mũ sir, ag kãke ti nón, ù tÿ 7 (ke) ãn ag. Kejën fi tóg vãhã ter mũ gé sir,” he ag tóg. ²³ “Kÿ fag kãgter ja tá vÿnvÿn ke kÿ fi hÿn mén tÿ 7 (ke) nĩnh mũ vë. Ag kar vÿ fi tÿ prũg ja nÿtĩgtĩ. Hã kÿ tóg vënhmÿ nÿ, ag tÿ: rĩr mãn jé ãg tóg ke mũ, hen kÿ,” he ag tóg, Jesus ti mÿ, Saduceu ag.

²⁴ Hã ra Jesus tóg ag mÿ: “ãjag pi(jé) Topê vĩ tÿ rán kÿ nĩ ki kanhró nÿtĩ,” he mũ, “Topê jykre ki kagtĩg ãjag nÿtĩ,” he tóg. “Hã kÿ ãjag tóg kygnê ja nĩ,” he tóg ag mÿ. ²⁵ “Ëg tÿ ãg ter ja tá vÿn ke kÿ ãg prũg ke tũ nĩ, kÿ ãg mén ke tũ nĩ gé,” he tóg. “Topê tÿ jëgnê jafã ri ke ãg nÿtĩ, kanhkã tá,” he tóg. ²⁶ “Topê vĩ ù to jykren nĩ, ti tÿ ãg tÿ ãg ter ja tá vÿn ke kãmén kÿ. Moisés tÿ rán ki tag tóg rán kÿ nĩ, Topê tÿ Moisés mÿ nén tó ja tag ti, vãnh pũr kãmén jan ki,” he tóg. “Topê tóg ti mÿ: Abraão vÿ iso: Topê, he tĩ, he ja nĩ, Isaque ke gé, Jacó ke gé, he ja tóg nĩ, Topê ti. Kãgter ag huri, Abraão, Isaque, Jacó. Hã ra Topê tóg: tÿ inh ag Topê nĩ, he ja nĩ, ag ter kar kÿ. ²⁷ Hã kÿ ag tóg rĩnrĩr nÿtĩ mÿr, Topê tÿ ùn rĩnrĩr nÿtĩ ag hã kri ke nĩn kÿ,” he tóg, Jesus ti. “Hã kÿ ãjag tóg kygnê tãvĩn mũ,” he tóg, Jesus ti, Saduceu ag mÿ.

*Topê tÿ ãg jyvën kãfór
(Mt 22.34-40; Lc 10.25-28)*

²⁸ Hã ra Topê vĩ to professor ù tóg tá jun mũ gé sir. Kÿ tóg ag tÿ jagnê mré vĩ mÿg mũ, Jesus tÿ Saduceu ag mÿ tó há han ja ãn ti. Hã kÿ tóg: “Topê tÿ ãg jyvën tÿ hẽ nÿ hÿn ti tÿ ãg jyvën kar kãfór nÿnh mũ?” he mũ, Jesus mÿ.

²⁹ Kÿ Jesus tóg ti mÿ: “ù tÿ kãfór nÿn hã vë, hã mẽ,” he mũ. “Ha mẽ, povo tÿ Israel,” he tóg mũ. “Ëg pã'i vÿ tÿ Topê nĩ, ãg pã'i vÿ tÿ ùn pir nĩ,” he tóg. ³⁰ “Topê to, ãg jóg mág to há tãvĩ nÿtĩmnĩ,” he tóg, “ti ki ge há han nĩ, ti to jykre pir nÿtĩmnĩ, krĩ pir, ti to tar nÿtĩmnĩ,” he tóg. ³¹ “Kÿ ti tÿ ãg jyvën ù tóg hã ri ke nĩ gé, hã vÿ: ãjag régre ki rĩr nÿtĩmnĩ, ãjag tÿ vënh ki rĩr há han ri ke, he mũ,” he tóg. “Ti tÿ ãg jyvën ù pi(jé) tag kãfór nĩ,” he tóg, Jesus ti, Topê vĩ to professor ãn mÿ.

³² Kÿ Topê vĩ to professor ãn tóg ti mÿ: “ke tóg tĩ,” he mũ. “ã tÿ ke há vë. Pir ti nĩ, Topê ti, ù pi(jé) ti ri ke nĩ,” he tóg. ³³ “Ëg jé ti to fe há nÿtĩgtĩ, ãg jé ti to krĩ há nÿtĩgtĩ gé, jykre pir ke gé. Ëg jé ti to tar nÿtĩ gé. Ëg jé ãg régre ki rĩr nÿtĩ gé, ãg tÿ vënh ki rĩr há han ri ke. Hã vÿ tóg nén kar kãfór nĩ,” he tóg. “Ëg tÿ Topê mÿ nén ù pũn kãfór tóg nĩ, ãg tÿ ti to há nÿtĩ ãn ti, ãg tÿ ti mÿ nén ù tãnh kãfór tóg nĩ gé,” he tóg, Topê vĩ to professor ãn ti.

³⁴ Kÿ Jesus tóg ti tÿ tó há nĩ ve kÿ (tóg) ti mÿ: “nén ù sĩ tóg tũ nĩ ver,” he mũ, “ã tÿ Topê tÿ tÿ ãg pã'i nĩ venh ke jé,” he tóg. Kar kÿ ù tóg Jesus ki jëmê mãn tũ nĩ sir. Ti kamÿg ag tóg mũ sir, hã kÿ ag tóg ti ki jëmê mãn tũ nĩ sir.

*Cristo tÿ tÿ Davi kósin nĩ
(Mt 22.41-46; Lc 20.41-44)*

³⁵ Kÿ Jesus tóg Topê jo ãn krêm ag kanhrãn jé ag ki jëmÿg mũ. “Topê vĩ to professor ag tÿ ne jé: Cristo vÿ tÿ Davi kósin nĩ, he nẽ?” he tóg ag mÿ. ³⁶ “Davi vÿ Cristo tó ja nĩ, Topê kuprĩg tÿ ti krĩn kÿ, kÿ tóg: ãg jóg mág tÿ Topê vÿ inh Senhor mÿ tag tó ja nĩ, hã kÿ tóg: “nĩ ra ver, inh pëgja tá,” he ja nĩ. “Sÿ ã kato vãsãnsãn mũ ag tÿ ã krêm vin ke vë, kÿ ag sigse vë sir. Tag jãvãnh nĩ ver,” he ja ti nĩ, Topê ti, inh Senhor mÿ, he ja tóg nĩ, Davi ti,” he tóg ag mÿ, Jesus ti. ³⁷ “Hã kÿ Davi tóg Cristo to: inh Senhor vë, he tĩ. Ti tÿ tÿ ti kósin nĩ ra ti kósin mÿ tÿ ti kri ke nĩnh mũ vë?” he tóg, Jesus ti. Hã ra ag tóg ti mÿ tó tũg. Ag tÿ ne tónh ke tóg tũ tĩ, ti kato vãsãnsãn mũ ag mÿ. Hã ra vënh kar mÿ ti vÿ tag tóg há nÿ.

*Ón kÿ Topẽ vî to professor ag tÿ jagtar ke
(Mt 23.1-36; Lc 20.45-47)*

³⁸ Kÿ Jesus tóg ag kanhrãn kÿ: “ón kÿ Topẽ vî to professor ag kamẽg nĩ,” he mũ. “Kur téj rinh ka(mẽ) ag nÿtĩ,” he tóg. “Kÿ vãnh kar tÿ ag mÿ: ã mÿ há? he kÿ tóg ag mÿ sér tĩ, ag tÿ cidade kaju kãmĩ mũn kÿ,” he tóg. ³⁹ “Ëg tÿ vãnh kanhrãn jafã krẽm ag tóg vãnh kãpãm kÿ nÿtĩgtĩ, festa ki ag tóg jẽn vén tĩ, ag tÿ tÿ pã'i nÿtĩn kÿ,” he tóg. ⁴⁰ “Hã ra ag tóg ùn mén ter ja fag tũ mãn kãn tĩ. Fag tũ mãn kãn kÿ ag tóg ón kÿ Topẽ mré vî mág han mũgtĩ, ãg tÿ ag to: ùn há vÿ tÿ ag nÿtĩ, he jé,” he tóg. “Hã to ag vêsÿrẽnh mág tãvi han ke mũ,” he tóg, Jesus ti.

*Ûn jagtar fi tÿ ã tũ vin kãn
(Lc 21.1-4)*

⁴¹ Kÿ Jesus tóg kejẽn Topẽ mÿ jãnkamy vin jafã kato nĩ mũ. Kÿ tóg ag tÿ kãki nén vin mũ vég mũ sir. Ûn rico ag tóg jãnkamy mág tÿ kãki vin mũ. ⁴² Kÿ ùn jagtar fi tá jun mũ gé, ùn mén ter ja fi. Hã ra fi tóg jãnkamy kãsir régre hã vin mũ sir, hã vÿ: 1 centavo, he mũ.

⁴³ Kÿ Jesus tóg ã mré mũ tĩ ag jé prẽr mũ sir, kÿ tóg ag mÿ: “ve ra ha,” he mũ. “Ûn rico tÿ vin kãfór han fi tóg, fi tũ sĩ (hã) ra. Tÿ nén ù tũ fi tóg nĩ, fi mén vÿ hur ter. ⁴⁴ Kÿ fi tóg ã tũ vin kãn ja nĩ, fi jẽn mré hã. Jãvo ùn rico ag vÿ ãjag tũ ke hã tÿ Topẽ mÿ vin mág tĩ. Hã ki fi tóg ag tÿ nĩm kãfór han, fi tÿ nĩm sĩ pẽ han mũ ra. Ki hã sóg tó mũ mÿr,” he tóg, Jesus ti.

13

*Ag tÿ Topẽ jo ãn kókén ke
(Mt 24.1-2; Lc 21.5-6)*

¹ Kÿ Jesus tóg Topẽ jo ãn tá kãkutẽ mũ sir. Re tá ti mré tĩ ù tóg ti mÿ: “ve ra ha, Senhor,” he mũ. “Pó sĩnvĩ tÿ tóg há nÿtĩ, kÿ tóg sĩ(nvĩ) tãvĩ nÿtĩ, ãn ti,” he tóg, Topẽ jo ãn to.

² Hã ra Jesus tóg ti mÿ: “ã mÿ ãn mág tag ti vigvég mũ?” he mũ. “Kejẽn ù pó tÿ jagnẽ kafãn mãn ke tũ nĩ,” he tóg. “Ag rãnrãj kãn ke vẽ,” he tóg Jesus ti.

*Vãnh jagãgtar to rã
(Mt 24.3-14; Lc 21.7-19)*

³ Kar kÿ Jesus tóg krĩ tÿ Oliveiras ra tĩg kÿ tá nĩ nĩ sir, Topẽ jo ãn kakãm. Kÿ ag tóg ag pin kÿ ti mÿ ke mũ, Pedro, Tiago, João, André ke gé. ⁴ “Ëg mÿ ti kurã ti tó,” he ag tóg ti mÿ. “Ëg ne ve kÿ ti kurã ki kanhró nÿtĩnh mũ? Kurã tÿ hẽ ki ãg hÿn nén kar tag venh ke mũ?” he ag tóg ti mÿ.

⁵ Kÿ Jesus tóg ag mÿ kãmén mũ sir. “Ker ù ãjag lograr hé hẽ’,” he tóg. ⁶ “Cristo vÿ tÿ inh nĩ,” he jé ag tóg ke mũ, ijiji tó kÿ. Û tÿ hẽn ri ke ag tóg tag tónh mũ, kÿ ù tÿ hẽn ri ke ag tóg ag vî kri nĩm ke mũ,” he tóg. ⁷ “Vãnh génh to vême mẽ jé ãjag tóg ke mũ, tag ki vãnh génh ke to, kuvar há tá vãnh génh to ke gé. To jürũn ke tũg nĩ hã ra. Vãnh génh enh ke vẽ. Hã ra kurã tÿ ãgno to hã ke vẽ ver,” he tóg. ⁸ “Nação ag tÿ jagnẽ kato tẽgtẽnh ke vẽ. Pã'i krẽm ke ag tÿ pã'i ù krẽm ke ag to jũnh ke vẽ gé. Kÿ ga tÿ ragrag ke tÿ hẽn ri ke han ke vẽ gé, ãmã tÿ hẽn ri ke ki. Vẽjẽn tÿ tũ' henh ke vẽ gé. Hã ra ãjag jagãgtar ke vãnh ven vén vẽ ver,” he tóg, Jesus ti.

⁹ “Ãjag kanẽ nĩm nĩ,” he tóg. “Ãjag jyvẽn tar han jé ag tóg ke mũ, pã'i ag, vãnh kanhrãn jafã krẽm. ãjag mrãnmrãn jé ag tóg ke mũ. ãjag jé prẽr jé ag tóg ke mũ, pã'i mág tÿ ãjag ve jé, pã'i mág kar ti, isugrĩn, ãjag tÿ pã'i ag mÿ inh vî tugtó jé,” he tóg. ¹⁰ “Kÿ inh kãtĩg ke to hã povo kar vÿ inh vî sér mẽnh ke mũ,” he tóg. ¹¹ “Ag tÿ vãhã sir ãjag sigse kÿ, ãjag gé kãmũ jé, kÿ ãjag tÿ nén tónh ke mũ to jykrén tũg nĩ, kã jatu' hemnĩ. Ag tÿ ãjag ki jẽmẽn kÿ ãjag tóg tónh ke mũ, Topẽ kuprĩg tÿ ãjag nĩgrẽg ki vî mũ ãn ti,” he tóg. “Ãjag tÿ tó tũ vẽ sir, ti tÿ tó vẽ sir,” he tóg. ¹² “Û vÿ tóg ã régre senh ke mũ, ti ter jé, ãn kã,” he tóg. “Kÿ ù panh tóg ã kósin senh ke mũ gé, ti ter jé,” he tóg. “Kÿ ù krẽ ãn tóg ã han mũ fag

sigsenh ke mū gé, fag kăgtén jé,” he tóg. ¹³ “Věnh kar vỹ tóg ājag to vĩ kónān ke mū gé, inh jiji tugrīn,” he tóg. “Hā ra ũ tỹ isovānh ke tū (pě) ěn kren ke vē,” he tóg.

Věsýrénh mág ke

(Mt 24.15-28; Lc 21.20-24)

¹⁴ Kĩ Jesus tóg ag mỹ: “kejěn ājag tóg vāhā ājag tỹ nén ũ kaměg tĩ ěn venh ke mū,” he mū, “ěg kavénh mū ěn ti,” he tóg. “Topě vĩ tó tĩ tỹ Daniel vỹ ti tó ja nĩgtĩ. Ti jěnh ke tū tá tóg jěnh mū,” he tóg. ũ tỹ to ke mū ěn jé ki kanhró nĩ. “Kỹ Judéia ki ke kar ag jé věnh pigjunh mũjěg, pānónh ra, fag mré hā,” he tóg. ¹⁵ “Ũ tỹ re tá nĩ ěn jé kāra rā tũg nĩ, ti ĩn ki, ti tū mǎn jé. ¹⁶ Kĩ ũ tỹ ā japỹ tá jě ěn jé vỹn ke tũg nĩ gé, ti kur mǎn jé,” he tóg. ¹⁷ “Ũn kufy fag tỹ věsýrénh ke vē, kurā ěn kā, ũ tỹ gĩr pygfām mū fag ke gé,” he tóg. ¹⁸ “Topě mré vĩmnĩ, ti tỹ kusa kā věnh ven tū nĩ jé. ¹⁹ Věsýrénh tỹ ge ve ja tū ěg nỹtĩ, Topě tỹ ěg mundo han jan ki. Kĩ ěg ge venh ke tū nĩ gé, kar kỹ,” he tóg. ²⁰ “Ěg tỹ kurā ki věsýrénh ke mū ěn vỹ e nỹtĩnh mū vē, hā ra tóg térem kỹ nỹtĩ nĩ, Topě tỹ ũn kuprěg ja ěn ag tugrīn. Ti tỹ térem tū nĩ (mū) ra ũ vỹ kren ke tū nĩ vē, ag vēsýrénh ěn to,” he tóg.

²¹ “Kỹ ũ tỹ ājag mỹ: ha vé, Cristo vỹ tag kā jě nĩ, he mū ra kri fig tũg nĩ, ti tỹ: tātá ti jě nĩ, he mū ra,” he tóg. ²² “Ōn kỹ Cristo vỹ věnh venven ke mū, ón kỹ Topě vĩ tó tĩ ag ke gé. Ōn kỹ milagre hyn han jé ag tóg ke mū, milagre tỹ hěn ri ke ti, ón kỹ Cristo ěn ag. Ag tỹ věnh kar krīn kónān sór vē, ag tỹ kygně jé, Topě tỹ ũn kuprěg ja ěn ag mré hā, hěn ri ke mūn. ²³ Ha vé, sỹ ājag mỹ tó kǎn vē, ti kutěnh ke to hā,” he tóg, Jesus ti.

Topě kósin kătĩg mǎn ke

(Mt 24.29-31; Lc 21.25-28)

²⁴ “Hā ra kurā ěn kā, věsýrénh ěn kar kỹ rā vỹ nhyr ke mū, kỹ kysā vỹ jěngrě' he mǎn ke tū nĩ gé. ²⁵ Kĩ krĩg vỹ vār ke mū gé, kanhkā krěm. Ěg tỹ kanhkā tá nén vég tū kar ěn vỹ ragrag ke kǎn mū gé. ²⁶ Kĩ vāhā věnh kar vỹ inh kătěre venh ke mū sir, kanhkā góg jagma, inh jykre tar (pě) nĩn kỹ,” he tóg. “Tỹ sóg ěprā ke fi kósin nĩ mỹr,” he tóg. “Inh ve vỹ kókov (pě) kătĩ mū,” he tóg. ²⁷ “Kỹ sóg sỹ jěgně jafā ag mỹ: ha mũjěg, henh ke mū, ag tỹ sỹ ũn kuprěg ja ag věnhmǎn jé, ga kar tá, kanhkā fyr mĩ hā,” he tóg, Jesus ti.

Ka tỹ figueira to comparaçāo

(Mt 24.32-35; Lc 21.29-33)

²⁸ “Ka tỹ figueira to ki kanhrān nĩ, to comparaçāo han kỹ,” he tóg. “Ti pě tánh kỹ, ti fěj tǎg han kỹ tóg kakó tĩ sir, ěkré tygtǎnh kurā ti. ²⁹ Ri ke ti nĩ, ājag tỹ inh kătĩg mǎn ke kurā ki kanhró nỹtĩnh ke mū ti. Ājag tỹ sỹ ājag mỹ nén tó mū tag ve kỹ tóg kakó tǎvĩ tĩ ha, inh kătĩg mǎn ke ti,” he tóg. ³⁰ “Sỹ ke há vē, hā kỹ sóg tag tó mū, ha mē. Ũri ũn rĩnrĩr mū ag tỹ nén kar ěn venh ke vē, ag kăgter ke to hā,” he tóg. ³¹ “Kanhkā vỹ tũ' henh ke mū, ga ti ke gé. Jāvo inh vỹ vỹ tũ' henh ke tū nĩ,” he tóg, Jesus ti.

Jesus kătĩg mǎn ke kurā

(Mt 24.36-44)

³² “Hā ra ũ pi(jé) isỹ kurā ki kătĩg mǎn ke ki kanhró nĩ', hora ěn ki ke gé',” he tóg. “Topě tỹ jěgně jafā ag pi(jé) ki kanhró nỹtĩ'. Inh pi(jé) ki kanhró nĩ gé', isỹ tỹ Topě kósin ra,” he tóg. “Ěg jóg mág hā vỹ ā pin kỹ ki kanhró nĩ, kurā kā nén kutěnh ke mū ěn ki,” he tóg. ³³ “Ājag kaně vin han nĩ, věnh rinfig nĩ,” he tóg. “Topě mré vĩ, ājag tỹ ti kurā ki kagtĩg nỹtĩn kỹ,” he tóg. ³⁴ “Ũ pasa ri ke vē,” he tóg. “Ā tỹ ā ĩn ki kutě kỹ tóg ā camarada ag mỹ: “ijo ki rĩr,” he mū, “inh rǎnrǎj ki,” he tóg. Kỹ tóg ũ tỹ jānkā ki rĩr tĩ ěn mỹ: “ā kaně nĩm han nĩ,” he mū gé. ³⁵ Hā kỹ sóg ājag mỹ: “ājag kaně nĩm han nĩ,” he mū gé,” he tóg. “Ājag pi(jé) ti jun ke ki kanhró nỹtĩ', ĩn tǎn tĩ',” he tóg. “Hěn ri ke mūn tóg kutyg ke ra jun mū, hěn ri ke mūn tóg kuty kuju ki jun mū, hěn ri ke mūn tóg galo kyr mū ra jun mū, hěn ri ke mūn tóg kusā ki jun mū,” he tóg. ³⁶ “Věnh ki ěměmnĩ, nũr tũg nĩ. Ājag tỹ ijāvānh tū ra sóg jun mū, vēsýmér,” he tóg, Jesus ti. ³⁷ “Věnh kar mỹ sóg tó mū, sỹ ājag mỹ tó mū tag, hā vỹ: věnh ki ěměmnĩ, he mū,” he tóg, Jesus ti.

14

Ag tỹ Jesus tén sór

(Mt 26.1-5; Lc 22.1-2; Jo 11.45-53)

¹ Hã ra festa tỹ Páscoa kurã kãtã kurã tãgtũ vễ sir, pão jễgja tũ konh ke kãtã. Kỹ Topễ tũ ki rĩr tĩ ag tóg Jesus vatánh tá ti se sór mũ, vễnh kar tỹ ti se vэг tũ nĩ jé. Topễ vĩ to professor mré ag tóg ti se sór mũ gé, ti tén jé. ² Hã ra ag tóg: “festa tag to mẽ jé ẽg tóg ke mũ ver,” he mũ. “Ẽg tỹ festa kã ti se kỹ vễnh génh mág hỹn tóg kutễnh mũ, ha vemnĩ,” he ag tóg.

Maria fi tỹ Jesus gãnh tãg

(Mt 26.6-13; Jo 12.1-8)

³ Ẽn kã Jesus tóg kejẽn ẽmã tỹ Betânia tá nĩ nĩ, Simão ỉn krẽm, vễnh kaga tỹ lepra han ja ẽn ỉn krẽm. Ti jễg nĩ ra ù fi tóg tá jun mũ, garrafa vyn kỹ. Pó tỹ alabastro tỹ tóg há(r) nĩ, garrafa ti. Ti ki jễ vỹ tóg tỹ nén kar tãg nĩ, hã vỹ: nardo, he mũ. Nardo pễ vễ, kaja e pễ ti nĩ, ger há ẽn ti. Garrafa ẽn mranh fi tóg mũ, kỹ fi tóg ti ki jễ ẽn tỹ Jesus gãnh kri kugjễg mũ sir.

⁴ Hã ra ù tỹ tá nỹtĩ ag kã ù ag tóg jagnễ mỹ: “fi tỹ ne jé nén kaja e tag kókén nễ?” he mũ. ⁵ “Ẽg tỹ nén ger há tag fón ke vễ vễ, kaja há to, jãnkamy tỹ hễn ri ke to,” he ag tóg. “Ẽg tỹ ùn jagãgtar ag mỹ vin ke vễ vễ,” he ag tóg. Kỹ ag tóg fi mỹ vĩ tar han mũ sir.

⁶ Hã ra Jesus tóg ag mỹ: “fi mỹ vĩ tũg,” he mũ. “Ãjag tỹ ne jé fi fe kaj han nễ?” he tóg. “Inh ki fi krov nĩ, inh jykre ki,” he tóg. ⁷ “Ãjag mré sóg nĩg sĩ han mũ, jãvo ùn jagãgtar mũ ag vỹ ãjag mré nỹtĩg mág han tĩ,” he tóg. “Isĩg kar kỹ ag mỹ nĩmnĩ, ãjag tỹ ag mỹ nén nĩm ke ti,” he tóg. ⁸ “Ã tỹ nén han ke mũn han fi tóg huri,” he tóg. “Inh kãn fi tóg huri, vễnh kej tá inh fón ke to,” he tóg. ⁹ “Ag tỹ vễnh vĩ sér tugtóg kỹ ag tóg fi tỹ nén han mũ tag ti tónh ke mũ gé, kỹ vễnh kar vỹ fi tỹ nén han mũ tag mẽgmễnh mũ sir, ha vemnĩ. Ki hã sóg tó mũ,” he tóg, Jesus ti.

Ag tỹ Jesus vatánh tá ti kãgmĩnh ke to jykrén

(Mt 26.14-16; Lc 22.3-6)

¹⁰ Kar kỹ Judas Iscariotes tóg tĩ mũ, Topễ tũ ki rĩr tĩ ag ra, ag mré Jesus jễnjễn ke to jykrén jé. Hã ra ù tỹ 12 (ke) ag kã ù vễ, Judas ti. ¹¹ Ag tỹ ti vĩ mẽ kỹ tóg ag mỹ sér tĩ sir. “Ã mỹ ẽg to jãnkamy vin mũ,” he ag tóg ti mỹ. Hã kỹ tóg: “inh hỹn hễ ri kenh mũ, ag tỹ ti kãgmĩ jé?” he mũ, Judas ti.

Ag tỹ Páscoa ko mũ

(Mt 26.17-25; Lc 22.7-14, 21-23; Jo 13.21-30)

¹² Pão jễgja tũ konh ke kurã ve vễ sir, cordeiro tãnh ke kurã vễ sir, Páscoa kã. Kỹ ti mré mũ tĩ ag tóg Jesus mỹ: “ẽg hỹn hễ tá ã mỹ carneiro sĩ tãnh mũ, ẽg tỹ kon jé?” he mũ. ¹³ Kỹ tóg ùn régre ag jẻgnẻg mũ, ti mré mũ tĩ ag. Kỹ tóg ag mỹ: “ha ẽmã mág ra mũjẻg,” he mũ. “Tã ãjag tóg ù venh ke mũ, goj vyn kỹ jễ ù. Ẽn nón mũmnĩ,” he tóg. ¹⁴ “Ti tỹ ỉn kãra rã kỹ ỉn tãn ẽn mré vĩmnĩ,” he tóg. “Ti mỹ tag tómnĩ,” he tóg. “Ẽg Senhor vỹ ã mỹ vễnh vỹ jẻnẻg mũ, hemnĩ. Ti tỹ ã ỉn krẽm Páscoa konh há tóg tĩ, ti mré mũ tĩ ag mré, hemnĩ ti mỹ,” he tóg, Jesus ti. ¹⁵ “Kỹ tóg ãjag mỹ ven ke mũ, kroggrog tỹ kynhmỹ nỹ ẽn ti,” he tóg. “Éhé ti nĩ. Tá nén kar vỹ kynkar kỹ nỹtĩ. Ẽg nĩgja vỹ tá nỹtĩ gé. Tá ẽg mỹ han nĩ,” he tóg, ti mré mũ tĩ régre ag mỹ.

¹⁶ Kỹ ag tóg mũ mũ sir, ẽmã mág ra, kỹ ag tóg sir vэг mũ, Jesus tỹ ag mỹ nén tó ja ti. Kỹ ag tóg vễjẻn kãn mũ sir, ag tỹ cordeiro ẽn ko jé.

¹⁷ Rã pur kar kỹ Jesus tóg ù tỹ 12 (ke) ag mré tá jun mũ sir. ¹⁸ Ag jẻg mũ jãvo Jesus tóg ag mỹ: “ãjag kãki ù tóg inh vatánh tá inh kato vãsãnsãn mũ ag mỹ inh ven ke mũ,” he mũ. “Inh mré jẻg mũ ù vễ, ki hã sóg tó mũ,” he tóg. ¹⁹ Kỹ ag tóg fe kaj' he mũ sir. Ti mỹ ag tóg: “inh mỹ vó! Inh mỹ vó?” he kãn mũ sir. ²⁰ Hã ra tóg ag mỹ: “ãjag kã ù vễ,” he mũ. “Inh mré pão tỹ kã punpun mũ vễ, pẻnky kãki,” he tóg. “Ẽn vễ mỹr,” he tóg. ²¹ “Ter jé sóg ke mũ, isỹ tỹ ẻprã ke fi kósin nĩn kỹ. Hã kỹ iser ke vỹ rãn kỹ nĩ,” he tóg. “Vãsỹ sóg

to rán k̄y n̄i,” he tóg. “Hã ra ù t̄y pã'i ag m̄y inh ven ke ên m̄y tóg v̄i kónãn tãv̄i han ke m̄u. Ti mur t̄u n̄in ran há t̄i v̄e,” he tóg, Jesus ti.

Santa Ceia

(Mt 26.26-30; Lc 22.15-20; 1Co 11.23-25)

²² Ag jêg n̄yt̄i ra Jesus tóg êm̄i m̄ãg m̄u sir, k̄y tóg Topê mré v̄i m̄u sir, êm̄i to. K̄y tóg v̄enh kã kugpãn k̄y ag m̄y v̄enh kãpãm m̄u sir, ti mré m̄u t̄i ag m̄y. “Inh hã v̄e,” he tóg, êm̄i to.

²³ Kar k̄y tóg copo vãg m̄u gé sir, vinho t̄y ki jên k̄y. To tóg Topê mré v̄i m̄u gé sir, k̄y tóg ùn pir m̄y ven', ven', he m̄u sir. K̄y ag tóg kãmê kãn m̄u sir. ²⁴ K̄y tóg ag m̄y: “inh kyvênh hã v̄e,” he m̄u. “Vênh kar jagfy tóg inh ki kãkutênh ke m̄u, inh kyvênh ti,” he tóg. “Topê v̄y v̄enh kar to há n̄i sór m̄u, inh kyvênh tugr̄n,” he tóg. ²⁵ “Ha m̄e,” he tóg. “Inh pi(jé) vinho kron mãn ha'. Kejên sóg kron mãn ke m̄u, Topê t̄y t̄y êg pã'i n̄i ên kã sóg kron mãn m̄u,” he tóg.

²⁶ Ag jên kar k̄y ag tóg Topê m̄y jãn m̄u sir. Jãn kar k̄y ag tóg sir kr̄i t̄y Oliveiras ra m̄u m̄u.

Jesus t̄y Pedro m̄y tó

(Mt 26.31-35; Lc 22.31-34; Jo 13.36-38)

²⁷ K̄y Jesus tóg ag m̄y: “ãjag kar v̄y inh ré k̄y m̄u kãn ke m̄u,” he m̄u. “Hã k̄y tóg rán k̄y n̄i, hã m̄e. “Û t̄y carneiro ki r̄ir t̄i ên tãnh jé sóg ke m̄u, k̄y ti m̄eg v̄y krig ke kãn ke m̄u,” he tóg, iso, Topê ti, ti v̄i rá ki,” he tóg, Jesus ti. “Hã ve jé ãjag tóg ke m̄u. ²⁸ Hã ra sóg iser kar k̄y r̄ir mãn ke m̄u. Ên kã sóg ãjag jo t̄inh ke m̄u, ga t̄y Galiléia ra,” he tóg, Jesus ti.

²⁹ K̄y Pedro tóg ti m̄y: “ag kar t̄y ã ré k̄y m̄u m̄u ra isóg ã ré k̄y t̄ig ke t̄u n̄i,” he m̄u, Pedro ti. ³⁰ Hã ra Jesus tóg ti m̄y: “ha vé,” he m̄u. “Ûri, kuty tag kã ã tóg iso: ti ki kagt̄ig sóg n̄i, he tãgt̄u han ke m̄u, galo kyr régre han ke to hã. Ki hã sóg tó m̄u,” he tóg.

³¹ Hã ra Pedro tóg v̄i tar han. “S̄y ã mré ter ke m̄u ra sóg ã to: ti ki kagt̄ig sóg n̄i, henh ke t̄u p̄e n̄i,” he tóg, Pedro ti. K̄y ti mré m̄u t̄i ag tóg hã tó kãn m̄u gé sir.

Getsêmani tá

(Mt 26.36-46; Lc 22.39-46)

³² K̄y ag tóg ka kré ra m̄u m̄u sir. Ka kré ên j̄ijin hã v̄y: Getsêmani, he m̄u. K̄y tóg ã mré m̄u t̄i ag m̄y: “n̄ign̄i ra ver, tag ki,” he m̄u. “S̄y ver Topê mré v̄emén ke v̄e,” he tóg, Jesus ti. ³³ K̄y tóg Pedro, Tiago, João ag m̄y: “inh mré kãmũ jêg,” he m̄u. K̄y tóg ti m̄y e t̄i sir, j̄ür̄un ke tóg m̄u sir, Jesus ti. ³⁴ K̄y tóg ag m̄y: “inh fe kaj mág tóg t̄i,” he m̄u, “k̄y inh fe kaj tóg inh m̄y t̄y iser ri ke n̄i,” he tóg. “Tag ki n̄yt̄imn̄i, n̄ugn̄ur t̄ug n̄i,” he tóg. ³⁵ K̄y tóg t̄ig s̄i han mãn k̄y m̄ug ke m̄u, ga kri n̄y tóg m̄u sir. ã jóg mré tóg v̄i m̄u sir, “is̄y hên ri ke m̄un n̄en venh ke m̄u ên vég t̄u n̄i jé, hora ên ki,” he tóg. ³⁶ K̄y tóg: “Aba', panh',” he m̄u. “Nén kar han ki kanhró ã tóg n̄i,” he tóg. “Inh jagtar ke tag t̄y t̄ug' hemn̄i,” he tóg. “Hã ra is̄y ã m̄y n̄en to v̄i m̄u tag han t̄ug n̄i, ã t̄y n̄en han ke m̄u ên hã han n̄i,” he tóg. ³⁷ K̄y tóg ã mré m̄u t̄i ag venh t̄i m̄u, hã ra ag tóg n̄ugn̄ur ja n̄i, k̄y tóg Pedro m̄y: “Simão, ã m̄y n̄ur'?” he m̄u, “ã m̄y hora pir hã ki n̄ur t̄u kórég?” he tóg ti m̄y. ³⁸ “N̄ur t̄ug n̄i,” he tóg. “Topê mré v̄imn̄i, ãjag t̄y ti v̄i mranh t̄u n̄i jé, ù t̄y ãjag kutãn m̄u ra. ãjag t̄y mranh sór t̄u v̄e v̄e, hã ra ãjag tóg krój n̄yt̄i, hã k̄y ãjag tóg mranh ke m̄u,” he tóg.

³⁹ K̄y tóg t̄ig mãn m̄u sir, Topê m̄y tó mãn jé. Ti v̄i ên hã tó mãn tóg m̄u. ⁴⁰ K̄y tóg ag tá jun mãn m̄u gé sir, hã ra ag tóg n̄ugn̄ur mãn n̄yt̄i, ag kanê krój n̄yt̄in k̄y. Hã k̄y ag t̄y ti m̄y v̄inh ke ên tóg t̄u t̄i. ⁴¹ K̄y tóg tá jun tãgt̄u han mãn m̄u. K̄y tóg ag m̄y: “ãjag ne tóg n̄ugn̄ur ja n̄i', v̄enhkãn ja ãjag tóg n̄i,” he m̄u. “Gen k̄y,” he tóg. “Pétêm ti huri, hora ti,” he tóg. “Û t̄y Topê v̄i mranh t̄i ag t̄y isenh ke n̄e ha,” he tóg. “T̄y sóg êprã ke fi kósin n̄i m̄y,” he tóg. ⁴² “N̄ign̄i ra, m̄u jé ha. Û t̄y ag m̄y inh ven m̄u tóg jun ke kãt̄ig ha,” he tóg.

Ag t̄y Jesus se

(Mt 26.47-56; Lc 22.47-53; Jo 18.3-12)

⁴³ Jesus t̄y ver t̄y v̄emén jê ra Judas tóg v̄es̄ymér jun m̄u sir. Û t̄y 12 (ke) ag kã ù v̄e, Judas ti. Ti mré polícia ag tóg kãmũ m̄u gé. Rógro génh k̄y ag kãmũ m̄u, ka kykv génh

kỹ ke gé. Topê tũ ki rĩr tĩ ag pã'i ag vỹ ag jëgně, Topê vĩ to professor ag ke gé, kófa ag ke gé. ⁴⁴ Judas ên, ù tỹ ag mỹ Jesus ven mũ ên vỹ ag mỹ vãnh jykre nĩm ja nĩ. “Sỹ ùn ki nhun ke mũ ên hã semnĩ. Ên hã pére mũmnĩ,” he ja tóg nĩ, Judas ti. ⁴⁵ ã tỹ tá jun kỹ tóg vësỹmér Jesus to grěn ke kỹ ti mỹ: “Senhor,” he mũ. Kỹ tóg ti ki nhun ke mũ sir, Judas ti, ón kỹ.

⁴⁶ Kỹ ag tóg ti kãgmĩ kỹ ti ség mũ sir. ⁴⁷ Jesus mré tĩ tĩ ù tóg rógro kunũnh kỹ polícia ù nĩgrêg kym mũ sir. Topê tũ ki rĩr tĩ to pã'i mág camarada vễ, ti tỹ ùn nĩgrêg kym mũ ên ti.

⁴⁸ Kỹ Jesus tóg ag mỹ: “ãjag ne tóg rógro génh kãmũ mũ,” he mũ, “ka kykyv génh kỹ ke gé!” he tóg. “Inh pi(jé) tỹ bandido nĩ,” he tóg. ⁴⁹ “Kurã kar ki sóg ãjag mré jẽ ja nĩgtĩ, mỹr, Topê jo ìn krêm,” he tóg. “Vãnh kanhrãn kỹ isóg tá nĩ ja nĩgtĩ, hã ra ãjag tóg tá iség tũ nĩ vễ mỹr,” he tóg. “Hã ra vãsỹ iso nén rán kỹ nĩ ên ki kenh ke hỹn,” he tóg.

⁵⁰ Kỹ ti mré mũ tĩ ag tóg ti ré kỹ pétẽ kãn mũ, vãnh pigju jé, mỹr, ha mẽ.

⁵¹ Hã ra kyrũ ù tóg ti nón tĩ mũ. Vãnh kãtor tãvĩ ti nĩ. Ti kãgmĩg ag tóg mũ gé. ⁵² Hã ra tóg kamêg kỹ ã kur ré kỹ vênhvãg mũ, ti kator ra.

Pã'i tỹ Jesus mré vĩ

(Mt 26.57-68; Lc 22.54-55, 63-71; Jo 18.13-14, 19-24)

⁵³ Kỹ ag tóg Jesus pére mũ mũ, Topê tũ ki rĩr tĩ to pã'i mỹ. Ti ìn tá ag tóg vênhmãn kãn kỹ nỹtĩ, Topê tũ ki rĩr tĩ to pã'i ag, kófa ag mré hã, Topê vĩ to professor ag mré hã.

⁵⁴ Hã ra Pedro tóg Jesus nón kãtĩ mũ, kuvar há tá. Kỹ tóg Topê tũ ki rĩr tĩ to pã'i ìn vãso ra rã mũ gé. Kỹ tóg polícia ag mré pĩ to tón nĩ nĩ, Pedro ti.

⁵⁵ Kỹ Topê tũ ki rĩr tĩ to pã'i ag tóg ù jãvãnhvãnh mũ, ù tỹ ón kỹ Jesus jykre kórég tó mũ ên. Ti vĩ tugrĩn ag tóg Jesus ti tén sór mũ. Hã ra tóg ag mỹ ki krov tũ nĩ. Vãnh jyvẽn tĩ kar ag tóg ù jãvãnhvãnh mũ, hã ra tóg ag mỹ ki krov tũ nĩ gé. ⁵⁶ ù tỹ hẽn ri ke ag tóg ón kỹ Jesus jykre kórég tó mũ, hã ra tóg ag mỹ ki krov tũ pẽ nĩ sir, ag tỹ vãnh jykre ù tó', vãnh jykre ù tó' he mũ ra.

⁵⁷ Kỹ ù ag tóg vãhã jëgjëg kỹ nỹtĩn kỹ (ag tóg) ón kỹ ti jykre kórég ù kãmén mũ sir.

⁵⁸ “Ti tỹ tó mẽ êg,” he ag tóg. “Topê jo ìn tag kókén jé sóg ke mũ, he ja tóg nĩ, vãnh nĩgé tỹ há tag ti, he ja tóg nĩ, hã ra sóg kurã tãgtũ ki ù han mãn ke mũ, êg tỹ êg nĩgé tỹ han vãnh ên han jé sóg ke mũ, he ja tóg nĩ,” he ag tóg, Jesus to. ⁵⁹ Ge ra tóg ag mỹ ki krov tũ nĩ, ti jykre kórég ên vég tũ ag tóg nĩ.

⁶⁰ Kỹ Topê tũ ki rĩr tĩ to pã'i mág tóg jëgně kỹ (tóg) ag kuju kã jẽ mũ sir. “ã tỹ nén ù tónh ke mũ mỹ ã mỹ tũ?” he tóg mũ. “Ag hã ne tóg ã vĩ kónãn tag tó ja nĩ gé!,” he tóg, Jesus mỹ. ⁶¹ Hã ra tóg hun ke mũ, nén ù tó tũ tóg nĩ. Kỹ pã'i mág ên tóg ti mỹ ke mãn mũ. “ã mỹ tỹ Cristo nĩ?” he tóg, “êg tỹ ù to: há ti nĩ, he mũ ên kósĩn mỹ tỹ ã nĩ? ã mỹ tỹ Topê kósĩn nĩ?” he tóg.

⁶² Kỹ Jesus tóg ti mỹ: “hỹ, inh hã vễ,” he mũ. “Êprã ke fi kósĩn ên vỹ tỹ inh nĩ. Inh ve jé ãjag tóg ke mũ ha. ù tỹ nén kar han mũ ên pëgja tá sóg nĩnh ke mũ. Kanhkã góg kãmĩ sóg kãtérenh ke mũ gé,” he tóg.

⁶³ Kỹ pã'i mág ên tóg ã kur tỹ jaran' ke mũ sir, jũ kỹ. Kỹ tóg: “ù tỹ ti jykre kórég tónh ke ù jãvãnh mãn ke tũ êg nĩ ha,” he mũ. ⁶⁴ “Ti tỹ Topê kato vĩ kónãn ja ên mẽ êg huri,” he tóg. “Êg hỹn ti tỹ hẽ ri kenh mũ ha?” he tóg.

“Ter jé tóg ke mũ, ti vĩ tag tugrĩn,” he ag tóg, ag kar ên.

⁶⁵ Kỹ ù ag tóg ti to sugug mũ sir. Ti kanẽ pãg ag tóg mũ gé sir, kỹ ag tóg ti tãnh kỹ ti mỹ: “ù nỹ ã tãnh?” he mũ. Kar kỹ polícia ag tóg ti tãnh mũ gé sir, ti kakã ki.

Pedro tỹ Jesus to ón

(Mt 26.69-75; Lc 22.56-62; Jo 18.15-18, 25-27)

⁶⁶ Hã ra Pedro tóg ìn vãso kã nĩ nĩ, Topê tũ ki rĩr tĩ to pã'i ên ìn tá. Hã ra pã'i ên camarada fag vỹ tá nỹtĩ gé, kỹ fag kã ùn pir fi tóg Pedro to kãtĩ mũ. ⁶⁷ Kỹ fi tóg ti vég mũ sir, ti tỹ pĩ to tón nĩ ra. Kỹ fi tóg ti tugnỹm kỹ ti mỹ: “Jesus mré ã tóg tĩg mũ gé,” he mũ, “Nazaré tá ke ên mré,” he fi tóg ti mỹ.

⁶⁸ Hã ra Pedro tóg: “vó,” he mũ. “Inh pi(jé) ti ki kanhró nĩ,” he tóg. “Ă tỹ ne tó nẽ?” he tóg. Kỹ tóg ãn jãnkã ra tĩ mũ sir, ãn kãra rã jé. Hã ra galo tóg kyr mũ.

⁶⁹ Hã ra fi tóg tá ti vég mũ gé. Kỹ fi tóg tá nỹtĩ ag mỹ ke mãn mũ sir. “Tá jẽ ãn tóg tỹ ag kã ã jẽ gé,” he fi tóg, Pedro to.

⁷⁰ Hã ra tóg: “vó’,” he mãn mũ. Kar kỹ tá nỹtĩ ag tóg Pedro mỹ ke mãn mũ. “Ă hỹn tỹ ag kã ã nĩ,” he ag tóg ti mỹ. “Tỹ ã Galiléia tá ke nĩ mỹr,” he ag tóg. “Ă vỹ vỹ tá ke ag vỹ ri ke nĩ,” he ag tóg.

⁷¹ Hã ra Pedro tóg ag mỹ: “ãjag tỹ nén tó mũ ãn ki kagtĩg sóg nĩ mỹr,” he mũ. “Inh ón mũ ra Topẽ tóg inh vóg kónãn ke mũ vẽ, hã kỹ sóg ón ke tũ pé nĩ,” he tóg.

⁷² Hã ra vësýmér galo tóg kyr mãn mũ. Kỹ Pedro tóg Jesus vỹ to jykrén mũ sir, Jesus tỹ ti mỹ nén tó ja ãn to, hã vỹ: “iso ã tóg: ti ki kagtĩg sóg nĩ, he tãgtũ han ke mũ, galo kyr régre han to hã,” he mũ. Tag mĩ êkrén kỹ tóg vãnh péju kỹ nĩ kỹ fỹ nĩ nĩ sir, Pedro ti. Vãhã tóg ti mỹ e tĩ.

15

Pilatos tỹ Jesus mré vỹ

(Mt 27.1-2, 11-14; Lc 23.1-5; Jo 18.28-38)

¹ Tỹ vaj kỹ ag tóg kusã ki Jesus ti jykrén mũ jagnẽ mré, Topẽ tũ ki rĩr tĩ to pã'i ag, kófa ag mré hã, Topẽ vỹ to professor ag mré hã ke gé, vãnh jyvẽn tĩ kar ãn ag. Kỹ ag tóg Jesus mrĩnh kỹ ti pére mũ mũ, Pilatos mỹ ti fẽg jé. ² Kỹ Pilatos tóg ti mỹ: “ã mỹ tỹ Judeu ag pã'i nĩ?” he mũ. Kỹ tóg: “ki hã ã tóg tó mũ,” he mũ, Jesus ti.

³ Hã ra Topẽ tũ ki rĩr tĩ to pã'i ag tóg ti kato vỹ tỹ hẽn ri ke han mũ sir. ⁴ Kỹ Pilatos tóg ti mỹ ke mãn mũ. “Mỹ ã tỹ ag mỹ nén ù tó jãvãnh,” he tóg. “Ha mẽ, ã to ag tóg vỹ kónãn mág kỹ nỹtĩ,” he tóg, Pilatos ti. ⁵ Hã ra Jesus tóg vỹ mãn tũ nĩ, kỹ tóg Pilatos mỹ e tĩ sir.

Ag tỹ Jesus to: ter jé tóg ke mũ, he

(Mt 27.15-26; Lc 23.13-25; Jo 18.39-19.16)

⁶ Hã ra Pilatos tóg ag mỹ Vẽse ag kar kã ãn pir kavãg tĩ, festa tỹ Páscoa kar ki. Ti jykre vẽ. Ag tỹ ù to vỹ mũ ãn kavãg tóg tĩ. ⁷ Hã ra ù tóg se kỹ nĩ, ti jijin hã vỹ: Barrabás, he mũ. Vãnh génh kutẽm ti ag mré tóg se kỹ jẽ nĩ, vãnh génh kỹ ag tóg ù tén ja nĩ, hã kỹ ag tóg nĩgfénh kỹ nỹtĩ. ⁸ Kỹ vãnh kar ãn ag tóg Pilatos to mũ mũ sir, ti mỹ: “ẽg mỹ ã tỹ nén han tĩ ãn han nĩ,” he jé.

⁹ Kỹ Pilatos tóg ag mỹ: “mỹ ãjag mỹ sỹ Judeu ag pã'i kyvãn há?” he mũ. ¹⁰ Topẽ tũ ki rĩr tĩ to pã'i ag tóg véké Jesus to jũ nỹtĩ, hã kỹ ag tóg nén (ũ) tũ to ti se ja nĩ. Hã ra Pilatos tóg ki kanhró nĩ, hã kỹ tóg ti kavãn sór mũ. ¹¹ Hã ra Topẽ tũ ki rĩr tĩ to pã'i ag tóg vãnh kar ag krĩn ja nĩ, ag tỹ Pilatos mỹ: “Barrabás hã kava ra,” he jé.

¹² Kỹ Pilatos tóg ag mỹ ke mãn mũ. “Kỹ sóg ti tỹ hẽn ri kenh mũ, ãjag tỹ ù to: Judeu ag pã'i, he mũ ãn tỹ?” he tóg. ¹³ Kỹ ag tóg prẽnprẽn mũ sir. “!..Cruz to ti sã..!” he ag tóg mũ sir, prẽnprẽn kỹ.

¹⁴ Kỹ Pilatos tóg ag mỹ: “e ri ken kỹ?” he mũ. “Ti kórég tỹ ne han ti?” he tóg ag mỹ. Hã ra ag tóg prẽn mãn', prẽn mãn' he mũ sir. “!..Cruz to ti sã..!” he ag tóg, prẽnprẽn kỹ.

¹⁵ Kỹ Pilatos tóg ag mỹ hã han sór mũ sir, kỹ tóg ag mỹ Barrabás kyvãg mũ sir. Jesus mrãnmrãn tóg mũ sir, mrãn ke jafã tỹ, kỹ tóg ag mỹ ti fẽg mũ sir, ag tỹ ka to ti sa jé.

Soldado ag tỹ Jesus vóg kónãn

(Mt 27.27-31; Jo 19.2-3)

¹⁶ Kỹ soldado ag tóg pã'i mág ãn kãra Jesus pére mũ mũ sir, ag vãnh jyvẽn jafã ãn kãra. Kỹ ag tóg soldado kar ag jé prẽn mũ sir. ¹⁷ Ti kri ag tóg kur fón mũ, kur kusũg tỹ. Sónh pirĩn kỹ ag tóg ti krĩ tógfig mũ sir. ¹⁸ Kỹ ag tóg ti mỹ: “viva, Judeu ag pã'i,” he mũ sir, ti nyg kỹ. ¹⁹ Kỹ ag tóg vãn tỹ ti krĩ mĩ mrãnmrãn mũ sir, ti to ag tóg sugsgũ mũ sir, kỹ ag tóg ti jo grĩnhgrĩnh ke mũ sir, ag tỹ ón kỹ ti to: “Senhor,” hen kỹ. ²⁰ Ag tỹ ti nyg kar ag tóg ti ki kunũg mũ, kur kusũg ãn ti. Kỹ ag tóg ti kur pẽ tỹ ti kãra rãg mũ sir. Kỹ ag tóg ti pére mũ mũ, ag tỹ cruz to ti san jé.

Jesus tỹ cruz to sa

(Mt 27.32-34; Lc 23.26-43; Jo 19.17-27)

²¹ Hã ra ù tóg vãnh kätä kätĩ mũ, hã vỹ: Cirene tá Simão, he mũ. Alexandre panh vễ, Rufo panh vễ gé. Ti tỹ mũ mũ ra ag tóg ti mỹ vĩ tar han mũ, ti tỹ Jesus cruz vyn jé.

²² Kỹ ag tóg Gólgota tá junjun mũ sir ti mré. Gólgota to ken hã vễ, hã vỹ: vãnh krĩ kuka, he mũ ẽg vĩ ki. ²³ Kỹ ag tóg ti mỹ vinho ven mũ, Jesus mỹ, ka tỹ mirra jẽnjo grór mré hã, hã ra tóg kron jävãnh nĩ, vãnh kagta ti. ²⁴ Kỹ ag tóg cruz to ti sãg mũ sir. Ti kur tỹ ag tóg jagnẽ mỹ vãnh kãpãm mũ sir, to ag tóg jogar he mũ gé, ti kur to, soldado ag.

²⁵ Kusã ki 9 hora vễ sir, kỹ tóg cruz to ti sãg mũ. ²⁶ Ag tỹ nén tỹ kato vĩ tóg rãn kỹ nĩ, hã vỹ: “Judeu ag pã'i tỹ rei vễ,” he mũ. Ti kri tóg sa, vãnh rãn ti. Ti tỹ nẽji vễsỹ pã'i tỹ rei han mũ to ag tóg ti tén mũ. ²⁷ Ti kóm ag tóg ùn régre ag tỹ cruz to sãg mũ gé, bandido ag. Û vỹ ti pẽgja tá sa, jó ù vỹ ti jakãnh tá sa. ²⁸ Hã kỹ tóg nén tỹ ã to rãn kỹ nĩ ẽn vễ, hã vỹ: “ag mỹ tóg tỹ ùn jykre pãno ag mré ke nĩ,” he mũ, Topẽ vĩ rãn ki. Hã ra tóg ge nĩ.

²⁹ KỸ ù tỹ mũ mũ mũ ag tóg ti nyg' he mũ gé, vỹn vỹn he kỹ. “Ó,” he ag tóg mỹ. “ã hã ne tóg: Topẽ jo ìn kókén jé sóg ke mũ, he gé',” he ag tóg. “Kurã tãgtũ ki sóg ù han mũ, he ã tóg mũ gé',” he ag tóg. ³⁰ “Vãnh kren han ra kema'. Cruz to kãtére kema',” he ag tóg ti mỹ.

³¹ Ge ag tóg mũ gé, Topẽ tũ ki rĩr tĩ to pã'i ag, Topẽ vĩ to professor ag mré. Ti nyg ag tóg mũ gé, kỹ ag tóg jagnẽ mỹ: “ù krenkren han tóg, hã ra tóg vãnh hã kren han ki kagtĩg nĩ,” he mũ. ³² “Cristo jé cruz to kãtére kema', Judeu ag pã'i ti', ẽg tỹ ve jé, ẽg tỹ ti vĩ kri nĩm jé,” he ag tóg. Kỹ bandido ag, ù tỹ ti kóm cruz to nỹtĩ ẽn ag tóg ti nyg mũ gé.

Jesus ter

(Mt 27.45-56; Lc 23.44-49; Jo 19.28-30)

³³ Rã tỹ ẽg nĩno kã sa ra tóg kuty' he mũ sir, ga kar mũ hã. Kỹ kuty ẽn tóg hora tãgtũ tũg mũ. ³⁴ 3 hora ki Jesus tóg prẽr mũ sir, jamã hár(a), kỹ tóg: “Eloí, Eloí, lemá sabactani?” he mũ. Ẽg vĩ ki ẽg tóg tag to: “Topẽ, Topẽ, ã tỹ ne jé isovãnh nẽ?” he mũ.

³⁵ Kỹ tá nỹtĩ ù ag tóg jẽmẽ kỹ (ag tóg) jagnẽ mỹ: “ha vé, Elias jé tóg prẽr mũ,” he mũ. ³⁶ Kỹ ù tóg vẽn hvãg mũ sir, kỹ tóg esponja tỹ vinho prãg mũ, vinho kaja pir tỹ. Ka jurỹn kỹ tóg tỹ kusón kỹ vinho kãra rãg kỹ ti mỹ ven mũ sir, ti tỹ ki ùnh' ùnh' ke jé. “Toreg',” he tóg. “Hẽn ri ke mũn Elias kätĩ mũ, ti kãtérem jé,” he tóg.

³⁷ Hã ra Jesus tóg prẽr mág (pẽ) han kỹ hun ke mũ sir. ³⁸ Hã ra Topẽ jo ìn krẽm kur tỹ jãnkã nĩfe tóg jaran ke mũ, ti jar tóg vãnh kãkym ke kãn mũ sir.

³⁹ Hã ra capitão tóg ti vэг jẽ nĩ. Ti prẽr mềg tóg mũ, ti tỹ hun ke ẽn mềg tóg mũ, kỹ tóg: “vãnh vĩ há ja vễ,” he mũ. “Topẽ kósin ja vễ” he tóg.

⁴⁰ Kỹ ùn tỹtã fag tóg tá nỹtĩ gé. Kuvar há tá nỹtĩ kỹ fag tóg ti vэг nỹtĩ nĩ. Fag kã ù fi vỹ tóg tỹ Maria Madalena fi nĩ, kỹ ù fi tóg tỹ Salomé fi nĩ gé, kỹ ù fi tóg tỹ Maria fi nĩ gé, José mré Tiago sĩ mỹnh tag fi. ⁴¹ Ûn tỹtã ẽn fag tóg ti nón mũ ja nĩgtĩ, ti tỹ Galiléia mũ tĩ mũn kỹ. Tá fag tóg ti ki rĩr ja nĩgtĩ gé. Kỹ ùn tỹtã tỹ hẽn ri ke fag tóg ti ve kỹ nỹtĩ gé, ti tỹ cruz to sa kỹ, ti mré Jerusalém ra mũ ja ẽn fag.

Ag tỹ vãnh kej tá ti fi

(Mt 27.57-61; Lc 23.50-56; Jo 19.38-42)

⁴² Rãkẽ tóg nỹ ha, nén kar han jé kurã vễ sir, hã vỹ: vẽn hkãn ke jo kurã ẽn, he mũ. ⁴³ Hã ki Arimatéia tá José tóg Pilatos mỹ ke mũ, ti tỹ ti mỹ Jesus fãr fi jé. Arimatéia tá José tóg tỹ vãnh jyvẽn tĩ ag kã ù nĩ. Jykre kuryj tóg nĩ. Topẽ tỹ tỹ ẽg pã'i nĩ ve sór tóg tĩ gé. Ẽn hã vỹ tóg mũmềg vãnh kỹ Pilatos mỹ Jesus fãr to vĩ mũ.

⁴⁴ Kỹ Pilatos tóg: “kỹ ti mỹ ter huri'?” he mũ. Kỹ tóg capitão jé prẽr kỹ ti mỹ: “ti mỹ ter huri'?” he mũ, “mỹ vãsỹ?” he tóg.

⁴⁵ Kỹ capitão tóg: “hỹ,” he mũ. “Ter ti huri,” he tóg. Kỹ Pilatos tóg José mỹ Jesus fãr ti fig mũ sir. ⁴⁶ Kỹ tóg sir kur kupri kym mũ, ùn há tãvĩ. Kỹ tóg Jesus kãtérem mũ. Kur ẽn tỹ tóg ti pãg mũ. Kỹ tóg vãnh kej kätä ti finh tĩ mũ sir, pãró nor kãkã. ag tỹ pãró nor han

ja kākā. Kĩ tóg pó tỹ nífénh mũ sir, ti jy. ⁴⁷ Hã ra Maria Madalena fi tóg vég mũ sir, ag tỹ ti fi ti, Maria fi mré hã, José mýnh fi.

16

Jesus rĩr mǎn

(Mt 28.1-8; Lc 24.1-12; Jo 20.1-10)

¹ Věnhkán ke kurā tũg kũ Maria Madalena fi tóg nén ger há mǎg mũ, Salomé fi ke gé, Maria fi ke gé, Tiago mýnh ěn fi. Fag tỹ ti fár ger há han sór vě. ² Kũ semana kurā ve ki fag tóg kusā (pě) ki ti kej ra mũ mũ, rã tỹ jun ke kũ sa ra. ³ Mũn kũ fag tóg jagně mỹ: “ũ nỹ hỹn ěg mỹ ti kej ti nón mũ', tá', pó tỹ nífě ěn ti'?” he mũ. ⁴ Hã ra fag tóg věnh jo vég mũ, ti kej tá, hã ra tóg nor nỹ nĩ, pó mág ěn tóg tĩn kũ nĩ nĩ sir.

⁵ Tá junjun kũ fag tóg ti kej kára ge mũ sir, kũ fag tóg kátá kyrũ vég mũ, hã ra tóg ti nỹgja pęgja tá nĩ nĩ, kur kupri tu kũ. Kũ tóg fag mỹ e tĩ, mỹr, ha mẽ. ⁶ Kũ kyrũ ěn tóg fag mỹ: “věnhmỹ' he tũg,” he mũ. “Ājag hỹn Jesus jāvānh mũ, Nazaré tá ke ti,” he tóg, “ag tỹ cruz to ũn sǎg mũ ěn ti,” he tóg. “Rĩr ti jě nĩ, tag ki ti tũ nĩ ha,” he tóg. “Ag tỹ ti fi ja hã vě ha,” he tóg. ⁷ “Kur Pedro mỹ tónh mũ jęg, ti mré mũ tĩ kar ag mỹ ke gé,” he tóg. “Ag mỹ: ājag jāmĩ tóg tĩg mũ nęji, hemnĩ, Galilėia ra, hemnĩ. Tá ājag ti venh mũ, hã kũ tóg ājag mỹ to ja nĩ, hemnĩ,” he tóg, fag mỹ, kyrũ ti.

⁸ Kũ fag tóg ti kej tá fũrũrũn kũ pa mũ. Pětě fag tóg sir mũ mũ, fag mỹ e tĩn kũ, fag tỹ jũrũn ke kũ. Kũ fag pi(jé) ũ mỹ nén ũ tó mũ mỹr', fag kaně jur kũ.

Maria Madalena fi tỹ ti ve

(Mt 28.9-10; Jo 20.11-18)

⁹ Jesus tỹ kusā ki rĩr mǎn kũ, ti tỹ semana ki kurā ve ěn ki rĩr mǎn kũ tóg Maria Madalena fi mỹ věnh ven vén mũ, ti tỹ ũn ki vējagrě kórég tỹ 7 (ke) pan ja ěn fi mỹ. ¹⁰ Kũ fi tóg tĩ mũ, ti mré nỹtĩ ag mỹ tó jé, ag fe kaj nỹtĩn kũ, ag kygfỹ' hen kũ. ¹¹ Hã ra ag tóg kri nĩm tũ nĩ, fi tỹ ag mỹ kāmén mũ ra, ti tỹ rĩr nĩ ěn ti, fi tỹ ā tỹ ti ve ja ěn kāmén mũ ra.

Ūn régre ag tỹ ti ve

(Lc 24.13-35)

¹² Kar kũ tóg ũn régre ag mỹ věnh ven mũ gé sir. Ag mỹ tóg vēsỹ ũn kũ tĩ nĩ. Ag mũ ra ag tóg ěpřy kri ti vég mũ. ¹³ Kũ ag tóg vỹnvỹn ke kũ (ag tóg) ũ tỹ tá nỹtĩ ag mỹ tó mũ gé sir, Jesus mré mũ tĩ ũ ag mỹ, hã ra ag tóg ag vĩ kri fig tũ nĩ gé.

Jesus tỹ ā mré mũ tĩ ag mỹ věnh ven

(Mt 28.16-20; Lc 24.36-49; Jo 20.19-23; Hk 1.6-8)

¹⁴ Vǎhã tóg ũ tỹ 11 (ke) ag mỹ věnh ven mũ gé, ag pin kũ, ag jęg nỹtĩ ra. Kũ tóg ag mỹ vĩ tar han mũ, ag tỹ kri nĩm jāvānh nỹtĩn kũ, ag tỹ to jykrén tũ nỹtĩn kũ. “Ājag hã ne tóg ũ tỹ inh vég mũ ěn fi vĩ kri fi ja tũ nĩ', ũ tỹ inh vég mũ ěn ag vĩ kri nĩm ja tũ ājag nĩ gé,” he tóg. “Ag tỹ inh rĩr mǎn vég mũ ra ājag tóg kri fi ja tũ nĩ,” he tóg. ¹⁵ Kũ tóg ag mỹ: “ga kri mũ kũ ěmǎ kar mĩ věnh vĩ sér kāmén nĩ, Topě tỹ há(r) ag kar mỹ,” he mũ. ¹⁶ “Ū tỹ ājag vĩ kri fig mũ ěn ag vỹ krenkren ke mũ, ũ tỹ inh ki ge kũ kygpe kũ nỹtĩ ěn ag vỹ krenkren ke mũ,” he tóg. “Hã ra ũ tỹ kri fig tũ ěn vỹ kren ke tũ nĩ, ũ tỹ inh ki rã tũ ěn vỹ kren ke tũ nĩ,” he tóg, Jesus ti. ¹⁷ “Ū tỹ inh ki ge mũ ěn ag vỹ milagre venh ke mũ inhhã,” he tóg. “Tag ve jé ag tóg ke mũ, ha mẽ. Věnh jagrě kórég pan jé ag tóg ke mũ, ijykre tỹ,” he tóg. “Ūn vĩ ũ ag vĩ tó jé ag tóg ke mũ,” he tóg. ¹⁸ “Ag tỹ kejěn pỹn kǎgmĩg mũ ra, ag tỹ kejěn veneno kron mũ ra tóg ag tỹ hě ri kenh ke tũ nĩ,” he tóg. “Ūn kaga ag męgmě jé ag tóg ke mũ gé, ag nĩgě tỹ, kũ ag tóg sir ag tỹ há' henh ke mũ,” he tóg, Jesus ti.

Jesus tỹ ā jóg ra tĩg

(Lc 24.50-53; Hk 1.9-11)

¹⁹ Jesus tỹ ā mré mũ tĩ ag mỹ tag tó kar kũ tóg kanhkã ra tǎpřy mũ sir, kũ tóg tá jun kũ (tóg) Topě pęgja tá nĩ mũ. ²⁰ Kũ ag tóg mũ mũ sir, ěmǎ kar mĩ hã, ti mré mũ tĩ ag. Kũ ag

tóg tugtó mũ, vãnh vĩ sér ễn ti, kỹ ễg Senhor tóg ag mré han tĩ nĩ, ag vĩ kóm tóg vãnh kar tỹ nén han vãnh ễn hyn han mũ. Hã vễ.

LUCAS TÏ RÁ

¹ Lucas tÏ rá vë. SÏ ã mÏ rán vë, Teófilo'. Û tÏ hën ri ke ag vÏ to jykrén, ag tÏ kãmén jé, ãg tÏ Jesus to nén ki kanhró nÏtÏ ên ti, Topë tÏ ti jënë ja ên ti, ký ag tóg rán huri. ² Û tÏ ti vég mü ag tóg ãg mÏ kãmén ja nÏgtÏ, ù tÏ ti vÏ tó tÏ ag, ù tÏ ti mré mü ja ên ag. Ên ag tÏ nén tó rán ag tóg huri, ù ag. ³ Ký sóg vãhã rán to jykrén mü gé sir, ha mẽ. Jesus kãme mẽ kãn ja inh nÏ ha, ti mur mré hã, ký sóg ti tÏ nén han mü mẽ kãn gé. Hã ký sóg ã mÏ Jesus kãme rán mü sir. Komër hã sóg rán kãn sór mü.

TÏ ã tóg pã'i mág nÏ, Teófilo'. ⁴ Më ã huri, Jesus kãme ti. SÏ ã mÏ rán vë, ã tÏ ti tÏ ki hã tó ja mën jé sir.

João Batista mur ke tó

⁵ Kejën Herodes tóg tÏ Israel ag pã'i mág tÏ rei nÏ, ga tÏ Judéia tá. Ký Topë tÏ ki rÏr tÏ ù tóg nÏ nÏ, ti jiji hã vÏ: Zacarias, he mü. Ti jóg'jóg ve jyjyn hã vÏ: Abias, he mü. Arão krë'krë ù vë, Abias ti. Semana pir ki tóg Topë tÏ ki rÏr tÏgtÏ, Abias ti. Ti semana ki ti krë'krë tÏ Zacarias ên tÏ ki rÏr vë, ti tÏ tÏ Abias krë'krë nÏn ký.

PrÏ ti nÏ, Zacarias ti, ký ti prÏ fi jiji hã vÏ: Isabel, he mü. Arão krë'krë fi vë gé, Isabel fi.

⁶ Ên fag vÏ vënh jykre kuryj han tÏ, ký fag jykre vÏ kuryj nÏtÏ, Topë mÏ. Ti vÏ ki króm fag tóg tÏ, ãg Senhor vÏn ki. Ti tÏ ãg jyvën han fag tóg tÏ, kygnë sór tÏ fag tóg nÏgtÏ. ⁷ Hã ra fag krë tóg tÏ tÏ. KurÏ fi tóg nÏ, Isabel fi, hã ký fag tóg krë tÏ nÏtÏ. Krë tÏ nÏtÏ ki fag tóg kófa nÏtÏ ha.

⁸ Kejën Zacarias tóg ã semana pétëm mü sir, ti tÏ Topë tÏ ki rÏr jé. Ký tóg cidade tÏ Jerusalém ra tÏ mü, Topë tÏ ki rÏr jé. Tá jun ký ag tóg jogar he mü, ag tÏ ù tÏ Topë mÏ ger há pÏn ke mü ên ve jé, incenso ên ti. ⁹ Ag jykre vë, ag tÏ to jogar he sór ti. Ag tÏ to jogar hen ký tóg tÏ Zacarias nÏ sir, ký tóg Topë jo ãn kãra rá mü sir, ti mÏ pÏn jé, ger há ên ti. ¹⁰ Ti tÏ Topë jo ãn krëm pÏn ký vënh kar tóg re tá nÏtÏ nÏ, Topë mré vÏn ký. Zacarias tÏ Topë mÏ pÏn ký ag tóg Topë mré vÏ nÏtÏ nÏ, re ki, ùn e ên ag.

¹¹ Ký tóg ti mÏ pÏn mü sir. Ký Topë tÏ jënë jafã vÏ ti mÏ vënh ven mü. Topë mÏ ger há pÏn jafã vÏ tá jé nÏ, ãn kãtã. Mesa ên pëgja tá tóg jé nÏ, Topë tÏ jënë jafã ti. ¹² Zacarias tÏ ti ve ký tóg jÏrÏn ke mü. Ti mÏ tóg e tÏ, ti tÏ ti ven ký. ¹³ Hã ra tóg ti mré vÏ mü, Topë tÏ jënë jafã ti. Ký tóg ti mÏ: "Zacarias'," he mü. "Kamëg tÏg nÏ," he tóg. "Topë vÏ ã tÏ ti mÏ nén to vÏ mü ên mẽ, ký tóg ã mÏ han ke mü ha. Fi kufyg jé ã tóg ke mü, ã prÏ fi, Isabel fi. Fi tÏ ti ve ký tóg gré nÏnh mü, ã kósin ti, ha vemnÏ," he tóg, Topë tÏ jënë jafã ti. "KÏ ã tÏ ti jyjy han ký: João, hemnÏ," he tóg mü. ¹⁴ "KÏ tóg ã mÏ sér tÏnh mü. ã fe tóg mrin kenh mü. Û tÏ hën ri ke ag mÏ tóg há tÏnh mü, fi tÏ ti ven ký. ¹⁵ Topë vÏ ti tÏ ùn mág han ke mü. Vinho vóg ke tÏ tóg nÏ, goj fa vóg ke tÏ tóg nÏ gé. Ti vãkre vë. Topë kuprÏg vÏ tÏ ti jagrë nÏnh mü, fi tÏ ver ti vég tÏ ki. ¹⁶ Israel ag mÏ tóg Topë vÏ tónh mü, ký ù tÏ hën ri ke ag vÏ ti vÏ mẽ ký kri fi ký ãjag jykre tovãnh ke mü. Topë jykre hã han jé. ¹⁷ ãg Senhor jo tóg tÏg ke mü gé. VãsÏ Topë vÏ tó tÏ tÏ Elias jykre han jé tóg ke mü. Elias vÏ Topë kuprÏg tÏ jagrë ja nÏgtÏ, ký tóg jykre tar han ja nÏgtÏ. Ên jykre han jé tóg ke mü. ã kósin tag tÏ ag jyvën ký ag panh tóg ãjag krë mré vënh jykre pir han ke mü. Û tÏ Topë vÏ mranh tÏ ên tóg vënh jykre kuryj han sór ke mü gé, ù tÏ Topë vÏ ki króm tÏ ên ri ke. Hã ki tóg vënh kar jykre tÏ há' henh ke mü, ag kugrynh ký, ã kósin tag ti. Topë mÏ tóg ag jykre tÏ há' henh mü, Cristo tÏ kãtÏg ken jo, ag tÏ ti jãvãnh jé," he tóg mü, Topë tÏ jënë jafã ti, Zacarias mÏ.

¹⁸ Ký Zacarias tóg ti mÏ: "hã ra sóg kófa nÏ ha," he mü. "Kar inh prÏ fi vÏ kófa nÏ gé, inh mré. Ký inh hÏn hë ri kenh mü? Inh mÏ tá krÏg mü vÏ?" he tóg. ¹⁹ Ký Topë tÏ jënë jafã tóg ti mÏ: "tÏ sóg Gabriel nÏ," he mü. "Topë nÏgja tá inh jëgtÏ. Hã ra tóg inh jënë, sÏ ã mré vÏ jé, sÏ ã mÏ vënh vÏ sér tag tó jé," he tóg. ²⁰ "Ha vé, vÏ vãnh nÏ jé ã tóg ke mü ha, ha vemnÏ. VÏ vãnh nÏ ki ã tóg isÏ ã mÏ nén tó mü kurã ên pétëm ke mü. ã hã ne tóg sÏ ã mÏ vÏ kri nÏm tÏ nÏ'. Ti kurã ki ã tóg venh mü, sÏ ã mÏ nén tó ja ti. ã tÏ inh vÏ kri fig tÏ nÏn ký ã tóg vÏ vãnh nÏnh mü ha," he tóg, Topë tÏ jënë jafã ti.

²¹ Hã ra vênh kar ên tóg re tá nýtĩ nĩ, Zacarias jãvãnh kÿ. Ag mÿ tóg e tĩ, ti kãkutẽ vãnh han kÿ, Topẽ jo ãn kãtã. ²² Vãhã tóg kãkutẽ mũ, hã ra tóg sir vĩ vãnh jẽ. Kÿ tóg ag mÿ ven mũ, ã nĩgẽ tÿ. Hã ki ag tóg ki kanhrãn mũ sir, ti tÿ nén nẽ ve ja ên ti, Topẽ jo ãn kãtã.

²³ Ti vĩ vãnh nĩn ki ti rãnrãj tóg kejẽn tũ' he mũ sir, ti tÿ Topẽ tũ ki rĩr ên ti. Kÿ tóg ã ãn ra tĩ mũ sir. ²⁴ Ti tÿ ã ãn tá jun kar kÿ ti prũ fi tóg kejẽn kufyg mũ sir, Isabel fi. Kÿ fi tóg vênh péju kÿ nĩ nĩ sir, fi mÿ sér tĩn kÿ. Kysã tÿ 5 (ke) han fi tóg, vênh péju kÿ nĩ ki. ²⁵ “Topẽ hã ne inh jagãgtãn',” he fi tóg mũ. “Inh ve tóg, kÿ tóg inh mÿ'ãg tÿ tũg' hé. Inh kurĩ to fag tóg: “Topẽ hÿn fi to kórég nĩ,” he ja nĩgtĩ. Hã ra tóg fag vĩ tÿ tũg' hé, Topẽ ti,” he fi tóg mũ. Hã kÿ fi tóg kufyg mũ sir, ã kósin vãnh (hã) ra.

Jesus mur ke tó

²⁶ Fi kufy nĩ ki kysã tÿ 6 vẽ sir, kÿ Topẽ vÿ ã tÿ jẽnẽ jafã jẽnẽg mũ, ti tÿ Jesus mur ke tónh tĩg jé, Gabriel ên ti. Kÿ tóg ga tÿ Galiléia ra tĩ mũ, cidade tÿ Nazaré ra. ²⁷ Tá tátãg ù fi tóg nĩ nĩ. Ûn mén ja tũ fi vẽ. Fi jijin hã vÿ: Maria, he mũ. Fi mén ken hã vÿ: José, he mũ. Davi krẽ'krẽ ù vẽ, José ti, fi mén ke ên ti. ²⁸ Fi hã mÿ tóg vênh ven mũ sir, Gabriel ti, kÿ tóg fi mÿ: “ã mÿ há?” he mũ. “Topẽ vÿ ã jagãgtãn, kÿ tóg ã vég mũ,” he tóg mũ. ²⁹ Fi tÿ ti ve kÿ fi tóg jürũn ke mũ. Ti vĩ tóg fi mÿ e tĩ, kÿ fi tóg to jykrén mũ sir, ti vĩ to. “Ti tÿ ne tó nẽ, hÿn?” he fi tóg mũ, to jykrén kÿ.

³⁰ Kÿ Topẽ tÿ jẽnẽ jafã tóg fi mÿ: “kamẽg tũg ra,” he mũ. “Topẽ vÿ ã jagãgtãn mÿr,” he tóg. ³¹ “Ha vé, kufyg jé ã tóg ke mũ,” he tóg. “Kÿ ã tóg kósin ke mũ. ã tÿ ti jyjyn kÿ ti mÿ: Jesus, hemnĩ,” he tóg, Topẽ tÿ jẽnẽ jafã ti, fi mÿ. ³² “Tÿn ùn mág jẽnh ke mũ, ã kósin tag ti, kÿ ag tóg ti to: ù tÿ kynhmÿ nĩ ên kósin, henh ke mũ. Kÿ ãg jóg tÿ Topẽ vÿ ti tÿ pã'i mág han ke mũ, vãsÿ ti jóg'jóg ve tÿ Davi jẽgia kã. ³³ Kÿ tóg tÿ pã'i nĩ sir, Jacó krẽ kar to pã'i. Ti tÿ tÿ pã'i nĩ tag vÿ tũ' henh ke tũ nĩ. Tÿ pã'i han kÿ tóg nĩ nĩ,” he tóg, Gabriel ti.

³⁴ Kÿ fi tóg ti mÿ: “hã ra sóg ù mré nÿ ja tũ nĩ ver,” he mũ. “Kÿ inh hẽ ri kenh mũ?” he fi tóg ti mÿ. ³⁵ Kÿ tóg fi mÿ: “Topẽ kuprĩg vÿ ã kri tĩnh mũ,” he mũ, “kÿ ti kãnhvég vÿ ã kri tĩnh mũ gé, kÿ tóg ã jykre tÿ ã kósin ti han ke mũ, Topẽ ti. Hã kÿ ag tóg ti to: Topẽ tũ, henh ke mũ, ã tÿ ùn venh ke ên to. Topẽ kósin, he jé ag tóg ke mũ, ti to. ³⁶ Ha vé, ã mré ke fi vÿ kufy nĩ, Isabel fi. Ûn gré ve jé fi tóg ke mũ. ã kófa (hã) ra fi tog kufy nĩ. Kysã tÿ 6 (ke) han fi tóg huri, kufy nĩ ki. Fi to ãjag tóg: kurĩ fi tóg nĩ, he tĩ vẽ, hã ra fi tóg kufy nĩ ha. ³⁷ Topẽ hã ne nén kar han há nĩ', hã kÿ tóg fi mÿ han. Kÿ tóg ã mÿ han ke mũ gé, sÿ ã mÿ tó mũ tag ti,” he tóg, Gabriel ti. ³⁸ Kÿ fi tóg ti mÿ: “há ti nĩ,” he mũ. “Tÿ sóg Topẽ camarada nĩ mÿr, ti tũ pẽ. Kÿ tóg inh mÿ há tĩ, ã tÿ inh mÿ tó mũ tag ti,” he fi tóg ti mÿ. Kÿ tóg tĩ mũ sir, Topẽ tÿ jẽnẽ jafã ti.

Maria fi tÿ Isabel fi venh tĩ

³⁹ Ti tĩg kar kÿ Maria fi tóg tĩ mũ gé sir, Isabel fi jamã ra. Pãnónh e tá tóg nĩ, fi jamã ti, ga tÿ Judéia tá. Fi tÿ ra tĩg kÿ fi tóg fũrũn tĩ mũ. ⁴⁰ Fi tÿ Zacarias ãn tá jun kÿ fi tóg Isabel fi mÿ: “ã mÿ há?” he mũ. ⁴¹ Kÿ Isabel fi tóg fi vĩ mẽg mũ, kÿ fi kósin tóg vo mũ, fi kãki. Kÿ Topẽ kuprĩg vÿ fi krĩn mũ. ⁴² Kÿ fi tóg prẽr mũ. “Topẽ tóg ã ve há han, fag kar kãmĩ tóg ã kuprẽg,” he fi tóg fi mÿ. “Kÿ Topẽ vÿ ã kósin ve há han mũ gé, ã tÿ ùn venh ke ti. ⁴³ Inh Senhor mÿnh fi hã ne tóg inh venh kãtĩ mũ', kÿ tóg inh mÿ e tĩ',” he fi tóg fi mÿ. ⁴⁴ “Ha vé, isÿ ã vĩ mẽ kÿ inh kósin tóg vo ja nĩ, inh kãki. Ti mÿ tóg sér tĩ, ã vĩ ti. ⁴⁵ ã hã ne tóg Topẽ vĩ kri fi', ti tÿ ã mÿ vênh vĩ jẽnẽn kÿ. Hã kÿ tóg ã ve há han, Topẽ ti. ã tÿ ti vĩ kri nĩm kÿ ã tóg venh ke mũ, ti tÿ ã mÿ nén tó ja ti,” he fi tóg, Isabel fi, Maria fi mÿ.

Maria fi jãn

⁴⁶ Kÿ Maria fi tóg ke mũ gé. “Topẽ mÿ sóg vĩ há han sór mũ,” he fi tóg. “Inh mÿ tóg tÿ ùn mág nĩ, ãg Senhor ti. ⁴⁷ Kÿ inh fe tóg mrin ke mũ, isÿ tÿ Topẽ tũ nĩn kÿ, isÿ tÿ ãg kren han tĩ ên tũ nĩn kÿ. ⁴⁸ Inh ki tóg ãvãnh mÿr. Tÿ sóg ti camarada nĩ. Tÿ sóg ùn sĩ nĩ, hã ra tóg inh ki ãvãnh. Kÿ vênh kar tóg iso: “Topẽ vÿ fi ve há han,” henh ke mũ, inh krẽ'krẽ kar ke gé, ãprã ke krẽ kar ke gé. ⁴⁹ Topẽ hã ne inh mÿ ãg tÿ nén han vãnh han'. Tar ti nĩ, Topẽ ti, hã kÿ tóg han, inh mÿ. Jykre kuryj ti nĩ, Topẽ ti, kÿ ti jiji tóg ãg mÿ mẽ há tĩ.

⁵⁰ Ëg jagāgtān tóg nīgtī, Ëg jóg'jóg ve ag ke gé, Ëg panh ag ke gé, Ëg ke gé, Ëg krē kar ke gé. Ū tỹ ti kamēg mū kar jagāgtān tóg nīgtī mỹr, ha mẽ. ⁵¹ Jykre (ka)mē tóg nī, kỹ tóg Ëg tỹ nén han vānh hyn han tī. Ū tỹ: “vēsóg ki inh nén kar han tī,” he mū ěn ag jykre tỹ tóg tūg' henh ke mū,” he fi tóg. ⁵² “Pā'i mág ag tỹ tóg ūn kāsir han, Topē ti. Kỹ tóg ūn kāsir ag tỹ ūn mág han. ⁵³ Ūn jagāgtar ag fónfan tóg mū, nén ū há tỹ, ū tỹ ti vī mẽ sór mū ag. Ūn rico ag mỹ tóg: “ha mū jēg,” hé, kỹ tóg ag mỹ nén ū nīm tū nī, kỹ ag tóg jagāgtar nỹtī ha, ū tỹ ti vī mẽ jāvānh ěn ag. ⁵⁴ Israel ag jagāgtān tóg mū, ā camarada ag, ā tỹ vāsỹ ag jagāgtān tī ěn to jykrén kỹ. Ëg hā vē, Ëg jagāgtān tóg. ⁵⁵ Ëg jóg'jóg ve ag mỹ tóg tó ja nī, Abraão mỹ, ti krē ag mỹ ke gé, ti tỹ Ëg jagāgtān ke ti. Kỹ tóg ā vī ěn to jykrén kỹ han, ti tỹ vāsỹ nén tó ja ti. Ti tỹ Ëg jagāgtān ke ěn tóg tūg' he jāvānh nī,” he fi tóg, Maria fi. Fi tỹ Topē mỹ vī há han hā vē.

⁵⁶ Kar fi tóg kysā tāgtū han mū sir, Isabel fi mré, kỹ fi tóg ā jamā ra vỹn ke mū sir.

João Batista mur

⁵⁷ Fi tīg kar Isabel fi vỹ fi kósin venh ke kurā pétēm mū sir, kỹ fi tóg vég mū. Hā ra tóg gré nỹ, fi kósin ti. ⁵⁸ Kỹ fi rā nỹtī fag vỹ vég mū, fi kanhkā fag ke gé. Topē tỹ fi jagāgtān mēg fag tóg mū. Kỹ tóg fag mỹ sér tī sir, fi mré, fi kósin to.

⁵⁹ Kurā tỹ 8 (ke) ki ag tóg fi tá junjun mū, ag tỹ ti gré junun fár kym jé. Kỹ ag tóg ti jyjy to jykrén mū gé, hā vỹ: Zacarias, he mū. Ti panh jiji tó sór ag tóg mū, ti mỹ. ⁶⁰ Hā ra ti mỹnh fi tóg: “vó,” he mū. “João, he jé tóg ke mū, ti jyjy ti,” he fi tóg mū. ⁶¹ Kỹ ag tóg fi mỹ: “ā kanhkā jiji tū vē hā ra,” he mū. ⁶² Kỹ ag tóg ti panh ki jēmē sór mū. Ājag nīgé tỹ ag tóg ti mỹ: “ti jyjy hỹn hē ri kenh mū?” he mū, ti panh mỹ, ag nīgé tỹ. ⁶³ Kỹ tóg ki rán jafā to vī mū, Zacarias ti, kỹ tóg rán mū. “Ti jijin hā vỹ: João, he mū,” he tóg, venh rán ki. Kỹ tóg ag mỹ e tī sir. ⁶⁴ Kỹ vāhā ti vī tóg punh ke mū. Ti nūnē tóg krónh ke mū, kỹ tóg vī mū sir, Topē mỹ vī há han tóg mū, ti mỹ sér tīn kỹ.

⁶⁵ Kỹ fag rā nỹtī kar vỹ kamēg mū. Kỹ vėnh vī ěn tóg vėnh kar kri rŭm mū, ga tỹ Judéia kar mī hā. Vėnh kar tóg tỹ vėmėn kĀn mū. ⁶⁶ Kỹ ū tỹ mēg mū fag vỹ to jykrén mū. “Gĩr tag hỹn hē ri kenh mū,” he fag tóg mū. Topē vỹ ti ki rĩr há han, hā kỹ tóg fag mỹ e tī.

Zacarias tỹ Topē mỹ vī há han

⁶⁷ Kỹ Topē kuprĩg vỹ ti panh tỹ Zacarias krĩn mū, kỹ tóg tag tó mū, ha mẽ.

⁶⁸ “Tỹ ti ūn mág jē, Ëg povo tỹ Israel kri, Ëg Senhor ti, hā vỹ: Topē, he mū. Ëg ki tóg ěvānh nīgtī, Topē ti, ti tỹ ti tū ag krenkren han jé. Ëg hā vỹ tỹ ti tū nỹtī,” he tóg. ⁶⁹ “Ti camarada tỹ Davi krē'krē ěn vỹ Ëg krenkren han ke mū, Ëg tỹ ti vī jēmėn kỹ. Ūn mág pē vē, Davi krē'krē ěn ti. Topē tỹ Ëg mỹ nén han hā vē. ⁷⁰ Hā kỹ tóg tó ja nī, vāsỹ. Ti vī tó tī ag vỹ tugtó ja nī, vāsỹ, Ëg si ag, ti tū ag. ⁷¹ Ū tỹ hėn ri ke ag vỹ Ëg kato tēgtē mŭgtī, hā ra tóg Ëg krenkren han mū, ag to, ū tỹ Ëg to kórég tāvī nỹtī ag to. ⁷² Ti tỹ Ëg jóg'jóg ve ag mỹ tó ja ěn han ja tóg nī, Ëg jagāgtān kỹ, Topē ti. Ag mré jykrén ja tóg nī, Topē ti. ěn to jykrén ja tóg nī, kỹ tóg ki króm ja nī sir, Topē ti. ⁷³ Ëg jóg'jóg ve tỹ Abraão mỹ tóg vėnh vī mág han ja nī, Topē ti. ⁷⁴ Kỹ tóg ti mỹ: “ag krenkren han jé sóg ke mū, ā krē ag, ag kato tēgtē mŭ ag to, ha vemnī,” he ja nī. “Sỹ ke há vē. Sỹ ag krenkren han kỹ ag tóg sir jatun mỹ isŭ han ke mū, mŭmėg tū nĩn kỹ,” he ja tóg nīgtī, Topē ti. ⁷⁵ “Nén ū vėnhmỹ han ke tū ag tóg nīgtī, kurā kĀtĩg ke mŭ ěn kĀ. Vėnh jykre kuryj tāvī han jé ag tóg ke mŭ, isŭ han kỹ. Ag tỹ ga kri mŭn kỹ ag tóg han ke mŭ, isŭ ti. Kurā kar ki ag tóg sir inh jykre hā han ke mŭ,” he ja tóg nīgtī, Topē ti, Abraão mỹ,” he tóg, Zacarias ti.

⁷⁶ Kỹ tóg ā kósin mỹ: “ha vé, vỹ,” he mŭ. “Sĩ ā tóg nī ver. Ū tỹ kynhmỹ nī ěn vī tó jé ā tóg ke mŭ, kỹ ag tóg ā to: “Topē vī tó ti tī,” henh ke mŭ. “Ëg Senhor jo ā tóg tĩnh mŭ, ā tỹ ti japry kure ri ke han jé, ā tỹ ti jamĩn kurynh ri ke han jé, ā tỹ vėnh kar mỹ Topē vī tón kỹ,” he tóg. ⁷⁷ “Ag kanhrĀn jé ā tóg ke mŭ, Topē tỹ Ëg krenkren han sór ěn to. Ëg tỹ ti vī mranh tỹ tóg Ëg mỹ vėnh pĀte fón ke mŭ, hā ki tóg Ëg krenkren han ke mŭ, Topē ti,” he tóg, Zacarias ti. ⁷⁸ “Topē tỹ Ëg jagāgtān hā vē, ti tỹ Ëg to há tāvī nĩn kỹ. Ëg ve jé tóg kĀtĩg ke mŭ, kỹ tóg rā tỹ jun ke ri ke nī, Cristo mur ke ti. ⁷⁹ Kutỹ ri ke ti nī, Ëg mỹ, Ëg tỹ ti ki

kagtig nýtín ký. Ti kätig ký tóg ãg mý kurã ri ke nĩ sir. Kãgter jé ãg tóg ke mũ, ký tóg ãg mý kuty ri ke nỹ sir. Hã ra tóg ãg mý ã japry ven ke mũ, ã jamĩn ti. Jagma mũn ký ãg tóg ti jykre kusa venh ke mũ,” he tóg, Zacarias ti. Ti tỹ ã kósin mý tón hã vë.

⁸⁰ Hã ký fi tóg João ve ja nĩ, ti han mũ fag tỹ kófa (hã) ra. Ký tóg mog mũ sir, ký tóg tar jé sir. Krĩ há tóg nĩ gé. Êmã tũ mĩ tóg tĩ mũ ver, ã kurã tỹ tá krỹg ki. Æ kurã ki tóg Israel ag mý vënh ven mũ, ag mý Topë vĩ kãmén jé.

2

Jesus Mur (Mt 1.18-25)

¹ João mur kar ký ga kri pã'i mág tỹ imperador tỹ Augusto vỹ kejën vënh vĩ jënëg mũ, vënh kar ag tỹ ãjag jyjy rán mũ jé. Ga kri mũ kar ag mý tóg vënh vĩ ên jëgnëg mũ, pã'i mág tỹ Augusto ti. ² Vënh jiji rá ve vë, ge han ja tũ ag nýtĩ. Cirênio vỹ tỹ ga tỹ Síria kri pã'i tỹ governador nĩ, Augusto tỹ vënh vĩ ên jënëg mũn kã. Tỹ tóg Augusto krëm ke nĩ, Cirênio ti. Ti tỹ tỹ pã'i nĩn ký ag tóg sir ãjag jyjy ránrán vén mũ. ³ Ký ag tóg mũ kãn mũ, ãjag jóg'jóg ve ag jamã ja ra. Tá ag tóg ãjag jiji rá vin mũ sir.

⁴⁻⁵ Ký José tóg tĩ mũ gé, ã prũnh ke fi mré, hã vỹ: Maria, he mũ. Cidade tỹ Nazaré tá fag tóg pa mũ, ga tỹ Galiléia tá. Ký fag tóg ga tỹ Judéia ra mũ mũ, cidade tỹ Belém ra. Davi krë'krë vë, José ti, hã ký tóg Belém ra tĩ mũ, ã jyjy rá nĩm jé. Davi jamã ja vë, Belém ti. Hã ký tóg ra tĩ mũ. Ký ti prũnh ke fi vỹ ti mré tĩ mũ, hã ra fi tóg kufy jagy nĩ. ⁶ Fag tỹ tá nýtĩ ki fi tóg ã kurã pétëm mũ. ⁷ Ký fi tóg ã kósin vég mũ sir. Gré ti nỹ, fi kósin ve tag ti. Ký fi tóg ti pãg ký koso kãkã ti fig mũ. Æn vỹ funfór nýtĩ, hã ký fag tóg vënh mëg jo Æn krëm nýtĩ ja nigtĩ.

Mé ki rĩr tĩ ag

⁸ Ký ù tỹ mé ki rĩr tĩ ag vỹ tá nýtĩ gé, carneiro ki rĩr tĩ ag. Ag japỹ ja tá ag nýtĩ, ãjag mëg ki rĩr jé, kuty ên kã. ⁹ Ký vãhã Topë tỹ jënë jafã vỹ ag mý vënh ven mũ, kanhkã tá. Topë tỹ jëngrë vỹ ag kri rũm ke mũ. Ký ag tóg kamëg ký jürũn ke mũ sir. ¹⁰ Ký Topë tỹ jënë jafã tóg ag mý: “kamëg tũg ra,” he mũ. “Sỹ ãjag mý nén ù tónh ke vë. Vënh vĩ há tó jé sóg ke mũ, ký tóg ãjag mý sér tĩnh mũ. Vënh kar vỹ mën h mũ, inh vĩ ti, povo kar, ký ag fe tóg mrin ke mũ sir. ¹¹ Æjag krenkren han tĩ vỹ ùri mur, hã vỹ: Cristo, he mũ. Æg Senhor vë ha mýr. Davi jamã ja tá tóg mur mũ. ¹² Ha mũ jëg, ãjag tỹ gĩr ên ve jé. Koso kãkã tóg pãg ký nỹ nĩ. Hã ki ãjag tóg ti ki kanhró nýtĩnh mũ,” he tóg ag mý, Topë tỹ jënë jafã ti.

¹³ Ký vãhã ù tỹ hën ri ke ag tóg vënh ven mũ sir. Topë tỹ jënë jafã ag, kanhkã tãn ag. Ên ag vỹ Topë mý vĩ há han mũ. ¹⁴ “Topë vỹ tỹ ùn mág pë nĩ,” he ag tóg mũ. “Kynhmỹ ti nĩ, vënh kar kãfór ti nĩ, ký ëprã ke ag vỹ jatun mý nýtĩ, ãjag krĩ kusa tĩn ký, Topë tỹ ù tó há ag,” he ag tóg mũ. ¹⁵ Kar ag tóg tũg' he mũ sir, ag tỹ kanhkã ra mũn ký.

Ag tỹ tũg' hen ký ù tỹ carneiro ki rĩr tĩ ag vỹ jagnë mý: “mũ nỹ, Belém ra, ãg tỹ ve jé, Topë tỹ nén han ja ti, ãg Senhor tỹ ãg mý vënh vĩ jënë ja ên ti,” he mũ. ¹⁶ Ký ag tóg fũrũnrũn mũ mũ sir. Tá ag tóg junjun mũ. Ký ag tóg vég mũ, Maria fi, José ti ke gé, gĩr ti ke gé. Koso kãkã tóg nỹ nĩ, Maria fi kósin ên ti. ¹⁷ Hã ký ag tóg vég mũ. Hã ký ag tóg kãmén mũ, vënh kar mý. Topë tỹ ag mý vënh vĩ jënë ja ên kãmén ag tóg mũ, gĩr ên to. ¹⁸ Ký tóg ù tỹ mëg mũ ag mý e tĩ sir. ù tỹ mé ki rĩr tĩ ag vỹ mëg ag tóg mũ, ký tóg ag mý sér tĩ. ¹⁹ Ký Maria fi tóg vënh vĩ tag to jykrén mũ gé sir. Fi pi(jé) kã jatun mũ', ag tỹ nén tó ja ên ti. To jykrén ký fi tóg nĩ nĩ, Maria fi.

²⁰ Ký carneiro ki rĩr tĩ ag tóg sir ãjag mëg to vỹnvỹn ke mũ gé. Topë mý ag tóg vĩ há han mũ. “Ti hã ne tóg ãg mý vënh vĩ jënë ja nĩ', ã tỹ jëgnë jafã ag tỹ', ký ãg tóg vé,” he ag tóg mũ sir, Topë to.

Fag tỹ Jesus jijin

²¹ Kar kurã tỹ 8 (ke) vỹ tũg mũ. Ký tóg ti gré junun fãr kym ke kurã pétëm mũ sir, gĩr sĩ ên ti. Ký fag tóg ti jijin ký ti mý: “Jesus,” he mũ. Topë tỹ jënë jafã vỹ ti jyjy tag tó ja nĩ, ti mýnh fi tỹ ver ti tỹ kufy tũ ra. Hã ký fag tóg sir tỹ ti jijin mũ.

Fag tỹ Topẽ mỹ Jesus ven

²² Kejẽn fag vãkre tóg tá krỹg mũ, kỹ fag tóg vẽnũh kykũnh sór mũ. Moisés vỹ tag rán ja nĩ, gĩr mur kar kỹ fag tỹ vẽnũh kykũnh ke ti. Judeu ag jykre hã vẽ. Fag tỹ vẽnũh kykũnh jé fag tóg cidade tỹ Jerusalém ra mũ mũ, fi tỹ Topẽ mỹ ã kósın ven jé, tá. “Ã tũ vẽ,” he sór fag tóg mũ, Topẽ mỹ, fi kósın ẽn to. ²³ Topẽ vỹ ki tag vỹ rán kỹ nĩ, hã vỹ: “fi kósın ve tỹ gré nỹn kỹ tóg tỹ ẽg jóg mág tỹ Topẽ tũ nỹ,” he mũ, Topẽ vỹ tỹ rán kỹ nĩ ki. ²⁴ Hã kỹ fag tóg Topẽ jo ın ra mũ mũ, Topẽ mỹ nén ù pũn jé. Rán kỹ tóg nĩ nĩ, ẽg jóg mág vĩn ki, fag tỹ ne tỹ ti mỹ pũn ke ti, hã vỹ: sórãg régre, ke tũ nĩ kỹ ton régre, he mũ gé. Ẽn ma fag tóg mũ mũ, fag tỹ Topẽ mỹ pũn jé. Topẽ tũ ki rĩr tĩ ag mỹ fag tóg vin tĩ, sórãg ti, kỹ ag tóg tãnh kỹ Topẽ mỹ pũn tĩ.

²⁵ Kỹ Jerusalém tá ù tóg nĩ nĩ, ti jyjy hã vỹ: Simeão, he mũ. Ẽn jykre kuryj vẽ, Simeão ti. Topẽ kamẽg tóg tĩgtĩ, Topẽ kuprĩg tỹ tóg jagrẽ nĩ. Topẽ tỹ Israel ag krenkren han mũ ẽn jãvãnh tóg nĩgtĩ, Simeão ti. ²⁶ Kỹ Topẽ kuprĩg vỹ ti mỹ: “Cristo ve jé ã tóg ke mũ, ã ter ke to hã, ẽg Senhor tỹ ti jẽnẽn kỹ,” he ja nĩgtĩ ti mỹ.

²⁷ Topẽ kuprĩg tỹ ti krĩn kỹ tóg kejẽn Topẽ jo ın kãra tĩ mũ. Kỹ tóg tá jẽ nĩ, hã ra fag tóg Jesus ma kãmũ mũ, fag tỹ Topẽ mỹ sórãg pũn jé, Moisés tỹ Judeu ag mỹ nén tó ja ti. ²⁸ ã tỹ Jesus ve kỹ tóg ti vãg mũ sir, kỹ tóg ti to Topẽ mỹ vỹ há han mũ, Simeão ti. ²⁹ “Ẽg jóg mág,” he tóg, Topẽ mỹ. “Vãhã ã tóg inh jé prẽr ke mũ, kỹ sóg jatun mỹ tĩg mũ ha,” he tóg. “Ã tỹ inh mỹ nén tó jan han ã tóg huri,” he tóg. ³⁰ “Ve inh huri, ã tỹ ẽg krenkren han ke mũ ti. Cristo ve inh huri,” he tóg, Simeão ti. ³¹ “Vẽnũh kar rĩnve ã tóg han, ã tỹ ẽg krenkren han ke mũ ti. ³² Kỹ tóg ẽg mỹ jẽngrẽ ri ke nĩ, Cristo mur ti. Kỹ povo kar vỹ vég mũ, fóg ag kar, kanhgág ag kar ke gé, ã tỹ ag krenkren han ke mũ ti. Ẽg povo tỹ Israel tỹ ã tóg ẽn mág han huri, vẽnũh kar rĩnve, Cristo tỹ ẽg mré ke nĩn kỹ,” he tóg, Simeão ti, Topẽ mỹ.

³³ Kỹ Jesus jóg vỹ ti vỹ mẽg mũ, Jesus mỹnh fi ke gé, kỹ tóg fag mỹ e tĩ, ti tỹ Jesus to nén tó mũ ẽn ti.

³⁴ Kỹ Simeão vỹ fag mỹ vẽnũh vỹ há tó mũ gé. “Topẽ vỹ ajag ve há han mũ,” he tóg mũ fag mỹ, Simeão ti. Kỹ tóg Maria fi mỹ: “ha vé,” he mũ. “Israel tỹ hẽn ri ke ag vỹ ti tugrĩn mũ há han ke mũ, jãvo ù tỹ hẽn ri ke ag vỹ ti tugnĩn mũ kónãn ke mũ gé. Kỹ ag tóg ti kato vĩnh ke mũ gé, Topẽ tỹ ti jẽnẽ ja ra. ³⁵ Kỹ ã tóg ti tugrĩn vêsỹrẽnh kenh ke mũ, jy, kỹ tóg rógro tỹ ã fe tỹ gynh ke ri ke nĩnh ke mũ, ã vêsỹrẽnh ke ti. Kỹ ẽg tóg venh ke mũ, ag tỹ nén to ti to jykren mũ ti,” he tóg, Maria fi mỹ, Simeão ti.

³⁶ Kỹ ù fi tóg tá nĩ gé, Topẽ jo ın krẽm, fi jiji hã vỹ: Ana, he mũ. Topẽ vỹ tó tĩ fi vẽ gé. Fanuel kósın fi vẽ. Kỹ fi jóg'jóg ve vỹ tỹ Aser nĩ. Kófa fi nĩ ha, kófa tãvĩ. ã mén kỹ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar. ³⁷ Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ẽn fi vỹ Topẽ jo ın krẽm nĩ nĩ, kurã kar ki fi tóg tá nĩ nĩ sir. Tá fi tóg Topẽ tũ han nĩgtĩ, ti mré vỹ kỹ. Jẽg tũ fi nĩgtĩ, fi tỹ Topẽ mré vỹ jé. Kutu tá fi tóg ke tĩ, kurã tá ke gé. ³⁸ Ẽn fi vỹ hora ẽn kã Topẽ jo ın krẽm jẽ mũ, Simeão tỹ Jesus ven kỹ. Kỹ fi tóg Jesus vég mũ gé sir, Ana fi. Ti ve kỹ fi tóg Topẽ mỹ vỹ há han mũ. “Inh mỹ tóg há tĩ, sỹ ti ven kỹ,” he fi tóg mũ, Topẽ mỹ. Vẽnũh kar mỹ fi tóg tó mũ, ẽn krenkren sór mũ ag mỹ, Jerusalém tá.

Fag tỹ Nazaré ra vỹn ke

³⁹ Kỹ fag tóg sir Moisés tỹ vẽnũh kykũnh to nén rán ja ẽn han kãn mũ sir, Jesus mỹnh fi, Topẽ tỹ Judeu fag mỹ vẽnũh jykre nĩm ja ẽn ti. Kar kỹ fag tóg sir cidade tỹ Nazaré ra vỹnvỹn ke mũ, ga tỹ Galiléia ra, fag jamã ra ke vẽ sir. ⁴⁰ Kỹ gĩr sĩ ẽn tóg mog mũ sir, komẽr hã tóg tar jẽ sir. Kỹ tóg vẽnũh kanhrãn há han mũ, kỹ Topẽ vỹ ti ve há han mũ gé, hã kỹ tóg vẽnũh kanhrãn mág mũ sir, ẽn sĩ ẽn ti.

Jesus tỹ ã pir mỹ Topẽ jo ın tá nĩ

⁴¹ Jesus mỹnh fag tóg prỹg kar ki Jerusalém ra mũ tĩ, fag tỹ festa tỹ Páscoa venh mũ jé. Fag jykre hã vẽ. ⁴² Jesus tỹ 12 anos han kỹ tóg fag mré tĩ mũ gé, fag tỹ festa ẽn venh mũn kỹ, Jerusalém ra. ⁴³ Festa tỹ tũ ken kỹ fag tóg vỹnvỹn ke mũ, hã ra Jesus tóg Jerusalém

tá nĩ nĩ. Hã ra fag tóg ki kagtĩg nĩtĩ, ti tỹ Jerusalém tá nĩ ěn ki. ⁴⁴ Kĩ fag tóg: “ti hỹn ũ tỹ ěg mré kãmũ mũ fag mré vyr, ěg jo,” he mũ. Kĩ fag tóg kurã pir ki mũ mũ, fag jamã ra vỹnvỹn ke kỹ. Fag tỹ ãjag mré ke fag tá junjun kũ fag tóg ti jãvãnh mũ, ãjag to há kar fag kãmĩ. ⁴⁵ Hã ra fag tóg tá Jesus vég tũ nĩ. Kũ fag tóg Jerusalém ra vỹnvỹn ke mãn mũ gé, ti jãvãnh jé. ⁴⁶ Vãhã fag tóg ti vég mũ, kurã tãgtũ tũ kũ. Topě jo ĩn krēm tóg nĩ nĩ, professor ag mré. Ag vĩ mēg tóg nĩ nĩ, kũ tóg ag ki jēmēg mũ gé, “ne nē?” hen kũ. ⁴⁷ Ũ tỹ ti vĩ mēg mũ ag mỹ tóg e tĩ. To jykrén há han tóg, Jesus ti, kũ tóg ag mỹ tó há han mũ. Ag tỹ ti vĩ mē kũ tóg ag mỹ e tĩ, professor ag mỹ.

⁴⁸ Ti mỹnh fag tỹ ti ve kũ tóg fag mỹ e tĩ gé sir. Kũ ti mỹnh fi tóg ti mỹ: “inh kósin’,” he mũ. “Ā tỹ tag kã ne han nĩ nē? Ā jóg mré sóg ã jãvãnh jagy han. Ā jãvãnh to ěg tóg kaně jur, ěg tỹ ã vég tũ nĩn kũ,” he fi tóg ti mỹ. ⁴⁹ Hã ra tóg fi mỹ: “ã tỹ ne jé inh jãvãnh ja nē?” he mũ. “Hě ri ken kũ hỹn’?” he tóg. “Inh panh pě ĩn krēm sóg nĩ nĩ mỹr, kũn mỹ ãjag mỹ vėnhmỹ?” he tóg, ã mỹnh fag mỹ. ⁵⁰ Hã ra tóg fag tỹ to jykrén tũ tĩ, fag kósin vĩ to.

⁵¹ Kũ tóg fag mré tĩ mũ, cidade tỹ Nazaré ra. Tá tóg fag mré nĩ nĩ sir, ti tỹ fag vĩ jēmēn kũ. Kũ ti mỹnh fi pi(jé) vėnh vĩ kar tag kã jatun nĩ’.

⁵² Kũ Jesus tóg mog mũ sir. Krĩ há tãvĩ tóg nĩ. Topě vỹ ti ve há han mũ gé. Kũ tóg vėnh kar mỹ há tĩ sir, ag tỹ ti jykre ven kũ.

3

João Batista ti

(Mt 3.1-12; Mc 1.1-8; Jo 1.19-28)

¹ Kejēn tóg Tibério tỹ pã’i mág tỹ imperador nĩ kri 15 anos han mũ. Ti tỹ Roma tá tỹ pã’i mág nĩ ěn kã Põncio Pilatos vỹ tỹ ga tỹ Judéia kri pã’i tỹ governador nĩ, Tibério krēm. ěn kã Herodes vỹ tỹ Galiléia kri pã’i tỹ governador nĩ gé, Tibério krēm. Herodes jãvy tỹ Filipe vỹ tỹ ga tỹ Ituréia tá pã’i tỹ governador nĩ gé, ga tỹ Traconites tá ke gé, Tibério krēm. Jãvo Lisãnias vỹ tỹ ga tỹ Abilene tá pã’i tỹ governador nĩ, Tibério krēm.

² ěn kã Caifás vỹ tỹ Topě tũ ki rĩr tĩ ag pã’i mág nĩ, Anás mré hã. Kũ vãhã Topě vỹ João mré vĩ mũ sir, Zacarias kósin ěn mré. ěmã tũg ja mĩ tóg tĩ mũ, João ti. Kũ Topě tóg ti mỹ: “ha Israel ag mỹ vėnh ven tĩg,” he mũ. ³ Kũ tóg sir tĩ mũ. Goj tỹ Jordão jagma tóg tĩ mũ. Tĩg kũ tóg vėnh kar jyvėn mũ, kũ tóg ag mỹ: “ã kype jé sóg ke mũ, ã tỹ ã jykre kórég tovãnh sór kũ, Topě tỹ ã tỹ ti vĩ mranh tỹ ã mỹ vėnh pãte fón jé,” he tóg mũ sir, vėnh kar mỹ.

⁴ João tóg rán kũ nĩ, vãsỹ. Topě vĩ tó tĩ tỹ Isaías vỹ João to tag rán ja nĩ, ha mē: “ẽmã tũg ja tá tóg jėnh ke mũ, ga kórég tá,” he ja tóg nĩ, Isaías ti. “Tá tóg ag mỹ tónh ke mũ. “Ěg Senhor kãtĩg ke jo vėnh jãnhkrigkrig nĩ,” he jé tóg ke mũ. “Ěpry kurég ãjag tóg tĩ, ěmĩn kurynh ãjag tóg tĩ, ãjag chefe jun ken kũ. Kũ tag ri ke han nĩ, ãjag jykre pãno togvãnh kũ, ěg Senhor kãtĩg ken jo. ⁵ Ti kãgnó tỹ ãjag tóg kyjer’ he tĩ, kar ãjag tóg ěpry sór kar kũm ke tĩ gé, ěmĩn sór ti. Ti jonjor kugrynh kãn ãjag tóg tĩ, ti sunsór vãvãm kãn ãjag tóg tĩ gé, ãjag tỹ ěpry han kũ, ěmĩn han kũ. Kũ tag ri ke han nĩ, ãjag jykre kórég to. ⁶ Hã kũ ěprã ke kar vỹ venh ke mũ, Topě tỹ ěg krenkren han ke ti,” he jé tóg ke mũ, kũ vėnh kar vỹ ti vĩ mēnh mũ,” he ja tóg nĩ, Isaías ti, João to.

⁷ Hã kũ João tóg sir ag jyvėn mũ sir, ag tỹ ti venh kãmũn kũ, ti tỹ ag kygpe jé. E tãvĩ ag nỹtĩ, ũ tỹ ti venh kãmũ mũ ag. Ag jyvėn kũ tóg ag mỹ: “pỹn ri ke ãjag tóg nỹtĩ, ãjag jykre pãno tãvĩ nĩn kũ,” he mũ. “Ũ nỹ ãjag mỹ: “Topě jũ venh ke tũ ãjag nĩ,” he tĩ? ⁸ Ājag jykre si togvãnh ra, ãjag tỹ ti jũ ve jãvãnh tĩn kũ. Vėnh jykre há han ra, ěg tỹ ãjag jykre tãg ve jé. Hã ra ãjag tóg jagně mỹ: “Abraão vỹ tỹ ěg jóg’jóg ve nĩ,” he mũ, “kũ Topě hỹn ěg to jũnh ke tũ nĩ, ěg tỹ tỹ Abraão krě’krě nỹtĩn tugrĩn,” he ãjag tóg tĩ. Hã tũ vė hã ra. Ājag jykre kórég ěn to ãjag tóg jagtar ke mũ, ha vemnĩ. Topě vỹ Abraão krě’krě hyn han ki kanhró nĩ, pó tag tỹ mỹr, ti tỹ Abraão krě’krě ve sór kũ, Topě ti. ⁹ Hã ra tóg ãjag tỹ tũ’ henh ke mũ, ãjag tỹ ãjag jykre kórég tovãnh tũ nĩn kũ,” he tóg, João ti.

“Ēg tỹ ka gỹn ri ke tóg nĩ. Ti kanĕn vānh nĩn kỹ ĕg tóg ti gỹn tĩ, tỹ pĩ han jé. Tag ri ke han jé tóg ke mũ, Topĕ ti, ājag mỹ, ājag tỹ vĕnh jykre há han tũ nĩn kỹ. Kỹ tóg pĩ ki ājag vām ke mũ, Topĕ ti,” he tóg ag mỹ, João ti.

¹⁰ Kỹ ũn e ag tóg ti ki jĕmĕnh kāmũ mũ sir, João ki. Kỹ ag tóg ti mỹ: “kỹ ĕg hỹn hĕ ri kenh mũ ha, Topĕ jykre han jé?” he mũ. ¹¹ Kỹ tóg ag mỹ: “ā kur régre nĩn kỹ ā kur pir nĩmnĩ, ũn kur tũ ĕn mỹ,” he mũ. “Ā jĕn tỹ ũn kókĩnkĩr ag mỹ vĕnh kápópām nĩ gé,” he tóg.

¹² Kỹ ũ tỹ governo mỹ imposto kaja mǎg tĩ ag vỹ João to kāmũ mũ gé, ti tỹ ag kygpe jé. Kỹ ag tóg ti mỹ: “professor’,” he mũ. “Ēg hỹn hĕ ri kenh mũ?” he ag tóg mũ gé. ¹³ Kỹ João tóg ag mỹ: “pā’i mǎg tỹ ājag mỹ nĕn tó mũ ĕn hā ri ke mǎn nĩ, jānkamy ti,” he mũ. “Ker ti kǎfór mǎn sór hĕ’,” he tóg ag mỹ.

¹⁴ Kỹ soldado ag vỹ tá junjun mũ gé. “Kỹ ĕg hỹn hĕ ri kenh mũ?” he ag tóg mũ gé sir, soldado ag. Kỹ tóg ag mỹ: “ag tũ mǎn sór tũg nĩ,” he mũ. “Ag to vāsān ājag tóg tĩ, ũ to ón ājag tóg tĩ gé, ājag tỹ ag jānkamy ve jé. Ke tũg nĩ. Ājag rānhřāj to ājag tóg jānkamy vĕg tĩ. Ti kǎfór mǎn sór tũg nĩ,” he tóg, João ti, soldado ag mỹ.

¹⁵ Kỹ vĕnh kar ag tóg ti to jykrĕn mũ, João to. “Ti mỹ tỹ Cristo tũ nĩ vỹ?” he ag tóg mũ sir ti to. João to ag tóg ke mũ, ag tỹ Cristo kǎtĩg jāvānh kỹ. ¹⁶ Kỹ João tóg ag mỹ: “inh pi(jé) tỹ Cristo nĩ’,” he mũ. “Goj hā tỹ sóg ājag kygpég tĩ. Inh nón tóg kǎtĩg mũ, Cristo ti, ha mĕ. Inh kǎfór ti nĩ. Sỹ tỹ ti camarada nĩnh ke vĕ vĕ, sỹ ti pĕn né kunũ jé, ti pĕn to ró ti. Hā ra sóg tỹ ti krĕm pĕ jĕ. Ēn vỹ tóg Topĕ kuprĩg jĕnĕnh ke mũ, ti tỹ tỹ ājag jagrĕ nĩ jé, kỹ tóg pĩ jĕngrĕ ri ke nĩ. Ti tỹ ājag kygpenh ken hā vĕ,” he tóg, João ti. mũ, ti tỹ tỹ ājag jagrĕ nĩ jé, kỹ tóg pĩ jĕngrĕ ri ke nĩ. Ti tỹ ājag kygpenh ken hā vĕ,” he tóg, João ti.

¹⁷ “Ti kǎtĩg vỹ tỹ ĕg tỹ rǎgró rĕn ri ke nĩ. Ti rĕn kar kỹ ĕg tóg ti fár vām tĩ, ĕg tỹ pājó kuprǎg jé. Ti kanĕ há vin han ĕg tóg tĩ. Ti fár pũn ĕg tóg tĩ. Cristo kǎtĩg kỹ tóg ri ke nỹ. Ũ tỹ ā to há ag mỹ tóg: “ha kāmũ jĕg,” henh ke mũ. Ũ tỹ ā to kórĕg ag vām jé tóg ke mũ, pĩ ki, hā ra tóg nhyn kenh ke tũ pĕ nĩ,” he tóg, João ti. ¹⁸ Hā kỹ tóg vĕnh kar mỹ Topĕ vĩ sér tó mũ, ag jyvĕn kỹ, João ti.

¹⁹ Kỹ tóg pā’i mǎg tỹ Herodes jyvĕn mũ gé, ti prũ fi to, hā vỹ: Herodias fi, he mũ. Tỹ fi ti jāvy prũ ja nĩ, hā ra tóg fi péju kỹ fi tỹ prũg mũ, Herodes ti. Nĕn ũ vĕnhmỹ e han tóg tĩ, hā kỹ João tóg ti jyvĕn mũ. ²⁰ Kar tóg sir nĕn ũ vĕnhmỹ ũ han mǎn mũ gé, Herodes ti. João ség tóg mũ, ti tỹ ti jyvĕn to.

João tỹ Jesus kype

(Mt 3.13-17; Mc 1.9-11)

²¹ Hā ra tóg kǎgmĩ kỹ jĕ tũ nĩ ver, João ti. Kỹ tóg ag kygpe kǎn mũ. Kỹ tóg kejĕn Jesus kypég mũ gé. Kỹ Jesus tóg jĕ nĩ, ti tỹ Topĕ mré vĩn kỹ, João tỹ ti kype kar kỹ. Kỹ vāhā kanhā tóg nor’ he mũ. ²² Kỹ Topĕ kuprĩg vỹ kanhā tá kǎtére mũ, ti kri. Tỹ sórǎg ve ti nĩ, Topĕ kuprĩg ti. Kỹ kanhā tá vĕnh vĩ tóg mĕ há tĩ, kỹ tóg: “tỹ ā inh kósĩn pir jĕ, tỹ ā tóg inh fe pĕ jĕgtĩ,” he mũ, vĕnh vĩ ti, Topĕ ti.

Jesus jóg’jóg ve ag

(Mt 1.1-17)

²³ Jesus vỹ 30 anos han mũ, ti tỹ vĕnh kar mỹ Topĕ kāmĕn ve ki. “José kósĩn vĕ,” he ag tóg tĩ ti to, hā ra tóg tỹ ti kósĩn tũ nĩgtĩ. Eli kósĩn vĕ, Jesus ti, kỹ Eli ĕn vỹ tỹ ti vovô nĩ. ²⁴ Eli vỹ tỹ Matate kósĩn nĩ. Matate vỹ tỹ Levi kósĩn nĩ. Levi vỹ tỹ Malqui kósĩn nĩ. Malqui vỹ tỹ Janai kósĩn nĩ. Janai vỹ tỹ José kósĩn nĩ. ²⁵ José vỹ tỹ Matatias kósĩn nĩ. Matatias vỹ tỹ Amós kósĩn nĩ. Amós vỹ tỹ Naum kósĩn nĩ. Naum vỹ tỹ Esli kósĩn nĩ. Esli vỹ tỹ Nagai kósĩn nĩ. ²⁶ Nagai vỹ tỹ Maate kósĩn nĩ. Maate vỹ tỹ Matatias kósĩn nĩ. Matatias vỹ tỹ Semei kósĩn nĩ. Semei vỹ tỹ José kósĩn nĩ. José vỹ tỹ Joda kósĩn nĩ. ²⁷ Joda vỹ tỹ Joanā kósĩn nĩ. Joanā vỹ tỹ Resa kósĩn nĩ. Resa vỹ tỹ Zorobabel kósĩn nĩ. Zorobabel vỹ tỹ Salatiel kósĩn nĩ. Salatiel vỹ tỹ Neri kósĩn nĩ. ²⁸ Neri vỹ tỹ Melqui kósĩn nĩ. Melqui vỹ tỹ Adi kósĩn nĩ. Adi vỹ tỹ Cosā kósĩn nĩ. Cosā vỹ tỹ Elmadão kósĩn nĩ. Elmadão vỹ tỹ Er kósĩn nĩ. ²⁹ Er vỹ tỹ Josué kósĩn nĩ. Josué vỹ tỹ Eliézer kósĩn nĩ. Eliézer vỹ tỹ Jorim kósĩn

nĩ. Jorim vỹ tỹ Matate kósin nĩ. Matate vỹ tỹ Levi kósin nĩ. ³⁰ Levi vỹ tỹ Simeão kósin nĩ. Simeão vỹ tỹ Judá kósin nĩ. Judá vỹ tỹ José kósin nĩ. José vỹ tỹ Jonã kósin nĩ. Jonã vỹ tỹ Eliaquim kósin nĩ. ³¹ Eliaquim vỹ tỹ Meleá kósin nĩ. Meleá vỹ tỹ Mena kósin nĩ. Mena vỹ tỹ Matata kósin nĩ. Matata vỹ tỹ Natã kósin nĩ. Natã vỹ tỹ Davi kósin nĩ. ³² Davi vỹ tỹ Jessé kósin nĩ. Jessé vỹ tỹ Obede kósin nĩ. Obede vỹ tỹ Boaz kósin nĩ. Boaz vỹ tỹ Sala kósin nĩ. Sala vỹ tỹ Nassom kósin nĩ. ³³ Nassom vỹ tỹ Aminadabe kósin nĩ. Aminadabe vỹ tỹ Admim kósin nĩ. Admim vỹ tỹ Arni kósin nĩ. Arni vỹ tỹ Esrom kósin nĩ. Esrom vỹ tỹ Peres kósin nĩ. Peres vỹ tỹ Judá kósin nĩ. ³⁴ Judá vỹ tỹ Jacó kósin nĩ. Jacó vỹ tỹ Isaque kósin nĩ. Isaque vỹ tỹ Abraão kósin nĩ. Abraão vỹ tỹ Tera kósin nĩ. Tera vỹ tỹ Nacor kósin nĩ. ³⁵ Nacor vỹ tỹ Seruque kósin nĩ. Seruque vỹ tỹ Ragaú kósin nĩ. Ragaú vỹ tỹ Faleque kósin nĩ. Faleque vỹ tỹ Éber kósin nĩ. Éber vỹ tỹ Sala kósin nĩ. ³⁶ Sala vỹ tỹ Cainã kósin nĩ. Cainã vỹ tỹ Arfaxade kósin nĩ. Arfaxade vỹ tỹ Sem kósin nĩ. Sem vỹ tỹ Noé kósin nĩ. Noé vỹ tỹ Lameque kósin nĩ. ³⁷ Lameque vỹ tỹ Metusalém kósin nĩ. Metusalém vỹ tỹ Enoque kósin nĩ. Enoque vỹ tỹ Jarete kósin nĩ. Jarete vỹ tỹ Maleleel kósin nĩ. Maleleel vỹ tỹ Cainã kósin nĩ. ³⁸ Cainã vỹ tỹ Enos kósin nĩ. Enos vỹ tỹ Sete kósin nĩ. Sete vỹ tỹ Adão kósin nĩ. Adão vỹ tỹ Topẽ tỹ há nĩ. Jesus jóg'jóg ve ag há vẽ.

4

*Jesus tỹ Topẽ vĩ mranh tũ
(Mt 4.1-11; Mc 1.12-13)*

¹ Kĩ Topẽ kuprĩg vỹ tỹ Jesus jagrẽ nĩ. Kĩ Jesus vỹ goj tỹ Jordão tá vỹn ke mũ, ã kype kỹ jẽn kỹ. Ti tĩg kỹ Topẽ kuprĩg vỹ ti krĩn mũ. ² Kĩ tóg ti tỹ ti krĩn kỹ ãmã tũg ja ra tĩ mũ sir, ga kórég ra. Tá tóg kurã tỹ 40 (ke) han mũ, ãmã tũg ja ki. Kĩ Japo vỹ ti tỹ ã jóg vĩ mranh han sór mũ, tá, há ra Jesus tóg ke tũ nĩ. ãmã tũg ja tá nĩn kỹ tóg jęg tũ nĩ, kurã tỹ 40 ãn ki. Kar kỹ tóg sir kókĩr mũ. ³ Ti kókĩr nĩn kỹ Japo vỹ ti mĩ vĩ mũ. “Tỹ ã Topẽ kósin nĩ mĩr,” he tóg. “Ã tỹ tỹ Topẽ kósin nĩn kỹ pó tag tỹ ãmĩ han nĩ, ã tỹ kon jé,” he tóg ti mĩ, Nén-Kórég ãn ti, Jesus mĩ. ⁴ Kĩ Jesus tóg ti mĩ: “há ra tag tóg rán kỹ nĩ, ha mẽ,” he mũ. “ãmĩ tãvĩ jamẽn kỹ ãg rĩnrĩr tũ nỹtĩ, Topẽ vĩ jamẽn kỹ ãg rĩnrĩr nỹtĩ. Há kỹ tóg sỹ ti vĩ mranh jãvãnh tĩ, ãmĩ to,” he tóg, Jesus ti, Nén-Kórég ãn mĩ.

⁵ Kĩ Japo vỹ ti mré tãpry mũ. Kĩ tóg ti mĩ mundo ven kãn mũ, ã tỹ kri ke kar ag ke gé. Ven pir ki tóg ti mĩ ven kãn mũ. ⁶ Kĩ tóg ti mĩ: “isũ vẽ mĩr,” he mũ, Japo ti. “Ã mĩ sóg tovãnh kãn sór mũ, ã tỹ tỹ vẽn kar tag ag pã'i jẽ jé. Kỹ ti sĩnvĩ tag kar vỹ tỹ ã tũ nĩnh mũ. Isũ vẽ mĩr, ã tỹn han ja ãn tỹ inh mĩ: “té,” hen kỹ. Kỹ sóg sỹ ãn kuprẽg mũ ãn mĩ vin tĩ sir. ⁷ ã há mĩ sóg tovãnh sór mũ ha, ã tỹ inh krẽm grĩnh ken kỹ, ã tỹ iso: “Topẽ vỹ tỹ ã nĩ,” hen kỹ,” he tóg, Nén-Kórég ti, Jesus mĩ. ⁸ Kĩ Jesus tóg ti mĩ: “tag vỹ rán kỹ nĩ, ha mẽ,” he mũ. “ãg pã'i tỹ Topẽ há krẽm ãg tóg ãg jakrĩ tỹ krỹ' he tĩ, ti há to ãg tóg: Topẽ vẽ, he tĩ,” he tóg, Topẽ vỹ rán kỹ nĩn ki. Há kỹ sóg mranh jãvãnh nĩ,” he tóg, Jesus ti, Nén-Kórég mĩ.

⁹ Kĩ Japo tóg ti mré tĩg mãn mũ, cidade tỹ Jerusalém ra. Tá tóg ti mĩ: “Topẽ jo ãn kri jẽnĩ, ti krĩ kri,” he mũ. Kĩ tóg ke mũ. Há ra kãgnó tóg tá nĩ, Topẽ jo ãn jo. Japo tóg Jesus mĩ: “Topẽ kósin vỹ tỹ ã nĩ,” he mũ. “Kỹ hũm hemnĩ. ¹⁰ Tag vỹ rán kỹ nĩ, ha mẽ: “ã tỹ jẽnẽ jãfã ag mĩ tóg tónh mũ, Topẽ ti, kỹ ag tóg ã ki rĩr ke mũ. ¹¹ ã jag nĩgẽ tỹ ag tóg ã vỹn ke mũ, kỹ ã tóg rỹj ke tũ nĩ. ã pẽn vỹ rỹj ke tũ nĩ gé, há jé ag tóg ã ki rĩr ke mũ,” he tóg, Topẽ vỹ rán kỹ nĩ ãn ki. Kỹ jatun mĩ hũm nĩ,” he tóg, Nén-Kórég ti, Jesus mĩ. ¹² Kĩ Jesus vỹ ti mĩ ke mũ gé. “Kỹ tag vỹ rán kỹ nĩ gé, ha mẽ,” he tóg. “Topẽ mĩ: ã mĩ ã tỹ nẽn tó ja ãn han mũ vỹ? he tũg nĩ,” he tóg mũ gé, Topẽ vỹ rán kỹ nĩ ãn ki. Há kỹ sóg Topẽ há tỹ inh mĩ nẽn tó mũ ãn han ke mũ, kỹ sóg hũm ke tũ nĩ, ti tỹ inh mĩ tó tũ nĩn kỹ,” he tóg, Jesus ti, Nén-Kórég mĩ.

¹³ Kĩ Japo vỹ ã tỹ nẽn tónh ke ãn tó kãn ja nĩ, há kỹ tóg Jesus tovãnh mũ ver, ti tỹ kurã ã kã ti mré vĩ mãn jé, kejẽn, ti tỹ ti mĩ há tĩ ve nĩn kỹ, Japo mĩ.

Jesus tỹ Galiléia tá ag kanhrân

(Mt 4.12-17; Mc 1.14-15)

¹⁴ Kỹ Jesus tóg tĩ mũ sir, Topẽ kuprĩg tỹ ti krĩn kỹ. Ga tỹ Galiléia ra tóg tĩ mũ. Kỹ vẽn̄h kar ti kãme mẽ kãn mũ sir, ga ẽn tá ke kar ag. ¹⁵ Kỹ tóg ag kanhrân mũ sir, Jesus ti, ag vẽn̄h kanhrân jafã krêm. Krêm ag tóg Topẽ vĩ tó tĩ, Judeu ag. Jesus tỹ ag kanhrân kỹ tóg ag mẽ e tĩ, ti vĩ ti. Hã kỹ ag tóg ti to vĩ há han mũ sir.

Jesus tỹ Nazaré ra vỹn ke

(Mt 13.53-58; Mc 6.1-6)

¹⁶ Kỹ Jesus tóg Nazaré tá jun mũ gé, ã jamã tá. Tá tóg mog ja nĩ, cidade tỹ Nazaré tá. Kỹ tóg ã tỹ nén han tĩ ẽn han mũ. Ag vẽn̄h kanhrân jafã ra tóg tĩ mũ, vẽn̄h kãn ke kurã ki. Tá tóg sir jẽgnẽ mũ, culto ki, ag vẽn̄h mãn kỹ nỹtĩ ẽn ki. Ti tỹ Topẽ vĩ to ke sór vẽn̄, hã kỹ tóg jẽgnẽ mũ, Jesus ti. ¹⁷ Ti jẽ kỹ ag tóg ti mẽ livro nĩm mũ, Isaías tỹ rán ja ẽn ti, vãsỹ Topẽ vĩ tó tĩ tỹ rán ja ẽn ti. Kỹ tóg livro tỹ vym ke mũ. Kỹ tóg ã tỹ to ke sór mũ ẽn vэг mũ, Isaías tỹ tó ja ti, ha mẽ. ¹⁸ “Topẽ kuprĩg vỹ inh krĩn mũ,” he tóg. “Inh jagrẽ vẽn̄ mỹr, hã kỹ tóg inh krĩn mũ. “Ûn jagãgtar ag mẽ inh vĩ tómnĩ,” he tóg inh mẽ. Inh jẽnẽg tóg mũ, isỹ ùn sigse kỹ nỹtĩ ag kygvãn jé, isỹ ùn kyvó ag tỹ ẽvãnh (há) han jé, isỹ ag tỹ ùn vóg kónãn mũ ag ki rĩr há han jé, ag jatu nỹtĩ jé, ¹⁹ isỹ vẽn̄h kar mẽ: “ũri ẽg jóg mág vỹ ẽg kren han sór mũ,” he jé,” he tóg, Isaías ti, vẽn̄h rá ki. Hã to ke tóg mũ, Jesus ti. ²⁰ Tag to ke kar kỹ tóg livro ẽn kri tỹ tam ke mãn mũ. Livro ki rĩr tĩ ẽn mẽ tóg jun mũ, livro ti. Kỹ tóg nĩ mũ sir.

Hã ra vẽn̄h kar ag tóg ti ki ẽvãnh mũ. ²¹ Kỹ tóg ag mẽ kãmén mũ, kỹ tóg: “vãsỹ rán kỹ nĩ ja tag mẽ ãjag tóg,” he mũ. “Ûri ke vẽn̄, ùri ãjag tóg vэг mũ, vãsỹ rán kỹ nĩ ja ẽn ti,” he tóg. “Inh hã to tóg tag tó ja nĩ, Isaías ti,” he tóg, Jesus ti.

²² Ag tỹ ti vĩ mẽ kỹ tóg ag mẽ e tĩ sir. “Ki hã tóg tó mũ, hã kỹ tóg ẽg mẽ e tĩ,” he ag tóg mũ. Kỹ ag tóg ti to vĩ mũ gé. “José kósin vẽn̄ mỹr, ẽg mré ke ẽn, hã ra tóg ẽg vĩ kãfór han sór mũ,” he ag tóg mũ ti to.

²³ Kỹ Jesus tóg ag mẽ: “ãjag hỹn iso jykrén sór mũ,” he mũ. “Médico mẽ ẽg tóg: “kur vêsỹ há' hé, ã tỹ tỹ médico nĩ sór nĩn kỹ,” he tĩ. ãjag hỹn tag tó sór mũ inh mẽ. ãjag hỹn inh mẽ: “cidade tỹ Cafarnaum tá ã tóg ag tỹ há' hé, ùn kagyga ag tỹ, kỹ kur tag ki ẽg tỹ há' hemnĩ gé, ã jamã tag ki, ã tỹ vẽn̄h kar tỹ há' he sór nĩn kỹ,” he sór ãjag hỹn mũ inh mẽ,” he tóg, Jesus ti.

²⁴ Kỹ tóg ag mẽ: “ti jamã tá ke ag ne tóg Topẽ vĩ tó tĩ ẽn to é he tĩ’,” he mũ. “Ti tỹ ke há vẽn̄. Hã kỹ ãjag tóg iso é he tĩ,” he tóg ag mẽ, Jesus ti. ²⁵⁻²⁶ “Ha mẽ, sỹ nén tó mũ ti. Elias to jykrén nĩ. Ti tỹ ga kri tĩ mũ kỹ tóg ta kutẽ vãn̄h han ja nĩgtĩ, prỹg tãgtũ kri kysã tỹ 6 (ke) ki. Kỹ tóg prỹg tĩ sir, ga ẽn mĩ, vẽn̄jẽn tóg tũ' he mũ sir. Kỹ Topẽ tóg Elias mẽ tó, ti tỹ cidade tỹ Sarepta ra tĩg jé, cidade tỹ Sidom kakó ra. Tá fóg fi tóg nĩ nĩ, ùn mén ter ja fi. Fi mré tóg jẽg tĩ sir, Elias ti, fi tỹ ti mẽ vẽn̄jẽn tỹ vẽn̄h kãpãm kỹ, prỹg ra. Topẽ pi(jé) Israel fi to ti jẽnẽ ja nĩgtĩ'. Ti pi(jé) ti jamã ra ti jẽnẽ ja nĩgtĩ'. Tá fag tóg e nỹtĩ ja nĩgtĩ gé, ùn mén ter ja fag. Hã ra Topẽ tóg fóg ẽn fi to ti jẽnẽ ja nĩgtĩ, fi tỹ ti ki rĩr jé,” he tóg, Jesus ti.

²⁷ “Kỹ Eliseu to jykrén nĩ gé, vãsỹ Topẽ vĩ tó tĩ ẽn to. Ti tỹ ga kri tĩ nĩn kỹ ùn kagyga ag tóg e ja nỹtĩgtĩ gé, ẽg povo tỹ Israel kãmĩ, vẽn̄h kaga kren vãn̄h han mũ ag, vẽn̄h kaga tỹ lepra han mũ ag. Hã ra ag tóg ti mẽ to vĩ ja tũ nĩgtĩ, ti tỹ ag tỹ há' hen jé. Kuvar há tá tóg kãtĩg ja nĩgtĩ, fóg ti, Naamã ti, ga tỹ Síria tá ke ẽn ti. Kỹ ti hã ne tóg Eliseu mẽ to vĩn kỹ há' he mũ sir inhã. Ti kaga kren vãn̄h ẽn tóg tũ' he mũ sir. Ge ãjag tóg nĩgtĩ iso. Kuvar há tá ke fag vỹ inh ki ge tĩ, jãvo ãjag tóg inh ki ge jãvãn̄h nỹtĩ, ãjag tỹ tỹ inh jamã tá ke nỹtĩ ra,” he tóg ag mẽ, Jesus ti.

²⁸ Kỹ ù tỹ ti vĩ mẽg mũ ag fe tóg gỹm ke mũ sir, Jesus to, ù tỹ vẽn̄h kanhrân jafã ẽn krêm nỹtĩ ag. ²⁹ Jẽgjẽg nẽgnẽ ag tóg mũ sir. Kãpa ag tóg mũ sir. Ti vóg ag tóg mũ sir, pãnónh ra. Nazaré vỹ pãnónh tá nĩ, ag jamã ti. Pãnónh ẽn to jãpry kỹ ag tóg tá ti kutẽm sór mũ, kãgnó ki ti ter jé. ³⁰ Hã ra Jesus tóg ag ré kỹ tĩ mũ, ag jãmĩ. Ti tỹ hẽ ri ke tũ ag tóg nĩ sir, kỹ tóg ag fĩn rãm kỹ ag ré kỹ tĩ mũ.

Hã ra ag tóg ti ví kri fi jãvãnh nýtí, ti jamã tá ke ag.

Jesus tỹ vãnh jagrẽ kórég kutêm

(Mc 1.21-28)

³¹ Kĩ Jesus tóg cidade tỹ Cafarnaum ra tĩ mũ. Ga tỹ Galiléia tá ti nĩ, Cafarnaum ti. Tá jun kũ tóg ag kanhrãn mũ, vãnh kãn ke kurã ki. ³² Kĩ tóg ag mỹ e tĩ, ag tỹ ti ví mễn kũ. Ti ví vỹ vãnh kar ví kãfór nĩ, hã kũ tóg ag mỹ e tĩ.

³³ Kĩ vãnh kanhrãn jafã ên krêm ù tóg nĩ nĩ. Jagrẽ kórég ti nĩ. Kĩ tóg prër mũ, kũ tóg: ³⁴ “ha mẽ, ã tỹ ãg tỹ hẽ ri kenh ke nẽ, Nazaré tá Jesus'?” he mũ. “Ã mỹ ãg tũg sór mũ'?” he tóg. “Ã ki kanhró sóg nĩ. Tỹ ã tóg ã pir mỹ Topẽ mré ke nĩ, ti tũ pẽ vỹ tỹ ã nĩ,” he tóg, ùn jagrẽ kórég ti. ³⁵ Hã ra Jesus tóg ti mỹ ví tar han mũ, kũ tóg: “vĩ tũg ra,” he mũ. “Ti tovãnh ra,” he tóg. Kĩ ti jagrẽ kórég ên tóg ti ter tĩ han mũ, vãnh kar rĩnve, kũ tóg ti ki kutẽ mũ sir. Ti kókég tũ tóg nĩ, ti jagrẽ kórég ti.

³⁶ Kĩ tóg vãnh kar mỹ e pẽ tãvĩ tĩ sir. Jagnẽ mỹ ag tóg: “ne nẽ hỹn vé'?” he mũ. “Vãnh jagrẽ kórég ag mỹ tóg ví tĩ, Jesus ti, kũ ag tóg sir ki króm tĩ, ti ví ki, ti kamẽg kũ, ti tỹ ag pan kũ. Ti hỹn tỹ ag kri ke nĩ,” he ag tóg mũ sir, Jesus to. ³⁷ Kĩ ti kãme tóg vãnh kar kri rĩm ke kãn mũ sir, ga ên tá.

Jesus tỹ ùn kagyga e ag tỹ há' he

(Mt 8.14-17; Mc 1.29-34)

³⁸ Kĩ Jesus tóg vãnh kanhrãn jafã ên ki kutẽ kũ Simão ìn ra tĩ mũ. Hã ra Simão prũ fi mỹnh fi tóg kaga nỹ nĩ. Rỹ jagy fi nỹ nĩ. Kũ ag tóg Jesus mỹ fi tó mũ. ³⁹ Kĩ tóg fi vãnh tĩ mũ. Fi krĩ tá jẽ kũ tóg fi mỹ: “rỹg mãn tũg nĩ,” he mũ. Kũ fi rỹ ên tóg tũ' he mũ sir. Kũ fi tóg vễymér nĩ nĩ. Ag ki rĩr fi tóg mũ sir, Simão má fi.

⁴⁰ Kĩ tóg sir kutyg mũ, rã tỹ pun ke kũ. Kũ ag tóg ùn kagyga ag tatĩn kãmũ kãn mũ. Kũ tóg ã nĩgẽ tỹ ag mẽ kãn mũ, Jesus ti, kũ ag tóg hághá' he kãn mũ. ⁴¹ Vãnh jagrẽ kórég pan kãn tóg mũ gé, ag to jũ kũ. Ag panh ke to hã ag tóg prër mũ, kũ ag tóg: “Topẽ kósin vỹ tỹ ã nĩ,” he tĩ. Hã ra tóg ag mỹ: “vĩ tũg ra,” he mũ. Ti ki kanhró ag tóg nýtí, ti tỹ tỹ Cristo nĩ ti. Hã kũ tóg ag mỹ: “vĩ tũg ra,” he mũ, Jesus ti.

Jesus tỹ Topẽ ví tó

(Mc 1.35-39)

⁴² Tỹ vaj kũ Jesus tóg tá kutẽ kũ ãmã tũg ja ra tĩ mũ. Kũ vãnh kar ag tóg ti jãvãnh kãn mũ. Hã ra ag tóg ti vég mũ. Ti ve kũ ag tóg ti mỹ: “ãg ré kũ tĩ tũg nĩ,” he mũ. ⁴³ Hã ra tóg ag mỹ: “vó,” he mũ. “Cidade ù ra sóg tũg mũ, sỹ ag mỹ Topẽ ví tó jé gé, Topẽ tỹ tỹ ãg pã'ĩ nĩnh ke ti. Hã jé Topẽ tóg inh mỹ: “ha ag mỹ vãnh ven,” he ja nĩ,” he tóg ag mỹ, Jesus ti. ⁴⁴ Kũ tóg tĩ mũ sir. Ga tỹ Judéia mĩ tóg tĩ mũ. Vãnh kanhrãn jafã krêm tóg ag mỹ Topẽ ví tó tĩ mũ sir, Jesus ti.

5

Jesus tỹ Pedro kanhrãn

(Mt 4.18-22; Mc 1.16-20)

¹ Kejẽn Jesus tóg goj nig tỹ Genesaré fyr tá jẽ nĩ, Topẽ ví kãmén kũ. Kũ vãnh kar vỹ ti pẽnĩn nýtĩ nĩ, kũ ag tóg ti kutãn mũ sir, ag e tãvĩ nýtĩn kũ, ag tỹ Topẽ ví mẽ sór kũ. ² Ag tỹ ti kutãn kũ tóg canoa régre vigvég mũ, nig fyr tá. Pirã kugmĩg tĩ ag vỹ tá kãpa kũ nýtĩ nĩ. Goj kãki jẽgĩg kũ ag tóg pirã kugmĩ jafã kunũnh kũ kupég nýtĩ nĩ. ³ Kũ Jesus tóg canoa kãra rã mũ. Simão tũ vẽ, canoa ên ti. Kũ tóg Simão mỹ: “tũg sĩ han ra, canoa kãmĩ, goj kuju ra,” he mũ. Kũ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kũ tóg ag kanhrãn mũ sir, vãnh kar ên ag, ù tỹ ti kutãn ja ên ag. Goj fyr tá ag tóg nýtĩ.

⁴ Ti tỹ ag kanhrãn kãn kũ tóg Simão mỹ: “goj kuju ra tũg, ti nig ja ra,” he mũ. “Tá ã rede tỹ goj kãki fón, ã tỹ pirã kugmĩ jé,” he tóg. ⁵ Kũ Simão tóg ãg Senhor mỹ: “hã ra ãg tóg kuty tag kã goj ki ti fón', fón' he ja nĩgĩ, fagrĩnh mỹ,” he mũ. “Nén ù kãgmĩg tũ ãg tóg nĩ mỹr,” he tóg. “Hã ra sóg ã vĩ tugrĩn ki fón sór mũ ha,” he tóg, Simão ti. ⁶ Kũ tóg ke mũ sir. Kũ tóg kugmĩ mág mũ. Fór tóg nĩ, rede ti, kũ tóg jaran ke mũ, ti kufy jagy tãvĩ nĩn

kỹ, pirã e tugnĩn. ⁷ Kĩ ag tóg ãjag régre ag mĩ ven mũ, ag tỹ canoa ù kãki kãmũ jé. Ag tỹ tá junjun kũ ag tóg canoa régre ãn fãn mũ, pirã tỹ. Funfór ti nỹtĩ, hã kũ tóg ki punpun ke kren mũ sir, canoa régre ãn ti.

⁸ Kĩ Simão tóg Jesus krẽm grĩnh ke mũ. Ti mĩ tóg e tĩ, pirã e ãn to, kũ tóg Jesus krẽm grĩnh ke mũ. Kũ tóg ti mĩ: “Senhor’,” he mũ. “Ã hỹn inh ré kũ tĩg mũ ha. Topẽ vĩ mranh ja inh nĩgtĩ, kũ inh hỹn ã mĩ kórég nĩ ha,” he tóg, Simão ti, Jesus mĩ. ⁹ Ti mĩ tóg e pẽ tãvĩ tĩ, ti tỹ pirã e ãn ven kũ, ti tỹ Jesus jykre ven kũ. Ti mré ke ag mĩ tóg e tĩ gé, ¹⁰ Tiago mĩ ke gé, João mĩ ke gé, Zebedeu krẽ tag ag mĩ. Simão régre ag vẽ, Zebedeu krẽ tag ag, ti companheiro ag vẽ.

Kĩ Simão tóg Jesus mĩ: “ã hỹn inh ré kũ tĩg mũ ha,” he mũ. Hã ra Jesus tóg ti mĩ: “kamẽg tũg nĩ,” he mũ. “Pirã kugmĩ há ã tóg jẽ. Ã kanhrãn jé sóg ke mũ, ã tỹ ãprã ke ag tỹ inh ki ge han jé,” he tóg, Simão mĩ, Jesus ti.

¹¹ Kĩ ag tóg ãjag canoa vóg mũ, goj fyr ra. Tá junjun kũ ag tóg ãjag tũ kar ré kũ mũ mũ sir, Jesus mré.

Jesus tỹ ùn kaga kren vãnũ tỹ há' he

(Mt 8.1-4; Mc 1.40-45)

¹² Kĩ tóg kejẽn cidade ù tá nĩ nĩ. Kũ ù tóg ti tá jun mũ, ù tỹ vãnũ kaga kren vãnũ han kũ nĩ ti, vãnũ kaga tỹ lepra he mũ ãn. Ti kri tóg rũm ke kãn ja nĩ, vãnũ kaga ti. ãn tóg Jesus tá jun kũ ti krẽm mũg ke mũ, kũ tóg ti mĩ: “Senhor’,” he mũ. “Ã mĩ isỹ há' he sór tũ nĩ?” he tóg. “Ã hã tóg isỹ há' henh mũ, ã tỹ isỹ há' he sór kũ,” he tóg ti mĩ.

¹³ Kĩ Jesus tóg ã nĩgé tỹ ti mẽg mũ, kũ tóg ti mĩ: “hej,” he mũ. “To sóg há nĩ, há' he ja há ã tóg nĩ,” he tóg ti mĩ. Kũ tóg ti kaga kren vãnũ tỹ há' he mũ sir vêsỹmér. Jãnhkri' he tóg mũ, ti fár ti. ¹⁴ Kĩ Jesus tóg ti mĩ ke mũ, ti tỹ ù mĩ tó tũg jé, ti tỹ há' he tag ti. “Ha tĩg,” he tóg. “Topẽ tũ ki rĩr tĩ to tĩg. Ti hã mĩ tómnĩ, kũ ti mĩ nén ù nĩm nĩ, ti tỹ Topẽ mĩ pũn jé, Moisés tỹ vãsỹ ãg mĩ nén tó ja ãn ti, ã jãnhkri to. Hã tugrĩn vãnũ kar vỹ ã tỹ há' he mũ tag ki kanhrãn mũ,” he tóg ti mĩ, Jesus ti.

¹⁵ Ge ra ti kãmẽ tóg vãnũ kar kri rũm ke mũ, kũ ù tỹ hẽn ri ke ag tóg vãnũ mãn mũ sir. Ag tỹ ti vĩ mẽ sór vẽ, ag tỹ ãjag tỹ há' he ãn ve sór vẽ gé. Hã jé ag tóg sir vãnũ mãn mũ.

¹⁶ Hã ra Jesus tóg ãmã tũg ja ra tĩ mũ, Topẽ mré vãmén jé.

Jesus tỹ ùn tĩg vãnũ tỹ há' he

(Mt 9.1-8; Mc 2.1-12)

¹⁷ Kejẽn tóg ag kanhrãn rãn mãn mũ. Kũ Fariseu ù ag tóg ti vĩ mẽgmẽg mũ gé sir, Topẽ vĩ to professor ag mré hã. Kór há tá ag tóg kãmũ ja nĩ, ga tỹ Galiléia tá, ga tỹ Judéia tá ke gé, cidade tỹ Jerusalém tá ke gé. Jesus pẽnĩn ag tóg nĩgnĩ kũ nỹtĩ nĩ. Hã ra Topẽ tóg ti tar han ja nĩ, hã kũ tóg ù tỹ hẽn ri ke ag tỹ há' he mũ, ùn kagyga ag tỹ, Jesus ti.

¹⁸ Kũ vãnũ ù ag tóg tá junjun mũ gé. ù va ag tóg kãmũ jẽg, kur kã, ùn kãnhgrĩ, ùn kónhgrĩ. Ag tỹ Jesus mĩ ti ven sór vẽ, ag tỹ ti krẽm ti fi sór vẽ. ¹⁹ Hã ra tóg fór tãvĩ nĩ, tá, kũ ag tóg ti tá junjun tũ nĩ sir, Jesus tá. Kũ ag tóg ãn to jãpry kũ ti kri ãn kunũg mũ. Ti nor ãn ki ag tóg ti térem mũ, Jesus jẽ ãn kukãm. ²⁰ Kũ Jesus tóg ag tỹ ti ki ge kũ nỹtĩ tag vэг mũ. Hã kũ tóg ùn kãnhgrĩ mĩ: “ã tỹ Topẽ vĩ mranh ja ãn tỹ tũ' he vẽ ha, vỹ,” he mũ.

²¹ Hã ra ti vĩ tag tóg Topẽ vĩ to professor ag mĩ e tĩ, Fariseu ag mĩ ke gé. Kũ ag tóg ti vĩ tag to jykren kónãn mũ. “Ti tỹ ne tó nẽ hỹn'?” he ag tóg mũ. “Topẽ to vĩ kónãn vẽ mỹr, ti vĩ tag to,” he ag tóg. “Topẽ hã ne ã pin kũ Topẽ vĩ mranh ãn tỹ tũg' he há nĩnh mũ', kũ ti tỹ vêsỹ tỹ Topẽ han vẽ sir, ti mĩ vãnũ pãte fón sór kũ,” he ag tóg mũ, to jykren kónãn kũ.

²² Hã ra Jesus tóg ag tỹ nén to jykren mũ vэг mũ. Kũ tóg ag mĩ: “ãjag tỹ ne jé to jykren kónãn nẽ?” he mũ. ²³ “Ne nỹ ãjag mĩ vãnũmỹ nỹ?” he tóg. “Ùn tĩg vãnũ mĩ sóg: “ã tỹ Topẽ vĩ mranh ja ãn tỹ tũ' he vẽ ha,” hé. Kỹn mĩ ãjag mĩ vãnũmỹ?” he tóg. “Sỹ ti mĩ: “nĩ ra, tĩg ra,” henh ke vẽ gé. Kỹn mĩ ãjag mĩ vãnũmỹ ke gé?” he tóg, tag to. ²⁴ “Hã ra sỹ ãjag mĩ inh jykre ven sór vẽ ha. Tỹ sóg ãprã ke fi kósin nĩ. Tá sóg krỹg ke mũ, Topẽ vĩ mranh tỹ vãnũ pãte fón ke tá. Sỹ tá krỹg mũ ven jé sóg ke mũ ãjag mĩ,” he tóg. Hã kũ tóg

ũn kónhgrĩ mĩ: “nĩ ra, ã kur gég tĩg, ã ãn ra,” he mũ, Jesus ti. ²⁵ Kĩ tóg vėsĩmér jěgně mũ sir. ã kur gég tóg mũ vãhã, ag rĩnve. ã ãn ra tóg tĩ mũ, Topě mĩ vĩ há han kĩ, ãn kãnhgrĩ ja ěn ti.

²⁶ Kĩ tóg vėnh kar mĩ e tãvĩ tĩ. Topě mĩ ag tóg vĩ há han mũ gé, ti to: “ěg kãfór ti nĩ,” hen kĩ. “Ge ve ja tũ ěg nĩtĩ, kĩ ěg tĩ ne to jykrén ke tóg tũ tĩ,” he ag tóg mũ sir, Jesus tĩ ãn kãnhgrĩ ja ěn tĩ há' hen kĩ.

Jesus tĩ Levi jé prěr

(Mt 9.9-13; Mc 2.13-17)

²⁷ Kar kĩ Jesus tóg tĩg mãn mũ. Kĩ tóg ũ tĩ governo mĩ jãnkamy mãg tĩ ũ vėg mũ, imposto mãg tĩ ěn ti. Ti jijin hã vỹ: Levi, he mũ. ã rãnhřãj han kĩ tóg nĩ nĩ, ti rãnhřãj jafã krēm, Jesus tĩ ti ve kĩ. Kĩ tóg ti mĩ: “inh mré kãtĩg,” he mũ. ²⁸ Kĩ tóg jěgně mũ sir. Ti mré tóg tĩ mũ sir, ã tũ kar ré kĩ.

²⁹ Kĩ Levi tóg ti mĩ festa mág han mũ, ti ģn tá. Kĩ ti tĩ festa to ãn jé prěr mũ ag vỹ tĩ ũ tĩ ģn ri ke nĩtĩ, festa venh kãmũ mũ ěn ag. Governo mĩ jãnkamy mãg tĩ ũ ag vė, ag mré ke ũ ag mré hã. Jesus mré ag tóg jėg mũ.

³⁰ Kĩ Fariseu ag tóg vėg mũ, Topě vĩ to professor ag ke gé, kĩ tóg ag mĩ kórég tĩ. Kĩ ag tóg ũ tĩ Jesus mré mũ tĩ ag to vĩ mũ gé. Ag mĩ ag tóg: “ãjag hã ne tóg governo mĩ jãnkamy mãg tĩ ag mré jėg mũ’,” he mũ. “Topě vĩ mranh tĩ ag mré ãjag tóg jėg mũ’,” he ag tóg, ũ tĩ Jesus mré mũ tĩ ag mĩ.

³¹ Hã ra Jesus tóg ag mĩ kãmén mũ. “Hỹ, ag mré sóg jėg mũ,” he tóg. “Hã ra ãn kagyga tũ ag vỹ médico venh mũ tũ nĩgtĩ,” he tóg mũ. “Ũn kagyga ag hã vỹ ti venh mũ tĩ,” he tóg. ³² “Inh pi(jé) ũ tĩ vėnh jykre kuryj han mũ ag mĩ: “ãjag jykre tovãnh ra,” he sór tĩ’. ũ tĩ Topě vĩ mranh ja ěn ag hã mĩ sóg: “ãjag jykre kórég tovãnh ra,” he sór tĩ. Hã jé sóg ãjag mĩ vėnh ven,” he tóg, Jesus ti.

Vãkre

(Mt 9.14-17; Mc 2.18-22)

³³ Kĩ Fariseu ag tóg ti mĩ ke mãn mũ. “João mré mũ tĩ ag vỹ vãkre (ka)mě nĩtĩgtĩ, vėjėn ki, kĩ ag tóg Topě mré vĩ (ka)mě han tĩ gé, ag vãkre kĩ. Kĩ Fariseu mré ke ag tóg ge nĩtĩgtĩ gé. Hã ra ã mré mũ tĩ ag tóg ge tũ nĩtĩ. Jėg ag tóg mũgtĩ, kurã kar ki. Vãkre vãnh ag nĩtĩ, ěg vãkre kurã ki,” he ag tóg mũ sir, Jesus mĩ. ³⁴ Kĩ tóg ag mĩ: “hỹ,” he mũ. “Hã ra vėnh prũg tĩ festa to kãmũ ag pi(jé) vãkrég tĩ’,” he tóg. “Festa vė mỹr, vėnh prũg ti, kĩ ti mré ke ag tóg ãn prũg mũ ěn venh kãmũ tĩ. Hã ra sóg tĩ ãn prũg mũ ěn ri ke nĩ, hã kĩ tóg inh mré mũ tĩ ag mĩ sér tĩ,” he tóg. ³⁵ “Vãhã tóg jun mũ, inh kurã ti. ěn kã ag tóg inh pėre mũnh mũ. ěn kã hã ag tóg ãjag vãkrenh ke venh mũ, kurã ěn kã, inh mré mũ tĩ ag,” he tóg, Jesus ti.

³⁶ Kĩ tóg ag mĩ comparação han mũ, kĩ tóg: “inh jykre tãg vỹ ge nỹnh mũ,” he mũ. “ěg pi(jé) ěg kur tãg kókég tĩ’, ěg tĩ ěg kur si jar kã nĩm jé,” he tóg. “Ke tũ nĩ mũ ra ěg tóg ěg kur há ěn kókég mũ, hã ra tóg ěg kur si ěn ki par tũ nĩgtĩ gé, ãn há ti. Kĩ ěg kur tóg kórég kar nĩtĩ nĩ sir,” he tóg. Ti tĩ ã jykre tãg tó vė, hã ra tóg kur tãg ri ke nĩ.

³⁷ Kĩ tóg ag mĩ: “vinho vỹ ge nĩgtĩ gé,” he mũ gé. “ěg pi(jé) vinho kajãg mũ tĩ ti fãr si tĩ sacco ki kujėg tĩ’, vinho tãg ěn ti’. Ke tũ nĩ mũ ra tóg kunãnh kĩ jar mũ. Kĩ vinho ěn tóg tũ’ he mũ, bolsa ke gé sir. ³⁸ Vinho kajãg mũ tĩ ti fãr tãg tĩ bolsa ki kujėn ke vė mỹr,” he tóg. Ti tĩ ã jykre tãg tó vė, hã ra tóg vinho kajãg mũ ri ke nĩ.

³⁹ Kĩ tóg ag mĩ: “ěg pi(jé) vinho si kron kĩ ãn kajãg kron sór tĩ’, ãn tãg ěn ti’,” he mũ gé. “Ti si hã tóg ěg mĩ há nĩ,” he ěg tóg tĩ,” he tóg, Jesus ti. Ti tĩ ã jykre tãg tó vė, hã ra ag jykre si tóg ag mĩ há tĩ, ũ tĩ ti vĩ mẽg mũ ag mĩ.

6

Vėnhkãn ke kurã ki vėnh jykre

(Mt 12.1-8; Mc 2.23-28)

¹ Kejëñ tóg vëñhkán ke kurā tá krýg mũ. Ký Jesus tóg êpý mũ tĩ mũ, trigo jo êpý mũ. Ti mré mũ tĩ ag tóg ti mré mũ mũ. Hã ra ag tóg sir trigo mó êñ tỹ kam ke mũ sir. Ájag nĩgé tỹ ag tóg rynhranh mũ, ag tỹ ti kanẽ ko jé. ² Hã ra Fariseu ù ag tóg ag vég mũ. Ag mũ vëñh rãñhrãj vë, ag tỹ trigo rynhranh mũ ti. Hã ki ag tóg ag mũ Topê vĩ mranh mũ, ag tỹ vëñhkán ke kurā ki rãñhrãj ký. Hã ký ag tóg ag mũ: “ãjag ne tóg nén han ke tũ han mũ nĩ, vëñhkán ke kurā ki,” he mũ. “Vëñh rãñhrãj vë mũr, ãjag tỹ nén han mũ ti,” he ag tóg, Jesus mré mũ tĩ ag mũ.

³ Hã ra Jesus tóg ag mũ: “vó,” he mũ. “Ag kókĩnkĩr vë mũr,” he tóg. “Davi to jykrén nĩ, ti mré mũ tĩ ag to ke gé. Ti kókĩr ký tóg ã tỹ nén han ke tũ han gé, hã ra Topê pi(jé) ti to jũ mũ,” he tóg. ⁴ “Topê jo ãn kã ra tóg rã, Davi ti. Tá tóg Topê jamĩ êñ kó. Ti tỹ konh ke tũ vë vë, Topê tũ ki rĩr tĩ ag hã tỹ konh ke vë vë. Hã ra tóg kó, ã mré mũ tĩ ag mũ tóg vëñh kãpópãm gé, Davi ti. Rán ký tóg nĩ nĩ mũr,” he tóg, Jesus ti. ⁵ Ký tóg ag mũ: “tỹ sóg vëñhkán ke kurā to pã'i nĩ mũr,” he mũ. “Tỹ sóg êprã ke fi kósin nĩ,” he tóg ag mũ, Jesus ti.

Jesus tỹ vëñhkán ke kurā kã ù tỹ há' he

(Mt 12.9-14; Mc 3.1-6)

⁶ Vëñhkán ke kurā ù kã Jesus tóg Israel ag tỹ vëñh kanhrãñ jafã kãra rã mũ, ag kanhrãñ jé. Tá ù tóg jẽ nĩ. Ti nĩgé vỹ tóg ja nĩ. ⁷ Ký Topê vĩ to professor ag tóg Jesus tugnyĩ mũ, Fariseu ag ke gé, ag tỹ ti tỹ há' he mũ êñ ven jé. “Ti mũ ti tỹ há' he sór tũ, tỹ êg vëñhkán ke kurā (hã) ra'?” he ag tóg. “Ti tỹ ti tỹ há' he ký êg tóg ti kãmén mũ, pã'i ag mũ, ti tỹ vëñhkán ke kurā kã rãñhrãj mũ ti,” he ag tóg. Hã ký ag tóg ti tugnyĩ mũ.

⁸ Hã ra Jesus tóg ag tỹ nén to jykrén vég jẽ nĩ. Ký tóg ùn nĩgé tóg êñ mũ: “kunĩg,” he mũ. “Tag kã jëñh nĩ,” he tóg ti mũ. Ký tóg kãtig ký kã jẽ mũ sir. ⁹ Ký tóg ag mũ: “sỹ ãjag ki jëmëñh há tóg tĩ,” he mũ. “Vëñhkán ke kurā ki êg hỹn ne han mũ'?” he tóg, “êg tỹ Topê vĩ ki króm jé?” he tóg. “Êg mũ nén ù há han mũ'? Êg tỹ ù tũ kókén kỹn mũ kórég tũ nỹnh mũ hỹn'?” he tóg. “Êg mũ ù kren han mũ hỹn'? Êg tỹ ù tén kỹn mũ kórég tũ nĩnh mũ hỹn'?” he tóg. Hã ra ag tóg ti mũ nén ù tó tũ nĩ.

¹⁰ Ký tóg ag ki êvãñh kãñ ký ùn nĩgé tóg êñ mũ: “ã nĩgé tỹ krýg hé,” he mũ. Ký tóg tỹ krýg he mũ sir. Ti tỹ tỹ krýg he ký tóg há' he mũ, ti nĩgé tóg êñ ti. ¹¹ Ký tóg vëñh kar mũ e tĩ. Ag fe tóg gym ke mũ, ký ag tóg jagnë mré vëmén mũ. “Êg hỹn ti tỹ hẽ ri kenh mũ hỹn', ti kãgmĩnh mũ vó?” he ag tóg, Jesus to. Hã ra tóg ùn nĩgé tóg êñ tỹ há' he ja nĩ sir.

Jesus tỹ apóstolo ag kuprëg

(Mt 10.1-4; Mc 3.13-19)

¹² Êñ kã Jesus tóg kejëñ pãñóñh ra tĩ mũ, ti tỹ Topê mré vëmén jé. Kuty êñ kã tóg Topê mré vĩ nĩ ki kurãg mũ. ¹³ Tỹ vaj ký tóg ã mré mũ tĩ ag jé prër kãñ mũ, ký tóg ag kãmĩ ù tỹ 12 (ke) êñ ag kuprëg mũ. Ag to tóg: “sỹ ùn vin mũ êñ ag,” he mũ, hã vỹ: apóstolo, he mũ. ¹⁴ Ag hã vë, ha mẽ: Simão, Jesus tỹ ti jyjy ù hã vỹ: Pedro, he mũ, ti jãvy tỹ André ke gé, Tiago ke gé, ti jãvy tỹ João mré, Filipe ke gé, Bartolomeu ke gé, ¹⁵ Mateus ke gé, Tomé ke gé, Tiago ke gé, Alfeu kósin tag ti, Simão ke gé, ag tỹ ù to: Zelote, he mũ tag ti, ¹⁶ Judas ke gé, Tiago kósin tag ti, Judas Iscariotes ke gé, ù tỹ Jesus vatãñh tá pã'i ag mũ ti kãmén ke tag ti.

Jesus tỹ ùn e ag ki rĩr

(Mt 4.23-25)

¹⁷ Ký Jesus tóg ag mré pãñóñh êñ to tere mũ sir, ký tóg kyjer tá jẽ nĩ. Ký ti mré mũ tỹ hën ri ke ag vỹ tá nỹtĩ gé. Û tỹ hën ri ke ag vỹ ti ki junjun ja nĩgtĩ, ga tỹ Judéia tá kãmũ ký, cidade tỹ Jerusalém tá ke gé, goj kafã tũ fyr tá ke gé, hã vỹ: cidade tỹ Tiro, he mũ, cidade tỹ Sidom, he mũ gé. Êñ kar vỹ ti ki junjun ja nĩgtĩ, ti tỹ ag tỹ há' he jé. Ký tóg fór pẽ nĩ, tá, ag tỹ e pẽ tãvĩ nỹtĩn ký. ¹⁸ Ûn jagrë kórég ag tỹ tóg há' he mũ gé, ag jagrë pan tóg mũ, Jesus ti, fag mré hã. ¹⁹ Ký vëñh kar vỹ ti kã krý' he sór mũ sir, hã jé ag tóg ti ki junjun mũ. Ký ù tỹ ti kã krý' he mũ êñ ag vỹ há' he kãñ mũ, ti tỹ ã jykre tar tỹ ag tỹ hághá' hen ký. Hã jé ag tóg vëñh mãñ ja nĩ. Hã ký ag tóg ti pëñĩn e tĩ sir.

Jesus t̄y ag kanhr̄an
(Mt 5.1-12)

²⁰ K̄y tóg ā mré m̄ũ t̄i ag ki ēvānh m̄ũ, k̄y tóg ag m̄y kāmén m̄ũ, Jesus ti, k̄y tóg: “Topē v̄y ājag ve há han m̄ũ, ājag t̄y: “kórég eg tóg n̄yt̄i,” hen k̄y,” he m̄ũ. “K̄y ājag tóg Topē t̄y t̄y ēg p̄ā i n̄i venh ke m̄ũ,” he tóg. ²¹ “Topē v̄y ājag ve há han m̄ũ, ājag t̄y: “inh kók̄ir ri ke tóg t̄i, s̄y v̄enh jykre kuryj ve sór t̄i ēn ti,” hen k̄y. K̄y ājag tóg venh ke m̄ũ,” he tóg. “Topē v̄y ājag ve há han m̄ũ, ājag v̄ēs̄yrénh m̄ũn k̄y, ēpr̄ā. Ājag m̄y sér n̄i jé tóg ke m̄ũ, tá,” he tóg. ²² “Topē v̄y ājag ve há han m̄ũ, ag t̄y ājag to kórég n̄yt̄in k̄y isugn̄in, ag t̄y ājag m̄y: “ha m̄ũ j̄ég,” hen k̄y, isugr̄in. Ag t̄y isugn̄in ājag m̄y v̄i kónān k̄y tóg há t̄i, ag t̄y ón k̄y ājag jykre kórég tó k̄y. T̄y sóg ēpr̄ā ke fi kós̄in n̄i m̄y,” he tóg, Jesus ti. ²³ “M̄y sér n̄yt̄imn̄i, ājag fe t̄y m̄rin kemn̄i, ag t̄y isugr̄in ājag vóg kónān m̄ũ ra. K̄y ājag tóg kanhk̄ā tá n̄én ũ há kar venh ke m̄ũ, v̄enh kaja jé, isugn̄in. Ge ja ag tóg n̄yt̄i ja n̄igt̄i, ũ t̄y ājag vóg m̄ũ ag jóg'jóg ag, v̄ās̄y Topē v̄i tó t̄i ag m̄y. Ag vóg kónān ja ag tóg n̄i gé. V̄ās̄y Topē v̄i tó t̄i ēn ag ri ke ājag tóg n̄yt̄i, ag kr̄ē'kr̄ē t̄y ājag vóg kónān k̄y,” he tóg, Jesus ti.

²⁴ “H̄ā ra Topē v̄y ājag ve kónān m̄ũ, ājag t̄y: “há ēg tóg n̄yt̄i,” hen k̄y. Ga kri m̄ũn k̄y ājag tóg n̄én ũ há v̄ég t̄i, k̄y ājag tóg kanhk̄ā tá jun ke t̄ũ n̄i,” he tóg. ²⁵ “Topē v̄y ājag ve kónān m̄ũ, ājag t̄y v̄enh jykre kuryj ve sór t̄ũ n̄yt̄in k̄y, ti t̄y ājag m̄y ājag kók̄ink̄ir ri ke t̄ũ n̄in k̄y, ēpr̄ā. K̄y ājag tóg venh ke t̄ũ n̄i. K̄y tóg ājag kók̄ink̄ir ri ke t̄inh m̄ũ, tá,” he tóg. “Topē v̄y ājag ve kónān m̄ũ, ti t̄y ājag m̄y sér t̄in k̄y, ēpr̄ā. V̄ēs̄yrénh jé ājag tóg ke m̄ũ, kygf̄y jé ājag tóg ke m̄ũ, tá,” he tóg. ²⁶ “Topē v̄y ājag ve kónān m̄ũ, v̄enh kar t̄y ājag to v̄i há han m̄ũn k̄y. Ājag m̄y ti há t̄i, v̄enh kar t̄y ājag to v̄i há han m̄ũn k̄y, h̄ā ra tóg Topē m̄y kórég n̄i. Ge ja ag tóg n̄yt̄igt̄i, ũ t̄y ājag m̄y v̄i há han m̄ũ ēn jóg'jóg ag, ón k̄y Topē v̄i tó (ka)m̄ē ēn ag m̄y, v̄ās̄y. Ag m̄y ag tóg v̄i há han ja n̄i gé. Ag ri ke ājag tóg n̄yt̄i, ón k̄y Topē v̄i tó (ka)m̄ē ēn ri ke ājag tóg n̄yt̄i, v̄enh kar t̄y ājag m̄y v̄i há han k̄y. H̄ā k̄y tóg ājag ve kónān m̄ũ, Topē ti,” he tóg, Jesus ti, ag m̄y.

Ēg t̄y ēg kato t̄ē m̄ũ ag to há n̄yt̄inh ke
(Mt 5.38-48)

²⁷ “Ājag jyv̄ēn sóg m̄ũ, ājag t̄y inh v̄i j̄ēm̄ēn k̄y, ha m̄ē. ũ t̄y ājag kato v̄ās̄āns̄ān m̄ũ ēn ag to fe n̄yt̄imn̄i jāvo. ũ t̄y ājag to j̄ũ m̄ũ ag m̄y n̄én ũ há han n̄i jāvo. ²⁸ ũ t̄y ājag m̄y v̄i kónān m̄ũ ag m̄y v̄i há han n̄i gé. ũ t̄y ājag m̄y f̄éf̄én m̄ũ ag to Topē mré v̄imn̄i gé. ²⁹ ũ ag t̄y ājag jam̄ē ki t̄ānh k̄y ag m̄y ājag jam̄ē ũ ti ven n̄i gé, ag t̄y ājag m̄y ki t̄ānh jé gé. ũ ag t̄y ājag capa m̄ān sór m̄ũ ēn ag m̄y ājag camisa n̄im n̄i gé. ³⁰ ũ ag t̄y ājag m̄y n̄én ũ to: “inh m̄y n̄im,” he k̄y ag m̄y n̄imn̄i. ũ ag t̄y ājag t̄y n̄én ũ m̄ān k̄y ag m̄y: “inh m̄y is̄ũ n̄im,” he t̄ũg n̄i. ³¹ Ājag t̄y ājag mré ke ũ to: “ti t̄y ēg m̄y tag han há tóg t̄i v̄ē,” he m̄ũ ra ēg h̄ā tóg ti m̄y han ke m̄ũ,” he tóg.

³² “ũ ag tóg ājag to há n̄yt̄i. Ājag t̄y tag ag h̄ā to há n̄yt̄in k̄y tóg t̄y n̄én ũ t̄ũ t̄i ver. V̄enh kar ag v̄y ge n̄yt̄i gé. ũ t̄y ājag to há n̄yt̄i ēn ag to ag tóg há n̄yt̄i gé, v̄enh kato, ũ t̄y Topē v̄i m̄ranh m̄ũ ag v̄y tag han t̄i. Tag v̄y há n̄i, h̄ā ra tóg t̄y n̄én ũ t̄ũ n̄i ver. ³³ ũ ag tóg ājag m̄y v̄i há han t̄i. Ājag t̄y ēn ag h̄ā m̄y v̄i há han k̄y tóg t̄y n̄én ũ t̄ũ n̄i ver. Ge ag tóg n̄yt̄i gé, Topē v̄i m̄ranh t̄i ag. Ājag t̄y ag m̄y v̄i há han k̄y ag tóg ājag m̄y v̄i há han m̄ũ gé, v̄enh kato. Há ti n̄i, h̄ā ra tóg t̄y n̄én ũ t̄ũ n̄i ver. ³⁴ ũ ag v̄y, ājag t̄y ag m̄y prestar hen k̄y ag tóg ājag m̄y n̄im m̄ān m̄ũ, ājag t̄ũ ti. Ājag t̄y ag h̄ā m̄y prestar he m̄ān k̄y tóg t̄y n̄én ũ t̄ũ n̄i ver. Topē v̄i m̄ranh t̄i ag v̄y ge n̄yt̄i gé. Ājag t̄y ag m̄y n̄im m̄ān k̄y ag tóg ājag m̄y prestar he m̄ān m̄ũ sir, ājag t̄ũ ti. Há ti n̄i, h̄ā ra tóg t̄y n̄én ũ t̄ũ n̄i ver.

³⁵ Ag jāvo ũ t̄y ājag kato v̄ās̄āns̄ān m̄ũ ag to há n̄yt̄imn̄i, ha m̄ē. V̄enh kar m̄y v̄i há han k̄ān n̄i. V̄enh kar m̄y prestar he k̄ān n̄i, ag t̄y ājag m̄y ājag t̄ũ n̄im t̄ũ (h̄ā) ra. K̄y ājag tóg kanhk̄ā tá venh ke m̄ũ, ājag t̄y ũri n̄én han m̄ũ tag ri ke ti. H̄ā ki ājag tóg t̄y ũ t̄y kynhm̄y n̄i ēn kr̄ē n̄yt̄i, ājag t̄y ti ri ke han k̄y. Ti h̄ā ne v̄enh kar m̄y v̄i há han k̄ān t̄i ver', ũn jykre kórég kar ag mré h̄ā, ag t̄y ti m̄y: “ēg m̄y tóg há t̄i,” he t̄ũ (h̄ā) ra, ag t̄y v̄enh h̄ā ki r̄ir há

han mũ (hã) ra tóg ag mý vī há han tĩ ver, Topẽ ti. ³⁶ Vẽnh kar jagãgtãn kãn nĩ, ãg jóg ri ke. ãg jóg tỹ vẽnũ kar jagãgtãn kóm vẽnũ kar jagãgtãn nĩ gé,” he tóg, Jesus ti.

Ëg tỹ kãnhmar ù to vī kónãn ke tũ

(Mt 7.1-5)

³⁷ “Kãnhmar ù to vī kónãn tũg nĩ, kỹ Topẽ vỹ ãjag to vī kónãn ke tũ nĩ gé. Kãnhmar ù to: “kórég ti nĩ,” he tũg nĩ, kỹ Topẽ vỹ ãjag to: “kórég ti nĩ,” henh ke tũ nĩ gé. Vẽnũ kar mý vẽnũ pãte fón nĩ, ke tũ nĩ mũ ra Topẽ vỹ ãjag mý vẽnũ pãte fón ke tũ nĩ gé. ³⁸ Ag mý nén ù há kar nĩm nĩ, kỹ Topẽ vỹ ãjag mý nén ù há kar nĩm ke mũ gé sir, hã ra tóg ãjag mý ãn kãfór nĩm ke mũ. ãjag mý nĩm mág han jé tóg ke mũ, Topẽ ti. Nĩm mág pẽ han jé tóg ke mũ, nén ù há kar tỹ. Hỹ, ge ti nĩ. ãjag tỹ ag mý nén ù há han kỹ Topẽ vỹ ãjag mý nén ù há han ke mũ gé. ãjag tỹ ag mý nén ù kórég han kỹ tóg ãjag mý hã ri ke han ke mũ gé,” he tóg, Jesus ti.

³⁹ Kỹ tóg ag mý: “ù tỹ ki kagtĩg ra tỹ ãjag pã'i nỹtĩ sór mũ tag vỹ ge nỹnh mũ, ha mẽ,” he mũ gé. Kỹ tóg: “ũn kyvó tỹ ùn kyvó ù mý: “sỹ ã pére tĩg ke vẽ,” hen kỹ ag tóg ag mũn kỹ kãgnó ki vár kãn ke mũ. Ge ag tóg tĩ, ãjag pã'i ag. ãjag tỹ ùn ki kagtĩg ag mré mũn kỹ ãjag tóg mũ kónãn kãn ke mũ. ⁴⁰ Aluno pi(jé) ã professor kãfór nĩnh mũ'. Ti tỹ kanhrãn há han kỹ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ'. ⁴¹ Jykre kórég mág ãjag tóg nỹtĩ, hã ra ãjag régre jykre pãno sĩ ãn ãjag mý kórég nỹ'. ⁴² Kỹ ãjag hã ne tóg ãjag régre ag mý: “sỹ ã mý ã jykre kórég kurynh há tóg tĩ,” he tĩ', ãjag tỹ ãjag jykre pãno tãvĩ ãn kurynh jãvãnh (hã) ra. Ke tũg ra mýr, ke tũ nĩ mũ ra ãjag tóg jykre régre nỹtĩ. ãjag jykre kurynh vén nĩ, kar ãjag tóg ãjag régre ag jykre kurynh há han mũ,” he tóg, Jesus ti.

Ka to comparação

(Mt 7.16-20; 12.33-35)

⁴³ “Ha vé, ka há pi(jé) kanẽ kórég han tĩ'. Kỹ ka kórég pi(jé) kanẽ há han tĩ gé'. ⁴⁴ Ëg tỹ ti kanẽ ve kỹ ãg tóg: “ũn kanẽ ko há ja vẽ,” henh ke mũ, ke tũ nĩn kỹ ãg tóg: “ũn kanẽ ko vãnh ja vẽ,” henh ke mũ. Sónh to ãg tóg pẽnva vég tũ nĩgtĩ mýr', kar ãg tóg vãnh tỹ jóhó to uva vég tũ nĩgtĩ gé, ha mẽ. ⁴⁵ Ge tóg nỹgtĩ, ãprã ke ag jykre ti. ùn jykre há vỹ nén ù há kar to jykren tĩ, ti jykre kuryj nĩn kỹ. Kỹ tóg ãg mý tó há han tĩ gé sir. Kỹ ùn jykre kórég vỹ ù kórég kar to jykren tĩ, ti jykre pãno nĩn kỹ. Kỹ tóg ãg mý tó kónãn tĩ gé sir. Hỹ, ge ti nỹgtĩ. Ëg tỹ nén to jykren tĩ ãn kãmén ãg tóg tĩ mýr,” he tóg, Jesus ti.

Ïn to comparação

(Mt 7.24-27)

⁴⁶ “ãjag ne tóg inh mý: “Senhor', Senhor',” he tĩ'. Hã ra ãjag tóg isỹ ãjag mý nén tó mũ ãn han vãnh nỹtĩgtĩ. Kỹ tóg vẽnũmỹ nỹ. ⁴⁷ Inh ki ge kỹ ãjag nỹtĩ. Inh vĩ ki kanhró ãjag tóg nỹtĩ. ãjag tỹ ki króm kỹ ãjag tóg sir tag ri ke nỹtĩnh mũ, ha mẽ. ⁴⁸ Ïn han mũ ri ke vẽ. ù tóg, ti tỹ Ïn han jé tóg kũm tĩ, kã há tá. Kũm kỹ tóg pãró kri Ïn han mũ sir, pãró kri tóg ti nũna gunhgunh mũ sir. Kỹ vãhã goj tóg var mũ, kỹ tóg Ïn kri rũm ke mũ, goj var ti. Hã ra Ïn tóg jẽ nĩ. Ti kókég tũ tóg nĩ, goj var ti. Ti tỹ pãró kri jẽ hã kỹ tóg tar jẽ. Ge ti nĩ, ãjag tỹ inh vĩ ki króm kỹ. ⁴⁹ ãjag tỹ inh vĩ ki króm tũ nĩn kỹ ãjag tóg sir tag ri ke nỹtĩnh mũ, ha mẽ. ù tóg Ïn han mũ gé, hã ra tóg jo kũm tũ nĩ, ti nũna vỹ jãvo krĩgmỹ nỹtĩ. Kỹ vãhã goj var vỹ Ïn kri rũm ke mũ sir, kỹ tóg kutẽ mũ sir, Ïn ti. Kỹ tóg mráj mũ sir, ha mẽ, ti nũna tỹ krĩgmỹ nỹtĩn kỹ. Ge ti nĩ, ù tỹ inh vĩ jẽmẽ jãvãnh ãn ti,” he tóg, Jesus ti.

7

Fóg tỹ capitão tỹ Jesus ki rã

(Mt 8.5-13)

¹ Jesus tỹ ag kar kanhrãn kãn kar tóg cidade tỹ Cafarnaum ra tĩ mũ. ² Tá fóg tỹ capitão tóg nĩ nĩ. Ti camarada tóg kaga nỹ nĩ. Vẽnũmỹ tóg nỹ, kỹ capitão tóg: “ti hỹn ter mũ ha,” he mũ. Hã ra tóg ti mý ti fe ri ke nĩ, ti camarada ti, capitão ãn mý. ³ Hã kỹ tóg Jesus

kāme mẽ kŷ Israel kófa ag jëgnëg mũ, Jesus to, ag tŷ ti mŷ: “ti venh kătŷg,” he jé. Jesus tŷ ti camarada tŷ há' he jé tóg ti mŷ vënh vŷ jënëg mũ, fóg tŷ capitão ên ti. ⁴ Kŷ ag tóg Jesus tá junjun mũ, Israel kófa ên ag. Kŷ ag tóg Jesus mŷ tó mũ. “Ă mŷ ti venh tŷg ke tũ nŷ?” he ag tóg mũ, Jesus mŷ. “Ūn há vë. ⁵ Ęg povo to tóg há tãvŷ nŷ, ti tŷ tŷ fóg (hã) ra. Ęg mŷ tóg ĩn han ja nŷ, ěg tŷ krêm Topë vŷ tó jafã ti, ti tŷ tŷ fóg (hã) ra,” he ag tóg mũ, Jesus mŷ, fóg tŷ capitão ên to.

⁶ Kŷ Jesus tóg: “hej,” he mũ. Kŷ tóg ag mré tŷ mũ. Kŷ tóg ti ĩn kakó ki jun mũ. Kŷ capitão tóg ti mŷ vënh vŷ jënë măn mũ gé. Ă mré ke ag jëgnëg tóg mũ, Jesus to. Kŷ ag tóg ti mŷ: “Senhor!,” he mũ. “Ti venh kārānh ke tũ ģ něji nŷ, ti tŷ tŷ fóg nŷn kŷ,” he ag tóg. “Ă mŷn hŷn jagy nŷ, ģ tŷ fóg ĩn kākŷi sãn ken kŷ, Judeu ag tŷ fóg ĩn sãn jãvānh nŷtŷn kŷ,” he ag tóg. ⁷ “Hã kŷ ti něji ģ venh kătŷg tũ nŷ gé, hã ra tóg ģ mŷ vënh vŷ jënëg mũ. Ă vŷ pir ki ti camarada něji há' henh mũ, ģ tŷ ģ vŷ tŷ ti tŷ há' henh há nŷn kŷ,” he ag tóg. ⁸ “Ha vé, tŷn ji pã'i krêm ke nŷ gé, kŷ soldado ag něji tŷ ti krêm ke nŷtŷ gé. Hã kŷn ji tóg pã'i jykre ki kanhró nŷ. Ti tŷ soldado ũ mŷ: “kutŷg,” hen kŷn ji tŷ mũ, ti tŷ ti mŷ: “kunŷg,” hen kŷn ji kătŷ mũ gé. Ti tŷ ģ camarada mŷ: “tag han ra,” hen kŷn ji han mũ. Ti vŷ tŷn ji ag jëgnëg tŷ. Hã kŷn ji ki kanhró nŷ. Ă vŷ tŷ ģ něji ti camarada tŷ há' he há nŷ,” he ag tóg mũ, Jesus mŷ, capitão mré ke ag.

⁹ Kŷ tóg Jesus mŷ e tŷ, ti vŷ tag ti. Kŷ tóg ģ mré mũ tŷ ag mŷ ke mũ, ũn a ag mŷ, ti nón kãmũ ěn ag mŷ. Kŷ tóg ag mŷ: “Israel ũ pi(jé) ti ri ke nŷ', ti tŷ tŷ fóg (hã) ra',” he mũ. “Ki kanhró tóg nŷ mŷr, kŷ tóg ĩnh ki rã kŷ jě. Ge ve ja tũ sóg nŷ. Há' he kŷ ti nŷ ha, ti camarada ti,” he tóg, Jesus ti.

¹⁰ Kŷ ag tóg vŷnvŷn ke mũ, capitão ĩn ra, capitão tŷ ũn jëgnëg mũ ag. Hã ra ti camarada ěn tóg há' he ja nŷ sir, ag tŷ tá junjun mũ ra.

Jesus tŷ ũn ter mũ rŷn măn

¹¹ Kānhmar Jesus tóg tŷ mũ gé sir, ěn ki. Kŷ tóg cidade tŷ Naim ra tŷ mũ. Ti mré mũ tŷ ag tóg ti mré mũ mũ, ũn e a g ke gé. Ti nón ag tóg mũ mũ. ¹² Kŷ tóg cidade ěn fyr ki jun mũ, cidade to ró jänkã ki. Kŷ ag tóg věser va kãmũ nŷ, ha mẽ. Ti mŷnh fi kósin pir vě mŷr. TI panh tóg ter ja nŷ. Kŷ ũ tŷ hěn ri ke fag vŷ fi mré mũ nŷ, cidade tá kãmũn kŷ. ag tŷ ti péjunh mũ vě, věnh kej tá.

¹³ Kŷ Jesus tóg fi věg mũ, kŷ fi tóg ti mŷ jagtar nŷ. Kŷ tóg fi mŷ: “fŷ tũg nŷ,” he mũ. ¹⁴ Kŷ tóg věser venh tŷ mũ, kŷ tóg tá jun kŷ ti měg mũ. Kŷ ũ tŷ ti va mũ ěn ag vŷ krŷg'krŷg' he mũ. Kŷ Jesus tóg věser mŷ: “kŷrũ',” he mũ. “Nŷ ra, he sóg mũ ģ mŷ,” he tóg mũ, věser mŷ, Jesus ti. ¹⁵ Kŷ tóg nŷ mũ (mŷr) sir, ha mẽ, věser ěn ti, kŷ tóg vŷ mũ sir, ũn ter ja ěn ti. Kŷ Jesus tóg ti mŷnh fi mŷ ti fěg mũ.

¹⁶ Kŷ tóg věnh kar mŷ e tŷ, kŷ ag tóg Topë to vŷ há han mũ sir. “Topë vŷ tó tŷ kãfór vŷ ěg ki jun,” he ag tóg mũ, “Topë vŷ ěg ve há han, hã kŷ tóg ti jěně,” he ag tóg mũ, Jesus to. ¹⁷ Kŷ ti věme tóg věnh kar kri rũm ke mũ sir, ga tŷ Juděia kar tá, ga kar ěn kãmŷ ke gé, Jesus tŷ ũn ter ja ěn rŷn măn ja ti.

*João Batista tŷ Jesus mŷ věnh vŷ jěně
(Mt 11.2-19)*

¹⁸ Ęn kã João vŷ se kŷ jě nŷ, João Batista ti, ũ tŷ ag kygpég tŷ ti. Kŷ João mré mũ tŷ ag tóg ti mŷ tó kãn mũ sir, Jesus tŷ něn han mũ ti. ¹⁹ Kŷ tóg ti mŷ e tŷ. Kŷ tóg Jesus to: “Topë tŷ ũn jěněg mũ hã mŷ vŷ?” he mũ. Hã kŷ tóg ģ mré mũ tŷ régre ag jëgnëg mũ, ag tŷ Jesus venh mũ jé, ag tŷ ti ki jěmě jé, ti mŷ: “ģ hã mŷ'?” he jé. “Ęg tŷ ũn jãvānh mũ mŷ tŷ ģ nŷ? Topë tŷ ũn jěněg mũ hã mŷ tŷ ģ nŷ? Ęg mŷ ũ jãvānh măn ke tũ nŷ ha', ģ pãte?” he sóg ag tóg mũ, Jesus mŷ.

²⁰ Kŷ ag tóg Jesus tá junjun mũ. Kŷ ag tóg ti mŷ: “João Batista vŷ ěg jěgně, ěg tŷ ģ ki jěmě jé,” he mũ. “Ă hã mŷ'? he tóg. Ęg tŷ ũn jãvānh mũ ěn hã mŷ tŷ ģ nŷ? Ęg mŷ ũ jãvānh măn ke tũ nŷ ha', ģ pãte? he tóg, João ti, ģ mŷ,” he ag tóg mũ, Jesus mŷ.

²¹ Hã ra Jesus tóg ũn kaga ag tŷ há' he mũ, ag tŷ ti mré vŷnh kãmũ kŷ. Věnh jagrě kórěg pan tóg mũ gé, kurã ěn kã. Ūn kyvó ag tŷ há' he tóg mũ gé, ag kaně tŷ. ²² Kŷ tóg João mré

mũ ti ag mÿ: “Ha João mÿ tag tómnĩ, ha mẽ,” he mũ. “Ājag tÿ nén vég mũ ta g tómnĩ, ājag tÿ nén mẽg mũ ti ke gé,” he tóg. “Tag han inh tĩ, ha mẽ: ùn kyvó ag vÿ isugrĩn ěvãnh há nÿtĩ ha. Ûn kãnhgrĩ ag vÿ mũ há han mũ ha, ùn kónhgrĩ ěn ag. Û tÿ vĕnh kaga kren vãnh han mũ ag krenkren han inh tĩ, ù tÿ lepra han mũ ag. Ûn kutu ag vÿ ěmĕ há nÿtĩ ha. Ûn kãgter mũ ag vÿ rĩnrĩr mãn gé. Ûn jagãgtar e ag vÿ Topĕ vĩ sér mẽg mũ ha ke gé, Topĕ tÿ tÿ ěg pã'i nĩnh ke to. ²³ Kÿ tóg ti tÿ iso jykrén kónãn tũ nĩn kÿ há' he mũ. Kÿ Topĕ tóg ti ve há han mũ sir. Tag tómnĩ, João mÿ,” he tóg, Jesus ti. ²⁴ Kÿ João tÿ ùn jĕgnĕg mũ ag tóg mũ mũ sir, João mÿ tó jé, mÿr, ha mẽ.

João tÿ ùn jĕgnĕg mũ ěn ag mũ kar kÿ Jesus tóg ùn e ěn ag kanhrãn mũ sir, kÿ tóg ag mÿ João kãmén mũ. “Ēmã tũ ja ra ājag tóg mũ ja nĩgtĩ, João ve jé,” he tóg. “Kÿ ti jykre hÿn ne ri ke nĩ, ājag mÿ? Kejĕn kãka tóg goj jagma krã tÿ man man ke tĩ. João jykre mÿ ājag mÿ tag ri ke tũ nĩ? Hÿ, ri ke tũ ti nĩ. ²⁵ Kÿ ti jykre hÿn ne ri ke nĩ ājag mÿ? Ti mÿ ājag mÿ ùn kur sĩnvĩ ag jykre ri ke nĩ? Vó. Ûn kur sĩnvĩ ag vÿ cidade mág tá nÿtĩ, pã'i mág ĩn krĕm, ùn jĕn mág mũ ag. Ag pi(jé) ěmã tũg ja mĩ mũ tĩ'. ²⁶ Kÿ ti jykre hÿn ne ri ke nĩ ājag mÿ? Ti jykre mÿ ājag mÿ Topĕ vĩ tó tĩ ag jykre ri ke nĩ? Hÿ, ri ke ti nĩ. Topĕ vĩ tó tĩ vĕ mÿr, hã ra tóg Topĕ vĩ tó tĩ ag kãfór kar nĩ, João ti. ²⁷ Topĕ vÿ João jĕnĕ, ti tÿ ijo tĩg jé. Hã kÿ tag tóg ti to rán kÿ nĩ, Topĕ vĩ ki, ha mẽ. “Ha vé, ã jo sóg ù jĕnĕnh mũ, ti tÿ vĕnh kar tÿ há' he jé, ã tĩg ken jo. Ag jyvĕn jé tóg ke mũ, kÿ tóg ěpry kure ri ke nĩ, ěmĩn kuryñh ri ke,” he tóg, Topĕ vĩ tÿ rán kÿ nĩ ki, João to, ti tÿ ijo tĩg ke tag to,” he tóg, Jesus ti, ag mÿ. ²⁸ “Ki hã sóg tó mũ, hã kÿ sóg ke mũ, ha mũ. Ēprã ke ag kãfór kar ti nĩ, João ti, Topĕ vĩ tón ki. Û tÿ ga kri mũ kãfór kar ti nĩ. Hã ra ù tÿ hĕn ri ke ag tóg Topĕ tÿ tÿ ěg pã'i nĩ venh ke mũ mÿr. Ag tÿ venh ke mũ (hã) ra ag tóg kãsir nÿtĩ. Kÿ ùn kãsir ěn ag tÿ ěgno pĕ ěn tóg João mág kãfór nĩnh mũ hã ra,” he tóg, Jesus ti, João to.

²⁹ “Jo João vĩ mẽg mũ e ěn ag tóg João vĩ mẽ há han ja nĩgtĩ, hã kÿ ag tóg Topĕ vĩ tag ti to: “ki hã ã tóg tó mũ,” he ja nĩgtĩ, João tÿ ag mÿ nén tó ja to. Hã kÿ tóg ag kygpe ja nĩgtĩ, João ti, ù tÿ governo mÿ imposto tÿ jãnkamy mág tĩ ag mré hã. ³⁰ Hã ra Fariseu ag tóg João vĩ jĕmĕ jãvãnh ja nÿtĩgtĩ, Topĕ vĩ to professor ag ke gé. Hã kÿ ag tóg Topĕ tÿ ag mÿ nén han sór mũ ěn tÿ ti mÿ nenh ja nĩgtĩ gé. Hã kÿ João tóg ag kygpe ja tũ nĩgtĩ gé,” he tóg, Jesus ti.

³¹ “Uri ke ag vÿ ge nÿtĩ gé, ha mẽ. ³² Gĩr ag ri ke ag tóg nÿtĩ. Gĩr ag vÿ jagnĕ mré kanhinnhir mũgtĩ. Kÿ ag tóg ājag mré ke ag jé prĕr tĩgtĩ, ag mré kanhinnhir jé. Kÿ ag tóg kejĕn jũ tĩ. “Ājag mÿ ěg tóg vãkyn, kanhinnhir kÿ, hã ra ājag ne tóg vĕnh gringrén jãvãnh nÿtĩ,” he ag tóg tĩ, gĩr ag, jagnĕ mÿ. “Ājag tÿ vĕnh gringrén jãvãnh nÿtĩn kÿ ěg tóg ón kÿ vĕsÿrĕnh mũ sir, ěg kanhinnhir kÿ, hã ra ājag ne tóg ěg mré fÿ jãvãnh nÿtĩgtĩ gé,” he ag tóg tĩ gé, ón kÿ jagnĕ to jũ kÿ, gĩr ag. ³³ Gĩr tag ag ri ke ājag tóg nÿtĩ, João to, iso ke gé,” he tóg, Jesus ti. “João vÿ vãkre ja nĩgtĩ, jĕn mág tũ, kron tũ. Kÿ ājag tóg ti to: “jagrĕ kórĕg tóg nĩ,” he ja nĩgtĩ, ti vãkre to. ³⁴ Ti jãvo sóg vãkrĕg tũ nĩgtĩ. Jĕg sóg nĩgtĩ, kron sóg nĩgtĩ. Kÿ ājag tóg iso: “ti hã ne jĕn mág tĩ,” he tĩ. “Ti hã ne kronkron tĩ, ti hã ne governo mÿ imposto tÿ jãnkamy mág tĩ ag to há nĩ, ti hã ne Topĕ vĩ mranh tĩ ag to há nĩ,” he ājag tóg tĩ iso, ěprã ke fi kósin to. Kÿ João jykre tóg ājag mÿ kórĕg nĩ, ti vãkre to, jãvo ĩnh jykre tóg ājag mÿ kórĕg nĩ gé, ĩnh vãkrĕg tũ to. ³⁵ Hã ra ěg tÿ ù jykre tugnÿm kÿ ěg tóg ti jykre há ěn ki kanhró nÿtĩ sir. Kÿ tóg tÿ Topĕ krĕ nĩ sir, kÿ ěg tóg ti ki Topĕ jykre ki kanhró nÿtĩ sir, ti jykre há ěn tugrĩn,” he tóg, Jesus ti. Ti tÿ ag mÿ João kãmén hã vĕ.

Jesus tÿ Simão ĩn krĕm jĕg

³⁶ Kejĕn Fariseu ù tóg Jesus mÿ tó mũ, ti tÿ ti mré jĕn jé. Kÿ tóg tĩ mũ, Fariseu ěn ĩn ra. Tá tóg ti mré jĕg mũ sir.

³⁷ Ti tÿ mré jĕg nĩ ra ù fi tóg ti ki jun mũ, cidade tá ke ù fi. Hã ra fi tóg mén ja e nĩ, Topĕ vĩ mranh kÿ. Jesus tÿ Fariseu ěn ĩn krĕm jĕ mẽg fi tóg mũ, hã kÿ fi tóg garrafa va kãtĩ mũ. Garrafa kãki tóg ěg tãg jafã nĩ, nén ger há tÿ. Pó kupri tÿ tóg han kÿ nĩ nĩ, garrafa ěn, pó tãnjã tÿ. ³⁸ Ēn va kãtĩg kÿ fi tóg ti pĕn to jĕ nĩ sir. Hã ra Jesus tóg cama kri nÿ kÿ jĕg mũ. Ag jykre vĕ, ag tÿ nÿ kÿ jĕn ke mũ ěn ti. Kÿ fi tóg ti pĕn to jĕ kÿ fÿ mũ. Fi tÿ Topĕ vĩ

mranh ja ěn tugrĩn fi tóg fy mũ. Kĩ fi tóg ã kanẽ var tỹ ti pẽn kupég mũ, kỹ fi tóg ã gãnh tỹ ti pẽn kykũg mũ gé. Ti pẽn ki nhun ke fi tóg mũ gé. Kỹ fi tóg ti pẽn tãg mũ sir, garrafa ki jẽ ěn tỹ.

³⁹ Kỹ Fariseu ěn tóg vég mũ, ù tỹ Jesus mỹ: “inh mré jẽn kãtĩg,” he ja ěn ti. Kỹ tóg to jykrén mũ, ùn tỹtã fi to, Jesus to ke gé. “Ti tỹ tỹ Topẽ vĩ tó tĩ nĩ ra tóg fi ki kanhró nĩnh mũ vễ,” he tóg. “Hã ra tóg ki kagtĩg nĩ ve nĩ. Ûn mén ja e fi vễ mỹr, Topẽ vĩ mranh fi tóg tĩgtĩ mỹr, hã ra tóg fi tỹ ã pẽn mẽ ěn kamẽg tũ nĩ, Jesus i,” he tóg, to jykrén kỹ, Fariseu ěn ti.

⁴⁰ Hã ra Jesus tóg ki kanhró nĩ. Kỹ tóg ti mỹ: “Simão’,” he mũ. “Sỹ ã mré vēmén ke vễ,” he tóg. Kỹ tóg ti mỹ: “ha tóg,” he mũ sir, Jesus mỹ. ⁴¹ Kỹ tóg: “kejẽn patrão ù tóg nĩgtĩ,” he mũ. “Ti camarada régre ag tóg ti mỹ név(e) nỹtĩ. Ûn név(e) ěn vỹ tỹ 500 (ke) nĩ, kar ùn név(e) vỹ tỹ 50 (ke) nĩ gé. ⁴² Hã ra ag tỹ ne tỹ kajãm ke tóg tũ tĩ, kỹ tóg ag mỹ tỹ tũg’ he mũ, ag név(e) tỹ, ag patrão ti. Kỹ ti camarada tỹ hẽ nỹ hỹn ti to há kãfór nĩ?” he tóg, Jesus ti, ti tỹ Simão ki jēmẽn kỹ.

⁴³ Kỹ Simão tóg ti mỹ: “ùn név(e) mág ja ěn hỹn tóg ti to há kãfór nĩ,” he mũ. Kỹ Jesus tóg ti mỹ: “ki hã ã tóg tó mũ,” he mũ. ⁴⁴ Kỹ tóg fi jé vĩrĩn ke mũ sir, ùn tỹtã kórég ěn fi jé, kỹ tóg Simão mỹ: “ã mỹ fi vég mũ?” he mũ. “Ã kanẽ var tỹ fi tóg inh pẽn kugpég mũ, kar fi tóg ã gãnh tỹ inh pẽn kykũg mũ gé,” he tóg. “Fi jãvó ã tóg inh mỹ goj ven tũ nĩ, isỹ inh pẽn kugpe jé, sỹ ã ĩn kãra rã kỹ,” he tóg. ⁴⁵ “Inh ki nhun ke ja tũ ã tóg nĩ, ã jãvo fi tóg inh pẽn ki nhun ke mũ, to fi krónh ke tũ nĩ jãvo,” he tóg. ⁴⁶ “Ã pi(jé) inh gãnh tãg ja nĩ’, ã jãvo fi tóg inh pẽn tãg,” he tóg. ⁴⁷ “Hã kỹ sóg ã mỹ tó mũ. Topẽ vĩ mranh tỹ hẽn ri ke han fi tóg. Hã ra tóg fi mỹ vẽn pãte fón kãn mũ sir, Topẽ ti, fi tỹ iso há tãvĩ nĩn kỹ, sỹ tỹ fi fe nĩn kỹ. Û mỹ tóg kejẽn vẽn pãte fón pir han tĩ, Topẽ ti, ù tỹ patrão ki név(e) sĩ ěn ri ke mỹ. Kỹ ěn tóg ti to há sĩ nĩ gé sir, fi tỹ iso há tãvĩ jãvo,” he tóg. ⁴⁸ Kỹ tóg fi mỹ: “ã tỹ Topẽ vĩ mranh ja ěn tỹ sóg vẽn pãte fón mũ,” he mũ, Jesus ti.

⁴⁹ Kỹ ti mré jẽg mũ ag tóg to jykrén mũ sir, ti vĩ to. Kỹ ag tóg jagnẽ mỹ ke mũ. “Ti hã mỹ ěg tỹ Topẽ vĩ mranh kỹ vẽn pãte fón ke mũ vỹ?” he ag tóg mũ. “Topẽ hã ne vẽn pãte fón há nĩ’, hã kỹ tóg ěg mỹ vẽn mỹ tĩ,” he ag tóg. ⁵⁰ Hã ra Jesus tóg fi mỹ ke mãn mũ. “Ã tỹ inh ki rã kỹ sóg ã kren han mũ,” he tóg. “Ha jatun mỹ tĩg,” he tóg, Jesus ti, ùn tỹtã kórég ja ěn fi mỹ.

8

Ûn tỹtã fag tỹ Jesus ki rĩr

¹ Tag pãte Jesus vỹ cidade kar mĩ tĩg kãn mũ, ěmã kãsir mĩ ke gé. Topẽ vĩ tó tóg tĩ mũ. Ag mỹ tóg: “Topẽ tỹ tỹ ãjag pã’i nĩ sór vễ,” he mũ. Kỹ ù tỹ 12 (ke) ag tóg ti mré mũ mũ. ² Kỹ ùn tỹtã fag tóg ti mré mũ mũ gé sir. Jesus tóg fag tỹ há’ he ja nĩ. Û fag tóg kaga ja nỹtĩgtĩ, kỹ ù fag tóg jagrẽ kórég ja nỹtĩgtĩ gé. Hã ra Jesus tóg fag tỹ hághá’ he kãn ja nĩ. Û fi vỹ tỹ Maria fi nĩ, Madalena he mũ tag fi. Jesus vỹ fi jagrẽ kórég pan ja nĩ, ù tỹ 7 (ke) vễ, ha mẽ, fi jagrẽ kórég ag. ³ Kar ù fi vỹ tỹ Joana fi nĩ gé, Cuza prũ fi vễ, pã’i mág tỹ Herodes tũ vég nĩ ěn prũ fi vễ. Kar ù fi vỹ tỹ Suzana fi nĩ gé. Kar ù fag vỹ ti mré mũ mũ gé, ti mỹ vẽn han jé. ãjag tũ tỹ fag tóg ti mỹ vẽn han tĩ, kar ti mré mũ tĩ ag mré hã.

Nén fy to comparação

(Mt 13.1-9; Mc 4.1-9)

⁴ Kejẽn ùn e ag vỹ vẽn mãn mũ sir, ěmã tỹ hẽn ri ke tá kãmũ kỹ. Jesus to ag tóg vẽn mãn mũ. Kỹ tóg ag kanhrãnrãn kỹ ag mỹ: “ù tỹ Topẽ vĩ tó tĩ vỹ ge nỹnh mũ, ha mẽ,” he mũ. ⁵ “Kejẽn ù tóg trigo fy vãvãm tĩ mũ. Ti tỹ vãvãm kỹ ti fy ù tóg ěpry kri, ěmĩn kri vãr mũ, kỹ ag tóg ti sãn mũ, kỹ sēsĩ ag vỹ ko mũ gé sir, jēsĩ tóg tỹ tũg’ ke mũ sir. ⁶ Ti fy ù tóg pãró kri vãr mũ. Kỹ tóg mur mũ vễ, hã ra tóg tóg mũ sir. Ga tỹ sĩ nĩn kỹ tóg goj ve ja tũ nĩ, hã kỹ tóg tóg mũ sir. ⁷ Ti fy ù tóg sónh kãki vãr mũ. Kỹ sónh tóg ti mré mur mũ, ti kri tóg rũm ke mũ sir. Kỹ tóg ter mũ sir, sónh kãki. ⁸ Ti fy ù tóg ga há kri vãr mũ. Kỹ tóg mur

há han mũ, kanẽ há ke gé. Kanẽ tỹ 100 (ke) han tóg mũ sir, ga há kri,” he tóg, Jesus ti. Kỹ tóg tag tó kar kỹ prẽr mũ. “!..Û nĩgrẽg nỹtĩ ag tỹ ki ãmẽn jé..!” he tóg, prẽr kỹ, Jesus ti.

Jesus tỹ nén fy to comparação kãmén

(Mt 13.10-23; Mc 4.10-20)

⁹ Kỹ ti mré mũ tĩ ag tóg ti ki jẽmẽg mũ. “Ne to ke nẽ, trigo fy kãme tag ti?” he ag tóg mũ, Jesus mỹ. ¹⁰ Kỹ tóg ag mỹ: “ãjag hã mỹ sóg Topẽ tỹ tỹ ãg pã'i nĩ ãn kãmén há han ke mũ, ijo tó ja tũ ãn ti,” he mũ. “Hã ra sóg ù ag mỹ comparação tãvĩ han mũ. Ag mỹ sóg tó há han ke tũ nĩ, ù tỹ ón kỹ mẽg mũ ag mỹ, kỹ ag tóg ãjag tỹ vég mũ ra ki kagtĩg nỹtĩ, ãjag tỹ mẽg mũ ra ag tóg to jykrén tũ nỹtĩ, kỹ tóg ag tỹ to jykrén ke tũ tĩ,” he tóg.

¹¹ Kỹ tóg ag mỹ kãmén mũ. “Nén fy kãme vỹ ge nỹnh mũ, ha mẽ,” he tóg. “Topẽ vĩ vỹ trigo fy ri ke nĩ. ¹² Û ag tóg Topẽ vĩ jẽmẽg tĩ. Jẽmẽ kar kỹ Japo tóg ag mỹ tỹ tũg' he tĩ, Topẽ vĩ tỹ. Kỹ ag tóg sir ti ki ge tũ nĩgtĩ, krenkren ke tũ ag nĩgtĩ sir. Kỹ tóg ãpry ãn, ãmĩn kri vár mũ ãn ri ke nĩ, ãn ti. ¹³ Kar ù ag tóg pãró kri vár mũ ãn ri ke nỹtĩ gé. Mẽg ag tóg tĩ vẽ, Topẽ vĩ ti. Kỹ ag tóg: “hej,” he mũ. Ag mỹ tóg sér tĩ sir. Hã ra ag tóg tỹ nén kré jãre tũ ri ke nỹtĩ mỹr, ha mẽ. Mũ sĩ han ag tóg mũ, Topẽ mré. Nén ù jagy kutẽ kỹ ag tóg Topẽ tovãnh mũ sir, ag tỹ Topẽ vĩ mranh sór kỹ. ¹⁴ Kar ti tỹ sónh kãki vár mũ vỹ ge nỹtĩgtĩ gé. Topẽ vĩ mẽg ag tóg tĩ gé. Hã ra ag tóg mũ mũ sir, ãjag rãnhraj nón. Ón kỹ ag tóg rico nỹtĩ sór mũ, ãjag rãnhraj to. Hã to ag tóg krĩ kufy nỹtĩ. Nén kar to éen ag tóg tĩ, kỹ tag hã ne ag mỹ há tĩ'. Hã kỹ ag tóg Topẽ vĩ to jykrén mãn tũ nĩgtĩ sir. Hã kỹ ag tóg kanẽ há han tũ nĩ gé sir. ¹⁵ Kar ga há kri vár mũ vỹ ge nĩ gé. Jẽmẽg ag tóg tĩ gé, Topẽ vĩ ti. Kỹ ag tóg ãjag fe tỹ ti ki rãg mũ sir, ag tỹ ti vĩ ki króm jé. Kỹ ag tóg kanẽ há han mũ sir. Komẽr hã ag tóg kanẽ há han', han', he mũ, ag tỹ nén ù jagy vég mũ ra,” he tóg. Ti tỹ ag mỹ ãg tỹ Topẽ tovãnh ke tũ kãmén hã vỹ, Jesus ti.

Lampião to comparação

(Mc 4.21-25)

¹⁶ Kỹ tóg ag mỹ: ãg tỹ lampião grug kỹ ãg pi(jé) kěj krẽm fẽg tĩ’,” he mũ. “Ëg pi(jé) cama krẽm fẽg tĩ gé', néj gru ti. Ti fẽg jafã kri ãg tóg ti fẽg tĩ. Kỹ vẽnũ kar tóg vég mũ sir, ag tỹ ãg ãn kãra kãgen kỹ. ¹⁷ Ge ti nỹ, sỹ ãjag mỹ nén tó mũ kar ti. Ver ãjag tóg to jykrén tũ nĩgtĩ. ãjag tỹ vãhã to jykrén kãn ke vỹ. Ver ãjag tóg ki kagtĩg nỹtĩ. ãjag tỹ vãhã ki kanhrãn kãn ke vỹ,” he tóg. ¹⁸ “Hã kỹ jẽmẽ há han nĩ. Û tỹ to jykrén há han kỹ tóg ù to jykrén mãn', ù to jykrén mãn', henh ke mũ. Û tỹ inh vĩ to jykrén há han tũ nĩn kỹ tóg ti mỹ tũg' he kãn mũ, ti tỹ nén ù to jykrén mũ kar ãn mré hã,” he tóg. Ti tỹ ag mỹ ãg tỹ ti vĩ to jykrén há han ke kãmén hã vỹ, Jesus ti.

Jesus mré ke pẽ fag

(Mt 12.46-50; Mc 3.31-35)

¹⁹ Kejẽn Jesus mỹnh fi vỹ ti venh kãtĩ mũ, ti jãvy ag mré. Hã ra fag tóg ti ki junjun tũ nĩ. Ti pẽnĩn tóg fór tãvĩ tĩ, hã kỹ ag tóg ti ki junjun tũ nĩ, ti mỹnh fi mré hã. ²⁰ Kỹ ù tóg ti mỹ: “ã mỹnh fi vỹ re tá jẽ, ã jãvy ag mré,” he mũ. “Fag tỹ ã venh kãmũ vỹ,” he tóg, Jesus mỹ. ²¹ Hã ra Jesus tóg ti mỹ: “mẽ’,” he mũ. “Hã ra ù tỹ Topẽ vĩ jẽmẽg mũ fag vỹ inh mỹnh pẽ ri ke nỹtĩ, inh jãvy pẽ ri ke ke gé, ù tỹ Topẽ vĩ ki króm mũ ag,” he tóg, Jesus ti.

Jesus tỹ kóho tỹ tũg' he

(Mt 8.23-27; Mc 4.35-41)

²² Kejẽn tóg canoa kãra rã mũ, ti mré mũ tĩ ag mré. Kỹ tóg ag mỹ: “mũ nỹ, goj nig kafã ù ra,” he mũ. Kỹ ag tóg mũ mũ, canoa kãmĩ. ²³ Ag mũn ki Jesus tóg nũr mũ sir. Kỹ vãhã kóho jũ tóg kraug he mũ sir. Króg ke tóg mũ sir, kóho ti. Kỹ goj tóg canoa kãki krém ke mũ. Ti fãn sór tóg mũ sir. Kỹ tóg ag mỹ ag kãgter ha mẽ tĩ. ²⁴ Kỹ ag tóg ti rĩn mũ mũ. Ti mỹ ag tóg: “Senhor', Senhor',” he mũ. “Ëg mỹ ãg kãgter ha mẽ tóg tĩ,” he ag tóg ti mỹ. Kỹ tóg rĩr mũ sir. Kỹ tóg kóho mỹ vĩ mũ, goj mỹ ke gé, goj vóg nén ãn mỹ. Kỹ tóg krỹg' he mũ sir, kóho ti. Katy' he tóg mũ sir. ²⁵ Kỹ tóg ag mỹ ke mũ. “Ajag tỹ ne jé inh ki ge há han tũ nĩ nẽ?” he tóg. Kỹ ag tóg kanẽ jur nỹtĩ nĩ. Ag mỹ tóg e tĩ, kỹ ag tóg jagnẽ mỹ: “ti

jkre tóg ěg mý e tĩ,” he mũ. “Kóho mý tóg vĩ mũ, Kĩ tóg ki hã ke mũ, kóho ti, goj ti ke gé,” he ag tóg mũ, jagně mý.

Jesus tỹ ùn jagrě kórég tỹ há' he

(Mt 8.28-34; Mc 5.1-20)

²⁶ Kóho tỹ tũg' hen kỹ ag tóg Gerasa ag jamã tá junjun mũ sir. Goj nig kafã ù tá tóg nĩ, ga tỹ Galiléia to hã. ²⁷ Kĩ tóg canoa kãki kãkutě mũ, Jesus ti. Kĩ ù tóg ti kato tẽ mũ, cidade tá ke ù, hã ra tóg jagrě kórég tỹ hěn ri ke nĩ. Si há tóg tĩ ha, ti jagrě e nĩ ti. Kĩ tóg kur tũ nĩ. Kato r tóg nĩ. Ìn tũ ti nĩ gé. Věnh kej tá tóg jěgtĩ, pãró tỹ věnh kej tá. ²⁸ Ěn tóg Jesus kato tẽ mũ. Kĩ tóg ti krēm mũg ke mũ. Prěr kỹ tóg: “!..ã isỹ hě ri kenh mũ, Jesus'..!” he mũ. “!..Kynhmỹ Topě kósin'..!” he tóg. “!..Ã mý sóg to vĩnh mũ, ã tỹ inh vóg kónãn tũ nĩ jé..!” he tóg, prěr kỹ, ùn jagrě kórég ěn ti. ²⁹ Hã ra Jesus tóg Nén-Kórég mý: “ti ki pa jěg,” he ja nĩ, hã kỹ tóg prěr mũ. Ti ki vĩrĩn ke', ti ki vĩrĩn ke' tỹ hěn ri ke han ja ag tóg nĩgtĩ, Nén-Kórég ag. Kĩ ti mré ke ag tóg ti se ja nĩgtĩ gé, ti mrĩnh kỹ, ferro tỹ, ti nĩgé, ti pěn ke gé. Hã ra tóg ã se ja kykym kãn ja nĩgtĩ. Kĩ Nén-Kórég ag tóg ěmã tũg ja ra ti tĩn ja nĩgtĩ. Hã kỹ tóg věnh kej mĩ tĩgtĩ, ùn jagrě kórég ěn ti.

³⁰ Kĩ Jesus tóg ti mý: “ã jiji hě ri ke tĩ?” he mũ. Kĩ tóg: “Mil,” he mũ. Nén-Kórég tỹ hěn ri ke ag tỹ tóg jagrě nĩ, hã kỹ tóg: “Mil,” he mũ.

³¹ Kĩ ag tóg Jesus mý to vĩ mũ, Nén-Kórég ag, ti tỹ nũgme ra ag jěgněg tũ nĩ jé, inferno ra. ³² Hã ra porco tỹ hěn ri ke tóg tá jěg nỹtĩ nĩ, pãnónh tá. Kĩ Nén-Kórég ag tóg Jesus mý to vĩ e han, ti tỹ ag mý: “ha porco ki ge jěg, ge kỹ,” he jé. Kĩ tóg ag mý ke mũ. ³³ Kĩ ag tóg ěn ki kãpa mũ sir, Nén-Kórég ag. Porco ag ki ag tóg ge mũ sir. Kĩ porco ag tóg mer ki re mũ, rán ki, goj nig ra. Goj ki ag tóg vár mũ sir. Nãgnãr kỹ ag tóg tũ' he kãn mũ sir.

³⁴ Kĩ ù tỹ porco ki rĩr tĩ ag tóg vėg mũ. Kĩ ag tóg pétě mũ, cidade ra. Tá ag tóg kãmén mũ, ěmã kãsir mĩ hã ke gé. ³⁵ Kĩ tá ke ag tóg ra mũ kãn mũ, ag vĩ mēg mũ ag. Ag tỹ nén ěn ve sór vė. Ra mũ kỹ ag tóg Jesus tá junjun mũ. Kĩ ag tóg ti vėg mũ sir, ùn jagrě kórég ja ti. Nĩ tóg mũ ha, Jesus rã hã. Kur tóg nĩ ha, krĩ há tóg nĩ ha. Kĩ ag fe tóg jũrũn ke mũ sir. ³⁶ Û tỹ Jesus tỹ ti tỹ há' he mũ vėg mũ ěn ag tóg kãmén kãn mũ sir, ù tỹ ùri ti venh kãmũ mũ ěn ag mý. Ûn jagrě kórég tó ag tóg mũ, ag mý, Jesus tỹ ti han ja ti, porco kãgter ja ti ke gé. ³⁷ Kĩ tá ke ag tóg ti mý to vĩ mũ, Jesus mý, ti tỹ tá kãkutě jé. Gerasa tá ke kar ag tóg kaně jur nỹtĩ, hã kỹ ag tóg ti mý: “ã tĩg kỹ tóg ěg mý há tĩnh mũ,” he mũ. Kĩ tóg canoa kãra rã kỹ tĩg sór mũ, ti mré mũ tĩ ag mré. ³⁸ Kĩ ùn jagrě kórég ja tóg ti mý to vĩ e han mũ, “nhỹ ã mré tĩg mũ,” hen kỹ, Jesus mý. Hã ra Jesus tóg ti pėre tĩg jãvãnh nĩ. ³⁹ “Ã jamã ra vỹn ké,” he tóg ti mý. “Tá ag mý kãmén nĩ, Topě tỹ ã tỹ há' he ja tag ti,” he tóg, Jesus ti. Kĩ tóg tĩ mũ sir, ùn jagrě kórég ja ti. Cidade kar mĩ tóg tĩ mũ. Ag mý tóg kãmén mũ sir, Jesus tỹ ti tỹ há' he ja ěn ti.

Jesus tỹ Jairo kósin fi rĩn mãn

(Mt 9.18-26; Mc 5.21-43)

⁴⁰ Kĩ Jesus tóg vỹn ke mũ, nig kafã ù ra. Kĩ tóg věnh e ěn mý sér tĩ, ag tỹ ti ven kỹ. Ti jãvãnh ja ag tóg nĩ, hã kỹ tóg ag mý sér tĩ, ag tỹ ti ven kỹ. ⁴¹ Kĩ vãhã ù tóg ti ki jun mũ, Jesus ki. Israel ag věnh kanhrãn jafã to pã'i vė, ti jyjyn hã vỹ: Jairo, he mũ. Ěn tóg Jesus krēm mũg ke mũ, ã jakrĩ tỹ tóg jě mũ, kỹ tóg ti mý vĩ mũ, ti tỹ ti ìn ra tĩg jé, Jesus ti. ⁴² Tĩ kósin pir fi vỹ kaga tãvĩ nỹ, kỹ fi kaga tãvĩ ěn vỹ fi tén sór mũ. Kri prỹg tỹ 12 (ke) fi nĩ, Jairo kósin pir ěn fi. Kĩ tóg ti mré tĩ mũ, Jesus ti.

Ti tĩg kỹ ùn e ag tóg ti nón mũ mũ. ⁴³ Kĩ ag kã ù fi tóg ag pétēm mũ. Kyvėnh krỹg tũ han kỹ fi tóg nĩ, prỹg tỹ 12 (ke) ki. Hã ra ag tóg fi kaga tỹ hě ri ke ja tũ nĩ, ag tỹ fi kygtãg mũ ra, médico ag. ⁴⁴ Ěn fi tóg ti nón ti kur mráj vóg mũ. Kĩ vėsỹmér fi kyvėnh tóg tũ' he mũ. ⁴⁵ Kĩ Jesus tóg: “ũ nỹ inh kur vóg?” he mũ. Hã ra věnh kar tóg: “inh hã tũ vė, inh hã tũ vė,” he mũ. Kĩ Pedro tóg ti mý vĩ mũ, Jesus mré mũ tĩ ag kar ke gé. Ti mý ag tóg: “ã kur mē kãn ěg tóg, hã ra ã tóg: “ũ nỹ inh kur vóg?” he mũ,” he tóg, Pedro ti, Jesus mý. ⁴⁶ Hã ra Jesus tóg: “vó,” he mũ. “Û tóg inh kur vóg,” he tóg. “Inh kuprĩg tóg inh ki kãtėre, hã kỹ sóg ki kanhrãn mũ,” he tóg. ⁴⁷ Kĩ ùn tỹtã ěn fi tóg to jykřn mũ sir. “Ti hỹn

tóg inh vé,” he fi tóg. Hã ký fi tóg jürün ke ký kãtĩ mũ. Jesus krêm fi tóg mũg ke mũ. Ký fi tóg ti mẽ tó kãn mũ, vãnh kar rĩnve. Ti mẽ fi tóg ã kaga ja ên kãmén kãn mũ, fi tỹ ti kur vóg ja ên ti ke gé, fi tỹ há' he ja ti ke gé. “Isỹ ã kur vóg ký sóg vësỹmér há' hé,” he fi tóg, Jesus mẽ. ⁴⁸ Ký tóg fi mẽ vĩ há han mũ, Jesus ti. “Inh kósin’,” he tóg. “Ã tỹ inh ki rã ký ã tóg há' hé. Ha tĩg, jatun mẽ. Há ã tóg nĩ ha,” he tóg fi mẽ, fi han kar ký, Jesus ti.

⁴⁹ Ti tỹ ver fi mré vēmén jê ra ù tóg jun mũ, pã'i tỹ Jairo ên ìn tá. “Ã kósin fi hur ter,” he tóg, pã'i mẽ. “Tũg ja fi tóg nĩ ha,” he tóg, Jairon mẽ. “Hã ký ti mẽ: kunĩg, he mãn tũg nĩ, ti kutãn mãn tũg nĩ,” he tóg.

⁵⁰ Hã ra Jesus tóg mēg mũ, ký tóg ti mẽ: “mũmēg tũg nĩ,” he mũ. “Inh vĩ hã kri fimnĩ, ký ã kósin fi tóg há' henh mũ,” he tóg. ⁵¹ Ký ag tóg mũ ký ti ìn tá junjun mũ sir, Jairo ìn tá. Ký Jesus tóg ag tỹ ìn kãra ge kamēg mũ. “Pedro vĩ ìn ra rãnh mũ, inh mré, João ke gé, João kãke tỹ Tiago ke gé, gĩr fi panh ke gé, fi mỹnh fi ke gé,” he tóg, Jesus ti. ⁵² Hã ra ùn e fag vĩ tá nỹtĩ nĩ gé, kygfỹ fag nỹtĩ nĩ, vēsỹrēnh ký, Ký Jesus tóg fag mẽ: “kygfỹ tũg ra,” he mũ. “Fi pi(jé) ter mũ'. Fi nũr vễ,” he tóg. ⁵³ Hã ra fag tóg ti nyg mũ. Fi ter ki kanhró fag tóg nỹtĩ, hã ký fag tóg ti nyg mũ. Hã ra Jesus tóg fag mẽ: “ha mũjēg,” he mũ.

⁵⁴ Fag mũn kar ký Jesus tóg fi nĩgē kãgmĩg mũ, ký tóg prēr mũ sir. “!..Nĩ ra, já..!” he tóg, jamã hár(a). ⁵⁵ Ký fi kuprĩg tóg fi to vỹn ke mũ. Nĩ fi tóg mũ sir, mẽr, ha mẽ, ùn ter mũ ên fi. Ký Jesus tóg fag mẽ tó mũ, fag tỹ fi mẽ vễjēn ven jé. ⁵⁶ Ký tóg fi han mũ fag mẽ e tãvĩ tĩ sir. Hã ra Jesus tóg fag mẽ tó mũ, fag tỹ ù mẽ tó tũg jé, fi rĩr mãn ja tag ti. Hã ra tóg fi ter mũ ra fi rĩn, Jesus ti.

9

Jesus tỹ ã mré mũ tĩ ag jēgnē

(Mt 10.5-15; Mc 6.7-13)

¹ Ký Jesus tóg ù tỹ 12 (ke) ag jé prēr mũ, ti tỹ ùn vin mũ ên ag, ag vãnh mãn jé. Ag vãnh mãn ký tóg ag tar han mũ sir, ag tỹ vãnh jagrē kórég pan jé, ag tỹ ùn kagyga ag tỹ há' he jé gé. ² Ký tóg ag jēgnēg mũ sir, ag tỹ Topē tỹ tỹ ěg pã'i nĩ ên kãmén jé, vãnh kar mẽ, ag tỹ ùn kagyga ag tỹ há' he kãn jé gé. ³ Hã ký tóg ag mẽ ke mũ sir. “Ajag mũn ký nén ù ma mũ tũg nĩ, vátó va mũ tũg nĩ, sacon ke gé, bolsa ên, pão ke gé, jãnkamy ke gé. Kur régre rĩnh tũg nĩ gé,” he tóg. ⁴ “Ajag tỹ ìn ra ge mũ hã ki nũgnũr' hemnĩ, hã ki ajag tỹ kurã ki kãpanh ke tá krỹg nĩ,” he tóg. ⁵ “Ag tỹ ajag mẽ: “kãge jēg ra,” he jãvãnh nĩn ký tá kãpamnĩ. Tá kãpa ký ajag pēn hã kykũnhkũnh nĩ, ag tỹ to ki kanhró nỹtĩ jé sir, Topē tỹ ag tovãnh ken ki,” he tóg, Jesus ti.

⁶ Ti tỹ ag jēgnēn ký ag tóg mũ sir, ù tỹ 12 (ke) ag. Ěmã kar mẽ ag tóg mũ sir. Topē kãmén ag tóg mũ mũ sir. ùn kagyga ag tỹ há' he kãn ag tóg mũ gé sir, fag ke gé.

Jesus kãme tỹ pã'i tỹ Herodes mẽ e

(Mt 14.1-12; Mc 6.14-29)

⁷ Ký pã'i mág tỹ governador tỹ Herodes vĩ mēg mũ sir, Jesus tỹ nén han mũ ti. Ký tóg ti mẽ e tĩ. Ký ti tỹ ne to jykrén ke tóg tũ tĩ. Hã ra ù ag tóg Jesus to: “João Batista vễ,” he tĩ. “João hỹn tóg ã ter ký rĩr mãn,” he ag tóg tĩ, Jesus to. ⁸ Jo ù ag tóg ti to: “Elias vễ,” he tĩ gé. “Ti hỹn vãnh ven mãn, vãsỹ Topē vĩ tó tĩ ãn, Elias ti,” he ag tóg tĩ gé, Jesus to. Ký ù ag tóg ti to: “vãsỹ Topē vĩ tó tĩ ù hỹn rĩr mãn,” he tĩ gé. ⁹ Hã jēmē tóg, Herodes ti, ký tóg to jykrén ký: “João mẽ vó?” he mũ, Jesus to. “Hã ra sóg João krĩ kym, ký tóg tũ' he mũ. Ký ù nē, hỹn'?” he tóg. “Nén han vãnh tỹ hēn ri ke hyn han tóg huri. ù nē, hỹn'?” he tóg. Herodes ti. Ký tóg kejēn ti ve sór mũ, ti tỹ ti mẽ e tĩn ký, hã ra Jesus vĩ ti venh tĩ tũ nĩ.

Jesus tỹ ù tỹ 5 mil (ke) ag jēn

(Mt 14.13-21; Mc 6.30-44; Jo 6.1-14)

¹⁰ Kejēn Jesus tỹ ùn vin mũ ag vĩ Jesus to vỹnvỹn ke mũ, ti tỹ ag jēgnē ja ên tá. Ti mẽ ag tóg kãmén mũ sir, ag tỹ nén han ja ên kar ti. Ký tóg ag mré vãnh pēju ký tĩ mũ, ěmã tỹ Betsaida ra, vyr mẽ ag mré vēmén jé. ¹¹ Hã ra ùn e ên ag tóg mēg mũ, Jesus tĩg ti, ký ag

tóg ti nón mū mū. Ag tỹ ti pétēm ky tóg ag mỹ vĩ há han mū, Jesus ti. Ag mỹ tóg kāmén mū, Topē tỹ tỹ ěg pã'i nĩ sór ti. Ag kāmĩ ùn kagyga tỹ há' he tóg mū gé, fag mré há.

¹² Ti tỹ ag mỹ tó jě ki tóg rāké nỹ sir, ky ù tỹ 12 (ke) ag tóg Jesus to kāmū mū. Ti mỹ ag tóg: “ã tỹ ag jěgnēnh há tóg tĩ,” he mū, “ag tỹ ěmã kar mĩ mū jé, pão comprar he jé, tá nũgnũr jé ke gé. Tag ki tóg ěmã tũ nĩ,” he ag tóg, Jesus mỹ. ¹³ Hã ra Jesus tóg ag mỹ: “vó,” he mū. “Ha inhhã ag jēn,” he tóg. Ky ag tóg ti mỹ: “hã ra vějēn tóg ěg mỹ tũ tĩ,” he mū. “Pão tỹ 5 (ke) hã vỹ ki nỹtĩ, pirã régre mré ke gé. ěg mỹ ag jo comprar henh mū vỹ, vějēn ti?” he ag tóg, Jesus mỹ. ¹⁴ Û tỹ mil tỹ 5 (ke) ag vē, ag tãvĩ, fag mré tó tũ ra. Hã ra fag tóg tá e nỹtĩ gé, gĩr mré ke gé.

Ag tỹ ti mỹ ke ky Jesus tóg ã mré mū tĩ ag mỹ: “ag mỹ tugtó, ag nĩgnĩ jé,” he mū, “ag tỹ vēnh nĩkrén jé, ù tỹ 50 (ke) pãte ù tỹ 50 (ke) ù pãte nĩgnĩ jé,” he tóg, Jesus ti, ã mré mū tĩ ag mỹ. ¹⁵ Ky ag tóg ke mū sir. Ky vēnh kar tóg nĩgnĩ mū sir. ¹⁶ Ky tóg pão tỹ 5 (ke) in gég mū, pirã régre ěn mré. Ky tóg kanhkã ki ěvãnh mū, ky tóg Topē mré vĩ mū sir. Ky tóg pão vēnh kãpópãm mū sir. Ky tóg ã mré mū tĩ ag mỹ vin mū, ag tỹ ùn e ěn mỹ vēnh kãpópãm jé, pirã ěn mré há. ¹⁷ Ky vēnh kar tóg ko kãn ky funfór mū sir. Ky ag tóg ti ke ěn gég mū. Kēj tỹ 12 (ke) fãn tóg, vějēn mru ěn ti. Hã ky Jesus tóg pão tỹ 5 (ke) tỹ ùn e ag fónfãn ja nĩgtĩ.

Pedro tỹ Jesus tó

(Mt 16.13-19; Mc 8.27-29)

¹⁸ Kejēn Jesus tóg Topē mré vĩ mū, ã pin ky. Hã ra ti mré mū tĩ ag tóg ti mré nỹtĩ nĩ. Ky tóg ag mỹ ke mū. “Ag iso hē ri ke tĩ?” he tóg ag mỹ, Jesus ti. ¹⁹ Ky ag tóg ti mỹ: “ũ ag vỹ: João Batista vē, he tĩ, jãvo ù ag vỹ: Elias vē, he tĩ gé, jãvo ù ag vỹ: vãsỹ Topē vĩ tó tĩ ù vỹ rĩr mãn, he tĩ gé, ã to,” he ag tóg, Jesus mỹ. ²⁰ Ky tóg ag mỹ: “ag jãvo ãjag hē ri ke tĩ, iso?” he mū. Ky Pedro vỹ ti mỹ kāmén mū. “Tỹ ã Cristo nĩ, Topē tỹ ěg mỹ ùn jēnēg mū ěn vỹ tỹ ã nĩ,” he tóg, Pedro ti, Jesus mỹ. ²¹ Ky tóg ti mỹ vĩ tar han mū, Jesus ti, ag tỹ ù mỹ tó tũ nĩ jé ver, ti tỹ tỹ Cristo nĩ ěn.

Jesus tỹ ã jagtar ke tó vén

(Mt 16.20-28; Mc 8.30-9.1)

²² Ky tóg ag mỹ kāmén mū. “Tỹ sóg ěprã ke fi kósin ěn nĩ,” he tóg. “Ijagtar jagy han ke vē,” he tóg. “Kófa ag tỹ iso: kórég ti nĩ, henh ke vē, Topē tũ ki rĩr tĩ to pã'i ag ke gé, Topē vĩ to professor ag ke gé. Ag tỹ isén ke vē. Kurã tãgtũ tũg mū ra sóg rĩr mãn mū há ra,” he tóg, Jesus ti.

²³ Ky Jesus tóg vēnh kar mỹ tó mū. “ãjag tỹ inh mré kāmū ky tóg há tĩnh mū,” he tóg. “Ky ãjag jykre tovãnh nĩ, ãjag tỹ isũ tãvĩ han jé. Ha vé, ag tỹ inh cruz tỹ inh kri fi ky sóg tĩg ke mū, ag tỹ to isa ky isén jé, ha vemnĩ. Vēnh nēnh ke tũ sóg nĩ. Isỹ tag han ri ke han nĩ, kurã kar ki, ãjag tỹ inh mré mū sór nỹtĩn ky,” he tóg. ²⁴ “ãjag tỹ ãjag jykre há han sór ky ãjag tỹ nũgme ki vár ke vē. Jãvo ãjag tỹ isugrĩn ãjag jykre tovãnh ky ãjag krenkren ke vē, ãjag kãgter ke mū (hã) ra. ²⁵ ãjag tỹ ga kri mũn ky ãjag tóg nén kar ganhar he sór mū. Ky ãjag kuprĩg vỹ vãfor ke mū. Ky tóg kórég nỹ sir, ãjag rico tãvĩ nỹtĩ ra. Ganho há venh ke tũ ãjag tóg ke mū, gen ky. ²⁶ Iso mỹ'ãg tũg nĩ, inh vĩ to. ãjag tỹ ùri iso mỹ'ãg ky sóg ãjag to mỹ'ãg ke mū gé, inh kãtĩg mãn ken ky. Tỹ sóg ěprã ke fi kósin ěn nĩ. Sĩnvĩ ti nĩnh mū, inh kãtĩg mãn ky, inh jóg tỹ inh jēnēn ky, ti tỹ isỹ ùn mág han ky. Ky ti tỹ jěgnē jafã ag vỹ inh mré kãmũnh mū gé, Topē tũ ag. ěn kã sóg ãjag to mỹ'ãg ke mū, ãjag tỹ ùri iso mỹ'ãg ky,” he tóg. ²⁷ “Ki hã sóg tó mū, ha mē. ãjag kãmĩ ù ag vỹ Topē tỹ tỹ ěg pã'i nĩ venh ke mū, ag ter ke to há, tag ki ěg mré nỹtĩ ù ag,” he tóg, Jesus ti.

Jesus tỹ vēnh ven ù han

(Mt 17.1-13; Mc 9.2-8)

²⁸ Jesus tỹ tag tó kar ky kurã tỹ 8 (ke) vỹ tũg mū. Ky tóg kejēn ag mỹ: “mū nỹ, vyrmy,” he mū. Pedro mỹ tóg ke mū, João mỹ ke gé, Tiago mỹ ke gé. Ag há mré tóg tĩ mū, pãnónh ra, Topē mré vēmén jé. ²⁹ Tá jun ky tóg Topē mré vĩ mū sir. Ky tóg vãhã vēnh ven ù han

mũ, vėnh ven kupri han tóg mũ. Ti kur tóg kóprėj nĩ, kókov tóg nĩ, ti kur ẽn ti. ³⁰ Kĩ ùn régre ag tóg vāhā tá vėnh ven mũ sir. Kĩ ag tóg Jesus mré vėmėn mũ sir. Moisés vė, Elias mré hā, ùn régre ẽn ag. ³¹ Ag ve vỹ ti ve ri ke nĩ gé, Moisés mré Elias ti. Jesus mré ag tóg vėmėn mũ, ti ter ken kāmėn ag tóg mũ sir, ti tỹ Jerusalém tá ter ke mũ ẽn ti.

³² Pedro ag mỹ tóg nũr há tāvĩ tĩ, ge ra ag tóg ag vėg mũ sir, ag mỹ nũgnũr há (hā) ra. Hā kĩ ag tóg Jesus tỹ ag mỹ vėnh ven ù han mũ ẽn vėg mũ sir, ti kókov ẽn ti, ti mré vėmėn mũ ag ke gé. ³³ Kĩ ù tỹ Jesus mré vėmėn kĩ nỹtĩ ag tóg mũ sór mũ sir. Kĩ Pedro tóg Jesus mỹ: “Senhor’,” he mũ. “Tag ki tóg há nĩ,” he tóg. “Ēg tỹ tag ki pājó tǎgtũ han kỹn hỹn há nĩnh mũ, ā mỹ, Moisés mỹ, Elias mỹ ke gé,” he tóg, Pedro ti. Hā ra tóg krĩ tũ nĩ, hā kĩ tóg pājó tó mũ.

³⁴ Pedro tỹ ver ti mỹ vėmėn kĩ kanhkā góg vỹ ag kri rũm ke mũ sir. Kĩ ag tóg kamėgmėg mũ, kanhkā góg ẽn ti. ³⁵ Kĩ vėnh vĩ tóg mẽ há' he mũ, kanhkā góg ẽn kǎtá, kĩ tóg: “inh kósın hā vė,” he mũ. “Inh fe pė hā vė,” he tóg. “Ti vĩ jėmė ra,” he tóg, vėnh vĩ ti, Topė ti.

³⁶ Ag tỹ tag mẽ kar kĩ Jesus tóg ā pir mỹ tá jė nĩ sir. Ti mré vėmėn ja ẽn ag ve mǎn tũ ag tóg nĩ sir, Pedro ag. Kĩ ag tóg mũ mũ. Hā ra ag tóg ù mỹ tó tũ nĩ ver, ag tỹ nėn ve ja ti. Tỹ vėmėn tũ ag tóg nĩ ver, ag tỹ kanhkā tá vėnh jykre ve ja ẽn ti.

Jesus tỹ kyrũ jagrė kórėg kutėm

(Mt 17.14-21; Mc 9.14-29)

³⁷ Tỹ vaj kĩ ag tóg pǎnónh ẽn tá kǎre mũ, Jesus mré. Kĩ ag tóg ù tỹ hėn ri ke ag vigvėg mũ sir. Jesus kato ag tóg kāmũ mũ. ³⁸ Kĩ vāhā ù tóg ag kāmĩ prėr mũ, ha mẽ. “!..Senhor..!” he tóg. “!..Inh kósın ve ra..! Inh kósın pir vė. ³⁹ Jagrė kórėg ti nĩ, ha mẽ. Kĩ tóg kejėn ti kǎ vyryn ke tĩ, kĩ tóg prėr tĩ, kĩ tóg ti ter tĩ han tĩ gé, kĩ tóg jārān mũ. Jārān kĩ tóg jũrũn' jũrũn' ke tĩ gé, kĩ tóg kejėn ti tovānh mũ sir, komėr hā, ti rỹj kar kĩ. ⁴⁰ Ā mré mũ tĩ ag mỹ sóg to vĩ mũ vė, ag tỹ ti jagrė kórėg tag kutėm jė, hā ra ag tóg ti tỹ hė ri ke tũ nĩ,” he tóg, ti panh ti, Jesus mỹ.

⁴¹ Kĩ Jesus tóg ti mỹ: “ājag ne tóg inh ki ge há han tũ nĩgtĩ,” he mũ. “Jykre pǎno ājag nỹtĩ,” he tóg. “Kysā tỹ hėn ri ke ki inh hỹn ājag mré tĩ nĩ? Kysā tỹ hėn ri ke ki inh hỹn ājag to fe tĩg nĩ?” he tóg. “Inh mỹ ti pére kǎtĩg nĩ,” he tóg, Jesus ti, ti panh mỹ. ⁴² Kĩ ag tóg ti pére kāmũ mũ. Ti jun kĩ ti jagrė tóg ti kǎ vyryn ke mũ. Ti tỹ jũrũn', jũrũn' ke han tóg mũ sir. Kĩ Jesus tóg ti jagrė mỹ vĩ jũ han mũ, ti tỹ ti ki kǎkutė jė. Hā ki tóg kyrũ ẽn tỹ há' he mũ sir. Kĩ tóg ti panh mỹ: “té,” he mũ sir.

⁴³ Kĩ tóg vėnh kar mỹ e tāvĩ tĩ. “Topė ne tóg tỹ ùn mág tāvĩ nĩ', ti jykre tóg há tāvĩ nĩ,” he ag tóg mũ sir, ag tỹ Jesus tỹ nėn han mũ to jykrėn kĩ.

Jesus tỹ ā jagtar ke tó mǎn

(Mt 17.22-23; Mc 9.30-32)

Kĩ Jesus tóg ā mré mũ tĩ ag mỹ: ⁴⁴ “ha mẽ há han,” he mũ. “Ēprā ke fi kósın ẽn vỹ jagtar nĩnh ke mũ. Inh hā vė,” he tóg. “Ēprā ke ag vỹ ājag tỹ inh ki nėn han sór mũ ẽn han ke mũ,” he tóg, Jesus ti. ⁴⁵ Hā ra tóg ag tỹ ti tỹ ā ter ke kāmėn tag to jykrėn tũ nĩgtĩ. Ag tỹ to jykrėn mũ ra ag tóg ki kagtĩg nỹtĩ. Kĩ ag tóg ājag tỹ ti ki jėmė sór mũ ra ti kamėg mũ gé, hā kĩ ag tóg ti mỹ: “ā tỹ ne tó nė?” he tũ nĩ, Jesus mỹ.

Ūn mág

(Mt 18.1-5; Mc 9.33-37)

⁴⁶ Kejėn Jesus mré mũ ag vỹ jagnė mỹ vĩ jũ han mũ. “Ēg kǎ ù tỹ hė nỹ jagnė kǎfór nĩ?” he ag tóg jagnė mỹ. Tag to ag tóg jagnė mỹ vĩ jũ han mũ. ⁴⁷ Hā ra Jesus tóg vėg mũ, ag tỹ nėn to jykrėn mũ ti. Kĩ tóg gĩr jė prėr mũ, ti tỹ ti mré jė jė. ⁴⁸ Kĩ tóg ag mỹ tag tó mũ, ha mẽ. “Gĩr tỹ ge jė'jyn nĩ, ti to há nỹtĩmnĩ, isugnĩn,” he tóg. “Ājag tỹ isugrĩn ti to há nỹtĩn kĩ ājag tóg iso há nỹtĩ gé sir. Ājag tỹ iso há nỹtĩn kĩ ājag tóg ù tỹ inh jėnėg mũ to há nỹtĩ gé sir. Kĩ ājag tỹ ěgno kar vỹ tỹ ājag mág kǎfór kar nĩnh mũ, ha mẽ, ājag tỹ tỹ ùn mág nỹtĩ sór kĩ. Tag to jykrėn nĩ,” he tóg, Jesus ti, ag mỹ.

Ū tỹ ãg kato tẽ tũ ag
(Mc 9.38-40)

⁴⁹ Kĩ João tóg Jesus mỹ: “Senhor’,” he mũ. “Ū ve ãg tóg vãnh jagrẽ pan tĩ, ã jiji tó kỹ, ãg tỹ ùn vég mũ ên ti,” he tóg, Jesus mỹ. “Hã ra tóg ãg mré tĩ tũ nĩgtĩ, hã kỹ ãg tóg ti mỹ: “vãnh jagrẽ kórég pan sór tũg nĩ,” hé,” he tóg, João ti, Jesus mỹ. ⁵⁰ Kĩ Jesus tóg ti mỹ: “ũ mỹ: “vãnh jagrẽ kórég pan tũg nĩ,” he tũg nĩ,” he mũ. “Ū tỹ ãg kato tẽ tũ nĩn kỹ ãg mré ke vẽ sir,” he tóg, Jesus ti, João mỹ.

Samaria tá ke ag tỹ Jesus mỹ: “kãrã ra,” he sór tũ

⁵¹ Kejẽn Jesus ter ke kurã tóg kakó nĩ sir. Kĩ tóg to jykrén kỹ Jerusalém ra tĩg sór mũ, ag tỹ tá ti tén jé. Kĩ tóg tĩg kỹ ù ag jẽgnẽg mũ, vãnh jo, ag tỹ ti jun ke tó jé, cidade kãsir tá. ⁵² Kĩ ag tóg mũ mũ, ag tỹ tón jé. Kĩ ag tóg cidade sĩ ù ki jun mũ. Samaria tá ke ag jamã ù vẽ. Tá ag tóg ti nũr ke ve sór mũ. ⁵³ Hã ra tá ke ag tóg ag mỹ nenh mũ. Ag mỹ ag tóg: “ãjag tỹ hẽ ra mũ nẽ?” he mũ. Kĩ ag tóg: “Jerusalém ra,” he mũ. Kĩ tóg ag mỹ kórég nĩ, hã kỹ ag tóg ag mỹ cama ven sór tũ nĩ. ⁵⁴ Kĩ Tiago tóg jũ mũ, João ke gé, Jesus mré mũ tĩ ag. Kĩ ag tóg Jesus mỹ: “Senhor’,” he mũ. “Ëg mỹ tóg há nỹnh mũ, ãg tỹ Topẽ mỹ: “kanhkã tá pĩ tỹ ag pũn nĩ,” hen kỹ. Mỹ ã mỹ há nỹnh mũ?” he ag tóg. “Ëg tỹ Elias tỹ nẽn han ja ên han há tóg tĩ,” he ag tóg, Jesus mỹ. ⁵⁵ Hã ra Jesus tóg ag jé vĩrĩn ke kỹ ag mỹ: “vĩ tũg ra,” he mũ. “Topẽ jykre pijé’, ãjag tỹ nẽn han sór mũ tag ti. Inh pi(jé) ag tũg sór mũ’. Isỹ ag kren han sór vẽ jãvo, hã jé sóg kãtĩ mũ, inh, hã vỹ: tỹ sóg ãprã ke fi kósĩn ên nĩ, he mũ,” he tóg, Jesus ti, ag mỹ. ⁵⁶ Kĩ ag tóg cidade ù ra mũ mũ, tá nũgnũr jé sir.

Ëg tỹ Jesus mré mũnh ke
(Mt 8.18-22)

⁵⁷ Ag mũn kỹ ù tóg Jesus mỹ: “sỹ ã mré tĩg há tóg tĩ,” he mũ. “Ã tỹ hẽn ra tĩg kỹ sóg ã mré tĩg ke mũ,” he tóg. ⁵⁸ Kĩ Jesus tóg ti mỹ: “hã ra tóg jagy tĩ,” he mũ. “Ĩn tũ sóg nĩ. Mĩg vỹ kré nỹtĩgtĩ, jẽsĩ vỹ jagfe nỹtĩgtĩ gé, ag jãvo isỹ hẽ tá nũr ke tóg tũ tĩ. Tỹ sóg ãprã ke fi kósĩn ên nĩ,” he tóg, Jesus ti.

⁵⁹ Kĩ Jesus tóg kejẽn ù mỹ: “mũ nỹ, inh mré,” he mũ. Hã ra tóg ti mỹ: “inh hỹn ver tĩg mũ ha, sỹ inh panh ter kỹ ga ki ti fón jé ver,” he mũ. ⁶⁰ Hã ra Jesus tóg ti mỹ: “vó,” he mũ. “Inh ki ge tũ ag vỹ ã panh kej han mũnh mũ. ã tỹ inhhã inh mré tĩg há tóg tĩ, ã tỹ Topẽ tỹ tỹ ãg pã’i nĩnh ke ên kãmén jé,” he tóg ti mỹ, Jesus ti.

⁶¹ Kĩ ù tóg ti mỹ ke mũ gé sir, Jesus mỹ. “Sỹ ã mré tĩg há tóg tĩ,” he tóg. “Hã ra sóg inh jamã ra tĩg sór mũ ver, sỹ inh mré ke fag mỹ isĩg ke tó jé,” he tóg, Jesus mỹ. ⁶² Kĩ Jesus tóg ti mỹ: “vó,” he mũ gé. “Ëg tỹ arado tỹ ga kũm kỹ ãg pi(jé) vỹsyãm ãvãnh tĩ,” he tóg. “Ge ti nĩ, ã tỹ inh mré tĩg sór kỹ. Inh mré ã tóg tĩg mũ. ã tỹ ã tũ han sór tĩn kỹ ã tóg Topẽ tỹ tỹ ãg pã’i nĩ tá krỹg ke tũ nĩ,” he tóg, Jesus ti, ù tỹ ti mré tĩg sór mũ mỹ.

10

Ū tỹ 70 (ke) ag tỹ Jesus vĩ kãmén mũ

¹ Kĩ Jesus tóg ù ag vin mũ gé sir, ù tỹ 70 (ke) ag. Kĩ tóg ag jẽgnẽg mũ sir, ag tỹ ti jo mũ jé. Ûn régre tĩn’, ùn régre tĩn’ he tóg. Ag mỹ tóg ke mũ, ag tỹ ãmã kar mĩ Topẽ kãmén mũn jé, cidade kar mĩ ke gé. Ag nón tóg ra tĩg sór mũ gé, Jesus ti. ² Kĩ tóg ag mỹ: “inh mỹ ag tóg ãkré ri ke nỹtĩ, ãjag tỹ ùn mỹ tónh ke mũ ag,” he mũ. “Kejẽn ãg jakré tóg éhé nỹgtĩ, hã ra ag pipir nỹtĩ, ù tỹ krenh ke mũ ag. Kĩ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ûn e ag tóg inh ki ge sór mũ nĩ, hã ra ù tỹ ag mỹ tónh ke tóg tũ tĩ,” he tóg. “Hã kỹ Topẽ mré vĩmĩnĩ, ti tỹ ù ag jẽgnẽn jé, ag tỹ ag mỹ tugtón jé, ti vĩ ti,” he tóg, Jesus ti, ã mré mũ tĩ ag mỹ.

³ “Ha mũjẽg. Ha vé, carneiro krẽ vỹ vãnh jy nĩgãn ki kagtĩg nỹtĩ, mĩg tỹ ag mãn sór kỹ. Mé krẽ ên ri ke ãjag nỹtĩ, hã ra sóg ãjag jẽgnẽg mũ, kỹ Topẽ vỹ ãjag jy nĩgãn mũ,” he tóg. ⁴ “Kỹ ãjag mũn kỹ sacco ma mũ tũg nĩ, bolso ên, jãnkamy tũ ke gé, pẽn né vãnh kafã gé(g)

mũ tũg nĩ gé, pẽn to ró ên. Kĩ ãjag tỹ ù ven kũ ti mỹ: “ã mỹ há?” he tũg nĩ gé. Jatun mỹ mũmnĩ,” he tóg.

⁵ “Kejẽn ãjag tóg êmã ù tá junjun ke mũ. Kĩ ãjag tỹ ãn ù ra ge kũ tá ke fag mỹ: “Topẽ jé ãjag ki rĩr, kũ ãjag jé jatun mỹ nỹtĩ nĩ,” hemnĩ fag mỹ,” he tóg, Jesus ti, ag mỹ. ⁶ “Kĩ tá ke ù tỹ inh ki rã kũ tóg jatu' he mũ sir, ti tỹ tỹ Topẽ kósin nĩn kũ. Tá ke ù tỹ inh ki rã jãvãnh nĩn kũ tóg jatu' he tũ nĩ sir. Ti jãvo ãjag tóg jatu' he mũ sir inhhã.

⁷ ãn ên krẽm nũgnũrmnĩ, ãjag tỹ kãra ge ja ên krẽm. Fag tỹ ãjag mỹ nén nĩm mũ ên komnĩ gé. Ûn rãnrãj han mũ ên tóg ti kaja venh ke mũ, ti rãnrãj kaja ti, hã kũ ag tóg ãjag jẽn ke mũ sir, vẽn kaja jé. ãn ù kãra ge tũg nĩ, êmã ên tá. ⁸ ãjag tỹ êmã ù tá junjun kũ ãn pir krẽm nỹtĩmnĩ, tá ke ag tỹ ãjag mỹ: “kãge ra,” hen kũ. Ag vẽn hã komnĩ. ⁹ Ûn kagyga ag tỹ há' hemnĩ. Ag mỹ: “Topẽ vỹ tỹ ãjag pã'i nĩnh mũ, ùn ri,” hemnĩ.

¹⁰ Kejẽn êmã ù tá ke ag tóg ãjag mỹ: “kãge ra,” he jãvãnh nỹtĩnh mũ. Kĩ êmã ên fĩn rãm kũ ag mỹ tag tómnĩ, ha mẽ: ¹¹ “ha vé, êg pẽn nug hã kykũnh êg tóg mũ, ãjag tỹ êg kavẽn tũ nĩ jé,” hemnĩ. “Ge ra êg tóg ãjag mỹ tó mũ, êg tỹ ãjag mỹ nén tónh kãmũ jan ki, hã vỹ: “Topẽ vỹ tỹ êg pã'i nĩnh mũ, ùn ri,” he mũ,” hemnĩ ag mỹ,” he tóg, Jesus ti. ¹² “Ha mẽ, kurã tỹ êgno ki ag tóg vêsýrénh ke mũ, ag tỹ ãjag vĩ mẽ jãvãnh kũ. Cidade tỹ Sodoma tá ke ag vêsýrénh kãfór han jé ag tóg ke mũ, kurã ên kã, ha vemnĩ,” he tóg, Jesus ti, ag mỹ.

*Jesus tỹ ù ag mỹ vĩ kónãn
(Mt 11.20-24)*

¹³ Kĩ tóg: “sỹ cidade tỹ Corazim ki ke ag mỹ tag tó sór mũ, ha mẽ,” he mũ. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ gé, ha mẽ. Kórég ve jé ãjag tóg ke mũ gé,” he tóg. “Êg tỹ nén han vãnh tỹ hẽn ri ke hyn han isóg ãjag mỹ, milagre tỹ hẽn ri ke, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg êg tỹ nén han vãnh ên hyn han tũ nĩ. Sỹ tá milagre hyn han mũ ra ag tóg ãjag jykre kórég tovãnh mũ vẽ, vãsỹ,” he tóg. “ãjag jykre pãno to ag jykren ke mũ vẽ, kygfỹ ag mũ vẽ, ag mỹ ti e tĩnh mũ vẽ, sỹ ag mỹ tó mũ ra. Ag jãvo ãjag tóg tovãnh sór tũ nĩ', to jykren sór tũ pẽ nĩ',” he tóg, Jesus ti. ¹⁴ “Tiro tá ke ag vỹ vêsýrénh kãn ke mũ, kurã tỹ êgno ên ki, Sidom tá ke ag ke gé, ag jykre pãno to. Ag vêsýrénh kãfór han jé ãjag tóg ke mũ jãvo, ha mẽ,” he tóg, Corazim tá ke ag to, Betsaida tá ke ag to ke gé.

¹⁵ Kĩ tóg: “sỹ cidade tỹ Cafarnaum ki ke ag mỹ tag tó sór vẽ, ha mẽ,” he mũ. “Ûri tóg ver ãjag mỹ sér tĩ,” he tóg. “Kanhkã ve jé êg tóg ke mũ,” he ãjag tóg tĩ, ón kũ. Hã ra ãjag tóg nũgme ki vár ke mũ jãvo, inferno ki,” he tóg, Jesus ti. Ti tỹ ã vĩ jẽmẽ jãvãnh mũ ag mỹ vĩ kónãn hã vẽ.

¹⁶ Kĩ tóg ã mré ke ag mỹ tag tó mũ. “Û tóg ãjag vĩ mẽ sór mũ, ha vemnĩ,” he tóg. “Kỹ tóg sir inh vĩ mẽg mũ gé, ti tỹ ãjag vĩ mẽn kũ. Û tóg ãjag vĩ mẽ sór tũ nĩ, ha vemnĩ. Kĩ tóg inh vĩ mẽnh ke tũ nĩ gé. Ti tỹ inh vĩ mẽnh ke tũ nĩn kũ tóg ù tỹ inh jẽnẽg mũ ên vĩ mẽnh ke tũ nĩ gé sir, Topẽ vĩ ti,” he tóg, Jesus ti. Ti tỹ ã mré mũ tĩ ag mỹ tón hã vẽ, ag tỹ ti vĩ kãmén mũ jé, kór há mũ, kuvar há mũ.

Kỹ ag tóg sir mũ mũ, ù tỹ 70 (ke) ên ag.

Û tỹ 70 (ke) ag tỹ Jesus to vỹnvỹn ke

¹⁷ Kejẽn ag tóg ti to vỹnvỹn ke mũ, kũ ag tóg ti mỹ vĩ sér han mũ sir. “Senhor',” he ag tóg mũ. “Vẽnh jagrẽ kórég ag vỹ êg vĩ ki han tĩ. ã jiji tó kũ êg tóg ag mỹ vĩ tĩ, kũ ag tóg ki hã han tĩ,” he ag tóg mũ, Jesus mỹ.

¹⁸ Kĩ tóg ag mỹ: “vãsỹ inh Japo vé, ti tỹ kanhkã tá kãtére kũ,” he mũ. “Ti fĩn rãm sóg, hã kũ sóg ti fón. Ta tỹ kómkóm ke ri ke nĩ ja ti nĩ, ti kutẽ ja ên ti. ¹⁹ Ti kri ke vỹ tỹ inh nĩ. Ha vé, ãjag to sóg vãsãn mũ, pỹn tỹ ãjag kókén tũ nĩ jé, ãjag tỹ ti sãn mũ ra, pỹn kakrã ke gé, Nén-Kórég kar ag ke gé. Û vỹ ãjag kókén ke tũ pẽ nĩ gé. ²⁰ Hã ra tag to mỹ há nỹtĩ tũg nĩ ver. Tag vỹ tỹ nén ù tũ nĩ ver. Vẽnh jagrẽ kórég vỹ ãjag vĩ han, vẽnh kuprĩg ke gé. Hã ra tag to mỹ sér nỹtĩ tũg nĩ. Nén ù vỹ há pẽ nĩ, kũ tag hã to mỹ sér nỹtĩmnĩ. ãjag jyjy

vỹ ránrán kÿ nÿtĩ, Topê livron ki, kanhkã tá, ãjag tÿ kanhkã tá junjun jé. Kÿ tag hã to mÿ sér nÿtĩmnĩ,” he tóg, Jesus ti.

*Jesus tÿ ùn kãsir ag to há
(Mt 11.25-27; 13.16-17)*

²¹ Kÿ tóg Jesus mÿ sér tĩ, hora ên kã. Topê kuprĩg tÿ ti krĩn kÿ tóg ti mÿ sér tĩ: “jóg’,” he mũ. “Tÿ ã tóg kanhkã tân ag kãfór kar nĩ, kar ã tóg tÿ êprã ke ag kãfór nĩ gé,” he tóg. “Inh mÿ tóg há tĩ, ã tÿ nén han mũ ti. Û tÿ: “ki kanhró mág inh nĩ,” he mũ ag mÿ ã tóg ã jykre ven ja tũ nĩ. Ag mÿ ã tóg kãmén ja tũ nĩ. Û tÿ gĩr ri ke ki kagtĩg ag hã mÿ ã tóg ven ja nĩ, ã jykre ti,” he tóg. “Hÿ, hã vë. ã tÿ nén to jykrén mũn hã vë, hã kÿ ã tóg ag hã mÿ ã jykre ti nĩm. Hã ra tóg há tãvĩ nĩ, jóg’,” he tóg, Jesus ti. ²² Kÿ tóg ã mré mũ tĩ ag mÿ: “inh jóg tóg inh mÿ tovãnh kãn, ã tÿ nén han ja kar ti,” he mũ. “Kÿ ù pi(jé) ti kósin ki kanhró nĩ’. Inh jóg ne inh ki kanhró nĩ’. Kÿ ù pi(jé) inh jóg ki kanhró nĩ gé’. Inh hã ne ti ki kanhró nĩ’, isÿ tÿ ti kósin nĩn kÿ. Hã ra sóg ãjag mÿ ti kãmén jé kãtĩ mũ, inh jóg ti. Isÿ tag to ùn kuprêg mũ ag hã mÿ sóg ti kãmén tĩ, inh jóg ti,” he tóg, Jesus ti.

²³ Kÿ tóg ã mré mũ tĩ ag mÿ nén ù kãmén mũ gé. Vyrmÿ tóg ag mÿ ke mũ, kÿ tóg: “ãjag hã ne vég mũ’, Topê jykre ti, hã kÿ Topê tóg ãjag ve há han mũ,” he mũ. “Sér pẽ ti tĩ, ù tÿ ti jykre vég mũ ag mÿ,” he tóg, Jesus ti. ²⁴ “Ki hã sóg tó mũ, ha mẽ. Û tÿ hên ri ke ag vÿ inh ve sór tãvĩ ja nÿtĩgtĩ, vãsÿ, ãjag tÿ ùri nén vég mũ tag ti. Hã ra ag tóg inh mur ken jo kãgter kãn. Topê vĩ tó tĩ ag ja vë, pã’i mág ag ja vë, hã kÿ ag tóg ãjag tÿ nén vég mũ ve sór tãvĩ ja nÿtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ãjag tÿ ùri nén mẽg mũ ti. ãjag hã ne mẽg mũ inhhã’,” he tóg, Jesus ti, ti mré mũ tĩ ag mÿ.

Samaria tá ke to comparação

²⁵ Kÿ vãhã Topê vĩ to professor ù vÿ ag kãmĩ jëgnẽ mũ, kÿ tóg Jesus ki jëmẽ sór mũ. Ti tÿ ón kÿ ti vĩ mẽ sór vë, hã kÿ tóg ti mÿ: “Senhor’,” he mũ. “Inh hÿn hẽ ri kenh mũ, isÿ rĩr krÿg ja tũ ve jé?” he tóg, Jesus mÿ.

²⁶ Kÿ Jesus tóg ti mÿ: “ne nÿ hÿn rán kÿ nĩ, Topê vĩ ki?” he mũ. “Topê jykre tÿ ne han jé ã ke mũ hÿn’?” he tóg. “To ke há ã tóg nĩ, ha inh mÿ tó,” he tóg.

²⁷ Kÿ tóg ti mÿ: “Topê vÿ tÿ ã kri ke nĩ, kÿ ti hã to há nĩmnĩ, ti ki rã há han nĩ, ti to jykre pir nĩmnĩ, ti to tar nĩmnĩ, ti mÿ ã tÿ nén han mũ kar ên han nĩ, ha mẽ. Kÿ ã régre kar ki rĩr nĩmnĩ gé, ã tÿ vënh ki rĩr há han ri ke. Topê tÿ nén tón hã vë,” he tóg, Topê vĩ to professor ti.

²⁸ Kÿ Jesus tóg: “hÿ,” he mũ. “Ki hã ã tóg tó mũ,” he tóg. “Tag han ra, kÿ ã tóg rĩr krÿg ja tũ venh ke mũ,” he tóg.

²⁹ Hã ra tóg ti mÿ há tũ nĩ, Jesus vĩ tag ti, hã kÿ tóg ti mÿ: “kÿ ù nÿ tÿ inh régre nĩ?” he mũ.

³⁰ Kÿ Jesus tóg ti mÿ tag tó mũ, ha mẽ. “Kejên ù tóg nĩgtĩ. Hã ra tóg Jerusalém tá kãtĩg kÿ Jericó ra tĩ mũ. Êprÿ jagma, êmĩn jagma ùn jykre kórég ag tóg ti jo vãjig mũ, bandido ag. Kÿ ag tóg ti kãgmĩ kÿ ti kur kunũg mũ. Ti mrãnmrãn ag tóg mũ. Ti tén kren ag tóg mũ, kÿ ag tóg hã ki ti tovãnh kar mũ mũ sir, ti tũ mãn kãn kÿ. Kÿ tóg tá nÿ nĩ sir.

³¹ Ti tÿ tá nÿ ra ù tóg êprÿ ên jagma kãtĩ mũ gé. Topê tũ ki rĩr tĩ ù vë. Ti vég tóg mũ, ùn vësÿrénh kÿ nÿ ên ti, hã ra tóg ti venh rã tũ nĩ. Êmĩn jagma tóg tĩ mũ.

³² Kÿ vãhã Levi krẽ ù tóg êprÿ jagma kãtĩ mũ gé. Tá jun kÿ tóg ti vég mũ gé, hã ra tóg ti venh rã tũ nĩ gé. Êmĩn jagma tóg tĩ mũ gé sir.

³³ Kÿ vãhã Samaria tá ke ù tóg êprÿ jagma kãtĩ mũ gé. Kÿ tóg tá jun mũ, kÿ tóg ti vég mũ. ³⁴ Kÿ tóg ti venh rã mũ inhhã. Ti kÿgtãg tóg mũ sir, azeite tÿ, vinho tÿ ke gé, ti mÿ to tĩn kÿ. ã kur tÿ tóg ti pãg mũ sir. Kÿ tóg ã mẽg kri ti nĩm mũ, ã tÿ ti ma tĩg jé. Hã kÿ tóg ag tÿ ìn krẽm nũr jafã tá jun mũ sir. Kÿ tóg tá ti ki rĩr mũ.

³⁵ Tÿ vaj kÿ tóg tĩg mãn sór mũ, hã kÿ tóg ù tÿ ìn ki rĩr mũ ên mÿ jãnkamy régre vin mũ, kÿ tóg ti mÿ: “ti ki rĩr há han,” he mũ. “Jãnkamy tag tÿ ã mÿ tá krÿg tũn kÿ sóg ã mÿ kajãm mãn mũ, sÿ vÿn ken kÿ,” he tóg. “Kajãm kãn jé sóg ke mũ, sÿ vÿn ken kÿ,” he tóg, Samaria tá ke ên ti. Ti tÿ ùn kaga ki rĩr mũn hã vë,” he tóg, Jesus ti.

³⁶ Kÿ tóg: “kÿ ùn tãgtũ ag vÿ ti ve ja nĩ. Ag kã ù tÿ hẽ nÿ tÿ ti régre ja nĩ, ag tÿ ùn vóg kónãn ja ên régre? Ha to jykrén (ke)ma',” he tóg, Jesus ti, Topẽ vĩ to professor ên mÿ.

³⁷ Kÿ ù tÿ ti ki jẽmẽg mũ ên tóg ti mÿ: “ù tÿ ti jagãgtãn mũ ên vÿ tÿ ti régre ja nĩ,” he mũ.

Kÿ Jesus tóg ti mÿ: “hÿ, tó há han ã,” he mũ. “Kÿ ên ri ke han nĩ. Ûn vësÿrénh mũ ag jagãgtãn kãn nĩ, ti ri kén,” he tóg, Jesus ti. Ti tÿ ù tÿ ón kÿ ti ki jẽmẽg mũ mÿ tón há vẽ.

Jesus tÿ Maria mré Marta fag venh tĩg

³⁸ Kejẽn ag tóg mũ mũ, Jesus ag, kÿ ag tóg êmã sĩ ù ki junjun mũ. Tá ù fi tóg nĩ nĩ, fi jijin há vÿ: Marta, he mũ. Ên fi vÿ Jesus mÿ: “inh ãn kãra ge jẽg, ãjag tÿ ãg mré nÿtĩ jé,” he mũ.

³⁹ Kÿ fi jãvy fi vÿ nĩ gé, há vÿ: Maria, he mũ. Kÿ Maria fi vÿ Jesus mré nĩ nĩ, ti vĩ jẽmẽ jé. ⁴⁰ Há ra Marta fi vÿ rãnrãj (ka)mẽ nĩ, Jesus ag mÿ vễjẽn han jé. Jãvo Maria fi tóg nĩ nĩ.

Kÿ Marta fi tóg Jesus mÿ: “Senhor',” he mũ. “Rãnrãj mág han tĩ sóg nĩ, há ra fi tóg nĩ nĩ. Fi mÿ ké, fi tÿ inh mré vễjẽn ki rĩr jé,” he fi tóg mũ.

⁴¹ Há ra Jesus tóg fi mÿ: “krĩ kufy ã tóg nĩ, nén ù tũ to, há ra fi tóg inh vĩ jẽmẽg nĩ nĩ,” he mũ, Marta fi mÿ. “Vễjẽn to vãnh kutãn tũg nĩ. ⁴² Nén ù pir há ne há nĩ', há vÿ: inh vĩ, he mũ. Maria fi vÿ inh vĩ há jẽmẽ sór mũ, kÿ sóg fi mÿ: “ha nén ù han,” he jãvãnh nĩ. Nén ù há kuprẽg fi tóg, fi tÿ inh vĩ mẽ sór kÿ,” he tóg, Jesus ti, Marta fi mÿ.

11

Ëg tÿ Topẽ mré vēmén

(Mt 6.9-15; 7.7-11)

¹ Kejẽn tóg Topẽ mré vĩ mũ, Jesus ti, êmã ù tá nĩ kÿ. Ti tÿ Topẽ mré vēmén kar kÿ ti mré mũ tĩ ag tóg ti mré vĩnh kãmũ mũ. Kÿ ag tóg ti mÿ: “Senhor',” he mũ. “Ëg kanhrãn nĩ, ãg tÿ Topẽ mré vĩ há han jé. João vÿ ã mré mũ tĩ ag kanhrãn. Ge ki ãg kanhrãn nĩ gé,” he ag tóg, Jesus mÿ.

² Kÿ tóg ag kanhrãn kÿ ag mÿ:

“Topẽ mré vĩ kÿ tag tómnĩ, ha mẽ,” he mũ.

“Ëg jóg mág, ã jyjy tó ãg tóg tĩ.

Kÿ vãnh kar jé ã tÿ tÿ ùn mág nĩ vé.

Ëg jé kãnhmar ã tÿ tÿ ãg pã'i nĩ vé.

³ Ëg mÿ ãg jẽn ti nĩm, kurã kar ki, ãg tÿ kurã kar ki ko tĩ ên.

⁴ Kÿ ãg mÿ vãnh pãte fón nĩ, ãg tÿ ã vĩ mranh ja ti, há jé ãg tóg ãg tÿ jagnẽ to jũ tÿ jagnẽ mÿ vãnh pãte fón ke mũ gé.

Kÿ ãg tÿ ã vĩ mranh sór kÿ ãg kren han nĩ, ãg tÿ mranh tũ nĩ jé,” hemnĩ,” he tóg, Jesus ti.

⁵ Kÿ tóg ag mÿ ãg tÿ Topẽ mré vēmén tĩ ên kãmén mãn mũ. Kÿ tóg ag mÿ: “kejẽn ù tóg nĩgtĩ,” he mũ. “Kuty si há tá tóg ã régre ãn ki jun mũ. Kÿ tóg ti mÿ: “régre',” he mũ. “Inh mÿ êmĩ tãgtũ nĩm, sÿ kar ã mÿ ti ri kén kÿ nĩm jé,” he tóg. ⁶ “Inh mré ke ù vÿ jun. Kór há tá tóg kãtĩg, kuvar há tá. Há ra sÿ ti mÿ ne han ke tóg tũ tĩ,” he tóg, ã régre mÿ.

⁷ Kÿ ti régre tóg ti mÿ: “há ra sóg nũr nÿ nĩ,” he mũ. “Kar inh krẽ tóg inh mré nũgnũr nÿtĩ gé. Jãnkã vÿ nĩfénh kÿ jẽ nĩ. Há kÿ tóg inh mÿ vẽnhmÿ tĩ, inh nĩnh ke mũ ra, sÿ ã mÿ êmĩ nĩm jé. Û ki jãvãnh,” he tóg ti mÿ.

⁸ Há ra tóg sir to vĩ mãn', to vĩ mãn' he mũ. Há kÿ tóg nĩ kÿ ti mÿ nĩm mũ sir, ti tÿ ti mÿ êmĩ to vĩ mũ ti. Ti régre vẽ, ù tÿ ti mÿ to vĩnh kãtĩ mũ ti. Ge ra tóg ti mÿ nĩm ke tũ nĩ vẽ, ti tÿ tÿ ti régre ra. Ti tÿ ti mÿ to vĩ mãn', to vĩ mãn' he tugrĩn tóg sir ti mÿ nĩm mũ jãvo. Ëg tÿ Topẽ mré vĩ ri ken há vẽ,” he tóg, Jesus ti.

⁹ “Ha mẽ, sÿ ãjag mÿ nén tó mũ tag ti. Topẽ mÿ nén kar to vĩmnĩ, kÿ tóg ãjag mÿ han mũ sir. ãjag tÿ ti mÿ nén ù to vĩ mũ ên jãvãnh nĩ, kÿ ãjag tóg venh ke mũ sir. Ti mré vĩ kÿ ãg tÿ ti jãnkã tÿ tórón tórón ke ri ke han nĩ, kÿ tóg ãjag mÿ ti róm ri ke han mũ, ti tÿ ãjag mÿ ãjag tÿ nén to vĩ mũ ên han kÿ. ¹⁰ Hÿ, há vẽ. ãjag tÿ ti mÿ nén to vĩn kÿ tóg ãjag mÿ han mũ. ãjag tÿ ti jãvãnh kÿ ãjag tóg venh ke mũ. ãjag tÿ ãg tÿ jãnkã tÿ tórón tórón ke ri

ke han kŷ tóg ājag mŷ ti róm ri ke han mŷ. ¹¹ Kejĕn ājag kósin tóg ājag mŷ pirā to vī mŷ. Kŷ ājag pi(jé) ti mŷ pŷn nĭm ke mŷ'. Pirā hā nĭm jé ājag tóg ke mŷ. ¹² Kejĕn tóg ājag mŷ garĭnh ovo to vī mŷ, ājag kósin ti. Kŷ ājag pi(jé) ti mŷ pŷn kakrā nĭm ke mŷ'. Garĭnh ovo hā nĭm jé ājag tóg ke mŷ. ¹³ Jykre pāno ājag nŷtĭ. Ājag jykre pāno (hā) ra ājag tóg ājag krĕ mŷ nĕn ũ há nĭm tĭ. Ge ti nĭ gé, ājag tŷ Topĕ mŷ nĕn ũ to vĭn kŷ. Nĕn ũ há hā nĭm jé tóg ke mŷ. Hā ra tóg ājag kǎfór han tĭ, ĕg jóg tŷ kanhkā tá nĭ ti. Ājag tŷ ti mŷ to vĭn kŷ tóg ā kuprĭg tŷ ājag jagrĕ han ke mŷ mŷr, Topĕ ti," he tóg, Jesus ti.

Jesus tŷ Topĕ jykre hā han kŷ tar nĭ

(Mt 12.22-30; Mc 3.20-27)

¹⁴ Kejĕn tóg ũn jagrĕ kórég mŷ ti jagrĕ kutĕm mŷ. Ti vĭ vānh han ja tóg nĭ, ti jagrĕ ti. Jesus tŷ ti kutĕm kar tóg vĭ há nĭ sir. Kŷ tóg vĕnh kar mŷ e tĭ sir, ag mŷ tóg sér tĭ sir. ¹⁵ Hā ra ũ ag tóg ti to: "jagrĕ kórég ti nĭ," he mŷ. "Nĕn-Kórég ag pā'i vŷ tŷ ti jagrĕ nĭ, Satanás ĕn, Belzebu he mŷ ĕn," he ag tóg mŷ, ón kŷ. "Hā kŷ tóg Nĕn-Kórég ag pan tĭ, ag jagrĕ kórég ag. Nĕn-Kórég ag pā'i jykre tŷ tóg ag pan tĭ," he ag tóg ón kŷ, Jesus to. ¹⁶ Hā ra ũ ag tóg ón kŷ ti jykre ve sór mŷ gé, kŷ ag tóg ti tŷ ĕg tŷ nĕn han vānh han mŷ ve sór mŷ sir, ti tŷ ag mŷ kanhkā jykre ven jé.

¹⁷ Hā ra Jesus tóg ki kanhró nĭ, ag tŷ nĕn to jykrĕn mŷn ki. Hā kŷ tóg ag mŷ: "pā'i pir krĕm ke ag tŷ jagnĕ kato tĕn kŷ ag tóg jagnĕ kǎgtĕn kǎn ke mŷ," he mŷ. "Īn pir krĕm ke fag tŷ jagnĕ kato tĕn kŷ fag tóg jagnĕ kǎgtĕn kǎn ke mŷ gé sir. ¹⁸ Ge ti nĭ, Nĕn-Kórég ag jykre ti. Nĕn-Kórég ag tŷ jagnĕ kato tĕn kŷ ag tóg jagnĕ tŷ tŷ' hĕnh mŷ gé vĕ, Satanás ag. Hā kŷ tóg vĕnhmŷ nĭ, ājag vĭ ti, ājag tŷ iso: "Satanás jykre tŷ, Belzebu ĕn jykre tŷ tóg Nĕn-Kórég ag pan tĭ," he mŷ ti. Ag tŷ jagnĕ kato tĕgtĕ to ken hā vĕ sir, ha mĕ," he tóg, Jesus ti. ¹⁹ "Belzebu jykre tŷ tóg ag pan mŷ, Nĕn-Kórég ag," he ājag tóg tĭ iso. Ājag mré ke ag to jykrĕn nĭ. Nĕn-Kórég ag pan ag tóg tĭ gé, ājag mré ke ag. Ag pi(jé) Satanás jykre ki ag pan tĭ'. Topĕ jykre ki ag tóg ag pan tĭ (mŷr') Ājag tŷ tag to jykrĕn kŷ ājag tóg inh jykre há ki kanhrān ke mŷ vĕ," he tóg ag mŷ, Jesus ti. ²⁰ "Topĕ kuprĭg jykre tŷ sóg Japo ag pan tĭ mŷr, ha mĕ. Topĕ kuprĭg tŷ Japo ag pan kǎn kŷ Topĕ tóg tŷ ĕg pā'i nĭ vĕ, mŷr. Tag to jykrĕn nĭ," he tóg, Jesus ti.

²¹ "Ū tŷ é he (ka)mĕ ag tóg ājag tŷ ki rĭr há han ti. Ag rógro vŷ jĕgtĭ, kŷ ag tóg ājag ĩn ki rĭr tĭ sir, ũ tŷ ag tŷ mǎg tŷ nĭn jé. Kŷ ũ tóg ag tŷ vóg ke tŷ nĭ gé, ag tŷ ki rĭr há han kŷ. ²² Kejĕn ũ tóg ũ tóg ũ tŷ é he (ka)mĕ ĕn in tá jun mŷ, ũ tŷ ti tar kǎfór nĭ ti. Ti rará kǎfór nĭn kŷ tóg ti tŷ hĕn ri kĕnh mŷ sir. Kŷ tóg ti rógro vǎg mŷ. Ti tŷ ũn kǎgtĕn jafǎ vǎg tóg mŷ, kŷ tóg ti tŷ mǎn kǎn mŷ gé sir. Ge ti nĭ, isŷ nĕn han mŷ ĕn ti. Ū tŷ é he (ka)mĕ ri ke ti nĭ, Japo ti, hā ra sóg ũn tar ĕn ri ke nĭ," he tóg.

²³ "Ājag tŷ tŷ inh mré ke tŷ nŷtĭn hā kŷ ājag tóg inh kato tĕgtĕ mŷ. Ājag tŷ inh mré ĕprǎ ke ag tŷ Topĕ to kǎmŷ han tŷ nĭn kŷ ājag tóg ag kǎmŷ kamĕg mŷ," he tóg.

Vĕnh jagrĕ kórég vŷn kĕnh ke

(Mt 12.43-45)

²⁴ "Kejĕn sóg vĕnh jagrĕ kórég ũ kutĕm mŷ. Kŷ tóg ga kórég mĭ tĭ mŷ, ti jagrĕ ĕn ti. Goj venh ke tŷ tóg nĭ, tá. Vĕnhkǎn ke tŷ tóg nĭ gé, ti tŷ hĕ ri ken kŷ vĕnhkǎn ke tŷ tĭn kŷ. Kŷ tóg vāhā to jykrĕn mŷ sir. "Inh hŷn ĕn ra tĭg mǎn ha, sŷ ũ tá kǎkutĕ ja ĕn ra. Inh mŷ tóg tŷ ĩn ri ke ja nĭ, kŷ inh jé hŷn ti kǎra rǎ mǎn ha," he tóg mŷ, ti jagrĕ ĕn ti. ²⁵ Kŷ tóg ti venh kǎtĭ mŷ. Hā ra tóg sir krĭ há nĭ. Kŷ tóg ti mŷ ĩn há ri ke nĭ sir, ĩn prur, ĩn sĭnvĭ ri ke. ²⁶ Kŷ tóg Nĕn-Kórég tŷ 7 (ke) ag mŷ tónh tĭ mŷ sir. "Ha kǎmŷ jĕg," he jé tóg ke mŷ. Hā ra ag jykre pāno tóg ti jykre pāno kǎfór nĭ. Kŷ ag tóg sir ũ ĕn kǎge ge mŷ, tŷ ag tóg ti jagrĕ nŷtĭ sir, isŷ ũn mŷ ti jagrĕ pir kutĕm ja ĕn ti. Hā kŷ tóg kórég távĭ nĭ sir. Ti jagrĕ kórég pir kutĕm inh nĭ vĕ, hā ra ũ tŷ 8 (ke) ag tóg tŷ ti jagrĕ nŷtĭ, ti tŷ inh ki rǎ tŷ nĭn kŷ," he tóg, Jesus ti. Ti tŷ ag mŷ vĕnh jagrĕ jykre tón hā vĕ.

Topĕ tŷ ĕg ve há han ke

²⁷ Kÿ ù tÿ ti vÿ mÿg mü ù fi tóg prÿr mü sir, fi tÿ ti vÿ tag mÿ kÿ. Ûn e ãn kãmÿ fi tóg jÿ nÿ, kÿ fi tóg ti mÿ ke mü. “!..Topÿ vÿ ã mÿnh fi ve há han, fi tÿ ã han tugrÿn, fi tÿ ã pafãm tugnen..!” he fi tóg, prÿr kÿ. ²⁸ Kÿ Jesus tóg fi mÿ: “hÿ,” he mü. “Hã ra Topÿ vÿ ã ve há han ke mü gé, ã tÿ ti vÿ jÿmÿn kÿ. Hã kÿ ã tÿ ti vÿ mÿ kÿ ke króm nÿ, kÿ tóg ã ve há tävÿ han ke mü,” he tóg, Jesus ti, ù tÿ prÿr mü ãn fi mÿ.

Jesus tÿ ón kÿ milagre han ke tÿ

(Mt 12.38-42)

²⁹ Hã ra ù tÿ hÿn ri ke ag tóg sir tá junjun mü, ti vÿ mÿ jÿ. Kÿ tóg fór tävÿ tÿ. Kÿ Jesus tóg ag mÿ: “kórég äjag nÿtÿ,” he mü. “Ón kÿ äjag tóg nÿn han vãnÿ ve sór mü. Venh ke tÿ äjag tóg nÿ. Nÿn ù pir há ve jÿ äjag tóg ke mü, há vÿ: Jonas tÿ nÿn ve ja ãn ri ke, he mü,” he tóg. ³⁰ “Jonas vÿ cidade tÿ Nínive tá ke ag mÿ Topÿ vÿ tó ja nÿ, kÿ ag tóg ti vÿ mÿ há han ja nÿ. ãn ri ke han jÿ sóg ke mü, äjag mÿ. Tÿ sóg ãprã ke fi kósin ãn nÿ,” he tóg. ³¹ “Kÿ pã'i mág ãn fi, kanhkã täpér tÿ sul tá kätÿg ja ãn fi, tä tá kätÿg ja ãn fi vÿ nÿnh ke mü gé, kurã tÿ ãgno ki, sÿ vÿnh kar jÿkre venh ke kurã ãn ki. Äjag mré fi tóg jÿnh mü, kÿ Topÿ tóg äjag mÿ vÿ kónãn ke mü, fi ve kÿ. Kanhkã fyr ja tá fi tóg kätÿg ja nÿ, vãsÿ, fi tÿ pã'i mág tÿ Salomão vÿ mÿ jÿ. Salomão kãfór vÿ tÿ inh nÿ, há ra äjag tóg inh vÿ mÿ jãvãnÿ nÿtÿ fi jãvo,” he tóg. ³² “Kÿ Topÿ vÿ Nínive tá ke ag ve kÿ äjag mÿ vÿ kónãn ke mü gé, kurã tÿ ãgno ãn ki, ha vemnÿ. Nínive tá ke ag tÿ Jonas vÿ mÿ kÿ ag tóg äjag jÿkre togvãnÿ ja nÿ. Tÿ sóg Jonas kãfór nÿ, há ra äjag tóg äjag jÿkre tovãnÿ jãvãnÿ nÿtÿ, sÿ äjag mÿ tó tÿ (há) ra,” he tóg, Jesus ti.

Jÿngrÿ ri ke ãg nÿtÿ

(Mt 5.15; 6.22-23)

³³ “Ëg tÿ lampião grug kÿ ãg pi(jÿ) ïn krÿm péju kÿn fÿg tÿ', ãg pi(jÿ) kÿj krÿm fÿg tÿ'. Ti fÿg jãfã kri ãg tóg fÿg tÿ, lampião gru ti. Kÿ ãg tóg ti gru tÿ ve há jÿgtÿ, ãg tÿ ïn kãtã kãmü kÿ,” he tóg, Jesus ti.

³⁴ “Ëg kanÿ há tóg tÿ ãg tÿ ve jãfã nÿ. Kÿ tóg ãg jo kurã han tÿ, ãg kanÿ ti, ti há nÿn kÿ. Kÿ tóg ãg jo kurã kar nÿ sir, ãg kanÿ há nÿn kÿ. Ëg kanÿ kórég nÿn kÿ tóg ãg jo kuty ke kãn mü sir. Kÿ tóg ge nÿ, ãg jÿkre kórég ti. Ëg kanÿ kórég ri ke ti nÿ, ãg jo kuty han tóg tÿ. ³⁵ Kÿ vÿnh kanhrãn nÿ. Ke tÿ nÿ mü ra tóg äjag jo kuty ri ke nÿ. Vÿnh jÿkre kórég há vÿ. Kÿ vÿnh jÿkre kórég han sór tÿg nÿ. ³⁶ Äjag jo kurã nÿn kÿ tóg há tävÿ nÿ, äjag jo kuty tÿ nÿn kÿ, äjag jo kuty sÿ tÿ nÿn kÿ ke gé. Äjag jÿkre há tävÿ nÿn kÿ tóg äjag jo kurã ri ke nÿ. Kÿ äjag tóg sir lampião gru ri ke nÿtÿ gé. Lampião gru mág nÿn kÿ tóg kómkom ke tÿ, ãg kanÿ jo, kÿ tóg ãg mÿ jÿngrÿ há han tÿ. Ge ãg nÿtÿ, ãg jÿkre há tävÿ nÿn kÿ, ti kórég sÿ tÿ nÿn kÿ,” he tóg, Jesus ti. Ti tÿ ag mÿ Topÿ jÿkre há tón há vÿ.

Jesus tÿ ùn jÿkre régre ag mÿ vÿ kónãn

(Mt 23.1-36; Mc 12.38-40)

³⁷ Ti tÿ ag mré vÿmÿn kar Fariseu ù tóg ti mÿ: “inh mré jÿn kätÿg,” he mü. Kÿ tóg ti mré tÿ mü, ti mré jÿn jÿ, Jesus ti. ³⁸ Hã ra Jesus tóg Judeu ag jÿkre han ja tÿ nÿ, ag jÿn jÿ ag tóg vÿnh nÿgpég tÿ. Kÿ tóg Fariseu ãn mÿ e tÿ. Kÿ tóg to jÿkrÿn kónãn mü sir.

³⁹ Kÿ Jesus tóg ki kanhró nÿ, kÿ tóg ti mÿ kãmÿn mü. “Fariseu vÿ tÿ äjag nÿtÿ,” he tóg. “Kÿ äjag tóg copo ven ja kugpég tÿ, pÿnky ven ja ke gé, há ra ti kãtã ke tóg kavÿj nÿ. Kÿ äjag jÿkre vÿ ge nÿtÿ gé. Jÿkre há nÿ ve äjag tóg nÿtÿ, há ra äjag tóg vÿnh jÿkre pãno han tÿ, há vÿ: jãnkamy to ag lograr he tÿ, he mü, äjag prÿ tÿ fag mré nÿ, he mü gé. ⁴⁰ Krÿ tÿ pÿ äjag nÿtÿ. Û tÿ ãg ven ja han mü vÿ ãg jÿkre han mü gé mÿr. Ëg jÿkre há nÿn kÿ ãg ven ja vÿ há nÿ gé. ⁴¹ Û jagãgtãn ra, äjag tÿ nÿn ù tÿ. Vÿnh jÿkre há kar han ra, kÿ tóg äjag tÿ nÿn ù kar jãnhkri nÿ ri ke nÿ sir,” he tóg.

⁴² “Fariseu', Topÿ vÿ äjag ve kónãn. Ón kÿ äjag tóg Topÿ mÿ äjag jakré tÿ dízimo han kãn tÿ. Äjag jakré tÿ hortelã tÿ 10 (ke) nÿn kÿ äjag tóg Topÿ mÿ ùn pir nÿm tÿ, dízimo han kÿ. Äjag jakré tÿ arruda tÿ äjag tóg dízimo nÿm tÿ gé, äjag jakré tÿ vÿnh kagta kar tÿ mÿr, äjag tÿ nÿn ù kar mré há. Nÿn ù kar tÿ äjag tóg dízimo vin tÿ, Topÿ mÿ. Hã ra äjag tóg

věnh jykre kuryj han tũ nĩ jãvo. Topě to há tũ ãjag tóg nýtĩ, ti vĩ jẽmẽ jãvãnh ãjag tóg nýtĩ. Æjag tỹ ti tỹ ěg jyvěnh ki króm mré hã ãjag jakré tỹ dízimo vin ra tóg há tãvĩ nĩnh mũ vễ, ha mẽ. Hã ra ãjag tóg ki króm sór tũ nĩgtĩ,” he tóg.

⁴³ “Fariseu', Topě vỹ ãjag ve kónãn. Věnh kanhrãn jafã krẽm ãjag tóg vễnh kãpãm kỹ nýtĩ, vễnh kar tỹ ãjag ve jé. Cidade kuju tá ãjag tóg mũgtĩ, kỹ vễnh kar tỹ ãjag mỹ: “Senhor, ã mỹ há?” hen kỹ tóg ãjag mỹ sér tĩ. ⁴⁴ Topě vỹ ãjag ve kónãn mỹr. Vễnh kej si ri ke ãjag nýtĩ, vễnh kej to ró tũ ri ke. Kri mũ ag tóg tĩ, vễnh kar, kỹ ag tóg ki kãgtĩg nýtĩ, ti tỹ tỹ vễnh kej nĩ ti. Kỹ ag tóg vễnh vatãnh tá vễnh kavěnh tĩ. Tag ri ke ãjag tóg nýtĩ. Kỹ ãjag krẽm ke ag vỹ Topě vỹ mranh tĩ, ãjag ven kỹ,” he tóg, Jesus ti, Fariseu ag mỹ.

⁴⁵ Kỹ Topě vỹ to professor ũ tóg Jesus mỹ: “ã tỹ Fariseu ag mỹ tag tó kỹ ã tóg ěg to vỹ kónãn tĩ nĩ gé, ag mré,” he mũ, ěg Senhor mỹ.

⁴⁶ Kỹ tóg: “ón kỹ Topě vỹ to professor',” he mũ. “Hỹ, Topě vỹ ãjag ve kónãn gé,” he tóg. “Vễnh kar mỹ ãjag tóg vễnh jykre kufy nĩm tĩ. Kufy jagy ti nỹ, vễnh jykre ěn ti, kỹ ãjag tóg han sór tũ nĩgtĩ. Ge ra ãjag tóg ag mỹ: “ha ki króm,” he tĩ. ⁴⁷ Topě vỹ ãjag ve kónãn mỹr. Æjag jóg'jóg ve ag vỹ Topě vỹ tó tĩ ag kãgtén. Jãvo ãjag tóg ag kej ki rĩr há han tĩ. ⁴⁸ Hã ki ãjag tóg ãjag jóg'jóg ve ag tỹ ag kãgtén to: “há ti nĩ,” he tĩ. Hã ki tóg ãjag mỹ há nĩ mỹr, ag tỹ ag kãgtén ja tugrĩn. Ag hã vỹ ag kãgtén ja nĩ, kỹ ãjag hã nỹ ag kej ki rĩr há han tĩ,” he tóg. ⁴⁹ “Hã kỹ Topě vỹ ãjag to vỹ ja nĩ. Ki kanhró ti nĩ, Topě ti, hã kỹ tóg ãjag to vỹ kónãn ja nĩ, ha mẽ. “Inh vỹ tó tĩ ag jẽgně jé sóg ke mũ ag mỹ, isỹ ũn vin mũ ag ke gé, ag tỹ ag mỹ inh vỹ tó jé. Hã ra ag tóg ag vóg kónãn ke mũ, ag kãgtén jé ag tóg ke mũ,” he ja tóg nĩ, Topě ti. ⁵⁰ Æjag jóg'jóg ve ag vỹ ag kygrěn kãn, hã ra tóg ãjag mỹ há tĩ, hã kỹ Topě vỹ to ãjag vóg kónãn ke mũ. ũ tỹ hěn ri ke ag kygrěn ag tóg, ãjag jóg'jóg ve ag, Topě tỹ ěprã ke ag han kar kỹ. ⁵¹ Ti kãke tóg Abel tén. Ti nón ke ag kãgtén ja ag tóg nĩ gé, ãjag jóg'jóg ve ag, Zacarias mré hã. Topě ĩn jãnkã krẽm ag tóg ti tãnh, Topě mỹ nén ũ pũn jafã ěn ki, Zacarias ti. Topě tỹ jẽgněg mũ ag kãgtén tovãnh tũ pẽ ag nýtĩ, ãjag jóg'jóg ve ag. Hã ra tóg ãjag mỹ há tĩ. Æjag tỹ ag kygrěn kãn ri ke ti nĩ. ũn kãgter mũ tag jagfỹ kajãm kãn jé ãjag tóg ke mũ, ha vemnĩ. Æjag mỹ sóg tó mũ mỹr,” he tóg, Jesus ti.

⁵² “Ón kỹ Topě vỹ to professor', Topě vỹ ãjag ve kónãn. Topě vỹ tỹ ěg kanhrãn mũ ěn ki ge jãvãnh ãjag tóg nýtĩ mỹr'. Kỹ ũ tỹ ki rã sór mũn kỹ ãjag tóg ti mỹ tó kónãn tĩ, ti tỹ ki vễnh fón tũ nĩn jé. Kỹ tóg ěg tỹ ũ jo ĩn nĩfenh ěn ri ke nĩ, ãjag tỹ ag tỹ Topě ki ge kaměg ti,” he tóg, Jesus ti. Ti tỹ ũ tỹ ón kỹ Topě vỹ to professor ag mỹ vỹ kónãn hã vễ.

⁵³ Ti tỹ tag tó kar kỹ tóg hěn ra tĩ mũ sir. Tag pãte Topě vỹ to professor ag tóg ti mré mũ kỹ ti tugnỹm tĩ, Fariseu ag ke gé. Ag tỹ ti vỹ to ti se sór vễ. Hã kỹ ag tóg ón kỹ ti ki jẽmẽgměg mũ. ⁵⁴ Ón kỹ ag tóg ti vỹ jẽměg tĩ gé sir, ag tỹ ti vỹ to ti kãgmĩn jé.

12

Ũn jykre régre ag

(Mt 10.26-27)

¹ Hã ra ũ tỹ hěn ri ke ag vỹ vễnh mãn kỹ nýtĩ nĩ. E tãvĩ ag tóg tĩ ha, mil tỹ hěn ri ke ag. Kỹ ag tóg jãgně sãnsãn mũ sir, ag e nýtĩn kỹ. Kỹ Jesus tóg ag kanhrãn rãn mũ. Æ mré mũ tĩ ag kanhrãn vén tóg mũ, kỹ tóg ag mỹ: “Fariseu ag jykre han sór tũg nĩ,” he mũ. “Pão jẽgĩa jafã ri ke ti nĩ, ag jykre ti, hã kỹ tóg Topě mỹ kórég nĩ. Ag jykre hã vễ, ha mẽ: jykre régre ag nýtĩ. Kỹ tag tóg Topě mỹ kórég tãvĩ nĩ,” he tóg. ² “Ěg tỹ pēju kỹ nén han mũ vỹ vễnh ven kãn ke mũ, ěg tỹ vễnh kar vatãnh tá nén to jykren mũ vỹ vễnh ven kãn ke mũ, kurã tỹ ěgno ki,” he tóg. ³ “Æjag tỹ vễnh kar vatãnh tá vễmén ja ěn mẽ kãn jé ag tóg ke mũ, vễnh kar. Æjag tỹ kékén kỹ nén tó ja ěn tó kãn jé ag tóg ke mũ, jamã hár(a), ãjag tỹ ĩn kãtã nén tó ja ěn. Hã kỹ vễnh jykre régre han tũg nĩ,” he tóg.

Ěg tỹ ěprã pã'i ag kaměg ke tũ

(Mt 10.28-31)

⁴ “Ha mẽ, iso há ãjag nýtĩ. Ag kaměg tũg nĩ, ũ tỹ ěg tén tĩ ag, pã'i ag. Ag tỹ ěg tén kar kỹ ag tóg ěg tỹ hě ri kenh ke tũ nĩ sir. Hã kỹ ag kaměg tũg nĩ. ⁵ Æjag mỹ sóg tónh mũ

ha, ãjag tÿ ùn kamêg ke ti, hã vÿ: Topê, he mÿ. Ti hã ne êg tén kar nÿgme ki êg vãm ki kanhró nĩ', mÿr ha mē'. Kÿ ti hã kamêg nĩ. ⁶ Sēsĩ vãm ag tóg tĩ, jãnkamy kato, êg tÿ ko jé. Jēsĩ tÿ 5 (ke) kato êg tóg jãnkamy pir mäg tĩ. Hã ra Topê pi(jé) ag kã jatun mÿ'. Ag ki rĩr nĩ tóg nĩ, sēsĩ ên ag ki. ⁷ Êg ki rĩr tóg nĩ gé, Topê ti. Êg tÿ nén vég mÿ kar ki kanhró tóg nĩ. Hã kÿ tóg êg gãnh ki kanhró nĩ gé. Nĩkrén kãn ja tóg nĩ, Topê ti, êg gãnh ti. Jēsĩ kãfór ãjag tóg nÿtĩ, Topê mÿ. ãjag kãmĩ ùn pir tóg sēsĩ e kãfór nĩ, ti mÿ. Hã kÿ ag kamêg tÿg nĩ, ù tÿ êg tén sór mÿ ag," he tóg.

Êg tÿ Jesus kãmén ke

(Mt 10.32-33; 12.32; 10.19-20)

⁸ "Hã kÿ sóg ãjag mÿ tag tó mÿ. Êprã ke ag mÿ: "tÿ sóg ti mré ke nĩ," hemnĩ, iso. Ag kamêg tÿg nĩ. Kÿ sóg ãjag tónh ke mÿ gé, Topê tÿ jênê jafã ag mÿ, kurã ên kã, ãjag tÿ tÿ inh mré ke nÿtĩ ti. Tÿ sóg êprã ke fi kósín ên nĩ, ha mē. ⁹ ãjag tÿ êprã ke ag mÿ inh kãmén tÿ nĩn kÿ sóg ãjag tónh ke tÿ nĩ gé, Topê tÿ jênê jafã ag mÿ, ãjag tÿ iso: "ti ki kagtĩg sóg nĩ," hen kÿ," he tóg.

¹⁰ "Tÿ sóg êprã ke fi kósín ên nĩ. Ag tÿ iso vême jÿ han kÿ sóg ag mÿ vênh pãte fón sór mÿ. Ag tÿ hã ra Topê kuprĩg to vême jÿ han kÿ Topê tóg ag mÿ vênh pãte fón mãn ke tÿ nĩ ha," he tóg.

¹¹ "ãjag vin jé ag tóg ke mÿ, pã'i ag mÿ, governador ag mÿ ke gé, ag tÿ ãjag sigse jé. Êg vênh kanhrãn jafã krêm ag tóg ãjag ki jêmê sór ke mÿ, ãjag tÿ inh ki ge kÿ nÿtĩ ti, ha vemnĩ. Hã ra to krĩ kufy han tÿg nĩ, ãjag tÿ ag mÿ inh kãmén ke ên to. ¹² Topê kuprĩg hã ne ãjag kanhrãn ke mÿ', kurã ên kã. Hã kÿ ãjag tóg tónh ke mÿ sir," he tóg, Jesus ti, ã mré mÿ tĩ ag mÿ.

Êg tÿ nén ù to én ke tÿ

¹³ Kÿ ùn e ag kãmĩ ù tóg Jesus mÿ: "Senhor'," he mÿ. "Inh jo inh kãke mré vĩmnĩ, êg tÿ êg panh ter ja tÿ nén kar vênh kãpãm jé, ti kuge ti," he tóg, Jesus mÿ.

¹⁴ Hã ra Jesus tóg ti mÿ: "vó," he mÿ. "Isũ pijé'," he tóg. "Inh pi(jé) ã mÿ ã kuge ve sór mÿ'. Inh pi(jé) ã tÿ vênh kãpãm sór mÿ'," he tóg.

¹⁵ Kÿ tóg ag kar mÿ: "ker nén ù to én hē'," he mÿ. "Êg tÿ nén kar pi(jé) êg rĩr han ke mÿ'. Êg tÿ mág nĩ ra êg pi(jé) mÿ há han ke mÿ'," he tóg.

¹⁶ Kÿ tóg ag mÿ: "vênh jykre há vÿ ge nÿnh mÿ, ha mē," he mÿ. "Ûn rico tóg nĩ ja nĩgtĩ mÿr," he tóg. "Ti japÿ vÿ nén kar kanê e han ja nĩgtĩ. ¹⁷ Kÿ tóg to jykrén mÿ sir, ùn rico ti. "Inh hÿn ne han mÿ ha?" he tóg. "Inh pãjó mág vó, inh pãjó kãsa vó, sÿ krêm isũ kar rãg jé?" he tóg. ¹⁸ "Inh pãjó kókén jé sóg ke mÿ, sÿ ti jêgja ki ùn mág han jé, kÿ sóg krêm isũ kar vin mÿ, inh jakré kanê kar ti," he tóg mÿ, to jykrén kÿ. ¹⁹ "Kÿ sóg jatu nĩ sir. Isũ vÿ prÿg tÿ hên ri ke pétêm mÿ, kÿ sóg rãnhraj mãn ke tÿ nĩ ha. Jatun mÿ sóg jêg nĩnh ke mÿ, kron nĩ jé inh ke mÿ gé. Inh mÿn sér tĩ sir, sÿ jatu nĩn kÿ," he tóg, to jykrén kÿ, ùn rico ti.

²⁰ Hã ra Topê tóg ti mÿ vĩ mÿ. "Krĩ tÿ ã nĩ," he tóg ti mÿ. "Kuty tag kã ã tóg ter ke mÿ ha, kÿ ã tÿ mág tag tÿ tÿ ù tÿ nĩnh ke mÿ ha ke gé. Ma tĩg ke tÿ ã tóg nĩ. ã ter ke vê," he tóg ti mÿ, Topê ti," he tóg, Jesus ti, ù tÿ ã panh tÿ mãn sór mÿ ên mÿ. ²¹ "Ge tóg tĩ, êg tÿ ga kri nén ù há ve sór kÿ, êg tÿ kanhkã tá tÿ nén ù tÿ nĩn kÿ, Topê mré. Êg pi(jé) ga kri êg tÿ mág ên ma mÿnh mÿ'. Êg tÿ kanhkã tá tÿ mág nÿtĩn kÿ tag hã tóg há nĩ," he tóg, Jesus ti.

Êg tÿ nén ù to krĩ kufy han ke tÿ

(Mt 6.25-34)

²² Kÿ tóg ã mré mÿ tĩ ag mÿ: "ha vé," he mÿ. "Vêjên to jykrén kÿ krĩ kufyg tÿg nĩ," he tóg. "Inh hÿn ùri ne konh mÿ'? Inh hÿn ne tunh mÿ'?" he tÿg nĩ. ²³ Topê tÿ êg han ja vê, êg tÿ ga kri mÿ jé. Hã kÿ tóg êg jên ki rĩr ke mÿ gé, êg kur ki ke gé. ²⁴ Sēsĩ to jykrén nĩ. Ag mÿ êkrãn tĩ'? Vó. Ag mÿ ãjag jakré kunÿg tĩ'? Vó. Ag mÿ pãjó han tĩ'? Vó, ke tÿ ag tóg nĩgtĩ, ge ra Topê tóg ag jên tĩ. Jēsĩ kãfór ãjag tóg nÿtĩ, Topê mÿ, hã kÿ tóg ãjag jên

ke mũ gé. ²⁵ Kĩ, Topê tỹ êg jé prêr kỹ êg tóg mũnh mũ gé. Êg pi(jé) mũnh ke tũ nĩ, ti tỹ êg jé prêr kỹ'. Êg tỹ to krĩ kufy han mũ ra êg tóg tĩg mũ. ²⁶ Êg pi(jé) êg krĩ kufy tugrĩn, êg krĩ há tugnĩn mũnh ke tũ nĩ'. Mũ jé êg tóg ke mũ, ti tỹ êg jé prêr kỹ. Hã kỹ nén ù ù to krĩ kufy han tũg nĩ.

²⁷ Ka fej to jykrén nĩ gé. Jatun mỹ tóg mog tĩ. Rãnrãj tũ tóg nĩgtĩ, kur han tũ tóg nĩgtĩ. Hã ra tóg sĩnvĩ nỹtĩgtĩ, ka fej ti, kỹ pã'i mág tỹ Salomão ên kur tóg ri ke tũ nỹtĩ ja nĩgtĩ, ti sĩnvĩ ja ra, vãnh kar kur sĩnvĩ kãfór ti nĩ, Salomão kur ti. Ki hã sóg tó mũ mỹr. ²⁸ Topê hã ne ka fej sĩnvĩ han tĩ'. Hã ra tóg kãnhmar kãgter tĩ, ka fej ti, ti sĩnvĩ ra. Ûri tóg há nỹtĩ, tỹ vaj kỹ tóg kógungun tĩ. Topê tỹ ka fej sĩnvĩ han kỹ tóg ãjag kur ki rĩr ke mũ gé, ha vemnĩ. Kỹ ti to: "ti mỹ êg mỹ kur nĩm mũ vỹ?" he tũg nĩ. ²⁹ "Inh hỹn ne konh mũ', ùri?" he tũg nĩ gé. To krĩ kufy han tũg nĩ. ³⁰ Topê ki ge tũ ag vỹ tag to jykrén mág tĩ. Hã ra êg jóg tỹ Topê vỹ êg ki kanhró nĩ, êg tỹ nén konh ke mũ ti, êg kur ti ke gé. Kỹ to krĩ kufy han tũg nĩ. ³¹ Topê tỹ tỹ êg pã'i nĩ ên hã ve jé vãsãnsãn nĩ. Kỹ tag hã to jykrén nĩ. Kỹ Topê vỹ ãjag mỹ ãjag tỹ nén ve sór mág ên vin ke mũ sir," he tóg, Jesus ti.

Kanhkã tá êg tũ

(Mt 6.19-21)

³² "Kamêg tũg nĩ, ãjag pipir nỹtĩ ra. Êg jóg tỹ Topê vỹ ãjag to há nĩ, hã kỹ tóg ãjag mỹ kanhkã ti ven sór mũ, ha mẽ. ³³ ãjag tỹ nén kar vin nĩ, ùn vêsyrénh mũ ag mỹ. Hã kỹ ãjag tóg kanhkã tá tỹ nén ù mág nỹtĩnh mũ. Tá ãjag kuge tóg tũ' henh ke tũ nĩ. Tag ki êg tóg êg jãnkamy fón tĩ, nén ù kar to. Tá tóg tũ' he jãvãnh nĩ, êg kuge ti. Tá ù tóg péjunh kãtĩg ke tũ nĩ gé, tá ti ga tóg kaggranh ke tũ nĩ gé. Kanhkã tá êg tũ vỹ ge nĩ. Tũg jãvãnh ti nĩ. ³⁴ ãjag tỹ ga kri tỹ nén ù mág nỹtĩn kỹ ãjag tóg ga kri mũ mág sór mũ. ãjag tỹ hã ra kanhkã tá tỹ nén ù mág nỹtĩn kỹ ãjag tóg kanhkã ra mũ sór mũ, kỹ tag hã ne há nĩ'," he tóg, Jesus ti.

Êg tỹ Jesus kãtĩg mãn jãvãnh ke

³⁵ "Êg kur tỹ êg tóg vêsófgĩg tĩ, êg tỹ rãnrãj há han jé. Êg lampião grug êg tóg tĩ, kuty kã, êg tỹ ve há han jé. Ên ri ke han nĩ, ãjag tỹ inh kãtĩg mãn ke jãvãnh kỹ. ³⁶ Kỹ ãjag tóg ùn camarada ri ke nỹtĩ. Kejên ag patrão vỹ hên ra tĩg mũ, ã prũ ke festa mág han jé. Kỹ ti camarada ag vỹ ti tỹ tá vỹn ke jãvãnh nỹtĩ. Ag tỹ ti jãvãnh há han kỹ tóg há tĩ, ag nũgnũr tũ nĩn kỹ. Kỹ ag tóg kãnhmar ti tỹ jãnkã tỹ tórón tórón ke kỹ mênh mũ, kỹ ag tóg ti mỹ róm ke mũ sir, ti jun kỹ. ³⁷ Kỹ tóg kejên jun mũ sir, ag patrão ti. Kỹ tóg sér tĩ, ti camarada ag tỹ ti jãvãnh nỹtĩn kỹ. Kỹ tóg ag mỹ vĩ há han ke mũ sir. Kỹ tóg vêsóg fĩn kỹ ag mỹ: "nĩgnĩ ra ver, mesa to," henh ke mũ sir. Kỹ tóg ag mỹ vễjên ven ke mũ. Ag patrão hã ne ã camarada ag mỹ vễjên ven ke mũ', ha vemnĩ. Ki hã sóg tó mũ," he tóg, Jesus ti. ³⁸ "Hên ri ke mũn tóg meia noite ki jun ke mũ, hên ri ke mũn tóg galo kyr mũ ra jun ke mũ. Ti camarada ag tỹ ti jãvãnh kỹ nỹtĩn kỹ tóg ag mỹ vĩ há tãvĩ han ke mũ sir, ha vemnĩ," he tóg, Jesus ti.

³⁹ "Kỹ tag to jykrén nĩ, ha mẽ. Inh kãtĩg mãn ke vỹ ù tỹ nén ù pigju(g) tĩ kãtĩg ri ke nĩnh mũ. Û tỹ ti ìn krêm nĩ ên pi(jé) ki kanhró nĩ', hora kã ti kãtĩg ke mũ ti. Û tỹ ti tỹ nén ù péju sór mũ tóg ên ge nĩ, ha mẽ. Ti tỹ ti kãtĩg ke hora ki kanhró nĩ (hã) ra tóg ã kanê fãn mũ vễ, ti tỹ ti ìn kãra rã tũ nĩ jé. Hã ra tóg ki kãtĩg nĩ. ⁴⁰ Ge ti nĩ, inh kãtĩg mãn ke ti. Vãnh ki rĩr, vãnh ki êmê. Êprã ke fi kósĩn vỹ kãtĩg ke mũ, ãjag tỹ ti kãtĩg ke to jykrén tũ (hã) ra," he tóg, Jesus ti.

Ûn camarada to comparaço

(Mt 24.45-51)

⁴¹ Kỹ Pedro vỹ ti mỹ: "Senhor'," he mũ. "Ã tỹ ù mỹ ke nê, ã tỹ tó ja tag ti? Ã tỹ ù tỹ ã ki ge tũ ag mỹ ke mỹ, êg mỹ ke mỹ vó?" he tóg, Pedro ti, Jesus mỹ.

⁴² Kỹ êg Senhor tóg ti mỹ: "hỹ," he mũ. "Kejên patrão tóg hên ra tĩg sór mũ, kỹ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Û tỹ ã rãnrãj ki rĩr há han tĩ ên kuprêg tóg mũ, ti tỹ ag mỹ vễjên ven jé, vễjên ke horan ki. ⁴³ Ti tỹ ag

ki rĩr há han kÿ ti patrão vÿ ti mÿ vĩ há han ke mũ, ti kătĩg măn kÿ, ù tÿ ag ki rĩr há han mũ ěn mÿ. ⁴⁴ Tÿ pã'i mág han jé tóg ke mũ, ti tÿ ti tũ ki rĩr kãn jé sir. Ki hã sóg ke mũ, ha mẽ. ⁴⁵ Ti camarada ěn jykre kórég nĩn kÿ tóg vĕnhmÿ nĩ jãvo, ha mẽ. To jykren kÿ tóg: “ĕg patrão vÿ kătĩg vãn ěn han mũ,” he mũ. Kÿ tóg ã mré camarada ag vóg kónãn kÿ ag mrãnmrãn mũ sir, fag ke gé. Kÿ tóg jatun mÿ jĕn mág han mũ, ùn kronkron tĩ ag mré tóg kronkron kÿ pépév tĩ nĩ gé sir. ⁴⁶ Kÿ ti patrão vÿ ti kãnhmÿ jun ke mũ, ha vemnĩ, ti tÿ ti jun ke kurã ki kagtĩg nĩn kÿ, ti hora ti ke gé, kÿ tóg ti vóg kónãn ke mũ gé sir, ti patrão ti, kÿ tóg ti fón ke mũ, Topĕ vĩ mranh tĩ ag mré hã,” he tóg.

⁴⁷ “Topĕ camarada ù vÿ ã patrão kătĩg ken jo ki rĩr há han tũ nĩgtĩ, ti patrão tÿ ti mÿ tó mũ ra. Ā patrão vĩ ki króm tũ ti nĩgtĩ. Ti mrãnmrãn mág jé tóg ke mũ, ti patrão ti, Topĕ ti. ⁴⁸ Û tóg ã tÿ nĕn han ke mẽ ja tũ nĩ, ti patrão vĩ ti, ti camarada ù ti. Hã ra tóg kórég han mũ gé. Kÿ ti patrão tóg ti mrãnmrãn ke mũ gé. Ti mrãnmrãn sĩ han jé tóg ke mũ jãvo. Û tóg vĕnh kanhrãn mág han tĩ. Kÿ Topĕ tóg vĕnh jykre há tãvĩ ve sór mũ sir, ti tÿ ki kanhrãn mág han mũ ěn to. Û mÿ ti vĩ mág tĩ, Topĕ ti, kÿ tóg ti tÿ ki króm há han ve sór mũ gé sir,” he tóg, Jesus ti.

Û tÿ Jesus tugrĩn ĕg kato tĕnh ke

(Mt 10.34-36)

⁴⁹ “Ga kri inh mur, isÿ re pũr tĩg ri ke han jé, hã vÿ: ùn e tÿ inh ki ge mũ, he mũ. Sÿ re pũr tĩg ri ke ěn venh há tóg tĩ, hã ra tóg ver gru tũ nĩ. ⁵⁰ Ti grug to hã sóg vĕsÿrĕnh ke mũ. Iser ke vĕ, kÿ tóg inh mÿ e tĩ. Sÿ ve jãvãn ěn tóg tĩ, inh vĕsÿrĕnh ke ti,” he tóg, Jesus ti.

⁵¹ “Ājag hÿn iso: “vĕnh kar tÿ jagnĕ to há han jé tóg ke mũ,” he tĩ. Hã tũ vĕ. Û tÿ hĕn ri ke tÿ jagnĕ kato tĕ han jé sóg ke mũ, ha vemnĩ. ⁵² Ha vé, ĩn pir krĕm ke fag vÿ jagnĕ kato tĕnh ke mũ. Ûn tãgtũ fag vÿ ùn régre fag kato tĕgtĕnh mũ ha. Kar ùn régre ěn fag vÿ ùn tãgtũ fag kato tĕgtĕnh mũ gé sir. ⁵³ Jagnĕ kato fag jagnĕ to jũgũnh mũ. Û tóg ã kósin kato tĕnh ke mũ, kÿ ù tóg kejĕn ã panh kato tĕnh ke mũ gé. Û fi vÿ ã kósin fi kato tĕnh ke mũ, kÿ fi vÿ ã mÿnh fi kato tĕnh ke mũ gé. Kÿ ù tóg ã má fi kato tĕnh ke mũ, kÿ fi tóg ã jamré kato tĕnh ke mũ gé sir. Ge ti nĩgtĩ,” he tóg, Jesus ti.

Jesus jykre ki kanhrãn

(Mt 16.2-3)

⁵⁴ Kÿ tóg vĕnh kar mÿ tó măn mũ gé, kÿ tóg ag mÿ: “kanhkã ve kÿ Ājag tóg ta ki kanhró nÿtĩ,” he mũ. “Kanhkã góg tÿ tãtã kătĩn kÿ Ājag tóg: “ta vÿ kutĕnh mũ,” he tĩ. Ki kanhró Ājag tóg nÿtĩgtĩ. ⁵⁵ Kar Ājag tóg kãka ki kanhró nÿtĩ gé. “Tag tán kătĩ mũ, kãka ti, kÿn hÿn jũ jagy nĩnh mũ, ha vemnĩ,” he Ājag tóg tĩ gé. ⁵⁶ Ki kanhró Ājag tóg nÿtĩ, ta jykre ti, kãka jykre ti, ga jykre ti ke gé. Hã ra Ājag tóg inh jykre ki kanhrãnran sór tũ nĩ, sÿ ùri Ājag mÿ tó mũ tag ti. Kutu Ājag nÿtĩ, ha mẽ, hã kÿ Ājag tóg ki kanhrãnran sór tũ nĩ,” he tóg, Jesus ti.

ĕg tÿ jagnĕ mÿ vĕnh pãte fón

(Mt 5.25-26)

⁵⁷ “Kÿ Ājag tóg vĕnh jykre kuryj to jykren tũ nĩ gé, Ājag tÿ jagnĕ mÿ vĕnh pãte fón jé, Ājag tÿ ver ga kri mũn kÿ. ⁵⁸ Kejĕn Ājag tóg jagnĕ mÿ vĕnh jykre vĕnhmÿ tó tĩ. Kÿ Ājag tóg pã'i mÿ tónh mũ sir. Ā tÿ ù to jũ mũ ěn vÿ ã tónh tĩg sór mũ. Ti tÿ pã'i tá jun ke to hã ti mré vĩmnĩ. Ti mÿ: “inh mÿ vĕnh pãte fón,” hemnĩ. Ke tũ nĩ mũ ra pã'i vÿ ã jykre pãno venh ke mũ, kÿ tóg polícia mÿ: “ti se ra,” henh ke mũ. Kÿ tóg ã senh ke mũ sir. ⁵⁹ Ha mẽ, tá ã kãnmar kãkutĕ măn ke tũ nĩ. Ā tÿ kajãm kãn kar kÿ ã hĕn ri ke mũn tá kãkutĕ măn ke mũ sir,” he tóg. Jesus tÿ ĕg tÿ jagnĕ mÿ vĕnh pãte fón kãmĕn hã vĕ.

13

ĕg tÿ ĕg jykre tovãn ěn ke

¹ Kejĕn ù ag tóg Jesus tá junjun mũ, hã ra ag tóg ti vĩ mẽ kÿ nÿtĩ. Kurã ěn kã ù ag tóg ti mÿ Galilĕia tá ke ag tó ja nĩ, fóg tÿ pã'i tÿ Pilatos tÿ ùn kãgtĕn ja ěn ag. Topĕ mÿ ag tóg

ājag mēg tãnh ja nĩ, ti mĩ pũn jé, hã ki Pilatos tóg ag kygrēn ja nĩ, hã k̄y ag kyvénh tóg ājag mēg kyvénh mré kutē ja nĩ. Hã kãmén ag tóg, Jesus m̄y, ti t̄y ag m̄y e t̄in k̄y, ag t̄y ũn kãgter m̄u ag to: “ag h̄yn Topē v̄i mranh mág,” hen k̄y. ² K̄y Jesus tóg ag m̄y: “ājag h̄yn Galiléia tá ke ěn to jykrén sór m̄u, ũn kãgter m̄u ěn ag to,” he m̄u. “Topē v̄i mranh mág t̄i ag vē,” he ājag tóg m̄u ag to. “Ag h̄yn vēnh jykre pãno han m̄u nĩ, ag h̄yn Galiléia tá ke ag jykre pãno kãfór han m̄u nĩ, hã k̄y Topē h̄yn tóg ag vóg kónãn mág,” he ājag tóg t̄i ag to. ³ Ke tũ vē hã ra. Ājag ri ke ag tóg n̄yt̄i, m̄yr, ha mē. Ājag t̄y ājag jykre tovãnh tũ n̄in k̄y ājag tóg nũgme ki vár ke m̄u, ha vemnĩ,” he tóg. ⁴ “Ū t̄y 18 (ke) ěn ag to jykrén nĩ, ũ t̄y goj t̄y Siloé tá kãgter m̄u ěn ag. Īn t̄ej ěn tóg ag kri kutē, ĩn vag j̄ē ěn ti, hã k̄y ag kãgter m̄u. Jerusalém tá ke kar ag jykre ri ke ja ag tóg n̄yt̄i. Ag pi(jé) ag jykre pãno ěn kãfór ja n̄yt̄i. Ag ri ke han ja ag n̄yt̄i, ha mē. ⁵ K̄y sóg ājag m̄y ke m̄u. Ājag t̄y ājag jykre pãno tovãnh tũn k̄y ājag tóg nũgme ki vár ke m̄u,” he tóg, Jesus ti.

Ka t̄y figueira to comparação

⁶ K̄y tóg ag m̄y: “ũ t̄y Topē jykre han sór tũ ag v̄y ge n̄yt̄inh m̄u, ha mē,” he m̄u. “Kejēn ũ tóg n̄igt̄i. Ka há krãn ja tóg n̄igt̄i, ka t̄y figueira. Ka kanē ũ vē, ko há ti j̄ē. ěn krãn ja tóg nĩ. Uva kãmĩ tóg ti krãn ja nĩ. K̄y tóg kejēn ti kanē ko sór m̄u, k̄y tóg venh kãt̄i m̄u. Hã ra tóg kanēn ja tũ nĩ. ⁷ K̄y tóg uva ki r̄ir t̄i m̄y: “ti ḡyn ra,” he m̄u. “Pr̄yg tãgtũ tóg nĩ ha, s̄y ti kanē vég tũ ki. Kanēn vãnh ti h̄yn j̄ē. Ti ḡyn ra, ti t̄y ga kókég tũ n̄in jé,” he tóg. ⁸ Hã ra tóg ã patrão m̄y: “ti tovãnh ra ver,” he m̄u, uva ki r̄ir t̄i ti. “Ti p̄en̄in sóg kũm m̄u ver, s̄y ti krēm ga j̄egja han jé ver. ⁹ Hēn ri ke m̄un tóg kanē há hyn han ke m̄u ha. Ke tũ n̄in k̄y sóg ã m̄y ti ḡyn ke m̄u vãhã,” he tóg m̄u, uva ki r̄ir t̄i ti,” he tóg, Jesus ti. Ti t̄y ũ t̄y ã jykre kórég tovãnh sór tũ tón hã vē.

Jesus t̄y vēnhkán ke kurã ki ũn kaga t̄y há' he

¹⁰ Kejēn tóg ag vēnh kanhrãn jafã krēm ag kanhrãn m̄u, Jesus ti, vēnhkán ke kurã ki. ¹¹ K̄y ũ fi tóg tá j̄ē nĩ. Jagrē kórég fi nĩ, hã k̄y fi tóg pãnh ke k̄y j̄ē nĩ. Vēnh ra hã j̄ē kórég fi tóg nĩ, fi jagrē tugn̄in. Pr̄yg t̄y 18 (ke) han fi tóg, fi jagrē t̄y fi kagãg t̄i ki. ¹² K̄y Jesus tóg fi vég m̄u, k̄y tóg fi jé pr̄er m̄u. “Kun̄ig, j̄y,” he tóg. “Ā kaga t̄y sóg tũ' henh m̄u,” he tóg fi m̄y. ¹³ K̄y tóg ã n̄igé t̄y fi kri fig m̄u. K̄y fi tóg vēnh ra hã j̄ēg há han m̄u, ha mē. K̄y fi tóg Topē to v̄i há han m̄u sir.

¹⁴ Hã ra vēnh kanhrãn jafã to pã'i tóg Jesus to jũ m̄u, ti t̄y vēnhkán ke kurã ki fi t̄y há' hen k̄y. Ti m̄y tóg t̄y vēnh rãnrãj nĩ, fi t̄y há' he m̄u tag ti, hã k̄y tóg Jesus to jũ m̄u. K̄y tóg v̄i m̄u sir. Vēnh kar jyv̄en k̄y tóg ag m̄y: “kurã t̄y 6 (ke) hã ki ěg tóg rãnrãj ke m̄u ha,” he m̄u. “Hã k̄y kurã t̄y 6 (ke) ěn ki kãmũmn̄i, ti t̄y ājag t̄y há' hen jé. Vēnhkán ke kurã ki vēnh kygtãg kãmũ tũg nĩ,” he tóg m̄u, pã'i ti.

¹⁵ Hã ra Jesus tóg ti v̄i kãfãn m̄u, k̄y tóg: “jykre régre ã nĩ (m̄yr),” he m̄u. “Vēnhkán ke kurã kã ājag tóg ājag mēg ki r̄ir t̄i gé, monh ki, cavalo ki ke gé, ha mē. Ājag mēg kygvãn ājag tóg t̄i, ājag t̄y ti kron m̄un jé, ti t̄y ĩn kãkã se k̄y j̄ē k̄y, cocho to. ¹⁶ K̄y tag fi v̄y se k̄y j̄ē ěn ri ke j̄ē ja nĩ gé, ha mē. Satanás hã v̄y fi sé', pr̄yg t̄y 18 (ke) ki. ěg jóg'jóg ve t̄y Abraão kósin ũ fi vē, ěg mēg kãfór fi tóg j̄ē, hã ra ã tóg jũ sór m̄u, is̄y vēnh kán ke kurã ki fi t̄y há' hen k̄y, is̄y fi kavãn ri ke han k̄y. Vēnh jykre vēnhm̄y han sór ã tóg nĩ,” he tóg, Jesus ti, pã'i ti m̄y.

¹⁷ Ti v̄i tag to ag tóg m̄y'ãg'ãg m̄u sir, ti kato tē m̄u ag. Hã ra tóg vēnh e ěn m̄y sér t̄i sir. Ag m̄y tóg n̄en ũ kar há han t̄i, hã k̄y tóg ag m̄y sér t̄i sir.

Mostarda fy to comparação

(Mt 13.31-32; Mc 4.30-32)

¹⁸ K̄y Jesus tóg ag m̄y: “Topē t̄y t̄y ěg pã'i n̄inh ke v̄y ge nĩ, ha mē,” he m̄u. ¹⁹ “Vãnh t̄y mostarda fy ri ke ti nĩ. S̄i ti nĩ, ti fy ti. ěg jap̄y ki ěg tóg krãn t̄i, k̄y tóg mog t̄i. K̄y tóg ka ri ke nĩ, ti t̄y p̄ē t̄ej n̄in k̄y. Hã k̄y s̄es̄i tóg kri jagf̄enh ke m̄u, ti p̄ē kri, ti p̄ē mág n̄in k̄y. Topē t̄y t̄y ěg pã'i nĩ kãme t̄y vēnh kar kri r̄um ke to ken hã vē,” he tóg, Jesus ti.

Fermento to comparaçã

(Mt 13.33)

²⁰ Kÿ tóg ag mÿ: “Topê tÿ tÿ êg pâ'i nÿn kÿ tóg tag ri ke nÿnh mÿ, ha mẽ,” he mÿn mÿ.
²¹ “Ûn tÿtá fag vÿ pão han tÿ, farÿnh tÿ. Pão han jé fag tóg pão jêgja jafã tÿ fermento ên tÿ farÿnh mré jêgjãg tÿ. Kejên ù fi tóg farÿnh e kãki ti jãgja jafã pir tÿ kãki vãm ja nÿ, hã ra tóg tÿ sòn ke kãn,” he tóg, Jesus ti. Ti vÿ tÿ vênh kar kri rùm ke kãmén hã vê.

Jãnkã sÿ to comparaçã

(Mt 7.13-14, 21-23)

²² Kÿ Jesus tóg tÿ mÿ. Cidade e fÿn rãm tóg mÿ, êmã kãsir fÿn ke gé. Tÿg kÿ tóg ag kanhrãnrãn mÿ sir. Ge kÿ tóg komêr hã cidade tÿ Jerusalém kukãm tÿ mÿ. ²³ Kÿ ù tóg ti mÿ: “Senhor’,” he mÿ. “Ûn krenkren mÿ ag mÿ pipir nÿtÿ, e nÿtÿ vó?” he tóg ti mÿ. Kÿ tóg ti mÿ: ²⁴ “hÿ,” he mÿ. “Inh ki rã vÿ jãnkã sÿ ra rã ri ke nÿ,” he tóg. “Vãsãn nÿ, ã tÿ ra rã jé. Kejên ù tóg ra rã mÿn ke tÿ nÿ ha. Ên kã ù tÿ hên ri ke ag vÿ ra ge sór mÿ, hã ra ag tóg tÿ hê ri kenh ke tÿ nÿ ha sir. ²⁵ Ìn ki rÿr tÿ ên tÿ nÿfénh ja vê mÿr, hã kÿ ag tóg ÿn kãra genh ke tÿ nÿ ha. Kanhkã to ken hã vê, ÿn ti. Ìn ki rÿr tÿ ên hã ne nÿfénh ke mÿ’, kÿ ãjag tóg sir re tá nÿtÿnh kÿ tÿ tórón’ tórón’ kenh ke mÿ. “Senhor’, êg mÿ róm, êg mÿ nón, jãnkã ti,” he jé ãjag tóg ke mÿ. Hã ra tóg sir ãjag mÿ: “ãjag ki kagtÿg sóg nÿ,” henh ke mÿ, ÿn ki rÿr tÿ ti. “Ãjag tÿ ù nÿtÿ?” he jé tóg ke mÿ. ²⁶ Kÿ ãjag tóg ti mÿ: “ã mÿ êg ki kagtÿg?” henh ke mÿ. “Êg hã vÿ ã mré jên ja nÿ, êg hã vÿ ã mré kron ja nÿ, êg kanhrãn ja ã tóg nÿ, êg jamã tá. Êg hã vê,” he jé ãjag tóg ke mÿ, ãjag tÿ re tá nÿtÿnh kÿ. ²⁷ Hã ra tóg ãjag mÿ: “inh pi(jé) ãjag ki kanhró nÿ’,” henh ke mÿ. “Ãjag pi(jé) tÿ inh mré ke nÿtÿ’. Ha mÿjêg. Vênh jykre pãno han ãjag tóg mÿgtÿ,” he jé tóg ke mÿ, ÿn ki rÿr tÿ ti, ãjag mÿ. ²⁸ ãjag tÿ ra mÿnh ke tá ãjag tóg vêsÿrénh ke mÿ, tá ãjag jã tóg gyngyn ke mÿ, gangan ke jé ãjag tóg ke mÿ, tá. Kór há tá ãjag tóg Abraão venh ke mÿ, tá, Isaque ke gé, Jacó ke gé, Topê vÿ tó tÿ ag kar ke gé. Ên ag kar vÿ Topê tÿ tÿ êg pâ'i nÿ venh mÿ sir, ãjag jãvo. ²⁹ Ên kã Topê ki ge kÿ nÿtÿ kar ag tóg kãmÿnh mÿ, rã jur ja tá, rã pur ja tá, kanhkã fyr tá, rã krêm tÿg ja tá. Kãmÿ kÿ ag tóg Topê tÿ tÿ êg pâ'i nÿ venh ke mÿ, ti tÿ ag ki rÿr nÿ ti, kÿ ag tóg tá jêg nÿtÿnh mÿ ãjag jãvo. ³⁰ Kÿ tag ki ùn kãsir ù ag tóg mág nÿtÿnh mÿ, tá pâ'i nÿtÿnh mÿ. Kÿ tag ki ùn mág ù ag tóg kãsir nÿtÿnh mÿ gé, tá, tere kÿ,” he tóg, Jesus ti.

Jesus tÿ Jerusalém tá ke ag to há nÿ

(Mt 23.37-39)

³¹ Kurã ên kã Fariseu ù ag tóg tá junjun mÿ, Jesus mré vémén jé. Ti mÿ ag tóg: “ha mẽ,” he mÿ. “Pã'i mág tÿ Herodes vÿ ã tén sór mÿ. Hã kÿ vênh péju tÿg, êmã ù ra,” he ag tóg mÿ sir, Jesus mÿ.

³² Kÿ tóg ag mÿ: “mÿg sÿ ri ke ti nÿ, Herodes ti,” he mÿ. “Hã kÿ tóg ke mÿ. Ver sóg vênh jagrê kórég pan mÿ, ùn kagyga ag tÿ há’ he jé sóg ke mÿ, ùri, vaj kÿ ke gé, kurã tÿ hên ri ke ki. Kãnhmar sóg ter ke mÿ, inh kurã ki, ha vemnÿ. ³³ Ûri sóg ver tÿg mÿ, vaj kÿ ke gé, vaj ùn kÿ ke gé. Iser ken kÿ sóg Jerusalém tá ter ke mÿ. Tag ki ke pijé’. Topê vÿ tó tÿ vÿ tÿ ÿnh nÿ, jo Jerusalém tá ke ag tóg ag kãgtén tÿ, Topê vÿ tó tÿ ag. Hã kÿ sóg Jerusalém tá ter tÿg ke mÿ gé. Tag tómnÿ, Herodes mÿ,” he tóg, Jesus ti.

³⁴ Kÿ tóg Jerusalém ki ke ag to vémén mÿ. Fe kaj han tóg, ag to, kÿ tóg: “Jerusalém tá ke ag mÿ sóg tag tó sór mÿ, ha mẽ,” he mÿ. “Topê vÿ tó tÿ ag kãgtén ag tóg tÿ. Topê tÿ ag mÿ ùn jêgnêg tÿ ag pin ag tóg tÿ, pó tÿ, ag tÿ ag kãgtén jé. Isÿ ag vênh mÿn há tóg tÿ vê, isÿ ag ki rÿr jé, Jerusalém tá ke ag, hã kÿ sóg ag jé prêr tÿ hên ri ke han mÿ. Garÿnh fi jykre ri ke han sór isóg mÿ vê, ag mÿ. Garÿnh fi vÿ ã krê kri jê nÿ, fi tÿ ag vêsÿrénh tÿ nÿ jé ke vê. Ên ri ke han sór sóg mÿ vê, hã ra ag tóg ke jãvãnh nÿtÿ. ³⁵ Hã kÿ ag tóg ag jamã pÿn kãn ke mÿ, kÿ vãpÿr vê sir. Û vÿ kãnhmar tá nÿg mÿn ke tÿ nÿ ha, ag tÿ cidade kókén ja tá. Hã kÿ sóg ag mÿ ke mÿ. Inh ve mÿn ke tÿ ag nÿ ha (mÿr). Kejên ag tóg iso: “Topê tÿ ti jênê ja vê,” henh ke mÿ. “Topê vÿ ti ve há han, ti tÿ ti jiji tó kãtÿg kÿ,” he jé ag tóg ke mÿ iso. Ên hã kã ag tóg ÿnh ve mÿn ke mÿ,” he tóg, Jesus ti.

14

Jesus t̄y v̄enhkán ke kurā ki ũ t̄y há' he

¹ Kej̄en tóg v̄enhkán ke kurā tá kr̄yḡ m̄. K̄y tóg p̄a'i ũ ĩn kr̄em n̄i n̄i. Fariseu ag p̄a'i v̄e. Ti t̄y ti ĩn kr̄em j̄en ke v̄e. Hã ra ag tóg tá ti t̄y r̄ir m̄, “ti m̄y v̄enhkán ke kurā ki r̄anhr̄aj ke t̄u?” he ag tóg m̄.

² Hã ra ũ tóg tá n̄i gé, ũn kaga ũ. K̄anhpar k̄an k̄y tóg j̄e. Jesus r̄in ja tá tóg j̄e n̄i. ³ K̄y Jesus tóg Top̄e v̄i to professor ag m̄y ke m̄, Fariseu ag m̄y ke gé. Ag m̄y tóg: “ēḡ t̄y v̄enhkán ke kurā k̄a ũ t̄y há' hen m̄y há n̄i, m̄y kórég n̄i vó?” he m̄. ⁴ Hã ra ag tóg ti m̄y n̄en ũ tó t̄u n̄i. K̄y Jesus tóg ũn kaga ěn kri ã n̄igé fi k̄y ti t̄y há' he m̄u sir. K̄y tóg ti m̄y: “ha t̄ig ge,” he m̄. ⁵ K̄y tóg ag m̄y: “kej̄en ãjag kósin ũ tóg goj ki kut̄enh m̄,” he m̄, “goj nig ki, ke t̄u n̄in k̄y ãjag m̄ḡ t̄y monh. V̄enhkán ke kurā ki tóg goj ki kut̄enh m̄, h̄en ri ke m̄n. K̄y ãjag tóg ti kun̄ug t̄i gé, ti t̄y v̄enhkán ke kurā k̄a ki kut̄en k̄y. K̄y ãjag t̄y ne j̄e iso j̄u sór n̄e?” he tóg. ⁶ K̄y tóg ag t̄y ti m̄y n̄en tónh ke tóg t̄u t̄i sir.

Festa to comparação

⁷ K̄y Jesus tóg v̄enħ kar kanhr̄an j̄e tag tó m̄u sir, ha m̄e. Ti mr̄e j̄ēḡj̄en k̄y n̄ȳt̄i ag m̄y tóg k̄am̄en m̄. Ag j̄en vén sór v̄e, ag t̄y t̄y ũn m̄ag n̄ȳt̄i j̄e. Hã véḡ tóg m̄, hã k̄y tóg ag kanhr̄anr̄an sór m̄, Jesus ti. ⁸ K̄y tóg ag m̄y: “kej̄en ũ tóg ãjag m̄y: “kurā ěn k̄a sóḡ v̄enħ pr̄ug ke to festa han ke m̄. Ha inh mr̄e j̄en k̄at̄ig,” henħ ke m̄. K̄y ti festa k̄a j̄en vén sór t̄ug n̄i. H̄en ri ke m̄n ã k̄afór n̄i ũ tóg ki jun m̄. ⁹ K̄y festa ki r̄ir m̄u tóg ã m̄y: “toreḡ ver’,” henħ ke m̄. “Ti j̄en kar k̄y ã tóg j̄en ke m̄. M̄e k̄y j̄e n̄i ver,” he j̄e tóg ke m̄ ã m̄y, ũ t̄y festa ki r̄ir t̄i ti. K̄y tóg ã m̄y'a t̄inh m̄u sir, ha m̄e. ¹⁰ K̄y ã t̄y festa venħ t̄ig k̄y m̄e k̄y n̄im̄n̄i ver, v̄ēj̄en j̄ävānh k̄y. K̄y festa ki r̄ir m̄u v̄y ã m̄y: “ha j̄en vén, fag mr̄e,” henħ ke m̄. K̄y ã pi(j̄e) m̄y'āḡ ke m̄u’,” he tóg ag m̄y, Jesus ti. ¹¹ “Hã k̄y tóg ũ t̄y ag k̄afór n̄i sór m̄u t̄erem ke m̄, v̄ēs̄ȳk̄a, Top̄e ti, ha vem̄n̄i. J̄avo tóg ũ t̄y: “t̄y inh ũn s̄i n̄i,” he m̄u ěn j̄anfyn ke m̄, ha vem̄n̄i,” he tóg, Jesus ti.

Ēḡ t̄y ũn jagtar ag jagāḡt̄an

¹² K̄y tóg ũ t̄y ã kóḡfyn m̄u ěn m̄y k̄am̄en m̄u gé. Ti m̄y tóg: “ã t̄y festa han sór k̄y ũn rico ag m̄y tó sór t̄ug n̄i, ã mr̄e ke fag m̄y, ã k̄ake ag m̄y, ã j̄avy ag m̄y, ã r̄a n̄ȳt̄i ag m̄y tó t̄ug n̄i gé,” he m̄. “ã t̄y ũn rico ag m̄y tó m̄u ra ag tóg v̄enħ kaja j̄e ã m̄y festa han sór m̄u gé. K̄y ã tóg ã festa kaja ti véḡ m̄u sir, ēpr̄a. ¹³ ã t̄y festa han sór k̄y ũn kaga k̄y r̄anhr̄aj v̄ānh ag m̄y tómn̄i, ũn k̄anhgr̄i ag m̄y, ũn kyvó ag m̄y. ¹⁴ ã t̄y tag han k̄y Top̄e v̄y ã ve há han ke m̄, ha vem̄n̄i. ã m̄y ag tóg festa han ke t̄u n̄i, ag t̄y n̄en ũ t̄u n̄in k̄y. K̄y ã tóg ã r̄ir m̄an ken k̄y ti kaja venħ ke m̄, Top̄e t̄y ũn j̄ykre kuryj kar r̄inr̄ir m̄an ke kurā ěn k̄a,” he tóg, Jesus ti.

*Festa m̄ag to comparação
(Mt 22.1-10)*

¹⁵ K̄y tóg tá n̄i ũ m̄y m̄e há t̄i, Jesus v̄i tag ti. Tá n̄ig k̄y tóg ag mr̄e j̄ēḡ m̄u gé, hã k̄y tóg Jesus v̄i m̄ḡ m̄. K̄y tóg ti m̄y: “ũ t̄y Top̄e t̄y t̄y ēḡ p̄a'i n̄i véḡ m̄u m̄yn h̄yn sér p̄e t̄inh m̄, ũ t̄y tá festa véḡ m̄u ěn m̄y,” he m̄.

¹⁶ K̄y Jesus tóg ti kanhr̄an k̄y ti m̄y: “kanhk̄a tá festa v̄y ge n̄inh m̄, ha m̄e,” he m̄. “Kej̄en ũ tóg n̄iḡt̄i. Festa m̄ag han sór tóg m̄, k̄y tóg ũ t̄y h̄en ri ke ag m̄y tó ja n̄i, ti t̄y festa han ke to hã. ¹⁷ Ti festa kur̄an k̄a tóg ã camarada j̄ēn̄ēḡ m̄, ti t̄y ũn kóḡfyn k̄y n̄ȳt̄i ag m̄y: “ha k̄am̄uj̄ēḡ,” he j̄e. “Kar k̄y tóg n̄i ha, inh festa ti,” hem̄n̄i,” he tóg, ã camarada m̄y. K̄y tóg ag m̄y tónh t̄i m̄u sir. ¹⁸ Hã ra ag tóg ve sór t̄u n̄i, ag kar ti, hã k̄y ag tóg ti m̄y v̄i m̄. ũ tóg ti m̄y: “ga kaj̄am inh,” he m̄. “Hã k̄y sóḡ ijap̄y venħ t̄i m̄u ver. ũri tóg inh m̄y v̄enħm̄y t̄i. S̄y festa venħ t̄ig ke v̄e v̄e, hã ra tóg v̄enħm̄y t̄i,” he tóg m̄. ¹⁹ K̄y ũ tóg ti m̄y: “monh génh sóḡ, monh t̄y 5 (ke) réḡre,” he m̄u gé. “K̄y sóḡ ag venħ t̄i m̄u ver. S̄y festa venħ t̄ig ke v̄e v̄e, hã ra tóg v̄enħm̄y t̄i,” he tóg m̄u gé sir, ũ ti. ²⁰ K̄y ũ tóg ti m̄y: “uri sóḡ pr̄ug m̄u ha, hã k̄y tóg v̄enħm̄y t̄i,” he m̄u gé.

²¹ Kÿ ti camarada tóg ti mÿ tónh kätĩ mÿ, ã patrão mÿ. Kÿ tóg jũ mÿ. Ti mÿ tóg: “Ëpry ra tĩg, ãmĩn mág ra, ãpry kásir ra ke gé, ãmã kar ki,” he mÿ. “Kÿ ãn jagtar ag tatĩ kätĩg, ãn kónhgrĩ ag, ãn kyvó ag, ãn tĩg vãnh ag ke gé,” he tóg. ã camarada mÿ tóg ke mÿ. ²² Kÿ tóg tĩg mãn mÿ, ti camarada ti. Kÿ tóg tá vÿn ke kÿ ã patrão mÿ: “ke kãn inh huri,” he mÿ. “Ag tatĩ kätĩg inh huri, hã ra tóg fór tũ nĩ ver, festa jo ãn ti,” he tóg mÿ, ti camarada ti, ti patrão mÿ.

²³ Kÿ ti patrão tóg ti mÿ: “vësÿkã tĩg mãn ge,” he mÿ. “Vãnh kãmĩ tĩg, ãmã kásir pẽ kãmĩ ke gé, ãpry ra, ãmĩn jagma,” he tóg. “Tã ag mÿ tugtónh tĩg. Ag kutãn nĩ, ag kãmũ jé, festa jo ãn fór jé,” he tóg, patrão ti, ã camarada mÿ,” he tóg, Jesus ti.

²⁴ “Hã kÿ sóg ãjag mÿ ke mÿ,” he tóg. “Û mÿ sóg tó vén ja nĩ, hã ra ag tóg inh festa venh ke tũ pẽ nĩ, sÿ ã mÿ tó vén ja ag,” he tóg. Jesus tÿ Fariseu ag mré jẽn kÿ ag mÿ kãmén hã vẽ.

Ëg tÿ ãg jykre tovãnh

(Mt 10.37-38)

²⁵ Kejẽn ãn e ag tóg Jesus nón mÿ mÿ. Kÿ tóg ag jé vĩrĩn ke kÿ ag mÿ: ²⁶ “ha mẽ,” he mÿ. “Û tÿ inh mré tĩg pẽ han sór mÿ jé inh hã to há kãfór nĩ, ã han mÿ fag kri, ti prũ fi kri, ti krẽ kri, ti kãke ag kri, ti jãvy ag kri, ti ve fag kri, vẽn h kri ke gé, mÿr, ha mẽ,” he tóg. “Ke tũ nĩ mÿ ra tóg inh mré kätĩg ke tũ nĩ, kÿ tóg tÿ inh mré ke nĩnh ke tũ nĩ gé. ²⁷ Ha vé, ag tÿ inh cruz tÿ inh kri fi kÿ sóg tĩg ke mÿ, ag tÿ to isa kÿ isén jé, ha vemnĩ. Vẽn nenh ke tũ sóg nĩ. Û tÿ inh ri ke han sór tũ nĩn kÿ tóg inh mré kätĩg ke tũ nĩ, kÿ tóg tÿ inh mré ke nĩnh ke tũ nĩ gé,” he tóg, Jesus ti,

²⁸ “To jykren, ã tÿ ãn téj han sór mÿ ãn to. Ti tÿ ãn téj han sór kÿ tóg ã jãnkamy nĩkrén vén ke mÿ. Kÿ tóg ãn kaja to jykren ke mÿ gé sir. Kar kÿ tóg ãn han sór ke mÿ vãhã. ²⁹ Ti tÿ to hã to jykren há han tũ ra tóg vẽn h mÿ tĩ. Kÿ tóg ãn jẽg ken ki kũm kÿ ti króggróg han ke mÿ sir. Ti króggróg han kÿ ti jãnkamy tóg tũ' henh ke mÿ, kÿ tóg tovãnh ke mÿ sir, ti tÿ ãn han ti. Kÿ ti mré ke ag tóg ti to vĩ kÿ ti nynh mÿ sir. ³⁰ Ti to ag tóg: “ha mẽ, ãn téj han sór tóg mÿ vẽ, hã ra tóg to jykren há han ja tũ nĩ, hã kÿ tóg kar tũ nĩ,” henh ke mÿ, ti régre ag,” he tóg.

³¹ “Kar pã'i mág to jykren nĩ gé. Pã'i ã tÿ ti mré vẽn h génh sór kÿ tóg ã krẽm ke ag nĩkrén ke mÿ gé sir, vẽn h génh ke to hã. “10 mil (ke) ãg nÿtĩ,” he jé tóg ke mÿ. “Ëg mÿ ag tÿ hẽn ri kenh mÿ vÿ?” he jé tóg ke mÿ. “20 mil (ke) ag nÿtĩ. Ag mÿ ãg tÿ tũ' he kãn ke tũ nĩ vÿ? Ëg kãfór ag tóg nÿtĩ. Ëg hÿn hẽ ri kenh mÿ, ag tÿ ãg tovãnh jé?” he jé tóg ke mÿ, pã'i ti. ³² Ti tÿ tag to jykren kÿ tóg pã'i ã ãn mÿ vẽn h vĩ jẽnẽnh mÿ, ti tÿ kór há tá nĩ (hã) ra, kuvar há tá. Ti mÿ vẽn h vĩ jẽnẽn kÿ tóg ti mÿ: “ã mÿ ãg tovãnh ke tũ nĩ?” he mÿ. “Inh ã mÿ ne nĩm mÿ, ã tÿ isovãnh jé?” he jé tóg ke mÿ, pã'i ãn mÿ,” he tóg, Jesus ti.

³³ “Hã kÿ to jykren nĩ, ãjag tÿ inh mré mÿ pẽ han ke to. Iso há kãfór nÿtĩm nĩ, ãjag tũ kar kri. Ke tũ nĩ mÿ ra ãjag pi(jé) inh mré mÿ pẽ han mÿ,” he tóg, Jesus ti.

Sa to comparação

(Mt 5.13; Mc 9.50)

³⁴ “Sa vÿ há nĩ. Hã ra sa kãhór tĩn kÿ ãg tÿ ne tÿ ti tÿ kajã' henh ke tóg tũ tĩ, tÿ sa' he mãn ke tũ tóg tĩ,” he tóg. ³⁵ “Ti kãhór tĩn kÿ tóg kórég nĩ, kÿ ãg tóg fón tĩ. Ëg pi(jé) ãg japÿ ki ti fón tĩ', ti tÿ ãg jakré tÿ há' he tũ nĩn kÿ, sa kãhór ti. Ti fón pẽ han jé ãg tóg ke mÿ. Ri ke ãjag nÿtĩ, ãjag tÿ inh mré mÿ pẽ han tũ nĩn kÿ. Jẽmẽ há han nĩ, sÿ ãjag mÿ nén tó mÿ tag ti,” he tóg, Jesus ti.

15

Ovelha vãfor to comparação

(Mt 18.12-14)

¹ Kejẽn ã tÿ imposto mág tĩ ag tóg ti to kãmũ mÿ, Topẽ vĩ mranh tĩ ag ke gé. Ag tÿ ti vĩ mẽ sór vẽ. ² Kÿ tóg Fariseu ag mÿ kórég nÿ, Topẽ vĩ to professor ag mÿ ke gé. Kÿ ag tóg

ti to vī vī he mū sir. “Topē vī mranh tī ag to tóg há nīgtī, tag ti,” he ag tóg mū. “Ag mré tóg jēg tī mýr,” he ag tóg mū, Jesus to.

³ Kŷ tóg ag kanhrān jé ag mý: “ū tŷ Topē vī mranh mū tŷ ā jykre kórég tovānh kŷ tóg ge nŷnh mū, ha mē,” he mū. ⁴ “Ū tóg nī ja nīgtī,” he tóg. “Ti mēg tŷ mé vŷ tŷ 100 (ke) nŷtī, ti mēg tŷ ovelha ti. Kŷ ti mēg pir tóg vāfor mū. Hā ra tóg ti kanēg tī mū, ti jāvānh tī tóg mū, ha mē. Ūn e ēn tovānh kŷ tóg ūn pir ēn nón tī mū. Ga kórég tá ag nŷtī, ti mēg kar ēn ag. Ag togvānh kŷ tóg ūn pir ēn nón tī mū, ha mē. ⁵ Kŷ tóg ti vég mū sir, ti mēg vāfor ja ēn ti. Kŷ tóg ā nunh kri ti fi kŷ ma tī mū. Ti fe tóg mrin ke mū sir. ⁶ Kŷ tóg ā ĩn tá jun mū. Tá tóg ā kanhkā fag jé prēr mū, ti rā hā nŷtī fag kar. Kŷ tóg fag mŷ tó mū. “Inh mré ti to mŷ sér,” he tóg. “Inh mēg vŷ vāfor ja nī, hā ra sóg ti ve mǎn mū ha,” he tóg mū, ā mēg to,” he tóg, Jesus ti. ⁷ “Hā ra tóg ge nī, ha mē. Ū tŷ 99 (ke) ag tŷ vēnh jykre kuryj han kŷ tóg há tī sir, kŷ tóg mŷ sér tī sir, kanhkā tá ke ag mŷ. Hā ra tóg mŷ sér kǎfór tī, ūn pir tŷ ā jykre kórég tovānh kŷ, ti tŷ ā tŷ Topē vī mranh mū ēn tovānh kŷ, ha mē. Kŷ isū ag vŷ e nŷtī,” he tóg, Jesus ti.

Jānkamy vāfor to comparação

⁸ “Kŷ ūn tŷtá to vēme vŷ ge nī, ha mē,” he tóg. “Jānkamy tŷ 10 (ke) tŷ fi tū nī, jānkamy tŷ por dia kaja tŷ 10 (ke) tŷ. Kejēn ūn pir tóg fi mŷ vāfor mū, kŷ fi tóg lampião grug mū sir. Fi ĩn kǎmī fi tóg prun kǎn mū. Ve há han fi tóg mū, jānkamy ēn kanēg jé, ĩn péno kar mī hā. ⁹ Vāhā fi tóg kejēn ve mǎn mū sir. Kŷ fi tóg ā mré ke kar fag jé prēr mū, fi rā hā nŷtī fag kar ke gé. Kŷ fi tóg fag mŷ: “inh mré to mŷ sér,” he mū. “Inh jānkamy vŷ vāfor ja nī, hā ra sóg ve mǎn mū ha,” he fi tóg mū. ¹⁰ Hā ra tóg ge nī, kanhkā tá, ha mē. Topē tŷ jēnē jafā ag mŷ tóg sér tāvī tī, ū tŷ ā jykre kórég to jūn kŷ, ti tŷ ā tŷ Topē vī mranh ēn tovānh kŷ, ha mē,” he tóg, Jesus ti.

Ūn kósin vāfor to comparação

¹¹ Kŷ tóg ag mŷ tag tó mū gé sir, ha mē. “Ū vŷ tóg kósin régre ja nīgtī,” he tóg. ¹² “Kŷ ti kósin tŷ ēgno tóg ā panh mŷ: “panh’,” he mū. “Inh mŷ ūri isū nīm, ā tŷ inh mŷ nén nīm ke mū ēn ti,” he tóg, ā panh mŷ. Ti tŷ to vīnh ke tū vē vē, hā ra tóg to vī mū. Ge ra ti panh tóg ā krē mŷ ā tū vēnh kǎpām mū sir. ¹³ Kǎnhmar ti kósin kyrū tóg ā tū mǎn kŷ kór há ra, kuvar há ra tī mū, ga ū ra. Tá tóg ā tū vām kǎn mū, nén ū kórég kar to. ¹⁴ Vām kǎn ja tóg nīgtī, ti jānkamy ti. Kŷ tóg kejēn tá prŷg han mū sir, ga ēn tá. Kŷ kyrū ēn tóg kókīr mū gé. ¹⁵ Kŷ tóg tá ke ū mré vēmén tī mū, ti tŷ ti mŷ vēnh rānhrāj nīm jé. Kŷ tóg ti jēnēg mū, ti tŷ ti porco ki rīr jé sir, ti safra tá. ¹⁶ Kŷ tóg porco jēn ko sór mū, ti kókīr nīn kŷ. Hā ra ag tóg ti mŷ nén ū nīm tūg mū, ti tŷ ko jé. Hā kŷ tóg kókīr tāvī nī sir. ¹⁷ Kŷ tóg kejēn krī há han mū. To jykren tóg mū sir. “Inh panh mŷ rānhrāj tī ag vŷ pǎo mág ko tī. Ag mŷ tóg kén tī, ag jén tī. Jo sóg kókīr kŷ ter ke mū,” he tóg, kyrū ti, ā pir mŷ nīn kŷ. ¹⁸ “Inh jé hŷn inh panh kukām tīg ha,” he tóg. “Kŷ sóg ti mŷ: “panh’,” hēnh ke mū. “Kanhkā tá nī ēn vī mranh inh, ā vī ti ke gé. ¹⁹ Kŷ sóg vēnhmŷ tŷ ā kósin tū nī. Sŷ tŷ ā camarada nīnh há tóg tī,” he jé sóg ke mū, inh panh mŷ,” he tóg mū, kyrū ti. ²⁰ Kŷ tóg tī mū sir, ā panh kukām.

Hā ra ti panh tóg kór há tá, kuvar há tá ti vég mū, kŷ tóg ti kato tē mū. Ti kato tē kŷ tóg ti ki póm ke mū sir, ti ki nhun ke tóg mū gé sir. ²¹ Kŷ ti kósin tóg ti mŷ: “panh’,” he mū. “Kanhkā tá nī ēn vī mranh inh, ā vī ke gé. Hā kŷ sóg vēnhmŷ tŷ ā kósin tū nī ha,” he tóg, ti panh mŷ.

²² Hā ra ti panh tóg ti mŷ: “vó, vēnh pǎte fón kŷ tóg nī,” he mū. Kŷ tóg ā camarada ag mŷ: “kur há tāvī ēn ma kāmūjēg,” he mū, “ti tŷ kur tāg ra rā jé. Ti mŷ nīgē kǎnīm ja nīm gé. Pēn né ēn tŷ, pēn to ró ēn tŷ ti mŷ jun gé. ²³ Monh tāgy ēn venh mūjēg. Ti tānh ra, ēg tŷ ko jé, ēg fe tŷ mrin ke jé. ²⁴ Inh kósin vŷ inh mŷ ter ja ri ke han, hā ra tóg rīr mǎn ri ke han. Vāfor ti vē vē, hā ra tóg kǎtīg mǎn huri,” he tóg, ti panh ti. Kŷ tóg ag mŷ sér tī sir, ag tŷ festa han kŷ.

²⁵ Hā ra ti kósin sanh tóg ti japŷ tá rānhrāj jē. Kŷ tóg vāhā tá kǎtīg kŷ ā ĩn tá jun mū. Tá jun kŷ tóg vākŷr mēg mū, fag vēnh gringrēn ēn ti. ²⁶ Kŷ tóg ā camarada jé prēr mū. Ti

mỹ tóg: “festa tỹ ne nẽ?” he mũ. ²⁷ Kĩ tóg ti mỹ: “ã jãvy vỹ jun, kĩ ã panh vỹ monh tãgy ãn tãnh,” he mũ. “Ti mỹ tóg sér tí, ti tỹ ti ve mãn kĩ. Kaga tũ tóg jẽ, há tóg jẽ, hã kĩ tóg ã panh mỹ sér tí,” he tóg, ti camarada ti. ²⁸ Kĩ tóg jũ mũ sir. Kĩ tóg ãn kãra rã tũg mũ, jũ kĩ.

Kĩ ti panh tóg ti mré vēmén tí mũ. Ti mỹ tóg: “ẽg mré festa venh kãrã,” he mũ. ²⁹ Hã ra tóg ti mỹ: “vó,” he mũ. “Prỹg tỹ hẽn ri ke ki sóg ã rãnhraj ti han, ha mẽ. Inh pi(jé) ã vĩ mranh ja nĩgtĩ'. Ge ra ã tóg inh mỹ nén ù nĩm ja tũ nĩ. ã pi(jé) inh mỹ cabrito fẽg tí', sỹ inh mré ke ag mỹ festa han jé. ³⁰ Hã ra ã kósín ãn tóg jun mũ sir, jo ã tóg ti mỹ monh tãgy ãn tãnh. Kórég ti nĩ, ã kósín ãn ti. ã tũ fón kãn tóg mỹr, ùn tỹtã kórég fag to, hã ra ã tóg festa mág han mũ, ti kãtĩg kĩ,” he tóg, ti kósín sanh ti, ã panh mỹ.

³¹ Hã ra ti panh tóg ti mỹ: “vó,” he mũ. “Inh mré ã tóg jẽ nĩ, kĩ tóg inh mỹ sér tí. Kĩ isũ kar vỹ tỹ ã tũ nỹtĩ, mỹr, ha mẽ. ³² Hã ra festa tag vỹ há nĩ, ha mẽ. Ẽg mỹ tóg sér tãvĩ tí. ã jãvy vỹ inh mỹ ter ja ri ke han, hã ra tóg rĩr mãn ri ke han. Vãfor ti vỹ vỹ, hã ra tóg kãtĩg mãn huri,” he tóg, ti panh ti, ã kósín sanh mỹ,” he tóg, Jesus ti. Ti tỹ Topẽ kãmén hã vỹ.

16

Ẽg tỹ ẽg tũ vẽn kãpãm ke

¹ Kĩ Jesus tóg ã mré mũ tí ag mỹ tag tó mũ, ha mẽ. “Kejẽn ãprã ke ù tóg nĩgtĩ, ùn rico. Kĩ ti tũ ki rĩr tí tóg nĩgtĩ gé. Ti patrão mỹ név(e) nỹtĩ ag vég ti tí, ti mỹ, ti tũ ki rĩr tí ti. Kejẽn ag tóg ti camarada ãn to vĩ mũ, ti tũ ki rĩr tí ãn to. Ti lograr ke (ka) mẽ ti nẽji nĩ, ti tũ to, ti camarada ti. ² Kĩ tóg ti jé prẽr mũ, kĩ tóg ti mỹ: “ã tỹ han mũ mẽ inh,” he mũ. “Sỹ ã rãnhraj tugnỹm ke vỹ. Ki rĩr mãn ke tũ ã tóg nĩ ha,” he tóg mũ ti mỹ. ³ Kĩ tóg to jykrén mũ sir, ti camarada ti. “Inh hỹn hẽ ri kenh mũ ha?” he tóg mũ. “Inh patrão vỹ inh kutẽm, inh rãnhraj ki. Kĩ inh hỹn ne konh ke mũ ha? Inh ẽpỹ jé sóg krój nĩ. Kĩ sóg vẽn kar mỹ: “inh mỹ nén ù nĩm, inh mỹ jãnkamy nĩm,” he sór tũ nĩ gé. Inh mỹ a tóg tí, sỹ ag mỹ tónh ke ti,” he tóg. ⁴ Kejẽn tóg: “ũri hã sóg ki kanhró nĩ ha, sỹ nén han ke ti,” he mũ. “Sỹ tag han kĩ ag tóg iso há nỹtĩnh mũ, kĩ ag tóg inh mỹ: “inh mré nĩnh kãtĩg,” henh ke mũ, inh patrão tỹ inh fón kar kĩ,” he tóg mũ, ti camarada kórég ti. ⁵ Kĩ tóg ù tỹ ã patrão mỹ név(e) nỹtĩ ãn ag jé prẽr kãn mũ sir. Kĩ tóg ù mỹ: “ã név(e) hẽ ri ke nĩ?” he mũ. ⁶ Kĩ tóg ti mỹ: “azeite tỹ lata tỹ 100 (ke) ki inh név(e) jẽ,” he mũ. Kĩ tóg ti mỹ: “hỹn, ã vẽn rán ti, sỹ ã mỹ ã név(e) térem kĩ 50 (ke) rán jé,” he mũ. Kĩ tóg rán mũ sir. ⁷ Kĩ tóg ù ù mỹ: “jo ã?” he mũ gé. “ã név(e) hẽ ri ke nĩ?” he tóg mũ gé. Kĩ tóg ti mỹ: “trigo tỹ sacco tỹ 100 (ke) ki inh név(e) jẽ,” he mũ. Kĩ tóg ti mỹ: “hỹn, ã vẽn rán ti, sỹ ã mỹ ã név(e) térem kĩ 80 (ke) rán jé,” he mũ gé. Kĩ tóg rán mũ gé sir.

⁸ Kĩ ti patrão tóg mẽg mũ, ti camarada tỹ nén han mũ ti. Kĩ tóg ti mỹ: “jykre (ka)mẽ ã tóg nĩ, kĩ ã tóg ù tỹ hẽn ri ke tỹ ã to há nĩ han, ã tỹ ag mỹ ag név(e) rem kĩ,” he mũ, ti patrão ti,” he tóg, Jesus ti.

“Kỹ hã vỹ. ù tỹ inh ki ge tũ ag vỹ ãjag tũ to jykrén há han tí, inhhã, ha mẽ. ãjag krĩ há kãfór han ag tóg tí ag tũ to jykrén ki. ãjag tỹ inh ki ge mũ ra ag tóg ãjag krĩ há kãfór han tí. Tỹ ag ãprã ke nỹtĩ, hã kĩ ag tóg tag ki nén to jykrén há han tí,” he tóg.

⁹ “Hã kĩ sóg ãjag mỹ tó mũ. Ti camarada ãn ri ke han nĩ, ãjag tũ tỹ ùn mỹ vẽn kãpãm nĩ, ãjag tỹ ga kri mũn kĩ. Kĩ ag tóg ãjag to há nỹtĩnh mũ. Kejẽn ãjag tóg ãjag tũ ré kĩ mũnh mũ. ãn kã ãjag tóg mũ há han ke mũ gé. Kĩ ãjag tóg kanhkã tá junjun ke mũ sir, ãjag tỹ ag mỹ ãjag tũ tỹ vẽn kãpãm kĩ. ¹⁰ ù tỹ nén ù sĩ ki rĩr há han kĩ tóg nén ù ki rĩr há han kãn ke mũ gé. Jãvo ù tỹ nén ù sĩ ki rĩr kónãn kĩ tóg nén ù ki rĩr kónãn kãn ke mũ gé sir. ¹¹ Ẽg tỹ ga kri nén vég mũ vỹ kãnhmar tũ' he mũ. ãjag tỹ hã ra ga kri ãjag tũ ki rĩr há han tũ kĩ ãjag tóg kanhkã tá tỹ nén ùn tũ nỹtĩnh mũ gé. ¹² ãjag tỹ ãprã nén vég mũ vỹ tỹ Topẽ tũ nĩ. Ti hã mỹ ãjag tóg ki rĩr ke mũ. ãjag tỹ ti tũ ki rĩr há han tũ kĩ tóg sir ãjag mỹ ãjag tũ pẽ ãn nĩm ke tũ nĩ gé, kanhkã tá,” he tóg.

¹³ “Ā jagrē régre nīn kŷ tóg vēnhmŷ tī. Ā tŷ Topē hā tŷ jagrē nīn kŷ jānkamy tān ēn tŷ jagrē nī sór tūg nī. Ā tŷ jānkamy e ve sór kŷ ti hā mī ēkrén kŷ ti hā vŷ tŷ ā jagrē nīnh mŷ. Kŷ ěg tóg Topē tŷ ěg mŷ nén tó mŷ ěn to jykrén há han ke tū nŷgtī. Ā tŷ Topē to há nīn kŷ ā tóg sir ga kri rico to vāsān sór ke tū nī. Ā tŷ ga kri rico nī sór kŷ ā tóg Topē mī ēkrég tū nī, ha vemnī,” he tóg, Jesus ti. Ti tŷ ěg tŷ ti tū hā to jykrén há to jykrén há han ke tón hā vē.

Topē jykre

(Mt 11.12-13; 5.31-32; Mc 10.11-12)

¹⁴ Hā ra Fariseu ag tóg mēg mŷ, ti tŷ nén tó mŷ ti. Jānkamy mág hā to ag tóg há nŷtī, rico ke sór ag nŷtī, Fariseu ag. Kŷ ag tóg Jesus vī tag mē kŷ ag tóg ti to é he mŷ. ¹⁵ Hā ra Jesus tóg ag mŷ: “ěprā ke ag mŷ ājag tóg há nŷtī ve nŷtī,” he mŷ. “Hā ra Topē vŷ ājag tŷ nén to jykrén mŷ ěn vég nī. Ōn kŷ ājag tóg há nŷtī. ěprā ke kāmī ājag tóg tŷ ūn mág nŷtī. Topē mŷ ājag tóg kórég nŷtī jāvo, ti mŷ kavėj ājag tóg nŷtī,” he tóg.

¹⁶ “Moisés tŷ ěg mŷ Topē vī tó ja ěn vŷ João tá krŷg, vāsŷ Topē vī tó tī ag tŷ ěg mŷ nén tó ja kar ěn ti. João tá ti krŷg, ěg kygpég tī ěn tá. João tá jun kŷ vēnh ū tŷ hēn ri ke ag tóg vāsānsān tī, ag tŷ ve jé. ¹⁷ Hā ra Topē jykre si ěn tóg tū' henh ke tū nī gé, Moisés tŷ ěg mŷ nén tó mŷ ěn ti. Ga vŷ tū' henh ke tū nī. Ki króm kán kŷ tóg nīnh mŷ,” he tóg.

¹⁸ “Ěg prŷg kŷ tóg ge nī, ha mē. Ā tŷ ā prŷ fi fón kar kŷ ū fi tŷ prŷg mán kŷ ā prŷ tū fi vē sir. Kŷ fi mén tŷ fi fón kŷ ū tŷ fi tŷ prŷg mán kŷ fi mén tū vē gé sir,” he tóg, Jesus ti. Ti tŷ Topē jykre kāmén hā vē.

Ū tŷ Topē vī mē jāvānh ag tŷ nŷgme ki vár

¹⁹ Kŷ Jesus tóg ag mŷ: “kejēn ū tóg nŷgtī, ūn rico pē,” he mŷ. “Kur kaja e tu ti tŷgtī, ūn tánh sá, kur ha pē. Kurā kar ki tóg vējēn há ko tī. Festa ri ke han tóg tī, kurā kar ki.

²⁰ Kŷ ūn jagtar tóg nŷgtī gé. Ti jiji hā vŷ: Lázaro, he mŷ. Vēnh kaga fugfo han vānh han tóg tī, kŷ tóg nŷ nī, ūn rico jānkā ki. ²¹ ěn vŷ kókŷr tŷgtī, ā kaga to. Kŷ tóg ūn rico jēn vár ko sór tŷgtī, ti jēn mru, hā ra tóg ti mŷ nīm tūg tī. Cachorro hā ne ti pēnīn e nŷtī. Vēnh fugfo han vānh ěn tugmān ag tóg tī. ²² Kejēn tóg ter mŷ, ūn jagtar ěn ti. Kŷ Topē tŷ jēnē jafā ag vŷ ti va mŷ mŷ, ti kuprŷg ti, kanhkā ra. Tá Abraão tóg nī nī, ěg jóg' jóg ve ti, kŷ tóg ti mré nī nī sir, ti tŷ tŷ ti krē'krē nīn kŷ.

Kar ūn rico tóg ter mŷ gé sir. Kŷ ag tóg ga kátá ti péju(g) mŷ. ²³ Hā ra tóg nŷgme ki kutē mŷ, ti kuprŷg ti. Inferno tá ti vēsŷrénh jagy han mŷ sir. Kejēn tóg kanhkā ki ěvānh mŷ, kŷ tóg tá Abraão vég mŷ, Lázaro ke gé, ti tŷ Abraão mré nīn kŷ, kuvar há tá. ²⁴ Kŷ tóg ag mŷ prēr mŷ. Kŷ tóg Abraão mŷ: “!..ljóg'..!” he mŷ. “!..Abraão..!” he tóg “!..ljagāgtān ra..!” he tóg. “Lázaro jēnē ra, ti tŷ ā nŷ(gé) juja junun mrān kŷ inh nūnē mrān sī han jé. Inh mŷ tóg rŷjgy tāvī tī, pī kākī,” he tóg, Abraão mŷ, ūn rico ja ěn ti.

²⁵ Kŷ Abraão tóg ti mŷ: “inh kósin,” he mŷ. “Ā tŷ ga kri tŷg ja ěn ki ěkré. Tá ā tóg há tŷ ja nŷgtī, jāvo Lázaro tóg jagtar ja nŷgtī. Kŷ tóg tag ki há han tī nī, jo ā tóg vēsŷrénh jē nī, ā tŷ ti jagāgtān ja tū nīn kŷ. ²⁶ Kŷ ěg kuju ki tóg tŷ kāgnó nī, kŷ ū tóg pāte rānh ke tū nī. Tag ki ke pí(jé) ěn ra tŷg mŷ', ěn tá ke pí(jé) tag ra kātŷg mŷ gé', kāgnó tag tugrŷn',” he tóg, Abraão ti, ūn rico ja ěn mŷ.

²⁷ Kŷ ūn rico ja tóg ā jóg tŷ Abraão mŷ: “kŷ sóg ā mŷ nén ū tó sór mŷ, ha mē,” he mŷ. “Ā mŷ inh jóg ěn ra ti jēnēnh ke tū? Tá inh mré ke ag vŷ nŷtī. ²⁸ 5(ke) ag nŷtī, inh mré pafa ja ag. Ti tŷ ag mŷ tónh tŷg jé, ag tŷ tag ki junjun tū nī jé, ag tŷ inh mré vēsŷrénh tū nīn jé,” he tóg, ūn rico ja ti, Abraão mŷ.

²⁹ Kŷ Abraão tóg ti mŷ: “tá ag tóg Moisés tŷ ěg mŷ nén tó ja ěn mēnh mŷ, Topē vī tó tī kar ag vī ke gé. Hā kŷ ag tóg Topē vī jēmēnh mŷ, ag tŷ mē sór kŷ,” he tóg.

³⁰ Hā ra tóg ā jóg tŷ Abraão ti mŷ: “vó” he mŷ. “Vēsēr tŷ ag tá jun mŷ ra ag jēmē há han ke mŷ vē, kŷ ag tóg ājag jykre pāno ěn tovānh ke mŷ vē, vēser tŷ ag mŷ tó mŷ ěn ti,” he tóg.

³¹ Hā ra tóg: “vó,” he mŷ gé. “Ag tŷ Moisés vī jēmē sór tū nīn kŷ ag tóg vēser vī mēnh ke tū nī gé, ag tŷ Topē vī tó tī ag vī mē jāvānh nŷtīn kŷ,” he tóg, Abraão ti, ūn rico ja ěn

mỹ,” he tóg, Jesus ti. Ti tỹ ag mỹ ãg tỹ Topẽ vĩ jẽmẽ jãvãnh nỹtĩn kỹ vỹsỹrẽnh ke ãn tón hã vỹ.

17

Topẽ vĩ mranh tỹ jagy nĩ

(Mt 18.6-7, 21-22; Mc 9.42)

¹ Kỹ Jesus tóg ã mré mũ tĩ ag mỹ: “ũ tỹ hẽn ri ke ag vỹ ù tỹ iso há ãn tỹ isovãnh han sór mũ, ha mẽ,” he mũ. “Vỹsỹrẽnh tãvĩn mũ jé ag tóg ke mũ, tag to. Topẽ vỹ ag ve kónãn tãvĩn mũ, ag tỹ ùn krĩn kónãn mũ tag to. ² Û tỹ ag krĩn kónãn mũ mỹ tóg há nỹnh mũ vỹ, ãg tỹ póg tỹ kra mág tỹ ag nunh to sa kỹ goj nig kuju ki ag vãm jé. Tag vỹ ag mỹ jagy tĩ vỹ. Hã ra ag tóg ti jagy tag kãfór venh ke mũ, ag tỹ ùn sĩ tỹ inh ki rã kỹ nĩ (hã) ra ti tỹ inh vỹ mranh han sór kỹ. ³ To jykrén, vỹnh ki rĩr kỹ.

Kejẽn ã régre vỹ Topẽ vĩ mranh mũ. Kỹ ti mỹ tómnĩ, ti tỹ kygnẽ ti. Ti tỹ tovãnh sór kỹ ti mỹ vỹnh pãte fón nĩ. ⁴ Hẽn ri ke mũn tóg ã tỹ Topẽ vỹ mranh han sór mũ han mãn', han mãn' he mũ, kejẽn. Kurã pir ki tóg ã jũ tỹ hẽn ri ke han sór mũ, hẽn ri ke mũn. Hã ra tóg ã jũ han kar kỹ: “inh pi(jé) ke mãn mũ ha',” henh ke mũ gé. ã jũn kỹ tóg tónh kãtĩg mãn', tónh kãtĩg mãn' he mũ gé. Kỹ ti mỹ vỹnh pãte fón to krónh ke tũg nĩ,” he tóg, Jesus ti.

Ëg tỹ Topẽ ki rã há han ke

⁵ Kỹ Jesus tỹ ùn vin mũ ag tóg ti mỹ: “ãg tỹ Topẽ ki rã há pẽ han há tóg tĩ,” he mũ. “Kỹ to ãg tar han nĩ,” he ag tóg, Jesus mỹ. ⁶ Kỹ tóg ag mỹ: “ãjag tỹ Topẽ ki rã kỹ tóg há tĩ,” he mũ. “Ka tỹ mostarda fy mĩ ãkrén nĩ,” he tóg. “Sĩ ti nĩ, hã ra tóg mog tĩ. Tag ri ke han nĩ, Topẽ ki rã kỹ. Ti ki rã kỹ ãjag tóg nén ù kar to tar nỹtĩnh mũ. Ka tag ve ra, ka krén tag ti. ãjag tỹ ti mỹ: “ã jãre tỹ ga tá kãkutẽ, kỹ goj nig ki vỹnh krãn,” hen kỹ tóg kenh mũ, ãjag tỹ Topẽ ki rãn kỹ,” he tóg, Jesus ti.

Tỹ ãg Topẽ camarada nỹtĩ

⁷ “ãjag camarada jykre to jykrén nĩ,” he tóg. “ãjag japỹ ki tóg rĩr tĩ, ga tỹ vĩrĩn ken kỹ, ke tũ nĩn kỹ tóg ãjag mẽg ki rĩr tĩ gé. Rãkãnh kỹ tóg ã rãnrãj ja tá kãtĩ tĩ. Kỹ ãjag pi(jé) ti mỹ: “kunĩg, jẽn jé,” he tĩ. ⁸ Ti mỹ ãjag tóg: “inh mỹ vỹjẽn han, ijẽn jé,” he tĩ. “Kuri ã kur tãnfyn kỹ tógfĩn, ã tỹ inh mỹ vỹjẽn jun jé, ijẽn jé, kron jé, kar kỹ ã tóg jẽn ke mũ gé sir, kron ke mũ gé sir, ijẽn kar kỹ,” he ãjag tóg tĩ, ãjag camarada mỹ. ⁹ Kỹ ãjag tóg ti mỹ vỹ há han tũ nĩ gé, ti tỹ ãjag vỹ ki króm mũ ra. ãjag camarada vỹ mỹr, ti rãnrãj vỹ, hã kỹ tóg ãjag vỹ ãn han ke mũ. ¹⁰ Kỹ ãjag camarada ag ri ke han nĩ, Topẽ mỹ, ha mẽ. ãjag tỹ Topẽ vỹ ki króm kãn kỹ jagnẽ mỹ: “ti camarada vỹ tỹ ãg nỹtĩ,” hemnĩ. “Ti tỹ ãg mỹ nén tó mũn hã han ãg tóg, kỹ tóg tỹ nén ù tũ nĩ,” hemnĩ jagnẽ mỹ. “Ti vỹ han kãn tugrĩn ãg tóg há nỹtĩ,” he tũg nĩ,” he tóg, Jesus ti.

Jesus tỹ ùn kaga tỹ 10 (ke) ag tỹ há' he

¹¹ Kỹ Jesus tóg Jerusalém ra tĩg sór mũ. Hã kỹ tóg ga tỹ Samaria fyr mĩ tĩ mũ. Ga tỹ Galiléia mré ti fyr vỹ. ¹² Tá tóg ãmã ù ki rã mũ, kỹ ù tỹ 10 (ke) ag tóg ti kato tẽgtẽ mũ sir. Vỹnh kaga kren vãnh hyn han ag tóg mũ, lepra han kỹ. Hã kỹ ag tóg kór há tá nỹtĩ, kuvar há tá. ¹³ Jamã hár(a) ag tóg prẽnprẽn mũ, kỹ ag tóg: “!..Jesus'..!” he mũ. “!..Senhor'..!” he ag tóg mũ. “!..Ëg jagãgtãn ra..!” he ag tóg mũ. ¹⁴ Kỹ tóg ag ki ãvãnh mũ, kỹ tóg ag mỹ: “Topẽ tũ ki rĩr tĩ ag mỹ vỹnh ven mũjẽg,” he mũ. Kỹ ag tóg mũ mũ.

Ag mũn kã ag tóg jãnhkri' he mũ sir, ag fár ti, tá junjun to hã. Hãghã' he ag tóg mũ sir. ¹⁵ Kỹ ag kãmĩ ùn pir tóg kyrã mũ, Jesus to. Topẽ mỹ tóg vỹ há han mũ, ã tỹ há' hen kỹ. Kỹ vỹnh kar vỹ ti vỹ mẽg mũ. ¹⁶ Ti tỹ Jesus tá jun kỹ tóg ti krẽm mũg ke mũ. Ti mỹ tóg: “inh mỹ tóg há tĩ, ã tỹ isỹ há' hen kỹ,” he mũ. Samaria tá fóg ù vỹ, Jesus to ùn kyrã mũ ãn ti.

¹⁷ Kỹ Jesus tóg: “ũ tỹ 10 (ke) tũ mỹ', hã vỹ: há', he mũ?” he mũ. “Hã ra ùn pir ne kãtĩg ja nĩ'. Hỹn, ù ag, ù tỹ 9 (ke) ãn ag?” he tóg. ¹⁸ “Fóg tag hã vỹ ã pir mỹ kyrã, Topẽ to: “ũn mág vỹ tỹ ti nĩ,” he jé,” he tóg, Jesus ti. ¹⁹ Kỹ tóg fóg ãn mỹ: “jẽgnẽ ra,” he mũ. “Ha tĩg,” he tóg. “ã tỹ inh ki rã kỹ, hã kỹ ã tóg há' he mũ,” he tóg, Jesus ti.

Topê tỹ tỹ êg pã'i nĩ to vênh jykre
(Mt 24.23-28, 37-41)

²⁰ Kejên Fariseu ag tóg ti ki jēmēnh kāmũ mũ. “Topê tỹ tỹ êg pã'i nĩ ên mỹ ver kór gy nĩ, mỹ kuvar gy?” he ag tóg ti mỹ. Kỹ tóg ag mỹ kāmén mũ sir. “Ti vég tũ êg tóg nĩ, êg kanê tỹ, Topê tỹ tỹ êg pã'i nĩ ti,” he tóg. ²¹ “Hã kỹ êg tóg to: “tag kã ti nĩ, tãtã ti nĩ,” henh ke tũ nĩ gé. Ha mẽ, ãjag kãmĩ ti huri vênh ven, ti tỹ tỹ êg pã'i nĩ ti, ãjag tỹ ti vég tũ (hã) ra,” he tóg.

²² Kỹ tóg ã mré mũ tĩ ag mỹ: “tỹ sóg êprã ke fi kósin nĩ,” he mũ. “Kejên tóg ãjag tỹ Topê tỹ tỹ êg pã'i nĩ venh ha pẽ tĩnh mũ. Ti tỹ kurã pir ki vênh ven mũ vỹ ãjag mỹ há tĩnh mũ vễ, hã ra ãjag tóg venh ke tũ nĩ ver,” he tóg. ²³ “Kỹ ag tóg ãjag mỹ: “tag ki ti jun ja nĩ,” henh ke mũ. “Ên tá tóg jẽ nĩ,” he jé ag tóg ke mũ gé. Kỹ venh mũ tũg nĩ hã ra. Ag vỹ jēmē sór tũg nĩ. ²⁴ Inh kãtĩg mãn ke vỹ ta tỹ kóm kóm ke ri ke nĩ. Ti tỹ kóm kóm ke kỹ êg tóg nén kar vég tĩ, kanhkã krēm. Kỹ vênh kar vỹ ti tỹ kóm kóm ke ên vég tĩ gé. Inh kãtĩg mãn ke vỹ ri ke nĩnh mũ, inh kurã ên kã. Vênh kar vỹ inh ve kãn mũ. Tỹ sóg êprã ke fi kósin nĩ,” he tóg. ²⁵ “Inh kãtĩg mãn ke to hã sóg hã ra vêsýrénh mág han ke mũ ver. Ūri ke ag vỹ iso é henh ke mũ ver,” he tóg.

²⁶ “Kỹ inh kãtĩg mãn ke kurã ên kã êprã ke ag tóg han kãn ke mũ, ag tỹ Noé tỹ ga mĩ tĩ mũ kã nén han ja ên ti. ²⁷ Ta kutê to hã ag tóg jẽn ja nĩgtĩ, jẽn kar kỹ ag tóg kron ja nĩgtĩ gé, vênh prũ kutēm ja ag nĩgtĩ gé. Ên kã Noé tóg kejên barco tỹ ãn kãra rã ja nĩ. Ti tỹ kãra rã kar kỹ ta tóg sir kutê ja nĩ, kỹ ag tóg goj var ki kãgter kãn ja nĩ. ²⁸ Kỹ tóg ri ke pẽ ja nĩ gé, Ló tỹ ga mĩ tĩg ki. Ên kã ag tóg jẽn ja nĩgtĩ gé, jẽn kar kỹ ag tóg kronkron ja nĩgtĩ gé. Vender ke mũ ja ag nĩgtĩ gé, kygãm ke mũ ja ag nĩgtĩ gé. Êkrãn ja ag nĩgtĩ gé, ãn hyn han ja ag nĩgtĩ gé. ²⁹ Ên kã Ló tóg kejên cidade tỹ Sodoma tá kãkutê ja nĩ, kỹ pĩ tóg kanhkã tá kãtère ja nĩ, cidade kri, pó tỹ enxofre nĩja ên ke gé. Kỹ ên tóg ag kãgtén kãn ja nĩ. Topê tỹ ag vóg kónãn ke to jykrén sór tũ ja ag nỹtĩgtĩ. ³⁰ Ge ti nĩnh mũ gé, êprã ke fi kósin tỹ vênh ven mãn ke kurã ên kã. Mĩ êkrén ke tũ ag nĩgtĩ gé, ti to há tũ ag. ³¹ Ū tỹ kurã ên kã ã ãn rã hã tĩn kỹn jé ã tũ mãn rã sór tũg, ti tũ tỹ ti ãn krēm nỹtĩ ti. Ū tỹ êpỹ tá tĩ ên jé ã tũ to vỹn ke tũg. ³² Ló prũ fi to jykrén. ³³ ãjag tỹ ãjag jykre hã han sór kỹ ãjag nũgme ki vár ke mũ, ha vemnĩ. ãjag tỹ isugrĩn ãjag jykre fi mãn kỹ ãjag krenkren ke vễ, ha vemnĩ,” he tóg.

³⁴ “Hã kỹ sóg tag tó mũ, ha mẽ. Kuty ên kã, inh kãtĩg mãn ke kuty ên kã ãn régre ag vỹ jagnê mré nũgnũr nỹtĩnh mũ. Ag kãmĩ ãn pir jé prêr sóg ke mũ, kỹ tóg inh mré tĩnh mũ, jãvo ti régre vỹ kã nỹnh mũ, ha vemnĩ. ³⁵ Ūn régre fag vỹ êgtynyn nỹtĩnh mũ, jagnê mré, ên kã. Kỹ sóg ãn pir fi jé prêr ke mũ, kỹ fi tóg inh mré tĩnh mũ, jãvo fi régre fi vỹ kã jẽnh mũ, ha vemnĩ. ³⁶ Ūn régre ag vỹ êpỹ ki rãnrãj mũnh mũ, ên kã. Kỹ sóg ãn pir jé prêr ke mũ, kỹ tóg inh mré tĩnh mũ. Jãvo ti régre vỹ tá tĩnh mũ gé, ha vemnĩ,” he tóg, Jesus ti.

³⁷ Kỹ ti mré mũ tĩ ag tóg êg Senhor mỹ: “tag hẽ tá ke nĩnh mũ hỹn'?” he mũ. Kỹ tóg ag mỹ: “kurã ên kã ãjag ki kanhró nỹtĩnh mũ,” he mũ. “Nén ũ ter nỹg ja ri ke ti nĩ. Hã tá tóg vênh mãn tĩ, jãtã ti, he êg tóg tĩ. Tag ri ke ti nĩnh mũ, ha vemnĩ,” he tóg, Jesus ti. Ti tỹ ã kãtĩg mãn ke tón hã vễ.

18

Êg tỹ Topê mré vỹ to krónh ke tũ

¹ Kỹ Jesus tóg ag mỹ: “ãjag tỹ Topê mré vēmén ke vỹ ge nỹnh mũ, ha mẽ,” he mũ. Êg tỹ kurã kar ki Topê mré vēmén kỹ tóg há tĩnh mũ, êg tỹ to krónh ke tũ nĩn kỹ. Tag tỹ tóg ag kanhrãnrãn sór mũ, ã mré mũ tĩ ag, hã kỹ tóg tag tó mũ, ha mẽ. ² “Kejên pã'i tóg nĩgtĩ, êmã ũ tá,” he tóg. “Ag tỹ jagnê to jũ vég ti tĩ. Ti rãnrãj hã vễ. Hã ra tóg Topê kamêg vãnh nĩ, ti jykre pãno nĩn kỹ. Kỹ tóg ã mré ke ag kamêg vãnh pẽ nĩgtĩ gé. Kórég pẽ ti nĩgtĩ. ³ Ti jamã tá ũ fi tóg nĩgtĩ gé, ãn mén ter ja fi. Ên fi vỹ kejên ti to kãtĩg kỹ ti mré vēmén mũ. Kỹ fi tóg ti mỹ: “inh lograr ke sór mũ ên ag jo inh vemnĩ,” he mũ. ⁴ Hã ra tóg

mê jāvānh nī. Jatu tóg nī nī, kysā tỹ hēn ri ke ki. Kỹ fi tóg ti tá jun tỹ hēn ri ke han mũ, to krónh ke tũ fi nī. Kỹ tóg kejēn to jykrén mũ. “Topē kamēg vānh inh nĩgtĩ,” he tóg. “Ũ kamēg vānh inh nĩgtĩ gé. ⁵ Hã ra fi tóg isovānh tũ pē nī, ũn mén ter ja ēn fi. Kurā kar ki fi tóg inh mỹ to vīnh kātĩ tĩ. Kỹ inh hỹn fi jy rānh mũ ha, ke tũ nī mũ ra fi tóg ijũ han ke mũ, fi tỹ inh venh kātĩ to krónh ke tũ nĩn kỹ, ha vemnĩ,” he tóg, pã'i kórég ti,” he tóg, ěg Senhor tỹ Jesus ti.

⁶ Kỹ tóg ag mỹ: “ti vĩ jēmē ra,” he mũ. “Jykre pāno ti nī, pã'i kórég ěn ti, hã ra tóg fi tỹ ti mỹ vĩ e ěn to fi kren han sór mũ,” he tóg. ⁷ “Hã kỹ Topē vỹ ājag krenkren han ke mũ gé. Ājag kuprēg ja tóg nĩ mỹr, kỹ ti mré vēmén nĩ. Kurā ki ti mỹ vīmĩ, kuty tá ke gé. Ājag kren han vānh nĩ ve ti nĩ, kejēn. ⁸ Hã ra tóg ājag krenkren han ke mũ, kānhmar, ha vemnĩ. Ki hã sóg tó mũ,” he tóg. “Hã ra ěprā ke fi kósin ěn tỹ kātĩg mǎn kỹ ag mỹ ti ki ge sór mũ vỹ?” he tóg, Jesus ti.

Ěg tỹ: “tỹ inh ũn há nĩ,” henh ke tũ

⁹ Kỹ Jesus tóg ag kanhrān mǎn mũ gé. Ũ tóg ũ tỹ ti vĩ mēg mũ ěn ag kāmĩ nỹtĩ, hã ra ag tóg vĕso: “tỹ ěg tóg ũn há nỹtĩ,” he tĩ. “Kórég tũ ěg nỹtĩ, jo ũ ag ne kórég nỹtĩ,” he ag tóg tĩ, vĕso, Jesus vĩ mēg mũ ũ ag. ěn ag kanhrānrān sór tóg mũ, Jesus ti. Kỹ tóg ag mỹ: “ājag jykre vỹ ge nỹnh mũ, ha mē,” he mũ. ¹⁰ “Kejēn Fariseu ũ tóg nĩgtĩ. Topē jo ĩn ra tóg tĩ mũ, tá Topē mré vĩ jé. Ti mré ũ tóg ra tĩ mũ gé, ũ tỹ governo mỹ jānkamy mǎg tĩ ti. Topē mré vĩ sór tóg mũ gé. ¹¹ Kỹ Fariseu tóg Topē mré vēmén jē nĩ. “Topē,” he tóg. “Inh mỹ tóg há tĩ, isỹ jykre kórég tũ nĩn kỹ, ag jāvo. Ũ ag tóg nĕn ũ péju(g) tĩ, hã ra sóg han tũ nĩgtĩ. Ũ ag tóg nĕn ũ vĕnhmỹ han tĩ inhhã, jāvo inh pi(jé) han tĩ. Ājag prũ tũ fag mré ag tóg nỹgtĩ inhhã. Kỹ governo mỹ jānkamy mǎg tĩ tag ti vỹ kórég nĩ gé inhhã. ¹² Ag jāvo sóg vĕnh jykre há han tĩ. Semana kar ki sóg vākre régre han tĩ, jĕg mē tĩ ki. Hã ki sóg ā jykre ki króm tĩ. Isũ tỹ sóg dízimo kajām tĩ, ā mỹ. Sỹ nĕn ũ tỹ 10 (ke) ki sóg ũn pir nĩm tĩ, ā mỹ dízimo han kỹ,” he tóg, Fariseu ti, Topé mỹ. ¹³ Hã ra governo mỹ jānkamy mǎg tĩ ěn tóg kór há tá jē nĩ, kuvar há tá, mỹ'āg kỹ. Kỹ tóg kanhkã ki ěvānh tũ nĩ gé. Ā fe kri tóg kǎgmĩg mũ, ti tỹ mỹ'āg mǎg kỹ. Kỹ tóg Topē mré vĩ mũ. “Topē,” he tóg mũ gé. “Ā vĩ mranh inh mỹr,” he tóg. “Ā mỹ inh jagāgtān ke tũ hã ra,” he tóg, Topē vĩ mranh tĩ ěn ti,” he tóg, Jesus ti.

¹⁴ “Ha mē, Topē vỹ ti mỹ vĕnh pāte fón, hã kỹ tóg jatun mỹ vyr. Jāvo tóg Fariseu ěn mỹ vĕnh pāte fón tũ nĩ. Ge ti nĩgtĩ. Ěg tỹ vĕso: “há inh nĩ,” henh kỹ Topē tóg ěg to kórég nĩ. Kỹ tóg ěg térem mũ sir. Ěg tỹ hã ra vĕso: “kórég inh nĩ,” henh kỹ Topē vỹ ěg to há nĩ, kỹ tóg ěg tỹ ũn mǎg han ke mũ gé sir,” he tóg, Jesus ti.

Jesus tỹ ũn kāsir ag to há

(Mt 19.13-15; Mc 10.13-16)

¹⁵ Kỹ fag tóg gĩr tatĩ kāmũ mũ ti to, ti tỹ gĩr kri ā nĩgé fi jé. Hã ra ti mré mũ tĩ ag tóg vĕg mũ, kỹ ag tóg fag to jũ mũ, ũ tỹ ag tatĩ kāmũ mũ fag to. ¹⁶ Hã ra Jesus tóg fag jé prĕr kỹ ag mỹ: “vĩ tũg nĩ, gĩr ag mỹ,” he mũ. “Gĩr ag tỹ iso kāmũ kamēg tũg nĩ,” he tóg. “Ũ tỹ ge hã vỹ ěg Senhor tỹ Topē krĕm nỹtĩnh mũ,” he tóg. ¹⁷ “Sỹ ke há vĕ, hã kỹ sóg tó mũ. Gĩr ag vỹ iso há pē nỹtĩ. ũn kāsir tag ag ri ke nỹtĩmĩ, ke tũ nĩ mũ ra ājag tóg Topē tỹ tỹ ěg pã'i nĩ venh ke tũ nĩ mỹr,” he tóg, Jesus ti.

Ũn rico ag

(Mt 19.16-30; Mc 10.17-31)

¹⁸ Kỹ kejēn ũ tóg Jesus ki jēmĕnh kātĩ mũ, pã'i ũ. Kỹ tóg ti mỹ: “Senhor’,” he mũ. “Hã ā tóg nĩ,” he tóg. “Sỹ rĩr krỹg ja tũ venh há tóg tĩ. Sỹ ti ve jé inh hỹn vĕnh jykre há tỹ ne han ke mũ?” he tóg. ¹⁹ Kỹ Jesus tóg ti mỹ: “iso: “há ā nĩ,” he sór tũg nĩ,” he mũ. “Ěg pi(jé) há nỹtĩ,” he tóg. “Topē hã ne ā pir mỹ há nĩ,” he tóg. ²⁰ “Topē tỹ nĕn ũ to ěg jyvĕn ja ěn ki kanhrō ā tóg nĩ, hã vỹ: ā prũ tũ fi mré nỹ tũg nĩ, he mũ, ũ tĕn tũg nĩ, he mũ, nĕn ũ péju(g) tũg nĩ, he mũ, ũ to ón tũg nĩ, he mũ, ā nỹ mré ā jóg kamēg nĩ, he mũ,” he tóg ti mỹ, Jesus ti. ²¹ Hã ra tóg: “ki króm kǎn sóg, isĩn kã,” he mũ. ²² Kỹ Jesus tóg ti mỹ: “nĕn ũ

pir vỹ tũ nĩ ver,” he mũ. “Ă tũ vãm kãn nĩ, ă tỹ ùn vēsỹrénh mũ ag mỹ vin jé, jãnkamy ti. Kỹ ă tóg kanhkã tá tũ mág nĩ sir. Kar kãtĩg nĩ, ă tỹ inh mré tĩg jé,” he tóg ti mỹ, Jesus ti. ²³ Kỹ tóg ti mỹ vẽnhmỹ tĩ, Jesus vĩ ti, ti rico pẽ nĩn kỹ.

²⁴ Hã ra Jesus tóg ti mỹ vẽnhmỹ ên ki kanhrãn mũ. Kỹ tóg ă mré mũ tĩ ag mỹ: “jagy ti nỹ, ùn rico tỹ Topẽ tỹ tỹ êg pã'i nĩ venh ke ti,” he mũ. ²⁵ “Cavalo pãnĩ sór vỹ préj nor fĩn rãm ke tũ nĩ,” he tóg. “Ti tỹ fĩn rãm ke ra tóg jagy tĩ vễ, ùn rico tỹ Topẽ tỹ tỹ êg pã'i nĩ venh ke ti,” he tóg.

²⁶ Kỹ ti vĩ mễg mũ ag tóg to vēmén mũ. “Kỹ ù hỹn kren ke tũ pẽ nĩ,” he ag tóg. ²⁷ Kỹ Jesus tóg ag mỹ: “ẽprã ke ag vỹ tá junjun ke tũ nĩ vễ,” he mũ. “Hã ra Topẽ hã tóg êg tỹ tá junjun han ke mũ,” he tóg.

²⁸ Kỹ Pedro vỹ: “ha vé,” he mũ. “Êg tỹ nén ù kar ré jé êg tóg mũ mũ, êg tỹ ă mré mũ jé,” he tóg. ²⁹ Kỹ Jesus tóg ag mỹ: “sỹ ke há vễ, hã kỹ sóg tó mũ,” he mũ. “Ủ tóg kejẽn ă jamã ré kỹ tĩ mũ, ti prũ fi, ti kãke, ti jãvy, ti han mũ fag, ti krẽ ré kỹ tóg tĩ mũ, Topẽ tỹ tỹ êg pã'i nĩ tugrĩn, ti tỹ ti vĩ ki króm jé,” he tóg. ³⁰ “Ên vỹ tóg sir vẽnh kaja jé nén kar ên tỹ ùn e venh ke mũ, ag jęgja kã, ga kri, kar kỹ tóg vãhã sir êg rĩr krỹg ja tũ venh ke mũ gé sir, kanhkã tá,” he tóg, Jesus ti.

Jesus tỹ ă ter ke tó mãn

(Mt 20.17-19; Mc 10.32-34)

³¹ Kỹ tóg ù tỹ 12 (ke) ag jé prěr mũ, vyrmỹ, ag mỹ kãmén jé. “Ha vé,” he tóg. “Jerusalém ra êg mũ mũ, kỹ sóg tá ve kãn ke mũ, vãsỹ Topẽ vĩ tó tĩ ag tỹ iso nén rán ja ên ti,” he tóg. “Tỹ sóg ẽprã ke fi kósin ên nĩ, hã kỹ ag tóg inh kãmén ja nĩ, Topẽ vĩ ki. ³² Fóg ag mỹ ag tóg inh fêg ke mũ, pã'i ag, Jerusalém tá, ha vemnĩ, ag tỹ iso é he jé, ag tỹ inh vóg kónãn jé, ag tỹ iso sug ke jé gé, ³³ ag tỹ inh mrãnmrãn jé. Ag tỹ isén ke vễ. Hã ra sóg kurã tãgtũ tũg kỹ rĩr mãn ke mũ, ha vemnĩ,” he tóg, ti mré mũ tĩ ag mỹ, Jesus ti. ³⁴ Hã ra ag tóg ti vĩ tag to jykrén tũ nĩ, ù tỹ 12 (ke) ên ag. Ti vĩ tóg ag mỹ vẽnhmỹ tĩ. Kỹ ag tóg ki kagtĩg nỹtĩ. “Ti tỹ ne tó nễ hỹn'?” he ag tóg mũ sir.

Jesus tỹ ùn kyvó tỹ há' he

(Mt 20.29-34; Mc 10.46-52)

³⁵ Ag mũn kỹ ag tóg Jericó to hã mũ mũ. Tá ùn kyvó vỹ ẽpry kri nĩ nĩ, êmĩn kri. “Inh mỹ jãnkamy nĩm,” he tóg tĩ, vẽnh kar mỹ, ti kyvó nĩn kỹ. ³⁶ Ên vỹ vẽnh kar tỹ ẽpry jagma mũ mễg tĩ. Kỹ tóg ag mỹ: “ũ nễ?” he mũ. ³⁷ Kỹ ag tóg ti mỹ: “Jesus vễ, Nazaré tá ke ên vễ,” he mũ. ³⁸ Kỹ tóg prěr mũ sir. “!..Jesus'..., Davi kósin'..., ijagãgtãn ra..!” he tóg mũ, prěr kỹ. ³⁹ Kỹ Jesus jo mũ ag vỹ ti mỹ vĩ jũ han mũ. “Êmẽ kã nĩ nĩ,” he ag tóg ti mỹ. Hã ra tóg prěr mãn', prěr mãn' he mũ. “!..Davi kósin'..., ijagãgtãn ra..!” he tóg.

⁴⁰ Kỹ Jesus tóg krỹg he mũ, kỹ tóg: “ti jé prěr,” he mũ. Kỹ ag tóg ti pére kãmũ mũ. Ti ki jun kỹ tóg ti mỹ: ⁴¹ “inh ă tỹ hẽ ri kenh ke?” he mũ. Kỹ tóg êg Senhor mỹ: “sỹ venh há tóg tĩ,” he mũ. ⁴² Kỹ Jesus tóg ti mỹ: “kỹ tỹ vé,” he mũ. “Ă tỹ inh ki rã kỹ ă há' henh ke mũ,” he tóg. ⁴³ Kỹ tóg vēsỹmér êvãnh há' he mũ sir. Kỹ tóg ti mré tĩ mũ. Topẽ mỹ tóg vĩ há han mũ. Kỹ tóg vẽnh kar mỹ há tĩ, ag tỹ ti tỹ há' he mũ ên ven kỹ. Kỹ ag tóg Topẽ mỹ vĩ há han mũ gé sir.

19

Jesus tỹ Zaqueu venh tĩg

¹ Kỹ Jesus tóg cidade tỹ Jericó ki rã mũ sir, kỹ tóg fĩn rãm kỹ tĩg sór mũ. ² Hã ra ù tóg tá nĩ nĩ, ti jyjy hã vỹ: Zaqueu, he mũ. Governo mỹ jãnkamy mäg tĩ ag pã'i vễ. Rico pẽ ti nĩ, rico tãvĩ. ³ Ên tóg Jesus ve sór mũ, ti tỹ Jericó fĩn rãm kỹ. Hã ra tóg rur jẽ, hã kỹ tóg ti vég tũ nĩ, vẽnh e ag tỹ ti pénĩn mũn kỹ. ⁴ Hã kỹ tóg ti jo vẽnhvãg tĩ mũ, kỹ tóg ka tỹ krén to tãpry mũ, ti tỹ Jesus ve jé, ti tỹ jagma tĩg kỹ. ⁵ Kỹ Jesus tóg ka ên tá jun mũ. Hã ra tóg krĩg mỹ êvãnh kỹ ka kri ti vég mũ. Kỹ tóg ti mỹ: “Zaqueu',” he mũ. “Kur kãtére to fũrũn ké. Isỹ ă ãn krẽm nũr ke vễ,” he tóg, Jesus ti. ⁶ Kỹ tóg tẻ tỹ mrãnħ ke mũ sir. Jesus mỹ tóg: “mũ jé ha,” he mũ. Ti mỹ tóg sér tĩ, Jesus tỹ ti ãn krẽm nũr sór kỹ.

⁷ Hã ra vênh e ên tóg Jesus to vĩ mũ sir, ti to jũ ký. “Topê vĩ mranh tĩ vễ, ên ti, hã ra tóg ti ãn krêm nũr sór mũ, vênh jykre pãno han tĩ ên mré,” he ag tóg mũ.

⁸ Ký Jesus tóg ti ãn krêm nĩ nĩ. Ký Zaqueu vĩ ti mỹ vênh kãmén kãtĩ mũ, ã jykre to jykrén ký. Ký tóg êg Senhor mỹ: “ha vé,” he mũ. “Isũ kuju vin jé sóg ke mũ, ãn jagtar ag mỹ. Ủ ag lograr he ja sóg nĩgtĩ, ag tũ ki, hã ra sóg ag mỹ ti kãfór nĩm sór mũ ha. Sỹ jãnkamy pir ki ãn lograr he jan ki sóg ti mỹ ã tỹ 4 (ke) vin sór mũ,” he tóg, Zaqueu ti.

⁹ Ký Jesus tóg ti mỹ: “há ti nĩ,” he mũ. “Ủri ã tóg kren mũ, ã mré ke fag mré hã,” he tóg. “Abraão kósin vĩ tỹ ã nĩ gé,” he tóg. ¹⁰ “Tỹ sóg êprã ke fi kósin nĩ. Ủn vãfor mũ ên jãvãnh jé sóg kãtĩg, sỹ ag krenkren han jé, ãn jykre pãno han mũ ên,” he tóg, Jesus ti.

Jãnkamy to comparação

(Mt 25.14-30)

¹¹ Hã ra ag tóg ti vĩ mẽ há han mũ, ký tóg ag mỹ Topê tỹ tỹ êg pã'i nĩnh ke ti kãmén sór mũ. Jerusalém to hã tóg nĩ, hã ký ag tóg ti to: “Topê tỹ tỹ êg pã'i nĩ hỹn vênh ven ke mũ, ti tỹ tá jun ký,” he mũ. ¹² Ký Jesus tóg ag mỹ kãmén mũ, Topê tỹ tỹ êg pã'i nĩnh ke tỹ ver vênh ven ke tũ nĩ. Ký tóg tag tó mũ, ha mẽ. “Kejẽn pã'i tóg nĩgtĩ,” he tóg. “Ên tóg ga ã ra tĩg sór mũ, tá ã tũ ve jé, ga ên tá ã tũ han jé. Tag han kar tóg tá vỹn ke sór mũ. ¹³ Pã'i ên vĩ ã camarada tỹ 10 (ke) ag jé prêr mũ, ký tóg ag mỹ jãnkamy prestar he mũ sir. Ag kar mỹ tóg ti kãmur pir nĩm mũ, jãnkamy tỹ, ã tỹ 10 (ke) ag mỹ. Ký tóg ag mỹ: “ha inh mỹ tỹ rãnrãj,” he mũ. “Kejẽn sóg vỹn kenh ke mũ, ký sóg tugnỹm ke mũ, ãjag rãnrãj ti,” he tóg. Kar tóg tĩ mũ sir.

¹⁴ Hã ra ti krêm ke ãn ag vĩ ti to há tũ nỹtĩ, ký ag tóg ti nón vênh vĩ jẽnẽg mũ. Ký ag tóg: “ã tỹ êg kri tỹ pã'i nĩn ký tóg vẽnhmỹ nĩ,” he mũ, “êg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vênh vĩ jẽnẽg mũn kã. ¹⁵ Hã ra tóg tỹ pã'i nĩn ký kejẽn vỹn ke mũ, ga ên ve kar ký, tá ti rãnrãj han kãn kar. Ký tóg tỹ pã'i mág jẽ. Vỹn ke ký tóg ã camarada ag jé prêr mũ sir, ti tỹ ãn mỹ jãnkamy vin ja ên ag. Ti tỹ ag rãnrãj tugnỹm sór vễ, ag ganho ve sór vễ gé. ¹⁶ Ký ãn tóg ti tá jun ký ti mỹ: “pã'i,” he mũ. “Ti kãmur pir nĩm ã tóg mỹr. Hã ra sóg kri ã tỹ 10 (ke) ganhar ké,” he tóg. ¹⁷ Ký ti patrão tóg ã camarada mỹ: “jykre há tãvĩ ã tóg nĩ,” he mũ. “Nén sĩ ki rĩr há han ã tóg, hã ký ã tóg cidade tỹ 10 (ke) ki rĩr mũ ha,” he tóg, pã'i ti, ã camarada mỹ. ¹⁸ Ký ãn tóg ti tá jun mũ gé. Ký tóg ti mỹ: “pã'i,” he mũ gé. “Ti kãmur pir nĩm ã tóg mỹr. Hã ra sóg kri ã tỹ 5 (ke) ganhar ké,” he tóg. ¹⁹ Ký ti patrão tóg ti mỹ: “cidade tỹ 5 (ke) ki rĩr jé ã tóg ke mũ ha,” he mũ gé.

²⁰ Ký ãn tóg tá jun mũ gé. Ký tóg ti mỹ: “pã'i,” he mũ gé. “Ha vé, ã tũ ti,” he tóg. “Inh krĩ pãgja ki sóg tógfĩn ký nĩm han. ²¹ ã kamẽg ja inh nĩ, ã vĩ tar to. ã tỹ nén vin ja tũ ên mãn sór ã tóg tĩ, ã tỹ nén krãn ja tũ kunũnh sór ã tóg tĩ,” he tóg, ti camarada ti, pã'i ti mỹ. ²² Ký ti patrão tóg ti mỹ: “ã vĩ tóg ã jykre pãno han mũ, ha mẽ,” he mũ. “Inh mỹ vĩ tar han tĩ? Inh mỹ sỹ nén vin ja tũ mãn sór tĩ? Inh mỹ sỹ nén krãn ja tũ kunũnh sór tĩ? Hã ki kanhrõ ã mỹ nĩ?” ²³ Ký ã tỹ ne jé inh jãnkamy tỹ banco ki rãnrãj tĩ ag mỹ vin ja tũ nĩ nẽ? ã tỹ ag mỹ vin mũ ra sóg ti juro venh mũ vễ, ký sóg isũ kãfór mãn ke mũ vễ,” he tóg, ti patrão ti, ã camarada mỹ. ²⁴ Ký tóg tá nỹtĩ ag mỹ: “ti nĩgã ti tũ mã,” he mũ. “Ủ tỹ ti kãmur tỹ 10 (ke) mãn ja ên mỹ nĩm, ti tũ pir ti,” he tóg mũ sir. ²⁵ Ký ag tóg ti mỹ: “pã'i,” he mũ. “Ti kãmur tỹ 10 (ke) vĩ tỹ ti tũ nỹtĩ. Tũ mág ve ti huri,” he ag tóg, pã'i mỹ. ²⁶ Ký tóg: “hỹ,” he mũ. “Hã ký sóg tó mũ. Ủn tũ mág vĩ mãn mãn ke mũ. Ủ tỹ tũ sĩ nĩ ên tũ kunũnh kãn jé ag tóg ke mũ gé,” he tóg. ²⁷ “Kỹ inh kato tẽ mũ ag pére kãmũmnĩ, ã tỹ iso: “ti tỹ êg kri tỹ pã'i jẽn ký tóg êg mỹ kórég nĩ,” he mũ ên ag. Ag kãgtén ra, inh rĩnve,” he tóg, pã'i ti,” he tóg, Jesus ti. Ti tỹ êg tỹ ti rãnrãj ki rĩr há han ke kãmén hã vễ.

²⁸ Tag tó kãn ký tóg tá kãkutẽ mũ sir, ký tóg cidade tỹ Jerusalém ra tĩ mũ.

Jesus tỹ Jerusalém tá jun

(Mt 21.1-11; Mc 11.1-11; Jo 12.12-19)

²⁹ Ti tỹ Jerusalém ra tĩg ký tóg êmã tỹ Betfagé to hã jun mũ, êmã tỹ Betânia tá, pãnónh tỹ Oliveiras he mũ ên tá. Tá jun ký tóg ã mré mũ tĩ régre ag jẽnẽg mũ, ag tỹ ti mỹ ag mẽg

tỹ burrica ve jé. ³⁰ Hã kỹ tóg ag mỹ: “ẽmã ẽn ra mũmnĩ, ẽg jo ẽmã ẽn ra,” he mũ. “Tá junjun kỹ ajag tóg burrica fi kósin venh mũ. Kri nĩ ja tũ ja tóg jẽ ver. Ẽn kavãn kỹ ti pére kãmũmnĩ, ti kyvãn kỹ,” he tóg. ³¹ “Hẽn ri ke mũn ag tóg ajag mỹ: “ajag tỹ ne jé ti kavãn nẽ?” henh mũ. Kỹ ag mỹ: “ẽg Senhor vỹ ti ve sór mũ,” hemnĩ,” he tóg, Jesus ti.

³² Kỹ ag tóg mũ mũ, Jesus tỹ ag jẽgnẽn kỹ. Ti tỹ ag mỹ tó mũ ve kãn ag tóg mũ sir. ³³ Kỹ ag tóg ti kyvãg mũ. Kỹ ti tỹ tỹ ùn mẽg mũ ag tóg ag mỹ vỹ mũ. “Ajag tỹ ne jé burrica kósin tag kavãn nẽ?” he ag tóg. ³⁴ Kỹ ag tóg: “ẽg Senhor vỹ ti ve sór mũ,” he mũ. ³⁵ Kỹ ag tóg Jesus mỹ ti pére kãmũ mũ. Ajag kur kugjẽn ag tóg mũ sir ti kri. Kỹ Jesus tóg kri nĩ mũ sir. ³⁶ Kỹ tóg tĩ mũ. Kỹ ag tóg ajag kur kugjẽn mũ sir, ẽpry jagma, ẽmĩn jagma. ³⁷ Ge kỹ ag tóg Jerusalém to hã junjun mũ sir, pãnónh tỹ Oliveiras to re kỹ.

Ag tỹ pãnónh ẽn to re kỹ vãhã ag kar ẽn tóg Topẽ mỹ vỹ há han mũ sir, Jesus mré mũ kar ẽn ag. Ag mỹ tóg sér tĩ. Jesus tỹ nén han mũ ve ja ag tóg nĩgtĩ, ti tỹ nén han vãn hyn han mũ ti. Ẽn mĩ ẽkrén kỹ ag tóg Topẽ mỹ vỹ há han mũ, jamã hár(a). ³⁸ Kỹ ag tóg: “!..sér tóg tĩ ẽg mỹ..!” he mũ. “!..Ẽg Senhor vỹ ẽg ki jun..., ẽg jóg mág tỹ ti jẽnẽn kỹ..!” he ag tóg. “!..Kanhkã tá ke ag tóg jatu nỹtĩ..! Topẽ mỹ ẽg tóg vỹ há han sór mũ, kynhmỹ nĩ ẽn mỹ..!” he ag tóg, prẽnprẽn kỹ.

³⁹ Hã ra Fariseu ù ag tóg tá nỹtĩ gé, vẽn h e ẽn kãmĩ. Kỹ ag tóg Jesus mỹ: “Senhor’,” he mũ. “Ã mré mũ tĩ ag mỹ: “prẽnprẽn tũg ra,” hé,” he ag tóg, Jesus mỹ. ⁴⁰ Hã ra Jesus tóg ag mỹ: “vó,” he mũ. “Ha mẽ, ag prẽnprẽn tũ nĩ ra pó hỹn prẽnprẽn mũ vẽ, ag mỹ sinsér mũ vẽ,” he tóg ag mỹ.

Jesus tỹ Jerusalém to fỹ

⁴¹ Ge kỹ ag tóg cidade tá junjun mũ sir. Cidade ẽn ve kỹ tóg to fỹ mũ, Jesus ti. ⁴² “Jerusalém tá ke ag vỹ ki kanhrãnran sór tũ nỹtĩ,” he tóg. “Ag tỹ ùri ki kanhrãnran há tóg tĩ vẽ, hã ra ag tóg ke jãvãn nỹtĩ. Ajag tỹ ki kanhrãnran’ he mũ ra ajag tóg jatu kenh ke mũ vẽ, mỹr, ha mẽ, hã ra ajag tóg jẽmẽ sór tũ nĩ. Kutu ajag tóg nỹtĩ. ⁴³ Hã kỹ ajag tóg vãhã kurã kórég pẽ venh ke mũ. Ajag kato tẽgtẽ mũ ag vỹ ajag to ráránh ke mũ. Kũm’kũm ke jé ag tóg ke mũ, ajag cidade jy ró pẽnĩn. Komẽr hã ag tóg ajag to grẽngrẽn kenh ke mũ, kỹ ag tóg ajag mãn vỹrỹn kenh ke mũ sir. ⁴⁴ Ajag tỹ tũg’ he kãn jé ag tóg ke mũ, ajag krẽ ke gé. Ajag ãn kókén kãn jé ag tóg ke mũ gé. Kỹ ãn tỹ pó pi(jé) jagnẽ kri nỹtĩnh mũ’. Kurã há ki ajag tóg Topẽ vỹ mẽ jãvãn nỹtĩ, ùri. Topẽ vỹ ùri ajag mỹ vỹ há han mũ ver, hã ra ajag tóg mẽ jãvãn nỹtĩ. Hã kỹ ajag tóg ti kórég venh ke mũ,” he tóg, Jesus ti. Fỹ pẽ han kỹ tóg tó mũ, cidade mĩ tĩg kỹ.

Jesus tỹ Topẽ jo ãn tá jun

(Mt 21.12-17; Mc 11.15-19; Jo 2.13-22)

⁴⁵ Kỹ tóg Topẽ jo ãn tá jun kỹ kãra rã mũ sir. Kỹ tóg ù tỹ tá nén ù vender he tĩ ag pan mũ sir. ⁴⁶ Ag mỹ tóg tag tó mũ, ha mẽ. “Topẽ vỹ rá to jykrén nĩ,” he tóg. “Tag vỹ rán kỹ nĩ, ha mẽ. ãn ãn jiji vỹ tỹ Topẽ mré vỹ jafã nĩ, he tóg, Topẽ vỹ tỹ rán kỹ nĩ ki. Hã ra ajag tóg Topẽ mré vỹ jafã tag krẽm nén kar pigju mũgtĩ, kỹ tóg bandido ag jamã ri ke nĩ sir,” he tóg, Jesus ti. Ag pan kỹ tóg ag mỹ tó mũ.

⁴⁷ Hã ki tóg kurã kar ki ag kanhrãnran mũ, Topẽ jo ãn krẽm. Hã ra Topẽ tũ ki rĩr tĩ to pã’i ag mỹ tóg kórég nĩ, Topẽ vỹ rán tĩ ag mỹ ke gé, pã’i kar ag mỹ. Hã kỹ ag tóg ti tén ke to jykrén mũ sir. ⁴⁸ Hã ra tóg ag mỹ ki króm sór tũ nĩ. Vẽn kar mỹ tóg mẽ sér tĩ, ti vỹ ti, hã kỹ pã’i ag tỹ ti tén sór mũ ra tóg vẽnhmỹ tĩ sir ag mỹ.

20

Ẽn nỹ hỹn Jesus jẽnẽ

(Mt 21.23-27; Mc 11.27-33)

¹ Kurã kar ki Jesus tóg Topẽ vỹ tó jẽ nĩ, vẽn vỹ sér ẽn, Topẽ jo ãn krẽm. Kỹ tóg kejẽn tá jẽ nĩ. Kỹ Topẽ tũ ki rĩr tĩ to pã’i ag tóg ti to kãmũ mũ, Topẽ vỹ to professor ag ke gé, kófa ag ke gé. ² Ti mỹ ag tóg: “ẽg tỹ ã ki jẽmẽn há tóg tĩ,” he mũ. Kỹ tóg ag mỹ: “hej,” he mũ. Kỹ ag tóg: “ã vẽn jykre tỹ ne tỹ tag han mũ?” he mũ. “Ẽ nỹ ã jẽnẽ?” he ag tóg.

³ Kĩ tóg ag mĩ: “ãjag ki sóg jēmēnh ke mũ gé, vēnh kato,” he mũ. “Ha mẽ. ⁴ João vỹ ag kygpég tĩ ja nĩgtĩ. Kĩ ti mĩ kanhkã tá vēnh jykre han mũ', ěprã jykre vó?” he tóg. “Ũ nỹ ti jēnē?” he tóg. “Inh mĩ tó,” he tóg, Jesus ti, ag mĩ. ⁵ Kĩ ag tóg jagnē mré to jykrén mũ sir. “Ěg tỹ ti mĩ: “Topē tỹ ti jēnē vē,” hen kỹ tóg ěg mĩ: “ãjag tỹ ne jé ti vĩ kri fig tũ ja nĩ nē?” henh ke mũ,” he ag tóg jagnē mĩ. ⁶ “Ěg tỹ hã ra ti mĩ: “ěprã ke jykre ja vē,” hen kỹ vēnh kar vỹ ěg pin sór ke mũ, pó tỹ, ha vemñĩ. João to ag tóg: “Topē vĩ tó tĩ pē ja vē,” he tĩ, hã kỹ ag tóg ěg to jũnh ke mũ, ěg tỹ: “hã tũ vē,” hen kỹ,” he ag tóg mũ jagnē mĩ. ⁷ “Topē jykre han ja ti nĩ,” he sór tũ ag nỹtĩ, kỹ ag tóg: “ěprã ke jykre han ja ti nĩ,” he sór tũ nỹtĩ gé. Hã kỹ ag tóg Jesus mĩ: “ěg pí(jé) ki kanhró nỹtĩ’,” he mũ, João jykre to. ⁸ Kĩ Jesus tóg ag mĩ: “kỹ sóg ãjag mĩ ũ tỹ inh jēnēg mũ ěn tónh ke tũ nĩ gé,” he mũ. Ā kato tē mũ ag mĩ tóg ke mũ.

Ũn camarada kórég ag to comparação

(Mt 21.33-46; Mc 12.1-12)

⁹ Kĩ tóg vēnh kar kanhrãnrãnh kỹ ag mĩ: “ěg tỹ Topē kato tē kỹ tóg ge nỹnh mũ, ha mẽ,” he mũ. “Kejēn ũ tóg nĩgtĩ. Uva krãnh ja tóg nĩ, nén kanē tỹ vinho han jafã ěn. Kỹ tóg ũ tỹ ki rĩr tĩ ag mré to jykrén kỹ ag mĩ tovãnh mũ sir. Ag mĩ tovãnh kỹ tóg ga ũ ra tĩ mũ. Hã ra tóg kãtig vãnh han mũ. ¹⁰ Ti uva kanēnh kỹ tóg ag mĩ ã camarada jēnēg mũ, ũ tỹ ki rĩr tĩ ag mĩ, ag tỹ ti mĩ ti tũ nĩm jé, ěkré kanē ěn ti. Hã ra ag tóg ti mĩ vin tũg mũ. Ti mrãnrãnh ag tóg mũ. Kỹ ag tóg ti mĩ: “ha tĩg,” he mũ. Nén ũ tũ ra tóg tĩ mũ sir. ¹¹ Kĩ tóg ã camarada ũ jēnēg mũ gé sir. Hã ra ag tóg ti mrãnrãnh mũ gé. Ti mĩ féfén kar kỹ ag tóg ti mĩ: “ha tĩg,” he mũ gé sir. Nén ũ tũ ra tóg tĩg mũ gé. ¹² Kĩ tóg ag mĩ ũ jēnē mãn mũ gé sir, hã ra ag tóg ti mrãnrãnh kỹ ti rãnh kỹ ti tĩn mũ sir.

¹³ Kĩ uva kré tỹ ũn tũn mũ tóg to jykrén mũ. “Inh hỹn hēn ri kenh ha,” he tóg, to jykrén kỹ. “Inh kósin jēnē jé sóg ke mũ, inh fe pē ěn, hēn ri ke mũn ag ti kamēg mũ,” he tóg. ¹⁴ Ti kósin tỹ ag tá jun kỹ nén kré ki rĩr tĩ ag tóg ti vég mũ. Kỹ ag tóg ti to jykrén mũ, jagnē mré. “Kejēn ěkré tag vỹ tỹ ti tũ nỹnh mũ,” he ag tóg. “Mũ nỹ, ti tén jé, ti tũ tag tỹ tỹ ěg tũ nỹnh jé,” he ag tóg. ¹⁵ Kĩ ag tóg ró mã ra ti pére mũ kỹ tá ti tén mũ sir. Kỹn hỹn hē ri kenh ke mũ', ěkré tỹ ũn tũn mũ ěn ti?” he tóg, Jesus ti. ¹⁶ “Kãtig jé tóg ke mũ, ěkré ki rĩr tĩ ag kãgtén jé. Kĩ tóg camarada ũ ag mĩ finh mũ sir, ã jakré ti,” he tóg, Jesus ti.

Kỹ ag tóg mēg mũ, ti vĩ ti, ti pēnĩn nỹtĩ ěn ag. Kỹ tóg ag mĩ e tĩ. “Ěg jé tag venh ke tũ nĩ,” he ag tóg mũ, ũ tỹ Jesus vĩ mēg mũ ag. ¹⁷ Hã ra Jesus tóg ag ki ěvãnh kỹ ag mĩ: “Topē vĩ rá tag to jykrén nĩ, ha mẽ,” he mũ. “Pó tỹ ĩn han jafã fón ag tóg, pó tỹ ĩn han tĩ ag. Ag mĩ tóg kórég ja nĩ, pó ěn ti. Hã ra Topē tóg pó ěn hã tỹ ĩn nũna han mũ,” he tóg, Topē vĩ tỹ rán kỹ nĩ ki,” he tóg, Jesus ti. Ti tỹ ã kato vãsãnsãnh mũ ag mĩ vēnh kãmén hã vē. ¹⁸ Kĩ tóg ag mĩ: “ũ tỹ hēn ri ke ag vỹ pó tag kri vár ke mũ, kỹ ag tóg kri vár kỹ tũ' henh ke mũ,” he mũ. “Kỹ pó tag vỹ ũ tỹ hēn ri ke ag kri kutēnh ke mũ gé, kỹ tóg ag tỹ nám nám ke kãn mũ sir, ag kri kutē kỹ,” he tóg, Topē vĩ tỹ rán kỹ nĩ ki,” he tóg, Jesus ti. Ti tỹ ag tỹ ti ki rã tũ tũgrĩn nũgme ki vár ke tón hã vē.

Ěg tỹ imposto kajãm

(Mt 22.15-22; Mc 12.13-17)

¹⁹ Kĩ Topē vĩ to professor ag vỹ ti vĩ mēg mũ, Topē tũ ki rĩr tĩ to pã'i ag ke gé. Ag hã to tóg kãmén ja nĩ, “ěg tỹ Topē kato vãsãnh tag vỹ ge nỹnh mũ,” he mũ ěn ti. Kỹ ag tóg ki kanhró nỹtĩ sir, hã kỹ ag tóg ti se sór mũ. Hã ra ag tóg ũn e ěn kamēg mũ. Ti vỹ vỹ vēnh kar mĩ mẽ há tĩ, hã kỹ pã'i ag tóg ti ség tũ nĩ ver, ag tỹ ti se sór mũ (hã) ra. ²⁰ Kĩ ag tóg hã ra ti tugnỹm mũ. Ti vĩ to ag tóg vãjig mũ, ag tỹ ti vĩ to fóg tỹ pã'i mĩ ti fēg jé. Ag tỹ ti vĩ tugnĩn fóg tỹ pã'i mág mĩ: “ha ti vóg kónãnh,” he sór vē. Hã je ag tóg ũn jykre kuryj nỹ ve ag jēgnēg mũ, ag tỹ ón kỹ Jesus ki jēmē jé. ²¹ Kĩ ěn ag tóg sir Jesus mĩ: “Senhor',” he mũ. “Vēnh jykre kuryj hã tó ã tóg tĩ, hã kãmén ã tóg tĩ. Hã kỹ ěprã ke ag ve tóg ã mĩ tỹ nén ũ tũ nĩ. Hã kỹ ã tóg Topē japry to, Topē jamĩn to ěg kanhrãnh há han tĩ,” he ag tóg mũ. ²² “Kỹn mĩ há nỹ, ěg tỹ fóg tỹ pã'i mág tỹ imperador mĩ jãnkamy ěn nĩm ti, imposto kajãm jé? Ěg mĩ hỹn nĩm mũ', nĩm ke tũ nĩ vó?” he ag tóg. ²³ Hã ra Jesus tóg ki kanhró

nĩ, ag jykre régre ti. Hã kÿ tóg ag mÿ: “ãjag ne tóg ón kÿ inh ki jëmẽ sór mÿ,” he mÿ.
²⁴ “Inh mÿ jãnkamy ven. Û jiji nÿ kã nĩ? Û kãggrá nÿ kã nĩ?” he tóg. Kÿ ag tóg ti mÿ: “pã'i mág kãggrá vë,” he mÿ. ²⁵ Kÿ tóg ag mÿ: “kÿ pã'i mág mÿ ti tũ nĩm, jo Topẽ mÿ ti tũ nĩm gé,” he mÿ, Jesus ti. ²⁶ Hã kÿ tóg ag tÿ ti vĩ to ti senh ke tóg tũ tĩ, ti vĩ há han kÿ. Kÿ tóg ag mÿ e tĩ, ti vĩ há tãvĩ ên ti. Kÿ ag tóg ti mÿ vĩ mãn tũ nĩ sir. Hã ra vënh kar vÿ ti vĩ mæg nÿtĩ nĩ.

Ûn kãgter mÿ ag tÿ rĩnrĩr mãn ke

(Mt 22.23-33; Mc 12.18-27)

²⁷ Kÿ Saduceu ag tóg ti tá junjun mÿ gé, ti ki jëmẽ jé. Hã ra Saduceu ag tóg: “êg ter ja tá êg tóg vÿn ke mãn ke tũ nĩ, rĩr mãn ke tũ êg tóg nĩ,” he tĩ. ²⁸ Ên ag vÿ Jesus ki jëmẽ sór mÿ gé, ón kÿ. Kÿ ag tóg ti mÿ: “Senhor',” he mÿ gé. “Moisés vÿ êg mÿ vënh jykre tag nĩm, hã vÿ: ã régre tÿ ã krê tũ ra ter kÿ ã tÿ ti prũ fi tÿ prüg ke vë, he mÿ. ã tÿ ã régre mÿ ã krê han ke vë, fi ki, he tóg mÿ gé. Moisés tÿ êg mÿ tó jan hã vë,” he ag tóg mÿ, Saduceu ag. ²⁹ “Kÿ ù tÿ jagnê mré pafa ja tÿ 7 (ke) ag vÿ nÿgtĩ. Ag kãke vÿ prüg mÿ, hã ra tóg ã kósin tũ ra ter mÿ. ³⁰ Kÿ ti jãvy vÿ fi tÿ prüg mÿ sir, hã ra tóg ã kósin tũ ra ter mÿ gé. ³¹ Kÿ ti jãvy ù tóg fi tÿ prüg mÿ gé, hã ra tóg ter mÿ gé, ti kósin tũ ra. Gen kÿ ag tóg kãgter kãn mÿ kejën, ù tÿ 7 (ke) ên ag. ³² Kÿ vãhã ag prũ fi vÿ ter mÿ gé sir. ³³ Kÿ fag kãgter ja tá rĩnrĩr mãn kÿ fi hÿn mén tÿ 7 (ke) nĩnh mÿ vë. Ag kar vÿ fi tÿ prüg ja nÿtĩgtĩ. Hã kÿ tóg vënhmÿ nÿ, ag tÿ: “rĩnrĩr mãn jé êg tóg ke mÿ,” hen kÿ,” he ag tóg. Saduceu ag tÿ Jesus mÿ ken hã vë.

³⁴ Kÿ Jesus tóg ag mÿ kãmén mÿ. “Êprã ke ag vÿ prügprüg tĩ, kÿ fag vÿ ag tÿ mén tĩ gé. ³⁵ Ag kãmĩ ù ag tóg ãjag kãgter ja tá rĩnrĩr mãn ke mÿ, ti kurã tá krÿg kÿ. Ên ag vÿ prüg mãn ke tũ nĩ sir, mén mãn ke tũ fag tóg nĩ gé sir, ãjag rĩnrĩr mãn kÿ. ³⁶ Ter mãn ke tũ ag tóg nĩ gé, mÿr, ha mē, hã kÿ ag prüg mãn ke tũ nĩ, kÿ fag mén mãn ke tũ nĩ gé. Kanhkã tân ri ke ag nÿtĩ, Topẽ tÿ jëgnê jafã ag ri ke mÿr, ùn rĩnrĩr mãn mÿ ag. Topẽ krê vÿ tÿ ag nÿtĩ sir, ag tÿ ãjag kãgter tá rĩnrĩr mãn ken kÿ. ³⁷ Rĩnrĩr mãn jé ag tóg ke mÿ, ùn kãgter mÿ ag, ha vemnĩ. Hã kÿ Moisés tóg Topẽ to tag tó ja nĩ, ha mē. Ti tÿ vãnh pÿr nĩ ên tá ti mré vëmén kar kÿ tóg Topẽ to: “Abraão tÿ ùn to: Topẽ, he mÿ ên vë, Isaque tÿ ùn to: Topẽ, he mÿ ên, Jacó tÿ ùn to: Topẽ, he mÿ ên,” he ja nĩ, Moisés ti. ³⁸ Kãgter ag huri, Abraão, Isaque, Jacó, hã ra Moisés tóg Topẽ to: “Abraão tÿ ùn to: Topẽ, he mÿ ên vë,” he ja nĩ. Ti tÿ tÿ ag Topẽ nĩn kÿ ag tóg rĩnrĩr nÿtĩ, ha mē, ag kãgter mÿ ra. Ûn kãgter kar ag vÿ Topẽ mÿ rĩnrĩr nÿtĩ,” he tóg, Jesus ti.

³⁹ Kÿ ù tÿ Topẽ vĩ rán tĩ ù ag tóg êg Senhor tÿ Jesus mÿ: “vĩ há han ã, êg ter ja tá vÿn kenh ke mÿ tag to,” he mÿ, ti mÿ. ⁴⁰ Kÿ ù tóg ti ki jëmẽ mãn sór tũ nĩ sir. Ti kamëgmæg ag tóg mÿ, hã kÿ ag tóg ti ki jëmẽ mãn sór tũ nĩ ha.

Cristo mÿ tÿ Davi kósin nĩ, Topẽ kósin mÿ vó

(Mt 22.41-46; Mc 12.35-37)

⁴¹ Kÿ Jesus tóg ag ki jëmæg mÿ gé sir. Kÿ tóg ag mÿ: “Topẽ vĩ rán tĩ ag ne tóg: “Cristo vÿ tÿ Davi kósin nĩ,” he tĩ,” he mÿ. ⁴² “Hã ra Davi tóg Cristo tó ja nĩ, ti tÿ Topẽ jé rán kÿ. Kÿ tóg: “êg jóg mág tÿ Topẽ vÿ inh Senhor mÿ tag tó ja nĩ, ha mē: “nĩ ra ver, inh pëgja tá,” he ja ti nĩ. ⁴³ “Isÿ ã kato vãsãnsãn mÿ ag tÿ ã krêm vin ke vë, kÿ ag sigse ri ke vë sir. Tag jãvãnh nĩ ver,” he ja ti nĩ, Topẽ ti,” he ja tóg nÿgtĩ, Davi ti,” he tóg, Jesus ti. ⁴⁴ “Hã kÿ Davi tóg Cristo to: “inh Senhor,” he ja nĩ. Kÿ ti kósin mÿ tÿ ti kri ke nĩ?” he tóg mÿ, Jesus ti.

Hã ra ag tóg ti mÿ tó tÿg mÿ. Ag tÿ ne tónh ke tóg tũ tĩ, ti kato tëgtë mÿ ag mÿ.

Ón kÿ Topẽ vĩ to professor ag kamæg jé êg ke mÿ

(Mt 23.1-36; Mc 12.38-40)

⁴⁵ Vënh kar tóg mæg mÿ, Jesus vĩ ti. Kÿ tóg ã mré mÿ tĩ ag mÿ: ⁴⁶ “ón kÿ Topẽ vĩ to professor ag kamæg nĩ,” he mÿ. “Kur téj rinh ka(mē) ag nÿtĩ,” he tóg. “Kÿ vënh kar tÿ ag mÿ: “ã mÿ há?” hen kÿ tóg ag mÿ sér tĩ, ag tÿ cidade kaju kãmĩ mÿn kÿ. Vënh kanhrãn

jafã krêm ag tóg vënh kãpãm ky nýtigtĩ. Festa ki ag tóg jën vén tĩ, ag tỹ tỹ pã'i nýtĩn ky,” he tóg. ⁴⁷ “Hã ra ag tóg ùn mén ter ja fag tũ mãn kãn tĩ. Fag tũ mãn kãn ky ag tóg ón ky Topẽ mré vĩ mág han mügtĩ, ãg tỹ ag to: “ùn há vỹ tỹ ag nýtĩ,” he jé. Hã to ag vësýrénh mág täví han ke mü,” he tóg, Jesus ti. Ti tỹ ù tỹ ón ky Topẽ to há nýtĩ ag kãmén há vë.

21

Ûn mén ter ja fi tỹ ã tũ vin kãn
(Mc 12.41-44)

¹ Ky Jesus tóg Topẽ jo ãn tá jẽ ky tãmĩ ãvãnh ky ùn rico ag vigvég mü. Jãnkamy vin jafã ki ag tóg ãjag tũ vin tĩ, Topẽ mỹ, jãnkamy ti. Vin mág ag tóg mü. ² Ky ùn mén ter ja fi vỹ tá jun mü gé sir. Tỹ nén ù tũ fi tóg nĩ, há ra fi tóg jãnkamy kãsir régre vin mü, Topẽ mỹ. ³ Ky Jesus tóg fi to: “ve ra ha,” he mü. “Ûn rico tỹ vin kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mén vỹ hur ter. ⁴ Ky fi tóg ã tũ vin kãn ja nĩ, fi jën mré há. Jãvo ùn rico ag vỹ ãjag tũ ke há tỹ Topẽ mỹ vin mág tĩ. Há ki fi tóg ag tỹ nĩm kãfór han, fi tỹ nĩm sĩ pẽ han mü ra. Ki há sóg tó mü mỹr,” he tóg, Jesus ti.

Topẽ jo ãn kókén ky nĩnh ke
(Mt 24.1-2; Mc 13.1-2)

⁵ Ën kã ù ag tóg Topẽ jo ãn to vĩ há han mü. “Sĩnvĩ pẽ ti jẽ,” he ag tóg mü. “Ti pó ve ra ha, mág ti nýtĩ. Ti sĩnvĩ han jafã vỹ e nýtĩ gé,” he ag tóg.

⁶ Ky Jesus tóg ke mü. “Mỹ ãjag mỹ sĩ?” he tóg. “Kejën tóg kókén kãn ky nỹnh mü, ha vemnĩ, ky pó vỹ jagnẽ kri nýtĩ mãn ke tũ nĩ ha. Gũm ke kãn jé tóg ke mü, tag ti,” he tóg, Jesus ti.

Vënh jagãgtar to rã
(Mt 24.3-14; Mc 13.3-13)

⁷ Ky ag tóg ãg Senhor ti mỹ: “kurã tỹ ne kã ke nẽ hỹn'?” he mü. “Ëg hỹn hën ri ken ky ti kurã ki kanhró nýtĩnh mü hỹn'? Topẽ hỹn ne han ke mü, ãg tỹ kurã ãn ki kanhró nýtĩ jé?” he ag tóg.

⁸ Ky tóg ag mỹ: “ker ù vỹ jëmẽ hẽ,” he mü. “Û tỹ hën ri ke ag vỹ inh jiji tó kãmũnh mü. “Cristo vỹ tỹ inh nĩ,” he jé ag tóg ke mü. “Inh kurã vỹ hur jun,” he jé ag tóg ke mü. Ag nón mü tũg nĩ. ⁹ Vënh génh mëgmẽ jé ãjag tóg ke mü, jagnẽ kato vãsãnsãn mü ag. Kamëg tũg nĩ há ra. Vënh génh tỹ hën ri ke han jé ag tóg ke mü, kurã tỹ ãgno to há. Ti kurã kã ke pijé,” he tóg.

¹⁰ Ky tóg ag mỹ: “povo ag tỹ jagnẽ kato vãsãnsãn ke vë, pã'i krêm ke ag tỹ pã'i ù krêm ke ag to jũnh ke vë,” he mü. ¹¹ “Ga tỹ ragrag ke jagy tỹ hën ri ke han ke vë gé, ãn kã. Ky vëjën tóg tũ' henh ke mü gé. Vënh kaga kórég (ka)mẽ vỹ vënh vinven ke mü, ãn kã sir. Nén ù vënhmỹ vỹ vënh vinven ke mü gé, kanhkã tá, ky vënh kar vỹ kanẽ junjur ke mü,” he tóg, Jesus ti.

¹² “Tag to há ag tóg ãjag sigsenh ke mü gé, ãjag vóg kónãn jé ag tóg ke mü gé, vënh kanhrãn jafã krêm ag tóg ãjag jykre vigvenh ke mü gé, vënh se ja kãki ag tóg ãjag vin ke mü gé. Pã'i mág tỹ rei ag mỹ ag tóg ãjag venven ke mü, pã'i tỹ governador ag mỹ ke gé, ãjag tỹ inh jyjy tó ja tugnĩn. ¹³ ãjag tỹ inh vĩ tó jé, há jé ag tóg ãjag tỹ genh ke mü. ¹⁴ Ën kã ãjag tỹ nén ù tónh ke to jykrén tũg nĩ, to krĩ kufy han tũg nĩ gé. ¹⁵ Inh há vỹ ãjag vỹ han ke mü, inh jykre nĩm jé sóg ke mü ãjag mỹ, ãjag tỹ ag mỹ tón jé,” he tóg. “Ky ag tỹ ãjag vỹ kafãn sór mü ra tóg ag mỹ vënhmỹ tĩnh mü, ha vemnĩ, ãjag kato tẽgtẽ mü ag mỹ. Ag tỹ ne tónh ke tóg tũ tĩnh mü, ha vemnĩ,” he tóg, Jesus ti.

¹⁶ “Ën kã ãjag han mü ãn vỹ ãjag senh mü, ãjag mré pafa mü ag ke gé, ãjag mré ke ag ke gé, ãjag to há kar ag mỹr,” he tóg. “ãjag kãmĩ ù ag kãgtén jé ag tóg ke mü gé, ha vemnĩ. ¹⁷ Vënh kar vỹ ãjag to kórég täví nýtĩnh mü, inh jiji tugrĩn. ¹⁸ Hã ra ãjag véké vësýrénh ke tũ nĩ, ãjag gãnh pir vỹ fagrĩnh mỹ kutënh ke tũ nĩ, ha vemnĩ. ¹⁹ To tar nýtĩmĩ, ãjag vësýrénh ke to, ky ãjag tóg rĩr krỹg ja tũ ãn venh ke mü,” he tóg, Jesus ti.

*Jerusalém kókén kÿ nÿnh ke
(Mt 24.15-21; Mc 13.14-19)*

²⁰ “Kejÿn ag tóg Jerusalém jy nÿtÿnh mũ, soldado ag, ag tÿ cidade ãn kókén jé. Ājag tÿ tag ve kÿ ājag tóg ki kanhró nÿtÿnh mũ. Ag tÿ ti kókén kãn ke kurā vÿ jun ke mũ, kurā ãn kã. ²¹ Kÿ vÿnh pigju mũmnÿ, pãnónh ra, ājag tÿ Judéia ki nÿtÿn kÿ. Ājag tÿ cidade mág tá nÿtÿn kÿ pétigtÿmnÿ, vãnh kãra. Ājag tÿ vãnh kãmÿ ěmã kãsir ki nÿtÿn kÿ cidade ra mũ tũg nÿ. ²² Topÿ tÿ ag vóg kónãn ke kurā vÿ sir, ag jykre kórég to, hã kÿ tóg vãsÿ rán kÿ nÿ. Vÿnh rá ãn ve jé ājag tóg ke mũ, kurā ãn kã. ²³ Kÿ ũn kufy fag vÿ vÿsÿrÿnh mág ke mũ, kurā ãn kã, gÿr pygfãm mũ fag ke gé. Ēprã ke ag vÿsÿrÿnh mág tãvÿ han ke vÿ, Topÿ tÿ povo tag to jũ jagy han ke vÿ, kurā ãn kã. ²⁴ Ājag kãmÿ ũn e tãvÿ kãgter ke vÿ, rógro tÿ. Kÿ ājag kãmÿ ũ ag vÿ sigse kÿ mũnh mũ, povo kar kãmÿ. Kÿ Jerusalém vÿ kókén kãn kÿ nÿnh ke mũ. Fóg ag vÿ sãnsãn ke mũ, ājag cidade mág ti. Kejÿn fóg ag tÿ tũ' henh ke kurā vÿ jun ke mũ gé hã ra,” he tóg, Jesus ti.

*Topÿ kósin kãtÿg mãn ke
(Mt 24.29-31; Mc 13.24-27)*

²⁵ “Kurā ãn kã rá vÿnhmÿn ke vÿ, kysã ti ke gé, krÿg ti ke gé. Kÿ ga kri mũ ag vÿ kamÿgmÿg kãn ke mũ. Kanÿ junjur mág jé ag tóg ke mũ, povo kar ãn ag. Kÿ goj vÿ krém ke mũ, goj kafã tũ vÿ jũnh ke mũ, ti kurā jun kÿ. ²⁶ Kÿ ěprã ke ag fe vÿ vo kónãn ke mũ, ag tÿ jũrũn ke vÿ ag kãgtÿn ke mũ, ag tÿ ājag tÿ nÿn venh ke to jũrũn ken kÿ. Ēg tÿ kanhkã tá nÿn vÿg tũ kar ãn vÿ ragrag ke kãn mũ mÿr, ha mÿ. ²⁷ Kÿ vãhã vÿnh kar vÿ ti kãtÿg ãn venh ke mũ, ěprã ke fi kósin ãn ti. Kanhkã góg kãmÿ sóg kãtÿg ke mũ vãhã sir. Inh ve vÿ tar nÿnh mũ, inh kãtÿg mãn kÿ. Kókov kãtÿg jé sóg ke mũ vãhã sir,” he tóg, Jesus ti.

*Ka tÿ figueira to comparação
(Mt 24.32-35; Mc 13.28-31)*

²⁸ “Ājag tÿ isÿ ājag mÿ nÿn tó mũ ãn ve sÿ han kÿ ājag kanÿ nÿm nÿ, ājag krÿ ti ke gé, ti tÿ ājag mÿ sér gy tÿn kÿ. Isÿ ājag krenkren han ken vÿ ha, isÿ kurā ãn hã kã jun kÿ,” he tóg.

²⁹ Kÿ tóg ag mÿ: “inh kãtÿg mãn ke vÿ ge nÿnh mũ, ha mÿ,” he mũ. “Ka tÿ figueira to ki kanhrãn nÿ, ka ũ to ke gé, to comparação han kÿ,” he tóg. ³⁰ “Ti pÿ tánh kÿ, ti féj tãg han kÿ tóg kakó tÿ sir, ěkré tygtãnh kurã ti. ³¹ Ēn ri ke ti nÿ, ājag tÿ inh kãtÿg mãn ke kurã ki kanhró nÿtÿ ti. Ājag tÿ sÿ ājag mÿ nÿn tó ja ãn ve kÿ tóg kakó tãvÿ tÿ ha, inh kãtÿg ke ti,” he tóg. “Ēn kã Topÿ tÿ tÿ ěg pã'i nÿ kenh ke vÿ sir. ³² Sÿ ke há vÿ, hã kÿ sóg tag tó mũ, ha mÿ. Ũ tÿ nÿn kar ãn vÿg mũ ag vÿ inh kãtÿg mãn ke tag venh ke mũ, ũri, ag kãgter ke to hã,” he tóg. ³³ “Kanhkã vÿ tũ' he mũ, ga ti ke gé. Jãvo inh vÿ vÿ tũ' henh ke tũ nÿ,” he tóg, Jesus ti.

Ēg tÿ vÿnh ki ěmÿnh ke

³⁴ “Vÿnh ki ěmÿ, ājag tÿ vÿjÿn e to nug kaga tũ nÿ jé, tógã nÿnh to, ājag tÿ kronkron to krÿ vÿnhmÿ tũ nÿ jé gé. Kÿ vÿjÿn to krÿ kufy han tũg nÿ gé, kur to, tag ki nÿn ũ kar to. Ke tũ nÿ mũ ra kurā ãn vÿ ājag vatãnh tá jun ke mũ, inh kãtÿg mãn ke kurā ãn ti. ³⁵ Ājag tÿ to vÿnh kãn kÿ nÿtÿ tũ nÿn kÿ tóg ājag mÿ sÿsÿ tÿ ěgje ki kutÿ ri ke nÿ. Vÿnh vatãnh tá tóg ki kutÿ tÿ, jÿsÿ ti. Ge ti nÿnh mũ, inh kãtÿg mãn ke ti, ga kri mũ ag kar mÿ. Ag vatãnh tá sóg jun ke mũ. ³⁶ Hã kÿ ājag kanÿ nÿm nÿ, nũr sór tũg nÿ. Inh kãtÿg kã jatũ to ken hã vÿ, hã vÿ: nũr, he mũ. Topÿ mrÿ vÿ tovãnh tũg nÿ, ājag tar nÿtÿ jé, nÿn ũ jagy ãn ve kÿ. Kÿ ājag tóg ěprã ke fi kósin rÿnja tá jÿnh ke mũ sir, mÿ'ãg tũ nÿn kÿ, isÿ vÿnh kar jykre tugnÿm kurã ãn kã,” he tóg, Jesus ti. Ti tÿ ag mÿ kurã tÿ ěgno kãmÿn hã vÿ.

³⁷ Hã ki tóg kurã kar ki Topÿ jo ãn krÿm ag kanhrãnrãn tÿ, Jesus ti. Kutÿg kÿ tóg cidade tá kãkutÿ kÿ pãnónh ra tÿ tÿ, tá nũr jé. To ag tóg: Oliveiras, he tÿ, pãnónh ãn to. ³⁸ Ti tÿ kusã ki Topÿ jo ãn tá jun kÿ ag tóg tá ti vÿ jÿmÿnh kãmũ tÿ, ũ tÿ hÿn ri ke ag.

22

Ag tỹ Jesus se sór

(Mt 26.1-5; Mc 14.1-2; Jo 11.45-53)

¹ Ën kã festa tóg kakó tĩ sir. Festa ên ki ag tóg pão ù ko tĩ, hã ra tóg jãgja tũ ja nĩgtĩ. Festa ên jijin hã vỹ: Páscoa, he mũ. ² Kỹ Topẽ tũ ki rĩr tĩ to pã'i ag vỹ Jesus to jykrén mũ. Ag tỹ ti tén sór vẽ. Topẽ vỹ to professor ag vỹ ti tén sór mũ gé. Hã ra ag tóg povo kamẽg mũ, kỹ ag tóg to jykrén kỹ nỹtĩ nĩ.

Judas tỹ pã'i ag mỹ Jesus ven sór

(Mt 26.14-16; Mc 14.10-11)

³ Ën kã Judas ên, ù tỹ Iscariotes he mũ ên vỹ jagrẽ vég mũ sir, Satanás tỹ. Hã ra tóg tỹ ù tỹ 12 (ke) ag kã ù nĩ, Jesus tỹ ùn vin mũ ag kã ù vỹ tỹ ti nĩ. ⁴ Ti tỹ Satanás tỹ jagrẽ nĩn kỹ tóg Topẽ tũ ki rĩr tĩ to pã'i ag venh tĩ mũ sir, soldado to pã'i ag ke gé. Ti tỹ ag mỹ Jesus ven sór vẽ, ag tỹ ti se jé.

Kỹ tóg tá jun kỹ ag mỹ tó mũ. ⁵ Kỹ tóg ag mỹ sér pẽ tĩ sir. Kỹ ag tóg ti mỹ jãnkamy tó mũ. Ag tỹ ti mỹ vin sór vẽ, ti tỹ ag mỹ Jesus ven kar kỹ. ⁶ Kỹ tóg ag mỹ: “hej,” he mũ sir. Kỹ tóg to jykrén mũ, ti tỹ ã mỹ ki króm ke to, ag mỹ: “ha ti kãgmĩ ha,” he jé, Judas ti. Ag tỹ vênh kar vatánh tá ti se sór vẽ. Hã kỹ Judas tóg ti tó sór mũ.

Pedro tỹ João mré festa tỹ Páscoa han

(Mt 26.17-25; Mc 14.12-21; Jo 13.21-30)

⁷ Kỹ tóg pão jãgja tũ ên konh ke kurã tá krỹg mũ sir. Kurã ên ki ag tóg mé tãg tãnh tĩ, ovelha tãg ên, ag tỹ kurã tỹ Páscoa kã ko tĩ ên. ⁸ Kỹ Jesus tóg Pedro jẽnẽg mũ sir, João mré. Kỹ tóg ag mỹ: “ha mũjẽg, mé tãnh jé, ovelha ên, ãg tỹ kon jé,” he mũ. ⁹ Kỹ ag tóg ti mỹ: “ẽg hẽ tá ti tãnh mũ hỹn'?” he mũ. ¹⁰ Kỹ tóg ag mỹ: “ha vé,” he mũ. “Êmã mág tag ra mũjẽg. Tá ajag tóg ù venh mũ. Goy vyn kỹ tóg tĩ mũ. Ën nón mũmnĩ. Kỹ ti ãn tá junjun kỹ ti nón gemnĩ. ¹¹ Kỹ ãn ki rĩr tĩ mỹ: “ẽg Senhor vỹ ã mỹ vênh vỹ jẽnẽg mũ,” hemnĩ. “Inh hỹn hẽ tá ovelha konh ke mũ, inh mré mũ tĩ ag mré?” he ti, ãg Senhor ti,” hemnĩ. “Mỹ ki vênh kánkán jafã tũ?” hemnĩ. ¹² Kỹ tóg ajag mỹ ven ke mũ sir, krogrog tỹ kynhmỹ nỹ ên ti, assoalho tỹ kynhmỹ nỹ ên ti. Éhé ti nĩ, kỹ mesa to nỹtĩ jafã vỹ tá nỹtĩ gé. Ën tá ti kãn nĩ ãg mỹ,” he tóg, Jesus ti. ¹³ Kỹ ag tóg mũ mũ sir. Jesus tỹ ag mỹ tó ja ên ve kãn ag tóg mũ, kỹ ag tóg mé tãnh mũ sir, tá.

Santa Ceia

(Mt 26.26-30; Mc 14.22-26; 1Co 11.23-25)

¹⁴ Kỹ tóg ag tỹ konh ke hora tá krỹg mũ sir. Kỹ Jesus tóg tá nĩ nĩ, ti tỹ ùn vin ja ag mré hã, apóstolo ên ag. ¹⁵ Kỹ tóg ag mỹ vēmén mũ sir. “Sỹ ovelha tag konh ha pẽ tóg tĩ vẽ ajag mré,” he tóg. “Sỹ inh vêsỹrénh ke to hã ajag mré ko sór ja vẽ,” he tóg, Jesus ti, ã mré mũ tĩ ag mỹ. ¹⁶ “Ti ko mãn ke tũ inh nĩ ha, ha vemnĩ. Topẽ tỹ tỹ ãg pã'i nĩ vỹ vênh ven ke mũ. Ti tỹ vênh ven ja ên kã sóg ko mãn ke mũ, kejẽn,” he tóg.

¹⁷ Kỹ tóg copa mãg mũ sir. To tóg Topẽ mré vỹ mũ, kỹ tóg ag mỹ: “ha kron,” he mũ. “Ha vênh kãpãm,” he tóg. ¹⁸ “Tag kron mãn ke tũ inh nĩ ha, ke gé, ha vemnĩ. Topẽ tỹ tỹ ãg pã'i nĩnh ken kỹ sóg kejẽn kron mãn ke mũ, ha vemnĩ,” he tóg.

¹⁹ Kỹ tóg ãmĩ mãg mũ sir. To tóg Topẽ mré vỹ mũ. Kupãn kỹ tóg ag mỹ vênh pipin mũ. Kỹ tóg ag mỹ: “inh hã vẽ,” he mũ. “Ajag jagfy sóg vênh fẽg ke mũ. Kỹ inh mĩ êkrén nĩ, ajag tỹ pão tag konh ken kỹ,” he tóg, Jesus ti. ²⁰ Ag tỹ ko kar kỹ tóg copa mãg mũ gé. Kỹ tóg ag mỹ: “copa ki jẽ tag vỹ inh kyvénh ri ke nĩ,” he mũ. “Ajag jagfy tóg inh ki kãkuténh mũ, inh kyvénh ti. Inh jykre tãg to ken hã vẽ, isỹ inh kyvénh tugrĩn ajag mỹ vênh pãte fón jé,” he tóg.

²¹ “Hã ra ajag kãmĩ ù tóg inh vatánh tá isónh ke mũ, inh kato tẽ ag mỹ. Inh mré tóg mesa tag to nĩ nĩ. ²² Tĩg jé sóg ke mũ, sỹ tỹ ãprã ke fi kósĩn nĩn kỹ. Vãsỹ Topẽ tóg to jykrén ja nĩ, hã kỹ sóg tĩ mũ. Hã ra ù tỹ isónh ke ên mỹ tóg vỹ kónãn tãvĩ han ke mũ, Topẽ ti,”

he tóg. ²³ Kÿ ag tóg jagnē mÿ ke mÿ. “Ēg kāmī ũ tÿ hē nē hÿn'?” he ag tóg mÿ sir jagnē mÿ, ũ tÿ ti tónh ke ěn to.

Ū tÿ hē nē tÿ ũn mág nī

²⁴ Ēn kā ag tóg jagnē káfór nī sór mÿ. Hã kÿ ag tóg jagnē to jÿ mÿ. ²⁵ Kÿ Jesus tóg ag mÿ ke mÿ. “Fóg ag pã'i ag vÿ ājag krēm ke ag mÿ vī tar han tī, kÿ ag tóg ag kri ke ag mÿ: “Ēg jóg,” he tī, ag tÿ ag mÿ vī tar han mÿ ra. ²⁶ Ag ri ke han tÿg nī. Ājag mÿ tÿ ũn mág nÿtī sór mÿ? Kÿ tÿ ũn kāsir ri ke nÿtīmñī jagnē mré,” he tóg, Jesus ti. “Ū tÿ inh jÿkre ki tÿ pã'i nīn kÿ tóg ā krēm ke ag camarada ri ke nīnh ke mÿ, ag ki rīr kÿ. ²⁷ Kejēn ěg tóg mesa to nÿtī, kÿ ũ tóg mesa ki rīr tīgtī. Ū tÿ hē nÿ hÿn mesa ki rīr tī? Ag patrão mÿ', ti camarada mÿ vó? Ti camarada vÿ ki rīr tīgtī. Jo sóg ājag ki rīr tīgtī, ājag camarada ri ke. ²⁸ Ājag hã ne inh mré mÿgtī'. Isovãnh ja tÿ pē ājag tóg nÿtī. Isÿ nén ũ jagy vég mÿ ěn ve kãn ājag tóg tī, inh mré. ²⁹ Inh panh vÿ isÿ pã'i han ke mÿ, kÿ sóg ājag tÿ pã'i han ke mÿ gé, ti tÿ isÿ pã'i han kóm, ³⁰ ājag tÿ inh mré jēn jé tá, inh mré kron jé tá, isÿ tÿ pã'i nīn kÿ. Kÿ ājag tóg ājag nīgja kri nīgnī kÿ nÿtīnh mÿ, ājag tÿ povo tÿ Israel ag jÿkre vigve jé, povo tÿ 12 (ke) ěn ag,” he tóg, Jesus ti.

Jesus tÿ Pedro mÿ tó

(Mt 26.31-35; Mc 14.27-31; Jo 13.36-38)

³¹ Kÿ ěg Senhor vÿ Pedro mÿ: “Simão', Simão',” he mÿ. “Ha vé, Satanás vÿ ājag to vī, Topē mÿ. Ti tÿ ājag jÿkre ve sór vē. Trigo tÿ ěg tóg gren ki kākag tī, ěg tÿ ti fār pan jé. Ēn ri ke han jé tóg ke mÿ, ājag tÿ, Satanás ti. ³² Hã ra sóg hur ā jagfy vī, ā tÿ inh ki rã tovãnh pē han tÿ nī jé. Kÿ ā tóg kejēn ā jÿkre to jÿkrén mãn ke mÿ, ā tÿ inh jÿkre hã han jé. Ēn kã ā tóg ā mré ke ag jÿvĕn kÿ ag tÿ tar' he mÿ.

³³ Hã ra Pedro tóg ti mÿ: “Senhor',” he mÿ. “Ā mré sóg se kÿ jĕnh mÿ, ā mré sóg ter ke mÿ gé,” he tóg. ³⁴ Hã ra Jesus tóg Pedro mÿ: “vó,” he mÿ. “Ha vé, ũri ā tóg iso: “ti ki kagtīg sóg nī,” he tãgtÿ han ke mÿ, galo kyr to hã, ha vemñī,” he tóg mÿ, Jesus ti.

Jesus tÿ ā mré mÿ tī ag mÿ tó

³⁵ Kÿ tóg ag kar mÿ: “ājag jĕgnē ja inh nī, vāsÿ,” he mÿ. “Kÿ ājag tóg nén ũ ma mÿ ja tÿ nīgtī, sacco tÿ, bolsa tÿ, pĕn né tÿ, pĕn to ró ěn. Ēn kã ājag mÿ jagãgtar ja nÿtīgtī'?” he tóg. Kÿ ag tóg ti mÿ: “vó,” he mÿ. ³⁶ Kÿ tóg ag mÿ: “hã ra tóg ũri ke tÿ nīgtī,” he mÿ. “Hã kÿ ājag jãnkamy ma mÿjĕg, ājag sacon ma mÿjĕg, ājag bolsa ma mÿjĕg. Ājag tÿ nén ũ tÿ nÿtīn kÿ ājag kur vender hemñī, rógro kajãm jé sir. ³⁷ Nén ũ tóg iso rán kÿ nī, hã vÿ: ag mÿ tóg tÿ ũn jÿkre pãno nī, he mÿ. Sÿ vãhã tag venh ke vē ha. Isÿ iso nén rán kÿ nī ěn ve kãn ke vē ha, vãhã,” he tóg, Jesus ti.

³⁸ Kÿ ag tóg ti mÿ: “Senhor',” he mÿ. “Rógro régre vÿ ki nÿtī,” he ag tóg mÿ. Hã ra tóg ag mÿ: “gen kÿ,” he mÿ.

Jesus tÿ ā panh mré vī

(Mt 26.36-46; Mc 14.32-42)

³⁹ Kÿ tóg ā tÿ tī jafã ra tī mÿ sir, hã vÿ: pãnónh tÿ Oliveira, he mÿ ěn ra. Ti mré mÿ tī ag vÿ ti nón mÿ mÿ sir. ⁴⁰ Tá jun kÿ tóg ag mÿ: “Topē mré vī, ājag tÿ ti vī mranh tÿ nī jé, ājag tÿ nén ũ jagy ve kÿ,” he mÿ, Jesus ti, ā mré mÿ tī ag mÿ.

⁴¹ Kÿ tóg tīg sī han mÿ, kÿ tóg ā jakrī tÿ jĕg mÿ. Kÿ tóg Topē mré vī mÿ sir. ⁴² Kÿ tóg: “panh',” he mÿ. “Mÿ ā tÿ inh vĕsÿrenh ke tag tÿ tÿ' he mÿ jãvãnh? Hã ra isÿ ā mÿ nén to vī mÿ tag han tÿg nī. Ā tÿ nén han ke mÿ ěn hã han nī,” he tóg, Jesus ti, Topē mÿ.

⁴³ Kÿ Topē tÿ jĕnē jafã ũ vÿ ti mÿ vĕnh ven mÿ sir, kanhkã tá, kÿ tóg ti tar han mÿ. ⁴⁴ Hã ra tóg ā ter ke to kanē jur mÿ, kÿ tóg Topē mré vī mãn', vī mãn', he mÿ. Kÿ ti kãrãn vÿ kyvĕnh nī sir, kÿ tóg ga kri vĕnh kugjĕg mÿ.

⁴⁵ Kÿ tóg Topē mré vī kar ā mré mÿ tī ag to kãtī mÿ. Hã ra ag tóg nÿgnÿr nÿtī nī. Krónh' krónh' he ja ag tóg nī, ag fe kaj tugrīn. ⁴⁶ Kÿ tóg ag mÿ: “ājag ne tóg nÿgnÿr nÿtī nī',” he mÿ. “Nīgnī ra, Topē mré vī, ājag tÿ ti vī mranh tÿ nī jé, ājag tÿ nén ũ jagy ve kÿ,” he tóg, ti mré mÿ tī ag mÿ.

Ag tỹ Jesus se

(Mt 26.47-56; Mc 14.43-50; Jo 18.3-11)

⁴⁷ Ti tỹ ver tỹ vēmén jẽ ra ag tóg junjun mũ sir, Judas mré hã, ù tỹ 12 (ke) ag kã ù ên ti. Ti tỹ ag tatĩn kãtĩg hã vễ, ù tỹ ti senh ke mũ ag. Û tỹ ag jo tĩ mũ ên tóg sir Jesus to grên ke kỹ ti ki nhun ke mũ. ⁴⁸ Kỹ Jesus tóg ti mỹ: “Judas’,” he mũ. “Ă ne tóg inh ki nhun ke kỹ iso: “ti hã vễ,” he mũ’, inh kato tẽ ag mỹ, inh, hã vỹ: ãprã ke fi kósin, he mũ,” he tóg, Jesus ti.

⁴⁹ Kỹ ti mré mũ ag tóg ag tỹ ti senh ke vég mũ. Kỹ ag tóg ti mỹ: “Senhor’,” he mũ. “Ëg mỹ rógro tỹ ag fynh ke tũ’?” he ag tóg. ⁵⁰ Kỹ ag kã ù tóg polícia ù fynh mũ, ti nĩgrêg tỹ rãm ke tóg mũ, ti pẽgja tá. Topẽ tũ ki rĩr tĩ to pã'i krêm ke ù vễ, polícia ên ti. ⁵¹ Hã ra Jesus tóg ag mỹ: “ag vóg tũg ra, há ti nĩ,” he mũ. Kỹ tóg ti nĩgrêg mãn kỹ to tỹ grên ke mũ sir.

⁵² Kỹ Jesus vỹ pã'i ag mré vēmén mũ, Topẽ tũ ki rĩr tĩ to pã'i ag mré, Topẽ jo ãn ki rĩr tĩ to pã'i ag mré ke gé, kófa ag mré ke gé. Ag kar vỹ ti se kãmũ mũ. Kỹ tóg ag mỹ: “ãjag ne tóg rógro génh kỹ iso kãmũ mũ’, ka kyv génh kỹ ke gé,” he mũ. “Inh pi(jé) tỹ bandido nĩ’,” he tóg. ⁵³ “Kurã kar ki sóg Topẽ jo ãn krêm ãjag mré nĩ ja nĩgtĩ, hã ra ãjag tóg tá ise sór ja tũ nĩ, ãjag tỹ ag kamẽg kỹ,” he tóg. “Hã ra tóg ùri jun, ãjag kurã ti, Japo tỹ ã tỹ nén han sór tĩ ên han jé, ãjag tỹ. Jykre ki kuty ti nĩ, Japo ti,” he tóg, Jesus ti.

Pedro tỹ Jesus to ón

(Mt 26.57-58, 69-75; Mc 14.53-54, 66-72; Jo 18.12-18, 25-27)

⁵⁴ Kỹ ag tóg ti ség mũ sir. Ag tỹ ti pére mũ kỹ ag tóg Topẽ tũ ki rĩr tĩ to pã'i mág ãn tá junjun mũ sir.

Hã ra Pedro vỹ kuvar há tá ag nón tĩ mũ. ⁵⁵ Ìn vãso tá ag tóg pĩ grug mũ, soldado ag, kỹ ag tóg tugtón nỹtĩ nĩ. Kỹ Pedro vỹ ag mré tón nĩ nĩ sir. ⁵⁶ Kỹ pã'i camarada ù fi vỹ tá ti vég mũ, pĩ grun ki. Kỹ fi tóg ti tugnỹm mũ. Kỹ fi tóg ag mỹ: “ti mré tĩ ù vễ inh mỹ’,” he mũ. ⁵⁷ Hã ra Pedro tóg: “vó,” he mũ. “Ti ki kagtĩg sóg nĩ, jỹ,” he tóg.

⁵⁸ Kar kỹ ù tóg ti tugnỹm mũ gé, kỹ tóg ti mỹ: “ag kã ù vỹ tỹ ã nĩ,” he mũ. Hã ra Pedro tóg ti mỹ: “inh hã tũ vễ, vỹ,” he mũ gé.

⁵⁹ Tag kar kỹ, hora pir tũg kỹ hẽn ri ke mũn ù tóg ti tugnỹm mũ gé. Kỹ tóg tá nỹtĩ ag mỹ: “ha vé, Galiléia tá ke vỹ tỹ ti nĩ,” he mũ. “Inh mỹ tóg tỹ ti mré ke nĩ,” he tóg mũ gé sir. ⁶⁰ Hã ra Pedro tóg ti mỹ: “inh pi(jé) ti ki kanhró nĩ, vỹ’,” he mũ. “Ă tỹ ne tó nẽ?” he tóg mũ sir. Ti tỹ ver tó nĩ ra galo vỹ kyr mũ. ⁶¹ Kỹ ãg Senhor vỹ vễsỹjãm ãvãnh kỹ Pedro tugnỹm mũ. Kỹ Pedro vỹ to jykrén mũ sir, ãg Senhor tỹ ti mỹ nén tó ja to, hã vỹ: “iso ã tóg: “ti ki kagtĩg sóg nĩ,” he tãgtũ han ke mũ, galo kyr to hã,” he ja ên mũ. ⁶² Kỹ Pedro vỹ tá kãkutẽ mũ, kỹ tóg fỹ mág han mũ sir.

Ag tỹ Jesus vóg kónãn

(Mt 26.67-68; Mc 14.65)

⁶³ Kỹ ù tỹ Jesus ség mũ ag vỹ ti to é he mũ sir. Ti tãnh ag tóg mũ gé sir. ⁶⁴ Ti kanẽ pãg kỹ ag tóg ti kakã ki tãnh kỹ ti mỹ: “ũ nỹ ã tãnh?” he mũ. “Ă tỹ nén kar ki kanhró nĩn kỹ ã hỹn ki kanhró nĩ,” he ag tóg ti mỹ. ⁶⁵ Gen kỹ ag tóg ti mỹ vĩ kónãn tỹ hẽn ri ke han mũ, ti to é he kỹ.

Pã'i ag tỹ Jesus ki jẽmẽ

(Mt 26.59-66; Mc 14.55-64; Jo 18.19-24)

⁶⁶ Tỹ vaj kỹ kófa kar ag tóg vẽn hãn mũ, Topẽ tũ ki rĩr tĩ to pã'i ag mré hã, Topẽ vĩ to professor ag mré hã. Ag vẽn hãn kỹ ag tóg ti jé prër kỹ ag rĩnja tá ti fẽg mũ sir, ag tỹ ón kỹ ti jykre ve jé. Ag tỹ ti tén sór vễ, hã ra ag tóg ón kỹ ti jykre ve vén sór mũ. ⁶⁷ Hã kỹ ag tóg ti mỹ: “ã mỹ tỹ Cristo nĩ?” he mũ. “Ha ãg mỹ tó,” he ag tóg. Kỹ tóg ag mỹ: “ãjag pi(jé) inh vĩ kri fig tĩ’, isỹ ãjag mỹ tó tĩ (hã) ra’,” he mũ. ⁶⁸ “Isỹ ãjag ki jẽmẽ sór mũ ra ãjag tóg inh mỹ tó tũ nĩ gé. Kỹ ãjag tóg isovãnh tũ nĩ gé,” he tóg. ⁶⁹ “Hã kỹ ãprã ke fi kósin vỹ Topẽ pẽgja tá nĩnh ke mũ ha. Topẽ vỹ tar nĩ. Sỹ ti pẽgja tá nĩnh ken vễ ha,” he tóg.

⁷⁰ Kÿ ag tóg ti mÿ ke kãn mÿ. “Kÿ ã mÿ tÿ Topê kósin nÿ?” he ag tóg mÿ ti mÿ. Kÿ tóg ag mÿ: “ki hã ãjag tóg tó mÿ,” he mÿ. “Inh hã vë,” he tóg ag mÿ, Jesus ti. ⁷¹ Kÿ ag tóg: “ti kato vÿ ù jëmë mãn ke tũ ãg nÿ ha,” he mÿ, jagnë mÿ. “Ti jënky ki kutë mÿ ãg tóg huri. Topê to ví kónãn ti huri. Ti ter ke vë,” he ag tóg mÿ sir, pã'i ag, Jesus to.

23

Pilatos tÿ Jesus ki jëmë

(Mt 27.1-2, 11-14; Mc 15.1-5; Jo 18.28-38)

¹ Hã ra tá ke kar ag vÿ Jesus pére mÿ mÿ, fóg tÿ pã'i tÿ Pilatos mÿ. ² Tá ag tóg ti kato ví mÿ sir, kÿ ag tóg Pilatos mÿ: “vënh kar krÿn kónãn han tóg tÿ, ag tÿ vënh jykre há tovãnh jé,” he mÿ. “Kÿ tóg ag mÿ: “pã'i mág tÿ imperador mÿ imposto nÿm tÿg nÿ,” he tÿ gé. Kÿ tóg vëso: “tÿ inh Cristo nÿ, pã'i mág tÿ rei ti,” he tÿ gé,” he ag tóg mÿ, Jesus to. ³ Kÿ Pilatos tóg ti mÿ: “ã mÿ tÿ Judeu ag pã'i tÿ rei nÿ?” he mÿ. Kÿ tóg ti mÿ: “ki hã ã tóg tó mÿ,” he mÿ, Jesus ti.

⁴ Kÿ Pilatos vÿ ag mÿ kãmén mÿ, Topê tũ ki rÿr tÿ to pã'i ag mÿ, povo kar mÿ ke gé, kÿ tóg: “ti tÿ nén ù kórég han ja vég tũ sóg nÿ, ti ki,” he mÿ. ⁵ Hã ra ag tóg ti tovãnh jávãnh pë nÿtÿ. Kÿ ag tóg ti mÿ: “hã ra tóg vënh kar krÿ rÿg tÿgtÿ,” he mÿ. “Ga tÿ Judéia kar mÿ tóg tÿg ja nÿ, ga tÿ Galiléia mÿ ke gé, tag mÿ ke gé. Tÿg kÿ tóg vënh kar krÿn kónãn tÿ,” he ag tóg ti mÿ, pã'i ag.

Herodes tÿ Jesus ki jëmë

⁶ Kÿ Pilatos vÿ ga tÿ Galiléia tag to jykren mÿ, kÿ tóg: “ti mÿ tÿ Galiléia tá ke nÿ?” he mÿ. ⁷ Kÿ ag tóg ti mÿ: “hÿ,” he mÿ. Hã ra Herodes vÿ tÿ ga tÿ Galiléia tá pã'i mág nÿ. Hã kÿ Pilatos tóg ti hã mÿ ti jënëg mÿ. Ën kã tóg Jerusalém tá nÿ gé, Herodes ti.

⁸ Kÿ tóg Herodes tá jun mÿ sir. Ti tÿ ti ve kÿ tóg ti mÿ sér tÿ. Ti tÿ ti ve sór ja vë. Ti kãmë mÿ ja tóg nÿ, hã kÿ tóg ti ve sór ja nÿgtÿ, Herodes ti. “Hën ri ke mÿn tóg nén ù han vãnh han ke mÿ, sÿ ve jé,” he tóg.

⁹ Jesus tÿ ti ki jun kÿ Herodes tóg ti ki jëmë sór mÿ, nén tÿ hën ri ke ki, hã ra tóg ti mÿ ví tÿg mÿ. ¹⁰ Hã ra pã'i ag vÿ tá nÿtÿ nÿ, kÿ ag tóg ti kato ví mág han mÿ sir, Topê ví to professor ag ke gé. Hã ra Jesus tóg ag mÿ ví tÿg mÿ gé. ¹¹ Kÿ Herodes vÿ ti to é he mÿ gé, ti mré ke kar ag ke gé, kÿ ag tóg ti nyg mÿ sir. Kur kupri pë tÿ tóg ti kri fón mÿ, ón kÿ. Kÿ tóg Pilatos mÿ ti jënë mãn mÿ sir.

¹² Kurã ãn kã Pilatos vÿ Herodes mÿ ví há han mÿ. Jagnë to há' he mãn ag tóg mÿ ha. Ag tÿ Jesus ve jo ag tóg jagnë kato tÿ ja nÿgtÿ.

Ag tÿ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kÿ Pilatos vÿ Topê tũ ki rÿr tÿ to pã'i ag jé prër mÿ sir, pã'i kar ag ke gé. ¹⁴ Kar tóg ag mÿ: “ãjag ne inh mÿ ti fëg',” he mÿ, “kÿ ãjag ne ti to: “vënh kar krÿn kónãn tóg tÿ,” he mÿ'. Ájag rÿnve sóg ti ki jëmë huri, hã ra sóg ve ja tũ nÿ, ãjag tÿ ti to nén tó ja ti. Nén ù kórég han ja tũ tóg nÿ. ¹⁵ Kÿ Herodes vÿ vég tũ nÿ gé. Sÿ ti mÿ ti jënë ja vë, ãjag ke gé. Hã ra tóg inh mÿ ti jënë mãn mÿ gé. Ëg hë ri ken kÿ ti tén mÿ hÿn'? Sÿ ki kagtÿg tóg tÿ. ¹⁶ Hã kÿ sóg ti mrãnmrãn kar ti tovãnh ke mÿ,” he tóg, Pilatos ti.

¹⁷ Festa tÿ Páscoa ki tóg ag mÿ vëse pir tovãnh tÿ, prÿg kar ki. Ti jykren hã vë. Hã kÿ tóg: “Jesus tovãnh jé sóg ke mÿ,” he mÿ. ¹⁸ Hã ra vënh kar ag tóg vãhã prënprër mÿ sir. “!..Ti tén ra..!” he ag tóg mÿ. “!..Barrabás tovãnh ra..!” he ag tóg. ¹⁹ Barrabás vÿ vënh génh to se kÿ jë nÿ. Cidade tá tóg vënh génh han ja nÿgtÿ, ãn kã tóg ù tén ja nÿgtÿ, hã to tóg se kÿ jë nÿ.

²⁰ Kÿ Pilatos vÿ ag mÿ ví mãn mÿ. Ti tÿ Jesus tovãnh sór vë, hã kÿ tóg ag mÿ ví mãn mÿ. ²¹ Hã ra ag tóg prënprër kÿ: “!..cruz to ti sã, cruz to ti sã..!” he mÿ. ²² Kÿ tóg ag mÿ ví tãgtũ han mÿ gé, Pilatos ti. “Ti kórég tÿ ne han ti? Sÿ vég tũ tóg tÿ. Ti tÿ ne to ter ke nÿ? Sÿ ki kagtÿg tóg tÿ. Hã kÿ sóg ti mrãnmrãn kar kÿ ti tovãnh ke mÿ,” he tóg. ²³ Hã ra ag tóg prënprër tãví han mÿ sir, hã kÿ ag tóg ti kutãn mÿ. Ti mÿ ag tóg: “!..cruz to ti sã..!”

he tãvĩ han mũ. Kĩ tóg ag prẽnprẽn to ag mĩ han sór mũ sir. ²⁴ To tóg jykrén mũ, kĩ tóg ag mĩ: “hej,” he mũ, ag tỹ ti kutãn to. ²⁵ Kĩ tóg ù ên tovãnh mũ sir, ù tỹ vẽnh génh to se kĩ jẽ ên ti, ù tỹ ù tén ja ên ti. Ag tỹ ù to vĩ mũ ên tovãnh tóg mũ sir. Kĩ tóg ag mĩ Jesus ti fẽg mũ sir, ag tỹ ti ki han sór mũ ên han jé. ²⁶ Kĩ ag tóg ti pére mũ mũ, cruz to ti sa jé.

Jesus tỹ cruz to sa

(Mt 27.32-44; Mc 15.21-32; Jo 19.17-27)

Ag mũn kĩ ag tóg ù kãtĩg vég mũ. Êpỹ tá tóg kãtĩ mũ, ti jijin hã vỹ: Cirene tá Simão, he mũ. Ti kri ag tóg Jesus cruz ti fig mũ, ti tỹ ti jo va tĩg jé, ti nón.

²⁷ Kĩ ù tỹ hẽn ri ke ag vỹ Jesus nón mũ mũ, ùn tỹtã fag ke gé. Ên fag vỹ vẽnyrénh mũ, kygfỹ mág han fag tóg mũ sir. ²⁸ Hã ra Jesus tóg vẽnyrãm êvãnh kĩ fag mĩ vĩ mũ. “Jerusalém tá ke’,” he tóg. “Ijé kygfỹ tũg nĩ,” he tóg. “Vẽnh jé kygfỹmni, ãjag krẽ jé kygfỹmni,” he tóg fag mĩ. ²⁹ “Ha vé, kurã kórég pẽ vỹ jun ke mũ ãjag mĩ. Ên kã ag tóg tag tónh ke mũ, ha mẽ: “ùn kurĩ fag mỹn pãgsĩ nĩnh mũ, fag tỹ ãjag krẽ ter vég tũ nĩn kĩ. ùn krẽ tũ fag mỹn pãgsĩ nĩnh mũ, ù tỹ gĩr pafãm tũ fag mĩ ke gé,” he jé ag tóg ke mũ. ³⁰ Ên kã ag tóg pãnónh mĩ: “inh kri tỹ tam ké,” henh ke mũ gé, kĩ ag tóg sór mĩ: “inh péju ra, vẽnh krẽm,” henh ke mũ gé. ³¹ Êg kato tẽ ag tỹ ka tánh gỹn kĩ ag hỹn ka tóg tovãnh ke tũ pẽ nĩ. Ka tánh ên ri ke sóg nĩ, jo ãjag vỹ ka tóg ri ke nỹtĩ. Hã kĩ ãjag tóg inh vẽnyrénh kãfór venh ke mũ, ha vemni,” he tóg, Jesus ti. Jerusalém fĩn rãm kĩ tóg ke mũ.

³² Ag tỹ Jesus pére mũn kĩ ag tóg ùn régre ag pére mũ mũ gé, ùn jykre pãno ag. Ag tỹ ka to ag sanh ke vẽ gé. ³³ Kĩ ag tóg pãnónh tá junjun mũ sir, ti jyjyn hã vỹ: Krĩ Kuka, he mũ. Tá ag tóg cruz to ti sãg mũ sir. ùn jykre pãno tỹ ag tóg cruz to sãg mũ gé, ti kóm, kĩ ù vỹ ti pẽgja tá sa, jo ù vỹ ti jakãnh tá sa.

³⁴ Kĩ Jesus vỹ: “panh’,” he mũ. “Ag mĩ vẽnh pãte fón nĩ,” he tóg. “Ag pi(jé) ki kanhró nỹtĩ’, ag tỹ nén han mũ tag ti’,” he tóg.

Kĩ soldado ag tóg ti kur tỹ jagnẽ mỹ tỹ vẽnh ken jé to jogar he mũ sir. ³⁵ Kĩ vẽnh e ag vỹ tá vég nỹtĩ. Hã ra pã’i ag tóg ti nyg mũ. Kĩ ag tóg jagnẽ mỹ: “ù ag krenkren han ja tóg nỹtĩ,” he mũ. “Cristo jé vẽnh kren han, Topẽ tỹ ti fẽg ja nĩn kĩ, ti tỹ ti kuprẽg ja nĩn kĩ, hã ra tóg vẽnh kren han ki kagtĩg nĩ,” he ag tóg mũ, Jesus to é he kĩ. ³⁶ Kĩ soldado ag vỹ ti nyg mũ gé. Ti rã hã nỹtĩn kĩ ag tóg ti mỹ vinagre ven mũ sir. ³⁷ Kĩ ag tóg: “ã mỹ tỹ Judeu ag pã’i mág nĩ’?” he mũ. “Vẽnh kren han ra, ã tỹ tỹ pã’i nĩn kĩ,” he ag tóg mũ ti mỹ, ti to é he kĩ. ³⁸ Hã ra ag tóg rán ja nĩ gé, ti tỹ cruz to sa kĩ jẽ ên ti. Ti to rán hã vẽ, hã vỹ: “Judeu ag pã’i mág tỹ rei hã vẽ,” he mũ. Ti kri tóg cruz to sa gé, ên rá ti.

³⁹ Kĩ ti kóm cruz to sa ù tóg ti mỹ vĩ mũ gé, ùn jykre pãno ên. Ti to tóg é he mũ gé. Kĩ tóg ti mỹ: “ã mỹ tỹ Cristo nĩ?” he mũ. “Vẽnh kren han ra, kĩ êg krenkren han gé,” he tóg mũ gé. ⁴⁰ Hã ra ti kóm cruz to sa ù ù tóg ti mỹ vĩ jũ han mũ, ù tỹ Jesus mỹ vĩ kónãnh mũ ên mỹ. Kĩ tóg ti mỹ: “kỹ ã mỹ Topẽ kamẽg tũ?” he mũ. “Vẽnyrénh ã tóg mũ gé, ti kóm. ⁴¹ Êg tỹ êg tỹ nén han ja kajãm vẽ jãvo, êg jykre pãno to êg vẽnyrénh nỹtĩ nĩ. Êg jãvo tóg jykre kuryj nĩ. Ti pi(jé) nén ù kórég han ja nĩ’,” he tóg. ⁴² Kĩ tóg Jesus mỹ: “Senhor’,” he mũ. “Inh ki êkrén nĩ, ã tỹ tỹ pã’i ki rãn kĩ,” he tóg mũ, Jesus mỹ. ⁴³ Kĩ Jesus tóg ti mỹ: “ha mẽ, ùri ã tóg inh mré nĩnh mũ, êmã há ên tá, Paraíso he mũ ên tá, kanhkã tá. Ki hã sóg tó mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

⁴⁴ Kejẽn rã tóg êg nĩno kã sa mũ sir. Hã ra tóg kuty’ he mũ sir, ga kar mĩ hã. Kuty ên tóg hora tãgtũ han mũ. ⁴⁵ Kĩ rã vỹ nhyn ke mũ sir. Topẽ jo ìn krẽm kur tỹ jãnkã mág pẽ vỹ kã sa nĩ. Ên vỹ jaran ke mũ. Kuju mĩ tóg jaran ke kãtère mũ sir, fĩn rãm kãn tóg mũ.

⁴⁶ Kĩ Jesus vỹ prẽn mág pẽ han mũ. Kĩ tóg: “!..panh’..!” he mũ. “!..Sỹ ã mỹ vẽnh fẽg vẽ, inh kuprĩg ti..!” he tóg. Tag tó kar tóg hun ke mũ sir.

⁴⁷ Hã ra fóg tỹ capitão tóg ti ter vég mũ. Kĩ tóg Topẽ mỹ vĩ há han mũ. “Vẽnh vĩ há ja vẽ, ùn há ja vẽ,” he tóg mũ. ⁴⁸ Kĩ vẽnh e ên vỹ ti ter vég mũ gé. Kĩ ag tóg ãjag tỹ nén

han ja to jykrén mū sir. Vāhā tóg ag mý e tí. “Topě hýn ěg týt hě ri kenh mū, ěg týt ti tén kýt?” he ag tóg mū sir. Tag tó kýt ag tóg ājag ĩn ra výt výt ke mū.

⁴⁹ Hā ra ti to há kar ag výt ti vég nýtí ní, kakó ki, ũn tátá fag ke gé. Galiléia tá ke fag tóg ti mré kāmū ja nýtí gé. Ti ter ve kån fag tóg mū sir.

Ag týt vėnh kej tá Jesus fi

(Mt 27.57-61; Mc 15.42-47; Jo 19.38-42)

⁵⁰ Kýt ũ tóg tá nýtí gé, vėnh jyvėn tí ũ, ha mē, ti jijin hā výt: José, he mū. Judeu ag týt cidade týt Arimatéia tá ke ti nýtí. Jykre kuryj tóg nýtí, jykre há. ⁵¹ Ti pi(jé) ag týt Jesus tén ke to: “hej,” he ja nýtí, ag týt Jesus to jykrén kýt. Topě týt týt ěg pā'i nính ke ve sór tóg mū gé. ⁵² Ěn výt Pilatos venh tí mū. Kýt tóg ti mýt Jesus to ví mū, ti ter kar kýt. ⁵³ Kýt tóg cruz to ti kátérem mū, kýt tóg kur há týt ti pāg mū sir. Kýt tóg pāró nor kākí vėnh kej kākā ti fig mū. Vėnh kej tąg vė, ag pi(jé) kākā ũ fi ja nýtí ver'. ⁵⁴ Hā ra sexta-feira vė sir, vėnhkån ke kurā ki rā tóg nýtí ha, sábado ki. ⁵⁵ Kýt ũn týtá fag výt ag nón mū mū, ti kej ve jé, ag týt ti finh mū ja tá. Ti mré Galiléia tá kāmū ja ěn fag vė, ũ týt ti fi han vég mū fag. ⁵⁶ Ve kar kýt fag tóg kyrāgrā kýt nén ger há han mū sir, ti tąg jafā ti, ti to tın jé. Hā ra fag tóg vėnhkån mū ver, vėnhkån ke kurā kā, Topě ví ki króm jé.

24

Jesus rír mån

(Mt 28.1-10; Mc 16.1-8; Jo 20.1-10)

¹ Kýt semana kurā ve tóg tá krýt mū sir. Kýt fag tóg kusā pē ki ti kej tá venh mū mū. Vėser ger há han jafā ěn ma fag tóg mū mū, fag týt han ja ěn ti, ti kej ra mún kýt. ² Hā ra pó ěn týt ti kej nífėnh kā nýtí výt kunũnh kýt nýtí. Hā vég fag tóg mū. ³ Kýt fag tóg ti kej tá junjun kýt ra ge mū, hā ra fag tóg vég tũ nýtí, vėser ti, Jesus ti, ěg Senhor ti. ⁴ Kýt tóg fag fe kaj tí sir, fag týt ti vég tũ nính kýt. Kýt vāhā ũn régre ag výt kāge mū, kur kupri rính kýt, kur kókov, Topě týt jėnė jafā ag. ⁵ Kýt fag tóg kanė junjur mū sir, kýt fag tóg ěprā ěvānh mū. Hā ra ag tóg fag mýt: “ājag ne tóg vėser jāvānh mū, ti rír ja (hā) ra,” he mū. ⁶ “Ki ti tũ nýtí, rír ti jė ha. Hā kýt tóg ājag mýt tó ja nýtí, ājag týt Galiléia tá nýtí ěn kā. ⁷ Kýt tóg ājag mýt: “ěprā ke fi kósin ěn fėg jé ag tóg ke mū, ũ týt Topě ví mranh tí ag mýt,” he ja nýtí. “Ka to ag ti sanh ke mū, hā ra tóg kurā tąg tũ ki rír mån ke mū,” he ja tóg nýtí, Jesus ti, vėso,” he ag tóg mū, Topě týt jėnė jafā ag.

⁸ Kýt fag tóg Jesus týt nén tó ja ěn mýt ěkrén mån mū sir. ⁹ Kýt fag výt ti kej tá kāpa kýt mū mū sir, ũ týt 11 (ke) ag mýt tó jé, ti mré mū tí kar ag mýt ke gé. ¹⁰ Maria Madalena fi vė, kar kýt Joana fi ke gé, Maria ũ fi ke gé, Tiago mýnh tag fi, ũ fag ke gé, fag mré. Fag hā ne Jesus týt ũn vin mū ag mýt kāmén mū, apóstolo ag mýt. ¹¹ Hā ra tóg ag mýt týt vėnh ó nýtí ve nýtí, hā kýt ag tóg kri fi ja tũ nýtí, fag vın kri.

¹² Kýt Pedro výt jė kýt ti kej ra vėnh vāg tí mū. Pānh ke tóg, kýt tóg ki ěvānh mū, kýt tóg ti kur tāví vég mū sir, ti pāg ja ti. Kýt tóg ti mýt e tí. Ti týt to jykrén tũ tóg tí sir. Kýt tóg tīg mån mū.

Ag týt Emaús ra mū

(Mc 16.12-13)

¹³ Kýt vāhā ag kā ũ ag tóg mū mū, kurā ěn kā, ũn régre ag. Ěmā sýt ra ag tóg mū mū. Jerusalém tán kakó nýtí, 10 (ke) quilômetros hýn. Ěmā ěn jyjyn hā výt: Emaús, he mū. ¹⁴ Ag mún kýt ag tóg jagnė mré vėmėn mū sir, ājag týt nén ve ja kar ěn to.

¹⁵ Ag týt vėmėn nýtí ra, ag týt jagnė mré týt vėmėn mág han nýtí ra Jesus tóg ag tá jun kýt ag mré tí mū. ¹⁶ Hā ra ag tóg ti ki kagtíg mū, ag týt ti vég mū (hā) ra. ¹⁷ Kýt Jesus tóg ag mýt: “ājag týt ne tó nėt?” he mū. “Vėmėn mág ājag tóg mū nýtí,” he tóg. Kýt ag tóg krýt he mū sir, ve ũ han ag tóg mū, ājag fe kaj tugnín. ¹⁸ Kýt ũ tóg ti mýt tó mū. Cleopas he mū ěn tóg ti mýt: “kýt ā mýt mėg tũ?” he mū. “Ũ týt festa venh kāmū ja ag výt mėt kån. Ě hā mýt ā pir mýt mėt tũ, ěg týt nén ve ja ti, ā týt Jerusalém kā nýtí (hā) ra?” he tóg ti mýt. ¹⁹ Kýt tóg ag mýt: “ne nėt?” he mū. Kýt ag tóg ti mýt: “Jesus ti,” he mū. “Nazaré tá ke vė. Topě ví tó tí

vê. Ëg tỹ nén han vãnh hyn han ja tóg nĩgtĩ. Topẽ vĩ tó há han ja tóg nĩgtĩ, kỹ Topẽ vỹ ti mré han tĩ, milagre kar ti. Kỹ povo kar ag vỹ vég tĩ, kỹ tóg ãg kar mỹ e tĩ. ²⁰ Kỹ Topẽ tũ ki rĩr tĩ ag vỹ ti fẽg, ãg pã'i kar ag, fóg tỹ pã'i tỹ ti tén jé, cruz to ti sa jé, hã kỹ tóg tũg mũ. ²¹ Ëg tỹ ti ve kỹ ãg tóg ti to: “ti hỹn ãg povo tỹ Israel ag krenkren han ke mũ,” he mũ vê. Hã ra tóg ter ja nĩ. Ûri tóg kurã tãgtũ han, ti ter kri,” he ag tóg, Jesus mỹ. ²² “Kỹ ãg kã ù fag vỹ ãg mỹ nén ù tó gé, kỹ tóg ãg mỹ e tĩ gé. Kusã pẽ ki fag tóg ti kej ra mũjẽg. ²³ Hã ra fag ti vég tũ nĩ, ti tỹ tá nỹ tũ nĩn kỹ. Kỹ fag tóg: “nén nẽ ve ãg,” he mũ gé. Topẽ tỹ jẽnẽ jafã nẽji, kỹ tóg nẽji fag mỹ: “rĩr ti jẽ nĩ,” hé. ²⁴ Kỹ ãg kã ù ag vỹ ra mũ mũ, ti kej ra, kỹ ag tóg vég mũ gé, fag tỹ nén tó ja ti. Hã ra ag tóg ti vég tũ pẽ nĩ,” he ag tóg, Jesus mỹ, ag tỹ ti ki kagtĩg nỹtĩn kỹ.

²⁵ Kỹ ù tỹ ag mré tĩ mũ ãn tóg ag mỹ: “ãjag tỹ ne jé vãsỹ Topẽ vĩ tó tĩ ag vĩ kri fi ja tũ nĩ nẽ?” he mũ. “Křĩ tũ ãjag nỹtĩ, to jykrén há han tũ ãjag tóg nỹtĩ,” he tóg. ²⁶ “Cristo vėsỹrénh ke vỹ, vėsỹrénh kar kỹ tóg tỹ ùn mág nĩnh mũ vãhã,” he tóg. ²⁷ Kỹ tóg ag mỹ vãnh rá kãmén kãn mũ sir, Moisés tỹ rá ti, Topẽ vĩ tó tĩ ag kar tỹ rá ti, ag tỹ Jesus to rán ja ti.

²⁸ Ag mỹ kãmén tĩ ki tóg ãmã ãn tá jun mũ sir. Ag mré tá jun kỹ tóg mã ra tĩg mũ ve nĩ. ²⁹ Kỹ ag tóg ti kógfyn mũ sir, kỹ ag tóg: “ãg mré nĩ,” he mũ. “Rãké tóg nỹ ha, kutyg ke rã tóg nỹ ha,” he ag tóg mũ sir. Kỹ tóg ag mré kãra rã mũ, ag mré nĩ jé. ³⁰ Kỹ tóg ag mré jẽn ke mũ gé sir. Ag mré jẽn ke kỹ tóg pão mág mũ, ãmĩ ti. Kỹ tóg Topẽ mré vĩ mũ, kar tóg kupãn kỹ tỹ vãnh ken mũ. ³¹ Kỹ ag tóg ti ki kanhrãn mũ sir vãhã. Ti ve há han ag tóg mũ sir. Hã ra tóg ki tũ nĩ ha, ti ve mãn tũ ag tóg nĩ sir.

³² Kỹ ag tóg jagnẽ mỹ: “ti tỹ ãg mré vãmén kỹ tóg ãg fe ki rã,” he mũ. “Ëg mỹ tóg ã to rán ja ãn kãmén kãn, ãg mũn kỹ. Hã ja vỹ,” he ag tóg mũ jagnẽ mỹ.

³³ Kỹ ag tóg vėsỹmér Jerusalém ra vỹnvỹn ke mũ sir. Tá ag tóg ù tỹ 11 (ke) ag vég mũ, ag mré ke ù ag mré hã. ³⁴ Hã ra ãn ag tóg ag mỹ: “ãg Senhor vỹ rĩr mãn,” he vén mũ. “Simão Pedro mỹ tóg vãnh ven, mỹr, ha mẽ,” he ag tóg mũ sir. ³⁵ Kỹ ag tóg ag mỹ: “hỹ, ti ve ãg ke gé,” he mũ gé. Kỹ ag tóg ag mỹ ãjag tỹ nén ve ja ãn tó mũ sir, ag tỹ ãjag mũ ki ti ve ja ti, ti tỹ ag mỹ ãmĩ kupãn ja ti ke gé. “Hã ki ãg tóg ti ki kanhró nỹtĩ, ãmĩ kupãn ja ki,” he ag tóg mũ.

Jesus tỹ vãnh kar ãn mỹ vãnh ven

(Mt 28.16-20; Mc 16.14-18; Jo 20.19-23; Hk 1.6-8)

³⁶ Ag tỹ ver tỹ vãmén nỹtĩ ra Jesus tóg ag mré jẽ mũ vãhã, ti tỹ hẽ tá kãrãnh ke tũ nĩ ra. Kỹ tóg ag mỹ: “mỹ sér nỹtĩmĩ,” he mũ. ³⁷ Hã ra ag tóg jũrũnrũn ke mũ sir. Ti kamẽg ag tóg mũ. “Vãnh kuprĩg hỹn,” he ag tóg mũ, Jesus to. ³⁸ Kỹ tóg ag mỹ: “ãjag ne tóg jũrũnrũn ke mũ,” he mũ. ãjag tỹ ne jé: “vãnh kuprĩg hỹn,” he nẽ?” he tóg. ³⁹ “Inh nĩgé ve ra, inh pẽn ve ra, inh hã vỹ,” he tóg. “Inh mẽgmẽ ra, ve há han ra. Vãnh kuprĩg pi(jé) fár nĩ, ti pi(jé) kuka nĩ. Inh fár ve ra, inh kuka ti,” he tóg. ⁴⁰ Vĩ kỹ tóg ag mỹ ã nĩgé ven mũ, ã pẽn ke gé. ⁴¹ Hã ra tóg ver ag mỹ e tĩ, ag fe tỹ mřin ke pẽ han kỹ, kỹ tóg ver ag tỹ ki kagtĩg tĩ. Hã kỹ tóg ag mỹ: “mỹ ki vỹjẽn tũ?” he mũ. ⁴² Kỹ ag tóg ti mỹ pirã nĩm mũ, mỹg mré. ⁴³ Kỹ tóg mãn kỹ ko mũ, ag rĩnve.

⁴⁴ Kỹ tóg ag mỹ: “hã tó ja inh nĩ, ãjag mỹ, iser to hã, isỹ ãjag mré nĩgnĩn kã,” he mũ. “Vãhã sóg ve kãn ja nĩgtĩ, ag tỹ iso nén rán ja ti, Moisés ti, ti tỹ ãjag mỹ vãnh jykre nĩm jan ki, kar kỹ Topẽ vĩ tó tĩ ag kar tỹ nén rán ja ki ke gé, Topẽ to jãn ki ke gé. Sỹ nén ven jan hã vỹ,” he tóg, ã mré mũ tĩ ag mỹ. ⁴⁵ Kỹ tóg ag mỹ kãmén há han mũ sir, hã kỹ ag tóg ti to nén rán ja ki kanhrãn kãn mũ sir, to jykrén há han ag tóg mũ sir, ti tỹ ag nĩgrẽg róm kỹ. ⁴⁶ Kỹ tóg ag mỹ: “tag vỹ rán kỹ nĩ, ha mẽ,” he mũ. “Hã kỹ Cristo vỹ vėsỹrénh, kỹ tóg rĩr mãn gé, ã ter kar kỹ, kurã tãgtũ tũg kỹ. Tag ve kãn sóg huri,” he tóg. ⁴⁷ “Kỹ tóg rán kỹ nĩ gé, ù ag tỹ vãnh kar mỹ inh kãmén ke ti. Inh jĩjin tó jé ag tóg ke mũ, ag tỹ vãnh kar mỹ: “ãjag jykre si tovãnh ra,” henh ken kỹ, ù tỹ inh vĩ tó tĩ ag. “Tovãnh kỹ Topẽ tóg ãjag mỹ vãnh pãte fón ke mũ, ãjag tỹ ti vĩ mřanh ja ti,” he jé ag tóg ke gé. Povo kar mỹ ag tóg tónh ke mũ, hã ra ag tóg tag ki tó vén ke mũ, Jerusalém ki. ãjag to ken hã vỹ. Inh kãmén

jé ãjag tóg ke mũ. ⁴⁸ Ve kãn ãjag tóg mÿr, hã kÿ ãjag tóg tónh ke mũ. ⁴⁹ Ha mẽ, inh panh vÿ ãjag mÿ nén ù tó ja nĩ, ãjag tÿ venh ken jé. Ēn jēnē jé sóg ke mũ ãjag mÿ. Hã kÿ tag ki nÿtĩmnĩ ver, cidade tÿ Jerusalém tag ki. Hēn ra mũ tũg nĩ. Vãhã ãjag tóg venh ke mũ, inh panh tÿ ãjag mÿ ùn tó ja ti, hã vÿ: ti kuprĩg, he mũ. Kanhkã tá tóg kãtĩg ke mũ, ù tÿ ãjag tar han ke ti,” he tóg, Jesus ti.

*Jesus tÿ kanhkã ra tĩg
(Mc 16.19-20; Hk 1.9-11)*

⁵⁰ Kÿ tóg ag jãmĩ tĩ mũ, ěmã tÿ Betânia ra. Tá tóg ã nĩgé tÿ ag kri ven mũ. Kÿ tóg ag mÿ vĩ há han mũ sir. ⁵¹ Ag mÿ vĩ há han kÿ tóg ag ré kÿ tĩ mũ, kanhkã ra tãpÿr tóg mũ. ⁵² Kÿ ag tóg ti to: “Topē vÿ tÿ ti nĩ,” he mũ sir. Kÿ ag tóg Jerusalém ra kãmũ mãn mũ, vēsÿkã. Ag mÿ tóg sér pē tĩ vãhã. ⁵³ Kurã kar ki ag tóg Topē jo ĩn ra mũ tĩ, tá Topē to vĩ há han jé, ti mÿ nén ù há kar tó jé, ti tÿ ag mÿ sér tĩn kÿ.
Hã vē.

JOÃO TỠ RÁ

Topê tỳ ã vỹ tỳ nén ù kar han

¹ Topê tỳ nén ù kar han ja tũg ki tóg nĩ ja nĩ, ãg tỳ ù to: “Topê vỹ,” he mũ ên ti, hã to ãg: Jesus, he mũ. Topê mré tóg nĩ. Topê vỹ tỳ ti nĩ gé. ² Topê tỳ nén (ũ) kar han tũg ki tóg Topê mré nĩ nĩ. ³ Ti hã tũgrĩn tóg nén ù kar han, Topê ti, ãg tỳ ù to: “Topê vỹ,” he mũ ên tũgnĩn. ã pir mỹ Topê tóg nén ù han tũ nĩ, ti hã mré tóg nén kar han kãn. ⁴ ãg tỳ ù to: “Topê vỹ,” he mu ên vỹ rĩr nĩ, hã kỹ tóg ãg rĩnrĩr han mũ gé. Jẽngrẽ ri ke ti nĩ, ù tỳ ãg rĩnrĩr han mũ ên ti. Ti tỳ ãg kanhrãn to ken hã vỹ. ⁵ Ûn jykre pãno ag vỹ ù tỳ kuty mĩ mũ ên ag ri ke nỹtĩ. Hã ra tóg ãg mỹ jẽngrẽ ri ke nĩ, ãg tỳ ù to: “Topê vỹ,” he mũ ên ti. Kỹ Nén-Kórég vỹ ti tỳ tũ' he han sór ja nĩ, hã ra tóg ti tỳ hẽ ri ke ja tũ nĩ.

⁶ Kỹ kejẽn Topê tóg ãprã ke ù jẽnẽ, ti jiji hã vỹ: João, he mũ. ⁷ Ti mỹ tóg: “ag mỹ ù tỳ ag mỹ jẽngrẽ hen mũ ên kãmén” he ja nĩ, hã kỹ tóg ke mỹ, ag kar tỳ ti vỹ mẽ jẽ, ag tỳ ti vỹ kri fi jẽ. ⁸ João pi(jé) ãg mỹ jẽngrẽ han ja nĩ'. Ti tỳ ãg mỹ: “ẽn hã vỹ,” henh kãtĩg ja vỹ, ù tỳ ãg mỹ jẽngrẽ han mũ ên to, hã vỹ: Jesus, he mũ. ⁹ Jẽngrẽ pẽ ên hã vỹ. ãprã tóg jun, ti tỳ ãg kanhrãn jẽ, ãprã ke kar, ù tỳ ãg ki jẽngrẽg pẽ han mũ ên ti.

¹⁰ Ga han tóg, ù tỳ ãg mỹ jẽngrẽ han mũ ên ti, kỹ tóg ãg mré ga kri tũnh kãtĩg gé, ga han kar kỹ. Hã ra ag tóg ti ki kanhrãn ja tũ nĩ, ãprã ke ag. ¹¹ ã povo kar mĩ tóg tĩg ja nĩ, hã ra ti mré ke ag pi(jẽ) ti ki ge sór ja nĩgtĩ'. ¹² Û ag tóg hã ra ti ki ge mũ. En ag to tóg: “Topê krẽ,” he mũ, ù tỳ ti ki ge kỹ nỹtĩ tãvĩ ag to. ¹³ Ti ki ge kỹ nỹtĩ tũgrĩn ãg hã vỹ tỳ ti krẽ nỹtĩ. ãg mur tũgrĩn ãg tóg ver tỳ ti krẽ tũ nỹtĩ. ãg panh tỳ ãg mỹnh fi mré nỹ tũgrĩn ãg tóg mur mũ gé. Topê tỳ ãg han mãn tũgrĩn ãg tóg tỳ ti krẽ nỹtĩ jãvo.

¹⁴ ãg tỳ ù to: “Topê vỹ,” he mũ ên vỹ ãg ri ke mur, kỹ tóg tỳ ãprã ke jẽ sir. ãg mré tóg tĩg ja nĩgtĩ. Há kỹ sóg ti vỹ. Pã'i mág vỹ tỳ ti nĩ, ùn tar, tag ve inh. ãg to há pẽ tãvĩ ti nĩ, kỹ tóg ki hã tó ti gé. Topê kósin pir vỹ, kỹ Topê vỹ ti mỹ: “ùn mág vỹ tỳ ã nĩ,” hé, ti jóg ti.

¹⁵ João vỹ ti kãmén ja nĩ gé. Ti kãmén há han tóg, kỹ tóg: “inh nón kãtĩ mũ ên vỹ inh kãfór nĩ,” he ja nĩ. “Inh nón kãtĩg jẽ tóg ke mũ, hã ra tóg tỳ ijo ke nĩ. Ên tó inh huri ãjag mỹ. Ti hã vỹ,” he ja tóg nĩ, João ti, Jesus to.

¹⁶ ãg to hã tãvĩ tóg nĩ, hã kỹ tóg mỹ nén ù ha kar han, ãg jagãgtãn kỹ. ãg jagãgtãn tag tovãnh ke tũ pẽ tóg nĩ. ¹⁷ Moisés vỹ ãg mỹ Topê tỳ ãg jyvẽn mũ ên tó ja nĩgtĩ, ãg tỳ ti vỹ ki króm jẽ, kỹ Jesus tóg ãg mỹ: “Topê vỹ ãjag mỹ vẽnẽh pãte fón sór mũ, ti tỳ ãjag to há nĩn kỹ,” he mũ. Ti hã ne ãg mỹ vẽnẽh vỹ sér ên to mũ'. ¹⁸ ãg pi(jé) Topê végtĩ'. Kỹ ãg kãmĩ ù vỹ ti ve ja tũ nĩ gé. Ti kósin pir hã vỹ ãg mỹ ti kãmén tĩ, ti hã vỹ ã jóg mré nĩ nĩ, Topê mré. Ti hã vỹ Topê ri ke nĩ. Kỹ tóg ãg mỹ ã panh ti kãmén tĩ, Topê kósin ti, Jesus ti.

João Batista tỳ Jesus kãmén.

(Mt 3.1-12; Mc 1.1-8; Lc 3.1-18)

¹⁹ Kejẽn Judeu ag pã'i ag vỹ João mỹ vẽnẽh vỹ jẽnẽg mũ. Jerusalém tá ag nỹtĩ, pã'i ag, Topê tũ ki rĩr tĩ, Levi krẽ'krẽ ag ke gé. Ag João mỹ vẽnẽh vỹ jẽnẽ kỹ ag tóg mỹ: “ũ nỹ tỳ nĩ?” he mũ. ²⁰ Kỹ tóg ag mỹ: “inh pi(jé) tỳ Cristo nĩ',” he mũ. Tó há han tóg, ag mỹ.

²¹ Kỹ ag tóg ti mỹ: “kỹ ã hỹn tỳ ù nĩ?” he mũ. “ã mỹ tỳ Elias nĩ'?” he ag tóg ti mỹ. Hã ra tóg ag mỹ: “vó” he mũ gé.

Kỹ ag tóg ti mỹ: “Topê vỹ tó tĩ ù nẽji kãtĩg ke mũ gé. Ti hã mỹ tỳ ã nĩ?” he mũ. Hã ra tóg: “vó,” he mũ gé.

²² Kỹ ag tóg ti mỹ: “ũ nỹ tỳ ã nĩ, ge kỹ?” he mũ. “Pã'i ag vỹ ãg jẽgnẽ, ãg tỳ ã ki jẽmẽ jẽ. ãg hỹn ne tónh ke mũ, ag mỹ?” he ag tóg mũ. “Vẽso ã hẽri ke ti?” he ag tóg mũ, João mỹ.

²³ Kỹ João vỹ ag mỹ vẽnẽh kãmén mũ. ã to nén rán kỹ nĩ ên tó tóg mũ, hã vỹ: “ũ tỳ ãmã tũg ja tá jẽ kỹ vẽnẽh kar mỹ Topê jykre kãmén mũ ên vỹ tỳ inh nĩ,” he mũ. “ũ tỳ vẽnẽh kar

mỹ: “ĕg Senhor japry kure ra, ti jamĭn kurynh ra, ti tỹ jagma tĩg há han jé, he tĩ ĕn vỹ tỹ inh nĩ. Isaías tỹ inh kĕmĕn hĕ vĕ,” he tóg, João ti.

²⁴ Jĕvo ũ tỹ ti ki jĕmĕg mũ ag vỹ tỹ Fariseu ag mrĕ ke nỹtĩ. ²⁵ Kỹ ag tóg ti mỹ: “ĕ tỹ hĕ ri ken kỹ ag kygpe sór nĕ, ĕ tỹ tỹ Cristo tũ hĕ ra?” he mũ. “Inh pi(jĕ) tỹ Elias nĩ, he ĕ tóg tĩ. Inh pi(jĕ) tỹ Topĕ vĩ tó tĩ ĕn nĩ, ĕg tỹ ũn kĕtĩg jĕvĕnh mũ ĕn, he ĕ tóg tĩ, hĕ ra ĕ tóg ag kygpég tĩ,” he ag tóg mũ, João mỹ. ²⁶ Kỹ tóg ag mỹ: “goj tỹ sóg ag kygpég tĩ,” he mũ. “Hĕ ra ũ tóg ĕjag kĕmĩ tĩ mũ ha, ĕjag tỹ ũn ki kagtĩg ũ. ²⁷ ĕn vỹ inh nón kĕtĩg ke mũ, hĕ ra tóg inh kĕfór nĩ. Sỹ ti camarada ninh ke vĕ vĕ, sỹ ti pĕn né kunũnh ke vĕ vĕ, ti pĕn to ró ti. Hĕ ra sóg tỹ ti krĕm ke pĕ jĕ,” he tóg, João ti

²⁸ Kỹ ag tóg mũ mũ, ti vĩ mĕ kar kỹ. Cidade tỹ Betĕnia tá ag tóg ti venh kĕmũ ja nĩgtĩ, Fariseu ag, João ti, Jordĕo mĕ tá. Tá tóg ag kygpég jĕ nĩ, João ti.

Jesus tỹ tỹ ĕg tỹ Topĕ mỹ ĕg mĕg tĕnh ĕn ri ke

²⁹ Tỹ vaj kỹ João vỹ Jesus vég mũ sir. João tá tóg jun mũ, Jesus ti. Kỹ João tóg ti to: “ti hĕ vĕ,” he mũ. “ĕg tỹ Topĕ mỹ ĕg mĕg tỹ carneiro krĕ tĕnh ĕn ri ke ti nĩ, cordeiro ĕn ti. Ti hĕ vỹ ĕg kar tỹ Topĕ vĩ mranh jagfy ter ke mũ,” he tóg. ³⁰ “Sỹ ũn kĕmĕn mũ ĕn hĕ vĕ. ũ tỹ ijo jĕ mũ vỹ inh nón kĕtĩg ke mũ, he ja inh nĩ ti to. Inh kĕfór ti nĩ, ti tỹ inh jo ke ninh kỹ, he ja inh nĩ. ³¹ Inh pi(jĕ) ti ki kanhró ja nĩ, hĕ ra sóg goj tỹ vĕnh kar ag kygpé, ag tỹ ti ki kanhrĕn kĕn jé, povo tỹ Israel ag kar,” he tóg, João ti

³² Kỹ tóg: “Topĕ kuprĩg ve inh,” he mũ gé. “Kanhkĕ tá kĕkutĕ kỹ tóg ti krĩ kri nĩ nĩ. Tỹ sórĕg ve ti nĩ, Topĕ kuprĩg ti, ti tỹ ti krĩ kri ninh kỹ. ³³ Inh pi(jĕ) Jesus ki kanhró nĩ vĕ. Hĕ ra Topĕ tóg inh mỹ: ha ag kygpenh tĩg,” he ja nĩgtĩ, kỹ tóg inh mỹ: “ĕ tỹ inh kuprĩg ve kỹ ĕ tóg ti ki kanhró ninh mũ,” he ja nĩ gé. “Kanhkĕ tá kĕkutĕ kỹ tóg ag kĕ ũn pir kri ninh mũ. Ti tỹ ũn kri nĩ mũ ĕn vỹ inh kuprĩg tỹ ag kygpenh ke mũ,” he ja tóg nĩ inh mỹ, Topĕ ti. ³⁴ Tag ve inh, hĕ kỹ sóg ĕjag mỹ: ti hĕ vỹ tỹ Topĕ kósin nĩ, he mũ” he tóg, João ti. Ti tỹ Jesus kĕmĕn hĕ vĕ.

Jesus tỹ ĕ mrĕ mũ tĩ ag jé prĕr

³⁵ Tỹ vaj kỹ João vỹ ĕ mrĕ mũ tĩ régre ag mrĕ vĕmĕn jĕ nĩ. ³⁶ Kỹ tóg Jesus tỹ mĩ tĩg vég mũ, kỹ tóg ag mỹ: “Topĕ tũ vỹ tỹ ti nĩ,” he mũ. “ĕg tỹ Topĕ mỹ ĕg mĕg tỹ cordeiro tĕnh tĩ ĕn ri ke ti nĩ,” he tóg, João ti.

³⁷ Ag tỹ ti vĩ tag mĕ kỹ ag tóg Jesus nón mũ mũ. ³⁸ Kỹ Jesus vỹ ag vég mũ, ag tỹ ti nón mũ ti. Kỹ tóg ag mỹ: “ne nĕ?” he mũ. Kỹ ag tóg ti mỹ: “ĕ hĕ tá ĕmĕ nĩ?” he mũ. ³⁹ Kỹ tóg ag mỹ: “mũ jé ha, inh mrĕ, ĕjag tỹ inh jamĕ ven jé,” he mũ. Kỹ ag tóg ti mrĕ mũ mũ sir. Ti mrĕ ag kurĕ ĕn tũg mũ. Rĕ kĕ ti nỹ ha, ag tỹ ti mrĕ mũ kri, 4 horas hỹn hĕn ri ke mũn.

⁴⁰ Ti mrĕ mũ ag kĕ ũ vỹ tỹ André nĩ, ũ tỹ João tỹ Jesus tó ja ĕn mĕg mũ ag kĕ ũ, hĕ vỹ: Simĕo Pedro jĕvy, he mũ, André ti, Jesus mrĕ vĕmĕn tĩ ĕn ag kĕ ũ ti. ⁴¹ ĕn tóg tá kĕtĩg, kỹ tóg vĕsỹmĕr ĕ kĕke tỹ Simĕo Pedro venh tĩ mũ, kỹ tóg ti mỹ: “Messias ve inh,” he mũ. “Messias,” he ag tóg tĩ, Topĕ tỹ ũn jĕnĕnh ke ĕn to, Cristo to. ⁴² André tỹ ti mỹ Jesus tó kỹ tóg ti mrĕ ti venh tĩ mũ. Kỹ Jesus vỹ ti ki ĕvĕnh mũ, kỹ tóg ti mỹ: “Simĕo vỹ tỹ ĕ nĩ, João kósin,” he mũ. “Sỹ ĕ jyjyn mĕn ke vĕ, hĕ vỹ: Cefas, he mũ,” he tóg, Jesus ti. Cefas to ken hĕ vĕ, hĕ vỹ: Pedro, he mũ, hĕ vỹ: pĕró, he mũ, ĕg vĩ ki.

Jesus tỹ Filipe mrĕ Natanael jé prĕr

⁴³ Tỹ vaj kỹ Jesus vỹ ga tỹ Galilĕia ra tĩg sór mũ. Ā tĩg ke jo tóg Filipe kato tĕ mũ. Kỹ tóg ti mỹ: “inh mrĕ kĕtĩg,” he mũ. Kỹ tóg tĩ mũ. ⁴⁴ Hĕ ra Filipe vỹ tỹ Betsaida tá ke nĩ, André mrĕ Pedro jamĕ ĕn tá ke. ⁴⁵ Kỹ Filipe vỹ Natanael venh tĩ mũ, ti mỹ Jesus kĕmĕn jé. Kỹ tóg ti mỹ: “Cristo ve inh huri,” he mũ. “Moisĕs vỹ ti kĕtĩg ke rán ja nĩ, Topĕ vĩ tó tĩ ag ke gé. Jesus to ken hĕ vĕ, Nazaré tá ke ĕn to ken hĕ vĕ, Josĕ kósin ĕn ti. Ti hĕ vỹ tỹ Cristo nĩ,” he tóg, Filipe ti, Natanael mỹ. ⁴⁶ Kỹ tóg ti mỹ: “hĕ ra sóg Nazaré tá ũn há ve ja tũ nĩ ver,” he mũ. Hĕ ra Filipe tóg ti mỹ: “ge ra ti venh kĕtĩg,” he mũ. Kỹ tóg ti mrĕ tĩ mũ.

⁴⁷ Ag tỹ Jesus tá junjun mũ ra Jesus tóg Natanael kãmén mũ, ù tỹ tá nỹtĩ ag mỹ. “Ù tỹ tá kãtĩ mũ ãn ve ra,” he tóg. “Israel krê'krê pẽ vê,” he tóg. “ùn há vỹ tỹ ti nĩ, ón vãnħ ti nĩ,” he tóg. ⁴⁸ Hã ra Natanael vỹ Jesus tỹ ã to vỹ tag mễg mũ. Kỹ tóg ti mỹ: “kỹ ã mỹ inh ki kanhró nĩ?” he mũ. Kỹ Jesus tóg ti mỹ: “Filipe tỹ ã jé prěr to hã sóg ã vé,” he mũ. “Ã tỹ ka krêm jẽ kỹ sóg ã vé, ka tỹ figueira ãn krêm,” he tóg,” he tóg. Jesus ti.

⁴⁹ Kỹ Natanael tóg Jesus mỹ: “mẽ’,” he mũ. “Topẽ kósın vỹ tỹ ã nĩ,” he tóg. “Ëg povo tỹ Israel kri pã'i vỹ tỹ ã nĩ,” he tóg.

⁵⁰ Kỹ Jesus tóg: “isỹ ã mỹ: ã ve ja inh nĩ, ã tỹ ka krêm jẽ ra, hen kỹ tóg ã mỹ e tĩ, kỹ ã tóg inh vỹ kri fi sór mũ,” he mũ. “Hã ra tóg ver tỹ nén ù tũ nĩ, sỹ ã ve ja tag ti. Isỹ kar kỹ nén han ke vỹ ã mỹ e pẽ tãvĩ tĩnh mũ, ha vemnĩ,” he tóg, Jesus ti. ⁵¹ “Ha vé, ki hã sóg tónħ ke mũ, ha mẽ. Kanhkã nor kỹ nĩ ve jé ãjag tóg ke mũ. Tá ãjag tóg Topẽ tỹ jễgnễ jafã ag venh ke mũ gé. Kanhkã tá ag kãrenh ke mũ, iso, kỹ ag ra mũ mãn ke mũ gé. Tỹ sóg ãprã ke fi kósın nĩ mỹr,” he tóg, Jesus ti.

2

Jesus tỹ vãnh prũg venh tĩ

¹ Kurã tãgtũ tũg kỹ ù tóg vãnh prũg han mũ ãmã tỹ Caná tá, ga tỹ Galiléia tá. Jesus mỹnh fi vỹ venh tĩg ja nĩ. ² Kỹ ag tóg Jesus mỹ tó mũ gé, ti tỹ festa venh kãtĩg jé, ti mré mũ tĩ ag mré. ³ Ag tỹ tá nỹtĩ ra vãnħ vinho tóg tũ' he mũ. Kỹ Jesus mỹnh fi tóg ti mỹ: “vinho hur tũg,” he mũ. ⁴ Hã ra Jesus tóg fi mỹ: “toreg', mỹnh',” he mũ. “Inh mré ke tũ vê, ã tỹ inh mỹ nén tó mũ tag ti,” he tóg, Jesus ti, ã mỹnh fi mỹ. ⁵ Hã ra fi tóg ù tỹ festa ki rĩr tĩ ag mỹ: “ti tỹ ãjag mỹ nén ù tó kỹ han nĩ,” he mũ.

⁶ Hã ra goj né mág tỹ 6 (ke) vỹ tá nỹtĩ, pó tỹ goj hé mág. Éhé ti nỹtĩ, balde fór tỹ 10 (ke) tỹ ãg tóg ùn pir fãn tĩ. Judeu ag vỹ vãnh kygpe e han tĩ, ag tỹ Topẽ mỹ há nỹtĩ jé. Ag jykre hã vê. Ag tỹ vãnh kygpe hã jé tóg tá nỹtĩ, goj nén ti. ⁷ Kỹ Jesus tóg festa ki rĩr tĩ ag mỹ: “goj né ãn fónfãn, goj run kỹ,” he mũ. Kỹ ag tóg ke mũ. Fónfãn kãn ag tóg mũ. ⁸ Kỹ tóg ag mỹ: “goj tag tỹ festa to pã'i mỹ ven,” he mũ. Kỹ ag tóg ke mũ. ⁹ Kỹ tóg kron mũ, festa to pã'i ãn ti. Hã ra tóg tỹ vinho nĩ sir, ag tỹ run ja ti. Hã ra tóg ki kagtĩg nĩ, festa to pã'i ti. ù tỹ festa ki rĩr tĩ ag hã vỹ ki kanhró nỹtĩ, pã'i ãn krêm ke ag.

Pã'i tỹ vinho hã ãn kron kỹ tóg ùn prũg mũ ãn jé prěr mũ. Kỹ tóg ti mỹ: ¹⁰ “vãnh jykre vãnhmỹ han ã,” he mũ. “Ag tỹ kronkron vén kỹ ã tóg ag mỹ vinho há tãvĩ nĩm ke mũ vê, kar kỹ vinho pãgsĩ vỹ há nĩ vê. Jãvo ã tóg ag mỹ vinho pãgsĩ ãn nĩm vén, kỹ ã tóg vinho há pẽ tag nĩm sór mũ ha vãnħ,” he tóg, festa to pã'i ti, ùn prũg mũ ãn mỹ. Hã ra tóg ki kagtĩg nĩ, Jesus tỹ goj tỹ vinho há ãn han mũ ti, há kỹ tóg ti mỹ e tĩ, ti tỹ festa kũu ki vinho há ven sór kỹ.

¹¹ Jesus tỹ ãmã tỹ Caná tá nén han mũn hã vê, Galiléia tá. Ëg tỹ nén han ki kagtĩg hyn han tóg tĩ, kỹ tóg tag han vén. Ti tỹ nén han mũ ki ãg tóg ti jykre tar ki kanhró nỹtĩ sir. Hã kỹ ag tóg ti ki ge mũ sir, ti mré mũ tĩ ag, ag tỹ ti jykre tar ãn ven kỹ.

¹² Kar kỹ Jesus vỹ cidade tỹ Cafarnaum ra tĩ mũ, ti mỹnh fi mrẽ, ti jãvy ag mré hã, ti mrẽ mũ tĩ ag mré ke gé. Tá ag tóg nỹtĩg mág sĩ han.

Jesus tỹ Topẽ jo ãn ra tĩ

(Mt 21.12-13; Mc 11.15-17; Lc 19.45-46)

¹³ ãn kã Judeu ag festa tỹ Páscoa vỹ kakó nĩ ha Kỹ Jesus vỹ cidade tỹ Jerusalém ra tĩ mũ, ti mré mũ ti ag mré. ¹⁴ Ti tỹ Topẽ jo ãn tá jun kỹ tóg ù tỹ boi vender he tĩ ag vég mũ, carneiro vender he tĩ ag ke gé sórãg vender he tĩ ag ke gé. Topẽ jo ãn krêm ag tóg ãjag negócio hyn han tĩ. Kar kỹ ù ag tóg tá nỹtĩ gé jãnkamy trocar he tĩ ag. ¹⁵ Jesus tỹ ag ve kỹ tóg ti mỹ e tĩ, ag tỹ Topẽ jo ãn kavãnh mũn kỹ. Hã kỹ tóg mrãn ke jafã fy tỹ ag mrãnmrãn jafã han mũ. ãn vyn kỹ tóg ag pan mũ, Topẽ jo ãn kãtã, carneiro ti ke gé, boi ti ke gé. ù tỹ jãnkamy trocar he tĩ ag jãnkamy ãn vãm tóg mũ gé, ãprã, kỹ tóg ag mesa tỹ krěj ke mũ gé. ¹⁶ ù tỹ sórãg vender he tĩ ag mỹ tóg: “ãjag tũ ma mũjễg,” he mũ. “Inh panh jo ãn krêm negócio han sór tũg nĩ. Bodega pijễ', inh panh jo ãn ti,” he tóg, Jesus ti.

¹⁷ Ti mré mũ tĩ ag tỹ tag ve kỹ ag tóg ti to rán kỹ nĩ ãn mĩ êkrég mũ, ha mē: “ã ãn tóg inh mỹ sĩnvĩ jẽ, kỹ tóg inh mỹ e tĩ, ag tỹn kavénh kỹ. Tag tugrĩn ag tóg inh krĩ rỹ han mũ, kỹ tóg kejẽn isén ke mũ sir, inh kri rỹ ti, ha vemnĩ,” he tóg, Topẽ vĩ tỹ rán kỹ nĩ ki, Jesus to.

¹⁸ Kỹ Judeu ag pã'i ag vỹ Jesus tỹ ag pan mũ vég mũ gé. Kỹ ag tóg ti mỹ: “ã tỹ hẽ ri ke nẽ?” he mũ. “Û nỹ hỹn ã mỹ: tag han nĩ, hé? Milagre ù han nĩ, êg tỹ ù tỹ ã jẽnẽg mũ ki kanhrãn jé,” he ag tóg mũ, pã'i ag, Jesus mỹ.

¹⁹ Hã ra Jesus tóg ag mỹ: “ãjag tỹ Topẽ jo ãn tag kókén kỹ sóg ti jẽgja ki ù han mãn ke mũ, kurã tãgtũ ki, ha vemnĩ,” he mũ. ²⁰ Kỹ tóg ag mỹ e tĩ. “Û tỹ Topẽ jo ãn tag han mũ ag vỹ ano tỹ 46 (ke) ki rãnrãj kỹ ti han. Jãvo ã mỹ kurã tãgtũ ki ti han sór mũ', in ti'?” he ag tóg mũ, Jesus mỹ, pã'i ag. ²¹ Hã ra Jesus tóg ag mỹ ã ter ke tó ja nĩgtĩ, vẽn kãmén ja ti nĩgtĩ, ti tỹ veso: “Topẽ jo ãn ri ke inh nĩ,” hen kỹ. ²² Ti tỹ kejẽn ã ter kar kỹ rĩr mãn kỹ ti mré mũ tĩ ag tóg ti vĩ tag ki êkrén kỹ ki kanhrãn mũ, kỹ ag tóg Topẽ vĩ ki rán kỹ nĩ ãn to jykrén há han mũ vãhã, Jesus vĩ to ke gé, kỹ ag tóg ti ki ge há han mũ ha.

Jesus tỹ vẽn kar ki kanhró

²³ Kỹ ù tỹ hẽn ri ke ag vỹ Jesus ki ge mũ, ti tỹ Jerusalém tá nĩn kỹ, festa tỹ Páscoa ãn kã. Ag tỹ ti tỹ nén han mũ ve kỹ ag tóg ti ki ge mũ. Milagre hyn han tóg tĩ. ²⁴ Hã ra tóg ag jykre ki kanhró nĩ, ù tỹ ón kỹ ti ki ge mũ ag jykre ki. Ón kỹ ag tóg ti ki ge mũ, hã kỹ ag tóg ti ki fe tũ nỹtĩ sir. ²⁵ Kỹ ù tỹ ti mỹ: “ũ ãn jykre vỹ ge nĩ,” hen kỹ tóg: “hỹ, ki kanhró inh nĩ,” he tĩ. Vēsóg ki tóg ag jykre ki kanhró nĩgtĩ.

3

Nicodemos tỹ Jesus mré vēmén

¹ ãn kã ù tóg nĩgtĩ, ti jijin hã vỹ: Nicodemos, he mũ. Judeu ag pã'i ù vẽ, Fariseu ù vẽ. ² ãn vỹ Jesus ve sór mũ, kỹ tóg kuty ra ti venh tĩ mũ, ti mré vēmén jé. Kỹ tóg ti mỹ: “Topẽ vỹ ã jẽnẽ, tag ki kanhró êg tóg nỹtĩ,” he mũ. “Topẽ tỹ êg mỹ ùn jẽnẽ vỹ tỹ ã nĩ, hã kỹ ã tóg êg tỹ nén han vãn hẽn hyn han tĩ. Topẽ tỹ ã mré han tũ nĩ ra ã tóg ã tỹ han mũ tag ki kagtĩg nĩnh mũ vẽ,” he tóg, Nicodemos ti, Jesus mỹ.

³ Kỹ Jesus tóg ti mỹ: “sỹ ã mỹ tag kãmén ke vẽ, ha mē,” he mũ. “Ûn mur mãn kỹ nỹtĩ ag hã vỹ Topẽ tỹ tỹ êg pã'i nĩ venh ke mũ, ag tãvĩ. Ki hã sóg tó mũ mỹr,” he tóg, Jesus ti, Nicodemos mỹ.

⁴ Kỹ Nicodemos tóg ti mỹ: “kỹ ùn sanh hỹn hẽ ri kenh mũ, ti mur mãn jé?” he mũ. “Ti mỹ vēsĩ han ki kanhró nĩ, kỹn mỹ ã mỹnh fi nug ki rã mãn kỹ mur mãn ke mũ?” he tóg, Nicodemos ti.

⁵⁻⁶ Hã ra Jesus tóg ti mỹ: “vó,” he mũ. “Êprã ke ag krẽ vỹ tỹ êprã ke nỹtĩ, ag mỹnh fag ri ke, Jãvo Topẽ kuprĩg tỹ ù han kỹ tóg Topẽ kuprĩg tỹ jagrẽ nĩ. Mur mãn to ken hã vẽ, hã vỹ: inh ki rã, he mũ, hã vỹ: mur mãn, he mũ. Goj tỹ ke vẽ, Topẽ kuprĩg tỹ ke vẽ gé. Û tỹ gen kỹ mur mãn ja tũ nĩn kỹ tóg Topẽ tỹ tỹ êg pã'i nĩ venh ke tũ pẽ nĩ. ⁷ Hã ra tóg ã mỹ e tĩ, sỹ ã mỹ: “mur mãn jé ã tóg ke mũ,” hen kỹ. ⁸ Kãka to jykrén nĩ. Ti tỹ mĩ tĩg sór mũ ãn mĩ tóg tĩ tĩ kãka ti. Ti tỹ krog he mũ ãn hã mẽg êg tóg tĩ, hã ra êg tóg ti vég tũ nĩ, kỹ êg ti tỹ hẽ ra tĩg ke mũ ki kagtĩg nỹtĩ, ti tỹ hẽ tá kãtĩg ãn ti ke gé. Ge ti nĩgtĩ, Topẽ kuprĩg tỹ ùn han mãn mũ ag mré,” he tóg, Jesus ti, Nicodemos mỹ. (Topẽ kuprĩg vég tũ êg tóg nĩgtĩ. Ha ra tóg êg mỹ ã jykre tãg nĩm, ti tỹ êg han mãn kỹ. Hã kỹ Jesus tóg Nicodemos mỹ: “kãka ri ke nĩ,” he mũ)

⁹ Kỹ Nicodemos tóg: “tag hỹn hẽ ri ke tĩ?” he mũ. ¹⁰ Kỹ Jesus tóg ti mỹ: “Israel ag kanhrãn ã tóg tĩ, hã ra ã tóg sỹ ã mỹ nén tó mũ tag ki kagtĩg nĩ,” he mũ. ¹¹ “Ki hã sóg tó mũ, hã kỹ sóg ã mỹ kãmén mũ. Sỹ nén ù ki kanhrãn mũ ãn hã tó sóg tĩ. Isỹ nén ù ve ja ãn hã kãmén sóg tĩ, hã ra ãjag tóg mẽ jãvãn h nỹtĩ. ¹² Isỹ ãjag mỹ ga kri vẽn h jykre kãmén mũ ra ãjag tóg jẽmẽ sór tũ nĩgtĩ. Kỹ ãjag hỹn hẽ ri kenh ke mũ', sỹ ãjag mỹ kanhkã tá vẽn h jykre kãmén kỹ?” he tóg. ¹³ “Ha vé, ãjag kãmĩ ù vỹ kanhkã ra tãpry tũ nĩ, tá vẽn h

jykre ên ve jé. Ājag jāvo isóg tá kākutē ja nī, hā ky sóg tó tī. Inh jamān hā vē. Tỹ sóg ēprā ke fi kósin nī,” he tóg, Jesus ti.

¹⁴ “Moisés vỹ pỹn tỹ ka to sa ja nĩgtī, ga kórég ên tá. Pỹn tỹ ferro kusüg tỹ há ên tỹ tóg ka to sa ja nĩgtī. Tag ri ke han jé ag tóg ke mũ, isỹ, isỹ tỹ ēprā ke fi kósin nĩn ky. ¹⁵ Kỹ ũ tỹ inh ki rānh ke mũ ên vỹ kren ke mũ. Rĩr krỹg ja tũ ve jé tóg ke mũ. Hā jé ag tóg ka to isanh ke mũ. ¹⁶ Topē vỹ ga kri mũ ag to há nī, hā ky tóg ā kósin pir fēg, vėnh kar tỹ ti ki ge jé, ag tỹ tũ' he tũ nĩ jé, ag tỹ ěg rĩr krỹg ja tũ ên ven jē. ¹⁷ Topē vỹ ā kósin jēnē, ti tỹ ēprā ke ag krenkren han jé. Ti pi(jé) sỹ ājag vóg kónān jé inh jēnē',” he tóg, Jesus ti, Nicodemos mỹ.

¹⁸ “Ũ tỹ inh ki rānh ke mũ to tóg jũnh ke tũ nī, Topē ti. Jāvo tóg ũ tỹ inh ki ge tũ ên ag hā to jũ nĩ isỹ tỹ ti kósin pir nĩn ky,” he tóg.

¹⁹ “Topē tỹ ũ tỹ inh ki ge tũ ag to jũ vỹ ge nī, ha mẽ. Ga kri mũ ag kanhrān sóg tĩ, hā ki sóg ag mỹ jēngrē ri ke nī. Hā ra ag tóg mẽ sór tũ nĩgtī. Kuty mĩ ag tóg mũ sór mũ, jēngrē tóg ag mỹ kórég nī, ag jykre pāno nĩn ky. ²⁰ Ũ tỹ vėnh jykre pāno han mũ kar vỹ kurā to kórég nỹtĩ, ky ag tóg kurā ki vėnh ven sór tũ nī, vėnh kar tỹ ag jykre pāno venh ha mẽ tĩn ky. ²¹ Ũ tỹ Topē vĩ ki króm mũ ag vỹ kurā ki vėnh ven sór tĩ. Kurā tóg ag mỹ sér tĩ, vėnh kar tỹ ag jykre hā ven jé. Topē vỹ ag tar han tĩ, ag tỹ nén ũ há han jé. Hā ve jé ag tóg ke mũ, vėnh kar ag,” he tóg, Jesus ti, Nicodemos mỹ. Ti tỹ ti mỹ Topē jykre kāmén ja hā vē.

João Batista tỹ Jesus kāmén mǎn

²² Ēn kǎ kejēn Jesus tóg ā mré mũ tĩ ag mré ga tỹ Judéia ra tĩ mũ, ky ag tóg tá nỹtĩ, vėnh kar kygpe ky. ²³ Hā ra João vỹ ag kygpég mũ gé, ên kǎ, vānh tỹ Enom tá, Salim tóg tá kakó nĩ. Tá goj vỹ éhé nĩ, hā ky tóg ag tỹ tá vėnhmǎn ky ag kygpég mũ, João ti. ²⁴ Ēn kǎ tóg ver se ky jē tũ nĩ, João ti.

²⁵ Kejēn Judeu ũ tóg tá nĩ gé, hā ra tóg João mré mũ tĩ ag vĩ kafǎn mũ. “Goj tỹ ěg tóg Topē mỹ jānhkri ky nĩgtĩ',” he tóg mũ, ag mỹ, Judeu ên ti. Hā to ag tóg jagně vĩ kafǎn mũ. ²⁶ Kỹ João mré mũ ag tóg João mỹ tag tó mũ, ha mẽ. “Ũ tỹ Jordão mǎtǎ ā mré nĩ ja ên vỹ ag kygpég jē nĩ, ā tỹ ěg mỹ ũn kāmén ja ên ti. Hā ra vėnh kar vỹ ti mré mũ mũ ha, hā ky ag tóg ā venh kāmũ mǎn tũ nĩ ha,” he ag tóg mũ, João mỹ, Jesus to. ²⁷ Hā ra tóg ag mỹ: “há ti nĩ,” he mũ. “Topē tỹ ěg mỹ ũn nĩm mũ ên hā vég ěg tóg tĩ,” he tóg. ²⁸ “Mĩ ěkren nĩ, sỹ ājag mỹ nén tó ja ti, hā vỹ: inh pi (jé) tỹ Cristo nĩ', he mũ. Sỹ ti jāmĩ tĩg ke hā jé tóg inh jēnē, Topē ti, he ja sóg nĩ ājag mỹ,” he tóg, João ti. ²⁹ “Vėnh prũg to jykrén nĩ. ũn prũg mũ hā vỹ ā prũ ke fi mré nĩ nĩ. Ti régre tóg hā ra ti rǎ hā jē, ũn prũg mũ ên rǎ hā, ky tóg ti vĩ mėg mũ, hā ra tóg ti mỹ mẽ sér pē tĩ, ti, vĩ ti. Ge ti nĩ, inh mré. Inh mỹ tóg sér tĩ, vėnh kar tỹ ti mré mũn ky, ti tỹ ũn prũg mũ ri ke nĩn ky, Jesus ti. ³⁰ ũn e tỹ ti mré mũn ky tóg há tĩ, ky tóg tỹ ũn mág nĩnh mũ ha. Hā ra sóg tỹ nén ũ tũ nĩnh ha,” he tóg, João ti.

Jesus tỹ kynhmỹ kǎtĩ

³¹ “ũn tỹ kynhmỹ kǎtĩ mũ ên vỹ vėnh kar kafór nĩ. Ēprā ke ag vỹ tỹ ēprā ke nỹtĩ, ky ag tóg ēprā ke jykre tỹ vėmén tĩ. ũ tỹ kanhkǎ tá kǎtĩ mũ ên vỹ tỹ vėnh kar kri ke jē. ³² Kỹ tóg ā tỹ tá nén ve ja ên hā tó mũ, ā tỹ tá nén mẽ ja ên, hā ra ag tóg ti vĩ mẽ sór tũ nĩ. ³³ ũ tỹ ti vĩ mėg mũ ag hā ra Topē to: “ki hā tóg tó tĩ,” he mũ. ³⁴ Topē tỹ ũn jēnēg mũ ên vỹ ti vĩ kāmén mũ. Topē kuprĩg vỹ Jesus tar han mũ, ti tỹ tỹ ti jagrē pē nĩn ky, ti tỹ ti ve mág han ky. ³⁵ Topē vỹ ā kósin to há tāvĩ nĩ, ky tóg ti mỹ nén (ũ) kar tovānh, ti hā tỹ ki rĩr jē. ³⁶ Hā ky ũ tỹ ti kósin ki rǎ mũ vỹ ter mǎn ke tũ nĩ. Rĩr krỹg ja tũ ve jé tóg ke mũ. ũ tỹ ti vĩ han sór tũ ên vỹ tag venh ke tũ pē nĩ, rĩr krỹg ja tũ tag ti. Topē vỹ ti vóg kónān ke mũ, ky tóg tũg' henh ke tũ nĩ, Topē tỹ ti vóg kónān ke ti,” he tóg, João ti. Ti tỹ ā mré mũ tĩ ag mỹ Jesus kāmén jan hā vē.

4

Jesus tỹ Samaria tá fi mré vēmén mũ

¹ Kỹ Fariseu ag vỹ mēg mũ, ùn tỹ hēn ri ke ag tỹ Jesus mré mũ ěn ti. Ûn e ag kygpég tóg mũ gé, Jesus ti, João tỹ ùn kygpe ja ag káfór. ² Hã ra Jesus vỹ ag kygpe ja tũ nĩ. Ti mré mũ tĩ ag hã vỹ ag kygpe ja nĩgtĩ. ³ Kỹ Jesus tóg mēg mũ, Fariseu ag tỹ ti tỹ tỹ ùn mág nĩ mē ja ti, hã kỹ tóg ga tỹ Judéia tá kãkutē kỹ ga tỹ Galiléia ra tĩ mũ, ti mré mũ tĩ ag mré. ⁴ Galiléia ra tĩg jé tóg ver ga tỹ Samaria fĩn rãm mũ. ⁵ Fĩn rãm kỹ tóg Samaria tá cidade ù tá jun mũ, hã vỹ: Sicar, he mũ. Tán kakó nĩ, Israel jóg'jóg ve tỹ Jacó japỹ ja ti. Ěpỹ ěn fi ja tóg nĩ, ã kósĩn tỹ José mỹ, Jacó ti. ⁶ Kỹ Jacó tỹ poço vỹ tá nĩ gé. Jesus tỹ poço ěn tá jun kỹ tóg tá vēnhkán kỹ nĩ nĩ, poço ěn rã hã. Rã tỹ ěg nĩno kã sa ra ke ja vē.

⁷ Jesus tỹ tá nĩn kỹ ùn tỹtá fi vỹ tá jun mũ, Samaria tá ke ù fi. Goj run jé fi tóg kãtĩ mũ. Kỹ Jesus vỹ fi mỹ: “inh mỹ goj jun, sỹ kron jé,” he mũ. ⁸ Ti mré mũ tĩ ag vỹ tá tũgtũ nỹtĩ, ã pir mỹ tóg tá nĩ nĩ, Jesus ti. Cidade ra ag kagáv, vējēn comprar he jé.

⁹ Jesus tỹ fi mỹ goj to vĩn kỹ fi tóg ti mỹ: “Judeu vỹ tỹ ã nĩ, hã ra ã tóg inh mỹ goj to vĩ mũ,” he mũ, “isỹ tỹ Samaria tá ke nĩ ra,” he fi tóg mũ, Jesus mỹ. Judeu ag vỹ Samaria tá ke ag to é he tĩ, hã kỹ fi tóg ti mỹ ke mũ.

¹⁰ Kỹ Jesus tóg fi mỹ: “Topē tỹ ã mỹ nén han sór mũ tag ki kagtĩg ã nĩ ver,” he mũ. “Kỹ ã tóg inh ki kagtĩg nĩ gé. Ke tũ nĩ mũ ra ã tóg inh mỹ: “inh mỹ goj nĩm,” henh ke mũ vē, kỹ sóg ã mỹ goj ror tỹ goj nĩm ke mũ vē,” he tóg fi mỹ, Jesus ti.

¹¹ Kỹ fi tóg Jesus mỹ: “runja tũ ã nĩ,” he mũ, “kỹ ã hỹn hē ri kenh mũ, ã tỹ goj ror tỹ goj ěn run jé? Téj jagy ti nĩ, poço ti,” he fi tóg ti mỹ. ¹² “Ěg jóg'jóg ve tỹ Jacó vỹ poço tag han, kỹ ag tóg ti goj kron, ti krē ke gé, ti mēg ke gé. ã mỹ ti káfór nĩ, hã kỹ ã mỹ goj ror tỹ goj run sór mũ?” he fi tóg mũ, Jesus mỹ.

¹³ Kỹ Jesus tóg fi mỹ: “ã tỹ goj tag kron kỹ ã tóg kãnhmar kron mãn sór mũ,” he mũ. ¹⁴ “Isỹ ã mỹ goj nĩm kỹ ã tóg kron pir han kar kỹ há nĩ ha, kron mãn sór ke tũ ã nĩ sir. ã kãki tóg goj ror han ke mũ, sỹ ã mỹ goj nĩm ke ti. Kỹ goj tag vỹ ã ter ke tũ han ke mũ, ha vemnĩ,” he tóg, Jesus ti. ¹⁵ Kỹ fi tóg ti mỹ: “inh mỹ nĩm gé, goj tag ti,” he mũ. “Kỹ sóg tag ki run mãn ke tũ nĩ ha, kỹ sóg kron sór mãn ke tũ nĩ ha,” he fi tóg.

¹⁶ Hã ra Jesus tóg fi mỹ: “kỹ ã mén jé prērmnĩ ge, ti mré inh venh kãtĩg nĩ,” he mũ fi mỹ. ¹⁷ “Hã ra sóg mén tũ nĩ,” he fi tóg. “Hỹ,” he tóg, Jesus ti. “Mēn tũ ã nĩ, ki hã ã tóg tó mũ. ¹⁸ ã mén ag vỹ ù tỹ 5 (ke) ja nĩgtĩ, kỹ ã tỹ ùri ùn mré nĩ ěn pi(jé) tỹ ã mén nĩ. Ki hã ã tóg tó mũ,” he tóg, Jesus ti.

¹⁹ Kỹ fi tóg Jesus mỹ: “Topē vĩ tó jafã vỹ tỹ ã nĩ, vég isóg nĩ nĩ,” he mũ. “Kỹ inh mỹ tag tó, ha mē. Ěg jóg'jóg ve ag vỹ tag ki Topē mré vēmén tĩ ja nĩgtĩ, pãnónh tag kri, kỹ ěg tóg ùri ke tĩ gé. ²⁰ Hã ra tóg ãjag mỹ há tũ nĩ, tag, ãjag tỹ tỹ Judeu nỹtĩn kỹ. “Jerusalém tá ěg Topē mré vēmén ke mũ, Jerusalém tá ěg tóg ti mỹ: ùn mág vỹ tỹ ã nĩ, henh ke mũ,” he ãjag tóg tĩ. Ti hỹn hē tá há nĩ, ěg tỹ Topē mré vēmén ke ti?” he fi tóg, Jesus mỹ

²¹ Hã ra Jesus tóg fi mỹ: “ha mē, sỹ ã mỹ nén kãmén ke ti,” he mũ. “Kãnhmar ãjag tóg pãnónh tag kri ěg jóg tỹ Topē mré vēmén mãn ke tũ nĩ, kỹ ěg Jerusalém tá ti mré vēmén mãn ke tũ nĩ gé. ²² Topē mré ãjag tóg vēmén sór ti, hã ra ãjag tóg ãjag tỹ ùn mré vēmén mũ ki kagtĩg nỹtĩ. ãjag jãvo ěg tóg ti ki kanhró nỹtĩ, ù tỹ vēnh kar krenkren han ke ěn tỹ tỹ Judeu krē'krē ag kã ù nĩn kỹ. ²³ Kãnhmar vēnh kar vỹ Topē mré vēmén há han ke mũ. Kakó ti nĩ ha, kurã tag. Kỹ ù tỹ ti mré vēmén mũ ag vỹ Topē kuprĩg tỹ jagrē nỹtĩ, hã kỹ ag tóg ti mré vēmén há han ke mũ, ěg jóg mág mré. Û tỹ ge hã jãvãnh ti mũ, ěg jóg mág ti, ag tỹ ti mré vēmén jé, ti mỹ: “ùn mág vỹ tỹ ã nĩ,” he jé,” he tóg. ²⁴ “Ěg pi(jé) Topē vég tĩ, hã ra tóg ěg mré nĩ nĩ. Kỹ, ěg tỹ ti mré vēmén sór kỹ ěg tóg ti kuprĩg tỹ jagrē nỹtĩnh mũ, ěg tỹ ti mré vēmén há han jé, ěg tỹ ti vég tũ ra. Ěg tỹ ti mỹ: “ùn mág vỹ tỹ ã nĩ,” hen kỹ ěg tóg ti mỹ ón ke tũ nĩ, vēnh vĩ há hã tó jé ěg tóg ke mũ,” he tóg mũ, Jesus ti, fi mỹ.

²⁵ Kỹ fi tóg ti mỹ: “hỹ,” he mũ. “Messias ěn vỹ kãtĩg ke mũ, ěg tỹ ù to: Cristo, he mũ ěn. ěn vỹ ěg mỹ kãmén kãn ke mũ, tag kar ti,” he fi tóg ti mỹ. ²⁶ Kỹ Jesus tóg fi mỹ: “inh hã vē,” he mũ. “Û tỹ ã mré vēmén jēn hã vē,” he tóg.

²⁷ Ti tỹ fi mỹ tag tó kỹ ti mré mũ tĩ ag tóg ti tá junjun mũ. Kỹ ag tóg ti tỹ fi mré vēmén vég mũ, kỹ tóg ag mỹ e tãvĩ tĩ. Hã ra ag tóg ti mỹ nén ù tó tũ nĩgtĩ. “À tỹ ne mẽ sór nẽ, fi ki?” he tũ ag tóg nĩgtĩ. “À tỹ ne tó nẽ, fi mỹ?” he tũ ag tóg nĩgtĩ gé.

²⁸ Hã ra fi tóg ã runja ré kỹ ti mũ, ã jamã ra. Kỹ fi tóg ã nĩgja tá ke ag mỹ: ²⁹ “mũ nỹ, ù ve jé,” he mũ. “Inh mỹ tóg sỹ nén han ja tó kãn. Ti mỹ tỹ Cristo tũ nĩ vỹ?” he fi tóg ag mỹ. ³⁰ Kỹ ag tóg fi mré kãmũ mũ sir, ti ve jé.

³¹ Fi tĩg kar kỹ ti mré mũ tĩ ag tóg Jesus mỹ “vějẽn ti ko ra,” he mũ. ³² Hã ra tóg ag mỹ: “ijẽn vỹ nĩ nĩ, hã ra tóg ãjag jẽn ri ke tũ nĩ,” he mũ. ³³ Kỹ ag tóg jagnẽ mỹ: “ũ nỹ ti mỹ vějẽn nĩm hỹn?” he mũ. ³⁴ Hã ra Jesus tóg: “ijẽn to ken hã vè, hã vỹ: tỹ isỹ Topẽ rãnrãj han kãn ke, he mũ, isỹ ù tỹ inh jẽnẽg mũ ẽn vĩ han ke, he mũ gé,” he tóg, Jesus ti. ³⁵ “Àjag mỹ ti kysã tỹ 4 (ke) nĩ ver, ẽg tỹ ẽg jakré kanẽ venh ke ti. Ha Sicar tá kãmũ mũ ag vigvé. Ûri ag tóg inh ke ge sór mũ, kỹ ag tóg inh mỹ ẽg jakré tóg nỹ ẽn ri ke nỹtĩ. ³⁶⁻³⁸ Fi mỹ sóg Topẽ vĩ tó, kỹ fi tóg ã mré ke ag mỹ tó. Hã ra sóg ãjag mỹ: “ha ag mỹ tó mãn, ag tỹ inh ki ge jé,” he mũ. Kỹ ãjag tóg ù jakré kym ri ke han mũ, ãjag tỹ Sicar tá ke ag tỹ inh ki ge mũ ven kỹ. “Û vỹ krãn tĩ, kar kỹ ù vỹ ti kanẽ mæg tĩ,” he ẽg tóg tĩ. Ki hã tó vè, tag, ẽg tỹ ẽprã ke ag tỹ inh ki genh ke to jykrén kỹ. Kỹ ù tỹ ag mỹ tó mãn mũ mỹ tóg sér tĩ, ti tỹ ag tỹ inh ki ge mũ ven kỹ. ã rãnrãj kaja vég tóg mũ sir. Hã ra ù tỹ ag mỹ tó vén ja ẽn mỹ tóg sér tĩ gé, ag tỹ inh ki ge mũ ti. ã rãnrãj kaja vég ti tĩ gé,” he tóg, Jesus ti, ã mré mũ tĩ ag mỹ.

³⁹ Hã ra ùn tỹtã ẽn fi tóg ã mré ke kar ag mỹ: “inh mỹ tóg sỹ nén han ja tó kãn,” he ja nĩ, Jesus to. Kỹ ag tóg Jesus ki ge mũ, fi vĩ to. ⁴⁰ Kỹ ag tóg Jesus tá junjun mũ sir. Kỹ ag tóg ti mỹ: “tĩg tũg nĩ. Ẽg mré nĩmnĩ,” he mũ. Kỹ tóg ag mré kurã régre tũg mũ. ⁴¹ Kỹ ù tỹ hẽn ri ke ag tóg ti ki ge mũ sir, ti vĩ to. ⁴² Ûn tỹtã ẽn fi mỹ ag tóg: “ã vĩ tugrĩn ẽg tóg ti ki ge mũ,” he mũ, “hã kỹ ẽg tóg ùri ti vĩ mæg mũ, kỹ ẽg tóg ti vĩ tugnĩn ti ki ge pẽ han kỹ nỹtĩ, ùri. Ti ki kanhró ẽg tóg nỹtĩ ha. Vẽn kar kren han tĩ ẽn vè mỹr,” he ag tóg mũ, ùn tỹtã ẽn fi mỹ. Hã kỹ Samaria tá ke tỹ hẽn ri ke ag vỹ Jesus ki ge kỹ nỹtĩ.

Jesus tỹ pã'i kósin tỹ há' he

⁴³ Jesus tỹ Samaria tá ke ag mré kurã régre tũg kar tóg ga tỹ Galiléia ra tĩ mũ sir. ⁴⁴ “Û tỹ Topẽ vĩ tó ti ẽn jamã tá ke ag ne tóg Topẽ vĩ tó tĩ ẽn to é he tĩ,” he ja tóg nĩ, Jesus ti, hã kỹ tóg kór há ra tĩ mũ, Galiléia ra. ⁴⁵ Hã ra ag tóg, ti tỹ tá jun kỹ (ag tóg) ti mỹ vĩ há han mũ. Ti ve ja ag tóg nĩ, Jerusalém tá, festa tỹ Páscoa ẽn tá, kỹ ag tóg ti tỹ tá nén hyn han ja ẽn ve kãn. Hã kỹ ag tóg ti mỹ vĩ há han mũ.

⁴⁶ Kỹ Jesus tóg ẽmã tỹ Caná ra tĩg mãn mũ, ga tỹ Galiléia tá ẽmã tỹ Caná ẽn ra. Tá tóg goj tỹ vinho han ja nĩgtĩ. Ẽn tá cidade tỹ Cafarnaum vỹ kakó nĩ.

Cafarnaum tá pã'i mág tóg nĩgtĩ. Ti kosin vỹ kaga nỹ nĩ. ⁴⁷ Kỹ tóg mæg mũ, Jesus tỹ Judéia tá kãtĩg ja ti, ti tỹ Galiléia tá jun ja ti, pã'i mág ẽn ti. Kỹ tóg ti venh kãtĩ mũ. “Inh mré inh kósin venh kãtĩg,” he tóg mũ, Jesus mỹ. “Kaga jagy tóg nỹ, kỹ tóg inh mỹ ti ter ha mẽ tĩ. ã mỹ ti tỹ há' henh ke tũ?” he tóg, pã'i mág ti Jesus mỹ. ⁴⁸ Hã ra Jesus tóg ti mỹ: “isỹ ẽg tỹ nén han vãnhan mũ ve sór ãjag tóg mũ, ãjag tỹ hẽn ri ke mũn inh ki ge jé,” he tóg, Jesus ti. ⁴⁹ Hã ra pã'i ẽn tóg Jesus ti mỹ: “vó,” he mũ. “Kuri inh mré tĩg, ti ter tũ nĩ jé,” he tóg. ⁵⁰ Kỹ Jesus tóg ti mỹ: “ha ã hã tĩg,” he mũ. “Há tóg nĩ ha, ã kósin ti,” he tóg. Kỹ tóg Jesus vỹ tag kri fi kỹ tĩ mũ sir, pã'i ẽn ti.

⁵¹ Ti tĩg kỹ tóg ã camarada ag kato tẽ mũ. Tỹ vaj kỹ ke vè. Ti ìn tá ag tóg kãmũ mũ, kỹ ag tóg ti mỹ: “ã kósin tóg há' hé huri,” he mũ sir. ⁵² Kỹ tóg ag mỹ: “ti rã tỹ hẽ kã sa ra há' hé?” he mũ. Kỹ ag tóg ti mỹ: “rãké tá, meio dia pãte ke sĩ,” he mũ. “Ẽn kã ti rỹg tóg tũ' he mũ,” he ag tóg ti mỹ. ⁵³ Hora ẽn kã Jesus tóg ti mỹ: “ã kósin vỹ há nĩ,” he ja nĩ. Kỹ tóg to jykrén há han mũ sir, pã'i ẽn ti, kỹ tóg Jesus ki rã mũ, ti prũ fi ke gé, ti krẽ kar ag ke gé, ti camarada kar ag ke gé. ⁵⁴ Jesus vỹ ga tỹ Judéia tá kãtĩg kỹ ga tỹ Galiléia ra tĩg ja nĩ. Ẽn kã tóg milagre ẽn han, kỹ tóg tỹ régre nỹtĩ, ti tỹ ẽg tỹ nén ù han vãnhan hyn han mũ ti.

5

Jesus tỹ ùn grĩn grĩn kỹ nỹ tỹ há' he

¹ Tag pãte Judeu ag tỹ festa há ù tóg kejẽn kutẽ mũ, kỹ Jesus vỹ Jerusalém ra tĩ mũ. ² Tá goj nig tóg nĩgtĩ, cidade jy ró jãnkã rã hã, jãnkã ẽn jijin hã vỹ: carneiro jo jãnkã, he mũ. Goj pẽnĩn tóg ãn tỹ 5 (ke) nỹtĩ, vẽn hã kaga jo ãn. Goj ẽn jyjy hã vỹ: Betesda, he mũ. ³ Ẽn tá vẽn hã kaga tỹ hẽn ri ke ag vỹ nỹtĩgtĩ, ùn kyvó ag, ùn tĩg vãn hã ag, ùn grĩn grĩn kỹ nỹtĩ ag ke gé. ⁴ Goj vãn vãn he mũ jãvãn hã kỹ ag tóg nỹtĩ. Kejẽn Topẽ tỹ jẽnẽ jafã vỹ goj ki rã kỹ tỹ vãn vãn he han mũ. Ẽn kã ù tỹ kãrãn vén mũ ẽn tóg há' he tĩ. Vẽn hã kaga kar tỹ há' he ti tĩ, goj vãnvor mũ ẽn, ù tỹ ki ge vén mũ ag kar tỹ.

⁵ Ẽn tá ù tóg nĩgtĩ, ùn kaga ù. Kaga nĩ ki tóg 38 (ke) anos han mũ. ⁶ Kỹ Jesus tóg tá jun kỹ ti vэг mũ, ti tỹ tá nỹn kỹ. Hã ra tóg ki kanhró nĩ, ti tỹ vãsỹ tá kaga nỹ ki. Kỹ tóg ti mỹ: “ã mỹ há' he sór tũ?” he mũ. ⁷ Hã ra tóg ti mỹ: “vó,” he mũ. “Hã ra tóg tũ tĩ, ù tỹ goj kãkã inh fэг ke ti,” he tóg, ùn kaga ti. “Goj tỹ vãn vãn he kỹ ag tóg inh jo kã ra ge tĩ, ijo tá jun kỹ,” he tóg, ùn kaga si ẽn ti.

⁸ Kỹ Jesus tóg ti mỹ: “jэг ra,” he mũ. “Ã cama va tĩg,” he tóg, Jesus ti, ùn kaga si ẽn mỹ. ⁹ Vēsỹmér tóg há' he mũ, kỹ tóg ã cama va tĩ mũ sir. Vẽn hã kã ke kurã ki ke vэг, Jesus tỹ ti han mũ ti.

¹⁰ Ti tỹ vẽn hã kã ke kurã ki ã cama va tĩg kỹ pã'i ag tóg ti mỹ: “vẽn hã kã ke kurã ki эг tóg nén ù va tĩg ke tũ nĩ vэг,” he mũ. “Ã tỹ nén han ke tũ han ã tóg mũ,” he ag tóg ti mỹ.

¹¹ Kỹ tóg ag mỹ: “ù tỹ isỹ há' he mũ ẽn vỹ inh mỹ: “ã cama va tĩg,” he ja nĩ, hã kỹ sóg va tĩ mũ,” he tóg. ¹² Kỹ ag tóg ti mỹ: “ù nỹ ã mỹ: “ã cama va tĩg,” hé?” he mũ. ¹³ Hã ra tóg ki kagtĩg nĩ, ù tỹ ti tỹ há' he mũ ẽn ti. Jesus vỹ ti tỹ há' he kar tĩg ja nĩ, vēsỹmér. E ag nỹtĩ, goj ẽn tá, vẽn hã kaga ag, hã kỹ Jesus tóg ag ré kỹ tĩg ja nĩ. Kỹ ùn kaga ja ẽn tóg ti jiji mẽ ja tũ nĩ.

¹⁴ Kar kỹ Jesus tóg ti ve mãn mũ, Topẽ jo ãn tá. Kỹ tóg ti mỹ: “ha vé,” he mũ. “Ã tỹ inh há' hé. Topẽ vĩ mranh mãn sór tũg nĩ, ã tỹ ti vĩ mranh mãn mũ ra ã tóg ã kaga kãfór venh ke mũ, ha vemnĩ,” he tóg ti mỹ, Jesus ti, ã tỹ ù tỹ há' he ja ẽn mỹ.

¹⁵ Hã ra tóg tĩ mũ, pã'i ag mỹ Jesus ti tó jé. ¹⁶ Kỹ ag tóg ti tén sór mũ sir, ti tỹ vẽn hã kã ke kurã ki ùn kaga ẽn tỹ há' hen kỹ. ¹⁷ Hã ra Jesus tóg pã'i ag mỹ: “inh panh vỹ rãnrãj kỹ nĩ nĩ, эг jóg mág ti,” he mũ. “Kỹ sóg ver ti kóm isũ han ke mũ gé,” he tóg, Jesus ti, pã'i ag mỹ. ¹⁸ Kỹ ag tóg ti to jũ jagy han mũ. “Ti tén jé эг tóg ke mũ,” he ag tóg mũ sir jagnẽ mỹ. Vẽn hã kã ke kurã ẽn ki tóg ã tỹ nén han ke tũ ẽn han ja nĩ, Jesus ti, Judeu ag jykre tovãn hã kỹ. Hã ra tóg Topẽ to: “inh panh vỹ tỹ ti nĩ,” he mũ gé. Ti tỹ vэгo: “Topẽ ri ke inh nĩ,” he vэг. Hã kỹ ag tóg ti to jũ mũ, pã'i ag.

Jesus tỹ ã tỹ tỹ Topẽ kósin nĩ kãmén

¹⁹ Kỹ Jesus tóg ag mỹ vẽn hã kãmén mũ. “Ki hã sóg tó mũ, ha mẽ,” he tóg. “Ẽg jóg mág kósin vỹ ã pir mỹ nén ù han ki kagtĩg nĩ. ã panh vэг ti tĩ, эг jóg mág kósin ti, kỹ tóg ã tỹ ã panh ki nén vэг mũ ẽn hã han tĩ. Ẽg jóg mág tỹ nén han mũ ẽn hã han tóg tĩ gé, ti kósin ti. ²⁰ Ẽg jóg mág vỹ ã kósin to há tãvĩ nĩgtĩ, hã kỹ tóg ti mỹ ã tỹ nén han mũ ẽn ven kãn mũ. Ti tỹ nén han mũ ù ve ãjag huri, hã ra ãjag tóg ti kãfór venh ke mũ ver, ha vemnĩ, kỹ tóg ãjag mỹ e tĩnh mũ. ²¹ Tag ve jé ãjag tóg ke mũ, ha mẽ. Ẽg jóg mág tóg ùn kãgter mũ ag rĩnrĩn mãn tĩ, ag rĩnrĩn nỹtĩ jé. Ẽn ri ke han jé tóg ke mũ gé, ti kósin ti. ã tỹ ùn rĩn mãn mũ ẽn rĩn mãn jé tóg ke mũ. ²² Kỹ эг jóg mág vỹ vẽn hã kã kãgter jykre tugnỹm ke mũ, hã ra tóg ã kósin mỹ tag tovãn hã. ²³ Ti mỹ tóg tag tovãn hã, vẽn hã kã tỹ ti to: “ùn mág vỹ tỹ ti nĩ,” he jé, ag tỹ эг jóg mág to: “ùn mág vỹ tỹ ti nĩ,” he mũ tag ri ke. ù tỹ ti kósin mỹ: “ùn mág vỹ tỹ ã nĩ,” he jãvãn hã kỹ tóg эг jóg mág mỹ tag tónh ke tũ nĩ gé. Ti hã vỹ ã kósin jẽnẽ ja nĩgtĩ. Inh hã vэг, ti kósin ti,” he tóg, Jesus ti.

²⁴ “Ãjag mỹ sóg tag tó mũ, ha mẽ. Ki hã sóg tó mũ, ha mẽ. ù tỹ inh vĩ jẽmэг mũ ẽn vỹ ter ke tũ nĩ, rĩr krỹg ja tũ ve jé tóg ke mũ, ti tỹ ù tỹ inh jẽnэг mũ ẽn ki rã kỹ jẽn kỹ. Ẽn to tóg jũnh ke tũ nĩ, Topẽ ti. Ti ter ke vэг vэг, hã ra tóg ter ke tũ nĩ. ²⁵ Ki hã sóg tó mũ, ha mẽ. Kãn hmar ùn kãgter kỹ nỹtĩ ag vỹ Topẽ kósin vĩ mẽnh ke mũ, kỹ ùn tỹ ti vĩ mẽg mũ ag

vỹ rĩnrĩr mǎn ke mũ. Kakó tǎvĩ ti nĩ ha, ag rĩnrĩr mǎn ke kurā ti. ²⁶ Inh panh vỹ ǎ pir mỹ vẽnħ kar rĩnrĩr han ki kanhró nĩ, hǎ ra tóg inh mỹ ǎ jykre tag nĩm gé, sỹ vẽnħ kar rĩnrĩr han mǎn jé gé, isỹ tỹ ti kósin nĩn kỹ. ²⁷ Kỹ tóg inh mỹ: “ẽprǎ ke kar jykre tugnỹm nĩ,” he ja nĩgtĩ, isỹ tỹ ẽprǎ ke fi kósin nĩn kỹ. ²⁸ Tag hỹn tóg ǎjag mỹ e tĩ, sỹ ǎjag mỹ: “vẽnħ kar rĩnrĩr han jé sóg ke mũ,” hen kỹ. Sỹ ke há vễ, hǎ ra. Kejẽn ùn kǎgter mũ kar ag vỹ inh vĩ mẽnħ ke mũ, kỹ ag tóg ǎjag kej tá kǎpa kǎn ke mũ. ²⁹ Kỹ ùn tỹ vẽnħ jykre há han mũ ag vỹ rĩnrĩr mǎn kỹ rĩr krỹg ja tũ ẽn venh ke mũ, jǎvo ùn tỹ vẽnħ jykre pǎno han mũ ag rĩnrĩr mǎn sĩ han kỹ nũgme ki vǎr kǎn ke mũ,” he tóg, Jesus ti.

Jesus tỹ vẽnħ kǎmén mũ

³⁰ Kỹ tóg ag mỹ: “inh pi(jé) isỹ vėsóg ki nén to jykrén mũ ẽn han tĩ’,” he mũ, Jesus ti. “Inh panh tỹ inh mỹ nén tó mũ ẽn hǎ tó sóg tĩ, isỹ vẽnħ kar jykre tugnỹm ken kỹ. Hǎ kỹ sóg ki hǎ tó tĩ, isỹ vėsóg ki to jykrén tũ nĩn kỹ. Û tỹ inh jẽnẽg mũ ẽn tỹ inh mỹ nén tó mũ ẽn hǎ tó sóg tĩ, hǎ kỹ tóg há kar nĩ,” he tóg.

³¹ “Kỹ isỹ vėjo: “ẽg jóg mág vỹ inh jẽnẽ, inh panh ti,” henh mũ ra ǎjag tóg inh mỹ: “ǎ ón nẽ,” henh ke mũ vễ. ³² Û vỹ iso: “Topẽ vỹ ti jẽnẽ,” he mũ. Hǎ ra tóg ki hǎ tó mũ, ù tỹ iso tag tó mũ ti. ³³ Kỹ ǎjag tóg João ki jẽmẽ sór ja nĩ gé, hǎ kỹ ǎjag tóg ti mỹ vẽnħ vĩ jẽnẽ ja nĩgtĩ. Kỹ tóg ǎjag mỹ inh kǎmén há han ja nĩgtĩ gé. ³⁴ Hǎ ra tóg inh mỹ tỹ nén ù tũ nĩ, ẽprǎ ke tỹ iso: “Topẽ vỹ ti jẽnẽ,” hen kỹ. Hǎ ra sóg ǎjag mỹ João vĩ tó mũ, ǎjag tỹ ti vĩ kri fi jé, ǎjag tỹ inh ki ge jé, ǎjag krenkren jé,” he tóg, Jesus ti.

³⁵ “João vỹ ǎjag mỹ lampiǎo gru ri ke ja nĩ, ǎjag mỹ kurā sĩ han kỹ, ti tỹ ǎjag mỹ Topẽ vĩ kǎmén ja nĩn kỹ. Kỹ tóg ǎjag mỹ sér tĩ ja nĩ, hǎ ra tóg kurā e han tũ nĩ. ³⁶ João vỹ ǎjag mỹ inh kǎmén ja nĩ, hǎ ra nén ù vỹ inh kǎmén tĩ gé, kỹ tóg João vĩ kǎfór nĩ. Inh panh vỹ inh mỹ: “ẽprǎ ke ag tỹ nén han vǎnh hyn han nĩ, milagre ti,” he ja nĩ, hǎ kỹ sóg hyn han tĩ. Isỹ milagre hyn han mũ tag vỹ inh kǎmén há han tĩ gé. ǎjag tỹ milagre tag vigven kỹ ǎjag tóg ki kanhrǎn ke mũ vễ, ẽg jóg mág tỹ inh jẽnẽ jan ki, inh panh ti. ³⁷ Kar kỹ ẽg jóg mág vỹ, ù tỹ inh jẽnẽg mũ ẽn vỹ inh kǎmén tĩ gé. Ti vĩ jẽmẽg tũ ǎjag nỹtĩ, kỹ ǎjag tóg ti vég tũ nĩ gé. ³⁸ Kỹ ǎjag tóg ti vĩ to jykrén há han tũ nĩ gé, ǎjag tỹ inh ki ge sór tũ nỹtĩn kỹ. Ti hǎ vỹ inh jẽnẽ. ³⁹ Topẽ vĩ to ke ǎjag tóg tĩ. Há ti nĩ, tag ti. “Èg tỹ Topẽ vĩ rá to ken kỹ ẽg hỹn rĩr krỹg ja tũ venh ke mũ,” he ǎjag tóg tĩ. Inh hǎ vỹ ki rán kỹ nĩ, ha mẽ, hǎ kỹ ki ve há han nĩ, vẽnħ rán ki,” he tóg. ⁴⁰ “Hǎ ra ǎjag tóg inh ki ge sór tũ nĩ. ǎjag tỹ inh ki ge kỹ nỹtĩ ra ǎjag rĩnrĩr kỹ nỹtĩnh mũ vễ,” he tóg, Jesus ti.

⁴¹ “Èprǎ ke ag tỹ inh mỹ vĩ há han tũ ra tóg inh mỹ tỹ nén ù tũ nĩ. ⁴² Hǎ ra sóg ǎjag jykre ki kanhró nĩ. ǎjag pi(jé) Topẽ to há nỹtĩ’. ⁴³ ǎjag mỹ sóg: “ẽg jóg mág vỹ inh jẽnẽ,” henh kǎtig ja nĩ, hǎ ra ǎjag tóg inh vĩ mẽ sór tũ nỹtĩ. Û tóg kejẽn ǎjag mré vẽnħ kǎtig ke mũ, Topẽ tỹ ti jẽnẽg tũ (hǎ) ra. Ẽn vĩ jẽmẽ jé ǎjag ke mũ, ha vemnĩ. ⁴⁴ Inh ki ge sór tũ ǎjag nỹtĩ, ǎjag tỹ ẽprǎ ke ag vĩ jẽmẽn kỹ. Èprǎ ke ag tỹ ǎjag mỹ vĩ há han kỹ tóg ǎjag mỹ sér tĩ. Kỹ ǎjag tóg Topẽ tỹ ǎjag mỹ nén tónh ke mũ mĩ ẽkrég tũ nĩgtĩ. “Inh jykre mỹ ti mỹ há nĩ vỹ?” he sór tũ ǎjag nĩ. ⁴⁵ ǎjag hỹn iso: “ti hỹn ẽg to vĩ kónǎn sór mũ, ẽg jóg mág mỹ,” he tĩ. Hǎ tũ vễ. Û tỹ ǎjag to vĩ kónǎn ke mũ hǎ vỹ tỹ Moisés nĩ, ǎjag tỹ ù to: “ti hỹn ẽg to há tǎvĩ nĩ,” he mũ ẽn ti. ⁴⁶ ǎjag tỹ Moisés vĩ kri fi (hǎ) ra ǎjag tóg inh vĩ kri nĩm ke mũ gé vễ vễ. Moisés vỹ iso livro han ja nĩ, ha mẽ. ⁴⁷ Hǎ ra ǎjag tóg ti vĩ rá kri fi sór tũ nĩ, hǎ kỹ ǎjag tóg inh vĩ kri nĩm sór tũ nĩ gé,” he tóg, Jesus ti. Ti tỹ pǎ’i ag mỹ vẽnħ kǎmén hǎ vễ.

6

Jesus tỹ ùn e jẽn

(Mt 14.13-21; Mc 6.30-44; Lc 9.10-17)

¹ Tag pǎte Jesus tóg kejẽn ga tỹ Galiléia tá goj nig fin rǎm mũ. Goj ẽn jiji hǎ vỹ: Tiberiádes, he mũ. ² Kỹ ù tỹ hẽn ri ke ag vỹ ti venh kǎmũ mũ, ti nón, ùn e tǎvĩ ag. Ti tỹ nén han vǎnh hyn han mũ ẽn ve ja ag tóg nĩ, ti tỹ ùn kagyga ag tỹ há’ he mũ ti. ³ Kỹ Jesus tóg pǎnónh tá ǎ mré mũ tĩ ag mré nĩ nĩ. ⁴ Festa tỹ Páscoa ẽn vỹ kakó nĩ ha, Judeu

ag tỹ festa han tĩ ên ti. ⁵ Kĩ Jesus vỹ ùn e ên ki êvãnh mũ, ù tỹ ti vĩ mẽnh kãmũ mũ ag ki. Kĩ tóg Filipe mỹ: “êg hỹn hẽ tá vễjẽn venh ke mũ, êg tỹ ùn e tag ag mỹ ven jé?” he mũ, Jesus ti. ⁶ Filipe mỹ tóg ke mũ, ti tỹ to ti jykre ve jé. Jãvo Jesus vỹ to jykrén há han huri, ti tỹ nén han ke mũ ên to.

⁷ Kĩ Filipe tóg ti mỹ: “êg tỹ ùn e tag ag mỹ nén ù sĩ ven jé êg hỹn jãnkamy tỹ hẽn ri ke to comprar henh ke mũ, hã ran kãkyn kenh ke mũ, ha vemni,” he tóg, Filipe ti.

⁸ Kĩ ag mré tĩ ù tóg, André he mũ ên tóg, Simão Pedro jãvy ên tóg Jesus mỹ: ⁹ “kyrũ ù tóg cevada tỹ êmĩ tỹ 5 (ke) ma kãtĩg ja nĩ, kãkufár régre mré,” he mũ. “Hã ra tóg tỹ nén ù tũ pẽ nĩ, vễjẽn sĩ tag. E tãvĩ ag nỹtĩ,” he tóg mũ, André ti.

¹⁰ Hã ra Jesus tóg: “ag mỹ: “nĩgnĩ ra,” hé,” he mũ. Kĩ ag tóg nĩgnĩ mũ. Tá tóg re gỹnh nĩ, hã kĩ ag tóg tá nĩgnĩ kĩ nỹtĩ. ùn tỹ 5 mil (ke) ag hỹn tá nỹtĩ, êg tỹ ag tãvĩ tón kĩ, hã ra fag tóg tá nỹtĩ gé, gĩr tỹ hẽn ri ke ke gé. ¹¹ Ag nĩgnĩ kĩ Jesus tóg êmĩ ên mãg mũ, kĩ tóg Topẽ mỹ: “há ti nĩ,” he mũ. Kĩ tóg ag mỹ vễnh kãpópãm mũ sir, kãkufár ên ke gé. Kĩ vễnh kar vỹ ag tỹ nén ko sór mũ ên ko mũ sir. Sĩ tũ tóg nĩ, vễjẽn ti. ¹² Ag funfór nỹtĩn kĩ Jesus tóg ã mré mũ tĩ ag mỹ: “ag tỹ ko ja tũ ên génh mũjêg, ti vãgfor tũ nĩ jé,” he mũ. ¹³ Kĩ ag tóg kěj tỹ 12 (ke) fãn mũ, cevada tỹ êmĩ tỹ 5 (ke) ên ke tỹ, vễnh e ên tỹ ko kar kĩ.

¹⁴ Kĩ tóg ag mỹ e tĩ, ag tỹ Jesus tỹ milagre tag han mũ ven kĩ. Kĩ ag tóg ti to: “Topẽ vĩ tó tĩ ên hã vễ,” he mũ. “Êg tỹ ùn jãvãnh mũ ên hỹn tóg,” he ag tóg, Jesus to. ¹⁵ Hã ra Jesus vỹ ki kanhró nĩ, ag tỹ nén han sór mũ ti. Ag tỹ Jesus tỹ pã'i mág tỹ rei han sór vễ. Tag ki kanhró tóg nĩ, Jesus ti. Hã kĩ tóg ã pir mỹ tĩ mũ, pãnónh ra, vễnh pēju jé.

Jesus tỹ goj nig kri tĩ (Mt 1422-33; Mc 645-52)

¹⁶ Kutyg ke mũ ra ti mré mũ tĩ ag tóg goj nig ra mũ mũ. ¹⁷ Barco kãra ge kĩ ag tóg goj fĩn rãm sór kĩ Cafarnaum ra mũ sór mũ. Kejẽn tóg kuty pẽ nỹ ha, hã ra Jesus tóg ag to vỹn ke ja tũ nĩ ver. ¹⁸ Kĩ vãhã kóho jũ vỹ kãtĩ mũ, kĩ goj vỹ krém ke mũ. ¹⁹ Mũ sĩ han ja ag nĩ, 5 (ke) quilômetros, hỹn, ke tũ nĩ kĩ 6 (ke) quilômetros, goj kri. Vãhã ag tóg Jesus vég mũ sir, ti tỹ goj kri tĩg kĩ. Ag barco ki tóg jun mũ. Kĩ ag kanẽ tóg jürũn ke mũ. ²⁰ Hã ra Jesus tóg ag mỹ: “inh hã vễ, mũmêg tũg nĩ,” he mũ. ²¹ Kĩ tóg ag mỹ sér tĩ, kĩ tóg barco kãra rã mũ sir, ag mré. Ti tỹ ag mré nĩn kĩ ag tóg kãnhmar junjun mũ, kafã ù tá.

Vễnh kar tỹ Jesus ve sór

²² Hã ra vễnh e ên vỹ kafã ù tá nỹtĩ ver. Tỹ vaj kĩ ag tóg Jesus jãvãnh mũ, tá. Ti jãvãnh kĩ ag tóg: “barco pir vỹ kã nỹ ja nĩ, kuty kĩ,” he mũ. “Kỹ ti mré mũ tĩ ag vỹ barco ên kãra ge kĩ mũ ja nĩ, hã ra tóg ag mré tĩg ja tũ nĩ,” he ag tóg mũ sir jagnẽ mỹ, ùn e ên ag. Tag tó mũ ra ag tóg Jesus vég tũ nĩ gé. ²³ Kĩ barco ù tóg ki junjun mũ, cidade tỹ Tiberiades tá kãmũ ù. Vễnh e ên tá ag tóg junjun mũ. Tá Jesus vỹ êmĩ to Topẽ mré vĩ ja nĩ, kar kĩ tóg vễnh e ên mỹ vễnh kãpópãm ja nĩ. ²⁴ Barco tỹ tá junjun mũ ra ag tóg kãra ge kĩ mũ mũ sir, Cafarnaum ra, ti ve jé. “Ki ti tũ nĩ, ti mré mũ tĩ ag vỹ ki tũgtũ nĩ gé. Mũ nỹ, ti nón,” he ag tóg mũ sir, ùn e ag, hã kĩ ag tóg ti nón mũ mũ.

Kanhkã tá pão

²⁵ Ag tỹ Cafarnaum tá junjun kĩ ag tóg tá ti vég mũ sir, goj nig kafã ù tá, ùn e ên ag. Kĩ ag tóg ti mỹ: “hẽ ri ken kĩ ã ki jun?” he mũ.

²⁶ Kĩ Jesus tóg ag mỹ: “ha mẽ, ki hã sóg tó mũ,” he mũ. “Ajag tỹ êmĩ ko ja tugrĩn ajag tóg inh ve sór mũ,” he tóg. “Sỹ milagre hyn han tĩ ên vég ajag tóg tĩ, hã ra ajag tóg to jykrén há han tũ nĩgtĩ,” he tóg. “Ajag tógá nỹtĩ tag hã ve sór ajag tóg mũ. ²⁷ Êg tỹ tag ki vễjẽn vég mũ ên vỹ kãnhmar tũ' henh ke mũ, kĩ tag tãvĩ to vãsãn sór tũg nĩ. Vễjẽn ù jé vãsãn nĩ, êmĩ tỹ ajag rĩnrĩr pẽ han mũ ên jé, êmĩ kórég vãnh ên jé. Sỹ ajag mỹ êmĩ ên nĩm sór vễ. Êg jóg tỹ Topẽ tỹ inh mỹ vễnh rãnhraj nĩm ja hã vễ. Ti tỹ inh mỹ tag tó hã kĩ sóg ajag mỹ nĩm sór mũ, êmĩ ti. Tỹ sóg ãprã ke fi kósin nĩ mỹr,” he tóg ag mỹ, Jesus ti.

²⁸ Kĩ ag tóg ti mỹ: “kỹ êg hỹn hẽ ri kenh ke mũ, êg tỹ Topẽ jykre han jé?” he mũ. ²⁹ Kĩ Jesus tóg ag mỹ: “Topẽ tỹ ùn jẽnêg mũ ên ki gemnĩ,” he mũ. ³⁰ Kĩ ag tóg ti mỹ: “kỹ ã hỹn ne han ke mũ, êg tỹ ve kĩ ã ki gen jé?” he mũ. “ã hỹn ne han há nĩgtĩ? ³¹ Êg jóg'jóg ve ag

vỹ kanhkā tá pāo ěn kó, maná he mũ ěn, ag tỹ ga kórég ěn mũ mũn kỹ. Ag to tag vỹ rán kỹ nĩ, ha mẽ: “kanhkā tá tóg ag mỹ pāo jĕnĕ, ag tỹ ko jé,” he ja tóg nĩ, Topĕ vỹ tỹ rán kỹ nĩ ki. Jāvo ā hỹn ěg mỹ ne han ke mũ?” he ag tóg, Jesus mỹ, ti vỹ káfān kỹ.

³² Kỹ Jesus tóg ag mỹ: “Moisés pi(jé) ājag mỹ kanhkā tá pāo pĕ nĩm ja nĩ,” he mũ. “Ki hā sóg tó mũ, ha mẽ,” he tóg. “Ũ tỹ ājag mỹ kanhkā tá pāo pĕ nĩm mũ ěn vỹ tỹ inh panh nĩ. ³³ Topĕ jamĩ vỹ kanhkā tá kátĕre mũ. ěn vỹ ěprā ke kar rĩnrĩr han mũ,” he tóg, Jesus ti.

³⁴ Kỹ ag tóg ti mỹ: “ěg mỹ ěmĩ ěn nĩm, kurā kar ki,” he mũ. ³⁵ Kỹ Jesus tóg ag mỹ vĕnh kāmĕn mũ sir. “Inh hā vỹ tỹ ěmĩ ěn ri ke nĩ, inh hā vỹ ājag rĩnrĩr han ke mũ,” he tóg. “Ěg tỹ vĕjĕn ko mũ ra ěg tóg kānhmar kókĩr mǎn' he tĩ, goj kron mǎn sór ěg tĩ gé. Ũ tỹ iso kātĩg mũ ěn mỹ tóg hā ra sér tĩnh mũ, ti tỹ inh ki rǎ kỹ. Ti mỹ sér tĩ ěn vỹ tũg' henh ke tũ pĕ nĩ. Isỹ ti mỹ vĕnh jykre nĩm ke mũ ěn vỹ vĕjĕn káfór nĩ,” he tóg, Jesus ti.

³⁶ “Hā ra ājag tóg ājag tỹ inh vĕg mũ ra inh ki ge sór tũ nĩ. ³⁷ Inh panh vỹ ũ ag kuprĕg mũ, ag tỹ tỹ isũ nỹtĩ jé. ěn ag vỹ iso kāmũ tĩ. Ũ tỹ iso kāmũ tĩ kar ag vỹ inh mỹ há nỹtĩ. Inh pi(jé) ũ mỹ: “inh mré kātĩ tũg,” henh ke mũ'. ³⁸ Kanhkā tá sóg kátĕre ja nĩ. Inh pi(jé) isỹ vĕsóg ki nĕn to jykrĕn mũ ěn han sór mũ'. Ũ tỹ inh jĕnĕg mũ tỹ inh mỹ nĕn tó mũ ěn hā han sóg tĩ, hā jé sóg tá kátĕre ja nĩ. ³⁹ Ti tỹ inh mỹ nĕn tó mũn hā vĕ, ha mẽ. “Isỹ ā mỹ ũn jĕnĕnh ke mũ ěn ki rĩr há han nĩ, ag vǎgfor tũ nĩ jé,” he ja tóg nĩ, inh mỹ, inh panh ti. Hā kỹ sóg ke mũ. Kỹ sóg ag rĩnrĩr mǎn ke mũ, kurā tỹ ěgno ki. ⁴⁰ Hỹ, tag vỹ inh panh mỹ há nĩ. Ũ tỹ ti kósin to kāmũ mũ ěn mỹ tóg rĩr krỹg ja tũ ven ke mũ, inh panh ti, ũ tỹ inh ki ge kỹ nỹtĩ ag kar mỹ. Kỹ sóg kurā tỹ ěgno ki ag rĩnrĩr mǎn kǎn ke mũ, ha vemnĩ,” he tóg, Jesus ti. Ti tỹ Judeu ag mỹ vĕnh kāmĕn hā vĕ.

Ěg tỹ Jesus nĩ konh ke

⁴¹ Kỹ Judeu ag tóg Jesus kato vỹ mũ, ti vỹ to, ti tỹ ag mỹ: “ěmĩ tỹ kanhkā tá kátĕre mũ ěn ri ke inh nĩ,” hen kỹ. ⁴² “Ti ki kanhró ěg nỹtĩ,” he ag tóg mũ. “José kósin vĕ, Jesus tag ti. Ti han mũ fag ki kanhró ěg nỹtĩ. Hā ra tóg vĕso: “kanhkā tá sóg kátĕre,” he sór mũ’,” he ag tóg mũ, Jesus to.

⁴³ Hā ra tóg ag mỹ: “iso vỹ kónǎn tũg nĩ, jagnĕ mỹ,” he mũ. ⁴⁴ “Inh panh tỹ ũn krĩn mũ ag hā vỹ iso kāmũnh mũ. Ũ tỹ iso kāmũ mũ ag rĩnrĩr mǎn jé sóg ke mũ, kurā tỹ ěgno ki. ⁴⁵ Topĕ vỹ tó tĩ ũ vỹ tag rán ja nĩ, ha mẽ: “Topĕ vỹ vĕnh kar kanhrǎn ke mũ,” he ja ti nĩ. Hā kỹ ũ tỹ inh panh vỹ mĕg mũ ag hā tóg iso kāmũnh ke mũ, inh panh tỹ ũn kanhrǎn mũ ag. ⁴⁶ Ěprā ke ũ pi(jé) inh panh ve ja nĩ'. Ũ tỹ Topĕ tá kātĩ mũ ěn hā vỹ ti ve ja nĩ, inh,” he tóg, Jesus ti.

⁴⁷ “Sỹ ājag mỹ ki hā tó mũn hā vĕ. Ũ tỹ inh ki rǎ mũ ěn vỹ rĩr krỹg ja tũ ěn venh ke mũ. ⁴⁸ Inh hā vỹ ěmĩ pĕ ri ke nĩ, inh hā vỹ ājag rĩnrĩr han ke mũ. ⁴⁹ Ājag jóg'jóg ve ag vỹ, ag tỹ ga kórég mũ mũn kỹ ag tóg kanhkā tá ěmĩ ěn ko ja nĩgtĩ, maná he mũ ěn, ag tỹ ko mũ (hā) ra ag tóg kǎgter kǎn. ⁵⁰ Ũ tỹ ěmĩ tỹ ěg rĩnrĩr han mũ ěn ko kỹ, ũ tỹ kanhkā tá kátĕre ja ěn ki rǎ kỹ tóg ter ke tũ pĕ nĩ. ⁵¹ ěmĩ ěn hā vỹ tỹ inh nĩ, inh hā vỹ kanhkā tá kátĕre, inh hā vỹ ājag rĩnrĩr han ke mũ. Ājag tỹ ěmĩ tag ko kỹ ājag ter ke tũ pĕ nĩ. Isỹ vĕnh kar mỹ vĕjĕn nĩm ke hā vĕ, hā vỹ: inh nĩ, he mũ. Ājag tỹ inh nĩ kon kỹ ājag rĩnrĩr nỹtĩnh mũ,” he tóg, Jesus ti.

⁵² Kỹ Judeu ag vỹ jagnĕ mỹ: “ti mỹ ěg mỹ ā nĩ nĩm ke mũ, ěg tỹ ti nĩ ko jé?” he mũ. “Vĕnhmỹ ti nĩ, tag,” he ag tóg mũ.

⁵³ Kỹ Jesus tóg ag mỹ: “isỹ ājag mỹ ke há vĕ,” he mũ. “Ājag tỹ inh nĩ ko sór tũ nĩn kỹ, ājag tỹ inh kyvĕnh kron sór tũ nĩn kỹ, ājag rĩnrĩr ke tũ pĕ nĩ. Tỹ sóg ěprā ke fi kósin nĩ,” he tóg, Jesus ti. ⁵⁴ “Ũ tỹ inh nĩ ko kỹ, ũ tỹ inh kyvĕnh kron kỹ tóg rĩr krỹg ja tũ venh ke mũ, kỹ sóg ti rĩn mǎn ke mũ, kurā tỹ ěgno ki. ⁵⁵ Inh nĩ vỹ tỹ vĕjĕn pĕ nĩ, inh kyvĕnh vỹ tỹ ěg tỹ kron jafā pĕ nĩ gé. ⁵⁶ Ũ tỹ inh nĩ kon kỹ, ti tỹ inh kyvĕnh kron kỹ tóg inh ki rǎ kỹ jĕ nĩ, kỹ sóg ti kǎki nĩ gé. Jagnĕ mré ke vỹ tỹ ěg nỹtĩ. ⁵⁷ Inh panh vỹ rĩr nĩ. Ti hā vỹ inh jĕnĕ, ti tugrĩn sóg rĩr jĕ. Kỹ ũ tỹ inh ki rǎ mũ ěn vỹ isugnĩn rĩr ke mũ gé. ⁵⁸ ěmĩ tỹ kanhkā tá kátĕre jan hā vĕ. Ājag jóg'jóg ve ag tỹ ěmĩ ko ja ěn ri ke tũ ti nĩ. Ag hā vỹ ājag tỹ ko mũ

ra kãgter kãn ja nĩgtĩ. Û tỹ ěmĩ pẽ tag ko kỹ tóg ter mãn ke tũ nĩ. Inh ki rã to ken hã vễ,” he tóg, Jesus ti.

⁵⁹ Cafarnaum tá tóg ag kanhrãn mũ, kỹ tóg ag mỹ vễnh kãmén kãn mũ, Jesus ti, ag tỹ vễnh kanhrãn jafã ěn krêm.

Û tỹ ón kỹ Jesus mré mũ tĩ ag tỹ ti tovãnh

⁶⁰ Kỹ tóg ti mré mũ tĩ ù ag mỹ e tĩ, ti vĩ ti. Kỹ ag tóg: “ti vĩ vĩ ěg mỹ mẽ jagy tĩ,” he mũ. “Mẽ jãvãnh ěg tóg nỹtĩ, ti tỹ ùri ěg mỹ nén tó mũ tag ti,” he ag tóg mũ.

⁶¹ Hã ra Jesus tóg ki kanhró nĩ, ag tỹ ti vĩ tag to vĩ kónãn mũ ti. Hã kỹ tóg ag mỹ: “tag mỹ ajag mỹ há tũ nĩ?” he mũ. ⁶² “Kỹ ajag hỹn hẽ ri kenh ke mũ, ajag tỹ hẽn ri ke mũn isỹ kanhkã ra tĩg mãn ven kỹ, isỹ hẽ tá kátère ja ěn ra tĩg mãn kỹ, isỹ tỹ ěprã ke fi kósín nĩn kỹ?” he tóg. ⁶³ “Û tỹ ěg rĩnrĩr han mũ vĩ tỹ Topẽ kuprĩg ti nĩ. Isỹ ajag mỹ inh nĩ ko mũ tag to ken hã vễ, hã vĩ: inh ki rã, he mũ. Inh vĩ tag ki króm tugrĩn ajag rĩnrĩr nỹtĩnh ke mũ. ⁶⁴ Hã ra ajag tóg inh vĩ kri fi sór tũ nỹtĩ,” he tóg, Jesus ti. Ag jykre ki kanhró tóg nĩ, vėsóg ki, Jesus ti, hã kỹ tóg ke mũ. Û tỹ ón kỹ ã ki ge mũ ěn ki kanhró tóg nĩ. Kỹ tóg ù tỹ pã'i ag mỹ ti tónh ke mũ ěn ki kanhró nĩ gé. ⁶⁵ Kỹ tóg ag mỹ: “hã kỹ sóg ajag mỹ: “inh panh tỹ ùn krĩn mũ ag hã vĩ iso kãmũnh ke mũ,” he ja nĩ,” he mũ, Jesus ti.

⁶⁶ Jesus vĩ tag tugrĩn ti mré mũ tĩ ù ag tóg ti tovãnh mũ sir, ti mré ag mũ mãn tũ nĩ. ⁶⁷ Kỹ Jesus tóg ù tỹ 12 (ke) ag mỹ: “ajag hỹn isovãnh sór mũ gé,” he mũ.

⁶⁸ Kỹ Simão Pedro tóg ti mỹ: “ěg tỹ ã tovãnh mũ ra ěg hỹn ù mré mũnh ke mũ?” he mũ. “Á hã vĩ ěg mỹ Topẽ vĩ tó tĩ, kỹ ěg tóg rĩr krỹg ja tũ vễnh ke mũ, ěg tỹ ã vĩ kri fi kỹ. ⁶⁹ Á ki ěg ge kỹ nỹtĩ, kỹ ěg tóg ã ki kanhró nỹtĩ. Cristo vĩ tỹ ã nĩ, Topẽ vĩ ěg mỹ ã jẽnẽ,” he tóg, Pedro ti, Jesus mỹ.

⁷⁰ Kỹ Jesus tóg ù tỹ 12 (ke) ag mỹ: “ajag kuprẽg inh,” he mũ, “hã kỹ ajag tóg tỹ ù tỹ 12 (ke) nỹtĩ,” he tóg. “Hã ra ajag kãmĩ ùn pir vĩ tỹ Japo tũ nĩ jãvo,” he tóg, Jesus ti. ⁷¹ Ti tỹ Judas ěn tó vễ, Simão Iscariotes kósín ěn. ěn vĩ kejẽn Jesus tovãnh kỹ pã'i ag mỹ ti ven, ag tỹ ti se jé. Û tỹ 12 (ke) ag kã ù ja vễ, Judas ti. Hã ra Jesus tóg ti tỹ nén han ke mũ ěn ki kanhró ja nĩ.

7

¹ Tag pãte Jesus tóg ga tỹ Galiléia mĩ tĩ mũ. Ga tỹ Judéia ra tĩg sór tũ ti nĩ ver, ag tỹ Judéia tá ti tén sór nỹtĩn kỹ, Judeu ag pã'i ag. ² Kejẽn tóg Judeu ag tỹ festa há ù tá krỹg mũ. Festa ěn kurã ki ag tóg pãjó krêm nỹtĩ, Jerusalém tá. ³ Kỹ Jesus jãvy ag tóg ti mỹ: “ga tỹ Judéia ra tĩg nĩ, Jerusalém ra,” he mũ. “Á tỹ tag hã ki milagre hyn han kỹ tá ã mré ke ag tóg vég tũ nĩgtĩ, hã kỹ cidade mág ra tĩg nĩ. ⁴ Vễnh kar tỹ ěg jykre ve jé ěg tóg vễnh kar rĩnve ěg tỹ nén han ke mũ ěn han tĩ. Hã ra ã tóg ag vatãnh tá milagre ti hyn han tĩ. Ag rĩnve han nĩ, ã tỹ nén han ke ti,” he ag tóg mũ, Jesus mỹ, ti jãvy ag. ⁵ Ag pi(jé) ti ki ge kỹ nỹtĩ', ti jãvy ag, hã kỹ ag tóg ti to é he mũ.

⁶ Hã ra Jesus tóg ag mỹ: “inh kurã vĩ jun ja tũ nĩ ver, hã kỹ sóg tĩg sór tũ nĩ ver,” he mũ. “Ajag hỹn kurã tũ nỹtĩ, kurã kar hỹn ajag mỹ há nỹtĩ, hã ra sóg kurã nĩ. ⁷ Û tỹ iso jũ mũ ag pi(jé) ajag to kórég nỹtĩ', hã ra ag tóg iso kórég nỹtĩ, isỹ ag mỹ: “ajag jykre vĩ kórég pẽ nĩ,” hen kỹ. ⁸ Ha festa venh mũjẽg inhhã. Inh pi(jé) tĩg sór mũ', ver'. Inh kurã vĩ jun ja tũ nĩ ver,” he tóg, Jesus ti, ã jãvy ag mỹ. ⁹ Tag tó kar kỹ tóg ver ga tỹ Galiléia mĩ tĩ mũ.

Jesus tỹ festa venh tĩ

¹⁰ Ti jãvy ag mũ kar kỹ kejẽn Jesus tóg tĩ mũ gé, Jerusalém ra, festa ěn ve jé. Hã ra tóg vễnh kar vatãnh tá tĩ mũ, vễnh péju kỹ. ¹¹ Kỹ Judeu ag tóg festa ki ti jãvãnh mũ. Jagnẽ mỹ ag tóg: “ti hẽ kã nĩ?” he mũ. ¹² Vễnh kar vĩ ti to vĩ mũ. Û ag tóg ti to: “ùn há vĩ tỹ ti nĩ,” he mũ. Jãvo ù ag tóg: “vó, ěg mỹ tóg ón tĩ,” he mũ gé. ¹³ Hã ra ag tóg jamã hár(a) ti to vẻmén tũ nĩgtĩ, pã'i ag kamẽg kỹ.

¹⁴ Festa kuju ki Jesus kejẽn Topẽ jo ĩn ra tĩ mũ, ag kanhrãn jé. ¹⁵ Kỹ ti vĩ tóg vễnh kar mỹ e tĩ. “Estudo mág han ja tũ ti nĩ, hã ra tóg ki kanhró pẽ nĩ,” he ag tóg mũ ti to, pã'i ag.

¹⁶ Kÿ Jesus tóg ag mÿ: “isÿ ãjag mÿ Topê vÿ tó vê,” he mÿ. “Inh jykre pijé'. Û tÿ inh jênêg mÿ ên jykre hã vê,” he tóg. ¹⁷ “Û tÿ Topê vÿ ki króm sór mÿ ag vÿ ki kanhró nÿtÿnh mÿ, sÿ ãjag mÿ ti jykre tó mÿ tag ti ki. Isÿ vêsóg ki sÿ nén tónh ke to jykrén mÿ pijé',” he tóg. ¹⁸ “Û tÿ ã tÿ vêsóg ki nén to jykrén mÿ ên tó kÿ tóg tÿ ùn mág nÿ sór mÿ. Hã ra sóg ù tÿ inh jênêg mÿ ên to: “ùn mág vÿ tÿ ti nÿ,” he mÿ. Hã kÿ ãjag tóg ki kanhró nÿtÿ, isÿ ki hã tó mÿn ki. Inh pi(jé) vênh jykre vênhmÿ tó tÿ'. ¹⁹ Moisés vÿ ãjag jyvên ja nÿgtÿ. Topê jykre to. ãjag tÿ ne jé ti vÿ han tÿ nÿ nê? Isÿ ti vÿ ki króm mÿ ra ãjag tóg isén sór mÿ',” he tóg, Jesus ti.

²⁰ Kÿ ùn e ên ag tóg ti mÿ: “krÿ vênhmÿ ã tóg nÿ.” he mÿ. “Á tén sór tÿ êg nÿtÿ,” he ag tóg mÿ, Jesus mÿ.

²¹ Hã ra Jesus tóg ag mÿ: “milagre pir han ja inh nÿ, vênhkán ke kurã ên ki, kÿ tóg ãjag mÿ e tÿ,” he mÿ. ²² “Vênhkán ke kurã ki ãjag tóg gÿr ag gré junun fár kym tÿ gé, Moisés tÿ ãjag mÿ: “ti mur pãte kurã tÿ 8 (ke) ki ti kym nÿ,” he ja nÿ ên kÿ. Hã ra ù tÿ ã krê fár kym vén pi(jé) tÿ Moisés nÿ ja nÿ'. Ti jo ke ù ja vê, ù tÿ kym vén ja ti. ²³ ãjag tÿ Moisés vÿ ki króm jé ãjag tóg vênhkán ke kurã ki gÿr fár kym tÿ. Hã ra ãjag tóg iso jÿ sór mÿ, isÿ vênhkán ke kurã ki ùn kaga pir tÿ há' hen kÿ. ²⁴ Ón kÿ ãjag tóg iso jÿ sór mÿ. Inh jykre vÿ ãjag mÿ kórég nÿ ve nÿ. ãjag tÿ to jykrén há han mÿ ra ãjag tóg inh jykre há nÿ venh mÿ vê,” he tóg, Jesus ti.

Ag tÿ Jesus to: “ti mÿ tÿ Cristo nÿ vÿ?” he

²⁵ Kÿ Jerusalém tá ke ag tóg Jesus to: “ti tén sór ja ag tóg nÿ,” he mÿ. ²⁶ “Hã ra tóg jatun mÿ vênh kar mré vémén jê nÿ. Ti mÿ ag tóg vÿ tÿ nÿ, pã'i ag. Ag mÿ hên ri ke mÿn ti to: “Cristo vÿ tÿ ti nÿ, Topê tÿ ùn jênêg mÿ vÿ tÿ ti nÿ,” he mÿ vÿ, êg pã'i ag?” he ag tóg mÿ, Jesus to. ²⁷ “Hã ra êg tóg ti tÿ hên tá kãtÿ mÿ ki kanhró nÿtÿ. Cristo ên kãtig kÿ êg tóg ti tÿ hên tá kãtig mÿ ki kãtig nÿtÿnh mÿ, kÿ ti hÿn tÿ Cristo tÿ nÿ,” he ag tóg mÿ, Jesus to.

²⁸ Hã ra Jesus tóg Topê jo ìn tá jê nÿ, vênh kar kanhrãn kÿ. Kÿ tóg jamã hár(a) ag kanhrãn mÿ. “Ti ki kanhró êg nÿtÿ, he ãjag tóg tÿ iso, ón kÿ,” he tóg. “Ti tÿ hên tá kãtÿ mÿ ki kanhró êg tóg nÿtÿ gé, he ãjag tóg tÿ, ón kÿ. Inh pi(jé) vêsóg ki: inh hÿn tÿg mÿ, hé'. Û tÿ inh jênêg mÿ ên vÿ ki hã tó tÿ. Hã ra ãjag tóg ti ki kãtig nÿtÿ, ù tÿ inh jênêg mÿ ên ti ki. ²⁹ Inh hã vÿ ti ki kanhró nÿ. Ti hã tá sóg kãtêre, ãjag ve jé, ti tÿ inh mÿ: “ha ag venh tÿg,” hen kÿ,” he tóg, Jesus ti.

³⁰ Kÿ ag tóg ti se sór mÿ, hã ra ag tóg ti vóg tÿ pê nÿ ver. Ti ter ke kurã vÿ jun ja tÿ nÿ ver, hã kÿ ag tóg ag tÿ ti se sór mÿ ra ti ség tÿ nÿ. ³¹ Ag jãvo ùn e ag tóg Jesus ki ge mÿ. Ti to ag tóg: “êg mÿ tóg tÿ Cristo nÿ ve nÿ,” he mÿ. “Cristo kãtig kÿ ti nêji milagre hÿn han ke mÿ. Jesus tÿ milagre hÿn han vÿ e nÿtÿ. Êg mÿ tóg tÿ Cristo nÿ,” he ag tóg, Jesus to. Tag tó kÿ ag tóg ti ki ge mÿ.

Pã'i ag tÿ Jesus se sór

³² Kÿ Fariseu ag tóg mÿg mÿ, ùn e ag tÿ Jesus to nén (ù) tó mÿ ti. Kÿ ag tóg Topê tÿ ki rÿr tÿ to pã'i ag mré vémén mÿ, ag tÿ Jesus senh ke to. Kÿ ag tóg polícia ag jênêg mÿ, ag tÿ ti se jé. ³³ Hã ra Jesus tóg: “ãjag mré sóg nÿ sÿ han ke mÿ ver,” he mÿ. “Tag pãte sóg tÿg ke mÿ, isÿ ù tÿ inh jênêg mÿ ên ve jé. ³⁴ Ên kã tóg ãjag tÿ inh venh há tÿnh mÿ, hã ra ãjag tóg inh venh ke tÿ nÿ. Ên tá junjun ke tÿ ãjag tóg nÿ, isÿ hên ra tÿg ke ên tá,” he tóg.

³⁵ Kÿ Judeu ag tóg jagnê mÿ: “ti hÿn hê ra tÿg sór mÿ?” he mÿ. “Êg hÿn hê tá ti venh ke tÿ nÿ? Ti hÿn hên ri ke mÿn ga tÿ Grécia ra tÿg sór mÿ, tá êg mré ke ag kanhrãn jé. ³⁶ Ne to ke nê, hÿn, hã vÿ: “ãjag tÿ inh venh há tóg tÿnh mÿ, hã ra ãjag tóg inh venh ke tÿ nÿ, he mÿ tag ti?” he ag tóg, Judeu ag. Jesus vÿ vÿ ag mÿ e tÿ, hã kÿ ag tóg ki kãtig nÿtÿ, ti tÿ nén tó mÿn ki.

Topê kuprÿg tÿ goj ri ke nÿ

³⁷ Vãhã tóg festa tÿ kurã tÿ êgno tá krÿg mÿ. Festa to kurã mág pê vê, kurã tÿ êgno ên ti, hã kÿ ag e tãvÿ nÿtÿ, Jerusalém tá. Kurã ên kã Jesus tóg jê kÿ vênh kar mÿ prêr mÿ sir. “!..ãjag tÿ goj kron sór kÿ inh mÿ to vÿ, isÿ ãjag mÿ goj há ven jé..!” he tóg, prêr kÿ.

³⁸ “!..Topê vî ki tag vỹ rán kỹ nĩ, ha mẽ: !..ājag tỹ inh ki ge kỹ tóg ājag kākĩ goj ror han ke mũ, isỹ ājag mỹ goj nĩm ke ti..!” he tóg. “!..Kỹ goj tag vỹ ājag rĩnrĩr pẽ han ke mo..!” he tóg, Jesus ti. Ti tỹ ag mỹ prẽr jan hã vẽ. ³⁹ Jesus tỹ ag mỹ Topê kuprĩg tón hã vẽ, hã to tóg: goj, he mũ. Topê kuprĩg tỹ tóg ag jagrẽn ke mũ, ù tỹ ti ki ge mũ ag. Festa ẽn kã tóg ag mỹ ti jẽnẽ ja tũ nĩ ver, Topê kuprĩg ti, ti tỹ ver ã ter kar kỹ rĩr mãn ja tũ nĩn kỹ, ti tỹ ã panh ra tĩg mãn ja tũ nĩn kỹ ver.

Ag tỹ Jesus ki kagtĩg

⁴⁰ Kỹ Jesus vĩ mẽg mũ ù ag tóg ti to: “Topê vĩ tó tĩ pẽ ẽn vẽ,” he mũ. ⁴¹ Kỹ ù ag tóg ti to: “Cristo vỹ tỹ ti nĩ, Topê tỹ ẽg mỹ ùn jẽnẽg mũ ẽn vỹ tỹ ti nĩ,” he tĩ gé. Hã ra ù ag tóg: “Cristo mỹ hỹn ga tỹ Galiléia tá kãtĩ mũ vỹ?” he mũ. ⁴² “Topê vĩ rá ki tóg: “Davi kósĩn vỹ tỹ ti nĩ, Cristo ti,” he mũ, “ẽmã tỹ Belém tá ke vỹ tỹ ti nĩ, Davi jamã ẽn tá ke,” he tóg, Topê vĩ tỹ rán kỹ nĩ ki. Hã kỹ tóg ẽg mỹ tỹ Cristo tũ nĩ, Jesus ti, ti tỹ tỹ Galiléia tá ke nĩn kỹ,” he ag tóg. ⁴³ Hã kỹ ag tóg vẽn kãpãm kỹ nỹtĩ, ti tugnĩn. ⁴⁴ Kỹ ag kãmĩ ù ag vỹ ti se sór mũ, hã ra ag tóg ti kãgmĩg tũ nĩgtĩ, ti kamẽg kỹ.

Pã'i ag tỹ Jesus ki ge sór tũ

⁴⁵ Kỹ polícia ag tóg Topê tũ ki rĩr tĩ to pã'i ag to vỹnvỹn ke mũ, Fariseu ag to ke gé, ù tỹ ag jẽgnẽ ja ag to. Kỹ ag tóg ag mỹ: “hỹn, ti?” he mũ. ⁴⁶ Kỹ ag tóg: “hã ra tóg vĩ há tãvĩ han mũ,” he mũ. “Vẽn h vỹ ge mẽ ja tũ ẽg nỹtĩ, hã kỹ ẽg tóg ti kãgmĩ ja tũ nĩ,” he ag tóg mũ, polícia ag. ⁴⁷ Kỹ Fariseu ag tóg ag mỹ: “kỹ ājag mỹ ti vỹ kri nĩm sór mũ, ti ón mũ ra?” he mũ. ⁴⁸ “Pã'i ù mỹ ti vỹ kri fig mũ? Vó, ke tũ ẽg nỹtĩ. Fariseu ù tỹ ti vỹ kri nĩm tũ nĩ gé. ⁴⁹ Hã ra ag tóg ki kagtĩg nỹtĩ, ù tỹ ti vỹ kri fig mũ ag. Topê vĩ rán ki kagtĩg ag nỹtĩ, kỹ Topê vỹ ag mỹ vỹ kónãn ke mũ, ha vemnĩ,” he ag tóg mũ, Fariseu ag.

⁵⁰ Hã ra Nicodemos vỹ ag mré nĩ gé, ù tỹ kuty tá Jesus mré vẽnẽn ja ẽn ti. Ẽn tóg ag mỹ: ⁵¹ “ẽg tỹ ti vóg kónãn sór kỹ ẽg tóg ti ki jẽmẽ vén ke mũ,” he mũ. “Ti tỹ nẽn han ja to jykrẽn há han jé ẽg tóg ke mũ, ẽg tỹ kar kỹ ti vóg kónãn jé. Topê tỹ ẽg mỹ vẽn jykre nĩm jan hã vẽ,” he tóg, Nicodemos ti.

⁵²⁻⁵³ Hã ra ag tóg ti mỹ: “ã hỹn tỹ Galiléia tá ke nĩ gé, hã kỹ ã tóg ti jy nĩgãn sór mũ,” he mũ. “Topê vĩ ki ve há han nĩ, kỹ ã tóg venh ke mũ. Galiléia tá ke ù vỹ Topê vĩ tónh ke tũ pẽ nĩ, Topê vỹ tá ke ù jẽnẽnh ke tũ pẽ nĩ,” he ag tóg, Nicodemos mỹ. Kỹ ag tóg ājag jamã ra mũ mũ sir, pã'i kar ag.

8

Jesus tỹ ùn tỹtã kórég fi mỹ vẽn pãte fón

¹ Hã ra Jesus tóg pãnónh tỹ Oliveiras ra tĩ mũ, tá nũr jé. ² Kurã ke ra tóg Jerusalém ra tĩg mãn kỹ (tóg) Topê jo ĩn tá nĩ mãn mũ sir, kỹ vẽn kar ag tóg ti vỹ mẽnh kãmũ mũ. Tá nĩ kỹ tóg ag kanhrãn mũ. ³ Kỹ Topê vĩ to professor ag vỹ ùn tỹtã fi pére kãmũ mũ, Fariseu ag ke gé. Ẽn tỹtã ẽn fi ve ja ag tóg nĩ, fi tỹ fi mén tũ mré nỹn kỹ. Vẽnh kuju kã ag tóg fi fẽg mũ. ⁴ Kỹ ag tóg Jesus mỹ: “Senhor,” he mũ. “Fi ve ẽg tóg, fi tỹ fi mén tũ mré nỹn kỹ,” he ag tóg, Jesus mỹ. ⁵ “Moisés vỹ ẽg mỹ: “ājag kãmĩ ù fi tỹ fi mén tũ mré nỹn kỹ fi tén nĩ, pó tỹ fi pin kỹ,” he ja nĩ. Jo ã hỹn hẽ ri ke tĩ?” he ag tóg, Jesus mỹ. ⁶ Ag tỹ ón kỹ ti vỹ mẽ sór vẽ, ag tỹ ti vỹ to ti se jé. Hã ra Jesus tóg pãnh ke kỹ nĩ kỹ ga kri rán mũ, ã nĩgẽ tỹ. Vĩ tũ tóg nĩ.

⁷ Hã ra ag tóg ti tovãnh sór tũ nĩ. Kỹ tóg vãhã ag ki ẽvãnh kỹ ag mỹ: “ājag kãmĩ ù hỹn Topê vĩ mranh ja tũ nĩ ver,” he mũ. “Ẽn hỹn fi pin vén ke mũ, pó tỹ,” he tóg mũ. ⁸ Kỹ tóg pãnh ke mãn kỹ ga kri rán mãn mũ.

⁹ Kỹ ti vỹ tóg ag mỹ e tĩ. Ag kar vỹ ājag tỹ Topê vĩ mranh ja ẽn mĩ ẽkrég mũ sir, hã kỹ ag tóg mũ mũ sir. Ẽn si há ag vỹ mũ vén mũ, kar kỹ vẽn kar ag. Komẽr hã ag tóg mũ kãn mũ. Vãhã Jesus vỹ ã pir mỹ nĩ, fi mré. Fi hã vỹ tá jẽ nĩ, ti mré. ¹⁰ Kỹ tóg fi ki ẽvãnh kỹ fi mỹ: “ag hẽ ra kagáv, ù tỹ ã kato vỹ mũ ag?” he mũ. “Ag mỹ ã vóg kónãn tũ?” he tóg. Ag mũ kar kỹ tóg fi mỹ ke mũ.

¹¹ Hã ra fi tóg ti mý: “hý,” he mũ. Ký tóg fi mý: “ký inh hýn ã vóg kónãn ke tũ nĩ gé,” he mũ. “Ha tĩg, jatun mý. Hã ra Topẽ vĩ mranh mãn sór tũg nĩ,” he tóg, Jesus ti. Ûn týtá kórég ên fi vóg kónãn sór ja tũ ti nĩ, Jesus ti.

Jesus tỹ jẽngrẽ ri ke nĩ

¹² Ký Jesus tóg Topẽ jo ãn krẽm nĩ ký vẽnũ kar kanhrãn mãn mũ. “Jẽngrẽ ri ke inh nĩ,” he tóg. “Ajag tỹ inh mré mũn ký ajag tóg kuty mũ mũ tũ nĩgtĩ. Jẽngrẽ mũ ajag tóg mũgtĩ, kurã mũ. Ajag tỹ vẽnũ jykre tãg han ke to ken hã vẽ,” he tóg.

¹³ Hã ra Fariseu ag tóg ti vĩ kafãn mũ, ký ag tóg ti mý: “vẽnũ kãmén ã tóg mũ ha,” he mũ. “Ëg tỹ vẽnũ kãmén ký ãg tóg ón ký vĩ tĩ,” he ag tóg mũ sir. ¹⁴ Hã ra Jesus tóg ag mý: “hý,” he mũ. “Vẽnũ kãmén inh tĩ, hã ra sóg ki hã tó tĩ,” he tóg mũ. “Isỹ hẽ tá kãtĩg mũ ên ki kanhró inh nĩ, isỹ hẽ ra tĩg ke mũ ti ke gé,” he tóg. “Hã ra ajag tóg inh ki kãtĩg nýtĩ, isỹ hẽ tá kãtĩg mũn ki, isỹ hẽ ra tĩg ken ki ke gé. Êprã ke ajag nýtĩ. ¹⁵ Kãnhmar ajag tóg ù to: “jykre kórég ti nĩ,” henh ke mũ. Ajag jãvo sóg vẽnũ kar jykre to nẽn ù tó tũ nĩ ver. ¹⁶ Isỹ hã ra ù jykre to nẽn ù tó sór mũ ra sóg tó há han ke mũ vẽ. Inh pi(jé) inh pir mý nẽn ù to jykren tĩ. Û tỹ inh jẽnẽg mũ vỹ inh mré nẽn ù kar to jykren tĩ. ¹⁷ Ký ùn rėgre ag tỹ vẽnũ vĩ pir han ký tóg ajag mý tỹ ki hã ke nĩ. Hã ký tóg rán ký nĩ, Topẽ vĩ tỹ rán ký nĩ ki. ¹⁸ Hã ký sóg vẽnũ kãmén mũ, hã ra inh panh tóg, ù tỹ inh jẽnẽg mũ tóg inh kãmén mũ gé. Rėgre ãg nýtĩ, ù tỹ inh kãmén mũ ti,” he tóg, Jesus ti.

¹⁹ Ký ag tóg ti mý: “hýn, ã panh ti?” he mũ. Ký Jesus tóg ag mý: “ajag pi(jé) inh ki kanhró nýtĩ,” he mũ. “Hã ký ajag tóg inh panh ki kãtĩg nýtĩ gé,” he tóg. “Ajag tỹ inh ki kanhró nýtĩ ra ajag tóg inh panh ki kanhró nýtĩnh mũ vẽ gé,” he tóg, Jesus ti. ²⁰ Ti tỹ ag mý vẽnũ kãmén hã vẽ. Topẽ jo ãn krẽm nĩ ký tóg ag mý vẽnũ kãmén mũ, ti tỹ jãnkamy vin jafã rã hã nĩn ký. Ký pã'i ag tóg ti se sór mũ, hã ra ag tóg ti kãgmĩg tũ nĩgtĩ, ag tỹ ti kamẽg ký. Ti ter ke kurã vỹ jun ja tũ nĩ ver, hã ký ag tóg ti tỹ hẽ ri ke tũ nĩ ver.

Jesus tỹ hẽn ra tĩg ke

²¹ Ký tóg ag mý kãmén mãn mũ. “Tĩg jé sóg ke mũ, ký ajag tóg inh ve sór ke mũ, hã ra ajag tóg inh venh ke tũ nĩ. Inh vėg tũ ki ajag tóg kãgter ke mũ, ký ajag tỹ Topẽ vĩ mranh ja ên vỹ ajag kãkã nĩ nĩ. Ajag pi(jé) isỹ hẽn ra tĩg ke mũ ên ki kanhró nýtĩ. Isỹ hẽn ra tĩg ke mũ ên ki kãtĩg ajag nýtĩ,” he tóg, Jesus ti. ²² Ký ag tóg jagnẽ mý: “ti mý hẽn ri ke mũn vėsén sór mũ, hã kýn mý: “ajag pi(jé) isỹ hẽn ra tĩg ke mũ ên ki kanhró nýtĩ,” he mũ?” he ag tóg, Jesus to. ²³ Hã ra Jesus tóg ag mý: “êprã ke vỹ tỹ ajag nýtĩ,” he mũ. “Jãvo sóg tỹ kãnhkã tá ke nĩ. Ga tag ki ke tỹ ajag nýtĩ, jãvo inh pi(jé) tỹ ga tag ki ke nĩ. ²⁴ Hã ký sóg ajag mý: “kãgter jé ajag tóg ke mũ, ký ajag tỹ Topẽ vĩ mranh ja ên vỹ ajag kãkã nĩ nĩ,” he ja nĩ. Ha vé, ajag tỹ inh ki ge sór tũ nĩn ký tóg ajag kãkã nĩnh ke mũ, ajag tỹ Topẽ vĩ mranh ja ên ti. “Û ên vỹ tỹ inh nĩ,” he ja inh nĩ ajag mý. Tag to: hý, hemnĩ,” he tóg, Jesus ti.

²⁵ Ký ag tóg ti mý: “tỹ ã ù nĩ?” he mũ. Ký Jesus tóg: “vãsỹ sóg ajag mý tó huri, isỹ ajag mré vēmén vẽnũ ký,” he mũ. “Ajag mý sóg vẽnũ kãmén tĩgtĩ. ²⁶ Hã ra sóg ajag mý tó kãn ja tũ nĩ ver, sỹ ajag mý vĩ kónãn ke vỹ kã nĩ gé ver. Hã ra sóg ù tỹ inh jẽnẽg mũ ên vĩ hã tó tĩ, ti tỹ inh mý tó ja kar ên ti. Ki hã tóg tó tĩ, ù tỹ inh jẽnẽg mũ ti,” he tóg, Jesus ti. ²⁷ Hã ra tóg ag tỹ to jykren tũ nĩgtĩ, ti tỹ ag mý ã panh tó mũ ra.

²⁸ Ký Jesus tóg ag mý ke mãn mũ. “Ajag tỹ ka to isa ký, ký ajag tóg inh ki kanhrãn ke mũ,” he tóg. “Tỹ sóg êprã ke fi kósın nĩ. Kurã ên kã ajag tóg ki kanhró nýtĩnh ke mũ, isỹ tỹ ùn ên nĩ ti. Inh pi(jé) vėsóg ki nẽn ù to jykren tĩ. Inh panh tỹ inh mý nẽn tó mũ ên hã tó sóg tĩ. Hã ki kanhró ajag nýtĩnh ke mũ, kurã ên kã, ajag tỹ ka to isa ký. ²⁹ Ký ù tỹ inh jẽnẽg mũ vỹ inh mré nĩ nĩ. Ti mý nẽn há nĩ ên hã han sóg tĩ, hã ký tóg inh mré nĩ nĩ,” he tóg, Jesus ti. ³⁰ Ag tỹ ti vĩ tag mẽ ký ùn e ag vỹ ti ki ge mũ, kurã ên kã.

Jesus tỹ ãg tar han ke

³¹ Kĩ Jesus tóg ù tỹ ti ki ge kũ nỹtĩ ag kanhrãn mũ. “Inh vĩ tovãnh tũg nĩ,” he tóg. “Kỹ ãjag tóg tỹ inh mré ke pẽ nỹtĩ. ³² Kĩ ãjag tóg Topẽ vĩ pẽ ki kanhró nỹtĩnh mũ. Topẽ vĩ pẽ ki kanhró tugrĩn ãjag tóg patrão kórég ve mãn ke tũ nĩ,” he tóg.

³³ Kĩ ag tóg ti mỹ: “Abraão krẽ'krẽ vĩ tỹ ãg nỹtĩ,” he mũ. “Ëg pi(jé) tỹ ù camarada nỹtĩ', ùri, vãsỹ ke gé. Ne to ke nẽ, hã vĩ: patrão kórég ve mãn ke tũ ãjag nĩ, he mũ tag ti?” he ag tóg mũ, Jesus mỹ.

³⁴ Hã ra Jesus tóg ag mỹ: “ki hã sóg ke mũ, hã kũ sóg tó mũ,” he mũ. “Ãjag tỹ Topẽ vĩ mranh kũ ãjag tóg tỹ ti vĩ mranh jafã nỹtĩ, kũ tóg ãg tỹ ùn kórég tỹ patrão vég mũ ri ke nĩ. ³⁵ Ti camarada ag pi(jé) ti ãn krẽm ãmã nỹtĩgtĩ'. Ti kósin hã vĩ ti ãn krẽm nĩgtĩ jãvo. ³⁶ Kĩ, Topẽ kósin tỹ ãjag tỹ Topẽ krẽ han kũ ãjag tóg patrão kórég ve mãn ke tũ nĩ ha. ³⁷ Abraão krẽ vĩ tỹ ãjag nỹtĩ. Ki kanhró inh nĩ. Hã ra ãjag tóg isén sór mũ, ãjag tỹ inh vĩ to há tũ nỹtĩn kũ. ³⁸ Inh panh tỹ inh mỹ nén tó mũ ãn hã tó sóg tĩ. Inh jãvo ãjag tóg ãjag panh tỹ ãjag mỹ nén tó mũ ãn hã tó tĩ,” he tóg, Jesus ti.

³⁹ Kĩ ag tóg ti mỹ: “hỹ, Abraão vĩ tỹ ãg panh nĩ,” he mũ.

Kỹ Jesus tóg ag mỹ: “ãjag tỹ tỹ Abraão krẽ nỹtĩn kũ ti jykre han nĩ ge,” he mũ. ⁴⁰ “Hã ra ãjag tóg isén sór mũ. ãjag mỹ sóg Topẽ vĩ pẽ tó ja nĩ, Topẽ tỹ inh mỹ nén tó mũ ãn ti, hã ra ãjag tóg isén sór mũ. Abraão vĩ tag han ja tũ nĩ. ⁴¹ Vyrmy ãjag panh ù tũ hã han ãjag tóg tĩ,” he tóg.

Kỹ ag tóg Jesus mỹ: “panh ãg nỹtĩ, hã vĩ: Topẽ, he mũ. Ëg pi(jé) panh tũ nỹtĩ',” he ag tóg mũ.

⁴² Hã ra Jesus tóg ag mỹ: “Topẽ tỹ tỹ ãjag panh nĩ ra ãjag tóg iso há nỹtĩnh mũ vẽ,” he mũ. “Inh panh tá sóg kãtére, hã kũ sóg ãjag mré nĩ nĩ. Inh pi(jé) vėsóg ki nén to jykren kũ kãtére mũ'. Ti hã vĩ inh jẽnẽ. ⁴³ Hã ra ãjag tóg inh vĩ ki kagtĩg nỹtĩ. Mẽ sór tũ ãjag nỹtĩ, hã kũ ãjag tóg ki kagtĩg nỹtĩ. ⁴⁴ Japo krẽ vĩ tỹ ãjag nỹtĩ, kũ ãjag tóg ti tỹ nén to jykren mũ ãn han tĩ. Topẽ tỹ ãg ke ag han ãn kã tóg ag kãgtén sór tĩgtĩ, Japo ti. Vãsỹ ti jykre vẽ, kũ tóg ùri tỹ ti jykre nĩ gé ver. Ti pi(jé) ki hã tó tĩ'. Ki hã tó to ti kórég pẽ nĩ, Japo ti. Vẽnh ó vĩ tỹ ti tũ pẽ nĩ. Ón mẽ ti nĩgtĩ, vẽnĩh ón né vẽ. Ti hã vĩ tỹ ùn ón mũ ag panh kar nĩ. ⁴⁵ Ti jãvo sóg ki hã tó tĩ. Hã ra ãjag tóg inh vĩ kri nĩm sór tũ nĩgtĩ. ⁴⁶ Inh hỹ ne ki Topẽ vĩ mranh? Ha inh mỹ tó. Mranh ja tũ sóg nĩ. Hã ra sóg ãjag mỹ Topẽ vĩ pẽ tó tĩ. ãjag hẽ ri ken kũ inh vĩ kri fi sór tũ nĩ? ⁴⁷ Topẽ krẽ ag vĩ Topẽ vĩ mẽg tĩ. ãjag pi(jé) inh vĩ jẽmẽ sór tĩ', ãjag tỹ tỹ Topẽ krẽ tũ nỹtĩn kũ,” he tóg, Jesus ti, ag mỹ.

Jesus tỹ Abraão kãfór nĩ

⁴⁸ Kỹ Judeu ag tóg ti mỹ: “Samaria tá ke ri ke ã tóg nĩ, ã tỹ ki kagtĩg nĩn kũ, kũ ã jagrẽ kórég nĩ gé,” he mũ.

⁴⁹ Hã ra Jesus tóg ag mỹ: “inh pi(jé) jagrẽ kórég nĩ',” he mũ. “Inh panh to sóg: ùn mág vĩ tỹ ti nĩ, he tĩ. Hã ra ãjag tóg iso é he tĩ. ⁵⁰ Inh pi(jé) vėsỹ ùn mág han sór mũ'. Û tỹ isỹ ùn mág han ke mũ vĩ nĩ nĩ, ãn vĩ vẽnĩh kar jykre tugnỹm ke mũ. ⁵¹ Ki hã sóg ke mũ, hã kũ sóg tó mũ, ha mẽ. ãjag tỹ inh vĩ kri fi kũ ãjag ter ke tũ pẽ nĩ,” he tóg, Jesus ti.

⁵² Kỹ Judeu ag tóg ti mỹ: “jagrẽ kórég ã tóg nĩ,” he mũ. “Vãhã tóg ve há tĩ, ã jagrẽ kórég ti,” he ag tóg mũ ti mỹ. “Abraão vĩ ter, kũ Topẽ vĩ tó tĩ ag kar vĩ kãgter. Hã ra ã tóg ón kũ: “ãjag tỹ inh vĩ kri nĩm kũ ãjag kãgter ke tũ pẽ nĩ,” he mũ. ⁵³ ã mỹ vėsỹ ãg jóg'jóg ve tỹ Abraão kãfór han sór mũ', ã tỹ ãg mỹ: kãgter ke tũ ãjag nĩ, hen kũ? Ter ja ti nĩ, Abraão ti, kũ Topẽ vĩ tó tĩ ag kar vĩ kãgter kãn gé. Vėsỹ ùn mág han kũ nĩ ve ã tóg nĩ,” he ag tóg, Jesus mỹ, Judeu ag.

⁵⁴ Kỹ Jesus tóg ag mỹ: “isỹ vėsỹ ùn mág han kũ sóg ón kũ ke mũ ve nĩ,” he mũ. “Hã ra inh panh hã vĩ isỹ ùn mág han ke mũ, ãjag tỹ ù to: ãg jóg mág, he mũ ãn ti. ⁵⁵ Hã ra ãjag tóg ti ki kagtĩg nỹtĩ, ãjag jãvo sóg ti ki kanhró nĩ. Isỹ ãjag mỹ: “ti ki kagtĩg inh nĩ,” he mũ ra sóg ãjag ón tag ri ke han mũ vẽ, hã ra sóg ti ki kanhró nĩ, kũ sóg ti vĩ ki króm tĩ gé. ⁵⁶ ãjag jóg'jóg ve tỹ Abraão vĩ inh kurã ve sór ja nĩ, kũ tóg kejẽn vé, kũ tóg ti mỹ sér pẽ tĩ, ti tỹ inh kurã ve kũ,” he tóg, Jesus ti.

⁵⁷ Kÿ Judeu ag tóg ti mÿ: “50 (ke) anos han tũ ã nĩ ver, hã ra ã tóg: “Abraão ve inh,” he mũ. Vĩ vënhmÿ han ã tóg,” he ag tóg mũ, Jesus mÿ.

⁵⁸ Hã ra Jesus tóg ag mÿ: “ki hã sóg ke mũ, hã kÿ sóg tó mũ, ha mẽ,” he mũ. “Abraão mur tũ ra sóg nĩ nĩ,” he tóg, Jesus ti. ⁵⁹ Kÿ ag tóg jÿgjũ mũ, ti tÿ vëso: “Topê ri ke inh nĩ,” hen kÿ. Hã kÿ ag tóg pó mãn kÿ ti pin sór mũ. Hã ra Jesus tóg Topê jo ãn kãtã kãkutê mũ sir, kÿ tóg tĩ mũ, vënh péju jé.

9

Jesus tÿ ãn kyvó tÿ há' he

¹ Kejën Jesus tóg tÿg kÿ ãn kyvó vég mũ. ã mur mũn kã tóg kyvó nĩ sir. ² Kÿ ti mré mũ tĩ ag tóg ti mré ti vég mũ gé. Kÿ ag tóg Jesus mÿ: “ti han mũ fag hÿn Topê vĩ mranh',” he mũ, “ha kÿ tóg kyvó nĩ',” he ag tóg. “Ti tÿ vësóg ki Topê vĩ mranh kÿn mÿ kyvó nĩ vó?” he ag tóg mũ. ³ Kÿ Jesus tóg ag mÿ: “ti tÿ Topê vĩ mranh to ke pijé',” he mũ. “Ti han mũ fag tÿ Topê vĩ mranh to ke pijé',” he tóg. “Topê tÿ vënh kar mÿ ã tÿ nén han sór mũ ên ven sór vë, ti ki. ⁴ Isÿ ù tÿ inh jënêg mũ ên tÿ inh mÿ nén tó mũ ên han sór vë. Ver tóg inh mÿ kurã nĩ, sÿ rãnrãj jé. Kãnhmar tóg kutÿ nÿnh mũ, kÿ ù tóg rãnrãj mãn ke tũ nĩ, iser ke kurã ên kã,” he tóg. ⁵ “Ver sóg ãjag mré tÿg mũ, kÿ sóg ãjag mÿ jëngrê ri ke nĩ ver,” he tóg, Jesus ti. ⁶ Tag tó kar kÿ tóg sug mũ, ga kri, kÿ tóg óré sĩ han mũ. Óré ên tÿ tóg ãn kyvó kanê to tĩn mũ. ⁷ Kÿ tóg ti mÿ: “ha tÿg, goj tÿ Siloé ki vënh kÿpe jé,” he mũ. Goj tÿ Siloé to ke hã vÿ: “ù tÿ inh jënê ja,” he mũ, êg vĩ ki. Kÿ tóg tĩ mũ, ãn kyvó ti. Kÿ tóg tá kãtÿg kÿ êvãnh há han tĩ nĩ sir.

⁸ Ti tÿ êvãnh há han kÿ tóg ti rã hã nÿtĩ kar ag mÿ e tĩ. Vënh kar vÿ ti ki kanhró nÿtĩ, vënh kar mÿ tóg: “inh mÿ nén ù nĩm,” he tĩ ja nÿgtĩ. Kÿ ag tóg, ag tÿ ti êvãnh há tag ve kÿ (ag tóg) ti to: “ù tÿ êg mÿ: inh mÿ nén ù nĩm, he tĩ ên hã tũ mÿ'?” he mũ. ⁹ Kÿ ag kãmĩ ù tóg: “ti hã vë,” he mũ. Hã ra ù ag tóg: “ên ri ke nĩ ve ti nĩ, hã ra tóg êg mÿ tÿ hã tũ nĩ,” he mũ gé. Hã ra tóg vëso: “inh hã vë,” he mũ. ¹⁰ Kÿ ag tóg ti mÿ: “kÿ ã hê ri ké, ã tÿ êvãnh há' he jé?” he mũ. ¹¹ Kÿ tóg ag mÿ: “ag tÿ ù to: Jesus, he mũ ên vÿ óré han, kÿ tóg inh kanê to tĩn, kÿ tóg inh mÿ: “goj tÿ Siloé ra tÿg nĩ, tá vënh kupemni,” hé. Kÿ sóg vyr. Vënh kupe sóg, kÿ sóg êvãnh há' he mũ sir,” he tóg, ãn kyvó ja ti. ¹² Kÿ ag tóg ti mÿ: “ti hê kã jé?” he mũ. Hã ra tóg ag mÿ: “ha'?” he mũ.

Fariseu ag tÿ ãn kyvó ja ki jëmê

¹³ Kÿ ag tóg Fariseu ag mÿ ti pére mũ mũ, ãn kyvó ja ên ti. ¹⁴ Hã ra tóg tÿ vënhkãn ke kurã nĩ. Ên kã Jesus tóg óré han kÿ ti tÿ há' hé. ¹⁵ Kÿ Fariseu ag tóg ti ki jëmê sór mũ gé. “ã hê ri ké, ã tÿ êvãnh há' he jé?” he ag tóg mũ gé. Kÿ tóg ag mÿ: “óré tÿ tóg inh kanê to tĩn, kÿ sóg vënh kupen vyr, kÿ sóg êvãnh há' he mũ sir,” he mũ, ag mÿ, ãn kyvó ja ti.

¹⁶ Kÿ Fariseu ù ag tóg Jesus to: “Topê pi(jé) ti jënê',” he mũ. “Vënhkãn ke kurã ki tóg vënhkãn vãnh nÿgtĩ, kÿ tóg kórég nĩ,” he ag tóg mũ, Jesus to, Fariseu ù ag. Hã ra ù ag tóg ti to: “hã ra tóg nén ù há tãvĩ han,” he mũ gé. “Ti kórég nĩ ran hÿn tag han ki kagtÿg nÿnh mũ vë,” he ag tóg, Fariseu ù ag. Hã kÿ ag vënh kãpãm kÿ nÿtĩ. ¹⁷ Kÿ ag tóg ãn kyvó ja ên ki jëmê mãn mũ. “Ti mÿ tÿ ãn há nĩ', ãn kórég mÿ vó?” he ag tóg mũ. “ã tÿ tóg há' hé mÿr,” he ag tóg.

Kÿ tóg ag mÿ: “inh mÿ tóg tÿ Topê vĩ tó jafã nĩ,” he mũ, ãn kyvó ja ti.

¹⁸ Hã ra ag tóg ti vĩ kri nĩm sór tũ nĩ. “Ti mÿ kyvó ja nĩ vÿ?” he ag tóg mũ. Kÿ ag tóg ti han mũ fag jé prêr mũ. ¹⁹ Kÿ ag tóg fag mÿ: “ãjag kósín hã mÿ'?” he mũ. “Ti mÿ ã mur mũn hã kã kyvó ja nĩ? Kÿn hÿn hê ri ké, ti tÿ ùri êvãnh há nÿn jé?” he ag tóg mũ, ti han mũ fag mÿ.

²⁰ Kÿ fag tóg: “hÿ, êg kósín hã vë,” he mũ. “ã mur mũn hã kã tóg kyvó ja nĩ. ²¹ Hã ra tóg ùri êvãnh há nĩ. Hê ri ken kÿ'? Ha'? ù nÿ ti han'? Ha ti ki jëmêmnĩ. Sanh há ti nĩ ha. ãjag mÿ ti tónh mũ,” he fag tóg, ti han mũ fag.

²² Hã ra fag tóg pã'i ag kamêg mũ, hã kÿ fag tóg: “ha ti ki jëmêmnĩ,” he mũ. Pã'i ag vÿ tag tó ja nĩ, Jesus to: “ãjag kãmĩ ù tÿ ti to: “Cristo vÿ tÿ ti nĩ,” hen kÿ êg ti kutê ke mũ,”

he mū, “ti tỹ tỹ ěg mré ke tũ nĩ jé, ti tỹ ěg mré vĕnhmān tũ nĩ jé, ěg vĕnh kanhrān jafā krĕm,” he ja ag tóg nĩgtĩ. ²³ Hā kỹ ũn kyvó ja ěn han mū fag vỹ Jesus to nĕn ũ tó sór tũ nĩ, hā kỹ fag tóg pā'i ag mỹ: “sanh há ti nĩ ha, ājag mỹ ti tónh mū,” he mū, fag kósín kyvó ja ěn to.

²⁴ Kỹ ag tóg ũn kyvó ja ěn jé prĕr mān mū. Kỹ ag tóg ti mỹ: “ker ón hĕ', Topĕ vỹ ā vỹ mĕg mū,” he mū. “Ũ tỹ ā tỹ há' he mū ěn vỹ kórég nĩ, Topĕ vỹ mranh ti tĩ,” he ag tóg mū ti mỹ. ²⁵ Kỹ tóg: “mĕ',” he mū. “Ti mỹ Topĕ vỹ mranh tĩ'? Sỹ ki kagtĩg tóg tĩ. Nĕn ũ pir hā ki kanhró sóg nĩ. Kyvó inh vĕ vĕ, hā ra sóg ěvānh há nĩ ha,” he tóg, ũn kyvó ja ěn ti.

²⁶ Kỹ ag tóg ti mỹ: “ti hĕ ri ké, ā tỹ há' he jé?” he mān mū. ²⁷ Hā ra tóg ag mỹ: “ājag mỹ inh hur tó, hā ra ājag tóg mĕ sór tũ nĩ,” he mū. “Ājag tỹ ne jé mĕ mān sór nĕ? Ājag mỹ ti mré mū sór mū gé?” he tóg.

²⁸ Kỹ ag tóg ti nyg mū. “Ā hā vỹ tỹ ti mré ke nĩ,” he ag tóg mū. “Jāvo ěg tóg tỹ Moisés mré ke nỹtĩ,” he ag tóg, pā'i ag, ũn kyvó ja ěn mỹ. ²⁹ “Topĕ vỹ Moisés mré vĕmĕn ja nĩ, tag ki kanhró ěg tóg nỹtĩ. Hā ra ěg pi(jé) ěn ki kanhró nỹtĩ'. Ti hỹn tỹ hĕ tá ke nĩ'?” he ag tóg, pā'i ag.

³⁰ Kỹ ũn kyvó ja ěn tóg ag mỹ: “mĕ',” he mān mū. “Ājag mỹ ti ki kagtĩg nỹtĩ, ti tỹ tỹ hĕ tá ke nĩn ki? Isỹ tóg há' hé mỹr, inh kanĕ tỹ. ³¹ Hā ra Topĕ tóg ěg vỹ mĕg tũ nĩgtĩ, ěg tỹ tỹ ti vỹ mranh jafā nỹtĩn kỹ. Ũ tỹ Topĕ kamĕg mū ěn vỹ hā mĕg ti tĩ. Ũ tỹ ti vỹ ki króm mū ěn vỹ hā mĕg ti tĩ, Topĕ ti. ³² Inh mur mū kã inh kyvó nĩ ja nĩ. Ũ tỹ ge tỹ há' he mū tag ve ja tũ inh nĩ ver. Hā ra tóg isỹ há' hé. ³³ Ti tỹ Topĕ tá kãtĩg tũ ra tóg nĕn ũ há han ki kagtĩg nĩ vĕ,” he tóg, ũn kyvó ja ti, pā'i ag mỹ.

³⁴ Hā ra ag tóg ti mỹ: “Topĕ vỹ mranh kỹ ā tóg mur, hā ra ā tóg ěg kanhrān sór mū',” he mū. Kỹ ag tóg ti kutĕm mū, vĕnh kanhrān jafā krĕm.

Ũn kyvó to comparaçāo

³⁵ Hā ra Jesus tóg mĕg mū, ag tỹ ti kutĕm ja ti. Kỹ tóg ti venh tĩ mū. Kỹ tóg ti mỹ: “ā mỹ ěprā ke fi kósín ěn ki rā sór tũ?” he mū.

³⁶ Kỹ tóg Jesus mỹ: “kỹ ũn nĕ ge?” he mū. “Sỹ ti ki rā sór vĕ,” he tóg.

³⁷ Kỹ Jesus tóg ti mỹ: “ti ve ā huri,” he mū. “Ũ tỹ ā mré vĕmĕn jĕ mū hā vỹ tỹ ti nĩ, inh hā vỹ tỹ ti nĩ,” he tóg.

³⁸ Kỹ ũn kyvó ja tóg ti mỹ: “Senhor,” he mū. “Ā ki rā kỹ inh jĕ nĩ,” he tóg. Kỹ tóg ti krĕm mūg ke mū, Jesus krĕm, ti mỹ: “Topĕ kósín vỹ tỹ ā nĩ,” he jé.

³⁹ Kỹ Jesus tóg ti mỹ: “ga tag ki sóg jun, sỹ vĕnh kar jykre tugnỹm jé,” he mū. “Ũn kyvó ag tỹ ěvānh há han jé sóg ke mū. Ag tỹ iso jykrĕn há han ke to ken hā vĕ. Kỹ sóg ũ tỹ ve há han mū ag kyvó han ke mū gé. Ag tỹ iso jykrĕn há han ki kagtĩg to ken hā vĕ,” he tóg, Jesus ti, ũn kyvó ja ěn mỹ.

⁴⁰ Hā ra Fariseu ũ ag tóg ti vỹ mĕg mū. Kỹ ag tóg ti mỹ: “kỹ ěg mỹ kyvó nỹtĩ gé'?” he mū.

⁴¹ Kỹ Jesus tóg ag mỹ: “ājag tỹ: kyvó ěg nỹtĩ, ki kagtĩg ěg nỹtĩ,” he mū hā ra Topĕ tóg ājag to jũ tũ nĩ ver. Hā ra ājag tóg vĕso: “ěvānh há ěg nỹtĩ, ki kanhró ěg nỹtĩ,” he tĩ. Hā kỹ ājag tỹ Topĕ vỹ mranh ja vỹ ājag kãkã nĩ nĩ,” he tóg, Jesus ti, Fariseu ag mỹ.

10

Vĕnh mĕg tỹ carneiro to comparaçāo

¹ Kỹ Jesus tóg ag mỹ vĕnh kāmĕn mān mū. “Ki hā sóg ke mū, hā kỹ sóg tó mū,” he tóg. “Ěg tỹ ěg mĕg tỹ carneiro jy ró han kỹ ěg tóg ti jãnkã ra rã tĩ. Jāvo ũ tóg kejĕn ró to tãpřy kỹ pãte rã sór tĩ. Ti tỹ carneiro péju sór vĕ, hā kỹ tóg ró to tãpřy kỹ pãte rã sór mū. ² Ti jāvo ũ tỹ carneiro ki rĩr tĩ vỹ jãnkã ra rã mū. ³ Jãnkã ki rĩr tĩ ěn vỹ ti mỹ ró nón tĩ, jãnkã ti. Kỹ tóg carneiro jygi tó kãn mū sir. Ti vỹ ki kanhró fag nỹtĩ, ti mĕg tỹ carneiro fag. ⁴ Kỹ tóg fag jo tĩ mū, re ra. Kỹ tóg ā mĕg fag jé prĕr kãn mū sir, kỹ fag tóg pa kãn mū, ũ tỹ carneiro ki rĩr tĩ ěn mĕg fag. Kỹ tóg fag jo tĩ mū, kỹ fag tóg ti nón mū mū sir, ti mĕg fag, fag tỹ ti vỹ ki kanhró nỹtĩn kỹ. ⁵ Fag pi(jé) ũ nón mūnh ke mū', fag tỹ ũn ki kagtĩg nón. Ũ

jo fag vënh pigjunh ke mü, fag tÿ ün ki kagtÿg ên jo. Fag pi(jé) ti vÿ ki kanhró nÿtÿ', hã kÿ fag tóg ti jo vënh pigjunh ke mü," he tóg, Jesus ti. ⁶ Jesus tÿ ag mÿ comparação han vë. Ti mÿ êg tóg vënh mæg tÿ carneiro ri ke nÿtÿ, êg tÿ ti nón mün kÿ. Hã ra Fariseu ag tóg ti vÿ to jykrén tũ nÿtÿ.

Vënh mæg to comparação ù

⁷ Hã ra Jesus tóg ag mÿ kãmén mǎn mü. "Ki hã sóg tó mü, hã kÿ sóg ke mü," he tóg. "Carneiro jy ró jǎnkã ri ke inh nÿ," he tóg. ⁸ "Û tÿ inh jo kãmü ag vÿ tÿ carneiro pigju(g) tÿ ag nÿtÿ ja nÿgtÿ, ün jũ (ka)mẽ ag nÿtÿ ja nÿgtÿ. Hã ra carneiro fag vÿ ag vÿ mẽ ja tũ nÿtÿ. ⁹ Inh hã vÿ fag mÿ jǎnkã ri ke nÿ. Û tÿ inh ki rã mü vÿ kren ke mü, kÿ tóg ti tÿ jǎnkã ra rã ri ke nÿ. Kÿ tóg kãra rã tÿ, kar kÿ tóg kãkutẽ tÿ gé, ti tÿ vëjën ve kÿ. ¹⁰ Vënh mæg tÿ carneiro pigju(g) tÿ ên vÿ carneiro pigju hã jé kãtÿ tÿ, fag kãgtén jé, fag kókén jé. Ti jãvo sóg fag ki rÿnrÿr há han hã jé kãtÿg, fag tÿ jagtar tũ nÿtÿ jé, fag mÿ sér tÿ jé," he tóg, Jesus ti.

¹¹ "Û tÿ carneiro ki rÿr tÿ ri ke inh nÿ gé, ün tÿ ki rÿr há ri ke inh nÿ. Û tÿ carneiro ki rÿr há han mü vÿ ã mæg jagfy ter ke mü, fag krenkren jé. ¹² Kÿ ù camarada vÿ tag ri ke tũ nÿgtÿ. Mÿg kamæg jé tóg ke mü, kÿ tóg mÿg ve kÿ vënhvãg tÿnh ke mü, ã patrão mæg tovãnh kÿ, ti camarada ti. Kÿ mÿg vÿ fag kugmÿnh ke mü, kÿ fag tóg vënh kãpugpóv ke mü gé, mÿg tugrÿn, carneiro fag. Ti camarada mæg pi(jé)', ti patrão mæg vë, hã kÿ tóg fag jy nÿgãn há han tũ nÿ. ¹³ Mÿg ve kÿ tóg vënh vãg tÿ mü. Jǎnkamy hã to tóg rǎnhrãj jẽ nÿ, hã kÿ tóg mÿg kamæg mü. ¹⁴ Ti jãvo sóg carneiro ki rÿr há han tÿ. Inh mæg ki kanhró sóg nÿ, kÿ fag tóg inh ki kanhró nÿtÿ gé. ¹⁵ Ri ke ti nÿ gé, inh panh mré. Inh ki kanhró tóg nÿ, kÿ sóg ti ki kanhró nÿ gé. Kÿ sóg inh mæg jagfy ter ke mü. ¹⁶ Inh mæg ù vÿ nÿtÿgtÿ gé ver, inh mæg tÿ hẽ tá ke fag. Ājag povo kãmÿ ke pijé'. Ên jé prër jé sóg ke mü gé, kÿ fag tóg inh mré kãmünh ke mü gé. Inh vÿ mẽ jé fag ke mü gé. Inh mæg tÿ tag ki fag mré ke vÿ tÿ fag nÿtÿnh mü. Fag kar jy sóg ró pir han ke mü, inh mæg kar jy, kÿ sóg inh pir mÿ fag ki rÿr ke mü," he tóg, Jesus ti.

¹⁷ "Inh panh vÿ iso há nÿ, isÿ inh mæg jagfy ter ken kÿ, kar kÿ sóg rÿr mǎn ke mü. ¹⁸ Iser sór tũ ra ù pi(jé) isén ke mü vë'. Hã ra sóg fag jagfy ter sór mü. Iser sór kÿ sóg ter ke mü. Inh rÿr mǎn sór kÿ sóg rÿr mǎn ke mü gé, iser kar kÿ. Inh panh tÿ inh mÿ nén tó mün hã vë," he tóg, Jesus ti.

¹⁹ Judeu ag tÿ ti vÿ tag mẽ kÿ ag tóg vënh kãpãm kÿ nÿtÿ mǎn mü gé. ²⁰ Ûn e tóg ti to: "jagrẽ kórég ti nÿ, krÿ vënhmÿ ti nÿ, ti vÿ mẽ sór tÿg nÿ," he mü. ²¹ Hã ra ù ag tóg: "ün pi(jé) ã jagrẽ kórég hã ra vënh vÿ há tó tÿ'," he mü. "Ûn kyvó tÿ há' he ki kagtÿg tóg nÿ gé, ün jagrẽ kórég ti," he ag tóg mü, Judeu ù ag, ù tÿ Jesus to há nÿtÿ ag.

Judeu ag tÿ Jesus tén mǎn sór

²² Kejën tóg Judeu ag tÿ festa há' ù tá krÿg mü. Vãsÿ ù tÿ Judeu ag kato vãsãnsãn mü ag vÿ Topẽ jo ïn kókén ja nÿgtÿ, hã ra Judeu ag tóg kejën ti ïn han mǎn. Ag tÿ ïn han mǎn to festa hã vë sir. Prÿg kar ki ag tóg festa ên han tÿ. Kusãg mü ên kã ke ja vë, festa ên ti. ²³ Hã ra Jesus tóg venh tÿg ja nÿ, kÿ tóg Topẽ jo ïn mÿ pasa ke tÿ nÿ, Salomão tÿ jǎnkã ên tá. ²⁴ Kÿ Judeu ag tóg ti venh kãmü mü, ag tÿ ón kÿ ti ki jëmẽ jé. "Ā hẽ ri ke kã êg mÿ vënh kãmén há han ke mü?" he ag tóg mü. "Ā mÿ tÿ Cristo nÿ? Topẽ tÿ êg mÿ ün jënënh ke mü ên mÿ tÿ ã nÿ? Ha êg mÿ tó há han," he ag tóg mü, ón kÿ.

²⁵ Hã ra Jesus tóg ag mÿ: "ãjag mÿ sóg hur tó, hã ra ãjag tóg kri nÿm sór tũ nÿ," he mü. "Milagre hyn han sóg tÿ gé, inh panh tÿ inh mÿ nén tó ja ên. Ên ve kÿ ãjag tóg inh ki kanhró nÿtÿnh mü vë. ²⁶ Hã ra ãjag tóg kri fi sór tũ nÿtÿ. Ājag pi(jé) inh mæg tÿ carneiro ri ke nÿtÿ', hã kÿ ãjag tóg kri nÿm sór tũ nÿtÿ. ²⁷ Inh mæg fag vÿ inh vÿ mẽ tÿ, fag ki kanhró sóg nÿ, hã kÿ fag tóg inh mré mügtÿ. ²⁸ Fag jagfy sóg ter ke mü, kÿ fag tóg kãgter ke tũ nÿ. Mÿg vÿ fag kugmÿnh ke tũ pẽ nÿ gé, isÿ fag jy nÿgãn kÿ. ²⁹ Inh panh tÿ inh mÿ fag vin mün hã vë, inh mæg fag. Hã ra tóg vënh kar kãfór nÿ, inh panh ti. Kÿ ù pi(jé) inh panh tũ ag péju(g) tÿ', ti tÿ tÿ vënh kar kri ke nÿn kÿ. ³⁰ Inh panh mré sóg tÿ ün pir nÿ," he tóg, Jesus ti.

³¹ Ag tỹ ti vĩ tag mẽ kỹ ag tóg pó tỹ hẽn ri ke mǎg mũ sir, Judeu ag, ag tỹ tỹ ti pin kỹ ti tén jé.

³² Hã ra Jesus tóg ag mỹ: “nén ù há hã hyn han ja inh nĩ,” he mũ. “Inh panh tỹ inh mỹ: “tag han ra,” he ja ên hã han inh tĩ. Sỹ nén han ja tỹ hẽ nỹ hỹn ãjag mỹ kórég nĩ”, hã kỹ ãjag tóg isén sór mũ?” he tóg.

³³ Hã ra ag tóg ti mỹ: “êg pi(jé) nén ù há to ã tén sór mũ”, he mũ. “Êprã ke vỹ tỹ ã nĩ, êg mré ke vỹ tỹ ã nĩ, hã ra ã tóg veso: “Topẽ kósin vỹ tỹ inh nĩ,” he mũ. ã tỹ Topẽ to vĩ kónãn hã vê. Tag to êg tóg ã tén ke mũ, pó tỹ ã pin kỹ,” he ag tóg mũ, Judeu ag.

³⁴ Kỹ Jesus tóg ag mỹ: “Topẽ vĩ tỹ rán kỹ nĩ ki tag vỹ rán kỹ nĩ, ha mẽ,” he mũ. “Topẽ vỹ êprã ke ag to: “Topẽ ri ke ãjag nỹtĩ,” he tĩ,” he tóg, Topẽ vĩ rá ki. ³⁵ Kỹ tóg ù tỹ ti vĩ mẽg mũ ên ag mỹ: “Topẽ ri ke ãjag nỹtĩ,” he ja nĩ, Topẽ ti. Hã ra tóg ón tũ nĩgtĩ, Topẽ ti.

³⁶ Hã kỹ tóg vẽnhmỹ tũ nĩ gé, sỹ ãjag mỹ: Topẽ kósin vỹ tỹ inh nĩ, hen kỹ. Inh panh vỹ inh kuprêg, kỹ tóg inh jẽnê gé, isỹ ãjag tá jun jé. Topẽ to vĩ kónãn pijé’, sỹ nén tó mũ tag ti. ³⁷ Isỹ inh panh vĩ ki króm tũ nĩ ra tóg há nĩnh mũ vê, ãjag tỹ inh vĩ kri nĩm sór tũ nỹtĩ ti. ³⁸ Hã ra sóg ti vĩ ki króm tĩ. Kỹ inh vĩ tỹ ãjag mỹ kórég nĩn kỹ isỹ milagre hyn han mũ ên vemnĩ. Isỹ milagre hyn han mũ ki tóg ve há tĩ, isỹ inh panh ri ke nĩ ti, kỹ inh panh vỹ inh ri ke nĩ gé,” he tóg, Jesus ti.

³⁹ Kỹ ag tóg ti vĩ to ti se sór mǎn mũ sir, hã ra tóg kren mǎn mũ gé.

⁴⁰ Kỹ tóg vẽnh péju kỹ tĩ mũ, goj tỹ Jordão mǎra, Jesus ti. João vỹ ên tá vẽnh kar kygpég jê ja nĩgtĩ, ti tỹ ag kygpe vén kỹ. Ên ra tóg tĩ mũ sir, Jesus ti, kỹ tóg tá nĩ nĩ, ã mré mũ tĩ ag mré. ⁴¹ Kỹ ù tỹ hẽn ri ke ag vỹ tá ti venh kǎmũ mũ. Jesus to ag tóg jagnê mỹ: “ha vé, João vỹ milagre han ja tũ nĩ,” he mũ. “Hã ra tóg Jesus kǎmén. Tó há han ja tóg nĩ, João ti. Ki hã tóg tó ja nĩ, ti tỹ êg mỹ Jesus to nén tó mũ ti,” he ag tóg. ⁴² Kỹ tá ù tỹ hẽn ri ke ag tóg ti ki ge mũ sir.

11

Lázaro ter

¹ Kejên ù tỹ Jesus to há ù tóg kaga nỹ nĩ, cidade tỹ Betânia tá. Ûn kaga ên jyjyn hã vỹ: Lázaro, he mũ. Ti ve fi vỹ tỹ Maria fi nĩ, Marta fi ke gé. Betânia tá fag êmã nỹtĩ gé. ² Maria ên fi vỹ kar kỹ kejên Jesus pẽn kri nén ger há kujê, kỹ fi tóg fi gǎnh tỹ ti pẽn kykũg mũ gé. Ên fi mré pafa mũ vỹ kaga nỹ. ³ Kỹ ti ve fag vỹ Jesus mỹ vẽnh vĩ jẽnêg mũ. Ti mỹ fag tóg: “ã tỹ ù to há nĩ ên vỹ kaga nỹ,” he mũ. ⁴ Kỹ Jesus tóg mẽg mũ. Hã ra tóg ã mré mũ tĩ ag mỹ: “ti pi(jé) vẽnh kaga tag to ter ke mũ”, he mũ. “Topẽ vỹ tỹ ùn mág nĩ. Tag vỹ vẽnh ven ke mũ, ti kaga tugrĩn. Kỹ Topẽ kósin vỹ tỹ ùn mág nĩ gé. Tag vỹ vẽnh ven ke mũ gé, ti kaga tugnĩn,” he tóg, Jesus ti. ⁵ Jesus vỹ Marta fi to há tǎvĩ nĩ, fi jǎvy fi to ke gé, Lázaro to ke gé.

⁶ Hã ra Jesus tóg, ti tỹ Lázaro kaga mẽg mũ ra (tóg ver) ti venh tĩ tũ nĩ. ã tỹ hẽ tá nĩ ên tá tóg ver kurã régre han. ⁷ Tag pǎte tóg ã mré mũ tĩ ag mỹ: “mũ nỹ, ga tỹ Judéia ra,” he mũ. ⁸ Kỹ ag tóg ti mỹ: “Senhor,” he mũ. “Êg tỹ Judéia tá nỹtĩn kỹ Judeu ag tóg ã pin sór ja nĩ, pó tỹ. Ra tĩ tũg nĩ,” he ag tóg ti mỹ. ⁹ Hã ra Jesus tóg ag mỹ comparação han mũ, ti ter ke kurã jun ja tũ to. “Kurã pir vỹ tỹ 12 (ke) hora ke nĩ,” he tóg. “Êg tỹ kurã ên ki hẽn ra mũn kỹ êg tóg krĩm kenh ke tũ nĩ, êg tỹ kurã ve há han kỹ. ¹⁰ Êg tỹ hã ra kuty ra hẽn ra mũn kỹ êg tóg krĩm ke tĩ, êg tỹ kuty ki nén ù vég tũ nĩn kỹ,” he tóg, Jesus ti.

¹¹ Kỹ tóg ag mỹ: “ù tỹ êg to há nĩ ên, Lázaro ên vỹ nũr nỹ,” he mũ. “Isỹ ti tỹ mrin ke han tĩg ke nẽ ha,” he tóg. ¹² Kỹ ag tóg ti mỹ: “ti nũr nỹn kỹn kren ke mũ,” he mũ. ¹³ Hã ra Jesus tóg ti ter ja tó ja nĩ. Jó ag tóg: “ti nũr vê, ti vẽnhkán vê,” he mũ, ag tỹ ti vĩ mẽn kỹ. ¹⁴ Kỹ Jesus tóg jamã hár(a) ag mỹ kǎmén mũ. “Lázaro vỹ ter huri,” he tóg. ¹⁵ “Ãjag tugrĩn tóg inh mỹ sér tĩ, isỹ ti ter ve ja tũ nĩn kỹ. ãjag tỹ isỹ nén han mũ ven kỹ ãjag tóg inh ki ge há han ke mũ. Mũ jé ha, ti ve jé,” he tóg.

¹⁶ Kỹ Tomé he mũ ên, ag tỹ ù to: “ùn vêgnig mũ,” he tĩ ên vỹ ti mré mũ tĩ ag mỹ: “mũ jé ha, ti mré, êg tỹ ti mré kǎgter jé,” he mũ. Kỹ ag tóg mũ mũ sir.

Jesus tỹ vãnh kar rĩnrĩr han ke

¹⁷ Kĩ ag tóg Betânia tá junjun mũ. Hã ra Lázaro vỹ vãnh kej tá nỹ nĩ. Kurã tỹ 4 (ke) vễ sir, ag tỹ vãnh kej tá ti fón ja kri. ¹⁸ Hã ra ag tóg Jerusalém kakó ki nỹtĩ, 3 quilômetros hỹn, ẽmã tỹ Betânia ki. ¹⁹ Kĩ Judeu tỹ hẽn ri ke fag vỹ Marta fi venh kãmũ ja nĩ, Maria fi ke gé, fag mré vễser kri fỹ jé. ²⁰ Kĩ Marta fi tóg mễg mũ, Jesus kãtĩg ti. Kĩ fi tóg tim ke kỹ ti venh tĩ mũ. Hã ra Maria fi tóg ã ãn krẽm nĩ nĩ. ²¹ Kĩ Marta fi tóg Jesus kato tễ mũ. “Senhor,” he fi tóg. “Ã tỹ kãnĩ ra ti ter ke tũ nĩ vễ,” he fi tóg. ²² “Hã ra sóg ã ki kanhró nĩ. ã tỹ Topẽ mỹ nén ù to vĩn kỹ tóg ã mỹ nĩm ke mũ, Topẽ ti,” he fi tóg, Marta fi, Jesus mỹ.

²³ Kĩ tóg fi mỹ: “ã mré ke vỹ rĩr mãn ke mũ,” he mũ.

²⁴ “Hỹ,” he fi tóg. “Vãnh kar rĩnrĩr mãn ken kỹ tóg rĩr mãn ke mũ gé, ki kanhró sóg nĩ. Kurã tỹ ẽgno ki ke vễ,” he fi tóg.

²⁵ Hã ra Jesus tóg fi mỹ: “inh hã vỹ vãnh kar rĩnrĩr mãn han tĩ,” he mũ. “Vãnh kar rĩnrĩn mũ vỹ tỹ inh nĩ,” he tóg. “Ủ tỹ inh ki rã mũ ẽn vỹ rĩr ke mũ, ti ter kỹ nỹ (hã) ra. ²⁶ Kĩ ùn rĩr jẽ tóg, ti tỹ inh ki rã kỹ (tóg) ter mãn ke tũ pẽ nĩ. ã mỹ inh vĩ tag kri fig mũ?” he tóg, Jesus ti.

²⁷ “Hỹ,” he fi tóg. “Cristo vỹ tỹ ã nĩ, Topẽ kósĩn ti, ù tỹ ga kri jun ke mũ ẽn ti. Tag vỹ inh mỹ tỹ hã nĩ,” he fi tóg, Jesus ti mỹ. ²⁸ Kĩ fi tóg tĩ mũ, fi jãvy fi jé prěr jé, Maria fi.

Jesus fỹ

Kỹ Marta fi tóg Maria fi tá jun kỹ fi mỹ: “ẽg Senhor vỹ jun, kỹ tóg ã ve sór mũ,” he mũ. ²⁹ Fi tỹ tag mẽ kỹ fi tóg tim ke kỹ tĩ mũ, Jesus ve jé. ³⁰ Hã ra tóg ẽmã ẽn ra rã ja tũ nĩ ver. Ver tóg tá nĩ nĩ, Marta fi tỹ hẽ tá ti mré vễmẽn ja ẽn tá. ³¹ Kĩ Judeu fag vỹ vэг mũ, Maria fi tỹ tim ke kỹ tĩg mũ ti. Fi mré kygfỹ jé fag kãmũ ja nĩ, Judeu fag. Fag tỹ fi tĩg ve kỹ fag tóg fi nón kãmũ mũ gé. “Fi hỹn ti kej ra tĩg sór mũ, tá fỹ jé,” he fag tóg mũ, hã kỹ fag tóg fi nón kãmũ mũ.

³² Kĩ Maria fi tóg Jesus tá jun mũ. Fi tỹ ti ve kỹ fi tóg ti pẽn krẽm mũg ke mũ. Ti mỹ fi tóg: “Senhor,” he mũ. “Ã tỹ kãnĩ ra ti ter ke tũ nĩ vễ,” he fi tóg mũ gé. ³³ Kĩ Jesus tóg fi fỹ mũ vэг mũ, kỹ tóg Judeu tỹ hẽn ri ke fag vэг mũ gé, fi nón kãmũ mũ fag. Kỹ tóg ti mỹ e tãvĩ tĩ. ³⁴ “Ti hẽ kã nỹ?” he tóg mũ sir. Kỹ ag tóg ti mỹ: “mũ nỹ, ti ve jé,” he mũ. ³⁵ Kĩ Jesus tóg fỹ mũ. ³⁶ Kĩ Judeu ag tóg: “ha vé,” he mũ. “Ti to há tãvĩ tóg nĩ, hã kỹ tóg fỹ mũ,” he ag tóg. ³⁷ Hã ra ag kãmĩ ù tóg: “ti tỹ há’ he ja tũ tóg nĩ,” he mũ. “Ủn kyvó kanẽ tỹ há’ he ja tóg nĩ, ti tỹ hẽ ri ken kỹ ti tỹ há’ he ja tũ nĩ nẽ, ti ter tũ nĩ jé? Ti mỹ tỹ hẽ ri ke tũ nĩ vỹ, ti kaga tỹ?” he ag tóg, Jesus to.

Jesus tỹ Lázaro rĩn mãn

³⁸ Kỹ tóg Jesus mỹ e tãvĩ tĩ. Kỹ tóg ti tỹ vãnh kej kỹ nỹ ẽn ra tĩ mũ. Hã ra ti kej vỹ tỹ pãrô nor nĩ, kỹ tóg pó mág tỹ nĩfẻnh kỹ nĩ, ti kej nor ti. ³⁹ Kĩ Jesus tóg ag mỹ: “ha pó tag kunũ,” he mũ. Kỹ Marta fi, ùn ter kỹ nỹ ẽn ve fi vỹ ti mỹ: “Senhor,” he mũ. “Ti hỹn ger nỹ ha. Kurã tỹ 4 (ke) vễ ha, ẽg tỹ ti fón ja kri,” he fi tóg mũ. ⁴⁰ Hã ra Jesus tóg fi mỹ: “ã mỹ sóg: ã tỹ inh ki rã há han kỹ ã tóg venh ke mũ, Topẽ tỹ tỹ ùn mág nĩ ti, he ja nĩ,” he mũ. ⁴¹ Kĩ ag tóg pó ẽn kunũg mũ.

Kỹ Jesus tóg kanhkã ki ẽvãnh mũ. Kỹ tóg: “panh’,” he mũ. “Inh mỹ tóg há tĩ. Inh vĩ tag jẻmẻg ã tóg mũ. ⁴² Jẻmẻg ã tóg tĩ, inh vĩ ti, hã kỹ ã tóg sỹ ã mỹ vĩ tag jẻmẻg mũ gé. Hã ra sóg jamã hár(a) ã mré vĩ mũ, ù tỹ ki nỹtĩ kar fag tỹ inh vĩ mẽ jé, fag tỹ inh ki ge jé, fag tỹ iso: “Topẽ tỹ ti jẻnẻ vễ,” he jé,” he tóg, Jesus ti.

⁴³ Tag tó kar kỹ tóg jamã hár(a) prěr mũ. “!..Lázaro, kuneg..!” he tóg. ⁴⁴ Kĩ ùn ter ja ẽn tóg kãtĩg mũ sir, ã kej kãki tóg kãkutẻ mũ sir, mỹr, ha mẽ. Ti pẽn vỹ sigse kỹ nỹtĩ, ti nĩgẻ ke gé, kỹ ti kakã vỹ pãg kỹ nĩ gé. Kỹ Jesus tóg ag mỹ: “ha ti kava,” he mũ, “ti tĩg jé,” he tóg. Kỹ ag tóg ti kyvãn kãn mũ sir.

⁴⁵ Kỹ ù tỹ Maria fi mrẻ kygfỹ jẻ kãmũ tỹ hẽn ri ke fag vỹ Jesus ki ge mũ sir, fag tỹ Jesus tỹ ti rĩn mãn mũ ẽn ven kỹ. ⁴⁶ Hã ra ù ag tóg Fariseu ag mỹ tẻnh mũ mũ, Jesus tỹ ti rĩn mãn ja ti.

*Ag tỹ Jesus tén ke to jykrén
(Mt 26.1-5; Mc 14.1-2; Lc 22.1-2)*

⁴⁷ Kỹ Fariseu ag tóg mễg mũ, Jesus tỹ Lázaro rĩn măn ja ti. Topẽ tũ ki rĩr tĩ to pã'i ag vỹ mễ kãn mũ gé. Kỹ ag tóg vễnh jyvẽn tĩ kar ag jé prěr mũ. “Èg hỹn ti tỹ hẽ ri kenh ke mũ?” he ag tóg mũ, Jesus to. “Milagre tỹ hẽn ri ke hyn han tóg tĩ. ⁴⁸ Èg tỹ ti kato vāsãn tũ nĩn kỹ tóg ãg mỹ vễnh kar tỹ ti ki genh ha mễ tĩ. Kỹ ãg fóg tỹ Romano ag vỹ ãg kato vāsãnsãn ke mũ. Topẽ jo ãn kókén jé ag tóg ke mũ, kỹ ag tóg ãg kãgtén kãn ke mũ gé, ãg fóg tỹ Romano ag, ha vemnĩ,” he ag tóg, vễnh jyvẽn tĩ ag.

⁴⁹ Kỹ pã'i ag kãmĩ ù vỹ tỹ Caifás nĩ. Prỹg ẽn kã tóg tỹ Topẽ tũ ki rĩr tĩ to pã'i mág nĩ, Caifás ti. Èn vỹ tóg ag mỹ: “to jykrén há han tũ ajag nỹtĩ,” he mũ. ⁵⁰ “Tag to jykrén nĩ, ha mễ. Ûn pir ter ke tóg kórég nĩ, hã ra tóg povo kãgter kãn kórég jakrêm nĩ. Kỹ ti hỹn ãg povo jagfy ter ke mũ, Jesus ti,” he tóg, Caifás ti. ⁵¹ Hã ra tóg vėsóg ki tag to jykrén ja tũ nĩ. Prỹg ẽn ki tóg tỹ Topẽ tũ ki rĩr tĩ to pã'i mág nĩ, hã kỹ Topẽ kuprĩg vỹ ti krĩn ja nĩ, ti tỹ Jesus to: “ãg povo jagfy tóg ter ke mũ,” he jé, Caifás ti. ⁵² Hã ra Judeu ag tãvĩ jagfy ke pijé'. Topẽ krẽ kar jagfy ke ja vễ. Ti tỹ vễnh kar tỹ ùn pir han sór ja vễ, Jesus ti, hã jé tóg ãg jagfy ter ja nĩ, ù tỹ povo kar kãmĩ ti ki genh ke mũ ag kar jagfy.

⁵³ Pã'i ag tỹ tỹ vემén kar kỹ ag tóg ti tén ke to jykrén mũ sir. ⁵⁴ Hã kỹ Jesus tóg vễnh péju kỹ tĩ mũ, ga kórég ra, ẽmã tỹ Efraim ra. Judeu ag mĩ tóg tĩg mãn tũ nĩ sir. Efraim hã tá tóg nĩ nĩ ver, kỹ ti mré mũ tĩ ag vỹ ti mré tá nỹtĩ gé.

⁵⁵ Hã ra Judeu ag tỹ festa tỹ Páscoa há ù vỹ kakó tĩ ha. Kỹ ù tỹ hẽn ri ke ag tóg Jerusalém ra mũ mũ, Páscoa ẽn ve jé. To hã ag tóg ra mũ mũ, vễnh jãnhkrigkrig jé, Judeu ag jykre ki. ⁵⁶ Tá ag tóg Jesus jãvãnh mũ, Topẽ jo ãn tá nỹtĩ kỹ. Kỹ ag tóg jagnẽ mỹ: “ti ã mỹ hỹn hẽ ri ke mũ?” he mũ. “Ti mỹ hỹn festa to kãtĩg ke mũ vỹ?” he ag tóg mũ, jagnẽ mỹ. ⁵⁷ Hã ra Topẽ tũ ki rĩr tĩ to pã'i ag vỹ vễnh kar mỹ vễnh vĩ jẽnẽ ja nĩgtĩ, Fariseu ag mré hã. “Ajag tỹ ti ve kỹ ãg mỹ tónh kãmũmnĩ,” he ja ag tóg nĩ, vễnh kar mỹ. Ag tỹ ti se sór vễ, hã kỹ ag tóg ke mũ.

12

*Betânia tá
(Mt 26.6-13; Mc 14.3-9)*

¹ Festa tỹ Páscoa to hã ke vễ sir, kurã tỹ 6 (ke) vỹ jun nỹ ha. Kỹ Jesus tóg Betânia ra tĩg mãn mũ, Lázaro jamã ra, ùn rĩr mãn mũ ẽn jamã ra. ² Tá fag tóg Jesus mỹ festa han mũ. Kỹ Marta fi tóg vễjẽn ki rĩr mũ. Lázaro vỹ Jesus mré nĩ nĩ, mesa to. ³ Kỹ Maria fi tóg nén ger há ma kãtĩ mũ, garrafa fór, ùn kaja e. Èn tỹ fi tóg Jesus pẽn kri kujẽg mũ, kỹ fi tóg ã gãnh tỹ kykũg mũ, ti pẽn ti. Kỹ ger há ẽn tóg ãn kar ẽn kri rùm ke mũ.

⁴ Kỹ tóg Judas Iscariotes mỹ e tĩ, ù tỹ Jesus mré mũ ẽn ag kã ù tag mỹ, ù tỹ pã'i ag mỹ Jesus ven ke mũ tag mỹ. Fi tỹ ger há tỹ ti pẽn to tĩn kỹ tóg ti mỹ e tĩ, kỹ tóg fi to: ⁵ “fi tỹ ger há ẽn fón ke vễ vễ, jãnkamy tỹ hẽn ri ke to,” he mũ. “Fi tỹ ùn jagãgtar ag mỹ jãnkamy ẽn kã vễnh kãpópãm jé vễ vễ,” he tóg mũ, Judas ti. ⁶ Hã ra tóg tag tó, ti tỹ Jesus mỹ jãnkamy ki rĩr kỹ. Hã ra tóg ti jãnkamy péju(g) tĩ. Hã kỹ tóg fi to tag tó ja nĩ, Judas ti. Ti tỹ ùn jagãgtar ag to jykrén ja pijé'. Ti tỹ jãnkamy ẽn mãn sór ja vễ. ⁷ Hã ra Jesus tóg ti mỹ: “fi to vĩ tũg,” he mũ. “Fi tỹ nén ger há ẽn nĩm han ja vễ, fi tỹ iser jé inh kri kujẽn jé, isỹ inh kej kãkã nỹ jé. Ki hã fi tóg han ja nĩ. ⁸ Ûn jagãgtar ag vỹ ajag mré nỹtĩ, tũ henh ke tũ ag tóg nỹtĩ. Ag jãvo sóg kãnhmar ajag mré nĩ mãn ke tũ nĩ,” he tóg, Jesus ti.

Ag tỹ Lázaro tén sór

⁹ Kỹ Judeu tỹ hẽn ri ke ag vỹ mễg mũ, Jesus tỹ Betânia tá nĩ ti, kỹ ag tóg ti venh kãmũ mũ. Hã ra ag tóg Lázaro ve sór mũ gé, ùn rĩr mãn mũ ẽn ti. ¹⁰ Pã'i ag tóg Lázaro tén sór mũ gé sir. ¹¹ Judeu tỹ hẽn ri ke ag vỹ Jesus ki ge kỹ nỹtĩ, ti tỹ Lázaro rĩn mãn ja tugrĩn, hã kỹ ag tóg Lázaro tén sór mũ.

*Jesus tỹ Jerusalém ra tĩg
(Mt 21.1-11; Mc 11.1-11; Lc 19.28-40)*

¹² Tỹ vaj kỹ Jesus tóg Jerusalém ra tĩ mũ. Kỹ ùn e ag tóg Jesus tỹ Jerusalém ra tĩ mẽg mũ sir, ù tỹ festa venh kãmũ mũ ãn ag. ¹³ Kỹ ag tóg ti ve jé kãpa mũ, Jerusalém tá. Tãnh féj génh kỹ ag tóg ti venh kãmũ mũ. Kỹ ag tóg: “!..Viva..!” he mũ. “!..Sér tóg tĩ ãg mẽ..! !..Ëg jóg mág vỹ ti jẽnẽ..! !..Israel kri pã'i mág pẽ vẽ..!” he ag tóg, prẽnprẽr kỹ. ¹⁴ Hã ra Jesus vỹ burrico sĩ ve ja nĩ, kỹ tóg kri nĩ kỹ Jerusalém ra tĩ mũ. Hã ra tóg rán kỹ nĩ, Topẽ vỹ tỹ rán kỹ nĩ ki, ti tỹ burrico sĩ kri tĩg ke ti, ha mẽ: ¹⁵ “kamẽg tũg nĩ, Sião tá ke kar',” he tóg. “Ãjag pã'i mág vỹ ùri jun ke mũ ha. Burrico sĩ kri tóg jun ke mũ ha,” he ja tóg nĩ, Topẽ vỹ rán ki, Jesus to.

¹⁶ Kurã ãn kã ag tóg ti rá tag to jykrén ja tũ nĩ ver, Jesus mré mũ tĩ ag. Jesus tỹ kanhkã ra vỹn ke kar kỹ ag tóg kejẽn to jykrén mũ ha, ti to rán kỹ nĩ ãn to, hã ra tóg ge ja nĩ.

¹⁷ Û tỹ Jesus mẽ prẽnprẽr mũ ag kãmĩ ù ag tóg Lázaro ve ja nĩ, Jesus tỹ ti rĩn mãn kỹ. Lázaro tỹ vẽnh kej kãkã nỹ ra Jesus tóg ti jé prẽr kỹ ti rĩn mãn ja nĩ. Û tỹ tag vég mũ ãn ag vỹ jagnẽ mẽ kãmén mũ sir. ¹⁸ Hã kỹ ùn e ãn ag tóg Jesus kato pêtẽ mũ, ti tỹ jun ke kỹ. Û ter kỹ nỹ rĩn mãn ãn ve ja tũ ag tóg nỹtĩ, kỹ tóg ag mẽ e tĩ. ¹⁹ Kỹ Fariseu ag tóg jagnẽ mẽ: “ha vé, ag pi(jé) ãg vỹ jẽmẽ sór mũ’,” he mũ. “Ti hã mré ag tóg mũ mũ,” he ag tóg, ti to jũgũ kỹ, pã'i ag.

Fóg tỹ Grego ag tỹ Jesus ve sór

²⁰ Festa venh kãmũ mũ ag vỹ e nỹtĩ. Ag kãmĩ ù vỹ tỹ ga tỹ Grécia tá ke nỹtĩ gé. ²¹ ãn ag vỹ Jesus ve sór mũ. Hã kỹ ag tóg Filipe mré vỹ mũ. Ga tỹ Galiléia tá ãmã tỹ Betsaida tá ke vỹ tỹ ti nĩ, Filipe ti. Kỹ fóg tỹ Grego ãn ag tóg Filipe mẽ: “ãg tỹ Jesus venh há tóg tĩ,” he mũ.

²² Kỹ Filipe tóg André mẽ tónh tĩ mũ, kỹ ag tóg Jesus mẽ tónh mũ mũ, Filipe ti, André ti ke gé.

²³ Hã ra Jesus tóg ag mẽ: “inh kurã vỹ hur jun,” he mũ. “Topẽ vỹ isỹ ùn mág han ke mũ ha. Tỹ sóg ãprã ke fi kósin nĩ,” he tóg. ²⁴ “Ki hã sóg ãjag mẽ tó mũ, hã kỹ sóg tó mũ. Isén jé ag tóg ke mũ, ùn e ag tỹ isugrĩn rĩnrĩn nỹtĩ jé. Ëg tỹ nén ù fy krãn ri ke ti nĩ. Ti péju(g) ãg tóg tĩ, ga ki, kỹ tóg vag tĩ, nén ù fy fár ti. Hã ra ti fy ãn tóg rĩr mãn kỹ mur mũ, kỹ tóg mog kỹ kanẽ e han mũ. Ëg tỹ ti krãn tũ nĩ ra tóg kanẽn ke tũ nĩ vẽ. ²⁵ ãn ri ke tóg nĩ, ãg mré hã. Ëg hã vỹ tỹ nén ù fy ri ke nỹtĩ gé. Ëg tỹ ãg jykre si tovãnh kỹ ãg tóg ãg rĩr krỹg ja tũ ãn venh ke mũ. Jãvo ãg tỹ ãg jykre si tovãnh pẽ han tũ nĩn kỹ ãg rĩnrĩn ke ãn tóg krỹ' he mũ sir. Kỹ ãg kanhkã tá vég tũ nĩ sir. ²⁶ ãjag tỹ inh rãnrãj han sór kỹ inh ri ke han nĩ, kỹ ãjag tóg tỹ inh mré ke nỹtĩnh mũ, kỹ ãjag tóg inh mré kanhkã tá nỹtĩnh ke mũ gé, ãjag tỹ inh rãnrãj han kỹ. Kỹ inh panh vỹ ãjag tỹ ùn mág han ke mũ gé, inh ri ke han jé tóg ke mũ, ãjag tỹ,” he tóg, Jesus ti.

Jesus tỹ ã ter ke tó

²⁷ “Ùri tóg inh mẽ e tĩ,” he tóg. “Krĩ kufy jagy isóg nĩ. Ge ra sóg inh panh mẽ: “inh kren han nĩ, inh jagtar tũ nĩ jé,” he sór tũ nĩ. Inh vỹsrénh hã jé sóg kãtig, ti tỹ inh mẽ jagy pẽ (hã) ra. ²⁸ Tag tó jé sóg ke mũ, inh panh mẽ, hã vỹ: “vẽnh kar mẽ ven nĩ, ã tỹ tỹ ùn mág nĩ tag ti,” he mũ,” he tóg, Jesus ti.

Ti tỹ tag tó kỹ vãhã Topẽ tóg ti mẽ vỹ mũ, kanhkã tá nĩ kỹ. Kỹ tóg jamã hár(a) ti mẽ: “ag mẽ sóg ven huri,” he mũ. “Hã ra sóg ag mẽ ven mãn ke mũ gé, isỹ tỹ ùn mág nĩ ti,” he tóg, Topẽ ti. Kanhkã tá nĩg kỹ tóg ti mẽ tó mũ. ²⁹ Kỹ ùn e ag tóg mẽg mũ, Topẽ vỹ ti, ag tỹ ãprã nỹtĩ ra. Kỹ ag tóg ti vỹ to: “ta tỹ tỹrỹrỹ he hỹn,” he mũ. Ag tỹ ki kagtĩg nỹtĩn kỹ ag tóg Topẽ vỹ to: “ta hỹn,” he mũ. Hã ra ù ag tóg: “Topẽ tỹ jẽnẽ jafã ù hỹn ti mré vẽnẽn,” he mũ gé, ag tỹ ki kagtĩg nỹtĩn kỹ.

³⁰ Hã ra Jesus tóg ag mẽ: “Topẽ pi(jé) isugrĩn vỹ ja nĩ’,” he mũ. “Ãjag tugnĩn ke ja vẽ,” he tóg. ³¹⁻³² “Hã kỹ ãjag tóg ka to isanh ke mũ, kynhmỹ. Topẽ tỹ ãprã ke ag jykre to: “kórég ti nĩ,” he vỹ, ti tỹ tag ki ùn mág tỹ Japo he mũ ãn to: ti kutẽ jé, he vỹ, hã kỹ ag tóg cruz to isãg mũ. ãn kã vẽnh kar ag vỹ inh ki genh ke mũ, isỹ ag krĩn kỹ, ha vemnĩ,” he tóg, Jesus ti. ³³ Tag tó tóg, ã mré mũ tĩ ag mẽ, ã ter ke kãmén kỹ, ag tỹ cruz to ti sanh ke ti.

³⁴ Kÿ vënh kar ag tóg ti mÿ: “hã ra ag tóg ãg mÿ: “Cristo vÿ ter ke tũ nĩ,” he tĩ. Topẽ vĩ ki ti nẽji rán kÿ nĩ,” he ag tóg mũ. “Jãvo ã tóg ãg mÿ: ãprã ke fi kósin ãn tÿ ag tóg cruz to ti sanh ke mũ, kynhmÿ, he mũ. Û to ke nẽ, hÿn, ãprã ke fi kósin ãn?” he ag tóg, Jesus mÿ.

³⁵ Kÿ tóg ag mÿ: “ver sóg ãjag mré nĩ nĩ, sÿ ãjag mÿ kurã han jé,” he mũ. “Kurã ki inh japry jagma mũmnĩ. Kãnhmar ti kuty nĩnh mũ. Ajag tÿ kuty ra inh jamĩn jagma mũ sór mũ ra ãjag tóg vãgfor mũnh ke mũ. ³⁶ Isÿ ver ãjag mré nĩn kÿ inh ki ge sórmnĩ, ãjag tÿ tÿ inh mré ke nÿtĩ jé. Kÿ ãjag tóg kurã ki nÿtĩ, isÿ tÿ jẽngrẽ ri ke nĩn kÿ,” he tóg, Jesus ti. Æ tÿ tag tó kar kÿ tóg tĩ mũ, ag ré kÿ. Vënh péju kÿ tóg tĩ mũ.

Judeu ag tÿ Jesus ki ge sór tũ

³⁷ Jesus vÿ ag rĩnve nén tÿ hẽn ri ke hyn han ja nĩgtĩ, ãg tÿ nén han vãnh tÿ hẽn ri ke, milagre tÿ hẽn ri ke, hã ra ag tóg ti ki ge sór tũ nĩgtĩ. ³⁸ Hã ra Isaías vÿ tag rán ja nĩ gé. “Ëg jóg mág,” he ja tóg nĩ. “Isÿ ag mÿ ã kãmén mũ ra ag tóg inh vĩ kri nĩm sór tũ nÿtĩ,” he ja tóg nĩ. “Ag tÿ ã tÿ nén han mũ ãn vég mũ ra ag tóg: “Topẽ jykre vÿ tar nĩ,” he ja tũ nĩ,” he ja tóg nĩ, Isaías ti. Hã ra tóg ge nĩgtĩ, Jesus tÿ ag mÿ Topẽ vĩ tón kÿ, ti tÿ ag mÿ milagre hyn han kÿ.

³⁹⁻⁴⁰ Kÿ Isaías vÿ ag to tag tó gé, ha mẽ. “Topẽ vÿ ag kyvó han, nĩgrẽg kutu, hã kÿ ag tóg mẽg tũ nĩgtĩ, kÿ ag tóg to jykrén sór tũ nĩgtĩ gé, kÿ ag tóg inh ki ge sór tũ nĩgtĩ gé, kÿ sóg ag tÿ há' henh ke tũ nĩ gé,” he ja tóg nĩ gé, Isaías ti, ti tÿ Topẽ vĩ tó kÿ. Jesus to tóg ke mũ. Hã kÿ ag tóg Jesus ki ge sór tũ nĩgtĩ. ⁴¹ Isaías vÿ Jesus ve ja nĩ, ti tÿ tÿ ãn mág nĩ ti, ãn tar ti. Jesus mur to hã ke ja vë, vãsÿ. Ti tÿ ti ve hã kÿ tóg tag tó ja nĩ, ti to, Isaías ti.

⁴² Hã ra ù ag tóg ti ki ge kÿ nÿtĩ gé, pã'i ù ag mré hã. Hã ra ag tóg tó sór tũ nĩgtĩ. Fariseu ag kamẽg ag tóg tĩ, hã kÿ ag tóg tó sór tũ nĩ. “Fariseu ag vÿ ãg pan ke mũ, ãg tÿ ãg vënh kanhrãnjafã ra mũ tũ nĩ jé, ãg tÿ ãg mré ke ag mré tá vënh mãn kÿ nÿtĩ tũ nĩn jé,” he ag tóg mũ, hã kÿ ag tóg Jesus tó tũ nĩgtĩ. ⁴³ Ëprã ke ag tÿ ag to vĩ há han mũ tag vÿ ag mÿ sér tĩ, kÿ Topẽ tÿ ag mÿ vĩ há han mũ vÿ ag mÿ pãgsĩ tĩ. Há ti nĩ gé vë vë, hã ra ag tóg ãprã pã'i ag hã kamẽg mũ.

Ag jykre kórég vënh ven ke

⁴⁴ Kÿ Jesus vÿ jamã hár(a) ke mũ, vënh kar tÿ ti vĩ mẽ jé. Kÿ tóg: “ãjag tÿ inh ki ge kÿ ãjag tóg ù tÿ inh jẽnẽg mũ ãn ki ge mũ gé,” he mũ. ⁴⁵ “Ajag tÿ inh ve kÿ ãjag tóg ti vég mũ gé, ù tÿ inh jẽnẽg mũ ãn ti. ⁴⁶ Sÿ ãjag mÿ kurã han hã jé sóg kãtĩg. Ajag tÿ inh ki ge kÿ sóg ãjag mÿ kuty ãn tÿ tũ' he mũ. ⁴⁷ Ajag tÿ ón kÿ inh vĩ mẽg mũ ra sóg ãjag to: “kórég ãjag nÿtĩ,” henh ke tũ nĩ. Inh pi(jé) ãjag mÿ: “kórég ãjag nÿtĩ,” he jé kãtĩg'. Sÿ ãjag krenkren han hã jé sóg kãtĩg. ⁴⁸ Ajag tÿ iso é he kÿ, ãjag tÿ inh vĩ to é he kÿ tóg vënh ven mũ, ãjag jykre kórég ãn ti, ha vemnĩ. Isÿ ãjag mÿ inh vĩ tó mũ ra ãjag tóg inh vĩ kri nĩm jãvãnh nÿtĩ. Hã tigrĩn tóg vënh ven ke mũ, ãjag jykre kórég ti, kurã tÿ ãgno tá hã. ⁴⁹ Inh pi(jé) isÿ vësóg ki nén to jykrén ja ãn tó tĩ'. Inh panh vĩ há tó ja inh nĩgtĩ, ù tÿ inh jẽnẽg mũ ãn vĩ ti. ãn vÿ inh mÿ: “tag tómnĩ, tag tó tũg nĩ,” he tĩ. ⁵⁰ Ti tÿ inh mÿ nén tó mũ vÿ ãjag rĩnrĩr han ke mũ, ki kanhró sóg nĩ. Hã kÿ sóg inh panh tÿ inh mÿ nén tó mũ ãn há tó tĩ, tag tãvĩ,” he tóg, Jesus ti.

13

Jesus tÿ ã mré mũ tĩ ag pẽn kugpe

¹ Hã ra festa tÿ Páscoa vÿ kakó tãvĩ tĩ sir, hã ra tóg tá krÿg tũ nĩ ver. Kÿ Jesus vÿ ki kanhró nĩ, ti tÿ ùri ter ke ãn ti. Ti kurã vÿ jun ja nĩ, ti tÿ ã panh ra tĩg jé. Æ mré mũ tĩ ag to tóg há tãvĩ ja nĩgtĩ, ag tÿ tÿ ti tũ nÿtĩn kÿ. Kÿ tóg ã ter ke kurã ãn kã ag to há tãvĩ nĩ gé, tag ki, ãprã, ti mré mũ tĩ ag to.

² Kÿ tóg rãkãnh kÿ ag mré jẽg mũ. Hã ra Japo vÿ Judas krĩn huri, ti tÿ pã'i ag mÿ Jesus ven tĩg jé, ag tÿ ti se jé. Judas Iscariotes ãn vë, Simão kósin ãn. ³ Hã ra Jesus tóg ki kanhró nĩ, ã tÿ Topẽ tá kãtĩg ja ãn ki, kÿ tóg ki kanhró nĩ gé, ã tÿ ra tĩg mãn ken ki. Kÿ Topẽ tóg

ti tar han mũ gé, ti tỹ nén ù kar ki ag mỹ tỹ ùn mág jê jé. Ên ki kanhró tóg nĩ gé, Jesus ti. ⁴ Tag kar to jykrén kỹ tóg vāhā jēgnē mũ sir, jēn kar kỹ. Jēgnē kỹ tóg ã capa kunũnh kỹ vēnh pēfi jafā tỹ vēnh pēfig mũ. ⁵ Goj tỹ tóg pēnky kākĩ kujēg mũ, kỹ tóg ã mré mũ tĩ ag pēn kugpég mũ. Vēnh pēfi jafā ên tỹ tóg ag pēn kykũg mũ. ⁶ Kỹ tóg Simão Pedro tá jun mũ gé, ti pēn kugpe jé. Hã ra Pedro tóg ti mỹ: “ã pi(jé) inh pēn kugpenh ke mũ,” he mũ.

⁷ Hã ra Jesus tóg ti mỹ: “ã pi(jé) ki kanhró nĩ, sỹ ã mỹ nén han mũ ti,” he mũ. “Kar kỹ ã tóg kejēn to jykrén ke mũ,” he tóg.

⁸ Hã ra Pedro tóg ti mỹ: “vó,” he mǎn mũ. “Inh pēn kugpenh ke tũ ã tóg nĩ,” he tóg. Kỹ Jesus tóg ti mỹ: “isỹ ã pēn kupég tũ nĩn kỹ ã tóg tỹ isũ tũ nĩnh ke mũ,” he mũ.

⁹ Kỹ Pedro tóg ti mỹ: “inh kupe kǎn nĩ, ge kỹ, inh pēn, inh krĩ, inh nĩgé ke gé,” he mũ.

¹⁰ Hã ra Jesus tóg ti mỹ: “mro ã huri,” he mũ. “Ã mro kar kỹ sóg ã pēn hã kugpenh ke mũ. Jǎnhkri ã nĩ, ã mro kar kỹ. Jǎnhkri ājag nỹtĩ, hã ra ājag kāmĩ ùn pir vỹ jǎnhkri tũ nĩ,” he tóg, Jesus ti. ¹¹ Û tỹ pǎ'i ag mỹ ã ven ke mũ ên ki kanhró tóg nĩ, Jesus ti, hã kỹ tóg ag mỹ: “ājag kāmĩ ùn pir vỹ jǎnhkri tũ nĩ,” he mũ.

¹² Kỹ tóg ag pēn kugpe kǎn mũ. Ag pēn kugpe kar kỹ tóg ã kur rĩnh mǎn mũ, kỹ tóg nĩ mǎn mũ. Kỹ tóg ag mỹ: “ājag mỹ sỹ nén han ja ki kanhró nỹtĩ?” he mũ. ¹³ “Iso ājag tóg: Senhor, he tĩ. Tó há han ājag tĩ. Tỹ sóg ājag Senhor nĩ. ¹⁴ Kỹ sóg tỹ ājag professor nĩ gé. Hã ra sóg ājag pēn kugpé. Hã kỹ tóg há tĩ, ājag tỹ jagnē mỹ jagnē pēn kugpe kỹ, inh ri ke han kỹ. ¹⁵ Sỹ ājag kanhrǎn sór vē, hã kỹ sóg ājag mỹ ājag pēn kugpé. Inh ri ke han nĩ. ¹⁶ Ki hã sóg tó mũ, hã kỹ sóg ke mũ. Ēg camarada pi(jé) ājag patrão kǎfór nỹtĩ'. Kỹ Ēg tỹ ù jēnēn kỹ tóg ù tỹ ti jēnēg mũ ên kǎfór tũ nĩ gé. ¹⁷ Tag ki kanhró ājag nỹtĩ, kỹ tóg há tĩ, ājag tỹ inh ri ke han kỹ. ¹⁸ Ājag kāmĩ ù tóg tag han ke tũ nĩ, ki kanhró sóg nĩ. Ājag kuprēg inh, kỹ sóg ājag ki kanhró nĩ. Tag vỹ ājag kāmĩ ù to rán kỹ nĩ, ha mē: “ù tỹ inh mré inh jamĩ ko mũ ên vỹ isovǎnh ke mũ ha,” he ti nĩ, Topē vỹ tỹ rán kỹ nĩ ki. Isỹ tag ve jé sóg ājag kuprēg. ¹⁹ Ûri sóg ājag mỹ tó mũ, ti tỹ isovǎnh ke to hã, ājag tỹ ên ve kỹ inh ki ěkrén' he jé. Ên ve kỹ inh ki ge kỹ nỹtĩmĩ jǎvo. ²⁰ Ki hã sóg tó mũ, hã kỹ sóg ke mũ. Isỹ ājag jēgnēnh ke vē. Kỹ ù tỹ ājag mỹ vỹ há han kỹ tóg inh mỹ vỹ há han ke mũ gé, hã ra tóg ù tỹ inh jēnēg mũ ên mỹ vỹ há han ke mũ gé, ājag mỹ vỹ há han kỹ,” he tóg, Jesus ti, ti mré mũ tĩ ag mỹ.

Û tỹ pǎ'i ag mỹ Jesus ven ke

(Mt 26.20-25; Mc 14.17-21; Lc 22.21-23)

²¹ Jesus tỹ tag tó kar kỹ tóg ti mỹ e tĩ. Krĩ kufy jagy ti nĩ, kỹ tóg ã mré mũ tĩ ag mỹ: “ki hã sóg tó mũ, hã kỹ sóg ke mũ,” he mũ. “Ājag kāmĩ ù vỹ pǎ'i ag mỹ inh ven ke mũ,” he tóg. ²² Kỹ tóg ag mỹ e tĩ. Ki kagtĩg ag nỹtĩ, kỹ ag tóg véké jagnē ki ěvǎnh mũ.

²³ Hã ra ù tóg Jesus rǎ hã nĩ nĩ, ên kǎ, ti tỹ ti to há nĩn kỹ. ²⁴ Kỹ Pedro tóg ti mỹ ã nĩgé ven mũ, kỹ tóg ti mỹ: “ti ki jēmē há han,” he mũ, ù tỹ Jesus rǎ hã nĩ ên mỹ. ²⁵ Kỹ tóg ti to grēn ke kỹ ti mỹ: “Senhor,” he mũ. “Û tỹ hē nē?” he tóg ti mỹ. ²⁶ Kỹ Jesus tóg ti mỹ: “ēmĩ tỹ sóg ti kume kǎ tỹ pun ke mũ,” he mũ, “kỹ sóg ti mỹ nĩm ke mũ sir. Ên hã vē,” he tóg mũ, Jesus ti. Tag tó kỹ tóg ěmĩ mǎg mũ, kỹ tóg ti kume kǎ tỹ pun ke mũ sir, kỹ tóg Judas mỹ nĩm mũ, Simão Iscariotes kósĩn ên mỹ. ²⁷ Kỹ Judas tóg ko mũ. Ti tỹ ko kar mũ ra vēsỹmér Satanás tóg ti kǎra rǎ ja nĩ sir. Kỹ Jesus tóg ti mỹ: “ã tỹ nén han sór mũ ên han tĩg nĩ, to fũrũn nĩ,” he mũ. ²⁸ Hã ra ù ag tóg ki kagtĩg nỹtĩ, Jesus tỹ ti mỹ nén tó mũ ên ki. ²⁹ Judas vỹ ag jǎnkamy ki rĩr tĩ. Hã kỹ ag kāmĩ ù tóg: “ti hỹn ti mỹ: “Ēg mỹ festa to compra ù han tĩg,” he sór mũ, ke tũ nĩ kỹ ti tỹ ùn jagāgtar ag mỹ nén ù nĩm ke hỹn,” he ag tóg mũ. ³⁰ Hã ra Judas tóg ěmĩ ên ko kar kỹ (tóg) króm ke kǎkutē mũ, re ra. Hã ra tóg kuty nỹ.

Vēnh jykre tǎg

³¹ Judas tĩg kar kỹ Jesus tóg ã mré mũ tĩ ag mỹ: “vāhā tóg vēnh ven ke mũ, isỹ tỹ ùn mág nĩ ti,” he mũ. “Tỹ sóg ěprǎ ke fi kósĩn nĩ. Hã ra sóg vēnh kar mỹ Topē tỹ tỹ ùn mág nĩ tag ven ke mũ gé. ³² Isỹ vēnh kar mỹ Topē tỹ tỹ ùn mág nĩ ven kỹ Topē tóg vēnh kar

mỹ ven ke mũ gé, isỹ tỹ ùn mág nĩ ti. Vēsỹmér tóg tag han ke mũ, Topẽ ti, ha vemnĩ,” he tóg, Jesus ti.

³³ “Inh jāvỹ', ājag mré sóg nĩ sĩ pẽ han mũ ver,” he tóg. “Inh jāvānh jé ājag tóg ke mũ, hã ra ājag tóg inh venh ke tũ nĩ. Tag tó inh, Judeu ag mỹ, hã ra sóg ājag mỹ tag hã tó mũ gé, hã vỹ: ājag pi(jé) isỹ hẽn ra tĩg ke mũ ẽn ki kanhró nỹtĩ', he mũ. ³⁴ Kỹ sóg ājag mỹ vẽn jykre tãg nĩm sór mũ, hã vỹ: jagnẽ to há tãvĩ nỹtĩmnĩ, he mũ. Ājag to há tãvĩ sóg nĩ gé. Tag ri ke han nĩ, jagnẽ mỹ. Vẽn jykre tãg hã vẽ. ³⁵ Ājag tỹ jagnẽ to há nỹtĩn kỹ vẽn kar vỹ ājag jykre ki kanhrān ke mũ. “Ti mré ke vỹ tỹ ag nỹtĩ,” he jé ag tóg ke mũ ājag to, ag tỹ ājag jykre há ve kỹ,” he tóg, Jesus ti.

Jesus tỹ Pedro mỹ nén tó mũ

(Mt 26.31-35; Mc 14.27-31; Lc 22.31-34)

³⁶ Kỹ Simão Pedro tóg Jesus mỹ: “Senhor,” he mũ. “Ā tỹ hẽ ra tĩg sór nẽ?” he tóg. Kỹ Jesus tóg: “ẽn ra ā tĩg ke tũ nĩ ver, inh mré,” he mũ. “Kar kỹ ā tóg kejẽn ẽn ra tĩg ke mũ gé, inh nón,” he tóg.

³⁷ Kỹ Pedro tóg ti mỹ: “isỹ ā mré tĩg há tóg tĩ,” he mũ. “Isỹ ā tigrĩn ter ken kỹ tóg inh mỹ tỹ nén ù tũ tĩnh mũ,” he tóg. ³⁸ Hã ra Jesus tóg ti mỹ: “vó,” he mũ. “Ūri ā tóg ón kỹ iso: “ti ki kagtĩg sóg nĩ,” henh ke mũ. “Ti ki kagtĩg sóg nĩ,” he tãgtũ han jé ā tóg ke mũ, galo kynkyr to hã. Ki hã sóg tó mũ, ha vemnĩ,” he tóg, Jesus ti. Ti tỹ Pedro mỹ tón hã vẽ.

14

Kanhkã to ẽmĩn

¹ Kỹ Jesus tóg ā mré mũ sĩ ag mỹ: “krĩ kufy han tũg nĩ,” he mũ. “Inh ki rã há han nĩ, kỹ Topẽ ki rã há han nĩ gé. ² Inh panh jamã tá ājag ĩn vỹ e nỹtĩ, ki hã sóg tó mũ. Ti tỹ tá tũ nỹtĩ ra sóg tónh ke tũ nĩ vẽ. Ra tĩg jé sóg ke mũ, isỹ ājag mỹ ājag ĩn kãnkãnjé. ³ Isỹ kãnkãn kar kỹ sóg tá kãtĩg măn ke mũ gé, sỹ ājag tatĩn tĩg jé, kỹ ājag tóg inh mré tá nỹtĩnh mũ. ⁴ Ti to ẽpry ki kanhró ājag nỹtĩ, sỹ hẽ ra tĩg ke to ẽmĩn ti,” he tóg.

⁵ Kỹ Tomé tóg ti mỹ: “ẽg pi(jé) ki kanhró nỹtĩ', ā tỹ hẽ ra tĩg ke ti',” he mũ. “Hã kỹ ẽg tóg ti to ẽpry ki kagtĩg nỹtĩ gé,” he tóg. ⁶ Kỹ Jesus tóg ag mỹ: “ti to ẽmĩn vỹ tỹ inh nĩ,” he mũ. “Vẽn vĩ há hã tó sóg tĩ. Inh hã vỹ ājag rĩnrĩr han ke mũ. Ū tỹ inh ki ge mũ ag vỹ inh panh venh ke mũ. ⁷ Ājag tỹ inh ki kanhró nỹtĩn kỹ ājag tóg inh panh ki kanhró nỹtĩ gé. Inh ki kanhrān ājag tóg huri, inh ve ājag tóg huri,” he tóg, Jesus ti.

⁸ Kỹ Filipe tóg ti mỹ: “ẽg mỹ ẽg jóg mág ti ven nĩ,” he mũ. “Ēg tỹ ti venh há tóg tĩ,” he tóg. ⁹ Kỹ Jesus tóg Filipe mỹ: “ā mỹ inh ki kagtĩg nĩ ver', isỹ ājag mré tĩg mág ja ra?” he mũ. “Ā tỹ inh ve kỹ ā tóg inh panh ti vэг mũ gé. Hã ra ā tóg inh mỹ: ẽg mỹ ti ven nĩ, he mũ. ¹⁰ Inh panh mré sóg tỹ ùn pir nĩ, kỹ tóg inh mré tỹ ùn pir nĩ gé. Ā mỹ tag kri fig tũ? Inh pi(jé) isỹ vēsóg ki nén to jykrén mũ tó sĩ'. Inh panh tũ hã tó sóg tĩ, ti tũ hã han sóg tĩ, inh mré tỹ ùn pir nĩ ẽn tũ ti. Kỹ tóg inh mré nén kar han mũ, inh panh ti. ¹¹ Inh vĩ kri nĩmnĩ, isỹ ā mỹ: “inh panh mré sóg tỹ ùn pir nĩ,” hen kỹ. Ā tỹ hã ra inh vĩ kri fi sór tũ nĩn kỹ isỹ nén han mũ ẽn ki ẽvānh nĩ, ā tỹ to jykrén há han jé. ¹² Ki hã sóg tó mũ, hã kỹ sóg ke mũ. Ū tỹ inh ki rã há han mũ ẽn vỹ isỹ nén han mũ ri ke han ke mũ gé, hã ra tóg isỹ nén han mũ kãfór han ke mũ, ha vemnĩ, isỹ ũri inh panh venh tĩg ken kỹ. ¹³ Kỹ sóg ājag tỹ inh mỹ nén ù to vĩ mũ ẽn hyn han kãn ke mũ, isỹ tỹ ājag kãke nĩn kỹ. Isỹ vẽn kar mỹ inh panh tỹ tỹ ùn mág nĩ ven ke vẽ, hã jé sóg ājag mỹ ājag tỹ nén to vĩ mũ ẽn hyn han ke mũ. ¹⁴ Kỹ, ājag tỹ inh mỹ nén ù to vĩnh ken kỹ sóg ẽn hyn han kãn ke mũ, isỹ tỹ ājag kãke nĩn kỹ, ha vemnĩ,” he tóg, Jesus ti.

Jesus tỹ Topẽ kuprĩg jẽnẽnh ke

¹⁵ “Ājag tỹ iso há nỹtĩn kỹ han nĩ, isỹ ājag mỹ nén tó mũ ti. ¹⁶ Kỹ isóg inh panh mỹ ti kuprĩg to vĩnh ke mũ, ti tỹ ājag mỹ ti jẽnẽ jé, ti tỹ tỹ ājag jagrẽ nĩ jé, ti tỹ ājag tar han jé, kỹ tóg ājag tovānh măn ke tũ nĩ. Ājag mỹ tóg ki hã tónh ke mũ. ¹⁷ Hã ra tóg ù tỹ inh ki

ge jāvānh ên ag mý nén ũ tónh ke tũ nĩ, ag tỹ ti ki kagtĩg nýtĩn kỹ. Ag jāvō ājag tóg ti ki kanhró nýtĩ. Ājag kátá tóg ājag mré nĩ nĩ, Topê kuprĩg ti,” he tóg, Jesus ti.

¹⁸ “Inh pi(jé) ājag tovānh ke mũ'. Isĩg mũ ra sóg vỹn kenh ke mũ, ājag to. ¹⁹ Kānhmar ũ tỹ inh ki ge jāvānh ên ag tóg inh ve mǎn ke tũ nĩ. Ag jāvō ājag tóg inh ve mǎn ke mũ. Rĩr inh nĩ nĩ, kỹ ājag tóg inh ri kén rĩr mǎn ke mũ gé. ²⁰ Ājag tỹ Topê kuprĩg tỹ ājag jagrē venh ke kurā ên ki ājag tóg inh ki kanhrān há han ke mũ, isỹ inh panh mré tỹ ũn pir nĩ ên ti. Kỹ ājag tóg inh mré tỹ ũn pir nýtĩn mũ gé, ha mẽ,” he tóg, Jesus ti.

²¹ “Ũ tỹ inh vĩ hǎ ki kanhrān mũ ên, ũ tỹ inh vĩ hǎ ki króm mũ ên hǎ vỹ iso há nĩ. Kỹ ũ tỹ iso há nĩ ên to inh panh tóg há tǎvĩ nĩ. Ên to sóg há tǎvĩ nĩ gé. Ên vỹ inh venh ke mũ,” he tóg, Jesus ti.

²² Kỹ Judas tóg ti ki jēmēg mũ. Judas Iscariotes pijé', Judas ũ vē. Ên vỹ Jesus mý: “ēg mý ā tóg vēnh ven sór mũ,” he mũ, “hǎ ra ā tóg ũ tỹ ā ki ge sór tũ ag mý vēnh ven sór tũ nĩ. Ā hē ri kenh ke mũ?” he tóg mũ.

²³ Kỹ Jesus tóg ti mý: “ũ tỹ iso há nýtĩ kar ag vỹ inh vĩ ki króm ke mũ,” he mũ. “Ũ tỹ inh vĩ ki króm mũ to inh panh tóg há nĩ, kỹ tóg ti mré ěmǎn ke mũ. Kỹ sóg ti mré ěmǎn ke mũ gé. ²⁴ Ũ tỹ iso há tũ ên vỹ inh vĩ han sór ke tũ nĩ gé. Inh pi(jé) inh vĩ hǎ tó tí'. Ũ tỹ inh jēnēg mũ ên vĩ hǎ tó sóg tí, inh panh vĩ ti,” he tóg.

²⁵ “Ājag mré sóg nĩ nĩ ver, kỹ sóg ājag mý tag kāmén mũ. ²⁶ Isĩg kar kỹ sóg ājag mý vēsýmér ũ tỹ ājag tar han ke mũ ên jēnēnh ke mũ, hǎ vỹ: Topê kuprĩg, he mũ. Inh panh vỹ ājag mý ti jēnēnh ke mũ. Ên vỹ nén ũ kar to ājag kanhrān há han ke mũ. Kỹ tóg ājag mý tó mǎn ke mũ gé, sỹ ājag mý nén tó mũ kar ti, ājag tỹ kā jatun tũ nĩ jé,” he tóg, Jesus ti.

²⁷ “Ājag krĩ kǎnhvy han jé sóg ke mũ. Sỹ ājag mý nén nĩm ke mũ hǎ vỹ: krĩ kǎnhvy, he mũ. Hǎ ra tóg ũ tỹ inh ki ge jāvānh ag krĩ kǎnhvy sĩ ên ri ke tũ nĩ, sỹ ājag mý ājag krĩ kǎnhvy han mũ ti. Krĩ kǎnhvy pē ājag nýtĩn ha. Hǎ kỹ krĩ kufy han tũg nĩ. Kanē jur han tũg nĩ gé. ²⁸ Inh vĩ tag mẽ ājag tóg huri, isỹ ājag mý: “tĩg jé sóg ke mũ, kar kỹ sóg ājag to vỹn kenh ke mũ gé,” he mũ ti. Ājag tỹ iso há nýtĩ ra tóg ājag mý sér tĩn mũ vē, isỹ inh panh venh tĩg ke ti. Inh panh vỹ inh kǎfór nĩ. ²⁹ Ũri sóg ājag mý tag kāmén mũ, ājag tỹ ên venh ke to hǎ. Kỹ inh mĩ ěkrén nĩ, ājag tỹ ên venh ken kỹ. Ên kǎ inh ki ge kỹ nýtĩm nĩ. ³⁰ Isỹ ājag mré vēmén tag vỹ rur nĩ ha. Ēprǎ pǎ'i mág jun ke nē ha. Hǎ ra ti pi(jé) tỹ inh krĩg mý ke nĩ'. ³¹ Hǎ ra sóg sỹ nén han ke mũ ên han sór mũ, ěprǎ ke kar ag tỹ inh jykre ve jé, isỹ inh panh to há tǎvĩ nĩ ti. Kỹ sóg inh panh tỹ inh mý nén tó mũ ên han kǎn tí. Hǎ ven sór inh mũ, ěprǎ ke kar ag mý. Mũ jé ha, re ra,” he tóg, Jesus ti. Ti tỹ ā mré mũ tí ag mý ag tỹ nén venh ke kāmén hǎ vē.

15

Jesus tỹ uva fa ri ke nĩ

¹ Ag mũn kỹ Jesus tóg ag mý: “uva fa ri ke inh nĩ,” he mũ. “Inh panh vỹ ũ tỹ uva ki rĩr mũ ên ri ke nĩ. ² Kỹ ājag uva pē ri ke nýtĩ,” he tóg. “Ũ tỹ inh vĩ han sór tũ ên ag hǎ vỹ uva pē kanēn vānh ên ri ke nýtĩ. Ên kym kỹ tóg fón tí, inh panh ti, uva pē kanēn vānh ên ti. Ũn kanē há han mũ ên ki rĩr há han tóg tí, ên féj rógrām tóg tí, ti pē kǎsir nēgnēm tóg tí gé, ti tỹ kanē e han jé. ³ Tag ri ke han ti tí, inh panh ti, ājag tỹ. Ājag tỹ há' he tóg huri, inh panh ti, ājag tỹ inh vĩ kri nĩm tugrĩn. ⁴ Isovānh tũg nĩ, kỹ sóg ājag tovānh ke tũ pē nĩ gé. Uva pē ên ri ke ti nĩ. Ti tỹ ti pē rógrām kỹ tóg tóg mũ. Jāvō ti pē tỹ uva fa ên to nýtĩn kỹ tóg kanē há han tí. Ên ri ke ti nĩ, ājag tỹ inh ki ge kỹ nýtĩ tag ti. Ājag tỹ inh ki ge kỹ nýtĩn kỹ ājag tóg vēnh jykre há hǎ han kỹ nýtĩ nĩ, jāvō ājag tỹ isovānh kỹ ājag tóg vēnh jykre há tovānh ke mũ gé,” he tóg, Jesus ti.

⁵ “Uva fa ri ke inh nĩ, kỹ ājag tóg uva pē ri ke nýtĩ gé. Ājag tỹ inh ki ge kỹ nýtĩn kỹ ājag tóg kanē e han ke mũ, ājag tỹ isovānh tũ nĩn kỹ. Ājag pi(jé) ājag pir mý nén ũ há han ki kanhró nýtĩ'. Inh hǎ ne ājag tar han tí'. ⁶ Ũ tỹ isovānh ke mũ ên fón jé tóg ke mũ, inh panh ti. Ēg tỹ uva pē kórég kym kỹ vām ên ri ke tóg nĩ. Ēg tỹ ti pē kym kỹ fón kỹ tóg tóg

mũ, kÿ ãg tóg ti pũn tĩ sir. Ën ri ke han jé tóg ke mũ, inh panh ti, ù tÿ isovãnh mũ ãn tÿ. ⁷ Æjag tÿ isovãnh tũ nĩn kÿ, ãjag tÿ isÿ ãjag mÿ nén tó mũ ãn to jykrén kÿ nÿtĩn kÿ, kÿ inh mÿ nén kar to vĩmnĩ. Han jé sóg ke mũ, ãjag mÿ, ãjag tÿ inh mÿ nén to vĩ mũ ãn ti, ha vemnĩ. ⁸ Æjag tÿ vãnh jykre há han kÿ tóg uva pẽ tÿ kanẽ e han ri ke nĩ. Kÿ vãnh kar ag tóg ãjag jykre ve kÿ Topẽ to: “ũn há vÿ tÿ ti nĩ,” henh ke mũ. Hã ki ag tóg ki kanhró nÿtĩnh mũ, ãjag tÿ tÿ inh mré ke nÿtĩ ti. ⁹ Inh panh vÿ iso há tãvĩ nĩ. Ge inh nĩgtĩ gé, ãjag to. Æjag to ha pẽ sóg nĩ gé. Inh ki ge kÿ nÿtĩmnĩ, sÿ ãjag to há tãvĩ nĩ jé. ¹⁰ Æjag tÿ isÿ ãjag mÿ nén tó mũ ki króm kÿ ãjag tóg inh ki ge kÿ nÿtĩnh mũ, kÿ sóg ãjag to há nĩ gé. Hã kÿ sóg inh panh vĩ hã ki króm kãn mũ, kÿ tóg iso há tãvĩ nĩ.

¹¹ Inh mÿ tóg sér tĩ. Kÿ sóg ãjag mÿ tag tó mũ, ti tÿ ãjag mÿ sér tĩn jé gé, ti tÿ inh mÿ sér ãn ri ke tĩn jé gé, ãjag mÿ. Ti tÿ ãjag mÿ sér tĩ hã jé sóg ãjag mÿ inh jykre kãmén mũ. ¹² Sÿ ãjag mÿ vãnh jykre nĩm mũn hã vẽ, ha mẽ. Jagnẽ to há pẽ nÿtĩmnĩ, sÿ ãjag to há nĩ ãn ri ke han nĩ, he sóg mũ. ¹³ Û tÿ ã mré ke ù ag jagfy ter sór mũ ãn vÿ ag to há ja nĩgtĩ. Û tÿ ãg to há kãfór pẽ ãn venh ke tũ ãg tóg nĩ, ãprã. ¹⁴ Inh mré ke pẽ vÿ tÿ ãjag nÿtĩ, ãjag tÿ inh vĩ ki króm kÿ. ¹⁵ Hã kÿ sóg ãjag to: “inh camarada ag,” he tũ nĩgtĩ gé. Æg pi(jé) ãg camarada ãn ag mÿ ãg tÿ nén to jykrén mũ ãn kãmén tĩ'. Æg mré ke ag hã mÿ ãg tóg kãmén tĩ. Æjag mÿ sóg inh panh tÿ inh mÿ nén tó mũ ãn kãmén kãn huri, hã kÿ sóg ãjag to: “inh mré ke ag,” he mũ. ¹⁶ Æjag pi(jé) inh kuprẽg'. Inh hã ne ãjag kuprẽg'. Kÿ sóg ãjag mÿ: “kanẽ e han nĩ,” he mũ ha, hã vÿ: vãnh jykre há, he mũ. Vãnh jykre há hã vÿ tũ' henh ke tũ nĩ. Æjag tÿ ãn han kÿ jatun mÿ Topẽ mÿ nén kar to vĩmnĩ, inh jyjy tó kÿ. Æjag tÿ ti mÿ nén ù to vĩ mũ ãn han jé tóg ke mũ, Topẽ ti, ãjag tÿ vãnh jykre há han kÿ nÿtĩn kÿ. ¹⁷ Sÿ ãjag mÿ nén tó mũn hã vẽ, hã vÿ: jagnẽ to há nÿtĩmnĩ, sÿ ãjag to há nĩ ãn ri ke, he mũ,” he tóg, Jesus ti.

Û tÿ ãg to jũnh ke ag

¹⁸ Û tÿ inh ki ge tũ ag vÿ iso jũ vén ja nĩgtĩ, kÿ ag tóg ãjag to jũ nÿtĩ gé. Tag mĩ ãkrén nĩ, ag tÿ ãjag to jũnh ken kÿ. ¹⁹ Æjag pi(jé) tÿ ag mré ke nÿtĩ'. Æjag tÿ tÿ ag mré ke nÿtĩ ra ag tóg ãjag to há nÿtĩnh ke mũ vẽ, hã ra ãjag tóg tÿ ag mré ke tũ nÿtĩ. Æjag kuprẽg inh, ag kãmĩ, ãjag tÿ tÿ inh mré ke nÿtĩ jé, hã kÿ ag tóg ãjag to jũ nÿtĩ. ²⁰ Vãsÿ sóg ãjag mÿ: “ãjag pi(jé) inh kãfór nÿtĩ',” he ja nĩgtĩ. Tag mĩ ãkrén nĩ. Inh camarada ri ke ãjag nÿtĩ, jãvo sóg tÿ ãjag patrão ri ke nĩ. Ag kãmĩ ù tóg inh vóg kónãn ke mũ. Ën vÿ ãjag vóg kónãn ke mũ gé. Ag kãmĩ ù tóg inh vĩ ki króm tĩ. Ën ag vÿ ãjag vĩ ki króm ke mũ gé. ²¹ Hã ra ag tóg ãjag vóg kónãn ke mũ gé, ãjag tÿ tÿ inh mré ke nÿtĩn kÿ. Ag pi(jé) ù tÿ inh jẽnẽg mũ ãn ki kanhró nÿtĩ'. ²² Inh kãtĩ tũ ra, isÿ ag mÿ inh vĩ tó tũ ra ag tóg: “hã ra ãg tóg ki kãgtĩg nÿtĩ,” henh ke mũ vẽ. Hã ra sóg ag mÿ tó, hã kÿ ag tóg ki kanhró nÿtĩ. ²³ Û tÿ iso jũ nÿtĩ ãn ag vÿ inh panh to jũ nÿtĩ gé. ²⁴ Nén ù han vãnh hyn han sóg tĩ, ag rĩnve, kÿ ù vÿ tag han ja tũ pẽ nĩ ijo. Isÿ tag han tũ nĩ ra ag tóg: “vẽg tũ ãg nĩ,” henh ke mũ vẽ. Hã ra ag tóg vé, ag tÿ vẽg mũ ra ag tóg ge ra iso jũ nÿtĩ, kÿ ag tóg inh panh to jũ nÿtĩ gé. ²⁵ Hã ra ag tóg rán kÿ nÿtĩ, Topẽ vĩ tÿ rán kÿ nĩ ki. “Nén ù tũ to ag tóg iso jũ sór mũ,” he tóg, Topẽ vĩ rá ki. Hã kÿ ag tóg ke tĩ,” he tóg, Jesus ti.

²⁶ “Hã ra tóg kãtĩg ke mũ, ù tÿ ãjag tar han ke ti. Topẽ kuprĩg to ken hã vẽ. Ti hã vÿ ki hã tónh ke mũ, inh panh kuprĩg ti. Ën hã vÿ ãjag mÿ inh kãmén ke mũ. ²⁷ Kÿ ãjag tóg vãnh kar mÿ inh kãmén ke mũ gé, ãn kã. Inh mré ãjag tóg mũ ja nĩ, isÿ ãjag mÿ tó vén mũn kã,” he tóg.

16

¹ “Æjag mÿ sóg tag kãmén kãn mũ, ãjag tÿ ki kanhró nÿtĩ jé, ãjag tÿ isovãnh sór tũ pẽ nĩ jé, ãjag jagtar ke kurã ãn kã. ² Æjag pan jé ag tóg ke mũ, pã'i ag, ãjag tÿ vãnh kanhrãn jafã ra mũ mãn tũ nĩ jé. Kÿ ag tóg ãjag kãgtén ke mũ gé. Æjag kãgtén kÿ ag tóg ón kÿ: “Topẽ vÿ ãg mÿ tó, hã kÿ ãg tóg ag kãgtén,” henh ke mũ. ³ Ag tÿ ãg jóg mág ki kãgtĩg nÿtĩ hã kÿ ag tóg tag han ke mũ. Inh ki kãgtĩg ag tóg nÿtĩ gé. ⁴ Ûri sóg ãjag mÿ tó mũ. Kÿ ãjag

tóg, ājag tỹ tag ve kỹ (ājag tóg): “ēg mỹ tóg tó ja nĩ, ēg tỹ ũri nén vėg mũ tag ti,” henh ke mũ,” he tóg, Jesus ti.

Topẽ kuprĩg kätĩg ke

Vāsỹ sóg ājag mỹ tag tó ja tũ nĩ ver. Vāsỹ sóg ājag mré tĩg nĩ vė, hã ra sóg ājag mỹ tag tó ja tũ nĩ, sỹ ũri ājag mỹ nén tó mũ tag ti. ⁵ ũri sóg tĩg ke mũ, isỹ ũ tỹ inh jėnėg mũ ěn ve jé. Kỹ ājag pi(jé) inh mỹ: “ã tỹ hẽ ra tĩg ke nẽ?” henh ke mũ'. ⁶ Ājag mỹ tóg e tĩ, sỹ ājag mỹ isĩg ke tag tó ja nĩn kỹ, kỹ ājag tóg fe kaj nỹtĩ. ⁷ Há ti nĩ hã ra, isĩg ke ti, ha mē. Isĩg tũ nĩn kỹ ũ tỹ ājag tar han mũ ěn vỹ kätĩg ke tũ nĩ vė, Topẽ kuprĩg ti. Isĩg kỹ sóg ājag mỹ ti jėnėnh ke mũ. ⁸ ěn vỹ, ā kätĩg kỹ (tóg) vėnh kar mỹ: “Topẽ vĩ mranh ā huri,” henh ke mũ, kỹ tóg ag mỹ vėnh jykre kuryj tónh ke mũ gé, kỹ tóg ag mỹ Topẽ tỹ ag vóg kónān ke ěn tónh ke mũ gé. ⁹ “Jesus ki ā tóg rã tũ nĩ, hã kỹ ā tóg Topẽ vĩ mranh tĩ,” he jé tóg ke mũ, vėnh kar mỹ. ¹⁰ Kỹ tóg ag mỹ vėnh jykre kuryj tónh ke mũ gé, Topẽ kuprĩg ti. Jāvo sóg tĩg ke mũ, inh panh kukām, kỹ ag tóg inh venh ke tũ nĩ. ¹¹ Kỹ Topẽ kuprĩg tóg ag mỹ Topẽ tỹ ag vóg kónān ke ěn tónh ke mũ gé. Tag ki ũn tỹ tỹ ũn mág pẽ tỹ Nėn-Kórėg ěn to tóg: “kórėg ti nĩ,” hé huri, Topẽ ti. Hã to ēg tóg ti tỹ ũn vóg kónān ke mũ ěn ag ki kanhró nỹtĩ,” he tóg, Jesus ti.

¹² “Sỹ ājag mỹ nén tónh ke mũ vỹ ver e nỹtĩ, hã ra tóg ver ājag mỹ mē jagy tĩ, hã kỹ sóg tónh ke tũ nĩ. ¹³ Topẽ kuprĩg tỹ ājag ki jun kỹ, ũ tỹ ki hã tó tĩ ěn kätĩg kỹ tóg koměr hã ājag mỹ tó kãn ke mũ, nén tỹ ki hã tó mũ ěn ti. Ti pi(jé) ā tỹ nén to jykrén mũ ěn tónh ke mũ', Topẽ kuprĩg ti. Inh panh tỹ inh mré nén to jykrén mũ ěn hã tó jé tóg ke mũ. Kỹ tóg ājag mỹ ājag tỹ kar kỹ nén venh ke ěn tónh ke mũ gé. ¹⁴ Ti hã vỹ iso: “ũn mág vỹ tỹ ti nĩ,” henh ke mũ gé. Inh vĩ hã tó jé tóg ke mũ ājag mỹ, hã kỹ tóg isỹ tỹ ũn mág nĩ tónh ke mũ. ¹⁵ Inh panh tỹ nén tó mũ ěn hã tó sóg tĩ gé. Kỹ tóg ěn hã tónh ke mũ gé, ti kuprĩg ti. Hã kỹ sóg ājag mỹ: inh vĩ hã tó jé tóg ke mũ,” he mũ,” he tóg, Jesus ti.

Jesus tỹ ter kar kỹ rĩr mãn ke

¹⁶ “Kānhmar ājag tóg inh ve mãn ke tũ nĩ ha, kejėn ājag tóg kurā ũ ki inh ve mãn ke mũ gé,” he tóg, Jesus ti. ¹⁷ Kỹ ti mré mũ tĩ ag tóg jagnė mỹ: “ti hỹn ne tó sór mũ, hã kỹ tóg: kānhmar ājag tóg inh ve mãn ke tũ nĩ ha, he mũ, hã kỹ tóg: kejėn ājag tóg kurā ũ ki inh ve mãn ke mũ gé, he mũ?” he ag tóg. “Ti tỹ ne tónh ke nẽ hỹn, hã kỹ tóg: inh panh kukām sóg tĩg mũ ha, he mũ?” he ag tóg. ¹⁸ “Ne to ke nẽ hỹn, hã vỹ: kānhmar, he mũ? Ęg pi(jé) ti tỹ nén tó mũ ěn ki kanhró nỹtĩ,” he ag tóg, jagnė mỹ.

¹⁹ Hã ra Jesus tóg ki kanhró nĩ, ag tỹ ti ki nén jėmė sór mũ ěn ki. Hã kỹ tóg ag mỹ: “inh vĩ mỹ ājag mỹ e?” he mũ. “Kānhmar ājag tóg inh ve mãn ke tũ nĩ ha, kejėn hã ājag tóg kurā ũ ki inh ve mãn ke mũ. ²⁰ Ki hã sóg tó mũ, hã kỹ sóg ke mũ. Kygỹ jé ājag tóg ke mũ. Vėsỹrėnh jé ājag tóg ke mũ. Hã ra tóg ũ tỹ inh ki ge tũ ag hã mỹ sér tĩnh mũ. Fe kaj han jé ājag tóg ke mũ, tag pāte tóg ājag mỹ sér tĩnh mãn ke mũ gé. ²¹ ũn tỹtá fi tỹ gĩr venh ken kỹ tóg fi mỹ jagy tĩ, fi kaga jagy ěn ti. Fi kósĩn tỹ fi ki mur kar kỹ tóg hã ra fi mỹ sér tĩ, kỹ fi tóg ā kaga ěn mĩ ěkrén mãn tũ nĩgtĩ. Fi tỹ ā kósĩn ve kỹ tóg fi mỹ sér tĩ. ²² Ge ve jé ājag tóg ke mũ. ũri tóg ājag mỹ jagy tĩ, hã ra sóg ājag ve mãn ke mũ, kỹ ājag fe tóg mrin kenh ke mũ, ājag tỹ inh ven kỹ. Kỹ ũ tóg ājag fe kaj han mãn ke tũ nĩ ha, inh kätĩg mãn kỹ. ²³ ěn kã ājag tóg inh mỹ nén ũ to vĩ mãn ke tũ nĩ ha, isỹ ājag mré nĩn kỹ. Ki hã sóg tó mũ, hã kỹ sóg ke mũ. Ājag tỹ inh panh mỹ nén ũ to vĩn kỹ tóg ājag mỹ vin kãn ke mũ, ājag tỹ ti mỹ nén ũ to vĩ mũ ěn tỹ, ājag tỹ tỹ inh mré ke nỹtĩn kỹ. ²⁴ Ver ājag tóg ti mỹ nén ũ to vĩ ja tũ nĩ, ājag tỹ ti mỹ: “ti mré ke vỹ tỹ ěg nỹtĩ,” hen kỹ. Ti mỹ nén ũ to vĩmĩn, kỹ tóg ājag mỹ hyn han kãn ke mũ, ājag tỹ nén to vĩ mũ ěn ti, kỹ tóg ājag mỹ sér tãvĩ tĩnh mũ,” he tóg, Jesus ti.

Jesus tỹ tỹ ěprā ke kar kri ke nĩ

²⁵ “Ājag mỹ sóg comparação han kỹ inh panh kāmėn tĩ, kānhmar sóg jamā hár(a) ājag mỹ inh panh kāmėn ke mũ, kỹ sóg ājag mỹ comparação han mãn ke tũ nĩ sir. ²⁶ Kurā ěn kã ājag tóg vėsóg ki inh panh mỹ nén ũ kar to vĩnh ke mũ, ājag tỹ tỹ inh mré ke nỹtĩn kỹ.

Kỹ sóg ãjag jagfy vĩ mãn ke tũ nĩ ha, ãjag tỹ vėsóg ki ti mré vēmén kỹ. ãjag hã vĩ ti mré vēmén ke mũ ha. ²⁷ Inh panh vĩ ãjag to há tãvĩ nĩgtĩ, ãjag tỹ iso há nỹtĩn kỹ, ãjag tỹ iso: “Topẽ vĩ ti jẽnẽ,” hen kỹ. ²⁸ Inh panh tỹ inh jẽnẽn hã kỹ sóg ga tag ki jun mũ. Hã ra sóg ùri inh mur ja ré kỹ tĩg ke mũ ha, inh panh kukãm,” he tóg, Jesus ti.

²⁹ Kỹ ti mré mũ tĩ ag tóg ti mỹ: “vãhã ã tóg êg mỹ kãmén há han mũ ha,” he mũ. “Vãhã ã tóg êg mỹ comparação tó tũ nĩ ha. ³⁰ Nén ù kar ki kanhró ã tóg nĩ, vég êg tóg mũ. Êg tỹ ã ki nén ù jẽmẽ sór kỹ ã tóg ki kanhró nĩ. Êg tỹ ã mỹ nén ù tó tũ ra ã tóg ki kanhró nĩ. Hã ki êg tóg vég mũ, ã tỹ Topẽ tá kãtĩg ja ti,” he ag tóg mũ, Jesus mỹ.

³¹ Kỹ tóg ag mỹ: “vãhã ãjag tóg inh ki ge kỹ nỹtĩ ha,” he mũ. ³² “Hã ra ãjag tóg kãnhmar inh ré kỹ mũ kãn mũ ha, ãjag ìn ra. Vẽn hã pugpóv kãn jé ãjag tóg ke mũ, ùri. Hã ra sóg pir pẽ tũ nĩ, ãjag tỹ inh ré kỹ mũ kãn mũ (hã) ra. Inh panh vĩ êgno kã inh mré jẽ nĩ. ³³ Tag kãmén sóg ãjag mỹ, ãjag tỹ krĩ kãnhvy nỹtĩ jé, ãjag tỹ inh ki ge kỹ nỹtĩ tugrĩn. Tag ki ãjag tóg nén ù jagy kar vég tĩ ver. Hã ra to krĩ kufy han tũg nĩ. Êprã ke kar kri ke vĩ tỹ inh nĩ, êprã ke kri pã'i ên, Japo ên kutẽm inh huri,” he tóg, Jesus ti.

17

Jesus tỹ Topẽ mré vēmén

¹ Jesus tỹ ã mré mũ tĩ ag mỹ tag kãmén kãn kar kỹ tóg kãnhkã ki êvãnh mũ, kỹ tóg: “panh’,” he mũ. “Inh hora tán krỹg huri,” he tóg. “Ag mỹ isỹ tỹ ùn mág nĩ ven nĩ, isỹ tỹ ã kósin nĩn kỹ. Kỹ sóg ag mỹ ã tỹ tỹ ùn mág nĩ ven ke mũ gé. ² Êprã ke kar kri ã tóg inh fẽg, isỹ ag mỹ rĩr krỹg ja tũ ven jé, ã tỹ inh mỹ ùn vin mũ kar ên ag mỹ, fag mỹ ke gé. ³ Û tỹ ã ki kanhrãn mũ ên vĩ rĩr krỹg ja tũ venh ke mũ, ù tỹ ã to: “Topẽ vê,” he mũ kar ag, ù tỹ ã to: “Topẽ ù vĩ tũ nĩ,” he mũ kar ag, fag kar ke gé. Kỹ ag tóg inh ki kanhró nỹtĩ gé, isỹ tỹ Jesus Cristo nĩn ki, ã hã tỹ inh jẽnẽ ên ki. ⁴ Ag hã mỹ sóg ã tỹ tỹ ùn mág nĩ tag ven, êprã ke ag mỹ, fag mỹ ke gé. ã tỹ inh mỹ nén tó mũ ên han kãn inh. ⁵ Vãsỹ, êg tỹ ga tag han tũg ki sóg ã mré nĩ ja nĩgtĩ, ên kã sóg tỹ ùn mág pẽ nĩ ja nĩgtĩ, ã mré. Ên han mãn nĩ, inh mỹ. Isỹ tỹ ùn mág pẽ nĩ han mãn nĩ, panh’.

⁶ Û ag kuprẽg ja ã nĩ, ag tỹ inh ki ge jé, fag ke gé. Ên ag mỹ sóg ã kãmén ja nĩgtĩ. ã tũ ag vê, hã ra ã tóg inh mỹ ag vin, fag ke gé. ã vĩ ki króm ag tóg tĩ, fag ke gé. ⁷ Ûri ag tóg ki kanhró nỹtĩ, isỹ ã tũ hã han mũ ên ki, fag ke gé. ã hã ne inh mỹ nén kar ên tó tĩ’. Tag vég ag tóg tĩ. ⁸ Ag mỹ sóg ã vĩ ti tó tĩ, kỹ tóg ag mỹ sér tĩ, fag mỹ ke gé. Kỹ ag tóg vég mũ, ã tỹ inh jẽnẽ ên ti. Kỹ ag tóg iso: “Topẽ tỹ ùn jẽnẽg mũ ên vê,” he mũ, fag ke gé.

⁹ ã tỹ inh mỹ ùn vin mũ ên ag hã jagfy sóg vĩ tĩ, fag ke gé. Û tỹ inh ki ge tũ ên ag jagfy sóg vĩnh ke tũ nĩ. ã tũ ag hã jagfy sóg vĩ tĩ. ¹⁰ Ha vé, isũ kar vĩ tỹ ã tũ nỹtĩ, kỹ ã tũ kar vĩ tỹ isũ nỹtĩ gé. Ag hã tugrĩn sóg tỹ ùn mág nĩ, ù tỹ inh ki ge kỹ nỹtĩ ên ag hã tugrĩn, fag ke gé. ¹¹ Inh mur ja ré kỹ sóg tĩg mũ, ijãvo ag tóg êgno mĩ mũ nĩ sir, isũ mré ã tũ ag. Ag jãvo sóg ã venh kãtĩg mũ ha. Inh panh mág, há tãvĩ ã tóg nĩ. Ag jy nĩgãn nĩ, ã jykre ki. ã hã ne inh mỹ ag vin’. ã mré sóg tỹ ùn pir nĩ. Ag tỹ jagnẽ mré tỹ ùn pir nỹtĩ han nĩ, isỹ ã mré tỹ ùn pir nĩ tag ri ke han nĩ, ag tỹ, fag tỹ ke gé. ¹² Isỹ ag mré nĩn kỹ sóg ag jy nĩgãn tĩ, ã jykre ki, ã tỹ inh mỹ ùn vin mũ ên ag kar jy, fag jy ke gé. Ag ki rĩr há han inh, kỹ ag kã ù tóg vãfor ja tũ nĩ. Ûn pir tóg hã ra vãfor kỹ nĩ inhhã, hã ra tóg ti to rãn kỹ nĩ, ti tỹ nũgme ki kutẽnh ke ti, hã kỹ ti tỹ ki kutẽnh ke nẽ ha. ¹³ Ûri sóg ã kukãm kãtĩg mũ, hã ra sóg ver tag ki ag mỹ kãmén mũ, ti tỹ ag mỹ sér tĩ jé, ti tỹ inh mỹ sér tĩ tag ri ke tĩ jé, ag mỹ. ¹⁴ Ag mỹ sóg hur ã vĩ kãmén. Kỹ ù tỹ inh ki ge tũ ag vĩ ag to jũ mũ, ag tỹ tỹ ag mré ke tũ nỹtĩn kỹ. Inh pi(jé) tỹ ag mré ke nĩ gé!, ù tỹ ag to jũ mũ ên mré. ¹⁵ Hã ra sóg ã mỹ: “ha ag jé prẽr,” he tũ nĩ, “ag tỹ ga tovãnh jé,” he tũ sóg nĩ. “Nén-Kórég jo ag jy nĩgãn nĩ,” he sóg mũ ã mỹ. ¹⁶ Ag pi(jé) tỹ inh ki ge tũ ag mré ke nỹtĩ’. Tỹ sóg ag mré ke tũ nĩ gé, ù tỹ inh ki ge jãvãnh ên ag mré. ¹⁷ ã vĩ há ki ag kanhrãn nĩ, ã tỹ ùn kuprẽg mũ ên ag, ag tỹ komẽr hã ã ri ke nỹtĩ jé. ã vĩ ên vĩ tỹ vẽn vĩ há tãvĩ nĩ. ¹⁸ Inh jẽnẽ ã tóg, sỹ ga kri mur jé. Kỹ sóg ã kóm ag jẽgnẽnh mũ, ag tỹ êprã ke kar ên ag mỹ inh kãmén jé. ¹⁹ Ag jagfy sóg ã mỹ vẽn fẽg ke mũ, ag tỹ inh mré ã mỹ vẽn vin kỹ nỹtĩ jé.

²⁰ Hã ra sóg nén ũ to ví sór mũ gé, sỹ ã mỹ ag kãmén kar kỹ. Ũ ag tóg ag ví mẽ kỹ inh ki genh ke mũ. Ēn ag to sóg ví sór mũ gé. ²¹ Ag kar tỹ tỹ ũn pir nỹtĩnh ken kỹ tóg há tí, ã tỹ inh mré tỹ ũn pir nĩ ěn ri ke, isỹ ã mré tỹ ũn pir nĩ ěn ri ke. Ag tỹ ěg mré tỹ ũn pir nỹtĩn kỹ tóg há tí. Kỹ vĕnh kar vỹ vĕnh ke mũ, ã tỹ nén to inh jĕnĕg mũ ti. ²² Isỹ ã tóg ũn mág han. Kỹ sóg ag tỹ ũn mág han ke mũ gé, ag tỹ jagnĕ mré tỹ ũn pir nỹtĩ jé, ã tỹ inh mré tỹ ũn pir nĩ tag ri ke. ²³ Inh mré ke vỹ tỹ ag nỹtĩ, kỹ sóg tỹ ag mré ke nĩ gé, kỹ ěg kar vỹ tỹ ũn pir ri ke nỹtĩ. ěg tỹ tỹ ũn pir nỹtĩ tugrĩn vĕnh kar tóg vĕnh ke mũ, ã tỹ inh jĕnĕ ěn ti. Ũn tỹ inh ki ge kỹ nỹtĩ ěn ag to há tãvĩ ã tóg nĩ, ã tỹ iso há nĩ tag ri ke. Tag ve jé ag tóg ke mũ, ěprã ke ag, ag tỹ ěg tỹ tỹ ũn pir nỹtĩ tag ven kỹ.

²⁴ Panh', vãsỹ ã tóg iso há nĩgtĩ vĕ, ěg tỹ ga tag han tũg ki. Hã kỹ ã tóg isỹ ũn mág pĕ han. Kỹ tóg inh mỹ há tĩnh mũ, ag tỹ inh mré nỹtĩn kỹ, ã tỹ inh mỹ ũn vin mũ ěn ag. Ag tỹ inh mré nỹtĩn kỹ ag tóg vĕnh ke mũ, ã tỹ isỹ ũn mág han ja ti. ²⁵ Panh', jykre kuryj ã tóg nĩ. Ũ tỹ inh ki ge tũ ag vỹ ã ki kagtĩg nỹtĩ, ag jãvo sóg ã ki kanhró nĩ. Kỹ tag ki inh mré nỹtĩ ag vỹ ki kanhró nỹtĩ gé, ã tỹ nén to inh jĕnĕg mũ ti. ²⁶ Ag mỹ sóg ã kãmén huri, kỹ sóg ag mỹ ã kãmén mãn ke mũ gé, ag tỹ jagnĕ to há nỹtĩ jé, ag tỹ ã tỹ iso há tag ri ke nỹtĩ jé. Kỹ sóg ag mré ěmãn ke mũ gé,” he tóg, Jesus ti, ã panh mré vĕmĕn kỹ.

18

Ag tỹ Jesus se

(Mt 26.47-56; Mc 14.43-50; Lc 22.47-53)

¹ Jesus tỹ tag tó kar kỹ tóg ã mré mũ tí ag mré tí mũ sir. Goj tỹ Cedrom kafã ũ ra ag tóg pa mũ sir. Tá ka tóg krãnkřãn kỹ nỹtĩ. Ka kré ěn krĕm ag tóg nĩgnĩ mũ sir. ² Hã ra Judas tóg ti tĩg ěn ki kanhró nĩ gé. Tã tóg ã mré mũ tí ag mré vĕmĕn tỹ ěn ri ke han huri, Jesus ti, hã kỹ Judas tóg ag tỹ ra mũnh ke ki kanhró nĩ, ũ tỹ pã'i ag mỹ Jesus ve ke mũ ěn ti. ³ Kỹ tóg ag nón tá jun mũ sir, Judas ti, soldado ag mré, polícia ag mré hã ke gé, pã'i ag tỹ ag jĕgnĕn kỹ. Fariseu ag vỹ pã'i ag mré polícia ag jĕgnĕ ja nĩ gé. Lampião e gég ag tóg kãmũ mũ, pĩ jónhkó ke gé, ka kykyv mré hã. ⁴ Hã ra Jesus tóg ki kanhró nĩ, ã jagtar ken ki, kỹ tóg ag kato tĕ mũ sir. Kỹ tóg ag mỹ: “ãjag tỹ ũ tỹ ě ve sór nĕ?” he mũ. ⁵ Kỹ ag tóg ti mỹ: “Nazaré tá ke ěn ve sór ěg tóg mũ,” he mũ. “Jesus vĕ mỹr,” he ag tóg mũ. Kỹ Jesus tóg ag mỹ: “inh hã vĕ,” he mũ. Hã ra Judas tóg ag mré kãtĩg ja nĩ gé, ũ tỹ pã'i ag mỹ Jesus ven mũ ěn ti. ⁶ Jesus tỹ ag mỹ: “inh hã vĕ,” ěn kỹ ag tóg ti jo ranh ke mũ. Rom ke ag tóg mũ sir, ěprã. ⁷ Kỹ Jesus tóg ag mỹ ví mãn mũ. “ãjag tỹ ũ ve sór nĕ?” he tóg. Kỹ ag tóg ti mỹ: “Jesus, Nazaré tá ke ěn,” he mãn mũ. ⁸ Kỹ Jesus tóg ag mỹ: “ãjag mỹ sóg: inh hã vĕ, ě huri. Kỹ ãjag tỹ ise sór kỹ inh mré ke tag ag togvãnh nĩ sir,” he tóg. ⁹ Hã ra tóg tag tó, ã tỹ to hã ã panh mỹ: “ã tỹ inh mỹ ũn vin ja ěn ag vỹ ki nỹtĩ, ag kãki ũ vỹ vãfor ja tũ nĩ,” he jan kỹ. ã tỹ ag jy nĩgãn jé tóg polícia ag mỹ: “ag togvãnh ra,” he mũ, ã mré mũ tí ag to.

¹⁰ Hã ra Simão Pedro tóg ã rógro ěn vyn kỹ tóg polícia ag kãki ũ nĩgrĕg kym ke mũ. Ti pĕgja tá ti nĩgrĕg jĕ ěn tỹ tóg kym ke mũ. Topĕ tũ ki rĩr tí to pã'i mág camarada ja vĕ, ti tỹ ũ nĩgrĕg kym mũ ěn ti, ti jijin hã vỹ: Malco, he mũ. ¹¹ Kỹ Jesus tóg Pedro mỹ: “ã rógro tỹ ti pãg ja tá fĕg,” he mũ. “Inh panh tỹ inh mỹ: “vĕsỹrĕnh jé ã tóg ke mũ,” he ja vĕ, hã kỹ sóg ag mỹ vĕnh fĕg ke mũ ha. Vĕnh nenh ke tũ sóg nĩ,” he tóg, Jesus ti.

Pã'i tỹ Anás tỹ Jesus ve

¹² Kỹ soldado ag tóg, ãjag pã'i mré (ag tóg) Jesus mrĩnh mũ sir, vãfe tỹ. Polícia ag vỹ ag mré ti mrĩnh mũ gé. ¹³ Kỹ ag tóg ti pĕre mũ mũ, Anás ĩn ra. Caifás kakrã vĕ, Anás ti, hã ra Caifás vỹ tỹ Topĕ tũ ki rĩr tí ag to pã'i mág nĩ, prỹg ěn kã. ¹⁴ Hã ra Caifás ěn vỹ pã'i ag mỹ: “ũn pir tỹ ěg povo jagfy ter kỹ tóg pãgsĩ nĩ,” he ja nĩ. Ēn kakrã ĩn ra ag tóg Jesus pĕre mũ mũ.

Pedro tỹ Jesus to: “ti ki kagtĩg sóg nĩ,” he vĕn

(Mt 26.57-58, 69-70; Mc 14.53-54, 66-80; Lc 22.54-57)

¹⁵ Kỹ Simão Pedro tóg Jesus nón tí mũ, Jesus mré ke ũ mré. Hã ra Jesus mré ke ũ ěn tóg Topĕ tũ ki rĩr tí ag to pã'i mág ěn ki kanhró nĩ, hã kỹ tóg Jesus nón Anás ĩn kãra rã mũ,

ĩn vāso ra. ¹⁶ Hã ra Pedro tóg re tá jẽ nĩ, ĩn jãnkã rã hã. Kĩ Jesus mré ke ù ĩn tóg ver ù tỹ jãnkã ki rĩr mũ ĩn fi mré vēmén mũ, kỹ fi tóg Pedro ti mỹ: “ha kãrã,” he mũ, ti mré ke ù ĩn tỹ pã'i mág ki kanhró nĩn kỹ. ¹⁷ Kỹ fi tóg ti mỹ: “ã hỹn tỹ Jesus mré ke nĩ,” he mũ, Pedro ti mỹ, ù tỹ jãnkã ki rĩr jẽ ĩn fi. Hã ra tóg fi mỹ ón kỹ: “vó,” he mũ.

¹⁸ Hã ra Anás camarada ù ag vỹ tá nỹtĩ gé, polícia ag mré. ĩn vāso ki ag tóg pĩ han kỹ nỹtĩ, ti tỹ kusa jagy tĩn kỹ. Pĩ to ag tóg tugtón nỹtĩ. Kỹ Pedro tóg ag mré tón nĩ gé, pĩ ĩn tí to.

Anás tỹ Jesus ki jēmẽ sór

(Mt 26.59-66; Mc 14.55-64; Lc 22.66-71)

¹⁹ Kỹ pã'i mág tóg Jesus mỹ: “inh mỹ ã mré mũ tĩ ag kãmén,” he mũ. “Ã tỹ nén kãmén tĩ ĩn ti kãmén nĩ gé, inh mỹ,” he tóg, Anás ti. ²⁰ Kỹ Jesus tóg ti mỹ: “vẽnh kar mỹ sóg jamã hár(a) tó tĩ,” he mũ. “Vẽnh kanhrãn jafã krēm sóg tó tĩ, Topẽ jo ĩn krēm ke gé. Judeu kar tỹ vẽnhmãn kỹ nỹtĩn kỹ sóg ag mỹ kãmén tĩ. Inh pi(jé) vẽn pēju kỹ tó tĩ', kỹ vẽn kar vỹ ki kanhró nỹtĩ. ²¹ Hã ra ã tóg inh ki jēmẽ sór mũ'. Inh vĩ jēmẽg mũ ĩn ag ki jēmẽmĩ. Ki kanhró ag tóg nỹtĩ, isỹ ag mỹ nén tó ja ĩn ki,” he tóg, Jesus ti.

²² Jesus tỹ tag tó kỹ polícia ù tóg Jesus tãnh mũ, kỹ tóg ti mỹ: “pã'i mág vẽ mỹr,” he mũ. “Hã ra ã tóg ti mỹ vĩ mũ,” he tóg mũ. ²³ Kỹ Jesus tóg ti mỹ: “kỹ inh hỹn vẽn vĩ kórég tỹ ne tó?” he mũ. “Ha inh mỹ sỹ vẽn vĩ kórég tó mũ ĩn tó,” he tóg. “Vĩ há han inh, ã tỹ hã ra ne tugnĩn isãnh nẽ?” he tóg.

²⁴ Tag pãte Anás tóg Jesus jẽnẽg mũ sir, ti tỹ Caifás venh tĩg jé, Topẽ tũ ki rĩr tĩ ag to pã'i mág ĩn mỹ. Ti mrĩnh kỹ jẽ kỹ tóg ti jẽnẽg mũ.

Pedro tỹ Jesus to: “ti ki kagtĩg sóg nĩ,” he mãn

(Mt 26.71-75; Mc 14.69-72; Lc 22.58-62)

²⁵ Hã ra Simão Pedro tóg tón nĩ nĩ, pĩ to. Kỹ tá nỹtĩ ag tóg ti mỹ: “ã hỹn tỹ ti mré ke nĩ gé,” he mũ. Hã ra tóg ón kỹ: “vó,” he mãn mũ. ²⁶ Kỹ pã'i mág mỹ rãnhraj tĩ ù vỹ tá nĩ gé. Pedro tỹ ù nĩgrẽg kym ja ĩn kanhkã ù vẽ. ĩn vỹ Pedro mỹ: “ã ve inh, ka kré krēm,” he mũ. Tá ã tóg ti mré jẽ ja nĩ,” he tóg mũ. ²⁷ Hã ra Pedro tóg ón kỹ ti mỹ: “vó,” he mãn mũ. ĩn kã galo vỹ kynkyr mũ ha.

Pilatos tỹ Jesus ki jēmẽ

(Mt 27.1-2, 11-14; Mc 15.1-5; Lc 23.1-5)

²⁸ Kusã pẽ ki ag tóg Jesus pére mũ mũ, pã'i tỹ governador ĩn ra, ti vēmén jafã ra, palácio ĩn ra. Caifás ĩn tá ag tóg ti pére kãpa mũ. Hã ra ag tóg pã'i tỹ governador ĩn kã ra ge sór tũ nĩ. Ag tỹ festa tỹ Páscoa han ke vỹ kakó tĩ ha, kỹ ù tỹ pã'i tỹ governador ĩn kã ra ge mũ vỹ festa tỹ Páscoa ĩn ki jẽn ke tũ nĩ. Ag jykre vẽ. Hã ra ag tóg ko sór mũ, hã kỹ ag tóg kã ra ge ja tũ nĩ sir. ²⁹ Kỹ Pilatos tóg re ra kãkutẽ mũ, ag mré vēmén jé. Kỹ tóg ag mỹ: “ti hẽ ri ké?” he mũ. “Ti vẽn jykre kórég tỹ ne han'?” he tóg, Pilatos ti, Jesus to. ³⁰ Kỹ ag tóg ti mỹ: “vẽn jykre kórég han ti tĩ,” he mũ. “Ti há nĩ ra ĩn tóg ã mỹ ti ven ke tũ nĩ vẽ,” he ag tóg, Pilatos mỹ. ³¹ Kỹ Pilatos tóg ag mỹ: “ha mũjẽg,” he mũ. “Ãjag jykre ki ãjag tóg ti jykre kórég ĩn to jykrén kỹ tónh ke mũ, ti jykre ti,” he tóg. Hã ra ag tóg ti mỹ: “ti ter ke vẽ,” he mũ. “Kỹ ã hã vỹ ĩn mỹ: “ha ti tén,” henh ke mũ,” he ag tóg, pã'i ag, Pilatos mỹ. ³² Hã ra Jesus tóg ag tỹ fóg tỹ pã'i mỹ ã fẽg ke tag tó ja nĩ, fóg ag tỹ cruz to ti sa kỹ ti tén jé. Hã kỹ ag tóg Pilatos mỹ ti ven mũ.

³³ Kỹ Pilatos tóg ã ĩn kãra rã mãn mũ, Jesus mré vēmén jé. Kỹ tóg ti mỹ: “ã mỹ tỹ Judeu ag pã'i mág nĩ?” he mũ. ³⁴ Kỹ Jesus tóg ti mỹ: “ũ nỹ ã mỹ tag tó?” he mũ. “Ã tỹ vēsóg ki to jykrén mỹ vó, pã'i ag tỹ ã mỹ tó mỹ vó?” he tóg. ³⁵ Kỹ Pilatos tóg: “inh pi(jé) tỹ Judeu nĩ,” he mũ. “Ã kanhkã ag vỹ inh mỹ ã fẽg, ã povo to pã'i ag. ĩn hẽ ri ké?” he tóg.

³⁶ Kỹ Jesus tóg ti mỹ: “inh pi(jé) tỹ ga tag kri pã'i mág nĩ,” he mũ. “Isỹ tỹ tag ki ùn mág nĩ ra inh krēm ke ag tóg Judeu ag mré jagnẽ génh ke mũ vẽ, kỹ ag tóg isenh ke tũ nĩ vẽ. Hã ra sóg tag ki tỹ ùn mág tũ nĩ, hã kỹ ag tóg isé, Judeu ag,” he tóg, Jesus ti.

³⁷ Kỹ Pilatos tóg ti mỹ: “kỹ ã mỹ hã ra tỹ pã'i mág nĩ?” he mũ. Kỹ Jesus tóg: “ki hã ã tóg tó mũ,” he mũ. “Isỹ ki hã tó jé, hã jé sóg ga kri mur ja nĩ, hã jé sóg ga kri tĩ mũ gé. Kỹ

ũ tỹ ki hã tó to há nỹtĩ ên ag kar vỹ inh vĩ jẽmẽg mũ,” he tóg, Jesus ti. ³⁸ Kĩ Pilatos tóg ti mỹ: “ne nỹ tỹ ki hã ke nĩ?” he mũ. “Sỹ ki kanhrãn jãvãnh mẽ tóg tĩ,” he tóg, Pilatos ti.

Jesus ter ke

(Mt 27.15-31; Mc 15.6-20; Lc 23.13-25)

Kỹ tóg re ra tĩg mãn mũ, pã'i ag mré vẽmẽn jé, kỹ tóg ag mỹ: “ti pi(jé) vẽn jykre kórég han tĩ,” he mũ. ³⁹ “Páscoa kar ki sóg ãjag mỹ vese ù kavãg tĩ. Kỹ inh hỹn ãjag mỹ ãjag tỹ ù to: “Judeu ag pã'i,” he mũ ên kyvãn ke mũ,” he tóg, Pilatos ti. ⁴⁰ Hã ra ag kar tóg prẽnprêr mũ sir. “!..Jesus pijé!..! Barrabás kava ra..!” he ag tóg mũ sir, prẽnprêr kỹ. Hã ra Barrabás ên vỹ tỹ ùn jykre kórég pẽ nĩ.

19

¹ Kĩ Pilatos tóg soldado ag mỹ: “ti mrãnmrãn ra, ge kỹ,” he mũ. ² Kỹ ag tóg ti mrãnmrãn mũ. Ti mrãnmrãn kar kỹ ag tóg sónh pĩrĩn kỹ ti krĩ tógfĩg mũ sir. Kỹ ag tóg kur kusũg tỹ ti kri fón mũ gé sir. ³ Ti ki junjun kỹ ag tóg ti mỹ: “viva, Judeu ag pã'i,” he mũ, ti nyg kỹ. Kar ag tóg ti tãnh mũ gé sir.

⁴ Kĩ Pilatos tóg re ra kutẽ mãn mũ gé sir. Kỹ tóg vẽn kar mỹ: “ha vé ha,” he mũ. “Ti jykre kórég mẽ ja tũ sóg nĩ vẽ. Kỹ sóg ãjag mỹ ti ven mũ. Nén ù vẽnhmỹ han tũ ti nĩ vẽ,” he tóg, Pilatos ti, ag mỹ.

⁵ Kỹ Jesus tóg kãkutẽ mũ, hã ra tóg sónh tỹ ã krĩ tógfĩn kỹ kãkutẽ mũ, kur kusũg ên tu kỹ ke gé. Kỹ Pilatos tóg vẽn kar mỹ: “ti ve ra,” he mũ, ag tỹ hẽn ri ke mũn ti tovãnh jé, ag tỹ ti jagtar ên ve kỹ.

⁶ Pã'i ag tỹ ti ve kỹ, polícia ag tỹ ti ve kỹ ag tóg prẽnprêr mũ gé sir. “!..Ka to ti sã..! !..Ka to ti sã..!” he ag tóg mũ sir, prẽnprêr kỹ. Kỹ Pilatos tóg ag mỹ: “kỹ ãjag hỹn inhhã ka to ti sa sór mũ,” he mũ. “Ti pi(jé) nén ù kórég han mũ,” he tóg.

⁷ Kỹ ag tóg ti mỹ: “hã ra tóg: “tỹ inh Topẽ kósin nĩ,” he tĩ ãg mỹ,” he mũ. “Ëg tỹ ù tỹ ge tén ke vẽ. Hã tó ja ti nĩ, ãg mỹ, Topẽ ti, hã kỹ tóg rán kỹ nĩ,” he ag tóg mũ sir, Pilatos mỹ.

⁸ Kỹ Pilatos tỹ ti tỹ tỹ Topẽ kósin nĩ mẽ kỹ tóg ti mỹ e tãvĩ tĩ. ⁹ Kỹ tóg ã ãn kãra rã mãn kỹ Jesus mỹ: “tỹ ã hẽ tá ke nĩ?” he mũ. Hã ra Jesus tóg ti mré vẽmẽn mãn sór tũ nĩ. ¹⁰ Kỹ Pilatos tóg ti mỹ: “ã mỹ inh mré vẽmẽn ke tũ?” he mũ. “Isỹ ã kavãn sór nĩ kỹ sóg ã kyvãg mũ. Isỹ ka to ã sa sór kỹ sóg to ã sãg mũ gé. Tag to jykrén,” he tóg, Pilatos ti, Jesus mỹ. ¹¹ Hã ra Jesus tóg ti mỹ: “Topẽ tỹ ã tỹ pã'i han tũ nĩ ra ã tóg tag han ki kagtĩg nĩnh mũ vẽ,” he mũ. “Hã kỹ ù tỹ ã mỹ inh fẽg mũ ên vỹ ã tỹ Topẽ vĩ mranh mũ tag kãfór nĩ ha,” he tóg, Jesus ti.

¹² Kỹ tóg Pilatos mỹ e pẽ tãvĩ tĩ, kỹ tóg ti kavãn sór mũ sir. Hã ra Judeu ag tóg ti mỹ: “ã tỹ tag kyvãn kỹ ã pi(jé) tỹ ãg kar kri pã'i mág pẽ tỹ Imperador ên mré ke nĩ,” he mũ. “Û tỹ vêsỹ pã'i mág han mũ ên vỹ Imperador kato tẽ mũ,” he ag tóg. ¹³ Kỹ Pilatos tóg ag vĩ tag mẽ kỹ mũmẽg mũ, kỹ tóg Jesus jé prêr mũ, ti tỹ ti mré re tá jẽn h kutẽ jé. Kỹ tóg ã nĩgja ên kri nĩ nĩ, ã tỹ hẽ tá vẽn kar jykre vég tĩ ên ki. Tá ag tóg pó nẽ ja nĩgtĩ, hã kỹ ag tóg to: “Pó Nẽ,” he tĩ, hã vỹ: “Gabatá,” he mũ, Hebreu vĩ ki. ¹⁴ Meio dia ki ke vẽ. Tỹ vaj kỹ ag tóg festa tỹ Páscoa ên han sór mũ, hã kỹ ag tóg ùri vẽn tỹ hẽn ri ke kãn mũ. Ên kã meio dia ki Pilatos tóg ã nĩgja kri nĩ nĩ, ag mỹ ag tỹ vẽn jykre han ke mũ ên tó jé. Kỹ tóg Judeu ag mỹ: “ãjag pã'i mág hã vẽ ha,” he mũ. ¹⁵ Hã ra ag tóg prẽnprêr kỹ: “!..ti tén ra, ti tén ra, ka to ti sã..!” he mũ sir.

“Kỹ inh mỹ ãjag pã'i mág tỹ cruz to sanh mũ?” he tóg, Pilatos ti. Kỹ pã'i ag tóg ti mỹ: “pã'i mág ãg nỹtĩ, hã vỹ: Imperador, he mũ,” he mũ. ¹⁶ Kỹ Pilatos tóg ag mỹ: “ha cruz to ti sanh mũjẽg gé,” he mũ sir.

Ag tỹ Jesus tỹ cruz to sanh ke

(Mt 27.32-44; Mc 15.21-32; Lc 23.26-43)

¹⁷ Kỹ ag tóg Jesus mỹ cruz fig mũ, ti tỹ vyn kỹ pãnónh tỹ Calvário ra tĩg jé, ag tỹ Hebreu vĩ ki to: Gólgota, he mũ ên ra. ¹⁸ Tá ag tóg cruz to ti sãg mũ sir. Ti mré ag tóg ùn régre ag tỹ cruz to ag sãg mũ gé, kỹ ù vỹ ti pẽgja tá cruz to sa, jãvo ù vỹ ti jakãnh tá cruz to sa

gé. Jãvo Jesus vỹ ag kuju kã cruz ti to sa gé. ¹⁹ Hã ra Pilatos tóg Jesus to vãnh rá han ja nĩ, kỹ ag tóg ti krĩg mỹ vãnhrá ên sa ja nĩ, hã vỹ: “Nazaré tá Jesus vễ, Judeu ag pã'i tỹ rei vễ,” he mũ, vãnh rán ki. Hebreu vĩ ki tóg rán kỹ nĩ, Latim vĩ ki ke gé, Grego vĩ ki ke gé. ²⁰ Kỹ Judeu tỹ hên ri ke ag tóg vég mũ sir, vãnh rá ti. Jerusalem vỹ tá kakó nĩ, Jesus tỹ hễ tá cruz to sa kỹ jê ên ti tá, hã kỹ ù tỹ hên ri ke ag tóg ti venh kãmũjêg sir. ²¹ Kỹ tóg pã'i ag mỹ há tũ nĩ. Hã kỹ ag tóg Pilatos mỹ: “Judeu ag pã'i tỹ rei vễ, he ja ã nĩ, vãnh rán ki,” he mũ. “Hã ra tóg ki krov ja tũ nĩ. Vêso tóg: “tỹ sóg Judeu ag pã'i tỹ rei nĩ,” he ja nĩ. Kỹ: Judeu ag pã'i mág vỹ tỹ inh nĩ, he rán nĩ,” he ag tóg, Pilatos mỹ. ²² Hã ra Pilatos tóg ag mỹ: “vó,” he mũ. “Rán inh huri, kỹ tóg rán kỹ nĩ ha,” he tóg mũ.

²³ Kỹ soldado ag tóg Jesus tỹ ka to sãg mũ. Kỹ ag tóg ti kur mãn kỹ vãnh kãpãm mũ. Û tỹ 4 (ke) ag vễ, soldado ag, hã kỹ ag tóg ti kur tỹ vãnh kãpãm tỹ 4 (ke) han mũ. Hã ra ti vãnh kri fêg ja vỹ kur pir tỹ há nĩ. Kurỹr tũ ti nĩ. ²⁴ Kỹ ag tóg ti capa há ve kỹ jagnê mỹ: “êg hỹn tag kym ke tũ nĩ,” he mũ. “Ti capa to jogar he jé êg tóg ke mũ. Û tỹ mãg mũ ên hã vỹ tóg tunh mũ,” he ag tóg mũ. Kỹ ag tóg to jogar he mũ sir. Hã ra ag tỹ ti kur to jogar he mũ ên tóg rán kỹ nĩ gé, Topê vĩ rá ki, ha mẽ. “Inh kur tỹ vãnh kãpãm ag tóg, hã ra ag tóg inh kur tỹ vãnh kri fêg ja to jogar he mũ,” he ja tóg nĩ, Topê vĩ rá ki, hã kỹ ag tóg ke mũ.

²⁵ Hã ra Jesus mỹnh fi vỹ tá jê nĩ, cruz rã hã, fi jãvy fi mré. Kar kỹ Maria Madalena fi vỹ tá jê nĩ gé, kar kỹ Maria ù fi ke gé, Clopas prũ fi. ²⁶ Kỹ Jesus tóg ã mỹnh fi vég mũ sir. Ti mré tĩ mũ ù vỹ fi to grên ke kỹ jê nĩ, Jesus tỹ ù to há pẽ ên ti. Kỹ Jesus tóg ã mỹnh fi mỹ: “tag vỹ tỹ ã kósın nĩnh mũ ha,” he mũ, ã mré tĩ mũ ên to. ²⁷ Jãvo tóg ti mỹ: “fi hã vỹ tỹ ã mỹnh nĩnh mũ ha,” he mũ gé, fi to. Hã kỹ ti mré tĩ mũ ên tóg fi mỹ: “inh mré nĩnh kãtĩg,” he mũ, kỹ fi tóg ti ãn krêm nĩ nĩ, ti tỹ Jesus jêgja ki fi jê'yn jé.

Jesus ter

(Mt 27.45-56; Mc 15.33-41; Lc 23.44-49)

²⁸ Jesus tỹ ã mỹnh fi mỹ tag tó kar kỹ tóg sir ã tỹ nén hyn han ke mũ ên hyn han kãn ja nĩ. Hã to jykrén kỹ tóg hã ra nén tỹ ã to rán kỹ nĩ ên hyn han kãn sór mũ, hã kỹ tóg: “inh og há tóg tĩ,” he mũ sir. ²⁹ Tá runja ù vỹ nĩ nĩ, hã ra vinho kaja pir vỹ ki nĩ, runja ên ki. Kỹ ag tóg esponja tỹ vinho ki tỹ pun ke mũ, kỹ ag tóg ka tỹ hissopo jurỹn kỹ (ag tóg) nén kugpe jafã ên kusón mũ, kusón kỹ ag tóg vinho kãra rãg kỹ ti mỹ jun mũ sir, vinho ti. ³⁰ Kỹ tóg ki ùnh ùnh ge mũ sir, vinho ên ki. Kỹ tóg: “ke kãn inh huri,” he mũ. Kỹ ti krĩ tóg héré' he mũ, kỹ tóg hun ke mũ. Kỹ tóg hur ter.

Soldado ù tỹ Jesus kusón

³¹ Kỹ Judeu ag tóg Pilatos mỹ to vĩ mũ, soldado ag tỹ ù tỹ ka to sa kỹ nỹtĩ ag fa mrynhmranh jé, ag tỹ kãnhmar kãgter jé. Tỹ vaj kỹ ag mỹ festa mág vễ, kỹ ag tóg ùri festa ên to nén kar kãnkan tĩ gé. Hã ra tóg ag mỹ kórég nĩ, ù tỹ ag festa kurã ki cruz to sa kỹ ter mũ ti. Hã kỹ ag tóg Pilatos mỹ ag kãgtén ke to vĩ mũ, ag tỹ ka to ag kãrem jé. ³² Kỹ soldado ag tóg ù tỹ Jesus mré cruz to vin kỹ nỹtĩ ag fa mrynhmranh mũ mũ. ³³ Kỹ ag tóg Jesus fa mrynhmranh sór mũ gé, hã ra tóg hur ter, hã kỹ ag tóg mrynhmranh tũ nĩ sir. ³⁴ Kỹ soldado ù tóg ã rógro tỹ ti jên'yr ki kusón mũ, kỹ ti kyvénh tóg ki kãkutê mũ, kyvénh jãpri mré.

³⁵ Tag ve inh, mỹr, ha mẽ, hã kỹ sóg ãjag mỹ tó mũ. Sỹ ki hã tó vễ. Sỹ ãjag mỹ tag kãmén vễ, ãjag tỹ inh vĩ tag kri fi jé, ãjag tỹ ti ki ge sór jé. ³⁶ Hã ra tóg rán kỹ nĩ gé, ag tỹ ti kusón ke tag ti. “Ag pi(jé) ti kuka mrynhmranh ke mũ',” he tóg, Topê vĩ tỹ rán kỹ nĩ ki. ³⁷ Kỹ tag tóg rán kỹ nĩ gé, hã mẽ. “Ag tỹ ùn kusón mũ ên ve jé ag tóg ke mũ,” he tóg mũ gé, Topê vĩ ki, Jesus to.

Ag tỹ vãnh kej ra ti va mũ

(Mt 27.57-61; Mc 15.42-47; Lc 23.50-56)

³⁸ Kỹ Jesus to há ù tóg nĩgtĩ, Arimatéia tá José. Ên vỹ ti mré tĩg ja tũ nĩgtĩ, ti tỹ pã'i ag kamêg kỹ, hã ra tóg Jesus to há nĩ. Ên vỹ tóg sir Pilatos venh tĩ mũ, kỹ tóg ti mỹ: “sỹ Jesus tỹ ka to ti kãtérem há tóg tĩ,” he mũ. Kỹ Pilatos tóg ti mỹ: “há ti nĩ,” he mũ. Kỹ Arimatéia

tá José ên tóg Jesus tỹ cruz to ti kátérem tĩ mũ. ³⁹ Kĩ Nicodemos vỹ kãtĩ mũ gé, ù tỹ kuty tá Jesus mré vēmén mũ ên ti. Ên vỹ ger há ma kãtĩ mũ, 45 (ke) quilos vë mỹr. Ka tỹ mirra jënjo ger há vë, kar ka tỹ aloés jënjo ger há mré. Ên ma kãtig tóg mũ, Nicodemos ti. ⁴⁰ Kĩ ag tóg Jesus ti kátérem mũ sir, cruz to, José mré Nicodemos ti. Ti pãg ag tóg mũ sir, kur tỹ, hã ra ag tóg nén ger há ên tỹ ti pãg ke ên kãkã nĩm mũ gé. Judeu ag jykre hã vë, ag tỹ vënh kej tá ù fi kũ. ⁴¹ Ka kré ù vỹ Gólgota tá kakó nĩ, kũ tóg tá vënh kej tãg nĩ, pãró nor ti, ka kré ên tá. Kuprã ti nỹ. ⁴² Ên kãkã ag tóg ti fig mũ, ti kakó nĩn kũ. Hã ra tóg rãké nỹ ha, kũ ag festa tóg kakó' he mũ ha, hã kũ ag tóg vënh kej tãg ên kãkã Jesus fig mũ sir.

20

*Jesus rĩr mãn**(Mt 28.1-8; Mc 16.1-8; Lc 24.1-12)*

¹ Tỹ vaj ùn kũ, semana ki kurã ve ki Maria Madalena fi tóg Jesus venh tĩg sór mũ, ti kej tá. Kusã pë ki fi tóg ra tĩ mũ, kurã sĩ hã ra. Hã ra fi tóg tá jun kũ (fi tóg) pó ên vëg mũ, ti kej nĩfe ên ti. Kunũnh kũ tóg jë nĩ, kũ tóg sir nor kũ nỹ nĩ, ti kej ti. ² Kũ fi tóg Simão Pedro to vënhvãg tĩ mũ sir, Jesus mré tĩ ù to ke gé, ù tỹ Jesus to há tãvĩ ên to. Kũ fi tóg ag mỹ: “êg Senhor va ag tóg mũ ja nĩ,” he mũ. “Á kej kãki tóg tũ nĩ,” he fi tóg mũ. “Ag hỹn hẽ ra ti va kagáv,” he fi tóg mũ ag mỹ. ³ Kũ ag tóg venh mũ mũ gé, Pedro ti, Jesus mré tĩ tĩ ù ên ke gé. ⁴ Pétê ag tóg mũ mũ, hã ra ù ên tóg Pedro kã raran ke mũ, kũ tóg tá jun vén mũ. ⁵ Kũ tóg pãró nor ên ki pãnh ke kũ kãtã kur ên vëg mũ, ti pãg ja ti, hã ra tóg kãra rã ja tũ nĩ. ⁶ Kũ Simão Pedro tóg ti nón tá jun mũ gé, hã ra tóg inhhã kãra rã mũ, ti kej kãra, Pedro ti. Kũ tóg kur ên vëg mũ gé sir. ⁷ Ti krĩ pãg ja vỹ vyr mỹ nĩ nĩ, kónhpên kũ. ⁸ Kũ ù ên tóg ti nón kãra rã mũ gé sir, kũ tóg ã tỹ ven kũ: “hã ja vë,” he mũ. ⁹ Vãhã ag tóg ki kanhró nỹtĩ. Tag to hã ag tóg ti vĩ to jykren há han ja tũ nĩ ver, ti to nén rán kũ nĩ ên to, ti tỹ ã ter kar kũ rĩr mãn ke ên to. Vãhã ag tóg ki kanhró nỹtĩ.

¹⁰ Ag tỹ ti kej tỹ kuprã nỹ ve kar kũ ag tóg vỹnvỹn ke mũ, ãjag ãn ra.

*Jesus tỹ Maria Madalena fi mỹ vënh ven**(Mt 28.9-10; Mc 16.9-11)*

¹¹ Hã ra Maria Madalena fi tóg tá jë nĩ, ti kej nor nĩ ên tá. Fỹ fi tóg jë nĩ. Fi fỹ kũ fi tóg ti kej to pãnh ke kũ (fi tóg) kãtã êvãnh mũ sir. ¹² Kũ fi tóg ùn régre ag vigvëg mũ. Topë tỹ jëgnë jafã ag vë. Kur kupri rĩnh kũ ag nĩgnĩg kũ nỹtĩ, Jesus nỹgja tá, ti kej kãtã. ù tóg ti krĩ nĩgja tá nĩ, kũ ù tóg ti pën nỹtĩgja tá nĩ gé. ¹³ Kũ ag tóg fi mỹ: “ã tỹ ù jãvãnh kũ fỹ nẽ, jỹ?” he mũ. Kũ fi tóg ag mỹ: “inh Senhor va ag tóg mũ ja nĩ, hã ra sóg ag tỹ hẽ ra ti va mũ ja ên ki kagtĩg nĩ,” he mũ. ¹⁴ Kũ fi tóg vësykã êvãnh mũ, hã ra Jesus tóg tá jë nĩ. Hã ra fi tóg ti ki kagtĩg nĩ. ¹⁵ Kũ tóg fi mỹ: “ã tỹ ù jãvãnh kũ fỹ nẽ, jỹ?” he mũ gé. Hã ra fi tóg ti to: “ti hỹn tỹ ka kré tag ki rĩr tĩ jë, he sóg mũ,” he mũ. Hã kũ fi tóg ti mỹ: “ã mỹ ag tỹ hën ra ti va mũ vëg tũ, vỹ?” he mũ. ¹⁶ Kũ Jesus tóg fi mỹ: “Maria’,” he mũ, fi jiji tó kũ. Kũ fi tóg ti tỹ fi mỹ fi jyjy tó kũ (fi tóg) vãhã ti ki kanhrãn mũ sir. Kũ fi tóg ti mỹ: “Raboni’, ã hã mỹ’?” he mũ. Hebreu vĩ ki fi tóg tó mũ, hã kũ fi tóg: “Raboni’,” he mũ. Êg vĩ ki êg tóg tag to: “Senhor,” he tĩ. Fi tỹ vãhã Jesus ki kanhrãn kũ nĩn kũ fi tóg ti mỹ ke mũ.

¹⁷ Hã ra Jesus tóg fi mỹ: “inh vóg tũg nĩ ver,” he mũ. “Isỹ ver inh panh ra tãprynhe vë. Inh kanhkã ag mỹ tónh tĩg nĩ hã ra. Ag mỹ: “isỹ ver inh panh venh tĩg ke vë, hã ra tóg tỹ ãjag panh nĩ gé, he tóg,” hemnĩ. “Isỹ ver inh Topë to tãprynhe vë, kũ tóg tỹ ãjag Topë nĩ gé, he ti,” hemnĩ ag mỹ,” he tóg Jesus ti, Maria Madalena fi mỹ.

¹⁸ Kũ fi tóg tĩ mũ, ti mré mügtĩ ag mỹ tó jé. “Êg Senhor ve inh,” he fi tóg mũ. Kũ fi tóg ag mỹ tó kãn mũ sir, ti tỹ fi mỹ nén tó mũ ên ti.

*Jesus tỹ ã mré mũ tĩ ag mỹ vënh ven**(Mt 28.16-20; Mc 16.14-18; Lc 24.36-49)*

¹⁹ Kurã ên kã, semana tỹ kurã ve ên tỹ rãkãnh kũ ag tóg vënhmãn kũ nỹtĩ, ãn ù krêm, ti mré mũ tĩ ag. Hã ra ag tóg jãnkã nĩfénh ja nĩ, chave tỹ, ag tỹ êprã pã'i ag kamëg kũ. Hã ra Jesus tóg vãhã vënh ven mũ, ag kãki, kũ tóg ag mỹ: “mỹ sér nỹtĩmnĩ,” he mũ. ²⁰ Tag tó

kỹ tóg ag mý ã nĩgẽ nug ven mũ, ã jẽn'yr ti ke gé. Kỹ tóg ag mý sér tĩ sir, ag tỹ ẽg Senhor ven kỹ. ²¹ Kỹ tóg ag mý ke mãn mũ. “Mý sér nỹtĩmĩ,” he tóg. “Inh panh tỹ inh jẽnẽ vẽ. Kỹ sóg ỹri ãjag jẽnẽg mũ gé, ti tỹ inh jẽnẽ ri ke,” he tóg. ²² Tag tó kar tóg ag ki hu he mũ, ag kar ki, kỹ tóg ag mý: “Topẽ kuprĩg vỹ tỹ ãjag jagrẽ nỹtĩ ha,” he mũ. ²³ “Ãjag tỹ ù mý: “ã tỹ Topẽ vỹ mranh ja ẽn tỹ tóg vẽn pãte fón mũ,” hen kỹ tóg vẽn pãte fón kỹ nĩ nĩ. ãjag tỹ ù mý: “ã mý ti vẽn pãte fón ke tũ nĩ,” hen kỹ tóg vẽn pãte fón ke tũ nĩ,” he tóg, Jesus ti, ti tỹ ag mý vẽn ven vén kỹ.

Tomé tỹ vãhã Jesus ve

²⁴ Hã ra Tomé vỹ ag mré nĩ ja tũ nĩ, ag tỹ Jesus vég mũ ẽn kã. Tomé ẽn vẽ, ag tỹ ù to: “ũn vẽnĩ,” he mũ ẽn vẽ, Jesus mré tĩ tĩ ù ẽn ti. ²⁵ Ag tỹ Tomé ẽn ve kỹ ag tóg ti mý: “ẽg Senhor ve ẽg,” he mũ. Hã ra tóg ag mý: “ti nĩgẽ nug ve sór inh mũ,” he mũ, “isỹ ag tỹ prego tỹ ti nĩgẽ nugnón ja ẽn mẽ jẽ, inh nĩgẽ tỹ,” he tóg mũ. “Kỹ sóg ti jẽn'yr ki mẽnh ke mũ gé, sỹ ki ti kusón ja ẽn mẽ jẽ. Ke tũ nĩ (mũ) ra isóg kri nĩm ke tũ pẽ nĩ, ti rĩr mãn kri,” he tóg, Tomé ti.

²⁶ Kurã tỹ 8 (ke) tũg kỹ ag tóg vẽn mãn kỹ nỹtĩ gé, kỹ Tomé vỹ ag mré nĩ gé. Īn jãnkã vỹ ki chaven kỹ nỹtĩ. Kỹ Jesus tóg ag mý vẽn ven mãn mũ, ag mré jẽn kỹ. Kỹ tóg ag mý: “mý sér nỹtĩmĩ,” he mũ. ²⁷ Kỹ tóg vẽn mãn Tomé mý: “ã nĩgẽ tỹ inh nĩgẽ nugnor mẽ,” he mũ. “ã nĩgẽ tỹ inh jẽn'yr kusón ja ẽn ti mẽ gé. Kri nĩmĩ, to: “vẽn ó vẽ,” he mãn tũg nĩ,” he tóg, Jesus ti. ²⁸ Kỹ Tomé tóg ti mý: “inh Senhor,” he mũ. “Topẽ’,” he tóg. ²⁹ Kỹ Jesus tóg ti mý: “vãhã ã tóg kri nĩm sór mũ ha, ã tỹ inh ve kỹ,” he mũ. “Û tỹ ã tỹ inh vég tũ ra kri nĩm mũ ẽn mý tóg vỹ há pẽ han ke mũ, Topẽ ti,” he tóg, Jesus ti, ti tỹ ag mý vẽn ven mãn kỹ.

Ëg tỹ Jesus ki ge jẽ livro tag tóg rán kỹ nĩ

³⁰ Jesus vỹ ag rĩnve ẽg tỹ nén han vãn hyn han kãn ja nĩgtĩ, nén tỹ hẽn ri ke, hã ra sóg rán kãn ja tũ nĩ. ³¹ Sỹ livro tag rán vẽ, ù tỹ vẽn rá tag vég mũ kar ẽn ag tỹ Jesus ki ge sór jẽ, ag tỹ ti to: “Cristo vỹ tỹ ti nĩ, Topẽ kósin vỹ tỹ ti nĩ,” he jẽ. Kỹ ãjag tỹ ti ki ge kỹ ãjag tóg rĩr krỹg ja tũ ẽn venh ke mũ, ti tugrĩn, mýr, ha mẽ.

21

Jesus tỹ ã mré mũ tĩ ù ag mý vẽn ven mãn

¹ Tag pãte Jesus tóg kejẽn goj tỹ Tiberiades tá ag mý vẽn ven mãn mũ, kỹ tóg ge tĩ, ha mẽ. ² Simão Pedro vỹ tá nĩ, Tomé ti ke gé, ag tỹ ù to: “ũn vẽnĩ,” he mũ ẽn ti, kar kỹ Natanael ti ke gé, ẽmã tỹ Caná tá ke ẽn, ga tỹ Galiléia tá ke ẽn, kar kỹ Zebedeu krẽ ag vỹ tá nỹtĩ gé, ù tỹ Jesus mré mũ tĩ régre ù ag ke gé. ³ Kỹ Simão Pedro vỹ ag mý: isỹ pirã kugmĩnh tĩg vẽ,” he mũ. Kỹ ag tóg ti mý: “ã mré ẽg mũnh mũ,” he mũ gé. Kỹ ag tóg barco ki ge mũ, goj kri mũ jẽ. Hã ra ag tóg nén ù kãgmĩg tũ pẽ nĩ, kuty ẽn kã.

⁴ Tỹ vaj kỹ kusã pẽ ki, rã tỹ jun ke mũ ra Jesus vỹ ga fyr tá jẽ nĩ, hã ra ag tóg ti ki kagtĩg nỹtĩ ver. ⁵ Kỹ tóg ag mý: “ãjag mý pirã ù kãgmĩg tũ?” he mũ. Kỹ ag tóg ti mý: “hỹ,” he mũ. ⁶ Kỹ tóg ag mý: “rede tỹ barco pẽgja tá fón,” he mũ, “kỹ ãjag tóg kugmĩnh ke mũ, pirã ti,” he tóg mũ. Kỹ ag tóg ke mũ. Kỹ tóg fór mũ, rede ti, kỹ ag tóg kãtãnfyn kórég nỹtĩ, ti kufy tĩn kỹ, pirã e nỹtĩn kỹ. ⁷ Kỹ ù tóg Pedro mý: “ẽg Senhor hã vẽ,” he mũ. Jesus tỹ ù to há pẽ ẽn vỹ Pedro mý ke mũ. Kỹ Pedro tóg ti vỹ tag to ã kur rĩnh mãn mũ. Kunũnh ja ti nĩ, ti kur ti. ã kur rĩnh kỹ tóg barco ki kãkutẽ kỹ (tóg) goj kãmĩ tĩ mũ sir, ti tỹ Jesus kukãm tĩg jẽ, goj kãmĩ. ⁸ Hã ra ag tóg ti nón barco kãmĩ mũ mũ gé, rede ẽn raran ag tóg mũ mũ. Kakó ti nĩ ha, goj fyr ti, 100 (ke) metros hỹn.

⁹ Ag tỹ vagvag ke pa kỹ ag tóg Jesus jãkã vég mũ sir. Pirã kugjĩn tóg nĩ nĩ, kỹ ẽmĩ tóg tá ti rã nĩ gé. ¹⁰ Kỹ Jesus tóg ag mý: “ãjag pirã gé kãmũjẽg,” he mũ. ¹¹ Kỹ Simão Pedro tóg barco kãra rã kỹ rede ẽn raran mũ. Goj fyr kukãm tóg ma tĩ mũ, kỹ tóg vag ke mũ sir, tar tá. Hã ra tóg fór nĩ, rede ti, pirã tỹ, 150 (ke) hỹn, pirã mág tãvĩ. Hã ra rede tóg jar ja tũ nĩ, ti e tãvĩ nỹtĩ ra. ¹² Kỹ Jesus tóg ag mý: “konh kãmũjẽg,” he mũ. Hã ra ag tóg ti mý: “tỹ

ã ù nĩ?” he jāvānh nýtĩgtĩ. Ti ki kanhró ag tóg nýtĩ, ti tỹ tỹ ěg Senhor nĩn ki. ¹³ Kĩ Jesus tóg ag mĩ ěmĩ ěn kã vĕnh ken mũ sir, pirã ti ke gé.

¹⁴ Jesus tỹ ag mĩ vĕnh ven tãgtũ vĕ ha, ěn kã, ti ter kar kũ rĩr mǎn kar kũ.

Jesus tỹ Pedro mré vĕmĕn

¹⁵ Ag jĕn kar kũ Jesus tóg Simão Pedro mĩ: “Simão’,” he mũ. “João kósin’,” he tóg. “Ă mĩ iso há tãvĩ nĩ, ě mré ke ag tỹ iso há nýtĩ ěn kãfór?” he tóg, Jesus ti, Pedro mĩ. Kĩ tóg ti mĩ: “hỹ, hã vĕ,” he mũ. “Ki kanhró ě tóg nĩ, isỹ ě to há pĕ nĩn ki,” he tóg, Pedro ti, Jesus mĩ. Kĩ Jesus tóg ti mĩ: “kũ ù tỹ inh ki ge kũ nýtĩ ag mĩ inh vĩ tómnĩ,” he mũ.

¹⁶ Kĩ tóg ti mĩ vĩ mǎn mũ, Jesus ti, Pedro mĩ. “Simão’,” he mǎn tóg. “João kósin’,” he tóg. “Ă mĩ iso há nĩ?” he tóg. Kĩ tóg ti mĩ: “hỹ, hã vĕ,” he mǎn mũ. “Ki kanhró ě tóg nĩ, isỹ ě to há nĩn ki,” he mǎn tóg. Kĩ Jesus tóg ti mĩ: “kũ ù tỹ inh ki ge kũ nýtĩ ag mĩ inh vĩ tómnĩ,” he mǎn mũ gé.

¹⁷ Kĩ Jesus tóg ti mĩ vĩ mǎn mũ gé, vĩ tãgtũ han kũ. “Simão’,” he tóg. “João kósin’,” he tóg. “Ă mĩ iso há nĩ?” he tóg. Kĩ tóg Pedro mĩ e tĩ, ti tỹ ti mĩ ke tãgtũ han kũ. Ti ki jĕmĕ tãgtũ han tóg, hã kũ tóg ti mĩ e tĩ. Kĩ tóg ti mĩ: “nĕn kar ki kanhró ě tóg nĩ,” he mũ. “Ki kanhró ě tóg nĩ, isỹ ě to há nĩn ki,” he tóg, Jesus mĩ, Pedro ti. Kĩ Jesus tóg ti mĩ: “kũ ù tỹ inh ki ge kũ nýtĩ ag mĩ inh vĩ tómnĩ,” he mǎn mũ. ¹⁸ “Ă mĩ sóg ki hã tó mũ, ha mĕ,” he tóg mũ. “Ă kyrũ kã ě tóg ě kur rĩnh kũ ě tỹ hĕn ra tĩg sór mũ ěn ra tĩg ja nĩgtĩ. Kejĕn ě kófa nĩnh ke vĕ. ěn kã ě tóg ag mĩ ě nĩgé tỹ vĕnh kri tỹ tam kenh mũ, kũ ag tóg ě senh mũ, ha vemnĩ, kũ ag tóg ě pére mũnh mũ, ě tỹ hĕ ra tĩg sór tũ ěn ra,” he tóg, Jesus ti, Pedro mĩ. ¹⁹ Ti tỹ ti mĩ ag tỹ ti tĕn ke tó vĕ. Hã ra ag tóg Topĕ tỹ tỹ ùn mág nĩ venh ke mũ, ag tỹ Pedro tĕn ke tugrĩn. Tag tó ti, Jesus ti, Pedro mĩ. Tag pãte tóg ti mĩ: “mũ jé ha, inh mré,” he mũ gé sir, Jesus ti.

Jesus tỹ João to Pedro mĩ vĩ

²⁰ Ag mũn kũ Pedro tóg vĕsỹjãm ěvānh kũ (tóg) ù tỹ Jesus nón kãtĩg mũ ěn vĕg mũ gé, Jesus tỹ ù to há tãvĩ ěn. Ag jĕn rĕn ja ěn tá tóg Jesus rã hã nĩ ja nĩ, ti mré tóg jagnĕ to grĕn ke kũ nĩ ja nĩ, Jesus tỹ ù to há tãvĩ ěn. ěn kã tóg Jesus ti mĩ: “ũ nỹ hỹn ě ven ke mũ, pã'i ag mĩ?” he ja nĩ. ěn hã vỹ Jesus nón tĩg mũ, Pedro tỹ ti mré tĩg kũ. ²¹ Pedro tỹ ti tỹ ag nón kãtĩ mũ ve kũ tóg Jesus mĩ: “jãvo ù tỹ ěg nón kãtĩg mũ tag ti?” he mũ. ²² Kĩ Jesus tóg ti mĩ: “sỹ ti mĩ nĕn tó mũ vỹ vyr mĩ nĩ,” he mũ. “Kỹ sỹ ě mĩ nĕn tó mũ vỹ vyr mĩ nĩ gé,” he tóg mũ. “Sỹ ti mĩ: “ter ke tũ ě tóg nĩ, isỹ vỹn ke ve jé ě tóg ke mũ,” he sór mũ ra sóg ti mĩ tónh ke mũ vĕ,” he tóg. “Ă hã mĩ sóg ě tũ tónh ke mũ, hã kũ sóg ě mĩ: mũ jé ha, inh mré, he mũ,” he tóg, Jesus ti, Pedro mĩ. Ti tỹ ù tỹ ag mré kãtĩ mũ ěn to ken hã vĕ.

²³ Jesus vĩ tag tugrĩn vĕnh kar tóg ti to: “ter ke tũ ti nĩ,” he tĩ, Jesus ki ge kũ nýtĩ kar ag. Hã ra Jesus pi(jé) ti to: “ter ke tũ ti nĩ,” he ja nĩgtĩ'. Ti to tóg: “sỹ ti mĩ: ter ke tũ ě tóg nĩ, isỹ vỹn ke ve jé ě tóg ke mũ, he sór mũ ra sóg ti mĩ tag tónh ke mũ vĕ,” he ja nĩ, Pedro mĩ, ù ěn to. Hã kũ ti to: “ter ke tũ ti nĩ,” he tũg nĩ.

João tỹ vĕnh kãmĕn

²⁴ João vỹ tỹ inh nĩ. Inh hã vỹ tag ve kǎn ja nĩ, hã kũ sóg rǎn. Ki hã tó sóg tĩ, vĕnh kar vỹ tag ki kanhró nýtĩ. ²⁵ Hã ra sóg Jesus tỹ nĕn hyn han mũ ěn rǎn kǎn ja tũ nĩ. Ti tỹ nĕn hyn han mũ ěn vỹ e tãvĩ nýtĩ, e tãvĩ. ěg tỹ tag rǎn kǎn sór mũ ra ěg tóg livro tỹ hĕn ri ke hyn han ke mũ vĕ. Kỹ ěg hỹn hĕ tá livro kar tag vin han ke mũ'? Sĩ ti nĩ, ěg ga ti, kũ ěg tỹ hĕ tá livro tag vin han ke tóg tũ tĩnh mũ, ěg tỹ Jesus tỹ nĕn hyn han ja ěn rǎn kǎn sór mũ ra.

Hã vĕ.

APÓSTOLO AG TỠ NÉN HAN KĀME

¹ Teófilo, inh livro ve ki sóg ã mỹ Jesus tỹ nén han kar tó ja nĩ, ti tỹ nén han vén mũ ên ti, ti tỹ nén han rén ên ti ke gé. Ti tỹ êg kanhrân mũ ên rán sóg huri ke gé. ² Kỹ sóg ti tỹ kanhkã ra tãpny mũ rán huri ke gé. ã tỹ kanhkã ra tãpny to hã tóg apóstolo ag mré vēmén ja nĩ ver, ã tỹ ùn kuprêg mũ ag mré. Topê kuprĩg tỹ ti mỹ nén tó mũ ên tó tóg mũ ag mỹ, ag tỹ ki hã han jé. ³ ã ter kar kỹ Jesus tóg ag mỹ vènh ven tỹ hên ri ke han ja nĩ, kurã tỹ 40 (ke) ki. Rĩr măn kỹ tóg ag mỹ vènh ven ja nĩ, ti tỹ ùn kuprêg ja ên ag mỹ. Ag tỹ ti ve kỹ, ag tỹ ti mré vēmén kỹ ag tóg ti rĩr jê ki kanhró nỹtĩ, apóstolo ag. Ag mỹ tóg Topê tỹ tỹ êg pã'i nĩ kãmén mũ, Jesus ti.

⁴ Kejên tóg ag mré nĩ nĩ. Kỹ tóg ag mỹ: “ver cidade tỹ Jerusalém tá kãpa tũg nĩ,” he mũ. “Tá nỹtĩ kỹ Topê tỹ ãjag mỹ nén tó ja jãvãnh nĩ,” he tóg, “isỹ ãjag mỹ nén tó ja ên ti,” he tóg. ⁵ “João vỹ goj tỹ êg kygpe ja nĩgtĩ,” he tóg. “Hã ra kãnhmar ãjag tóg Topê kuprĩg tỹ jagrê venh ke mũ. Sỹ ãjag kypenh ken hã vê,” he tóg, Jesus ti. Kỹ tóg tĩ mũ sir.

Jesus tỹ kanhkã ra tĩg

⁶ Kejên ag tóg vènh măn mũ sir, Jesus tỹ ùn vin mũ ag. Kỹ tóg ag mré nĩ nĩ, Jesus ti. Kỹ ag tóg ti mỹ: “Senhor,” he mũ. “ã mỹ ù ri êg pã'i mág fêg măn mũ', êg povo tỹ Israel tỹ pã'i mág?” he ag tóg ti mỹ.

⁷ Hã ra tóg ag mỹ: “vó,” he mũ. “Topê hã ki kanhro nĩ,” he tóg. “ãjag tũ pijé,” he tóg. “Kurã ên ki kanhrân ke tũ ãjag tóg nĩ, Topê tỹ ãjag pã'i mág fêg măn ke kurã ti. Topê hã ne kurã tag tónh ke mũ,” he tóg. ⁸ “Hã ra Topê kuprĩg vỹ tỹ ãjag jagrê nĩnh ke mũ. Kỹ ti hã vỹ ãjag tar han ke mũ, ãjag tỹ inh kãmén jé. Cidade tỹ Jerusalém tá ãjag tóg inh kãmén ke mũ, ga tỹ Judéia tá ke gé, ga tỹ Samaria tá ke gé, ga fyn ja tá hã ke gé mỹr,” he tóg, Jesus ti.

⁹ ã tỹ tag tó kar kỹ tóg vãhã kynch mỹ tãpny mũ sir ag rĩnve, kỹ kanhkã góg vỹ ti kri rũm ke mũ sir, ti ve măn tũ ag tóg nĩ sir. ¹⁰ Hã ra ag tóg kanhkã tugnyũm mũ, ag tỹ ti tĩg ven kỹ, ti tỹ ùn vin mũ ag.

Kỹ vãhã ùn régre ag tóg tá nỹtĩ, kur kupri rĩnh kỹ. Topê tỹ jênê jafã ag vê, ùn régre ên ag. ¹¹ Kỹ ag tóg ag mỹ: “ha vé, Galiléia tá ke',” he mũ. “ãjag hã ne tóg kanhkã tá êvãnh nỹtĩ nĩ,” he ag tóg. “Jesus vỹ vỹn kenh mũ, ti tĩg ja ên ri ke han jé tóg ke mũ. Ti tỹ kanhkã ra tãpny vê, hã ra tóg tá kãtére măn ke mũ gé,” he ag tóg, Topê tỹ jênê jafã ag, Jesus tỹ ùn vin mũ ag mỹ.

Ag tỹ Matias fêg

¹² Kỹ Jesus tỹ ùn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kỹ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

¹³ Ag tỹ Jerusalém tá junjun kỹ ag tóg ãn to jãpny jafã to jãpny mũ, tá nỹtĩ jé, ãn kri. ù tỹ tá nỹtĩ ag hã vê: Pedro, João, Tiago, André, Filipe, Tomé, Bartolomeu, Mateus, Tiago ù hã vỹ: Alfeu kósin, he mũ, Simão ke gé, vỹ tar han tĩ tag ti, Judas ke gé, Tiago kósin tag ti. ¹⁴ Ag kar ên tóg Topê mré vỹ mũ, jagnê mré, ùn tỹtã fag mré hã, Maria fi mré hã, Jesus mỹnh ên fi, Jesus jãvy ag mré hã ke gé, ha mẽ.

¹⁵ Kejên Jesus mré ke tỹ hên ri ke ag vỹ tá nỹtĩ nĩ, ãn to jãpny jafã ên tá, ù tỹ 100 kri 20 (ke) hỹn.

¹⁶ Kỹ Pedro vỹ tóg jêg nê mũ, kỹ tóg: “ha vé, inh kanhkã',” he mũ. “Vãsỹ tóg rán kỹ nĩ, Judas to,” he tóg. “Topê kuprĩg tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vènh rán ki,” he tóg. “Ag jãmĩ tóg kãtĩg ja nĩ, Judas ti, ù tỹ Jesus kãgmĩnh ke mũ ag jãmĩ. ¹⁷ Hã ra tóg tỹ êg mré ke ja nĩ, kỹ ti tỹ nén han mũ tóg êg tỹ nén han mũ ri ke ja nĩ gé,” he tóg, Pedro ti. ¹⁸ “Hã ra tóg Jesus kato jãnkamy măn ja nĩ, kỹ tóg jãnkamy ên tỹ êpỹ kajãm ja nĩgtĩ. Hã ra tóg ã nunh kã vènh jãján ja nĩ, kỹ tóg tam ke kỹ

kutē ja nī, kŷ ti nug tóg jar ja nī, kŷ ti nug tóg kākutē ja nī, kŷ tóg ter ja nī, Judas ti,” he tóg, Pedro ti.

¹⁹ “Kŷ Jerusalém tá ke kar ag tóg mēg mū sir, hā kŷ ag tóg ti japŷ to: Aceldama, he mū, hā vŷ: ěpŷ kyvénh, he mū, ěg vī ki,” he tóg, Pedro ti.

²⁰ “Ěg tŷ Topē mŷ jān jān jafā ki tag tóg rán kŷ nī, hā mē: ěn jamā vŷ vag ke mū, ū pi(jé) ki ěmān mān mū’, he tóg, vēnh rán ki, Judas to,” he tóg, Pedro ti. “Kŷ ū vŷ ge nī gé, hā mē: ū ū tŷ ti jĕg ja kā jĕnh ke kŷ ti rānrāj han ke vē, he tóg mū gé, vēnh rán ki,” he tóg, Pedro ti. ²¹ “Hā kŷ ěg tŷ ěg mré mū tī ū jāvānh ke vē. Jesus mré tóg tŷ ja nŷgtī, ěg tŷ ūn jāvānh ke mū ti, kŷ tóg Jesus tŷ ga mī tī ěn ve ja nŷgtī gé. ²² João tŷ Jesus kype ve ja tóg nī gé. Jesus tŷ kanhkā ra tāpŷy ve ja tóg nī gé. Jesus tŷ nĕn han mū kar ve ja tóg nī, ěg tŷ ūn jāvānh ke mū ti. Kŷ tóg sir Jesus rīr mān tónh ke mū ěg mré,” he tóg, Pedro ti.

²³ Kŷ ag tóg ūn régre ag vin mū, hā vŷ: José, he mū, ti jyŷy ū hā vŷ: Barsabás, he mū. Fóg tŷ ti jiji hā vŷ: Justo, he mū. Ti mré ag tóg Matias fĕg mū gé. ²⁴ Kŷ ag tóg Topē mré vī mū, kŷ ag tóg tag tó mū, ha mē. “Ěg jóg’,” he ag tóg ti mŷ. “Ěg tŷ nĕn to jykrĕn mū ki kanhró ā tóg nī,” he ag tóg mū. “Ā hŷn ū tŷ hĕ kuprĕg, ūn régre tag ag kā, ²⁵ ti tŷ ěg mré ā rānrāj tag han jé, ti tŷ tŷ ěg mré apóstolo jĕ jé? Judas vŷ ā rānrāj tovānh, kŷ tóg ā tŷ ra tŷ ke ěn ra vyr. Kŷ ū tŷ hĕ nŷ ti jĕg ja kā jĕnh mū ha?” he ag tóg mū, Topē mŷ. ²⁶ Kŷ ag tóg to jogar he mū sir, hā ra Matias tóg Judas jĕgja kā jĕ nī. Hā kŷ tóg tŷ ū tŷ 11 (ke) ag mré ke nī sir, tŷ tóg apóstolo jĕ sir.

2

Topē kuprĭg tŷ tŷ ěg jagrĕ

¹ Vāhā tóg festa tŷ Pentecostes kurā tá krŷg mū. Kŷ vēnh kar vŷ vēnh mān kŷ nŷtī nī, Jesus ki ge kŷ nŷtī kar ěn ag.

² Kŷ vāhā kanhkā tá kóho ri ke tóg mē há tī, króg he mū ěn ti. Kŷ ĩn tóg kóho ri ke ěn tŷ fór mū. Hā ra ag tóg ĩn ěn ki nŷtī, Jesus ki ge kŷ nŷtī ag.

³ Kŷ ag tóg nĕn nĕ vég mū, hā ra tóg tŷ pī gru hā pĕ nī, nĕn nĕ ěn ti. Vĕnh kápópām kŷ tóg nī nī, pī gru hā pĕ ěn ti. Kŷ tóg ag kri nī’ nī’ he kĕn mū, pī gru hā pĕ ěn ti. ⁴ Kŷ Topē kuprĭg tóg ag ki ge kĕn mū, kŷ ag tóg vēnh vī ū tugtó mū, Topē kuprĭg tŷ ag krĭn kŷ, ti tŷ tŷ ag jagrĕ nĭn kŷ.

⁵ Hā ra Jerusalém tá ke ū ag tóg Topē to há nŷtī gé. Israel ag vē gé, hā ra ag tóg povo tŷ hĕn ri ke mī mogmog ja nī. Hā kŷ ag vī tóg tó tŷ hĕn ri ke nī.

⁶ Ag tŷ kóho ri ke ěn mē kŷ ag tóg vēnh mān mū. Kŷ ag tóg ājag vī e ěn ki Pedro ag tŷ nĕn tó mū mĕg mū. ⁷ Kŷ tóg ag mŷ e tī. Ag fe tŷ hĕn ri ke nĭn kŷ ag tóg: “ha vé, Galilĕia tá ke ag vē mŷr,” he mū. “Galilĕia tá ke ag vŷ vyr mŷ vī nŷtī. ⁸ Hā ra ěg tóg ěg vī pĕ ki ag vī jĕmĕg mū,” he ag tóg. ⁹ “Ěg kā ū ag tóg Pártia tá kāmū mū, kŷ ū ag tóg Média tá kāmū mū gé, ū ag tóg ga tŷ Elāo tá kāmū mū, ū ag tóg ga tŷ Mesopotāmia tá kāmū mū, ū ag tóg Judĕia tá kāmū mū, ū ag tóg Capadócia tá kāmū mū, kar kŷ Ponto tá, Āsia tá, ¹⁰ Frĭgia tá, Panfĭlia tá, Egito tá, ga tŷ Lĭbia tá, cidade tŷ Cirene ěn mā tá. Ū ag tóg cidade tŷ Roma tá kāmū mū gé. ¹¹ Ū ag tóg tŷ Israel nŷtī, kar kŷ ū ag tóg tŷ fóg tŷ Israel jykre han mū nŷtī gé. Ū ag tóg goj vāso tŷ Creta tá kāmū mū, ū ag tóg ga tŷ Arábĭa tá kāmū mū gé. Ěg kar tóg ěg vī pĕ ki ag tŷ Topē kāmĕn mū mĕg mū, ag tŷ Topē tŷ nĕn han ja kāmĕn mū ti, Topē tŷ milagre hŷn han ja ěn ti,” he ag tóg. ¹² Ājag mŷ e tĭn kŷ ag tóg jagnĕ mŷ: “ne nĕ hŷn’?” he mū. Ag fe tóg jŷrŷn ke mū, ag tŷ ge ve ja tŷ nŷtĭn kŷ.

¹³ Ū ag tóg hā ra nyg mū. “Kronkron kŷ ag kĕgter mū mŷr,” he ag tóg.

Pedro tŷ ag mŷ Topē vī tó

¹⁴ Kŷ Pedro tóg ū tŷ 11 (ke) ag mré jĕgnĕ mū, kŷ tóg jamā hár(a) ag mŷ: “inh kanhkā’,” he mū. “Jerusalém tá ke’,” he tóg. “Jĕmĕ há han ra, sŷ ājag mŷ nĕn tó mū ti,” he tóg. ¹⁵ “Ājag hā tóg ěg to: kronkron kŷ ag kĕgter mū, he mū. Hā tŷ vē hā ra. 9 horas vē ver, meio dia to hĕn sa mŷr,” he tóg. “Ag kronkron kŷ ag tóg rākĕnh kŷ kronkron kŷ kĕgter mŷgtī, ūn kronkron mū ěn ag,” he tóg. “Hā kŷ ěg tóg kron ja tŷ nī,” he tóg, Pedro ti.

¹⁶ “Hã ra tóg vāsý rán ký nĩ, ěg tý ũri nén vég mũ ti. Topě ví tó tí tý Joel tóg vāsý tag tó ja nĩ, ha mẽ: ¹⁷ “kurã tý ěgno to hã sóg inh kuprĩg jĕnĕnh mũ, vĕnh kar mý, ti tý tý ājag jagrĕ nĩ jé,” he ja tóg nĩ, Topě ti. “Ký ājag krĕ ag tý fag mré Topě ví mẽ ký tónh ke vĕ. Kyrũ ag tý nén nĕ venh ke vĕ. Kófa ag tý vĕnh pétinh ke vĕ. ¹⁸ Sý inh camarada ag mý inh kuprĩg jĕnĕnh ke vĕ gé, fag mý ke gé. Ký fag tóg inh ví tónh ke mũ gé,” he tóg, Topě ti. ¹⁹ “Ājag tý nén han vānh han jé sóg ke mũ gé, ājag mý, kanhkã tá, ga tá ke gé, ěpra, kyvĕnh mýr, pĩ mýr, nĩja mýr. ²⁰ Ký rã tý kutyg ke vĕ, kysã kyvĕnh ke vĕ gé. Kar ký Topě kurã vĕ sir, kurã mág ěn ti. ²¹ Ký ũ tý Topě mý nén kar to ví mũ ěn kren ke vĕ sir,” he tóg, Topě ti. Joel tý tón hã vĕ, vāsý,” he tóg, Pedro ti.

²² “Inh kanhkã', inh ví jĕmĕ ra,” he tóg. “Nazaré tá Jesus vĕ mýr,” he tóg. “Ti hã tóg nén han vānh hyn han ja nĩgtĩ, Topě jykre hyn han ja tóg nĩgtĩ, Topě tý ti jĕnĕn ký. Hã ra Topě tóg Jesus mý tó ja nĩ, ti tý milagre ěn hyn han jé. Ký tóg ājag rĩnve hyn han, ājag tý ve jé, Jesus to jykrén jé. Hã ký ājag tóg vé,” he tóg, Pedro ti. ²³ “Hã ra Topě tóg ājag mý ti fĕg sór ja nĩ, Jesus ti. Ký tóg to jykrén ký ājag mý ti fĕg ja nĩ. Jãvo ājag tóg ka to ti sa ja nĩ, ti tén ja ājag tóg nĩ. Ký ũ tý ka to ti sãg mũ ěn ag jykre vỹ pãno tãví nĩ. ²⁴ Hã ra Topě tóg ti rĩn mãn ja nĩ, hã ký tóg vĕser jagĕgtar ěn tý tũ' he ja nĩ ti mý. Hã ký tóg vĕser jamã tá nĩg mág ja tũ nĩ, Jesus ti,” he tóg, Pedro ti.

²⁵ “Hã ký Davi tóg Jesus jo tag tó ja nĩ, ký tóg Jesus tý ā jóg mré ví ri ke nĩ. Ti to tóg: “ěg jóg',” he ja nĩ. “Ā vég isóg nĩ nĩ,” he ja tóg nĩ. “Inh pĕgja tá ā tóg nĩ nĩ, hã ký sóg krónh ke tũ nĩ,” he ja tóg nĩ, Davi ti. ²⁶ “Hã ký inh fe tóg mrin ke mũ. Ví sér han isóg nĩ nĩ. Iser ký inh fár tóg nýnh ke mũ, hã ra sóg to krĩ kufy tũ nĩ. ²⁷ Inh kuprĩg vỹ vĕnh kuprĩg jamã tá nĩnh ke tũ nĩ. Inh fár vỹ vag ke tũ nĩ gé, sý tý ā tý kuprĕg ja nĩn ký,” he ja tóg nĩ, Davi ti, Topě mý. ²⁸ “Inh kanhrãn ā tóg nĩ nĩ, isý kanhkã to ěpry ěn ve há han jé, kanhkã to ěmĩn ěn ti. Isý ā mré nĩn ký tóg inh mý sér tãví tí,” he ja tóg nĩ. Davi tý Jesus tón hã vĕ,” he tóg, Pedro ti.

²⁹ “Inh kanhkã',” he tóg. “Ěg jóg'jóg tý Davi kãmén há han jé sóg ke mũ ājag mý,” he tóg. “Vāsý ti ter mýr, ký ag tóg vĕnh kej tá ti péju, hã ra ěg tóg vég tí, ti kej ti, Davi kej ti,” he tóg. ³⁰ “Ā tý ga mĩ tĩg ký tóg hã ra Topě ví tó tí ja nĩgtĩ, Davi ti. Topě tóg ti mý: “ā krĕ'krĕ ag kã ũ vỹ tý pã'i tý rei nĩnh mũ,” he ja nĩgtĩ, Topě ti. ³¹ Topě ví tag kri fi ký tóg Cristo rĩr mãn ke tó ja nĩgtĩ gé, Davi ti. Hã ký tóg ā ví ěn tó ja nĩgtĩ. Cristo pi(jé) vĕser jamã tá nĩg mág han', ký ti fár vỹ vag ja tũ nĩ gé,” he tóg, Pedro ti.

³² “Cristo vĕ, hã vỹ: Jesus, he mũ. Topě vỹ ti rĩn mãn, ký ěg kar tóg ti ve ja nĩgtĩ,” he tóg. ³³ “Topě tóg ti mý: “kunĩg, inh pĕgja tá nĩ,” he ja nĩ, Jesus ti mý. Ký ěg jóg tóg ti mý ā tý ěg mý nén tó ja fĕg, hã vỹ: Topě kuprĩg, he mũ. Hã ký tóg ěg mý tý jagrĕ han mũ, Topě kuprĩg tý, Jesus ti. Hã ký ājag tóg ũri tag vég mũ, tag mĕg mũ,” he tóg, Pedro ti.

³⁴ “Davi hã tóg rĩr mãn ja tũ nĩ ver, kanhkã ra tóg tãpry ja tũ nĩ ver, ge ra tóg tag tó ja nĩ, ha mẽ: “ěg jóg mág vỹ inh Senhor mý tag tó ja nĩ, hã vỹ: “nĩ ra ver, inh pĕgja tá,” he ja tóg nĩ, ³⁵ “sý ā kato vāsãnsãn mũ ag tý ā jakrĕm vin jé, ag sigse jé,” he ja tóg nĩ. Davi tý tón hã vĕ,” he tóg, Pedro ti.

³⁶ “Jesus tag hã vỹ, ājag tý ka to ũn sãg mũ tag hã vỹ: tý ěg Senhor nĩ, he mũ,” he tóg. “Topě vỹ ti to: “tý tóg Cristo nĩ,” he mũ. “Tý tóg vĕnh kar Senhor nĩ,” he tóg. Ěg tý vĕnh ví tag kri finh ke vĕ. Ěg povo tý Israel tý ti ki kanhrãn ke vĕ, ěg ví tag kri nĩm ke vĕ,” he tóg, Pedro ti, ũ tý vĕnh mãn ký nýtĩ kar ag mý.

³⁷ Ag tý ti ví jĕmĕ ký ti jykre tóg ag kãra rã mũ sir. Ký ag tóg ti mý: “ký ěg hýn hĕ ri kenh mũ, vỹ?” he mũ, Jesus tý ũn vin mũ kar ag mý ke gé.

³⁸ Ký Pedro tóg ag mý: “ājag jykre tovānh ra,” he mũ. “Ký ěg tóg ājag kygpenh ke mũ, Jesus Cristo jiji tó ký,” he tóg. “Ký Topě tóg ājag mý ājag tý ti ví mranh ja ěn tý vĕnh pãte fón ke mũ. Ký ājag tóg Topě kuprĩg tý jagrĕ nýtĩnh mũ gé, Topě tý ājag mý ti jĕnĕn ký. ³⁹ Ti tý ājag hã mý ti nĩm ke vĕ inhhã, ājag krĕ mré hã ke gé. Ti tý ũn mý vĕnh ví jĕnĕg mũ kar ag mý tóg nĩm tí, Topě ti, ěg jóg mág ti, ag tý ver kuvar há tá mũ hã ra,” he tóg, Pedro ti.

⁴⁰ Vĩ tỹ hēn ri ke han tóg, Jesus kāmén kỹ. Ag jyvēn tóg mũ gé, kỹ tóg ag mỹ: “Jesus mỹ: “inh kren han nĩ,” hemnĩ,” he mũ. “Ēg kar vỹ vēnh jykre pāno han kãn, ã jykre han vānh nỹtĩn kỹ. Kỹ inh kren han nĩ, hemnĩ, Jesus mỹ,” he tóg, Pedro ti.

⁴¹ Ũ tỹ ti vĩ han mũ ag kygpég ag tóg mũ sir. Kurā ěn kã ũn kygpe kỹ nỹtĩ ag vỹ tỹ ũ tỹ 3 mil nỹtĩ hỹn, hēn ri ke mũn. ⁴² Ēn ag vỹ kurā kar ki Jesus tỹ ũn vin mũ ag vĩ jēmē jé vēnh mǎn tĩ, jagnē ve jé ke gé. Kỹ ag tóg Jesus jamĩ ko mũ sir. Kỹ ag tóg ti mré vĩ mũ gé, kurā kar ki.

Jesus ki ge mũ ag jykre ti

⁴³ Kỹ Jesus tỹ ũn vin mũ ag tóg ěg tỹ nén han vānh tỹ hēn ri ke han tĩ nỹtĩgtĩ. Hã kỹ vēnh kar tóg Topē kamēg tĩ. ⁴⁴ Jāvo ũ tỹ Jesus ki ge kỹ nỹtĩ ag tóg jagnē mré vēnh jykre pir han mũgtĩ. Kỹ ag kuge vỹ jagnē tũ ri ke nỹtĩ. ⁴⁵ Ũ ag tóg ājag kuge ũ vāvām mũ gé, jānkamy kato, kỹ ag tóg ũn jānkamy tũ ag mỹ vēnh kǎpópām mũ. ⁴⁶ Kurā kar ki ag kar tóg Topē jo ĩn ra mũ tĩ, ag tỹ ti mré vĩ jé. Ājag ĩn kãki ag tóg Jesus jamĩ ko mũgtĩ gé. Jatun mỹ ag tóg sir jēgiēg mũ. Kỹ tóg ag mỹ sér tĩ sir. ⁴⁷ Kỹ ag tóg Topē mỹ: “há ti nĩ,” he ti gé. Jó vēnh kar tóg ag to há nỹtĩ gé. Kỹ Topē tóg kurā kar ki ũ ag mỹ krĩ há nĩm tĩ gé, kỹ ag tóg ti ki ge mũ, ag krenkren jé. Hã kỹ ag tóg komēr hã e nỹtĩ.

3

Ũn grĩ tỹ há' he

¹ Kejēn Pedro tóg João mré Topē jo ĩn ra mũ mũ, meio dia pāte 3 horas ki. Israel ag tỹ Topē mré vĩ jafā vē, hã vỹ: 3 horas, he mũ.

² Topē jo ĩn tá ũ tóg nĩ nĩ, ũn grĩ. Ā mūr mũ kã tóg ge nĩ. Topē jo ĩn jānkã tá tóg nĩ nĩ, jānkã sīnvĩ he mũ ěn tá. Tá tóg: “inh mỹ nén ũ nĩm,” he nĩgtĩ, ũ tỹ Topē jo ĩn kãra ge mũ ag mỹ.

Ēn va ag tóg kāmũ mũ, jānkã tá ti nĩm jé. Kỹ João mré Pedro tóg Topē jo ĩn tá junjun mũ. ³ Ũn grĩ tỹ Pedro ag ve kỹ tóg ag mỹ nén ũ to vĩ mũ. ⁴ Kỹ Pedro ag tóg ti tugnỹm mũ. Kỹ Pedro tóg ti mỹ: “ěg ki ěvānh ra,” he mũ. ⁵ Kỹ tóg ag ki ěvānh mũ. “Ag hỹn inh mỹ jānkamy nĩm ke mũ,” he tóg.

⁶ Hã ra Pedro tóg ti mỹ: “jānkamy tóg inh mỹ tũ tĩ,” he mũ. “Sỹ nén ma tĩ hã tỹ sóg ā mỹ nĩm mũ, hã vỹ: Jesus Cristo jyjy hã tó kỹ, Nazaré tá ke ěn jiji tó kỹ sóg ā mỹ: ha jēg, he mũ, ha mĩ tĩg, he sóg ā mỹ,” he tóg, Pedro ti, ũn grĩ mỹ. ⁷ Kỹ tóg ti pēgja tá ti kǎgmĩ kỹ ti fēg mũ.

Kỹ vāhã ti pēn tóg tar' he mũ sir, ti pēn nágán ti. ⁸ Hũm hen kỹ tóg jē nĩ sir. Jēg há' he tóg mũ sir. Mĩ tóg tĩ mũ sir. Ag mré tóg Topē jo ĩn kãra rã mũ sir. Tá tóg mĩ tĩ kỹ hũm hũm he mũ. Topē mỹ tóg vĩ há han mũ sir.

⁹ Kỹ vēnh kar tóg ti vég mũ, ti tỹ mĩ tĩg kỹ, ti tỹ Topē mỹ vĩ há han kỹ. ¹⁰ Ag tỹ ti ve kỹ ag tóg ti ki kanhró nỹtĩ. “Topē jo ĩn jānkã tá nĩ ěn hã vē mỹr,” he ag tóg mũ. “Jānkã sīnvĩ he mũ ěn tá nĩ mũn hã vē mỹr,” he ag tóg mũ. “Vēnh kar mỹ: inh mỹ nĩm, he tĩ ěn hã vē mỹr,” he ag tóg ti to. Kỹ tóg ag mỹ e tĩ sir. Ag fe tóg jūrũn ke mũ sir, ag tỹ ti ven kỹ.

Pedro tỹ Topē jykre kāmén mũ

¹¹ Hã ra tóg Pedro mré João mré tĩ mũ, ũn grĩ ja ěn ti. Hã kỹ vēnh kar tóg ag to vēnh mǎn mũ, Topē jo ĩn krēm, pã'i tỹ Salomão he mũ ěn sala tá. Vēnh kar ag mỹ tóg e tĩ, ũn grĩ ěn tỹ há' hen kỹ.

¹² Ā tỹ ũn e ěn ag ve kỹ Pedro tóg ag mỹ: “inh kanhkã',” he mũ. “Ājag fe hã ne tóg jūrũn ke mũ,” he tóg. “Ēg tỹ vēsóg ki ti tỹ há' he tũ vē. Topē tỹ ti tỹ tĩg há' he vē mỹr. Ēg tỹ vēnh jykre kuryj han mũ ra ěg tóg ge han ki kagtĩg nỹtĩ vē,” he tóg, Pedro ti, ũn e ěn ag mỹ.

¹³ “Ēg jóg'jóg ve ag vỹ Topē to há ja nỹtĩgtĩ, Abraão ti, Isaque ti, Jacó ti ke gé. Topē ěn vē mỹr, ũ tỹ ti tỹ há' he mũ ti,” he tóg. “Topē ěn vỹ ã kósĩn tỹ ũn mág han. Ti kósĩn hã vē, hã vỹ: Jesus, he mũ. Hã ra ājag tóg fóg ag mỹ ti fēg ja nĩgtĩ. Fóg tỹ pã'i tỹ Pilatos vỹ: “ti kavān jé sóg ke mũ,” he mũ vē. Hã ra ājag tóg ti mỹ: “nejé,” he ja nĩgtĩ. ¹⁴ Ũ tỹ vēnh

jykre kuryj han mū to ājag tóg: “nejé,” he ja nīgtī, Topē t̄y ūn kuprēg mū ēn to, Jesus ēn to. Hā ra ājag tóg ū t̄y ūn tén mū to: “ti kyvān ra,” he ja nīgtī. ¹⁵ Ū t̄y ēg rīnrīr han tī ēn tén ja ājag tóg nīgtī m̄yr. Topē tóg hā ra ti rīn m̄an ja nī, ti ter mū hā ra, k̄y ēg tóg ti ve ja nīgtī,” he tóg, Pedro ti, ūn e ēn ag m̄y.

¹⁶ “K̄y ēg tóg Jesus ki ge mū. Hā k̄y Jesus tóg ūn grī ja tag t̄y tar' he mū, ājag t̄y ūn vég mū tag ti, ājag t̄y ūn ki kanhrān mū tag ti. Jesus v̄y ti t̄y ā ki rā han. K̄y ti t̄y Jesus ki rā k̄y tóg há' he mū sir, ājag rīnve,” he tóg, Pedro ti.

¹⁷ “Inh kanhkā,” he tóg. “Ājag t̄y ki kagtīg n̄ytīn k̄y, hā k̄y ājag tóg Jesus tén ja nīgtī. Hā k̄y ājag p̄a'i ag tóg ti tén ja nīgtī,” he tóg.

¹⁸ “Hā k̄y Topē tóg vās̄y rán k̄y nī ēn han. Topē vī tó tī ag kar tóg vās̄y Jesus jagtar ke ti tó ja nīgtī, Topē t̄y ag m̄y: ha tó, hen k̄y. “Topē t̄y ūn jēnēg mū ēn t̄y jagtar ke vē, Cristo ti,” he ja ag tóg nīgtī, Topē vī tó tī ag,” he tóg, Pedro ti.

¹⁹ “K̄y ājag jykre tovānh nī. Topē jykre ki gemnī, Topē t̄y ājag t̄y ti vī mranh t̄y tū' he jé. ²⁰ Hā k̄y ājag tóg t̄y Topē mré ke n̄ytī, k̄y tóg ājag krī t̄y k̄anhvy' henh ke mū, Topē ti. Kar k̄y tóg ājag m̄y ti jēnē m̄an mū gé, ti t̄y ājag m̄y ūn jēnēnh ke ēn ti, Cristo ti, hā v̄y: Jesus, he mū,” he tóg, Pedro ti. ²¹ “Ti t̄y kanhkā tá nī vē ver. Ti t̄y ā kurā pétēm k̄y tóg vāhā tá v̄yn kenh mū, Topē t̄y nén kar han m̄an ke kurā ēn k̄a,” he tóg.

“Hā k̄y Topē tóg vās̄y ā vī tó tī ag m̄y tó ja nīgtī, ag t̄y vēnh kar m̄y ti vī tó jé, ti tū ag kar m̄y. ²² Hā k̄y Moisés v̄y tag tó ja nī, ha mē: “Topē v̄y ājag m̄y ā vī tó tī ū jēnēnh ke mū, ājag mré ke ū, ti t̄y ājag m̄y Topē vī tó jé, inh ri kén. Ēn ti vī jēmēm̄nī,” he ja tóg nīgtī, Moisés ti,” he tóg, Pedro ti. ²³ “Ū t̄y ti vī jēmē jāvānh ēn ter ke vē,” he ja tóg nīgtī, “ēn pi(jé) t̄y Topē tū nī’,” he ja tóg nīgtī, Moisés ti,” he tóg, Pedro ti.

²⁴ “Topē vī tó tī ag kar v̄y tó ja nīgtī, ēg t̄y ūri vég mū tag ti. Samuel v̄y tag tó vén ja nīgtī, kar ti nón ke ag kar tóg tag tó ja nī gé vāhā,” he tóg, Pedro ti.

²⁵ “Topē vī tó tī ēn krē v̄y t̄y ājag n̄ytī,” he tóg. “Ājag jóg'jóg ve ag hā mré tóg jykrén ja nīgtī, Topē ti, Abraão hā mré. Hā k̄y tóg Abraão m̄y: “ā kósīn ū hā tigrīn sóg vēnh kar to há nīnh mū,” he ja nīgtī, Topē ti,” he tóg, Pedro ti. ²⁶ “Ājag hā m̄y tóg ā kósīn jēnē, ti rīn m̄an k̄y, Topē ti. Ājag hā m̄y tóg tó vén, ājag t̄y t̄y Israel n̄ytīn k̄y. Ājag hā m̄y tóg tó, ājag t̄y ājag jykre p̄ano tovānh jé. Ti t̄y ājag krīn sór vē, ājag t̄y tovānh jé, ājag jykre p̄ano ēn ti,” he tóg, Pedro ti, ū t̄y Topē jo īn krēm vēnh m̄an k̄y n̄ytī ēn ag m̄y.

4

P̄a'i ag t̄y Pedro mré João to jū

¹ Ag t̄y ver vēmén k̄y n̄ytī ra Topē tū ki rīr tī ag tóg tá junjun mū. Topē jo īn to capitāo v̄y ag mré tá jun mū gé, Saduceu ag ke gé, ū t̄y: “ēg h̄yn rīnrīr m̄an ke tū nī ha, ēg ter kar k̄y,” he mū ēn ag. ² Pedro ag to ag tóg jūgjū mū, ag t̄y: “Jesus v̄y rīr m̄an,” hen k̄y. “K̄y ēg tóg ti ri kén rīr m̄an mū gé, ēg ter k̄y,” he ag tóg, Pedro ag. Hā k̄y p̄a'i ag tóg ag to jūgjū mū. ³ Hā k̄y ag tóg Pedro ag sigség mū, vēse jafā k̄atā ag tóg ag vām mū, ag t̄y k̄atā nūgnūr pir han jé. Rāké ti n̄y ha, hā k̄y ag tóg: “ha ver k̄atā nūgnūr,” he mū.

⁴ Hā ra ū t̄y hēn ri ke ag tóg Pedro ag vī mē ja nīgtī, k̄y ag tóg sir ti vī kri fig mū. Ū t̄y 5 mil (ke) ag vē, Jesus ki ge k̄y n̄ytī ag, ēg t̄y ūn t̄ytā fag mré tó tū hā ra.

⁵ T̄y vaj k̄y p̄a'i ag tóg vēnh m̄an mū, kófa ag mré hā, Topē vī to professor ag mré hā. Jerusalém tá ag tóg vēnh m̄an mū. ⁶ Topē tū ki rīr tī to p̄a'i mág jygy hā v̄y: Anás, he mū. Ag p̄a'i mág ū j̄jīn hā v̄y: Caifás, he mū. P̄a'i mág kanhkā ū jygy hā v̄y: João, he mū, k̄y ū j̄jīn hā v̄y: Alexandre, he mū. P̄a'i mág mré ke kar ag v̄y tá vēnh m̄an k̄y n̄ytī. ⁷ Vēnh kuju ki ag tóg Pedro ag vin mū, k̄y ag tóg: “ū n̄y ājag m̄y vēnh jykre tag nīm, ājag t̄y ūn grī ēn t̄y há' he jé?” he mū. “Ū jykre t̄y ājag ti t̄y há' hé?” he ag tóg mū, Pedro ag m̄y.

⁸ K̄y vāhā Topē kuprīg tóg Pedro krīn mū. K̄y tóg: “ha vé,” he mū. ⁹ “Nén ū há to ājag tóg ēg kugmīg mū, ēg t̄y ūn grī t̄y há' he mū ēn to,” he tóg. “K̄y ājag tóg vāhā ēg jykre jēmē sór mū ha,” he tóg. ¹⁰ “Ājag m̄y sóg ēg jykre tónh mū, Israel kar t̄y ki kanhró n̄ytī jé,” he tóg. “Jesus tigrīn tóg há' hé, Nazaré tá ke ēn tigrīn tóg tar jē nī, ājag t̄y ū t̄y ka to

sāg mū ěn hā tugrīn. Topē tóg ti rīn mǎn ja nī, ũ tỹ cruz to ter mū ěn ti. ěn vỹ ti tỹ há' hé, ũn grī ja ěn ti,” he tóg, Pedro ti. ¹¹ “Jesus ěn hā to tag tóg rán kỹ nī, Topē vỹ tỹ rán kỹ nī ěn ki, ha mē: ājag tỹ pó tỹ ĩn han kỹ ājag tóg pó ũ fón, ti tỹ ājag mỹ kórég nīn kỹ. Hā ra Topē tóg pó ěn hā tỹ ĩn nūna han mū,” he ja tóg nī, Topē vỹ ki, Jesus to,” he tóg, Pedro ti.

¹² “Ũ pi(jé) ěg kren han ke mū'. Topē tóg Jesus fēg inhā, ti hā tỹ ěg kren han jé, ti hā tỹ ěprā ke ag krenkren han kǎn jé, kanhkā krēm ke kar ěn ag. ěg kren han ke mū ũ venh ke tũ ěg nī mỹr,” he tóg, Pedro ti, pǎ'i ag mỹ.

¹³ Pǎ'i ag tỹ Pedro vỹ mē kỹ tóg ag mỹ e tĩ. “ěg kamēg tũ ag tóg nĩgtĩ mỹr,” he ag tóg, Pedro to, João to ke gé. “Vēnh rán sī ag nỹtĩ vē mỹr, escola ki ge mág ja tũ ag nỹtĩ vē,” he ag tóg. To jykrén kỹ ag tóg ag ki kanhró nỹtĩ. “Jesus mré ke ag vē,” he ag tóg mū, Pedro ag to. Kỹ tóg ag mỹ e tĩ.

¹⁴ Hā ra ũn grī ja tóg tá jē ag mré. Kỹ ag tỹ ne tỹ ag kato vīnh ke tóg tũ tĩ sir. ¹⁵ Kỹ ag tóg Pedro ag mỹ: “ha ver kǎpa jēg,” he mū. Kỹ pǎ'i ěn ag tóg ver jagnē mré to jykrén mū. ¹⁶ Kỹ ag tóg: “ěg hỹn ag tỹ hē ri kenh mū ha'?” he mū. “Jerusalém tá ke kar vỹ ag tỹ nén han mū ki kanhró kar nỹtĩ. Kỹ ag jykre tóg vēnh kar mỹ há nỹ. Kỹ ěg tỹ ag to: ag ón vē, hen kỹ tóg tỹ ũn nỹ sir,” he ag tóg jagnē mỹ. ¹⁷ “Ag tỹ hā ra vēnh kar mỹ Jesus tó kỹ tóg tỹ ũ nỹ gé,” he ag tóg. “Kỹ ěg tỹ ag mỹ: ha tó mǎn tũg, henh ke vē,” he ag tóg. “Ājag tỹ ti tó mǎn kỹ ěg tóg ājag vóg kónǎn ke mū ha, he jé ěg tóg ke mū ag mỹ,” he ag tóg jagnē mỹ. ¹⁸ Kỹ ag tóg Pedro ag jé prēr mǎn mū. Kỹ ag tóg: “Ker ũ mỹ tó mǎn hē',” he mū. “Ker Jesus tỹ vỹ mǎn hē',” he ag tóg mū ag mỹ.

¹⁹ Hā ra Pedro tóg João mré ag mỹ ke mū. “Topē tóg ěg mỹ: “ha vēnh kar mỹ tó,” he ja nī. Ājag tóg hā ra: “ker tó hē',” he mū. ěg hỹn ũ tỹ hē vỹ han mū', Topē vỹ vó, ājag vỹ vó?” he tóg ag mỹ. “Ne nỹ hỹn Topē mỹ há nīnh mū'?” he tóg. “ěg mỹ tó,” he tóg. ²⁰ “ěg pi(jé) tó tũg mū', ěg tỹ nén vég mū ti, Jesus tỹ ěg mỹ nén tó ja ěn ti,” he tóg ag mỹ, Pedro ti.

²¹ Hā ra pǎ'i ag tóg: “ker tó hē', ker tó hē',” he mǎn mū gé. Kỹ ag tóg ag kygvāg mū sir. Ājag tỹ ag vóg kónǎn há ra ag tóg ag vóg kónǎn tũ nī, vēnh kar tỹ ag to há nỹtĩn kỹ, vēnh kar tỹ Topē to: “há ti nī, ti hā ne tóg ũn grī ěn tỹ há' he mū',” hen kỹ.

²² Hā ra ũn grī ja ěn tóg tĩ nī sir. 40 anos kǎfór han tóg, kỹ Topē tóg ti tỹ há' hé.

Jesus mré ke ag tỹ Topē mré vỹ

²³ Pedro ag tỹ kygvar kỹ mū kỹ ag tóg ājag mré ke ag to mū mū. Kỹ ag tóg pǎ'i tỹ ājag mỹ nén tó ěn kāmén mū, kófa ag tỹ: “ker Jesus tó hē',” he mū ěn ti. ²⁴ Kỹ vēnh kar ag tóg tag jēmē kỹ Topē mỹ vỹ há han mū, jagnē mré. Kỹ ag tóg: “ěg jóg mág',” he mū. “Tỹ ā tóg vēnh kar kri ke nī,” he ag tóg mū. “Kanhkā han ā mỹr, ga ti, goj ti ke gé, mī mū ag kar ke gé,” he ag tóg. ²⁵ “ěg jóg'jóg tỹ Davi krīn ja ā tóg nĩgtĩ, ā camarada ěn ti. Ā kuprīg tỹ ā tóg ti krīn ja nī. Kỹ tóg Jesus tó ja nĩgtĩ, kỹ tóg: “fóg kar ag ne tóg jũgiũ mū, kanhgág ag ke gé,” he ja nī. “Īnh kanhkā tỹ Israel ag ne tóg nén ũ tũ to jykrén',” he ja tóg nī. ²⁶ “Nação kar ag pǎ'i ag vỹ vēnh génh kỹ nỹtĩ, ěg pǎ'i ag ke gé, Topē kato tēgtē jé, Topē tỹ ũn kuprēg mū ěn ag kato,” he ja tóg nĩgtĩ, Davi ti,” he ag tóg, Topē mỹ. ²⁷ “Hā ra tóg ki hā tó ja nī. ěmā tag ki ag tóg vēnh génh kỹ nỹtĩ, ā kósin kato, ā tỹ ũn kuprēg mū ěn kato, ũn kuryj nī ěn kato, hā vỹ: Jesus, he mū,” he ag tóg. “Pǎi mág tỹ Herodes vỹ ti kato tē mū gé, pǎ'i tỹ Pilatos ke gé, ag tỹ ũ to: Pôncio, he mū ěn, fóg ag kar, Israel ag kar ke gé,” he ag tóg. “Tag ag kar vỹ vēnh génh kỹ nỹtĩ, ā kósin kato,” he ag tóg. ²⁸ “Ā tỹ nén to jykrén mū han ag tóg mū sir, ā kato tēgtē mū tag ag. Vāsỹ ā tóg to: ge tĩ jé tóg ke mū, he ja nĩgtĩ,” he ag tóg, Topē mỹ. ²⁹ “Pǎ'i ag tỹ ěg mỹ nén tó mē ā tóg, ag tỹ ěg mỹ: ker tó hē', he mū tag ti. Kỹ ěg tỹ tar' hemnī, ěg tỹ ag kamēg tũ nīn jé, ěg tỹ ā vỹ tó jé, ěg tỹ tỹ ā camarada nỹtĩn kỹ,” he ag tóg, Topē mỹ. ³⁰ “Kỹ ěg mré milagre hyn han nī gé. ũn kagyga ag tỹ há' hemnī, ěg tỹ nén han vānh han nī, ěg tỹ ā mỹ to vīn kỹ, ěg tỹ ā kósin tỹ Jesus jyjy tó kỹ, ěg tỹ ũn kuryj nī ěn tó kỹ,” he ag tóg, Topē mỹ.

³¹ Ag tỹ ti mré vỹ kar kỹ ga tóg jũrũn ke mū sir, ag tỹ tá nỹtĩ hā ra. Kỹ Topē kuprīg tóg ag krīn mū gé. Kỹ ag tóg mūmēg vānh kỹ Topē vỹ kāmén mū sir.

Jesus ki ge kŷ nŷtī ag jykre pir

³² Ū tŷ Jesus ki ge kŷ nŷtī ag tóg jykre pir han kŷ nŷtī. Ū pi(jé) ā kuge to: “isū vē,” he tī'. Ājag kuge kar to ag tóg: “ēg tū vē,” he tī. ³³ Jesus tŷ ūn vin mŷ ag tóg ēg Senhor tŷ Jesus rīr mǎn tugtó mŷ, to tar pē nŷtīn kŷ. Kŷ Topē tóg ag ki rīr há han mŷ gé sir. ³⁴ Ag mré ke ū pi(jé) jagāgtar nŷtī' Ag kāmī ū tóg ēpŷ nŷtī, kar ū tóg ĩn nŷtī gé. Ājag tū ěn funfón ag tóg mŷ, kŷ ag tóg ti kaja ma kāmū mŷ. ³⁵ Jesus tŷ ūn vin mŷ ag mŷ nīm jé, jānkamy ti. Kŷ ūn jagāgtar ag tóg jānkamy ěn to ājag tŷ nén ve sór mŷ ěn mǎn mŷ sir.

³⁶ Kŷ ū tóg nī gé, ti jiji hǎ vŷ: José, he mŷ. Jesus tŷ ūn vin mŷ ag tóg ti to: Barnabé, he tī, hǎ vŷ: vēnh jyvĕn krĕ, he mŷ, hǎ vŷ: Barnabé, he mŷ. Levi kósin'kósin ū vē. Goj vāso tŷ Chipre tá ke vē.

³⁷ ěn hǎ vŷ ēpŷ nī, kŷ tóg ā japŷ fón mŷ, kŷ tóg Jesus tŷ ūn vin mŷ ag mŷ ti kaja ma kǎtī mŷ. Kŷ ag tóg jagnĕ mŷ kǎnhkrég mŷ sir.

5

Ananias fag tŷ Topē mŷ ón

¹ Kŷ ū tóg nī gé, ti jyjy hǎ vŷ: Ananias, he mŷ. Jǎvo ti prŷ fi jiji hǎ vŷ: Safira, he mŷ. ěn vŷ tóg ā japŷ fón mŷ gé. ² Kŷ tóg ā prŷ fi mŷ: “ti kaja vēnh kǎpóv péju kŷ ēg tóg nīm mŷ,” he mŷ. Ti vēnh kǎpóv ū tŷ tóg Jesus tŷ ūn vin mŷ ag mŷ nīm mŷ. “Ēg japŷ kaja kar hǎ vē,” he tóg mŷ ag mŷ, ón kŷ.

³ Kŷ Pedro tóg ti mŷ: “Satanás hǎ ne tóg ā krīn ja nī’,” he mŷ. “Hǎ kŷ ā tóg Topē kuprīg mŷ ón. Hǎ kŷ ā tóg ti kaja vēnh kǎpóv péju kŷ nīm ja nī’,” he tóg. “Hǎ ra ā tóg ti tŷ ā krīn mŷ ra: “nejé,” he ja tū nī, Satanás mŷ,” he tóg. ⁴ “Ā japŷ vē (mŷr), ha mĕ,” he tóg. “Kŷ ti kaja vŷ tóg tŷ ā tū nī gé sir,” he tóg. “Kŷ ā tŷ ma kǎtī tū nī hǎ ra tóg tŷ nén ū tū nī vē,” he tóg. “Hǎ ra ā tóg ā ón ke to jykrén ja nīgtī, ā tŷ ti kaja to ón jé,” he tóg. “Hǎ kŷ ā tóg ēg mŷ ón, hǎ ra ā tóg Topē hǎ mŷ ón mŷ,” he tóg, Pedro ti.

⁵ Ananias tŷ ti vī mĕ kŷ tóg kutĕ mŷ, ti ter vē sir. Ū tŷ mĕg mŷ ag kar mŷ tóg e tī, kŷ ag fe tóg jŷrŷn ke mŷ. ⁶ Kŷ kyrŷ ag tóg jĕgjĕg nĕgnĕ kŷ ag tóg ti fi han mŷ. Kŷ ag tóg ti va mŷ mŷ, kŷ ag tóg ti kĕnh mŷ sir.

⁷ 3 horas tŷg kŷ ti prŷ fi tóg mī kǎtī mŷ gé. Hǎ ra fi tóg ā mén ter mĕ ja tū nī ver. ⁸ Kŷ Pedro tóg fi mŷ: “ājag mŷ ti kaja tag to fón, ājag japŷ ti?” he mŷ fi mŷ.

Kŷ fi tóg: “hŷ, ti kaja tag to ēg tóg fón,” he mŷ, ón kŷ.

⁹ Kŷ Pedro tóg fi mŷ: “ājag ne tóg jagnĕ mré to jykrén ja nī gé’,” he mŷ. “Topē kuprīg mŷ ājag ón mŷr. Ū tŷ ā mén kĕnh mŷ ag vŷ mī kāmŷ jĕg. Ā va ag tóg mŷnh mŷ gé,” he tóg fi mŷ, Pedro ti.

¹⁰ Kŷ fi tóg kutĕ kŷ hun ke mŷ gé sir. Kyrŷ ag tŷ junjun kŷ ag tóg fi ter vég mŷ gé, kŷ ag tóg fi kĕnh mŷ mŷ gé, fi mén mré. ¹¹ Kŷ Jesus ki ge kŷ nŷtī kar ag fe tóg jŷrŷn ke mŷ, ū tŷ mĕg mŷ kar ag ke gé.

Hǎ kŷ Ananias fag tóg Topē mŷ ón tugrīn kǎgter mŷ. Kŷ tóg vēnh kar mŷ e tī sir.

Ag tŷ Jesus tŷ ūn vin mŷ ag vóg kónǎn

¹² Jesus tŷ ūn vin mŷ ag tóg nén ve vǎnh tŷ hĕn ri ke hyn han mŷgtī, vēnh kar mŷ. Jesus ki ge kŷ nŷtī kar ag vŷ kurā kar ki vēnh mǎn tī, pǎ'i tŷ Salomāo he mŷ ěn sala tá, Topē jo ĩn krĕm. ¹³ Jesus ki ge tū ag tóg venh kāmŷ tū nīgtī, ag tŷ ag kamĕg kŷ. Hǎ ra tóg vēnh kar mŷ há tī sir, Jesus ki ge kŷ nŷtī ag jykre ti. ¹⁴ Kurā kar ki ū tóg to jykrén ke mŷ, Jesus ki rǎ jé, ū tŷ hĕn ri ke ag, fag ke gé. Hǎ ki ag tóg e nŷtī sir, Jesus ki ge mŷ ěn ag.

¹⁵ Kejĕn ag tóg ūn kagyga gé kāmŷ mŷ gé vǎhǎ, ĕpryn kri, ĕmīn kri. Tá ag tóg cama kri nŷtī, nŷg jafǎn ki. Kŷ ag tóg Pedro jǎvǎnh mŷ. “Ti kǎnhvég tŷ ēg mī tŷg kŷ ū tóg hĕn ri ke mŷn tŷ há' hĕnh ke,” he ag tóg.

¹⁶ Ū tŷ hĕn ri ke ag tóg Jerusalém tá vēnh mǎn mŷ, ĕmǎ kar tá kāmŷ ěn ag. Ūn kagyga ag gé(g) ag tóg kāmŷ mŷ, ūn jagrĕ kórég ag ke gé. Kŷ ag tóg há' he kǎn mŷ sir.

¹⁷ Kŷ Topē tŷ ki rīr tī to pǎ'i mág tóg jŷ tǎvī nī, ti mré ke kar ag ke gé, Saduceu he mŷ ěn ag kar. ¹⁸ Kŷ ag tóg Jesus tŷ ūn vin mŷ ag sigség mŷ, vēse ja mág tá.

¹⁹ Hã ra kuty tá Topě tỹ jěně jafã tóg tere kỹ vese ja jãnkãn nugnón mũ, rugróm tóg mũ. Ag gé(g) tóg tĩ mũ, ag kygvãn kỹ, kỹ tóg ag mỹ: ²⁰ “ha mũ jěg, Topě jo ãn ra, ãjag tỹ vãnh kar mỹ Topě vĩ tóg jé, Topě tỹ ẽg rĩnrĩn mãn ke ẽn ti,” he mũ, Topě tỹ jěně jafã ti, ag mỹ.

²¹ Ag tỹ ti vĩ mẽ kỹ ag tóg kusã pẽ ki Topě jo ãn ra mũ mũ, tá Topě vĩ tóg jé. Hã ra Topě tũ ki rĩr tĩ to pã'i mág tóg ã mré ke ag jěgněg mũ, ag tỹ kófa ag jé prěr jé, vãnh jyvẽn tĩ kar ẽn ag, povo tỹ Israel to pã'i ag ke gé. Kỹ ag tóg vese ja ra ù jěgněg mũ, ag tỹ vėsígse ag tatĩ kãmũ jé. ²² Polícia ag tỹ tá junjun mũ ra ag tóg vese ja kãtã tũgtũ nỹtĩ. Kỹ ag tóg vỹnvỹn ke mũ. ²³ Kỹ ag tóg: “vese ja tóg nĩfẻnh kỹ jẻ nĩ, nĩfẻnh jãfa tỹ,” he mũ. “Kỹ ù tỹ ki rĩr mũ ag tóg tá nỹtĩ gé, ti jãnkãn tá. Ẽg tỹ nón mũ ra tóg kuprã jẻ nĩ,” he ag tóg mũ, pã'i ag mỹ.

²⁴ Topě jo ãn to capitão tỹ mẽ kỹ tóg ti mỹ e tĩ, Topě tũ ki rĩr tĩ to pã'i mág ag mỹ ke gé. Kỹ tóg ag krĩ tũ tĩ sir. ²⁵ Kỹ ù tóg tá jun kỹ: “Topě jo ãn krẻm ag nỹtĩ, ãjag tỹ ùn sigsẻg mũ ag,” he mũ. “Tã ag tóg vãnh kar mỹ Topě vĩ tóg nỹtĩ,” he tóg.

²⁶ Kỹ capitão tóg polĩcia ag mrẻ tĩ mũ, ag tatĩ kãmũ jé. Komẻr hã ag tóg vĩ mũ, ag mrẻ. “Ẽg vãsãnsãn kỹ ù tỹ ag vĩ mẽg mũ ag tóg hẻn ri ke mũn ẽg pin ke mũ, póg tỹ,” he ag tóg, polĩcia ag.

²⁷ Apóstolo ag tỹ ag mrẻ junjun kỹ ag tóg pã'i ag jo ag vin mũ. Kỹ Topě tũ ki rĩr tĩ to pã'i mág tóg ag mỹ. ²⁸ “ãjag mỹ ẽg tóg: ker ẽn jiji tóg mãn hẻ', he ja nĩgtĩ',” he mũ. “Ge ra ãjag tóg Jerusalẻm tá ke kar ag mỹ tugtóg ja nĩgtĩ, ẽn vĩ ti,” he ag tóg, Jesus vĩ to. “ãjag hỹn ti ter to ẽg jagãgtar han sỏr mũ,” he ag tóg, pã'i ag.

²⁹ Kỹ Jesus tỹ ùn vin mũ ag kar tóg ag mỹ tag tóg mũ, ha mẽ. Pedro tóg ag mỹ tag tóg mũ, ha mẽ: “Topě tỹ ẽg mỹ nẻn tóg mũ ẽn han jẻ ẽg tóg ke mũ (mỹr),” he tóg. “Ẽprã ke ag tỹ ẽg mỹ: “ke tũg nĩ,” he mũ hã ra ẽg tóg ti tỹ ẽg mỹ nẻn tóg mũ ẽn han mũ,” he tóg. ³⁰ “Ẽg jóg'jóg ag vỹ Topě to há nỹtĩgtĩ. Ag tỹ ù to há nỹtĩ ẽn vỹ Jesus ti rĩn mãn ja nĩgtĩ, ãjag tỹ ùn tẻn mũ ẽn ti, ka to ùn sãg mũ ẽn ti,” he tóg. ³¹ “Kỹ Topě tóg ti tỹ pã'i mág han mũ, ti tỹ ẽg kren han tĩ han kỹ, ti tỹ ti mỹ: “kunĩg, inh pẻgia tá nĩ,” hen kỹ. Jesus tỹ tóg ẽg kar krẻn sỏr mũ, ẽg povo tỹ Israel kar tỹ vãnh jykre pãno tovãnh jẻ, ti tỹ ag tỹ ã vĩ mranh tỹ vãnh pãte fỏn jẻ,” he tóg. ³² “Nẻn kar ẽn ve ja ẽg tóg nĩgtĩ, hã kỹ ẽg tóg ti vĩ tóg mũ sir. Kỹ Topě kuprĩg tóg ẽg kanhrãn mũ gé. Topě vỹ ù tỹ ti vĩ han mũ kar ag mỹ ã kuprĩg jẻnẻg mũ,” he tóg, Pedro ti.

³³ Pã'i ag tỹ ti vĩ mẽ kỹ ag fe tóg gỹm ke mũ, kỹ ag tóg ag kãgtẻn ke to jykrẻn mũ, Jesus tỹ ùn vin mũ ẽn ag. ³⁴ Kỹ vãhã ù tóg jẻg nẻ mũ, Fariseu ù, ti jyjy hã vỹ: Gamaliel, he mũ. Topě vĩ to professor ù vẻ, kỹ vãnh kar mỹ tóg há nỹ, ti jykre ti. Kỹ tóg: “ver ag kãpan nĩ,” he mũ. ³⁵ Ag mũ kar tóg ag mỹ: “inh kanhkã',” he mũ. “To jykrẻn nĩ ver, ãjag tỹ han tũ jẻ,” he tóg. ³⁶ “Pedro ag jo ke ù tóg jẻ ja nĩ gé, ti jiji hã vỹ: Teudas, he mũ. Ti hã ne tóg vẻsỹ tỹ pã'i mág han ja nĩ, kỹ ù tỹ 100 tỹ 4 ag vỹ ti nón mũ ja nĩgtĩ sir. Ti tẻn ja ag tóg nĩ jãvo, pã'i ag, kỹ ù tỹ ti vĩ han mũ ag tóg tãmĩ mũ ja nĩ, kỹ tóg tũ' he mũ,” he tóg. ³⁷ “Kar kỹ ù vỹ jẻ ja nĩ gé, ti jyjy hã vỹ: Judas, he mũ. Galilẻia tá ke ẽn vẻ. Ag tỹ vãnh kar jyjji rãnran mũ ra tóg tá jẻ ja nĩ, Judas ẽn ti, kỹ ù tỹ hẻn ri ke ag tóg ti nón mũ ja nĩgtĩ gé. Ẽn tẻn ja ag tóg nĩ gé, pã'i ag, kỹ ù tỹ ti vĩ han mũ ag tóg krig' ke ja nĩ, vãnh pipin kỹ,” he tóg.

³⁸ “Isỹ nẻn to jykrẻn hã vẻ, ha mẽ: Pedro ag tovãnh nĩ ver,” he tóg. “Ag mỹ: ha mũ jẻg, hemnĩ ver,” he tóg. “Ag tũ tỹ tỹ ẻprã ke ag jykre nẻn kỹ tóg tũ' henh ke mũ (mỹr), vẻsẻg ki, ha mẽ,” he tóg. ³⁹ “Ti tỹ hã ra tỹ Topě jykre nẻn kỹ ãjag tóg tỹ tũ' henh ke tũ nĩ,” he tóg. “ãjag tỹ ge ra ag to jũ nỹtĩn kỹ ãjag tóg vãhã Topě kato tẻ mũ,” he tóg, Gamaliel ti.

⁴⁰ Kỹ ag tóg ti mỹ: “hej,” he mũ. Kỹ ag tóg Jesus tỹ ùn vin mũ ag jẻ prẻr mãn mũ. Ag mrãnmrãn ag tóg mũ. Kỹ ag tóg: “ker Jesus tóg mãn hẻ',” he mãn mũ ag mỹ. Kỹ ag tóg: “ha mũ jẻg ge,” he mũ.

⁴¹ Kỹ ag tóg mũ mũ, Jesus tỹ ùn vin mũ ag. Ag mỹ tóg sẻr tĩ, ha mẽ. Ag tỹ Jesus ri ke jagẻgtar mũ ra tóg ag mỹ sẻr tĩ, ag tỹ Jesus ri kẻn jagẻgtar ke ki krỹg kỹ. ⁴² Kurã kar ki

ag tóg Topě jo ĩn tá Jesus tó tĩ, ti to: “Topě vỹ ti jěně,” hen kỹ. Věnh kar ĩn tá ag tóg ti kāmén mũ gé, ù tỹ ag kógfyn kỹ. To ag tóg krónh ke tũ nĩgtĩ sir.

6

Ag tỹ ù tỹ 7 (ke) ag vin

¹ Kỹ ù tỹ hěn ri ke ag tóg Jesus ki ge mũ. Û ag tóg Grego vĩ tó tĩ, Jesus mré mũ ù ag. Kỹ ù ag tóg Hebreu vĩ tó tĩ gé, ti mré mũ ù ag. Ag e nỹtĩn kỹ ù tỹ Grego vĩ tó mũ ag tóg kejěn vĩ kónān mũ, Hebreu vĩ tó tĩ ag kato. “Û tỹ Hebreu vĩ tó mũ ag vỹ ěg ki króm tũ nỹtĩ (mỹr),” he ag tóg. “Ag kã ùn mén ter ja fag vỹ kurã kar ki vějěn há vég tĩ, ag tỹ fag mỹ vin kỹ,” he ag tóg. “Hã ra ěg kã ùn mén ter ja ěn fag kã ag tóg jatun nỹtĩ, fag tỹ ag vĩ tó tũ nĩn kỹ. Hã kỹ fag tóg jagãgtar nỹtĩ, ěg mré ke fag,” he ag tóg.

² Kỹ ù tỹ 12 ag tóg mĕg mũ, Jesus tỹ ùn vin mũ ag. Kỹ ag tóg Jesus mré mũ kar ag jé prĕr mũ. Kỹ ag tóg: “Ěg tũ há vĕ, há vỹ ěg tỹ tỹ Topě vĩ tó ti nỹ,” he mũ. “Ěg tỹ vějěn ki rĩr kỹ ěg tóg kutar nỹtĩ, kỹ ěg tóg ěg tỹ nĕn han ke ki rĩr há han ke tũ nĩ gé,” he ag tóg. ³ “Kỹ ù tỹ 7 (ke) ag vin nĩ, ùn kãme kórég tũ ag, ùn jykre há ag, ù tỹ Topě kuprĩg tỹ jagrĕ nĩ ěn ag,” he ag tóg. “Ěn mỹ ěg tóg věnh rãnrãj ěn nĩm mũ, ag tỹ vĕjĕn ki rĩr jé,” he ag tóg. ⁴ “Ěg há tóg há ra Topě mré vĩ kỹ nỹtĩ, ti vĩ tó kỹ nỹtĩ. Ěg tỹ nĕn han ken há vĕ,” he ag tóg, Pedro ag.

⁵ Ag vĩ vỹ věnh kar mỹ há nĩ ha, kỹ ag tóg Estêvão fĕg mũ sir, ù tỹ Jesus ki rã kỹ jĕ ěn ti, kỹ Topě kuprĩg vỹ tỹ ti jagrĕ nĩ. Ti mré ag tóg Filipe fĕg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag ti, fóg tỹ Israel jykre han mũ tag ti. ⁶ Ěn ag vin ag tóg mũ, Jesus tỹ ùn vin mũ ag jo. Kỹ ag tóg ag to Topě mré vĩ mũ, ag nĩgé tỹ ag mĕ kỹ. Hã kỹ ag tóg ag mỹ věnh rãnrãj ěn nĩm mũ, ag tỹ vĕjĕn ki rĩr jé.

⁷ Kỹ Topě vĩ tóg věnh kar kri rũm ke mũ sir. Û tỹ Jesus mré mũ ag vỹ tóg hěn ri ke nỹtĩ, Jerusalém tá. Kỹ Topě tũ ki rĩr tĩ ù ag tóg Jesus vĩ kri fi kỹ ti ki ge mũ gé sir.

Ag tỹ Estêvão se

⁸ Estêvão vỹ há ra krĩ há nĩ, Topě tỹ ti mỹ věnh jykre nĩm kỹ. Kỹ tóg ěg tỹ nĕn han vãnh tỹ hěn ri ke hyn han mũ, věnh kar mỹ. ⁹ Kỹ Israel ag věnh kanhrãn jafã ù tá ag tóg ti vĩ kafãn mũ, ùn kygvãn kỹ nỹtĩ he mũ ěn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ěn ag kar vỹ ājag tỹ Estêvão mré vĩn kỹ ti vĩ kafãn mũ. ¹⁰ Hã ra ag tỹ ti vĩ kafãn ke tóg tũ tĩ, ti krĩ há nĩn kỹ, ti tỹ Topě kuprĩg tỹ jagrĕ nĩn kỹ. ¹¹ Kỹ ag tóg ù ag krĩn mũ, ag tỹ ti kato vĩ jé, Estêvão kato. Kỹ ag tóg: “ti vĩ mĕ ěg (mỹr),” he mũ. “Moisés kato vĩ kónān tóg (mỹr), Topě kato ke gé,” he ag tóg ón kỹ, Estêvão to. ¹² Hã kỹ věnh kar tóg ti to jũgũ mũ, Estêvão to, kófa ag mré há, Topě vĩ to professor ag mré há. Kỹ ag tóg ti kãgmĩ kỹ ti ség mũ. Kỹ ag tóg pã'i ag jo ti pére kãmũ mũ. ¹³ Û tỹ ón kỹ ti kato vĩnh ke mũ ag jé ag tóg prĕr mũ gé, pã'i ag. Kỹ ag tóg ti kato: “Topě jo ĩn kato tóg vĩ kónān tĩ, Topě tỹ ěg mỹ nĕn tó ja ti kato ke gé,” he mũ ón kỹ. “Hã ra tóg ã vĩ kónān to krónh ke tũ nĩgtĩ,” he ag tóg ón kỹ, Estêvão to. ¹⁴ “Ti vĩ mĕ ěg (mỹr),” he ag tóg. “Jesus kãmén tóg tĩgtĩ, Nazaré tá ke ěn ti,” he ag tóg. “Topě jo ĩn kókén jé tóg ke mũ, Jesus ti,” he tóg nĩgtĩ, Estêvão ti, kỹ tóg Moisés tỹ ěg mỹ věnh jykre nĩm mũ ěn tỹ tũ' he sór mũ gé, ěg mỹ věnh jykre ù nĩm kỹ,” he ag tóg. Ag tỹ Estêvão to ón há vĕ.

¹⁵ Kỹ pã'i kar ag tóg ti tugnỹm mũ, há ra ti ve tóg sir Topě tỹ jĕně jafã ve ri ke nĩ, Estêvão ti.

7

Estêvão tỹ věnh kãmén

¹ Kỹ Topě tũ ki rĩr tĩ to pã'i mág tóg ti mỹ: “Ki há ke mỹ'?” he mũ.

² Kÿ Estêvão tóg ag mÿ: “ijóg’,” he mÿ. “Inh kanhkā’,” he tóg. “Ëg jóg tÿ Topê vÿ tóg vënh kar kãfór nÿ,” he tóg. “Ti hã ne ãg jóg’jóg tÿ Abraão mré vÿ ja nÿgtÿ, ti tÿ ver ga tÿ Mesopotâmia tá nÿ ki, ti tÿ ver ãmã tÿ Harã ra ti tÿ ki.

³ Kÿ tóg ti mÿ: “ã jamã tá kutê,” he ja nÿ. “Ã kanhkã ag kar ré kÿ tÿg,” he ja tóg nÿ ti mÿ. “Ga ù ra tÿg, isÿ tá ã mÿ: tag kã nÿmnÿ, he jé,” he ja tóg nÿ ti mÿ, Topê ti.

⁴ Hã kÿ tóg ga tÿ Caldéia tá kãkutê mÿ, Hãra tá ãmã jé, Abraão ti. Ti panh ter kar kÿ Topê tóg ti mÿ: “ga tag ra tÿg sir,” he mÿ.

Ëg jamã hã vë, Abraão jamã ja ti,” he tóg, Estêvão ti, pã'i ag mÿ.

⁵ “Ge ra Topê tóg Abraão mÿ ga ãn nÿm ja tÿ nÿ, ãpÿ pir mré tóg kÿ. Ti mÿ tóg hã ra: “ã tÿnh ke vë, kar kÿ, ã krê tÿnh ke vë gé,” he ja nÿ, Topê ti. Hã ra tóg ver kósin ja tÿ nÿ, Topê tÿ ti mÿ: “ã krê tÿnh ke vë,” he mÿ ra.

⁶ Kÿ Topê tóg ti mÿ: “ã krê ag tÿ fóg ù ag mré mÿnh ke vë, fóg ãn jamã tá,” he mÿ. “Fóg ãn ag tÿ camarada han ke vë, ag vóg kónãn jé ag tóg ke mÿ, prÿg tÿ 100 tÿ 4 ki,” he tóg, Abraão mÿ, Topê ti. ⁷ “Hã ra ù tÿ ag vóg kónãn mÿ ãn ag vóg kónãn jé sóg ke mÿ gé, kar kÿ,” he tóg, Topê ti. “Isÿ ag vóg kónãn kar kÿ ã krê ag tóg tá kãpanh mÿ. Kÿ ag tóg ga tag ki isÿ ti han mÿ,” he tóg, Topê ti. Ti tÿ Abraão mÿ ken hã vë,” he tóg, Estêvão ti.

⁸ “Kÿ tóg ti mÿ vënh jykre nÿm mÿ, ti tÿ ã krê ag gré junun fár kÿm jé. Kÿ ti sinal vë sir. Kar kÿ Abraão tóg Isaque han mÿ. Ti tÿ kurã tÿ 8 han kÿ tóg ti mÿ kÿm mÿ. Isaque tÿ Jacó han kÿ tóg ge han mÿ gé, kÿ Jacó tóg ge han mÿ gé, ti tÿ ã krê tÿ 12 ãn ag han kÿ, ãg tÿ ù to: ãg jóg’jóg kar, he mÿ ãn ag,” he tóg. ⁹ “Hã ra ãg jóg’jóg ãn ag tóg ãjag jãvy tÿ José to jÿgÿ nÿtÿ, ãjag tÿ ti tÿ to é nÿ kÿ. Hã kÿ ag tóg ti vëne he mÿ, José ti, ù tÿ ga tÿ Egito ra mÿ mÿ ag mÿ. Hã ra Topê tóg ti ki rÿr mÿ. ¹⁰ Kÿ tóg ti jÿ nÿgã nÿ mÿ, ti tÿ vënh jagtar vég mÿ ra. Ti jykre há nÿn kÿ tóg Egito tá ke ag pã'i mág mÿ há tÿ, ag tÿ ù to: Faraó, he mÿ ãn mÿ. Hã kÿ tóg ti tÿ pã'i mág han mÿ, Faraó ti, José ti tÿ. Ti tÿ tóg pã'i mág han mÿ, ti tÿ Egito tá ke kar ag ki rÿr jé, Faraó mré ke kar ag ki rÿr jé gé sir.

¹¹ Kejën tóg prÿg han mÿ, ga tÿ Egito mÿ hã, ga tÿ Canãã mÿ hã ke gé. Kÿ vënh kar tóg kókÿnkÿr mÿ, prÿg kã. Kÿ ãg jóg’jóg ãn ag tóg kókÿnkÿr mÿ gé. ¹² Kÿ ù tóg Jacó mÿ: “Egito tá ti vëjën nÿ inhã,” he mÿ. Kÿ tóg ãg jóg’jóg ag jëgnëg mÿ, Jacó ti, ag tÿ Egito ra mÿ vén jé. ¹³ Ag tÿ ra mÿ mã nÿ kÿ José tóg vãhã ag mÿ: “inh hã vë,” he mÿ, ã kãke ag mÿ. Hã kÿ Faraó tóg José kanhkã ki kanhró nÿ gé sir. ¹⁴ Kÿ José tóg ã panh tÿ Jacó jé prër mÿ, ti tÿ vënh kar tatÿn kãtÿg jé. ù tÿ 70 kri 5 ag vë, ti kanhkã ag. ¹⁵ Kÿ Jacó tóg Egito ra tÿ mÿ. Tá tóg ter mÿ kejën. Kar kÿ ãg jóg’jóg ag vÿ tá kãgter kã nÿ gé. ¹⁶ ãmã tÿ Siquém tá ag tóg kénh kÿ nÿtÿ, Abraão vÿ tóg vënh kej ãn to jãnkamy nÿm ja nÿ, Emor krê ag mÿ, ãmã tÿ Siquém tá,” he tóg, Estêvão ti.

¹⁷ “Vãhã tóg kurã pétëm ke mÿ sir, Topê tÿ Abraão mÿ: “ã krê mÿ sóg ga ãn nÿm mÿ,” he mÿ kurã ti. Kÿ ag tóg Egito tá vënh grun mÿ.

¹⁸ Kejën ù tá pã'i tóg tÿ pã'i jë, Egito tá. Hã ra tóg José mÿ ja tÿ nÿ, pã'i tag ti. ¹⁹ ãn tóg ãg kanhkã ag kã'ug mÿ, ag lograr ke tóg mÿ, ãg jóg ag vóg kónãn tóg mÿ gé. Kÿ tóg ag mÿ: “ãjag krê kãsir ag vãm ra, ag kãgter jé,” he mÿ, pã'i ãn ti,” he tóg, Estêvão ti.

²⁰ “Ti tÿ tag tóg kar vãhã Moisés tóg mur mÿ, kÿ tóg Topê mÿ há tÿ. Hã ra ti han mÿ fag tóg kÿsã tãgtÿ hã ki ti ki rÿr mÿ. ²¹ Kÿsã tãgtÿ tÿg kÿ fag tóg sir ti fón mÿ. Hã ra Faraó ãn kósin fi tóg ti ve kÿ ti vãg mÿ, ti jë'ÿn jé. Kÿ tóg fi kósin ri ke nÿ, Moisés ti. ²² Kÿ tóg nÿn kar ki kanhrã nÿ, Egito tá vënh jykre kar ãn ki. Kÿ ti jykre vÿ vënh jykre tÿ hÿn ri ke nÿ, kÿ ti vÿ vÿ vënh vÿ tÿ hÿn ri ke nÿ gé, Moisés ti,” he tóg, Estêvão ti.

²³ “Vãhã tóg prÿg tÿ 40 han mÿ, Moisés ti. Kÿ tóg ã kanhkã pë ag to jÿkrén mÿ, povo tÿ Israel to, ag tÿ nÿn han mÿ venh tÿg jé. ²⁴ Kÿ tóg ù vég mÿ. Egito tá ke ù vég tóg mÿ, Moisés ti. Ti tÿ Israel vóg kónãn vég tóg mÿ, nÿn ù tÿ to. Kÿ tóg ti to jÿ kÿ Israel ãn kajã mÿ, ti tén tóg mÿ, Egito tá ke ãn ti. ²⁵ “Inh kanhkã ag hÿn isÿ nÿn han mÿ to jÿkrén mÿ,” he tóg. “Hã kÿ ag tóg ki kanhró nÿtÿ, Topê tÿ inh tÿgrÿn ag kren han ke ti,” he tóg, Moisés ti. Hã ra ag tóg to jÿkrén tÿ nÿtÿ, ti kanhkã ag,” he tóg, Estêvão ti.

²⁶ “Tỹ vaj kỹ tóg ag to tĩg mǎn mũ, ǎ kanhkǎ ag to. Kỹ ũn régre ag tóg jagně to jũ nỹtĩ, Israel ag. Kỹ Moisés tóg ag tỹ jagně to há han sór mũ. Hǎ jé tóg ag mỹ: “tỹ ǎjag tóg jagně kanhkǎ nỹtĩ vế,” he mũ. “ǎjag tỹ ne jé jagně vóg kónǎn sór nế?” he tóg.

²⁷ Ũ tỹ ǎ régre vóg kónǎn mũ ẽn tóg ti vóg kỹ ti mỹ: “ǎ pi(jé) tỹ ẽg pǎ'i nĩ,” he mũ. “ǎ pi(jé) ẽg jyvẽn mũ’,” he tóg. ²⁸ “ǎ hỹn isén sór mũ, ǎ tỹ rǎké tá Egito tá ke ẽn tén ri ke han sór ǎ hỹn mũ,” he tóg ti mỹ,” he tóg, Estêvão ti.

²⁹ “Kỹ Moisés tóg ǎ tỹ ti vĩ mẽ kỹ tóg vẽn pēju kỹ tĩ mũ. Kỹ tóg ga tỹ Midiǎ ra tĩ mũ. Povo ũ ag mĩ tóg tĩ mũ gé. Tá tóg prũg kỹ kósin régre han mũ. ³⁰ Prỹg tỹ 40 tũg kỹ Topě tỹ jẽně jafǎ vỹ ti mỹ vẽn ven mũ, ti tỹ ẽmǎ tũ ja mĩ tĩ mũ ra, krĩ tỹ Sinai tá. Vǎnh grug ki tóg ti vég mũ, Moisés ti, Topě tỹ jẽně jafǎ ẽn ti. ³¹ Ti tỹ ti ve kỹ tóg ti mỹ e tĩ. Kỹ tóg ra tĩ mũ, ti ve há han jé. Kỹ tóg vẽn vĩ mẽg mũ. Topě vĩ vế. ³² Kỹ tóg ti mỹ: “tỹ sóg ǎ jóg'jóg ag Topě nĩ,” he mũ, “Abraão Topě, Isaque Topě, Jacó Topě,” he tóg, vẽn vĩ ti.

Hǎ ra Moisés tóg jũrũn ke mũ, ti kamẽg kỹ. Kỹ tóg tá ẽvǎnh jǎvǎnh nĩ.

³³ Hǎ ra Topě tóg ti mỹ: “ǎ pẽn né kunũ ra, ǎ pẽn to ró ti,” he mũ. “Inh jo ǎ tóg jẽ nĩ (mỹr), hǎ ra sóg vẽn kar kǎfór nĩ. Hǎ kỹ kunũ,” he tóg, Topě ti. ³⁴ “Egito tá ke ag tỹ isũ ag vóg kónǎn vég isóg nĩ nĩ. Ag vėkrẽnkrěr mẽg sóg nĩ nĩ. Kỹ sóg tere, sỹ ag kygvǎn jé. Hǎ kỹ sóg ǎ jẽnẽg mũ, ga tỹ Egito ra, ǎ tỹ ag kygvǎn jé. Ha tĩg,” he tóg, Topě tỹ jẽně jafǎ ti, Moisés mỹ,” he tóg, Estêvão ti.

³⁵ “Moisés ẽn hǎ jẽně ja tóg nĩ, Topě ti, ti tỹ ǎ kanhkǎ ag kren han jé, ti tỹ tỹ pǎ'i nĩ jé. Hǎ to Topě tỹ jẽně jafǎ tóg ti mỹ vẽn ven, vǎnh gru ki. Hǎ ra ti kanhkǎ ag tóg ti to é he ja nĩgtĩ, ti mỹ: “ǎ pi(jé) tỹ ẽg pǎ'i nĩ’,” hen kỹ, “ǎ pi(jé) ẽg jyvẽn mũ’,” hen kỹ. ³⁶ Moisés tóg sir ẽg tỹ nén han vǎnh hyn han, ga tỹ Egito tá, goj kafǎ tũ tá ke gé, goj kusũg he mũ ẽn tá ke gé. Kỹ ag tóg ẽmǎ tũ mĩ mũ mũ, prỹg tỹ 40 ki, ti kanhkǎ ag. Kỹ Moisés vỹ ag jo tĩ mũ, ti tỹ ga tỹ Egito tá ag kǎpan kỹ. Hǎ ra tóg ag mũn ki ẽg tỹ nén han vǎnh hyn han mũ gé,” he tóg, Estêvão ti.

³⁷ “Moisés tóg ǎ kanhkǎ ag mỹ, povo tỹ Israel ag mỹ tóg tag tó ja nĩ: “Topě vỹ ǎjag mỹ ǎ vĩ tó tĩ ũ jẽněnh mũ, ǎjag mré ke ũ, ti tỹ ǎjag mỹ Topě vĩ tó jé inh ri kén,” he ja tóg nĩgtĩ, Moisés ti. ³⁸ Moisés ẽn hǎ ne tóg povo tỹ Israel ag mré ẽmǎ tũ mĩ tĩ ja nĩgtĩ. Ag tỹ kejẽn pǎnónh tỹ Sinai tá nỹtĩn kỹ tóg Topě tỹ jẽně jafǎ mré vĩ mũ, Moisés ti. Kỹ tóg ti mỹ vẽn vĩ nĩm mũ, Topě ti, ẽg tỹ ti vĩ ẽn han kỹ ẽg tỹ ẽg rĩr krỹg ja tũ ve jé. Kỹ Moisés tóg ẽg jóg'jóg ag mỹ vẽn vĩ ẽn tugtó mũ. Hǎ ra tóg ẽg mỹ tó mũ gé,” he tóg, Estêvão ti.

³⁹ “Moisés vĩ han vǎnh ag nỹtĩ, ẽg jóg'jóg ag. Kỹ ag tóg ti tovǎnh kỹ ga tỹ Egito ra mũ mǎn sór mũ, kyrǎgrǎ kỹ. ⁴⁰ Kỹ ag tóg Moisés jǎvy tỹ Arǎo mré vĩ mũ. Kỹ ag tóg ti mỹ: “ẽg mỹ vẽn kǎggrǎ tỹ topě han, retrato tỹ, ẽg tỹ vẽn jo ag gé(g) mũ jé,” he ag tóg.

Hǎ ra Moisés vỹ ver pǎnónh tỹ Sinai kri nĩ nĩ.

Kỹ ag tóg Arǎo mỹ: “Moisés tóg ẽg jo tĩg ja nĩ,” he mũ. “Èg kǎpan ja tóg nĩ, ga tỹ Egito tá, hǎ ran hẽ ra vyr hỹn’?” he ag tóg ti mỹ. Kỹ tóg ag mỹ: “hej,” he mũ. ⁴¹ Kỹ ag tóg monh sĩ kǎggran mũ. Kỹ ag tóg ti kǎggrǎ ẽn mỹ ag tóg ǎjag mẽg kugprũn mũ, retrato ẽn mỹ. Ag tỹ han mũ tóg ag mỹ sĩnvĩ tĩ. Kỹ tóg ag mỹ sér tĩ sir.

⁴² Hǎ ra Topě tóg vẽn kaja jé ag tovǎnh mũ gé, hǎ kỹ ag tóg rǎ to jǎnjǎn mũ, kysǎ to (mỹr), krĩg kar to (mỹr). Hǎ kỹ Topě vĩ tó tĩ ũ tóg ag to rǎn mũ gé, kỹ tóg: “Israel’,” he mũ. “ǎjag tỹ ẽmǎ tũ ja mĩ mũn kỹ ǎjag tóg inh mỹ nén ũ pũn ja tũ nĩgtĩ (mỹr),” he tóg. “Prỹg tỹ 40 ki ǎjag tóg ẽmǎ tũ ja mĩ mũ ja nĩgtĩ,” he tóg, “hǎ ra ǎjag tóg topě ũ ag mỹ kugprũn ja nĩgtĩ, inh mỹ pũn tũ nĩn kỹ,” he tóg, Topě ti, ǎ vĩ tó tĩ tỹ. ⁴³ “Topě tỹ Moloque ĩn sĩ va ǎjag tóg mũ ja nĩgtĩ, krĩg kǎggrǎ ke gé, hǎ vỹ: Renfǎ, he mũ, krĩg retrato ẽn ti,” he tóg. “Vẽn kǎggrǎ ẽn to ǎjag tóg jǎnjǎn ja nĩgtĩ,” he tóg. “Hǎ kỹ sóg ǎjag vóg kónǎn kỹ Babilônia tá ke ag jėgněnh mũ, ag tỹ ǎjag tatĩn mũ jé, cidade tỹ Babilônia mǎ ra,” he tóg, Topě ti, ǎ vĩ tó tĩ tỹ,” he tóg, Estêvão ti.

⁴⁴ “Èg jóg ag tỹ ẽmǎ tũg ja mĩ mũn kỹ ag tóg kur tỹ Topě pẽ jo ĩn han ja nĩ, ag tỹ tá Topě tũ han jé, ti ĩn tá. Topě vỹ Moisés mỹ tó ja nĩ, ti tỹ kur tỹ Topě jo ĩn han jé, kỹ tóg ti tỹ nén han ke ven ja nĩ ti mỹ. ⁴⁵ Ag krẽ tóg sir ag ri kén ĩn tỹ kur ẽn ma mũ ja nĩgtĩ gé, ag tỹ

Topē tỹ ājag mỹ ěmā tó mũ ěn ra mũn kỹ. Moisés ter kar Josué tóg sir ag jo tĩ mũ, kỹ ag tóg ga ěn ra mũ mũ. Hã ra Topē tóg ga ěn tá ke ag kãpan mũ, ěg jóg'jóg ag jo.

Kejĕn Davi tóg tỹ ag pã'i nĩ sir, prỹg tỹ hĕn ri ke kar kỹ. Hã ra ĩn tỹ kur ěn tóg ver jĕ nĩ. ⁴⁶ Topē vỹ Davi to há nĩ. Kỹ Davi tóg ti mỹ: “sỹ ā mỹ ĩn há han há tóg tĩ vē,” he mũ. “Ā hã ne tóg tỹ ijóg'jóg tỹ Jacó Topē nĩ,” he tóg. “Kỹ tóg ā tỹ ĩn tỹ kur krĕm nĩn kỹ ĩnh mỹ há tũ nĩ,” he tóg ti mỹ, Davi ti.

⁴⁷ Hã ra Davi tóg han tũ nĩ ver. Ti kósin tỹ Salomão tóg ĩn ěn han mũ,” he tóg, Estêvão ti.

⁴⁸ Kỹ tóg ag mỹ: “hã ra vēnh kar kãfór ěn tóg ěg tỹ ti jo ĩn han mũ ěn krĕm nĩ tũ nĩgtĩ (mỹr),” he mũ. “Hã kỹ Topē vĩ tó tĩ ũ tóg ti to tag tó ja nĩ, ha mẽ. ⁴⁹ “Kanhkã tãn vỹ tỹ ĩnh nĩ,” he tóg. “Īnh nĩg ja ri ken hã vē,” he tóg. “Kỹ ga vỹ tỹ isũ nĩ gé. Sỹ tá vēnhkán sór nĩn kỹ sóg kenh ke mũ. Isũ kar vē. Kỹ ājag tỹ ĩnh mỹ ĩn han sór kỹ ājag hỹn hĕ ri kenh mũ?” he tóg. “Pĕtĕm ke tũ ājag nĩnh mũ, ājag tỹ ĩnh mỹ vēnhkán jafã han ken ki,” he tóg. ⁵⁰ “Īnh hã ne tóg nĕn kar hyn han ja nĩ ĩnhhã,” he tóg, Topē ti, ā vĩ tó tĩ tỹ,” he tóg, Estêvão ti.

⁵¹ Kỹ tóg ag mỹ: “krĩ tũ ājag nỹtĩ (mỹr),” he mũ. “Ki kanhrãn jãvãnh ājag tóg nỹtĩ (mỹr),” he tóg. “Kỹ ājag nĩgrĕg tóg kutu nĩ gé (mỹr), Topē kuprĩg kato ājag tóg vãsãnsãn nỹtĩ. Ājag jóg'jóg ag mrĕ ājag tóg ti kato vãsãnsãn nỹtĩ,” he tóg. ⁵² “Ājag jóg'jóg ag ne tóg Topē vĩ tó tĩ ag kar vóg kónãn ja nĩgtĩ', ag kãgtĕn ja ag tóg nĩgtĩ'. Hã ra ěn ag tóg ũ tỹ vēnh jykre kuryj han mũ ěn kãmĕn ja nĩgtĩ, hã vỹ: Jesus, he mũ. Ti kãtĩg ke jo ag tóg ti tó ja nĩgtĩ, Topē vĩ tó tĩ ag. Jãvo ājag tóg ěn kato vĩ ja nĩgtĩ, fóg mỹ. Kỹ ājag tóg ti tĕn ja nĩgtĩ, Cristo ti,” he tóg, Estêvão ti.

⁵³ “Topē hã ne ājag mỹ ā vĩ nĩm ja nĩ', ā tỹ jĕgnĕ jafã ag tỹ. Hã ra ājag tóg ti vĩ mrynhrãnh ja nĩgtĩ,” he tóg. Estêvão tỹ pã'i ag mỹ tón hã vē.

Ag tỹ Estêvão tĕn

⁵⁴ ũ tỹ tá nỹtĩ ag tỹ ti vĩ mẽ kỹ ag fe tóg gỹm ke mũ. Kỹ ag tóg ājag jã tỹ gyngyn he mũ, tỹ ag tóg gangan ke mũ. ⁵⁵ Hã ra Topē kuprĩg tóg Estêvão krĩn mũ, kỹ Estêvão tóg kanhkã ki ěvãnh mũ. Kỹ tóg Topē vég mũ, ti kókov ti. Jesus vég tóg mũ gé, Topē pĕgja tá tóg jĕ nĩ, Jesus ti. ⁵⁶ Kỹ tóg: “ha vé,” he mũ. “Kanhkã tá sóg vég mũ,” he tóg. “Kỹ ĕprã ke fi kósin tóg Topē pĕgja tá jĕ nĩ,” he tóg.

⁵⁷ Kỹ ag tóg prĕnprĕr mũ sir, ājag nĩgrĕg nĩgfĕnh kỹ. Ti to ag tóg vēnh génh mũ sir, ag kar ti. ⁵⁸ Kỹ ag tóg ti ség mũ, cidade tỹ Jerusalém tá ag tóg ti kutĕm mũ gé. Kỹ ag tóg ti pin mũ, pó tỹ. Ājag kur vãvãm ag tóg mũ, kỹ kyrũ tóg ki rĩr mũ, ag kur ki. Kyrũ ěn jiji hã vỹ: Saulo, he mũ.

⁵⁹ Kỹ ag tóg Estêvão pin mũ sir, pó tỹ. Hã ra Estêvão tóg jamã hár(a): “!..ĩnh Senhor'..!” he mũ. “!..Jesus'..!” he tóg. “!..Īnh kuprĩg jãvãnh ra..!” he tóg mũ. ⁶⁰ Kỹ tóg ā jakrĩ tỹ jĕ kỹ prĕr mũ, jamã hár(a), kỹ tóg: “!..ĩnh Senhor'..!” he mũ. “!..Ag tỹ ĩnh pin tỹ vēnh pãte fón ne..!” he tóg mũ. Kar kỹ tóg hun ke mũ sir.

8

Saulo tỹ ag vóg kónãn

¹ Jãvo Saulo ěn mỹ tóg há tĩ, ag tỹ ti tĕn kỹ. Kurã ěn kã ag tóg Jesus ki ge mũ kar vóg kónãn jagy han mũ, Jerusalém tá. ũ tỹ vēnh mãn tĩ ag vóg kónãn ag tóg mũ gé, ũ tỹ Topē vĩ mẽ jĕ vēnh mãn tĩ ag. Kỹ ag tóg jagãgtar tãvĩ nỹtĩ. Kỹ ag tóg vēnh kãpugpóv kãn mũ sir. Ga tỹ Judéia kar mĩ ag tóg mũ mũ, ga tỹ Samaria mĩ ke gé. Hã ra Jesus tỹ ũn vin mũ ag hã tóg Jerusalém tá nỹtĩ nĩ.

² ũ tỹ Topē to há tĩ ag tóg fe kaj nỹtĩ, Estêvão ter kỹ. Kỹ ag tóg kygfỹ mág kỹ ti kĕnh mũ.

³ Hã ra Saulo tóg Jesus ki ge kỹ nỹtĩ kar ag vóg kónãn jagy han mũ, ũ tỹ Topē vĩ mẽ jĕ vēnh mãn tĩ ag. Ti tỹ ag tũg sór vē, Saulo ti. Hã jĕ tóg ĩn kar kãra rã tĩ. Ti tỹ Jesus ki rã kỹ jĕ ũ ven kỹ tóg vēse jan kãtã ti fón ti, ũn grĕ ag, ũn tãtã fag ke gé.

Samaria tá Topě vī tó

⁴ Ū tỹ vĕnh kĀpugpóv mŭ ěn ag vỹ vĕnh kar mỹ vĕnh vī sér tugtó mŭgtĩ, Topě vī ti. ⁵ Kỹ Filipe tóg tĩ mŭ gé. Ga tỹ Samaria ra tóg tĩ mŭ, kỹ tóg cidade ũ ki ra mŭ, Cristo kāmén jĕ. ⁶ Kỹ vĕnh kar tóg ti vī mĕgmĕg mŭ. Jĕmĕ há han ag tóg mŭ, Filipe vī ti. Hã ra Filipe tóg ěg tỹ nĕn han vĕnh hyn han mŭ gé. Kỹ ag tóg vég mŭ. Hã kỹ ag tóg jĕmĕ há han mŭ. ⁷ Vĕnh jagrĕ kórég tỹ hĕn ri ke pan tóg mŭ, Filipe ti. Ti tỹ ag pan kỹ ag tóg jamã há(a) prĕr mŭ, kỹ ag tóg kĀpa mŭ. Ū grĩ ag tỹ há' he tóg mŭ gé, ũn vagvá ag tỹ ke gé, ũn vygvá ag tỹ. ⁸ Kỹ tóg vĕnh kar mỹ sér tĩ sir, cidade ěn tá.

⁹ Kỹ Simão tóg nĩ nĩ, cidade ěn tá ke ũ. Kujá vĕ, Simão ěn ti. Kỹ tóg nĕn vĕnhmỹ hyn han tĩgtĩ. Kỹ tóg ga tỹ Samaria tá ke ag tỹ ti tỹ nĕn han ve kỹ tóg ag mỹ e tĩ. Vĕso tóg: “ag kĀfór inh nĩ,” he tĩ, ag tỹ ti kamĕg jĕ. ¹⁰ Hã kỹ vĕnh kar tóg ti kamĕg mŭ sir, ũn sanh ag, gĩr ag ke gé. Ti to ag tóg: “Topě jykre han tóg tĩgtĩ, Topě jykre mág (pĕ) ěn,” he tĩ, Simão ěn to. ¹¹ Kysã tỹ hĕn ri ke ki tóg nĕn vĕnhmỹ hyn han ti, kỹ tóg vĕnh kar mỹ e tĩ, hã kỹ ag tóg ti kamĕg tĩ sir.

¹² Vãhã ag tóg Filipe vī kri fig mŭ, Samaria tá ke ag, ti tỹ Jesus Cristo tón kỹ. Topě tỹ tỹ ěg pã'i nĩ kāmén tóg mŭ, Filipe ti. Ū tỹ ã vī kri fig mŭ ag kygpég tóg mŭ, ũn gré ag, ũn tãtã fag ke gé. ¹³ Kỹ Simão ěn tóg ti vī kri fig mŭ gé, kujá ěn ti. Kỹ Filipe tóg ti kypég mŭ gé. Kỹ tóg Filipe mré nĩ nĩ. Kỹ tóg Filipe tỹ ěg tỹ nĕn han vĕnh hyn han mŭ vég mŭ, Topě jykre tỹ. Kỹ tóg ti mỹ e (pĕ) tãvĩ tĩ sir, Simão mỹ.

¹⁴ Kỹ vãhã Jesus tỹ ũn vin mŭ ag tóg kejĕn mĕg mŭ, Samaria tá ke ag tỹ Topě vī kri fig mŭ ěn ti. Jerusalém tá ag tóg mĕg mŭ, kỹ ag tóg João mré Pedro jĕnĕg mŭ, ag tỹ ve jĕ. ¹⁵ Pedro ag tỹ tá junjun kỹ ag tóg ag to Topě mré vī mŭ, Samaria tá ke ag to, Topě tỹ ã kuprĩg tỹ ag jagrĕn jĕ. ¹⁶ Tá ke ũ tóg tỹ jagrĕ tũ ja nĩ ver. Kygpe kỹ ag nỹtĩ inhhã, Jesus jiji tó kỹ, ěg Senhor jyjy tó kỹ. ¹⁷ Kỹ Pedro ag tóg ãjag nĩgĕ tỹ ag mĕgmĕg mŭ, kỹ Topě kuprĩg tóg ag kãra rã mŭ.

¹⁸ Hã ra Simão tóg vég mŭ, Jesus tỹ ũn vin mŭ ag tỹ nĕn han mŭ ti. Ag tỹ ũ mĕ kỹ Topě kuprĩg tóg ag kãra rã mŭ. ěn vég tóg mŭ, Simão ti. Kỹ tóg ag mỹ jãnkamy ven mŭ, Pedro ag mỹ. ¹⁹ Kỹ tóg ag mỹ: “inh mỹ vĕnh jykre tag nĩm nĩ, jãnkamy tag to,” he mŭ. “Sỹ ũ mĕ kỹ Topě kuprĩg tóg ag kãra rãnh ke mŭ. Sỹ vĕnh jykre ěn ki kanhrãnh há tóg tĩ,” he tóg.

²⁰ Hã ra Pedro tóg ti mỹ: “ã jãnkamy mré ã nũgme ki kutĕnh mŭ,” he mŭ. “Topě tỹ nĩm ja vĕ (mỹr), hã ra ã tóg jãnkamy ti mãn sór mŭ, vĕnh jykre ti,” he tóg. ²¹ “Ã pi(jĕ) Topě jykre tag ki kanhró nĩnh mŭ', kỹ Topě tóg ã mỹ nĩm ke tũ nĩ,” he tóg. “Ã jykre pijé kuryj nỹ', Topě mỹ,” he tóg. ²² “Ã jykre pãno tag tovãnh ra,” he tóg. “Topě mré vī. Hĕn ri ke mŭn tóg ã mỹ vĕnh pãte fón mŭ, ã tỹ vĕnh jykre pãno to jykrĕn mŭ tag ti,” he tóg. Pedro ti. ²³ “Fe kórég tãvĩ ã nĩ (mỹr), kỹ ã jykre vỹ pãno nỹ gé sir,” he tóg, Pedro ti.

²⁴ Kỹ Simão tóg ti mỹ: “iso Topě mré vī, inh jagtar jĕg tũ nĩ jĕ, ã tỹ inh mỹ tó mŭ tag ti,” he mŭ.

²⁵ Hã ra Pedro ag tóg mŭ mãn gé, ag tỹ ěg Senhor tỹ Jesus vī tó kar kỹ. Ājag tỹ nĕn ve ja ěn tó kãn ag tóg, Jesus tỹ nĕn han ja ti. Kỹ ag tóg Jerusalém to vỹnvỹn ke mŭ sir. Ag mŭ kỹ ag tóg ga tỹ Samaria mĩ Topě vī há tugtó mŭ gé.

Filipe tỹ ũn kypég mŭ

²⁶ Hã ra Topě tỹ jĕnĕ jafã tóg Filipe mỹ vī mŭ, kỹ tóg: “kanhkã tãpér ra tĩg, ěpry jagma tĩg, ěmĩn jagma,” he mŭ. Jerusalém tán kãtĩ, Gaza mĩ, hã ra tóg ěmã tũ fĩn kutĕ mŭ. Ēpry ěn jagma tĩg, ěmĩn ěn jagma,” he tóg mŭ, Topě tỹ jĕnĕ jafã ti.

Kỹ tóg tĩ mŭ sir, Filipe ti. ²⁷ Tá jun kỹ tóg ga tỹ Etiópia tá ke vég mŭ, pã'i fi rãnhřãj han tĩ ti, pã'i tỹ rainha fi tỹ nĕn ũ kar vég tĩ ti, ũn kurĩ ěn ti. Pã'i fi jijin hã vỹ: Candace, he mŭ. Fi krĕm pã'i ěn tóg Jerusalém ra tĩg ja nĩ, ũn kurĩ ěn ti. Tá tóg Topě kurã mág ve ja nĩ, festa mág ti, Jerusalém tá. ²⁸ Hã ra tóg ã jamã ra vỹn ke mŭ sir, carroça kãmĩ. Tĩg kỹ tóg Topě vī to ke mŭ, Isaías tỹ rá ěn ti. Vãsỹ Topě vī tó tĩ vĕ, hã vỹ: Isaías, he mŭ.

²⁹ Kŷ Topē kuprīg tóg Filipe mŷ: “carroça kukām tīg,” he mŷ. ³⁰ Kŷ Filipe tóg fūrŷn tĩ mŷ, kŷ tóg ti tŷ vĕnh rá to ke mĕg mŷ, Isaías tŷ rá ĕn to, vāsŷ Topē vĩ tó tĩ tŷ rá ĕn to. Kŷ tóg ti mŷ: “ã mŷ ã tŷ nĕn to ke mŷ tag ki kanhró nĩ?” he mŷ.

³¹ Hã ra tóg: “vó,” he mŷ. “Ũ tóg inh mŷ kāmĕn ja tũ nĩ ver,” he tóg. “Ă mŷ inh mŷ kāmĕn ke tũ nĩ?” he tóg. “Tãpry ra, inh mré nĩ jé,” he tóg. Kŷ tóg ke mŷ, Filipe ti.

³² Ti tŷ ken hã vĕ, ha mĕ: “ovelha ri ke han tóg, ũ ĕn ti. Ovelha pére ĕg mŷgtĩ, ti tãnh jé, hã ra tóg vĩ tũ nĩgtĩ (mŷr). Cordeiro ri ke han tóg mŷ gé. Ĕg tŷ ti kyki ronh mŷ ra tóg jatun mŷ jé nĩ gé (mŷr). ³³ Ũ ĕn tŷ Topē vĩ mranh tũ hã ra ag tóg ti vóg kónãn, ag tŷ ti jyvĕn tũ ra. Ti mré ke ag jykre pãno tó kãn ke tũ ĕg tóg nĩgtĩ (mŷr). Ti tén ja ag tóg (mŷr), kŷ tóg ter mŷ sir,” he tóg, vĕnh rá ti.

³⁴ Kŷ ũn kurĩ ĕn tóg Filipe mŷ: “ũ to ke nĕ hŷn'? Topē vĩ tó tĩ tŷ ne tó nĕ hŷn'?” he mŷ. “Inh mŷ tó,” he tóg. “Ti tŷ vĕso ke mŷ', ũ to ke mŷ vó?” he tóg.

³⁵ Kŷ Filipe tóg ti mŷ vĕnh rá tag kāmĕn mŷ sir. Jesus kāmĕn tóg mŷ. Ti mŷ tóg vĕnh vĩ há ĕn tó mŷ, Jesus to.

³⁶ Ge ag tóg mŷ mŷ, ĕpry jagma, ĕmĩn jagma. Kŷ ag tóg goj tá junjun mŷ. Kŷ ũn kurĩ ĕn tóg: “tag ki tóg goj nĩ,” he mŷ. “Ă tŷ ki inh kype jé tóg há nĩ, he tóg.

³⁷ Kŷ Filipe tóg ti mŷ: “ã tŷ ã fe tŷ ti ki rã kŷ nĩ nĩn kŷ tóg há nĩ,” he mŷ.

Kŷ tóg: “ti ki sóg rã kŷ nĩ,” he mŷ. “Jesus tóg tŷ Topē kósin nĩ (mŷr), Jesus Cristo ti,” he tóg, ũn kurĩ ti. ³⁸ Kŷ tóg carroça tĩn ti mŷ: “ver krŷg hé,” he mŷ. Kŷ tóg Filipe mré goj ra tére mŷ, kŷ tóg kãra rã mŷ, ũn kurĩ ti. Kŷ Filipe tóg ti kypĕg mŷ sir.

³⁹ Ag tŷ goj kãtã kãjãpry kŷ Filipe tóg tũ' he mŷ, Topē kuprīg tŷ ti ma tīg kŷ. Kŷ ũn kurĩ tóg ti ve mãn tũ nĩ sir. Hã ra tóg tĩ mŷ, ã jamãn ra. Ti mŷ tóg sér tĩ sir.

⁴⁰ Hã ra Filipe tóg cidade tŷ Azoto tá nĩ nĩ. Kŷ tóg tīg kŷ Jesus vĩ tó tĩ mŷ, ĕmã kar mĩ. Kŷ tóg kejĕn cidade tŷ Cesarĕia tá jun mŷ, Jesus kãme sér tó jé.

9

*Saulo tŷ Jesus ki rã
(Hk 22.6-16; 26.12-18)*

¹ Hã ra Saulo tóg ver ũ tŷ ĕg Senhor tŷ Jesus mré mŷ mŷ ag vóg kónãn sór mŷ. Ag to tóg krĩ rŷ nĩ ver. Ti tŷ ag kãgtĕn sór vĕ. Hã to tóg Topē tũ ki rĩr tĩ to pã'i mág to tĩ mŷ.

² Kŷ tóg ti mŷ permissão to vĩ mŷ, ti tŷ cidade tŷ Damasco ra tīg jé. Tá tóg permissão ĕn tŷ pã'i ag mŷ ven sór mŷ, ag tŷ ti mŷ: “ha ag venh tĩ gé,” he jé. Ti tŷ Jesus mré tĩ mŷ ũ ve kŷ tóg ti se sór tĩ. Jerusalém ra tóg ag tatĩ tīg sór tĩ, ti tŷ ũn ség mŷ ag, ũn grĕ ag, ũn tãtã fag ke gé. ³ Hã jé tóg Damasco ra tĩ mŷ. Ti tŷ kakó ke mŷr hã jĕngrĕ tar tóg vĕnh ven mŷ, kanhkã tá. Rã kãfór tóg nĩ, hã ra tóg Saulo ki kómkóm ke mŷ sir. ⁴ Kŷ Saulo tóg kutĕ mŷ, ga kri tóg tá' ke mŷ. Kŷ tóg vĕnh vĩ mĕg mŷ. Kŷ tóg: “Saulo', Saulo',” he mŷ. “Ă tŷ ne jé isũ ag vóg kónãn nĕ?” he tóg, vĕnh vĩ ti.

⁵ Kŷ Saulo tóg ĕg Senhor mŷ: “ã tŷ ũ nĕ?” he mŷ.

Kŷ tóg ti mŷ: “tŷ sóg Jesus nĩ, ã tŷ ũn vóg kónãn sór tĩ ĕn vŷ tŷ inh nĩ,” he mŷ. ⁶ “Jĕg nĕ ra, cidade tag ki rã, tá ũ tóg ã mŷ tónh mŷ, ã tŷ nĕn han ke ti,” he tóg, vĕnh vĩ ti.

⁷ Ti mré mŷ ag vŷ vĕnh vĩ tag mĕg mŷ gé, hã ra ag tóg nĕn ũ vég tũ nĩ. Kŷ ag kãne tóg jŷrŷn ke mŷ. ⁸ Kŷ Saulo tóg jĕg nĕ mŷ sir. Kŷ tóg tãmĩ ĕvãnh sór mŷ, hã ra tóg nĕn ũ vég tũ nĩ. Kŷ ag tóg ti nĩgé kãgmĩ kŷ ti pére mŷ mŷ, cidade tŷ Damasco ra. ⁹ Kurã tãgtũ ki tóg ĕvãnh tũ nĩ, kŷ tóg jĕg tũ (pĕ) nĩ gé, kron tũ (pĕ) ti nĩ gé, Saulo ti.

¹⁰ Damasco tá ke ũ tóg nĩ nĩ, ti jyjy hã vŷ: Ananias, he mŷ. Jesus mré tĩ ũ vĕ. Kŷ Jesus tóg ti mŷ vĕnh ven mŷ. Kŷ tóg: “Ananias',” he mŷ.

Kŷ Ananias tóg ĕg Senhor ti mŷ: “inh hã vĕ,” he mŷ.

¹¹ Kŷ Jesus tóg ti mŷ: “jĕg nĕ ra,” he mŷ. “Ĕmĩn kuryj he mŷ ĕn ra tīg. Judas he mŷ ĕn ĩn kãra rã. Tá ũ tóg nĩ nĩ, ti jiji hã vŷ: Saulo, he mŷ. Cidade tŷ Tarso tá ke vĕ. Ĕn mré vĩmnĩ,” he tóg. “Ha vé, inh mré tóg vĩ nĩ,” he tóg. ¹² “Kŷ tóg ũ vég nĩ nĩ, ti jyjy hã vŷ:

Ananias, he mū. Ā hā vē. Ā tỹ ti ĩn kĀra rĀnh ke vē. Ā tỹ ā nĭgĕ tỹ ti mĕnh ke vē. Kỹ tóg ve mĀn ke mū, ā tỹ ti mĕn tỹ. Tag vég tóg nĭ nĭ, Saulo ti,” he tóg, Jesus ti, Ananias mỹ.

¹³ Kỹ Ananias tóg ĕg Senhor ti mỹ: “vĕnh kar tóg ti kĀmĕn tĩ hĀ ra, ā tỹ inh mỹ tó mū tag ti,” he mū. “Jerusalĕm tá tóg ā tũ ag vóg kónĀn,” he tóg. ¹⁴ “Kỹ tóg permissĀo ma kĀtĩ mū, Topĕ tũ ki rĩr tĩ to pĀ'i mág tỹ ti mỹ han kỹ. Kỹ tóg ũ tỹ ā mrĕ vĩ mū kar sigse sór mū, cidade tag ki,” he tóg, Ananias ti, Jesus mỹ.

¹⁵ Kỹ ĕg Senhor tỹ Jesus tóg ti mỹ: “ti venh tĩg,” he mū. “Ti kuprĕg isóg (mỹr), ti tỹ ijiji tó jé, fóg ag kar mỹ, kanhgág ag kar mỹ ke gé, povo tỹ Israel ag mỹ ke gé,” he tóg. ¹⁶ “Ti mỹ sóg ven mū, ti tỹ isugrĭn jagtar ke ti,” he tóg, Jesus ti.

¹⁷ Kỹ Ananias tóg tĩ mū. Ti tỹ ĩn ĕn tá jun kỹ tóg ā nĭgĕ tỹ ti mĕg mū, kỹ tóg ti mỹ: “Saulo!,” he mū. “Régre!,” he tóg mū. “Ēg Senhor vỹ inh jĕnĕ, Jesus mỹr, sỹ ā ve jé,” he tóg. “Ti ve ā (mỹr), ĕpry kri, ā tỹ tag ki jun mūn kĀ,” he tóg. “HĀ kỹ sóg kĀtĩ mū, ā tỹ ve mĀn jé, Topĕ kuprĭg tỹ tỹ ā jagrĕ nĭ jé,” he tóg, Ananias ti.

¹⁸ Kỹ tóg vĀhĀ ti kanĕ tá pa mū, pirĀ fār ri ke. Kỹ tóg ve há' he mĀn mū sir. Kỹ tóg jĕg nĕ mū sir. Kỹ tóg ti kypĕg mū sir, Ananias ti. ¹⁹ Kỹ tóg jĕg mū gé sir, hĀ kỹ tóg tar' he mū sir. Damasco tá tóg nĭ nĭ ver, Jesus mrĕ mū tĩ ag mrĕ. ²⁰ Kỹ tóg vĕsỹmĕr Jesus kĀmĕn mū, Israel ag vĕnh kanhrĀn jafĀ krĕm. “Tỹ tóg Topĕ kósin nĭ,” he tóg mū, Jesus to. ²¹ ũ tỹ ti vĩ mĕg mū kar ag mỹ tóg e tĩ. “Jerusalĕm tá tóg ag vóg kónĀn, ũ tỹ Jesus tó mū ag,” he ag tóg. “Kỹ tóg tag ki jun mū gé, ag sigse jé, Topĕ tũ ki rĩr tĩ tỹ pĀ'i mág ag mỹ ag tatĩ tĩg jé,” he ag tóg, Saulo to. Kỹ tóg ag mỹ e tĩ, ti tỹ Jesus to: Topĕ kósin vē,” hen kỹ.

²² HĀ ra Saulo tóg fe tar nĭ. Kỹ tóg Israel ag kanhrĀn mū, cidade tỹ Damasco tá. Ag mỹ tóg Jesus kĀmĕn mū. “Tỹ tóg Cristo nĭ, Jesus ti,” he tóg, ag mỹ Topĕ vĩ kĀmĕn kỹ. Kỹ tóg ag tỹ ti vĩ kafĀn sór mū hĀ ra ag mỹ vĕnhmỹ tĩ sir.

Saulo tỹ cidade tỹ Jerusalĕm ra tĩg

²³ KurĀ tỹ hĕn ri ke tũg kỹ Israel ag tóg kejĕn jagnĕ mrĕ jykrĕn mū, Saulo tĕn ke to. ²⁴ HĀ ra Saulo tóg mĕg mū, ag tỹ ti to jykrĕn ĕn to. Cidade ĕn to ró jĀnkĀ tá ag tóg vĀjig nỹtĩ, ti jo, kurĀ kar ki, kuty tá ke gé, ag tỹ hĕn ri ke mūn tá ti tĕn jé. Kỹ tóg mĕg mū sir, Saulo ti. ²⁵ Kỹ ti mrĕ ke ag vỹ kuty tá kĕj kĀkĀ ti nĭm kỹ ti tĕrem mū, cidade ĕn to ró to. Kỹ tóg Jerusalĕm ra tĩ mū.

²⁶ Ti tỹ Jerusalĕm tá jun kỹ tóg Jesus mrĕ mū ag mrĕ nĭ sór mū, Jesus mrĕ mū tĩ ag mrĕ. HĀ ra ag tóg ti kamĕg mū. “Ti ón hỹn,” he ag tóg ti to, ti tỹ ag vóg kónĀn jan kỹ. ²⁷ Kỹ Barnabé tóg ti mrĕ vĩ kỹ Jesus tỹ ũn vin mū ag to ti pére tĩ mū. Kỹ tóg ag mỹ ti tỹ Jesus ve ja ĕn kĀmĕn mū, ĕpry jagma. “Kỹ Jesus tóg ti mrĕ vĩ ja nĭ gé,” he tóg. “Kar tóg Damasco tá ke ag mỹ Jesus kĀmĕn ja nĭ gé, ti tỹ mūmĕg tũ nĭn kỹ,” he tóg, Barnabé ti.

²⁸ Kỹ Saulo tóg ag mrĕ tĩ nĭ ver, Jerusalĕm tá. Tá tóg Jesus kĀmĕn mū gé, ti tỹ mūmĕg tũ nĭn kỹ. ²⁹ Kỹ tóg Israel ag mrĕ vĩ mū gé, ũ tỹ Grego vĩ tó mū ag mrĕ ke gé. Ag tỹ ti vĩ kafĀn kỹ tóg ag mrĕ vĩ mū. HĀ ra ag tóg ti tĕn ke to jykrĕn mū, Saulo tĕn ke to. ³⁰ Kỹ Jesus mrĕ ke ag tóg mĕg mū gé, ag tỹ Saulo tĕn ke to jykrĕn mū ĕn to. Kỹ ag tóg cidade tỹ Cesarĕia ra ti pére mū mū. Tá junjun kỹ ag tóg cidade tỹ Tarso ra ti jĕnĕg mū.

³¹ Jesus ki ge kỹ nỹtĩ ag kar vỹ jatun mỹ nỹtĩ nĭ sir, ũ tỹ Topĕ vĩ mĕ jé vĕnh mĀn tĩ ĕn ag. Jatun mỹ ag tóg nỹtĩ sir, ga tỹ Judĕia tá, ga tỹ Galilĕia tá ke gé, ga tỹ Samaria tá ke gé. Kỹ ag tóg jatun mỹ vĕnh kanhrĀn mū, Topĕ jykre tỹ. Topĕ vĩ ki ag tóg króm mū, Topĕ kamĕg kỹ. Topĕ kuprĭg vỹ ag krĭn mū. Kỹ ag krĩ vỹ kĀnhvy' he mū. Kỹ ag tóg e nỹtĩ gé sir.

Enĕias

³² Kejĕn Pedro tóg vĕnh kar ag vegvenh tĩ mū. Kỹ tóg cidade tỹ Lida ra tĩ mū gé, tá Topĕ tũ ag vegve jé. ³³ Tá ũ tóg nỹ nĭ, ti jijin hĀ vỹ: Enĕias, he mū. Grĭn kỹ tóg nỹ nĭ, ā cama kri. 8 anos han tóg, grĩ nỹ ki.

³⁴ Kỹ Pedro tóg ti mỹ: “Enĕias!,” he mū. “Jesus Cristo vỹ ā han,” he tóg. “Jĕg nĕ ra, ā cama fi han ra,” he tóg.

³⁵ Kŷ tóg vēsŷmēr jēg nē mū. Kŷ cidade tŷ Lida tá ke kar ag vŷ ti vég mū, cidade tŷ Saroná tá ke kar ag ke gé. Kŷ ag tóg ti ve kŷ Jesus ki ge mū gé sir.

Dorcas fī

³⁶ Cidade tŷ Jope tá ū fi tóg nī nī, Jesus mré tī mū fi, fi jiji hā vŷ: Tabita, he mū, hā vŷ: Dorcas, he mū, fi jyy ti, fóg tŷ Grego vīn ki. Ēn fi hā vŷ nén kar há han mū. Ūn jagāgtar fag mŷ fi tóg nén vīn tī.

³⁷ Kejēn fi tóg kaga nŷ nī, kŷ fi tóg ter mū sir. Kŷ fag tóg fi kupe kŷ ĩn to jāpŷy jafā tá fi fig mū, kynh mŷ.

³⁸ Jo Jope tóg Lida kakó kā nī, hā ra Pedro tóg Lida tá nī nī. Kŷ Jope tá ke ag tóg ti ki kanhró nŷtī, Pedron ki, Jesus mré mū ag.

Kŷ ag tóg ūn régre ag jēgnēg mū, ag tŷ ti mŷ: “kur kātīg mē han,” he jé. ³⁹ Kŷ Pedro tóg vēsŷmēr tī mū. Kŷ tóg tá jun mū. Hā ra Dorcas fi tóg ĩn to jāpŷy jafā tá nŷ nī, ter kŷ. Pedro jun kŷ ag tóg ĩn to jāpŷy jafā to jāpŷy mū, ti mré. Kŷ ūn mén ter ja ěn fag kar vŷ ti to kāmū mū. Kygfŷy fag tóg mū. Ti mŷ fag tóg kur venven mū, fi tŷ fag mŷ kugrŷn ja ti, camisa, vestido ke gé, vēnh kri fē ke gé. Dorcas fi tóg fag mŷ kugrŷn mē han ja nīgtī.

⁴⁰ Kŷ Pedro tóg vēnh kar mŷ: “ha pa jēg,” he mū. Kŷ tóg ā jakŷī tŷ jēg kŷ Topē mré vī mū. Kŷ tóg vēser fi mŷ: “Tabita', nī ra,” he mū. Kŷ fi tóg mŷin ke mū. Kŷ fi tóg nī mū, fi tŷ Pedro ven kŷ. ⁴¹ Kŷ tóg fi nīgé kāgmī kŷ fi fēg mū. Kŷ tóg vēnh kar jé prēr mū, Topē tū kar, ūn mén ter ja ěn fag mré hā. Kŷ tóg fag mŷ fi ven mū.

⁴² Kŷ Jope tá ke kar ag vŷ mēg mū sir, fi rīr mǎn ěn ti. Kŷ ū tŷ hēn ri ke ag vŷ Jesus ki ge mū sir.

⁴³ Kŷ Pedro tóg cidade tŷ Jope tá nī nī ver, Simão he mū ěn mré, ū tŷ nén fār tŷ tǎnāj ke tī ěn mré.

10

Capitão tŷ Cornélio

¹ Cidade tŷ Cesaréia tá ū tóg nī nī, ti jiji hā vŷ: Cornélio, he mū. Soldado tŷ 100 to pǎ'i vē, ag tŷ ū to: ga tŷ Itália tá ke ag, he mū ěn to capitão vē. ² Ēn vŷ Topē to há nī, kŷ tóg Topē kamēg tī. Ti mré ke kar vŷ ge nŷtī gé. Povo tŷ Israel ag kāmī ūn jagāgtar ag jagāgtǎn tóg tīgtī, ti tŷ tŷ Israel ag mré ke tū hā ra. Topē mré tóg vī tī gé. ³ Ēn tóg nén nē vég mū, 3 horas ki, ā nŷr tū ra. Kŷ tóg Topē tŷ jēnē jafā jun vég mū. Kŷ tóg ti mŷ: “Cornélio',” he mū, Topē tŷ jēnē jafā ti.

⁴ Ti tŷ ti ve kŷ ti fe tóg jūrūn ke mū, kŷ tóg: “ne nē?” he mū.

Hā ra tóg ti mŷ: “Topē vŷ ā vī mēg mū (mŷr),” he mū. “Ā tŷ ūn jagāgtar ag mŷ nén nīm tī vég tóg mū gé,” he tóg. “Hā kŷ tóg ā to jykrén mū,” he tóg. ⁵ “Kŷ ū jēgnēmnī, ag tŷ Jope ra mū jé. Tá ū tóg nī nī, ti jiji hā vŷ: Simão, he mū, kŷ ti jyy ū hā vŷ: Pedro, he mū. Ēn jé prērnmī,” he tóg. ⁶ “Simão mré tóg nī nī, ū tŷ nén fār tŷ tǎnāj ke tī ěn mré, kŷ ti ĩn vŷ goj kafā tū fyr tá jē nī,” he tóg.

⁷ Kŷ Topē tŷ jēnē jafā tóg tī mū, ti mŷ tó kar kŷ. Kŷ capitão ěn tóg ā camarada régre ag jé prēr mū, soldado pir mré, ū tŷ Topē kamēg mū ěn ti. Ū tŷ ā rǎnhrāj han mū ěn jé tóg prēr mū. ⁸ Kŷ tóg ag mŷ ā tŷ nén ve ja tó mū, kŷ tóg cidade tŷ Jope ra ag jēgnēg mū.

⁹ Tŷ vaj kŷ ag tóg cidade ěn to hā nŷtī, meio dia ki. Kŷ Pedro tóg ĩn kri kyjer ěn ra tāpŷy mū, Topē mré vī jé. ¹⁰ Kŷ tóg kókīr mū. Kŷ tóg fag mŷ vējén to vī mū. Fag tŷ ver ti mŷ han mū ra tóg nén nē vég mū, Pedro ti. ¹¹ Kŷ tóg ag tŷ kanhkā nón mū vég mū. Tá nén ū tóg kátére mū. Kŷ tóg tŷ kur mág ve nī. Ti péno kygie kŷ tóg ga kri kátére mū, kur ti. ¹² Hā ra bicho kar tóg kur ěn kāki nŷtī nī, fa tŷ 4 (ke) kar tóg nŷtī, ū tóg ā nug kri mūgtī gé, sēsī kar ke gé, jēsī kar. ¹³ Kŷ vēnh vī tóg mē há tī, kŷ tóg: “tág',” he mū. “Tǎnh kŷ kó, vŷ,” he tóg.

¹⁴ Kŷ Pedro tóg ěg Senhor ti mŷ: “nejé,” he mū. “Nén ū jēggŷy ko ja tū sóg nī (mŷr),” he tóg. “Ěg povo jykre tū vē, ěg tŷ bicho ěn kon kŷ,” he tóg.

¹⁵ Kŷ tóg ti mŷ vĭ mǎn mŷ sir jāvo, vĕnh vĭ ti, kŷ tóg: “Topĕ tóg hǎ ra to: há ti nĭ, he mŷ. Kŷ jĕggryg tŭg nĭ,” he tóg.

¹⁶ Ge tǎgtŭ han tóg, kŷ nĕn nĕ ĕn tóg vĕg tŭ¹ he mŷ sir, kanhkā tá.

¹⁷ Hǎ ra tóg Pedro mŷ e tĭ. Ti tŷ to jykrĕn tŭ tóg tĭ, ti tŷ vĕg mŷ to. Ti tŷ ver to jykrĕn mŷ ra ag tóg junjun mŷ, Cornĕlio tŷ ũn jĕgnĕg mŷ ag. Ũ tóg ag mŷ: “ĭn ĕn vĕ,” he ja nĭ.

¹⁸ Kŷ ag tóg tá junjun mŷ. Ró to jĕgjĕ kŷ ag tóg jamā hár(a) ke mŷ, kŷ ag tóg: “Simāo Pedro ag mŷ ki nŷtĭ?” he mŷ.

¹⁹ Hǎ ra Pedro tóg ver ǎ tŷ vĕg mŷ ĕn to jykrĕn nĭ nĭ. Kŷ Topĕ kuprĭg tóg ti mŷ ke mŷ. “Ha vé, ũn régre ag vŷ ǎ jĕ prĕr mŷ,” he tóg. ²⁰ “Jĕg nĕ ra, kátĕre ra, tĭg ra ag mré,” he tóg. “To jykrĕn tŭg. Isŷ ag jĕgnĕ vĕ,” he tóg, Pedro mŷ, Topĕ kuprĭg ti.

²¹ Kŷ Pedro tóg ag to kátĕre mŷ, kŷ tóg ag mŷ: “inh hǎ vĕ,” he mŷ. “Inh jĕ prĕr ja ājag tóg nĭ,” he tóg. “Ājag tŷ ne to kāmŷ nĕ?” he tóg ag mŷ.

²² Kŷ ag tóg ti mŷ: “Cornĕlio tŷ ĕg jĕgnĕ vĕ,” he mŷ. “Capitāo vĕ, Cornĕlio ti. Ũn jykre kuryj vĕ, kŷ tóg Topĕ kamĕg tĭ,” he ag tóg. “Israel kar ag tóg ti to há nŷtĭ, ti to ag tóg vĭ há han tĭ. Topĕ tŷ jĕnĕ jafǎ vŷ ti mŷ ke ja nĭ, ti tŷ ǎ jĕ prĕr jĕ, ǎ tŷ ti ĭn ra tĭg jĕ, ǎ tŷ ti mŷ Topĕ kāmĕn jĕ,” he ag tóg, Pedro mŷ.

²³ Kŷ Pedro tóg ag mŷ: “kǎge jĕg ra,” he mŷ. Kŷ ag tóg tá nŷgnŭr mŷ. Tŷ vaj kŷ tóg ag mré tĭ mŷ. Kŷ Jope tá ke ũ ag tóg ti mré mŷ mŷ gé, Jesus mré ke ũ ag. ²⁴ Tŷ vaj kŷ ag tóg Cesarĕia tá junjun mŷ. Tá Cornĕlio tóg ag jāvǎnh mŷ. Hǎ kŷ tóg ǎ kanhkā ag kar kógfyn ja nĭ, ag mŷ vĕnh vĭ jĕnĕ ja tóg nĭ, ǎ mré ke kar ag mŷ. Kŷ ag tóg kāmŷ ja nĭ, kŷ ag tóg tá nŷtĭ sir.

²⁵ Pedro tŷ tá jun kŷ Cornĕlio tóg ti kato tĕ mŷ, kŷ tóg ti jo mŷg ke mŷ. “Ti hŷn tŷ Topĕ nĭ,” he tóg, hǎ kŷ tóg ti jo mŷg ke mŷ, Cornĕlio ti.

²⁶ Hǎ ra Pedro tóg ti fĕg mŷ, kŷ tóg: “ke tŭg ra,” he mŷ. “Tŷ sóg ĕprǎ ke nĭ gé,” he tóg ti mŷ. ²⁷ Kŷ tóg ti mŷ vĭ há han mŷ. Kŷ tóg kǎra rǎ kŷ ũn e ag vĕg mŷ, ũn vĕnh mǎn kŷ nŷtĭ ag, Pedro ti. ²⁸ Kŷ tóg ag mŷ: “Israel ag vŷ fóg mré nĭ tŭ nĭgtĭ (mŷr),” he mŷ. “Ĕg jykrĕn hǎ vĕ,” he tóg. “Kŷ ĕg tóg fóg ĭn kǎra rǎ tŭ nĭgtĭ gé (mŷr) sir. Tag ki kanhró ājag tóg nŷtĭ,” he tóg. “Hǎ ra Topĕ tóg inh kanhrǎn, ǎ jykre tŷ. Kŷ sóg vĕnh kar ĭn kǎra rǎnh mŷ, jĕggry tŭ nĭn kŷ,” he tóg. ²⁹ “Hǎ kŷ sóg jatun mŷ kǎtĭg, vĕsŷmĕr, ājag tŷ inh jĕ prĕr kŷ. Kŷ sŷ ājag ki jĕmĕnh há tóg tĭ. Ājag tŷ hĕ ri ke jĕ inh jĕ prĕr nĕ?” he tóg ag mŷ, Pedro ti.

³⁰ Kŷ Cornĕlio tóg ti mŷ: “4 dias vĕ ha ũri,” he mŷ, “kŷ sóg Topĕ mré vĭnh ke nĭ nĭ, jĕg tŭ nĭn kŷ. 3 horas vĕ. Inh ĭn krĕm sóg Topĕ mré vĭnh ke nĭ nĭ, kŷ sóg ũ vĕg nĭ nĭ. Ti kur tóg kókov nĭ. ³¹ Kŷ tóg inh mŷ: “Cornĕlio!,” he mŷ. “Topĕ vŷ ǎ vĭ mĕg mŷ. Ā tŷ ũn jagĕgtar mŷ nĕn vin ĕn ve tóg. To tóg jykrĕn, Topĕ ti,” he tóg. ³² “Kŷ Jope ra ũ jĕnĕ. Tá Simāo jĕ prĕr, ũ tŷ Pedro he mŷ ĕn ti. Nĕn fár tŷ tǎnǎj ke tĭ ĕn ĭn krĕm tóg nĭ nĭ, hǎ vŷ: Simāo, he mŷ. Ti ĭn vŷ goj kafǎ tŭ fyr tá jĕ nĭ,” he tóg inh mŷ, Topĕ tŷ jĕnĕ jafǎ ti,” he tóg, capitāo ti. ³³ “Kŷ sóg vĕsŷmĕr ǎ to ũ ag jĕgnĕ. Kŷ ǎ tóg kǎtĭ mŷ. Kŷ tóg há tĭ, ǎ kǎtĭg ti. Hǎ to ĕg tóg vĕnh mǎn, Topĕ jo. Topĕ tŷ ǎ mŷ nĕn tó ja kāmĕn ra ĕg mŷ. Ĕg tŷ mĕnh há tóg tĭ vĕ,” he tóg, Cornĕlio ti, Pedro mŷ.

Pedro tŷ Cornĕlio mŷ Topĕ vĭ tó

³⁴ Kŷ Pedro tóg ag mŷ kāmĕn mŷ, kŷ tóg: “vǎhǎ tóg sŷ to jykrĕn mŷ,” he mŷ. “Topĕ mŷ nĕn ũ tŭ vĕ, Israel he mŷ ĕn ag, fóg he mŷ ĕn ag ke gé, kanhgág ag ke gé, Israel jykre han tŭ kar ag,” he tóg. ³⁵ “Ũ tŷ ti kamĕg mŷ vŷ ti mŷ há nŷtĭ, Topĕ mŷ, ũ tŷ vĕnh jykre kuryj han mŷ ag kar, povo kar kāmĭ,” he tóg. ³⁶ “Povo tŷ Israel mŷ tóg ǎ vĭ ĕn jĕnĕ ja nĭ, Topĕ ti. Ĕg mŷ tóg tó, ĕg tŷ jatu nŷtĭ jĕ, ti tŷ Jesus Cristo tugrĭn ĕg to há nĭn kŷ. Jesus ĕn vŷ tŷ vĕnh kar Senhor nĭ,” he tóg.

³⁷ “Vĕnh vĭ ĕn mĕ kǎn ājag tóg huri. Judĕia kar mĭ tóg rŭm ke ja nĭ. João tóg vĕnh kar mŷ: “ājag jykre tovǎnh ra,” he ja nĭgtĭ. Kŷ tóg ag kygpe ja nĭ. Kar kŷ Jesus tóg Galilĕia mĭ tĭg vĕn mŷ, Nazaré tá ke ĕn ti. ³⁸ Kŷ Topĕ tóg Jesus mŷ ǎ kuprĭg jĕnĕ ja nĭ. Kŷ tóg ti mŷ

vēnh jykre nīm ja nī. Ga kar mī tóg tīg ja nīgtī. Nén kar há han ja tóg nīgtī. Japo tỹ ün vóg kónān mū ag tỹ há' he ja tóg nī gé. Topē hā ne ti mré han ja nīgtī hā ra'," he tóg.

³⁹ "Nén kar ěn ve ja ěg tóg nīgtī, ti tỹ nén han mū kar, ga tỹ Judéia tá, Jerusalém tá ke gé. ěn tỹ ag tóg cruz to ti sa ja nīgtī, ti tén ja ag tóg nīgtī. ⁴⁰ Kurā tāgtū tūg kỹ Topē tóg ěn rīn mān ja nīgtī, kỹ tóg vēnh ven ja nīgtī," he tóg, Pedro ti.

⁴¹ "Hā ra vēnh kar vỹ ti ve ja tū nī. ěg hā mỹ tóg vēnh ven ja nī. Hā to Topē tóg ěg kuprēg ja nīgtī. Ti mré ěg tóg jēn ja nīgtī, kron ja nīgtī gé, ti tỹ ā ter kar rīr mān kỹ," he tóg, Pedro ti. ⁴² "Kỹ tóg ěg mỹ: "vēnh kar mỹ inh kāmén nī," he ja nīgtī. "Topē vỹ ti tỹ vēnh kar káfór han, hemnī," he ja tóg nī ěg mỹ. "Kỹ tóg vēnh kar tỹ nén han mū venh ke mū sir. Ū tỹ ūri rīnrīr mū ag kar tỹ nén hyn han mū ve jé tóg ke mū, ün ter mū ag kar tỹ nén hyn han mū kar ke gé, hemnī," he ja tóg nīgtī ěg mỹ, Jesus ti," he tóg, Pedro ti.

⁴³ "Vāsỹ Topē vī tó tī ag kar vỹ ti kāmén ja nīgtī, kỹ ag tóg: "ũ tỹ ti ki rā mū mỹ tóg vēnh pāte fón ke mū, Topē ti, ti tỹ ti vī mranh mū ti," he ja nīgtī. "Cristo tugrīn tóg vēnh pāte fón ke mū," he ja ag tóg nīgtī, Topē vī tó tī ag," he tóg, Pedro ti.

Topē kuprīg tỹ tỹ ag jagrē nī

⁴⁴ Pedro tỹ ver tag tó kỹ vāhā Topē kuprīg tóg ag ki rā mū, ū tỹ ti vī mēg mū ag ki. ⁴⁵ Kỹ Israel ag tỹ Jesus ki ge kỹ nýtī ag mỹ tóg e tī, ū tỹ Pedro mré kāmū ag mỹ. "Topē kuprīg tóg tỹ ag jagrē nī'," he ag tóg. "Ag tỹ tỹ fóg nýtī ra tóg ag ki rā mū'," he ag tóg. ⁴⁶ "Vēnh vī ū tugtó ag mū (mỹr)," he ag tóg. "Vēnh vī ěn ki ag tóg Topē mỹ: há ā tóg nī, he mū," he ag tóg.

⁴⁷ Kỹ Pedro tóg: "ũ tóg ag to: ag kygpenh ke tū ěg nī, henh ke tū nī (mỹr)," he mū. "Topē kuprīg tỹ ag jagrē nýtī. ěg ki rā ri ke han tóg ag ki, Topē kuprīg ti. Kỹ ěg hỹn ag kygpenh mū ha," he tóg, Pedro ti. ⁴⁸ Kỹ tóg ū mỹ: "ag kygpe ra ge, Jesus Cristo jiji tó kỹ," he mū sir.

Ājag kygpe kar kỹ ag tóg Pedro mỹ: "ver ěg mré nī," he mū. Kỹ tóg ag mré nī sī han kar kỹ tī mū sir.

11

Pedro tỹ Jerusalém tá ā tỹ nén han mū tó

¹ Kỹ Jesus tỹ ün vin mū kar ag vỹ jēmēg mū, fóg ag tỹ Topē vī kri fig mū ti. Judéia kar mī ag tóg jēmēg mū, Jesus mré ke kar ag. ² Kỹ Pedro tóg Jerusalém ra tī mū. Kỹ tá Jesus ki ge mū ag tóg ti mré vī mū. Ti mré vī mū ag tóg: "vēnh kar vỹ ājag gré junjun fār kym ke mū, ěg jykre han jé, ag tỹ Topē jykre han sór kỹ," he ag tóg tī. ěn ag vỹ Pedro mỹ vī mū, ³ kỹ ag tóg: "ün fār kym ja tū ag mré ā tóg jēg mū (mỹr), ag ĩn ki," he mū.

⁴ Kỹ Pedro tóg ag mỹ nén kar ěn kāmén mū, ⁵ kỹ tóg: "cidade tỹ Jope tá sóg nī ja nī, kỹ sóg Topē mré vī nī ja nīgtī. Ti mré vī kỹ sóg nén nē vég mū," he tóg. "Nén gé(g) tīg jafā vē, kur mág ri ke. Ti péno kygie tóg kanhkā tá kātére mū. Kỹ tóg inh ki jun mū. ⁶ Kỹ sóg kākī ěvānh mū, kỹ sóg bicho kar vég mū, fa tỹ 4 ke ti nýtī, nēn tān ag mré hā, ag nug kri mū tī ag mré hā, sēsī kar mré hā, jēsī kar. ⁷ Kỹ sóg vēnh vī mēg mū, kỹ tóg: "tág', vỹ," he mū. "Tānh kỹ kó," he tóg. ⁸ Kỹ sóg ti mỹ: "nejé," he mū. "Nén ū jēggry ko ja tū sóg nī," he sóg ti mỹ. "ěg jykre tū vē, ěg tỹ bicho ěn kon kỹ," he sóg ti mỹ. ⁹ Kỹ tóg inh mỹ tó mān mū gé, kanhkā tá vēnh vī ti, kỹ tóg: "Topē tóg hā ra to: há tī nī, he mū. Kỹ jēggry tūg nī," he tóg, kanhkā tá. ¹⁰ Ge tāgtū han tóg, kỹ nén nē ěn tóg vég tū' he mū sir, kanhkā tá. ¹¹ Kỹ vēšmēr ün tāgtū ag vỹ tá nýtī, inh nī ěn rā. Cidade tỹ Cesaréia tá ag kāmū ja nīgtī, fóg tỹ iso ag jēgnēn kỹ. ¹² Kỹ Topē kuprīg tóg inh mỹ: "ha jatun mỹ ag mré tīg," he mū. Kỹ tag ag tóg inh mré mū mū, ū tỹ 6 (ke) tag ag, Jesus mré ke tag ag. Kỹ ěg tóg ěn ĩn kāra ge mū sir.

¹³ Kỹ tóg ěg mỹ ā tỹ Topē tỹ jēnē jafā ve ja tó mū. Ti ĩn kātá tóg nēji jē ja nī, Topē tỹ jēnē jafā ti. Kỹ tóg nēji ti mỹ: "Jope ra ū jēgnē," he mū. "Tá Simāo jé prēr, ū tỹ Pedro he mū ěn," he ja tóg nēji ti mỹ. ¹⁴ "ěn vỹ ā mré vīnh mū. Ti vī tỹ ā tóg kren ke mū, ā mré ke kar fag ke gé," he ja tóg nēji nī ti mỹ, Topē tỹ jēnē jafā ti," he tóg, Pedro ti.

¹⁵ “Kỹ sóg ag mý kāmén mū. Isỹ tó sī han mū ra Topē kuprīg tóg ag ki rā mū. Ti tỹ ěg ki rā ri ke han tóg mū, kurā ěn kã. ¹⁶ Kĩ sóg Jesus vĩ to jykrén mū, ti tỹ ěg mý: João tóg goj tỹ ag kygpe ja nĩgtĩ, hã ra Topē kuprīg tóg ag kãra rãnh mū, tỹ vėnh kype ri ke vė sir, he ěn to,” he tóg, Pedro ti. ¹⁷ “Kỹ Topē vỹ ag jagrėn mū, ã kuprīg tỹ, ti tỹ ěg jagrėn ri ke vė, ěg tỹ Jesus Cristo ki ge kũ. Hã kũ sóg Topē kato tẽ jãvãnh ja nĩ,” he tóg, Pedro ti.

¹⁸ Ag tỹ tag mẽ kũ ag krĩ tóg kusa' he mū. Kũ ag tóg: “Topē vỹ fóg ag krĩn mū gé, ag tỹ ãjag jykre tovãnh jé, ag tỹ ěg rĩr krỹg ja tũ ve jé,” he ag tóg mū.

Antioquia tá ke ag tỹ Topē vĩ kri fi

¹⁹ Ag tỹ Estêvão tén kar kũ Jesus ki ge kũ nỹtĩ ag tóg hėn ra mū mū, ag tỹ ag vóg kónãn kũ. Kũ ag tóg ga tỹ Fenícia ra mū mū, goj vãso tỹ Chipre ra, cidade tỹ Antioquia ra ke gé. Ag mũn kũ ag tóg Israel ag hã mý Topē vĩ tóg mū.

²⁰ Kejėn Chipre tá ke ũ ag tóg cidade tỹ Antioquia ra mū mū, Cirene tá ke ag ke gé. ěn ag tóg fóg tỹ Grego vĩ tóg mū ag mý Jesus Cristo kāmén mū, vėnh vĩ sér tag ti. ²¹ Kũ Topē tóg ag mré ag krĩn mū. Kũ ũ tỹ hėn ri ke ag tóg Jesus ki ge mū, Topē jykre han jé. ²² Kũ Jerusalém tá ke ag tóg mẽg mū, fóg ag tỹ Jesus vĩ kri fig mū ti. Jerusalém tá Jesus ki ge kũ nỹtĩ ag tóg mẽg mū gé, ũ tỹ tá Topē vĩ mẽ jé vėnh mãn tĩ ag. Kũ ag tóg Barnabé jėnėg mū, ti tỹ Antioquia ra tĩg jé.

²³ Ti tỹ tá jun kũ ti fe tóg mrin ke mū, Topē tỹ ag jagãgtãn kũ. Kũ tóg ag jyvėn mū, ag tỹ Jesus ki rã to krónh ke tũ nĩn jé, ag tỹ fe tar nỹtĩn jé. ²⁴ Barnabé vỹ tỹ ũn vĩ há nĩ, Topē kuprīg vỹ tỹ ti jagrė nĩ. Kũ ti jykre kar tóg Jesus ki rã ja nĩ. Kũ ũ tỹ hėn ri ke ag vỹ Jesus ki ge mū gé sir, ti tỹ ag jyvėn kũ.

²⁵ Kũ Barnabé tóg cidade tỹ Tarso ra tĩ mū, Saulo jãvãnh jé, tá. ²⁶ Ti tỹ ti ve kũ tóg ti pére tĩ mū, Antioquia ra. Kũ ag tóg prỹg pir han, Antioquia tá. Jesus ki ge kũ nỹtĩ ag tỹ vėnh mãn kũ ag tóg ag kanhrãn tĩ, Barnabé ti, Saulo ti ke gé. Kũ ũn e vỹ Barnabé ag vĩ jėmėg tĩ. Kũ ag tóg Antioquia tá ag tóg ũ tỹ Jesus mré mū ag to: “Cristo mré ke ag,” he vėn. Kũ ag jiji vė sir, hã vỹ: Cristo mré ke ag, he mū.

²⁷ Kejėn Jerusalém tá ke ũ ag tóg Antioquia tá junjun mū, Topē vĩ tóg tĩ ag. ²⁸ Ag kã ũ jijin hã vỹ: Ágabo, he mū. ěn vỹ kejėn Topē kuprīg tỹ ti krĩn kũ: “kejėn ěg tóg prỹg venh mū, kãnhmar,” he mū, “ga kar mĩ hã,” he tóg. Kũ tóg Cláudio tỹ pã'i tỹ imperador nĩn kũ tóg ge nĩ. ²⁹ Kũ ag tóg prỹg nĩnh ken kũ Jesus mré mū ag tóg Judéia tá ke ag to jykrén mū sir. Kũ ag tóg: “ěg hỹn ag mý nén ũ jėnėnh mū, ag tỹ kon jé,” he mū. Kũ vėnh kar vỹ ag tũ kuju vin han mū, ag tỹ Judéia tá Jesus mré ke ag mý jėnė jé. ³⁰ Kũ ag tóg Barnabé jėnėg mū, Saulo ke gé, ag tỹ gé(g) mū jé, kófa ag mý vin jé, ũ tỹ Jesus ki ge kũ nỹtĩ ag ki rĩr tĩ ag mý. Kũ ag tóg ke mū sir.

12

Ag tỹ Pedro se

¹ Kejėn pã'i tỹ rei tỹ Herodes vỹ Jesus ki ge kũ nỹtĩ ũ ag sigség mū, ag vóg kónãn jé. ² Kũ tóg soldado jėnėg mū, ti tỹ Tiago tén jé, João kãke ěn. Kyfé téj tỹ tóg ti tén mū, rógro téj tỹ, soldado ti, Herodes tỹ ti jėnėn kũ. ³ Kũ tóg Israel ag mý há tĩ, ti tỹ Tiago tén kũ. Kũ Herodes tóg Pedro kãgmĩg mū gé sir. Festa kãki tóg ti kãgmĩg mū. Festa ěn ki ag tóg pão jėgĩã tũ ko tĩ, Israel ag. Ag jykre vė.

⁴ Soldado ag tỹ Pedro ve kũ ag tóg vėse ja kãki ti fón mū. Soldado tỹ 16 ag vỹ ti ki rĩr mū, ũ tỹ 4 tỹ ti ki rĩr nỹtĩn kũ ũ tỹ 4 ũ ag nỹtĩg ja ki nỹtĩ ke tĩ, jagnė ri kén. “Festa tỹ Páscoa kar kũ sóg ag mý ti ven mū, ag tỹ ti vóg kónãn jé,” he tóg, Herodes ti. ⁵ Kũ Pedro tóg se kũ jė nĩ. Hã ra Jesus ki ge kũ nỹtĩ ag tóg ti jo Topē mré vĩ kũ nỹtĩ, ag tỹ to krónh ke tũ nĩn kũ.

Pedro tỹ kavari nĩ

⁶ Tỹ vaj kũ Herodes vỹ ag mý ti ven sór mū. Tỹ kuty ěn kã Pedro tóg soldado régre ag kuju ki nũr mū. Ferro régre tỹ tóg se kũ nỹ ag mré. Soldado ũ ag tóg vėse ja jãnkã ki rĩr mū.

⁷ Kŷ vāhā Topē tŷ jēnē jafā tóg ti mré jē nī, kŷ tóg ĩn ěn krēm jēngrē nī, kuty hā ra. Ěn tóg Pedro ki péréen ke mŷ, ti kavy ki. Ti rĭn tóg mŷ, kŷ tóg ti mŷ: “kur nī,” he mŷ. Kŷ ti nĭgē se ja tóg varan ke mŷ, ferro ěn ti. Kŷ tóg kavar kŷ nī nī, kyvar kŷ, Pedro ti. ⁸ Kŷ Topē tŷ jēnē jafā tóg ti mŷ: “vēsóg fĭ ra,” he mŷ. “Ā pēn né tu ra gé, ā pēn to ró ti,” he tóg. Kŷ tóg ke mŷ sir. Kŷ tóg ti mŷ: “Ā kur rŷ tu kŷ inh nón kātĭg,” he mŷ.

⁹ Kŷ tóg kākutē mŷ. Ti nón tóg tĭ mŷ, Pedro ti. Hā ra tóg ti mŷ tŷ nén ũ ve jē, ti tŷ vég mŷ ti. Ti mŷ tóg tŷ ti vēnhpéti ve tĭ, Topē tŷ jēnē jafā tŷ nén han mŷ ti. ¹⁰ Jānkā ki rĭr vén mŷ ěn pātén ag tóg mŷ, jānkā ki rĭr mŷ ũ ke gé. Kŷ ag tóg jānkā mág tá junjun mŷ, ferro tŷ han kŷ jē ěn, kyfē tŷ han kŷ jē ěn, ũn tŷ cidade to nón mŷ ěn. Jānkā ěn vŷ vēsógki rām ke mŷ ag jo. Kŷ ag tóg kāpa mŷ sir. Ěpŷy jagma ag tóg mŷ mŷ, ěmĭn jagma. Kŷ vāhā Topē tŷ jēnē jafā tóg tĭ mŷ sir. ¹¹ Kŷ vāhā Pedro tóg mŷin ke mŷ, kŷ tóg: “vāhā sóg ki kanhró nī,” he mŷ. “Topē vŷ ā tŷ jēnē jafā jēnē ja nī, kŷ tóg inh kren han mŷ, pā'i tŷ Herodes jo. Israel kar ag tóg inh jagtar nĭnh ke jāvānh mŷ, hā ra sóg venh ke tŷ nī,” he tóg, Pedro ti.

¹² To jykrén kŷ tóg Maria fi ĩn ra tĭ mŷ, João mŷnh ěn fi, ag tŷ ũ to: Marcos, he mŷ ěn mŷnh fi. Fi ĩn krēm ag tóg vēnh mǎn kŷ nŷtĭ nī, Topē mré ag vĭ nŷtĭ nī, ũ tŷ hēn ri ke ag. ¹³ Kŷ tóg ĩn to ró jānkā tŷ tórón' tórón' ke mŷ. Kŷ fi camarada fi tóg venh kātĭ mŷ. Fi jyjy hā vŷ: Rode, he mŷ. ¹⁴ Kŷ fi tóg Pedro vĭ ki kanhró nī, hā ra fi tóg ti mŷ nón tŷ nī, róm tŷ fi nī, jānkā ti, fi fe tŷ mŷin ke mŷ ra. Fi tŷ ĩn kāra rān kŷ fi tóg vēnh kar mŷ: “Pedro vŷ ró to jē,” he mŷ.

¹⁵ Kŷ ag tóg fi mŷ: “krĭ vēnhmŷ ā nī,” he mŷ. Hā ra fi tóg: “ti hā vē,” he mŷ. Kŷ ag tóg fi mŷ: “tĭ ki rĭr tĭ ěn vē hŷn,” he mŷ.

¹⁶ Kŷ Pedro tóg ver re tá jē nī, jānkā tŷ tórón' tórón' ke mǎn kŷ. Kŷ ag tóg ti mŷ róm mŷ, jānkā ti. Ti vég ag tóg mŷ sir, kŷ tóg ag mŷ e tĭ. ¹⁷ Kŷ Pedro tóg ag mŷ ā nĭgē tŷ ge mŷ, ag tŷ katy' he jé. Kŷ tóg ag mŷ Topē tŷ ti kavān tó mŷ sir, Topē tŷ ti kyvān kŷ. Topē tŷ vēse ja kātá ā kutēm kāmén tóg mŷ sir. Kŷ tóg ag mŷ: “Tiago mŷ kemnī, Jesus mré ke kar ag mŷ ke gé,” he mŷ. Kŷ tóg Jerusalém tá kutē kŷ ěmā ũ ra tĭ mŷ sir.

¹⁸ Tŷ vaj kŷ soldado ag fe tóg jŷrŷn ke mŷ. “Pedro hŷn hē kātá vyr, ti hŷn ne kātá vyr?” he ag tóg mŷ, ti jāvānh kŷ. ¹⁹ Kŷ Herodes tóg ũ ag jēgnēg mŷ gé, ti kǎgmĭ jé. Hā ra ag tóg ti vég tŷ nī gé. Kŷ Herodes tóg Pedro ki rĭr mŷ ag ki jēmēg mǎn mŷ. Kar kŷ tóg soldado ũ ag mŷ: “ag kǎgtén ra, ti ki rĭr mŷ ag,” he mŷ. Kŷ ag tóg ag kǎgtén mŷ sir.

Kar kŷ Herodes tóg Judéia tá kutē kŷ cidade tŷ Cesaréia ra tĭ mŷ sir, tá nī jé.

Herodes ter

²⁰ Herodes tóg cidade tŷ Tiro tá ke ag to jŷ mŷ, cidade tŷ Sidom tá ke ag to ke gé. Ěn ag tóg Herodes nĭgja tá junjun mŷ. Kŷ ag tóg pā'i sĭ mré vĭ mŷ, ti jĭji hā vŷ: Blasto, he mŷ. Herodes vŷ ti tŷ pā'i han ja nī. Ěn mŷ ag tóg to vĭ mŷ, ti tŷ ag jagfy vĭ jé, pā'i tŷ Herodes mré, ti tŷ ti fe tŷ há' he jé. Herodes krēm ke ag tóg ag mŷ vējēn vēne he ja nĭgtĭ, Tiro tá ke ag mŷ, Sidom tá ke ag mŷ ke gé. Herodes tŷ ag to jŷ nĭn kŷ ag tóg tá vējēn ve mǎn tŷ nī sir. Hā kŷ ag tóg ti fe tŷ há' he sór mŷ, ti tŷ ag mŷ vēne he mǎn jé.

²¹ Kŷ Herodes tóg ag mŷ kurā nĭm mŷ. Kŷ tóg ā kur sĭnvĭ ěn tu mŷ, pā'i kur ěn ti. Kŷ tóg ā nĭgja kri nī kŷ ag mŷ vĭ mág han mŷ. ²² Kŷ vēnh kar tóg ti to: “ěprā vēnh vĭ pijé’,” he mŷ. “Tŷ tóg Topē vĭ mē tĭ, ti vĭ ti,” he ag tóg mŷ. ²³ Kŷ vēsŷmér Topē tŷ jēnē jafā tóg ti vóg kónān mŷ sir, ti tŷ ag mŷ: “vó,” he tŷ nĭn kŷ. “Inh pi(jé) tŷ Topē nī’,” he ja tŷ tóg nī, hā kŷ tóg ti vóg kónān mŷ sir. Kŷ ti nug ga vŷ ti kagrāg mŷ, hā kŷ tóg ter mŷ.

Barnabé tŷ Saulo mré Topē vĭ tónh tĭg

²⁴ Jó ũ tŷ hēn ri ke ag vŷ Topē vĭ mēg mŷ, kŷ ag tóg Jesus ki ge mŷ.

²⁵ Kŷ Barnabé vŷ Saulo mré ājag tŷ nén gé(g) kāmŷ mŷ ěn vin mŷ, Jerusalém tá ke ag mŷ. Prŷg nĭn kŷ Jesus ki ge kŷ nŷtĭ ag tóg Jerusalém tá ke ag mŷ vējēn jēgnē ja nĭgtĭ. Ag mŷ vējēn ěn vin kŷ ag tóg vŷnvŷn ke mŷ sir, Barnabé ti, Saulo ti ke gé. João pére ag tóg mŷ mŷ, Marcos he mŷ ěn ti.

13

¹ Antioquia tá ũ ag tóg nýtī, Topē vī tó tī ũ ag, Jesus jykre tỹ vēnh kanhrān nýtī ag ke gé. Jesus ki ge kỹ nýtī ag mré ag tóg nýtī, ũ tỹ vēnh mǎn tī ag mré, ag tỹ Topē vī mē jé. Kỹ ũ jijin hǎ vỹ: Barnabé, he mǔ, kar ũ jyjyn hǎ vỹ: Simão Negro, he mǔ. Ũ tóg tỹ Lúcio nī, Cirene tá ke tag ti. Kỹ ũ tóg tỹ Manaém nī, pǎ'i tỹ Herodes mré mog mǔ tag ti. Kỹ ũ tóg tỹ Saulo nī gé.

² Kejēn ag tóg jagnē mỹ Topē jykre tó mǔ, ag tỹ jēg tǔ nīn kỹ. Kỹ Topē kuprīg tóg ag mỹ: “Barnabé fēg ra, Saulo mré,” he mǔ, “ag tỹ inh rānrāj han jé, isỹ nēn to jykrēn mǔ ěn ti, ag tỹ inh jykre tó jé, vēnh kar mỹ,” he tóg, Topē kuprīg ti.

³ Kỹ ag tóg jēg tǔ nīn kỹ Topē mré vī mǎn mǔ. Ājag nīgē tỹ ag tóg ag mēg mǔ, ag kymēn ag tóg mǔ, kỹ ag tóg: “ha mǔ jēg ge,” he mǔ. Hǎ kỹ Topē kuprīg tóg ag jēgnēg mǔ sir.

Kujá tỹ Elimas

⁴ Topē kuprīg tỹ ag jēgnēn kỹ ag tóg cidade tỹ Selēucia ra mǔ mǔ. Tá junjun kỹ ag tóg goj vǎso tỹ Chipre ra mǔ mǔ, canoa mág kāmī. ⁵ Kỹ ag tóg cidade tỹ Salamina tá junjun mǔ. Tá ag tóg Topē vī kāmén mǔ, Israel ag tỹ vēnh kanhrān jafǎ kǎtá. João Marcos vỹ ag mré tī mǔ gé. Ag camarada vē, João Marcos ti.

⁶ Goj vǎso mī ag tóg pa mǔ. Kỹ ag tóg cidade tỹ Pafos tá junjun mǔ, Topē vī kāmén kỹ. Tá ũ tóg nī nī, kujá ũ. Ōn kỹ tóg Topē vī tó sór mǔ. Israel ũ vē, ti jiji hǎ vỹ: Bar Jesus, he mǔ. ⁷ Governador mré tóg nī nī. Governador jyjy hǎ vỹ: Sérgio Paulo, he mǔ. Krī há ti nī, Sérgio Paulo ti. Kỹ tóg Barnabé jé prēr mǔ, Saulo jé ke gé, ti tỹ Topē vī jēmē sór kỹ.

⁸ Kỹ kujá ěn tóg ag vī kato tē mǔ, governador tỹ Topē vī kri fig tǔ nī jé. Kujá ěn jiji ũ hǎ vỹ: Elimas, he mǔ, hǎ vỹ: kujá, he mǔ, ti jyjy ti.

⁹ Kỹ vǎhǎ Topē kuprīg tóg Saulo krīn mǔ. Saulo jiji ũ hǎ vỹ: Paulo, he mǔ.

Kỹ Topē kuprīg tỹ ti krīn kỹ Paulo tóg kujá ěn ki kanē jǔ han kỹ ti ki ěvǎnh mǔ, ¹⁰ kỹ tóg: “tỹ ā tóg ũn ón mé nī,” he mǔ. “Jykre pǎno ā nī (mỹr),” he tóg. “Japo kósin vỹ tỹ ā nī (mỹr), vēnh jykre kuryj kato tē ā nī (mỹr),” he tóg. “Topē japry vỹ kugryj nýtī, ti jamīn ti, hǎ ra ā tóg tỹ pǎno ke sór tī (mỹr), kỹ ā tóg vēnh jykre pǎno to krónh ke tǔ nīgťī (mỹr),” he tóg. ¹¹ “Ha vé, Topē vỹ ā vóg mǔ, kỹ ā tóg kyvǎn ha,” he tóg. “Rǎ venh ke tǔ ā nīnh mǔ, kurǎ tỹ hēn ri ke ki,” he tóg, Paulo ti.

Kỹ tóg vēsýmér ti mỹ kuty' he mǔ. Kyvó tóg nī sir. Kỹ tóg jēmīg mǔ. Ũ jé tóg prēr mǔ, ti tỹ ti pére tīg jé.

¹² Governador tỹ tag ve kỹ tóg ti mỹ e tī. Kỹ tóg Jesus ki rǎ mǔ. Topē jykre tóg ti mỹ tar ja nī.

Paulo tỹ cidade tỹ Antioquia tá Topē vī tó

¹³ Kỹ vǎhǎ Paulo ag tóg Pafos tá pa mǔ. Canoa mág kāmī ag mǔ mǔ. Kỹ ag tóg ga tỹ Panfília tá junjun mǔ, cidade tỹ Perge tá. Hǎ ra João Marcos tóg kyrǎ mǔ. Ag ré kỹ tóg Jerusalém ra vỹn ke mǔ, João Marcos ti. ¹⁴ Jó ag tóg Perge tá pa mǔ, ga tỹ Pisídia ra mǔ jé, cidade tỹ Antioquia ra. Tá junjun kỹ ag tóg vēnhkán ke kurǎ ki ag tóg Israel tỹ vēnh kanhrān jafǎ kǎra ge mǔ, tá ag nīgnī mǔ gé.

¹⁵ Ũ tóg tá Topē tỹ ěg mỹ vēnh jykre nīm ja ěn to ke mǔ, rán kỹ nī ěn to. Ti tỹ ěg jyvēn tó tóg mǔ gé, vǎsỹ Topē vī tó tī ag tỹ rán ja ěn ti. Kar kỹ pǎ'i ag tóg Paulo ag jé prēr mǔ. Kỹ ag tóg: “kanhkǎ',” he mǔ. “Ājag tỹ ěg jyvēn sór nýtīn kỹ tóg há tī,” he ag tóg.

¹⁶ Kỹ Paulo tóg jēg nē mǔ. Ā nīgē tỹ tóg ag mỹ ge mǔ, ag tỹ katy' he jé. Kỹ tóg ag mỹ: “ha mē, Israel kar',” he mǔ. “Jēmē ra ha, ũ tỹ Topē kamēg mǔ kar, ājag tỹ tỹ fóg nýtī ra,” he tóg. ¹⁷ “Israel ag vỹ Topē kamēg tī. Topē tag tóg ěg jóg'jóg ag kuprēg ja nī. Ag tỹ tóg povo mág han, ag tỹ ver Egito tá ke ag mré nýtīn kỹ. Tá tóg ag kǎpan mǔ, ā jykre tar ěn tỹ, Topē ti,” he tóg. ¹⁸ “Ag to tóg fen mág mǔ, Topē tag ti, ag tỹ ěmǎ tǔg ja mī mǔn kỹ, prýg tỹ 40 ěn ki. ¹⁹ Povo tỹ 7 tỹ tóg tǔ' he mǔ, ga tỹ Canaã tá. Kỹ tóg ěg jóg'jóg ag mỹ ag ga fig mǔ, tỹ ag tǔ nī jé. ²⁰ Kỹ tóg ag mỹ pǎ'i ag vin mǔ gé, ag jyvēn jafǎ ag, 100 tỹ 4 kri 50 anos ki. Kar kỹ Samuel vỹ tỹ Topē vī tó tī nī gé. ²¹ Kỹ ag tóg pǎ'i mág tỹ rei ve sór mǔ. Kỹ ag tóg Topē mỹ to vī mǔ. Hǎ kỹ Topē tóg Saulo fēg mǔ, Quis kósin ěn. Benjamim krē'krē

ũ vĕ, Saulo ti. 40 anos ki tóg tỹ pã'i mág tỹ rei nĩ. ²² Ti tỹ ěn kutĕm kar tóg Davi fĕg mũ, Topĕ ti. Davi to tóg vĩ há han mũ, Topĕ ti, kỹ tóg: “Davi ve sóg, Jessé kósin,” he mũ. “Nén há han tóg tĩgtĩ. Kỹ sóg ti to há nĩ. Ěn hã vỹ inh jykre kar han mũ,” he tóg, Topĕ ti, Davi to,” he tóg, Paulo ti.

²³ “Davi kósin ũ vĕ, hã vỹ: Jesus, he mũ. Topĕ vỹ vãsỹ ti kătĩg ke tó ja nĩgtĩ. Kỹ tóg vãhã Jesus jĕnĕ ja nĩ, ěg povo tỹ Israel to, ti tỹ ěg kren han jé. ²⁴ João vỹ ti kătĩg ke jo vĕnh kar mỹ: “ãjag jykre tovãnh ra,” he ja nĩgtĩ, “isỹ ãjag kygpe jé,” he ja tóg nĩgtĩ, ěg povo tỹ Israel kar mỹ. ²⁵ João rãnhřaj tỹ tũ' henh ken kỹ tóg ag mỹ: “iso ãjag tóg Cristo he sór mũ,” he ja nĩgtĩ, João ti. “Hã tũ vĕ,” he ja tóg nĩgtĩ. “Inh pi(jé) tỹ Cristo nĩ,” he ja tóg nĩgtĩ. “Ha vé, inh nón tóg kătĩg, inh Senhor ti, hã vỹ: Jesus, he mũ. Sỹ tỹ ti camarada nĩnh ke vĕ vĕ, sỹ ti pĕn né kunũ jé, ti pĕn to ró ti, hã ra sóg tỹ ti krĕm ke pĕ jĕ,” he ja tóg nĩ, João ti,” he tóg, Paulo ti.

²⁶ “Inh kanhkã',” he tóg. “Abraão krĕ',” he tóg. “Ũ tỹ Topĕ kamĕg mũ', fóg kãmĩ',” he tóg. “Topĕ vỹ ěg hã mỹ vĕnh vĩ tag jĕnĕ, ěg krenkren jé,” he tóg. ²⁷ “Jerusalém tá ke ag vỹ Jesus ki kagtĩg ja nỹtĩgtĩ. Ti tỹ tỹ Topĕ kósin nĩn ki kagtĩg ja ag tóg nỹtĩgtĩ, ag pã'i ag ke gé. Hã kỹ ag tóg vãsỹ rán kỹ nĩ ěn han. Vĕnhkán ke kurã ki ag tóg vég tĩ, Topĕ vĩ tó tĩ ag tỹ nén rán ja ti. Hã ra ag tóg sir ag tỹ nén tó mũ ěn ki króm, ãjag tỹ Jesus to: ter jé tóg ke mũ, hen kỹ. ²⁸ Nén ũ kórég han ja tũ ti nĩ, kỹ ti ter ke tũ vĕ vĕ, hã ra ag tóg Pilatos mỹ: “ěg tỹ ti tén há tóg tĩ vĕ,” he ja nĩgtĩ. ²⁹ Ag tỹ ti to rán ja ěn ki króm kãn kỹ ag tóg cruz ěn to ti térem ja nĩgtĩ, vĕnh kej kătã ag tóg ti fón ja nĩgtĩ.

³⁰ Hã ra Topĕ tóg ti rĩn mãn ja nĩgtĩ, ti ter mũ ra. ³¹ Kỹ tóg ã mré ke ag mỹ vĕnh ven ja nĩgtĩ sir, Jesus ti, ũ tỹ ti mré Jerusalém ra mũ ja ag mỹ, Galiléia tá kãmũ kỹ. Ěn ag tóg ti kãmén mũ sir, vĕnh kar mỹ. ³² Vĕnh vĩ tag tó ěg tóg mũ,” he tóg, Paulo ti.

³³ “Ěg jóg'jóg ag vỹ Topĕ vĩ ěn mĕ ja nĩgtĩ. Hã ra tóg ũri han mũ, Topĕ ti, ã tỹ vãsỹ nén tó ja ěn ti. Ěg jóg'jóg ag krĕ'krĕ ag mỹ tóg han mũ, ti tỹ vãsỹ nén tó ja ěn ti, Topĕ ti. Hã kỹ tóg Jesus rĩn mãn, ti ter kỹ. Kỹ tóg ti mỹ: “tỹ ã tóg inh kósin jĕ. ũri sóg ã han,” he ja nĩgtĩ, Topĕ ti, Jesus mỹ. Topĕ mỹ jãn jafã ki tóg rán kỹ nĩ, jãn tỹ 2 ki,” he tóg, Paulo ti.

³⁴ “Hã ra tóg ti tỹ ti rĩn mãn ke tó ja nĩgtĩ gé, ti mur ke to hã. Ti vag ke tũ ěn tó ja tóg nĩgtĩ gé, kỹ tóg: “sỹ Davi mỹ nén tó ja ěn ki króm jé sóg ke mũ,” he ja nĩgtĩ. “ãjag mỹ sóg han mũ, sỹ ti mỹ nén tó ja ěn ti,” he ja tóg nĩgtĩ, Topĕ ti,” he tóg, Paulo ti.

³⁵ “Kỹ tóg tag tó ja nĩgtĩ gé: “ã tũ vỹ vag ke tũ nĩ,” he ja tóg nĩgtĩ gé, Topĕ ti,” he tóg, Paulo ti.

³⁶ “Hã ra Davi vỹ ter ja nĩgtĩ, ã jóg'jóg ag nón. Kỹ tóg vag ja nĩ inhhã. Topĕ tỹ ti mỹ nén tó jan ki króm ja tóg nĩgtĩ, Davi ti. Ā mré ke ag mỹ tóg han, Topĕ tỹ ti mỹ nén tó ja ti. Hã ra tóg ter kỹ vag ja nĩgtĩ inhhã, Davi ti. ³⁷ Ti jãvo tóg vag ja tũ nĩ inhhã, Jesus ti, Topĕ tỹ ti rĩn mãn kỹ,” he tóg, Paulo ti.

³⁸ “Ha vé, inh kanhkã',” he tóg. “Jesus tag tigrĩn Topĕ vỹ ãjag mỹ vĕnh pãte fón sór mũ, ãjag tỹ ti vĩ mranh ja ti. Hã kỹ sóg ãjag mỹ tó mũ,” he tóg. ³⁹ “ãjag tỹ Moisés vĩ mĕg mũ ra ãjag jykre tóg kuryj ja tũ nĩ ver. ãjag tỹ hã ra Jesus ki ge kỹ tóg ke mũ sir, Topĕ ti. ãjag kugrynh tóg mũ sir. ⁴⁰ Hã ra ti to é he tũg nĩ. Ke tũ nĩ mũ ra ãjag tóg venh ke mũ, vãsỹ nén rán kỹ nĩ ěn ti, Topĕ vĩ tó tĩ tỹ nén tó ěn ti, ⁴¹ hã vỹ: “iso ãjag tóg é he mũ (mỹr),” he mũ. “Sỹ nén han ke ve jé ãjag tóg ke mũ, kỹ ãjag kanĕ jur ke mũ, ãjag fe tóg jũrũn kenh ke mũ gé,” he ja tóg nĩgtĩ, Topĕ ti. “ãjag tỹ kri finh ke tũ vĕ vĕ, ũ tỹ ãjag mỹ tó mũ ra. Hã ra ãjag tóg venh ke mũ,” he ja tóg nĩgtĩ, Topĕ vĩ tó tĩ ti,” he tóg, Paulo ti.

⁴² Ag tỹ Paulo vĩ mĕ kãn kỹ ag tóg ĩn ěn kătã pa mũ. ĩn kătã pa kỹ ag tóg ti mỹ: “vĕnh kãn ke kurã ũ tá ěg mỹ kãmén mãn nĩ,” he mũ. ⁴³ Kỹ Israel tỹ hĕn ri ke ag tóg Paulo ag nón mũ mũ. Fóg ag tóg ag nón mũ mũ gé, fóg tỹ Israel jykre han mũ ag, ũ tỹ Topĕ kamĕg mũ ag. Kỹ Paulo ag tóg ag jyvĕn mũ, ag tỹ Topĕ to jykren kỹ nỹtĩ jé, ag tỹ ti tỹ ěg jagãgtãn to jykren kỹ nỹtĩ jé.

⁴⁴ Vēnhkán ke kurā ū tá cidade ên tá ke kar ag vỹ vēnh mǎn mǔ, Topē vỹ jēmē jé. ⁴⁵ Kỹ Israel ag tóg ũn e ên véng mǔ. Kỹ ag tóg jũgĩũ mǔ, vēnh kar tỹ Paulo ag to há nỹtĩn kỹ. Hã kỹ ag tóg Paulo vỹ kafǎn mǔ sir, ti tỹ ag mỹ Topē vỹ tón kỹ. Ti to ag tóg vỹ vỹ he mǔ gé.

⁴⁶ Hã ra Paulo ag tóg ag kamēg tũ nĩ. Ag mỹ ag tóg: “ājag hã mỹ ěg tóg tó vén, Topē vỹ ti,” he mǔ, “ti tỹ ěg mỹ: Israel ag mỹ tó vén, hen kỹ. Hã ra ājag tóg mē jāvǎnh nỹtĩ,” he ag tóg. “Ěg rĩr krỹg ja tũ venh ke tũ ājag nĩ, ājag tỹ mē jāvǎnh nỹtĩn kỹ,” he ag tóg. “Hã kỹ ěg tóg sir fóg ag hã mỹ tónh ke mǔ, Topē vỹ ti,” he ag tóg. ⁴⁷ “Topē vỹ ěg mỹ: “ājag tỹ sóg néj gru ri ke han mǔ,” he mǔ, “fóg kar ag tỹ ājag ki Topē ve jé, kanhgág ag ke gé. Ājag ki ag tóg mēnh ke mǔ, Jesus tỹ ag krenkren han ke ti, ga fyn ja mĩ hã,” he ja tóg nĩ ěg mỹ, Topē ti,” he ag tóg, Paulo ag.

⁴⁸ Fóg ag tỹ tag mē kỹ tóg ag mỹ sér tĩ sir. Kỹ ag tóg Topē vỹ to há nỹtĩ, ti mỹ vỹ há han kỹ. Kỹ ag tóg Jesus ki ge mǔ, Topē tỹ ũn kuprēg mǔ ag, ag tỹ ěg rĩr krỹg ja tũ ve jé. ⁴⁹ Kỹ ga ên tá ke kar ag vỹ Topē vỹ jēmēg mǔ.

⁵⁰ Hã ra Israel ag tóg ũn tǎtá há ũ fag mré vỹ mǔ, fóg tỹ Israel jykre han mǔ fag. Pǎ'i ag mré ag tóg vỹ mǔ gé. Paulo ag kato ag tóg vỹ mǔ. Kỹ ag tóg ag vóg kónǎn mǔ. “Ha mǔ jēg, ěmǎ ũ ra,” he ag tóg mǔ sir, ag vóg kónǎn kar kỹ.

⁵¹ Kỹ Paulo ag tóg ājag pēn kykũnhkũnh mǔ, ag mỹ: “Topē tovǎnh ājag huri,” he jé. Kỹ ag tóg cidade tỹ Icônio ra mǔ mǔ sir. ⁵² Jesus mré mǔ ag mỹ tóg hã ra sér tĩ. Topē kuprĩg vỹ tỹ ag jagrē nĩ, kỹ tóg ag mỹ sér tĩ sir.

14

Cidade tỹ Icônio tá Topē vỹ tó

¹ Ag tỹ cidade tỹ Icônio tá junjun kỹ ag tóg sir Israel tỹ vēnh kanhrǎn jafǎ kǎra ge mǔ. Kỹ ag tóg ag mỹ Topē vỹ kǎmén mǔ. Kỹ Israel tỹ hēn ri ke ag tóg Jesus ki ge mǔ gé, fóg tỹ hēn ri ke ag ke gé, ũ tỹ Grego vỹ tó mǔ ên ag. ² Kỹ Israel ag tóg, ũ tỹ Jesus ki ge jāvǎnh ag tóg fóg ag krĩn kónǎn mǔ sir, Jesus mré ke ag to.

³ Hã ra Paulo ag tóg tá nỹtĩ mág han mǔ. Kỹ ag tóg Topē vỹ tó mǔ, ag tỹ ag kamēg tũ nĩn kỹ, Topē vỹ kri fi kỹ. Kỹ Topē tóg ag mỹ ã jykre fig mǔ, ag tỹ ěg tỹ nén han vǎnh hyn han jé. Hã kỹ vēnh kar tóg Topē jykre ki kanhró nỹtĩ sir.

⁴ Kỹ vēnh kar tóg vēnh kǎpugpóv kỹ nỹtĩ nĩ. ũ ag tóg Israel ag to há nỹtĩ, jó ũ ag tóg Jesus tỹ ũn vin mǔ ag tó há nỹtĩ. ⁵ Kỹ Israel ag tóg fóg ag mré jykrén mǔ, fóg tỹ pǎ'i ag mré, ag tỹ Paulo ag vóg kónǎn jé, ag tỹ pó tỹ ag pin jé. ⁶ Kỹ Paulo ag tóg jēmēg mǔ, kỹ ag tóg cidade ũ ra mǔ mǔ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nỹtĩ, cidade tag ti. ⁷ Cidade ên mĩ mũn kỹ ag tóg tá Jesus vỹ há tugtó mǔ sir.

Ag tỹ cidade tỹ Listra tá Paulo vóg kónǎn

⁸ Cidade tỹ Listra tá ke ũ tóg nĩ nĩ, ũn tĩg vǎnh. Ti pēn vỹ grĩ nỹtĩ. Ge pē tóg nĩ, ã mur mũn kǎ. Pēn krój tóg nĩ.

⁹ Ěn tóg sir Paulo vỹ mēg mǔ. Kỹ Paulo tóg ti tugnỹm mǔ. Kỹ tóg ti tỹ Jesus vỹ kri fig mǔ véng mǔ, Jesus tỹ ti tỹ há' he jé. ¹⁰ Kỹ tóg jamǎ hár(a) ti mỹ ke mǔ, kỹ tóg: “jēg nē ra,” he mǔ. “Vēnhrǎ hã jēg,” he tóg ti mỹ, Paulo ti. Kỹ tóg vǎhǎ hũm he mǔ. Kỹ tóg mĩ tĩ mǔ.

¹¹ Kỹ tóg vēnh kar ên mỹ e tĩ, ag tỹ Paulo tỹ nén han mǔ ven kỹ. Kỹ ag tóg ājag vỹ ki jagnē mỹ ke mǔ, vỹ tỹ Licaônia he mũn ki. Jamǎ hár(a) ag tóg: “topē ag vỹ ěg tá junjun,” he mǔ. “Ěg ri ke ag nỹtĩ, topē ag, kỹ ag tóg ěg tá re mǔ,” he ag tóg, Paulo ag to. ¹² Kỹ ag tóg Barnabé to: Júpiter, he mǔ. Paulo to ag tóg: Mercúrio, he mǔ sir, ti vỹ mág to. Ón kỹ ag topē jygi vē, hã vỹ: Júpiter, Mercúrio, he mǔ.

Hã ra Paulo ag tóg ag vỹ ki kagtĩg nỹtĩ.

¹³ Júpiter jo ĩn vỹ cidade fyr tá jē nĩ, kỹ ti tũ ki rĩr tĩ tóg tá nĩ gé. Kỹ tóg monh gé(g) tĩ mǔ, ka fej tỹ coroa ke gé, Júpiter tũ ki rĩr tĩ ên ti. Cidade to ró jǎnkǎ mǎra tóg gé(g) tĩ mǔ. Tá tóg monh kugprũn sór mǔ, Barnabé mỹ, Paulo mỹ ke gé. Ón kỹ ag tóg Paulo ag to: “topē ag vē,” he mǔ, hã kỹ ag tóg ag mỹ monh kuprũn sór mǔ, tá ke kar ên ag.

¹⁴ Hã ra Paulo ag tóg mēg mū, kŷ ag tóg ājag kur janjān mū, jūgŷū kŷ. Ū tŷ vēnh mǎn kŷ nŷtī ag to ag tóg pétē mū. Prēr kŷ ag tóg ag mŷ: ¹⁵ “ne nē?” he mū. “Tŷ ěg ěprā ke nŷtī, ājag ri ke,” he ag tóg. “Hã ra ěg tóg ājag mŷ kāmén sór mū, ājag tŷ ón kŷ topē tag ag tovānh jé. Topē pē ki gemnī, ūn rīr mūn ki. Kanhkā han tóg, ga ke gé, goj ke gé, mí mū kar ěn ke gé, Topē ti,” he ag tóg. ¹⁶ “Vāsŷ Topē tóg nação ag mŷ nén ū tó ja tū nīgtī, kŷ ag tóg ājag jykre mī mūgtī. ¹⁷ Ge ra tóg ag ki rīr há han mū, Topē ti, ag tŷ tag to vāhā ti ki kanhrān jé. Hã jé tóg ta jēnē, kŷ ājag jakré tóg mogmog mū. Kŷ ājag tóg konh ke mū. Kŷ ājag fe tóg há’ he mū sir. Ājag mŷ tóg sér tī sir, ti tŷ ājag mŷ vējēn han kŷ, Topē ti,” he ag tóg, Paulo ag.

¹⁸ Ag vī ki ag tóg ag mŷ nén ū kugprūn tovānh mū, Paulo ag mŷ, vēnh kar ěn ag. Hã ra ag tóg ag mŷ nén ū kugprūn kren ja nīgtī, tá.

¹⁹ Kar kŷ cidade tŷ Antioquia tá ke ag tóg tá junjun mū, cidade tŷ Icônio tá ke ag ke gé. Israel ag vē, tá junjun mū ag. ěn ag vēnh kar krīn kónān mū, kŷ ag tóg Paulo pin mū, pó tŷ. “Ter ti huri,” he ag tóg mū sir, ti pin kar kŷ. Kŷ ag tóg ti raran mū sir. Cidade fyr tá ag tóg ti raran kŷ ti fón mū sir. ²⁰ Kŷ Jesus mré mū ag tóg ti venh kāmū mū, hã ra tóg jēg nē mū, Paulo ti. Cidade kāra tóg rā mū.

Tŷ vaj kŷ tóg hã ra cidade tŷ Derbe ra tī mū, Barnabé mré. ²¹ Tá ag tóg Jesus kāme há tó mū gé, Derbe tá. Kŷ ū tŷ hēn ri ke ag tóg Jesus ki ge mū sir.

Paulo ag tŷ cidade tŷ Antioquia ra vŷnvŷn ke

Kar kŷ ag tóg cidade tŷ Listra ra vŷnvŷn ke mū, cidade tŷ Icônio ra ke gé, cidade tŷ Antioquia ra ke gé, Paulo ag. ²² Vŷnvŷn ke ki ag tóg Jesus mré mū ag jyvēn mū sir, ag tŷ Jesus vī kri fi to krónh ke tū nīn jé, ag tŷ to fe tar nīn jé ke gé. “Ěg tŷ Topē tŷ tŷ ěg pǎi nī ve sór nŷtīn kŷ ěg tóg ti venh ke jo vēnh jagāgtar jagy venh ke mū,” he ag tóg, Jesus ki ge kŷ nŷtī ag mŷ, Paulo ag. ²³ Kŷ ag tóg ag mŷ kófa ag kuprēg mū, ag tŷ Jesus ki ge kŷ nŷtī ag ki rīr jé, ū tŷ Topē vī mē jé vēnh mǎn tī ag ki. Ag to ag tóg Topē mré vī mū gé, nén ū ko tū nīn kŷ. Kŷ ag tóg: “Topē vŷ ājag ki rīr há han mū,” he mū. Kŷ ag tóg mū mū sir. ²⁴ Kŷ ag tóg ga tŷ Pisídia fīn pa mū. Ga tŷ Panfília tá ag tóg junjun mū. ²⁵ Cidade tŷ Perge tá ag tóg Topē vī tó mū gé sir. Kar kŷ ag tóg cidade tŷ Atália ra mū mū. ²⁶ Tá junjun kŷ ag tóg cidade tŷ Antioquia ra mū mū gé, canoa mág kāmī. Antioquia ěn tá ag tóg pa ja nī (mŷr). Tá ke ag tóg ag to Topē mré vī ja nīgtī, ti tŷ ag jy nīgān jé, ag tŷ ti rānhraj han kŷ. Vēnh rānhraj ěn han kǎn ag tóg mū (mŷr) sir, kŷ ag tóg Antioquia ra vŷnvŷn ke mū. ²⁷ Tá junjun kŷ ag tóg Jesus ki ge mū kar jé prēr mū, ag tŷ vēnh mǎn jé. Kŷ ag tóg ag mŷ Topē tŷ nén han mū kar kāmén mū. “Fóg ag ne tóg Jesus ki ge mū gé, Topē tŷ ag krīn kŷ,” he ag tóg mū ag mŷ.

²⁸ Kŷ ag tóg tá nŷtī, kŷsā tŷ hēn ri ke ki. Jesus mré mū ag mré ag tóg nŷtīgtī.

15

Ag tŷ Topē jykre to jykren

¹ Kejēn Judéia tá ke ū ag tóg tá junjun mū, Antioquia tá. Tá junjun kŷ ag tóg Jesus mré ke ag mŷ kāmén mū, kŷ ag tóg: “ājag gré junun fār kym nī,” he mū. “Moisés tŷ ěg mŷ nén tó mū ěn han nī. Ke tū nī mū ra ājag tóg krenkren ke tū nī,” he ag tóg.

² Hã ra Paulo ag tóg: “ke tū vē,” he mū. Kŷ ag tóg jagnē vī kafān mū sir. Kŷ Jesus mré ke kar ag tóg Paulo ag mŷ ke mū, ag tŷ Jerusalém ra mū jé. “Tag ag mré mūmnī, Jerusalém ra,” he ag tóg. “Tá Jesus tŷ ūn vin mū ag mré vīmnī, kófa ag mré. Ag mŷ: ěg hŷn hē ri kenh mū, vēnh gré junun fār kym ke to? hemnī,” he ag tóg.

³ Kŷ Paulo ag tóg: “ěg mūnh ke nē ha,” he mū. Jesus ki ge kŷ nŷtī ag tóg ag mré mū sī han, kŷ ag tóg mū mū. Kŷ ag tóg ga tŷ Fenícia fīn pa mū sir, ga tŷ Samaria fīn ke gé. Ag mūn kŷ ag tóg Jesus mré ke kar ag mŷ fóg ag kāmén mū, fóg ag tŷ Jesus ki ge mū ag. Kŷ tóg vēnh kar mŷ sér tī sir. ⁴ Hã kŷ ag tóg Jerusalém tá junjun mū. Kŷ tá Jesus ki ge kŷ nŷtī ag tóg vēnh mǎn mū, Jesus tŷ ūn vin mū ag mré hã, kófa ag mré hã. Kŷ ag tóg ag mŷ Topē tŷ nén han mū kar tugtó mū.

⁵ Hã ra Fariseu ù ag tóg tá nýtĩ gé, ù tỹ Jesus ki ge mũ ag. Ĕn ag tóg ag mỹ ke mũ. “Ĕg mỹ tóg há tĩ, ag tỹ ãjag gré junun fár kym kym ken kỹ,” he ag tóg mũ, fóg ag to. “Ag tỹ Moisés tỹ ěg mỹ vĕnh jykre nĩm ja ki kanhrãn kỹ tóg ěg mỹ há tĩ,” he ag tóg mũ sir, Fariseu ag, fóg ag to, ù tỹ Israel jykre han tũ ag to.

⁶ Kỹ vãhã Jesus tỹ ùn vin mũ ag vỹ kófa ag mré vĕnh mãn mũ, vyr mỹ, to vĕmén jé. ⁷ Kỹ ag tóg to vĕmén mág han mũ sir. Kỹ kejĕn Pedro tóg jĕg nĕ kỹ ag mỹ: “inh kanhkã’,” he mũ. “Vãsỹ Topĕ tóg inh kuprĕg ja nĩ, isỹ fóg ag mỹ Jesus vĩ há tó jé, ag tỹ jĕmĕ kỹ krenkren jé,” he tóg. “Tag ki kanhró ãjag tóg nýtĩ,” he tóg. ⁸ “Kỹ Topĕ tóg ag mỹ ã kuprĩg jĕnĕg mũ. Ag fe ki kanhró tóg nĩ, Topĕ ti, kỹ tóg ag mỹ ti jĕnĕg mũ. Hã ki tóg ěg mỹ ven mũ, ag tỹ Jesus ki ge kỹ nýtĩ ti, ěg ri kén,” he tóg. ⁹ “Hã kỹ Topĕ tóg ag to: vyr mỹ ke ag vĕ, he tũ nĩgtĩ. Ag tỹ ti ki ge kỹ nýtĩn kỹ tóg ag fe tỹ jãnhkri’ he mũ, fóg ag fe tỹ,” he tóg. ¹⁰ “Topĕ tỹ há vĕ (mỹr). To: vĕnhmỹ ti nĩ, he tũg nĩ,” he tóg. “Ag mỹ ãjag tóg vĕnh jykre jagy ěn fi sór mũ, ti tỹ ěg mỹ han jagy ja ra. Ĕg jóg’jóg ag mỹ tóg han jagy ja nĩ, kỹ tóg ag mỹ ag tỹ ki króm tũ nĩnh ha mĕ tóg tĩ, ěg mỹ ke gé. Hã ra ãjag tóg ag mỹ fi sór mũ,” he tóg. ¹¹ “Ke tũg nĩ. Jesus tỹ ěg jagãgtãn kỹ tóg ěg kren han mũ, ěg tỹ ti vĩ kri fi kỹ. Kỹ ěg tóg ag ri ke tãvĩ nýtĩ,” he tóg, Pedro ti.

¹² Kỹ vĕnh kar ag tóg ěmĕ kỹ nýtĩ nĩ. Kỹ ag tóg Barnabé tỹ ag mỹ nĕn tó mũ mĕg mũ, Paulo tỹ ag mỹ nĕn kãmĕn ti ke gé. Ag tỹ ěg tỹ nĕn han vãnh hyn han mũ tó ag tóg mũ gé. Ag tỹ Topĕ jykre ki fóg ag mỹ nĕn hyn han mũ tó ag tóg mũ gé sir.

¹³ Ag tỹ tó kãn kỹ Tiago tóg sir ag mỹ: “ha mĕ, inh kanhkã’,” he mũ. ¹⁴ “Simão vỹ ěg mỹ tó ja nĩ, Topĕ tỹ nĕn han ve ti, Simão tỹ fóg ag mỹ Topĕ vĩ tó ve ti. Kỹ ag tóg tỹ Topĕ tũ nýtĩ sir, fóg tỹ ti vĩ mĕg mũ ag. Jesus mré ke vỹ tỹ ag nýtĩ, ag tỹ ti ki ge kỹ nýtĩn kỹ. ¹⁵ Hã ra tóg vãsỹ rán kỹ nĩ. Topĕ vĩ tó tĩ tóg tag rán ja nĩgtĩ, ha mĕ: ¹⁶ “kãtig jé sóg ke mũ, he tóg, Topĕ ti. Davi krĕm Israel ag tóg e pĕ ja nýtĩ ja nĩgtĩ. Hã ra Davi jykre tóg tũ’ he mũ. Kỹ tóg ĩn vag ri ke nĩ sir. ĩn tãg han jé sóg ke mũ, hã vỹ: Davi krĕ’krĕ ù vỹ tỹ pã’i nĩnh mãn mũ, he mũ. Isỹ han ken hã vĕ. ¹⁷ Ti tỹ sóg ùn mág pĕ han ke mũ, povo kar kãmĩ ke ag tỹ inh ki ge sór jé, fóg kar kãmĩ ke ag tỹ isũ nýtĩ jé, kanhgág kar kãmĩ ke ag ke gé, isỹ ùn kuprĕg mũ ag, he tóg. ¹⁸ Topĕ tỹ tón hã vĕ. ù tỹ vãsỹ tag kãmĕn mũ tỹ tón hã vĕ,” he tóg, Topĕ vĩ tó tĩ ti. Hã kỹ ěg tóg tag ki kanhró tãvĩ nýtĩ,” he tóg, Tiago ti.

¹⁹ “Isỹ nĕn to jykrĕn hã vĕ, ěg tỹ ag mỹ ěg jykre jagy ěn tó tũ nĩn jé, ù tỹ fóg kar kãmĩ Topĕ jykre han sór mũ ag mỹ, kanhgág ag mỹ ke gé,” he tóg. ²⁰ “Ĕg tỹ ag mỹ tónh ke, ha mĕ: vĕnh kãggrã to festa ko tũg nĩ, ã prũ tũ fi mré nỹ tũg nĩ, nĕn ù tỹ vĕsókĩ ter mũ ko tũg nĩ, nĕn ù kyvĕnh ko tũg nĩ gé,” he tóg, Tiago ti. ²¹ “Moisés jykre tugtó ag tóg tĩ, ěg mré Israel ag, cidade kar ki. Vĕnh kãn ke kurã ki ag tóg ti tỹ rán mũ to ke tĩ. Vãsỹ ag tóg ke ja nýtĩ, kỹ ag tóg ùri ke tãvĩ tĩ gé,” he tóg. “Hã kỹ ù tỹ han sór mũ tóg han tĩ, Moisés jykre ti,” he tóg, Tiago ti.

Apóstolo ag tỹ carta rán mũ

²² Kỹ Jesus tỹ ùn vin mũ ag tóg to jykrĕn mũ, kófa ag ke gé, Jesus ki ge mũ ag kar ke gé, ù tỹ Topĕ vĩ mĕ jé vĕnh mãn tĩ ag. Kỹ ag tóg ù ag kuprĕg mũ, ag tỹ Antioquia ra mũ jé, Paulo mré, Barnabé mré. Ag tỹ ùn kuprĕg mũ ag hã vĕ, hã vỹ: Judas, he mũ, ti jiji ù hã vỹ: Barsabás, he mũ. Silas kuprĕg ag tóg mũ gé. Ĕn ag tóg tỹ Jesus mré ke ag pã’i nýtĩ.

²³ Ag mỹ ag tóg vĕnh rán nĩm mũ gé. Ag tỹ rán hã vĕ, ha mĕ:

“Jesus tỹ ùn vin mũ ag tỹ rán hã vĕ, kófa ag tỹ rán ke gé, Jesus mré ke ag. Ĕg tỹ cidade tỹ Antioquia tá ke ag mỹ rán hã vĕ, fóg tỹ Jesus mré ke ag mỹ, ga tỹ Síria tá ke ag mỹ, ga tỹ Cilícia tá ke ag mỹ ke gé. Ājag mỹ há?

²⁴ Ĕg kã ù ag tỹ ãjag tá junjun mĕ ěg tóg. Ājag krĩn ù han ag tóg mũ, kỹ ãjag krĩ tóg kufy’ he mũ. Hã ra ěg tóg ag mỹ: ha vĕnh jykre tag tó, he ja tũ nĩgtĩ. ²⁵ Kỹ ěg tóg vĕnh mãn, ěg tỹ to jykrĕn jé. Kỹ ěg kar tóg to jykrĕn kỹ tag ag kuprĕg, ěg tỹ ãjag to ag jĕgnĕ jé, ag tỹ Barnabé mré mũ jé, Paulo mré. Ag to ěg há tãvĩ nýtĩ, Barnabé to, Paulo to ke gé. ²⁶ Ag hã ne tóg fe tũmĕ nýtĩgtĩ’, fe tar kamĕ ag nýtĩgtĩ’. Kỹ ag tóg ěg Senhor tỹ Jesus

Cristo vī tó mūgtī, ũ tỹ hēn ri ke tỹ ag tén sór mū hā ra. ²⁷ Ēg tỹ ag to há nỹtĩn kỹ ěg tóg Judas jēnēg mū, Silas ke gé, ag tỹ ājag mỹ ěg tỹ rán mū tag ti kāmén jé.

²⁸ Topē kuprīg vỹ ěg mỹ tó, kỹ tóg ěg mỹ há tĩ gé, ěg tỹ ājag mỹ vēnh jykre jagy ěn fig tũ nĩn jé. Tag hā han jé ājag tóg ke mū, ha mē: ²⁹ vēnh kăgrá to festa ko tũg nĩ, nén ũ kyvēnh ko tũg nĩ gé. Nén ũ tỹ vēsóg ki ter mū ěn ko tũg nĩ gé. Ājag prũ tũ fag mré nỹ tũg nĩ gé. Ājag tỹ tag ki króm kỹ tóg há tĩ. Jatun mỹ nỹtĩmnĩ.” Vēnhrán hā vē.

³⁰ Kỹ ag tóg ag mỹ: “ha mū jēg ge,” he mū. Kỹ ag tóg mū kỹ Antioquia tá junjun mū. Tá ag tóg vēnh kar jé prēr mū. Jesus ki ge mū kar jé ag tóg prēr mū sir, ag tỹ to vēnh măn jé. Kỹ ag tóg ag mỹ vēnh rán ěn nĩm mū. ³¹ Kỹ ag tóg to ke mū, vēnh rán to. Kỹ tóg ag mỹ há tĩ, ag tỹ vēnh jyvēn rá ěn ven kỹ. Kỹ ag krĩ tóg kănhvy' he mū sir.

³² Kỹ Judas vỹ Silas mré vēnh kar jyvēn mū gé. Topē vī tó tĩ ag vē. Hā kỹ ag tóg ag jyvēn tỹ hēn ri ke han mū. Ag fe tỹ ag tóg tar' he mū. ³³ Tá ag tóg semana tỹ hēn ri ke han mū. Kỹ Jesus mré ke ag tóg ag mỹ: “ha jatun mỹ mū jēg,” he mū, ag tỹ Jerusalém ra vỹnvỹn ke jé, ũ tỹ ājag jēgnēg mū ěn to. ³⁴ Hā ra tóg Silas mỹ há nĩ, kỹ tóg tá nĩ nĩ sir, tĩ tũ tóg nĩ sir.

³⁵ Kỹ Paulo tóg Barnabé mré Antioquia tá nĩ nĩ. Topē vī tỹ ag tóg ag kanhrān mū, kāmén kỹ. Hā ra ũ tỹ hēn ri ke ag tóg ag ri kén Topē vī tó mū gé.

Paulo tỹ ā pir mỹ tīg, Barnabé tỹ ā pir mỹ tīg

³⁶ Si há tũ ra Paulo tóg Barnabé mỹ: “mū nỹ, ěg tỹ ěmā ěn kar mĩ mū măn jé, ěg tỹ Jesus vī tó ja tá,” he mū. “Isỹ Jesus mré ke ag venh há tóg tĩ. Ag mỹ hēn ri ke mũn mū há han mū vỹ? he sóg tĩ,” he tóg, Paulo ti, Barnabé mỹ.

³⁷ Kỹ Barnabé tóg João Marcos pére tīg sór mū. ³⁸ Hā ra Paulo mỹ tóg kórég nĩ, Marcos tỹ ag ré kỹ tīg ja nĩn kỹ, ga tỹ Panfília tá. “Ū tỹ ěg mré Topē rānhraj han ja tũ ěn pére sóg tīg măn ke tũ nĩ ha,” he tóg, Paulo ti.

³⁹ Hā to ag tóg jagnē to jũgiũ mū. Kỹ ag tóg vēnh kăpugpóv kỹ mū mū. Kỹ Barnabé tóg Marcos mré goj vāso tỹ Chipre ra tĩ mū, canoa mág kāmĩ.

⁴⁰ Jó Paulo tóg Silas kuprēg mū, ti tỹ ti mré tīg jé. Kỹ tóg tĩ mū sir. Jesus mré ke ag tóg Paulo to Topē mré vī mū, ti tỹ ti jy nĩgān jé. ⁴¹ Kỹ ag tóg ga tỹ Síria mĩ pa mū, ga tỹ Cilícia mĩ ke gé. Jesus ki ge mū kar jyvēn tóg mū, ā tīg kỹ, Paulo ti.

16

Timóteo tỹ Paulo mré tīg

¹ Kỹ Paulo ag tóg cidade tỹ Derbe tá junjun mū, cidade tỹ Listra tá ke gé. Kỹ tá ũ tóg nĩ nĩ, Jesus mré tĩ ũ, ti jyjy hā vỹ: Timóteo, he mū. Ti mỹnh fi ne tóg tỹ Israel nĩ', hā ra fi tóg Jesus ki rā ja nĩgtĩ. Ti panh tóg tỹ fóg tỹ Grego nĩ, Timóteo panh ti.

² Ti to ag tóg vī há han mū, Jesus mré ka ag, Listra tá ke ag, Icônio tá ke ag ke gé, Timóteo to. ³ Kỹ Paulo tóg ti pére tīg sór mū, kỹ tóg ti gré junun fár kym mū, Israel ag tugrĩn. Vēnh kar tóg ti panh tỹ tỹ fóg tỹ Grego nĩ ki kanhró nỹtĩ, hā kỹ tóg ti fár kym ja tũ nĩ. Hā ra ag tỹ ra mũnh ke tá ag tóg e nỹtĩ, Israel ag, hā kỹ Paulo tóg ti fár kym mū sir.

⁴ Kỹ ag tóg cidade ěn mĩ mū mū. Kỹ ag tóg ag mỹ Jesus tỹ ũn vin mū ag tỹ rá kāmén mū sir, kófa ag tỹ Jerusalém tá nén rán ja ti, Jesus mré ke ag mỹ. Ag tỹ nén ki króm ke hā tỹ ag tóg ag mỹ kāmén mū. ⁵ Hā kỹ Jesus ki ge mū ag tóg tar nỹtĩ sir, Jesus jyken ki. Vēnh măn ag tóg tĩ, ag tỹ Topē vī mē jé. E ag tóg nĩgtĩ sir, komē hā.

Paulo tỹ nén nē vég mū

⁶ Kỹ Paulo ag tóg ga tỹ Frígia mĩ pa mū, ga tỹ Galácia mĩ ke gé. Kỹ ag tóg ga tỹ Ásia tá Topē vī tó sór mū, hā ra Topē kuprīg tóg ag mỹn nenh mū. ⁷ Kỹ ag tóg ga tỹ Mísia tá junjun mū. Kỹ ag tóg ga tỹ Bitínia ra mū sór mū, hā ra Topē kuprīg tóg ag mỹn nenh mū gé. ⁸ Kỹ ag tóg Mísia jy mū kỹ cidade tỹ Trôade tá junjun mū. ⁹ Kỹ kutyg kỹ Paulo tóg nén nē vég mū. Ga tỹ Macedônia tá ke vég tóg mū, ti vēnhpéti ki. Kỹ tóg ti jo jē nĩ. Kỹ tóg ti mỹ: “Macedônia to kătīg, ěg kanhrān jé,” he mū ti mỹ, ga tỹ Macedônia tá ke ěn ti. Kỹ Paulo tóg rĩr mū sir.

¹⁰ Paulo tỹ nén nē ěn ve kar kỹ ěg tóg vēsỹmér Macedônia ra mũ sór mũ sir. “Jesus hỹn ěg mỹ: ha mũ jěg, hé,” he ěg tóg. “Ag mỹ inh vĩn tó, he ti hỹn, Jesus ti,” he ěg tóg, Paulo tỹ nén nē ěn ve kỹ. ¹¹ Kỹ ěg tóg cidade tỹ Trôade ki pa mũ. Vēsỹmér ěg tóg goj vāso tỹ Samotrácia ra mũ mũ. Tỹ vaj kỹ ěg tóg cidade tỹ Neápolis ra mũ mũ. ¹² Tá pa kỹ ěg tóg cidade tỹ Filipos ra mũ mũ. Ga tỹ Macedônia ki cidade ve vĕ. ěg tỹ tá junjun vén jan hã vĕ. Fóg tỹ Romano ag jamã ũ vĕ. Tá ěg tóg kurã e sĩ ki nỹtĩ nĩ.

Lídia fi tỹ Jesus ki rã

¹³ Vĕnh kán ke kurã ki ěg tóg cidade to ró mãra mũ mũ, goj ra. “Tán hỹn Topĕ mré vĩ jafã nĩ,” he ěg tóg. Tá ěg tóg nĩgnĩ mũ sir. Ũn tátã fag tóg tá nỹtĩ nĩ, kỹ ěg tóg fag mré vĩ mũ.

¹⁴ Tá ũ fi tóg nĩ nĩ, fi jiji hã vỹ: Lídia, he mũ. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topĕ kamĕg fi tóg tĩ. ěn fi vỹ Paulo vĩ mĕg mũ sir. Kỹ Topĕ tóg fi mỹ krĩ há nĩm mũ, kỹ fi tóg Paulo vĩ jĕmĕ há han mũ. ¹⁵ Kỹ ěg tóg fi kypég mũ, fi mré ke kar mré hã. Kỹ fi tóg ěg mỹ: “isỹ Jesus ki rã kỹ jĕ ve ājag (mỹr),” he mũ. “Ti tỹ ājag mỹ gen kỹ inh ĩn ki gemnĩ,” he fi tóg. “Tá inh mré nỹtĩmnĩ,” he fi tóg. Vĩ ki fi tóg ěg kutãn mũ. Kỹ ěg tóg ke mũ.

Paulo ag tỹ Filipos tá se kỹ nỹtĩ

¹⁶ ěg tỹ kejĕn Topĕ mré vĩ jafã ra mũ mãn kỹ ũ fi tóg ěg kato tĕ mũ. Ũ camarada fi vĕ. Hã ra fi tóg jagrĕ kórég nĩ, kỹ fi jagrĕ tóg vĕnh kar mỹ ag tỹ nén venh ke tó tĩ. Fi patrão ag tóg fi tugnĩn jãnkamy mág vĕg tĩ, fi tỹ jãnkamy to vĕnh kar mỹ ag tỹ nén venh ke tón kỹ.

¹⁷ ěn fi vỹ Paulo nón tĩ mũ, ěg nón, kỹ fi tóg jamã hár(a) prĕr mũ, kỹ fi tóg: “Topĕ pĕ camarada ag vĕ (mỹr),” he mũ. “Vĕnh kar kãfór camarada ag vĕ mỹr. Ag hã ne tóg ājag mỹ vĕnh vĩ tó tĩ, ājag tỹ to krenkren jé’,” he fi tóg ěg to. ¹⁸ Kurã tỹ hĕn ri ke han fi tóg, vĩ tỹ ge han kỹ. Kỹ tóg Paulo mỹ tỹ ũ nỹ, kỹ tóg kyrã kỹ fi jagrĕ mỹ: “Jesus Cristo jykre tỹ sóg ā mỹ tó mũ, ā tỹ fi tovãnh jé,” he mũ. Kỹ tóg vēsỹmér fi tovãnh mũ sir, fi jagrĕ kórég ěn ti.

¹⁹ Hã ra fi patrão ag mỹ tóg tỹ ũ nỹ, ag tỹ fi tugrĩn ganho ve mãn tũ nĩn kỹ. Kỹ ag tóg Paulo ség mũ, Silas ke gé. Pã'i ag mỹ ag tóg ag ven mũ, cidade kuju ki. ²⁰ Pã'i ag mỹ ag ven kỹ ag tóg: “Israel tag ag ve ra ha,” he mũ. “Vĕnh kar jũgũ han ag tóg mũ nĩ (mỹr), ěg jamã tag mĩ,” he ag tóg. ²¹ “Vĕnh jykre vĕnhmỹ tó ag tóg mũ (mỹr), ěg tỹ nén han ke tũ tó ag tóg mũ (mỹr). Tỹ ěg tóg Romano nỹtĩ, kỹ ag jykre tóg ěg mỹ tỹ ũ nỹ,” he ag tóg. ²² Povo ěn kar tóg ag to kórég nỹtĩ, kỹ ag tóg ag kato vĩ mũ.

Kỹ pã'i ag tóg polícia ag mỹ: “ag kur nũ ra,” he mũ. “Ag mrãnmrãn ra,” he ag tóg mũ gé. ²³ Ag mrãnmrãn tỹ hĕn ri ke han ag tóg mũ, ka tĕj tỹ. Kar ag tóg vĕse ja kãki ag vãm mũ. Vĕse ja ki rĩr tĩ mỹ ag tóg: “ag nĩgfĕnh há han nĩ, ag tỹ kãpa tũ nĩ jé,” he mũ. ²⁴ Ag tỹ ti mỹ tag tó to tóg vĕse ja kuju tá ag vãm mũ, vĕse ja mág ěn kuju tá. Ka tỹ tóg ag sigség mũ sir.

²⁵ Meia noite ki Paulo tóg Silas mré Topĕ mré vĩ mũ. Ti mỹ ag tóg jãnjãn mũ, Topĕ mỹ. Kỹ vĕse ag kar vỹ jĕmĕg mũ sir. ²⁶ Kỹ vãhã ga tóg jũrũn ke mũ. Vĕse ja krĕm tóg jũrũn ke mũ. Kỹ vēsỹmér jãnkã kar vỹ nognor kãn tĩ mũ, rómróm kãn tóg mũ. Kỹ vĕse ag kar ěn ferro tóg kygvar kãn mũ, ag se ja ti. ²⁷ Kỹ tóg vĕse ja ki rĩr tĩ nũnmãn mũ gé. hã ra vĕse ja jãnkã kar tóg nognor kỹ nỹtĩ nĩ, rómróm kỹ tóg nỹtĩ nĩ. Kỹ ũ tỹ ag ki rĩr tĩ ěn tóg ā kyfé tĕj, ā rógro ěn kunũnh kỹ tóg vĕnh kusón sór mũ. “Vĕse kar ag hỹn vĕnh pigju kãn,” he tóg. Hã kỹ tóg vĕnh kusón sór mũ.

²⁸ Hã ra Paulo tóg jamã hár(a): “ker vĕnh vóg kónãn hĕ’,” he mũ. “ěg kar vỹ ki nỹtĩ,” he tóg.

²⁹ Kỹ tóg néj gru to vĩ mũ, ũ tỹ ag ki rĩr tĩ ěn ti. Kỹ tóg Paulo ag se ja kãra vĕnhvãg rã mũ, jũrũn ke kỹ. Paulo jo tóg mũg ke mũ, Silas jo ke gé, ag tỹ ti mỹ ti kãfór nỹtĩn kỹ. ³⁰ Ag gé(g) tóg tĩ mũ, vĕse ja kãtã kãkutĕ kỹ, kỹ tóg ag mỹ: “inh hỹn hĕ ri kenh mũ vỹ?” he

mũ. “Topě vī mranh sóg, hã ra tóg ti tỹ inh kren han há tĩ,” he tóg, ũ tỹ vëse ja ki rĩr tĩ ãn ti.

³¹ Kĩ ag tóg ti mỹ: “Jesus Cristo ki rã ge,” he mũ. “Kỹ ã tóg kren mũ, ã mré ke kar ag mré hã,” he ag tóg ti mỹ, Paulo ag. ³² Kĩ ag tóg ti mỹ Jesus vī kãmén mũ, ti mré nỹtĩ ag mỹ ke gé. ³³ Kĩ tóg ag ki rĩr mũ vësýmér, kuty ke nỹ ra. Ag tỹ ag mrãnmrãn ja ãn kupég tóg mũ ag mỹ. Kĩ ag tóg vënh kaja jé ti kypég mũ gé, ti mré nỹtĩ ag mré, ag tỹ Jesus ki ge kỹ. ³⁴ Kĩ tóg ã ãn ra ag tatĩn tĩ mũ. Ag jën tóg mũ. Ti fe tóg mrin ke mũ sir, ti tỹ Jesus ki rã kỹ. Ti mré nỹtĩ ag kar mỹ tóg sér tĩ gé sir, ũ tỹ vëse ja ki rĩr tĩ ãn mré ke fag mỹ.

³⁵ Tỹ vaj kỹ pã'i ag tóg polícia ag jëgnëg mũ, ũ tỹ vëse ja ki rĩr tĩ ãn mỹ. “Ën ag mỹ: ha mũ jëg, hemnĩ,” he ag tóg ti mỹ. ³⁶ Kỹ ũ tỹ vëse ja ki rĩr tĩ ãn tóg Paulo mỹ ke mũ. “Pã'i ag vỹ inh mỹ vënh vī jënë, isỹ ãjag mỹ: ha mũ jëg, he jé. Hã kỹ jatun mỹ mũ jëg,” he tóg, Paulo ag mỹ.

³⁷ Kỹ Paulo tóg ti mỹ: “hã ra ag tóg vënh ó to ëg mrãnmrãn ja nĩ,” he mũ. “Vënh kar vỹ ag tỹ ëg mrãnmrãn ve kãn. Hã ra ag tóg ëg ki jëmë ja tũ nĩ, ëg jyvën ja tũ ag nĩ gé. Tỹ ëg Romano nỹtĩ, hã ra ag tóg vëse ja kãki ëg vãm. Jó ag tóg vënh kar vatánh tá ëg mỹ: ha mũ jëg, he sór mũ. Mũnh ke tũ ëg nĩ. Ag hã tóg kãmũnh mũ, pã'i ag. Ëg tatĩ ag tóg mũnh mũ. Kỹ ëg mũnh mũ ha,” he tóg, Paulo ti.

³⁸ Kỹ polícia ag tóg pã'i ag mỹ tag tó mũ sir, kỹ tóg ag mỹ e tĩ. Ag tỹ Romano ũ vóg kónãn ke tũ vë vë, hã kỹ ag fe tóg jürün ke mũ, pã'i ag. ³⁹ “Ëg mỹ vënh pãte fón nĩ, ëg tỹ ãjag se ja ti,” he ag tóg mũ. Kỹ ag tóg ag tatĩ mũ mũ. “Ëjag tỹ ëg jamã ki pa kỹ tóg há tĩ,” he ag tóg mũ sir ag mỹ.

⁴⁰ Ag tỹ vëse ja ki pa kỹ ag tóg Lídia fi ãn ra mũ mũ sir. Jesus mré ke ag vëg ag tóg mũ. Kỹ ag tóg ag jyvën mũ. Kỹ ag tóg cidade ãn ki pa mũ sir.

17

Cidade tỹ Tessalônica tá

¹ Kỹ ag tóg cidade tỹ Anfípõlis mĩ pa mũ, cidade tỹ Apolônica mĩ ke gé. Kỹ ag tóg cidade tỹ Tessalônica tá junjun mũ. Tá Israel tỹ vënh kanhrãn jafã tóg nĩ. ² Kỹ Paulo tóg ã tỹ nén han tĩ ãn han mũ sir. Israel tỹ vënh kanhrãn jafã kãra tóg rã mũ. Ag mré tóg vī mũ, vënh kãn ke kurã tägtũ ki. Topě vī tó tóg mũ sir ag mỹ, Paulo ti, vãsỹ rán kỹ nĩ ãn ti. ³ Ag mỹ tóg Cristo kãmén mũ, ti jagtar ti, ti ter kar rĩr mãn ja ãn ti. “Jesus hã vë, hã vỹ: Cristo, he mũ,” he tóg. “Cristo tóg vãsỹ rán kỹ nĩ, ti jagtar ke ti, ti rĩr mãn ke ti ke gé, hã vỹ: Jesus, he mũ,” he tóg, Paulo ti.

⁴ Kỹ tóg ũ ag mỹ ge nĩ, Israel kãmĩ ũ ag mỹ. Kỹ ag tóg Paulo mré mügtĩ, Silas mré ke gé. Kỹ fóg tỹ Grego he mũ tỹ hën ri ke ag tóg to há nỹtĩ gé sir, ũ tỹ Topě kamëg mũ ag, ãn tãtã há fag ke gé.

⁵ Hã ra Israel ũ ag mỹ tóg tỹ ũ nỹ. Hã kỹ ag tóg ãn kórég ag mỹ: “kãmũ jëg ra,” he mũ, ãn rãnrãj vãn ag mỹ. Vënh génh kỹ ag tóg vënh kar jügjũ han mũ. Kỹ ag tóg Jasão he mũ ãn ãn jy nỹtĩ nĩ sir. Paulo ag kanëg ag tóg mũ, ag jãvãn kỹ, ag tỹ vënh kar jügjũ ãn ag mỹ ag ven jé. ⁶ Hã ra ag tóg ag vëg tũ nĩ, Paulo ag. Kỹ ag tóg Jasão pére mũ mũ, Jesus mré ke ũ ag mré ke gé. Pã'i ag mỹ ag tóg ag vin mũ. Kỹ ag tóg jamã hár(a) prër mũ. “Û tỹ mundo kar ki vënh kar jügjũ han mũ ag tóg tag ki junjun mũ (mỹr),” he ag tóg mũ. ⁷ “Jasão tóg ag mỹ: kãge jëg ra, hé. Hã ra ag kar tóg pã'i mág tỹ imperador vī mranh ja tĩgtĩ. “Vyr mỹ ëg pã'i mág nĩ, hã vỹ: Jesus, he mũ,” he ag tóg. “Kỹ ëg pi(jé) imperador krëm nỹtĩgtĩ,” he ag tóg, Paulo ag,” he ag tóg mũ. Ag tỹ Paulo to ón hã vë, pã'i ag mỹ.

⁸ Kỹ ũ tỹ mëg mũ ag vỹ fe ũ nỹtĩ sir, cidade ãn tá pã'i ũ ag, cidade ãn tá ke kar ag ke gé. ⁹ Kỹ pã'i ag tóg Jasão ag mỹ: “ëg mỹ jãnkamy nĩm ké, ëg tỹ to ve jé, ãjag tỹ imperador kato tënh ke tũ ti,” he ag tóg. Ag tỹ ag mỹ nĩm kar kỹ ag tóg: “ha mũ jëg (ge),” he mũ sir.

Cidade tỹ Beréia tá

¹⁰ Kuty ãn kã Jesus mré ke ag tóg Paulo mỹ: “ha tĩg, cidade tỹ Beréia ra,” he mũ. Silas mỹ ag tóg ke mũ gé. Kỹ ag tóg mũ mũ.

Ag tỹ Beréia tá junjun kỹ ag tóg Israel tỹ vėnh kanhrĀn jafĀ kĀra ge mũ, ag mỹ Topě vỹ tó jé.

¹¹ Beréia tá ke ag tóg jykre há nỹtĩ. Ag pi(jé) Tessalônica tá ke ag ri ke nỹtĩ'. Kỹ ag tóg Paulo ag vỹ kri fig mũ. Ag mỹ tóg há tĩ sir. KurĀ kar ki ag tóg Topě vỹ ki estudar he mũ, ag tỹ to: “ki hĀ tóg tó tĩ,” hen kỹ. ¹² Kỹ ũ tỹ hėn ri ke ag tóg Jesus ki ge mũ, fóg tỹ Grego ag mré hĀ, ũn tĀtá há fag mré hĀ.

¹³ Kỹ Israel ag tóg męg mũ, cidade tỹ Tessalônica tá. Paulo tỹ Beréia tá Topě vỹ tó mũ męg ag tóg mũ sir. Kỹ ag tóg Beréia tá junjun mũ, ag tỹ tá vėnh kar jũgũ han jé. ¹⁴ Kỹ Jesus mré ke ag tóg Paulo mỹ: “hĀ tĩg, canoa mág kĀmĩ,” he mũ. HĀ ra Silas vỹ tĩ tũ nĩ, Timóteo ke gé. Beréia tá ag nỹtĩ. ¹⁵ Kỹ ũ ag tóg Paulo mré mũ mũ. Cidade tỹ Atenas ra ag tóg ti pére mũ mũ. Ag tỹ tá vỹnvỹn kenh ken kỹ Paulo tóg ag mỹ ke mũ, ag tỹ Silas jé prěr jé, ag tỹ Timóteo jé prěr jé ke gé, ag tỹ vėsỹmėr cidade tỹ Atenas kukĀm kĀmũ jé.

Cidade tỹ Atenas tá

¹⁶ Kỹ Paulo tóg Atenas tá nĩ nĩ, Silas jĀvĀnh kỹ, Timóteo jĀvĀnh kỹ ke gé. HĀ ra tóg sir krĩ ũ nĩ, ti tỹ tá vėnh kĀggrá tỹ hėn ri ke ven kỹ, ti tỹ ag tỹ to jĀn jafĀ ěn ven kỹ. ¹⁷ Kỹ tóg Israel tỹ vėnh kanhrĀn jafĀ ki Israel ag mré vỹ mũ, fóg tỹ Israel jykre han mũ ag mré ke gé. KurĀ kar ki tóg cidade kuru tá vėnh kar mré vỹ mũ gé sir, ũ tỹ tá nỹtĩ ag mré.

¹⁸ Kỹ ũ ag tóg ti mré vỹ mũ, ũ tỹ Epicuro tỹ nén rán ja to jykren mũ ag, ũ tỹ Estóico he mũ ag tỹ nén rán ja to jykren mũ ag ke gé. Kỹ ag tóg ti to: “vỹ mĀ pė tóg nĩ, vỹ kamė tóg nĩ,” he mũ. “Ti hỹn tóg ne tó'?” he ag tóg. Kỹ ũ ag tóg ti to: “topě ũ tugtó ti hỹn, kór há tá topě,” he mũ. HĀ ra Paulo tóg Jesus tỹ vėme sér tó mũ. Jesus rĩr mĀn tó tóg mũ, Paulo ti.

¹⁹ Kỹ ag tóg sór tỹ Areópago ra ti pére mũ mũ. Tá pĀ'i ag tóg ag jyvėn tĩ, sór tỹ Areópago tá. Kỹ pĀ'i ag tóg ti mỹ: “Ā tỹ vėnh jykre tag tó mũ kĀmén há han ra ěg mỹ,” he mũ, ti mỹ. ²⁰ “(Ge) mē ja tũ ěg nỹtĩ, Ā tỹ ěg mỹ tó mũ tag ti. Kỹ ěg mỹ kĀmén há han nĩ,” he ag tóg, pĀ'i ag.

²¹ HĀ ra Atenas tá ke ag tóg vėnh vỹ tĀg mē to há nỹtĩ, cidade ũ tá kĀmũ kỹ tá nỹtĩ ag ke gé. Ag tỹ vėnh vỹ tĀg mē kỹ ag fe tóg mrin ke tĩ.

²² Kỹ Paulo tóg sór tỹ Areópago kri jē kỹ ag mỹ: “Atenas tá ke',” he mũ. “Topě tỹ hėn ri ke kamėg Ājag tóg tĩ (mỹr). Tag ve sóg,” he tóg. ²³ “Ājag jamĀ mĩ sóg tĩ, kỹ sóg Ājag tỹ topě jo ĩn kĀsir kar vigvé. Kỹ sóg topě jo ĩn sĩ ũ vé, kỹ tóg to rán kỹ nĩ, hĀ vỹ: ěg tỹ topě ki kagtĩg jo ĩn, he mũ, ti rá ti. Topě ěn tó sóg tĩ, Ājag tỹ Topě ki kagtĩg ěn. Ājag tỹ ti ki kagtĩg nĩ ra Ājag tóg ti mỹ nén ũ kugprũn tĩ,” he tóg.

²⁴ “Topě ěn vỹ mundo kar han, mĩ mũ kar ke gé. KanhkĀ tĀn vė mỹr, kỹ tóg tỹ ga to pĀ'i nĩ gé. HĀ kỹ tóg ěg tỹ ti jo ĩn han krēm nĩ tũ nĩgtĩ (mỹr),” he tóg. ²⁵ “Kỹ ěg tóg ti ki rĩr ke tũ nĩ gé, ti jagtar tũ nĩn kỹ. Vėnh kar rĩn tóg nĩgtĩ (mỹr), Topě ti, kỹ tóg vėnh kar tỹ hĀmhĀm ke han tĩ. Vėnh kar tỹ nén precisar he kar nĩm tóg tĩ (mỹr),” he tóg. ²⁶ “Kỹ tóg vėnh kyvénh pir tỹ ěprĀ ke kar hyn han, naçĀo kar (mỹr), ga kar mĩ mũ mũ ag (mỹr). Tỹ ěg vėnh kyvénh pir nỹtĩ. Kỹ tóg ěg mỹ ěg mur kurĀ nĩm mũ gé, ěg ter kurĀ ti ke gé. ěg mỹ tóg ěg jamĀ nĩm mũ gé, Topě ti,” he tóg. ²⁷ “Vėnh kar hyn han tóg, Topě ti, ěg tỹ ti to há nĩn jé, ěg tỹ ti ki kanhró nỹtĩ jé. Kór gy tũ ti nĩ, ti pi(jé) kuvar gy nĩ'. Kakó ti nĩ, Topě ti,” he tóg. ²⁸ “Ti tỹ ěg han vė mỹr, hĀ kỹ ěg tóg rĩnrĩr nỹtĩ nĩ, ti tugrĩn. Ti tugnĩn ěg tóg mũgtĩ (mỹr), kỹ ěg tóg ti tugrĩn nỹtĩ gé (mỹr), Topě tugrĩn. HĀ kỹ Ājag kĀmĩ vėnhrán tĩ ag tóg tó ja nĩgtĩ gé, kỹ ag tóg: tỹ ěg Topě krē nỹtĩ, he ja nĩgtĩ. ²⁹ ěg tỹ tỹ ti krē nỹtĩn kỹ ěg tóg ti ki kanhró nỹtĩ gé. Ouro ri ke tũ ti nĩ, Topě ti. Ti pi(jé) prata ri ke nĩ'. Ti pi(jé) pó ri ke nĩ'. Ti pi(jé) tỹ vėnh kĀggrá nĩ', retrato ke gé, ti sĩnvĩ ra. ěprĀ ke tỹ nén to jykren mũ ri ke tũ ti nĩ, ěg tỹ nén han mũ ri ke tũ ti nĩ. Topě vė (mỹr), Topě,” he tóg, Paulo ti.

³⁰ “HĀ ra Topě tóg ěg to fe mág mũ, ěg tỹ ti ki kagtĩg nỹtĩn kỹ. HĀ kỹ tóg vĀhĀ vėnh kar mỹ vėnh vỹ jėnėg mũ, ěg tỹ ěg jykre tovĀnh jé. ³¹ KurĀ nĩm tóg huri, kỹ tóg kurĀ ěn ki ěprĀ ke jykre kar tugnỹm ke mũ. KurĀ ěn ki tóg vėnh jykre kuryj han ke mũ inhhĀ, Topě ti, ti tỹ ěg jykre tugnỹm ke mũn kỹ. ũn pir kuprėg tóg, ti tỹ ti jagfy ěg kar jykre tugnỹm

jé. Ēn tóg ter ja nĩ, hã ra Topê tóg ti ter kÿ ti rĩn mãn ja nĩ, ěg tÿ ti ki kanhró nÿtĩ jé, ù tÿ Topê jagfy ěg jykre tugnÿm ke ti,” he tóg, Paulo ti.

³² Ti tÿ ag mÿ ti ter kar rĩr mãn tón kÿ ù ag tóg to é he mũ. Jó ù ag tóg: “kurã ù kã ěg hẽn ri ke mũn ã vĩ mẽ mãn sór mũ,” he mũ. ³³ Hã kÿ Paulo tóg tĩ mũ, ag ré kÿ. ³⁴ Kÿ ù ag tóg ti nón mũ mũ, kÿ ag tóg Jesus ki ge mũ sir. Ag kã ù vÿ tÿ Dionísio nĩ. Areópago tá ag jyvẽn tĩ ag kã ù vẽ, Dionísio ti. Kÿ ù fi tóg Jesus ki rã mũ gé. Fi jyjy hã vÿ: Damáris, he mũ. Kÿ ù ag vÿ ti ki ge mũ gé sir.

18

Cidade tÿ Corinto tá

¹ Kÿ Paulo tóg cidade tÿ Atenas ki kutẽ kÿ cidade tÿ Corinto ra tĩ mũ.

² Tá Israel ù tóg nĩ nĩ, ti jiji hã vÿ: Áquila, he mũ. Ponto tá ke vẽ. Ũri tóg ga tÿ Itália tá kãtĩg ja nĩ, ã prũ fi mré. Fi jyjy hã vÿ: Priscila, he mũ. Pã'i mág tÿ imperador tÿ Cláudio he mũ tóg Israel kar ag mÿ: “cidade tÿ Roma ki pa jĕg,” he ja nĩgtĩ. Hã kÿ fag tóg cidade tÿ Corinto tá junjun ja nĩgtĩ.

³ Kÿ Paulo tóg fag mré nĩ nĩ sir. Fag mré tóg rãnrãj mũ sir. Hã ra fag tóg kur tÿ ĩn han mũgtĩ, Paulo kóm. Fag rãnrãj hã vẽ. Hã kÿ Paulo tóg fag mré rãnrãj mũ sir, ti tÿ fag mré nĩn kÿ. ⁴ Kÿ tóg vĕnhkán ke kurã kar ki ag mÿ Topê vĩ tó mũ, Israel tÿ vĕnh kanhrãn jafã krēm, Israel ag tÿ ti vĩ kri fi jé, fóg tÿ Grego ag ke gé. ⁵ Kÿ Silas vÿ Macedônia tá kãtĩ mũ, Timóteo ke gé. Kÿ Paulo tóg Topê vĩ tó tãvĩ nĩ nĩ, ĩn tÿ kur han mãn tũ tóg nĩ. Israel ag mÿ tóg Jesus kãmén mũ, ti tÿ tÿ Cristo nĩ ti.

⁶ Hã ra ag tóg ti kato vĩ mũ. Kÿ ag tóg Jesus to é he mũ. Kÿ Paulo tóg ã kur rũmrũm mũ, ag mÿ: “vĕnh hã ki ajag tóg vãgfor kenh mũ, nũgme ki vár kÿ, inferno ki,” he jé. “Ajag mÿ sóg tó, Jesus ti, hã ra ajag tóg mẽ jãvãnh nÿtĩ. Kÿ ajag tÿ vĕsóg ki vĕsÿrĕnh ke vẽ. ĩnh hã tóg fóg ag kar mÿ tónh tĩg ha, kanhgág ag kar mÿ ke gé,” he tóg mũ, Paulo ti. ⁷ Hã kÿ tóg tá kutẽ kÿ fóg ĩn kãra rã mũ, ti jiji hã vÿ: Tício Justo, he mũ. Topê kamĕg ti tĩ. Ti ĩn vÿ Israel tÿ vĕnh kanhrãn jafã rã jĕ gé. Kÿ Paulo tóg ti ĩn kãra rã mũ sir.

⁸ Hã ra Israel tÿ vĕnh kanhrãn jafã to pã'i vÿ Jesus ki rã mũ, ti jyjy hã vÿ: Crispo, he mũ. Ti mré ke kar vÿ Jesus ki ge mũ gé, Corinto tá ke tÿ hẽn ri ke ag ke gé, ag tÿ Paulo vĩ mẽ kÿ. Kÿ ag tóg kygpe kÿ nÿtĩ sir.

⁹ Kejĕn Paulo tóg kuty kã nĕn nĕ vĕg mũ. Topê tÿ ti mÿ vĕnh ven vẽ, kÿ tóg ti mÿ: “kamĕg tũg ra,” he mũ. “ĩnh vĩ kãmén ra, ha mẽ kÿ nĩ tũg,” he tóg. ¹⁰ “Ā mré sóg nĩnh mũ. Ũ pi(jé) ã vóg kónãn mũ,” he tóg. “Cidade tag ki ù tÿ hẽn ri ke ag vÿ tÿ isũ nÿtĩnh mũ,” he tóg, Topê ti.

¹¹ Kÿ Paulo tóg prÿg pir kri kysã tÿ 6 ke ki tá nĩ nĩ. Ag mÿ tóg Topê vĩ kãmén tĩ nĩ sir, tá.

¹² Kejĕn ù tÿ Gálio he mũ tóg tÿ Romano tÿ governador nĩ, ga tÿ Grécia ki. Kÿ Israel ag kar tóg Paulo kato vãsãnsãn mũ. Kÿ ag tóg ti kãgmĩ kÿ pã'i mág mÿ ti ven mũ mũ. ¹³ Kÿ ag tóg governador mÿ: “tag tóg ěg jykre tÿ tũ' he sór mũ’,” he mũ. “Vĕnh kar tóg ti vĩ tugnĩn Topê to jãnjãn tĩ, vĕnh jykre tãg tÿ hã ra,” he ag tóg ti mÿ.

¹⁴ Kÿ Paulo tóg vĩ sór mũ, hã ra Gálio tóg Israel ag mÿ: “Israel’,” he mũ. “Ti tÿ nĕn ù kórég han mũ ra sóg ajag jagfy vĩ tĩ vẽ, ti tÿ crime han mũ ra, Paulo ti,” he tóg. ¹⁵ “Hã ra ajag jykre to ajag tóg ti to jũ mũ, ajag jiji to, ajag vĕnh rá to (mÿr). Isũ pijé’, ajag tũ tag ti’. Ajag hã ne tag to jykrén ke mũ inhhã’. ĩnh pi(jé) ajag tũ to jykrén sór mũ’,” he tóg, Gálio ti, pã'i mág ĕn ti. ¹⁶ Kÿ tóg ag mÿ: “ha mũ jĕg,” he mũ sir, vĩ tar han kÿ.

¹⁷ Kÿ tá nÿtĩ ag tóg Sóstenes kãgmĩg mũ. Israel tÿ vĕnh kanhrãn jafã to pã'i vẽ. Ti kãgmĩ kÿ ag tóg ti mrãnmrãn mũ, pã'i mág ĕn ĩn tá, hã ra Gálio tóg ki ĕmĕ sór tũ nĩ.

Paulo tÿ Antioquia ra vÿn ke

¹⁸ Kÿ Paulo tóg tá nĩ sir, kurã tÿ hẽn ri ke ki. Kÿ tóg kejĕn Jesus mré ke ag mÿ: “isĩg vĕ ha,” he mũ. Kÿ Áquila tóg ti mré tĩ mũ, ti prũ tÿ Priscila fi mré hã. Ag tÿ ga tÿ Síria ra mũnh ke vẽ. Cidade tÿ Cencreia tá ag tóg canoa mág ki ge sór mũ, va mũ jé. To hã

tóg vėnh jārég mū, Paulo ti, Topē mý promessa han kŷ. ¹⁹ Kŷ ag kar tóg canoa mág kăki cidade tŷ Ēfeso ra mū mū. Hă ra Áquila fag vŷ tá nŷtĭ, mū măn tŷ fag nĭ sir.

Kŷ Paulo tóg Israel tŷ vėnh kanhrăn jafă kăra ră mū, Israel ag mré vĭ jé. ²⁰ Ag tŷ ti vĭ mē kŷ tá ke ag tóg ti mŷ: “ėg mré nĭ nĭ,” he mū.

Hă ra tóg ag mŷ: “hă ra sóg ver tĭg mū ha,” he mū. ²¹ “Kănhmar sóg vŷn kenh ke mū hă ra, Topē tŷ inh vŷn kenh ke to há nĭn kŷ,” he tóg. Kŷ tóg cidade tŷ Ēfeso tá kutē mū. ²² Kŷ tóg cidade tŷ Cesaréia tá jun mū. Kŷ tóg cidade tŷ Jerusalém ra tĭg kŷ Jesus ki ge mū kar vigvėg mū, ũ tŷ Topē vĭ mē jé vėnh măn tĭ ag. Kar kŷ tóg cidade tŷ Antioquia ra tĭ mū. ²³ Tá tóg nĭ sĭ han mū. Kar kŷ tóg tá kutē kŷ ga tŷ Galácia mĭ kutē mū, ga tŷ Frígia mĭ ke gé. Jesus mré mū ag jyvėn tóg mū sir, ag tŷ tar nŷtĭ jé.

Apolo tŷ Topē vĭ tó

²⁴ Kejėn Israel ũ tóg cidade tŷ Ēfeso tá jun mū, ti jiji hă vŷ: Apolo, he mū. Cidade tŷ Alexandria tá tóg mur ja nĭ. Vĭ há ti nĭ. Topē vĭ tó tóg tĭ gé, văsŷ răn kŷ nĭ ěn to tóg tar nĭ.

²⁵ Ěn tóg Jesus japry ki kanhró nĭ, Jesus jamĭn ki. Mŷmėg vănh nĭn kŷ tóg Jesus vĭ tó tĭ mū, ti tŷ to krónh ke vănh nĭn kŷ. Hă ra tóg João tŷ ag kygpėg mū ěn hă ki kanhró nĭ. Ěg tŷ Jesus jyjy tó kŷ kygpe kŷ nĭ tag ki kagtĭg tóg nĭ ver.

²⁶ Ěn tóg Israel tŷ vėnh kanhrăn jafă krėm ag kanhrăn mū sir, ti tŷ mŷmėg vănh nĭn kŷ. Áquila fag tŷ ti vĭ mėg kŷ fag tóg ti mŷ: “ėg venh kătĭg nĭ,” he mū. Kŷ fag tóg ti mŷ Topē japry kămėn kăn mū, Topē jamĭn ti. ²⁷ Kar tóg ga tŷ Grécia ra tĭg sór mū, Apolo ti. Kŷ Jesus mré ke ag tóg ti mŷ: “há ti nŷ, ha tĭg ge,” he mū. Kŷ ag tóg Jesus mré mū ag mŷ vėnh rá jėnėg mū, ag tŷ ti mŷ: “kără ra,” hen jé. Tá jun kŷ tóg Jesus ki ge kŷ nŷtĭ ag jyvėn mū, kŷ ag tóg ti tŷ ag jyvėn to tar han kŷ nŷtĭ nĭ sir, Topē tŷ ũn jagăgtăn mū ag. ²⁸ Israel ag mré tóg vĭ tĭ, Apolo ti, vėnh kar jo. Ag mŷ tóg Topē vĭ tó tĭ, văsŷ răn kŷ nĭ ěn ti. Kŷ tóg ag mŷ Cristo kămėn mū sir. “Cristo vŷ tŷ Jesus nĭ,” he tóg mū ag mŷ, Apolo ti, ag mŷ Topē vĭ rá kămėn kŷ.

19

Paulo tŷ cidade tŷ Ēfeso tá nĭ

¹ Kŷ Apolo tóg cidade tŷ Corinto tá nĭ nĭ sir. Hă ra Paulo tóg cidade tŷ Ēfeso tá jun mū. Ga ěn mĭ tóg tĭg ja nĭgtĭ, pănónh kri kyjer ěn mĭ. Kŷ tóg Ēfeso tá jun mū sir.

² Tá ũ ag tóg Jesus ki ge ja nĭgtĭ. Kŷ Paulo tóg ag mŷ: “ăjag mŷ Topē kuprĭg tŷ jagrė nŷtĭ', äjag tŷ Jesus ki gen kă'?” he mū. Kŷ ag tóg ti mŷ: “kŷ ne nē ge, Topē kuprĭg ti?” he mū, Paulo mŷ. ³ Kŷ Paulo tóg: “ăjag tŷ kygpe kŷ äjag hē ri ké?” he mū. Kŷ ag tóg: “João tŷ ag kygpe ri ke ti nĭ, ěg kygpe ti,” he mū. ⁴ Kŷ Paulo tóg: “João tóg ag kygpe ja nĭgtĭ, ag tŷ äjag jykre tovănh sór nŷtĭn kŷ,” he mū. “Kŷ tóg vėnh kar mŷ kămėn ja nĭ gé, ag tŷ ũ tŷ ti nón kătĭ ěn ki ge jé, hă vŷ: Jesus, he mū,” he tóg, Paulo ti. ⁵ Ag tŷ tag mē kŷ ag tóg ti mŷ: “Jesus jiji tó kŷ ěg kygpe ge,” he mū. ⁶ Kŷ Paulo tóg ä nĭgé tŷ ag mėg mū, kŷ Topē kuprĭg tóg ag ki ră mū sir. Vėnh vĭ ũ han ag tóg mū sir. Kŷ ag tóg Topē vĭ tó mū gé. ⁷ ũ tŷ 12 ag hŷn, vėnh vĭ ũ han mū ěn ag.

⁸ Kŷ Paulo tóg Israel tŷ vėnh kanhrăn jafă kăra ră mū. Ti tŷ mŷmėg vănh nĭn kŷ tóg Topē tŷ tŷ ěg pă'i nĭ kămėn mū. Kysă tăgtŷ ki tóg ag mŷ kămėn mū, ag tŷ hėn ri ke mŷn ti vĭ kri fi jé. ⁹ Hă ra ũ ag tóg ti vĭ to fe ũ nŷtĭ sir, ag tŷ kri fi jăvănh nŷtĭn kŷ. Kŷ ag tóg to é hen kŷ ag tóg to vĭ kónăn mū, vėnh kar jo. Kŷ Paulo tóg ag mré vĭ măn tŷ nĭ sir. Jesus mré mū ag mŷ tóg: “vyr mŷ ěg nŷtĭ,” he mū. Kŷ tóg escola krėm ag kanhrăn mū sir, kură kar ki. Escola to professor ěn jiji hă vŷ: Tirano, he mū.

¹⁰ Prŷg régre ki tóg tá nĭ nĭ, gen kŷ, Paulo ti. Hă kŷ ga tŷ Ásia tá ke ag kar vŷ Jesus vĭ mėg mŷgtĭ, Israel ag kar, fóg tŷ Grego he mū ag kar ke gé. ¹¹ Kŷ Topē tóg Paulo mŷ vėnh jykre nĭm mū gé, kŷ tóg ěg tŷ nén han vănh tŷ hėn ri ke hŷn han mū. ¹² Kejėn ag tóg Paulo kur tŷ ũn kagyga ag mėgmėg mū, ag tŷ há' he jé. Paulo tŷ kur mē kar kŷ ag tóg tŷ

ũn kagyga ag mēgmēg mū. Kŷ ag tóg hághá' he mū. Vēnh jagrē kórég ag vŷ gen kŷ pa mū gé, ũn kaga ag tŷ ti kur mẽ kŷ.

Kujá ag

¹³ Kŷ Israel ag kujá ag vŷ tá nŷtí gé. Kujá ěn ag tóg ěmā kar kri rŷm ke tŷ. Kejěn ag tóg ājag tŷ vēnh jagrē kórég ven kŷ ag tóg Jesus jyjy tó tŷ. Őn kŷ ag tóg tó tŷ. Kŷ ag tóg ũ mŷ: “Jesus jykre tŷ sóg ā kutěm ke mū, Paulo tŷ ũn kāmén tŷ ěn jykre tŷ,” he mū, ũn jagrē kórég mŷ. Hā ra ag tŷ ón kŷ Jesus jiji tó vē. Ti mré ke pijé'. ¹⁴ Ũ tŷ ge tó mū ag vŷ tŷ Israel ag nŷtí. Topě tŷ ki rŷr tŷ to pā'i mág krě ag vē, kŷ ti jiji hā vŷ: Ceva, he mū, ag panh jyjy ti. Ũ tŷ 7 ke ag vē, ti krě ěn ag.

¹⁵ Ag tŷ ũn jagrē kórég mŷ Jesus jiji tó kŷ vēnh jagrē kórég ěn tóg ag mŷ: “Jesus ki kanhró sóg nŷ, Paulo mẽ inh huri ke gé, hā ra ājag tóg tŷ ũ nŷtí?” he mū ag mŷ, kujá ag mŷ. ¹⁶ Kŷ ũn jagrē kórég ěn tóg ag to hŷm he mū. Ag kygrěg tóg mū, hā ra ag tóg ti tŷ hě ri ke tŷ nŷ. Kŷ ag tóg kator kŷ rinfig mū sir, kygvěnh kŷ. ¹⁷ Kŷ Ēfeso tá ke ag kar tóg měg mū, Israel kar, fóg tŷ Grego ag kar ke gé. Kŷ ag tóg mŷměgměg mū sir. Kŷ Jesus Cristo jiji tóg ag mŷ tar nŷ, ag mŷ tóg něn kar kăfór nŷ, Jesus Cristo jyjy ti.

¹⁸ Kŷ Jesus ki ge kŷ nŷtí ag tóg ājag jykre kórég tugtó mū sir, jagně mŷ. ¹⁹ Ũ ag tóg curandeiro tŷ han ja nŷgtŷ, kujá tŷ ke gé. Kŷ ag tóg ājag vēnh rán gé kāmŷ mū, curandeiro tŷ vēnh rán ěn ti. Kŷ ag tóg kuprŷn kěn mū sir, vēnh kar rŷnve. Ag tŷ ti kaja nŷkrěn kŷ tóg kaja e ja nŷ, jěnkamy tŷ 50 mil hŷn. ²⁰ Hā kŷ Topě vŷ tóg sir vēnh kar kri rŷm ke mū. Kŷ ũ tŷ hěn ri ke ag tóg kri fig mū sir.

Ēfeso tá vēnh génh

²¹ Kar kŷ Paulo tóg to jykrěn mū. Ga tŷ Macedônia mŷ tóg kutě sór mū, ga tŷ Grécia mŷ, Jerusalém ra tŷg jé. “Isŷ Jerusalém ra tŷg kar kŷ sóg cidade tŷ Roma ra tŷg sór mū gé,” he tóg, Paulo ti. ²² Kŷ tóg ga tŷ Macedônia ra ũn régre ag jěgněg mū, ti mré rěnhrěj mū ag, hā vŷ: Timóteo mré Erasto, he mū. Ti hā tóg hā ra ga tŷ Āsia tá nŷ nŷ ver, Paulo ti.

²³ Kejěn vēnh génh tóg kutě mū, Jesus japry tugrŷn, ti jamŷn tugnŷn. ²⁴ Ũ tóg Ēfeso tá nŷ nŷ, ũ tŷ prata tŷ ĩn sŷ kăggrá han mū ti, ũ tŷ topě tŷ Diana he mū fi jo ĩn sŷ ěn kăggrá han mū ti, retrato ěn. Ũ tŷ han mū jiji hā vŷ: Demétrio, he mū. Ti camarada tŷ hěn ri ke ag tóg vēnh rěnhrěj ěn ki něn há vég tŷ. Ag ganho vē.

²⁵ Kŷ tóg ā camarada ag jé prěr kěn mū, Demétrio ti. Ũ tŷ ā ri kěn rěnhrěj mū ag jé prěr tóg mū gé. Ag vēnh měn kŷ tóg ag mŷ: “há vé,” he mū. “Věnh rěnhrěj tag ki ěg tóg něn ũ há vég mŷgtŷ, ěg ganho ti. Tag ki ěg há nŷtŷ,” he tóg. ²⁶ “Hā ra Paulo tag tóg cidade tag ki tóg ũ tŷ hěn ri ke krŷn mū sir, ga tŷ Āsia mŷ ke gé. Ag mŷ tóg: “vēnh nŷgé tŷ han ja pi(jé) tŷ Topě nŷ,” he tŷ. Kŷ ag tóg ti vŷ kri fig mū sir. Tag vég ěg mŷ (mŷr),” he tóg. ²⁷ “Kŷ ěg tŷ něn tag tóg tŷ' he sór mū sir ti tugrŷn, ěg ganho ti. Hā ra Diana fi jo ĩn tóg tŷ něn ũ tŷ nŷ ke gé, ti sŷnvŷ nŷ ra. Kŷ fi tóg tŷ něn ũ tŷ nŷ gé sir, fi tŷ tŷ ũn mág nŷ ra. Āsia kar mŷ ag tóg fi to jěnjěn tŷ, ga kar mŷ ke gé. Hā ra tóg fi tŷ tŷg' hěnh ha, Paulo ti, ti tŷ: “vēnh kăggrá pi(jé) tŷ Topě nŷ, hěn kŷ,” he tóg, Demétrio ti, ũ tŷ fi jo ĩn sŷ han mū ěn ti.

²⁸ Ag tŷ tag mẽ kŷ ag fe tóg gŷm ke mū sir. Kŷ ag tóg jamā hár(a) prěr kŷ: “!..topě tŷ Diana fi vŷ kăfór ne..! !..Tŷ fi Ēfeso ag tŷ ne..!” he mū sir, prěnprěr kŷ. ²⁹ Kŷ cidade ěn ki ag vēnh génh vē sir, kŷ vēnh kar tóg ĩn mág ěn ra pétě mū, ĩn kri ĩn tŷ ěn ra. Gaio he mū ti pére ag tóg mū mū, ti kăgmŷ kŷ, Aristarco ke gé. Macedônia tá ke ag vē. Ēn ag tóg Paulo mré kāmŷ ja nŷgtŷ. Ēn ag kugmŷg ag tóg mū, ag tŷ ĩn mág ěn ra ag tatŷ mŷ jé.

³⁰ Kŷ Paulo tóg ra tŷg sór mū, ag mré vŷ jé, hā ra ũ tŷ Jesus ki ge kŷ nŷtŷ ag tóg ti mŷ: “tŷ tŷg ra,” he mū. ³¹ Kŷ ga tŷ Āsia tá pā'i ag tóg ti mŷ vēnh vŷ jěněg mū gé, ti tŷ ĩn mág ěn ra tŷ tŷ nŷ jé. Ti to ag tóg há nŷtŷ, pā'i ag.

³² ĩn mág tá ag tóg vēnh měn kŷ nŷtŷ nŷ, ũ tŷ hěn ri ke ag. Kŷ ũ ag tóg něn ũ tó tŷ, prěnprěr kŷ, jó ũ ag tóg něn ũ tó tŷ, prěnprěr kŷ. Kŷ vēnh kar tóg vŷ vŷ he kěn mū sir. Věnh měn kŷ ag nŷtŷ, hā ra ag tóg: “ěg tŷ hě ri ke jé vēnh měn ně hŷn'?” he mū. ³³ Kŷ Israel ag tóg vēnh kar mŷ ũ ven mŷ gé, Alexandre he mū ěn. Kŷ Alexandre tóg ā nŷgé tŷ

ge mū, ag tỹ katy' he jé. Kỹ tóg ag mỹ kāmén sór mū. ³⁴ Kỹ ag tóg vég mū sir, ti tỹ tỹ Israel nĩ ti, Alexandre ti. Hã ra ag tóg tỹ fóg nỹti, tá vènh mǎn kỹ nỹti ag. Kỹ ag tóg Israel ag to jũgũ nỹti nĩ. Ag tỹ ti tỹ tỹ Israel nĩ èn ven kỹ vènh kar tóg prěr pir han mū, hã vỹ: “!..Éfeso tá ke fi tỹ vènh kar káfór ne..! !..Diana he mū fi vỹ vènh kar káfór ne..!” he mū, prěrprěr kỹ. Hora régre han ag tóg mū sir, ge nỹti ki.

³⁵ Governo mỹ rán tĩ èn tóg hã ra ag fe tỹ há' he mū. Kar kỹ tóg ag mỹ: “Éfeso tá ke',” he mū. “Vènh kar vỹ Diana fi ki kanhró nỹti,” he tóg. “Éfeso tá èg tóg fi ki rĩr mū. Fi kǎggrá nēji tóg kanhkā tá kākutē ja nĩ. Vènh kar tóg tag ki kanhró nỹti,” he tóg. ³⁶ “Ū tóg tag kato vĩ tũ nĩgtĩ (mỹr),” he tóg. “Hã kỹ jatu ké. Krĩ rỹg tũg ra,” he tóg. ³⁷ “Tag ag tatĩ ājag tóg kāmũ ja nĩgtĩ, hã ra ag tóg topē fi jo ìn tá nén ũ péju ja tũ nĩgtĩ. Èg topē fi to ag tóg vĩ kónān tũ nĩgtĩ (mỹr),” he tóg. ³⁸ “Demétrio mỹ ag kato vĩ sór ke mū'?” he tóg. “Vènh kǎggrá han mū ag mỹ ti mré ag vĩ kafān sór mū'?” he tóg. “Kỹ kófa ag mỹ tómnĩ ge, vènh jyvèn ke kurā èn kǎ. Ag kato vĩmnĩ ge,” he tóg. ³⁹ “Ājag tỹ hã ra nén ũ tó sór kỹ ājag tóg èg tũ ki kanhró nỹti. Kurā nĩm jé èg tóg ke mū, kỹ èg vènh mǎn kỹ venh mū ha,” he tóg. ⁴⁰ “Hã ra èg tỹ ón kỹ vènh génh kỹ ũ ag hỹn èg to: pǎ'i mág tỹ imperador kato ag tē sór mū, he mū. Nén ũ tũ to ājag tóg vènh mǎn mū (mỹr),” he tóg. “Ū tỹ èg mỹ: ne nē? he mū ra èg tỹ ne tónh ke tóg tũ tĩ,” he tóg, governo mỹ rán tĩ ti. ⁴¹ Kar kỹ tóg ag mỹ: “ha mū jęg,” he mū. Kỹ ag tóg mū mū sir.

20

Paulo tỹ ga tỹ Macedônia mĩ tĩg

¹ Vènh kar tỹ jatu ke mǎn kỹ Paulo tóg Jesus ki ge kỹ nỹti ag jé prěr mū. Ag jyvèn tóg mū, kỹ tóg ag mỹ: “sỹ tĩ ma,” he mū. Kỹ tóg ga tỹ Macedônia ra tĩ mū. ² Kỹ tóg ga èn mĩ tĩ mū, kỹ tóg fĩn kutē mū. Jesus ki ge kỹ nỹti kar ag jyvèn mág tóg mū. Kỹ tóg tĩg mǎn kỹ ga tỹ Grécia tá jun mū. ³ Tá tóg kysā tǎgtũ tũg mū. Kỹ tóg ga tỹ Síria ra vỹn ke sór mū, canoa mág kāmĩ. Hã ra Israel ag tóg tá ti vóg kónān sór mū. Kỹ tóg to jykrén kỹ ga tỹ Macedônia mĩ kutē mū, ga tỹ Síria ra vỹn ken jé. ⁴ Ti mré ag tóg mū mū, hã vỹ: Sópatro, he mū, Pirro kósin tag ti, Beréia tá ke tag ti. Kỹ Tessalônica tá Artistarco tóg ti mré tĩ mū, Segundo ke gé. Derbe tá Gaio tóg ti mré tĩ mū, Timóteo ke gé. Ásia tá Tíquico tóg ti mré tĩ mū, Trófimo ke gé. ⁵ Èn ag kar vỹ èg jo mū mū, cidade tỹ Trôade ra. Tá ag tóg èg jāvānh mū sir.

⁶ Kỹ èg tóg cidade tỹ Filipos tá pa mū, festa tỹ pǎo jęgja tũ ke kurā kar kỹ. Kỹ èg tóg kurā tỹ 5 (ke) tũg kỹ Trôade tá junjun mū ag tá, èg jo mū ag tá. Tá èg tóg kurā tỹ 7 (ke) tũg mū sir.

Cidade tỹ Trôade tá

⁷ Semana tỹ kurā ve ki èg tóg vènh mǎn mū sir, Domingo kǎ, Jesus jamĩ kó jé. Kỹ Paulo tóg tỹ vaj kỹ tĩg sór mū, hã kỹ tóg ag mré vēmén mág mū. Kỹ èg tóg meia noite pétēm mū, vēmén nỹtĩn ki. ⁸ Ìn to jāpry jafā tá èg nỹti, kỹ néj gru tỹ hèn ri ke tá grug kỹ nỹti nĩ.

⁹ Kỹ kyrũ tóg tá nĩ nĩ, ti jyjy hã vỹ: Êutico, he mū. Jānkā ror kǎ tóg nĩ nĩ, janela kǎ. Hã ra tóg nũr mū sir. Nũr sér han tóg mū sir. Jó Paulo tóg vēmén jē nĩ. Kỹ tóg ā nũr kỹ jānkā ror ki kutē mū. Janela tǎgtũ tá nĩ kỹ tóg èprā kutē mū. Kỹ tóg ter ja nĩ sir, ag tỹ re kỹ, ti ve jé.

¹⁰ Kỹ Paulo tóg tére mū gé sir. Ti kri tóg pǎnh ke mū. Kỹ tóg ti kǎgũg mū, ã nĩgnó tỹ. Kỹ tóg ag mỹ: “fe kaj tũg ra,” he mū. “Ti kuprĩg vỹ ti kākā nĩ nĩ,” he tóg. ¹¹ Kỹ tóg tǎpry mū, Paulo ti. Jesus jamĩ kǎnhkrég tóg mū sir, kỹ tóg ko mū gé. Ag mỹ tóg vēmén mág han mǎn mū gé, kỹ tóg tỹ vaj mū. Vaj kỹ tóg tĩ mū, cidade èn ki kutē kỹ, Paulo ti.

¹² Hã ra ag tóg kyrũ èn pére kāmũ mū. Rĩr tóg nĩ nĩ, kỹ ag krĩ tóg há' he mū sir.

Cidade tỹ Mileto ra

¹³ Kỹ èg tóg ti jo canoa mág kǎra ge mū, Paulo jo. Kỹ èg tóg cidade tỹ Assôs ra mū mū. Tá Paulo tóg èg mré canoa kǎra rǎ sór mū gé, ti tỹ èg mré tĩg jé. “Iso ra mū jęg, inh hã vỹ

inh pēn kā ra tī mū,” he ja tóg nīgtī, Paulo ti. ¹⁴ Ēg tỹ cidade tỹ Assôs tá pa kỹ tóg ěg mré tĩ mū gé, Paulo ti, canoa mág kāmĩ. Kỹ ěg tóg cidade tỹ Mitilene tá junjun mū. ¹⁵ Tá pa kỹ ěg tóg tỹ vaj kỹ goj vāso tỹ Quios kakām krýg mū. Tỹ vaj kỹ ěg tóg goj vāso tỹ Samos to hā nūgnūr mū, kỹ ěg tóg tỹ vaj kỹ cidade tỹ Mileto tá junjun mū sir. ¹⁶ Paulo tóg: “Ēfeso ra ěg mūnh ke tũ nĩ,” he ja nīgtī. “Ēg tỹ Jerusalém kukām mūnh ke vē, hā kỹ ěg tóg Ásia ki nýtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tĩ,” he ja tóg nīgtī, Paulo ti.

Paulo tỹ Jesus mré ke ag mré vĩ

¹⁷ Mileto tá nĩ kỹ tóg Ēfeso ra vēnh vĩ jēnēg mū, Paulo ti, kófa ag mỹ, Jesus ki ge kỹ nýtĩ to pā'i ag mỹ, ag kāmũ jé. ¹⁸ Ag tỹ tá junjun kỹ tóg ag mỹ: “inh ve ja ājag tóg (mỹr),” he mū. “Inh kātĩg ven kā ājag tóg inh vé, isỹ ga tỹ Ásia tá jun vén kā,” he tóg. ¹⁹ “Ēg Senhor tỹ Jesus tỹ inh mỹ nén nĩm ja han isóg tĩ. Vēnh káfór han tũ sóg tĩ. Kejēn sóg fỹ tĩ gé, sỹ vēnh jykre pāno ven kỹ. Israel ag tóg iso jūgũ tĩ gé, kỹ sóg vēsýrēnh tĩ gé,” he tóg.

²⁰ “Nén há kar tó sóg tĩ ājag mỹ. Inh pi(jé) ājag mỹ tó tũ nīgtī', sỹ nén ki kanhrān mū tĩ'. Ēg vēnh mān ki sóg tó ja nīgtī, ājag ĩn krēm ke gé,” he tóg. ²¹ “Israel ag mỹ sóg tó ja nīgtī, inh mré ke ag mỹ, fóg tỹ Grego ag mỹ ke gé, ag tỹ ājag jykre tovānh jé, Topē jykre han jé, Jesus Cristo ki rā jé, ěg Senhor ki. Tag tó ja sóg nīgtī,” he tóg, Paulo ti.

²² “Ha vé, Jerusalém ra sóg tĩ mū, Topē kuprĩg tỹ inh mỹ: ha tĩg, hen kỹ. Isỹ tá nén venh ke ki kagtĩg sóg nĩ ver,” he tóg. ²³ “Hā ra Topē kuprĩg tóg inh mỹ tag tó tĩ, ha mē: “ā se jé ag tóg ke mū, ā vóg kónān jé ag tóg ke mū,” he tóg tĩ. Isỹ ěmā ũ ki rā tóg inh mỹ inh vēsýrēnh ke tó tĩ, Topē kuprĩg ti,” he tóg. ²⁴ “Hā ra tóg inh mỹ tỹ nén ũ tũ nĩ. Ag tỹ isén ke mū ra tóg inh mỹ tỹ nén ũ tũ nĩ gé. Sỹ inh rānrāj kān há tóg tĩ, Jesus Cristo tỹ inh mỹ vēnh rānrāj nĩm ja ěn ti, hā vỹ: sỹ vēnh kar mỹ Jesus to vĩ sér ěn tó jé, he mū, sỹ Topē tỹ ěg jagēgtān mū ti tó jé, he mū,” he tóg.

²⁵ “Ha vé, inh ve mān ke tũ ājag tóg nĩ ha, ki kanhró sóg nĩ. ũ tỹ hēn ri ke ag mỹ sóg Topē tỹ tỹ ěg pā'i nĩ tó ja nīgtī, isỹ ag venh tĩg kỹ. Hā ra ag kar ěn tóg inh ve mān ke tũ nĩ ha,” he tóg. ²⁶ “Hā kỹ sóg ājag mỹ tó mū. ũ tỹ Jesus ki rā tũ nĩn kỹ tóg iso: inh mỹ tóg tó ja tũ nĩ, hēnh ke tũ nĩ,” he tóg. ²⁷ “Ājag mỹ sóg tó kān, Topē jykre kar tó sóg ājag mỹ. Inh pi(jé) ājag mỹ nén ũ tó tūg ja nĩ',” he tóg. ²⁸ “Vēnh ki rĩrmnĩ, vēso jykrén kỹ. Kỹ Jesus ki ge mū kar ag ki rĩrmnĩ gé. Topē kuprĩg vỹ ājag tỹ ag to pā'i hyn han, kỹ ag ki rĩr há han nĩ. Ā kyvénh tỹ tóg ag kygjam mū mýr, Jesus ti. Ti mỹ ag tóg tỹ ti mēg ri ke nýtĩ, kỹ ājag tỹ ti mēg ěn jēn ke,” he tóg. ²⁹ “Isĩg kỹ ũ ag tóg ājag to junjun ke mū, kỹ ag tóg mĩg ri ke nýtĩ, ti mēg mān sór kỹ, hā vỹ: Jesus ki ge kỹ nýtĩ ag kókén sór mū, he mū,” he tóg. ³⁰ “Ājag kāmĩ ũ tóg vēnh ó tónh ke mū gé, Jesus mré mū ag tỹ ag mré mū kónān han jé,” he tóg. ³¹ “Kỹ vēnh ki rĩr. Iso jykrén. Prýg tāgtũ ki sóg ājag jyvēn, kurā ki, kuty ki ke gé. Ājag kar jyvēn sóg (mýr). Ājag jyvēn kỹ sóg fỹ tĩ gé kejēn,” he tóg. ³² “Hā ra sóg Topē mỹ: ag ki rĩr, he mū, ājag to. Topē vỹ ā vĩ tỹ ājag ki rĩr ke mū gé, ti tỹ ājag jagāgtān kỹ. Ti hā vỹ ti ki rā to ājag tar han ke mū, Topē ti. Ājag mỹ tóg ěmā há tāvĩ nĩm ke mū gé, kar kỹ, ti tũ kar ag mré hā,” he tóg, Paulo ti.

³³ “Inh pi(jé) ājag mỹ: inh mỹ jānkamy nĩm, inh mỹ kur nĩm, he mū',” he tóg. ³⁴ “Isỹ nén ũ génh jé sóg rānrāj ja nīgtī (mýr), inh nĩgé tỹ. Kỹ inh rānrāj ki inh companheiro ag vỹ ājag tũ ti vigve ja nīgtī gé inh kóm,” he tóg. ³⁵ “Hā ki sóg ājag mỹ Jesus jykre ti ven mū. Ēg rānrāj ki ěg tũ ven kỹ ěg tóg ũn krónhkrój ag mỹ nén ũ vin ke mū gé, ěg tỹ ti jykre han kỹ. Ēg Senhor tỹ Jesus vĩ mĩ sóg ěkrég tĩ. Ti hā tóg ěg mỹ tag tó ja nīgtī, kỹ tóg: “ũ tỹ ěg mỹ nén ũ nĩm kỹ tóg pāgsĩ nỹ,” he ja nīgtī. “Há sĩ tóg nỹ. Ēg tỹ ũ mỹ ěg tũ nĩm hā kỹ tóg há nỹ,” he ja tóg nīgtī, Jesus ti,” he tóg, Paulo ti. Paulo tỹ ag mỹ ken hā vē.

³⁶ Ti tỹ tó kān kỹ tóg ā jakrĩ tỹ jē mū, kỹ tóg Topē mré vĩ mū, vēnh kar to. ³⁷ Kỹ ag tóg kygfỹ' he mū. Paulo nunh jāgmỹ ag tóg ājag nĩgnó fón mū, ti ki ag tóg nhun ke mū. ³⁸ Ag mỹ tóg e tĩ, ti tỹ ag mỹ: “inh ve mān ke tũ ājag nĩ ha,” hen kỹ. Kỹ ag tóg canoa mág ra ti mré mū mū sir.

21

Jerusalém ra

¹ Vāhã ãg tóg ag mÿ: “ãg mÿ sór vë,” he mÿ. ãg tÿ ag ré kÿ mÿ kÿ tóg ag mÿ jagy tÿ. Ge ra ãg tóg tá pa mÿ. Kÿ ãg tóg canoa mág kāmÿ mÿ mÿ, goj vāso tÿ Cós kukām, vësÿméri. Tÿ vaj kÿ ãg tóg goj vāso tÿ Rodes tá junjun mÿ. Kar ãg tóg cidade tÿ Pátara tá junjun mÿ sir. ² Tá ãg tóg canoa mág ù vëg mÿ gé, ù tÿ ga tÿ Fenícia ra tÿ mÿ ãn. Kÿ ãg tóg kāra ge kÿ kāmÿ mÿ mÿ sir. ³ Goj vāso tÿ Chipre vëg ãg tóg mÿ, ãg jakānh tá. Kÿ ãg tóg ga tÿ Síría kukām mÿ mÿ. Cidade tÿ Tiro tá ãg tóg krÿg mÿ. Ag tÿ canoa tÿ nén rÿnh tÿ ãn tÿ tá vin han ke vë, cidade tÿ Tiro tá. ⁴ Tá ãg tóg Jesus mré mÿ ag vëg mÿ. Hã kÿ ãg tóg kurã tÿ 7 (ke) ki tá nÿtÿ nÿ. Topë kuprÿg tÿ ag krÿn kÿ ag tóg Paulo mÿ ke mÿ, ti tÿ Jerusalém ra tÿg tÿ nÿ jé, he ag tóg. ⁵ Ge ra ãg tóg kurã tÿ 7 (ke) tÿg kÿ mÿ mǎn mÿ. Hã ra ag tóg ãg mré mÿ sÿ han mÿ, ājag prÿ fag mré hã ke gé. Cidade tá ag tóg pa mÿ ãg mré, kÿ ãg tóg goj fyr tá ãg jakrÿ tÿ nÿtÿn kÿ Topë mré vÿ mÿ. ⁶ Kÿ ãg tóg: “ãg mÿnh ken vë ha,” he mÿ. Kÿ ãg tóg canoa kāra ge mÿ. Jó ag tóg ājag jamã ra vÿnvÿn ke mÿ gé.

⁷ Kÿ ãg tóg cidade tÿ Tiro tá pa kÿ mÿ mǎn kÿ cidade tÿ Ptolemaida tá junjun mÿ. Jesus mré ke ag vëg ãg tóg mÿ sir tá. Ag mré ãg tóg kurã pir han mÿ.

⁸ Tÿ vaj kÿ ãg tóg tá pa kÿ cidade tÿ Cesaréia ra mÿ mÿ, ãg pën kã. Tá ãg tóg Jesus vÿ tó tÿ ù ïn krēm nÿtÿ mÿ, ti jiji hã vÿ: Filipe, he mÿ. ù tÿ 7 (ke) ãn ag kã ù vë, ù tÿ vëjën vënh kãpópãm mÿ ãn ag kã ù vë. ⁹ Ti kósÿn fag vÿ tÿ 4 (ke) nÿtÿ, ùn mén ja tÿ fag. ãn fag vÿ Topë vÿ tó mügtÿ.

¹⁰ Si há tÿ tá Judéia tá ke ù tóg kãtÿ mÿ, ù tÿ Topë vÿ tó tÿ ti, ti jyjy hã vÿ: Ágabo, he mÿ.

¹¹ ãn tóg ãg tá jun kÿ Paulo vësógfÿn ja tÿ ã nÿgé sigség mÿ, ã pën ke gé. Kÿ tóg: “Topë kuprÿg tÿ tón hã vë, ha mÿ: ù tÿ vësógfÿn ja tag tÿ tÿ nÿ ãn vÿ se kÿ jënh mÿ,” he mÿ. “Israel ag vÿ ti senh mÿ, kÿ ag tóg fóg ag mÿ ti fëg mÿ, he tóg, Topë kuprÿg ti,” he tóg, Ágabo ti.

¹² ãg tÿ tag mÿ kÿ ãg tóg Paulo mÿ: “Jerusalém ra tÿ tÿg nÿ,” he mÿ. Kÿ tá ke ag tóg ge mÿ sir ãg mré. ¹³ Hã ra Paulo tóg: “ājag hã ne tóg kygfÿ' he mÿ',” he mÿ. “Inh fe kaj han ājag tóg mÿ,” he tóg. “Ag tÿ ise sór nÿtÿn kÿ tóg inh mÿ tÿ nén ù tÿ nÿ. Ag tÿ isén sór nÿtÿn kÿ tóg inh mÿ tÿ nén ù tÿ nÿ gé, ag tÿ Jerusalém tá inh vóg kónān sór kÿ, ãg Senhor tÿ Jesus tugnÿn,” he tóg, Paulo ti.

¹⁴ ãg vÿ mÿ jāvānh tóg nÿ. Kÿ ãg tóg vÿ mǎn tÿ nÿ sir. “Jesus tÿ nén han mÿ vÿ tóg há nÿ,” he ãg tóg mÿ sir. ¹⁵ Kar kÿ ãg tóg nén kar kǎn mÿ. Kÿ ãg tóg Jerusalém ra mÿ mÿ. ¹⁶ Cesaréia tá ke ù ag tóg ãg mré mÿ mÿ gé, Jesus mré ke ù ag. ãg mÿ ag tóg ù ven mÿ, ãg tÿ ti ïn krēm nÿtÿ jé. Ti jiji hã vÿ: Menasom, he mÿ. Goj vāso tÿ Chipre tá ke vë. Vāsÿ tóg Jesus ki rã ja nÿgtÿ. ãg tÿ ti ïn krēm nÿgnÿr ke vë.

Paulo tÿ Tiago mré vëmén

¹⁷ ãg tÿ Jerusalém tá junjun kÿ Jesus mré ke ag fe tóg mrin ke mÿ sir.

¹⁸ Tÿ vaj kÿ Paulo tóg ãg mré Tiago venh tÿ mÿ. Kÿ kófa ag kar tóg tá vënh mǎn mÿ gé. ¹⁹ Ag mÿ tóg: “ājag mÿ há?” he mÿ. Kÿ tóg ag mÿ Topë tÿ nén han kar tugtó mÿ. Tugtó kǎn tóg mÿ, Topë tÿ fóg kar krÿn mÿ ti, ti tÿ ag mÿ Topë vÿ tón kÿ. ²⁰ Ag tÿ mÿ kÿ ag tóg Topë mÿ vÿ há han mÿ. Kÿ ag tóg Paulo mÿ: “régre',” he mÿ. “Israel tÿ hën ri ke ag vÿ Jesus ki ge kÿ nÿtÿ, ù tÿ mil tÿ hën ri ke ag. ãn kar tóg Moisés tÿ ãg mÿ vënh jykre nÿm ja han (ka)mÿ nÿgtÿ',” he ag tóg. ²¹ “Hã ra ù ag tóg ag mÿ ã to ón ja nÿgtÿ. ã to ag tóg: “Israel kar krÿn kónān tóg tÿ,” he tÿ. “Israel tÿ fóg mÿ mÿ kar krÿn kónān tóg tÿ, ag tÿ Moisés tÿ ãg mÿ nén nÿm ja tovānh jé,” he ag tóg tÿ ã to, ón kÿ. ãjag krë gré junun fār kym tÿg nÿ, he ã nÿji tÿ. Moisés tÿ ãg mÿ nén nÿm ja hán mǎn tÿg nÿ, he ã nÿji tÿ,” he ag tóg, Paulo mÿ. ²² “Kÿ ãg ne han mÿ ha'?” he ag tóg. “ù tÿ hën ri ke ag vÿ vënh mǎn ke mÿ, ag tÿ ã kãtÿg mÿn kÿ,” he ag tóg, Paulo mÿ. ²³ “Tag hã han jé ã tóg ke mÿ, ha mÿ. ù tÿ 4 (ke) ag vÿ ki nÿtÿ ãg mré, Topë mÿ promessa han mÿ ag,” he ag tóg. ²⁴ “Ag mÿ: “inh mré nÿtÿmÿnÿ,” hemnÿ. Ag mré vënh jānhkri han nÿ, ãg jykre ki. Ag tÿ vëjārég mÿ kÿ ag jo kajām nÿ. Hã

kỹ vènh kar tóg ã jykre ki kanhró nýtĩ sir. Û ên ag tỹ ã to ón mũ ve jé ag tóg ke mũ, ã tỹ Moisés tỹ êg mũ nén nĩm ja ên han kỹ,” he ag tóg mũ, Tiago ag, Paulo mũ.

²⁵ “Jó êg tóg fóg ag tỹ Jesus ki ge mũ ag mũ vènh rá jènê ja nĩgtĩ, kanhgág ag mũ ke gé. Û tỹ Israel jykre han tũ kar to êg tóg jykren, kỹ êg tóg ag mũ vènh rá ên jènê ja nĩ. Ag mũ êg tóg: Moisés tỹ êg mũ nén nĩm ja ên han ke tũ ãjag nĩ, he ja nĩgtĩ. ãjag tỹ nén han ken hã vê, ha mê: vènh kãggrá to festa ko tũg nĩ, retrato to festa ên. Nén ù kyvènh ko tũg nĩ gé. Nén tỹ vêsóg ki ter ja ên ko tũg nĩ gé. ãjag prũ tũ fag mré nỹ tũg nĩ gé, he ja êg tóg nĩgtĩ ag mũ, ù tỹ Israel jykre han tũ ag mũ,” he ag tóg, kófa ag, Paulo mũ.

²⁶ Kỹ Paulo tóg ù tỹ 4 (ke) ên ag mũ: “inh mré nýtĩmnĩ,” he mũ, ù tỹ promessa han mũ ag mũ. Tỹ vaj kỹ tóg ag mré vènh jãnhkrig mũ, Israel ag jykre ki. Kỹ tóg Topê jo ãn to tĩg kỹ ù tỹ ki rĩr tĩ ag mũ: “ag mré sóg vènh jãnhkrig mũ,” he mũ sir. Ag mũ tóg kurã nĩm, Paulo ti, ag tỹ kurã ên kã Topê mũ ti tũ pũn jé, ù tỹ 4 (ke) ag jo, Topê tũ ki rĩr tĩ ag. Kurã ên to hã ag tóg vènh jãnhkrig tĩ, kurã tỹ 7 (ke) ki, promessa han mũ ag.

Ag tỹ Paulo se

²⁷ Kỹ tóg kurã tỹ 7 (ke) ên tũ ken kỹ Israel tỹ Ásia tá ke ag tóg Topê jo ãn tá ti vég mũ sir, Paulo ti. Kỹ ag tóg vènh génh mág han mũ. Ti kãmĩg ag tóg mũ, kỹ ag tóg prẽnprẽr mũ sir. ²⁸ “!..Israel kar, kãmũ jêg ra..!” he ag tóg. “!..Ûn gré ên ve ra..! !..Û tỹ vènh kar krĩn kónãn mũ ên ve ra..! !..Êg povo to tóg vĩ kónãn mo..! !..Moisés tỹ êg mũ nén nĩm ja to..! !..Topê jo ãn to tóg vĩ kónãn mo..! !..Kỹ tóg fóg ag mũ: Topê jo ãn kãra ge jêg, he ja ne..! !..Hã kỹ tóg Topê jo ãn kavènh mo..!” he ag tóg, prẽnprẽr kỹ, Paulo to. ²⁹ Fóg tỹ Trófimo ên ve ja ag tóg nĩgtĩ, Éfeso tá ke ên, Paulo mré tĩ mũ ên. Jerusalém tá ag tóg ti ve ja nĩgtĩ, kỹ ag tóg ón kỹ: “Paulo hỹn ti pére vyr, Topê jo ãn kãra,” he mũ.

³⁰ Kỹ cidade ên tá ke kar ag vỹ vènh génh mũ sir, jũgũ kỹ. Ag tỹ Paulo kãgmĩ kỹ ag tóg Topê jo ãn kãtã ti kutèm mũ. Kỹ ù tỹ ki rĩr tĩ ag tóg Topê jo ãn nĩgfènh mũ sir. ³¹ Kỹ ag tóg ti rêg mũ, Paulo ti.

Hã ra soldado ag pã'i vỹ mễg mũ, major ti, Jerusalém tá ke kar ag tỹ vènh génh kỹ. ³² Kỹ tóg soldado ag jé prẽr kỹ, ag pã'i jé prẽr kỹ tóg ag to pétê mũ. Ag tỹ soldado ag ve kỹ, ag tỹ major ve kỹ ag tóg sir krỹg he mũ, Paulo rẽn kỹ. ³³ Hã ra major tóg tá jun mũ. “Ti kãgmĩ ra,” he tóg, soldado ag mũ. “Ti se ra, ferro régre tỹ,” he tóg. “Û nê?” he tóg. “Ti tỹ ne han nê?” he tóg, vènh kar mũ, major ti. ³⁴ Hã ra ù ag tóg ti mũ nén ù tóg, kỹ ù ag tóg ti mũ nén ù tóg, kỹ tóg ki kanhrãn tũ nĩ sir. Kỹ tóg soldado ag mũ: “êg ãn kãra ti rãg,” he mũ.

³⁵ Ag tỹ sãnsãn he jafã tá junjun kỹ ag tóg ti vãg mũ. Vènh kar tỹ ti to vènh génh kỹ ag tóg ti vãg mũ, ag tỹ ti kã kyn ke jé. ³⁶ Vènh kar tóg ag nón mũ kỹ: “!..ti rê ra..!” he mũ, prẽnprẽr kỹ.

Paulo tỹ ag mũ vènh kãmén mũ

³⁷ Ag tỹ ãn kãra ti rãg sór kỹ Paulo tóg major mũ: “sỹ ã mré vèmén há tóg tĩ,” he mũ. Grego vĩ ki tóg ti mũ ke mũ. Fóg tỹ major vê, hã kỹ tóg Grego vĩ hã tóg tĩ.

³⁸ Kỹ major tóg ti mũ: “ã hã ne tóg Grego vĩ tóg há nĩ,” he mũ. “Kỹ ã mũ tỹ Egito tá ke ên tũ nĩ, ù tỹ kurã ên kã vènh génh han mũ ên, ù tỹ mil tỹ 4 (ke) mré tĩ mũ ên, governo kato tẽ mũ ên ag mré, êmã tũ mĩ tĩ mũ ên?” he tóg, Paulo mũ, major ti.

³⁹ Kỹ Paulo tóg ti mũ: “hỹ,” he mũ. “Tỹ sóg Israel nĩ,” he tóg. “Tỹ sóg cidade tỹ Tarso tá ke nĩ. Ga tỹ Cilícia tá cidade mág kãfór vê, inh mur ja ti. Isỹ povo tag mré vĩnh há tóg tĩ,” he tóg, Paulo ti, major mũ. ⁴⁰ Kỹ tóg ti mũ: “ha vĩ ge,” he mũ.

Kỹ Paulo tóg sãnsãn he jafã kri jê kỹ ag mũ ke mũ sir. Hebreu vĩ ki tóg ag mũ ke mũ, kỹ tóg:

22

¹ “inh kanhkã,” he mũ. “Ijóg,” he tóg. “Isỹ ãjag mũ inh jykre kãmén ke vê, ki êmê,” he tóg ag mũ.

² Kỹ ag tóg ti tỹ Hebreu vĩ ki ag mũ vĩ mễg mũ sir, kỹ ag tóg katy' he mũ sir.

³ Kŷ tóg ag mŷ: “tŷ sóg Israel nĩ,” he mŷ. “Cidade tŷ Tarso tá inh mur, ga tŷ Cilícia tá. Cidade tag ki sóg hã ra mog mŷ, kŷ Gamaliel tóg inh kanhrãn. Inh mŷ tóg ěg jóg'jóg ag jykre tó kãn, kŷ sóg to tar ja nĩ. Topě jykre to sóg tar tãvĩ ja nĩgtĩ, ajag tŷ ũri han mŷ ri kén,” he tóg. “Topě jykre hŷn, he sóg tĩ gé, ěg jykre ěn to, hã ra sóg kygně. ⁴ Hã kŷ sóg Jesus mré mŷ ag to jũ tãvĩ ja nĩgtĩ. Ag kãgtén sór ja inh nĩgtĩ, ũn tãtã fag ke gé. Ag sigse ja sóg nĩgtĩ, vĕse ja kãki sóg ag vãm ja nĩgtĩ gé. ⁵ Topě tũ ki rĩr tĩ to pã'i mág vŷ ki kanhró nĩ, kófa ag kar ke gé. Ag hã tóg inh mŷ permissão han ja nĩgtĩ, sŷ cidade tŷ Damasco ra tĩg jé, tá ěg mré ke ag mŷ ven jé. Tá sóg Jesus mré ke ag sigse sór ja nĩ gé, Jerusalém ra ag tatĩ kãtig jé, tag ki ag vóg kónãn jé,” he tóg, Paulo ti.

Paulo tŷ ã tŷ Jesus ki rã kãmén
(Hk 9.1-19; 26.12-18)

⁶ “Isĩg kŷ sóg Damasco tá jun mŷ. Kŷ tóg vãhã vĕnh jĕngrĕ tar tãvĩ tóg vãhã inh ki kómkóm ke mŷ. Kanhkã tá ke vĕ, vĕnh jĕngrĕ tag ti. Rã tŷ ěg nĩno kã sa ra tóg ke mŷ. ⁷ Kŷ sóg kutĕ mŷ. Kŷ sóg vĕnh vĩ mĕg mŷ, kŷ tóg inh mŷ: “Saulo', Saulo', ã tŷ ne jé isũ ag vóg kónãn nĕ?” he mŷ, vĕnh vĩ ti. ⁸ Kŷ sóg ěg Senhor mŷ: “ã tŷ ũ nĕ?” he mŷ. Kŷ tóg inh mŷ: “tŷ sóg Jesus nĩ, Nazaré tá ke ěn,” he mŷ, “ã tŷ ũn vóg kónãn sór tĩ ěn hã vŷ tŷ inh nĩ,” he tóg inh mŷ. ⁹ Inh mré mŷ ag vŷ vĕnh jĕngrĕ ěn vigvĕg mŷ. Hã ra ag tóg ũ tŷ inh mŷ vĩ mŷ mĕg tũ nĩ.

¹⁰ Kŷ sóg ěg Senhor ti mŷ: “kŷ sŷ hĕ ri kenh ke nĕ?” he mŷ. Kŷ tóg inh mŷ: “jĕg nĕ ra,” he mŷ. “Damasco ki rã. Tá ũ tóg ã mŷ tó kãn mŷ, ã tŷ nĕn han ke ti,” he tóg inh mŷ, vĕnh vĩ ti. ¹¹ Hã ra sóg nĕn ũ vĕg tũ nĩ, vĕnh jĕngrĕ ěn tar tãvĩ nĩn kŷ. Kŷ inh mré mŷ ag tóg inh nĩgĕ kãgmĩ kŷ inh pére mŷ mŷ. Hã ki ěg tóg Damasco tá junjun mŷ sir.

¹² Kŷ ũ tŷ Ananias he mŷ ěn tóg inh venh kãtĩ mŷ. Moisés tŷ ěg mŷ vĕnh jykre nĩm ja ěn han kãn tóg nĩgtĩ, Ananias ti. Damasco tá ke kar vŷ ti to vĩ há han mŷgtĩ, Israel ěn ag kar. ¹³ ěn tóg inh venh kãtĩ mŷ, kŷ tóg iso jun kŷ inh mŷ: “régrĕ',” he mŷ. “Saulo',” he tóg mŷ. “Inh ki ěvãnh ra,” he tóg. Kŷ sóg vĕsŷmĕr ti vĕg mŷ sir. ¹⁴ Kŷ tóg inh mŷ: “ěg jóg'jóg ag tŷ Topě vŷ ã kuprĕg, vãsŷ,” he mŷ, “ã tŷ ti jykre ki kanhró nĩ jé, ã tŷ ũn kuryj nĩ ěn ve jé, Cristo ěn. Ti hã tóg ã mré vĩnh mŷ,” he tóg inh mŷ, Ananias ti. ¹⁵ “ã tŷ vĕnh kar mŷ ã tŷ nĕn vĕg mŷ tónh ke vĕ, ã tŷ nĕn mĕg mŷ ti,” he tóg inh mŷ. ¹⁶ “Kŷ ěmĕ kŷ nĩ tũg nĩ. Jĕg nĕ ra, ã tŷ kype kŷ jĕ jé, Topě tŷ ã tŷ ti vĩ mranh tŷ tũ' he jé. Ti mré vĩ, ti jiji tó kŷ,” he tóg inh mŷ, Ananias ti,” he tóg, Paulo ti.

Paulo tŷ ã rãnrãj kãmén

¹⁷ “Isŷ Jerusalém ra vŷn ke kŷ sóg Topě jo ĩn krĕm ti mré vĩ mŷ. Kŷ sóg nĕn nĕ vĕg mŷ. ¹⁸ Ti hã vĕ, ěg Senhor hã vĕ. Kŷ tóg inh mŷ: “kur Jerusalém tá kutĕ,” he mŷ. “ã vĩ mĕnh ke tũ ag nĩ, ã tŷ ag mŷ inh kãmén mŷ ra,” he tóg inh mŷ.

¹⁹ Kŷ sóg ěg Senhor ti mŷ: “hã ra ag tóg isŷ nĕn han ja ki kanhró nŷtĩ,” he mŷ. “Ag sigse han ja isóg tĩgtĩ. Vĕnh kanhrãn jafã krĕm sóg ag mrãnmrãn ja tĩgtĩ gé, ũ tŷ ã ki ge kŷ nŷtĩ ag,” he sóg ti mŷ. ²⁰ “Kŷ sóg ag tŷ Estêvão tén kŷ, ag tŷ ũ tŷ ã vĩ tó mŷ ěn tén kŷ sóg tá jĕ ja nĩ gé, kŷ tóg inh mŷ há ja tĩ, ag tŷ ti tén kŷ. Ag kur ki sóg rĩr ja nĩgtĩ gé, ũ tŷ Estêvão tén mŷ ag kur ki,” he sóg, ěg Senhor mŷ.

²¹ Hã ra tóg inh mŷ: “vó, ha tĩg,” he mŷ. “Kór há ra sóg ã jĕnĕnh mŷ, kuvar há ra. Fóg kar to sóg ã jĕnĕnh mŷ, kanhgág kar to ke gé,” he tóg inh mŷ,” he tóg, Paulo ti.

²² Hã ra vĕnh kar ěn ag tóg ěmĕ kŷ nŷtĩ nĩ. Ag tŷ ti vĩ tag mĕ kŷ ag tóg prĕnrĕr mŷ sir. “!..Ti tén ra..!” he ag tóg. “!..Ũ tŷ ge vŷ kórĕg ne..!” he ag tóg. “!..Ti rĩr nĩn kŷ tóg ěg mŷ tŷ ũ nŷnh mo..!” he ag tóg. ²³ Prĕnrĕr ag tóg mŷ. Ajag kur vãm ag tóg mŷ, ga funfur han ag tóg mŷ sir. Ag jũgŷũ vĕ.

²⁴ Kŷ major vŷ: “ĩn kãra ti rãg,” he mŷ. “Nĕn fãr tŷ ti mrãnmrãn, cavalo tŷ mrãn ke jafã ri ke ěn tŷ. Hã tŷ ti ki jĕmĕ. Ag tŷ hĕ ri ke jé ã to vĩ kónãn nĕ? hemnĩ ti mŷ,” he tóg, major ti, soldado ag mŷ. Major tóg Paulo tŷ ag mŷ nĕn tó ja ěn mĕ ja tũ nĩ, ti tŷ Hebreu ag vĩ ki kãgtĩg nĩn kŷ. Hã kŷ tóg soldado ag mŷ: “ti ki jĕmĕ,” he mŷ sir.

²⁵ Kĩ ag tóg ti ség mũ, nén fár tỹ, ag tỹ ti mrãnmrãn jé. Hã ra Paulo tóg capitão mỹ, ù tỹ tá jẽ ên mỹ tóg: “mỹ ã mỹ kuryj, ag tỹ inh mrãnmrãn ke ti?” he mũ. “Tỹ sóg Romano nĩ, hã ra ag tóg nén fár tỹ inh mrãnmrãn sór mũ, ù tỹ inh ki jẽmẽg tũ ra, ag tỹ inh jyvẽn tũ ra,” he tóg, Paulo ti. ²⁶ Kĩ tóg capitão mỹ e tĩ, kỹ tóg major mỹ tónh tĩ mũ. Ti mỹ tóg: “ã tỹ ne han ke nẽ ha?” he mũ. “Romano vễ mỹr,” he tóg ti mỹ. ²⁷ Kĩ major tóg ti to kãtĩ mũ, kỹ tóg ti mỹ: “kỹ ã mỹ tỹ Romano nĩ?” he mũ. Kỹ Paulo tóg: “hỹ,” he mũ. ²⁸ Kĩ major tóg ti mỹ: “isỹ tỹ Romano nĩ jé sóg jãnkamy tỹ hẽn ri ke tỹ kajãm,” he mũ ti mỹ. Kỹ Paulo tóg ti mỹ: “inh mur kã sóg ge nĩ hã ra, inh panh ri kén,” he mũ. ²⁹ Kĩ ag tóg ti tovãnh mũ sir, ù tỹ ti mrãnmrãn ke mũ ên ag. Hã ra tóg major mỹ e tĩ, ti tỹ ti se kỹ. Ti tỹ ùn Romano senh ke tũ vễ vễ, hã kỹ tóg ti mỹ e tĩ.

Israel tỹ pã'i ag tỹ Paulo vĩ mễg mũ

³⁰ Tỹ vaj kỹ major tóg Israel ag ki jẽmẽ mãn sór mũ, ag tỹ hẽn ri ke kỹ Paulo to jũ mũ ti. Kỹ tóg ti kavãn mũ. Kỹ tóg Topẽ tũ ki rĩr tĩ to pã'i mág ag jé prěr mũ, vẽn jyvẽn tĩ kar ag ke gé. Kỹ tóg Paulo pére tĩ mũ, ag jo ti fẽg jé.

23

¹ Kỹ Paulo tóg vẽn jyvẽn ti ag vég mũ, kỹ tóg: “inh kanhkã',” he mũ. “Vẽn jykre há kar han isóg nĩgtĩ (mỹr), kurã kar ki, ùri ke gé, isỹ Topẽ mĩ êkrén kỹ,” he tóg.

² Kỹ Topẽ tũ ki rĩr tĩ to pã'i mág tóg ke mũ, ù tỹ Ananias he mũ ên vỹ: “ti jẽnky ki tãnh,” he mũ, ti jy nỹtĩ ag mỹ.

³ Kỹ Paulo tóg ti mỹ: “Topẽ vỹ ã tãnh ke mũ,” he mũ. “Jykre régre ã nĩ, kỹ ã tóg tỹ ìn to ró ri ke nĩ. Êg tỹ tinta kupri tỹ to tĩn kỹ êg tóg ti kórég vég tũ nĩgtĩ, tinta krêm ti kórég ti,” he tóg. “Inh jyvẽn sór ã tóg mũ, Topẽ jykre ki, hã ra ã hã tóg Topẽ jykre mranh, ã tỹ ag mỹ: ti tãnh ra, hen kỹ,” he tóg, Paulo ti.

⁴ Kỹ tá nỹtĩ ag tóg ti mỹ: “ã hã tóg Topẽ camarada mỹ vĩ kónãn, Topẽ tũ ki rĩr tĩ to pã'i mág mỹ,” he mũ, Paulo mỹ. ⁵ Kỹ Paulo tóg: “mẽ',” he mũ. “Ti tỹ tỹ pã'i mág nĩn ki sóg kagtĩg ja nĩ, ke tũ nĩ mũ ra sóg ti to vĩ kónãn ja tũ nĩ vễ,” he tóg. “Topẽ vĩ ki tag tóg rán kỹ nĩ nĩ, hã vỹ: ã povo tỹ pã'i mág to vĩ kónãn tũg nĩ, he mũ,” he tóg, Paulo ti.

⁶ Hã ra Paulo tóg ag vég mũ, vẽn jyvẽn tĩ ag. ù ag tóg tỹ Saduceu nỹtĩ, kỹ ù ag tóg tỹ Fariseu nỹtĩ. Vyrmỹ ag jykre nỹtĩ. Kỹ Paulo tóg jamã hár(a) ke kỹ ag mỹ: “inh kanhkã',” he mũ. “Tỹ sóg Fariseu nĩ, kỹ inh panh tóg tỹ Fariseu nĩ gé,” he tóg. “Topẽ vỹ ùn ter mũ ag rĩnrĩn mãn ke mũ. Tag vỹ inh mỹ ki hã ke nĩ, hã kỹ ãjag tóg iso jũgũ mũ,” he tóg, Paulo ti.

⁷ Ti tỹ tag tó kar kỹ vẽn jyvẽn tĩ ag tóg vẽn kãpugpóv kỹ nỹtĩ. Fariseu ag tóg Saduceu ag mré vĩ jũgũ han mũ, jagnẽ vĩ kafãn kỹ. ⁸ Saduceu ag mỹ tóg tũ tĩ, Topẽ tỹ êg ter mũ rĩn mãn mũ ti. Topẽ tỹ jẽnẽ jafã tóg ag mỹ tũ tĩ gé. Kỹ vẽn kuprĩg tóg ag mỹ tũ tĩ gé. Hã ra Fariseu ag mỹ tóg nỹtĩ, vẽn kuprĩg, Topẽ tỹ jẽnẽ jafã, ti tỹ êg rĩn mãn mũ ke gé. Hã kỹ ag tóg jagnẽ vĩ kafãn mũ sir. ⁹ Kỹ ag tóg jagnẽ to jũgũ kỹ prẽnprěr mũ. Fariseu ag kãmĩ ù ag tóg jẽg nẽ nẽ kỹ, Saduceu vĩ kafãn kỹ ag tóg: “nén ù kórég han tũ ti nĩ, Paulo ti,” he mũ. “Hẽn ri ke mũn ti hỹn nén nẽ ve ja nĩ, vẽn kuprĩg hẽn ri ke mũn, ke tũ nĩ kỹ Topẽ tỹ jẽnẽ jafã,” he ag tóg, Fariseu ag, Topẽ vĩ to professor ag. ¹⁰ Kỹ vẽn génh tóg kutẽ mũ ve nĩ. Kỹ major tóg Paulo to jykren mũ. “Ag hỹn gen kỹ ti janjãn ke mũ, ti jónjãn kỹ,” he tóg, vẽn génh ven kỹ. Kỹ tóg soldado ag mỹ: “kur mũ jẽg, ti kãgmĩ jé, êg ìn kãra ti rãg jé,” he mũ, major ti. Kỹ ag tóg ìn kãra ti rãg mũ.

¹¹ Tỹ kuty kỹ Jesus tóg Paulo mré vĩ mũ. “Kamẽg tũg ra,” he tóg ti mỹ. “Jerusalém tá ã tóg inh vĩ tó há han. Ge jé ã tóg ke mũ, cidade tỹ Roma tá,” he tóg, Paulo mỹ, Jesus ti.

Ag tỹ Paulo tén sór

¹² Tỹ vaj kỹ Israel ag tóg vẽn mãn mũ sir. Jagnẽ mré ag tóg jykren mũ. “Paulo tén jé êg tóg ke mũ,” he ag tóg. “Jẽn ke tũ êg nĩ, kron ke tũ êg nĩ gé, êg tỹ Paulo tén ke jo, ke tũ nĩ mũ ra Topẽ jé êg vóg kónãn,” he ag tóg. ¹³ ù tỹ 40 (ke) kãfór vễ, jagnẽ mré jykren mũ ag. ¹⁴ Ên ag vỹ Topẽ tũ ki rĩr tĩ to pã'i mág ag mré vĩnh kãmũ mũ, kófa ag mré hã. “Jagnẽ

mré ěg jykren,” he ag tóg. “Nén ũ kāmēnh ke tū ěg nĩ, ěg tỹ Paulo tén ke jo, ke tū nĩ mũ ra Topē jé ěg vóg kónān,” he ag tóg. ¹⁵ “Kỹ major mré vĩnh mũmnĩ. Vēnh jyvēn tĩ ag mré mũmnĩ, ājag tỹ ti mré vĩ jé. Ti mỹ: ěg tỹ ti tỹ nén ũ kórég han mũ to jykren mǎn ke vē, hemnĩ, hǎ to ěg mỹ ti ven mǎn nĩ, hemnĩ ti mỹ. Ti tỹ: hej, hen kỹ ěg tóg ti tén ke mũ, kỹ tóg ājag to jun ke tū nĩ,” he ag tóg, pǎ'i ag mỹ.

¹⁶ Hǎ ra Paulo ve fi kósın tóg ag tỹ han sór mũ ěn mēg mũ. Kỹ tóg soldado jo ĩn kǎra rǎ kỹ Paulo mỹ tó mũ. ¹⁷ Kỹ Paulo tóg capitão ũ jé prēr kỹ ti mỹ: “major mỹ kyrũ tag pére tĩg, ti tỹ ti mỹ nén ũ tó jé,” he mũ ti mỹ.

¹⁸ Kỹ tóg ti pére tĩ mũ sir, major to. Kỹ tóg ti mỹ: “ũ se kỹ jē ěn tóg, Paulo ěn tóg inh jé prēr,” he mũ, “kỹ tóg inh mỹ: “kyrũ tag tỹ major mỹ ti pére tĩg,” he mũ. Ti tỹ nēji ā mré vĩ sór nē,” he tóg, capitão ti.

¹⁹ Kỹ major tóg ti nĩgē kǎgmĩ kỹ ti pére tĩ mũ, vēnh péju kỹ. Kỹ tóg ti mỹ: “ǎ hē ri ké?” he mũ.

²⁰ Kỹ tóg ti mỹ: “Israel ag tóg to jykren, ag tỹ ā mỹ to vĩ jé, ā tỹ vaj kỹ Paulo jēnē jé, vēnh jyvēn tĩ ag to. Ón kỹ ag tóg ā mỹ: “ti ve mǎn jé ěg tóg ke mũ, ěg tỹ ti to jykren mǎn jé,” hēnh ke mũ. Hǎ ra ag ón vē,” he tóg, major mỹ. ²¹ “Ag mỹ: hej, he tũg nĩ. Ũ tỹ 49 (ke) ag tóg, ti jo vājig mũ. Jagnē mré ag jykren, ag tỹ nén ũ konh ke tū nĩ jé, kron ke tū nĩ jé, ti tén ken jo. “Ke tū nĩ mũ ra Topē jé ěg vóg kónān,” he ag tóg. ěn ag tóg ā tỹ ag mỹ: hej, hēnh ke jāvānh mũ sir,” he tóg, kyrũ ti, major mỹ.

²² Kỹ major tóg ti mỹ: “ũ mỹ: ti mỹ sóg tó, he tũg nĩ,” he mũ. “Ha jatun mỹ tĩg,” he tóg ti mỹ.

Major tỹ Paulo jēnēnh ke, pǎ'i mág tỹ governador ra

²³ Kỹ major tóg capitão régre ag mỹ: “kāmũ jēg ra,” he mũ. Kỹ tóg ag mỹ: “ājag tũ kǎnkǎn ra,” he mũ. “Cidade tỹ Cesaréia ra ājag mũnh mũ, kuty tag kǎ 9 horas ki. Kỹ soldado tỹ 200 (ke) ag vỹ mũnh mũ, cavalo kri mũ ag tỹ 70 (ke) ag ke gé, kỹ ũ tỹ 200 (ke) ũ ag vỹ rógro pu gég mũnh mũ,” he tóg. ²⁴ “Kỹ cavalo ũ ag vỹ mũnh ke mũ gé, Paulo tỹ kri nĩ jé. Governador tỹ Félix to ti pére mũ jēg, tĩ tỹ jatun mỹ tá jun jé,” he tóg, major ti, capitão ag mỹ.

²⁵ Kỹ tóg pǎ'i mág tỹ Félix mỹ rán mũ, major ti, kỹ tóg:

²⁶ “Cláudio Lísias tỹ rá vē,” he mũ. “Isỹ Governador tỹ Félix mỹ rán hǎ vē, ā tỹ inh kǎfór nĩn kỹ. Ā mỹ sóg: ā mỹ há? he mũ,” he tóg.

²⁷ “Tag vỹ tỹ Israel ag vēse jē. Ti tén kren ag tóg. Hǎ ra sóg ti tỹ tỹ Romano nĩ jēmē, kỹ sóg inh soldado ag mré ti kren han. ²⁸ Hǎ ra sóg ti kato tē mũ ag ki jēmē sór mũ. Ag tỹ hē ri ke jé ti to jũgũ nē? he sóg. Hǎ kỹ sóg vēnh jyvēn tĩ ag mỹ ti ven mũ. ²⁹ Kỹ sóg vég mũ. Ag jykre tugrĩn ag tóg ti to jũgũ mũ. Crime han tũ ti nĩ. Ti tỹ nén ũ to ter jé han tũ ti nĩ gé. Kỹ tóg ti tỹ nén ũ to se kỹ nỹ jé tóg han tũ nĩ gé. ³⁰ Hǎ ra sóg nén ũ mē gé. Ti to ag tóg vājig mũ sir, hǎ kỹ sóg vēsỹmér ti jēnēg mũ ā to. Ti kato vĩ mũ ag mỹ sóg: ti hǎ mré vĩmnĩ, he mũ gé,” he tóg.

Vēnh rá ki tóg tó ja nĩ, major ti, governador mỹ.

³¹ Kỹ soldado ag tóg han mũ sir, ti tỹ ag mỹ nén tó mũ ti. Paulo pére ag tóg mũ mũ. Kuty tá mũ kỹ ag tóg cidade tỹ Antipátride tá junjun mũ. ³² Tỹ vaj kỹ ag tóg kyrǎgrǎ mũ, ājag jamǎ ra, ũ tỹ ājag pēn kǎ mũ mũ ag. Cavalo kri mũ ag tóg ti pére mũ mũ inhhǎ. ³³ ěn ag vỹ Cesaréia tá junjun mũ. Governador mỹ ag tóg vēnh rá ěn nĩm mũ. Kỹ ag tóg ti mỹ Paulo ven mũ.

³⁴ Kỹ pǎ'i mág ěn tóg vēnh rá vég mũ, kỹ tóg Paulo mỹ: “tỹ ā ga tỹ hē tá ke nĩ, ga tỹ ne tá?” he mũ. Kỹ tóg ti mỹ: “ga tỹ Cilícia tá,” he mũ. ³⁵ Kỹ tóg Paulo mỹ: “ǎ kato vĩ mũ ag tỹ junjun kỹ sóg ā ki jēmēnh mũ,” he mũ. Kỹ tóg soldado ag mỹ: “pǎ'i mág tỹ Herodes tỹ vēnh jyvēn jafǎ krēm ti nĩm,” he mũ, pǎ'i mág tỹ Félix ti.

¹ 5 dias tūg kŷ pā'i tŷ Ananias vŷ tá jun mŷ, cidade tŷ Cesaréia tá. Topē tū ki rŷr tŷ to pā'i mág vē. Kófa ag vŷ junjun mŷ gé ti mré. Ū vŷ vŷ káfór han tŷ gé, ti jiji hā vŷ: Tértulo, he mŷ. Kŷ ag tóg pā'i mág tŷ governador mŷ Paulo tó mŷ, ón kŷ ti kato vŷ kŷ. ² Kŷ tóg Paulo jé prēr mŷ.

Kŷ Tértulo tóg ti kato vŷ mŷ, kŷ tóg: “Félix’,” he mŷ. “Há tāvī ā tóg jē,” he tóg ti mŷ. “Ēg ki ā tóg rŷr há tāvī han tŷ, kŷ ěg tóg jatun mŷ nŷtŷ. Ā tŷ nén to jykrén mŷ kar tóg ěg mŷ há tŷ,” he tóg, Félix mŷ. ³ “Hā kŷ ěg tóg ā to há (pē) tāvī nŷtŷ. Ā to ěg jykrén há han tŷ. Kurā kar ki ěg tóg ā to vŷ há han tŷ,” he tóg. ⁴ “Kŷ ěg tóg ā mré nén ū sŷ (pē) to vŷnh kāmŷ mŷ. Kutar ā nŷ, ěg ki rŷr há han kŷ, hā kŷ ěg tóg ā mŷ vŷ mág han sór tū nŷ. Ēg to ā há nŷ, hā kŷ ā tóg ěg vŷ mē sór mŷ,” he tóg.

⁵ “Tag ti vŷ vŷ kónān tāvī han tŷ. Israel kar ag krŷn kónān tóg tŷ, kŷ ag tóg tŷ tugrŷn vēnh kāpugpóv kŷ nŷtŷ. Ga kar mŷ tóg ke tŷ. Kŷ tóg tŷ Nazaré tá ke ěn mré ke ag pā'i mág nŷ gé,” he tóg. Paulo to tóg ke mŷ. ⁶ “Kŷ tóg Topē jo ĩn kāvénh sór mŷ gé, hā kŷ ěg tóg ti kāgmŷ. Ēg tŷ ěg jykre ki ti jyvén ke vē vē. ⁷ Hā ra Lísias tóg kātŷ mŷ, major ěn ti. Kŷ tóg ti kāgmŷ mŷ. Ēg kju ki tóg ti tŷ hān ke mŷ, jŷ kŷ. ⁸ Kŷ tóg ti kato vŷ mŷ ag mŷ ké, ag tŷ ā venh kāmŷ jé. Ā tŷ vēse tag ti ki jēmē kŷ ā tóg venh mŷ. Ki hā ěg tóg ke tŷ. Ā mŷ ti tónh mŷ,” he tóg, Tértulo ti. Ti tŷ Paulo to ón hā vē.

⁹ Kŷ Israel ag tóg ti mré tó mŷ gé, pā'i ěn ag. “Ti tŷ ki hā ke vē,” he ag tóg, Tértulo to.

Paulo tŷ vēnh kāmén

¹⁰ Kŷ governador tóg Paulo mŷ ā nŷgé tŷ ven mŷ, Paulo vŷ jé. Kŷ Paulo tóg: “prŷg tŷ hēn ri ke ki ā tóg tŷ pā'i mág nŷ, Israel ag mŷ,” he mŷ. “Hā kŷ tóg sŷ ā mŷ ĩnh jykre tón kŷ tóg ĩnh mŷ sér tŷ,” he tóg.

¹¹ “Kurā tŷ 12 pātén tū tóg nŷ, sŷ Jerusalém tá jun ti. Sŷ tá Topē tū han jé sóg ra tŷg ja nŷgtŷ. Vēnh kar vŷ tá ĩnh ve ja nŷgtŷ. Ag hŷn ā mŷ tónh mŷ, ā tŷ ag ki jēmén kŷ,” he tóg. ¹² “Hā ra sóg jatun mŷ isŷ han tŷ ja nŷ. Topē jo ĩn krēm sóg ū vŷ kafān ja tū nŷ. Vēnh génh han ja tū sóg nŷ gé, ěg vēnh kanhrān jafā krēm. Cidade ki sóg nén ū kórég han ja tū nŷ gé,” he tóg. ¹³ “Ag tŷ ĩnh kato vŷ mŷ pi(jé) tŷ ki hā ke nŷ. Ā tŷ ve há nŷn kŷ ā tóg ki kanhró nŷnh mŷ,” he tóg. ¹⁴ “Kŷ sóg ā mŷ ki hā tónh mŷ ha,” he tóg. “ĩnh jóg'jóg ag tŷ Topē jykre han tŷ ěn hā han isóg tŷ gé, kŷ sóg vāsŷ nén rán kŷ nŷ ěn kri fig tŷ gé, ū tŷ Topē vŷ tó tŷ ag tŷ nén rán ja ěn ti, Moisés mré hā. Hā ra sóg vēnh jykre tág tag han mŷ gé, Topē tŷ ūri ěg mŷ nén tó mŷ ti. Tag to ag tóg: “vyr mŷ vēnh jykre vē,” he tŷ, pā'i ag. ¹⁵ Hā ra sóg ag ri kén Topē tŷ nén han ke ěn ve sór mŷ. Ti tŷ ěg ter kar kŷ ěg rŷn mán ěn ve sór isóg mŷ. Ūn jykre kuryj ag rŷn mán jé tóg ke mŷ, ūn jykre pāno ag ke gé,” he tóg. ¹⁶ “Kŷ sóg tŷg há han sór mŷ (mŷr), ū tŷ iso: nén ū kórég han ti huri, he tū nŷn jé,” he tóg. “Topē rŷnve sóg tŷg há han sór mŷ,” he tóg.

¹⁷ “Vāhā sóg Jerusalém tá jun mán. Prŷg tŷ hēn ri ke ki sóg tá jun ja tū nŷ vē. Hā ra sóg ra vyr, sŷ ĩnh povo ki ūn jagāgtar fag mŷ nén ū vin jé, sŷ Topē mŷ nén ū pŷn jé gé,” he tóg. ¹⁸ “Vēnh jānhkrig ja sóg nŷ, ěg jykre ki. Kŷ sóg Topē jo ĩn kāra rā ja nŷ, jatun mŷ, vēnh génh han tū kŷ. ¹⁹ Hā ra Israel ag tŷ Ásia tá ke ag vŷ tá ĩnh ve ja nŷgtŷ gé,” he tóg. “Ēn ag tŷ ā jo nŷtŷn kŷ, ag tŷ ĩnh kato vŷ kŷ tóg há tŷ vē, ag tŷ iso jykrén mŷ ra, ag tŷ iso jŷ mŷ ra,” he tóg. ²⁰ “Hā ra ū tŷ ki nŷtŷ ag tŷ ā mŷ ĩnh jykre kórég tónh ke vē. Vēnh jyvén tŷ ag vŷ ĩnh ki jēmē ja nŷ, kŷ tag ag vŷ tá nŷtŷ ja nŷ. Hā ra ag tóg tá isŷ nén ū vēnhmŷ han ve ja tū nŷ,” he tóg. ²¹ “Vēnh vŷ pir tŷ sóg jamā hár(a) tó ja nŷ, isŷ ag rŷnve jēn kŷ, hā vŷ: Topē tŷ ūn ter mŷ rŷn mán mŷ ěn kri sóg fig mŷ, hā kŷ ājag tóg ūri iso jŷgŷjŷ mŷ, he ja sóg nŷ ag mŷ,” he tóg, Paulo ti.

²² Kŷ Félix tóg kurā ū kā ti ve mán sór mŷ, pā'i mág tŷ governador ěn ti. Jesus japry ki kanhró tóg nŷ, Jesus jamŷn ki, ti jykre ki, Félix ti. Hā kŷ tóg: “major tŷ Lísias kātŷg kŷ sóg ājag ki jēmē kán mŷ,” he mŷ. ²³ Kŷ tóg capitāo mŷ: “ti fēg han ra,” he mŷ. “Ti jagāgtān ra hā ra,” he tóg. “Ti mré ke ag tŷ ti mŷ nén ū nŷm sór kŷ tóg há nŷ. Ag mŷ nenh tŷg nŷ,” he tóg, capitāo mŷ, Félix ti. Ti tŷ Paulo to ken hā vē.

Félix tỹ Paulo ki jēmē mǎn

²⁴ Si há tũ ra Félix vỹ Paulo vỹ mẽ mǎn sór mũ, ti prũ fi mré. Fi jyjy hã vỹ: Drusila, he mũ. Israel fi vỹ. Kỹ tóg Paulo jé prěr mũ sir, Félix ti, ti tỹ fag mỹ Jesus Cristo ki rã kǎmén jé.

²⁵ Kỹ Paulo tóg vãnh jykre kuryj kǎmén mũ sir. Věso jykrén ke kǎmén tóg mũ. Topě tỹ kar kỹ vãnh kar tỹ nén han mũ tó tóg mũ. Kỹ Félix tóg ǎ kaně tỹ jũrũn' ke mũ sir, ti tỹ ǎ jykre pǎno mĩ ěkrén kỹ. Kỹ tóg ti mỹ: “ha ver tĩg,” he mũ. “Kejěn sóg ǎ ki jēmē mǎn mũ gé, kar kỹ, inh kutar tũ nĩn kỹ,” he tóg, Félix ti, Paulo mỹ. ²⁶ Hã ra tóg Paulo ki jǎnkamy mǎn sór mũ gé, ti tỹ ti kavǎn jé, ti tỹ ti kyvǎn jé. Hã jé tóg kǎnhmar ti jé prěr mǎn', kǎnhmar ti jé prěr mǎn' he tĩ, ti mré vēmén jé. Hã ra Paulo tóg ti mỹ ven tũg.

²⁷ Hã ki prỹg rėgre tóg tũg mũ sir. Kỹ Félix jėgja kǎ ũ tóg jě mũ sir, hã vỹ: Pórcio Festo, he mũ. Kỹ Félix tóg Israel ag tỹ ǎ to vỹ há han sór mũ, ag tỹ ti tỹ jykrén há han jé, ti nón. Hã kỹ tóg Paulo kavǎg tũ nĩ. Se kỹ tóg jě nĩ.

25

Paulo tỹ pǎ'i mág tỹ Imperador ve sór

¹ Hã kỹ Festo vỹ tỹ governador nĩ sir. Ti tỹ 3 (ke) dias ěn kǎ pǎ'i mág nĩn kỹ tóg cidade tỹ Cesarėia tá kutě kỹ cidade tỹ Jerusalém ra tĩ mũ. ² Kỹ Topě tũ ki rĩr tĩ to pǎ'i mág ag vỹ Israel há ag mré vỹ mág han mũ, Paulo kato. Kỹ ag tóg governador mỹ nén ũ to vỹ mũ. ³ “ǎ tỹ ěg to há nĩn kỹ vãnh vỹ jěněmnĩ, Paulo tỹ Jerusalém mĩ kǎtĩg jé, ěg mĩ,” he ag tóg ti mỹ. Hã ra ag tóg ti kǎtĩg kỹ ti tén sór mũ, ěpry kri, ěmĩn kri.

⁴ Hã ra Festo tóg ag mỹ: “Cesarėia tá tóg se kỹ jě, Paulo ti,” he mũ. “Jó sóg kǎnhmar ra tĩg mũ gé,” he tóg. ⁵ “Kỹ ǎjag pǎ'i ag vỹ inh mré mũnh mũ gé. Tá sóg ǎjag mré ti venh mũ, ti tỹ hěn ri ke mũn nén ũ kórėg han ja ěn ti,” he tóg. ⁶ Kỹ tóg tá nĩ sĩ han mũ sir, 8 (ke) dias hỹn hěn ri ke mũn, ke tũ nĩ kỹ 10 (ke) dias hỹn. Kỹ tóg Cesarėia ra vỹn ke mǎn mũ. Tỹ vaj kỹ tóg ǎ tỹ kri nĩn kỹ ag jyvěh jafǎ kri nĩ mũ. Kỹ tóg soldado mỹ: “Paulo pére kǎtĩ,” he mũ. ⁷ Ti kǎtĩg kỹ Israel ag tóg ti jy nỹtĩ, Jerusalém tá kǎmũ ag. Paulo kato ag tóg vỹ tỹ hěn ri ke han mũ. Ti jykre pǎno tugtó ag tóg mũ sir, ón kỹ, hã ra tóg ag mỹ ki krov tũ nĩ.

⁸ Kỹ Paulo tóg vãnh kǎmén mũ sir, kỹ tóg: “Israel ag jykre mranh ja tũ sóg nĩ,” he mũ. “Topě jo ĩn kavěnh ja tũ sóg nĩ gé. Kỹ sóg ěg kar pǎ'i mág tỹ Imperador vỹ mranh ja tũ nĩ gé,” he tóg, Paulo ti.

⁹ Hã ra Festo tóg Israel ag mỹ nén ũ há han sór mũ. Hã kỹ tóg Paulo mỹ: “mỹ ǎ tỹ Jerusalém ra tĩg jé há?” he mũ. “Sỹ tá ǎ jykre venh há tóg tĩ, ag tỹ ǎ kato vỹ ti,” he tóg, Festo ti.

¹⁰ Hã ra tóg Paulo mỹ ag tỹ tá ti tén ha mẽ tĩ, hã kỹ tóg: “ne jé,” he mũ. “Ěg pǎ'i mág tỹ Imperador jėgja kǎ ǎ tóg inh ki jēmėg mũ,” he tóg. “Hã kỹ ǎ tỹ tag ki inh jykre venh ke vě,” he tóg. “Israel ag to sóg jykre pǎno han ja tũ nĩ (mỹr). Kỹ ǎ tóg ki kanhró nĩ (mỹr), ha mẽ,” he tóg. ¹¹ “Isỹ crime han ra isỹ to ter ke vě vě. Kỹ sóg ne tónh ke tũ nĩ vě. Hã ra ag tóg ón kỹ inh kato vỹ mũ sir. Hã kỹ tóg ǎ tỹ ag mỹ inh fėg kỹ věnhmỹ tĩ. ǎ tỹ ag mỹ nén há han sór vě (mỹr), hã kỹ ǎ tóg ag mỹ ke mũ. Ěg pǎ'i tỹ Imperador hã tóg ǎ pin kỹ inh jykre venh ke mũ,” he tóg, Paulo ti.

¹² Kỹ Festo tóg ǎ mré jykrén mũ ag mré vỹ mũ, kỹ tóg Paulo mỹ: “ǎ tỹ Imperador ve sór kỹ ǎ tóg Imperador venh tĩg mũ, cidade tỹ Roma ra,” he mũ, Paulo mỹ.

Pǎ'i tỹ Agripa tỹ Paulo mré vỹ

¹³ Si há tũ ra Israel ag pǎ'i mág tỹ Agripa vỹ cidade tỹ Cesarėia tá jun mũ, ti prũ tỹ Berenice fi mré. Fag tỹ Festo to pygsa ke vě. ¹⁴ Tá fag tóg kurǎ pir tũg mũ. Kỹ Festo tóg ti mỹ Paulo kǎmén mũ. Kỹ tóg ti mỹ: “Félix vỹ věse ũ kavǎn ja tũ nĩ,” he mũ. ¹⁵ “Kỹ Topě tũ ki rĩr tĩ to pǎ'i mág ag tóg inh mỹ ti kǎmén, Israel ag kófa ag ke gé. Jerusalém tá ag tóg inh mré ti kato vỹ, isỹ ag mỹ: té, ha ti vóg kónǎn, he jé,” he tóg. ¹⁶ “Kỹ sóg ag mỹ: ěg jykre tóg ge tũ nĩ, he mũ. Ěg pi(jé): ti tén ra, henh mũ', kǎnhmar', he sóg. Ti kato vỹ mũ ag tỹ ti kato nỹtĩn kỹ tóg vãnh kǎmén tĩ, věse ti. Kar ěg tóg ti vóg kónǎn tĩ sir. Romano

jykren hã vĕ, he sóg ag mÿ,” he tóg Festo ti. ¹⁷ “Hã kÿ ag tóg tag ki vĕnh mǎn mÿ. Kÿ sóg vĕsÿmĕr ag vĕg mÿ, tÿ vaj kÿ. Inh nĭg jafǎ kri nĭ kÿ sóg Paulo jé prĕr mÿ,” he tóg. ¹⁸ “Kÿ ag tóg ti kato vĭ mÿ. Hã ra ag tóg isÿ nĕn to jykrĕn mÿ tó tÿ nĭgtĭ (mÿr), ti jykre kórĕg ti,” he tóg. ¹⁹ “Ag Topĕ jykre tó ag tóg mÿ. Ũn ter mÿ tó ag tóg mÿ, ag tÿ ũn to: Jesus, he mÿ ĕn ti. Hã ra Paulo tóg ti to: rĭr ti jĕ nĭ, he mÿ,” he tóg. ²⁰ “Kÿ sÿ ne to jykrĕn ke tóg tÿ tĭ inh mÿ. Kÿ sóg Paulo mÿ: ã mÿ Jerusalĕm ra tĭg ke tÿ nĭ? he mÿ. Tá ag tóg ã jyvĕn há han mÿ sir, he sóg ti mÿ,” he tóg. ²¹ “Hã ra Paulo tóg ĕg pǎ'i mág tÿ Imperador ve sór mÿ, ti tÿ ti jykre ve jé. Hã kÿ sóg soldado ag mÿ: ti fĕg han ra, he mÿ. Kejĕn sóg Imperador ra ti jĕnĕnh mÿ, he sóg ag mÿ,” he tóg, Festo ti, pǎ'i tÿ Agripa mÿ.

²² Kÿ Agripa vÿ Festo mÿ: “sÿ ti vĭ mĕnh hã tóg ti,” he mÿ.

Kÿ Festo tóg: “vaj kÿ ã tóg ti vĭ mĕnh mÿ,” he mÿ

²³ Tÿ vaj kÿ Agripa vÿ kǎtĭ mÿ, Berenice fi mré. Kur sĭnvĭ rĭnh kÿ fag nÿtĭ, pǎ'i mág kur ti. Tenente ag mré fag tóg kǎmÿ mÿ, ũn kǎfór ag mré ke gé, cidade ĕn tá ke ag. Īn mág kǎra ag tóg ge mÿ. Kÿ Festo tóg Paulo jé prĕr mÿ sir. Kÿ ag tóg ti pére kǎmÿ mÿ.

²⁴ Kÿ Festo vÿ: “pǎ'i tÿ Agripa’,” he mÿ. “Tag ki ke kar’,” he tóg. “Tag ti ve ra ha,” he tóg. “Israel kar ag tóg Jerusalĕm tá inh mré ti to vĭ. Tag ki ag tóg inh mré vĭ mÿ gé ti to. Prĕnprĕr ag tóg, ti ter jé,” he tóg. ²⁵ “Hã ra sóg vĕg mÿ. Nĕn ũ vĕnhmÿ han tÿ tóg nĭ, ti tÿ to ter jé. Kÿ tóg pǎ'i mág tÿ Imperador ve sór mÿ, hã kÿ sóg to jykrĕn mÿ. Sÿ ti jĕnĕnh ke vĕ,” he tóg. ²⁶ “Hã ra sóg ti to nĕn rán ke ki kagtĭg nĭ ver, sÿ Imperador mÿ nĕn rán jé. Hã kÿ sóg ti jé prĕr, ãjag tÿ ti ve jé, ã tÿ ti ve jé, pǎ'i tÿ Agripa’,” he tóg. “Ãjag tÿ ti ki jĕmĕ kÿ sóg sÿ nĕn rán ke ki kanhró nĭnh mÿ,” he tóg. ²⁷ “Sÿ nĕn rán tÿ ra ti jĕnĕ kÿ tóg vĕnhmÿ nÿnh mÿ, sÿ ag tÿ ti kato nĕn tó mÿ ĕn rán tÿ ra,” he tóg, Festo ti.

26

Paulo tÿ vĕnh kǎmĕn mǎn

¹ Kÿ Agripa vÿ Paulo mÿ: “ã tÿ vĕnh kǎmĕn kÿ tóg há tĭ,” he mÿ. Kÿ Paulo tóg ã nĭgé tÿ krÿg he mÿ, kÿ tóg: “pǎ'i Agripa’,” he mÿ. ² “Ã hã ne tóg Israel jykre kar ki kanhró nĭ'. Hã kÿ tóg inh mÿ há tĭ, sÿ ũri ã jÿ vĭ kÿ,” he tóg. ³ “Israel ag tÿ inh kato vĭ mÿ to sóg kǎmĕn kǎn sór mÿ ã mÿ,” he tóg. “Hã kÿ jatun mÿ inh vĭ jĕmĕmnĭ,” he tóg.

⁴ “Israel kar vÿ inh ki kanhró nÿtĭ, vǎsÿ, isĭ kǎ, isÿ inh mur ja tá nĭn kǎ, isÿ kar kÿ Jerusalĕm tá nĭn kÿ ke gé,” he tóg. ⁵ “Isĭ kǎ sóg ĕg jykre han kǎn mÿ, tag ki kanhró ag nÿtĭ, ag tÿ tó sór kÿ,” he tóg. “Tÿ sóg Fariseu nĭ (mÿr), jó Fariseu ag vÿ ĕg jykre kar to tar nÿtĭ (mÿr),” he tóg. ⁶ “Hã ra ag tóg inh kato vĭ mÿ. Topĕ vÿ ĕg jóg'jóg ag mÿ: “rĭr mǎn jé ãjag tóg ke mÿ, ãjag ter kÿ,” he ja nĭgtĭ. Ti vĭ tag kri sóg fig mÿ, hã kÿ ag tóg inh kato vĭ mÿ,” he tóg. ⁷ “Povo tÿ 12 (ke) vÿ tÿ ĕg nÿtĭ. Ĕg kar vÿ Topĕ jykre hyn han tĭ, kuty ki, kurǎ ki ke gé. Ĕg tÿ ter kar rĭr mǎn jé, hã jé ĕg tóg ke tĭ, hã jé ĕg tóg Topĕ jykre han tĭ, pǎ'i tÿ Agripa’,” he tóg. “Sÿ Topĕ tÿ ĕg mÿ tag tó kri fi kÿ Israel ag tóg inh kato vĭ mÿ,” he tóg. ⁸ “Mÿ ãjag mÿ vĕnhmÿ, Topĕ tÿ ũn ter kar rĭn mǎn ke ti'?” he tóg. “Vĕnhmÿ ke tÿg nĭ,” he tóg, Paulo ti.

⁹ “Hã ra sóg vǎsÿ Jesus kato tĕ ja nĭ gé. Nazaré tá ke ĕn mré ke ag vóg kónǎn jagy han ja sóg nĭ vĕ, vǎsÿ,” he tóg. ¹⁰ “Jerusalĕm tá sóg ke ja nĭgtĭ. Jesus tÿ ag sigse ja sóg nĭgtĭ gé. Topĕ tÿ ki rĭr tĭ to pǎ'i mág ag vÿ inh mÿ tag to permissǎo han ja nĭgtĭ gé,” he tóg. “Ag tÿ Jesus mré ke ag kǎmĭ ũ tĕn kÿ tóg inh mÿ há ja tĭgtĭ gé,” he tóg. ¹¹ “Ĕg vĕnh kanhrǎn jafǎ krĕm isóg ag vóg kónǎn ja nĭgtĭ gé, ag tÿ Jesus ki ge tag tovǎnh jé, ag tÿ ti mÿ vĭ kónǎn jé. Ag to sóg jÿ tǎvĭ ja nĭgtĭ gé, inh fe tÿ gÿm ken kÿ. Kÿ sóg cidade ũ ra ag nón tĭg ja nĭgtĭ gé, ag vóg kónǎn jé,” he tóg.

Paulo tÿ ã tÿ Jesus ki rǎ kǎmĕn

(Hk 9.1-19; 22.6-16)

¹² “Hã kÿ sóg cidade tÿ Damasco ra tĭg ja nĭ gé. Topĕ tÿ ki rĭr tĭ to pǎ'i mág ag vÿ inh mÿ permissǎo han ja nĭgtĭ, inh mÿ: ha tĭg, hen kÿ. ¹³ Ĕpÿry jagma sóg meio dia ki jĕngrĕ tar vé, kanhkǎ tá. Rǎ kǎfór vĕ, ha mĕ, pǎ'i,” he tóg. “Jĕngrĕ ĕn vÿ inh ki kóm'kóm kĕ, inh

mré mū ag ki ke gé. ¹⁴ Kĩ ěg kar vỹ vár mū, ga kri. Kĩ sóg vĕnh vĩ mĕ. Inh mré tóg vĩ, Hebreu vĩ ki, kũ tóg inh mỹ: “Saulo', Saulo',” he mū. “Ā hã ne tóg isũ ag vóg kónãn nĩ,” he tóg inh mỹ. “Ā vóg isóg mū, ka junun kri ferro ěn tỹ, monh vóg jafã ěn tỹ. Kĩ tóg ã tỹ inh kato nig kũ, ã tỹ ka kato vãsã kũ tóg kaga mág tĩnh mū,” he tóg inh mỹ, vĕnh vĩ tĩ,” he tóg, Paulo ti.

¹⁵ “Kĩ sóg ěg Senhor mỹ: “ã tỹ ũ nĕ?” he mū. Kĩ tóg inh mỹ: “tỹ sóg Jesus nĩ,” he mū. “Ā tỹ ũn vóg kónãn sór tĩ ěn vỹ tỹ inh nĩ,” he tóg inh mỹ. ¹⁶ “Jĕg ra, vĕnh rã hã jĕg,” he tóg. “Ā mỹ sóg vĕnh ven, ã tỹ isũ han jé, ã tỹ nĕn vĕg mū tag tó jé. Ā mỹ sóg vĕnh ven mãn ke mū gé, kejĕn. Tag kar tó jé ã tóg ke mū,” he tóg inh mỹ. ¹⁷ “Ā povo mỹ sóg ã jĕnĕnh mū, fóg kar ag mỹ ke gé, kanhgág kar ag mỹ ke gé. Hã ra sóg ã jy nĩgãn mū,” he tóg inh mỹ. ¹⁸ “Ag kanĕ nugnón sór inh mū (mỹr). Ag tỹ vĕnh jykre pãno han kũ tóg ag kãki kuty nĩ sir, hã ra sóg ag kãki jĕngrĕ han sór mū. Satanás krĕm ag nỹtĩ, Japo krĕm. Hã ra sóg ag kygvãn sór mū, ag tỹ inh jykre han jé. Ag tỹ inh vĩ mranh tỹ sóg vĕnh pãte fón sór ke mū (mỹr), ag tỹ ũ tỹ inh ki ge kũ nỹtĩ ag mré kanhkã tá nỹtĩnh ken jé, isỹ ũn kuprĕg kar ag mré hã,” he tóg inh mỹ, Jesus ti,” he tóg, Paulo ti.

Paulo tỹ ã rãnrãj kãmĕn

¹⁹ “Kĩ sóg ti vĩ mranh tũ nĩ, pã'i tỹ Agripa',” he tóg. “Kanhkã tá nĩ kũ tóg inh mré vĩ ja nĩ, Jesus ti, kũ sóg ti vĩ han. ²⁰ Damasco tá ke ag mỹ sóg tó vĕn, kar Jerusalĕm tá ke ag mỹ ke gé, ga tỹ Judĕia tá ke ag kar mỹ ke gé. Israel kar ag mỹ sóg tó mū, kar sóg fóg ag mỹ tó mū gé sir, kanhgág ag mỹ ke gé. Ag mỹ sóg tó, ag tỹ ãjag jykre tovãnh jé, ag tỹ Topĕ jykre han jé sir, ag tỹ vĕnh jykre kuryj han jé, vĕnh kar tỹ ag tỹ ãjag jykre tovãnh ve jé,” he tóg, Paulo ti.

²¹ “Isỹ tag han to Israel ag tóg Topĕ jo ĩn krĕm inh kãgmĩ ja nĩgtĩ, isĕn jé,” he tóg. ²² “Hã ra Topĕ tóg inh jy nĩgãn mū. Hã kũ sóg ũri jĕ mū. Ti vĩ tó inh mū (mỹr), ũn mág ag mỹ, ũn kãsir ag mỹ ke gé. Vãsỹ Topĕ vĩ tó tĩ ag tóg tó ja nĩgtĩ, isỹ nĕn tó mū tag, Moisés mré hã,” he tóg. ²³ “Cristo jagtar ke tó ja ag tóg nĩgtĩ. Ā ter kar rĩr vĕn ke ti, ěg jo, he ja ag tóg nĩgtĩ, Cristo to. Kĩ tóg ěg povo mỹ jĕngrĕg tĩ ěn ri ke nĩ sir, fóg kar ag mỹ ke gé, kanhgág kar ag mỹ ke gé,” he tóg, Paulo ti.

²⁴ Paulo tỹ gen kũ tóg Festo mỹ e tĩ sir, Paulo tỹ vĕnh kãmĕn kũ. Kũ Festo tóg jamã hár(a): “krĩ tũ ã nĩ, Paulo',” he mū. “Ā tỹ vĕnh rá ve mág kũ tóg ã krĩ tũ (pĕ) tĩ,” he tóg, Festo ti.

²⁵ Hã ra tóg ti mỹ: “inh krĩ vỹ há nĩ, Festo',” he mū. “Há tãvĩ ã jĕ nĩ vỹ,” he tóg ti mỹ. “Hã ra sóg ki hã tó mū (mỹr), to jykrĕn há han kũ,” he tóg. ²⁶ “Tag kã nĩ vỹ ki kanhró nĩ, pã'i tỹ Agripa tag ti. Hã kũ sóg ti ve kũ mỹ'ãg tũ nĩ. Tó kãn sóg mū. Mĕ ti huri, ki kanhró tóg nĩ. Vĕnh kar tóg mĕ kãn tĩ ha,” he tóg.

²⁷ “Pã'i tỹ Agripa',” he tóg. “Ā mỹ Topĕ vĩ tó tĩ ag tỹ nĕn tó mū kri fig mũ'?” he tóg. “Kri nĩm ã tóg mū, ki kanhró sóg nĩ,” he tóg.

²⁸ Kũ Agripa tóg Paulo mỹ: “vĕme sĩ tỹ ã mỹ isỹ Cristo ki rã han sór mũ'?” he mū.

²⁹ Kũ Paulo tóg ti mỹ: “hỹ,” he mū. “Hã to sóg Topĕ mré vĩ mū,” he tóg. “Ā tỹ vĕme sĩ hã ki Jesus ki rãnh ken kũ tóg há tĩ vĕ, ke tũ nĩ kũ vĕme mág ki. Ā tỹ inh ri kĕn ke kũ tóg há tĩ vĕ, ã, ã mré inh vĩ mĕg mū ag ke gé. Isỹ se kũ jĕ tag hã to sóg ã mỹ: inh ri kemnĩ, henh ke tũ nĩ,” he tóg, Paulo ti.

³⁰ Kũ pã'i tỹ Agripa vỹ jĕg nĕ mū sir, governador ke gé, Berenice fi ke gé, ag mré nỹtĩ kar ag ke gé. ³¹ Kũ ag tóg kãpa mū. Kũ ag tóg jagnĕ mré vĩ mū. “Nĕn ũ kórĕg han tũ ti nĩ,” he ag tóg. “Vĕké tóg se kũ jĕ. Ā tỹ nĕn han tũ to tóg ter ke tũ nĩ,” he ag tóg. ³² Kũ Agripa tóg Festo mỹ: “ti tỹ kyvar kũ jĕ hã vĕ vĕ, hã ra tóg pã'i mág tỹ Imperador ve sór mū,” he tóg mū.

¹ Hã kÿ Festo tóg kejĕn Paulo mÿ: “ã tÿ ga tÿ Itália ra tĭg ke nĕ ha,” he mÿ. Kÿ tóg pã'i mÿ ti fĕg mÿ. Soldado ag capitão vĕ, pã'i ĕn ti. Ũ tÿ Imperador mré ke ag he mÿ ĕn capitão vĕ. Ti jiji hã vÿ: Júlio, he mÿ. Ti mÿ ag tóg vĕse ũ ag vin mÿ gé.

² Kÿ ĕg tóg canoa mág kãra ge mÿ sir. Cidade tÿ Adramítio tá ke vĕ, canoa mág ĕn ti. Ag tÿ ga tÿ Ásia fyr to mÿ sór vĕ, canoa kãmĩ. Kÿ ĕg tóg goj kãmĩ mÿ mÿ, tá pa kÿ. Aristarco tóg ĕg mré tĩ mÿ, cidade tÿ Tessalônica tá ke ĕn ti, ga tÿ Macedônia tá ke ĕn ti.

³ Tÿ vaj kÿ ĕg tóg cidade tÿ Sidom tá krÿg mÿ sir. Kÿ Júlio tóg Paulo mÿ vĩ há han mÿ. Kÿ tóg ti mÿ: “ã mré ke ag venh tĭg, ag tÿ ã ki rĩr jé,” he mÿ.

⁴ Tá pa kÿ kãka tóg ĕg kato tĕ mÿ. Kÿ ĕg tóg goj vãso tÿ Chipre kakãm mÿ mÿ, ti tÿ ĕg jakãnh tá nĭn kÿ. ⁵ Kÿ ĕg tóg goj kafã tũ kãmĩ mÿ mÿ, ga tÿ Cilíciã fyr to, ga tÿ Panfília fyr to ke gé. Kÿ ĕg tóg cidade tÿ Mirra tá junjun mÿ sir, ga tÿ Líciã tá. ⁶ Tá capitão tóg canoa mág ũ vĕg mÿ, cidade tÿ Alexandria tá canoa, ũ tÿ ga tÿ Itália ra tĩ mÿ ĕn. Kÿ tóg ĕg mÿ: “kã ge jĕg,” he mÿ, capitão ti. ⁷ Kãmĩ ĕg tóg mÿ mÿ. Komĕr hã ĕg tóg mÿ mÿ, kurã tÿ hĕn ri ke ki. Kÿ ĕg tóg vãhã goj vãso tÿ Cnido tá junjun mÿ. Hã ra kãka tóg ĕg kato tĕ mÿ gé. Kÿ ĕg tóg tá fin rãm tũ nĭgtĩ. Kÿ ĕg tóg goj vãso tÿ Creta kakãm mÿ mÿ, kãka tÿ ĕg tÿ vĭrĭn ke kÿ. Krĩ tÿ Salmona kakãm mÿ ĕg tóg mÿ, kãka krĕfĭn. ⁸ Kãmĩ tĭg tóg jagy tĩ, Creta fyr to hã tĭg kÿ. Kÿ ĕg tóg vãhã komĕr hã ĕg tóg canoa sag ja há he mÿ tá junjun mÿ. Cidade ũ vÿ tá kakó nĩ, ti jyjy hã vÿ: Laséia, he mÿ. ⁹ Hã ra ĕg tóg komĕr hã mÿ ja nĭgtĩ, hã kÿ kusa tóg kakó tĩ ha. Kÿ tóg goj kãmĩ tĭg kórég nĩ, kóho tugrĭn. Festa ũ pãtĕn tóg huri, Israel ag vãkre jafã ti. Hã kÿ Paulo tóg ag jyvĕn kÿ: ¹⁰ “goj tóg kãmĩ tĭg kórég tĩ ha, vÿ,” he mÿ. “Kÿ ĕg tóg jagãgtar mÿ ha. Kÿ tóg inh mÿ canoa tÿ nĭnunh mÿ tĭg ha mĕ tĩ, kÿ ajag tũ vÿ vãgfor mÿ sir, jó ĕg hĕn ri ke mĭn kãgter ke mÿ gé,” he tóg, Paulo ti.

¹¹ Hã ra capitão tóg canoa tÿ ũ tũn mĭn vĩ mĕg mÿ sir. Canoa vóg mÿ vĩ mĕg tóg mÿ gé, hã kÿ tóg Paulo vĩ mĕg tũ nĩ sir. ¹² Canoa sag ja ĕn tóg há sĩ nĩ, hã kÿ ag tóg tá kusa fin pa vãnh nÿtĩ. Hã kÿ ũn e ag tóg tá pa sór mÿ, ag tÿ cidade tÿ Fenice tá junjun jé, tá kusa fin pa jé. Goj vãso tÿ Creta tá cidade ũ vĕ, canoa sag ja ũ vĕ, Fenice ti. Tá rã krĕfĭn tá kãka vÿ króg he tũ nĭgtĩ. Hã kÿ ag tóg ra mÿ sór mÿ sir.

Kóho mág

¹³ Hã ra kãka sĩ tóg komĕr hã kraug he mÿ sir. Kÿ tóg ag mÿ há tĩ. Hã kÿ ĕg tóg tá pa kÿ Creta fyr ra mÿ mÿ sir, Creta fyr kakó ra, goj kãmĩ mĭn kÿ. ¹⁴ Vãhã kóho jũ tóg canoa kato tĕ mÿ sir, ti jiji hã vÿ: Nordeste, he mÿ. Creta tán kãti mÿ. ¹⁵ Hã ra ĕg tóg kóho jũ tag kato canoa vóg tÿ hĕ ri ke tũ nĩ, kÿ ĕg tóg ti vóg tovãnh mÿ sir. Kÿ kóho tóg canoa va tĩ mÿ. ¹⁶ Kÿ ĕg tóg goj vãso sĩ to hã mÿ mÿ, ti jyjy hã vÿ: Cauda, he mÿ. Hã ra ĕg tóg canoa sĩ nÿgnÿn kãmũ ja nĩ, ti se kÿ. Cauda tá ĕg tóg canoa mág kri ti fi han sór mÿ, hã ra ĕg tóg to jagãgtar mÿ, kóho to. ¹⁷ Vãhã ag tóg ti kãtãnfyn mÿ, canoa vóg tĩ ag. Kar ag tóg canoa mág tógfĭn mÿ, ti tÿ vãm ke tũ nĩ jé. Hã ra ag tóg rÿnhřÿj kamĕg mÿ, rÿnhřÿj tÿ Sirte he mÿ ĕn, ga tÿ Líbiã fyr tá. Hã kÿ ag tóg kur kunũg mÿ sir. Kur ĕn vÿ canoa kri sag tĩ, kãka tÿ ti tĭn jé. Ĕn kunũg ag tóg mÿ sir.

¹⁸ Hã ra ĕg tóg kóho jũ to jagãgtar' he mÿ, kÿ ag tóg tÿ vaj kÿ canoa tÿ rĭg mÿ ĕn kaju vãm mÿ sir, goj ki, ti kufy vĕnh kãpãm ag tóg mÿ sir. ¹⁹ Tÿ vaj ũn kÿ ĕg tóg jagãgtar tãvĩ nÿtĩ, kÿ ĕg tóg vãvãm kãn mÿ sir, canoa kãki nÿtĩ ĕn, ti tralha ti. Ĕg kar tóg ag mré vãvãm mÿ sir. ²⁰ Kurã tÿ hĕn ri ke ki ĕg tóg rã vĕg tũ (pĕ) nĩ, krĭg ke gé. Kóho jũ ĕn tóg ĕg kato tĕ mÿ. Kÿ tóg ĕg mÿ ĕg kãgter ha mĕ tĩ. “Ĕg hÿn krenkren ke tũ nĩ ha,” he ĕg tóg.

²¹ Hã ra ĕg tóg jĕg tũ (pĕ) ja nĩ, kurã tÿ hĕn ri ke ki. Kÿ Paulo tóg ag to tĭg kÿ: “ajag tÿ inh vĩ kri finh ke vĕ vĕ,” he mÿ. “Ĕg tÿ Creta tá kãpa tũ nĩ ra ĕg jagãgtar tũ nĭnh ke vĕ vĕ, kÿ ajag tÿ nĕn ũ kren tũ nĭnh ke vĕ vĕ,” he tóg. ²² “Hã ra ajag fe ti tÿ rĭnh kemnĩ. Ĕg kar vÿ krenkren mÿ. Canoa hã vÿ tũ' henh mÿ!” he tóg. ²³ “Kuty tag kã Topĕ tÿ jĕnĕ jafã tóg inh mré vĩ mÿ. Inh Senhor hã vĕ, ũ tÿ ti jĕnĕg mÿ ti, hã vÿ: Topĕ, he mÿ,” he tóg. ²⁴ “Ti tÿ jĕnĕ jafã tóg inh mÿ: “kamĕg tũg nĩ, Paulo!” he mÿ. “Pã'i mág tÿ Imperador ve jé ã tóg ke mÿ, kÿ Topĕ tóg ã mré mÿ ag kar vin, ag tÿ ã mré krenkren jé,” he tóg inh mÿ,” he

tóg, Paulo ti. ²⁵ “Kỹ ãjag fe ti tỹ há' hemní. Topẽ vĩ kri sóg fig mũ. Ti tỹ inh mỹ tó mũ vỹ ge nĩnh mũ,” he tóg, Paulo ti. ²⁶ “Jó ẽg tỹ canoa tỹ goj vãso to tĩn há tóg tĩ,” he tóg.

²⁷ Semana régre vẽ sir, ẽg tỹ goj kafãn tũ mũ mũ kri, kóho tỹ ẽg ran tĩ ki. Goj kafã tũ ẽn jiji hã vỹ: Mediterrâneo, he mũ. Meio noite ki canoa vóg tĩ ag tóg: “ga hỹn kakó nĩ ha,” he mũ. ²⁸ Kĩ ag tóg goj kãmũn mũ sir. Kĩ tóg 36 (ke) metros he mũ. Kãnhmar ag tóg kãmũn mãn, kĩ tóg 27 (ke) metros he mũ sir. ²⁹ Kĩ ag tóg pãró kamẽg mũ, ẽg tỹ ag mỹ kã ta kenh ha mẽ tĩn kỹ. Kĩ ag tóg canoa nér tá ti se jafã tỹ 4 (ke) vin mũ. Ferro ù vẽ, ti se jafã ti. Ti tỹ rỹnhryj kãkã nỹ kỹ canoa tóg tá krỹg he mũ. Ti vin kỹ tóg ag tỹ kurã venh há tĩ, canoa vóg tĩ ag. ³⁰ Kĩ ag tóg canoa sĩ ẽn térem mũ, goj ki. Canoa se jafã tỹ ag tóg kãki vin mũ, ag tỹ ón kỹ canoa krĩ tá vin jé. Hã ra ag tóg canoa mág ré kỹ ga ra mũ sór mũ.

³¹ Hã ra Paulo tóg vég mũ. Kĩ tóg capitão mỹ, soldado ag mỹ tóg: “ag tỹ pa kỹ ãjag vỹ krenkren ke tũ nĩ,” he mũ.

³² Kĩ soldado ag tóg vãfe kym mũ sir, ag tỹ vãfe tỹ canoa sĩ térem kỹ. Kĩ canoa sĩ ẽn tóg kutẽ mũ sir.

³³ Tỹ vaj ken kỹ Paulo tóg vẽnũ kar jyvẽn mũ, ag jẽn jé. Kỹ tóg: “semana régre vẽ (mỹr), ãjag fe von kỹ,” he mũ. “Nén ù kãmẽg tũ ãjag nỹtĩ (mỹr) ver,” he tóg. ³⁴ “Pão ko ra, ãjag tỹ tar há ki krenkren jé. Û vỹ ter ke tũ nĩ, kỹ ù vỹ kaganh ke tũ nĩ gé,” he tóg, Paulo ti. ³⁵ Ti tỹ tag tó kar kỹ tóg pão mãg mũ sir. Vẽnũ kar rĩnve tóg Topẽ mré vĩ mũ, kỹ tóg kupãn kỹ ko mũ sir.

³⁶ Kỹ vẽnũ kar tóg fe tar nỹtĩ sir. Kỹ ag tóg ko mũ gé sir. ³⁷ 276 (ke) ẽg nỹtĩ, canoa mág ẽn kãki.

³⁸ ẽg tỹ ko kar kỹ ag tóg goj ki trigo kugjẽg mũ, canoa tỹ kãnhvy' hen jé.

³⁹ Tỹ vaj kỹ ag tóg vég mũ sir, hã ra ag tóg goj vãso ẽn ki kagtĩg nỹtĩ. Kỹ ag tóg tá rỹnhryj vég mũ sir, rĩnhryj ti. Tá kóho tóg há sĩ nĩ. Kỹ ag tóg tag ra canoa tĩn sór mũ. ⁴⁰ Kỹ ag tóg ferro ẽn kykym mũ sir, goj kãki. Kỹ ag tóg canoa vóg jafã kygvãg mũ gé. Canoa krĩ tá ag tóg kur kujén mũ, kóho kato. ⁴¹ Hã kỹ ẽg tóg rỹnhryj ẽn to mũ mũ sir. Kỹ goj régre tóg jagnẽ ki jun nĩ. Kỹ canoa tóg rỹnhryj kãra rã mũ sir. Ti krĩ tóg rĩnhryj krẽm rã mũ, kỹ tóg sir tar mũ sir. Kỹ ti nér tóg kam ke mũ sir, goj jũ kỹ. Kỹ tóg mráj mũ, canoa ti.

⁴² Kỹ soldado ag tóg vẽnũ sigse ag kãgtén sór mũ, ag mrogmro kỹ vẽnũ pigju tũ nĩn jé, ag krenkren tũ nĩn jé. ⁴³ Hã ra capitão tóg Paulo kren han sór mũ. Kỹ tóg ag mỹ: “ke tũg ra,” he mũ. “Ãjag tỹ tũgnũm há nĩn kỹ goj kãra ge vén inhhã, ãjag tỹ ga ra ge vén jé, tũgnũm kỹ,” he tóg. ⁴⁴ “Ãjag tỹ tũgnũm kórég kỹ kan kri nỹmĩ, canoa mrãnhryj kri,” he tóg, capitão ti.

Kỹ ag tóg ge mũ sir. Hã kỹ ẽg kar tóg ga tá junjun mũ, krenkren kỹ.

28

Goj vãso tỹ Malta tá

¹ ẽg tỹ ga tá nỹtĩn kỹ ẽg tóg ga jiji mẽg mũ, hã vỹ: Malta, he mu. ² Tá ke ag tóg ẽg jagãgtãn mũ. Kỹ ag tóg pĩn han mũ. ẽg mỹ ag tóg: “kãge jẽg ra,” he mũ, ta kutẽ kỹ, kusa jagy tĩn kỹ. Kanhgág ri ke ag vẽ, tá ke ag.

³ Kỹ Paulo tóg pĩnh tĩ mũ, kỹ tóg pĩ ki nĩn mũ. Hã ra pỹn tóg pĩ kãkã nỹ ja nĩ. Rỹ mẽ kỹ tóg tím ke kỹ Paulo prãg mũ, ti nĩgé ki. ⁴ Kỹ tá ke ag tóg pỹn ẽn vég mũ, ti tỹ ti nĩgé to sa kỹ. Kỹ ag tóg jagnẽ mỹ: “ũ tén tĩ hỹn vẽ,” he mũ. “Goj tán kren, hã ra tóg ã tỹ nén han jan kajãm mũ,” he ag tóg, Paulo to.

⁵ Hã ra Paulo tóg pỹn kãvẽn mũ, pĩ ki tóg tỹ vén mũ. Hã ra tóg kaga tũ nĩ, ti nĩgé ti, Topẽ tỹ ti tỹ há' hen kỹ.

⁶ Hã ra ag tóg ti tugnỹm mũ, ti kãnhpar ve jé, ke tũ nĩ kỹ ti ter kỹ kutẽ ve jé. Hã kỹ ag tóg ti vég nỹtĩ, hora tỹ hẽn ri ke ki. Hã ra tóg ke tũ nĩ. Kỹ ag tóg ti to jykrén mãn mũ. “Topẽ tũ mỹ vó?” he ag tóg mũ, ón kỹ, Paulo to. Ag mỹ tóg e tĩ, hã kỹ ag tóg ti to: “topẽ hỹn,” he mũ.

⁷ Goj vāso tá ke ěn ag kăfór vỹ tỹ Públío nĩ. Tá tóg ĩn nĩ, ā japỹ tá. Ęg tỹ tón nỹtĩ tag tá tóg kakó nĩ, ti ĩn ti. Kỹ tóg ěg mỹ: “kăge jĕg ra,” he mũ. Ti mré ěg tóg kură tâgtũ han mũ.

⁸ Hă ra Públío panh tóg kaga nỹ nĩ. Jăgfa kyvĕnh han tóg, ký tóg to rỹg nỹ nĩ gé. Kỹ Paulo tóg ti venh rā mũ. Kỹ tóg ti to Topĕ mré vĩ mũ. Ā nĩgé tỹ tóg ti mĕg mũ, ký tóg há' he mũ sir. ⁹ Ti han kỹ vĕnh kagyga kar ag vỹ tá junjun mũ sir, goj vāso ěn tá. Kỹ tóg ag tỹ há' he kăn mũ, Paulo ti.

¹⁰ Kỹ ag tóg ěg ki rĩr há han mũ. Ęg tỹ kar kỹ canoa ũ kăra ge kỹ ag tóg ěg mỹ ěg tỹ nĕn ve sór mũ kar ěn vin mũ.

Roma ra

¹¹ Kysă tâgtũ tũg kỹ ěg tóg canoa ũ kăra ge mũ sir. Cidade tỹ Alexandre tá ke vĕ gé, canoa ěn. Tá tóg kusa fĩn rā ja nĩ, Malta tá. Ti rá vỹ tỹ ti vĕgni kăggrá nĩ, ti retrato ěn ti. Őn kỹ Romano ag topĕ ũ vĕ, ti vĕgni kăggrá ti.

¹² Tá pa kỹ ěg tóg mũ kỹ cidade tỹ Siracusa tá krỹg mũ. Kỹ ěg tóg tá kură tâgtũ tũg mũ. ¹³ Tá pa kỹ ěg tóg cidade tỹ Régio tá junjun mũ. Tỹ vaj kỹ kăka tóg ěg vóg há han mũ. Hă kỹ ěg tóg kură régre tũg kỹ cidade tỹ Pozuoli tá junjun mũ sir. ¹⁴ Tá ěg tóg Jesus mré ke ag vég mũ, kỹ ag tóg ěg mỹ: “ěg mré semana tũg nĩ ver,” he mũ. Kar kỹ ěg tóg cidade tỹ Roma ra mũ mũ sir. ¹⁵ Roma tá ke ag tóg ěg kămũ mĕ ja nĩ, Jesus mré ke ag. Kỹ ag tóg ěg venh kămũ mũ. Cidade tỹ Ápio jamă he mũ ěn tá ag tóg ěg kato tĕgtĕ mũ, ěmă tỹ Venda Tăgtũ he mũ ěn tá ke gé. Paulo tỹ ag ve kỹ ti fe tóg mrin ke mũ. Kỹ tóg Topĕ mỹ vĩ há han mũ. Ti krĩ tóg kănhvy' he mũ sir.

¹⁶ Ęg tỹ cidade mág tỹ Roma tá junjun kỹ Paulo tóg vyr mỹ nĩ nĩ, vĕse ũ ag mré tóg nĩ tũ nĩ. Soldado pir hă tóg ti ki rĩr mũ. Capităo tóg ti mỹ tag to: “hej,” he ja nĩ.

Roma tá

¹⁷ Kură tâgtũ tũg kỹ Paulo tóg Israel kăfór ag jé prĕr mũ. Ag vĕnh măn kỹ tóg ag mỹ: “inh kănhkă',” he mũ. “Se kỹ inh jĕ, Jerusalém tá, kỹ ag tóg tá fóg tỹ Romano ag mỹ inh fĕg, isỹ nĕn ũ han tũ hă ra, isỹ ěg jykre mranh tũ hă ra, isỹ ěg jóg'jóg tỹ ěg mỹ vĕnh jykre nĩm ja ěn mranh tũ hă ra,” he tóg. ¹⁸ “Fóg tỹ Romano ag tóg inh kavăn sór mũ vĕ, ag tỹ inh ki jĕmĕ kar kỹ. Isỹ nĕn han ja tũ to sóg ter ke tũ nĩ vĕ. ¹⁹ Hă ra Israel ag tóg inh kato vĩ, hă kỹ sóg sir pă'i mág tỹ Imperador ve sór mũ, ag tỹ isĕn tũ nĩ jé. Hă ra sóg ěg povo kavĕnh sór tũ nĩ, Imperador jo,” he tóg. ²⁰ “Hă kỹ sóg ājag jé prĕr mũ, sỹ ājag ki jĕmĕ jé. Ęg povo tỹ Israel kar vỹ Cristo ve sór mũ. Sỹ Cristo tó hă to sóg se kỹ jĕ nĩ,” he tóg, Paulo ti.

²¹ Kỹ ag tóg ti mỹ: “ũ tóg ěg mỹ ā to vĕnh rán han ja tũ nĩ, Judéia tá,” he mũ ti mỹ, pă'i ag. “Kỹ ěg kănhkă ũ tóg ěg ki jun ja tũ nĩ jé, ti tỹ ěg mỹ ā tỹ nĕn ũ kórĕg han mũ ěn tó jé,” he ag tóg. ²² “Hă ra tóg ěg tỹ ā ki jĕmĕnh há tĩ, ā tỹ nĕn to jykrĕn mũ ti. Vĕnh jykre tăg tag kato ag tóg vĩ tĩ, vĕnh kar ag, hă kỹ tóg ěg tỹ ā ki jĕmĕnh há tĩ,” he ag tóg ti mỹ, Israel mág ag.

²³ Kỹ ag tóg ti mỹ kură nĩm mũ. Kỹ ũn e ag tóg vĕnh măn mũ sir, ti tỹ ĩn krĕm nĩ ěn tá. Ag mỹ tóg Topĕ tỹ tỹ ěg pă'i nĩ kămĕn mũ. Jesus kămĕn tóg mũ, ag tỹ hĕn ri ke mũn ti ki ge jé. Moisés tỹ ag mỹ vĕnh jykre nĩm ja ěn tó tóg mũ sir ag mỹ, văsỹ Topĕ vĩ tó tĩ ag vĩ ke gé. Vĕnh rá ěn ki tóg ag mỹ Jesus ti ven mũ sir. Kusă ki ag tóg kămũ ja nĩ, tỹ vĕmĕn nỹtĩ ki ag tóg kutyg mũ. ²⁴ Kỹ tóg ũ ag mỹ ki hă tó ti, Paulo tỹ ag mỹ nĕn tó mũ ti, kỹ ag tóg kri fig mũ. Hă ra tóg ũ ag mỹ há tũ nĩ. ²⁵ Hă kỹ ag tóg vĕnh kăpugpóv kỹ nỹtĩ. Kỹ ag tóg mũ mũ, Paulo tỹ ag mỹ tag tó kar kỹ, ha mĕ. Ag mỹ tóg: “Topĕ kuprĩg tóg tó há han ja nĩ, ti tỹ Topĕ vĩ tó tĩ tỹ Isaiás mỹ: ag mỹ tag tó, hen kỹ,” he tóg. ²⁶ “Ęg jóg'jóg ag mỹ tóg tag tó ja nĩ, hă mĕ: “povo tag mỹ tag tó, hă mĕ: mĕ jé ājag tóg ke mũ, ón kỹ, hă ra ājag tóg to jykrĕn ke tũ nĩnh mũ, hemnĩ,” he tóg. ²⁷ “Kỹ ag tóg ki kăgtĩg nỹtĩnh mũ. Povo tag ag vỹ krĩ tũ nỹtĩ, nĩgrĕg kutu ag tóg nỹtĩ gé, kanĕ kyvó ag tóg nỹtĩ gé, ag tỹ nĕn ũ ve sór tũ nỹtĩnh kỹ, ag tỹ jĕmĕ sór tũ nỹtĩnh kỹ, ag tỹ to jykrĕn sór tũ nỹtĩnh kỹ ke gé. Hă kỹ ag tóg inh ki ge sór tũ nỹtĩ gé, kỹ sóg ag tỹ há' hĕnh ke tũ nĩ gé,” he tóg, Isaiás ti,” he tóg mũ, Paulo ti, Israel ag mỹ.

²⁸ “Hã kÿ sóg, ãjag mÿ tó mũ,” he tóg, Paulo ti. “Ãjag tÿ mẽ jãvãnh nÿtÿn kÿ fóg ag vÿ mẽnh mũ, kanhgág ag ke gé, Topẽ tÿ ag krenkren han sór mũ ti. Kÿ ag tóg ti mÿ: hej, henh mũ,” he tóg, Paulo ti, Israel ag mÿ.

²⁹ Paulo tÿ tag tó kar kÿ Israel ag tóg mũ mũ sir, jagnẽ vÿ kafã kÿ.

³⁰ Paulo vÿ prÿg régre tũg mũ, ã ãn krêm nÿn kÿ. Alugar hen kÿ tóg jẽ nÿ, ãn ãn ti, kÿ tóg kajãm mũ, Paulo ti, ã jãnkamy tÿ. Kÿ tóg ã tÿ ti mré vÿ sór mũ mÿ: “kãrã ra,” he ti.

³¹ Vẽnh kar mÿ tóg Topẽ tÿ tÿ ãg pã'i nÿ kãmén mũ sir, fe tar han kÿ. ãg Senhor tÿ Jesus Cristo kãmén tóg mũ sir. ã tóg ti mÿ: “vÿ tũg ra,” he tũ nÿ, ti se kÿ nÿ hã ra.

PAULO TỠ CARTA HAN: ROMA TÁ KE AG MỠ CARTA

¹ Paulo tỠ rá vễ. IsỠ cidade tỠ Roma tá ke ag mỠ rán ken hã vễ.

TỠ sóg Jesus Cristo camarada nỠ, kỠ tóg inh fễg, isỠ tỠ apóstolo nỠ jé. Hã jé tóg inh jé prêr. KỠ tóg inh kuprễg gé, isỠ vễnh kar mỠ vễnh vỠ sér kãmén jé, Topễ tỠ ễg mỠ vễnh vỠ jễnễ ja ễn ti. ² Topễ vỠ vẫsỠ ẫ vỠ tó tỠ ag mỠ: “ha inh kósin kãmé tó,” he ja nĩgtỠ, kỠ ag tóg ti kãmé rán ja nĩgtỠ gé, ag tỠ Topễ vỠ rán kỠ. ³ Topễ kósin ễn tó ja ag tóg nĩgtỠ, ễg Senhor tỠ Jesus Cristo ti. TỠ tóg vẫsỠ pã'i mág tỠ Davi kósin nỠ, Jesus ti. Ti jóg'jóg ve hã vễ, Davi ti. ⁴ Ti tỠ tỠ Davi kósin nỠn kỠ tóg tỠ ễprã ke nỠ, Davi ri ke, hã ra tóg tỠ Topễ kósin nỠ gé, hã kỠ tóg ẫ ter kar kỠ rĩr mẫn ja nỠ. Topễ tỠ ti rĩn mẫn to ễg tóg ti tỠ tỠ Topễ kósin nỠn ki kanhró nỹtỠ. Topễ vỠ ti tỠ ẫn mág han mỗ gé sir, ễg Senhor tỠ Jesus tỠ.

⁵ Topễ hã ne isar han', Jesus tigrĩn. Ti hã ne inh fễg', isỠ tỠ apóstolo nỠn jé, isỠ fóg ag kar mỠ ti kãmén jé, kanhgág ag mỠ ke gé, ag tỠ ti ki ge jé, ti vỠ kri fi jé, ti vỠ kri nĩm jé, ti jiji mễ kỠ. ⁶ Ỡ tỠ inh vỠ mễg mỗ vỠ tỠ ẫjag nỹtỠ gé.

Topễ vỠ ẫjag kuprễg, hã kỠ ẫjag vỠ tỠ Jesus Cristo tũ nỹtỠ. ⁷ KỠ sóg ẫjag mỠ vễnh rá jễnễg mỗ, Topễ tỠ ẫjag to há nỠn kỠ. Cidade tỠ Roma tá ẫjag tóg nỹtỠ. Topễ ne ẫjag kuprễg', hã kỠ ẫjag vỠ tỠ ti tũ nỹtỠ. Hã kỠ sóg ễg jóg tỠ Topễ mỠ: “ag tar han nỠ, ag mỠ vễnh jykre kusa nĩm nỠ,” he tỠ, Topễ mỠ, ễg Senhor tỠ Jesus Cristo mỠ ke gé.

Paulo tỠ Roma tá ke ag ve sór

⁸ Ha mễ, vễnh kar vỠ ẫjag tỠ ti ki ge kỠ nỹtỠ tag mễ huri, kỠ sóg ẫjag to Topễ mỠ vỠ há han tỠ, Jesus Cristo tigrĩn. Ti hã mré sóg vễmẻn tỠ. ⁹ Ti hã mỠ sóg rẫnh ráj tỠ, to krónh ke vẫnh sóg nĩgtỠ, hã kỠ sóg ti kósin to vễme sér ễn tó tỠ. Ti hã mré sóg ẫjag jagfỠ vỠ tỠ gé, kỠ tóg ki kanhró nỠ. Kurã kar ki sóg ẫjag kãmẻn tĩgtỠ, ti mỠ. ¹⁰ IsỠ ti mré vễmẻn kỠ sóg ẫjag tó tỠ. Ti mỠ sóg sỠ kejẻn ẫjag ve sór mỗ tó tỠ. Ti tỠ kejẻn sỠ ẫjag venh ke to há nỠn kỠ tóg inh mỠ: hej, henh ke mỗ. ¹¹ ẫjag ve sór tãvỠ inh nĩgtỠ, sỠ ẫjag mỠ Topễ kuprễg tỠ inh kanhrãn ja ễn kãmẻn jé, ẫjag tỠ inh vỠ jẻmẻn kỠ tar nỹtỠ jé. ¹² KỠ ễg tóg jagnễ tar han ke mỗ sir, ễg tỠ jagnễ jykre ven kỠ, ẫjag tỠ isỠ Jesus ki rã kỠ nỠ ven kỠ, isỠ ẫjag tỠ ti ki ge kỠ nỹtỠ ven kỠ ke gé.

¹³ Inh kanhkã', inh mỠ tóg ẫjag tỠ tag ki kanhró nỹtĩnh há tỠ, ha mễ: ẫjag venh tĩg ke to inh jykrẻn tỠ hẻn ri ke han huri, hã ra tóg inh mỠ ki króm ja tũ nỠ ver. IsỠ ẫjag mỠ Topễ vỠ kãmẻn sór vễ, Roma ki ke ỗ ag mỠ ke gé, ag kãmỠ ỗ tỠ Topễ ki ge jé. Fóg kar mỠ sóg ke tỠ, kỠ tóg inh mỠ sér tĩnh mỗ, sỠ Roma tá tỏnh ke mẫn kỠ ke gé. ¹⁴ Fóg tỠ Grego ag mỠ sóg Topễ vỠ tó tỠ, fóg kar ag mỠ ke gé, kanhgág ag mỠ ke gé, ỗ tỠ nẻn ỗ ki kanhró ag mỠ, ỗ tỠ nẻn ỗ ki kagtĩg ag mỠ ke gé. Topễ vỠ inh mỠ: “ha ag mỠ tó,” he ja nĩgtỠ. ¹⁵ Hã kỠ sóg Roma tá ti tó sór mỗ gé, Topễ vỠ sér ễn ti.

Topễ jykre tar

¹⁶ Inh pi(jé) Topễ vỠ sér tag to mỠ'ẫg sór mỗ'. Topễ hã ne tag to ễg kren han tỠ', ễg tỠ kri fin kỠ. Topễ jykre tar hã vễ. Judeu ag kren han sór tóg mỗ, kar kỠ fóg kar ag ke gé, kanhgág ag ke gé. ¹⁷ Tag hã ki ễg tóg Topễ jykre ki kanhró nỹtĩnh mỗ, Topễ vỠ sér hã ki. Ễg tỠ ti ki rã hã kỠ ễg tóg ti mỠ kuryj nỹtỠ. Hã kỠ tag tóg rán kỠ nỠ, ha mễ: “ễg tỠ Topễ ki rã hã tugnỠn ễg tóg ti mỠ kuryj nỹtĩnh ke mỗ, kỠ ễg rẫnrẫr mẫn ke mỗ,” he ja tóg nỠ, Topễ vỠ rán ki.

Ễprã ke ag jykre pãno

¹⁸ Hã ra Topễ tóg jũ nỠ gé, kanhkã tá. Ỡ tỠ ti ki ẻkrẻg tũ ag to tóg jũ mỗ. Topễ vỠ ag mỠ tỠ nẻn ỗ tũ nỠ, hã kỠ ag tóg vễnh jykre kuryj han sór tũ nĩgtỠ. Vễnh vỠ há tỠ ag tóg tũg' he sór tỠ gé, vễnh jykre kórẻg han sór kỠ. ¹⁹ Topễ jykre há nỹtĩn hã ki kanhró ag tóg nỹtỠ vễ, ag tỠ ki kanhrãn sór kỠ. Topễ vỠ ễg kar mỠ tag ven tỠ. ²⁰ Ễg pi(jé) Topễ vẻg tỠ'. Hã ra tóg nẻn ỗ kar han, ễg tỠ nẻn vẻg mỗ kar. Ễn vigve kỠ ễg tóg ti jykre mág nỠ ễn ki kanhró nỠ sir. “Ỡ tỠ tag han mỗ vỠ tỠ ẫn mág nỠ,” he jé ễg tóg ke mỗ. “Ễn jykre vỠ tar nỠ, ễn hỠn

tóg tũ' henh ke tũ nĩ," he jé ěg tóg ke mũ, ěg tỹ Topě tỹ nén han ja vigve kỹ. Hã ra ag tóg ki kanhrãn jãvãnh nỹtĩ, hã kỹ Topě tóg ag to jũnh ke mũ, hã ra ag tỹ ne tónh ke tóg tũ tĩnh mũ. ²¹ Ti tỹ tỹ Topě nĩn ki kanhró ag tóg nỹtĩ vễ, hã ra ag tóg ti to: "Topě vễ," he tũ nĩgtĩ. Ti tỹ tỹ ùn mág nĩ tag tó sór tũ ag tóg nĩgtĩ. Ti mỹ ag: "inh mỹ tóg há tĩ," he ja tũ nĩgtĩ gé, ti tỹ ag ki rĩr há han mũ ra. Hã kỹ ag tóg ag tỹ krĩ há ra ki kagtĩg nỹtĩ sir, ag krĩ há tóg tũ' he ja nĩgtĩ sir. Nén ù há to jykrén mũ ki kagtĩg ag nỹtĩ ha. ²² "Ki kanhró mág inh nĩ," he ag tóg tĩ, hã ra ag tóg krĩ vễnhmỹ nỹtĩ ha. ²³ Kỹ ag tóg Topě pẻ tag jẻgja kã, ùn ter vãnh tag jẻgja kã ag tóg sir ẻprã ke kãggrã fẻg mũ sir, ẻprã ke ag kãgter tĩn ra. Sẻsĩ kãggrã vin ag ke gé, bicho tỹ fa tỹ 4 ag kãggrã ke gé, pỹn kãggrã ke gé. Tag vỹ ag mỹ tỹ topẻ nỹtĩ sir.

²⁴ Hã kỹ Topě tóg ag tovãnh mũ sir. Ag tỹ ãjag tỹ nén to én mũ ẻn han sór nỹtĩn kỹ tóg ag tovãnh mũ, ag tỹ han jé. Jagnẻ kavẻnh ag tóg mũ sir. ²⁵ Topẻ vĩ há kri fi vãnh ra ag tóg vẻnh ó hã kri nĩm tĩ. Ag tỹ ù tỹ nén ù kar han ja ẻn to: "Topẻ vễ," henh ke vễ vễ, hã ra ag tóg ti tỹ nén han ja to: "Topẻ vễ," he sór mũ, ón kỹ. ù tỹ nén ù kar han mũ hã ne ã pir mỹ tỹ ùn mág nĩ', ti hã mỹ ěg tóg vĩ há han ke mũ'. To krónh ke vãnh ěg nỹtĩ. Amẻm.

²⁶ Ag tỹ Topě tỹ nén han ja to: "Topẻ vễ," hen kỹ Topẻ tóg ag togvãnh gé, ag tỹ ãjag tỹ nén to én mũ ẻn han jé, ěg kavẻnh tĩ ẻn ti. Ag prũ fag tỹ ag mrẻ nỹ tũg kỹ fag tóg jag(nẻ) hã mrẻ ti vẻnhmỹ han mũ sir, mỹr, ha mẽ. ²⁷ Kỹ fag mẻn ag tóg ãjag prũ fag mrẻ nỹ tovãnh kỹ jagnẻ to én mũ gé sir. Jagnẻ to én kỹ ag tóg jagnẻ mrẻ nỹ kỹ ti kórẻg han mũ gé sir, jagnẻ kavẻnh kỹ. Hã kỹ ag tóg ag tỹ Topẻ tovãnh to jagãgtar nỹtĩnh mũ. Ti tỹ ag vóg kónãn hã vễ.

²⁸ Ve ra ha. Topẻ ki ẻkrẻn jãvãnh ag tóg nỹtĩ, ti to é he kỹ. Hã kỹ Topẻ tóg ag togvãnh ja nĩgtĩ gé sir, vẻnh kato, ag tỹ vẻnh jykre pãno han sór kỹ. "Ha han, ge kỹ sir," he ja tóg nĩgtĩ. ²⁹ Vẻnh jykre pãno tỹ ag fỏr nỹtĩ ha, ti kórẻg tãvĩ tỹ. Nẻn kar to én (ka)mẻ ag nỹtĩ. Vẻnh jykre kuryj han vãnh ag nỹtĩ. Jagnẻ tũ to én (ka)mẻ ag nỹtĩ. Jagnẻ kãgtẻn ag tóg tĩ gé. Jagnẻ vĩ kafãn ag tóg tĩ gé. Jagnẻ mỹ un'ón ag tóg tĩ gé. Jagnẻ krĩn kónãn ag tóg tĩ gé. Jagnẻ to vĩ kónãn ag tóg tĩ gé. ³⁰ Jagnẻ to un'ón ag tóg tĩ gé. Topẻ kato tẻ mág ag tóg nỹtĩ. Jagnẻ vóg kónãn ag tóg tĩ. "Ag kãfỏr vỹ tỹ inh nĩ," he ag tóg tĩ, kỹ ag tóg vẻso nẻn ù há tó tĩ, ón kỹ. "Inh hỹn vẻnh jykre pãno tỹ ne han mũ, ùrĩ?" he ag tóg tĩ, kurã kar ki. ãjag mỹnh fag vĩ han vãnh ag tóg nỹtĩ gé, ãjag panh ag vĩ ti. ³¹ Krĩ tũ ag nỹtĩ. Ón kỹ ag tóg jagnẻ mrẻ nẻn kar to jykrẻn tĩ, ãjag tỹ ki krỏm ke tũ (hã) ra. Jagnẻ mrẻ há nỹtĩ ki kagtĩg ag nỹtĩ, kỹ ag tóg jagnẻ jagãgtãn ki kagtĩg nỹtĩ gé. ³² Topẻ vỹ ù tỹ tag han mũ to: "kãgter jẻ ag tóg ke mũ," he ja nĩgtĩ. Ag tỹ tag ki kanhró nỹtĩ ra ag tóg han mũ sir, kỹ ag tóg ù tỹ tag han mũ to há nỹtĩ gé, mỹr, ha mẽ.

2

Topẻ tỹ vẻnh jykre pãno to jũ

¹ Fỏg mrẻ kanhgág ag vỹ vẻnh jykre kórẻg tag hyn han kãn tĩ, kỹ ag tóg Judeu ag mỹ kórẻg nỹtĩ. Hã ra Judeu ag vỹ ti kórẻg han tĩ gé, ag tỹ ón kỹ ag to vĩ mũ ra. "Kórẻg ag nỹtĩ," he ag tóg tĩ, hã ra ag tóg fỏg jykre kórẻg ẻn han tĩ gé, kanhgág jykre kórẻg ti ke gé. Hã kỹ ag tóg ãjag jykre tugnĩn ti kórẻg venh ke mũ gé. ² Topẻ vỹ ù tỹ tag han mũ vóg kónãn ke mũ, ti jykre kuryj nĩn kỹ, Topẻ ti. Ti tỹ ke há vễ. ³ ùn jykre kórẻg ag tóg ag mỹ kórẻg nỹtĩ, Judeu ag mỹ, hã ra ag tóg hã han tĩ gé. Kỹ ag hỹn hẻ ri kenh mũ, Topẻ tỹ ag vóg kónãn tũ nĩ jẻ? Ag vóg kónãn jẻ tóg ke mũ, ha vemnĩ. ⁴ Ver tóg ěg to há nĩ, ver tóg ěg to fen nĩnh mũ, ver tóg jũ vãnh nĩ, Topẻ ti. Ti tỹ ěg tỹ ěg jykre kórẻg tovãnh ve sór vễ, hã kỹ tóg ver ěg to há tãvĩ nĩ. Hã ra tóg ag mỹ tỹ nẻn ù tũ nĩ ve nĩ, Topẻ tỹ ěg to fen nĩnh ke mũ ti. ⁵ Kutu ag nỹtĩ, vẻnh jykre pãno tovãnh jãvãnh ag nỹtĩ, hã kỹ Topẻ tỹ ag to jũ tóg komẻr hã mág rã nĩ. Kejẻn tóg Topẻ tỹ vẻnh kar jykre venh ke kurã pẻtẻm ke mũ sir. Kỹ ag tóg venh ke mũ, Topẻ tỹ ag vóg kónãn ke ti, kỹ vẻnh kar vỹ ti jykre kuryj venh ke mũ, ti tỹ ěg mỹ ki hã tó mũ ti. ⁶ Ti hã ne ěg mỹ nĩm ke mũ', ěg tỹ nẻn hyn han ja ẻn kaja ti. ⁷ ẻn kã tóg ěg mỹ ěg rĩr krỹg ja tũ ven ke mũ, ùn jykre kuryj ag mỹ. ěg tỹ ti jykre há to tar nỹtĩn kỹ tóg ěg mỹ ěg rĩr krỹg ja tũ ven ke mũ, ěg tỹ tá tỹ ùn mág nỹtĩ sór kỹ, ěg tỹ Topẻ

hã tỹ ãg mỹ vĩ há han ke ve sór kỹ, ãg tỹ ãg rĩr krỹg ja tũ ve sór kỹ. Kỹ tóg ãg mỹ ven ke mũ. ⁸ Hã ra tóg ù vóg kónãn ke mũ gé. Û tóg ãjag tỹ nén han sór mũ ãn hã han tĩ. Vãnh vĩ há kri fi vãnh ag nỹtĩ, ag tỹ vãnh jykre pãno hyn han sór kỹ. Hã kỹ tóg ag vóg kónãn ke mũ. ⁹ Û tỹ vãnh jykre pãno han mũ kar vỹ kanẽ junjur ke mũ, jagtar jagy hyn han kỹ. Ag tỹ tỹ Judeu nỹtĩ ra ag tóg jagãgtar ke mũ, kar kỹ fóg kar ag ke gé, kanhgág ag ke gé. ¹⁰ Û tỹ vãnh jykre kuryj han mũ tỹ tóg ùn mág hyn han ke mũ hã ra, to tóg vĩ há han ke mũ, ãg mỹ tóg vãnh jykre kusa nĩm ke mũ, ãg tỹ tỹ Judeu nỹtĩ ra, kar kỹ fóg ag mỹ ke gé, kanhgág ag mỹ ke gé.

¹¹ Ha vé, Topẽ mỹ ti tỹ nén ù tũ nĩ, Judeu ag, fóg ag, kanhgág ag. Ti mỹ ãg tóg tỹ ùn pir nỹtĩ. ¹² Û ag tóg Topẽ vĩ mẽ ja tũ nỹtĩ. Kỹ ag tóg ti kórég kar hyn han mũ sir. Kỹ ag tóg nũgme ki vár ke mũ sir, inferno ki, ag jykre kórég to. Ag jãvo Judeu ag vỹ Topẽ vĩ mẽ ja nĩgtĩ. Hã ra ag tóg ti kórég han tĩ gé. Kỹ Topẽ tóg ag vóg kónãn ke mũ gé sir. “Isỹ ãjag mỹ nén tó ja ãn han ja tũ ãjag nỹtĩ,” he jé tóg ke mũ. ¹³ Ha vé, ãg tỹ Topẽ vĩ mẽg mũ ra han tũ nĩn kỹ ãg Topẽ mỹ há tũ nỹtĩ. ãg tỹ ti vĩ ki króm kỹ ãg tóg ti mỹ kuryj nỹtĩ. ¹⁴ Fóg ag mré kanhgág ag vỹ Topẽ vĩ mẽ ja tũ nĩ ver, ù tỹ Judeu jykre han tũ kar ag. Ge ra vãnh jykre há tóg ag mỹ sér tĩ, ag tỹ Topẽ vĩ mẽ ja tũ (hã) ra. Kỹ ag tỹ vãnh jykre há han sór mũ tag vỹ ag mỹ ag tỹ ki króm han jafã nĩ. ¹⁵ Topẽ tỹ nén tó ja ãn vỹ ag kãkã nĩ, hã kỹ ag tóg han sór mũ, ag tỹ mẽ ja tũ ra. Hã kỹ tóg ag mỹ sér tĩ, ag tỹ nén ù há han kỹ. Jãvo tóg ag mỹ e tĩ, ag tỹ ti kórég han kỹ. Ag tỹ Topẽ vĩ mẽ ja tũ ra ag tóg vãnh jykre há ki kanhró nỹtĩ. ¹⁶ Kejẽn Topẽ tóg Jesus Cristo mỹ: “ag jykre ve kãn nĩ,” henh ke mũ, ti kurã ãn kã. Kỹ vãnh kar jykre vỹ vãnh ven ke mũ, ag jykre kórég mré hã, ag tỹ vãnh kar vatánh tá nén han ja ti. Tag hã tó sóg tĩ, sỹ vãnh kar mỹ ti vĩ sér kãmén kỹ.

Judeu ag tỹ Topẽ vĩ mranh ja

¹⁷ Ha vé, Judeu ag mỹ tóg sér tĩ, ag tỹ tỹ Judeu nỹtĩn kỹ. “Topẽ ne ãg jyvẽn ja nĩgtĩ', kỹ ãg nũgme ki vár ke tũ nĩ,” he ag tóg tĩ. “Topẽ to ãg há nỹtĩ,” he ag tóg tĩ gé. ¹⁸ Ti tỹ ãg ki nén ve sór mũ ki kanhró ag tóg nỹtĩ. Ti vĩ ki tóg rán kỹ nĩ, hã kỹ ag tóg ãn ve kỹ vãnh jykre kuryj ki kanhró nỹtĩ. ¹⁹ “Ki kanhró ãg nỹtĩ,” he ag tóg tĩ, hã kỹ ag tóg ù tỹ ki kagtĩg ag mỹ tó tĩ, Judeu ag, ag tỹ ag mỹ ùn kyvó ag ri ke nỹtĩn kỹ. Kutu mĩ ag tóg mũgtĩ, kỹ ag tóg ag mỹ jẽngrẽ han sór tĩ, ag mỹ Topẽ vĩ tó kỹ. ²⁰ Û tỹ ki kagtĩg ag kanhrãn ag tóg tĩ, gĩr ag ke gé. “Topẽ vĩ vỹ há nĩ, vãnh jykre há vẽ, ki hã tóg tó tĩ, hã to ãg Topẽ ki kanhrãn tĩ,” he ag tóg tĩ. ²¹ Ón kỹ ag tóg ù ag kanhrãn tĩ, ãjag tỹ ki kagtĩg nỹtĩ (hã) ra. Û mỹ ag tóg: “nén ù péju(g) tũg nĩ,” he tĩ. Hã ra ag tóg ù tũ péju(g) tĩ. ²² Ón kỹ ag tóg: “ã prũ tũ fi mré nỹ tũg nĩ, ã mén tũ mré nỹ tũg nĩ gé,” he tĩ. Hã ra ag tóg fag mré nỹgnỹ tĩ. Ón kỹ ag tóg vãnh kãggrá tỹ topẽ to: “Topẽ pijé',” he tĩ. Hã ra ag tóg vãnh kãggrá ag jo ãn krẽm ag tũ péju(g) tĩ. ²³ “Topẽ vỹ ãg jyvẽn ja nĩgtĩ,” he ag tóg tĩ. Hã ra ag tóg ti vĩ mranh tĩ. Topẽ kavẽn ag tóg tĩ. ²⁴ Hã kỹ tag tóg rán kỹ nĩ, Judeu ag to, Topẽ vĩ rán ki, ha mẽ: “ãjag jykre kórég ve kỹ fóg ag mré kanhgág ag vỹ Topẽ jykre to: kórég ti hỹn nĩ,” he tĩ,” he ja tóg nĩgtĩ, Judeu ag to, Topẽ vĩ rán ki.

²⁵ Há ti nĩ, ãg tỹ tỹ Judeu nỹtĩ ti, ãg tỹ Topẽ vĩ ki króm kỹ. ãg tỹ hã ra ti vĩ mranh kỹ tóg ãg mỹ nén ù há han ke tũ nĩ, ãg tỹ tỹ Judeu nỹtĩ ra. Fóg ri ke vỹ tỹ ãg nỹtĩ, kanhgág ri ke, ãg tỹ ti vĩ mranh kỹ. ²⁶ Kejẽn fóg ù tóg sir Topẽ vĩ ki króm mũ sir, kanhgág ù hẽn ri ke mũn. Kỹ tóg Topẽ mỹ tỹ Judeu ri ke nĩ sir, ti tỹ Topẽ vĩ ki króm to. ²⁷ Hã kỹ fóg ag mré kanhgág ag vỹ Judeu ag jykre kórég tónh ke mũ, ha vemnĩ, ag tỹ Topẽ vĩ ki króm kỹ. Topẽ vĩ mranh ag tóg tĩ, ag tỹ tỹ Judeu nỹtĩ ra, ag tỹ Topẽ vĩ rá vэг nỹtĩ ra. Hã tó jé ag tóg ke mũ, fóg ag, kanhgág ag ke gé. ²⁸⁻²⁹ Ón kỹ ag tóg tỹ Judeu nỹtĩ, ag pi(jé) tỹ Topẽ tũ pẽ nỹtĩ'. Ón kỹ ag gré junun fár vỹ kym kỹ nĩ, Topẽ tỹ ag mỹ: “kym ra,” he ja nĩn kỹ. Kỹ ag tóg tag tugnĩn jagnẽ mỹ: “Topẽ tũ vỹ tỹ ãg nỹtĩ,” he tĩ. Hã ra ag pi(jé) tag tugrĩn tỹ Topẽ tũ nỹtĩ'. Topẽ tũ ag vỹ ãjag fe tỹ ti ki rã tĩ, kỹ ag jykre hã ne kym kỹ nĩ ri ke nĩ'. Ag tỹ vãnh jykre kórég tovãnh to ken hã vẽ. Topẽ kuprĩg ne ãg jykre há han tĩ', kỹ Topẽ tóg

ĕg mŷ vĭ h  han tĭ g  sir, ĕg jykre h  nŷtĭn kŷ. Ti pi(j )  pr  ke ri ke  n kŷ vĭ h  han tĭ', ti ki ge kŷ nŷtĭ ag mŷ.  g h  vŷ tŷ Top  t  p  nŷtĭ'.

3

¹ Kŷ Judeu ag hŷn inh mŷ: “kŷn mŷ h  t  nĭ,  g tŷ tŷ Judeu ag kr  nŷtĭn kŷ?” he s r m . “ g gr  junun f r kym kŷ nĭn kŷn mŷ tŷ n n   t  nĭ?” he s r ag hŷn m . ² V , h  t vĭ ti nĭ g .  g h  mŷ t g   vĭ ti t  ja nĭgtĭ, Top  ti,  g tŷ tŷ Judeu kr  nŷtĭn kŷ. ³  g k mĭ   t g ti vĭ kri fig t  nĭgtĭ. H  ra Top  pi(j ) ag tugrĭn   tŷ n n t  ja  n han ke t  nĭ', ag tŷ ti vĭ ki kr m t  ra t g   vĭ ki kr m tĭ, Top  ti, ag j vo. ⁴ Ti tŷ  g mŷ t  ja  n han ti tĭ,  n v nh ti nĭgtĭ.  pr  ke ag ne un' n tĭ', h  ra t g  n ke t  p  nĭ, Top  ti. H  kŷ tag t g r n kŷ nĭ, Top  vĭ r n ki, h  vŷ: “v nh kar vŷ venh ke m ,   tŷ   vĭ han tĭ ti,” he m . “  tŷ   jykre tugnŷm kŷ t g venh ke m  sir,   tŷ ki h  t  tĭ ti,” he ja t g nĭ, Top  to, Top  vĭ tŷ r n kŷ nĭ ki. H  ra t g ge nĭ.

⁵ Kŷ Judeu ag hŷn  n kŷ inh mŷ: “kŷn hŷn h  nĭ,  g jykre p no ti,” he s r m . “V nh kar vŷ  g jykre p no ve kŷ Top  jykre kuryj nĭ ki kanhr  nŷtĭ, ti tŷ  g j vo v nh jykre p no to h  t  nĭn kŷ. H  kŷ  g jykre p no tag vŷ tŷ n n   h  nĭ. H  ra t g to  g v g k n n s r m ,  g jykre p no to, ti tŷ tŷ n n   h  nĭ ra. Tag tugnĭn t g jykre p no nĭ ve nĭ, Top  ti,” he s r ag hŷn m , Judeu   ag.  pr  ke ag vŷ  n kŷ vĭ tŷ ge han tĭ. ⁶ H  ra t g h  t  nĭ, ag vĭ tag ti. Top  jykre h  ne kuryj nĭ'. Ti jykre h  nĭn kŷ t g  pr  ke jykre to: “h  t  ti nĭ,” h nh ke m . Jykre kuryj ti nĭ inh .

⁷ H  ra Judeu   ag t g  n kŷ: “v nhmŷ  g ki kr m kŷ nŷtĭ v ,” he tĭ g . “ g  n tugrĭn Top  tŷ tŷ  n m g nĭ tag vŷ v nh ven m , ti  n v nh vŷ v nh ven m   g j vo. H  ti nĭ, tag ti. H  kŷ ti tŷ  g  n m  tag to: “inh vĭ mranh ja  jag t g nĭgtĭ,” h nh kŷ t g v nhmŷn kŷ t  m , Top  ti,” he ag t g tĭ,  n kŷ. ⁸ “Ti k r g han j   g t g ke m , Top  tŷ  g jykre k r g tŷ n n   h  han j ,” he ag t g tĭ,  n kŷ. Kŷ ag t g iso  n kŷ: “tag t  ti tĭ, Paulo ti,” he tĭ g .   tŷ tag t  m  ag v g k n n j  t g ke m , Top  ti, ag  n m  tag to, ti jykre kuryj nĭn kŷ, ha vemnĭ.

 g kar tŷ Top  vĭ mranh k n

⁹ Kŷ isŷ Judeu ag to ne t  n ?  g mŷ f g ag k f r nŷtĭ,  g tŷ tŷ Judeu nŷtĭn kŷ? V , ag k f r t   g nŷtĭ. Top  vĭ mranh k n  g mŷr, Judeu, f g, kanhg g,  g kar mŷr. Tag t  inh huri. H  ra t g ge nĭ. ¹⁰ H  kŷ tag t g r n kŷ nĭ g , ha m : “ n jykre kuryj vŷ t  tĭ,  n jykre kuryj venh ke t  p   g nĭgtĭ. ¹¹ V nh jykre h  han ki kagtĭg kar  g nŷtĭ,   tŷ Top  jykre han s r m  vŷ t  tĭ. ¹²  g kar vŷ Top  japry, Top  jamĭn tov nh k n kŷ nŷtĭ. Jykre k r g kar  g nŷtĭ. V nh jykre kuryj han v nh  g nŷtĭ.  n jykre h  venh ke t  p   g nĭ. ¹³ Un' n (ka)m  kar  g nŷtĭ, jagn  to.  g tŷ v ser to n n kŷ v ser ger t g k kut  tĭ.  g  n vŷ v ser ger tag ri ke nĭ. Jagn  mŷ  g t g un' n tĭ g .  g vĭ j  tŷ  g t g jagn  k gt n ri ke han tĭ g , kŷ t g pŷn veneno ri ke nĭ,  g vĭ j  ti. ¹⁴ V nh vĭ j  tŷ  g f r nŷtĭ, kŷ  g t g v nh kar mŷ vĭ k n n tĭ. ¹⁵ Jagn  k gt n (ka)m   g nŷtĭ, tag h  t g  g mŷ s r tĭ. ¹⁶  g tŷ h n mĭ m  kŷ  g t g n n   kar k k g tĭ, h  kŷ  g mr  ke fag vŷ jagtar nŷtĭ,  g to. ¹⁷  g pi(j ) v nh jykre kusa ve s r tĭ'. ¹⁸ Top  kam g s r v nh  g nŷtĭ,” he ja t g nĭgtĭ, Top  vĭ tŷ r n kŷ nĭ ki. H  ra t g ge nĭ.

¹⁹ H  ra  g kar vŷ tag ki kanhr  nŷtĭ, ha m .  g h  mŷ ti r n kŷ nĭ, Top  vĭ ti,  g tŷ ki kr m j . H  ra  g t g mranh k n. Kŷ Top  tŷ  g mŷ: “ti k r g han  ,” he m  ra t g  g tŷ ti mŷ ne t nh ke t g t  tĭ,  g kar ti. H  j  t g  g mŷ   vĭ j n  ja nĭgtĭ,  g tŷ to  g k r g nĭ tag ki kanhr n j . ²⁰ Top  vĭ ki kr m k n ja t   g t g nŷtĭ, h  kŷ  g kuryj t  nŷtĭ, Top  mŷ. H  kŷ  g tŷ Top  tŷ v sŷ  g jyv n ja  n m g m  ra  g t g Top  vĭ mranh ki kanhr n m , ti tŷ  g mŷ: “tag han t g ra,” h nh kŷ. Ge ta  g t g mranh tĭ.

Top  tŷ  g kren han s r

²¹⁻²² V h  Top  jykre kuryj t g v nh ven ja nĭgtĭ. Ti h  ne  g mŷ v nh p te f n m  sir', inh ',  g tŷ Jesus Cristo ki ge kŷ,  g tŷ ti tŷ  g jyv n ja  n mranh ja (h ) ra. Ti jykre

kuryj hã vë. Vãsỹ tóg tó ja nĩ, Topẽ ti, ti tỹ tag han ke ti. ã jykre si ki tóg tó ja nĩ, kỹ ti vĩ tó tĩ ag, profeta ên ag tóg tó ja nĩgtĩ gé, ti jykre tãg ke ti. Û tỹ ti ki ge kũ nỹti kar mỹ tóg vënh pãte fón tĩ. Kũ êg kar tóg jagnê ri ke nỹti ha, êg tỹ ti ki ge kũ. ²³ Topẽ vĩ mranh kãn êg, vënh jykre kuryj han tũ êg nỹti, Topẽ jykre kuryj tag han ki kagtĩg êg nỹti. ²⁴ Hã ra tóg êg jagãgtãn kũ êg mỹ vënh pãte fón sór mũ. Fagrĩnh mỹ ke vë, kajãm ke tũ êg tóg nĩ. Jesus Cristo tugnĩn tóg êg kren han sór mũ. ²⁵ Topẽ ne Jesus fêg', ti hã tỹ êg tỹ Topẽ vĩ mranh tỹ tũg' hen jé, ti ter kũ ti kyvënh tỹ êg jagfy ti ki kãkutê kũ. Kũ êg tóg ti ki rã kũ há nỹti sir, Topẽ jykre kuryj hã vë sir. Jesus to êg ki kanhrãn mũ, vënh jykre kuryj ti. Hã kũ Topẽ tóg êg tỹ vãsỹ ti vĩ mranh ja ên to tóg êg vóg ja tũ nĩ ver, êg to fen kũ, ²⁶ ti tỹ ùri êg mỹ ã jykre tãg ven sór kũ. Topẽ vỹ kuryj nĩ. Ti tỹ êg mỹ vënh pãte fón kũ êg ti mỹ kugryj nỹti sir, êg tỹ Jesus ki gen kũ. Topẽ jykre kuryj hã vë sir.

²⁷ Kũ Judeu ag hỹn inh mỹ: “kũ êg mỹ Topẽ mỹ há tũ nỹti, êg tỹ ti vĩ ki króm sór mũ ra?” he sór mũ. Hỹ, hã vë. Kórég êg nỹti, hã kũ êg tóg ti vĩ ki króm sór mũ ra mranh tĩ. Êg tỹ ti ki ge kũ tóg êg mỹ vënh pãte fón tĩ, kũ êg há nỹti. ²⁸ Tag ki kanhró êg nỹti, ha mẽ. Êg tỹ Topẽ jykre si ên han sór mũ ra êg jykre pãno vỹ êg kãkã nĩ nĩ. Êg tỹ Jesus ki gen hã kũ tóg êg mỹ vënh pãte fón ke mũ hã ra. ²⁹ Topẽ pi(jé) Judeu ag tãvĩ vég nĩ nĩ'. Fóg ag vég ti nĩ gé, kanhgág ag ke gé. ³⁰ Pir ti nĩ, Topẽ ti. Hã kũ tóg ù tỹ ti ki ge mũ ag mỹ vënh pãte fón tĩ, Judeu ag mré hã, fóg ag mỹ ke gé, kanhgág ag mỹ ke gé. Êg tỹ ti ki ge to tóg êg mỹ vënh pãte fón tĩ, êg kar mỹ.

³¹ Kũ êg mỹ ti ki ge kũ (êg mỹ) Topẽ tỹ vãsỹ êg mỹ vënh jykre nĩm ja ên tỹ tũg' he tĩ, Topẽ tỹ Judeu ag jyvën ja ên tí? Vó. Vãhã êg ki króm há han ki kanhró nỹti, Topẽ tỹ êg mỹ vënh jykre nĩm ja ên ki.

4

Topẽ tỹ Abraão mỹ vënh pãte fón

¹ Kũ Judeu ag hỹn inh mỹ: “êg jóg'jóg ve pẽ tỹ Abraão hỹn hẽ ri ke tí?” he sór mũ. ²⁻³ “Nén ù há kar han ti tĩ, Abraão ti, hã tugrĩn tóg tỹ Topẽ mỹ ùn há nĩ,” he sór ag hỹn mũ, Judeu ag. Vó, hã tũ vë. Ti ki rã tugnĩn ke vë. Hã kũ tag vỹ ti to rán kũ nĩ, ha mẽ: “Abraão vỹ Topẽ ki rã, hã kũ tóg tỹ Topẽ mỹ ùn há nĩ, ti tỹ ti ki rã tugrĩn,” he tóg mũ, Topẽ vĩ rán ki. Ti tỹ nén ù há han tugnĩn Topẽ mỹ tỹ ùn há nĩ ra tóg vëso: “tỹ sóg ùn há nĩ, ag kar kãfór,” henh ke mũ vë, vësỹ ùn há han sór kũ. Hã ra êg vësỹ ùn há han ki kagtĩg nỹti.

⁴ Hã vé, êg rãnhraj to êg tóg êg rãnhraj kaja vég tĩ. Fagrĩnh mỹ ke tũ vë, êg rãnhraj kaja ti. ⁵ Topẽ jykre vỹ ge tũ nĩgtĩ. Êg tỹ ti ki ge kũ êg tóg ti mỹ tỹ, ùn há nỹti. Êg tỹ ti ki ge tugrĩn tóg êg mỹ vënh pãte fón tĩ, êg tỹ ti vĩ mranh ja ti. Êg rãnhraj pijé'. Topẽ tỹ nén han mũn hã vë.

⁶ Hã kũ vãsỹ êg pã'i tỹ Davi tóg tó ja nĩgtĩ gé. Û tỹ nén ù kórég han tĩ ên to tóg vĩ há han ja nĩ, Davi ti. Topẽ vỹ êg mỹ vënh pãte fón tĩ, êg tỹ ti vĩ mranh ja ti. Topẽ tỹ ùn mỹ vënh pãte fón ja ên to Davi tóg tag tó ja nĩgtĩ, ha mẽ: ⁷ “Topẽ vỹ êg ve há han ke mũ, hã kũ tóg êg mỹ êg tỹ ti vĩ mranh ja ên tỹ vënh pãte fón tĩ. Kũ êg ve mãn ke tũ nĩ ha, êg jykre pãno ja ên ti, ti tỹ vënh pãte fón kũ nĩn kũ. ⁸ Topẽ vỹ êg ve há han ke mũ, hã kũ tóg êg mỹ êg tỹ ti vĩ mranh ja ên kaja kórég ên ven ke tũ pẽ nĩ,” he ja tóg nĩgtĩ, Davi ti.

⁹ Kũ Judeu ag hỹn inh mỹ: “Davi hỹn ù tỹ hẽ to tag tó ja nĩgtĩ'?” he sór mũ. “Judeu jykre han mũ ag to ke mỹ vó, ag jykre han tũ ag to ke mỹ vó?” he sór ag hỹn mũ. Êg kar to ke vë. Hã vë, Abraão to sóg: “ti tỹ Topẽ ki rã tugrĩn tóg tỹ Topẽ mỹ ùn há nĩ,” he ja nĩ. ¹⁰ Kũ ti jykre tỹ Topẽ mỹ kuryj nĩ ên kã ti mỹ Judeu ag jykre han kũ tĩ nĩ', Abraão tí? Vó, ên kã ti êg jykre han tũ nĩ ver. Ên kã ti ã gré junun fár kym ja tũ nĩ ver. ¹¹ Topẽ vỹ ti mỹ vënh pãte fón, ti tỹ ti ki rã tugnĩn, ti tỹ ver Israel ag jykre ki kagtĩg nĩn kã. Ti mỹ vënh pãte fón kar kũ Topẽ tóg ti mỹ êg jykre tag nĩm ja nĩ, ti tỹ ã gré junun fár kym jé sir, vënh kar tỹ ti jykre há nĩ ki kanhrãn jé. Hã kũ tóg tỹ ù tỹ Topẽ ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ajag fár kym tũ ra ke gé. Topẽ ki ge kũ êg tóg Topẽ mỹ tỹ ùn há nỹti, Abraão ri ke. ¹² Kũ tóg tỹ Judeu jykre han mũ ag jóg'jóg ve pẽ

nĩ gé sir, Abraão ti, ag tỹ ti mré Topẽ ki ge ký. Judeu jykre han to hã tóg Topẽ ki rã, ẽg jóg tỹ Abraão ti. Ký ẽg tỹ Topẽ ki ge ký tóg tỹ ẽg jóg pẽ nĩ gé sir, ẽg tỹ tỹ Judeu krẽ nỹtĩ ra Topẽ ki ge ký nỹtĩn ký. ¹³ Topẽ vỹ Abraão mỹ: “ã krẽ vỹ ga kar mĩ mũnh mũ, ký tóg tỹ ag tũ kar ninh mũ,” he ja nĩgtĩ. Ti tỹ Topẽ vỹ kri fi tugrĩn tóg ti mỹ tag tó. Vẽnh jykre si ki króm tugnĩn ke pijé'. Ti tỹ Topẽ ki rã ký tóg ti mỹ tỹ ùn há nĩ, hã ký Topẽ tóg ti mỹ tag tó ja nĩ.

Topẽ tỹ ù tỹ ti ki ge ký nỹtĩ ag to há

¹⁴⁻¹⁵ Ha vé, ẽg tỹ Topẽ tỹ vãsỹ ẽg mỹ vẽn h jykre nĩm ja ẽn han sór mũ ra ẽg tóg mranh tĩ, ký Topẽ tóg ẽg vóg kónãn ke mũ vè sir. Hã ký ẽg tóg ti tỹ ẽg mỹ nén ù há tó ja ẽn venh ke tũ pẽ nĩ vè sir. Ẽg vóg kónãn jé tóg ke mũ vè sir, ký tóg ẽg mỹ nén ù há nĩm ke tũ nĩ vè sir. Ký tóg ẽg mỹ: “ha inh ki rã,” henh ke tũ nĩ vè gé. Topẽ tỹ ẽg vóg kónãn ke mũ hã ne kã nĩ vè', ti vỹ mranh tugrĩn. ¹⁶ Hã ra tóg ẽg mỹ: “ha inh ki rã, sỹ ãjag mỹ nén ù há ẽn han jé, ãjag tỹ inh ki ge tugrĩn,” he ja nĩgtĩ. Ti tỹ ẽg jagãgtãn hã vè. Topẽ tóg Abraão krẽ kar ag mỹ vin sór mũ, ã tỹ nén tó ja ẽn. Ti pi(jé) Judeu jykre han mũ ag tãvĩ mỹ vin sór mũ'. Û tỹ Abraão ri ke Topẽ ki ge mũ ag mỹ tóg vin sór mũ gé, Topẽ ti. Ẽg kar jóg'jóg ve vỹ tỹ ti nĩ, Abraão ti. ¹⁷⁻¹⁸ Topẽ hã ne ti mỹ: “ã krẽ tỹ sóg povo e hyn han ke mũ,” he ja nĩ', hã ký tóg tỹ ẽg kar jóg'jóg ve pẽ nĩ. Rán ký ti nĩ, Topẽ vỹ rán ki. Ký tóg ti vỹ tag kri fi ja nĩgtĩ, Abraão ti, ã tỹ gĩr ve vãn h nĩ ra, ti kófa nĩn ký. Ûn ter mũ ag rĩnrĩr mãn han ki kanhró tóg nĩ, Topẽ ti. Ký tóg nén kar han ki kanhró nĩgtĩ gé. Nén ù tóg tũ tĩ ver, hã ra Topẽ tóg nén ù kar han tĩ, ã vỹ tỹ. Hã ký tóg Abraão mỹ ti kósin ke tó ja nĩgtĩ gé. Ký Abraão tóg ti vỹ kri fi ja nĩgtĩ. Ver tóg kósin ja tũ nĩ, ã kófa nĩ ra, hã ra tóg Topẽ vỹ kri fi ja nĩgtĩ, Topẽ tỹ ti mỹ: “ã krẽ tỹ sóg povo e hyn han ke mũ,” he ja tag to. ¹⁹⁻²⁰ Topẽ tỹ ti mỹ tag tó ký tóg 100 (ke) anos pétẽm, Abraão ti. Si há ti nĩ ja nĩgtĩ, ti prũ tỹ Sara fi ke gé. Gĩr han vãn h fag nỹtĩ, ẽn kã. Ẽn hã kã Topẽ tóg ti mỹ ti krẽ e hyn han ke tó ja nĩgtĩ. Ký tóg ti vỹ kri fi ja nĩgtĩ, to krónh ke tũ ja tóg nĩgtĩ. “Hỹ mỹ vỹ?” he ja tũ ti nĩgtĩ, Topẽ vỹ tag to. Ti vỹ kri fi ký tóg Topẽ to: “ùn mág vỹ tỹ ti nĩ,” he ja nĩgtĩ. ²¹ “Topẽ vỹ ã tỹ nén tó ja han ki kanhró nĩ,” he ja ti nĩ, Abraão ti, to krónh ke tũ nĩn ký. ²² Tag hã tugnĩn tóg Topẽ mỹ tỹ ùn há nĩ, ti tỹ ã fe tỹ ti ki rãn ký.

²³ Topẽ vỹ tó tĩ ù tóg Abraão to rán ja nĩ, Topẽ vỹ rán ki, ti tỹ Topẽ mỹ tỹ ùn há nĩ ti. ²⁴ Hã ra tóg ẽg to rán ja nĩ gé. Topẽ mỹ ẽg tóg tỹ ùn há nỹtĩnh ke mũ gé, Abraão ri ke, ẽg tỹ ti ki ge ký. Hã ký tóg ẽg Senhor tỹ Jesus rĩn mãn ja nĩgtĩ, ti ter ja tá. ²⁵ Ẽg jagfỹ tóg ter ja nĩ, Jesus ti, ti tỹ ẽg tỹ Topẽ vỹ mranh tỹ tũg' he jé. Hã jé Topẽ tóg ti fẽg ja nĩ. Ký tóg ti rĩn mãn ja nĩ gé, ti tỹ ẽg mỹ vẽn h pãte fón jé, ẽg tỹ ti vỹ mranh ja ti.

5

Topẽ tỹ ẽg to jũ mãn ke tũ

¹ Ký tóg ẽg mỹ vẽn h pãte fón mũ sir, ẽg tỹ Jesus Cristo ki ge ký nỹtĩn ký. Ký ẽg tóg jatun mỹ nỹtĩ, Topẽ tỹ ẽg to jũ mãn tũ nĩn ký, ẽg Senhor tỹ Jesus Cristo tugrĩn. ² Ti hã tugnĩn Topẽ tóg ẽg jagãgtãn tĩ. Tag tugrĩn ẽg tar nỹtĩ sir. Ký tóg ẽg mỹ sér tĩ gé. Topẽ vỹ ẽg tỹ ùn mág han ke mũ, ti tỹ tỹ ùn mág nĩ ẽn ri ke han jé tóg ke mũ, ký tóg ẽg mỹ sér tĩnh mũ sir. ³ Ver ẽg tóg ti jagy vég tĩ, tag ki. Hã ra tóg ẽg mỹ sér tĩ gé, ẽg tỹ ti jagy vég mũ ra. Ẽg tỹ ti jagy vég mũ tag ne ẽg tar han ke mũ', komẽr hã. ⁴ Ẽg tar nỹtĩn ký ẽg ti tovãn h sór tũ nĩ ki kanhró nỹtĩ sir. Ẽg tỹ ti tovãn h sór tũ nỹtĩn ký ẽg tóg Topẽ tỹ ẽg mỹ nén tó ja kar venh ke mũ, ti tỹ ẽg mỹ nén ù há ven ke ẽn ti, tá. ⁵ Ẽg pi(jé) venh ke tũ nĩ', Topẽ tỹ nén tó ja ẽn ti. Ẽg mỹ tóg ã kuprĩg jẽnẽ huri, ti tỹ tỹ ẽg jagrẽ nĩ jé. Ẽg jagrẽ tag vỹ ẽg mỹ: “Topẽ vỹ ã to há nĩ,” he tĩ. Ti hã tugrĩn ẽg ki kanhró nỹtĩ, ẽg tỹ Topẽ tỹ ẽg mỹ nén tó ja ẽn venh ke ki.

⁶ Jykre pãno ẽg nỹtĩ, krój ẽg nỹtĩ. Ẽg tỹ ver kórég nỹtĩ ẽn kã Cristo ne ẽg jagfỹ ter ja nĩgtĩ'. ⁷ Ti jãvo ẽg kã ù tóg ẽg jagfỹ ter ke tũ nĩ. Ûn jykre há jagfỹ ter ke tũ ẽg nỹtĩ. ⁸ Ẽg jãvo Cristo vỹ ẽg jagfỹ ter ja nĩ, ẽg tỹ tỹ Topẽ vỹ mranh jafã nỹtĩ ra. Hã ki ẽg ki kanhró nỹtĩ, Topẽ tỹ ẽg to há tãvĩ nĩ ti. ⁹ Ký Topẽ tóg ẽg mỹ vẽn h pãte fón mũ sir, Jesus tỹ ẽg

jagfy ter ja tugnĭn, ti kyvĕnh tugrĭn. Kŷ tóg Topĕ tŷ vĕnh kar to jŭnh ke kurā ěn ki ěg kren han ke mŭ gé, ha mĕ. ¹⁰ Ęg tŷ ver ti kato tĕ nŷtĭ ra Topĕ kósin tóg ěg jagfy ter, kŷ Topĕ tóg ěg to há nĭ, ěg to jŭ mĕn tŭ ti nĭ. Kŷ tóg ěg to há nĭ ha. Kŷ tóg kurā ěn kĕ ěg kren han ke mŭ gé, ti rĭr jĕn kŷ, ti kósin ti. ¹¹ Kurā ěn kĕ tóg ěg kren han ke mŭ, hĕ ra tóg ũri ěg to há nĭ gé, kŷ tóg ěg mŷ sér tĭ. Ęg Senhor tŷ Jesus Cristo tugnĭn ke vĕ. Ti hĕ ne Topĕ tŷ ěg to há nĭnh ke han'. Ti hĕ ne Topĕ tŷ ěg to jŭ tŷ tŭ' he mŭ'.

Adĕo vŷ Topĕ vĭ mranh vĕn, Jesus vŷ ki króm kĕn

¹² Ha vé, ũn pir vŷ Topĕ vĭ mranh vĕn, kŷ Topĕ vĭ mranh vŷ kĕ nĭ nĭ sir. Ti vĭ mranh tugrĭn tóg ter ja nĭ gé, ũ tŷ ti vĭ mranh vĕn mŭ ěn ti. Ũ tŷ ti vĭ mranh vĕn ja ěn ri ke ěg nŷtĭ, Topĕ vĭ mranh kĕn ja ěg tóg nĭ gé, ěg tŷ tŷ ũn ve nón ke nŷtĭn kŷ. Kŷ ěg tóg kĕgter kĕn ke mŭ gé, Topĕ vĭ mranh kŷ. ¹³ Topĕ tŷ ěg jyvĕn to hĕ ag tóg ti vĭ mranh ja nĭgtĭ gé, hĕ ra ag tóg vĕnh jykre kórég to: “Topĕ vĭ mranh vĕ,” he ja tŭ nĭ ver, ag tŷ Topĕ tŷ ěg jyvĕn tĭ ěn mĕ ja tŭ nĭn kŷ, Moisés tŷ Topĕ vĭ rán ja to hĕ. ¹⁴⁻¹⁵ Ge ra ag tóg kĕgter ja nĭ, ěn to. Adĕo vŷ ter, ti nón ke ag vŷ kĕgter, Moisés mur to hĕ. Adĕo ne Topĕ tŷ ti mŷ ka kanĕ to: “ko tŭg nĭ,” he ja ěn ko ja nĭgtĭ'. Ti nón ke ag vŷ Topĕ vĭ mranh gé, hĕ ra ag pi(jé) Adĕo tŷ Topĕ vĭ mranh ja ěn ri ke hyn han ja nĭgtĭ'. Ge ra ag tóg kĕgter. Kŷ ěg ũri kĕgter tĭ gé, ěg tŷ ũn ve ěn nón Topĕ vĭ mranh kŷ.

Ũn pir tŷ Topĕ vĭ mranh vĕn ja tugrĭn ěg tóg kĕgter kĕn ke mŭ. Ũn ve tŷ ěg jo vĕnh jykre kórég han jan hĕ vĕ. Ti jĕvo ti nón ke ěn ti, Jesus hĕ vŷ ěg mŷ vĕnh jykre há nĭm ke mŭ. Ti tugnĭn Topĕ vŷ ũn e tĕvĭ jagĕtĕn ke mŭ sir. Ęg mŷ tóg nĕn tŷ hĕn ri ke hyn han ke mŭ sir, kŷ tóg presente há tĕvĭ ri ke nĭ sir, ũn pir tugrĭn, hĕ vŷ: Jesus Cristo, he mŭ. Kŷ Jesus tŷ ěg mŷ vĕnh jykre há nĭm mŭ ěn vŷ ũn ve tŷ ěg mŷ vĕnh jykre kórég nĭm ja ěn kĕfór nĭ. ¹⁶ Ũn pir tŷ Topĕ vĭ mranh vĕn ěn tugnĭn ěg kĕgter kĕn ke mŭ. Topĕ vĭ mranh pir tugrĭn tóg ěg vóg kónĕn kĕn ke mŭ. Hĕ ra tóg ěg mŷ presente ri ke han sór mŭ ha. Ęg jagĕtĕn tóg tĭ, ěg tŷ ti vĭ mranh tŷ hĕn ri ke han ja ra, kŷ tóg ěg mŷ vĕnh pĕte fón mŭ gé sir. ¹⁷ Ũn pir tŷ Tope vĭ mranh vĕn ja tugnĭn ěg kar kĕgter kĕn ke mŭ. Hĕ ra tóg ũn pir ũ tugrĭn ěg jagĕtĕn ke mŭ ha, kŷ tóg ěg mŷ vĕnh pĕte fón mŭ. Kŷ tóg ěg kugrynh ke mŭ. Ęg mŷ presente ri ke han hĕ vĕ. Kŷ ěg tóg rĭnrĭr mĕn ke mŭ gé, kŷ ěg tóg tá tŷ ũn mág nŷtĭnh mŭ sir, ũn pir tugnĭn, hĕ vŷ: Jesus Cristo, he mŭ. Hĕ ki Jesus tŷ ěg mŷ vĕnh jykre há nĭm mŭ tóg ũn ve tŷ ěg mŷ vĕnh jykre kórég nĭm ja ěn kĕfór nĭ.

¹⁸ Hŷ, ũn pir tŷ Topĕ vĭ mranh vĕn ja tugrĭn Topĕ tóg ěg vóg kónĕn kĕn ke mŭ sir. Ri ke ti nĭ, Jesus tŷ ěg kren han mŭ ti. Ũn pir tŷ Topĕ vĭ ki króm kĕn tugnĭn Topĕ tóg ěg kar jagĕtĕn ke mŭ sir, kŷ tóg ěg mŷ vĕnh pĕte fón ke mŭ, ěg kĕgter mĕn tŭ nĭ jé, ěg kuprĭg ti. ¹⁹ Ũn pir tóg Topĕ vĭ han ja tŭ nĭ, kŷ ěg kar vŷ Topĕ vĭ mranh tĭ sir, ti nón. Kar kŷ ũn pir vŷ Topĕ vĭ han kĕn ja nĭgtĭ, kŷ Topĕ tóg ti tugrĭn ěg mŷ vĕnh pĕte fón kĕn ke mŭ gé sir. ²⁰ Kŷ Topĕ tóg Moisés tŷ ěg jyvĕn ja nĭgtĭ, hĕ kŷ tóg rán ja nĭ. Kŷ ěg tóg ti vĭ mĕ kŷ ěg tŷ Topĕ vĭ mranh e han ja ěn ki kanhrĕn mŭ sir. Ęg tŷ ti vĭ mranh e tĕvĭ nĭ ra Topĕ tóg ěg jagĕtĕn kĕfór han mŭ gé sir, ²¹ ti tŷ ěg jykre kugrynh jé sir. Nŷgme ki ěg tóg vĕr kĕn ke mŭ vĕ, inferno ki, ěg tŷ Topĕ vĭ mranh to. Jagy ti nĭ. Hĕ ra Topĕ tóg ěg jagĕtĕn kĕn ke mŭ, kŷ tóg ěg kugrynh ke mŭ, kŷ ěg rĭr krŷg ja tŭ venh ke mŭ, nŷgme ki vĕr ke tŭ ěg nŷtĭ, inferno ki. Topĕ tŷ ěg jagĕtĕn hĕ vĕ, ěg Senhor tŷ Jesus Cristo tŷ ěg jagfy ter ja tugrĭn ken hĕ vĕ.

6

Jesus Cristo tŷ ěg jykre si tŷg

¹ Kŷ Judeu ũ hŷn inh mŷ: “kŷn hŷn há nĭnh mŭ, ěg tŷ Topĕ vĭ mranh kŷ,” he sór mŭ. “Kŷ tóg ěg jagĕtĕn kĕfór han ke mŭ gé, ěg tŷ mranh mág kŷ,” he sór ag hŷn mŭ. ² Vó, há tŭ pĕ ti nĭ. Kórég ti nĭ. Ti ki ge kŷ ěg tóg vĕnh jykre tĕg han tĭ, kŷ ěg jykre si tóg tŭ tĭ ha, ti tŷ ěg jykre si tŷ tŭ' hen kŷ.

³ Ha vé, vĕnh kype kŷ ěg nŷtĭ. Batismo tag vŷ ge nĭ, ha mĕ. Ęg tŷ Cristo ki rĕ to ken hĕ vĕ. Cristo vŷ ter ja nĭ. Ter kŷ tóg ěg jykre si tŷ tŭ' hé. ⁴ Tŷg kŷ tóg ti mré vĕnh kej kĕkĕ

nỹ ri ke han mũ gé, ãg jykre si ti. Kỹ Cristo vỹ rĩr mǎn, ter kar kỹ, Topẽ tỹ ti rĩn mǎn kỹ. Tar ti nĩ, Topẽ ti, hã kỹ tóg ti rĩn mǎn. ãg tỹ ti mré rĩr mǎn ri ke ti nĩ, hã vỹ: vãnh jykre tǎg to tar nĩ, he mũ. Batismo to ken hã vỹ.

⁵ ãg jykre si tỹ tóg tũ' hé, ti ter kỹ, kỹ ãg jykre tǎg tóg nỹ ha, ãg tỹ ti mré rĩnrĩr nỹtĩn kỹ, ti rĩr mǎn ẽn ri ke. ⁶ Ti tỹ cruz to sa kỹ ãg jykre si tóg ti mré to sa ri ke han gé, kỹ tóg tũ' he mũ, ãg tỹ ti vỹ mranh mǎn tũ nĩ jé. Topẽ vỹ mranh jafã vỹ tỹ ãg nỹtĩ ja nĩgtĩ, hã kỹ tóg tỹ tũg' he ja nĩ, Jesus Cristo ti. Hã kỹ ãg tóg ùri Topẽ vỹ mranh tĩ ag ri ke tũ nỹtĩ ha. ⁷ ãg jykre si tũg kỹ ãg tóg jykre kuryj nỹtĩ ha, ha mẽ, kỹ ãg tóg mranh sór mǎn tũ nĩ ha. ⁸ Cristo vỹ ãg jykre si tỹ tũg' hé, ti ter kỹ. Kỹ tóg ãg mỹ vãnh jykre tǎg han mũ gé, rĩr mǎn kỹ, kỹ ãg tóg ti mré jykre tǎg ẽn hã mĩ mũnh mũ. Vãnh vỹ há to ken hã vỹ.

⁹ Cristo ne rĩr mǎn', ter kar kỹ. Kỹ tóg ter mǎn ke tũ nĩ ha. Û vỹ ti tén mǎn ke tũ pẽ nĩ ha. ¹⁰ Ter ja ti nĩ. Ti ter ja vỹ pir nĩ, ãg tỹ Topẽ vỹ mranh ẽn tugnĩn. Kỹ tóg rĩr jẽ nĩ sir, Topẽ mỹ, ti tỹ Topẽ tũ han kǎn jé. ¹¹ Kỹ ti ri ke han nĩ. Topẽ vỹ mranh tũg nĩ, ãg jykre si ter kỹ nỹn kỹ. Topẽ jykre hã han nĩ, ãg tỹ ti tũ han kǎn jé, ãg tỹ Jesus Cristo ki ge kỹ nỹtĩn kỹ.

¹² ãg jykre vỹ Topẽ vỹ mranh sór mũ, ãg jykre ter ke tag. ãg jykre tỹ nén to ẽn mũ ẽn han tũg nĩ, Topẽ vỹ mranh tũg nĩ. ¹³ Kejẽn ãg tóg ãg pẽn tỹ, ãg nĩgẽ tỹ, ãg nũnẽ tỹ, ãg há ki nỹtĩ kar tỹ Topẽ vỹ mranh sór mũ. ãg tỹ mranh kỹ ãg tóg ãg há tỹ vãnh jykre pǎno han ja nỹtĩgtĩ, Topẽ kato tẽ ja nỹtĩgtĩ. Kỹ ke tũg nĩ. Topẽ mỹ vãnh fẽg nĩ. ãg jykre si ter kỹ, ãg jykre tǎg nỹtĩn kỹ Topẽ mỹ vãnh fẽg kǎn nĩ, ti jykre hã han sór mĩnĩ, ãg jykre tỹ, ãg há ki nỹtĩ kar tỹ. ãg tỹ ti mỹ vãnh fẽg kỹ ãg tóg ti jykre há han kǎn ke mũ sir. ¹⁴ Kỹ ãg tóg ùri Topẽ vỹ mranh tĩ ag ri ke tũ nỹtĩ ha, Topẽ tỹ ãg jagãgtãn kỹ, ti tỹ ãg tar han kỹ. Ti tỹ ãg jyvẽn ja ẽn tugnĩn tóg ãg vóg kónãn ke mũ vỹ, ãg tỹ mranh kỹ, hã ra tóg ãg jagãgtãn mũ ha.

Jesus Cristo tỹ ãg jykre tǎg

¹⁵ Kỹ Judeu ag hỹn inh mỹ: “kỹ Topẽ vỹ ãg tỹ ti vỹ mranh mũ ra ãg vóg kónãn mǎn ke tũ nĩ. Kỹ ãg hỹn jatun mỹ mranh mũ,” he sór mũ. “ãg jagãgtãn ti tĩ, hã kỹ tóg tỹ nén ù tũ nĩ, ti vỹ mranh mũ ti,” he sór ag hỹn mũ. Hã tũ vỹ hã ra. Kórég ti nĩ, ãg tỹ ti vỹ mranh kỹ. ¹⁶ ãg tỹ ù mỹ vãnh fẽg kỹ tóg tỹ ãg patrão nĩ, kỹ ãg hã vỹ tỹ ti camarada nỹtĩ. Ri ke ti nĩ, ãg tỹ Topẽ vỹ mranh sór kỹ. Ti vỹ mranh jafã vỹ tỹ ãg nỹtĩ, ẽn kã. ãg tỹ Topẽ vỹ kri fig tĩ nĩn kỹ ãg tóg ti mỹ há nỹtĩ sir. ¹⁷ Vãsỹ ãg tóg tỹ Topẽ vỹ mranh jafã ja nỹtĩgtĩ. Hã ra ãg tóg ùri Topẽ vỹ kri fig tĩ ha, ãg fe tỹ ti ki ge kỹ. ãg tỹ Topẽ vỹ mẽ ja ẽn kri fig ãg tóg tĩ, kỹ sóg Topẽ mỹ vỹ há han tĩ, ãg to. ¹⁸ Topẽ vỹ ãg jykre kugrynh, ãg tỹ tỹ ti vỹ mranh jafã tũ nỹtĩ jé, ùri. Kỹ ãg tóg tỹ Topẽ krẽm ke nỹtĩ, ãg tỹ tỹ ti jykre kuryj mĩ mũ jafã nỹtĩ jé, ùri.

¹⁹ ãg mỹ sóg ãg tỹ tỹ ti vỹ ki króm jafã nỹtĩ tag tó mũ, comparação han kỹ, ãg tỹ to ãg tỹ tỹ ùn há mỹ vãnh fẽg ki kanhró nỹtĩ jé, hã vỹ: Topẽ, he mũ. Vãsỹ ãg tóg vãnh jykre pǎno han sór ja nỹtĩ, nén ù kavéj ti, nén ù kórég kar ti. Tag han kỹ ãg tóg ùn kórég mỹ vãnh fẽg ja nỹtĩ. ùri Topẽ mỹ vãnh fẽg kǎn, ãg tỹ tỹ ti tũ nỹtĩ jé, vãnh jykre kuryj hã han jé sir. ²⁰ Vãsỹ, ãg tỹ tỹ Topẽ vỹ mranh kỹ nỹtĩn kỹ vãnh jykre há tóg ãg mỹ tũg ja nĩ. ²¹ Kỹ ãg ne han ja nỹtĩ, tempo ẽn kã? Vãnh jykre kórég tãvĩ han ja ãg tóg nỹtĩ. ãg tỹ ãg jykre si to jykrén kỹ tóg ãg mỹ'a tĩ, ùri. Vãnh jykre tag tugnĩn ãg nũgme ki vár kǎn ke mũ vỹ, hã kỹ tóg ãg mỹ'a tĩ, ãg tỹ ti kórég han ja to jykrén kỹ. ²² ùri ãg tóg kygvar kỹ nỹtĩ, mỹr, ha mẽ, Topẽ vỹ mranh ja ẽn tỹ tóg tũg' he ja nĩ. Topẽ mỹ ãg vãnh fẽg kỹ nỹtĩ. ãg tỹ nén han mũ vỹ tỹ ti tũ nĩ, ti jykre kuryj, kỹ ãg tóg ter ke tũ nĩ ha, ãg kuprĩg vỹ rĩr nĩ ha. ²³ Topẽ vỹ mranh tugrĩn ãg nũgme ki vár ke mũ vỹ. Topẽ tỹ ãg vóg kónãn hã vỹ. Hã ra tóg ãg jagãgtãn mũ, kỹ tóg ãg mỹ rĩr krỹg ja tũ ven ke mũ. Ti tỹ ãg mỹ presente han hã vỹ, hã vỹ: ãg tỹ ãg rĩr krỹg ja tũ venh ke, he mũ, ãg Senhor tỹ Jesus Cristo tugnĩn.

7

Věnh prũg to comparação

¹ Inh kanhkã', Topě tỹ vãsỹ ěg mỹ věnh jykre nĩm ja ěn ki kanhró ājag tóg nỹtĩ, Moisés tỹ rán ja ěn ti. ěg rĩr nỹtĩn kỹ ěg tóg věnh jykre ěn han kỹ nỹtĩ, ěg ter kỹ tóg ěg mỹ tũ' he mũ, věnh jykre ěn ti. ² Ri ke ti nĩ gé, ěg prũ fi mré. Fi mén rĩr jěn kỹ fi tóg tỹ ti tũ jě, fi mén tũ. Ti ter kỹ fi tóg tỹ ti tũ tũ jě sir, ti tũg kỹ. ³ Fi mén rĩr jěn kỹ fi tóg tỹ ti tũ jě. Fi tỹ ti rĩr tĩ ra ũ mré nỹ kỹ fi tóg ě mén tũ mré nỹ mũ. Ti ter kỹ fi tóg mén tũ jě sir, kỹ, fi tỹ ũ mré tĩg sór kỹ tóg sir há tĩ, fi mén vě sir, fi tỹ ũ mré tĩ mũ ěn ti. ⁴ Ri ke ti nĩ, Topě tỹ vãsỹ ěg mỹ věnh jykre nĩm ja ěn ti. Cristo ter kỹ tóg ěg jykre si tỹ tũg' hé gé. Hã kỹ tóg ěg tỹ ti tỹ ěg jyvěn ja ěn mranh ja ra tóg ěg vóg kónãn ke tũ nĩ sir. Vãhã ěg tóg tỹ Cristo tũ nỹtĩ ha, ũ tỹ ter kar kỹ rĩr mãn ja ěn tũ vỹ tỹ ěg nỹtĩ. Kỹ ěg tóg ũri Topě jykre hã han sór mũ ha, ti mỹ sér tĩ jé. ⁵ Vãsỹ ěg tóg ěg tỹ nén to ěn ja ěn hyn han tĩ ja nĩgtĩ. Kỹ ěg tóg věnh jykre kavėj han kãn ja nĩgtĩ, ěg jykre tỹ, ěg há ki nỹtĩ kar tỹ ke gé. ěg jykre kavėj tugrĩn ěg nũgme ki vár ke mũ vě. Topě tỹ ěg jyvěn mũ jěměn kỹ ěg tóg ki kanhrãn mũ, ěg tỹ ti vĩ mranh mũ tag ki. Jérĩn mỹ ěg tóg mranh mãn', mranh mãn' he mũ sir. ⁶ Hã ra tóg ěg mỹ tũ tĩ ha, ěg tỹ Topě tỹ vãsỹ ěg jyvěn jěměg mũ ra mranh mũ ti, Cristo tỹ ter kỹ ěg jykre si tỹ tũg' hen kỹ. Topě vĩ mranh sór tũ ěg nỹtĩ ha. ěg kygvãn ti huri, kỹ ěg tóg Topě tũ hã han tĩ sir, Topě kuprĩg tỹ ěg krĩn kỹ. Kỹ ěg tóg Topě tỹ ěg jyvěn to kaně jur han mãn ke tũ nĩ ha. Ki króm sór ěg nỹtĩ ha. ěg kaně jur pijé'. Topě kuprĩg tỹ ěg mỹ věnh jykre tãg nĩm jan hã vě.

Věnh jykre kórég han kỹ ěg Topě vĩ mranh tĩ

⁷ Kỹ Judeu ag hỹn inh mỹ: “kỹ Topě tỹ vãsỹ ěg jyvěn mũ ěn mỹ kórég nĩ?” he sór mũ. Vó, kórég tũ ti nĩ. ěg jyvěn ja tóg nĩgtĩ, kỹ ěg tóg ti vĩ mẽ kỹ: “věnh jykre kórég han kỹ inh hỹn tóg ti vĩ mranh tĩ,” he tĩ. Topě vỹ ěg mỹ: “nén ũ to ěn tũg nĩ,” he ja nĩ. Tag jěměn kỹ ěg tóg ũ tũ to ěn tag tỹ Topě vĩ mranh nĩ ki kanhró nỹtĩ. ⁸ Topě tỹ ěg jyvěn mũ ra ěg tóg ti vĩ mranh sór mũgtĩ, Jérĩn mỹ. Ti tỹ ěg mỹ: “tag han tũg ra,” he mũ ra ěg tóg han sór tĩ, hã kỹ ěg tóg ũ tũ to ěn sór tĩ. Topě tỹ ěg jyvěn tũ ra ěg ki kanhrãn ke tũ nĩ vě, věnh jykre pãno tỹ ti vĩ mranh nĩn ki. ⁹ Vãsỹ ěg tóg Topě tỹ ěg jyvěn mũ ěn mẽg tũ ja nỹtĩgtĩ. Véké ěg tóg mũ ja nỹtĩgtĩ, jatun mỹ. Kỹ tóg vãhã ěg mỹ ě vĩ jěně ja nĩ, Topě ti, ěg jyvěn kỹ. ěn mẽ kỹ ěg tóg ěg tỹ ti vĩ mranh ja ěn ki kanhrãn ja nỹtĩgtĩ, ěg tỹ to nũgme ki vár ke mũ mré hã. Kỹ ěg tóg kaně jur nỹtĩ ha. ¹⁰ Topě vỹ tóg ěg jyvěn, ěg tỹ nũgme ki vár ke tũ nỹtĩ jé. Jérĩn mỹ ěg tóg ki vár ke mũ, ěg tỹ ti tỹ ěg jyvěn kri fig tũ nĩn kỹ. Hã ve ěg tóg, ěg tỹ ti tỹ ěg jyvěn mẽ kỹ. ¹¹ ěg tỹ Topě vĩ mranh kỹ ěg tóg Topě tỹ ěg jyvěn mũ kato tě mũ. Kỹ ěg nũgme ki vár ke mũ sir, ěg tỹ: “ti hỹn tỹ nén ũ tũ nĩ, sỹ ti vĩ mranh mũ ti,” he mũ ra.

¹² Hã kỹ Topě tỹ vãsỹ ěg jyvěn mũ ěn vỹ há nĩ, ti tỹ tỹ Topě tũ nĩn kỹ. Kỹ Topě tỹ vãsỹ ěg mỹ věnh jykre nĩm ja ěn vỹ kuryj nĩ gé. Há ti nĩ, Topě tũ vỹ tỹ ti nĩ gé.

¹³ Kỹ Judeu ag hỹn inh mỹ: “ěg mỹ věnh jykre há tugnĩn nũgme ki vár ke mũ?” he sór mũ. Vó, ke tũ vě. Topě vĩ mranh tugrĩn ěg nũgme ki vár ke mũ. Nén ũ há ja vě, Topě tỹ ěg jyvěn ja ti, hã ra ěg tóg mranh. ěg tỹ Topě tỹ ěg jyvěn mẽ kỹ ěg tóg ěg jykre kórég to: “ti vĩ mranh ja inh nĩgtĩ,” he tĩ. Hã ki ěg tóg ki kanhrãn mũ, ěg tỹ Topě vĩ mranh tag tỹ tỹ nén ũ kórég tãvĩ nĩn ki. ¹⁴ Topě tỹ ěg jyvěn mũ ěn vỹ tỹ ti tũ nĩ, ti kuprĩg vỹ to ěg kanhrãn tĩ. Jérĩn mỹ ěg tóg ěg tỹ nén to ěn mũ ěn han sór tĩ, ěg krój nỹtĩn kỹ. Ti vĩ mranh kỹ ěg tóg tỹ ti vĩ mranh jafã nỹtĩ.

ěg tỹ ti kórég han sór tũ ra ěg tóg han tĩ

¹⁵ ěg jykre tóg inh mỹ e tĩ. Sỹ nén to há ěn han tũ sóg nĩgtĩ. Sỹ nén to há tũ ěn hã han sóg tĩ mỹr, kỹ tóg inh mỹ e tĩ. ¹⁶ ěg tỹ ti kórég han sór tũ ra ěg tóg han tĩ. Ti vĩ mranh mũ vỹ ěg mỹ kórég nĩ, kỹ ěg tóg ki kanhró nỹtĩ, ti tỹ ěg jyvěn há han ja ěn ki. Ge ra ěg tóg mranh tĩ. ¹⁷ ěg jykre si hã vě. ěg tỹ ěg jykre si tovãnh kãn ja tũ nĩn kỹ ěg tóg ti vĩ mranh tĩ, ěg tỹ mranh sór tũ (hã) ra. ěg jykre tãg tũ vě, tag ti. ¹⁸ ěg pi(jé) věnh jykre há to tar

nýtí'. Věnh jykre kórég vỹ ver ěg kākā nĩ nĩ. Věnh jykre kuryj tóg ěg mỹ sér tí, ge ra ěg tóg ti pãno han tí, ěg tỹ ũn há han sór mũ ra. ¹⁹ Hã kỹ ěg pi(jé) věnh jykre há han tí', ěg tỹ han sór mũ ra'. Ti kórég hã han ěg tí, ěg tỹ han sór tũ ra. ²⁰ ěg tỹ nén han sór tũ ěn han ěg tóg tí, věnh vatánh tá. ěg jykre si hã tugrĩn ěg tóg Topě vĩ mranh tí, ěg tỹ tovãnh kãn ja tũ nĩn kỹ.

²¹ Ha vé, ěg jykre ti. ũn há hã han sór ěg tóg mũgtĩ. Ge ra ěg tóg ũn kórég hã han tí, ěg jykre si tỹ ěg kākā nĩn kỹ. ²² ěg tỹ to jykrén há han kỹ ěg tóg: “Topě tỹ ěg jyvěn mũ vỹ há nĩ,” he ti. ěg mỹ tóg sér tí. ²³ ěg tỹ hã ra ěg jykre to jykrén kỹ ěg tóg věnh jykre kórég hã han mũgtĩ ver, věnh vatánh tá. Kỹ ěg tóg sir věnh jykre há kato tẽ mũ, ěg tỹ věnh jykre kórég han kỹ, věnh jykre há tỹ ěg mỹ há nĩ (hã) ra. Ti vĩ mranh jafã vỹ tỹ ěg nýtĩ, ěg tỹ Topě vĩ mranh to én kỹ, ěg tỹ to én sór tũ ra. ěg kākā tóg nĩ nĩ, věnh jykre kórég ti. ²⁴⁻²⁵ ěg tỹ to jykrén há han kỹ Topě tỹ ěg jyvěn tí ěn tóg ěg mỹ há tí, kỹ ěg tóg han sór mũ. Ge ra ěg tóg ti vĩ mranh ja nĩgtĩ, kỹ ěg tóg mranh mãn', mranh mãn' he tí sir, ěg tỹ mranh sór tũ ra.

Jagy pẽ ti nĩ. Kórég ěg nýtĩ, ěg tỹ ũn há han ki kagtĩg nýtĩn kỹ. Nũgme ki vár kãn jé ěg tóg ke mũ mỹr. ũ nỹ hỹn ěg kren han ki kanhró nĩ, věnh jykre kórég tag to? ěg Senhor tỹ Jesus Cristo hã vē. Ti hã vỹ ěg kren han mũ. Kỹ ěg tóg Topě mỹ: “há ti nĩ, ã kósin tỹ ěg kren han mũ ti,” he tí. Hã kỹ ěg tóg vēsóg ki ěg jykre si tỹ tũg' he ki kagtĩg nýtĩ. Jesus hã tugnĩn Topě tóg ěg mỹ věnh pãte fón tí, kỹ ěg tóg ti mỹ há nýtĩ.

8

Topě kuprĩg tỹ ěg jagrẽ

¹ Kỹ tóg, ěg tỹ Jesus Cristo ki rã kỹ Topě tóg ěg vóg kónãn mãn ke tũ nĩ ha. ² Věnh jykre tãg vỹ ěg kākā nĩ ha, Topě kuprĩg tugrĩn, ěg tỹ Jesus Cristo ki ge kỹ nýtĩn kỹ. Ti tỹ tỹ ěg jagrẽ nĩn kỹ ěg rĩnrĩr nýtĩ, kỹ ěg kygvar kỹ nýtĩ sir, Topě vĩ mranh jan ki. Nũgme ki vár ke tũ ěg nýtĩ ha. ³ Topě tỹ vãsỹ ěg jyvěn mũ ra ěg krenkren ja tũ nĩ ver, ěg tỹ ki króm kãn ja tũ nĩn kỹ, ěg krónhkrój nýtĩn kỹ. Hã kỹ Topě tóg ã kósin jěně ja nĩ. ũ tỹ Topě vĩ mranh jafã ri ke tóg mur, ěg ri ke, hã ra tóg mranh ja tũ nĩ inhhã. Kỹ tóg ěg jagfy ter ja nĩ, ěg hã tỹ ti vĩ mranh ja tugrĩn. Topě tỹ ti vóg kónãn hã vē, ěg nýtĩg ja ki. ⁴ Vãhã ěg tóg Topě tỹ vãsỹ ěg jyvěn mũ ěn ki króm há nýtĩ, Topě kuprĩg tỹ tỹ ěg jagrẽ nĩn kỹ. Kỹ ěg tóg ěg tỹ nén to én mũ ěn han mãn ke tũ nýtĩ sir, ěg jagrẽ há tỹ ěg tar han mũ tugnĩn. ⁵ ěg tỹ ěg tỹ nén to én mũ ěn han sór kỹ ěg tóg tỹ Topě vĩ mranh jafã nýtĩ. ěg tỹ hã ra Topě kuprĩg tỹ jagrẽ nĩn kỹ ěg tóg ti hã tỹ ěg mỹ nén tó mũ ěn han tí. ⁶ ěg tỹ nén to én mũ ěn han kỹ ěg nũgme ki vár ke mũ vē. ěg tỹ Topě kuprĩg tỹ ěg mỹ nén tó mũ ěn han kỹ ěg tóg věnh jykre tãg han kỹ nýtĩ, kỹ ěg jatun mỹ mũgtĩ sir.

⁷ ũ tỹ ěg tỹ nén to én mũ ěn han kỹ tóg Topě kato tẽ mũ sir. Ti pi(jé) Topě jykre han tí'. Han ki kagtĩg tóg nĩgtĩ. ěg jykre sin hã vē. ⁸ ũ tỹ ěg tỹ nén to én mũ ěn han to tóg kórég nĩ, Topě ti. ⁹ Ag jãvo ãjag tóg Topě kuprĩg tỹ ãjag mỹ nén tó mũ ěn hã han tí. ěg tỹ nén to én mũ ěn han vãnh ãjag nýtĩ, Topě kuprĩg tỹ tỹ ãjag jagrẽ nĩn kỹ. ũ tỹ Cristo kuprĩg tỹ jagrẽ tũ nĩ ěn pi(jé) tỹ ti tũ nĩ'. ¹⁰ Cristo tũ vỹ tỹ ěg nýtĩ, kỹ tóg ěg kākā jě nĩ, Jesus Cristo ti, ã kuprĩg tỹ. Kỹ ěg há vỹ ter ke mũ, ěg tỹ Topě vĩ mranh jan kỹ. Hã ra ěg tóg ěg rĩr krỹg ja tũ venh ke mũ, Topě tỹ ěg mỹ věnh pãte fón ja nĩn kỹ. ¹¹ Topě kuprĩg vỹ tỹ ěg jagrẽ jě ha. Topě vỹ Jesus rĩn mãn, ti ter kar kỹ. Ti tỹ Jesus rĩn mãn kỹ tóg ěg há ter ke tag rĩn mãn ki kanhró nĩ gé, ěg mỹ ěg há tãg han kỹ, ti kuprĩg tỹ tỹ ěg jagrẽ nĩn kỹ.

¹² Inh kanhkã', Topě tũ vỹ tỹ ěg nýtĩ ha, ěg tỹ ti jykre hã han jé. Kỹ han tũg nĩ, ãjag tỹ nén to én mũ ti. ¹³ ěg tỹ nén to én mũ ěn han kỹ ěg nũgme ki vár ke mũ. Topě tỹ ěg jagrẽ vỹ ěg tỹ nén to én mũ tag tỹ tũg' he sór mũ. ěg tỹ ti mré tỹ tũg' hen kỹ ěg věnh jykre tãg han kỹ nýtĩn mũ. ¹⁴ ěg tỹ Topě kuprĩg tỹ ěg mỹ nén tó tí ěn han kỹ ěg tóg tỹ Topě krě nýtĩ, Jesus jãvy ěg nýtĩ mỹr, ha mẽ. ¹⁵ ěg tỹ tỹ Jesus jãvy nýtĩn kỹ ti pi(jé) ěg kaně jun ke mũ'. Ti kuprĩg vỹ tỹ ěg jagrẽ nĩ, kỹ ěg tóg tỹ Jesus jãvy nýtĩ ha. Topě pi(jé) tỹ ěg patrão kórég ri ke nĩ'. Tỹ tóg ěg panh nĩ ha. Hã kỹ ěg tóg ti mỹ: “Aba,” he tí, hã vỹ: “ěg jóg,”

he mū, ěg vī ki. Ěg jagrē hā jamēn kŷ ěg tóg ti mŷ: “ěg jóg mág,” he tī. ¹⁶ Topē kuprīg hā ne ěg mŷ tó tī, ěg tŷ tŷ Topē krē nŷtī ti, Jesus jāvy. Hā kŷ ěg ki kanhró nŷtī. ¹⁷ Ěg tŷ tŷ ti krē nŷtīn kŷ tóg ěg mŷ ā tū nīm kān ke mū gé, Topē ti. Jesus Cristo hā mŷ tóg nīm kān ke mū, kŷ tóg ěg mŷ nīm kān ke mū gé sir, ěg kāke mré. Hā jé ěg tóg ti mré jagāgtar ke mū gé, ti tŷ vēnh jykre há to jagtar ja ěn ri ke. Kŷ ěg tóg ti mré tŷ ūn mág nŷtīnh ke mū gé, ěg jagtar kar kŷ.

Kanhkā ve jé ěg tóg ke mū

¹⁸ Ha vé, tag ki kanhró sóg nī, ha mē. Kanhkā tá tóg sér pē tīnh mū. Tá ěg tóg tŷ ūn mág nŷtīnh mū. Kŷ ěg tŷ ūri ti tugnīn jagāgtar mū tag vŷ tŷ ěg mŷ nén ū tū pē nŷgtī, ěg tŷ tŷ ūn mág nīnh ke to jykren kŷ. ¹⁹ Topē vŷ ā krē tŷ tŷ ūn mág han ke mū. Kŷ Topē tŷ ūn han mū kar ag tóg tag hā ve sór mū gé, bicho kar, ka kar, ěkré kar ke gé, nén kar ti. ²⁰ Nén kar vŷ jagāgtar nŷtī, ūn ve tŷ Topē vī mranh tugrīn. Vēnh kókén ja tū ti nī, Topē vī mranh ja tū ti nī, hā ra tóg ūn ve tŷ Topē vī mranh ja tugnīn jagtar nŷtī, Topē tŷ ěg mré ti vóg kónān kŷ, nén kar ti. ²¹ Hā ra Topē tóg ā tŷ ūn han mū kar ag mŷ: “kejēn ājag jagtar mán ke tū nŷtī ha,” he ja nī. Kŷ Topē tŷ Jesus jāvy ag tŷ ūn mág hyn han ke kurā ěn kā tóg nén kar tŷ há' henh ke mū gé, kŷ tóg tŷg mán ke tū nī ha, nén kar ti. Nén kar vŷ há nŷtīnh mū, Jesus jāvy há nŷtīnh ke ěn ri ke. ²² Ver tóg Topē tŷ ūn han mū kar ag mŷ jagy tī, kŷ tóg fag tŷ fag kósin mán kŷ fag vēnhkrēr ěn ri ke han tī, Topē tŷ ūn han kar ti, ti jagāgtar nŷtīn kŷ. ²³ Nén ū kar tag vēnhkrēr ri ke han ěg tóg tī gé, ěg tŷ ti jagy ven kŷ, ěg tŷ ti kuprīg tŷ jagre nŷtī ra. Ěg jagrē to ěg tóg ki kanhró nŷtī, ěg tŷ tá tŷ ūn mág nŷtīnh ke ti. Ge ra tóg ver ěg mŷ jagy tī, tag ti ki, kŷ ěg tóg ti mré nŷtī sór mū. Kŷ ěg tóg venh ke mū sir, ti tŷ ā krē pē mŷ nén nīm ke mū ěn ti. Hā jāvānh ěg tóg mū. Ěn kā tóg ěg mŷ ěg fār tǎg han ke mū, ěg fār ter ke tū ti.

²⁴ Krenkren kŷ ěg nŷtī, hā ra ěg tóg ver vég tū nŷgtī, ěg krenkren kŷ nŷtī tag, ěg fār tǎg tag. Ěg tŷ venh há tóg tī. Hā jāvānh ěg tóg tī. Ěg tŷn jāvānh mū ra ěg tóg ver vég tū nŷtī. Ěg tŷn ve kar kŷ ěg tóg ti jāvānh mán ke tū nŷtī ha. ²⁵ Hā ra ěg tóg ver vég tū nŷtī, hā kŷ ěg tóg ti jāvānh mū ver. To krónh ke tū ěg tóg nŷtī, ti jāvānh to.

Topē kuprīg tŷ ěg jagfy vī

²⁶ Hā ra Topē kuprīg vŷ ěg tar han tī, ěg krój nŷtīn kŷ. Kejēn ěg ki kagtīg nŷtī, ěg tŷ ne to vīnh ken ki, ěg tŷ Topē mré vēmén kŷ. Hā kŷ tóg ěg jagfy vī tī, Topē kuprīg ti. Kejēn ěg jēnger mág han tī, ěg tŷ nén ū to vīnh ken ki kagtīg nŷtīn kŷ. Hā ra tóg ěg mré vī tī gé, ěg jagfy, Topē kuprīg ti. Ti vī ki kagtīg ěg nŷtī, hā ra tóg ěg jagfy vī' vī' he tī. ²⁷ Kŷ Topē vŷ ěg tŷ nén ū to jykren mū kar végtī. Kŷ tóg ā kuprīg tŷ nén tó mū tag ki kanhró nī gé. Ti jykre vŷ ti mŷ há nī, ti tŷ nén to vī mū ti, ěg jagfy, Topē tū kar ag jagfy. Topē tŷ nén ū han sór mū ěn hā to vī tóg tī, ti kuprīg ti.

²⁸ Ha vé, Topē to há ěg nŷtī, hā kŷ ěg tŷ nén végtī mū kar vŷ ěg tar han ke mū, ěg tŷ ti jagy végtī mū mré hā. Topē hā vŷ ěg ki rīr mū, hā kŷ nén ū kar vŷ ěg tar han ke mū, ti tŷ ěg kuprīg ja nīn kŷ. ²⁹ Ěg tŷ ti ki ge tŷg ki tóg: “inh ki tóg rānh ke mū, tag,” he ja nī, ki kanhró nīn kŷ. Kŷ tóg ěg kuprīg ja nī gé, ěg tŷ ti kósin ri ke pē nŷtī jé. Ti hā vŷ tŷ Topē kósin pē nī inhhā, ti kósin ve, kŷ tóg tŷ ěg kāke nī gé sir, kŷ ti jāvy ag, ti ve fag vŷ e tǎvī tǎvī nŷtīnh mū ha. Ěg hā vē sir. Topē tŷ nén to jykren hā vē. ³⁰ Hā jé tóg ěg kuprīg, kŷ tóg ěg mŷ vēnh vī jēnē. Ti tŷ ěg mŷ vēnh vī jēnē kŷ tóg ěg mŷ vēnh pǎte fón gé. Ěg mŷ vēnh pǎte fón kŷ tóg ěg tŷ ūn mág hyn han ke mū gé, ti mré, tá.

Topē tŷ ěg to há

³¹ Tag tóg inh mŷ e tī, sŷ to jykren ke tóg inh mŷ tū tī. Topē vŷ tŷ ěg mré ke nī mŷr. Hā kŷ ěg kato tē ū pi(jé) ěg tŷ hē ri kenh mū ha'. ³² Topē vŷ ā kósin pir fēg ja nī, ti tŷ ěg jagfy ter jé. Ā kósin pir nenh ja tū tóg nī, hā kŷ tóg ěg mŷ nén ū há nenh ke tū pē nī, ti tŷ ā kósin pir nenh ja tū nīn kŷ. ³³ Topē tŷ ěg kuprīg kŷ tóg ū tŷ ěg kato vī sór mū ra tóg ag mŷ vēnhmŷ tī. Topē hā ne ěg mŷ vēnh pǎte fón ja nŷgtī'. ³⁴ Kŷ ū ag tŷ ěg to: “kórég ag

nýtí,” he mũ ra ãg tóg Topẽ mý há nýtí. Jesus Cristo hã tóg ter ja nĩ, ãg jagfy, ký tóg rĩr mãn ja nĩ gé. Topẽ pẽgja tá tóg nĩ nĩ, ti rã hã, ký tóg ãg jagfy vĩ tí.

³⁵ Ký ù pi(jé) Cristo tỹ ãg to jũ han ki kanhró nĩ'. Ti fe vỹ tỹ ãg nýtí. Kejẽn ãg tóg nén ù jagy venh ke mũ, ti tigrĩn. Kejẽn ãg kanẽ jur ke mũ. Kejẽn ag tóg ãg vóg kónãn ke mũ. Kejẽn ãg tóg kókĩnkĩr ke mũ. Kejẽn ãg tóg kur venh ke tũ nĩ gé. Kejẽn ãg tóg kãgter kren ke mũ. Kejẽn ag tóg ãg kãmĩ ù tén ke mũ. Jérĩn mý ãg tóg Cristo tovãnh ke tũ nĩ. Ký tóg ãg tovãnh ke tũ nĩ gé, Jesus Cristo ti. ãg to há nĩn ký tóg nĩ nĩ. ³⁶ Kejẽn ãg tóg ti jagy tag vég tí, hã ký tóg rán ký nĩ, ha mẽ: “ãg tỹ ã to há nýtí tugnĩn ag tóg ãg tén sór tí, kurã kar ki. Ag mý ãg tóg carneiro ri ke nýtí. Carneiro tãnh ãg tóg tí, ãg tỹ ko jé. Vẽnh mẽg ri ke ãg nýtí, ag mý, ãg tỹ ã to há nýtí tigrĩn,” he ja tóg nĩ, Topẽ vĩ rá ki. Hã ra tóg ge nĩ. ³⁷ Hã ra tóg tỹ nén ù tũ nĩ, ãg mý. Ti hã ne ãg tar han tí', ù tỹ ãg to há tãvĩ nĩ tí. Hã ký tóg ãg mý sér tí, ãg tỹ nén jagy vég mũ ra, ti tigrĩn.

³⁸ Ha vé, tag ki kanhró sóg nĩ, ha mẽ. Nén ù pi(jé) Topẽ tỹ ãg to há nĩ tag tỹ tũg' henh mũ', ha mẽ. ãg ter mũ ra tóg ãg to há nĩ, ãg ter tũ ra ke gé. Topẽ tỹ jẽnẽ jafã ag vỹ Topẽ tỹ ãg kato tẽ han ki kagtĩg nýtí gé. Japo ag vỹ ti tỹ ãg kato tẽ han ke tũ nĩ gé, ag tỹ han sór mũ ra. Pã'i kar ag vỹ tag han ki kagtĩg nýtí gé. ãg tỹ ùri nén ù jagy vég mũ ra ãg tóg ti tovãnh ke tũ nĩ, ký tóg ãg to jũnh ke tũ nĩ gé, ãg tỹ kejẽn nén ù jagy tãvĩ vég mũ ra. ³⁹ Kanhkã tãn ag vỹ ti tỹ ãg to jũ han ke tũ nĩ gé, nũgme tãn ag ke gé, ag tỹ ti tỹ ãg to jũ han sór mũ ra. Topẽ tỹ nén hyn han ja kar vỹ ti tỹ ãg to jũ (jé) han ke tũ pẽ nĩ. ãg to há nĩ ký tóg nĩ nĩ, ãg tỹ ãg Senhor tỹ Jesus Cristo ki ge ký nýtĩn ký.

9

Topẽ tỹ Judeu ag kuprẽg

¹ Nén ù tó sór inh mũ gé, ha mẽ. Cristo vỹ ki kanhró nĩ, sỹ tónh ke mũ tag. Sỹ ki hã ke vẽ, ón tũ sóg nĩgtĩ, ký Topẽ kuprĩg vỹ inh mý: “ki hã ã tóg tó,” he tí gé. ²⁻³ Ha mẽ, inh mré ke ag to sóg fe kaj tãvĩ nĩ, Judeu ag to, ag tỹ Jesus kato tẽn ký. Fỹ sóg tí, sỹ ag mĩ ãkrén ký, inh mý tóg vẽnũh kaga jagy ri ke nĩ, ha mẽ. Ký, Topẽ tỹ ag jagfy inh kato tẽ ra tóg inh mý há tí vẽ, Jesus tỹ ãg jagfy ter ri ke, ag tỹ ti ki ge jé. Ti tỹ ag jagfy isỹ Cristo mré ke tũ han ra tóg inh mý há tí vẽ. Tỹ ag tóg inh kanhkã pẽ nýtí, ⁴ isỹ tỹ ag mré Israel krẽ nĩn ký. Tỹ ag tóg Topẽ krẽ ja nýtí vẽ, ký tóg ag mý ã jykre tar ven ja nĩ gé. Ag mré vẽnũh jykre tỹ hẽn ri ke han ja tóg nĩgtĩ, ag jyvẽn ja tóg nĩgtĩ gé, ký ti vĩ tó tí ag vỹ rán ja nĩgtĩ gé, Topẽ vĩ ti. Ti jo ãn pẽ han ja ag tóg nĩgtĩ, Jerusalém tá, krẽm nén ù kar pũn jafã. Ag mý tóg ã tỹ nén han ke ti kãmén ja nĩgtĩ. ⁵ ãg jóg'jóg ve ag, ù tỹ vãsỹ Topẽ mré vẽnũn tí ag vỹ ag jóg'jóg ve nýtí gé, ký Cristo vỹ tỹ ag kã ù nĩ gé, ag kanhkã, ti tỹ ga kri tĩg ký. ãg kri ke kar vẽ, Cristo ti, Topẽ ti. Ti hã mý ãg vỹ há han ke mũ, to ãg krónh ke vãnũh nýtí, ga kri, kanhkã tá ke gé, ti mý vỹ há han to. Amém.

⁶ Jesus kato tẽ ag tóg nýtí ha, Israel ag, Topẽ tỹ ag jyvẽn ja ra. Hã ký tóg Topẽ tỹ ag mý tó há han ja tũ nĩ ve nĩ. Hã tũ vẽ hã ra. Ag hã ne to jykren há han ja tũ nĩ', ti tỹ ag mý tó há han ja ra. ãg tỹ to jykren há han ký ãg Israel ag jykre ki kanhrãn mũ, ha mẽ: Israel krẽ ù tóg tỹ Topẽ krẽ pẽ tũ nýtí, ha mẽ. ⁷ Hã ra ag tóg: “Abraão vỹ tỹ ãg jóg'jóg ve nĩ,” he tí, “hã ký ãg tóg tỹ Topẽ krẽ nýtí, Abraão tugnĩn,” he ag tóg tí. Kygnẽ ký ag tóg tag tó tí, ha mẽ. Topẽ tóg Abraão mý: “ã kósĩn tỹ Isaque krẽ vỹ tỹ ã krẽ pẽ nýtĩnh mũ,” he ja nĩ. ⁸ Hã ra Abraão vỹ krẽ e han ja nĩgtĩ, kósĩn pir tũ ti nĩ. Hã ký Abraão krẽ ù vỹ tỹ Topẽ krẽ tũ nýtí, Abraão tỹ ag han ja ra. ù tỹ Topẽ ki ge ký nýtí ag hã vỹ tỹ Topẽ krẽ nýtí, Topẽ tỹ ùn kuprẽg ja ag.

⁹ Topẽ vỹ Abraão mý: “prỹg tũg ký sóg ã venh kãtĩg mãn ke mũ, ký Sara fi kósĩn vỹ kã nỹnh mũ sir, ha vemnĩ,” he ja nĩ. Topẽ tỹ Abraão mý Isaque mur ke tó jan hã vẽ, ti tỹ Isaque hã kuprẽg jan ký. ¹⁰ Ký tóg ge nĩ gé, ãg tỹ Rebeca fi krẽ to jykren ký, Isaque prũ fi. Krẽ vẽnũn han ja fi nĩ, ký ag tóg tỹ ãg jóg tỹ Isaque krẽ kar nýtí, ùn vẽnũn ja ag. ¹¹⁻¹² Ký ag mur tũg ki, ag tỹ ver nén ù han tũg ki Topẽ tóg ag mýnh fi mý: “ùn mur vén ke mũ vỹ tỹ ù tỹ ti nón mur ke mũ ãn krẽm ke jẽnũh ke mũ, ha vemnĩ,” he ja nĩ. Topẽ tỹ fi mý tó kã

ag tóg nén ũ há mré nén ũ kórég han ja tũ nĩ ver. Ag mur tũg ki ke ja vē. Topē tỹ ěg mỹ ã jykre ven sór ja vē, hã kỹ tóg ag mur tũg ki tag tó ja nĩ. Ā tỹ nén to jykrén mũ ěn han ti tĩ, Topē ti. Kỹ tóg ã tỹ ũn kuprĕg sór mũ ěn hã kuprĕg tĩ gé, ag tỹ ver nén ũ han tũg ki. ¹³ Hã kỹ tag tóg rán kỹ nĩ gé, Rebeca fi krĕ ěn ag to, ha mẽ: “Jacó to inh há nĩ, hã ra sóg ti jo mur ja tỹ Esaú to kórég nĩ,” he ja tóg nĩ, Topē vĩ rán ki.

¹⁴ Kỹ Judeu ag hỹn inh mỹ: “Topē jykre vỹ há tũ nĩ,” he sór mũ. “Kuryj tũ ti nĩ, ti tỹ vĕsóg ki nén to jykrén sór kỹ, ti tỹ ũn kuprĕg mũ ěn to,” he ag hỹn tĩ. Hã tũ vē hã ra. ¹⁵ Hã kỹ tóg Moisés mỹ: “isỹ ũn jagāgtān sór mũ ěn hã jagāgtān jé sóg ke mũ,” he ja nĩ, Topē ti. ¹⁶ ěg tỹ to vāsān tũ vē, ěg tỹ to tar nĩnh ke tũ vē. Topē tỹ vĕsóg ki ěg jagāgtān hã vē. ¹⁷ Hã kỹ ga tỹ Egito tá pã'i tỹ Faraó to tag tóg rán kỹ nĩ gé, ha mẽ. “Ūn tar vỹ tỹ inh nĩ,” he ja ti nĩ, Topē ti, Faraó mỹ. “Ā tỹ sóg ũn tar han, vĕnh kar tỹ isỹ tỹ ũn tar nĩ tag ki kanhró nỹtĩ jé, isỹ ã vóg kónān to, ã tar jĕ ra. Vĕnh kar tỹ inh jyjy mĕnh ke vē, hã jé sóg ã fĕg,” he ja ti nĩ, vāsỹ, Topē ti, Faraó mỹ.

¹⁸ Hã kỹ, Topē tỹ ũn jagāgtān sór nĩn kỹ tóg ti jagāgtān tĩ sir. Hã ra tóg ũ tỹ mẽ jāvānh ěn ti kutu kãfór han mũ sir, Faraó ri ke.

Topē tỹ ã tỹ nén han sór mũ ěn han tĩ

¹⁹ Kỹ Judeu ag hỹn inh mỹ: “kỹ ěg hỹn Topē tỹ ěg kuprĕg tũ tigrĩn kutu nỹtĩnh mũ,” he sór mũ. “Ti tũgnĩn ke vē. Kỹ ti tỹ ne jé ěg vóg kónān sór nĕ?” he sór ag hỹn mũ, ón kỹ Topē to vĩn kỹ. ²⁰ Ha vé, ěprã ke vỹ tỹ ěg nỹtĩ. Ti vĩ kafān ke tũ pĕ ěg tóg nĩ. Ti kamĕg jé ěg tóg ke mũ. Ā tỹ nén han sór mũ ěn han ti tĩ.

ěg rānhřāj to jykrén nĩ. Kejĕn ěg tóg nén ũ han tĩ, go'or tỹ. Kỹ go'or tóg ěg mỹ: “isỹ kukrũ kórég han tũg nĩ, isỹ kukrũ sĩnvĩ han nĩ,” he tũ nĩgtĩ. ěg vĩ kafān ke tũ ti nĩ, go'or ti. ěg tỹ tỹ nén han sór mũ ěn han ěg tóg tĩ, ti ki jĕmĕ vānh ěg nỹtĩ. ²¹ Go'or ũ tỹ ěg kukrũ sĩnvĩ han tĩ, ũ tỹ ěg kukrũ kórég han tĩ. ěg tỹ nén han sór mũ ěn han ěg tóg tĩ.

²² Topē vỹ ěg rānhřāj tag ri ke han tĩ gé. Ti tỹ nén han sór mũ ěn han ti tĩ, ěg tỹ, ěg tỹ ti mỹ go'or tỹ kukrũ ri ke nỹtĩn kỹ. Ū ag to tóg jũ tĩ, ěg kar tỹ ag ki ti tar nĩ to jykrén jé, ti jũ ěn ti, Topē ti. Kỹ tóg kānhmar ag to jũnh ke vē vē, hã ra tóg ver ag to fe mág nĩ, ag kórég tāvĩ nỹtĩ ra, ti tỹ ũ to jũnh ke mũ ag. Hã ra tóg ag vóg kónān ke mũ, ha vemnĩ. ²³ Kỹ tóg ũ ag jagāgtān mũ gé, vĕnh kar tỹ ag ki Topē tỹ tỹ ũn há tāvĩ nĩ to jykrén jé, ěg há kar kãfór. Hã jé tóg ag kuprĕg ja nĩgtĩ. Ti tỹ ag tỹ ũn mág han sór vē, ti mré. ²⁴ ěg hã vē sir, ũn kuprĕg kỹ nỹtĩ tag ag. Hã kỹ tóg ěg mỹ vĕnh vĩ jĕnĕ. Judeu ag kāmĩ tóg ěg mỹ vĕnh vĩ jĕnĕ, fóg ag kāmĩ ke gé, kanhgág ag kāmĩ ke gé, ti tỹ ěg jagāgtān sór kỹ.

²⁵ Hã kỹ Oséias tóg tag tó ja nĩ, ha mẽ. “Vāsỹ ag vỹ tỹ inh mré ke tũ ja nỹtĩ, hã ra sóg ag mỹ: “inh mré ke vỹ tỹ ājag nỹtĩnh mũ ha, isũ ag,” he sór mũ, he ti, Topē ti,” he ja tóg nĩgtĩ, Oséias ti. “Vāsỹ sóg ag to há tũ ja nĩgtĩ, hã ra sóg ag to há nĩnh mũ ha,” he ti. ²⁶ “Vāsỹ sóg ag mỹ: “ājag pi(jé) tỹ isũ nỹtĩ’,” he ja nĩgtĩ. Hã ra sóg ag mỹ: “Topē krĕ vỹ tỹ ājag nỹtĩnh mũ,” hĕnh ke mũ, “ũn rĩr nĩ ěn krĕ vỹ tỹ ājag nỹtĩnh mũ,” he jé sóg ke mũ ag mỹ,” he ti, Topē ti,” he ja tóg nĩ, Oséias ti. Ti tỹ ũ tỹ ũri Cristo ki ge kỹ nỹtĩ ag kāmĕn hã vē.

²⁷ Kỹ Isaías vỹ Israel krĕ ag to tag tó, ha mẽ: “e ag nỹtĩ, Israel krĕ ag, rỹnhřāj e nĩ ěn ri ke, goj kāmĩ pó rynchryj e nĩ ěn ri ke. Ge ra ag pipir nỹtĩnh mũ, ũn krenkren ke mũ ag.

²⁸ Topē vỹ kānhmar ã tỹ nén tó ja ěn han ke mũ, ga tag ki, kỹ tóg ag vóg kónān kãn ke mũ, ũn e ěn ag, ag kórég nỹtĩn kỹ,” he ja ti nĩ, Isaías ti. ²⁹ Kỹ tóg tag tó ja nĩ gé, ha mẽ: “ěg tũg kãn kren ti, Topē ti, vĕnh kar kri nĩ ěn ti. Hã ra tóg ěg kāmĩ ũn pipir krenkren han ja nĩgtĩ. Cidade tỹ Sodoma tá ke ag tũg kãn ja tóg nĩ, Topē ti, cidade tỹ Gomorra tá ke ag ke gé. Kỹ tóg ěg tũg kãn kren gé, ag ri kĕn, hã ra tóg ěg kāmĩ ũ krenkren han mũ,” he ja tóg nĩ, Isaías ti.

³⁰ Oséias mré Isaías ag tỹ tó mũ vỹ ge nĩ, ha mẽ. Fóg ag, kanhgág ag pi(jé) vĕnh jykre kuryj nón mũ ja nĩgtĩ'. Ge ra Topē tóg ag jagāgtān kỹ ag mỹ vĕnh pãte fón mũ ha, ag tỹ Jesus ki rã kỹ. ³¹ Ag jãvo Israel krĕ ag vỹ ājag jykre hã tỹ Topē tỹ ag jyvĕn ki króm sór ja nĩgtĩ. “Ti vĩ han ěg tĩ, kỹ tóg ěg to há nĩ,” he ag tóg tĩ. Hã ra ag tóg ki króm kãn ja tũ nĩ,

hã ky Topê tóg ag to há tũ nĩ, jérĩn mĩ. ³² Hẽ ri ken ky hĩn'? Ag tỹ ti ki ge ja tũ nĩn ky, hã ky tóg ag mĩ vẽn pãte fón ja tũ nĩ gé. Ag tỹ vėsóg ki Topê jykre ki króm sór ja vẽn. Hã ky ag tóg ón ky ki króm ja nĩgtĩ. Hã ky ag tóg Cristo kato tẽ nĩti.

Pó ri ke ti nĩ, Cristo ti, ẽg tỹ tỹ krĩm ke jafã. Ag tỹ ti tỹ krĩm ke jan hã vẽn, hã vỹ: ti ki rã tũ, he mũ. ³³ Hã ky tag tóg rán ky nĩ, Jesus Cristo to, ha mẽ. “Pãnónh sĩ tỹ Sião pẽnĩn cidade ki sóg pó nĩm mũ, ag tỹ tỹ krĩm ke jé. Ky ag tóg, pãró tag tỹ ag tóg krĩm ke ky vár ke mũ sir. Hã ra ù tỹ ti ki rã mũ vỹ ã tỹ nén ve sór mũ ẽn venh ke mũ,” he ja ti nĩ, Topê vĩ rán ki, Jesus Cristo to.

10

Judeu ag tỹ Jesus ki ge ky krenkren ke

¹ Inh kanhkã', isỹ inh mré ke tỹ Israel tỹ krenkren han venh há tãvĩ tóg tĩ, hã jé sóg Topê mré vẽn tĩ. ² Topê vĩ han jé ag tóg vãsãnsãn mũgtĩ, tag vэг isóg nĩ nĩ. Hã ra ag tóg ki kagtĩg nĩti, ky ag tóg ẽg tỹ nén han ke tũ ẽn han tĩ. ³ Vėsóg ki ag tóg vẽn jykre kuryj to vãsãn sór tĩ. Hã ra ù tỹ ẽg mĩ vẽn jykre kuryj nĩm sór mũ vỹ tỹ Topê ti nĩ. Tag ve sór tũ ag nĩti, Topê tỹ ẽg mĩ nĩm ke tag. Hã ky ag tóg Topê kato vãsãnsãn mũ. ⁴ Cristo vỹ hur kãtig. Ky ẽg tóg ti ki ge ky nĩtin ky ti mĩ há nĩti ha. ẽg tỹ Topê tỹ vãsỹ ẽg jyvẽn ki króm tugnĩn ke pijé'. Jesus Cristo ki rã tugrĩn ke vẽn.

⁵ Ha vé, Moisés vỹ Topê jykre si to tag rán, ha mẽ. “Û tỹ vẽn jykre kuryj han kãn mũ vỹ rĩr nĩnh ke mũ, ù tỹ ge vỹ rĩr krỹg ja tũ venh ke mũ, ti tỹ Topê tỹ ẽg jyvẽn tĩ ẽn ki króm kãn tugnĩn,” he ja tóg nĩ, Moisés ti. Hã ra ẽg tóg ki króm kãn ki kagtĩg nĩti, hã ky ẽg tóg ẽg tỹ ki króm kãn sór mũ ra rĩr nĩnh ke tũ nĩ. ⁶ ẽg tỹ Jesus ki rã tugrĩn ẽg Topê mĩ há nĩti. Ky ẽg tóg: “ũ nỹ hĩn kanhkã ra tĩg mũ, Cristo pére kãtig jé?” henh ke tũ pẽ nĩ. Mur ky ti nĩ ha. ⁷ Ky ẽg: “ũ nỹ hĩn vẽn kuprĩg ag jamã ra tĩg mũ, Cristo rĩn mãn jé?” henh ke tũ pẽ nĩ gé. Rĩr mãn ky ti nĩ ha. ⁸ Tag tó jé ẽg tóg ke mũ, ha mẽ: “jagy tũ ti nĩ, Topê vĩ ti, to jykrén há ti nĩ. Kãnhmar ẽg tónh ke mũ, kãnhmar ẽg to jykrén ke mũ, Topê vĩ to,” he jé ẽg tóg ke mũ.

Topê vĩ tag hã tó sóg tĩ. “Jesus Cristo ki rã tugnĩn ẽg krenkren ke mũ,” he sóg tĩ. ⁹ ẽg krenkren jé ẽg tóg Jesus to: “ẽg Senhor vỹ tỹ ti nĩ,” henh ke mũ. Vẽn kar mĩ ẽg tónh ke mũ. Ky ẽg tóg ẽg fe tỹ ti ki rãnh ke mũ gé. Topê tỹ ti ter kar ky ti rĩn mãn ja tag vỹ tỹ ẽg mĩ ki hã ke nĩ, ky ẽg kri fig mũ. Ky ẽg tóg krenkren ke mũ sir. ¹⁰ ẽg tỹ ẽg fe tỹ ti ki rã ky ẽg tóg ti mĩ há nĩti. ẽg tỹ vẽn kar mĩ ti kãmén ky ẽg krenkren ke mũ sir. ¹¹ Hã ky tag tóg rán ky nĩ, ha mẽ: “ẽg tỹ ti ki ge ky ẽg tóg ẽg tỹ nén ve sór mũ ẽn venh ke mũ,” he ja tóg nĩ, Topê vĩ rán ki. ¹² Vẽn kar mĩ ke vẽn sir, vẽn vĩ tag. Judeu ag mĩ ke vẽn, kar ky fóg ag mĩ ke vẽn gé, kanhgág ag mĩ ke vẽn gé. Tỹ tóg ẽg kar Senhor nĩ mỹr. Ky, ẽg tỹ ti mĩ nén ù to vĩn ky tóg ẽg mĩ nén ù tỹ hẽn ri ke nĩm ke mũ gé sir, ẽg kar mỹ. ¹³ Tag hã vỹ rán ky nĩ gé, ha mẽ: “ẽg tỹ ẽg Senhor mỹ: “inh kren han nĩ,” hen ky ẽg krenkren ke mũ, ẽg kar,” he ja tóg nĩ, Topê vĩ tỹ rán ky nĩ ki.

¹⁴ ẽg tỹ ti ki rã tũ nĩti ra ẽg tóg: “inh kren han nĩ,” he ki kagtĩg nĩtĩnh mũ vẽn. ẽg tỹ ti vĩ mẽ ja tũ nĩti ra ẽg tóg ti ki ge ki kagtĩg nĩtĩnh mũ vẽn. Û tỹ ẽg mĩ ti vĩ tó tũ nĩ ra ẽg ti vĩ mẽnh ke tũ nĩnh mũ vẽn. ¹⁵ Topê tỹ ag jẽgnẽg tũ nĩ ra ag tóg ẽg mĩ ti vĩ tónh ke tũ nĩnh mũ vẽn. Hã ky tag tóg rán ky nĩ, ha mẽ. “Û tỹ ẽg mỹ Topê vĩ sér ma kãmũ ag junjun vỹ ẽg mỹ sér pẽ tĩ,” he ja tóg nĩ, Topê vĩ tỹ rán ky nĩ ki. Topê tỹ ã vĩ tó tĩ ag jẽgnẽ to ken hã vẽn.

¹⁶ Hã ra ù ag tóg kri fi jãvãnh nĩti gé, ag tỹ ón ky mẽg mũ ra, Topê vĩ sér ti. Isaías vỹ ag to Topê mỹ tag tó ja nĩ. “ẽg jóg mág', inh vĩ mẽ jãvãnh ag nĩti,” he ja tóg nĩ. ¹⁷ Hã ky tóg, ẽg tỹ ti vĩ mẽ há han kar ky ẽg tóg ti ki rã tĩ. ẽg tỹ Cristo kãme mẽ ky ẽg ti ki rã tĩ.

¹⁸ Ky ajag hĩn inh mỹ: “Judeu ag mỹ hẽn ri ke mũn mẽ ja tũ nĩ, hã ky ag mỹ ti ki ge ja tũ nĩ?” he sór mũ, ajag tỹ inh carta tag ve ky. Vó, mẽ ky ag nĩti vẽn. Tag vỹ rán ky nĩ, ha mẽ: “ga kar mĩ ag tóg mẽ ja nĩgtĩ, ã vĩ ti. Ga fyr tá tóg jun gé, ã vĩ ti,” he ja ti nĩ, Topê vĩ rá ki.

¹⁹ Kĩ ājag h̄yn inh m̄y: “kĩ Judeu ag h̄en ri ke m̄un to jykr̄en há han ki kagt̄ig n̄yt̄i, ag t̄y m̄eg m̄u ra?” he s̄or m̄u, ājag t̄y inh carta tag ve k̄y. Vó, ag t̄y to jykr̄en s̄or k̄y ag tóg to jykr̄en m̄u vē. Moisés v̄y ěg m̄y tag k̄am̄en, ha m̄e: “Top̄e tóg fóg mr̄e kanhgág to tag tó s̄or m̄u, ha m̄e,” he tóg. “Ag v̄y t̄y isũ tũ n̄yt̄i ver, h̄a ra sóg ag t̄y isũ han s̄or m̄u, ājag t̄y ag ve k̄y ājag t̄y inh ki r̄a to ěn j̄e,” he tóg. “Fóg mr̄e kanhgág ag v̄y ājag m̄y kr̄i tũ n̄yt̄i, h̄a ra sóg ag to há n̄i s̄or m̄u, ājag t̄y ag tugr̄in j̄ugjũ j̄e, he tóg, Top̄e ti,” he ja tóg n̄igt̄i, Moisés ti, Judeu ag m̄y.

²⁰ Kĩ Isaías tóg tag tó m̄u ḡe, fóg ag to, kanhgág ag to, ha m̄e. “Ū ag tóg inh j̄av̄anh ja tũ n̄yt̄igt̄i, h̄a ra ag tóg inh v̄i j̄em̄eg m̄u ha. Top̄e h̄e ri ke t̄i? he ja tũ ag n̄yt̄i, h̄a ra sóg ag m̄y inh v̄i j̄en̄eg m̄u ha, he tóg, Top̄e ti,” he ja ti n̄i ḡe, Isaías ti. P̄a'i ag kam̄eg v̄anh k̄y tóg Judeu ag m̄y fóg ag mr̄e kanhgág ag t̄y Top̄e ki genh ke tó ja n̄i, Isaías ti. ²¹ Kĩ tóg Israel ag to tag tó ja n̄i ḡe sir, ha m̄e: “kur̄a kar ki sóg ājag m̄y: kun̄ig, he t̄i. H̄a j̄e sóg ājag m̄y inh n̄iḡe ven t̄i, ājag t̄y ḡir m̄y ājag n̄iḡe ven t̄i ěn ri ke. H̄a ra ājag tóg inh v̄i m̄e j̄av̄anh n̄yt̄i'. Inh v̄i kaf̄an kón̄an ājag tóg m̄u m̄yr',” he ja tóg n̄i, Isaías ti, ti t̄y Judeu ag m̄y Top̄e v̄i tón k̄y.

11

Israel kr̄e'kr̄e pipir ag v̄y t̄y Top̄e tũ n̄yt̄i

¹ Kĩ ājag h̄yn: “kĩ Top̄e m̄y ā povo t̄y Israel tov̄anh k̄an k̄y n̄i?” he s̄or m̄u, ājag t̄y inh carta tag ve k̄y. Vó, ag tov̄anh k̄an tũ ti n̄i. H̄a vé, t̄y sóg Israel kr̄e n̄i ḡe, h̄a ra sóg ti ki r̄a. Abraão kr̄e'kr̄e ū v̄y t̄y inh n̄i ḡe, ti kósin'kósin t̄y Benjamim kr̄e'kr̄e ū m̄yr. ² Isov̄anh ja tũ ti n̄i, Top̄e ti, h̄a k̄y tóg ā povo tov̄anh k̄an ja tũ n̄i. Nén kar han t̄ug ki tóg ěg kupr̄eg ja n̄i, ěg t̄y t̄y ti tũ n̄yt̄i j̄e.

Elias to jykr̄en n̄i. Ti k̄ame tóg rán k̄y n̄i, Top̄e v̄i rá ki. Elias tempo k̄a Israel ag tóg Top̄e kato t̄e m̄u. Kĩ ag tóg Elias kato t̄e m̄u ḡe, ti tén j̄e. H̄a k̄y tóg Top̄e m̄y tó m̄u, Elias ti, k̄y tóg: ³ “Senhor',” he m̄u. “Ā v̄i tó t̄i ag k̄agt̄en k̄an ag huri, ā m̄y p̄un jaf̄a kókén ag huri ke ḡe. Inh pir m̄y sóg kren, k̄y ag tóg isén s̄or m̄u ha ke ḡe. Ā tov̄anh k̄an k̄y ag n̄yt̄i,” he ja tóg n̄i, Elias ti, Top̄e m̄y, Israel ag to. ⁴ H̄a ra Top̄e tóg ti m̄y: “kr̄i kufy han t̄ug n̄i,” he m̄u. “Ū t̄y 7 mil (ke) v̄y ki n̄yt̄i, ū t̄y isov̄anh tũ ag, s̄y ūn kupr̄eg ja ag. Tag ag v̄y v̄enh k̄aggr̄a t̄y top̄e t̄y Baal m̄y: “Top̄e v̄y t̄y ā n̄i,” he ja tũ n̄i,” he ja tóg n̄i, Top̄e ti, Elias m̄y. Ti t̄y Israel pipir ag t̄y Top̄e tov̄anh t̄ug ja ěn tó vē.

⁵ Ge ti n̄igt̄i, ūri. Pir ag n̄yt̄i, Israel t̄y Top̄e to há n̄yt̄i ag. Ti kato t̄e k̄an tũ ěg m̄yr. Top̄e v̄y ěg jaḡagt̄an, k̄y tóg ěg kupr̄eg, h̄a k̄y ěg tóg ti to há n̄yt̄i, ěg pipir n̄yt̄i ra, ěg t̄y t̄y Israel kr̄e n̄yt̄in k̄y. ⁶ ěg t̄y v̄esóg ki han pijé', ěg t̄y to v̄as̄an pijé'. Top̄e t̄y v̄esóg ki ěg jaḡagt̄an h̄a vē. Ke tũ n̄i m̄u ra tóg: “v̄esóg ki sóg ājag jaḡagt̄an,” henh ke tũ n̄i vē. H̄a ra tóg v̄esóg ki ěg jaḡagt̄an.

⁷ Ge ti n̄i, ha m̄e, Israel ag v̄y ve s̄or ja n̄igt̄i, Top̄e t̄y ěg m̄y n̄en ū há ven ke ěn ti, h̄a ra ag tóg venh ke tũ n̄i. Top̄e t̄y ūn kupr̄eg m̄u ag h̄a m̄y tóg ven t̄i, Top̄e ti. J̄avo ū ag tóg kutu n̄yt̄i sir, ag t̄y Top̄e v̄i m̄e j̄av̄anh n̄yt̄in k̄y. ⁸ H̄a k̄y tag tóg rán k̄y n̄i, Israel ag to, ha m̄e: “Top̄e v̄y ag kr̄i tũ han, h̄a k̄y ag tóg ti v̄i rá v̄eg m̄u ra to jykr̄en tũ n̄yt̄igt̄i. M̄eg tũ ag n̄yt̄i, ājag n̄igr̄eg ra. Ūri ag tóg gen k̄y n̄yt̄inh m̄u ver,” he ja ti n̄i, Top̄e v̄i rán ki. ⁹ Kĩ Davi v̄y Judeu ag to tag tó ja n̄i ḡe, ha m̄e: “Top̄e m̄y festa han ag tóg t̄i. H̄a ra ag tóg ón k̄y ti m̄y festa han t̄i, k̄y ag tóg to sigse k̄y n̄yt̄inh m̄u, ag festa to. Ag sigse k̄y tóg ag vóg kón̄an ke m̄u, Top̄e ti. Krenkren ke tũ ag tóg n̄i. ¹⁰ Kutu ag n̄yt̄i, to jykr̄en ke tũ p̄e ag n̄yt̄i, k̄y ag tóg v̄enh jykre kufy h̄a venh ke m̄u, h̄a to ag jagtar n̄yt̄inh m̄u,” he ja tóg n̄i, Judeu ag to, Davi ti.

Judeu ag to é henh ke tũ ěg tóg n̄i

¹¹ Kĩ ājag h̄yn inh m̄y: “kĩ Top̄e m̄y Judeu ag t̄y n̄ugme ki vár ke tag ve s̄or m̄u, h̄a j̄en m̄y ag m̄y Jesus j̄en̄e ja n̄i, ag t̄y ti t̄y pr̄anh ke j̄e?” he s̄or m̄u. Vó. H̄a ra ag tóg Top̄e kato t̄egt̄e t̄i. Ti v̄i mranh ja ag tóg n̄yt̄igt̄i, h̄a k̄y Top̄e tóg fóg ag mr̄e kanhgág ag krenkren han s̄or m̄u, Judeu ag t̄y ag ve k̄y ti ki ge to ěn j̄e. ¹² Kĩ Judeu ag t̄y Top̄e v̄i mranh k̄y Top̄e

tóg fóg mré kanhgág kar to há nĩ. Kĩ Judeu ag vỹ jagãgtar nỹtĩ. Ag nỹtĩg ja ki ù ag kar vỹ Topẽ tỹ ag to há nĩ vég mũ. Há ti nĩ, tag. Kỹ, Topẽ tỹ Judeu ag to há' he mãn nĩ ra tóg hã ra ga kri mũ kar mỹ há pẽ tävĩ tĩnh mũ vễ, mỹr, ha mẽ. Hã ra tóg ag to há tũ nĩ ver.

¹³ Kĩ sóg ãjag mỹ tag tó sór mũ, ãjag tỹ tỹ fóg nỹtĩn kỹ, kanhgág ag mỹ ke gé. ãjag apóstolo vỹ tỹ inh nĩ, sỹ ãjag mỹ Topẽ vĩ tó jé. Inh rãnhraj vỹ inh mỹ sér pẽ tĩ. ¹⁴ Isỹ ãjag mỹ Topẽ vĩ tó kỹ inh mré ke ag hên ri ke mũn ãjag kóm Jesus ki ge sór mũ gé, kỹ ag krenkren ke mũ sir, Israel ag. ¹⁵ Ha vé, Topẽ tỹ inh mré ke ag tovãnh to tóg povo ù ag to há nĩ ha, ag to jũ mãn tũ tóg nĩ sir. Topẽ tỹ Israel ag to há' he mãn mũ ra tóg vãnh kar mỹ há pẽ tävĩ tĩnh mũ vễ, kỹ vãnh kar vỹ rĩnrĩr mãn ke mũ vễ, ùn kãgter mũ ag mré hã. Hã ra tóg ag to há tũ nĩ ver.

¹⁶ Êmĩ to jykrén nĩ. Êmĩ kupar ko há nĩn kỹ tóg ko há kar nĩ. Ge ti nĩgtĩ gé, ka tỹ. Ti jãre há nĩn kỹ ka vỹ há kar nĩ. Israel ag vỹ tag ri ke nỹtĩ. Ag jóg'jóg ve ag vỹ ka jãre ri ke nỹtĩ. Topẽ mỹ ag há nỹtĩ ja nĩgtĩ, hã kỹ ag krẽ vỹ Topẽ mỹ há nỹtĩnh ke mũ gé. ¹⁷ Povo tỹ Israel vỹ ka tỹ oliveira há ri ke nỹtĩ. Ti jãre vỹ há nĩ, hã ra ti pẽ ù tóg kórég nỹtĩ. Hã kỹ tóg mrynhmranh kỹ vãvãm mũ, Topẽ ti, ti pẽ kórég ên ti. Ti tỹ Israel kórég ag togvãnh to ken hã vễ, hã vỹ: ka pẽ kórég vãvãm, he mũ. Ka pẽ kórég tag nỹtĩg ja ki tóg ka ù pẽ vin, vãnh kãmĩ ka tỹ oliveira pẽ tỹ, ùn kanẽn vãnh pẽ tỹ. ãjag hã vễ sir, ãjag tỹ tỹ fóg nỹtĩn kỹ, kanhgág ag ke gé. Hã ra ka ù pẽ tag vỹ ka há jãre ên tỹ ti kume végtĩ, kỹ tóg tỹ há' he mũ sir. ãjag tỹ Topẽ tỹ Israel jóg'jóg ve tỹ Abraão mỹ nén tó ja ên végtĩ mũ to ken hã vễ, hã vỹ: ka há jãre kume végtĩ, he mũ. ¹⁸ Kĩ Israel ag to é he sór tũg nĩ, Topẽ tỹ ag vãm mũ ra, êg tỹ ka pẽ kórég vãm ri ke. Ag nỹtĩg ja ki ãjag nỹtĩ. Hã ra ka jãre vỹ tỹ Judeu ag jóg'jóg ve nỹtĩ. ãjag jóg'jóg ve pijé', fóg pijé', kanhgág pijé'. Judeu ag vễ. Kĩ Judeu ag to é he sór tũg nĩ.

¹⁹ Hên ri ke mũn ãjag tóg inh mỹ: “hã ra tóg Judeu ag vãm, êg to há nĩ jé,” he sór mũ. “Hã kỹ tóg êg to há nĩ,” he ãjag hỹn mũ. ²⁰ Hỹ, ag vãm tóg. Hã ra ag tóg ti ki rã jãvãnh ja nỹtĩgtĩ, hã kỹ tóg ag vãm. Jãvo tóg ãjag to há nĩ, ãjag tỹ ti ki ge to. Hã kỹ ag to é he sór tũg nĩ. Topẽ kamẽg nĩ mỹr. ²¹ Israel krẽ ag tỹ ti ki ge jãvãnh tũgnĩn tóg ag vãm. Ag jagãgtãn jãvãnh tóg nĩ ha. Kĩ tóg ãjag jagãgtãn ke tũ nĩ gé, ãjag tỹ ti ki ge to tar tũ nỹtĩn kỹ. Hã kỹ ti hã kamẽg nĩ.

²² Hã ki Topẽ tỹ tỹ ùn há nĩ tóg ve há tĩ, hã ra tóg ù ag vóg kónãn jagy han tĩ gé. ù tỹ ti vỹ mranh mũ ag vóg kónãn jagy han tóg tĩ, Topẽ ti. Hã ra tóg sir ãjag to há nĩ sir, ãjag tỹ ti tovãnh tũ nĩn kỹ. ãjag tỹ ti tovãnh kỹ tóg ãjag vãm ke mũ gé, ha vemnĩ. ²³ Judeu ag tỹ ti ki ge kỹ tóg ag to há nĩ mãn ke mũ gé sir, kỹ tóg ka há ki ti pẽ mrynhmráj ja ên ki vin mãn ke ri ke nĩ sir. ²⁴ Ha vé, ãjag hã vỹ tỹ ka kanẽn vãnh pẽ ri ke nỹtĩ'. Hã ra tóg ka há ki ãjag vin, ãjag tỹ tỹ ka kanẽn vãnh pẽ nỹtĩ ra. Kĩ tóg, ti tỹ ka há ên pẽ mrynhmráj ja ên ki vin mãn sór nĩ ra tóg vin mãn mũ sir, ka há ên ki, hã vỹ: Judeu ag tỹ Jesus ki rã, he mũ. Ka há pẽ mrynhmráj ja ên ki vin mãn to ken hã vễ. Êg pi(jé) ka kanẽn vãnh pẽ tỹ ka kanẽn há ki vin tĩ'. Êg tỹ ka há pẽ tỹ ki vin mãn tag vỹ jagy tũ nĩ vễ. Hã kỹ tóg Topẽ mỹ jagy tũ tĩ, ti tỹ Judeu ag to há nĩ mãn kỹ.

Topẽ tỹ Israel ag krenkren han sór

²⁵ Isỹ ãjag mỹ nén ù kãmén sór vễ, ãjag tỹ mẽ ja tũ ù, ha mẽ. Sỹ ãjag mỹ kãmén sór vễ, ãjag tỹ Judeu ag to é he tũ nĩ jé. Ha vé, Israel ù ag vỹ ver mẽ sór tũ nỹtĩ. ù ag tóg mẽ sór mũ, hã ra ù ag tóg mẽ jãvãnh nỹtĩ gé, vãnh kar tỹ Topẽ vĩ mẽ jé, Judeu tũ ag kar. Kejên ag tóg mẽ kãn ke mũ, fóg kar, kanhgág kar ke gé. ²⁶ Ag tỹ mẽ kãn ke ên kã Israel ag tóg krenkren ke mũ gé. Hã kỹ tag tóg ag to rãn kỹ nĩ, ha mẽ: “ag krenkren han tĩ vỹ jun ke mũ. Pãnónh sĩ tỹ Sião pênĩn cidade ên tá tóg vãnh ven ke mũ, ag krenkren han tĩ ti. Ên vỹ Jacó krẽ ag tỹ inh vỹ mranh ja ên tỹ vãnh pãte fón ke mũ, Israel krẽ en ag mỹ. ²⁷ Sỹ ag mré jykrén jan hã vễ. Ag tỹ inh vỹ mranh tỹ sóg tũg' he mũ,” he ja tóg nĩ, Topẽ vĩ rá ki, Judeu ag to. ²⁸ Jesus kato tẽ ag tóg mũ ver, ti kãmẽ sér mẽ jãvãnh ag nỹtĩ ver, hã kỹ ãjag tóg ag nỹtĩg ja ki Topẽ vĩ sér mẽg mũ. Hã ra ag jóg'jóg ve ag vỹ Topẽ to há nỹtĩ ja nĩgtĩ, hã kỹ Topẽ tóg ag krẽ'krẽ to há nĩnh ke mũ ge kejên, ti tỹ vãsỹ ag kuprẽg ja nĩn kỹ. ²⁹ Topẽ

tỹ ù to há nĩn kỹ tóg ti to há nĩ, ti tỹ ù kuprêg kỹ tóg kuprêg kỹ jê nĩ gé. Tỹ tũg' henh ke tũ ti nĩ, Topê ti.

³⁰ Vãsỹ ãjag tóg Topê vĩ ki kagtĩg ja nỹtĩgtĩ gé. Hã ra Topê tóg ùri ãjag jagãgtãn, ãjag tỹ ti ki ge jé, Judeu ag tỹ ti vĩ mranh ag nỹtĩg ja kã. ³¹ Kỹ ên ag tóg ti vĩ mranh mũgtĩ ver, Topê tỹ kar kỹ ag jagãgtãn jé, ti tỹ ãjag jagãgtãn ri ke. ³² Kỹ Topê tóg êg kar mỹ êg tỹ ti vĩ mranh mũ tag ven kãn sór mũ, êg tỹ to jykrén mân jé. Ti tỹ êg jagãgtãn sór vê, êg tỹ ti ki ge jé, hã jé tóg êg mỹ êg tỹ ti vĩ mranh mũ ven sór mũ.

Topê jykre tỹ êg jykre kãfór nĩ

³³ Topê vỹ tỹ ùn mág pẽ nĩ, mỹr, ha mẽ. Ti jykre vỹ vẽnũ kar kri nĩ kar nĩ. Ve kãn jãvãnh êg nỹtĩ, ti jykre ti, tá krỹg jãvãnh êg nỹtĩ. Nén ù kar ki kanhró ti nĩ mỹr, nén ù kar to jykrén há han kãn ti tĩ mỹr. Ti tỹ nén to jykrén mũ ve kãn ke tũ pẽ êg nĩ. “Ti hỹn hẽ ri ken kỹ tag han?” henh ke tũ êg tóg nĩ gé. To jykrén kórég êg tóg nỹtĩ. ³⁴ Û nỹ Topê tỹ nén to jykrén mũ ki kanhró nĩ? Ki kagtĩg kar êg nỹtĩ. Û nỹ Topê mỹ: “tag han ra, tag han tũg ra,” he tĩ? Û vỹ ti jyvẽn ke tũ pẽ nĩ. ³⁵ Û nỹ ti mỹ nén ù nĩm', Topê tỹ ti mỹ kajãm jé? Nén kar vỹ tỹ ti tũ nỹtĩ mỹr, hã kỹ tóg êg hã mỹ nén ù kar nĩm tĩ, êg jagãgtãn kỹ. ³⁶ Topê hã ne nén kar hyn han'. Ti hã jamẽn kỹ êg tóg nỹtĩ, nén ù kar vỹ ti jamẽn kỹ nỹtĩ gé. Hã kỹ êg tóg tỹ ti tũ nỹtĩ gé, nén ù kar ti ke gé. Kỹ ti hã ne tóg tỹ ùn mág nĩ', ti pir mỹ. Ti hã mỹ êg tóg vĩ há han tĩ, to krónh ke tũ êg nĩ, ga kri, kanhkã tá ke gé. Amém.

12

Topê mỹ êg vẽnũ fêg ke mũ

¹ Inh kanhkã', Topê vỹ ãjag jagãgtãn. Hã kỹ sóg ãjag mỹ: “ti mỹ vẽnũ fêg,” he mũ. Kỹ tóg êg tỹ ti mỹ nén ù pũn ri ke nĩ, êg tỹ ti mỹ vẽnũ fêg kỹ. Judeu ag vỹ ãjag mẽg tânũ kỹ pũn tĩ. Ag jãvo êg tóg ti mỹ êg rĩnrĩr nỹtĩn kỹ vẽnũ fêg tĩ. Ti mỹ tóg sér tĩ, êg tỹ tag han kỹ, êg tỹ tỹ ti tũ nỹtĩn kỹ sir. Gen kỹ ãjag tóg Topê jykre han ke mũ. ² Êprã ke ag jykre han sór tũg nĩ. Topê vỹ ãjag krĩ tãg han sór mũ. Vẽnũ jykre tãg han sór tóg mũ. Kỹ ãjag tóg nén há han ki kanhró nỹtĩnh mũ. Vẽnũ jykre kuryj han jé ãjag tóg ke mũ. Kygnẽnũ ke tũ ãjag tóg nĩ. Tag ve sór tóg mũ, Topê ti. Tag hã to tóg êg kanhrãn ke mũ.

³ Ha vé, Topê vỹ isar han, kỹ sóg ãjag jyvẽn há han ki kanhró nĩ. Hã kỹ sóg ãjag kar mỹ tag tóg mũ. Vêsỹ ùn mág han sór tũg nĩ. “Tỹ inh ùn mág nĩ,” he tũg nĩ, ã tỹ tỹ ùn mág tũ nĩn kỹ. Êg kar vỹ Topê ki ge kỹ nỹtĩ, kỹ tóg êg kar tỹ nén ù to tar han tĩ, êg kar tỹ ti rãnrãj han jé. Tag to jykrén kỹ jagnẽ to é he tũg nĩ.

⁴ Êg há to jykrén nĩ. Ti ki nỹtĩ vỹ e nỹtĩ, êg pẽn, êg nĩgnó, êg kanẽ, êg nĩgrêg, ti kar ti. Êg há ki nỹtĩ vỹ jagnẽ kóm rãnrãj nỹtĩ kar nỹtĩ, vyr mỹ. ⁵ Ge ti nĩgtĩ, êg mré. E êg nỹtĩ, hã ra êg tỹ Cristo ki ge kỹ nỹtĩn kỹ êg tóg êg há ri ke nỹtĩ, kỹ êg tóg jagnẽ ki rĩr ke mũ sir, êg há ki nỹtĩ tỹ jagnẽ ki rĩr tĩ ên ri ke. ⁶ Hã ra ù tóg nén ù han há nĩgtĩ, kỹ ù tóg nén ù ù han há nĩgtĩ gé, Topê tỹ to êg tar han kỹ. Êg kãmĩ ù mỹ tóg: “ag jyvẽn nĩ,” he tĩ, Jesus ti. Kỹ Topê tỹ ã mỹ nén tóg mũ hã tỹ êg jyvẽn nĩ, ti tỹ ã mỹ: “ag jyvẽn nĩ,” hen kỹ. ⁷ Êg kãmĩ ù mỹ tóg: “ũn jagãgtar ag jagãgtãn nĩ,” he ti gé. Kỹ êg jagãgtãn há han to tar nĩmĩnĩ. Êg kãmĩ ù mỹ tóg: “inh vĩ kãmén nĩ,” he tĩ gé. Kỹ to krónh ke tũg nĩ. ⁸ Êg kãmĩ ù mỹ tóg: “ag mỹ ag tỹ nén han ke kãmén nĩ,” he tĩ gé. Kỹ ã rãnrãj tag ki rĩr há han nĩ. Êg kãmĩ ù mỹ tóg: “ã tỹ nén ù nĩm mág nĩ, inh mỹ,” he tĩ gé. Kỹ ón kỹ ti mỹ nĩm sór tũg nĩ. Êg kãmĩ ù mỹ tóg: “culto to pã'i vỹ tỹ ã nĩ,” he tĩ gé. ã tỹ tỹ to pã'i nĩn kỹ to jykrén há han nĩ. Êg kãmĩ ù mỹ tóg: “ag jagãgtãn nĩ,” he tĩ gé. Kỹ ti tỹ ã mỹ ã tỹ êg jagãgtãn ke tag tóg kỹ to mỹ sér nĩmĩnĩ. Êg tỹ jagnẽ ki rĩr to ken hã vẽ.

⁹ Jagnẽ to há tãvĩ nỹtĩmĩnĩ. Ón kỹ jagnẽ to há nỹtĩ sór tũg nĩ. Vẽnũ jykre pãno to kórég tãvĩ nỹtĩmĩnĩ, kỹ tovãnh kãn nĩ. Vẽnũ jykre há hã mĩ mũmĩnĩ. ¹⁰ Jagnẽ to há pẽ tãvĩ nỹtĩmĩnĩ, ãjag tỹ jagnẽ mré pafa ja ag to há ri ke nỹtĩmĩnĩ, jagnẽ to. Jagnẽ mỹ komẽr hã vĩmĩnĩ, êg tỹ pã'i mỹ komẽr hã vĩ ên ri kemnĩ, jagnẽ mỹ. ¹¹ Topê jykre to krónh ke tũg nĩ. Ti tỹ ãjag mỹ: “tag han ra,” he to jẽnjêr ke tũg nĩ gé, to vãsãn nĩ. Ti kuprĩg tỹ ãjag mỹ nén tóg mũ ên ki króm nĩ, kỹ tóg ãjag mỹ sér tĩnh mũ. Êg Senhor tũ han nĩ. ¹² Topê vỹ êg

mỹ nén ù há kar han ke mũ. Tag to mỹ sér nýtĩmĩ. Kejẽn ãjag tóg nén ù jagy venh ke mũ, ti tugnĩn. Tag to krónh ke tũg nĩ. Topẽ mré vémén kũ nýtĩmĩ. ¹³ ãjag mré Topẽ ki rã ù jagtar nĩn kũ ti jagãgtãn nĩ. Û tũ ãjag to pasa ke kũ ti mỹ: “inh mré nĩ,” hemnĩ.

¹⁴ Kejẽn ù tóg ãjag vóg kónãn sór mũ. Ën to Topẽ mỹ: “ti jagãgtãn nĩ,” hemnĩ. Ti to: “ti vóg kónãn nĩ,” he tũg nĩ. ¹⁵ Kejẽn tóg ù mỹ sér tĩ. Kũ ti mré mỹ sér nýtĩmĩ gé. Kejẽn ù tóg fũ tĩ. Ti mré fũmĩ gé. ¹⁶ Jagnẽ mré vẽn jykre pir hã han nĩ, hã vỹ: jagnẽ to há, he mũ. Vẽsỹ ùn mág han sór tũg nĩ. Tũ ùn kãsir ag mré ke nýtĩmĩ. “Ag mré ke vỹ tũ inh nĩ,” hemnĩ, ùn kãsir ag to. Hẽn ri ke mũn ãjag kãmĩ ù tóg vẽn kanhrãn mág to tar nĩ, ãjag kãfór. Ti jé: “ag kãfór inh nĩ, vẽn kanhrãn mág ja tag to,” he tũg nĩ.

¹⁷ Kejẽn ù tóg ãjag mỹ nén ù kórég han tĩ. Ge ra ti mỹ nén ù há hã han nĩ. Vẽn kar mỹ vĩ há tãvĩ han nĩ, ù tũ ãjag to: “kygnẽ ti huri,” he tũ nĩ jé. ¹⁸ Vãsãn nĩ, ãjag tũ ù to krĩ rỹ tũ nýtĩ jé, ãjag tũ vẽn kar to krĩ kuprã nýtĩ jé.

¹⁹ Inh kanhkã, ù tũ ãjag mỹ nén ù kórég han mũ ra vẽn kajãm sór tũg nĩ. Topẽ hã tóg ã tũ ti to jũnh ke ãn ki kanhró nĩ'. Hã kũ tag vỹ rán kũ nĩ, ha mẽ: “inh hã ne ãjag kajãm ke mũ', inh hã ne ag mỹ ven ke mũ', ag tũ ãjag jykre kórég to jagãgtar ke ti, he ti, ãg Senhor ti,” he ja tóg nĩ, Topẽ vĩ tũ rán kũ nĩ ki. ²⁰ Kũ ù tũ ãjag kato tẽ mũ mỹ nén ù há kar han nĩ. Ti kókĩr nĩn kũ ti mỹ vẽn ven nĩ. Ti hãghã kũ ti mỹ goj ven nĩ. Gen kũ ã tóg ti mỹ'a pẽ han ke mũ, ha vemnĩ, ã tũ ti to há nĩn kũ, ti tũ ã to kórég nĩ ra. ²¹ Û tũ vẽn jykre pãno han mũ ag vỹ ãg kato tẽ tĩ. Kũ ãg tóg ag ki rĩr ke mũ, vẽn kaja jé. Ag jagtar nýtĩn kũ ãg tóg ag jagãgtãn ke mũ. ãg tũ ag jagãgtãn kũ ag jykre pãno tóg ag mỹ vẽnhmỹ nĩn mũ, ag tũ ãg jykre ve kũ, ha vemnĩ.

13

ãg pã'i ag

¹ ãg kri pã'i vỹ nỹgtĩ. Kũ tóg ãg tũ ag vĩ ki han há tĩ. Topẽ tũ ag tũ pã'i han hã vỹ, ag krĩn kũ. Ti hã vỹ ù tũ hẽ nỹ tũ pã'i nĩnh ke to jykren tĩ'. ² Kũ ag kato tẽ sór tũg nĩ. Topẽ hã vỹ ag vin tĩ, pã'i ag krĩn kũ, kũ ag kato vãsãn tũg nĩ. Û tũ ag kato vãsãnsãn mũ ag vóg kónãn jé ag tóg ke mũ, pã'i ag. ³ ãg tũ vẽn jykre há han kũ ãg tóg pã'i ag vэг mũ ra kanẽ jur han ke tũ nĩ. Û tũ vẽn jykre kórég han mũ ag vỹ veso kanẽ jur tĩ, pã'i ag ve kũ. Kũ ãg hỹn hẽ ri kenh ke mũ, ag tũ ãg kanẽ jun tũg jé? Vẽn jykre há tãvĩ han jé ãg tóg ke mũ, kũ ag tóg ãg to vémén há han ke mũ sir, pã'i ag. ⁴ ãg pã'i ag ne ãg jyvẽn tĩ', ãg tũ vẽn jykre há to tar nýtĩ jé. Ag tũ Topẽ tũ ag mỹ nén tó mũn han hã vỹ. ã tũ vẽn jykre kórég han kũ kanẽ jurmĩ. ã vóg konãn jé ag tóg ke mũ, ha vemnĩ, hã jé Topẽ tóg ag vin. Topẽ tũ ag vỹ, ag tũ ùn jykre kórég han mũ ag vóg kónãn jé, ag tũ ag jykre pãno to ag jagãgtar han jé. ⁵ Hã kũ ag vĩ ki króm nĩ, ag tũ ãjag to jũ tũ nýtĩ jé. ãjag kakã kavénh ti tĩ gé, ãjag tũ pã'i ag vĩ ki króm tũ ãn ti. Hã kũ ki króm sórmnĩ.

⁶ Kũ governo mỹ imposto kajãm nĩ gé. Topẽ tũ ag mỹ vẽn rãnrãj nĩm ja ãn han ag tĩ, kurã kar ki, pã'i ag, governo mỹ rãnrãj tĩ ag. Kũ ag mỹ kajãm nĩ. ⁷ Kũ ãjag név(e) kajãm kãn nĩ, governo mỹ ke gé. ãjag tũ pã'i ù mỹ imposto kajãm ken kũ ti mỹ ven nĩ, jãnkamy ti. ãjag pã'i ag kamẽg nĩ, ag mỹ komẽr hã vĩmĩ.

Topẽ jykre hã mĩ mũmĩ

⁸ ãjag név(e) kajãm kãn nĩ. Mré hã jagnẽ to há tãvĩ nýtĩmĩ gé. Jagnẽ to há nýtĩ to krónh ke tũg nĩ. ãg tũ jagnẽ to há nýtĩn kũ ãg tóg Topẽ tũ ãg jyvẽn ja ãn ki króm kãn mũ sir. ⁹ Ha vé, Topẽ tóg ãg mỹ: “ã prũ tũ fi mré nỹ tũg nĩ, kũ ã mén tũ mré nỹ tũg nĩ gé,” he ja nĩ. Kũ tóg: “ũ tén tũg nĩ, nén ù péju(g) tũg nĩ, ù to ón tũg nĩ, nén ù to é n tũg nĩ gé,” he ja nĩ gé. Ti tũ ãg jyvẽn vỹ e nýtĩ. Hã ra ãg tũ ti tũ ãg jyvẽn kar tũ tó pir han sór kũ ãg tóg tag tónh ke mũ, ha mẽ: “ã régre ki rĩr nĩmĩ. ã tũ vẽn ki rĩr há ri ke han nĩ, ã régre ki,” he jé ãg tóg ke mũ. ¹⁰ ãg tũ ãg régre kar ki rĩr há nýtĩn kũ ãg tóg ag mỹ nén ù kórég han ke tũ nĩ. Hã kũ ãg tóg jagnẽ ki rĩr há nýtĩn ki Topẽ tũ ãg jyvẽn tĩ ãn ki króm kãn ke mũ.

¹¹ Vāsān nī. Vēnh jykre kórég tovānh kān nī. Ti tỹ ěg kren han ke kurā vỹ kakó pē tĩ ha. Ěg tỹ ti ki ge vén kỹ tóg ver kór gy nỹ ja nĩ, kuvar gy nỹ ja tóg nĩ ver ěn kã, hã ra tóg ũri kakó tãvĩ tĩ ha. ¹² Ti kãtĩg to hã tóg ěg mỹ kuty ri ke nĩ. Kuty tag vỹ tũg ke nē ha, tỹ vaj ke ti nỹ ha. Ti tỹ kãnhmar kãtĩg ke to ken hã vē. Hã kỹ ag tỹ kuty kã nén han tĩ ěn han mãn sór tũg nĩ, vēnh jykre kavėj ěn ti. Ěg tỹ kurā ki nén han jafã ěn han nĩ, vēnh jykre kuryj ti, ěg tỹ vēnh jykre há han kỹ vēnh jykre kórég kato tē jé, tỹ tũg' he jé. ¹³ Ěg tỹ kurā mĩ tĩg há han tĩ ěn ri ke han nĩ. Ag tỹ baile ki nén ũ vēnhmỹ han tĩ ěn han tũg nĩ. Kronkron tũg nĩ gé. Fag to ěn tũg nĩ, kỹ fag mré nỹ tũg nĩ, ag mré ke gé. Jagnē to jú tũg nĩ gé, jagnē tũ to ěn tũg nĩ gé. ¹⁴ Ěg Senhor tỹ Jesus Cristo jykre tãg hã han nĩ. Ěg tỹ nén to ěn mũ ěn han sór mãn tũg nĩ. Ěg jykre si tovānh kān nĩ.

14

Jesus ki ge kỹ nỹtĩ fag tỹ jagnē to há nỹtĩnh ke

¹ ũ tóg krój nỹtĩ ver. Jesus jykre ũ tóg ver ag mỹ jagy tĩ, ag tỹ ti ki ge kỹ nỹtĩ ra. ũ tỹ ge tovānh tũg nĩ, ag mỹ: “ěg mré Topē vĩ mēnh kãtĩg nĩ,” hemnĩ. Ag vĩ kafãn tũg nĩ hã ra, ag tỹ kygnē kỹ: “tag tóg inh mỹ ge nĩ, ge nĩ,” he mũ ra. ² ũ mỹ tóg nén kar ko há tĩ, hã ra ũ tóg nén ũ nĩ ko vānh nĩn kỹ ěkré hã ko tĩ. “Vēnh kãggrá mỹ ag tóg pũn ja nĩ, vēnh mēg ěn nĩ ti, ag tỹ ón kỹ topē kãggran ja ěn mỹ, hã kỹ sóg ti nĩ ko sór tũ nĩ,” he ag tóg tĩ, ũn krój ag. ³ Hã ra ājag kãmĩ ũ ag tóg ge ra ko tĩ, vēnh kãggrá tỹ ag mỹ tỹ nén ũ tũ nĩn kỹ. Ājag tỹ ko kỹ ũ tỹ ko vānh ěn to é he tũg nĩ. Kỹ ājag tỹ ko sór vānh kỹ ũ tỹ ko mũ ěn to: “ti kórég han ti tĩ,” he sór tũg nĩ gé. Vējěn to jagnē mỹ vĩ tũg nĩ. Ā mré tóg Topē ki rã kỹ jē gé, ũ tỹ ko mũ ti, kỹ ti to vĩ tũg nĩ. ⁴ Jesus mỹ rãnhraj tĩ vỹ tỹ ěg nỹtĩ, ěg kar, hã kỹ tóg vēnhmỹ tĩ, ěg tỹ jagnē to vĩ sór kỹ. ũ tỹ ěg mỹ vĩnh ke mũ vỹ tỹ ěg Senhor ti nĩ, ěg tỹ tỹ ti tũ nỹtĩn kỹ. Hã ra ěg kar vỹ há kutē kãn ke mũ, kurā ěn kã, ha vemnĩ, ěg Senhor tỹ ěg tar han kỹ.

⁵ ũ tóg vēnh kán ke kurā to: “kurā kórég,” he tĩ, kurā ũ to ke gé. Jãvo ũ tóg kurā kar to: “kurā há,” he tĩ gé. Há kar ti nỹtĩ, ājag tỹ kurā han mũ ti. Kỹ ājag tỹ nén to jykrén mũ ěn hã han nĩ. ⁶ Ěg kar vỹ ěg Senhor jykre mĩ mũ sór mũ, hã kỹ ũ tóg kurā kórég han sór tĩ, ti jykre mĩ tĩ jé, jãvo ũ tóg kurā kórég han vānh nĩ, ti jykre mĩ tĩ jé gé. Há kar ti nĩ.

Kỹ ũ tỹ nén ũ kar ko mũ vỹ ge nĩ gé. Ěg Senhor jykre mĩ tĩ hã jé tóg ko tĩ gé. Ti hã mỹ tóg to vĩ há han tĩ, vējěn to, Topē hã mỹ. ũ tỹ nén ũ nĩ ko vānh ěn vỹ ěg Senhor jykre mĩ tĩ hã jé ko vānh nĩ gé, ti tỹ ti mỹ há nĩ jé. Kỹ tóg to Topē mỹ vĩ há han tĩ gé. Há kar ti nĩ, ěg tỹ nén ũ nĩ ko mũ ti, ěg tỹ ko vānh ti ke gé.

⁷ Ěg pi(jé) ěg jykre han ke mũ', ěg tỹ ga kri mũn kỹ. Kỹ, ěg ter ken kỹ ěg pi(jé) ěg jykre ki ter ke mũ gé'. ⁸ Ěg tỹ ga kri mũn kỹ ěg tóg ěg Senhor jykre hã han ke mũ. Ti tũ han hã jé ěg tóg ga kri mũ nĩ. Kỹ, ěg ter ken kỹ ěg tóg ti jykre hã ki ter ke mũ gé'. Hã kỹ ěg tóg tỹ ti tũ kar nỹtĩ sir, ěg tỹ ga kri mũn kỹ ke gé. Ěg Senhor tỹ Jesus Cristo tũ vỹ tỹ ěg nỹtĩ. ⁹ Ěg tỹ tỹ ti tũ nỹtĩ hã jé tóg ter ja nĩ. Hã jé tóg rĩr mãn ja nĩ gé. Ti tỹ tỹ ěg Senhor nĩ hã jé tóg ter ja nĩ, vēnh kar pã'i, ũn rĩnrĩr mũ ag pã'i, ũn kãgter ja ag pã'i ke gé.

¹⁰ Kỹ ājag tỹ hē ri ke jé jagnē to vĩ sór nē? Ājag tỹ hē ri ke jé jagnē to é he nē? Topē hã vỹ ěg jykre ve kãn ke mũ, ěg kar, ti tỹ ěg jé prēr ken kỹ. ¹¹ Hã kỹ tag tóg rán kỹ nĩ, ha mẽ. “Rĩr inh jē nĩ,” he tóg, ěg Senhor ti. “Vēnh kar vỹ inh krēm grĩnh kenh ke mũ, ha vemnĩ. Vēnh kar vỹ inh mỹ: “ũn mág vỹ tỹ ã nĩ,” henh ke mũ, he ti, Topē ti,” he tóg, Topē vỹ tỹ rán kỹ nĩ ki. ¹² Ěg kar vỹ Topē rĩnja tá nỹtĩnh ke mũ, kỹ tóg ěg jykre tugnỹm ke mũ. Ěg hã ki tóg jēmēnh ke mũ, ěg tỹ nén han ja ěn to. ¹³ Hã kỹ jagnē to vĩ mãn tũg nĩ.

Ěg tỹ jagnē to fen ke

Jagnē to: “kórég ti nĩ,” he mãn tũg nĩ. Ājag tỹ nén ũ han ken kỹ tag to jykrén nĩ, ha mẽ. “Isỹ tag han kỹ inh régre mỹ inh ve kỹ Topē vĩ mranh ke tũ nĩ vỹ?” he jé ěg tóg ke mũ. “Ti mỹ tỹ prãnh kenh ke tũ nĩ vỹ, isỹ tag han kỹ?” he jé ěg tóg ke mũ.

¹⁴ Tag ki kanhró inh nĩ, ha mẽ: “vējēn pi(jé) ēg kavēnh tĩ’.” Jesus tỹ tón hã vē. Nén ũ tũ vē, vējēn ti, ēg tỹ ko jafã tãvĩ vē. Hã ra ũ tóg nén ũ nĩ to: “vēnh kãggrã mỹ ag tóg pũn ja nĩ, vēnh mẽg ēn nĩ ti, hã kỹ sóg ko kỹ Topē vĩ mranh tĩ,” he tĩ. ũ tỹ tag tó mũ jykre kavēnh ti tĩ, ti tỹ ge ra kon kỹ. ¹⁵ Inh mỹ tóg tỹ Topē vĩ mranh tũ nĩ, isỹ nén ũ nĩ ko tag ti. Kỹ sóg ko' he mũ sir. Kỹ inh régre ũ tóg isỹ ko mũ ve kỹ ko sór mũ gé sir, hã ra tóg ti hã mỹ Topē vĩ mranh ri ke nĩ. Kỹ tóg ko kỹ isugrĩn Topē vĩ mranh mũ sir. Kỹ tóg nũgme ki kutēnh ke mũ sir, ti tỹ ko kỹ Topē vĩ mranh kỹ. Kỹ tóg isỹ ti tén ri ke nĩ sir, Cristo tỹ ũn jagfy ter ja ēn ti. Isỹ tag han kỹ tóg sỹ ti to há tũ ri ke nĩ, isỹ inh jēn tugnĩn ti tén ri ke han kỹ. ¹⁶ Kỹ tag han sór tũg nĩ, ũ tỹ ājag tỹ nén han mũ to ājag to vĩ tũ nĩ jé. Há ti nĩ vē, ājag tỹ kon kỹ, hã ra ũ tỹ ājag jēn to ājag to vĩn kỹ ko sór tũg nĩ. ¹⁷ Topē tỹ tỹ ēg Senhor nĩn kỹ ēg jēn tóg tỹ nén ũ tũ nĩ ha mỹr, kỹ ēg tỹ nén ũ nĩ ko tũ ra tóg ēg mỹ tỹ nén ũ tũ nĩ. Nén ũ ũ to ēg jykren ke mũ ha, hã vỹ: vēnh jykre kuryj, he mũ, vēnh jykre kusa, he mũ, vēnh jykre sér, he mũ, Topē kuprĩg tỹ mỹr, ēg jagrē tãg ti. ¹⁸ Ēg tỹ gen kỹ Cristo jykre han kỹ tóg Topē mỹ há tĩ ha, ēg jykre ti, kỹ tóg ēg mré ēprã ke ag mỹ há tĩ gé sir, ha vemnĩ.

¹⁹ Kỹ ēg jé jagnē krĩ kuprãg hã to jykren. Ēg jé jagnē tar han sór. ²⁰ Kỹ tóg ēg tỹ nén ũ nĩ ko to ēg régre tỹ tỹ prãnh ke han kỹ tóg kórég nĩ, ēg tỹ ũ tỹ Topē ki rã kỹ nĩ ũ tỹ tỹ prãnh ke han kỹ. Vējēn kar vỹ há nĩ. Hã ra ũ tóg vējēn ũ to jykren kónãn sór mũ, ti tỹ to Topē vĩ mranh kỹ. Ti tỹ ge ra kon kỹ tóg tỹ prãnh ke mũ sir. ²¹ Kỹ tóg kórég nĩ, ēg régre tỹ ēg tugnĩn Topē vĩ mranh kỹ. Hã jé nén ũ nĩ ko tũg nĩ, ā régre tỹ to tỹ prãnh kenh (ka) mẽ tĩn kỹ. Ti rĩnve vinho kron tũg nĩ gé. Nén ũ tỹ ā régre tỹ Topē vĩ mranh han ēn tovãnh kãn nĩ. ²² Ā tỹ nén ũ to: “kórég tũ ti nĩ,” hen kỹ Topē hã mỹ tómnĩ. Hã ra ā régre rĩnve han tũg nĩ, ti tỹ ā mỹ há nĩ ra, ā régre tỹ ā tugnĩn Topē vĩ mranh tũ nĩ jé. Ā tỹ Topē tỹ ā mỹ nén tó hã han kỹ tóg há nĩ, kỹ ā tóg jatu nĩ, ha vemnĩ. ²³ ũ tóg ko tĩ, hã ra tóg ā tỹ ko mũ tag to: “isỹ Topē vĩ mranh ja mỹ vỹ?” he mũ sir. Ti tỹ ge ra ko kỹ tóg to krĩ kufy nĩ sir, kỹ tóg Topē vĩ mranh mũ sir. Ēg tỹ ti ki ge kỹ nỹtĩn kỹ ēg tóg ti tũ hã han sór mũ sir. Ēg tỹ nén ũ to: “tag han kỹ inh mỹ ti vĩ mranh mũ vỹ?” hen kỹ ēg han ke tũ nĩ, ke tũ nĩ mũ ra ēg ti vĩ mranh mũ.

15

Ēg tỹ ēg mré ke ag to há nỹtĩn ke

¹ Ha vé, tar ēg nỹtĩ. Hã kỹ tóg ēg tỹ ũn krój nỹtĩ ag to fen nỹtĩn há tĩ. “Ēn tóg inh mỹ há tĩ, hã kỹ sóg han sór mũ,” henh ke tũ ēg tóg nĩ. ² “Mỹ inh régre mỹ há nĩ vỹ?” he jé ēg tóg ke mũ. Ti tỹ ti mỹ há tũ nĩn kỹ ēg han ke tũ nĩ. Ēg tỹ ti tar han sór vē, ēg tỹ nén han mũ kar tỹ. ³ Cristo pi(jé) ā tỹ nén to én mũ ěn han ja nĩgtĩ', hã kỹ tóg ēg jagfy jagtar ja nĩgtĩ. Kỹ tóg Topē mỹ: “ā to ag tóg vĩ kónãn tĩ, ā kato tē ag, hã ra ag vĩ vỹ inh kri kutēnh ke mũ,” he ja nĩ. Ti mur tũg ki Topē vĩ tó tĩ ũ tóg ti vĩ tag rán ja nĩ, hã ra tóg ge nĩ. ⁴ Hã ra Topē tóg ēg kanhrãn sór mũ, hã kỹ tóg ā vĩ tó tĩ ag mỹ: “ha rán,” he ja nĩgtĩ, hã kỹ ag tóg ránrán ja nĩgtĩ. Ēn ve kỹ ēg tar nỹtĩ, Jesus jykre mĩ mũ to, kỹ ēg tỹ prãnh kenh ke tũ nĩ. Kỹ ēg tóg ēg tỹ kanhkã tá nén venh ke ěn kã jatu' henh ke tũ nĩ gé. ⁵ Topē vỹ ēg to fen kỹ nĩ. Ti hã vỹ ājag tỹ jagnē to fen han ke mũ, ti kóm, ājag tỹ ti mré jykre pir nỹtĩ jé, ājag tỹ Jesus Cristo ki ge kỹ nỹtĩn kỹ. Ēg tỹ to vãsãn han ki kanhró tóg nĩ, Topē ti. ⁶ Kỹ ājag tóg jagnē mré ēg jóg tỹ Topē to: “ũn mág vỹ tỹ ti nĩ,” henh ke mũ gé. Vēnh vĩ pir han jé ājag tóg ke mũ, ti to, ēg Senhor tỹ Jesus Cristo to ke gé.

Fóg ag mré kanhgág ag tỹ Topē vĩ mẽnh ke

⁷ Hã kỹ jagnē to há nỹtĩmnĩ, Cristo tỹ ēg to há nĩ ri ke nỹtĩmnĩ, jagnē to. Kỹ ũ tóg ājag jykre ve kỹ Topē to: “ũn mág vỹ tỹ ti nĩ,” henh ke mũ. ⁸ Tag to jykren nĩ, ha mẽ. Cristo vỹ Judeu ag ki rĩr jé kãtĩg ja nĩ, ti tỹ Topē tỹ vãsỹ ēg jóg!jóg ve ag mỹ nén tó ja ěn ki han jé. Ēn ve kỹ ēg tóg ki kanhrãn mũ, Topē tỹ vēnh vĩ há hã tó tĩ ti. ⁹ Kỹ tóg povo ũ ag jagãgtãn gé, kỹ ag tóg ti tugrĩn Topē mỹ vĩ há han mũ gé sir, fóg ag, kanhgág ag ke gé. Hã kỹ Davi tóg tag rán ja nĩ gé, ha mẽ: “tag tugnĩn sóg ā mỹ vĩ há han ke mũ, fóg ag rĩnve, kanhgág ag rĩnve ke gé. Ag rĩnve sóg ā mỹ jãn ke mũ, ā jé tó jé sóg ke mũ, ā jiji tó kỹ,” he ja tóg nĩ,

Davi ti, Topě vī tỹ rán kỹ nĩ ki. ¹⁰ Kỹ tag tóg rán kỹ nĩ gé, ha mẽ. “Fóg', kanhgág', mỹ sér nỹtĩmĩ, Judeu ag mré hã, ti tũ ag mré hã,” he tóg mũ gé, Topě vī tỹ rán kỹ nĩ ki. ¹¹ Kỹ tag tóg rán kỹ nĩ gé, ha mẽ. “Fóg', kanhgág', ěg Senhor mỹ vĩ há han nĩ. Topě to vĩ há han kãn nĩ, povo kar',” he ja tóg nĩ gé, Topě vī tỹ rán kỹ nĩ ki. ¹² Kỹ Isaías vỹ Cristo to tag tó ja nĩ gé, ha mẽ: “Jessé krě'krě ũ vỹ tỹ ũn mág jěnh mũ, Davi panh ěn krě'krě ũ, kỹ tóg tỹ povo kar ag pã'i mág jěnh mũ. Fóg ag vỹ kanhgág ag mré ti ki ge sór ke mũ,” he ja tóg nĩ, Isaías ti. Ti tỹ Jesus tón hã vẽ. ¹³ Topě hã ne ěg mỹ ven ke mũ', nén ũ há kar, hã kỹ tóg ěg mỹ tó ja nĩ. Ti hã ki ājag tóg ge kỹ nỹtĩ. Ti hã vỹ ājag fe tỹ mrin kenh ke mũ, ti hã vỹ ājag krĩ kuprãg ke mũ'. Topě kuprĩg vỹ tỹ ājag jagrě nĩ, kỹ tóg nén kar han há nĩgtĩ. Ti hã vỹ ājag tar han ke mũ', ājag tỹ Topě tỹ ěg mỹ nén ũ há ven kenh ke ěn to tar nỹtĩ jé, ājag tỹ tag hã mĩ ěkrén jé.

Paulo rãnrãj

¹⁴ Inh kanhkã', vėnh jykre há han kỹ ājag tóg nỹtĩ. Isỹ ājag mỹ tó tũg ki ājag tóg ki kanhrãn ja nĩ. Vég isóg nĩ nĩ. Hã kỹ ājag tóg jagně jyvėn ki kanhró nỹtĩ gé. ¹⁵ Inh vėnh rá tag ki sóg ājag mỹ nén ũ tỹ hėn ri ke kãmén, ti tỹ inh mỹ sér tĩn kỹ, sỹ ājag vég tũ ra. Ājag mỹ sóg kãmén há han, ājag tỹ kã jatu tũ nĩ jé, ājag tỹ męg mũ tag kã. Topě ne tag to inh jěně', tag to tóg isar han'. ¹⁶ Inh jé prěr tóg, isỹ povo kar mỹ Jesus Cristo kãmén jé. Kỹ sóg ti tũ ki rĩr jě nĩ, Topě vĩ sér tó sóg tĩ, fóg ag mỹ, kanhgág ag mỹ ke gé. Ag tỹ ti ki ge kỹ tóg ti mỹ sér tĩ, Topě kuprĩg tỹ ag tỹ ũn há han kỹ, ag tỹ tỹ Topě tũ nỹtĩn kỹ. Inh rãnrãj hã vẽ.

¹⁷ Tỹ sóg Jesus Cristo rãnrãj han jafã nĩ, Topě tỹ isar han kỹ, kỹ inh rãnrãj tóg inh mỹ sér tĩ. ¹⁸ Kỹ sóg ājag mỹ Cristo tỹ inh mỹ vėnh rãnrãj nĩm ja hã tỹ vėmén sór mũ. Fóg ag mré kanhgág ag tỹ ti ki ge jé tóg isar han tĩ, ti vĩ tó tag to. Inh vĩ mẽ kỹ ag tóg ti ki ge sór mũ, ag tỹ inh jykre ve kỹ ke gé. Jesus Cristo tỹ nén han mũn hã vẽ. ¹⁹ Milagre hyn han sóg tĩ gé, Topě tỹ isar han kỹ. Ti kuprĩg tỹ inh krĩn kỹ sóg hyn han tĩ, milagre ti. Milagre hyn han kỹ sóg vėnh kar mỹ ti vĩ ti tó ja nĩgtĩ, Jerusalém tá, kỹ tá kãkutě kỹ sóg ga kar mĩ tĩg ja nĩgtĩ gé, ga tỹ Ilĩria mĩ hã. Vėnh kar mỹ sóg Cristo kãme sér tó ja nĩgtĩ. ²⁰ ũ tỹ tá jun tũ ra sóg tá jun vén ja nĩgtĩ, sỹ tá ti vĩ tó vén jé, ag tỹ vãhã Cristo kãme mẽ jé, ũ tỹ mẽ ja tũ ag. Inh hã ne ag mỹ tó vén sór ja nĩgtĩ', isỹ ũ rãnrãj ja ki rãnrãj tũ nĩ jé. ²¹ Hã kỹ tag tóg rán kỹ nĩ, ha mẽ: “ũ tỹ ti vėme mẽ ja tũ ěn ag vỹ ti ki kanhrãn ke mũ. ũ tỹ ti vĩ mẽ ja tũ ag vỹ mẽnh ke mũ,” he ja tóg nĩ, Topě vĩ rá ki. Sỹ ti vĩ tag hã ki króm sór vẽ.

Paulo tỹ Roma ra tĩg sór

²² Hã kỹ sóg ājag tá jun ja tũ nĩ ver, sỹ ājag venh há hã ra. ²³ Hã ra sóg hur han kãn, tag ki inh rãnrãj ti. Vãsỹ sóg to jykrén, sỹ ājag venh tĩg jé. ²⁴ Kỹ tóg hėn ri ke mũn inh mỹ ki króm ke mũ ha. Sỹ ga tỹ Espanha ra tĩg sór vẽ, kỹ sóg ājag venh rãnh mũ, ěpřy kãkre ki, ěmĩn kãkre ki. Kỹ tóg há tĩ, ājag tỹ inh jagãgtãn ken kỹ, sỹ ājag tá jun ken kỹ. Ājag tỹ inh jagãgtãn há han kỹ sóg tĩg há han ke mũ, Espanha ra. Hã ra sóg ājag mré nĩ sĩ han sór mũ, ājag tỹ isar han jé.

²⁵ Hã ra sóg ver Jerusalém ra tĩg sór mũ. Sỹ tá Topě tũ ag mỹ jãnkamy ma tĩg ke vẽ. ²⁶ Ga tỹ Macedônia tá Jesus mré ke ag vỹ inh mỹ jãnkamy vin, ga tỹ Grécia tá Jesus mré ke ag ke gé, isỹ Jerusalém tá ũn jagãgtar nỹtĩ ag jagãgtãn jé, jãnkamy ěn tỹ. ěg mré ke ag vẽ gé, Jerusalém tá ũn jagtar nỹtĩ ag. ²⁷ Macedônia tá ke ag mỹ tóg sér tĩ, ag tỹ Jerusalém tá ke ag mré jãnkamy vėnh kãpãm kỹ. Grécia tá ke ag mỹ tóg sér tĩ gé. Hã ra tóg inh mỹ há tĩ gé. Jerusalém tá ke ag vỹ Jesus ki ge vén, Judeu ag, kỹ fóg ag vỹ ag vĩ mẽ kỹ Jesus kãme mẽ ja nĩgtĩ. Hã kỹ fóg ag vỹ Judeu ag tũ mãn ja nĩ, hã vỹ: Topě vĩ, he mũ. Kỹ tóg há nĩ ha, ag tỹ mẽ kar kỹ ag mỹ ājag tũ vėnh kãpãm kỹ, vėnh kaja jé, ag jãnkamy ti.

²⁸ Isỹ tag han kãn kỹ, sỹ ag mỹ jãnkamy tag vin kar kỹ sóg cidade tỹ Roma tá nĩ sĩ han kar kỹ ga tỹ Espanha ra tĩg sór mũ ha. ²⁹ Ha mẽ, isỹ ājag ki jun ken kỹ Cristo vĩ vỹ ājag mỹ sér tĩnh mũ, ěg tỹ jagně mré ti to vėmén kỹ, isỹ ājag mỹ ti vĩ tón kỹ, ha vemnĩ. Ti vĩ sér to tóg ěg mỹ sér tĩnh mũ.

³⁰ Inh kanhkã', ãg Senhor tỹ Jesus Cristo ki ge kỹ ãjag tóg nỹtĩ, kỹ ãjag tóg jagnẽ to há nỹtĩ gé, Topẽ kuprĩg tugrĩn. Kỹ sóg ãjag mỹ tag to vĩ sór mũ gé, ha mẽ. Iso Topẽ mré vĩmnĩ, inh mré, to krónh ke tũg nĩ. ³¹ Judéia tá ag vĩ e nỹtĩ, ù tỹ Jesus kato tẽ mũ ag, kỹ ag tóg inh kato tẽ sór mũ gé. Kỹ iso Topẽ mré vĩmnĩ, ti tỹ inh jy nĩgãn jé, Jerusalém tá ù tỹ Jesus ki ge kỹ nỹtĩ ag tỹ inh mỹ vĩ há han jé gé, ti tỹ ag mỹ há tĩ jé, sỹ jãnkamy ên tỹ ag jagãgtãn sór mũ tag ti. ³² Tá kãtĩg kỹ sóg jatun mỹ ãjag ki jun ke mũ. Kỹ tóg ãg kar mỹ sér tĩnh mũ, sỹ ãjag to pasanh tĩg ken kỹ, Topẽ tỹ isĩg ke tag to há nĩn kỹ. Kỹ ãjag tóg isar han ke mũ sir.

³³ Topẽ vĩ ãg krĩ kuprãg tĩ. Kỹ sóg ti mỹ to vĩ tĩ, ti tỹ ãjag krĩ kãnhvy han jé. Amém.

16

Paulo tỹ ùn e mĩ êkrég tĩ

¹ ãjag mỹ sóg ãg mré ke fi tó sór mũ, Febe fi. Cidade tỹ Cencreia tá fi tóg Jesus ki ge kỹ nỹtĩ fag ki rĩr tĩgtĩ. ² Fi tỹ kejẽn ãjag ki jun kỹ fi mỹ: “ha kãrã,” hemnĩ. ãjag mré fi tóg Jesus ki rã kỹ jẽ nĩ, kỹ fi mỹ nén tỹ fi mỹ tũ ên ven kãn nĩ. ù tỹ hẽn ri ke jagãgtãn fi huri, inh ke gé.

³ Priscila fi mĩ sóg êkrég tĩ, fi mén tỹ Áquila mĩ ke gé. Inh mré fag tóg rãnrãj mág, Jesus Cristo rãnrãj han kỹ. ⁴ Isugnĩn fag tóg kãgter kren, inh jy nĩgãn jé. Tag hã mĩ sóg êkrég tĩ, kỹ sóg fag to há tãvĩ nĩ. Kỹ fóg kar kãmĩ Jesus ki ge kỹ nỹtĩ ag vĩ tag tugrĩn fag to há nỹtĩnh ke mũ gé, fag tỹ inh jy nĩgãn kỹ. ⁵ Fag ãn krẽm ù ag tóg vẽn hãn tĩ gé, culto han jé. Ên fag ki sóg êkrég tĩ gé.

Iso há ù vĩ nĩ gé, hã vĩ: Epêneto, he mũ. Ga tỹ Ásia tá ù tỹ Jesus ki rã vén jan hã vẽ. Ti mĩ sóg êkrég tĩ gé. ⁶ Kỹ Maria fi vĩ nĩ gé. ãjag mỹ fi rãnrãj mág. Fi mĩ sóg êkrég tĩ gé. ⁷ Kỹ sóg Adrônico mĩ êkrég tĩ gé, Júnias mĩ ke gé. Inh kanhkã ag vẽ. Inh mré ag tóg sigse kỹ nỹtĩ ja nĩgtĩ gé. Apóstolo ag kãmĩ ag tóg tỹ ùn mág nỹtĩ. Vãsỹ ag tóg Jesus ki ge jẽg, isỹ ti ki rã tũg ki.

⁸ Ampliato mĩ sóg êkrég tĩ gé. Ti to inh há tãvĩ nĩ, ãg Senhor tugrĩn. ⁹ Kỹ sóg Urbano mĩ êkrég tĩ gé. Inh mré tóg Cristo rãnrãj han tĩ. Kar kỹ iso há ù vĩ nĩ gé, Estáquis ti. Ti ki sóg êkrég tĩ gé. ¹⁰ Apeles mĩ sóg êkrég tĩ gé. Cristo tovãnh jãvãnh ja ti nĩ. Aristóbulo mré ke fag mĩ sóg êkrég tĩ gé. ¹¹ Kar kỹ inh kanhkã ù vĩ tá jẽ gé, Herodião ti. Ti ki sóg êkrég tĩ. Kỹ sóg Narciso mré ke fag mĩ êkrég tĩ, ù tỹ fag kãmĩ ãg Senhor ki ge kỹ nỹtĩ fag.

¹² Kỹ sóg Trifena fi ki êkrég tĩ, Trifosa fi mĩ ke gé. ãg Senhor mỹ fag rãnrãj mũgtĩ. Kỹ sóg iso há tãvĩ ù fi mĩ êkrég tĩ gé, hã vĩ: Pérside, he mũ. ãg Senhor mỹ rãnrãj to fi tar tãvĩ nĩ. ¹³ Kỹ sóg Rufo mĩ êkrég tĩ. Topẽ ne ti kuprẽg', ti mỹnh fi ke gé'. Inh mỹ fi tóg tỹ inh mỹnh ri ke nĩ, ti mỹnh fi. ¹⁴ Kỹ sóg Asíncrito mĩ êkrég tĩ, Flegonte mĩ ke gé, Hermes mĩ ke gé, Pátrobas mĩ ke gé, Hermas mĩ ke gé, ag mré Topẽ vĩ mẽ jé vẽn hãn tĩ ag mĩ ke gé. ¹⁵ Kỹ sóg Filólogo mĩ êkrég tĩ, Júlia fi mĩ ke gé, Nereu mĩ ke gé, ti ve fi mré, Olimpas mĩ ke gé, kỹ ag mré Jesus vĩ mẽ jé vẽn hãn tĩ ag mĩ ke gé, Topẽ tũ kar ag mĩ.

¹⁶ Kỹ jagnẽ ki nhun ke ri ke han nĩ, Jesus mré ke kar ki, jagnẽ nĩgé kãgmĩ kỹ. Cristo ki ge kỹ nỹtĩ kar vĩ ãjag mĩ êkrég tĩ, êmã kar ki ke ag.

Ón kỹ vẽn vĩ há mẽ sór tũg nĩ

¹⁷ Nén ù tó sór sóg mũ gé ver ãjag mỹ. ù ag tóg ãjag tỹ jagnẽ to jũ han sór mũ. ãjag tỹ jagnẽ vĩ kafãn kónãn mũ han sór ag tóg mũ. Ag pi(jé) ãjag tỹ Topẽ vĩ mẽ ja ên ri ke tó tĩ'. Ên ag vĩ mẽ sór tũg nĩ. ¹⁸ Ag pi(jé) ãg Senhor tỹ Cristo rãnrãj han sór tĩ'. Ag nug hã ki rĩr ag tóg tĩ'. Ag vĩ vĩ mẽ há tĩ, ón kỹ, kỹ ù tỹ hẽn ri ke ag tóg kri fi sór mũ, ag vĩ kri, ag tỹ ag jykre kórég ki kagtĩg nỹtĩn kỹ, ù tỹ nén ù vẽn hãmỹ to jykrén tũ ag. Inh mỹ tóg ag tỹ ù tỹ ge krĩn kónãn ha mẽ tĩ. Kỹ ag vĩ mẽ sór tũg nĩ.

¹⁹ ãjag tỹ Topẽ vĩ kri nĩm mũ tag vĩ mẽ há tĩ. Vẽn kar vĩ mẽ, kỹ tóg inh mỹ sér tĩ sir, ãjag to. Kỹ tóg ãjag tỹ vẽn jykre há ki kanhrãn mág nỹtĩnh há tĩ. ãjag tỹ vẽn jykre pãno to jykrén tũ pẽ nỹtĩn kỹ tóg há tĩ gé.

²⁰ Topê vỹ ãg krĩ kuprãg tĩ. Kãnhmar tóg ãg mỹ Satanás tỹ tũg' henh ke mũ gé, ha vemní, kỹ tóg ãjag vóg mãn ke tũ nĩ ha.

Ëg Senhor tỹ Jesus mỹ sóg to vĩ tĩ, ti tỹ ãjag mỹ ã tỹ nén ù há ãn vin jé.

Paulo mré ke ag tỹ Roma ki ke fag mĩ êkrég tĩ

²¹ Inh mré Jesus rãnhraj han mũ tỹ Timóteo vỹ ãjag mĩ êkrég tĩ gé, Lúcio ti ke gé, Jasão ke gé, Sosípatro ke gé, inh kanhkã ag.

²² Û tỹ Paulo mỹ tag rán mũ vỹ tỹ inh nĩ, hã vỹ: Tércio, he mũ. Kỹ sóg ãjag mĩ êkrég tĩ gé, ãjag tỹ inh mré ãg Senhor ki ge kỹ nỹtĩn kỹ.

²³ Gaio vỹ ãjag mĩ êkrég tĩ. Ti ãn krêm sóg jẽ, kỹ ãg tóg ti ãn krêm culto han tĩ. Erasto vỹ ãjag mĩ êkrég tĩ gé, ù tỹ cidade jãnkamy ki rĩr tĩ ãn ti. Ëg régre tỹ Quarto vỹ ãjag mĩ êkrég tĩ gé. ²⁴ Ëg Senhor tỹ Jesus Cristo mỹ sóg to vĩ tĩ, ti tỹ ãjag kar tar han jé. Amém.

Topê mỹ ãg vĩ há han ke

²⁵ Ha mẽ, ãg jé Topê mỹ vĩ há han. Ëg tar han ki kanhró tóg nĩ, ãg tỹ ti ki rã kar krónh ke tũ nĩn jé. Sỹ ãjag mỹ Topê vĩ sér tó mũn hã vỹ, Jesus Cristo kãmén kỹ. Vã sỹ ãg tóg mẽ ja tũ nĩ, ti vĩ sér tag ti. Ëg tỹ vãhã mẽ vỹ, Topê tỹ ãg mỹ to vỹnh jykre nĩm kỹ. Prỹg tỹ hẽn ri ke ki ag tóg mẽ ja tũ nỹtĩ, ãg jo ke ag. ²⁶ Ûri hã ãg tóg mẽg mũ. Vã sỹ Topê vĩ rán tĩ ag vỹ ãg tỹ ùri mẽg mũ tag tó ja nĩgtĩ. Kỹ Topê tóg tag to: “povo kar mỹ kãmén nĩ, fóg ag mỹ, kanhgág ag mỹ, Judeu ag mré hã,” he ja nĩ, ãg tỹ mẽ kãn jé, ti ki ge jé, ti vĩ kri fi jé, ti tỹ tỹ ãg Senhor kar jẽ jé. ã tỹ nén kar han tũg ki tóg nĩ nĩ, Topê ti, ù tỹ ti han ja tũ (hã) ra. Kỹ tóg tũ' henh ke tũ nĩ gé. Gen kỹ tóg nĩ nĩ.

²⁷ Ti hã ne ã pir mỹ nén ù kar ki kanhró nĩ!, Topê ti. Jesus Cristo hã tóg ãg mỹ Topê ven ke mũ. Kỹ ãg tóg ti hã mỹ vĩ há han sór mũ, Topê hã mỹ, kỹ tóg krỹg henh ke tũ nĩ, ãg tỹ ti mỹ vĩ há han mũ ti. Amém.

PAULO TỠ CARTA HAN: CORINTO TÁ KE AG MỠ CARTA VE

¹ Paulo tỠ rá vễ. Isỹ cidade tỠ Corinto tá ke ag mỠ rán hã vễ. KỠ ẽg rẻgre tỠ Sỏstenes vỠ inh mrẻ rán mỠ gẻ. Topẻ hã ne inh kuprẻg', kỠ tỏg inh jẻ prẻr, Jesus Cristo tỠ inh fẻg jẻ, sỠ tỠ ti apỏstolo jẻ jẻ sir. Hã kỠ sỏg ảjag mỠ rán mỠ. ² Corinto tá ảjag tỏg vẻnh mản tỠ, Topẻ vỠ mẻ jẻ. Topẻ tỠ vỠ tỠ ảjag nỠtỠ, ảjag tỠ tỠ Jesus Cristo mrẻ ke nỠtỠn kỠ. ảjag jẻ prẻr tỏg, ảjag tỠ tỠ ti tỠ nỠtỠn jẻ.

Vẻnh kar mỠ ke vẻ gẻ, vẻnh rá tag ti, ừ tỠ hẻ tá ẻg Senhor tỠ Jesus Cristo jiji tỏ tỠ ag mỠ. Ừ tỠ ti hã to: “ẻg Senhor vẻ,” he tỠ ag mỠ ke vẻ gẻ. Ag Senhor vẻ, kỠ tỏg tỠ ẻg Senhor nỠ gẻ, Jesus ti.

³ Topẻ mỠ sỏg to vỠ tỠ, ti tỠ ảjag tar han jẻ, ti tỠ ảjag krỠ kuprẻg jẻ, ẻg jỏg mág ti, ẻg Senhor tỠ Jesus Cristo jỏg ti.

Topẻ tỠ ẻg mỠ nẻn han mỠ vỠ há nỠ

⁴ Kurẻ kar ki sỏg ảjag to Topẻ mrẻ vỠ tỠ. Ti mỠ sỏg: “há ti nỠ, ả tỠ Jesus Cristo tugrỠn ag tar han kỠ,” he tỠ. ⁵ Ti tugnỠn ảjag tỏg ừn rico ag ri ke nỠtỠ, nẻn kar to mỠr, Topẻ vỠ to, vẻnh jykre há kar to. Ki kanhrỏ ảjag tỏg nỠtỠ. ⁶ Cristo tỠ vẻme ki kanhrỏ ảjag tỏg nỠtỠ mỠr, to tar ảjag tỏg nỠtỠ. ⁷ Hã kỠ Topẻ kuprẻg tỠ ẻg mỠ nẻn nỠm tỠ ẻn vỠ tỳg' he vẻnh nỠgtỠ ảjag mỠ. ẻg Senhor tỠ Jesus Cristo vẻnh ven mản ẻn jẻvẻnh ảjag tỏg mỳgtỠ gẻ, ti kỏtỠg ke ti. ⁸ Ti hã vỠ ảjag tar han mỠ', ảjag tỠ ti tovẻnh tỠ nỠ jẻ, ảjag tỠ kygnẻg tỠ nỠ jẻ. KỠ ẻg Senhor tỠ Jesus Cristo kỏtỠg mản kỠ, ti kurẻ ki, kỠ tỏg ảjag tỠ kygnẻ ja tỠ ẻn venh ke mỠ sir. ⁹ Topẻ ne fagrỠn mỠ vỠ vẻnh nỠgtỠ'. ảjag jẻ prẻr tỏg, ảjag tỠ tỠ ti kỏsin tỠ Jesus Cristo mrẻ ke nỠtỠ jẻ, ảjag tỠ tỠ ẻg Senhor mrẻ ke nỠtỠ jẻ gẻ.

Vẻnh kỏpỏm kỠ nỠtỠ tỳg nỠ

¹⁰ Inh kanhkỏ', vẻnh vỠ pir han nỠ. ẻg Senhor tỠ Jesus Cristo jiji ki sỏg ảjag jyvẻn sỏr mỠ, hã kỠ sỏg ke mỠ. Vẻnh kỏpỏm sỏr tỳg ra. Vẻnh jykre pir han sỏr ra. Nẻn pir hã to jykren nỠ. Vẻnh jykre pir hã han sỏr ra.

¹¹ Inh kanhkỏ', ảjag to sỏg vẻnh vỠ jagy mẻ. Cloe fi mrẻ ke fag vỠ inh mỠ tỏ, kỠ fag tỏg inh mỠ ảjag tỠ vẻnh kỏpỏm sỏr mỠ kỏmẻn, ảjag tỠ jagnẻ to jỠ sỏr mỠ ti. ¹² Tag mẻ sỏg, ha mẻ: ảjag kỏmỠ ừ tỏg nẻji: “tỠ sỏg Paulo mrẻ ke nỠ,” he tỠ. KỠ ừ tỏg nẻji: “tỠ sỏg Apolo mrẻ ke nỠ,” he tỠ gẻ. Jỏvo ừ tỏg: “tỠ sỏg Pedro mrẻ ke nỠ,” he tỠ, kỠ ừ tỏg: “tỠ sỏg Cristo mrẻ ke nỠ,” he tỠ gẻ. ¹³ Cristo mỠ vẻnh kỏpỏm kỠ nỠ? Vỏ. Inh hã mỠ ảjag jagfy cruz to sa'? Vỏ. Inh jyjy tỏ kỠ ảjag mỠ vẻnh kygpe kỠ nỠtỠ', isỠ tỠ Paulo nỠn kỠ'? Vỏ, ke tỠ vẻ.

¹⁴ Hã kỠ tỏg inh mỠ há tỠ, ừri, sỠ ảjag kygpe ja tỠ nỠ ti. Tag to sỏg Topẻ mỠ: “há ti nỠ,” he tỠ. ¹⁵ KỠ ảjag tỏg iso: “ti jiji tỏ kỠ sỏg kype kỠ nỠ,” he vẻnh nỠtỠgtỠ. Crispo hã kype inh, kar kỠ Gaio ti ke gẻ. ¹⁶ Kar kỠ sỏg Estẻfanas fag kygpẻ gẻ. Kar inh ừ kygpẻg tỠ nỠ, hỠn, he sỏg. ¹⁷ Cristo pi(jẻ) inh mỠ: “ha ag kygpenh tỠg,” he ja nỠ'. Inh mỠ tỏg: “ha ag mỠ inh kỏmẻn tỠg, ha inh vỠ tỏnh tỠg,” he ja nỠ. KỠ sỏg tỏ tỠgtỠ. Hã ra sỏg ỏn kỠ tỠ vẻme kanhrỏ han vẻnh nỠgtỠ, ke tỠ nỠ mỠ ra Cristo tỠ cruz to sa ja ẻn tỠ nẻn ừ tỠ ri ke nỠ sir, isỠ inh vỠ kanhrỏ tỠ ảjag krỠn sỏr mỠ ra.

Jesus tỠ cruz to sa ja hã tỏ ẻg tỠ

¹⁸ Ừ mỠ ẻg tỏg vẻnh kỏgtỠg nỠtỠ ve nỠ, ẻg tỠ Jesus tỠ cruz to sa mỠ ẻn tỏ kỠ. Hã ra ag tỠ nỳgme ki vỏr ke vẻ. Ag jỏvo tỏg ẻg mỠ Topẻ tỠ há (r) nỠ, Jesus tỠ cruz to sa ti, hã kỠ ẻg krenkren kỠ nỠtỠ, Topẻ tỠ hã tugrỠn ẻg krenkren han kỠ. ¹⁹ Hã kỠ tỏg rán kỠ nỠ, ha mẻ. “Ừn kanhrỏ mág ag jykre tỠ sỏg tỠ' henh ke mỠ, ha vemnỠ, ừn estudo mág ag tỠ nẻn to jykren mỠ tỠ sỏg tỠ' henh ke mỠ,” he tỏg, Topẻ ti.

²⁰ Hã kỠ ỏn kỠ ừn kanhrỏ mág ag pi(jẻ) tỠ nẻn ừ nỠtỠ'. ỏn kỠ vẻnh rán tỠ ag pi(jẻ) tỠ nẻn ừ nỠtỠ'. ỏn kỠ ừn estudo mág ag pi(jẻ) tỠ nẻn ừ nỠtỠ'. ẻg tỠ tag ki nẻn ừ ki kanhrỏn mỠ to tỏg: “nẻn ừ tỠ vẻ,” he ja nỠgtỠ, Topẻ ti. “KrỠ tỠ ag nỠtỠ, ừ tỠ tag hã nỏn mỠ sỏr mỠ ag,” he tỏg, Topẻ ti.

²¹ Topě tỹ nén to jykrén mũ vỹ ge nĩ, ha mẽ. Ěg tỹ vėsóg ki Topě to jykrén sór mũ ra ěg tóg ti ki kanhrän ja tũ nĩgtĩ, ěg tỹ ga kri mũn kỹ. Hã kỹ Topě tóg ěg tỹ ti vĩ jěmě kỹ kri fi kỹ ěg kren han mũ. Hã kỹ tóg ag mỹ Topě krĩ tũ nĩ ve nĩ, ũ tỹ ki kagtĩg ag mỹ. ²² Judeu ag ne ěg tỹ nén han vãnh ve sór mũ', milagre ti, ag tỹ Topě jykre ki kanhrän jé. Kỹ fóg tỹ Grego ag ne ón kỹ ti jykre to vémén sór mũ'. ²³ Ag jãvo ěg tóg nén pir hã tó tĩ, hã vỹ: Cristo tỹ cruz to sa kỹ ter ja ti, he mũ. Judeu ũ ag mỹ tóg jěggry tĩ, ti cruz ti, jãvo tóg Judeu tũ ag mỹ ěg krĩ tũ nĩ ve nĩ, ag tỹ ěg vĩ mẽ kỹ, fóg ũ ag mỹ, kanhgág ũ ag mỹ ke gé. ²⁴ Judeu kãmĩ ũ ag tóg kuprěg kỹ nỹtĩ jãvo, fóg kãmĩ ũ ag tóg kuprěg kỹ nỹtĩ gé, kanhgág ag kãmĩ ke gé. Ag hã mỹ tóg há tĩ, Cristo tỹ cruz to sa kỹ ter ja ti, ũn kuprěg kỹ nỹtĩ ag mỹ. Ěg hã vė. Topě jykre tar hã vė, Cristo tỹ cruz to sa ja ti. Topě krĩ há to ken hã vė, hã vỹ: Cristo ter ja ti, he mũ. ²⁵ Topě krĩ tũ nĩ ve vỹ ěprã ke krĩ há nĩ ve kãfór nĩ mỹr, ti hã ne ã pir mỹ krĩ há nĩ'. Kỹ Topě krój nĩ ve vỹ ěprã ke ag tar nĩ ve kãfór nĩ gé. Topě hã ne ã pir mỹ tar nĩ'.

Topě vỹ ěg kuprěg, ěg tỹ tỹ nén ũ tũ ra

²⁶ Inh kanhkã', vėso jykrén. Topě vỹ ājag jé prěr. Ājag kãmĩ ti pipir nỹtĩ, ũn kanhró mág ag, escola tỹ hěn ri ke ki vėnh kanhrän ja ag. ũn mág ag vỹ pipir nỹtĩ gé, ũn mág krě ag ke gé. ũ tỹ ge kuprěg mág tũ ti nĩgtĩ, Topě ti. ²⁷ ũ tỹ ũn mág ag mỹ krĩ tũ nĩ ve ag hã kuprěg ti tĩ mỹr, ũn vėnh kagtĩg ag. Ti tỹ ũn krĩ há ag mỹ'a han sór vė. Kỹ tóg tag ki ũn krój nỹtĩ ag kuprěg, ũn tar ag mỹ'a han jé. ²⁸ Hã jé Topě tóg ũ tỹ tag ki jagtar nỹtĩ ag kuprěg. ũn mág ag tỹ ěg ve kỹ ěg tóg ag mỹ jagāgtar nỹtĩ. Nén ũ tũ vỹ tỹ ěg nỹtĩ. Hã ra Topě tóg ěg kuprěg mũ, ag tỹ tũ' hen jé, ũn mág ag vỹ tỹ. ²⁹ Hã kỹ ũ tóg Topě mỹ: "ũn mág vỹ tỹ inh nĩ, há inh nĩ," henh ke tũ pė nĩ, ěg tỹ kejěn ti ve kỹ. Hã jé Topě tóg ũn jagtar ag kuprěg.

³⁰ Topě mré ke vỹ tỹ ěg nỹtĩ, ha mẽ, ěg tỹ tỹ Jesus Cristo mré ke nỹtĩn kỹ. Topě hã vỹ ěg krĩ há han mũ', Jesus tugnĩn. Topě hã vỹ ěg mỹ vėnh pãte fón mũ', ti tugrĩn. Ti hã ne ěg tỹ tỹ ti tũ nỹtĩ han mũ', ti tugnĩn. Ti hã ne ěg krenkren han mũ'. Topě tỹ ti mỹ vėnh jykre nĩm hã vė, ěg tỹ tag han jé, ³¹ ũ tỹ rán kỹ nĩ tag ti, hã vỹ: "ājag tỹ ũ to: ũn mág vỹ tỹ ti nĩ, he sór kỹ ěg Senhor ti tómnĩ," he mũ, Topě vĩ rán ki.

2

Paulo vỹ krój nĩ gé

¹ Inh kanhkã', ājag ki sóg jun ja nĩ, sỹ ājag mỹ Topě jykre tó jé. Inh pi(jé) ājag mỹ ón kỹ vėme kanhró han'. Inh pi(jé) ājag tỹ vėnh vĩ ki kanhró jãvãnh tó'. ² Nén pir hã to sóg jykrén ja nĩgtĩ, sỹ ājag mỹ tó jé, hã vỹ: Jesus Cristo, he mũ, ti tỹ cruz to sa kỹ ter ja ěn ti. ³ Krój ja inh nĩ, sỹ ājag ki jun kỹ. Mũměg ja inh nĩ, kaně jur han ja inh nĩ, sỹ ājag mré nĩn kỹ. ⁴ Isỹ ājag mỹ Topě vĩ tó kỹ inh pi(jé) vėnh vĩ sĩnvĩ tỹ ājag krĩn sór ja nĩgtĩ', inh pi(jé) inh krĩ há tỹ vėnh vĩ kanhró tó ja nĩgtĩ'. Topě kuprĩg tỹ inh jagrě nĩ hã tỹ sóg ājag mỹ tó ja nĩgtĩ', ti jykre tar tỹ. ⁵ Hã kỹ ājag pi(jé) ěprã ke jykre há ki ge jěg', ěprã ke vĩ kanhró ki'. Hỹ, hã ra ājag tóg Topě jykre tar ki ge jěg mỹr'.

Topě kuprĩg vỹ Topě tỹ nén to jykrén mũ ki kanhró nĩ

⁶ Jãvo sóg ũ tỹ Jesus ki kanhró mág ag mỹ Topě vĩ kanhró tó tĩ gé, ũ tỹ to jykrén há ag mỹ. Hã ra ti pi(jé) tỹ ěprã ke vĩ kanhró nĩ'. Ga kri ke ag jykre tó tũ sóg nĩgtĩ, ũri ũn mág ag vỹ ti. Tũ' he jé tóg ke mũ, ũri ũn mág ag vỹ ti. ⁷ Topě vĩ kanhró tó sóg tĩ mỹr'. Ěn tỹ ěg vėsóg ki ki kanhrän ke tũ nĩ. Vãšỹ ěg tóg ki kanhrän ja tũ nĩ gé. Hã ra Topě tóg vãšỹ to jykrén mũ, mundo tỹ kã nĩ to hã tóg to jykrén mũ, ěg tỹ ti vĩ ki kanhrän jé, ěg tỹ ti jykre ki kanhró tugrĩn tỹ ũn mág nỹtĩ jé. ⁸ ũri ũn mág ag pi(jé) ki kanhró nỹtĩ', Topě jykre tag ki'. Ag tỹ ki kanhró nỹtĩ ra ag pi(jé) Jesus tỹ ka to ti sanh mũ vė', ěg Senhor tỹ, ũ tỹ vėnh kar kãfór nĩ tag tỹ mỹr. Hã ra ag tóg ti ki kagtĩg nỹtĩn kỹ ag tóg cruz to ti sa ja nĩgtĩ. ⁹ Hã ra tóg rán kỹ nĩ, Topě jykre ti, hã vỹ: "Topě tóg ěg mỹ nén ũ há tãvĩ kãn ja nĩ, ũ tỹ ti to há kar mỹ mỹr," he mũ. "ũ pi(jé) tag ve ja nĩ ver'. ũ pi(jé) tag mẽ ja nĩ ver'. Ěprã ke ag

pi(jé) to jykrén ja nĩ ver'. Topě hã ne to jykrén ja nĩgtĩ, ti tỹ ěg mỹ kãn ke ěn to," he ja tóg nĩgtĩ, Topě vĩ rán ki.

¹⁰ Kỹ tóg ěg hã mỹ tó ja nĩ. Ā kuprĩg tỹ tóg ěg kanhrãn ja nĩ, to. Ti kuprĩg vỹ nén kar to jykrén tĩgtĩ, Topě tỹ nén to jykrén mũ mré hã, ti tỹ vėnh kar vatánh tá nén to jykrén mũ mré hã. ¹¹ Ge ti nĩ, ha mẽ. Ęprã ke tỹ nén to jykrén mũ ki kanhró ěg tóg nĩ. Kỹ ěg ne tỹ ki kanhrãn tĩ? Ęg krĩ tỹ ěg ki kanhrãn tĩ. Ęprã ke krĩ vỹ ěprã ke tỹ nén to jykrén mũ ki kanhrãn tĩ. Hã ra Topě kuprĩg vỹ Topě tỹ nén to jykrén mũ ki kanhrãn tĩ. Ęprã ke pi(jé) Topě tỹ nén to jykrén mũ ki kanhrãn tĩ, ti tỹ Topě kuprĩg tỹ jagrě tũ ra'. ¹² Hã ra Topě pi(jé) ěg mỹ ěprã ke kuprĩg tỹ ěg jagrě han'. Topě kuprĩg tỹ tóg ěg mỹ ěg jagrě han, ěg tỹ ti tỹ ěg mỹ nén nĩm mũ ki kanhró nỹtĩ jé. Ti hã vỹ ěg kren han sór mũ, ěg tỹ vėnh krenkren han ki kagtĩg ra. Ti tỹ ěg mỹ nén nĩm to ken hã vỹ.

¹³ Hã tó sóg tĩ. Ęprã vėnh kanhró pijé', sỹ ājag mỹ tó mũ tag ti. Topě kuprĩg kanhró vỹ. Hã kỹ sóg ti kuprĩg hã tỹ ti jykre kãmén tĩ. ¹⁴ Ęprã ke ag pi(jé) Topě kuprĩg to há nỹtĩ', ti jykre to'. Ag mỹ tóg tỹ Topě krĩ tũ nĩ ve nĩ. To jykrén há han ki kagtĩg ag nỹtĩ, ag tỹ Topě kuprĩg tỹ jagrě tũ nỹtĩn kỹ. ¹⁵ Ũ tỹ ti kuprĩg tỹ jagrě jě ěn hã ne nén kar to jykrén há han tĩ'. Kỹ ũ pi(jé) ěg tỹ nén han mũ ěn ki kanhró nĩ', ti tỹ vég mũ ra, ti tỹ Topě kuprĩg tỹ jagrě tũ jėn kỹ.

¹⁶ Hỹ, ũ nỹ hỹn Topě tỹ nén to jykrén mũ ki kanhró nĩ'? Ũ nỹ hỹn Topě kanhrãn mũ'? Ũ tỹ ti kanhrãn mũ venh ke tũ ěg tóg nĩ. Jãvo Cristo hã ne ěg kanhrãn tĩ', ti tỹ ěg krĩ ri ke nĩn kỹ.

3

Topě camarada ag tỹ jagně ri ke

¹ Inh kanhkã', inh pi(jé) ājag mỹ Topě jykre tó kãn ja nĩ ver', sỹ ājag mỹ tó sór mũ ra. Ũ tỹ Topě kuprĩg tỹ jagrě nỹtĩ tũ ri ke vỹ tỹ ājag nỹtĩ, gĩr ri ke vỹ tỹ ājag nỹtĩ, ājag tỹ Cristo jykre to tar tũ nỹtĩn kỹ. ² Hã kỹ sóg ājag mỹ leite ri ke hã ven ja nĩ, sỹ ājag mỹ Topě vĩ tó kỹ. Inh pi(jé) ājag mỹ vėjėn tar ri ke ven ja nĩgtĩ', ājag tỹ to tar tũ ja nỹtĩn kỹ ver. Kỹ ājag tóg ũri to tar tũ nỹtĩ gé. Ver ājag tóg ũ tỹ Topě kuprĩg tỹ jagrě tũ nỹtĩ ve nĩ. ³ Hã kỹ ājag tóg vėnh kãpugpóv kỹ nỹtĩ, ājag tỹ jagně to jũ nỹtĩn kỹ. Hã ki ājag tóg ěprã ke jykre han tĩ, hã ki ājag tóg ti tỹ jagrě tũ nỹtĩ ve nĩ. ⁴ Kỹ ājag kãmĩ ũ ne tóg: "Paulo mré ke vỹ tỹ inh nĩ," he tĩ'. Kỹ ũ tóg: "jãvo sóg tỹ Apolo mré ke nĩ," he tĩ gé'. Ęprã ke jykre hã vỹ, ājag tỹ han mũ tag ti.

⁵ Ũ nỹ tỹ Apolo nĩ', jo ũ nỹ tỹ inh nĩ', hã vỹ: Paulo, he mũ? Topě camarada ri ke ěg nỹtĩ, kỹ ājag tóg ěg vỹ kri fi kỹ Jesus ki ge ja nĩgtĩ, ěg Senhor tỹ ājag krĩn kỹ. Ti hã vỹ ěg mỹ ěg rãnrãj nĩm ja nĩ. ⁶ Topě vĩ krãn inh, ājag kãki, kỹ Apolo vỹ ki gónh, hã ra ũ tỹ ti mog han mũ vỹ tỹ Topě nĩ. ⁷ Hã kỹ ũ tỹ krãn mũ pi(jé) tỹ ũn mág nĩ'. Ũ tỹ ki gónh mũ pi(jé) tỹ ũn mág nĩ gé'. Pir ti nĩ, ũn mág ti, hã vỹ: Topě, he mũ, ũ tỹ ti mog han mũ ěn ti. ⁸ Ũ tỹ krãn mũ vỹ ũ tỹ ki gónh mũ ěn ri ke nĩ. Kanhkã tá ěg tóg ěg rãnrãj kaja venh ke mũ. Sỹ krãn ja kaja ve jé sóg ke mũ, jãvo tóg ã tỹ ki gónh ja kaja venh ke mũ gé. ⁹ Topě hã mré ěg tóg rãnrãj mũgtĩ. Topě japỹ ri ke ājag nỹtĩ.

Topě tỹ ěg rãnrãj tugnỹm ke

Kỹ ājag tóg ti tỹ ĩn han mũ ri ke nỹtĩ gé. ¹⁰ ĩn tỹ kri jě jafã ri ke han inh, ĩn króggróg ri ke ti, sỹ ājag mỹ ti jykre tó kỹ, Topě tỹ to inh krĩn kỹ. Kỹ sóg to jykrén há han, sỹ ĩn tỹ kri jě jafã ri ke ěn tar há han jě. Kỹ ājag kãmĩ tóg kri ĩn ri ke han mũ sir, ti tỹ isỹ ājag kanhrãn nón ājag kanhrãn kỹ. Kỹ ũ tỹ Topě vĩ tó mũ jé to jykrén há han. ¹¹ ĩn tỹ kri jě jafã ri ke ěn vỹ pir nĩ, hã vỹ: Jesus Cristo, he mũ, hã kỹ sóg ājag mỹ ri ke han, sỹ ti kãmén kỹ. Ũ venh ke tũ ěg tóg nĩgtĩ. ¹² Kri ěg tóg ĩn ri ke hyn han tĩ. Ũ tóg ouro tỹ han mũ, ũ tóg prata tỹ han mũ, ũ tóg pó sĩnvĩ tỹ han mũ, ũ tóg ka tỹ han mũ, ũ tóg re tỹ han mũ, ũ tóg ěkré fár tỹ han mũ. ¹³ Kurã tỹ ěgno ki ěg tóg venh ke mũ, ĩn há ti, hã vỹ: ěg tỹ ũ mỹ ti vỹ kãmén há han ja ti, he mũ. Pĩ vỹ ěg rãnrãj kókén ke mũ, kỹ ěg tóg pĩ ki ěg rãnrãj

jykre venh ke mū. ¹⁴ Pī tỹ ti kókén vānh nīn kỹ ěg tóg ti kaja venh ke mū sir, ěg tỹ ĩn tỹ kri jě jafā kri han ja kaja ti. ¹⁵ Pī tỹ ěg rānhraj kókén kỹ ěg tóg ěg rānhraj ti kren ke mū sir, ti tũg kỹ, ge ra ěg hā tóg kren ke mū hā ra, ěg tỹ kanhkā ra mūn kỹ. Hā ra tóg ěg tỹ pī ki kren ri ke nī sir.

¹⁶ Ha mẽ, Topě ĩn ri ke ěg nỹtĩ, Topě kuprĩg tỹ ěg kākā jěn kỹ. Ājag mỹ tag ki kagtĩg? Ki kagtĩg nĩ ve ājag nỹtĩ. ¹⁷ Ū tỹ Topě ĩn kókén mū ěn kókén jě tóg ke mū, Topě ti. Ti tũ vė mỹr, ti ĩn ti. Ājag hā vė, ti ĩn ti, ěg hā vė.

Ěg pi(jé) jagně káfór nỹtĩ!

¹⁸ Kygně tũg nĩ, ājag tỹ vėso: “ki kanhró mág inh nĩ,” hen kỹ. Ājag tỹ ěprā ki kanhró mág nỹtĩn kỹ to: “nén ũ tũ vė,” hemnĩ, to: “sỹ nén ũ ki kagtĩg ri ke vė,” hemnĩ, ājag tỹ Topě jykre hā ki kanhrān jě. ¹⁹ Ěprā ki kanhró mág ag to Topě tóg: “nén ũ tũ vė,” he tĩ. Vėnh kagtĩg ag tóg nỹtĩ, ti mỹ. Hā kỹ tag tóg rán kỹ nĩ, ha mẽ: “ěprā ke ag mỹ tóg ag tỹ ki kanhró mág nỹtĩ ve nĩ, hā ra Topě tóg hā ki ag mỹ ag krĩ tũ nỹtĩ ěn ven ke mū,” he tóg, Topě vĩ rá ki. ²⁰ Kỹ ti rá ũ vỹ ge nĩ gé, ha mẽ: “Topě vỹ ki kanhró nĩ, ũ tỹ ki kanhró mág ag tỹ nén to jykrén mūn ki. Nén ũ tũ vė, ag tỹ nén to jykrén mū ti. Kỹ tóg ki kanhró nĩ, Topě ti,” he tóg mū gé, Topě vĩ rá ki. ²¹ Hā kỹ ěprā ke jiji tó sór tũg nĩ. Ag pi(jé) tỹ ũn mág nỹtĩ!. Ājag mré ke kar ag vė mỹr. ²² Inh hā vỹ tỹ ājag mré ke nĩ. Apolo vỹ tỹ ājag mré ke nĩ gé, Pedro ti ke gé. Mundo ki ke kar vỹ tỹ ājag tũ nĩ gé, ājag rĩnrĩr nĩ ti ke gé, ājag ter ke ti ke gé, ājag tỹ ũri vėg mū ti ke gé, ājag tỹ vāhā venh ke ti ke gé. Ājag tũ kar vė mỹr, ²³ jāvo ājag hā ne tỹ Cristo tũ nỹtĩ!, kỹ Cristo vỹ tỹ Topě tũ nĩ. Vyrmy tũ han sór tũg nĩ.

4

Apóstolo ag

¹ Ājag tỹ ěg to jykrén kỹ tag to jykrén nĩ, ha mẽ. Cristo camarada vỹ tỹ ěg nỹtĩ. Topě jykre tó ěg tóg tĩ, ěg tỹ vėsóg ki nén to jykrén vānh ěn. Ěn ki rĩr ěg tóg tĩ. ² Kỹ ěg patrāo tóg nén ũ pir ve sór nĩgtĩ, ěg tỹ ti tũ ki rĩr mūn kỹ, hā vỹ: ěg tỹ ki rĩr há han mū, he mū. Ge ti nĩ, Topě tỹ ěg ki nén ve sór mū ti. Ti tũ ki rĩr há han jě ěg tóg ke mū. ³ Kỹ ājag tỹ isỹ nén han mū to vĩ mū ra tóg inh mỹ tỹ nén ũ tũ nĩ, ěprā ke ag tỹ inh jykre to vĩ mū ra. Kỹ isóg inh jykre to: há ti nĩ, he tũ nĩgtĩ gé. ⁴ Inh pi(jé) sỹ ti vĩ mranh mū ki kanhró nĩ!. Hā ra sóg tag to: “hā kỹ inh jykre vỹ kuryj kar nĩ,” he tũ nĩgtĩ gé. Topě hā ne ěg jykre tugnym tĩ!, hā kỹ tóg ki kanhró kar nĩ, hā kỹ tóg tónh ke mū. ⁵ Kỹ ũ jykre to vĩ sór tũg nĩ, kurā tỹ ěgno to hā, ěg Senhor kātĩg ke to hā. Ti ha ne nén kar vėnh ven han ke mū!, ěg tỹ vėnh vatánh tá nén han mū mré hā, ěg tỹ kuty tá nén han mū mré hā. Kỹ tóg ěg tỹ nén ũ to jykrén mū ěn vėnh ven han kån ke mū gé mỹr. Kỹ ěg tóg mėnh mū sir, Topě tỹ ěg mỹ vĩ há han ke ti. Vyrmy tóg ěg mỹ tónh ke mū, ěg kar mỹ, ěg tỹ nén han ja ti.

⁶ Inh kanhkā!, Topě vĩ rán ja pātén sór tũg nĩ. Ū tỹ ājag kanhrān mū to: “Topě vĩ tó tĩ ag kāmĩ káfór vỹ tỹ ti nĩ,” he tũg nĩ. Ājag tỹ to jykrén há han jě, hā jě sóg vėnh hā to tag rán, ājag mỹ, Apolo to ke gé, ěg tỹ jagně ri ke nỹtĩ tag ti. ⁷ Ěg tỹ jagně káfór han sór kỹ ěg tóg ón kỹ ke tĩ. Ha vé, Topě vỹ ěg mỹ ěg tũ vin kån. Ěg tỹ vėsóg ki mǎn ja pijé!. Kỹ ājag tỹ ne jě to: “isũ vė,” he sór nē? Tỹ tóg Topě tỹ ājag mỹ nĩm tũ nĩ ve nĩ, ājag tỹ to: “isũ vỹ ģ tũ káfór nĩ,” hen kỹ.

⁸ Tỹ ũn há nỹtĩ ve ājag nỹtĩ, vėnhmỹ. Rico nỹtĩ ve ājag nỹtĩ, vėnhmỹ. Tỹ ũn mág nỹtĩ ve ājag nỹtĩ vėnhmỹ, inh jāvo. Hỹ, há ti nĩ vė, ājag tỹ tỹ ũn mág nỹtĩ ra. Kỹ sóg tỹ ājag mré ũn mág nĩnh mū gé vė vė. Hā ra tóg ke tũ tĩ. ⁹ Jesus tỹ ũn fėg mū vỹ tỹ inh nĩ, apóstolo vỹ tỹ inh nĩ. Hā ra tóg sỹ to jykrén mū ra tóg Topě tỹ isỹ ũn jykre kórėg ag ri ke han nĩ ve nĩ, ũn kónėg ag ri ke, ag tỹ ũn kagtén mū ěn ag ri ke. Vėnh kar ne tóg isugnym tĩ!, ěprā ke kar, Topě tỹ jėnė jafā ag kar ke gé, mundo tag ki ke kar ag mỹr. ¹⁰ Krĩ tũ nĩ ve sóg nĩ mỹr, Cristo tugrĩn. Inh jāvo ājag tóg krĩ há nỹtĩ ve nỹtĩ, Cristo jykre ki. Krój inh nĩ, jāvo ājag tóg tar nỹtĩ ve nỹtĩ. Ājag to ag tóg vĩ há han tĩ, jāvo ag tóg iso é he tĩ. ¹¹ Hā kỹ sóg kókĩr mū, ũri, kur tũ sóg nĩ gé, iso kry ag tóg mū gé, jamā tũ sóg nĩ gé, ¹² ron sóg tĩ gé, sỹ inh rānhraj ki ijėn ven jě. Ag tỹ iso é he mū ra sóg ag mỹ nén ũ há tó tĩ, Topě tỹ ag mỹ

han jé. Ag tỹ inh vóg kónān kỹ sóg ag mỹ vènh nenh tũ nĩgtĩ. ¹³ Ag tỹ iso fé fé he mũ ra sóg komēr hã ag mỹ vĩ tĩ, ag jũ tỹ tũ' he jé. Vãfár ri ke inh nĩ, vènh kar mỹ, ag tỹ nén fón tĩ kar ri ke inh nĩ.

¹⁴ Inh pi(jé) ājag mỹ'a han sór mũ'. Hã ra sóg ājag mỹ tag rán, sỹ ājag jyvèn jé, ājag tỹ tỹ inh krē ri ke nỹtĩn kỹ, sỹ ājag to há tãvĩ nĩn kỹ. ¹⁵ Ũ tỹ ājag kanhrān sór mũ vỹ e nỹtĩ, ũ tỹ Cristo jykre tỹ ājag kanhrān sór mũ ag. Mil kãfór ag nỹtĩ, hỹn. Hã ra sóg pir nĩ, sỹ ājag panh ri ke nĩn kỹ. Isỹ ājag mỹ Jesus Cristo kãmén kỹ sóg ājag panh ri ke nĩ, ti tỹ sỹ ājag hỹn han ri ke nĩn kỹ. ¹⁶ Hã kỹ sóg ājag jyvèn mũ, ājag tỹ sỹ nén han mũ han jé. ¹⁷ Hã jé sóg Timóteo jēnē, ājag to. Inh kósín ri ke ti nĩ, ti to inh há tãvĩ nĩ, kỹ tóg ěg Senhor jykre to tar nĩ. Ēn hã vỹ ājag mỹ tó mǎn ke mũ, isỹ Jesus Cristo japry jagma tĩ ti, isỹ ti jamĩn jagma tĩ ti, isỹ igreja kar ki ke ag kanhrān tĩ ti, ěmã kar mĩ hã.

¹⁸ Jãvo ājag kãmĩ ũ tóg vēsỹ ũn mág han sór mũ, iso: “kãtĩg ke tũ pē ti nĩ,” hen kỹ. ¹⁹⁻²⁰ Hã ra sóg kãnhmar ājag to pasa ke kãtĩg ke mũ, ha vemnĩ, ěg Senhor tỹ: “ha tĩg,” hen kỹ. Kỹ sóg ag jykre venh ke mũ, vēsỹ ũn mág han mũ ag. Ēg pi(jé) ũ vĩ tỹ Topē tỹ tỹ ěg pã'i nĩ ěn vég tĩ'. Hã ra ti jykre tar hã tỹ ěg vég tĩ. Hã kỹ inh pi(jé) ag vĩ mẽ sór mũ ver'. Ag jykre tar ve sór inh mũ, ũ tỹ vēsỹ ũn mág han mũ ag. ²¹ Kỹ isỹ ājag tá jun kỹ ne nỹ hỹn ājag mỹ há nĩnh mũ? Inh mỹ ka ma kãtĩ mũ', ājag mrānmrān jé? Inh mỹ ājag mỹ vĩ há han ke mũ', komēr hã, ājag tỹ tỹ inh fe nỹtĩn kỹ? Ne nỹ hỹn há nĩ ājag mỹ? Ha to jykrén.

5

Ũn prũg kónān mũ

¹ Nén ũ tóg mẽ há tĩ ājag to, ke gé. Nén ũ vènhmỹ han ājag nēji tĩ, hã ra tóg kórég pē nĩ, ājag kãmĩ ũ tỹ nén han mũ ti. Tag mẽ inh, ha mẽ: ājag kãmĩ ũ tóg nēji ā panh prũ fi tỹ prũg mũ. Ũ tỹ Topē jykre ki kagtĩg ag pi(jé) ti ri ke han tĩ', ti jykre kórég tag tĩ'. ² Hã ra ājag tóg to fe kaj tũ nỹtĩgtĩ. Vēsỹ ũn mág han sór ājag tóg mũgtĩ, vènh jykre kórég tag tỹ ājag kãmĩ ũ kãkã nỹ ra. Ājag ne tóg vēsỹrénh tũ nỹtĩgtĩ', ājag tỹ ũ tỹ ti kórég tỹ ge han mũ ěn kutēm jé, ājag kãmĩ. ³ Ha mẽ, ěg tỹ ti tỹ nén han ke to inh jykrén huri, sỹ ājag mré nĩ tũ ra ver. Hã ra sóg ājag to jykrén tĩ. Sỹ ājag mré nĩ ri ke han sóg tĩ, sỹ ājag mré ti to jykrén kỹ. Ũ tỹ vènh jykre pãno tỹ ge han mũ ěn tỹ tag han nĩ, ha mẽ. ⁴ Vènh mǎn jé ājag tóg ke mũ, jó sóg ājag mré nĩ ri ke han mũ, ājag vènh mǎn ki. Ēn ki ěg Senhor tỹ Jesus vỹ ājag mỹ vènh jykre nĩm ke mũ. Kỹ ājag tóg sir Jesus jyjy tó kỹ ⁵ ti fēg ke mũ, ũn jykre kórég ěn ti, Satanás mỹ, ti tỹ ti fár kókén jé. Satanás tỹ ti fár kókén kỹ tóg hèn ri ke mũn to jykrén mǎn ke mũ, kỹ ti kuprĩg vỹ kren ke mũ, ěg Senhor tỹ Jesus kurā ěn kã.

⁶ Ājag tỹ vēsō: “há ěg nỹtĩ,” he mũ ran pi(jé) há nĩgtĩ'. Ha mẽ, pão jãgja sĩ tỹ, fermento sĩ tỹ pão kar tóg són ke kỹ mog tĩ. Tag to jykrén. ⁷ Hã kỹ fón kãn nĩ, pão jãgja si ti, ājag tỹ pão tãg han jé, ũn jãgja tũ ri ke ājag nỹtĩ, ājag jykre ti, ti há nĩn kỹ. Kỹ vènh jykre kórég vãm kãn nĩ. Cristo vỹ ěg jagfy ter mỹr. Ēg tỹ Páscoa kã cordeiro tãnh tĩ ěn ri ke ti nĩ, Jesus ter ti. ⁸ Ēg tỹ festa ěn ko jé ěg tóg pão jãgja si fón kãn tĩ. Kỹ kemnĩ gé, hã vỹ: vènh jykre pãno tovãnh, he mũ, nén ũ vènhmỹ han mǎn tũg, he mũ, ājag tỹ pão jãgja tũ ri ke nỹtĩ jé, hã vỹ: vènh jykre kuryj han nĩ, he mũ, vènh jykre pir han nĩ, he mũ gé.

⁹ Hã jé sóg ājag mỹ rán ja nĩ, ājag tỹ ũ tỹ nén ũ vènhmỹ han mũ ag mré mũ tũ nĩ jé. ¹⁰ Hã ra sóg ũ tỹ Jesus ki ge tũ ag tó ja tũ nĩ, isỹ: “ag mré mũ tũg nĩ,” hen kỹ. Jykre pãno ag nỹtĩ, ěprã ke ag, hã vỹ: nén kar to ěn (ka)mě, he mũ, nén ũ péju tĩ he mũ vỹrmỹ topē han mũ, he mũ. Ājag tỹ tag ag mré vēmén sór tũ nĩn kỹ ājag hỹn mundo tag tovãnh kỹ hē ra mũnh ke mũ. Inh pi(jé) tag tó ja nĩ'. ¹¹ Hã ra sóg ājag mỹ ũ tỹ ón kỹ tỹ ěg régre nĩ ěn rán mũ. Ũ tỹ: “tỹ inh ā mré Jesus ki rã kỹ nĩ,” he mũ ra nén ũ vènhmỹ han tovãnh sór tũ nĩn kỹ ti mré tĩg mǎn tũg nĩ, ti tỹ nén kar to ěn (ka)mě nĩn kỹ, ti tỹ vỹrmỹ topē han kỹ, ti tỹ ũ to vĩ kónān (ka)mě nĩn kỹ, ti tỹ kron (ka)mě nĩn kỹ, ti tỹ nén ũ pigju(g) ti nĩn kỹ. Ũ tỹ ge mré nĩ sór tũg, nĩ, ti mré jēn tũg nĩ gé.

¹² Ęg pi(jé) ěg mré ke tũ ag jykre tugnỹm ke mũ', Jesus ki ge tũ ag. Ājag tỹ ěg mré ke ag jykre tugnỹm ke vĕ, ag jykre to: "tag vỹ há nĩ, tag vỹ kórég nĩ," henh ke vĕ. ¹³ Topĕ há ne ũ ag jykre venh ke mũ', ěg mré ke tũ ag. Ęg mré ke tỹ vĕnh jykre pãno han kỹ ěg ti jykre tónh ke mũ. Hã kỹ ũ tỹ vĕnh jykre kórég han mũ ěn kutĕm nĩ, ājag kãmĩ.

6

Ęg tỹ pã'i ag mỹ ěg mré Jesus ki rã kỹ nỹtĩ ũ tónh ke tũ

¹ Kỹ nĕn ũ tóg vĕnhmỹ tĩ gé. Ājag kãmĩ ũ tóg ā mré ke to jũ kỹ Jesus mré ke tũ ag tỹ pã'i mỹ tó tĩ, pã'i ag jykre pãno ra. Ti pi(jé) Topĕ tũ ag mỹ tó tĩ'. Vĕnhmỹ ti nĩ, tag ti. ² Ęprã ke ag jykre tugnỹm jé ājag tóg ke mũ mỹr, ājag tỹ tỹ Topĕ tũ nỹtĩn kỹ. Ājag mỹ tag mĕ ja tũ? Kỹ, ājag tỹ ga kri ke kar jykre tugnỹm ken kỹ ājag hỹn jagnĕ jykre tugnỹm há han ke mũ gé, jagnĕ to jũ tỹ tũ' henh ke jé ājag tóg ke mũ gé. Ki ājag tóg krỹg mũ mỹr. ³ Topĕ tỹ jĕnĕ jafã ag jykre tugnỹm jé ājag tóg ke mũ mỹr, ājag mỹ tag mĕ ja tũ? Kỹ ājag hỹn ěprã ke jykre tugnỹm há han ke mũ gé. ⁴ Ge ra ājag tóg ěg mré ke tũ ag mỹ: "ha inh mỹ isũ ti vé," he tĩ, ũ tỹ ěg mré vĕnh mãn tĩ tũ ag mỹ, ag tỹ ga kri ājag tũ ven jé. ⁵ Mỹ ājag mỹ'a tũ? Ājag kãmĩ ũ mỹ kri há tũ nĩ', ti tỹ ājag jyvĕn jé ājag tũ to, ājag tỹ jagnĕ tũ to jykrĕn mũ to? ⁶ Vĕnhmỹ ti nĩ, irmão tỹ irmão ũ tón kỹ, ũ tỹ Jesus ki rã kỹ nĩ tũ mỹ, ti tỹ ājag tũ ven jé. ⁷ Ājag tỹ jagnĕ tũ to jykrĕn kónãn kỹ tóg vĕnhmỹ pĕ nĩ, ājag tỹ to jagnĕ to jũ kỹ mỹr. Ājag tỹ ne jé ājag tũ tovãnh sór tũ nĩ nĕ? Ājag tỹ ne jé ũ tỹ ājag tũ mãn sór kỹ ti mỹ nenh ke nĕ? Ti há tóg vĕnh jykre pãno han mũ, ājag tũ mãn sór kỹ. Ge ra ti mỹ nĩm nĩ. Kỹ ā tóg Topĕ vĩ mranh tũ nĩ, inhhã, ti tugrĩn. ⁸ Hã ra ājag tóg ti mỹ nenh sór mũ. Kỹ ājag tóg jagnĕ tũ to vĕnh jykre kórég han tĩ gé mỹr, jagnĕ tũ mãn sór ājag tóg mũ gé mỹr, ājag mré ke tũ ěn mỹr. ⁹ Ũn jykre pãno ag pi(jé) Topĕ tỹ tỹ ěg pã'i nĩ venh ke mũ'. Ājag mỹ tag mĕ ja tũ?

Ha mĕ, ker kygnĕ hĕ'. Ũ tỹ ũn mén tũ fag mré nỹ mũ ag pi(jé) venh ke mũ', Topĕ tỹ ěg pã'i nĩ ti. Ũ tỹ virmỹ topĕ han mũ ag pi(jé) venh ke mũ'. Ũ tỹ ā prũ ra ũ fi mré nỹ mũ ěn pi(jé) venh ke mũ', ũ fi tỹ ā mén ra ũ mré nỹ kỹ fi pi(jé) venh ke mũ'. Ũn gré tỹ ũn gré ũ tỹ prũg mũ ěn pi(jé) venh ke mũ'. Ũn gré tỹ ti tỹ prũg sór mũ mỹ nenh tũ ěn pi(jé) venh ke mũ gé'. ¹⁰ Ũn tũ péju(g) tĩ ěn pi(jé) venh ke mũ', ũ tỹ nĕn kar to én (ka)mĕ pi(jé) venh ke mũ', ũn kron (ka)mĕ pi(jé) venh ke mũ', ũ tỹ ěg to vĩ kónãn tĩ pi(jé) venh ke mũ', ũ tỹ ěg vatãnh tá ěg tũ mǎg tĩ pi(jé) venh ke mũ'. Topĕ tỹ tỹ ěg pã'i nĩ venh ke tũ ag tóg nĩ, vĕnh jykre tỹ ge han tĩ ag. ¹¹ Ājag kãmĩ ũ tóg vĕnh jykre tỹ ge han ja nĩgtĩ, vãsỹ, hã ra ājag tóg vĕnh kugpe kỹ nỹtĩ, ũri. Kykũnh kỹ ājag tóg nỹtĩ, ěn tỹ, kỹ Topĕ tóg ājag mỹ vĕnh pãte fón ja nĩ sir, ěg Senhor tỹ Jesus Cristo tugrĩn, Topĕ kuprĩg tugnĩn.

Ęg tỹ nĕn ũ vĕnhmỹ han ke tũ

¹² Kỹ ājag hỹn inh mỹ: "isỹ nĕn han sór mũ ěn han jé sóg ke mũ. Topĕ vỹ ge ra inh jagãgtãn ke mũ," he sór mũ. Vó. Nĕn ũ tóg ěg mỹ nĕn ũ há han ke tũ nĩ, kỹ tóg ěg tỹ ěn han mũ ra há tũ nĩ. Ęg tỹ nĕn ũ han sór mũ ěn tóg han há nỹtĩnh mũ vĕ, hã ra isỹ nĕn ũ kórég tỹ tãn nĩn kỹ tóg inh mỹ há tũ nĩ sir. ¹³ "Vĕjĕn vỹ tỹ ěg nug tũ nĩ, kỹ ěg nug vỹ tỹ vĕjĕn né nĩ," he ājag tóg tĩ. Hỹ, hã ra Topĕ vỹ tỹ tũ' henh ke mũ, vĕjĕn tỹ, ěg nug tỹ ke gé. Ęg han ja tóg nĩgtĩ, Topĕ ti. Hã ra ti pi(jé) ěg tỹ tỹ ũn mén tũ mré nỹ jafã han'. Ęg Senhor tũ vĕ, ěg, kỹ ěg Senhor vỹ tỹ ěg tãn nĩ sir. ¹⁴ Ęg Senhor rĩn mãn tóg, Topĕ ti, kỹ tóg ěg rĩn mãn ke mũ gé, ti jykre tar tỹ.

¹⁵ Kỹ ěg hã vỹ tỹ Cristo tũ nỹtĩ, ti mré ěg tóg tỹ ũn pir ri ke nỹtĩ. Ājag mỹ tag mĕ ja tũ? Kỹ ěg tỹ Cristo tũ tỹ ũn mén tũ fi mré tỹ ũn pir ri ke han kỹ tóg vĕnhmỹ pĕ nĩgtĩ, fi mré nỹn kỹ. Ke tũg nĩ. ¹⁶ Ha mĕ, ũ tỹ ũn mén (ka)mĕ fi mré nỹ kỹ tóg fi mré tỹ ũn pir ri ke nĩ. Hã kỹ tóg vãsỹ tó ja nĩ. "Ũn pir ri ke fag nỹtĩ, jagnĕ mré nỹtĩ fag," he ja tóg nĩ. Ājag mỹ tag mĕ ja tũ? ¹⁷ Fag jãvo ěg tỹ tỹ ěg Senhor mré ke nỹtĩn kỹ ěg tóg ti mré vĕnh kuprĩg pir ri ke nỹtĩ gé sir.

¹⁸ Ęg tỹ ũn mén tũ mré nỹ kỹ, Ęg tỹ ũn prũg tũ mré nỹ kỹ Ęg tóg vĕnh kavĕnh tĩ sir, Ęg tỹ Topĕ vĩ mranh tag tỹ. Ęg tỹ nĕn ũ ũ ki Topĕ vĩ mranh kỹ Ęg tóg vĕnh kavĕnh tỹ ge han tũ nĩgtĩ. Hã kỹ ũn mén tũ mré nỹ tovãnh kãn nĩ, ũn prũ tũ mré nỹ tovãnh kãn nĩ gé.
¹⁹ Ęg hã vỹ Topĕ kuprĩg jo ĩn ri ke nỹtĩ. Ęg kãkã tóg jĕ nĩ, Topĕ kuprĩg ti, ti tỹ tỹ Ęg jagrĕ nĩn kỹ. Topĕ tỹ Ęg mỹ nĕn han hã vĕ. Ājag mỹ tag mĕ ja tũ? Hã kỹ Ęg pi(jé) tỹ vĕnh pã'i jĕ'. Topĕ krĕm ke vỹ tỹ Ęg nỹtĩ. ²⁰ Ęg kajãm tóg mỹr, kaja e to. Hã kỹ vĕnh kar mỹ Topĕ tỹ tỹ ũn há nĩ ven nĩ, ājag tỹ ti jykre kuryj han mũn kỹ.

7

Ęg tỹ prũg há han to vĕnh jykre

¹ Ājag tỹ inh mỹ vĕnh rán jĕnĕn kỹ ājag tóg inh mỹ ājag prũg ke ti tó ja nĩ. Ājag prũg tũ nĩn kỹ tóg há tĩ vĕ. ² Hã ra tóg ājag mỹ vĕnhmỹ tĩnh mũ, kỹ tóg inh mỹ ājag tỹ ũn mén tũ fag to ěn ha mĕ tĩ. Hã kỹ tóg há nĩ, ũ tỹ ũn pir fi tỹ prũg kỹ, fi tỹ tỹ ti prũ pĕ nĩ jĕ. ũ fi tỹ ũn pir tỹ mén kỹ tóg há tĩ gé, ti tỹ fi mén pĕ nĩ jĕ gé. ³ Kỹ fi mén jĕ fi mỹ fi tũ han, fi mré nỹ kỹ, jãvo ti prũ fi jĕ ti tũ han, ti mré nỹ kỹ. ⁴ Fi pi(jé) tỹ vĕsũ nĩ', fi mén jĕn kỹ'. Fi mén tũ vĕ sir. Kỹ ti hã vỹ ri ke nĩ gé. Ti pi(jé) tỹ vĕsũ nĩ gé', ti prũ jĕn kỹ'. Fi tũ vĕ, fi mén ti. ⁵ Hã kỹ jagnĕ mỹ vĕnh nenh tũg nĩ. Hĕn ri ke mũn ājag kejĕn jagnĕ mré to jykrĕn sór mũ, ājag tỹ kuty pipir ki jagnĕ mré nỹ tũ nĩ jĕ, ājag tỹ Topĕ mré vĕmén jĕ vãsãnsãn jĕ. Kỹ tag pãte jagnĕ mré nỹ mãn nĩ sir, Satanás tỹ ājag krĩn kónãn tũ nĩ jĕ. Ājag tỹ ũ mré nỹ sór kỹ tóg inh mỹ to ājag tỹ Topĕ vĩ mranh ha mĕ tĩ, Satanás tỹ ājag krĩn kỹ. Hã kỹ tóg ājag tỹ kãnhmar jagnĕ mré nỹ mãn kỹn há tĩ.

⁶ Tag kar tó sóg ājag mỹ, ājag krój nỹtĩn kỹ. Inh pi(jé) vĕnh kar mỹ: “ha prũg, ha mén,” he sór mũ'. ⁷ Vĕnh kar tỹ inh ri ke nỹtĩ ra tóg inh mỹ há tĩ vĕ, isỹ prũ tũ nĩ tag ri ke. Hã ra Topĕ tóg vĕnh kar tỹ vurmỹ nĕn ũ to tar han tĩ, Ęg tỹ ki króm jĕ. Hã kỹ ũ tóg ā prũ tũ to tar nĩ, jó ũ tóg ā prũ fi to tar nĩ. Topĕ tỹ nĕn han jan hã vĕ.

⁸ Hã ra sóg ũn prũ tũ mỹ tag tó sór mũ, ha mĕ. Ājag tỹ inh prũ tũ ri ke nỹtĩ ra tóg há tĩ vĕ, kỹ ũn mén ter ja fag tỹ mén mãn tũ ra tóg há tĩ vĕ gé. ⁹ Ājag tỹ hã ra prũg sór kỹ, ājag tỹ mén sór kỹ tóg há tĩ gé, kỹ ājag tóg vĕnh prũg han mũ sir. Ājag tỹ prũ tũ nĩ ra fag to ěn kỹn pi(jé) há nĩ', ājag tỹ ag to ěn kỹ ke gé'. Hã kỹ prũg nĩ, mén nĩ ājag tỹ ũ to ěn tũ nĩ jĕ.

¹⁰ Ājag kãmĩ ũ tóg prũ nỹtĩ, ũ fag tóg mén nỹtĩ gé. Ęg Senhor vỹ ājag hã mỹ tag tó mũ, sỹ tónh ke tag, ha mĕ. Isỹ tó pijé', ti tỹ tó hã nĕ', ha mĕ. Ā mén fón tũg nĩ. ¹¹ Ā tỹ ge ra to fón kỹ mén mãn tũg nĩ. Ā tỹ mén mãn sór kỹ ā mén fón jan hã mré to jykrĕn, ājag tỹ jagnĕ mré nỹtĩ mãn jĕ sir. Kỹ ā prũ jĕn kỹ fi fón tũg nĩ gé. Ęg Senhor tỹ tón hã vĕ.

¹² Jãvo inh hã tóg tag tó mũ ājag mỹ, ha mĕ. Ęg Senhor tỹ tó pijé', ha mĕ. Ājag kãmĩ ũ prũ fi tóg Jesus ki rã sór tũ nĩ, fi mén tỹ tỹ Jesus mré ke nĩ ra. Fi tỹ ti mré nĩ sór nĩn kỹ tóg fi mré nĩ ha sir. Fi tovãnh sór tũg nĩ. ¹³ KỸ ā mén tỹ Jesus ki rã sór tũ ra ā mré nĩ sór kỹ ti mré nĩmĩ gé. ¹⁴ Topĕ tũ vỹ tỹ ā nĩ, ā mén tỹ ti ki rã sór tũ ra. Hã ra tóg ā mré nĩn kỹ tỹ ti tũ ri ke nĩ gé sir. Kỹ ā prũ fi tỹ Jesus ki rã sór tũ ra fi tóg tỹ Topĕ tũ ri ke nĩ gé sir, fi tỹ ā mré nĩn kỹ. Ke tũ nĩ mũ ra ājag krĕ vỹ ti ki rã tũ krĕ ri ke nỹtĩnh mũ vĕ, Topĕ mũ. Hã ra ag pi(jé) ri ke nỹtĩ'. Tỹ Topĕ tũ ri ke ag nỹtĩ gé sir, ājag krĕ ti. ¹⁵ Hĕn ri ke mũn ā mén, ā prũ fi ā fón sór mũ, fi tỹ Jesus ki rã sór tũ nĩn kỹ. Kỹ fi mỹ, ti mỹ: “ha tĩ ge,” hemnĩ. Topĕ vỹ Ęg krĩ kuprãg sór mũ, hã jĕ tóg Ęg kuprĕg. Hã kỹ ā pi(jé) tỹ ā mén krĕm ke nĩ', ti tỹ ā tovãnh sór kỹ, ā pi(jé) tỹ ā prũ fi krĕm ke nĩ gé', fi tỹ ā tovãnh sór kỹ, ā tỹ jesus ki rã tigrĩn. ¹⁶ Hĕn ri ke mũn ti kejĕn kren ke mũ, ā jamĕn kỹ, ā mén ti, hã ra ā pi(jé) ki kanhró nĩ', ti kren ke ti'. Hĕn ri ke mũn fi kejĕn kren ke mũ, ā jamĕn kỹ, ā prũ fi, hã ra ā pi(jé) ki kanhró nĩ', fi kren ke ti'. Hã kỹ fi tĩg kamĕg tũg nĩ, fi tĩg sór kỹ, ti tĩg sór kỹ ke gé.

Ęg tỹ Topĕ jykre hã mĩ mũnh

¹⁷ Topĕ tỹ ā jykre tỹ ā kuprĕg ja ěn hã mĩ tĩg nĩ, Ęg Senhor tỹ ā mỹ Vĕnh jykre nĩm ja ěn hã mĩ. Hã tó sóg tĩ, Ęg mré vĕnh mãn tĩ kar ag mỹ. ¹⁸ Topĕ vỹ ā kuprĕg. Ā tỹ tỹ Israel

mré ke nĩn k̄y ã gré junun fár v̄y kym k̄y nĩgtĩ. K̄y tóg hã tĩ. T̄y tũ' he sór tũg nĩ. ã t̄y t̄y Israel mré ke tũ nĩn k̄y ã fár v̄y kym k̄y nĩ tũ nĩ. K̄y tóg há tĩ gé. Kym sór tũg nĩ gé. ¹⁹ Nén ũ tũ v̄e, ti fár kym ke ti, ti fár kym ke tũ ti ke gé. Nén pir v̄y há nĩ, hã v̄y: ěg t̄y Topẽ v̄i ki króm, he mũ, ěg t̄y ti t̄y ěg jyv̄en mũ han, he mũ.

²⁰ Topẽ t̄y hã t̄y ã kupr̄eg k̄y v̄enh jykre ěn hã mĩ tĩmnĩ. ²¹ Ājag kãmĩ ũ v̄y patrão n̄ytĩ. Ājag kajãm tóg, ājag patrão ti, ěg t̄y ěg m̄eg kajãm ěn ri ke, hã k̄y ājag tóg t̄y ti tũ n̄ytĩ, fagr̄inh m̄y ājag tóg ti rãnhraj han ti. To kr̄i kufy n̄ytĩ tũg nĩ. Ājag t̄y hã ra ājag patrão tovãnh to v̄enh jykre há ve k̄y tovãnh nĩ, ti t̄y ājag tovãnh sór k̄y. ²² Ha vé, ěg Senhor v̄y ājag kupr̄eg, ājag patrão n̄ytĩ ra. Ājag t̄y t̄y Cristo tũ n̄ytĩn k̄y ājag tóg t̄y ũn patrão tũ ěn ri ke n̄ytĩ sir, ājag t̄y ěprã patrão kr̄em n̄ytĩ ra. K̄y ājag patrão v̄y ge nĩ gé. ěg Senhor t̄y ti kupr̄eg k̄y tóg t̄y ti patrão j̄e sir. Hã k̄y ũn patrão tũ ag v̄y Cristo ki ge k̄y t̄y Cristo kr̄em ke n̄ytĩ. j̄avo ũn patrão ag v̄y Cristo tugr̄in t̄y ũn patrão tũ ěn ri ke n̄ytĩ gé. ²³ H̄y, ěg kyḡjãm ti m̄yr, kaja e t̄y, Cristo ti. Hã k̄y ěprã ke ag kr̄em n̄ytĩ sór tũg nĩ, tũ nĩ mũ ra ag tóg ājag t̄y Cristo mré mũ kam̄eg mũ.

²⁴ Inh kanhkã', Topẽ t̄y hã t̄y ājag kupr̄eg k̄y v̄enh jykre ěn hã mĩ mũmnĩ.

Ũn mén ja tũ fag tó v̄enh jykre

²⁵ Ũn mén ja tũ fag tó ja ājag tóg nĩgtĩ inh m̄y, ājag t̄y rán ki. Hã ra ěg Senhor pi(jé) fag to nén ũ tó ja nĩgtĩ'. K̄y sóg to jykren k̄y ājag m̄y tag tó sór mũ, ha m̄e. ěg Senhor tóg inh jagãgtãn, k̄y tóg isar han, s̄y to jykren há han j̄e. ²⁶ K̄y sóg ěg t̄y ti jagy v̄eg t̄i tag to jykren mũ. To jykren k̄y tóg inh m̄y há tĩ, ājag t̄y ũri nén han mũ tag tovãnh sór tũ nĩ j̄e. ²⁷ ã m̄y pr̄ũ j̄e? K̄y fi fón sór tũg nĩ. ã m̄y pr̄ũ tũ j̄e? K̄y pr̄ug sór tũg nĩ gé. ²⁸ ã t̄y ge ra pr̄ug sór k̄y tóg há tĩ gé hã ra, Topẽ v̄i mranh ke tũ ã tóg nĩ, pr̄ug k̄y. K̄y ũn mén ja tũ fi mén k̄y tóg há tĩ gé sir. Topẽ v̄i mranh pijé'. Hã ra tóg jagy t̄inh mũ. Kr̄i kufy ve j̄e ājag tóg ke mũ, tag ki, ěprã, ājag pr̄ug k̄y, ājag mén k̄y ke gé. Hã ra tóg inh m̄y há tĩ v̄e, ājag kr̄i kufy tũ nĩ ti.

²⁹ Inh kanhkã', inh v̄i tag j̄em̄e ra, ha m̄e. Kurã t̄y ěgno v̄y kãnhmar jun ke mũ. Hã k̄y ũn mén fi j̄e ũn mén ja tũ fi ri ke nĩ, ũn pr̄ug ja tũ ri ke nĩ gé. Tag ki v̄enh jykre v̄e, fag t̄y jagn̄e mré n̄ytĩg ti. Kãnhmar tóg tũ' henh ke mũ. ³⁰ Hã k̄y ũ t̄y tag ki f̄y mũ j̄e ũn f̄y tũ ri ke nĩ. ũ t̄y tag ki m̄y sér nĩ j̄e ũn m̄y sér vãnh ri ke nĩ. ũ t̄y nén ũ comprar he mũ j̄e ũ t̄y nén ũ comprar he tũ ri ke nĩ. ³¹ ũ t̄y ga kri t̄y nén ũ mág nĩ ěn j̄e ũ t̄y nén ũ tũ ěn ri ke nĩ. Tũg kãn j̄e tóg ke mũ, ěg t̄y tag ki nén v̄eg mũ ti.

³² Nén ũ pir tóg inh m̄y há tĩ v̄e, hã v̄y: ājag kr̄i kuprã k̄y n̄ytĩmnĩ, he mũ, ājag t̄y nén ũ to kr̄i kufy tũ n̄ytĩ j̄e.

Ũn pr̄ug tũ ěn v̄y ěg Senhor tũ ki r̄ir tĩgtĩ, k̄y tóg: “ěg Senhor m̄yn m̄y há nĩ v̄y, s̄y nén han mũ ti?” he t̄i. ³³ J̄avo ũn pr̄ug mũ v̄y ěg t̄y tag ki nén v̄eg t̄i ki r̄ir nĩgtĩ, k̄y tóg: “inh pr̄ũ fi m̄yn m̄y há nĩ v̄y, s̄y nén han mũ ti?” he t̄i gé. ³⁴ K̄y tóg ěg Senhor tũ ki r̄ir tãv̄i han tũ nĩ sir, ũn pr̄ũ ěn ti. K̄y fi v̄y ge nĩgtĩ gé, ũn mén ter ja fi, ũn mén ja tũ fi ke gé. ěg Senhor tũ ki r̄ir fag tóg nĩgtĩ, fag t̄y t̄y ti tũ tãv̄i n̄ytĩ j̄e, fag t̄y ti tũ ki króm há han j̄e, fag t̄y nén ũ han k̄y, fag t̄y nén ũ to jykren k̄y ke gé. ũn mén mũ fi tóg hã ra ěg t̄y tag ki nén v̄eg t̄i ki r̄ir nĩgtĩ, k̄y fi tóg: “inh mén m̄yn m̄y há nĩ v̄y, s̄y nén han mũ ti?” he t̄i gé.

³⁵ S̄y ājag tũ to jykren há han k̄y, hã k̄y sóg ājag m̄y tag tó mũ. Inh pi(jé) ājag m̄y v̄i tar han sór mũ', ājag t̄y ti t̄y ājag m̄y há tũ nĩ ěn han j̄e'. Ājag t̄y mũ há han k̄y tóg inh m̄y há tĩ, ājag t̄y ěg Senhor tũ ki r̄ir há han k̄y, nén ũ t̄y ājag kutãn tũ nĩ j̄e.

³⁶ H̄en ri ke mũn ti ājag kãmĩ ũ m̄y há tũ nĩ, ti kósin fi mén tũ n̄in k̄y. H̄en ri ke mũn tóg fi m̄y v̄enhm̄y n̄y ve nĩ, fi panh m̄y ke gé. H̄en ri ke mũn fi sanh há nĩ ha, h̄en ri ke mũn fi jagtar ke mũ, fi mén ke tũ to. K̄y tóg jatun m̄y fi t̄y ã t̄y nén han sór mũ ěn han mũ sir, fi panh ti. Há ti nĩ, fi mén ke ti. Topẽ v̄i mranh pijé'. ³⁷ H̄en ri ke mũn ũ tóg to jykren há han mũ hã ra, k̄y tóg fi mén sór tũ nĩ sir. K̄y tóg tá kr̄y nĩ, ã kósin fi ki r̄ir ke ti. K̄y tóg to jykren mãn mũ ra tóg ti m̄y há tĩ, fi mén ke tũ ti. Tovãnh sór tũ ti nĩ. K̄y tóg fi mén tũ nĩ sir. Tag v̄y há tãv̄i nĩ. ³⁸ Hã k̄y tóg ge nĩ, ha m̄e. Ti t̄y fi mén k̄y tóg há nĩ, ã kósin mén ja tũ fi. Ti t̄y fi mén tũ n̄in k̄y tóg há kãfór nĩ.

³⁹ Ûn týtá fag vỹ tỹ ãjag mén tũ nýtĩ, ag rĩnrĩr nýtĩn kỹ. Û fi mén ter kar kỹ fi hã ra ù tỹ mén sór mũ kỹ fi tóg mén mũ sir, jatun mỹ. Fi mén mãn vễ sir, Há ti nĩ. Hã ran jé tỹ ãg Senhor mré ke nĩ, fi mén mãn ke ti. ⁴⁰ Fi tỹ mén mãn sór tũ nĩn kỹ tóg há kãfór nĩ sir, fi mỹ sér kãfór. Isỹ fag to jykrén hã vễ. Hã ra sóg Topẽ kuprĩg tỹ jagrẽ nĩ, hã kỹ sóg ãjag mré to jykrén há han mũ gé.

8

Vẽnh kãggrá tỹ topẽ to vễnh jykre

¹ Kỹ sóg ãjag mỹ vễjẽn tó sór mũ gé. ãjag mễg tãnh kỹ ag tóg vễnh kãggrá tỹ topẽ mỹ pũn vén tĩ, pũn kar kỹ ag tóg açougue ki ãjag mỹ vễne he tĩ. Kỹ ãjag kãmĩ ù tóg: “inh mỹ açougue ki mãn kỹ konh mỹ vỹ?” he tĩ, hã kỹ sóg ãjag mỹ kãmén sór mũ.

Hã ra ãjag kãmĩ ù tóg: “ki kanhró ãg nýtĩ, to tar ãg nýtĩ,” he tĩ. “Jatun mỹ ãg tóg konh ke mũ,” he ag tóg tĩ. ãg tỹ nén ù to: “ki kanhró mág inh nĩ,” hen kỹ tóg inh mỹ ãg tỹ kãnhmar ù to: “ti pi(jé) inh ri ke nĩ, ti kãfór inh nĩ,” henh ha mẽ tĩ. ãg tỹ jagnẽ to há nýtĩn ke vễ. ãg tỹ jagnẽ to há nýtĩn kỹ ãg tóg jagnẽ mỹ nén ù há tó tĩ, ãg kar tỹ ki kanhrãn há han jé sir. ² ãg tỹ nén ù to: “ki kanhró sóg nĩ, ã jãvo,” hen kỹ ãg pi(jé) ki kanhrãn há han mũ ver'. ³ ãg tỹ Topẽ to há nýtĩn kỹ, kỹ tóg ãg tỹ ti ki kanhrãn há han mũ sir Topẽ ti.

⁴ Kỹ sóg ãjag mỹ vễjẽn ẽn kãmén sór mũ, ag tỹ ón kỹ vễnh kãggrá tỹ topẽ mỹ pũn tĩ ẽn ti. Nén ù tũ vễ ón kỹ vễnh kãggrá tỹ topẽ ti. Pir ti nĩ, Topẽ ti. Topẽ ù vỹ tũ nĩ. ⁵ Nén ù e to ag tóg ón kỹ: “Topẽ vễ,” he tĩ, kanhkã tãn ù ag to, ga tãn ù ag to ke gé, Û tỹ ge vỹ e nýtĩ, topẽ tỹ ge ti, Senhor tỹ ge ti. ⁶ Hã ta tóg ãg mỹ pir nĩ, Topẽ ti, ãg jóg mág ti, ag jãvo. Nén kar han ja ti nĩgtĩ mỹr vễnhmỹ, kỹ ãg tóg ti hã ve sór mũ gé sir. Pir ti nĩ gé, ãg Senhor ti, hã vỹ: Jesus Cristo, he mũ. Nén ù kar vỹ nýtĩ ti tugrĩn, kỹ ãg ti tugnĩn krenkren ke mũ gé.

⁷ Hã ra ãg kãmĩ ù ag tóg tag ki kagtĩg nýtĩ ver. Tãg ti nĩ ver, ãjag tỹ ón kỹ vễnh kãggrá tỹ topẽ tovãnh mũ ti, kỹ tóg ver ag mỹ e tĩ. Hã kỹ ón kỹ vễnh kãggrá tỹ topẽ mỹ vễjẽn pũn ja ẽn tóg tỹ vễnh kãggrá tỹ topẽ ẽn tũ nĩ nẽji ag mỹ. Kỹ tóg ag tũ vễjẽn ẽn ko kỹ tóg ag tỹ vễnh kãggrá tỹ topẽ ẽn tũ ko ri ke nĩ sir ag mỹ. Kỹ tóg ag mỹ há tũ tĩ sir, ag tỹ tag to krój nýtĩn kỹ ver. Kỹ tóg ag mỹ ag tỹ vễjẽn to vễnh kavénh ha mẽ tĩ.

⁸ ãg pi(jé) vễjẽn tugrĩn Topẽ to há nýtĩ, ti to kórég nýtĩ. ãg tỹ ko tũ (hã) ra nén ù tũ vễ gé, vễnh kãggrá tỹ Topẽ mỹ pũn ja ẽn ti. Vễjẽn vễ mỹr. ⁹ Nén ù kar vỹ tỹ ãg tũ nĩ.

Hã ra ùn krój tóg hẽn ri ke mũn Topẽ vĩ mranh ke mũ, ãg tugrĩn, ti tỹ ãg tỹ ti mỹ nén ù vễnhmỹ to tar nýtĩ nĩ ve nĩn kỹ. Kỹ tag han sór tũg nĩ. ¹⁰ Ve ra ha. Tar ã tóg nĩ, ki kanhró ã tóg nĩ, vễnh kãggrá tỹ topẽ vỹ tỹ nén ù tũ nĩ ã mỹ. Hã kỹ ã tóg ti jo ĩn krẽm rã kỹ ko mũ sir, ti festa ti, ã mré ke ù tỹ ti mỹ festa han kỹ. Nén ù tũ vễ vễ. ã tỹ ti festa ko mũ ti. Hã ra ãg mré Jesus ki rã kỹ jẽ ù tóg tag to krój nĩ ver, kỹ tóg tá ã vэг mũ sir, ã tỹ ti festa ko mũ ẽn kã. Kỹ tóg ã ve kỹ to jykrén mũ sir, ti festa ko sór jé, vễnh kãggrá tỹ topẽ mỹ festa ẽn, ti mỹ pũn ja ẽn ti. Hã ra vễnh kãggrá tỹ topẽ tóg ti mỹ tar nĩ, ùn krój mỹ, ti tỹ Jesus ki rã kỹ nĩ (hã) ra. ¹¹ Kỹ tóg ã tỹ ko mũ tugrĩn vãfor ke mũ sir, ùn krój nĩ ti. Ti jãvo ã tóg ki kanhró nĩ, hã ra tóg ã tugnĩn tũ' henh ke mũ, ùn krój nĩ ti. Hã ra Cristo tóg ti jagfỹ ter ja nĩgtĩ. ¹² ã tỹ ti vĩ mranh hã vễ sir, ã régre krój ẽn to. Ti vóg kónãn ã tóg mũ sir, ti krój nĩn kỹ. Hã ki ã tóg Cristo vĩ mranh mũ sir, mỹr, ha mẽ. ¹³ Hã kỹ sóg tag han sór tũ nĩ. Inh ĩrmão tỹ isỹ nén ù nĩ ko to Topẽ vĩ mranh kỹ sóg nén ù nĩ ko sór mãn ke tũ nĩ ha, ón kỹ vễnh kãggrá tỹ topẽ mỹ pũn ja ẽn ti, ti tỹ mranh tũ nĩ jé sir, isugrĩn.

9

Paulo tỹ jãnkamy ve sór tũ

¹ Isỹ nén han mũ ve ra. Ẽprã ke ag tỹ inh mỹ nén tó mũ ẽn han sór tũ inh nĩgtĩ. Jesus hã vỹ inh fẽg, isỹ tỹ apóstolo jẽ jé. Ti ve inh mỹr, ãg Senhor tỹ Jesus ti. Kỹ ãjag vỹ isugnĩn ãg Senhor ki ge jẽg. Inh rãnhraj kaja vỹ tỹ ãjag nýtĩ. ² Hẽn ri ke mũn sóg ù mỹ tỹ apóstolo

tũ nĩ. Ājag hã m̃y sóg t̃y apóstolo jẽ m̃yr, ājag t̃y inh vĩ mẽ tigrĩn ti ki ge k̃y. Hã ki tóg ve há tĩ, ěg Senhor t̃y inh fẽg ja ti. ³ K̃y ù t̃y kejẽn inh kato vĩ sór mũ m̃y sóg tag tó tĩ, ha mẽ. ⁴⁻⁵ Jesus t̃y ùn vin mũ ù ag ri ke inh nĩ, apóstolo ù ag ri ke, ù t̃y Jesus mré pygfa mũ ag ri ke, Pedro ri ke ke gé, is̃y ṽejẽn to, inh prũ tũ to ag jykre han tũ ra. Ājag prũ fag pére ag mũ tĩ, ag t̃y h̃en ra mũn k̃y. Is̃y ag ri ke ù t̃y Jesus ki rã k̃y jẽ ù fi t̃y prüg sór mũ ra sóg fi pére t̃ig ke mũ ṽe gé, hã ra sóg ke sór tũ nĩ. K̃y ag tóg ājag j̃en ko tĩ, ag t̃y ājag m̃y Topẽ vĩ tó to. Is̃y ag ri kén ājag j̃en ko sór mũ ra sóg konh ke mũ ṽe gé, hã ra sóg ko sór tũ nĩ. ⁶ Inh nĩgé rãnr̃aj ja kaja hã ko sór inh tĩ, Barnabé ti ke gé. Ěg t̃y Topẽ vĩ tó tĩ ù ag ri kén ěg nĩgé rãnr̃aj tovãnh sór mũ ra ěg tóg tovãnh ke mũ ṽe, hã ra ěg tóg rãnr̃aj sór mũ. ⁷ Ěg t̃y Topẽ t̃y ěg m̃y ṽenh rãnr̃aj nĩm kaja venh ken k̃y tóg há tĩ ṽe. Soldado jykre ri ke ti nĩ. Ag pi(jé) ājag tũ ko tí', ag t̃y ṽenh génh han k̃y, soldado ag. Ājag ṽenh génh hã to ag tóg ṽejẽn ṽég tĩ. K̃y ù t̃y uva ki r̃ir tĩ ṽy ti kanẽ ko tĩ gé. K̃y ù t̃y ovelha ki r̃ir tĩ ṽy fi leite kron tĩ gé. Hã k̃y tóg ěg t̃y Topẽ vĩ tó to ganho ve sór mũ ra tóg há tĩ ṽe, hã ra ěg tóg ve sór tũ nĩ.

⁸ Ěprã ke jykre ki ěg tóg ěg rãnr̃aj p̃e to ěg j̃en ṽég tĩ. K̃y Topẽ ṽy tag tó ja nĩgtĩ. ⁹ Moisés ṽy tag rán ja nĩ, ha mẽ. “Monh t̃y ěkré jãnkre ki rãnr̃aj k̃y ti j̃enky tógfĩn tũg nĩ, ti j̃en kam̃eg tũg nĩ,” he ja ti nĩ, Topẽ vĩ rá ki. Topẽ m̃y monh hã to jykren k̃y tag tó ja nĩ? Vó. ¹⁰ Ěg to jykren hã k̃y tóg tag tó ja nĩ. Ěg hã to tóg rán k̃y nĩ, ěg t̃y ěg rãnr̃aj to ěg j̃en ve jé. Hã k̃y ù t̃y ěp̃y ki rãnr̃aj mũ tóg to ñen ù ve sór mũ, hã jé tóg rãnr̃aj jẽ nĩ. Ù t̃y jãnkreg mũ ṽy to ñen ù ve sór mũ gé, ã rãnr̃aj to. ¹¹ Is̃y ājag m̃y kanhkã jykre tó k̃y tóg s̃y ñen ù krãn ri ke nĩ, k̃y s̃y ājag ki ñen ù ve sór mũ ra tóg há tĩ ṽe, ij̃en jé, hã ra sóg ve sór tũ nĩ. ¹² Ù ag tóg ājag j̃en ṽég tĩ, Topẽ vĩ to. K̃y tóg s̃y ag ri kén ājag ki jãnkamy ve sór mũ ra há tĩ ṽe, s̃y ājag m̃y Topẽ vĩ tó ṽen k̃y. Hã ra sóg ājag j̃en ve sór tũ nĩ. Inh jagtar ra tóg inh m̃y t̃y ñen ù tũ nĩ, ù t̃y isugr̃in Cristo kãme sér kato vĩ tũ nĩ jé, s̃y ti kaja ve tugñin Jesus to kórég tũ nĩ jé. Hã k̃y sóg ve sór tũ nĩ.

¹³ Ù t̃y Topẽ ãn kr̃em ti tũ ki r̃ir tĩ ag ṽy tá ājag j̃en ṽég tĩ gé, ag t̃y Topẽ m̃y ñen vin tĩ ěn t̃y. K̃y ù t̃y Topẽ m̃y ñen ù p̃un tĩ ěn ṽy ti ke ko tĩ gé. Ājag m̃y tag mẽ ja tũ? ¹⁴ Hã k̃y ěg Senhor ṽy tag tó ja nĩgtĩ gé, hã ṽy: “ù t̃y ti kãm̃en mũ ěn ṽy tag to ājag j̃en venh ke mũ,” he mũ. ¹⁵ Hã ra sóg ājag j̃en ve sór ja tũ nĩ. K̃y sóg ve sór tũ nĩ gé, ùri, hã k̃y sóg ājag m̃y rán mũ. Is̃y ij̃en to inh nĩgé t̃y rãnr̃aj mũ hã to sóg t̃y ùn mág ñinh mũ, kanhkã tá. K̃y sóg t̃y tũ' he sór tũ nĩgtĩ. Iser jé tóg inh m̃y há tĩ, ù t̃y inh m̃y Topẽ vĩ kajãm sór mũ (hã) ra.

¹⁶ Jesus kãm̃en sóg tĩ. Inh rãnr̃aj hã ṽe. Ti hã tóg inh m̃y tó, s̃y ti kãm̃en jé. K̃y sóg ti tó tigr̃in t̃y ùn mág ñinh ke tũ nĩ. Is̃y ti kãm̃en sór tũ ra Topẽ tóg inh vóg kónãn ke mũ ṽe, is̃y inh rãnr̃aj han tũ ñin k̃y. ¹⁷ Topẽ t̃y inh m̃y: “ha kãm̃en,” he tũ nĩ ra sóg kanhkã tá to ganho venh ke ṽe ṽe, s̃y ti kãm̃en tĩ ti to. Hã ra tóg inh m̃y: “ha kãm̃en,” he ja nĩ, k̃y tóg s̃y ti rãnr̃aj ki r̃ir há han mũ ve sór mũ sir inh ki, Topẽ ti. ¹⁸ K̃y sóg kanhkã tá to ganho venh ke tũ nĩ, inh rãnr̃aj ja to. Hã ra sóg ganho ve sór mũ tá. Hã k̃y sóg ěprã ke ag ki s̃y ñen ve sór mũ ěn ve sór tũ nĩ, ij̃en jé. Ājag t̃y inh m̃y ñen vin ke ti ve sór tũ inh nĩ. Véké sóg ājag m̃y tó tĩ, Topẽ vĩ ti, ṽenh kar m̃y ke gé. Ājag t̃y inh m̃y kajãm tũ ra tóg inh m̃y há tĩ. K̃y sóg tag hã to kanhkã tá inh ganho ti venh ke mũ.

Ûn e t̃y Jesus ki ge k̃y tóg Paulo m̃y há tĩ

¹⁹ Ù pi(jé) inh kri ke nĩ'. Ge ra sóg ṽes̃y ṽenh kar kr̃em ke han, ṽenh kar t̃y inh patrão ri ke ñytĩ jé. “H̃en ri ke mũn ù tóg Jesus ki rã sór mũ, is̃y t̃y ti kr̃em ke ñin k̃y,” he sóg tĩ. Hã jé sóg ṽes̃y ag kr̃em ke han tĩ, ù t̃y ti ki ge mũ ag e ñytĩ jé, isugr̃in. ²⁰ Judeu ag tugñin sóg ṽes̃y Judeu han tĩ, Judeu ag t̃y Jesus ki ge jé. Is̃y ag jykre han sór tũ ra inh han ke tũ nĩ ṽe, hã ra sóg han sór tĩ, is̃y ag to há ñin k̃y. K̃y sóg Judeu jykre han mũ ag tigr̃in ag jykre han tĩ, ù t̃y ag jykre han mũ ag t̃y Jesus ki ge jé, isugñin. ²¹ K̃y fóg ag ṽy Judeu jykre han tũ nĩgtĩ, kanhgág ag ke gé. K̃y sóg fóg ag tigr̃in fóg jykre han tĩ, kanhgág ag tugñin sóg kanhgág jykre han tĩ, ag t̃y isugr̃in Jesus ki ge jé. Inh pi(jé) Topẽ jykre tovãnh mũ hã ra'. Cristo jykre han sóg tĩgtĩ m̃yr. Judeu jykre hã tovãnh inh tĩ, fóg to, kanhgág to ke

gé. ²² Kÿ sóg ùn krój ag mÿ komēr hã vÿ tÿ, ag tÿ isugnÿn Jesus to vãsãnsãn mãn jé. Isÿ ùn jykre ve kÿ sóg ti jykre ri ke han tÿ, ag tÿ Jesus ki ge jé, isugrÿn. ²³ Tag kar han sóg tÿ, Jesus kãme tugnÿn, isÿ ti mré ti rãnrãj ki rÿr jé.

²⁴ Ha mē, ùn e tóg corrida han tÿ, hã ra ùn pir tóg ganhar ke tÿ inhhã. Ag ri ke han nÿ. Vãsãn ra, ãjag tÿ ganhar ken jé, Jesus tÿ ěg mÿ nén ven ke ti. ²⁵ Ha vé, ù tÿ torneio han tÿ ag vÿ to jykrén mág tÿ, kÿ ag vãkrég tÿ gé, ag tÿ ganhar ken jé. Ěprã jykre ki ag tóg ganhar ke sór tÿ, hã jé ag vãkrég tÿ, ti tÿ kãnhmar tũ' he mÿ ra, ag ganho ti. Hã ra ěg tóg kanhkã tá ěg ganho venh ke mÿ, ù tÿ tũg ke vãnh ěn ti. ²⁶ Ge sóg tÿ gé, sÿ corrida ri ke han kÿ. Pétēm sór inh nÿ, to krónh ke tũ sóg nÿ. Rará ri ke han sóg tÿ to. Inh pi(jé) véké rará tÿ'. ²⁷ Vēnh hã to rá sóg tÿ, kÿ sóg isÿ nén to ěn mÿ ěn han ke tũ nÿ. Inh mÿ Topē tÿ inh fón ha mē tóg tÿ, isÿ ãjag jyvēn kar kÿ vēnh jykre pãno han kÿ. Hã kÿ sóg vēso rá tÿ, sÿ han tũg jé.

10

Ěg jo ke ag to jykrén nÿ

¹ Inh kanhkã', tag jēmē ra, ãjag tÿ ki kanhrãn jé. Ěg jóg'jóg ve ag vÿ Moisés mré mÿ ja nÿgtÿ. Kanhkã góg ěn krēm ag tóg mÿ kãn ja nÿgtÿ, kÿ ag tóg goj kusũg nig ěn kafã ra pa kãn ja nÿgtÿ gé. ² Ěg vēnh kygpe ri ken hã vē, ag tÿ kanhkã góg krēm mÿ ja ti, ag tÿ goj kusũg nig kafã ra pa ja ti ke gé. ěn kã Moisés vÿ ag jãmÿ tÿg ja nÿgtÿ, Jesus tÿ ěg ki rÿr nÿ tag ri ke. ³ Kÿ ěg jóg'jóg ve ag tóg kanhkã tá vējēn ko kãn ja nÿgtÿ gé, ⁴ kanhkã tá goj tÿ ěganē ki kronkron kãn ja ag tóg nÿgtÿ gé, kanhkã tá goj tÿ vēnh kanē ti. Pãró tá ag tóg goj ve ja nÿgtÿ, hã ra tóg tÿ kanhkã tá ke nÿ ja nÿgtÿ. Cristo to ken hã vē. Ti hã vÿ ag mré tÿ ja nÿgtÿ. Kÿ tóg ag mÿ goj ěn ven ja nÿgtÿ. ⁵ Ge ra Topē tóg ěg jóg'jóg ve ag to jũ kãn ja nÿgtÿ, kÿ ag tóg kãgter kãn ja nÿgtÿ, ga kórég ěn tá. Hã ra tóg ùn pipir ag hã to há ja nÿgtÿ, Topē ti, kÿ ag hã tóg krenkren ja nÿgtÿ, ùn pipir ěn ag. ⁶ Hã ra tóg rán kÿ nÿ, ěg tÿ tÿ vēnh kanhrãn jé, ěg tÿ nén ù kórég to ěn tũ nÿ jé. To ěn ja ag tóg nÿgtÿ, ěg jóg'jóg ve ag, kÿ ěg tag han ke tũ nÿ.

⁷ Hã kÿ ón kÿ vēnh kãggrã tÿ topē nón mÿ sór tũg nÿ. Tag han ja ag tóg nÿgtÿ gé, ěg jóg'jóg ve ag. Hã kÿ tag tóg rán kÿ nÿ, hã mē. “Povo kar vÿ nÿgnÿ mÿ sir, ag tÿ vēnh kãggrã tÿ topē to festa ko jé, ag kronkron jé sir, ag tÿ kar kÿ vēnh gringrén jé fag mré,” he ja tóg nÿgtÿ, Topē vÿ rán ki. Hã to Topē tóg ag to jũ ja nÿgtÿ gé.

⁸ Kÿ ěg ùn mén tũ fag mré nÿnh ke tũ nÿ gé. Tag han ja ag tóg nÿgtÿ gé, ěg jóg'jóg ve ag, kÿ kurã pir ki ù tÿ 23 mil (ke) ag vÿ kãgter ja nÿgtÿ, Topē tÿ ag tũg kÿ. ⁹ Kÿ ěg Topē to: “ti hÿn iso jũnh ke tũ nÿ, sÿ ti vÿ mranh mÿ ra,” henh ke tũ nÿ gé. Ke ja ag tóg nÿgtÿ gé, ěg jóg'jóg ve ag, kÿ pÿn tóg ag kãgtén ja nÿgtÿ, Topē tÿ ag to jũn kÿ. ¹⁰ Kÿ ěg Topē to vÿ kónãn ke tũ nÿ gé. Ke ja ag tóg nÿgtÿ gé, ěg jóg'jóg ve ag, kÿ Topē tÿ jēnē jafã tóg ag kãgtén ja nÿgtÿ.

¹¹ Hã ra Topē tóg ag vóg kónãn, ěg tÿ ag to vēnh kanhrãn jé. Hã jé tóg rán kÿ nÿ gé, ti tÿ to ěg jyvēn jé. Ěg hã mÿn kakó nÿ, kurã tÿ ěgno ti. ¹² Hã kÿ vēso jykrén. Ā tÿg há han kÿ, ã tÿ ti vÿ mranh tũg kÿ tóg há tÿ. Hã jé vēnh ki rÿr, ã tÿ prãnh ke tũ nÿ jé. ¹³ Nén-Kórég vÿ ěg krÿn sór mÿ, ěg tÿ Topē vÿ mranh jé. Hã ra tóg ěprã ke jykre ki ěg krÿn sór tÿgtÿ, Japo ti. Kÿ Topē tóg ti vég tÿ, kÿ tóg ěg ki rÿr tÿ. Kÿ tóg kejēn ti mÿ: “gen kÿ,” he tÿ sir, ti tÿ ěg kutãn tãvÿ han mÿ ra ěg tÿ hē ri ke tũ nÿ jé. Kÿ tóg ěg tar han ke mÿ gé, ěg tÿ Nén-Kórég tÿ ěg krÿn kónãn mÿ ra ti kato tē jé, ěg tÿ ti mÿ: “hej,” he tũ nÿ jé.

Vēnh kãggrã tÿ topē jykre han sór tũg nÿ

¹⁴ Inh krē', tag tugrÿn vēnh kãggrã tÿ topē tovãnh pē han nÿ, ve sór tũg nÿ. ¹⁵ Ki kanhró ãjag tóg nÿgtÿ, hã kÿ ěg tÿ Jesus jamÿ ko tÿ ěn to jykrén nÿ, ha mē. ¹⁶ Ěg tÿ Cristo ter ja mÿ ěkrén kÿ ěg tóg kron tÿ, ti kyvénh ri ke ěn ti. Copa ěn to Jesus tóg Topē mré vÿ há han ja nÿgtÿ, ag tÿ kron jé. Kÿ ěg tóg to Topē mré vÿ kar kÿ kron tÿ sir. Ěg tÿ kron kÿ ěg tóg tÿ ti mré ke nÿgtÿ sir, ěg tÿ ti kyvénh ri ke ěn kron kÿ. Kÿ ti jamÿ vÿ ge nÿgtÿ gé. Kupãn kÿ ěg tóg ko tÿ, Cristo tÿ ěg mÿ tón kÿ. Ěg tÿ kon kÿ ěg tóg tÿ ti mré ke nÿgtÿ gé sir, ěg tÿ ti nÿ ri

ke ên kon ký. ¹⁷ Ti jamĩ vỹ pir nĩ, ký êg tóg ko kãn ký êg tóg tỹ ùn pir nỹtĩ gé, ti mré, êg e hã ra. Jesus jamĩ ko to vãnh jykre hã vễ.

¹⁸ Ký povo tỹ Israel ag to jykrén nĩ gé, ha mẽ, Israel krẽ ag to. Topẽ mỹ ag tóg nén ù pũn tĩ, ti pũn jafã kri. Pũn ký ag tóg ko tĩ gé. Ag tỹ kon ký ag tóg tỹ ag tỹ ùn mỹ pũn mũ ên mré ke nỹtĩ gé sir, êg tỹ tỹ Jesus mré ke nỹtĩ ri ke. ¹⁹⁻²⁰ Ký ón ký vãnh kãggrá tỹ topẽ to jykrén nĩ gé, ha mẽ. Ag tỹ vãnh kãggrá tỹ topẽ mỹ nén ù pũn ký ag tóg Nén-Kórég ag hã mỹ pũn tĩ. Ag pi (jé) Topẽ pẽ mỹ pũn tĩ'. Hã ký tóg inh mỹ há tũ nĩ, ãjag tỹ tỹ Nén-Kórég ag mré ke nỹtĩn ký, ãjag tỹ ag tũ kon ký ke gé.

Inh pi(jé) ãjag mỹ: “vãnh kãggrá tỹ topẽ vỹ nỹgtĩ, ký ag tỹ ag mỹ pũn mũ ên vỹ tỹ nén ù nĩ,” he sór tĩ'. Nén ù tũ vễ, Topẽ tũ vễ, ón ký vãnh kãggrá tỹ topẽ ti. ²¹ Hã ra tóg vãnhmỹ nĩ, ãjag tỹ êg Senhor tỹ copa ki ke kron kar ký Nén-Kórég tỹ copa ki ke kron ký ke gé. Vãnhmỹ ti nĩ, ãjag tỹ êg Senhor jẽn ko kar Nén-Kórég ag jẽn kon ký ke gé. ²² Êg tỹ Nén-Kórég ag tũ kon ký ti hẽn ri ke mũn êg to jũnh ke mũ, êg Senhor ti. Ti tỹ êg to jũ nĩn ký tóg vãnhmỹ nĩ. Êg pi(jé) ti tỹ hẽn ri kenh mũ'. Hã ký ón ký vãnh kãggrá tỹ topẽ ve sór tũg nĩ.

Êg régre tũgrĩn êg kejẽn konh ke tũ nĩ

²³ Hã ra ãjag tóg inh mỹ: “isỹ nén han sór mũ ên han jé sóg ke mũ, pi(jé) kórég nĩ,” he sór mũ. Há ti nĩ vễ, tag ti. Hã ra êg tỹ nén han mũ ù tóg êg mỹ nén ù há han tũ nĩgtĩ. Nén ù kar han há êg tóg tĩ vễ, hã ra êg tỹ nén han mũ ù tóg êg tar han ke tũ nĩ, Jesus to. ²⁴ Ký ã tũ to jykrén tãvĩ han tũg nĩ, ã régre tũ to jykrén nĩ gé, ti mỹ há nĩ jé, ha mẽ. ²⁵ Ký ã tỹ nén ù tãnh jafã ki nén ù nĩ kajãm sór nĩn kỹn há tĩ, ký ag mỹ: “ù mỹ ón ký vãnh kãggrá tỹ topẽ mỹ ti nĩ tag pũn ja tũ?” he tũg nĩ. Jẽmẽ tũg nĩ, jatun mỹ komnĩ. ²⁶ Topẽ tũ vễ, ga ti, ga kri ke kar ti ke gé, hã ký jatun mỹ komnĩ. ²⁷ Kejẽn ù tỹ Jesus ki rã tũ ù vỹ ã mỹ: “inh mré jẽn kãtĩg,” he mũ sir. ã tĩg sór ký ã tóg tĩg mũ, ký ã tóg nén ù kar konh ke mũ. Ti ki jẽmẽ tũg nĩ, ù tỹ hẽn ri ke mũn ón ký vãnh kãggrá tỹ topẽ mỹ nén ù pũn ja ti, ã tỹ jatun mỹ ko jé. ²⁸ Hẽn ri ke mũn ù tóg sir ã mỹ: “vějẽn tag ù pũn ag, ón ký vãnh kãggrá tỹ topẽ mỹ,” he mũ. Ký ko tũg nĩ sir, ti tũgrĩn, ù tỹ ã mỹ tó mũ tũgnĩn, ti tỹ ã to jykrén kónãn tũ nĩ jé. ²⁹ ã pi(jé) to jykrén mũ vễ', hã ra ti hã tóg to jykrén mũ, hã ký tóg ã mỹ tó mũ. Há tũ ti nĩ inh mỹ, ù tỹ iso jykrén kónãn ký, isỹ nén ù tỹ inh mỹ kórég tũ han to. ³⁰ Topẽ mỹ sóg vějẽn ên to vĩ há han ja nĩgtĩ. Ký ù tỹ tag to iso vĩ vĩ he mũ ra tóg inh mỹ kórég nĩ, sỹ Topẽ mỹ vĩ há han ja ên to. Hã ký sóg ko sór tũ nĩ, ù tỹ iso jykrén kónãn sór ký.

³¹ Hã ký Topẽ hã mỹ nén kar han nĩ, vãnh kar tỹ Topẽ jykre há nĩ ve jé. ã jẽn ký ti jykre ki jẽn nĩ. ã kron ký ti jykre ki kron nĩ. ã tỹ nén ù han ký ti jykre hã ki han nĩ gé, vãnh kar tỹ ti jykre há nĩ ve jé. ³² ù tỹ ã tũgrĩn Topẽ to jũ tũ nĩ jẽn há tĩ, Judeu ag, fóg ag, kanhgág ag, Topẽ tũ ag ke gé, ù tỹ êg mré ke ag. Ký vãnh jykre há hã han nĩ. ³³ Ke sóg tĩ gé. Vãsãn sóg tĩ, vãnh kar tỹ iso há nỹtĩ jé. Hã jé sóg isũ ki rĩr tãvĩ han tũ nĩgtĩ. Vãnh kar tũ ki rĩr inh tĩ, ag tỹ Jesus ki ge jé.

11

¹ Inh jykre han sórmnĩ, isỹ Jesus jykre han ri ke.

Ùn tỹtá fag jykre

² Hỹ, ãjag mỹ sóg vĩ há han sór mũ mỹr. Isỹ ãjag mỹ nén tó mũ ên to jykrén kãn ãjag tóg mũgtĩ mỹr'. Isỹ ãjag kanhrãn ên ki króm sór ãjag tóg tĩ. ³ Hã ký sóg nén ù ki ãjag kanhrãn sór mũ sir, ha mẽ. Cristo vỹ tỹ ag kri ke nĩ, ký ag vỹ tỹ ãjag prũ fag kri ke nỹtĩ, ký Topẽ vỹ tỹ Cristo kri ke nĩ gé. ⁴ Ký ag kãmĩ ù tỹ kur tỹ vãnh kri fón ký Topẽ mré vĩ ký tóg há tũ nĩ, ti tỹ kur tỹ vãnh kri fón ký jẽn ký Topẽ vĩ tón ký. Ti mỹ'ag vễ sir. ⁵ ùn tỹtá fag tỹ hã ra kur tỹ vãnh kri fón tũ ra Topẽ mré vĩ ký tóg há tũ nĩ. Fag tỹ kur tỹ vãnh kri fón tũ ra Topẽ vĩ tó ký fag tóg ãjag kri ke ên mỹ'a han mũ sir, ký tóg fag mỹ'a tĩ gé sir, fag krĩ kator ri ke ti nĩ sir. ⁶ Hã ký tóg fag tỹ vãnh kri fón sór tũ ký fag krĩ kator ri ke nĩ. Hã ra tóg fag mỹ'a tĩ, fag gãn rhonh ke to, fag krĩ kator nĩnh ke to. Hã ký tóg há tĩ gé, fag tỹ kur tỹ vãnh kri fón ti. ⁷ Hỹ, hã vễ. Ag kãmĩ ù tóg kur tỹ vãnh kri fón ke tũ nĩ, ti tỹ tỹ

Topê ri ke nîn kÿ, êg tÿ ti tugrîn Topê tÿ ti kri tÿ ùn mág nî ven kÿ. Hã ra êg tóg ùn tÿtá fag hã tugrîn êg tóg ag tÿ fag kri tÿ ùn mág nÿtî vég tî. ⁸ Ha vé, Topê pi(jé) ùn ve fi tÿ ùn ve ti han ja nî'. Ùn ve tÿ tóg fi han ja nî mÿr. ⁹ Kÿn pi(jé) fi tugrîn ti han'. Ti hã tugnîn tóg fi han. ¹⁰ Hã kÿ ùn tÿtá fag tóg kur tÿ vènh kri fón ke mü, fag tÿ tÿ ag krêm ke nÿtîn kÿ. Kÿ Topê tÿ jênê jafá ag tóg fag tÿ tÿ ag tÿ nÿtî ki kanhró nÿtî sir, kur ên to. ¹¹ Hã ra êg kar vÿ êg Senhor ki ge kÿ nÿtî. Ti ki ge kÿ nÿtîn kÿ ùn tÿtá fag pi(jé) ájag pir mÿ tÿ nén ù nÿtî'. Ag mré ke fag nÿtî. Kÿ ag pi(jé) ájag pir mÿ tÿ nén ù nÿtî gé'. Fag mré ke ag nÿtî gé. Jagnê ki rîr êg tóg tî ha. ¹² Hÿ, ùn tÿtá fi vÿ tÿ ti ki han kÿ nî. Hã ra ag kar tóg fag ki mur tî sir, jávo êg kar vÿ tÿ Topê tÿ há (r) kar nÿtî.

¹³ Kÿ to jykrén, ájag. Há tÿ tóg nî, ùn tÿtá fag tÿ kur tÿ vènh kri fón tÿ ra Topê mré vémén kÿ. ¹⁴ Fag kar vÿ kur tÿ vènh kri fón tî, êg mré ke tÿ fag mré há. Hã kÿ êg vésóg ki ki kanhró nÿtî, vènh jykre tag ti. Há ti nî mÿr.

Ag mÿ'a tóg tî, ag gånh tég ti. Vésóg ki êg tag to jykrén tî. ¹⁵ Hã ra tóg fag mÿ sér tî, fag gånh tég ti. Hÿ, fag gånh vÿ tÿ fag krî kri fón ja ri ke nî. ¹⁶ Hèn ri ke mÿn ájag kãmî ù mÿ tóg há tÿ nî hã ra, fag krî kri fón ja ti. Kÿ tag to jykrén nî, ha mē: ã tÿ kri fón sór tÿ tag pi(jé) tÿ êg jykre nî'. Topê tÿ fag jykre pijé'. Igreja kar ki fag tóg kur tÿ vènh kri fón tî, ha mē. Kÿ igreja krêm êg mÿ'a han sór tÿg nî.

Santa Ceia to vènh jykre

(Mt 26.26-28; Mc 14.22-24; Lc 22.17-20)

¹⁷ Kÿ sóg nén ù ki ájag mÿ vî há han ke tÿ nî gé. Ájag jykre ù tóg há tÿ nî, ha mē. Ájag vènh mán kÿ ájag nēji, Jesus jamî ko kÿ ájag nēji jagnê jèn vóg tî, kÿ ájag nēji jagnê kókég tî sir. ¹⁸ Ájag vènh mán kÿ ájag nēji jagnê kato tē tî, vènh kápãm kÿ, kÿ tóg inh mÿ ki hã ke ve nî, sÿ to jykrén kÿ. Ájag kãmî ù hÿn vènh kápãm sór tî, he sóg tî. ¹⁹ Hÿ, há ti nî vè, ájag tÿ vènh kápãm kÿ nÿtîn kÿ. Kÿ ùn jykre há ag vÿ vènh ven ke mü, ájag kãmî.

²⁰ Kÿ, ájag vènh mán kÿ ájag pi(jé) êg Senhor jamî ko tî', Santa Ceia he mü ên tî'. ²¹ Tÿ festa han kÿ ájag kar nēji vènh fân hã jé ko tî, ájag fór sór kÿ. Tá jun kÿ ájag nēji kånhar ko tî. Kÿ ù ag nēji vènh fân tî, vinho kron kÿ ag nēji tÿ pépév tî, jó ù ag tóg kókînkîr tî sir, ù tÿ kånhar tá junjun mü ag tÿ ag tÿ kaggran kÿ. ²² Ha mē, vènhmÿ ti nî. Topê mré ke ag to é he mü ve ájag tóg nÿtî mÿr', ájag tÿ ag tÿ kaggran kÿ. Ùn jagtar ag mÿ'a han ájag tóg mü mÿr', ájag tÿ ag jèn kaggran kÿ, ag junjun to há. Tag tÿ inh hÿn hē ri kenh mü? Inh mÿ ájag mÿ vî há han ke mü', tag to'? Vó', kenh ke tÿ inh nî. Kórég ti nî, ájag tÿ han mü tag ti. Ájag ïn hã tá vèjèn tÿ vènh fân nî.

²³ Ha mē, êg Senhor tóg inh mÿ tó ja nî, sÿ ájag mÿ tó mü ti, êg tÿ ti ter to jykrén kÿ tag han jé, ha mē. Kuty ên kã, Judas tÿ pä'i ag mÿ êg Senhor tÿ Jesus tó ja ên kã êg Senhor tóg êmî mán ja nÿgtî, Jesus ti. ²⁴ To tóg Topê mré vî ja nÿgtî. Kupân kÿ tóg ag mÿ: "inh hã vè," he ja nÿgtî. "Ájag jagfÿ sóg ter ke mü. Kÿ inh mî êkrén nî, ájag tÿ pão tag kon kÿ," he ja tóg nÿgtî. ²⁵ Ag tÿ ko kar kÿ tóg copa mán ja nÿgtî gé sir. Kÿ tóg ag mÿ: "copa ki jē tag vÿ inh kyvénh ri ke nî," he ja nÿgtî. "Inh jykre tãg to ken hã vè, isÿ inh kyvénh tugrîn ájag mÿ vènh pãte fón jé. Kÿ inh kyvénh tÿ inh ki kutē mü ên mî êkrén nî, ájag tÿ copa kãkã nî tag kron kÿ," he ja tóg nÿgtî gé. ²⁶ Hã kÿ êg tÿ êmî ên kon kÿ, êg tÿ copa kãkã nî ên kron kÿ êg tóg sir êg Senhor ter ti tó tî. Tag han êg tî, ti kätig ken jo.

²⁷ Hã kÿ vènh jykre kórég ki êmî ên ko sór tÿg nî, copa kãkã nî ên kron kónãn sór tÿg nî gé, êg Senhor tÿ ti. Ke tÿ nî mü ra tóg êg tÿ ti ter to é he ri ke nî, êg tÿ ti kyvénh kutē to é he ri ke ti nî, êg tÿ êg jykre kórég ra kron kÿ. ²⁸ Hã kÿ êg jé êg jykre tugnÿm. Tugnÿm kar kÿ, ti há nî ve kar kÿ êg tóg êmî ên konh mü, copa kãkã nî ên kron ke mü gé. ²⁹ Êg tÿ ón kÿ ko sór kÿ, ón kÿ kron sór kÿ, ti tÿ êg mÿ vèjèn ù ri ke nîn kÿ Topê tóg êg vóg kónãn ke mü sir, êg tÿ êmî ên to êg Senhor ter mî êkrég tÿ nîn kÿ. Kÿ êg tóg Topê tÿ êg vóg kónãn hã jé tÿ nén ù tÿ han kÿ ko' he mü, kron' he mü gé sir. ³⁰ Ájag tÿ Jesus jamî ko to vènh ki rîr há han tÿ nÿtîn kÿ, hã kÿ ù ag tóg krónhkrój nÿtî, ájag kãmî, kÿ ù ag tóg kaga nÿtî, kÿ ù tÿ hèn ri ke ag tóg kãgter huri ke gé. ³¹ Ha vé, êg tÿ êg jykre tugnÿm kÿ ti mÿ tó kÿ tóg êg mÿ vènh pãte fón ke mü. Kÿ tóg êg jykre tugnÿm mán ke tÿ nî sir, êg vóg kónãn ke tÿ

tóg nĩ gé, ěg Senhor ti. ³² Hã ra tóg kejĕn ěg vóg kónãn tĩ. Ěg Senhor tỹ ěg kanhrãn sór vĕ, ti tỹ ěg tỹ kygnĕ to ěg vóg kónãn kỹ, ti tỹ ěg vãm tũ nĩ jé, ũ tỹ ti vĩ mranh mũ ag mré hã.

³³ Inh kanhkã', tag to jykrén, kỹ jagnĕ jãvãnh nĩ, ãjag tỹ vĕjĕn tỹ Santa Ceia ko sór kỹ.

³⁴ Ājag kãmĩ ũ kókĩr nĩn kỹ tóg ã ĩn tá ã jĕn tỹ vĕnh fãn ke mũ, ke tũ nĩ mũ ra tóg ãjag vóg kónãn ke mũ, ěg Senhor ti, ãjag tỹ vĕnh mãn kỹ vĕnh fãnfãn kỹ.

Sỹ ãjag mỹ nĕn tónh ke ũ tóg nỹtĩ ke gé, hã ra sóg rán ke tũ nĩ. Sỹ ãjag mré nĩnh ken kỹ sóg ãjag mỹ kãmĕn ke mũ.

12

Topĕ vỹ ěg tar han mũ, ti kuprĩg tỹ

¹ Kỹ sóg ãjag mỹ Topĕ kuprĩg tỹ ěg krĩn ke tag tó sór mũ, ãjag tỹ inh ki jĕmĕn kỹ. Kejĕn tóg nĕn ũ to ěg tar han tĩ, ěg tỹ han jé, Topĕ kuprĩg ti. ² Ha vé, vãsỹ, ãjag tỹ Jesus ki ge tũg ki ãjag tóg ón kỹ vĕnh kãggrá tỹ topĕ nón mũ ja nĩgtĩ gé. Vĩ vãnh ti nỹtĩ, vĕnh kãggrá tỹ topĕ ti, hã ra Japo vỹ ãjag tỹ ag ki rã han ja nĩgtĩ. ³ Hã kỹ sóg tag to ãjag kanhrãn sór mũ, ha mĕ. Topĕ kuprĩg tỹ ěg krĩn kỹ ěg pi(jé) Jesus to: “Nĕn-Kórég ag pã'i mág,” he tĩ'. Jãvo ěg tỹ Jesus mỹ: “ěg Senhor,” hen kỹ Topĕ kuprĩg tóg ěg krĩn mũ sir, ke tũ nĩ mũ ra ěg ti mỹ: “ěg Senhor,” he vãnh nĩ sir.

⁴ Kỹ Topĕ kuprĩg vỹ tỹ ũn pir nĩ, hã ra tóg ěg tar han tĩ, nĕn ũ kar to. Vyrmỹ tóg ěg tãn tĩ', ěg tãn tĩ' he tĩ. ⁵ Kỹ ěg rãnrãj vỹ e nỹtĩ gé, ěg kar vỹ vyrmỹ rãnrãj nỹtĩ gé, hã ra tóg pir nĩ, ěg Senhor ti, ũ tỹ ěg mỹ vĕnh rãnrãj nĩm tĩ ti. ⁶ Kỹ ěg tỹ ti jykre ki nĕn ũ hyn han mũ vỹ e nỹtĩ, hã ra tóg pir nĩ, Topĕ ti, ũ tỹ ěg tar han mũ ti.

⁷ Kỹ Topĕ kuprĩg vỹ ěg tar han kãn tĩ sir, kỹ tóg ũ tỹ nĕn ũ to tãn kỹ nĩ han tĩ, jó tóg ũ tỹ nĕn ũ ũ to tãn kỹ nĩ han tĩ gé, ěg kar tỹ jagnĕ mỹ nĕn ũ há han jé, ěg tỹ nĕn ũ to tar nỹtĩ ěn tỹ. ⁸ Hã kỹ Topĕ kuprĩg tóg ũ tar han tĩ, ti tỹ ěg mỹ ti vĩ kãmĕn há han jé sir. Ũ tar han tóg tĩ gé, ti tỹ Topĕ vĩ ki nĕn ũ kar ki kanhró nĩ jé. ⁹ Kỹ Topĕ kuprĩg tóg ũ tar han tĩ, ti tỹ ti ki fé mág to. Ũ tar han tóg tĩ gé, ti tỹ ũn kagyga tỹ há' he jé, Topĕ kuprĩg ěn ti mỹr. ¹⁰ Ũ tar han tóg tĩ gé, ti tỹ ěg tỹ nĕn han vãnh han jé, ũ tar han tóg tĩ, ti tỹ ěg jyvĕn há han jé, kỹ tóg ũ tar han tĩ, ti tỹ: “tag vỹ tỹ vĕnh jagrĕ há nĩ, tag vỹ tỹ vĕnh jagrĕ kórég nĩ,” he jé. Ũ tar han tóg tĩ, ti tỹ ěg tỹ vĕnh vĩ ki kagtĩg ki Topĕ mré vĕmĕn jé, kỹ tóg ũ tar han tĩ, ti tỹ ěg tỹ vĕnh vĩ ki kagtĩg mĕ kỹ ěg vĩ ki tó jé sir. ¹¹ Hã ra tóg pir nĩ, Topĕ kuprĩg ti. Ti pir nĩ ra tóg nĕn ũ e tag hyn han tĩ, kỹ tóg to ěg tar han tĩ. Ti hã ne to jykrén kỹ: “tag tar han jé sóg ke mũ, tag to, jó sóg ũ ěn tar han ke mũ, ěn to,” he tĩ'. Kỹ tóg vyrmỹ ũ tar han', vyrmỹ ũ tar han' he tĩ sir.

Nĕn ũ pir ri ke ěg nỹtĩ, ěg jagrĕ pir nĩn kỹ

¹² Ěg há to jykrén nĩ, ha mĕ. Ěg há vỹ tỹ ũn pir nĩ, hã ra ěg há ki nỹtĩ vỹ e nỹtĩ, ěg pĕn, ěg nĩgé, ěg nĩgrĕg, ti kar ti. Kỹ ěg há ki nỹtĩ kar vỹ tỹ ěg há nĩ sir. Nĕn ũ pir vĕ sir, ti e nỹtĩ ra, ti tỹ ěg ki nỹtĩ kar nĩn kỹ. Tag ri ke ěg nỹtĩ gé. Cristo há ri ke ěg nỹtĩ, ěg tỹ ti ki ge kỹ nỹtĩn kỹ. ¹³ Topĕ kuprĩg vỹ tỹ ũn pir nĩ, kỹ ěg kar vỹ kygpe kỹ nỹtĩ, ti kuprĩg tỹ, hã vỹ: Cristo há pir, he mũ. Ěg kãmĩ ũ ag tóg tỹ povo tỹ Israel ag ki ke nỹtĩ, ũ ag tóg tỹ povo ũ ag ki ke nỹtĩ gé, ũ ag tóg ěprã ke tỹ patrão nỹtĩ, jó ũ ag tóg patrão tũ nỹtĩ. Hã ra Topĕ kuprĩg vỹ tỹ ũn pir nĩ, ěg jagrĕ ti, kỹ tóg tỹ ěg jagrĕ kar nĩ, ti pir nĩ hã ra. Nĕn ũ pir vỹ tỹ ěg nỹtĩ.

¹⁴ Ěg há vỹ ge nĩ, ha mĕ. Ěg há ki nỹtĩ pi(jé) tỹ ũn pir nĩ'. E ti nỹtĩ, ěg há ki nỹtĩ ti. Kỹ ěg jé ěg rãnrãj to vĩ vĩ he tũ nĩ. ¹⁵ Hĕn ri ke mũn ěg pĕn tóg to jykrén kỹ: “inh pi (jé) tỹ vĕnh nĩgé nĩ', hã kỹ sóg vĕnh há ki nỹtĩ tũ nĩ,” he tĩ. Hã tũ vĕ hã ra. Ěg há ki nỹtĩ ti nĩ, ěg pĕn ti, ti tỹ tỹ ěg nĩgé tũ nĩ ra. ¹⁶ Kỹ ěg nĩgrĕg tóg to jykrén kỹ hĕn ri ke mũn: “inh pi(jé) tỹ vĕnh kanĕ nĩ', hã kỹ sóg vĕnh há ki nỹtĩ tũ nĩ',” he tĩ gé. Hã tũ vĕ mỹr. ¹⁷ Ěg há tỹ tỹ vĕnh kanĕ tãvĩ nĩ hã ra ěg ne tỹ jĕmĕnh mũ vĕ? Ěg há tỹ tỹ vĕnh nĩgrĕg tãvĩ nĩ hã ra ěg nĕn ũ ger mĕnh ke tũ nĩ vĕ. ¹⁸ Topĕ hã ne ěg há ki nỹtĩ hyn han kãn', kỹ tóg ti ki nỹtĩ kar mỹ vyrmỹ vĕnh jykre vin kãn ja nĩgtĩ, ti tỹ ã rãnrãj ěn han jé. Topĕ tỹ nĕn to jykrén jan

hã vë. ¹⁹ Kÿ ti ki nÿtĩ kar tÿ vënh jykre pir nĩ ra ãg há vÿ tũ nĩ vë. ²⁰ Há ti nĩ, Topë jykre ti. ãg há ki nÿtĩ jykre e han ti, ti e tÿ ãg há pir han jé sir.

²¹ Hã kÿ ãg kanë pi(jé) ãg nĩgë mÿ: “ã pi(jé) inh mré rãnrãj tĩ,” he tĩ'. Kÿ ãg krĩ vÿ ge nĩgtĩ gé. ãg pën mÿ ti: “ã pi(jé) inh mré rãnrãj tĩ,” he tũ nĩgtĩ gé. ²² Ge tũ ti nĩ, ãg há jykre ti. ãg há ki nÿtĩ ù tóg rãnrãj krój han nĩ ve nĩ, hã ra ãg tóg jarĩn mÿ tÿ jagnë mré rãnrãj kãn tĩ. ²³ Kÿ ti ki nÿtĩ ù tóg rãnrãj kufy han tĩ, kÿ ãg tóg hã ra ti ki rĩr há han tĩ sir. Kÿ ti ki nÿtĩ ù tóg ãg mÿ sĩnvĩ tũ nÿtĩ, hã kÿ ãg tóg kur krëm ti rãg tĩ. ²⁴ ù tÿ ãg mÿ sĩnvĩ nÿtĩ tÿ ãg tóg kur krëm rãg tũ nĩgtĩ sir. Kÿ Topë tóg ãg mÿ vënh jykre nĩm, ãg tÿ ti ki nÿtĩ tÿ vënh rãnrãj kufy han mũ ãn ki rĩr há han jé sir. ãg há jykre hã vë. Topë vÿ to jykrén kãn, kÿ tóg ãg há ki nÿtĩ han kãn, ²⁵ ãg há tÿ vënh jykre pir han jé. Kÿ tóg ti mÿ há tĩ, ãg tÿ ãg mré Jesus ki ge kÿ nÿtĩ kar ag ki rĩr há han kÿ. ãg tÿ jagnë ki rĩr há han kÿ ãg kãmĩ ù vÿ jagtar tũ nÿtĩnh mũ, ãg tÿ ãg há ki nÿtĩ jykre pir ri ke han kãn kÿ, jagnë mÿ. ²⁶ Hÿ, ãg há ki nÿtĩ pir kaga nĩn kÿ tóg kaga kãn tĩ sir. Kÿ tóg ge nĩ gé, ãg mré. Jagnë mré tóg ãg mÿ e tĩ. Kÿ ù tÿ ãg kãmĩ ù mÿ vĩ há han kÿ tóg ãg kar mÿ sér tĩ gé sir.

²⁷ Ha mẽ, Cristo há ri ke ãg nÿtĩ, kÿ ãg kar vÿ ti há ki nÿtĩ ri ke nÿtĩ gé sir. ²⁸ Kÿ Topë tóg ù tÿ igreja ki ke kar mÿ vënh rãnrãj vin kãn, ãg mÿ. ãg kãmĩ ù ag vin tóg, ag tÿ tÿ apóstolo nÿtĩ jé. Tag pãte tóg ù ag vin, ag tÿ jagnë jykre ki kanhrãn kÿ jagnë jyvën jé. Tag pãte tóg ù ag vin, ag tÿ tÿ ti vĩ tó jafã nÿtĩ jé. Kÿ tóg ù ag vin, ag tÿ ãg tÿ nén han vãnh hyn han jé. Kÿ tóg ù ag vin, ag tÿ ùn kagyga tÿ há' he jé. Kÿ tóg ù ag vin, ag tÿ ù jagãgtãn jé. Kÿ tóg ù ag vin, ag tÿ tÿ igreja krëm tÿ pã'i nÿtĩ jé. Kÿ tóg ù ag vin, ag tÿ ãg tÿ vënh vĩ ki kagtĩg ki Topë mré vëmén jé. ²⁹ ãg kar pi(jé) tÿ apóstolo nÿtĩ'. ãg kar pi(jé) tÿ vënh jyvën jafã nÿtĩ'. ãg kar pi(jé) tÿ Topë vĩ kãmén jafã nÿtĩ'. ãg kar pi(jé) ãg tÿ nén han vãnh hyn han tĩ'. ³⁰ ãg kar pi(jé) ùn kagyga tÿ há' he tĩ'. ãg kar pi(jé) ãg tÿ vënh vĩ ki kagtĩg tÿ Topë mré vëmén tĩ'. ãg kar pi(jé) vënh vĩ ãn mẽ kÿ ãg vĩ ki hã tó tĩ'. ³¹ Kÿ Topë mÿ to vĩ mág, ti kuprĩg tÿ nén ù há to ãjag tar han jé, ãjag kar tÿ jagnë mré rãnrãj kãn jé sir.

ãjag tÿ nén han mũ ù tóg há sĩ nĩ, kÿ ù tóg há tãvĩ nĩ gé. Kÿ sóg ãjag mÿ nén ù há tãvĩ kãmén sór mũ, ha mẽ.

13

Vënh kar to há nÿtĩmnĩ

¹ Hën ri ke mũn ãg tóg ãprã ke ag vĩ tÿ hën ri ke tó há nÿtĩgtĩ, Topë tÿ jënë jafã ag vĩ mré hã. ãg tÿ jarĩn mÿ vënh kar to há tũ nÿtĩnh kÿ ãg tóg ón kÿ ke nĩ hã ra, ãg vĩ tag ti. ãg tÿ vënh kar to há tũ nÿtĩnh kÿ ãg tóg ón kÿ vĩ há han tĩ, ferro tÿ véké kyr ri ke, sino tÿ kejën ón kÿ kyr ãn ri ke. ² Hën ri ke mũn ãg tóg vënh jyvën há han tĩgtĩ. Topë hën ri ke mũn nén ù kar tó tĩ ãg mÿ, ãprã ke jykre ki kanhró kar ãg nÿtĩ hën ri ke mũn. Hën ri ke mũn ãg tóg Topë ki rã há han kÿ nÿtĩ, kÿ ãg ti vĩ to: “hÿ mÿ vÿ?” he tũ pë nĩgtĩ. Kÿ ãg tóg pãnónh mÿ: “ha tĩg,” he tĩ, hã ra tóg sir tĩ tĩ. ãg tÿ jarĩn mÿ vënh kar to há tũ nÿtĩnh kÿ tóg tÿ ón kÿ ke nĩ. ³ Hën ri ke mũn ãg tóg ãg tũ vin kãn tĩ, ùn jagtar ag mÿ. Hën ri ke mũn ãg tóg ù tÿ Jesus kato tẽ mũ ag mÿ vënh fëg mũ, ag tÿ ãg pũn jé. ãg tÿ jarĩn mÿ vënh kar to há tũ nÿtĩnh kÿ tóg ãg mÿ nén ù há han ke tũ nĩ.

⁴ ãg tÿ vënh kar to há nÿtĩnh kÿ ãg tóg vënh kar to fen nÿtĩ. Ag mÿ ãg tóg nén há kar han sór mũ. ãg pi(jé) jagnë tũ to ãn ke mũ'. “ã kãfór vÿ tÿ inh nĩ,” henh ke tũ ãg tóg nĩ. “Ùn mág vÿ tÿ inh nĩ,” henh ke tũ ãg tóg nĩ gé. ⁵ Vënhmÿ mẽ han ke tũ ãg tóg nĩ gé, ãg tũ tãvĩ hã to jykrén ke tũ ãg tóg nĩ gé. “Ti hÿn ne ki kanhrãn ke tũ pë nĩ,” henh ke tũ ãg tóg nĩ gé. Kÿ ù tÿ ãg vóg kónãn mũ ra ãg tóg ti to jũnh ke tũ nĩ gé. ⁶ ãg tÿ vënh jykre pãno ven kÿn pi(jé) ãg mÿ sér tĩnh mũ'. ãg tÿ ù tÿ ki hã tó mũ mẽ kÿ tóg ãg mÿ sér tĩnh mũ. ⁷ ãg tÿ nén ù jagy vég mũ ra ãg pi(jé) to vĩnh ke mũ'. Nén ù kar to ãg tóg: “Topë vÿ tag han há nĩ,” henh ke mũ. Ti hã ki ãg tóg nén ù kar ve sór ke mũ. Vënh kar ki ãg fe mág nÿtĩnh mũ, ãg tÿ vënh kar to há nÿtĩnh kÿ.

⁸ ãg tÿ vënh kar to há nÿtĩ ãn vÿ krÿg ja tũ nĩnh mũ. Jãvo ãg tÿ jagnë jykre ki vënh kanhrãn kÿ jagnë jyvën tĩ ãn vÿ krÿg ja nÿ. ãg tÿ ãg tÿ vënh vĩ ki kagtĩg tÿ Topë mré

vémén tí ěn vỹ krýg ja nỹ gé. Ěg tý ěpra nén ũ ki kanhró nýtí ěn kar vỹ krýg ja nỹ gé. ⁹ Ůri ěg tóg nén sĩ há ki kanhró nýtí. Nén sĩ tý ěg tóg jagně jyvěn tí, Topě tý ěg mỹ tó tý. Ěg pi(jé) ki kanhrān kān kỹ nýtí ver'. ¹⁰ Kānhmar tóg vĕnh ven ke mŭ, ũ tý nén ũ kar ki kanhró kar nĩ ěn ti. Kỹ há ěg tóg nén ũ hyn han há tāvĩ han kān ke mŭ, kurā ěn kā.

¹¹ Ěg mog mŭ ri ke ti nĩ. Vāsỹ sóg sĩ ja jĕgtĩ. Kỹ sóg ũn kāsir ag tý nén tó tí ěn tó ja nĩgtĩ gé. Ũn kāsir ag mỹ ke ěn tóg inh mỹ ke ja nĩgtĩ gé. Ũn kāsir tý nén to jykrén tí ěn to sóg jykrén ja nĩgtĩ gé. Kejĕn sóg sanh há jĕ sir. Kỹ sóg ũn kāsir jykre tovānh kān ja nĩgtĩ. Ěn ri ke ti nĩ, ěg Senhor kātĩg mān ke ti. Ki kanhrān kān jé ěg tóg ke mŭ, ěn kā. ¹² Ůri ěg tóg ve há han tŭ nĩgtĩ ver, ěg Senhor jykre ti, kỹ tóg ěg tý vĕnh ve jafā ki vĕnh ve há han tŭ ri ke nĩ. Kuty nĩ ve ti nĩ, ěg tý vĕnh ve jafā ki nén vĕg mŭ ti. Há kỹ ěg tóg ve há han tŭ nĩ ver. Kurā ěn kā ěg tóg nén kar ve há han kān ke mŭ há ra. Ěg há vỹ tóg ti venh ke mŭ. Ůri ěg tóg sĩn kỹ ti ki kanhró nýtí. Kurā ěn kā ěg tóg ki kanhrān kān ke mŭ, ti tý ěg ki kanhró kar ěn ri ke.

¹³ Há kỹ tag vỹ krýg ja tŭ nỹ, ha mě. Ěg tý Topě ki rā mŭ vỹ krýg ja tŭ nỹ. Ěg tý ti há ki nén ũ kar ve sór mŭ vỹ krýg ja tŭ nỹ gé. Ěg tý vĕnh kar to há vỹ krýg ja tŭ nỹ gé. Kỹ nén ũ pir tóg káfór nĩ, há vỹ: ěg tý vĕnh kar to há nĩ, he mŭ.

14

Topě vỹ ā kuprĩg tý ěg tar han tí, ěg tý jagně ki rĩr jé

¹ Kỹ vĕnh kar to há nýtĩmĩ. Kỹ Topě mỹ to vĩmĩ gé, ti kuprĩg tý nén ũ to ājag tar han jé. Ti tý nén ũ to ěg tar han tí ũ vỹ káfór nĩ, há vỹ: ěg tý jagně jykre ki kanhrān kỹ jagně jyvěn tí, he mŭ. ² Ěg tý há ra ěg tý vĕnh vĩ ki kagtĩg ki vémén kỹ ěg pi(jé) ěpra ke ag mỹ nén ũ tó tí'. Topě há mỹ ěg tó tí, ěg tý tag tó kỹ. Ů pi(jé) ki kanhró nĩ', ěg tý vĕnh vĩ ki kagtĩg ki vémén kỹ'. Topě kuprĩg há tóg ěg krĩn tí, ěg tý vĕnh vĩ ki kagtĩg ěn tó jé. Kỹ ěg tóg ki kagtĩg nýtí, ěg tý nén tó mŭ ti. ³ Ěg tý há ra ěg vĩ ki jagně jyvěn kỹ ěg tóg ũ tý mĕg mŭ kar jyvěn tí sir. Tý ěg tóg jagně tar han tí, Topě to. Jagně jyvěn ěg tóg tí, jagně fe kaj tý ěg tóg tŭg' he tí gé, ěg tý jagně mỹ ěg vĩ ki vémén kỹ. ⁴ Ů tý ěg tý vĕnh vĩ ki katĩg ki vémén mŭn vỹ vĕnhmỹ tý ũn tar jĕ sir, Topě to, ũn vémén mŭ ti. Ů tý ěg vĩ ki vĕnh jyvěn tí ěn tóg ěg tar han kān mŭ sir, Topě to, ěg mré vĕnh mān kỹ nýtí ag kar.

⁵ Inh mŭn há tí vĕ, ājag kar tý ěg tý vĕnh vĩ ki kagtĩg tý Topě mré vémén há há ra. Ājag kar tý ěg vĩ ki jagně jykre to jagně jyvěn há nýtí ra tóg há ra tag káfór nĩ. Kỹ tóg inh mỹ há káfór nĩ vĕ, ājag tý ke kān mŭ ra. Ů tý ěg vĩ ki tó mŭ vỹ ũ tý ěg tý vĕnh vĩ ki kagtĩg ki vémén mŭ ěn káfór nĩ, ũ tý ěg vĩ ki jagně jykre to vĕnh jyvěn tí ěn, mŭr, ha mě. Kejĕn ũ tóg ěg tý vĕnh vĩ ki kagtĩg ki vémén tí. Kar kỹ ũ tóg ti vĩ ěn mě kỹ ěg vĩ ki tó mŭ sir, ti tý nén tó ja ěn ti. Tag vỹ há tí gé. Ů tý vĕnh mān kỹ nýtí kar vỹ ki kanhrān kān mŭ sir, ti vĩ ti, kỹ ag tóg tý tar nýtĩnh mŭ sir.

⁶ Inh kanhkā', ha vé. Hĕn ri ke mŭn sóg ājag ki jun kỹ ěg tý vĕnh vĩ ki kagtĩg ki vémén mŭ. Kỹ sóg ājag mỹ nén ũ há han ke tŭ nĩ ha, tý, ājag tý inh vĩ ki kagtĩg nýtĩn kỹ. Jāvo isŭ ājag mỹ Topě tý inh mỹ nén tó mŭ tý ěg vĩ ki kāmén kỹ sóg tý ājag tar han mŭ sir, isŭ ājag mỹ sŭ nén to jykrén mŭ kāmén kỹ, sŭ ājag jyvěn kỹ, sŭ ājag mỹ Topě vĩ ki nén rán kỹ nĩ ěn kāmén kỹ. Kỹ sóg tý ājag tar han mu sir, mŭr, ha mě, ājag tý inh vĩ ki kanhrān kỹ.

⁷ Vān tý vākyn jafā to jykrén nĩ, vākyn jafā ũ to ke gé. Ag tý kyn kórég kỹ ěg tóg ki kagtĩg nýtí sir, ag tý vākyn mŭ ti. ⁸ Kỹ vākyn jafā tý trombeta vỹ ge nĩgtĩ gé. Ag tý ti kyr mě kỹ soldado ag vỹ vĕnh kān kān tí, vĕnh génh ke to. Ag tý tý kyn há han tŭ nýtĩn kỹ ag pi(jé) vĕnh génh ke to vĕnh kān ke mŭ'. ⁹ Ge ti nĩ gé, ěg vĩ ti. Ěg tý ag tý ki kagtĩg ěn tó kỹ ag tóg to jykrén ke tŭ nĩ gé, ěg tý nén tó mŭ to. Véké ěg tóg vémén mŭ sir, ěg tý gen kỹ.

¹⁰ Vĕnh vĩ vỹ e nýtí, ga tag kri. Povo kar vỹ vyrmỹ vĩ nĩ' he kar nýtí. Ěg vĩ pĕ ki ěg tóg vémén ki kanhró nýtí. ¹¹ Kỹ sóg kejĕn ě tá ke ũ vĩ mĕg tí. Sŭ ti vĩ ki kagtĩg nĩn kỹ sóg ti jykre ki kanhrān ke tŭ nĩ, ũn vĩ mŭ ti, kỹ tóg inh jykre ki kanhrān ke tŭ nĩ gé. Ge ti nĩ gé, ěg tý vĕnh vĩ ki kagtĩg ki vémén kỹ. Ki kagtĩg ěg tóg nýtí sir.

¹² Topě kuprīg tỹ ājag tar han mū ve sór ājag tóg nýtī, nén ũ ũ to. Kỹ tóg há tī. Kỹ hã ra ěg mré ke ag tar han jafã to én nĩ, ěn hã to Topě mré vīmñĩ, hã vỹ: ěg vĩ ki jagně jyvĕn, he mū.

¹³⁻¹⁴ ěg tỹ vĕnh vĩ ki kagtīg ki Topě mré vĕmĕn kỹ ěg tóg to jykrĕn kỹ nĩ tũ ra Topě mré vĕmĕn tĩ. Kỹ, ã tỹ vĕnh vĩ ki kagtīg ki vĕmĕn to tar nĩn kỹ Topě mỹ to vīmñĩ, ti tỹ ã tỹ nĕn tó ja ěn ki kanhrãn kỹ ěg mỹ ěg vĩ ki kãmĕn to ã tar han jé gé. Kỹ ã tóg: “tag tó ja inh nĩ, tag tó ja inh nĩ,” hĕnh ke mū gé sir, kỹ tóg há tī. ¹⁵ ěg tỹ to jykrĕn kỹ nĩ tũ ra Topě mré vĕmĕn kỹ tóg há tī. ěg tỹ hã ra to jykrĕn kỹ nĩn kỹ ti mré vĕmĕn kỹ tóg há tĩ gé. ěg tỹ to jykrĕn kỹ nĩ tũ ra Topě mỹ jãn kỹ tóg há tī. ěg tỹ hã ra to jykrĕn kỹ nĩn kỹ ti mỹ jãn kỹ tóg há tĩ gé. Sỹ tag han kãn sór vĕ. ¹⁶ Ha vé, ã tỹ to jykrĕn kỹ nĩ tũ ra Topě to vĩ há han kỹ ã vĩ mĕg mū ag vỹ ki kagtīg nýtī, ã vĩ ti, ã tỹ ěg tỹ vĕnh vĩ ki kagtīg ki vĕmĕn kỹ. Kỹ tóg ag tỹ ã mré: “hỹ, hã vĕ,” he sór mū ra tóg vĕnhmỹ tĩ. “Ti ne tó mū vỹ? Sỹ ki kagtīg tóg tĩ,” he jé ag tóg ke mū. ¹⁷ Tó há han ã tĩgtĩ, ã tỹ ěg tỹ vĕnh vĩ ki kagtīg ki vĕmĕn kỹ. Hã ra ũ tỹ mĕg mū ag vỹ ki kagtīg nýtī, kỹ ã pi(jé) ag tar han tĩ’.

¹⁸ ěg tỹ vĕnh vĩ ki kagtīg ki vĕmĕn to sóg tar pĕ nĩ inhhã. To tar nĩn kỹ sóg ājag kãfór nĩ. ¹⁹ Hã ra sóg tag tó sór tũ nĩ, ěg vĕnh mãn kỹ nýtĩn kỹ. Hĕn ri ke mũn sóg vĕnh vĩ tỹ mil (ke) han ke mū, ěg tỹ vĕnh vĩ ki kagtīg ki vĕmĕn kỹ. Hã ra sóg jĕrĩn mỹ ājag tar han ke tũ nĩ. Hã kỹ sóg tag tó sór tũ nĩ. Sỹ nĕn to jykrĕn mū hã tó sór inh mū, kỹ sóg inh vĩ pir tỹ ājag tar han ke mū.

²⁰ Inh kanhkã’, to jykrĕn há han nĩ. Gĩr tỹ nĕn ũ to jykrĕn tũ ěn ri ke nýtī sór tũg nĩ. Vĕnh jykre pãno hã to gĩr tỹ ti ki kagtīg nĩ ěn ri ke nýtĩmñĩ, ājag tỹ ti kórĕg han tũ nĩ jé. Nĕn ũ há to jykrĕn kỹ tóg inh mỹ ājag tỹ ũn sanh há ag tỹ nĕn ũ to jykrĕn há ěn ri ke nýtĩnh há tĩ. ²¹ Ve ra, Topě vĩ rán ki tag vỹ rán kỹ nĩ, ha mĕ. “Inh povo tỹ inh vĩ mĕ jãvãnh nýtĩn kỹ sóg ag mỹ ũn vĩ ũ ag vĩ ki inh vĩ jĕnĕnh ke mū. Povo tỹ vyrmy vĩ ag mỹ sóg: “ha ag mỹ inh vĩ ti tó,” hĕnh ke mū, “ag vĩ tũ ki hã ra, ũ tỹ inh vĩ mĕ jãvãnh ag mỹ,” he jé sóg ke mū. Hã kỹ ag tóg mĕnh ke tũ nĩ, inh povo ti, ag tỹ ag vĩ tũ ki ag mỹ vĕmĕn kỹ,” he tóg, ěg Senhor ti, Topě vĩ rá ki. ²² Hã kỹ tóg tỹ ũ tỹ Topě ki ge jãvãnh ag tỹ ki kagtīg han jafã nĩ, ěg tỹ vĕnh vĩ ki kagtīg tỹ vĕmĕn mū ti. Ti ki ge kỹ nýtī ag mỹ ke pijé’. Jãvo ěg tỹ jagně jykre ki kanhrãn kỹ jagně jyvĕn tag vỹ tỹ ti ki ge kỹ nýtī ag tar han jafã nĩ. Ti ki ge jãvãnh ag mỹ ke pijé’.

²³ Ha vé, kejĕn ěg mré ke ag vỹ vĕnh mãn kãn mū. Kỹ vĕnh kar tóg hĕn ri ke mũn ěg tỹ vĕnh vĩ ki kagtīg ki vĕmĕn mū. Kỹ ũ tỹ ki kagtīg tóg venh ke kãtīg mū, ũ tỹ Jesus ki rã ja tũ ti hĕn ri ke mũn. Kỹ tóg ti tỹ ājag tỹ vĕnh vĩ ki kagtīg tag mĕ kỹ tóg ājag to: “krĩ vĕnhmỹ ag nýtī,” hĕnh ke mū sir, ón kỹ. ²⁴ Ājag tỹ ěg vĩ ki jagně jykre ki kanhrãn kỹ jagně jyvĕn kỹ tóg hã ra há tĩ. Kỹ ũ tỹ Jesus ki rã tũ vỹ jun mū, ũ tỹ ki kagtīg. Kỹ tóg ājag vĩ mĕnh mū, kỹ tóg to jykrĕn ke mū sir. Ājag vĩ to tóg: “hỹ, hã vĕ,” hĕnh ke mū. Ti jykre pãno to tóg jykrĕn ke mū gé. ²⁵ Ti tỹ nĕn ũ to jykrĕn mū vỹ vĕnh ven kãn ke mū, kỹ tóg ti mỹ e tĩnh mū sir. Mũg ke jé tóg ke mū. “Topě vỹ tỹ ũn mág nĩ,” he jé tóg ke mū. Kỹ tóg ki kanhró nĩnh mū, tó jé tóg ke mū sir, Topě tỹ ājag mré nĩ ti.

Culto ki vĕnh jykre

²⁶ Kỹ ājag vĕnh mãn kỹ tag vỹ há nĩ, ha mĕ. ũ tóg Topě mỹ jãn ke mū, ti mỹ cantar ken jé. ũ tóg Topě vĩ tỹ vĕnh kanhrãn kỹ tónh ke mū. ũ mỹ tóg nĕn ũ tónh mū, Topě ti, ti tỹ tỹ ājag jyvĕn jé. ũ tóg ěg tỹ vĕnh vĩ ki kagtīg ki vĕmĕn ke mū, ũ tóg ti vĩ mĕ kỹ ěg vĩ pĕ ki tónh ke mū, ti tỹ nĕn tó mū ěn ti. Há kar ti nĩ, ājag tỹ tag tỹ Topě to tar nýtī jé. ²⁷ Ājag tỹ ěg tỹ vĕnh vĩ ki kagtīg ki vĕmĕn sór kỹ ũn pipir ag hã tóg tónh ke mū, hĕn ri ke mũn ũn régre, ke tũ nĩn kỹ ũn tãgtũ, jagně ri ke. ũ tỹ tó kỹ ũ tóg vĩnh ke tũ nĩ sir. ũn pir tỹ vĕmĕn kỹ tóg há tĩ. Kỹ ũ tóg ti vĩ mĕ kỹ ěg vĩ pĕ ki tónh ke mū gé sir, ti tỹ nĕn tó mū ěn ti. ²⁸ Kejĕn tóg ki tũ nĩ, ũ tỹ ti tỹ nĕn tó mū ěn tỹ ěg vĩ ki tónh ke mū ti. Kỹ ěg tóg ěg tỹ vĕnh vĩ ki kagtīg tỹ vĕmĕn ke tũ nĩ sir, vĕnh kar rĩnve. Ājag ĩn hã tá vĕmĕn nĩ, ěg tỹ vĕnh vĩ ki kagtīg tỹ. ěn tỹ igreja krĕm vĕmĕn tũg nĩ, ěg tỹ vĕnh vĩ ki kagtīg tỹ, ũ tỹ ti tỹ nĕn tó mū tỹ ěg vĩ ki tónh ke tũ nĩn kỹ.

²⁹ Kĩ tóg ajag tỹ jagně jykre ki kanhrān kỹ ěg vĩ ki jagně jyvěn ken kỹ tóg ge nĩ gé, ha mẽ. Ũn régre vỹ tónh ke mũ, ke tũ nĩn kỹ ũn tãgtũ, jagně ri kén tón jé. Kỹ ag vĩ mẽg mũ ag vỹ to jykren ke mũ, ag tỹ ti kygně tũ ve jé. ³⁰ Hã ra hěn ri ke mũn Topě tóg ũ mỹ nén ũ tónh ke mũ gé. Kỹ ũn vēmén vén mũ tóg krỹg henh ke mũ ver, kỹ ũ tóg ti ri kén tónh mũ sir, Topě tỹ ti mỹ nén tó ja ti. ³¹ Hã kỹ ajag kar vỹ jagně jyvěn ke mũ, ajag tỹ jagně ri kén vēmén kỹ. Gen kỹ ajag tóg jagně kanhrān ke mũ sir, jagně kri kuprãg ke ajag tóg mũ gé sir. ³² Topě kuprĩg vỹ ěg krĩn tĩ, ěg tỹ jagně jyvěn jé. Hã ra ti pi(jé) ěg tỹ nén tó sór tũ ra ěg kri gĩnh ke tĩ'. ³³ Hã kỹ tóg Topě mỹ há tũ nĩ, ěg tỹ ũ vēmén jẽ ra ěg tỹ nén tónh ke mũ ěn tó sór kỹ. ěg tỹ jagně tỹ tó kar kỹ ěg tỹ nén tónh ke tó kỹ tóg ti mỹ há tĩ, kỹ vėnh kar tóg jatun mỹ mẽnh ke mũ sir, ěg tỹ nén tó mũ ti. Topě jykre kusan hã vė.

³⁴ Topě tũ vỹ tỹ ěg nỹtĩ. Kỹ ũn tỹtã fag vỹ vēmén ke tũ nĩ, igreja krēm. Hẽ tá igreja krēm fag vỹ jatu nỹtĩgtĩ, ěmã kar mĩ, kỹ ajag tóg fag ri ke jatu nỹtĩnh mũ gé. “Tỹ fag tóg ag krēm ke nỹtĩ,” he ja tóg nĩ, Topě ti, hã kỹ fag tóg vēmén ke tũ nĩ, igreja krēm. ³⁵ Kỹ fag tóg ajag tỹ Topě vĩ ki kanhrān há han tũ nĩn kỹ fag tóg ajag ĩn tá ajag mén ki jēmėnh mũ, ajag tỹ ki kanhrān há han tũ ja ěn ti. ěg mỹ'a tóg tĩ, fag tỹ igreja krēm vēmén sór kỹ, kỹ ke sór tũg nĩ. ³⁶ Ajag hỹn tag ki króm sór tũ nĩ, vėg isóg nĩ nĩ. “ěg hã vỹ to jykren há tãvĩ han tĩ, ěg hã vỹ tó vén, vėnh kar jo, Topě vĩ ti,” he ajag tóg tĩ, ěg kãfór nỹtĩ sór kỹ. Hã ra tóg e nỹtĩ, Jesus ki ge mũ ag. Tó há han ag tóg tĩ gé. Ag mré vėnh jykre pir han sórmnĩ.

³⁷ Ajag kãmĩ ũ hỹn: “Topě vỹ inh mré vēmén tĩ, ti kuprĩg tỹ inh krĩn tag to sóg tar tãvĩ nĩ,” he tĩ. Kỹn hỹn ki kanhró nĩ, sỹ ajag mỹ Topě jykre tó mũ tag, ajag tỹ igreja krēm vėnh mãn ke to. ěg Senhor tỹ ěg mỹ vėnh jykre nĩm jan hã vė, sỹ ajag mỹ rán mũ tag ti. ³⁸ Ũ tỹ tag to: “nén ũ tũ vė,” he mũ ra sóg ti to: “nén ũ tũ vỹ tỹ ã nĩ,” he mũ gé.

³⁹ Inh kanhkã', Topě mỹ to vĩ mág, ti kuprĩg tỹ ajag tar han jé, ajag tỹ jagně jykre ve kỹ jagně jyvěn há han jé, ěg vĩ ki. Ũ tỹ ěg tỹ vėnh vĩ ki kagtĩg ki vēmén sór kỹ ti mỹ: “vĩ tũg ra,” he tũg nĩ gé. ⁴⁰ Hã ra ũ vēmén jẽ ra ěg tỹ nén tónh ke mũ ěn tó sór tũg nĩ. To jykre kusa nỹtĩmnĩ.

15

Jesus rĩr jẽ

¹ Inh kanhkã', sỹ ajag mỹ Jesus kãme sér ěn tó mãn ke vė, sỹ ajag mỹ tó ja ěn ti. ěn kri fig ajag tóg tĩ, kỹ ajag tóg mĩ mũgtĩ. ² Ti vĩ kri nĩm kỹ ajag tóg krenkren ke mũ, ajag tỹ tovãnh tũ nĩn kỹ. Sỹ ajag mỹ nén tó ja ěn tỹ tũ' he tũg nĩ, ke tũ nĩ mũ ra ajag tóg vėké kri fi ja nĩnh mũ. Kỹ ajag tóg tá nén ũ venh ke tũ nĩ gé.

³ Sỹ ajag mỹ Topě vĩ kãmén kỹ sóg ajag mỹ sỹ nén mẽ ja ěn hã tó vén ja nĩgtĩ, hã vỹ: Cristo vỹ ěg jagfy ter ja nĩgtĩ, ěg tỹ Topě vĩ mranh ja tugrĩn, he mũ. Tag vỹ rán kỹ nĩ, Topě vĩ rá ki. ⁴ Kỹ ag tóg vėnh kej kãtã ti fi ja nĩgtĩ. Kurã tãgtũ tũg kỹ tóg rĩr mãn ja nĩgtĩ gé. Tag vỹ rán kỹ nĩ gé, Topě vĩ rá ki. ⁵ Kỹ tóg Pedro mỹ vėnh ven, kar kỹ ũ tỹ 12 (ke) ag mỹ ke gé. ⁶ Kar kỹ tóg ũ tỹ 500 (ke) kãfór ag mỹ vėnh ven gé, vėnh ven pir ki, ag vėnh mãn kỹ nỹtĩ ěn ki. ěn ag kãmĩ ũn pipir ag tóg kãgter ja nĩgtĩ, hã ra ũn e ag tóg ver ěg mré nỹtĩ. ⁷ Kar kỹ Tiago tóg ti vé gé, kar kỹ ti tỹ ũn vin mũ kar ag, ke gé, apóstolo kar ěn ag. ⁸ Kar kỹ sóg vãhã ti vé gé, ag kar nón. Sỹ ti venh ke tũ vė vė, sỹ kãnhmar ti ki rã ja tũ nĩn kỹ. ⁹ Apóstolo ag krēm ke kar vỹ tỹ inh nĩ. Sỹ tá krỹg ke tũ vė vė, sỹ tỹ apóstolo nĩnh ke ti, isỹ Topě ki ge kỹ nỹtĩ ag vóg kónãn jan kỹ, fag ke gé. ¹⁰ Hã ra Topě tóg inh jagãgtãn, hã kỹ tóg isỹ apóstolo han mũ. Kỹ ti pi(jé) fagrĩnh mỹ inh jagãgtãn'. Rãnhraj mág han inh mỹr, ag rãnhraj kãfór kar. Hã ra sóg inh pir mỹ han tũ nĩgtĩ. Topě hã ne isar han tĩ', inh rãnhraj to'.

¹¹ Hã ra ěg kar tóg Jesus tó tĩ. “Jesus vỹ rĩr jẽ,” he ag tóg tĩ, apóstolo ũ ag, kỹ sóg tag tó tĩ gé, ag mré. Kỹ ajag tóg sỹ ti kãmén kỹ inh vĩ kri fig tĩ. ¹² ěg kar vỹ Cristo tỹ ter kar ti rĩr mãn ja ěn tó tĩ.

Jesus mré ěg rĩnrĩr mãn ke mũ gé

Cristo rĩr mǎn mũ ra ăjag kǎmĩ ũ tóg ón kũ: “Ăg ter kar kũ Ăg rĩr mǎn ke tũ nĩ ha,” he tĩ'. Hǎ tũ vĕ. ¹³ Ăg tũ Ăg ter kar kũ rĩr mǎn ke tũ nĩ hǎ ra Cristo vỹ rĩr mǎn ja tũ nĩnh mũ gé vĕ vĕ. ¹⁴ Cristo rĩr mǎn ja tũ nĩ hǎ ra Ăg tóg fagrĩnh mũ ăjag mũ ti kǎmĕn ja nĩnh mũ gé vĕ vĕ. Kũ ăjag tóg fagrĩnh mũ kri fi ja nĩnh mũ gé vĕ vĕ. ¹⁵ Kũ Ăg tóg Topĕ to ón ja nĩnh mũ gé vĕ vĕ, Ăg tũ ti to: “Cristo rĩn mǎn ja tóg nĩ,” hen kũ. Kũ Ăg kar vỹ ti to ón ja nĩnh mũ vĕ. Hǎ ra tóg Jesus rĩn mǎn ja nĩ, Topĕ ti.

¹⁶ Hỹ, ũn kǎgter mũ ag rĩnrĩr mǎn ke tũ nĩ ra Cristo vỹ rĩr mǎn ja tũ nĩnh mũ gé vĕ vĕ, ha mĕ. ¹⁷ Kũ Cristo rĩr mǎn tũ nĩ ra Ăg tóg fagrĩnh mũ ti ki ge ja nĩnh mũ gé vĕ vĕ. Kũ Ăg tóg Topĕ vĩ mranh ja ĕn hǎ ki nỹtĩnh mũ vĕ ver, tũ tũ' he ja tũ ti nĩnh mũ vĕ, ti rĩr mǎn tũ nĩ hǎ ra. ¹⁸ Kũ ũ vĕ gé, ha mĕ: ti rĩr mǎn tũ nĩ ra ũ tũ Cristo ki ge kar kũ kǎgter mũ ĕn ag vỹ nũgme ki vǎr kǎn kũ nỹtĩnh mũ gé vĕ vĕ, ha mĕ. ¹⁹ Hǎ kũ tóg vĕnhmỹ tĩ, ăjag tũ: “rĩr mǎn ke tũ Ăg nĩ,” hen kũ. Cristo pi(jé) Ăg tũ ga kri mũ tag tǎvĩ ki rĩr nĩgtĩ'. Kanhkǎ tá Ăg tóg junjun ke mũ. Ke tũ nĩ mũ ra Ăg tóg ũn jagăgtar ag kǎfór kar nỹtĩnh mũ vĕ, Ăg tũ fagrĩnh mũ Jesus ki rǎ ja nỹtĩ ra. Hǎ tũ vĕ mỹr.

²⁰ Cristo vỹ rĩr mǎn, ter kar kũ. Hǎ vĕ. ũn kǎgter kũ nỹtĩ ag kar kǎmĩ ti rĩr mǎn vén, Cristo ti, hǎ kũ Ăg tóg rĩnrĩr mǎn ke mũ gé, Ăg tũ ti ki ge kũ. ²¹ ũn pir tugrĩn Ăg kar vỹ kǎgter ke mũ, hǎ kũ Ăg tóg ũn pir tugnĩn rĩnrĩr mǎn kǎn ke mũ gé, Ăg ter kar kũ. ²² Adǎo tũ Topĕ vĩ mranh tugrĩn Ăg tóg kǎgter kǎn ke mũ, Ăg tũ tũ ti krĕ nỹtĩn kũ. Ri ke ti nĩ, Cristo tugnĩn Ăg tóg rĩnrĩr mǎn kǎn ke mũ gé, Ăg tũ ti ki ge kũ nỹtĩn kũ.

²³ Topĕ tũ nén to jykrĕn mũn hǎ vĕ, Cristo tũ Ăg jo rĩr mǎn tag ti. Hǎ kũ tóg rĩr mǎn vén. Kar kũ ũ tũ Cristo ki ge kũ nỹtĩ ag vỹ rĩnrĩr mǎn ke mũ gé sir, ti kǎtĩg mǎn kũ. ²⁴⁻²⁵ Kũ vǎhǎ kurǎ tũ Ăgno vĕ sir. Kurǎ ĕn kǎ Jesus vỹ Topĕ mũ: “ǎ hǎ ne Ăg kri ke jĕ ha',” henh ke mũ, ti panh mũ. ũri tóg tũ pǎ'i mág nĩ ver, Cristo ti, kũ tóg pǎ'i ũ ag vĩ tũ tũ' he kǎn mũ, ũn jykre tar kar, ũ tũ Ăg kǎfór nỹtĩ kar. Tũ tũ' he kǎn jé tóg ke mũ, hǎ jé tóg ver tũ pǎ'i mág nĩ, Cristo ti, ti tũ ǎ kato tĕgtĕ mũ ag jykre sǎn kǎn jé, ti tũ ag vĩ tũ tũ' he kǎn jé.

²⁶ Ăg tũ Topĕ vĩ mranh tugrĩn Ăg kǎgter kǎn mũ. Hǎ ra tóg tũ tũ' henh ke mũ gé, Ăg ter mũ tũ, kũ Ăg ter mǎn ke tũ nĩ ha, kurǎ tũ Ăgno ĕn kǎ. Ti tũ Ăg ter mũ tũ tũ' hen kũ tóg há kar nĩ sir. ²⁷ Hỹ, vĕnh kar vỹ tũ ti krĕm ke nỹtĩ, ti tũ ag jykre sǎn kũ, ti tũ ũn mág ag vĩ tũ tũ' hen kũ. Vĕnh kar vỹ tũ ti krĕm ke nỹtĩ, Cristo krĕm. Hǎ ra ũn pir vỹ tũ ti krĕm ke tũ nĩ, hǎ vỹ: ũ tũ vĕnh kar tũ ti krĕm ke han ja ĕn, he mũ, hǎ vỹ: Topĕ, he mũ. ²⁸ Vĕnh kar tũ ti krĕm ke nỹtĩn kũ, kurǎ ĕn kǎ tóg ti krĕm vĕnh fĕg ke mũ gé, ti kósĩn ti, ǎ panh krĕm, ũ tũ vĕnh kar tũ ti krĕm vin ja ĕn krĕm. Kurǎ ĕn kǎ Topĕ tóg tũ vĕnh kar kri ke jĕnh mũ, ǎ pir mũ. Kũ ũ tóg ti ri ke jĕnh ke tũ pĕ nĩ.

²⁹ Ăg rĩr mǎn ke tũ nỹtĩ ra ăjag kǎ ũ tóg fagrĩnh mũ ũn ter mũ ag jagfy vĕnh kygpenh mũ vĕ. Ag rĩr mǎn tũ ra tóg vĕnhmỹ tĩ vĕ, ăjag tũ ag jagfy vĕnh kygpenh ke ti. Hǎ tũ vĕ hǎ ra. Rĩr mǎn jé Ăg tóg ke mũ. ³⁰ Hǎ kũ sóg kurǎ kar ki ti jagy vég tĩ gé, hǎ ra sóg ag mũ vĕnh nenh tũ nĩgtĩ, ũ tũ inh vóg kónǎn sór mũ ag mũ. ³¹ Kurǎ kar ki sóg ter kren' he tĩgtĩ. Ki hǎ sóg tó tĩ, ki kanhró ăjag nỹtĩ. Ăjag hǎ ki sóg tũ ũn mág nĩ, Jesus Cristo ki, Ăg Senhor ki. ³² Cidade tũ Éfeso tá sóg mĩg mré rǎrá ri ke han mỹr, hǎ ra tóg inh mũ nén ũ há han ke tũ nĩ vĕ, Ăg tũ rĩr mǎn' he tũ ra. ũn kǎgter mũ ag rĩnrĩr mǎn ke tũ ra Ăg tóg jatun mũ Ăg tũ nén to ĕn mũ han ke mũ vĕ, Ăg tũ: “mũ nỹ, jĕn jé, kron jé, Ăg hỹn vaj kũ ter ke mũ,” hen kũ, Topĕ ki ge tũ ag ri kĕn ken kũ. ³³ Hǎ tũ vĕ hǎ ra.

Kygnĕ tũg nĩ. Tag to jykrĕn nĩ, ha mĕ: ũn vĩ kórég ag vĩ jĕmĕ sór tũg nĩ. Vĕnh jykre há pǎno han ti tĩ, ag vĩ kórég ti. ³⁴ Krĩ há han ra, tag hǎ ne há nĩ'. Topĕ vĩ mranh tũg nĩ. Ăjag kǎmĩ ũ vỹ Topĕ ki kanhró tũ nỹtĩ ver'. Tag to vĕnh mũ ĕn nĩ.

Ăg rĩr mǎn ke to vĕnh jykre

³⁵ Kũ ũ tóg to jykrĕn kũ inh mũ: “Topĕ hỹn hĕ ri kĕnh ke mũ, ti tũ ũn ter mũ ag rĩnrĩr mǎn jé?” he sór mũ. “Ăg fǎr hỹn hĕ ri kĕnh ke mũ?” he sór ăjag hỹn mũ. ³⁶ Krĩ tũ ăjag nỹtĩ mỹr'. Nén ũ fy jykre vỹ Ăg ter ri ke nĩ, ha mĕ. Ăg tũ krǎn kũ tóg kugnǎnh tĩ, ti fǎr ti, jǎvo tóg ti kǎtǎ mur mǎn mũ sir. ³⁷ Kũ ti fy pi(jé) ti fĕj ri ke nĩ gé', ti tũ han ke ti. Sĩ ti nĩ,

trigo fy ti, nén ũ kar fy ti ke gé. ³⁸ Topê hã ne ti pên han mû', ti féj ke gé, ti fej ke gé. Ti hã ne to jykrén tí'. Kÿ tóg nén kar fy mÿ ti féj ũ nÿm', ti féj ũ nÿm' he tí.

³⁹ Kÿ nén ũ fár vÿ ge nÿgtí gé. Ti pi(jé) pir nÿ gé'. Ęg fár vÿ vÿrmÿ nÿ, kar kÿ bicho fár vÿ vÿrmÿ nÿ gé, kar kÿ sÿsÿ fár vÿ vÿrmÿ nÿ gé, jÿsÿ fár ti, kar kÿ pirã fár vÿ vÿrmÿ nÿ gé.

⁴⁰ Kÿ kanhkã tân ag vÿ vÿrmÿ fár nÿtí gé, ěprã ke ag vÿ vÿrmÿ fár nÿtí gé. Kÿ ěg ve vÿ ge nÿgtí gé. Kanhkã tá ke ag ve vÿ vÿrmÿ nÿ, ěprã ke ag ve vÿ vÿrmÿ nÿgtí gé. ⁴¹ Rã jÿngrê vÿ vÿrmÿ nÿ, kÿsã jÿngrê vÿ vÿrmÿ nÿ gé, krÿg jÿngrê vÿ vÿrmÿ nÿ gé. Kÿ krÿg ag vÿ jagnê ri ke tũ nÿtí gé, ãjag jÿngrê ki.

⁴² Ge ti nÿ, ěg ter kar kÿ ěg rÿr mãn ke ti. Ter jé ěg tóg ke mû, kÿ tóg ěg tÿ nén ũ fy krãn ri ke nÿ sir, ěg fár tÿ ga ra rã mû ti. Ęg rÿr mãn kÿ ěg pi(jé) ter mãn ke mû'.

Kejÿn tóg ěg mÿ'a tí, ěg ter ke to hã. Hã ra ěg tóg sÿnvÿ nÿtÿnh mû, ěg rÿr mãn kÿ. ⁴³ Krój ěg nÿtí. Hã ra ěg tóg tar nÿtÿnh mû, ěg rÿr mãn kÿ. ⁴⁴ Ũri ěg tóg tÿ ěprã ke nÿtí, kÿ ěg fár vÿ tÿ ěprã ke fár nÿ. Ęg rÿr mãn kÿ ěg tóg Topê kuprÿg jamã tá fár nÿtÿnh mû. Ęprã ěg fár nÿtí, kÿ ěg tóg tÿ ěprã ke nÿtí. Kÿ ěg tóg ěg tÿ Topê kuprÿg jamã tá ěg fár ũ venh ke ki kanhró nÿtí sir. Ęprã ke fár ve vén ěg tí. Kar kÿ ěg tóg Topê kuprÿg jamã tá fár ũ venh ke mû, ěprã ke fár ve kar kÿ. ⁴⁵⁻⁴⁶ Hã kÿ tag tóg rán kÿ nÿ, ha mÿ: “ũn ve ti, Adão ti vÿ rÿr nÿ ja nÿgtí. Jãvo ũ tÿ ěgno ti, Cristo ti vÿ ã kuprÿg tÿ nén kar rÿnrÿr han,” he ja tóg nÿgtí, Topê vÿ rá ki. ⁴⁷ Ũn ve ěn, Adão ěn vÿ ga tÿ há (r) nÿ, hã kÿ ti jykre tóg tÿ ěprã ke jykre nÿ. Cristo vÿ tÿ kanhkã tá ke nÿ. ⁴⁸ Ũn ve vÿ tÿ ěprã ke nÿ, kÿ ti krê kar vÿ tÿ ěprã ke nÿtí gé, ti mré. Jãvo Cristo vÿ tÿ kanhkã tá ke nÿ. Kÿ ti mré ke kar vÿ tÿ kanhkã tá ke nÿtí gé, ti mré. ⁴⁹ Ęprã ke ěn ve ri ke ěg nÿtí, ěg kar tÿ Adão ve kÿ. Kÿ ěg tóg kanhkã tá ke ěn ve ri ke nÿtÿnh ke mû gé, ěg tÿ Cristo ve kÿ, ěg rÿnrÿr mãn ken kÿ.

Jesus kãtÿg mãn ken kÿ tóg ěg kar han mãn ke mû

⁵⁰ Inh kanhkã', sÿ ãjag mÿ tag tó há han sór vÿ, sÿ ki kanhrãn há han kÿ, ha mÿ. Ęg fár tÿ ěprã ke tag pi(jé) Topê tÿ tÿ ěg pã'i nÿ venh ke mû'. Nén ter ke mû ěn pi(jé) nén ũ ter vãnĥ tá venh ke mû'. Topê vÿ ěg han mãn ke mû, ěg tÿ ve jé.

⁵¹ Kÿ sóg ãjag mÿ nén ũ tó sór mû gé, ãjag tÿ mÿ ja tũ ti, ha mÿ. Ęg kãmÿ ũ ag tóg ti jun ke pétÿm mû, kãgter ke tũ ag tóg nÿ. Kÿ Topê tóg ěg kar han mãn kãn ke mû, kurã ěn kã, ěg tÿ ti ki ge kÿ nÿtÿn kÿ. ⁵² Kÿ tóg ěg tÿ pan ke kar mrin ke ěn ri ke nÿnh mû, ti tÿ ěg han mãn ke ti, trombeta kyr rÿn kã. Trombeta kyr ěn vÿ mÿ há tÿnh mû, kÿ ũn kãgter mû ag vÿ rÿnrÿr mãn kãn ke mû, ag tÿ kãgter mãn ke tũ nÿ jé sir. Ęn kã tóg ěg han mãn ke mû gé sir, ěg tÿ ti jun ke pétÿm mû ra kãgter ja tũ ra. ⁵³ Ha vé, ti tÿ ěg fár kókrãnh mû tag tÿ ũ han tũ ra ěg tóg venh ke tũ nÿnh mû vÿ, kanhkã ti. Hã kÿ tóg ěg fár ter ke mû tag tÿ ũ han ke mû, ti han mãn kÿ, ti ter mãn tũ nÿ jé, kókrãnh mãn tũ nÿ jé. Kejÿn tóg kÿnh ke mû. ⁵⁴ Ęg fár kókrãnh mû tag tÿ tóg ũ han ke mû, ti kókrãnh vãnĥ nÿ jé sir. Ęg fár ter ke mû tag tÿ ũ han jé tóg ke mû, ti ter vãnĥ nÿ jé. Kurã ěn kã ěg tóg vÿnh rá tag venh ke mû gé, vãsÿ rán kÿ nÿ tag, hã vÿ: “tũg ti huri, ěg ter ke mû ti, ěg ter pãte rÿg kÿ,” he mû. “Topê vÿ tÿ tũg' hé, ěg ter ke mû tÿ. ⁵⁵ Kãgter kãn ja ěg tóg nÿgtí. Hã ra ěg tóg tag ve mãn ke tũ nÿ ha. Nén ũ tÿ ã prÿj tÿ ěg tugtãn tÿ ěg tén ri ke ti nÿ, ěg ter ke mû ti, hã ra Topê tóg tÿ tũg' hé,” he tóg, Topê vÿ rá ki.

⁵⁶ Topê vÿ mranh hã tugrÿn ěg tóg kãgter tí. Nén ũ tÿ ěg tugtãg tí prÿj ri ken hã vÿ, hã vÿ: ěg tÿ Topê vÿ mranh, he mû. Hã ra Jesus tóg tÿ tũg' he kãn, ěg tÿ Topê vÿ mranh tÿ. Kÿ tóg nén ũ prÿj ěn tÿ prÿj tũ nÿ ri ke nÿ sir. Ter mãn ke tũ ěg tóg nÿtí ha, kurã ěn kã. Topê vÿ ěg jÿvÿn tí. Ęg tÿ ti vÿ mranh hã tugnÿn ěg tóg kãgter kãn ja nÿgtí. ⁵⁷ Hã ra Jesus tóg tÿ tũg' hé huri.

Topê hã mÿ sóg vÿ há han mû, ti hã vÿ ěg tar han tí, ěg tÿ ti vÿ mranh mãn tũg jé. Ęg Senhor tÿ Jesus Cristo tugrÿn tóg ěg tar han tí, Topê ti.

⁵⁸ Tag to jykrén kÿ tar nÿtÿmnÿ, Topê to, ãjag tÿ ti ki rã tovãnĥ tũ nÿ jé. Ęjag to sóg há tãvÿ nÿ, inh kanhkã'. Ęg Senhor rãnhrãj han kãn sórmnÿ. Tag to jykrén nÿ, ha mÿ: ěg pi(jé) véké rãnhrãj tÿgtí', ěg tÿ ěg Senhor rãnhrãj han kÿ'. Ti kaja ve jé ěg tóg ke mû mÿr, kanhkã tá.

16

Ëg tỹ ãg mré Jesus ki ge ký nýtĩ ag jagãgtãn ke

¹ Ký sóg ãjag mỹ ãjag tỹ ù tỹ Topẽ ki ge ký nýtĩ ra jagãgtar nýtĩ ag mỹ jãnkamy jẽnẽnh ke ãn tó sór mũ gé sir, ãjag tỹ inh ki nén jẽmẽ sór mũ ti. Ga tỹ Galácia tá igreja krẽm vẽnẽh mãn tĩ ag mỹ sóg tag tó ja nĩ, sỹ ãjag mỹ tónh ke tag ti, ha mẽ. ² Domingo kar ki nén ù sĩ tỹ vurmỹ nĩmni, ãjag ãn tá. Û tỹ nén ù mág ãn tóg nén ù mág sĩ tỹ vurmỹ nĩm ke mũ gé, ký ù tỹ nén ù sĩ ãn tóg nén ù sĩ tỹ vurmỹ nĩm ke mũ gé. ãjag tỹ semana kar ki nĩm han ký tóg komẽr hã mág mũ sir. Ký tóg kar ký nĩ, sỹ ãjag ki jun mũ ra. ãjag tỹ inh kãtĩg ken jo vyr mỹ nĩm han ja tũ nĩn ký tóg há tũ nỹ. ³ Ký ùn kuprẽg nĩ gé, ag tỹ ãjag tỹ nén ù ma mũ jé, Jerusalém ra, ãjag tỹ tá ke fag mỹ nén ven sór mũ ti. Inh jun ký sóg ag jẽgnẽnh ke mũ, carta mré hã. ⁴ ãjag tỹ nén ù ãn éhé nĩn ký sóg hẽn ri ke mũn ma tĩg sór mũ gé, ký sóg ag mré tĩg mũ gé.

Paulo tỹ nén han sór mũ

⁵ Ký tóg, isỹ ga tỹ Macedônia mĩ kutẽnh ken ký sóg vãhã ãjag tá jun sór mũ sir. Isỹ Macedônia mĩ kutẽ sór vẽ. ⁶ Hã ra sóg ãjag mré nĩg mág sĩ han sór mũ, ti tỹ inh mỹ ki króm ken ký. Hẽn ri ke mũn sóg prỹg kusa fĩn rãm ke mũ, ãjag mré nĩ ki, ký ãjag tóg sir inh jagãgtãn ken ke mũ, isỹ kar hẽn ra tĩg ken ký. ⁷ Inh pi(jé) ãjag ve sĩ han sór mũ', hã ra sóg ver kutar nĩ, hã ký sóg kar hã ãjag venh tĩg sór mũ. Sỹ ãjag mré nĩ sór vẽ mỹr, ãg Senhor tỹ to há nĩn ký. ⁸ Ver sóg cidade tỹ Éfeso tag kã nĩ ki festa tỹ Pentecoste pêtẽm sór mũ. ⁹ Tag ki ke ag tóg mẽ há han mũ, inh vĩ ti, ù tỹ hẽn ri ke ag. Hã ra tag ki ver ù tỹ inh kato vãsãnsãn mũ ag vỹ e nýtĩ. Hã ký sóg Éfeso tag kã nĩg mág sĩ han sór mũ, sỹ kar ãjag venh tĩg jé.

¹⁰ Hẽn ri ke mũn Timóteo tóg ãjag ki jun ke mũ. Ký ti vĩ jẽmẽ há han nĩ, ti mỹ'ãg tũ nĩ jé, ti tỹ ãjag mré nĩn ký. Ëg Senhor rãnhraj han tóg tĩ mỹr, inh kóm. ¹¹ Ký ti to é he tũg nĩ, ti kyrũ hã ra. Ký ti tĩg ken ký ti jagãgtãn nĩ gé, ti tỹ jatun mỹ inh ki jun jé. Sỹ ti jãvãnh vẽ, ãg régre ag mré hã.

¹² Ëg régre tỹ Apolo mré sóg vẽnẽn gé. Ti mỹ sóg to vĩ mũ vẽ, ti tỹ ãjag venh tĩg jé, ãg régre tag ag mré hã, ù tỹ ãjag venh kãmũ tag ag mré. Hã ra tóg tĩg jãvãnh nĩ ver. Ti tỹ ti mỹ ki króm ken ký ti nẽji kejẽn ãjag venh tĩg ke mũ hã ra.

Jesus ki ge ký nýtĩ ag tỹ jagnẽ mĩ êkrén

¹³ ãjag kanẽ fãn nĩ. Ëg Senhor ki rã tovãnh tũg nĩ. Krónh ke tũg nĩ, tar nýtĩmni. ¹⁴ Ký ãjag tỹ nén ù kar han ký vẽnẽ kar to há nýtĩmni.

¹⁵ Ký sóg ãjag mỹ nén ù to vĩ sór mũ gé, Estéfanas to mỹr. Estéfanas fag vỹ Jesus ki ge vén ja nĩgtĩ, ãjag jamã tá, ga tỹ Grécia tag tá. Ký fag tóg Topẽ tũ fag ki rĩr nýtĩgtĩ, Topẽ tũ fag kar ki. ¹⁶ Hã ký sóg fag tó mũ ãjag mỹ. Ký fag vĩ jẽmẽmni. Ký Topẽ rãnhraj han mũ ag kar vĩ jẽmẽ kãn nĩ, ke gé, ãg mré rãnhraj mũ ag kar vĩ ti.

¹⁷ Estéfanas tóg inh ki jun há han, Fortunato ke gé, Acaico ke gé. Ag tỹ inh ki junjun ký inh fe tóg mrin ke mũ mỹr. Sỹ ãjag venh há tĩn ký tóg inh mỹ sér pẽ tĩ, sỹ ag ve ký, ãjag jẽgja kã ke vẽ mỹr, ag tỹ tỹ ãjag mré ke nýtĩn ký. ¹⁸ Inh mỹ ag tóg vĩ há han mũ ãjag to, ký ag tóg inh krĩ kusãg mũ sir. Ag tỹ ãjag krĩ kusãg ke vẽ gé. Û tỹ ge to há tãvĩ nýtĩmni.

¹⁹ Ga tỹ Ásia tá igreja krẽm vẽnẽmãn tĩ ag vỹ ãjag mĩ êkrég tĩ. Ký Áquila mré Priscila fag vỹ ãjag mĩ êkrén mág tĩ gé, fag tỹ ãjag mré ãg Senhor ki ge ký nýtĩn ký. Fag ãn krẽm fag tóg culto han tĩ. Fag ãn tá culto to kãmũ fag vỹ ãjag mĩ êkrég tĩ gé, ²⁰ kar ký ãg Senhor ki ge ký nýtĩ fag kar ke gé. Jagnẽ to há tãvĩ nýtĩmni, ký jagnẽ ki nhun ke ri ke han nĩ, Jesus mré ke kar ki, ãjag tỹ jagnẽ nĩg kãgmĩ ký.

²¹ Sỹ vãhã vėsóg ki ãjag mỹ rán vẽ, ù tỹ inh vĩ rán ja pãte, inh, hã vỹ: Paulo, he mũ. ²² Topẽ mỹ sóg to vĩ tĩ, ti tỹ ù tỹ ãg Senhor to há tãvĩ tũ ãn ag vóg kónãn kãn jé. "Marana tá," he sóg tĩ, hã vỹ: ha kãtĩg, Senhor, he mũ, ãjag vĩ ki.

²³ Ëg Senhor tỹ Jesus mỹ sóg to vĩ tĩ, ti tỹ ãjag tar han jé. ²⁴ ãjag jé isỹ ãjag to há tãvĩ nĩ ki kanhrãn, ãg tỹ Jesus Cristo ki ge ký nýtĩn ký.

1 CORINTO 16:24

272

1 CORINTO 16:24

Hã vĕ.

PAULO TỠ CARTA HAN: CORINTO TÃ KE AG MỠ CARTA Û

¹ Paulo tỡ rá vễ, ẽg rẻgre tỡ Timỏteo mrẻ. Jesus Cristo hã ne inh fẻg', isỡ tỡ ti apỏstolo jẻ jẻ, Topẻ tỡ inh kuprẻg kỡ. Isỡ Topẻ tỡ ag mỡ rỏn vẻ, ù tỡ cidade tỡ Corinto tỏ vẻnh mỏn tỡ ag mỡ, ù tỡ Grẻcia tỏ vẻnhmỏn tỡ ag mỡ ke gẻ. ² Ẽg jỏg tỡ Topẻ jẻ ỏjag tar han, ti jẻ ỏjag krỡ kuprỏg, ẽg Senhor tỡ Jesus Cristo ti ke gẻ.

Topẻ tỡ Paulo krỡ tỡ kỏnhvy' he

³ Topẻ mỡ sỏg vỡ hỏ han tỡ, ẽg Senhor tỡ Jesus Cristo panh ti mỡ, ẽg jỏg mỡ, ù tỡ ẽg jagỏgtỏn tỡ ẻn mỡ. Ẽg vẻsỡrẻnh kỡ tỏg ẽg krỡ tỡ kỏnhvy' he tỡ, Topẻ ti. Ti hỏ mỡ sỏg agradecer he tỡ mỡr. ⁴ Ti hỏ ne inh vẻsỡrẻnh mỡ ra inh krỡ tỡ kỏnhvy' he tỡ, inh jagtar tỡn kỡ. Ti tỡ inh krỡ tỡ kỏnhvy' he tugrỡn sỏg inh kỏnhkỏ ag krỡ tỡ kỏnhvy' he ki kỏnhrỏ nỡ ha, inh kỏnhkỏ ù tỡ nẻn ù jagy vẻg mỡ ra. ⁵ Cristo jagtar ja ẻn ri ke pẻ ve mỏg sỏg mỡr, hỏ kỡ Cristo tỏg inh krỡ kufy tỡ hẻn ri ke tỡ tỡ' he tỡ gẻ sir. ⁶ Hỏ ra sỏg ỏjag jagfy jagtar nỡ, ỏjag tỡ ti hỏ to tar nỡtỡn jẻ gẻ, ỏjag krenkren jẻ. Topẻ tỡ isar han kỡ tỏg inh kỏm ỏjag tar han ke mỡ gẻ sir. ỏjag tỡ inh kỏm jagtar nỡtỡn kỡ ỏjag tỏg inh kỏm ti to krỏnh kỏnh ke tỡ nỡ gẻ sir. ⁷ ỏjag ki ẻkrẻn mỏg sỏg tỡ, hỏ ra sỏg ki kỏnhrỏ nỡ, Topẻ tỡ ỏjag tar han ẻn ki. Ûri ỏjag tỏg hỏ ra inh mrẻ jagtar nỡtỡ, hỏ kỡ Topẻ tỏg ỏjag krỡ tỡ kỏnhvy' he tỡ gẻ, ti tỡ inh krỡ tỡ kỏnhvy' he tỡ ẻn ri ke han tỏg tỡ, ỏjag mỡ.

⁸ Inh kỏnhkỏ', ỏjag mỡ sỏg inh jagtar mỏg ja tỏ sỏr mỡ. Ga tỡ ỏsía tỏ sỏg nẻn ù jagy tỏvỡ ve ja nỡ, tỏ ag tỏg isỡ hẻn ri ke kren, kỡ sỏg: “ủri inh hỡn kren mỏn ke tỡ nỡ ha,” he ja nỡ. ⁹ “Ag tỡ isỡ tỡg' hẻnh ke hỡn,” he sỏg mỡ vẻ. ẻn kỏ sỏg Topẻ hỏ mỡ ẻkrẻg mỡ sir, isỡ vẻnhmỡ kren mỏn ke tỡ nỡn kỡ. “Ti hỏ ne inh kren han ki kỏnhrỏ nỡ,” he ja inh nỡ. “Ủn kỏgter mỡ ag rỡnrỡn mỏn ki kỏnhrỏ tỏg nỡ, kỡ tỏg inh kren han ki kỏnhrỏ nỡ gẻ,” he ja inh nỡ. ¹⁰ Kỡ tỏg inh kren han ja nỡ, iser kren mỡ ẻn kỏ, kỡ tỏg kejẻn inh kren han mỏn ke mỡ gẻ. Ti hỏ mỡ sỏg to vỡ tỡ, ti hỏ tỡ inh kren han jẻ. ¹¹ Kỡ iso vỏsỏn nỡ gẻ, iso Topẻ mrẻ vỡ kỡ, kỡ Topẻ tỏg ỏjag vỡ mẻnh mỡ. Ti tỡ ỏjag vỡ mẻ tugrỡn inh jagỏgtỏn kỡ ỏjag tỏg ti mỡ agradecer hẻnh ke mỡ. Kỡ ù tỡ hẻn ri ke ag vỡ Topẻ mỡ vỡ hỏ han ke mỡ, ti tỡ inh jagỏgtỏn ke tugrỡn.

Paulo tỡ Corinto tỏ ke ag venh kỏtỡg ja tỡ

¹² Ha vẻ, inh jykre tỏg tỡ ùn hỏ nỡ, ki kỏnhrỏ inh nỡ. Vẻnh kar mỡ sỏg nẻn ù hỏ hỏ han tỡ, vẻnh jykre kuryj, kỡ sỏg ki hỏ tỏ tỡ gẻ, Topẻ jykre han kỡ. Inh pi(jẻ) isỡ vẻsỏg ki nẻn to jykrẻn mỡ ẻn hỏ han tỡ'. Topẻ hỏ ne isar han tỡ', isỡ ti jykre ki krỏm jẻ. Kỡ sỏg ỏjag mỡ ti jykre hỏ kỏmẻn ja nỡgtỡ gẻ. ¹³ Tag hỏ rỏn isỏg tỡ gẻ, kỡ ỏjag tỏg isỡ rá ve kỡ (ỏjag tỏg) ki kỏnhrỏn ke mỡ gẻ sir. Ti pi(jẻ) mẻ jagy tỡ'. ỏjag tỡ ki kỏnhrỏn kỏn kỡ tỏg hỏ tỡnh mỡ. ¹⁴ ỏjag tỡ ki kỏnhrỏn sỡ tag kỏfỏr han kỡ tỏg hỏ tỡnh mỡ. Kỡ kurỏ ẻn kỏ, ẽg Senhor tỡ Jesus kurỏ ẻn kỏ tỏg ỏjag mỡ sẻr tỡnh ke mỡ, ỏjag tỡ inh ven kỡ. Kỡ tỏg inh mỡ sẻr tỡnh ke mỡ gẻ, isỡ ỏjag ven kỡ.

¹⁵ Tag to jykrẻn kỡ sỏg ỏjag ki jun kren ja nỡgtỡ. Isỡ ỏjag ki jun ke vẻ vẻ, isỡ ỏjag tar han jẻ. Isỡ vỏsỡ ỏjag tar han ja ẻn ri ke han mỏn ke vẻ vẻ. ¹⁶ Kỡ sỏg ỏjag ve kar kỡ (sỏg) ga tỡ Macedỏnia ra tỡg ke mỡ vẻ. Kar kỡ, isỡ Macedỏnia tỏ kỏtỡg mỏn kỡ sỏg ỏjag ve mỏn ke mỡ vẻ gẻ, ỏjag tỡ inh jagỏgtỏn kỡ inh mỡ jỏnkamy nỡmỡn' he jẻ vẻ vẻ, isỡ ga tỡ Judẻia ra tỡg hỏ han ke to. ¹⁷ Hỏ ra tỏg inh mỡ ki krov ja tỡ nỡ, hỏ kỡ sỏg kỏtỡg ja tỡ nỡ. Kỡ inh mỡ kỏnhir kỡ ỏjag mỡ: “kỏtỡg jẻ sỏg ke mỡ,” he ja nỡ'? Vỏ. Inh jykre pijẻ', isỡ kỏnhir kỡ tỏ tỡ ẻn ti. Kỡ sỏg jykrẻ rẻgre han tỡ nỡgtỡ gẻ. Ủn jykre rẻgre ag tỡ: “hej,” he mỡ ra ag tỏg han sỏr tỡ nỡ. Ge tỡ inh nỡgtỡ. ¹⁸ Topẻ hỏ ne ỏn vỏnh nỡ', hỏ ra tỏg ki kỏnhrỏ nỡ, inh jykre pir nỡ ti. ¹⁹ Topẻ kỏsin jykre hỏ han sỏg tỡ, Jesus Cristo jykre ti. Inh hỏ ne ỏjag mỡ ti kỏmẻn ja nỡ', Silas mrẻ, Timỏteo mrẻ ke gẻ. Ti pi(jẻ) ỏ tỡ: “hej,” he mỡ ra han ke tỡ nỡ'. Han ti tỡ, nẻn ù kar ti, Topẻ kỏsin ti. ²⁰ Topẻ hỏ vỡ ẻg mỡ ẻg tỡ nẻn vẻnh ke ti tỏ ja nỡgtỡ, kỡ ẻg tỏg ti kỏsin hỏ tugrỡn vẻg mỡ sir, ti panh tỡ ẻg mỡ nẻn tỏ mỡ ẻn ti. Hỏ tỏ sỏg tỡ, vẻnh kar mỡ,

Topê ón vánh ên hã tó sóg tĩ. Kĩ êg tóg ti hã mĩ vĩ há han tĩ sir, Topê hã mĩ, êg tĩ ti tĩ êg mĩ nén tó mũ ên to: “hã vê,” hen kũ. ²¹ Topê hã ne Cristo ki isar han, ãjag mré hã. Kĩ tóg êg kuprêg gé. ²² Kĩ tóg êg nĩgĩêg kũ êg vin tĩ gé. Ā kuprĩg jênêg tóg mũ êg mĩ. Ti tĩ êg mĩ Ā kuprĩg jênê tigrĩn êg tóg ki kanhró nĩtĩ, ti tĩ êg mĩ nén ũ kar vin ke mũ ên ti.

²³ Ha vé, ki hã sóg tó mũ, Topê ne ki kanhró nĩ'. Inh ón tĩ nĩ ra tóg inh vóg kónãn mũ vê. Isĩ ãjag to jũ tũ nĩ jé, hã jé sóg ãjag tá jun ja tũ nĩ ver, cidade tĩ Corinto tá. Sĩ tá jun ra sóg ãjag to jũnh ke mũ vê. ²⁴ Inh pi(jé) ãjag to tar han sór mũ'. Jesus hã ki ge kũ ãjag nĩtĩ, ti hã to tar ãjag nĩtĩ. Ājag fe tĩ mrin ke han sór sóg mũ vê, hã jé sóg ãjag to vāsãn tĩ vê.

2

¹ Hã kũ sóg tag to jykrén ja nĩ, ha mē: “ag kanê jun mãn sór tũ inh nĩ,” he sóg, “hã kũ sóg ag venh tĩg ke tũ nĩ ver,” he sóg ãjag to. ² Ha mē, isĩ ãjag kanê jun kũ ũ nĩ hĩn inh fe tĩ mrin kenh mũ'? Isĩ ãjag kanê jun kũ ũ tĩ inh fe tĩ mrin kenh ke tóg tũ tĩ. ³ Hã kũ sóg ãjag mĩ vênh rá ên jênê gé, ãjag tĩ inh kanê jun tũ nĩn jé gé, sĩ ãjag ki jun kũ. Inh jun kũ tóg inh mĩ há tĩnh mũ, ãjag tĩ inh fe tĩ mrin ken kũ. Tag to sóg jykrén tĩ gé, ha mē. “Ag tĩ inh fe tĩ mrin ke kũ tóg hĩn ag mĩ sér tĩ gé,” he sóg tĩ, ãjag to. ⁴ Sĩ ãjag mĩ carta ên rán mũn kũ sóg to fĩ mág mĩr, ãjag tigrĩn sóg kanê jur, ãjag tigrĩn sóg vênh mĩ en. Inh pi(jé) ãjag kanê jun sór ja nĩ'. Isĩ ãjag to há pē nĩn kũ sóg ãjag mĩ vênh rá ên han ja nĩgtĩ, ãjag tĩ isĩ ãjag to há nĩ tag ki kanhró nĩtĩn jé.

Êg tĩ jagnê mĩ vênh pãte fón ke

⁵ Ha mē, ãjag kãmĩ ũ tóg ãjag kanê jur han ja nĩ. Ti pi(jé) isavĩn kanê jun ja nĩ'. Ājag kar kanê jun ja tóg nĩ. Hên ri ke mũn sóg tó há han ja tũ nĩ, isĩ: “ãjag kar,” he kũ. Ājag kãmĩ ũn e kanê junjur han tóg hã ra, ti tĩ Topê vĩ mranh tigrĩn. ⁶ Kũ ãjag tóg hur ti mĩ vĩ kónãn. Ha ti továnh, gen kũ. ⁷ Vãhã ti mĩ vênh pãte fón nĩ, ti mĩ vênh vĩ há hã tómnĩ. Ke tũ nĩ (mũ) ra ti fe kaj tóg ti tén ke mũ, ha vemnĩ. ⁸ Hã kũ sóg ãjag mĩ tag to vĩ sór mũ vãhã, ha mē: ti mĩ ven nĩ, ãjag tĩ ti to há nĩtĩ ti. ⁹ Isĩ ãjag tĩ inh vĩ kri fig mũ ên ve sór ja vê, hã jé sóg ãjag mĩ vênh rá ên jênê ja nĩ, mĩr, ha mē. ¹⁰ Ājag tĩ ũ mĩ vênh pãte fón kũ sóg ti mĩ vênh pãte fón tĩ gé. Kejên sóg vênh pãte fón tĩ, ũ mĩ. Kũ sóg Cristo rĩnve ti mĩ vênh pãte fón tĩ, ãjag jagãgtãn kũ. ¹¹ Satanás tĩ êg tĩ hē ri ke tũ nĩn jé sóg vênh pãte fón tĩ. Ti tĩ nén to jykrén mũ ên ki kanhró êg tóg nĩ mĩr, Satanás tĩ nén to jykrén mũ ti.

Paulo krĩ kufy

¹² Ha vé, isĩ cidade tĩ Trôade tá jun ja nĩn kũ sóg tá ke ag mĩ Cristo kãme sér ên tó ja nĩgtĩ. Kũ ag tóg jēmê há han ja nĩgtĩ, êg Senhor tĩ ag krĩn kũ. ¹³ Hã ra sóg êg mré ke tĩ Tito ve ja tũ nĩ tá. Isĩ tá ti venh ke vê vê, hã ra tóg ki tũ nĩ, isĩ tá jun mũ ra. Hã kũ sóg ti to krĩ kufy nĩ ja nĩgtĩ. Hã kũ sóg ag mĩ: “isĩg ke vê,” he kũ tĩg ja nĩ sir, ga tĩ Macedônia ra, ti nón.

Jesus vĩ tĩ nén ger há ri ke nĩ

¹⁴ Hã ra sóg Topê hã mĩ vĩ há han tĩ. Ti hã ne inh jênêg tĩ', isĩ êmã kar mĩ tĩg jé, Cristo tigrĩn. Kũ vênh kar tóg ti tĩ tĩ ũn mág pē nĩ hã vég tĩ, ag tĩ inh jykre jagma êvánh kũ. Hã kũ vênh kar tóg ti ki kanhrãn mũ sir, isĩ ag mĩ ti tón kũ. Kũ tóg ag mĩ nén ger há kri nĩ nĩ, ag tĩ ti vĩ mên kũ. ¹⁵ Nén ger há tóg vênh kar kri rũm ke tĩ. Ri ke ti nĩ, isĩ vênh kar mĩ Cristo kãmén kũ, ag tĩ Topê ki kanhrãn jé. Vênh kar mĩ sóg ti vĩ tó tĩ, ũn krenkren mũ ag mĩ, ũn vãgfor kũ nĩtĩ ag mĩ ke gé. ¹⁶ ũn vãgfor kũ nĩtĩ ag tĩ inh vĩ mēg mũ ra kri fig tũ nĩn kũ ag tóg nũgme ki vár ke mũ. Kũ inh vĩ tóg ag mĩ nén ũ ter ger gy ên ri ke nĩ. Ag jãvo ũn krenkren mũ ag tĩ inh vĩ jēmê kũ ag tóg rĩnrĩr ke mũ, ag tĩ inh vĩ kri nĩm kũ. Kũ inh vĩ tóg ag mĩ êg tĩ nén ger há mē kũ êg fe tĩ mrin ke ên kri nĩ nĩ. Hã ra êg pi(jé) vēsóg ki vênh rãnrãj tag han há nĩtĩgtĩ'. ¹⁷ Ha vé, ũ ag vĩ Topê vĩ kãmén to ti kaja ve sór tĩ, jãnkamy ve sór to ag tóg Topê vĩ kãmén tĩ. Ke tũ nĩ kũ ag tóg ti vĩ tó ên tigrĩn vēsũ ũn mág han tĩ. Ag jãvo inh pi(jé) ti kaja ve sór tĩ', inh pi(jé) vēsũ ũn mág han sór mũ'.

Cristo ki rã kÿ sóg Topê rĩnve ti kãmén tĩ. Jykre pir han sóg tĩ gé mÿr. Kÿ ù tÿ inh jẽnêg mũ vÿ tÿ Topê ti nĩ.

3

Vẽnĥ jykre tãg

¹ Kÿ ãjag hÿn iso: “tÿ sóg ùn há nĩ, he tóg tĩ, Paulo ti,” he sór tĩ. Hã tũ vê. Û ag tóg ãjag mÿ carta to vĩ tĩ, kÿ ag tóg: “ùn há vÿ tÿ ti nĩ, hemnĩ iso, carta ki,” he tĩ, “kÿ vẽnĥ kar tóg vẽnĥ rá tag ve kÿ isÿ tÿ ùn há nĩ ki kanhró nÿtĩnh mũ,” he ag tóg tĩ. Inh pi(jé) carta tÿ ge ma tĩg sór mũ'. ² Inh mÿ ãjag tóg carta ri ke nÿtĩ. ãjag mĩ sóg êkrég tĩ, kÿ sóg vẽnĥ kar mÿ ãjag kãmén tĩ. Inh hã ki ag tóg ãjag jykre há vég tĩ, kÿ ag tóg isÿ tÿ ùn há nĩ ên ki kanhrãn mũ sir. Hã ki ãjag tóg carta ri ke nÿtĩ. ³ ãjag mÿ sóg Cristo jykre kãmén ja nĩ, kÿ ãjag tóg mĩ mũgtĩ. Kÿ vẽnĥ kar tóg ãjag jykre ve kÿ (ag tóg) Cristo ki kanhró nÿtĩ, kÿ ãjag tóg tÿ Cristo tÿ vẽnĥ rá ri ke nÿtĩ, sÿ carta han ja ri ke. Hã ra ti pi(jé) caneta tÿ rán kÿ nĩ'. Topê kuprĩg tÿ tóg rán kÿ nĩ, ùn rĩr nĩ ên kuprĩg tÿ tóg rán kÿ nĩ, carta ên ti. Kÿ tóg pó tÿ rán jafã kri rán kÿ nĩ tũ nĩ gé. Êg ki tóg rán kÿ nĩ, kÿ tóg tÿ êg jykre nĩ sir, carta ri ke ên ti.

⁴ Topê hã vÿ Cristo tÿ isar han tĩ, hã kÿ sóg ãjag ki carta tÿ ge han ki kanhró nĩ. ⁵ Inh pi(jé) vêsóg ki nén ù há to jykrén ki kanhró nĩ'. Inh pi(jé) vêsóg ki nén ù há han ki kanhró nĩ gé'. Hÿ, Topê hã ne isar han tĩ', isÿ nén ù há han ke to. ⁶ Ti hã ne inh krĩn tĩ', isÿ ti jykre tãg kãmén jé, vẽnĥ kar mÿ. Ti pi(jé) êg mÿ vãsÿ nén rán kÿ nĩ ên tó mãn mũ'. Vãhã tóg êg mÿ ã kuprĩg jẽnêg mũ. Vẽnĥ jykre tãg to ken hã vê, hã vÿ: “Topê kuprĩg tÿ êg krĩn mũ,” he mũ. Ha vé, Topê kuprĩg vÿ êg rĩn tĩ, jãvo vãsÿ Topê vĩ rán kÿ nĩ ên vÿ êg tén ke ja nĩgtĩ, êg tÿ mranh kÿ.

⁷ Topê vĩ tÿ vãsÿ rán kÿ nĩ ja ên vÿ pó kri rán kÿ nĩ ja nĩ, ù tÿ êg tén mũ ên ti. Moisés tóg pó kri ti rán ja nĩ, Topê tÿ ti mÿ tón kÿ. Ti tÿ ti mÿ tó kar kÿ ti kakã tóg jẽngrê nĩ ja nĩgtĩ, Moisés ti. Kÿ tóg Israel ag mÿ e ja tĩ, Moisés kakã ki êvãnh tũ ja ag tóg nĩgtĩ sir, ti tÿ kakã jẽngrê nĩn kÿ. Hã ra tóg kejên tũ' he ja nĩgtĩ gé, ti kakã jẽngrê ti. ⁸ Kÿ ù tÿ Topê kuprĩg kãmén mũ ên hÿn tóg Moisés kakã jẽngrê kãfór nĩ, ti sĩnvĩ kãfór ti nĩ. ⁹ Moisés vÿ Topê tÿ êg vóg kónãn ke ên tó ja nĩgtĩ. Hã ra Topê vĩ tag tóg ti kakã jẽngrê han, ti sĩnvĩ han ti. Jãvo sóg Topê tÿ êg mÿ vẽnĥ pãte fón ke ên hã tó tĩ. Ti tÿ êg to “jykre há ag nÿtĩ ha,” he mũ ên tó sóg tĩ. Topê vĩ tag tugrĩn sóg Moisés sĩnvĩ kãfór pẽ nĩ. ¹⁰ Kÿ vãsÿ nén sĩnvĩ ên tóg vãhã êg mÿ sĩnvĩ tũ nĩ ha, vãsÿ jẽngrê ên tóg êg mÿ jẽngrê tũ nĩ ha, êg tÿ ù tãg tag sĩnvĩ ve kÿ, êg tÿ ù tãg jẽngrê ven kÿ. Ûn tãg tag vÿ nén kar sĩnvĩ kãfór nĩ. ¹¹ Vãsÿ rán kÿ nĩ ja ên tóg tũ' he ja nĩ. Kÿ ù tÿ tũ' he mũ ên tóg sĩnvĩ ja nĩgtĩ gé. Ti jãvo isÿ vẽnĥ jykre tó mũ tag vÿ tũ' henĥ ke tũ pẽ nĩ, hã kÿ tóg ùn si sĩnvĩ ên kãfór nĩ.

¹² Êg tÿ tag venĥ ke jãvãnh sóg mũ mÿr. Hã kÿ sóg jamã hár(a) tó mũ, inh pi(jé) sÿ ag mÿ tó jé to mÿ'ãg mũ'. ¹³ Moisés ri ke han tũ sóg nĩ. Kur tÿ tóg vẽnĥ kri fón ja nĩ. Kÿ tóg vẽnĥ pugrĩn ja nĩ, ti tÿ ã kakã jẽngrê ên péju jé. Hã ra tóg komêr hã tũ' he ja nĩ, ti jẽngrê ên ti. Hã kÿ tóg kur krêm vẽnĥ péju, Moisés ti, Israel ag tÿ ti jẽngrê vég tũ nĩ jé. ¹⁴ Hã ra ag tóg ùri ki kagtĩg nÿtĩ gé ver. Kyvó ri ke ag nÿtĩ, kutu, Israel ag. Ag tÿ vãsÿ rán kÿ nĩ ên to ken kÿ tóg ag mÿ Moisés vẽnĥ pugrĩn kÿ nĩ ên ri ke nĩ, ti pãkrĩ ri ke. Ag tÿ ki kagtĩg to ken hã vê. Cristo hã tugrĩn êg tóg vãsÿ nén rán kÿ nĩ ên to jykrén há han mũ ha, hã ra ag tóg ki kagtĩg nÿtĩ jãvo. ¹⁵ Hã kÿ ag tóg Moisés tÿ nén rán mũ to ke ên mẽg tĩ, hã ra ag tóg to jykrén tũ nĩgtĩ, kÿ tóg Moisés vẽnĥ pugrĩn ên ri ke nĩ ag mÿ, ti pãkrĩ ên ri ke. ¹⁶ Kejên ù tóg êg Senhor ki rã mũ, ag kãki ù. Kÿ tóg vãhã ag tÿ ti vẽnĥ pugrĩ vÿm ri ke nĩ. ¹⁷ Hã kÿ tag tóg rán kÿ nĩ, Topê vĩ rá ki, ha mẽ: Moisés tÿ êg Senhor mré vêmén kÿ tóg ã vẽnĥ pugrĩn tÿ vÿm ke ja nĩgtĩ,” he ja tóg nĩ, Topê vĩ rá ki. Topê kuprĩg to ken hã vê, êg Senhor he mũ tag ti. Kÿ êg Senhor kuprĩg hã ne êg kygvãn ke mũ', êg tÿ ti vĩ ki króm ke to. ¹⁸ Hã kÿ tóg êg mÿ ti vẽnĥ pugrĩn tÿ vÿm ke ja ri ke nĩ, kÿ êg tóg êg Senhor sĩnvĩ ên, jẽngrê ên ve há han tĩ. Êg tÿ vẽnĥ ve jafã ki nén ù ve há ên ri ke tóg nĩ sir. Êg tÿ êg Senhor ki êvãnh kÿ êg tóg ti ri ke nÿtĩnh ke mũ gé. Komêr hã êg tóg ve ù han ke mũ, ti ve ên ri ke, êg tÿ ti tugnÿm kÿ, êg tÿ êg Senhor tugnÿm kÿ, ti kuprĩg ti.

4

Paulo krój nĩ

¹ Inh rãnrãj hã vë, Topë tỹ inh mỹ vënh rãnrãj nĩm jan hã vë. Kỹ tóg inh jagãgtãn mũ gé, isỹ ti rãnrãj to krónh ke tũ nĩ jé. ² Hỹ, ù ag tóg nén tỹ ãg mỹ'ãg han tĩ ên han tĩ, kuty tá, ù tỹ ag vég tũ nĩn jé. Vënh jykre tỹ ge tovãnh kãn inh huri mýr. Kỹ sóg ãjag mỹ ón tũ nĩgtĩ gé, ãjag lograr henh ke tũ sóg nĩ gé. Ón kỹ sóg: “Topë vỹ tag tó ja nĩ,” he tũ nĩ gé. Ki hã sóg tó tĩ. Topë rĩnve sóg vëmén tĩ, hã kỹ sóg ón tũ nĩgtĩ. Û tỹ isugnỹm mũ ên vỹ ki kanhrãn kãn ke mũ, inh jykre ki. ³ Kỹ ù tóg kejẽn ki kagtĩg nỹtĩ, isỹ Jesus kãme sér tó mũ ên ki. Ag mỹ tóg nén ù péju kỹ nĩ ri ke nĩ. Û tỹ vãgfor kỹ nỹtĩ ag vë, hã kỹ ag tóg ki kanhrãn tũ nĩgtĩ. ⁴ Kyvó ag nỹtĩ, krĩ tũ ag nỹtĩ. Jesus ki ge sór tũ ag nỹtĩ, Satanás tỹ ag kyvó nĩm ti kỹ. Êprã pã'i ag kri ke vỹ tỹ ti nĩ, Satanás ti. Ti tỹ ag kyvó nĩm ti kỹ ag tóg Cristo kãme tag to jykrén tũ nĩgtĩ. Ti jẽngrẽ vég tũ ag tóg nĩgtĩ, ti sĩnvĩ ti. Cristo hã vỹ tỹ Topë kãnhvég ri ke nĩ, ti ve ri ke.

⁵ Inh pi(jé) inh jykre kãmén tĩ'. Jesus Cristo hã kãmén sóg tĩ, ti tỹ tỹ ãg Senhor nĩ ti. Jãvo sóg tỹ ãjag camarada ri ke nĩ, isỹ Jesus to há nĩn kỹ. ⁶ Ha vé, ù tỹ kutyg mũ ra kurãg han mũ ên tóg ãg ki kurã han mũ gé sir, Topë ti, ãg tỹ ki kanhrãn jé, Topë tỹ tỹ ùn mág nĩn ki. ãg tỹ Cristo ve kỹ ãg tóg Topë ki kanhrãn tĩ. Cristo vỹ tóg Topë ve hã pẽ nĩ. ãg ki kurã to ken hã vë, hã vỹ: Topë ki kanhró he mũ.

⁷ ãg tỹ tỹ êprã ke nỹtĩ (hã) ra tóg ãg kanhrãn sór tĩ, kỹ tóg ãg tỹ go'or tỹ kukrũ han kỹ kãki jãnkamy e vin ên ri ke nĩ. ãg hã vỹ tỹ go'or tỹ kukrũ ên ri ke nỹtĩ, ãg krój nỹtĩn kỹ, inh ke gé. Hã ra tóg ãg kanhrãn tĩ, vënh kar tỹ ti hã tỹ tỹ ùn tar tãvĩ nĩ ên ve je. Jãnkamy ri ke to ken hã vë. ãg pi(jé) tar nỹtĩ'. Û tỹ ãg tar han mũ vỹ tỹ Topë ti nĩ. ⁸ Inh krój nĩ ra Topë tỹ isar han mũ vë, ha vé ha. Nén kar tóg inh kutãn tĩ, hã ra inh pi(jé) to krĩ kufy han tĩ'. Kejẽn tóg inh jykre tũ tĩgtĩ, kỹ tóg isỹ: hỹ mỹ vỹ? he ja há tĩgtĩ, hã ra inh pi(jé) to krónh ke tĩ'. ⁹ Inh vóg kónãn ag tóg tĩ, hã ra Topë pi(jé) isovãnh tĩ'. Inh rỹnh ag tóg tĩ, hã ra ag pi(je) isén tĩ'. ¹⁰ Kurã kar ki sóg Jesus vësýrénh ên ri ke han tĩgtĩ. Hã tugrĩn vënh kar tóg Jesus rĩr nĩ tag venh ke mũ gé, inh vësýrénh tugrĩn. ¹¹ Kurã kar ki sóg ter kren tĩ, Jesus tugrĩn. Hã ki Jesus rĩr nĩ tóg inh ki ve há tĩ, inh fár vag ke mũ ra. ¹² Iser kren kỹ ajag tóg tar nỹtĩ jãvo, rĩnrĩr ãjag nỹtĩ.

¹³ Tag vỹ Topë vĩ ki rãn kỹ nĩ, ha mẽ: “Topë vĩ kri nĩm inh, hã kỹ sóg tó,” he ja tóg nĩgtĩ, Topë vĩ rá ki. Topë vĩ tag hã vỹ inh jykre han tĩ, hã kỹ sóg tó tĩ gé. Kri fig sóg tĩ, hã kỹ sóg tó tĩ mýr. ¹⁴ Topë ne ãg Senhor tỹ Jesus rĩn mãn ja nĩ'. Ên vỹ inh rĩn mãn ke mũ gé, ki kanhró sóg nĩ. Kurã ên kã tóg ãjag mré inh jé prër ke mũ, ãg tỹ ti mỹ vënh ven jé. ¹⁵ ãjag tugrĩn sóg ti jagy tag ve kãn tĩ. Kỹ komër hã ùn e tóg Topë tỹ ag jagãgtãn tag mẽnh ke mũ. Vënh grun jé ãg tóg ke mũ, kỹ ùn e tóg sir ti mỹ vĩ há han ke mũ. Kỹ Topë to vĩ há han mũ ag tóg e tãvĩ nỹtĩ sir. Topë tỹ tỹ ùn mág nĩn hã vë.

ãg tỹ Jesus ki ge kỹ nỹtĩn kỹ ãg krenkren ke

¹⁶ Hã kỹ sóg to krónh ke jãvãnh nĩ. Ha vé, inh fár tag tóg krój nĩ, komër hã tóg ter sór mũ, ti vag jé. Hã ra inh kuprĩg tóg tar nĩ jãvo. Kurã kar ki tóg vënh han mãn tĩ, Topë tỹ isar han kỹ, inh kuprĩg ti. ¹⁷ Tag ki sóg ti jagy vég tĩ, hã ra tóg inh mỹ kãnhvy nĩ. Tũ' he jé tóg ke mũ, tag ki ti jagy ti. Tá ãg tóg nén ù há tãvĩ venh ke mũ, ãg tỹ tag ki ti jagy ve ja tugrĩn, hã ra tóg tũ' he jãvãnh nĩ, ãg tỹ tá nén venh ke mũ ên ti. Ki kagtĩg ãg nĩ ver, hã ra tóg há tãvĩ nĩnh mũ, ãg tỹ tag ki nén ù há ve kãfór ti nĩnh mũ, tá. ¹⁸ Hã ve sór inh nĩ, hã mĩ sóg êkrég tĩ. Ver ãg tóg vég tũ nĩgtĩ, sỹ nén ve sór mũ tag ti. Hã kỹ sóg ãg tỹ nén (ũ) vég mũ tag to jykrén sór tũ nĩgtĩ. ãg tỹ nén (ũ) vég mũ tag vỹ tũ' henh ke mũ. ãg tỹ ùri nén (ũ) vég tũ ên vỹ tũ' henh ke tũ nĩ, ãg tỹ tá nén venh ke mũ ên ti.

5

¹ ãg fár vỹ ãg pãjó ri ke nĩ. Tũ' he jé tóg ke mũ, ãg fár ti. Hã ra Topë ne ãg mỹ ãn tãg ri ke han ke mũ', kãnhkã tá'. Hã ra tóg ãg tỹ tag ki ãn han ri ke tũ nĩ. Tũ' he jãvãnh tóg nĩ, Topë tỹ ãg jamã tãg han mũ ti. ² Tag ki ãg tóg vësýrénh tĩ, ãg fár tỹ ãg pãjó ri ke tag ki.

Kỹ tóg ãg tỹ kanhkã tá ãg jamã tãg ãn venh há tí. Hã jé ãg tóg prẽr tí. Kỹ tóg ãg tỹ kur tãg tu ri ke nĩ. ³ ãg tỹ kur tu kỹ ãg kator tũ nỹtĩ. ãg kur ri ke ti nĩ, kanhkã tá ãg jamã ti, ãg tỹ ãg fãr tãg tun kỹ. ⁴ Ha vé, ki hã sóg tó mũ. Tag ki, ãg tỹ ãg fãr tỹ pãjó ri ke tag ki nỹtin kỹ ãg tóg vësýrénh tí, ãg mũ ãg ter jãvãnh tĩn kỹ. ãg mũ tóg ãg rĩr hã tag tỹ kanhkã tá jun há tí vë, kỹ tóg ãg tỹ tag ki ãg kur kunũg tũ ra ãg tỹ kanhkã tá jun kỹ ãg kur tãg tu ri ke nĩnh mũ, ãg mũ. Kỹ ãg tỹ ãg fãr tãg ve kỹ ãg fãr si tóg tũ' he mũ, ãg ter tũ ra. Tag hã tóg ãg mũ há tĩnh mũ vë. ⁵ ãg tỹ kanhkã tá ãg fãr tãg venh ke jé Topẽ tóg ãg mũ vënh jykre nĩm, kỹ tóg ãg mũ ã kuprĩg jẽnẽ gé. Hã ki ãg tóg ki kanhró nỹtĩ, ãg tỹ tá nén (ũ) venh ke mũ ãn ki.

⁶ Hã kỹ tóg inh mũ sér tí. ãg tỹ ver ga kri mũn kỹ ãg tóg ãg Senhor vég tũ nĩgtĩ ver. ⁷ ãg tỹ ti vég tũ ra ãg tóg ti vĩ kri fig tí. ⁸ Kỹ sóg kanẽ jur mãn tũ nĩ ha. Isỹ inh fãr tỹ pãjó ri ke tag tovãnh há tóg tí, sỹ ãg Senhor mré nĩ jé, inh jamã pẽ tá. ⁹ Hã kỹ sóg vãsãn tí, inh jykre tỹ ti mũ há nĩ jé. Isỹ tag kã nĩ kỹ sóg vãsãn tí, kỹ sóg tá vãsãn ke mũ gé, sỹ tá ti mré nĩnh ken kỹ.

¹⁰ Ha vé, ãg kar vỹ Cristo mũ vënh ven ke mũ, ti tỹ ãg jykre tugnỹm jé. Kỹ tóg ãg mũ nĩm ke mũ, ãg tỹ tag ki nén (ũ) han mũ kaja ti. Û tỹ tag ki nén (ũ) há han mũ ãn tóg ã tũ kajan venh ke mũ gé, kỹ ù tỹ tag ki nén (ũ) kórég han mũ ãn ag tóg ãjag vësýrénh venh ke mũ gé sir.

Cristo tỹ ãg jykre si tỹ tũ' he

¹¹ Ha vé, ãg Senhor kamẽg sóg tí, hã kỹ sóg ãprã ke ag mũ ki hã tó tí, ag tỹ ti ki ge jé. Topẽ hã ne inh ki kanhró kar nĩ'. Kỹ ãjag hỹn, ãjag tỹ nén to jykrén há han kỹ (ãjag hỹn) inh ki kanhró nỹtĩnh ke mũ gé, he sóg tí. ¹² Inh pi(jé) ãjag mũ: “ũn mág vỹ tỹ inh nĩ,” he sór tí'. Hã ra sóg ãjag mũ vënh kãmén mũ, ti tỹ ãjag mũ sér tí jé, sỹ ãjag mũ nén (ũ) kãmén mũ ãn tugrĩn, ãjag tỹ iso: “jykre há tãvĩ ti nĩ,” he jé. Tag tómnĩ, ù tỹ vësỹ tỹ ùn mág han sór mũ ag mũ. Û tỹ ge jykre vỹ sĩnvĩ nĩ ve nĩ, hã ra tóg ãg tỹ ve há han kỹ (tóg) krój nĩ, ag jykre ti. ¹³ Ha vé, krĩ tũ inh nẽji nĩ. Topẽ jykre han tugrĩn sóg krĩ tũ nĩ ve nĩ. Kejẽn sóg krĩ há han tí gé. ãjag tugrĩn ke vë, inh krĩ há ti. ¹⁴ Cristo hã vỹ tỹ inh fe nĩ, hã kỹ sóg vënh kar to há nĩ. Tag to sóg jykrén mũ, ha mẽ: vënh kar jagfỹ tóg ter ja nĩ, Cristo ti, kỹ ãg kar jykre si vỹ tũ' he mũ sir, ti jamẽn kỹ. ¹⁵ Ti hã ne vënh kar jagfỹ ter ja nĩ'. Hã kỹ ãg pi(jé) tỹ ãg tũ nỹtĩ', ùri'. Ti tũ vỹ tỹ ãg nỹtĩ, ti tỹ ãg jagfỹ ter ja nĩnh kỹ, ti tỹ ãg jagfỹ rĩr mãn ja nĩnh kỹ ke gé. Kỹ ti hã ne ãg mũ ãg tỹ nén han ke mũ ãn tó tí', ùri'.

¹⁶ Vãsỹ ãg tóg ãg tỹ vësóg ki nén (ũ) to jykrén kỹ (ãg tóg) ãprã ke jykre to: “tag vỹ há nĩ, tag vỹ kórég nĩ,” he ja nĩgtĩ. Ûri ãg tóg vësóg ki tag to jykrén mãn ke tũ nĩ ha. Cristo to ãg vësóg ki jykrén mãn ke tũ nĩ gé, ãg tỹ vãsỹ vësóg ki ti to jykrén' he ja ãn ri ke tũ vë ha, ùri. ¹⁷ Hẽ ri ken kỹ? Cristo tỹ ãg han mãn kỹ mũr. Ti ki ge kỹ ãg nỹtĩ, hã kỹ tóg ãg han mãn ja nĩ. ãg jykre si tóg tũ tí ha, ãg tỹ nén han ja ãn tóg tũ tí ha ke gé. Ûri ãg tóg tỹ ùn tãg nỹtĩ ha, ãg krĩ, ãg jykre ti ke gé. ¹⁸ Topẽ tỹ nén han mũn hã vë. Topẽ kato vãsãn ãg tí vë, hã ra ãg tóg ùri tỹ Cristo mré ke nỹtĩ ha, Topẽ tỹ ãg han mãn kỹ, Cristo tugrĩn. Kỹ tóg ãg mũ vënh rãnhraj tag nĩm mũ gé sir, ãg tỹ vënh kar mũ: tỹ Cristo mré ke nỹtĩmnĩ, he jé. ¹⁹ Ha vé, Topẽ vỹ Cristo jẽnẽ, ti tỹ ãg tỹ tỹ ti mré ke nỹtĩ han jé, ãprã ke kar tỹ ti ki ge sór jé. Kỹ tóg ãg tỹ ti vỹ mranh tỹ tũ' he sór mũ gé sir, ãg tỹ ti kaja kórég vég tũ nĩ jé. Kỹ tóg ãg mũ: ha vënh kar mũ tó, isỹ ag to há nĩ sór mũ ti,” he ja nĩ gé.

²⁰ Cristo hã ne inh jẽnẽg mũ', isỹ ti jiji tó jé. Kỹ Topẽ tóg vënh kar jyvẽn tí, kỹ sóg hã tó jẽ nĩ. Hã kỹ sóg Cristo jyjy tó kỹ (sóg) ãjag mũ tag to vỹ sór mũ, ha mẽ: “Topẽ to há nỹtĩmnĩ, ti kato vãsãn mãn sór tũg nĩ,” he sóg mũ. ²¹ Jesus pi(jé) Topẽ vỹ mranh ja nĩgtĩ'. Hã ra tóg ãg tỹ ti vỹ mranh ja ãn kajãm kãn. Kỹ tóg ãg mũ Topẽ jykre kuryj ãn nĩm mũ sir, ãg jagfỹ kajãm kar kỹ.

6

¹ Topẽ mré sóg rãnhraj tĩgtĩ. Hã kỹ sóg ãjag jyvẽn mũ, ãjag tỹ Topẽ vỹ ki króm jé. ãjag tỹ ti vỹ ki króm tũ nĩnh kỹ tóg fagrĩnh mũ ãjag jagãgtãn nĩ. ² Ti hã ne tag tó ja nĩ', ha mẽ:

sỹ ājag jagāgtan ke kurā ki sóg ājag tỹ inh mỹ nén to ví mũ ên han ke mũ. Ājag krenkren ke kurā ki sóg ājag krenkren han ke mũ,” he ja tóg nĩ, Topê ti. Ājag krenkren ke kurā vỹ hur jun, ha mẽ. Ūri tóg êg krenkren han sór mũ, Topê ti.

³ Kỹ sóg nén ũ vènhmỹ han tũ nĩgtĩ sir, ũ tỹ iso vènh jykre kórég tó tũ nĩjé, inh rānhrāj to. ⁴ Vènh jykre há mĩ sóg tĩ mỹr, isỹ tỹ Topê camarada jèn kỹ, kỹ inh jykre tóg vènh kar mỹ ve há tĩ. Isỹ nén ũ jagy vég mũ ra sóg ti to krónh ke tũ nĩgtĩ, ijagtar nĩ ra, inh kanê jur mũ ra. ⁵ Kejên ag tóg inh mrānmrān tĩ, vèseja kátá ag tóg inh fón tĩ, vènh kar tóg kejên inh kri rũv tĩ. Kejên sóg inh rānhrāj tỹ inh kutān to jagtar tĩ, kejên sóg nũr tũ nĩgtĩ, kejên sóg vèjên vég tũ nĩgtĩ. ⁶ Isỹ ti jagy vég mũ hã ra ijykre tóg tỹ ũn há nỹ, Topê ví ki kanhró mág sóg nĩ, vènh kar to sóg fe nĩ, vènh kar mỹ sóg komêr hã ví tĩ, vènh kar tỹ isỹ tỹ Topê camarada jê tag ki kanhrān kãn jé. Topê kuprīg vỹ tỹ inh jagrê nĩ, hã kỹ sóg vènh jykre kuryj to tar nĩ. Inh pi(jé) ón kỹ ũ to há nĩ. ⁷ Ki hã tó sóg tĩ. Topê hã ne isar han!. Ti hã ne inh mỹ ā jykre kuryj nĩm!, kỹ tóg tỹ isỹ tỹ rárá jafā nĩ, Topê jykre há ên ti. Inh kren han tóg, Topê ti, ti tỹ inh mỹ vènh jykre kuryj nĩm ti kỹ, kỹ ag tóg ti jykre hã tugrĩn (ag tóg) ājag jykre kórég vég tĩ gé.

⁸ Kejên ag tóg inh mỹ ví há han tĩ, kejên ag tóg iso é he tĩ. Kejên ag tóg iso ti kórég kar tó tĩ, kejên ag tóg iso nén ũ há tó tĩ. Kejên ag tóg iso: “ti ón nê,” he tĩ, hã ra sóg ón vānh nĩgtĩ. ⁹ Ū tóg kāmĩ inh ki kagtīg nĩ ve nỹtĩ, hã ra vènh kar tóg inh ki kanhró nỹtĩ. Ter kren tỹ hên ri ke han sóg tĩgtĩ, hã ra sóg rĩr tĩ nĩ ver. Inh vóg kónān ag tóg tĩ, hã ra ag tóg isén ja tũ nĩ. ¹⁰ Inh fe kaj tóg tĩ, ge ra tóg inh mỹ sér tĩ. Jagtar sóg tĩ, hã ra sóg ũ tỹ hên ri ke ag jagāgtān tĩ, ag mỹ Topê ví tón kỹ. Nén ũ tỹ isóg tũ tũ nĩ, hã ra Topê tỹ êg mỹ nén nĩm mũ ên kar vỹ tỹ isũ nỹtĩ.

¹¹ Ājag hã mỹ sóg ijagtar tag kāmén mũ, tó kãn sóg mũ, ājag mỹ, isỹ ājag to há tãví nĩn kỹ. Ājag hã to sóg fen mág kỹ nĩ. ¹² Inh pi(jé) ājag to kórég nĩ!. Ājag hã ne iso há tũ nĩ ve nỹtĩ!. ¹³ Inh krê ri ke ājag nỹtĩ. Hã kỹ sóg ājag mỹ tag to ví sór mũ, ha mẽ: “isỹ ājag to há kóm iso há nỹtĩmnĩ, iso fe mág nỹtĩmnĩ,” he sóg mũ.

Ū tỹ Jesus ki ge tũ ag pi(jé) tỹ êg mré ke nỹtĩ

¹⁴ Ū tỹ Jesus ki rá tũ mré jykrén sór tũg nĩ. Tỹ ag êg mré ke tũ nỹtĩ. Hã kỹ ũn jykre pāno ag mré jykrén sór tũg nĩ gé, ājag tỹ vènh jykre kuryj han kỹ nỹtĩn kỹ. Kurā pi(jé) tỹ kuty mré ke nĩ!. ¹⁵ Cristo pi(jé) Japo mré jykrén tĩ!. Kỹ ũ tỹ ti ki rá kỹ jê pi(jé) ũ tỹ ti ki rá tũ mré jykrén há nĩnh mũ!. ¹⁶ Kỹ Topê jo ĩn pi(jé) tỹ ón kỹ topê jo ke nĩ!. Ha vé, Topê jo ĩn vỹ tỹ êg nỹtĩ, ũn rĩr mũ jo ĩn. Ti hã ne tag tó, ha mẽ: “ag ki sóg ijamā han ke mũ, ag mré sóg tũg ke mũ, ag Topê vỹ tỹ inh nĩnh mũ, kỹ ag vỹ tỹ inh povo nỹtĩnh mũ,” he ja ti nĩgtĩ. ¹⁷ Hã kỹ êg Senhor tóg tag tó, ha mẽ: “ag ré kỹ mũmnĩ, vyrĩmỹ nỹtĩmnĩ. Vènh jykre kavéj han tũg nĩ, kỹ sóg ājag mỹ: ha kāmũ jêg, henh ke mũ. ¹⁸ Ājag jóg vỹ tỹ inh nĩnh mũ, kỹ ājag vỹ tỹ inh krê nỹtĩnh mũ,” he tóg, êg Senhor ti, ũ tỹ nén (ũ) kar han ki kanhrān kỹ nĩ ên ti,” he ja tóg nĩgtĩ, Topê ví rán ki.

7

¹ Inh kanhkā!, inh fe vỹ tỹ ājag nỹtĩ. Hã kỹ sóg ājag mỹ tag tó mũ. Êg hã mỹ tóg tó mũ, Topê ti, ti tỹ tỹ êg jóg mág nĩ tag ti, kỹ êg tóg ti venh ke mũ. Ājag tỹ ti ve hã jé nén (ũ) kavéj ên tovānh kãn nĩ, ājag jānhkri nỹtĩ jé. Nén (ũ) kavéj han tũg nĩ, to jykrén tũg nĩ gé. Komêr hã jykre há tãví nỹtĩ sórmnĩ. Topê tũ vỹ tỹ êg nỹtĩ, kỹ ti kamêg nĩ, ti jykre kuryj ên ri ke nỹtĩ sórmnĩ.

Paulo fe tỹ mrin ke

² Iso fe mág han mǎn nĩ, ha mẽ. Inh pi(jé) ũ mỹ vènh jykre pāno han sór tĩ!, inh pi(jé) ũ krĩn kónān sór tĩ!, inh pi(jé) ũ tỹ nén ũ péju sór tĩ!. ³ Isỹ ājag mỹ tag tó mũ jāvo sóg ājag to kórég tũ nĩ. Ājag mré ke vỹ tỹ inh nĩ, kỹ êg tóg jatun mỹ jagnê mré mũ mũ, jagnê mré kǎgter êg tóg ke mũ gé, hên ri ke mũn. ⁴ Inh mỹ ag tóg vènh ví há tónh ke mũ, he sóg tĩ ājag to. Kỹ sóg vènh kar mỹ ājag to: há ag nỹtĩ, he tĩ. Tag ki sóg ti jagy pẽ vég mũ, hã ra inh krĩ tóg kǎnhvy nĩ, ājag to, kỹ tóg sir inh mỹ sér pẽ tĩ.

⁵ Ha vé, isy ga ty Macedônia tá jun ky sóg nén ũ ty inh krī kuprāg ke ve ja tū nī. Tá sóg ti jagy ve mǎn gé. Iso rará ag tóg, tá, ky sóg vėnhmỹ en mǎn gé sir. ⁶ Hã ra Topě tóg inh mỹ Tito jėnė, ky ti hã tóg inh krī ty kǎnhvy' hé. Ũn vėsyrėnh mũ ěn mỹ tóg vī há han tī, Topě ti, hã ky tóg inh mỹ Tito jėnė, ěn kǎ. ⁷ Ti ty inh ki jun ky tóg inh mỹ vī há han. Ky tóg inh mỹ ājag ty iso vī há han ja tag tó mũ gé sir, ājag ty inh ve sór mũ tag tó ti mũ, ājag ty vėnh jykre kórėg to vėnhmỹ en ěn kǎmėn ti mũ, ājag ty inh jagfy vėnh vī tó sór mũ tó ti mũ gé inh mỹ. Sỹ tag mē ky tóg inh mỹ sér gy tī sir.

⁸ Inh carta ty ājag ki jun ky tóg ājag fe kaj han, isy rá ti. Hã ra tóg há tī. Ājag fe kaj han tóg, kurā pir ki, ky ājag tóg ājag jykre kórėg ěn tovǎnh ja nī, hã ky tóg inh mỹ sér tī. Ūri tóg inh mỹ sér tī, isy carta rán ky jėnė ja ěn mī ěkrėn ky, hã ky sóg rán tũg sór ja tū nī. ⁹ Inh mỹ tóg sér tī. Hė ri ken ky? Ājag fe kaj mỹ inh mỹ sér tī? Vó. Ājag ty ājag fe kaj ty ājag mỹ jagy tīn ky ājag jykre kórėg ěn tovǎnh ky tóg inh mỹ sér tī. Ājag fe kaj tugrīn ājag tóg Topě mỹ vėnh fėg, ky inh carta tóg ājag mỹ nén (ũ) kórėg kǎmėn ja tū nī. ¹⁰ Ěg ty ěg fe kaj tugrīn Topě mỹ vėnh fėg ky ěg tóg ěg jykre kórėg tovǎnh kǎn ke mũ, ky ěg krenkren ke mũ. Tag vỹ ěg mỹ sér tī. Jǎvo ěg ty fe kaj ra ěg jykre kórėg tovǎnh tū nīn ky ěg ter pė han ke mũ sir.

¹¹ Ha vé. Ājag fe kaj tīn ky ājag tóg ājag jykre tugnỹm mũ sir, Topě ty ājag krīn ky. Vėnh jykre kórėg ěn to ājag tóg jũ mũ sir, kanė jur han ājag tóg mũ sir, ky ājag tóg: “vėnh jykre kórėg ěn han sór tũ ěg tóg nĩgtī,” he mũ sir. Inh ve sór ājag tóg mũ nī sir, vėnh jykre kórėg ty ājag tóg tũ' he sór mũ, ũn ty vėnh jykre kórėg han mũ ěn mỹ vī tar han sór ājag tóg mũ. Há kar ti nī. Hã ki tóg ājag ty ti mrė ti jykre kórėg ěn han ja tũ (tóg) ve há tī sir.

¹² Isy ājag mỹ carta ěn rán ky sóg ũ ty vėnh jykre kórėg han mũ ěn tó ja nī, ti ty ũn mỹ ti kórėg han mũ ěn tó ja inh nī gé. Hã ra sóg tag to jykrėn, sỹ rán ky, ha mē: “isy Corinto tá ke ag ty iso há nỹtī venh há tóg tī, ag ty ājag ty iso há nīn ki kanhrǎn jė, Topě rīnve,” he ja sóg nī, hã ky sóg carta ěn rán ja nī. ¹³ Hã ky inh krī tóg kǎnhvy' he mũ sir, isy ājag ty iso há nỹtīn mėn ky. Ky inh krī ty kǎnhvy' hen mrė tóg inh mỹ sér pė tī gé sir, Tito ty ājag to vī há han ky. Ti krī ty kuprǎ' he ja ājag tóg nī, ti ty ājag mrė nīn ky, ky tóg ti mỹ há tī gé. ¹⁴ Ti mỹ sóg ājag kǎmėn ja nī, ājag ty ti mỹ vī há han ke tag ti. Ti tĩg ke to hã sóg ti mỹ ājag kǎmėn ja nī, hã ra ājag tóg ti mỹ ki hã han ja nī. Inh kavėnh ja tũ ājag tóg nī. Ha vé, ājag mỹ sóg ki hã tó há han tī. Ky tóg ri ke nī ja nĩgtī, sỹ Tito mỹ ājag to vī há han ja nīn ky. Ki hã han ja ājag tóg nĩgtī.

¹⁵ Ky tóg kurā kar ki ājag mī ěkrėg tī, ājag to tóg há tǎvī nī, Tito ti. Ājag ty inh vī kri nīm mũ ěn mī tóg ěkrėg tī, ājag ty inh kamėg mũ ěn mī, ky ājag nėji ti kamėg ja nī gé, isy ti jėnėn ky. Hã tó tóg tī. ¹⁶ Ky tóg inh mỹ sér tī gé sir, ājag ty inh kavėnh ja tũ nīn ky, ājag ty inh vī ki króm ky.

8

Ěg ty jǎnkamy nīm ke

¹ Ky sóg ājag mỹ Topě ty ga ty Macedônia tá ke ag tar han mũ tó sór mũ gé, Macedônia tá igreja krėm vėnhmǎn ky nỹtī ag, ũ ty tá vėnh pǎnpin tī ag. Ājag jagǎgtar hã ra ag tóg Jerusalém tá ke ag jagǎgtǎn sór mũ, ag mỹ jǎnkamy jėnėn ky. ² Ha vé, ti jagy pė hã ve ja ag tóg nĩgtī, Macedônia tá ke ag, ag jykre há vėnh ven jė. Ge ra tóg ag mỹ sér tī. Jagǎgtar ag nỹtī gé, ty nén (ũ) mág tũ ag nỹtī. Hã ra ag tóg, ag mỹ sér nīn ky (ag tóg) vin mág pė han ja nĩgtī, ag jagtar mág mũ ra. Ag ty Jerusalém ra jǎnkamy jėnė sór vė. ³ Ha vé, ag jykre ve inh. Ājag ty nén (ũ) ty vėnh kǎpǎm ag tóg, ag jėn mrė hã. ⁴ To ag tóg inh mỹ to vī mág, isy ag mỹ: “ājag tũ ty vėnh kǎpǎm tũg nī,” he tũ nīn jė. Ag ty Topě tũ ag mỹ nén ũ há han sór vė. Tag hã ne ag mỹ sér tī', Topě ty tag to ag tar han ky, hã ky ag tóg inh mỹ: “ěg ty ag mỹ jǎnkamy jėnė sór vė,” he mũ. ⁵ Ky ag tóg vėnh jykre há han, isy ag ki vėnh jykre há ve sór mũ ěn kǎfór. Ěg Senhor mỹ ag tóg vėnh vin, kar ky ag tóg inh mỹ vėnh vin gé, Topě ty ag mỹ: “ha ti mỹ vėnh vin,” hen ky.

⁶ Kĩ sóg Tito mĩ ké, ti tỹ ãjag ki jãnkamy ù ve jé, ãjag tỹ Jerusalém tá ke ag mỹ jãnkamy jẽnẽnh ke ti. ãjag ki tóg hur jãnkamy sĩ vé, kỹ tóg ti tỹ ùri ve kãn há tĩ, ti tỹ ãjag mỹ sér tĩ jé gé, Topẽ tỹ tag to ãjag tar han kỹ. ⁷ Ha vé, Jesus ki ge kỹ ãjag nỹtĩ. Vĩ há ãjag nỹtĩ. Ki kanhrãn mág ãjag nỹtĩ. Û jagãgtãn sór ãjag nỹtĩ. Jagnẽ to há ãjag nỹtĩ. Tag kar ki ãjag tóg ùn rico ri ke nỹtĩ. Kỹ nén ù há tag han sórmnĩ gé, Tito tỹ ãjag ki nén venh ke mũ tag ti.

⁸ Inh pi(jé) ãjag mỹ: “ker ag jagãgtãn tũg hẽ,” he sór mũ. Sỹ ãjag tỹ vẽnũ kar to há nỹtĩ ve sór vẽ, ãjag tỹ ù ag jagãgtãn mũn ki. ⁹ Ha vé, ãg Senhor tỹ Jesus Cristo vỹ ãg jagãgtãn ja nĩ gé. Tag ki kanhró ãjag tóg nỹtĩ. Kanhkã tá ti rico nĩ ja nĩgtĩ, hã ra tóg ã tỹ nén (ũ) ãn tovãnh kãn. ã tỹ ãg jagfy jagtar tĩ jé tóg kãtig. Kỹ ãg tóg ti jagtar tũgrĩn rico nỹtĩ sir.

¹⁰ Kĩ sóg tag to jykrén, ha mẽ. Ano ti nĩ ha, ãjag tỹ ag mỹ jẽnẽnh ke tỹ vỹrmỹ vin han vén kri. ãjag hã ne to jykrén vén ja nĩgtĩ gé, Jerusalém tá ke ag mỹ jãnkamy jẽnẽnh ke to. ¹¹ Kỹ ãjag tỹ nén han vén ja ãn han kãn nĩ, ùri. To jykrén ja ãjag tóg nĩgtĩ, kỹ han kãn sórmnĩ gé. ãjag tỹ vỹrmỹ nén vin ja ãn kri vin mãn nĩ, ag mỹ jẽnẽnh jé. ¹² ãjag tỹ nén nĩm kỹ ti tỹ ãjag mỹ sér nĩn kỹ tóg Topẽ mỹ há tĩ. Û tỹ nén ù mág vỹ nĩm mág han ke mũ, ù tỹ nén ù sĩ vỹ sĩn kỹ nĩm ke mũ. Topẽ pi(jé) ù tỹ nén ù sĩ tỹ nĩm mág ve sór mũ'.

¹³ Ti tỹ ãjag tỹ ù jagãgtãn tũgrĩn ãjag mỹ tũ tĩn kỹ tóg Topẽ mỹ ù tĩ sir. Vẽnũ kar tỹ nén ù sĩ ve kỹ tóg há tĩ. ¹⁴ ùri ãjag tũ tóg e nĩ, hã kỹ tóg ãjag tỹ ùn jagãgtar ag mỹ vẽnũ kãpãm há tĩ. Kejẽn tóg ãjag mỹ tũ' henh ke mũ gé, kỹ ag tóg sir ãjag mỹ nén (ũ) vin ke mũ gé, vẽnũ kato. Kỹ vẽnũ kar vỹ jagnẽ ri ke nỹtĩ sir. Tag hã vỹ há nĩ'. ¹⁵ Hã kỹ tag tóg rán kỹ nĩ, ha mẽ: “ũ tóg vỹjẽn génh mág han ja nĩgtĩ, ù tóg génh pir han ja nĩgtĩ gé. Kỹ ù tỹ génh mág han mũ mỹ tóg kãfór ja tũ nĩgtĩ, hã ra ù tỹ génh pir han mũ ãn mỹ tóg tũ' he ja tũ nĩgtĩ gé,” he tóg mũ, Topẽ vỹ rá ki. Jagnẽ ri ke ag tóg nỹtĩ ja nĩgtĩ. Hã kỹ tóg ãg tỹ ù tỹ nén (ũ) pir nĩ ãn jagãgtãn há tĩ.

Tito to vême

¹⁶ Topẽ hã ne Tito fe han', ti tỹ ãjag to há tãvĩ nĩ jé. Kỹ sóg Topẽ mỹ vỹ há han tĩ sir, ti tỹ ti fe han kỹ. ¹⁷ Kỹ tóg kãnhmar inh mỹ: “hej,” hé, sỹ ti mỹ: “ha Corinto ra tĩg,” hen kỹ. Kãnhmar tóg tĩg sór ja nĩ, Tito ti. ¹⁸ Kỹ sóg ti mré ãg régre ù jẽnẽ sór mũ gé. ãg régre tag vỹ Jesus kãmén tĩ, kỹ igreja krẽm vẽnũmãn kỹ nỹtĩ ag kar vỹ ti to vỹ há han tĩ, ù tỹ ãmã kar ki Topẽ vỹ to vẽnũ pãnpin tĩ ag. ¹⁹ Kỹ igreja krẽm ke kar vỹ ti hã kuprẽg, ti hã tỹ inh mré ãg tỹ ùn jagãgtar ag mỹ nén jẽnẽnh ke tag ki rĩr jé. ãg Senhor tỹ ùn mág nĩ tag vẽnũ ven hã jé ãg tóg tag ki rĩr sór mũ, ãg tỹ ag jagãgtãn ke tag ti ki. Kỹ tóg inh mỹ há tĩ gé, sỹ inh pir mỹ ki rĩr tũ nĩn kỹ.

²⁰ Kỹ ù tóg iso jykrén kónãn ke tũ nĩ gé, isỹ inh pir mỹ ki rĩr tũ nĩn kỹ. Jãnkamy e vẽ, ãg tỹ ma mũnh ke ti, kỹ tóg inh mỹ ù tỹ tag to iso jykrén kónãn ha mẽ tĩ. Kỹ tóg inh mỹ há tĩ, ù ag tỹ inh mré ki rĩr mũn kỹ. ²¹ Isỹ vẽnũ jykre kuryj han sór vẽ, hã to sóg jykrén tĩ. ãg Senhor ne inh jykre ki kanhró nĩ', kỹ tóg há tĩ gé, ãprã ke ag tỹ inh jykre há vэг mũn kỹ.

²² Inh mré tĩg ke mũ tag vỹ Tito mré ãjag ki jun ke mũ, kar kỹ ãg régre ù ke gé. ãg régre tag hã ne ãg Senhor tũ ki rĩr há han tĩgtĩ', tag ve tỹ hẽn ri ke han inh huri. Ti tũ ki rĩr nĩ vỹ ti mỹ sér tĩ. Kỹ tóg ãjag vême mẽ, hã kỹ tóg ãjag ve sór mũ. ãjag to tóg há tãvĩ nĩ, ti tỹ ãjag vême mẽn kỹ.

²³ Kỹ Tito ne ãjag venh kãtig ke mũ'. Inh mré rãnhraj jafã vẽ, Tio ti, kỹ tóg inh mré ãjag to vãsãn tĩ. Ti mré kãmũ tag ag vỹ tỹ ùn há nỹtĩ gé. Û tỹ igreja krẽm vẽnũmãn kỹ nỹtĩ ag vỹ ag jẽgnẽ ja nĩ, ãjag to. Ag tỹ Cristo jykre há ãn han kỹ nỹtĩ vỹ ve há tĩ. ²⁴ Ag tỹ ãjag ki junjun kỹ ag ki rĩr há han nĩ, vẽnũ kar tỹ ve jé, ãjag tỹ ag to há nỹtĩ ti, igreja krẽm vẽnũ pãnpin tĩ ag kar tỹ ãjag jykre há ve jé. Vẽnũ kar mỹ sóg ãjag to: “vỹ há tãvĩ han ag tóg tĩ,” he tĩ. Kỹ Tito ag mỹ vỹ há han nĩ, ke tũ nĩ (mũ) ra sóg ón ja nĩnh mũ.

¹ Kŷ ājag tóg, ěg tŷ Jerusalém tá Topě ki ge kŷ nŷtŷ ag mŷ jěgněnh ke tag ki kanhró (ājag tóg) nŷtŷ, hā kŷ sóg tó sór tŷ nŷ. ² Ag jagāgtān sór ājag tóg mŷ, ki kanhró sóg nŷ. Hā kŷ sóg Macedônia tá ke ag mŷ tó tŷ. Ag mŷ sóg: “Grécia tá ke ag ne Jerusalém tá ke ag mŷ nén ū jěně sór tŷ,” he tŷ. “Kri prŷg tóg nŷ ha, ag tŷ nén ū jěně sór mŷn kri,” he sóg tŷ, ājag to. Kŷ ag tóg ke sór mŷ gé sir, ājag kóm. ³ Hā kŷ sóg ājag mŷ ěg régre ag jěgněg mŷ, ājag tŷ ki kanhrān jé, sŷ ājag kāmén mŷ ti. Kŷ ājag tŷ nén (ŭ) nŷm sór mŷ ěn vin kān nŷ, ūri, kŷ sóg fagrŷnh mŷ vŷ ja tŷ nŷnh mŷ. ⁴ Hēn ri ke mŷn Macedônia tá ke ū ag tóg inh mré kāmŷ sór mŷ. Kŷ tóg ājag tŷ nén vin ja tŷ nŷ kŷ inh mŷ'a tŷnh mŷ, isŷ ón kŷ vŷ ja nŷn kŷ. Kŷ tóg ājag mŷ'a tŷnh mŷ gé sir. ⁵ Hā kŷ sóg to jykřén, sŷ ājag mŷ ěg régre tag ag jěgně jé, inh kātŷg ke to hā, ājag tŷ nén vin han kān jé, ājag tŷ nén (ŭ) tŷ ěg mré ke ag jagāgtān ke ti. Vāsŷ ājag tóg tó ja nŷ, ājag tŷ nén vin sór mŷ ěn ti, kŷ ha vin han, kŷ tóg e nŷnh mŷ, jānkamy ti, kŷ tóg ve há tŷ, ti tŷ ājag mŷ sér nŷ ti. Kŷ ū tóg ājag to: “ti mŷ ag mŷ há tŷ ja, hā kŷ ag tóg nŷm sŷ han ja nŷ?” henh ke tŷ nŷ.

⁶ Kŷ sóg tag tó sór mŷ, ha mē: “ŭ tŷ ti fy pir krān kŷ tóg pin kŷ génh ke mŷ gé sir. Ŭ tŷ krān mág mŷ ěn hā tóg génh mág han ke mŷ gé sir,” he sóg tŷ. ⁷ Kŷ ājag tŷ nén to jykřén mŷ ěn hā vin nŷ, ājag tŷ Jerusalém ra jěně jé. Ti tŷ ājag mŷ sér tŷ nŷn kŷ tóg há tŷ nŷ. Inh pi(jé) ājag mŷ vŷ tar han mŷ'. Mŷ sér nŷtŷmŷnŷ, ājag tŷ ěg mré ke ag jagāgtān to, kŷ tóg Topě mŷ há tŷ sir. Ŭ tŷ ge to tóg há tāvŷ nŷ. ⁸ Kŷ Topě tóg to tar nŷ gé, ājag mŷ nén vin mág han ke to, ājag tŷ tŷ ājag ki e nŷ jé, kurā kar ki, nén ū tŷ ājag mŷ tŷ' he tŷ nŷ jé. Kŷ tóg, ājag tŷ tŷ ājag ki mág nŷn kŷ (tóg) ājag tŷ ū jagāgtān', ū jagāgtān' henh há tŷ sir. ⁹ Tag vŷ rán kŷ nŷ, ha mē: “ŭn jagāgtar ag mŷ tóg vin mág tŷ, ti tŷ ěg mŷ vēnh vŷ há tó tóg tŷ' henh ke tŷ nŷ,” he tóg, Topě vŷ rá ki.

¹⁰ Ha vé, Topě ne ěg mŷ nén (ŭ) kar fy vin mŷ', ěg tŷ krān jé, kŷ tóg ěg mŷ pāo han jafā nŷm mŷ gé, ěg tŷ tŷ pāo han kŷ kon jé. Kŷ tóg ājag mŷ ājag tŷ tŷ ū jagāgtān ke mŷ ěn ven mŷ gé, kŷ tóg nén ū fy ri ke nŷ. Kaně há ri ke han jé tóg ke mŷ gé, ājag tŷ vēnh jykře kuryj tag han kŷ, hā vŷ: jagně jagāgtān, he mŷ. ¹¹ Tag ki ājag tóg rico nŷtŷnh ke mŷ, ājag tŷ vēnh kar jagāgtān kŷ. Kŷ ag tóg e nŷtŷnh mŷ gé sir, ū tŷ ěg tŷgrŷn Topě to vŷ há han mŷ ag, ag tŷ ěg tŷ ag jagāgtān tŷgrŷn Topě to vŷ há han kŷ. ¹² Kŷ tóg ge nŷ. ěg tŷ Topě ki ge kŷ nŷtŷ ag jagāgtān kŷ ěg tóg ag jagāgtar tŷ tŷ' he mŷ. Tag tóg há tŷ. Hā ra ag tóg ěg tŷ ag jagāgtān tŷgrŷn (ag tóg) Topě mŷ vŷ há han ke mŷ gé sir. ¹³ Hā ki ag tóg ājag tŷ Topě vŷ kri fig mŷ vég mŷ, ājag tŷ ag jagāgtān ki. Kŷ ag tóg tag to Topě to vŷ há han ke mŷ gé sir, ha vemnŷ. Cristo to vēme to ājag nēji há nŷtŷ. Hā ve jé ag tóg ke mŷ, ājag tŷ ag jagāgtān mág kŷ, ājag tŷ vēnh kar jagāgtān kŷ ke gé. ¹⁴ Kŷ ag tóg ājag to Topě mré vēmén ke mŷ gé sir, ājag to há tāvŷ nŷtŷnh kŷ. Topě tŷ ājag jagāgtān há pě han mŷ ěn ve jé ag tóg ke mŷ, hā kŷ ag tóg ājag ve sór ke mŷ gé sir. ¹⁵ Topě ne ěg mŷ nén ū há tāvŷ vin tŷ mŷr'. Pi(jé) kaja nŷ', ti tŷ ěg mŷ nén vin mŷ ti. ěg jé ti mŷ to vŷ há han, ti mŷ agradecer hen kŷ.

10

Paulo tŷ nén to vŷ

¹ Ha vé, ājag jyvěnh sór inh mŷ, inh, hā vŷ: Paulo, he mŷ. Sŷ ājag mré nŷn kŷ sóg nēji koměr hā vŷ tŷ, kŷ, isŷ kór há tá nŷn kŷ isóg nēji vŷ jŷ han tŷ ājag mŷ. Cristo ne koměr hā vŷ tŷ'. Ŭn há vē, Cristo ti. Ti jykře hā han sór inh nŷgtŷ. ² Hā kŷ sóg ājag mŷ tag to vŷ sór mŷ, ha mē. Isŷ ājag mŷ nén rán mŷ tag jēmēmŷnŷ. Kŷ sóg ājag ki jun kŷ vŷ jŷ han ke tŷ nŷ. Vŷ jŷ han jé sóg ke mŷ, ha vemnŷ, ū tŷ inh kato vŷ mŷ ag mŷ, ū tŷ iso: “ā tŷ vēsóg ki nén to jykřén mŷ ěn hā han tóg tŷ,” he mŷ ag mŷ. ³ ěprā ke vŷ tŷ inh nŷ, hā ra inh pi(jé) ěprā ke jykře han kŷ vēnh jykře kórég han to vāsān tŷ'. ⁴ Vāsān mág sóg tŷ, hā ra inh pi(jé) ěprā ke ag jykře han kŷ vāsān mŷ'. Topě jykře tar ěn hā han kŷ sóg hā to vāsān tŷ, kŷ tóg soldado tŷ rárā jafā ri ke nŷ, Topě jykře tar ti. Tŷ sóg ěg kato tē mŷ ag vēnh pigju jafā mág ěn kókég tŷ, hā vŷ: isŷ ū tŷ ěg vŷ kato vāsānsān mŷ ag vŷ tŷ tŷ' he mŷ, he mŷ. ⁵ Ŭ tŷ Topě kato vŷ sór mŷ ag vŷ tŷ sóg tŷ' he tŷ gé. Vēsŷ ūn mág han sór ag tóg nŷtŷ, Topě kato vāsān kŷ, ěg tŷ Topě jykře ki kanhrān mŷ kato vāsān kŷ. Tŷ tŷ' he jé sóg ke mŷ, Topě jykře tar

hã tỹ. Ęprã ke ag tỹ Topẽ vĩ kato tẽ mũ ag tỹ Cristo krêm ge han kãn sór sóg mũ, kỹ ag sigse kỹ nỹtĩ ri ke vẽ sir. ⁶ Kỹ, sỹ ãjag tỹ Topẽ vĩ kri nĩm mũ ve kỹ sóg ù tỹ kri fi sór tũ ag mỹ vĩ jũ han ke mũ sir, ha vemnĩ.

⁷ To jykrén há han nĩ, ha mẽ. “Tỹ sóg Cristo mré ke nĩ,” he ãjag tóg tĩ, ãjag kãmĩ ù. Kỹ to jykrén há han nĩ. Tỹ sóg Cristo mré ke nĩ gé, inh, ãjag kóm mỹr, ha mẽ. ⁸ Ęg Senhor ne inh fêg', sỹ ãjag jyvên jé. Ti pi(jé) inh mỹ: “ha ag kókén,” hé'. Kỹ sóg ãjag mỹ tó, Ęg Senhor tỹ inh fêg ja ti. Isỹ vëso vĩ há han hã vë. Ge ra tóg inh mỹ'a tũ nĩ, isỹ vëso vĩ há han mũ ti. ⁹ Sỹ ãjag jyvên sór vë. Inh pi(jé) ãjag kanẽ jun sór mũ'. Ąjag jyvên hã jé sóg ãjag mỹ rán. ¹⁰ Inh carta ki inh nẽji ãjag mỹ vĩ tar han tĩ, vĩ jũ, kỹ sỹ ãjag mré nĩn kỹ sóg nẽji krój nĩ ve nĩ, kỹ inh vĩ nẽji tóg tỹ nén ù tũ nĩ ve nĩ. ¹¹ Tag to jykrén, ha mẽ: isỹ rán mũ ri ke han jé sóg ke mũ, isỹ ãjag mré nĩnh ken kỹ, ha mẽ. Ąjag vég tũ sóg nĩ, isỹ carta tag rán kỹ. Isỹ ãjag mré nĩnh ken kỹ sóg inh vĩ tag ri ke han ke mũ, ha vemnĩ.

¹² Ąjag kãmĩ ù tóg vëso vĩ há han sór tĩ. Inh pi(jé) ag ri ke nĩ', inh pi(jé) tỹ ag mré ke nĩ gé'. Vësóg ki to jykrén kỹ ag tóg nén ù to: “tag vỹ há nĩ, tag vỹ há tũ nĩ,” he tĩ. Tag to jykrén kỹ ag jykre tóg ag mỹ há nĩ ve nĩ. Topẽ jykre ve vén sór tũ ag tóg nĩ. Ag tỹ vësóg ki nén to jykrén hã tóg ag mỹ há tĩ. Krĩ tũ ag nỹtĩ.

¹³ Ag jãvo sóg Topẽ jykre vég tĩ, hã kỹ sóg ãjag mỹ: “inh jykre vỹ há nĩ,” he tĩ. Topẽ ne inh mỹ inh rãnhraj ti nĩm, kỹ tóg inh mỹ: “ha Corinto tá ke ag ki rĩr,” he ja nĩgtĩ gé. ¹⁴ Inh pi(jé) Topẽ tỹ inh mỹ vënh rãnhraj nĩm ãn pátén tĩ', kỹ sóg pátén ja tũ nĩ gé, sỹ ãjag mỹ rán kỹ. Inh hã ne ãjag mỹ Cristo kãmén vén ja nĩgtĩ'. ¹⁵ Hã kỹ sóg isũ tỹ ãjag jyvên tĩ. Ù tũ pijé'. Inh pi(jé) ù rãnhraj to: “isỹ han ja vë,” he mũ'. Isũ hã ki sóg tỹ ùn mág nĩ. Kỹ sóg tag to jykrén mũ gé, ha mẽ: ãjag tỹ Topẽ ki ge kỹ nỹtĩ to tar nỹtĩn kỹ sóg tỹ ùn mág tãvĩ nĩnh ke mũ gé, ãjag mré. Isũ hã vë, inh rãnhraj hã vë. ¹⁶ Kỹ sóg ãjag jamã mã ra tĩg sór mũ gé, sỹ Cristo kãmén jé, ù tỹ ag mỹ tó ja tũ ãn ra. Sỹ tãtã ag mỹ kãmén kỹ sóg inhhã ki rãnhraj mũ sir, ù tỹ ag mỹ tá Topẽ vĩ kãmén ja tũ nĩn kỹ. Kỹ sóg inh rãnhraj hã tugnĩn tỹ ùn mág jënh mũ, ù rãnhraj tugrĩn ke tũ vë.

¹⁷ Hã ra tóg há tũ tĩ, Ęg vëme tag ti. Ąjag tỹ ùn mág nĩ tó sór kỹ Ęg Senhor ti tómnĩ. ¹⁸ Ęg tỹ vëso: “ùn há vỹ tỹ inh nĩ,” he mũ ra Ęg pi(jé) tỹ ùn há nỹtĩ'. Ęg Senhor tỹ Ęg to: “ùn há vỹ tỹ ã nĩ,” hen hã kỹ Ęg tóg tỹ ùn há nỹtĩ.

11

Ón kỹ apóstolo ag

¹ Iso fe nỹtĩmnĩ. Krĩ tũ nĩ ve inh nĩ, isỹ vësó kỹ. Hã ra ãjag tóg iso fe nỹtĩ, kỹ tóg há tĩ. ² Ąjag to sóg há pẽ nĩ, Topẽ tỹ ãjag to há nĩ ri ke, hã kỹ sóg ãjag jyvên tĩ. Kỹ ãjag tóg ùn mén ke mũ fi ri ke nỹtĩ, kỹ Cristo vỹ ãjag mén ke ri ke nĩ sir. Vënh prüg tag to sóg ãjag kãn sór mũ mỹr, ãjag jãnhkri nỹtĩ jé, tãtãg tỹ mén ja tũ jãnhkri ri ke. ³ Hã ra sóg ãjag to: “ag mỹ ti tovãnh sór tũ nĩ vỹ?” he mũ. Pỹn vỹ Eva fi mỹ ón, Japo ti, ti jykre (ka)mẽ nĩn kỹ, kỹ fi tóg ti vĩ kri nĩm. Kỹ tóg ãjag mỹ ón sór mũ gé, Japo ti, ãjag tỹ Cristo tovãnh jé, ãjag tỹ ti jykre pir tovãnh jé, ãjag tỹ ti to tar ãn to krónh ke jé. ⁴ Hã kỹ ãjag tóg ù ag vĩ jëmẽ sór mũ, ag tỹ ãjag mỹ ón kỹ Jesus tó kỹ, ag tỹ isỹ ãjag mỹ nén tó mũ ãn hã tũ tó mũ ra ãjag tóg jëmẽ sór tĩ. Ón kỹ jagrẽ vỹ ãjag mỹ há nĩ ve nĩ, Topẽ tỹ ãjag mỹ nĩm ja tũ ãn. Ón kỹ topẽ vĩ vỹ ãjag mỹ mẽ sér tĩ ve nĩ, ãjag tỹ vãsỹ mẽ ja tũ ãn. Vënhmỹ han sór ãjag tóg mũ.

⁵ Ón kỹ apóstolo ag ne ãjag mỹ vënh vĩ tag tó sór mũ'. Inh pi(jé) tỹ ag krêm ke nĩ', ha mẽ. ⁶ Vĩ sĩnvĩ han tũ inh nẽji nĩ, ag vĩ sĩnvĩ ri ke han tũ inh nẽji nĩ. Hã ra sóg nén tỹ hën ri ke ki kanhró nĩgtĩ, tag ve ãjag tóg mỹr, ãjag tỹ inh vĩ mẽ tỹ hën ri ke han mũ ãn ki.

⁷ Ąjag mỹ sóg Topẽ vĩ tó ja nĩgtĩ, kỹ sóg tag to ãjag ki ti kaja ve sór ja tũ nĩ. Vësỹ ùn sĩ han ja inh nĩ, sỹ ãjag mré nĩn kỹ, ãjag tỹ tỹ ùn mág nỹtĩ jé, isugrĩn. Tag tugrĩn inh mỹ Topẽ vĩ mranh'? Vó, vënh jykre há vé. ⁸ Ęmã ù tá Jesus ki ge kỹ nỹtĩ fag ne inh mỹ fag jãnkamy vënh kãpãm, kỹ fag tóg inh mỹ ti jënë ja nĩ, sỹ ãjag mré nĩn kỹ. Fag tũ hã ko ja inh nĩgtĩ. ⁹ Kỹ, isỹ jãnkamy ve sór mũ ra sóg ãjag mỹ tó ja tũ nĩ gé. “Ti hỹn ag mỹ jagy

tinh mũ,” he sóg tĩ, hã k̄y sóg ājag m̄y to ja tũ nĩ. Ga t̄y Macedônia tá ěg régre ag ne inh ki junjun ja n̄gtĩ', s̄y ājag mré n̄n k̄y, k̄y ag tóg inh m̄y j̄ankamy ũ ma k̄mũ ja n̄ gé, s̄y to nén t̄y inh m̄y tũ nĩ ěn m̄n jé. Gen k̄y sóg isú vég tĩ hã ra, ti t̄y ājag m̄y jagy tũ n̄n jé. Inh jykren hã vē. Tovānh sór tũ inh n̄gtĩ. ¹⁰ Ki hã tó sóg tĩ, Cristo t̄y ki hã tó tĩ ěn ri ke han sóg tĩ. K̄y sóg ājag to: “ga t̄y Grécia tá ke ag v̄y j̄ankamy to inh jykre ki kanhr̄an k̄an ke mũ, ag t̄y iso v̄ivĩ he tũ n̄n jé,” he mũ. Ājag j̄ankamy ve sór tũ p̄ ěn inh n̄gtĩ. ¹¹ H̄ ě ri ken k̄y? Inh m̄y ājag to há tũ n̄gtĩ? Vó, ājag to sóg há t̄avĩ nĩ, k̄y Top̄ ě ne ki kanhró nĩ'.

¹² Hã ra sóg ājag tũ ve sór tũ nĩ, s̄y ag v̄i t̄y tũ' hen jé, ón k̄y apóstolo ěn ag v̄i ti. Inh m̄y tóg ag t̄y ājag m̄y: “Paulo ri ke inh nĩ. Inh m̄y ājag tũ vēnh k̄ap̄am,” henh ha m̄ ě. Hã k̄y sóg ājag tũ ve sór tũ nĩ. ¹³ Ón k̄y apóstolo v̄y t̄y ag n̄tĩ, m̄y, ha m̄ ě, ón k̄y ag tóg: “Top̄ ě r̄anhr̄aj han ěg tóg mũ,” he tĩ. Ón k̄y ag tóg: “Cristo v̄y ěg t̄y apóstolo han,” he tĩ. ¹⁴ Satanás jykre hã vē. V̄ēs̄y tóg Top̄ ě t̄y j̄ēnē jaf̄a ri ke han tĩ, ón k̄y, Satanás ti. ¹⁵ K̄y Satanás m̄y r̄anhr̄aj tĩ ag tóg ón k̄y (ag tóg) jykre kuryj n̄tĩ ve nĩ gé. Hã ra Top̄ ě tóg ag vóg kónān ke mũ, ag r̄anhr̄aj kórég to.

Paulo jagtar

¹⁶ Ha m̄ ě, tó m̄n jé sóg ke mũ, s̄y tó ja ti. Inh pi(jé) kr̄i tũ nĩ'. Is̄y ājag m̄y kr̄i tũ nĩ ve (hã) ra, ge ra iso hã n̄ȳimnĩ, s̄y vēso vēnh v̄i há tón k̄y. ¹⁷ S̄y ājag m̄y s̄y nén ve ja ěn tó sór vē, k̄y tóg inh kr̄i tũ nĩ ve nĩ. S̄y vēso v̄i há han k̄y sóg kr̄i tũ nĩ ve nĩ. ěg t̄y ěg Senhor jykre tó k̄y ěg tóg tag tó tũ n̄gtĩ, s̄y tónh ke tag. ¹⁸ Hã ra sóg tó sór mũ. Vēnh kar tóg ājag m̄y ag t̄y nén ve ja tó tĩ, k̄y sóg ājag m̄y s̄y nén ve ja ěn tó sór mũ gé, ha m̄ ě. ¹⁹ Kr̄i há ājag n̄tĩ, ge ra ũn kr̄i tũ ag tóg ājag m̄y há n̄tĩ ve nĩ. ²⁰ ũ t̄y ājag m̄y: “tag han ra, tag han tũg ra,” hen k̄y tóg ājag m̄y sér tĩ ve n̄gtĩ. ũ t̄y ājag tũ m̄n sór k̄y tóg ājag m̄y há tĩ ve n̄gtĩ, ũ t̄y ājag m̄y un'ón mũ ag tóg ājag m̄y há n̄tĩ ve n̄gtĩ, ũ t̄y vēso: “t̄y inh ũn mág nĩ,” he mũ ag v̄y ājag m̄y há n̄tĩ ve n̄gtĩ gé, ũ t̄y ājag kak̄a ki t̄anh tĩ ěn ag ke gé. ũ t̄y ge v̄y ājag m̄y há kar n̄tĩ ve n̄gtĩ. ²¹ Inh m̄y'a tóg tĩ, s̄y tag tó k̄y. Vēnh jykre tag to sóg krój nĩ, tag han sór vānh inh n̄gtĩ, ag t̄y han ri ke tag.

Hã ra ag tóg ājag m̄y ag t̄y nén ve ja ěn ti tó sór mũ, ón k̄y apóstolo ěn ag, ag t̄y nén ũ há kar han mũ tó ag tóg tĩ. K̄y sóg ag ri ke tónh ke mũ gé sir, ũn kr̄i tũ ag ri kén. ²² Hebreu v̄y t̄y ag n̄tĩ. T̄y sóg Hebreu nĩ gé. Israel kr̄ē'kr̄ē v̄y t̄y ag n̄tĩ. T̄y sóg Israel kr̄ē'kr̄ē nĩ gé. Abraão kr̄ē'kr̄ē v̄y t̄y ag n̄tĩ. T̄y sóg Abraão kr̄ē'kr̄ē nĩ gé. ²³ Cristo camarada v̄y t̄y ag n̄tĩ. Tag to sóg ag k̄áfór nĩ hã ra. Ha vé, kr̄i tũ p̄ ě nĩ ve sóg nĩ, s̄y t̄y ag k̄áfór nĩ tag tón k̄y.

Ha m̄ ě, is̄y t̄y Cristo camarada nĩ ti: inh r̄anhr̄aj e tag hã to sóg ag k̄áfór nĩ, ise k̄y n̄n e ja hã to sóg ag k̄áfór nĩ gé. Inh mr̄anmr̄an k̄áfór han ag tóg tĩ gé, ter kren t̄y h̄ ěn ri ke ve inh, ag k̄áfór ke gé. ²⁴ Judeu ag ne inh mr̄anmr̄an t̄y 5 (ke) han', ag t̄y ũ mr̄anmr̄an t̄y 39 (ke) han tĩ ěn t̄y 5 (ke) han ag tóg is̄y, kur̄a t̄y h̄ ěn ri ke han tóg, ti t̄y 5 (ke) ěn tá kr̄ȳg jé. ²⁵ Kar k̄y ag tóg ka t̄y inh mr̄anmr̄an t̄y 3 (ke) han ja n̄gtĩ gé. Kur̄a t̄y h̄ ěn ri ke han tóg ke gé, ti t̄y 3 (ke) ěn tá kr̄ȳg jé. Pó t̄y ag inh pin ja n̄gtĩ gé, isén jé, kur̄a pir ki. Kar k̄y sóg goj ki ter kren t̄agtũ han ke gé, ěn k̄a sóg kej̄ ěn kuty pir ki kur̄a mré goj nig k̄aki n̄agn̄ar, goj kaf̄a tũ k̄aki. ²⁶ Kuvar há ra t̄y t̄y h̄ ěn ri ke han inh, k̄y goj var tóg inh jagtar han. ěg tũ péju(g) tĩ ag v̄y inh jagtar han tĩ. Inh mré ke ag v̄y inh vóg kónān sór n̄gtĩ, fóg ag ke gé, cidade ki ke ag ke gé, ěm̄a tũ tá ke ag ke gé. Goj kaf̄a tũ kri inh jagtar han. Ón k̄y ěg kanhk̄a ag v̄y inh jagtar han tĩ gé. ²⁷ R̄anhr̄aj mág to inh jagtar tĩ gé, to sóg ron tĩ, k̄y sóg n̄r tũ t̄y h̄ ěn ri ke hyn han tĩ gé. Kej̄ ěn sóg kók̄ir tĩ, kej̄ ěn sóg goj vég tũ n̄gtĩ, v̄akre t̄y h̄ ěn ri ke han sóg tĩ, kusa m̄ ěg sóg tĩ, inh kur̄a tóg iso tũg tĩ gé. ²⁸ K̄y, is̄y kur̄a kar ki ti jagy tag vég mũ mré hã sóg igreja kr̄ēm vēnhm̄an tĩ ag to kr̄i kufy han tĩ gé. ²⁹ ũ t̄y Cristo v̄i to krónh ken k̄y tóg inh m̄y jagy tĩ gé. ũ t̄y Top̄ ě v̄i mranh k̄y sóg kan̄ ě jur t̄y t̄y gé.

³⁰ K̄y, is̄y vēsó k̄y sóg is̄y nén ũ jagy vég mũ ěn tó sór tĩ, inh krój nĩ ěn ti. ³¹ Top̄ ě ne ki kanhró nĩ', ěg Senhor t̄y Jesus jóg ti. ěg t̄y ti m̄y v̄i há han tóg tũ' henh ke tũ p̄ ě nĩ. Ti hã ne ki kanhró nĩ'. Inh pi(jé) ón mũ'. ³² Cidade t̄y Damasco tá sóg nĩ ja n̄gtĩ, k̄y p̄'ĩ mág t̄y

rei tỹ Aretas ẽn krẽm pã'i ù vỹ governo ki rĩr nĩ ja nĩgtĩ. Ẽn tóg ijo vãji ja nĩgtĩ. Ti polícia ag tóg ijo vãji ja nĩgtĩ, ag tỹ ise jé. ³³ Hã ra inh mré ke ag tóg kěj mág kãkã inh péju kỹ jãnkã ror tỹ isérem, cidade to ró tỹ, hã kỹ sóg kren. Isỹ ti jagy ve jan hã vẽ.

12

Paulo tỹ nén nẽ ve

¹ Kỹ ãjag tỹ isỹ tỹ ùn mág nĩ tag mẽ sór kỹ, kỹ sóg ãjag mỹ ẽg Senhor tỹ inh mỹ nén ven mũ ẽn tó sór mũ gé ver, ti tỹ inh mỹ nén kãmén mũ ti. Sỹ ãjag mỹ tónh ke tũ vẽ vẽ, hã ra ãjag tóg mẽ sór mũ. ² Ha vé, ù ki kanhró sóg nĩ, Jesus ki rã ù. 14 (ke) anos ti nĩ ha, ti tỹ kanhkã ra tĩg kri, kanhkã tãgtũ he mũ ẽn ra. Hẽn ri ke mũn tóg ã rĩr há ra vyr, hẽn ri ke mũn ti kuprĩg tóg ra vyr, inh pi(jé) ki kanhró nĩ'. Topẽ hã ne ki kanhró nĩ'. ³ Hã ra tóg ra vyr, hẽn ri ke mũn ã rĩr há ra, ti kuprĩg hẽn ri ke mũn, inh pi(jé) ki kanhró nĩ', Topẽ hã ne ki kanhró nĩ'. ⁴ Kỹ tóg ẽg tỹ hẽ tá Topẽ mré nỹtĩnh ke mũ ẽn ra vyr, Paraíso he mũ ẽn ra. Tá tóg vẽn hĩ jẽmẽ, ẽprã ke tỹ nén tónh ke tũ ẽn mẽ tóg tá, kanhkã tá vẽn hĩ jykre sĩnvĩ pẽ ẽn, ẽg tỹ tag ki nén ki kagtĩg ẽn. ⁵ Ẽn hã to sóg: “ũn mág vỹ tỹ inh nĩ,” he sór mũ. Isỹ vėsóg ki kanhkã ra tĩg pijé'. Isỹ ẽg tỹ ẽprã vég tĩ ẽn tó kỹ sóg inh krój nĩ hã tó sór mũ. ⁶ Isỹ ùn mág nĩ tag tó kỹ sóg ki hã tó tĩ, vẽn hĩ ó pijé'. Hã ra sóg tó tũ nĩ, ãjag tỹ iso: “vẽn hĩ kar kãfór vỹ tỹ ti nĩ,” he tũ nĩ jé. Inh jykre vég ãjag tóg mũgtĩ, inh vĩ mẽg ãjag tóg mũgtĩ, kỹ tag hã to jykrén nĩ, tag hã to ãjag tóg inh jykre ki kanhrãn ke mũ.

⁷ Kỹ Topẽ tóg, ti tỹ inh mỹ kanhkã ven kar kỹ (tóg) to jykrén gé, sỹ vėsỹ ùn mág han sór tũ nĩ jé. Hã jé tóg inh há tỹ nén ù jagy ki nĩ han tĩ gé, kỹ tóg sónh tỹ inh ki já ri ke nĩ. Satanás krẽm ke ù vẽ, kỹ tóg isãnh tĩ, isỹ vėsỹ ùn mág han tũ nĩ jé. ⁸ Kỹ sóg ẽg Senhor mỹ to vĩ tãgtũ han, ti tỹ inh mỹ tỹ tũ' hen jé. ⁹ Hã ra tóg ke jãvãnh ja nĩ. Kỹ tóg inh mỹ: “ã jagãgtãn sóg tĩ,” he ja nĩ, “kỹ tóg há tĩ,” he ja tóg nĩ, ẽg Senhor ti. “Ã krój nĩ hã ki isỹ tỹ ùn tar nĩ ve há tĩ,” he ja tóg nĩ inh mỹ, ẽg Senhor ti. Hã kỹ inh krój nĩ tag tóg inh mỹ há tĩ. Inh krój nĩn kỹ sóg Cristo tar hã tỹ tar nĩ nĩ. Tag hã ne há tĩ'. ¹⁰ Hã kỹ inh krój nĩ tóg inh mỹ sér tĩ, ag tỹ iso vĩ kónãn ti ke gé, inh jagtar nĩ ti ke gé, ag tỹ inh vóg kónãn ti ke gé, inh kanẽ jur ti ke gé. Inh mỹ tóg sér kar tĩ, sỹ nén vég mũ ti, sỹ Cristo hã tỹ fe nĩn kỹ. Inh krój nĩ ẽn kã sóg tar nĩ, mỹr, ha mẽ.

Paulo tỹ Corinto tá ke ag to nén to jykrén

¹¹ Ha vé ha, vėsỹ ùn krĩ tũ nĩ ẽn ri ke han sóg, ãjag tỹ inh kutãn kỹ. ãjag tỹ iso vĩ há han ke vẽ vẽ. Inh pi(jé) ù tỹ vėsỹ apóstolo han mũ ẽn ag krẽm ke nĩ', isỹ tỹ nén (ũ) tũ hã ra, mỹr, ha mẽ. ¹² ãjag mỹ sóg sỹ tỹ apóstolo jẽ ven huri. Isỹ nén (ũ) jagy vég mũ ra sóg to krónh ke tũ nĩgtĩ. Ẽg tỹ nén han vãn hyn han ja inh nĩgtĩ, ãjag rĩnve, milagre ti, Topẽ jykre ti ke gé. Hã ki ãjag tóg venh mũ, sỹ tỹ apóstolo jẽ ti. ¹³ Kỹ inh ãjag mỹ ne han ja tũ nĩ nẽji, ãjag tỹ ẽmã ù tá Jesus to vẽn hĩmãn tĩ ag to: “ẽg kãfór ag nỹtĩ,” hen jé? Nén pir hã han tũ inh nĩ, hã vỹ: ãjag jẽn ko ja tũ inh nĩ, he mũ, sỹ ãjag mré nĩn kỹ, kỹ tóg ãjag mỹ jagy nĩ ja tũ nĩ. Tag tỹ kórég kỹ inh mỹ vẽn hĩ pãte fón nĩ.

¹⁴ Ha vé ha, sỹ ãjag ve mãn sór vẽ mỹr. Sỹ tag to jykre tãgtũ hã vẽ sir. Kỹ sóg inh jun kỹ ãjag mré nĩn kỹ (sóg) ãjag mỹ ti jagy nĩm sór tũ nĩ gé, ùri. Inh pi(jé) ãjag tũ mãn sór mũ'. Sỹ ãjag venh kãtĩg ke vẽ. Ẽg krẽ pi(jé) ẽg rico han tĩ', ẽg tỹ ag jẽ'ỹn mũ ra. Ẽg hã ne ẽg krẽ mỹ nén ù nĩm tĩ'. ¹⁵ Hã kỹ sóg isũ fón kãn ke mũ, ãjag tugrĩn, vẽn hĩ fẽg jé sóg ke mũ gé, sỹ ãjag krenkren han jé. ãjag to sóg há tãvĩ nĩ. Hã kỹ tóg inh mỹ e tĩ, ãjag tỹ iso há tũ nỹtĩ ti. ¹⁶ Kỹ ãjag tóg ki kanhró nỹtĩ, isỹ ãjag mré nĩn kỹ ãjag mỹ ti jagy nĩm sór tũ nĩ ti.

Hã ra sóg nẽji ãjag vatãnh tá ãjag krĩn tĩ, ãjag mỹ sóg nẽji ón tĩ. ¹⁷ Kỹ inh mỹ ãjag vatãnh tá ãjag tũ mág tĩ', sỹ ãjag mỹ inh mré ke ag jẽgnẽn kỹ'? Ke tũ sóg nĩgtĩ mỹr. ¹⁸ Tito mỹ sóg to vĩ, ti tỹ ẽg régre ù ẽn mré ãjag venh tĩg jé. Kỹ Tito mỹ inh mỹ ãjag tũ ma kãtĩg ja nĩ'? Ke tũ tóg nĩ, ki kanhró ãjag tóg nỹtĩ. Inh jykre hã han tóg tĩ, Tito ti. Isỹ nén han mũ ẽn hã han tóg tĩ.

¹⁹ Ājag h̄yn iso: “ón k̄y tóg v̄enh jagfy v̄i m̄ũ,” he m̄ũ. “Ti t̄y ěg t̄y ã to há n̄yťi ěn han sór v̄e,” he ājag h̄yn m̄ũ iso. Hã tũ v̄e, k̄y Cristo v̄y ki kanhró n̄i, Top̄e ti ke gé. Ājag to sóg há p̄e n̄i, hã k̄y sóg v̄i m̄ũ, ājag t̄y inh v̄i tugr̄in ti hã to tar n̄yťi j̄e. ²⁰ Tag hã to sóg jykr̄en m̄ũ, ha m̄e: h̄en ri ke m̄ũn ěg tóg jagn̄e t̄y ũn m̄ũ, s̄y ājag ki jun k̄y. H̄en ri ke m̄ũn ājag tóg jagn̄e to jũ m̄ũ, h̄en ri ke m̄ũn ājag tóg jagn̄e tũ ki v̄e'ĩ m̄ũ, h̄en ri ke m̄ũn ājag tóg jagn̄e to kr̄i r̄y n̄yťi, v̄enh kar h̄en ri ke m̄ũn ājag tũ hã m̄i ěkr̄en sór t̄i, h̄en ri ke m̄ũn ājag tóg jagn̄e to v̄i kónãn m̄ũ, h̄en ri ke m̄ũn ājag tóg jagn̄e to v̄i v̄i henh m̄ũ, h̄en ri ke m̄ũn ājag tóg jagn̄e kãfór n̄yťi sór m̄ũ, h̄en ri ke m̄ũn ājag tóg v̄enh jykre e han sór m̄ũ. ²¹ K̄y tóg inh m̄y'a t̄inh m̄ũ, s̄y ājag ki jun k̄y, k̄y Top̄e t̄y is̄y ũn s̄i han ri ke v̄e sir. Inh f̄yñh ke v̄e, ājag t̄y v̄as̄y Top̄e v̄i mranh ja ěn tovãnh sór tũ n̄yťin k̄y, n̄en ũ kav̄ej ěn ti, ã prũ tũ fi mr̄e n̄y, ã mén tũ mr̄e n̄y, fag to ěn t̄i ěn m̄ȳr. Ājag t̄y ěn tovãnh tũ n̄in k̄y tóg inh m̄y'a t̄inh m̄ũ.

13

Paulo t̄y ag jyv̄en m̄an m̄ũ

¹ S̄y ājag ve tãgt̄inh ke v̄e ha. K̄y sóg ājag jykre venh ke m̄ũ. Ũ t̄y ājag jykre kórég v̄eg m̄ũ v̄y tónh ke m̄ũ, ājag t̄y ti kórég han ja ti. ũn régre v̄y tugtónh ke m̄ũ, ke tũ n̄in k̄y ũn tãgt̄ũ. ² Tag tó inh huri, k̄y sóg tó m̄an sór m̄ũ m̄ȳr. S̄y ājag mr̄e n̄i ja n̄in k̄y sóg ājag m̄y tag tó ja n̄i, k̄y sóg ũri ājag m̄y rán m̄ũ sir, s̄y ājag mr̄e n̄i tũ n̄in k̄y, ha m̄e. S̄y ājag mr̄e n̄i ja n̄in k̄y sóg kom̄er hã v̄i ja n̄i, ũ t̄y Top̄e v̄i mranh ja ěn ag m̄y. Inh jun m̄an k̄y inh pi(jé) kom̄er hã v̄i m̄an m̄ũ', ha vemn̄i. V̄i tar han j̄e sóg ke m̄ũ m̄ȳr. ³ Cristo v̄i m̄e sór ājag m̄ũ, inh ki. M̄e j̄e ājag tóg ke m̄ũ. Ti pi(jé) krój n̄i'. Tar ti n̄i, hã k̄y sóg v̄i tar han ke m̄ũ gé. ⁴ Krój n̄i ve ja ti n̄i, ti t̄y cruz to sa k̄y. Hã ra tóg r̄ir m̄an, Top̄e t̄y ti r̄in m̄an k̄y. Top̄e tar n̄i hã v̄e. K̄y sóg krój n̄i gé, s̄y ti ki rã k̄y j̄en k̄y, hã ra sóg ti mr̄e r̄ir k̄y j̄e gé, ājag m̄y, Top̄e tar n̄in k̄y.

⁵ Ājag jykre tugn̄ym n̄i. “Inh m̄y Jesus ki rã há han m̄ũ v̄y?” hemn̄i, v̄eso jykr̄en k̄y. “Jesus Cristo m̄y inh kãkã n̄i?” hemn̄i. Ājag t̄y tag to: “h̄y, hã v̄e,” he tũ n̄in k̄y ājag pi(jé) t̄y ti tũ n̄yťi'. ěn kã ājag tóg ti tovãnh k̄y m̄ũ n̄i sir. ⁶ Hã ra sóg ti tovãnh ja tũ n̄i. Ājag t̄y tag ki kanhr̄an k̄yn há t̄i. ⁷ Ājag to sóg Top̄e mr̄e v̄em̄en t̄i, ājag t̄y n̄en ũ kórég han tũ n̄i j̄e. K̄y inh rãnr̄aj tóg Top̄e m̄y há t̄i sir, v̄enh kar m̄y ke gé. Ag t̄y hã ra iso é he m̄ũ ra n̄en ũ há tãv̄i han sórmn̄i, ha m̄e, k̄y ājag t̄y Jesus tũ hã han ke m̄ũ tag ne há tãv̄i n̄inh m̄ũ'. ⁸ Inh pi(jé) ũ t̄y ki hã tó m̄ũ kato t̄e sór m̄ũ'. Ũ t̄y ki hã tó m̄ũ tag ve sór inh n̄i m̄ȳr. ⁹ Inh m̄y tóg sér t̄i, inh krój n̄in k̄y, k̄y tóg inh m̄y sér t̄i gé, ājag tar n̄yťin k̄y. Hã j̄e sóg Top̄e mr̄e v̄i t̄i, ti t̄y ājag m̄y v̄enh jykre há ěn n̄im j̄e, ājag t̄y há p̄e n̄yťi j̄e. ¹⁰ Hã k̄y sóg ājag m̄y carta tag rán, s̄y ājag v̄eg tũ n̄in k̄y. K̄y sóg kom̄er hã v̄i sór m̄ũ, s̄y ājag mr̄e n̄inh ken k̄y. Inh pi(jé) v̄i tar han sór m̄ũ', inh pi(jé) ěg Senhor t̄y isar han k̄y inh v̄i tar t̄y ājag kók̄en sór m̄ũ'. Ājag tar han sór inh m̄ũ m̄ȳr.

¹¹ Inh kanhkã', s̄y ājag m̄y rán kãn hã v̄e. Hã ra sóg ver tag tó sór m̄ũ, ha m̄e: v̄enh kãn n̄i, ājag t̄y kygn̄eg tũ n̄i j̄e, inh v̄i j̄em̄em̄n̄i, v̄enh jykre pir han n̄i, kr̄i kuprã n̄yťimn̄i. Top̄e ne ěg to há n̄i', ti ne ěg kr̄i kuprãg t̄i'. Ti hã ne ājag ki r̄ir m̄ũ', ājag t̄y ti jykre tag han k̄y.

¹² Jagn̄e ki nhun ke ri ke han n̄i, Jesus mr̄e ke kar ki, ājag t̄y jagn̄e n̄igé kãgm̄i k̄y. Top̄e tũ ki ge k̄y n̄yťi kar v̄y ājag m̄y: “ājag m̄y há?” he sór m̄ũ.

¹³⁻¹⁴ ěg Senhor t̄y Jesus Cristo j̄e ājag tar han t̄i. Top̄e v̄y ājag to há n̄i. Ti kupr̄ig v̄y t̄y ājag jagr̄e n̄i. Ti jykre hã m̄i m̄um̄n̄i. Hã v̄e.

PAULO TỠ CARTA HAN: GALÁCIA TÁ KE AG MỠ CARTA

¹ Paulo tỠ rá vĕ, inh. IsỠ ga tỠ Galácia tá ke ag mỠ rán hã vĕ. Jesus Cristo hã vỠ inh fĕg, sỠ tỠ ti apóstolo jĕ jé, ĕg jóg tỠ Topĕ ti ke gé. Ēprã ke tỠ inh fĕg pijé'. Jesus Cristo hã ne inh fĕg', Topĕ tỠ ũn rĭn mãn mũ ti, ti ter kar kỠ. ² SỠ inh mré ke ag mré ga tỠ Galácia tá ke ag mỠ rán hã vĕ, ũ tỠ Galácia tá Jesus to vĕnhmãn tỠ ag mỠ.

³ Topĕ mỠ sóg to vĭ tỠ, ti tỠ ājag tar han jé, ĕg jóg mág tỠ ājag krĭ kuprãg jé, ĕg pã'i tỠ Jesus Cristo ti ke gé.

⁴ Ti hã ne ũ tỠ ā tĕn mũ ag mỠ vĕnh fĕg', ti tỠ ĕg tỠ Topĕ vĭ mranh tỠ tũ' he jé, kỠ tóg ĕg kren han, ĕprã ke jykre to. Ēprã ke jykre tỠ pãno nĭ kỠ tóg vĕnh jykre tag ki ĕg kunĭ. Ēg jóg tỠ Topĕ tỠ nĕn ve sór mũn hã vĕ, ti hã ne Jesus mỠ tag tó ja nĭ'. ⁵ KỠ ĕg tóg Topĕ to vĭ há han sór mũ, kỠ tóg tũg' he jãvãnh nĭ, ti to vĭ há tag ti. Hã vĕ.

Jesus kãme pir nĭ

⁶ Ājag ne tóg kãnhmar sỠ ājag mỠ Cristo kãmĕn ja ĕn tovãnh sór mũ', ti tỠ ĕg jagfỠ ter ja kãme ti. Ti kãme ũ nón mũ sór ājag tóg mũ, Cristo tỠ ĕg mỠ tó ja tũ nón. Inh mỠ tóg e tỠ mỠr, ājag jykre tag ti. ⁷ Cristo kãme vỠ pir nĭ, kỠ ti kãme ũ tóg tũ tỠ. Hã ra ũ ag tóg ājag krĭ kufỠ han sór mũ, hã kỠ ag tóg Cristo kãme ĕn ki króm há han tũ nĭgtĭ. Ũ tó sór ag tóg mũ mỠr, Cristo jykre to, hã vỠ: “ājag krenkren jé ājag tóg Cristo ki rã kar kỠ Judeu ag jykre han ke mũ gé, Topĕ tỠ Moisés mỠ nĕn tó ja ĕn ti,” he mũ. ⁸ Hã ra sóg ājag mỠ tó há han ja nĭgtĭ, isỠ ājag mỠ: “ti ki rã tãvĭ han jé ājag tóg ke mũ,” hen kỠ. Ũ tỠ inh vĭ tag ri ke tó tũ ag jé mũ kónãn. Hĕn ri ke mũn isóg ājag mỠ tag tó tũ nĭ, hĕn ri ke mũn sóg ti pãte nĕn ũ tónh ke mũ. KỠ inh jé tĭg kónãn. Hĕn ri ke mũn kanhkã tá Topĕ tỠ jĕnĕ jafã tóg isỠ tó ja ĕn ri ke han ke tũ nĭ, pãte tóg hĕn ri ke mũn nĕn ũ tó sór mũ. KỠ ti jé tĭg kónãn. ⁹ Tag tó ja inh nĭ, kỠ sóg tó mãn mũ sir. Ũ tỠ ājag mỠ Cristo kãmĕn kỠ, hã ra tóg ājag mỠ isỠ tó ri ke han tũ nĭ, isỠ tó pãte tóg ũ tó sór mũ, kỠ ti jé tĭg kónãn.

¹⁰ Vĭ tar han sóg tỠ, ĕprã ke kórĕg ag to. Inh pi(jé) ón kỠ ag mỠ vĭ há han sór mũ', ag tỠ iso há nĭtĭ jé'. Ēprã ke ag tỠ iso há nĭ tag, ag tỠ iso kórĕg nĭ tag tóg inh mỠ tỠ nĕn ũ tũ nĭ.

IsỠ ĕprã ke ag tỠ iso nĕn tó mũ to jykren nĭ ra inh hĭn Cristo tũ ki rĭr tũ nĭnh mũ vĕ. Hã ra sóg ti hã to jykren tỠ. “IsỠ nĕn tó mũ hĭn ti mỠ há nĭ, ti mỠ kórĕg nĭ vó?” he sóg tỠ, ti tỠ inh mỠ vĭ há han jé, Topĕ ti.

Paulo tỠ Topĕ vĭ há tó

¹¹⁻¹² Cristo kãmĕn ja inh nĭgtĭ, isỠ ājag mỠ: “ti ki rã kỠ ĕg krenkren ke mũ, ĕg tỠ Moisés jykre han tũ ra,” hen kỠ. Ēprã ke tỠ véké nĕn ũ to jykren ja pijé', sỠ ājag mỠ nĕn tó mũ ti. Ēprã ke tỠ inh kanhrãn ja pijé'. Ũ pi(jé) inh mỠ: “tag tómnĭ,” he mũ'. Jesus Cristo hã ne inh kanhrãn', ti hã ne inh mỠ tag tó kãn'. Tag to jykren nĭ, inh kanhkã'.

¹³⁻¹⁴ IsỠ vãsỠ nĕn han ja mĕ ājag tóg huri. TỠ sóg Judeu krĕ nĭ, hã kỠ sóg Judeu jykre han tỠ ja nĭgtĭ, Moisés tỠ ĕg jóg'jóg ve ag mỠ Topĕ jykre tó ja ĕn ti. KỠ sóg inh povo jykre ki, Judeu jykre ki sóg vãsãn mág, hã kỠ sóg inh rĕgre ag pãtĕn, sỠ ĕg jykre ki króm to tar tãvĭ nĭn kỠ. Ēg jóg'jóg ve ag jykre tãvĭ han sóg nĭgtĭ mỠr, tag hã mĭ sóg ĕkren ja nĭgtĭ. KỠ sóg kygnĕ kỠ: “Jesus hĭn ón kỠ vĕsỠ Topĕ han,” he ja nĭ gé. Hã kỠ sóg ti ki ge kỠ nĭtĭ ag vóg kónãn tãvĭ han, isỠ ag tỠ tũ' he jé. Ag jagãgtãn vãnh ja inh nĭgtĭ.

¹⁵⁻¹⁶ Hã ra Topĕ tóg kejĕn inh mỠ Jesus to: “inh kósĭn vỠ tỠ ti nĭ,” hé, isỠ fóg ag mỠ, kanhgág ag mỠ ti kãmĕn jé, ũ tỠ mĕ ja tũ ag kar mỠ. Ti hã tóg inh mur to hã inh kuprĕg, inh jagãgtãn kỠ. KỠ, Jesus tỠ inh mỠ vĕnh ven kar inh pi(jé) ĕprã ke ũ mré vĕmĕn', ti ki jĕmĕ jé'. ¹⁷ KỠ sóg Jerusalém ra tĭg ja tũ nĭ gé, sỠ ijo apóstolo ag mré vĕmĕn jé. Ga tỠ Arábĭa ra sóg vyr, ĕn kã, kar kỠ sóg tá kãtĭg kỠ cidade tỠ Damasco tá jun mãn.

¹⁸ KỠ, 3 anos tũg kỠ sóg kejĕn Jerusalém ra vyr, sỠ apóstolo Pedro mré vĕmĕn jé. Ti mré sóg kurã tỠ 15 (ke) han, tãvĭ. ¹⁹ Ēn kã inh pi(jé) apóstolo ũ ag vé'. Tiago hã ve inh, ĕg Senhor jãvy ĕn, isỠ Pedro mré vĭn kỠ.

²⁰ Ājag mǝ sóg ki hǎ rán mǝ. Inh pi(jé) ón mǝ', Topě hǎ ne ki kanhró nǝ'.

²¹ Tag pǎte sóg ga tǝ Síria ra vyr, ga tǝ Cilícia ra ke gé. ²² Isǝ ra tǝg jé sóg ga tǝ Judéia fǝn rǎm. Kǝ Judéia tá Jesus to vėnh mǎn tǝ ag inh ki kagtǝg nǝtǝ ja nǝgtǝ. Inh ve ja tǝ ag nǝtǝ ver, Judéia tá Cristo ki ge kǝ nǝtǝ ag. ²³ Iso vǝ hǎ mǝ ja ag tóg nǝgtǝ, hǎ vǝ: “ũ tǝ ěg vóg kónǎn mǝ ěn nǝji Cristo tó mǝ,” he mǝ. “Vǎsǝ tóg ũ tǝ ti ki ge kǝ nǝtǝ ag tǝg sór ja nǝ, hǎ ra tóg ũri ti kǎmėn mǝ ha, nǝji,” he ja ag tóg nǝgtǝ iso. ²⁴ Kǝ ag tóg isugrǝn Topě to vǝ há han ja nǝgtǝ, ag tǝ tag mǝ kǝ.

2

Paulo jykre tǝ apóstolo ũ ag mǝ há nǝ.

¹ Tag pǎte 14 anos tǝg kar sóg Jerusalém ra tǝg mǎn gé, Barnabé mré, kǝ Tito tóg ěg mré vyr gé. ² Topě tǝ inh mǝ: “ha ra tǝg,” he ja vė. Tá jun kǝ sóg ag mǝ isǝ nén tó tǝ ěn kǎmėn kǎn ja nǝ sir, sǝ fóg ag mǝ nén kǎmėn tǝ ěn ti. Vyr mǝ sóg tag to pǎ'i ag mré vėmėn. Fóg ag mǝ sóg: “Jesus ki rǎ kǝ ěg krenkren ke mǝ, ěg tǝ Moisés jykre han tǝ ra,” he tǝ. Kǝ sóg tag to pǎ'i ag ki jėmė sór ja nǝ, sǝ ag mǝ: “mǝ há, fóg ag tǝ Moisés jykre han tǝ ra, kanhgág ag ke gé?” he jé. Isǝ fagrǝnh mǝ rǎnrǎj jǎvǎnh tóg tǝ, isǝ fagrǝnh mǝ carreira ri ke han jǎvǎnh tóg tǝ, hǎ kǝ sóg ag ki jėmėnh vyr. ³ Kǝ tóg ag mǝ há tǝ, sǝ fóg ag mǝ, kanhgág ag mǝ Jesus hǎ tó mǝ ti, sǝ ag mǝ Moisés tó tǝ ra, sǝ ag mǝ Judeu ag jykre tó tǝ ra, sǝ ag mǝ: “ha ājag gré fǎr junun kym,” he tǝ ra. Hǎ kǝ ag tóg Tito mǝ: “ha kym,” he ja tǝ nǝ gé. Fóg tǝ Grego vė, Tito ti, ũ tǝ Jerusalém ra inh mré tǝ mǝ ěn ti. Hǎ kǝ tóg ā gré fǎr kym ja tǝ nǝ, ti tǝ tǝ Judeu tǝ nǝn kǝ. ⁴ Hǎ ra ón kǝ Jesus ki ge kǝ nǝtǝ ag tóg ti kym sór ja nǝ. Ón kǝ ag tóg Jesus jykre ve sór ja nǝ. “Ti mǝ Moisés jykre tovǎnh tǝ?” he ag tóg iso. Ag tǝ Moisés jykre krėm ěg vin mǎn sór ja vė, kǝ tóg ěg patrǎo ri ke nǝ, Moisés jykre ěn ti. ⁵ Hǎ ra sóg ag kato tǝ. Inh pi(jé) ag mǝ: “hǝ,” he ja nǝgtǝ'. Ag kato tǝ tǎvi han ja inh nǝgtǝ ājag jagfy, ājag tǝ vėnh vǝ há hǎ kri fi jé, Jesus kǎme tǝ ājag mǝ sér tǝ jé, ājag tǝ Moisés jykre kufy ěn han tǝ nǝn kǝ.

⁶ Kǝ pǎ'i ag tóg isǝ ag mǝ nén kǎmėn mǝ ěn to: “tó kǎn ja tǝ ā nǝ,” he ja tǝ nǝ gé, ũn mág ag. Vǎsǝ ag tóg tǝ pǎ'i tǝ ja nǝtǝgtǝ, ũn mág tag ag, hǎ ra tóg inh mǝ tǝ nén ũ tǝ nǝ, ha mǝ. Topě mǝ ti tǝ nén ũ tǝ nǝ, ěg tǝ ěprǎ ke ag mǝ tǝ ũn mág nǝtǝ ti, ũn sǝ nǝtǝ ti ke gé. ⁷ Kǝ tóg pǎ'i tag ag mǝ há tǝ, sǝ fóg ag mǝ, sǝ kanhgág ag mǝ Topě vǝ tónh ke ti, ũn gré fǎr junun kym ja tǝ ěn ag mǝ, Topě tǝ inh mǝ: “povo ũ ag mǝ tónh tǝg,” hen kǝ. “Topě vǝ Pedro mǝ tó, ti tǝ Judeu ag mǝ tó jé, ũn gré fǎr junun kym kǝ nǝtǝ ěn ag mǝ, hǎ ra ā tóg ũ ag mǝ tónh ke mǝ,” he ja ag tóg nǝ inh mǝ, Jerusalém tá ũn mág ag. ⁸ Topě ne Pedro ti tar han, ti tǝ tǝ Judeu ag apóstolo jė jé. Kǝ tóg isar han, isǝ tǝ ũ ag apóstolo jė jé, ũn tǝ Judeu ag jykre han tǝ kar ag. ⁹ Tag ve ag, Topě tǝ tag to isar han mǝ ve ag, Tiago ti, Pedro ti, João ti ke gé. Igreja to pǎ'i vǝ tǝ ag nǝtǝ, kǝ ag tóg tǝ igreja nǝna ri ke nǝtǝ. ěn ag ne inh nǝgé mǝ', Barnabé nǝgé ke gé. Hǎ kǝ ag tóg ěg mǝ: “há ti nǝ, ājag rǎnrǎj ti, ājag tǝ nén han sór mǝ ti,” he mǝ. “Ha fóg ag mǝ tónh mǝjėg, kanhgág ag mǝ, jǎvo ěg tóg ũ tǝ Judeu ag jykre han mǝ ag hǎ mǝ tónh ke mǝ,” he ag tóg mǝ ěg mǝ, pǎ'i ag. ¹⁰ Kǝ ag tóg ěg mǝ to vǝ, ěg tǝ ag kǎmǝ ũn vėsǝrėnh mǝ ag jagāgtǎn jé, ěg tǝ ag mǝ nén ũ jėnė jé, fag mǝ ke gé. Tag han sóg tǝ mǝr. Inh pi(jé) kǎ jatun tǝ'.

Fóg ag tǝ Judeu ag ri ke nǝtǝ

¹¹ Kǝ kejėn Pedro tóg cidade tǝ Antioquia tá jun ja nǝgtǝ. Hǎ ra tóg tá kygnė, kǝ sóg ti kato tǝ. Ti hǎ mǝ sóg ti kygnė ěn tó. ¹² Kǝ Tiago tóg kejėn ti mré ke ũ ag jėgnė ja nǝgtǝ. Ag tǝ junjun tǝ ki Pedro tóg fóg ag mré jėn ja nǝgtǝ, Judeu tǝ ag mré. Hǎ ra Tiago tá ke ag tǝ junjun kǝ tóg sir Judeu tǝ ag mré jėn jǎvǎnh nǝ sir, ti tǝ Judeu ag kamėg vė sir, ũn gré junun fǎr kym tǝ ag jagfy. Kǝ Pedro tóg ón kǝ vyrmǝ nǝ mǝ sir, fóg ag vǎm kǝ. ¹³ Kǝ ti mré Judeu ũ ag tóg fóg ag vǎm mǝ gé sir. Kǝ vǎhǎ Barnabé tóg fóg ag vǎm mǝ gé sir. Ki kanhró ti nǝ vė, Barnabé ti, ěg tǝ jatun mǝ fóg mré nǝnh ke ti, ěg tǝ tǝ Judeu nǝtǝ ra. ¹⁴ Ag kar vǝ kygnė kǎn, Pedro nón. Jesus jykre pijé', vėnh vǝ sér pijé'.

Sỹ ag tỹ kygnē tag ve kỹ sóg vēnh kar rĩnve Pedro mỹ tag tó, ha mẽ. “Ha vé, Judeu tỹ ã nĩ,” he sóg ti mỹ. “Ã tỹ tỹ Judeu nĩ ra ã tóg fóg jykre han ja nĩgtĩ, fóg mré jēn kỹ,” he sóg ti mỹ. “Kỹ ã tỹ ne jé ũri Judeu jykre han mǎn sór nē? ã tỹ ne jé fóg ag mỹ: Judeu ag jykre han nĩ, he sór nē?” he sóg ti mỹ.

Jesus ki ge kỹ nỹti kỹ ěg povo pir ri ke nỹti

¹⁵ Judeu krē vỹ tỹ ěg nỹti, kỹ ěg tóg fóg ag tỹ Topē vĩ mranh tĩ ěn ri ke tũ nỹti. ¹⁶ Hã kỹ ěg tóg Topē tỹ vāsỹ ěg jyvēn tĩ ěn ki kanhró nỹti. Hã ra ěg pi(jé) tag tigrĩn Topē mỹ há nỹti. ěg tỹ Jesus Cristo ki ge kỹ ěg ti mỹ há nỹti. Hã kỹ ěg tóg Jesus Cristo ki ge kỹ nỹti, ěg tỹ ti mỹ tỹ ũn há nỹti jé, ti tỹ ěg tỹ ti ki ge kỹ nỹti tag tigrĩn ěg mỹ vēnh pãte fón jé sir. ěg pi(jé) Topē tỹ vāsỹ ěg jyvēn tĩ ěn ki króm ja nĩgtĩ, hã kỹ ěg tóg ti mỹ tỹ ũn há tũ nỹti, ěg tỹ ti tỹ vāsỹ ěg jyvēn han sór mũ ra. Topē pi(jé) Moisés tỹ ěg mỹ vēnh jykre nĩm ja ěn tigrĩn ěg mỹ vēnh pãte fón ke mũ. Jesus Cristo tigrĩn ke vē.

¹⁷ Kỹ tóg ge nĩ. ěg tỹ Cristo ki ge tigrĩn ěg tóg Topē mỹ tỹ ũn há nỹti. ěg tỹ Topē vĩ mranh kỹ, hã kỹ tóg ěg mỹ vēnh pãte fón mũ, ěg tỹ tỹ Judeu nỹtĩn kỹ, kỹ tóg fóg ag mỹ vēnh pãte fón mũ gé, kanhgág ag mỹ ke gé.

Kỹ ājag hỹn iso: “ã tỹ tag tó kỹ ã tóg: Cristo vỹ Topē vĩ mranh tag to há nĩgtĩ, he tĩ,” he sór mũ. Vó, hã tũ vē. ¹⁸ Hã ra tag to jykrén, ha mẽ: ěg tỹ Topē tỹ vāsỹ vēnh jykre to: “vēnh jykre tag han mǎn ke tũ ěg nĩ ha,” he kar kỹ: “vó, han mǎn jé ěg tóg ke mũ, ge ra,” hen kỹ tóg vēnhmỹ tĩ sir. Vēnh jykre régre vē sir. ¹⁹ Topē tỹ vāsỹ ěg jyvēn ja ěn ki kanhró ěg tóg nỹti. Kỹ ěg tóg ti tỹ ěg jyvēn mũ ěn mẽ kỹ: “vēnh jykre kórég han kỹ sóg Topē vĩ mranh tĩ,” he mũ sir. Ti vĩ ki króm ki kagtĩg ěg tóg nỹti, ěg tỹ ki króm sór mũ ra. Hã ra Cristo vỹ ěg jykre si tỹ tũ! he ja nĩ. Ti mré tóg cruz to sa ja nĩ, ěg jykre si ti. Kỹ tóg ěg mỹ vēnh jykre tãg nĩm mũ sir, ěg tỹ tỹ Topē tũ nỹti jé. ²⁰ ěg jykre si vỹ tũ! hé. Hã kỹ ěg tóg ti tũ há han tĩ, ěg tỹ ver ga kri mũn kỹ. Topē kósin ki rá tigrĩn ěg tóg sir rĩnrĩr nỹti. Ti fe vỹ tỹ ěg nỹti, ěg kar vỹ tỹ ti fe nỹti, kỹ tóg ěg jagfy ũ tỹ ã tén tĩ ag mỹ vēnh fēg, kỹ tóg ěg jagfy ter ja nĩ. ²¹ Ti ki ge kỹ nỹti tigrĩn ěg tóg Topē mỹ há nỹti. Topē tỹ ěg jagãgtãn há vē. ěg tỹ: “Topē jykre si ki króm kỹ inh hỹn Topē mỹ tỹ ũn há nĩ,” hen kỹ Cristo vỹ fagrĩnh mỹ ter ja nĩ. Kỹ ěg tóg Topē tỹ ěg jagãgtãn tag tỹ tũ! he mũ. Hã tũ vē mỹr.

3

Ěg tỹ Jesus ki ge kỹ ěg krenkren ke

¹ Galácia tá ke', ājag ne tóg krĩ tũ nỹti ve nỹti! ũ nỹ ājag krĩn kónãn, ājag tỹ Jesus Cristo tovãnh sór jé? Ti tỹ ka to sa ja ěn tó kãn inh mỹr ājag mỹ, kỹ ājag tỹ ne jé vāsỹ vēnh jykre ěn han sór nē? ² Kỹ sóg ājag ki tag jēmē sór mũ, ha mẽ: Topē ne ājag mỹ ã kuprĩg jēnē!. Ājag tỹ vāsỹ vēnh jykre si ěn mĩ mũ tigrĩn ājag mỹ jagrēn kỹ nỹti? Vó, inh vĩ tigrĩn ājag tóg Cristo ki ge kỹ nỹti, kỹ ājag tóg Cristo ki ge tigrĩn jagrēn kỹ nỹti. ³ Kỹ krĩ vēnh mỹ han sór tũg nĩ. Topē kuprĩg tỹ ājag krĩn kỹ ājag Jesus ki ge ja nĩ. Kỹ: vēsóg ki sóg ti jykre ki krov,” he tũg nĩ. ⁴ Ke tũ nĩ (mũ) ra ājag tóg fagrĩnh mỹ Topē kuprĩg tỹ jagrē nĩ ěn vé. Hã ra tóg inh mỹ fagrĩnh mỹ ke tũ nĩ. ⁵ Kỹ ũ tỹ ājag mỹ ã kuprĩg jēnēg mũ ěn vỹ ěg tỹ nén han vãnh hyn han ja nĩgtĩ gé. Ti mỹ ājag tỹ vāsỹ vēnh jykre si mĩ mũ tigrĩn milagre ěn hyn han! Vó. Ājag tỹ Cristo kãme sér mẽ kỹ ti ki ge tigrĩn tóg milagre ěn hyn han. Tag to jykrén.

⁶ Kỹ Abraão to jykrén nĩ gé. Topē ki tóg rã kỹ nĩ ja nĩ, kỹ tóg Topē mỹ tỹ ũn há nĩ sir, Abraão ti. ⁷ Tag to jykrén há han nĩ. ěg tỹ Abraão nón Topē ki ge kỹ nỹti kỹ ěg tóg Abraão krē'krē ag ri ke nỹti. ⁸ Topē vỹ fóg ag mré kanhgág ag krenkren han sór mũ, ag tỹ ti ki ge kỹ. ũ tỹ Judeu jykre han tũ ag kar krenkren han sór tóg mũ. Hã tóg rán kỹ nĩ. Vāsỹ tóg rán kỹ nĩ, Topē vĩ tỹ rán kỹ nĩ ki. Vāsỹ tóg Abraão mỹ vēnh vĩ sér tag tó ja nĩ, ha mẽ: “povo kar mỹ sóg vĩ há han ke mũ, ã tigrĩn,” he ja tóg nĩ, Topē ti, Abraão mỹ. ⁹ Ti mỹ tóg vĩ há han ja nĩ, Topē ti, Abraão mỹ, ti tỹ ti ki rã há han kỹ. Kỹ tóg ũ tỹ ti nón ti ki ge kỹ nỹti ag mỹ vĩ há han ke mũ gé.

¹⁰ Û tỹ vāsỹ vėnh jykre si ẽn ki króm tugrĩn kren sór mũ ag mỹ tóg vĩ kónān ke mũ, Topẽ ti, ag tỹ ki króm sór mũ ra mranh kỹ, mỹr, ha mẽ. Hã kỹ tag tóg rán kỹ nĩ, ha mẽ. “Topẽ tỹ ẽg jyvẽn mũ tóg e nỹtĩ, kỹ ti vĩ tóg rán kỹ nỹtĩ. Ẽg tỹ ki króm kãn ke vė. Û tỹ mranh pir han mũ mỹ tóg vĩ kónān ke mũ, Topẽ ti,” he tóg, Topẽ vĩ tỹ rán kỹ nĩ ki. ¹¹ Hã kỹ ẽg tỹ Topẽ tỹ vāsỹ ẽg jyvẽn mũ ẽn ki króm sór mũ ra ẽg tóg ti mỹ tỹ ùn há tũ nỹtĩ, Topẽ ti mỹ, ẽg tỹ ki króm kãn tũ nĩn kỹ. Hã kỹ tag tóg rán kỹ nĩ gé: “ẽg tỹ Topẽ ki ge kỹ nỹtĩn hã kỹ ẽg tóg ti mỹ tỹ ùn há nỹtĩ, kỹ ẽg tóg krenkren ke mũ ha,” he ja tóg nĩ, Topẽ vĩ tỹ rán kỹ nĩ ki. ¹² Kỹ Topẽ tỹ vāsỹ ẽg jyvẽn tĩ ẽn vỹ ẽg tỹ ti ki rã ri ke tũ nĩ. Hã kỹ tóg tag tó ja nĩ, Topẽ ti, ha mẽ: “ājag tỹ inh vĩ ki króm tugrĩn ājag krenkren ke mũ,” he ja tóg nĩ. Hã ra ẽg tóg ki króm ki kagtĩg nỹtĩ, hã kỹ ẽg tóg ti jykre si ki króm sór mũ ra ki króm ja tũ nĩ, hã kỹ ẽg tóg krenkren ke tũ nĩ sir.

¹³ Jãvo ẽg tỹ Cristo ki ge kỹ ẽg krenkren ke mũ. Topẽ vỹ ẽg mỹ vĩ kónān ke mũ vė, ẽg tỹ ti tỹ vāsỹ ẽg jyvẽn mũ ẽn mranh ja to. Hã ra Cristo tóg ẽg kren han mũ, Topẽ tỹ ẽg mỹ vĩ kónān tũ nĩ jé. Cristo hã ne Topẽ mỹ: “ha ag jagfy inh hã mỹ vĩ kónān,” he ja nĩgtĩ. Ti to tag tóg rán kỹ nĩ, ha mẽ: “ũ tỹ cruz to sa mũ ẽn mỹ tóg vĩ kónān mũ, Topẽ ti,” he ja tóg nĩgtĩ, Topẽ vĩ tỹ rán kỹ nĩ ki. ¹⁴ Ti tỹ Cristo hã mỹ vĩ kónān kỹ tóg ẽg hã mỹ vĩ há han mũ sir, ti tỹ Abraão mỹ vĩ há han ja ẽn ri ke. Fóg ag mỹ tóg vĩ há han mũ, kanhgág ag mỹ ke gé, Jesus Cristo tugrĩn. Kỹ tóg ẽg mỹ ā kuprĩg jẽnẽg mũ sir, ẽg tỹ ti ki rã ja tugrĩn. Tó ja ti nĩ, ti tỹ ẽg jagrẽn ke ti, kỹ tóg ke mũ, ẽg tỹ ti ki rã ja tugrĩn.

Abraão tỹ Topẽ vĩ kri nĩm kỹ tỹ ùn há nĩ

¹⁵ Inh kanhkã', ẽprã ke jykre to jykren. Kejẽn ùn régre ag tóg jagnẽ mré nén ù to jykren tĩ. To jykren kar kỹ ag tóg rán tĩ, kỹ ag tóg ājag jygi ránrán tĩ gé sir. Ag jygi ránrán kar kỹ ù tóg sir tỹ nén ù han mãn ke tũ nĩ. Rán kỹ tóg nĩ nĩ, kỹ ag tóg tỹ ti rá ù han tũ nĩgtĩ sir. Ẽprã ke jykre hã vė. ¹⁶ Kỹ Topẽ jykre vỹ ge nĩgtĩ gé. Topẽ vỹ Abraão mỹ tó ja nĩ, vāsỹ, ti tỹ ti mỹ nén ù há han ke ti, ti krẽ'krẽ mỹ ke gé. Kỹ tóg, ti tỹ ti krẽ'krẽ tó kỹ (tóg) Abraão krẽ'krẽ ag kã ùn pir hã tó ja nĩ. Ti pi(jé) Abraão mỹ: “ã krẽ'krẽ ag,” he ja nĩ. “Ā krẽ'krẽ,” he ja ti nĩ, hã vỹ: Cristo, he mũ, hã vỹ: Abraão krẽ'krẽ ag kã ùn pir, he mũ.

¹⁷ Kỹ Topẽ tóg Moisés mur ke to hã Abraão mỹ ti tỹ ti krẽ'krẽ ag kã ù mỹ vĩ há han ke tag tó ja nĩ, ti tỹ Abraão mré jykren kỹ. Kỹ, tag pãte, 430 (ke) anos tũg kỹ tóg Moisés mỹ ti tỹ ẽg jyvẽn ke ẽn nĩm. Hã ra tóg ã tỹ Moisés mỹ vėnh jykre ẽn nĩm mũ ra tóg ã tỹ Abraão mỹ vėnh jykre tó ja ẽn tỹ tũ' he ja tũ nĩ. ¹⁸ Kỹ Topẽ tỹ Abraão mỹ: “ve jé ã tóg ke mũ, ã krẽ'krẽ mrẽ,” he ja ẽn tugrĩn tóg ve ja nĩ, Topẽ vĩ hã tugrĩn tóg ve ja nĩ, Abraão ti. Ti tỹ ẽg jyvẽn ẽn to ke tũ vė, ti tỹ ẽg mỹ: “ẽn ve jé ājag tóg ke mũ,” hen kỹ ẽg tóg venh ke mũ, ti vĩ tugnĩn.

¹⁹ Kỹ ājag hỹn inh mỹ: “Topẽ tỹ ne jé Moisés mỹ ti tỹ ẽg jyvẽn ke ẽn tó ja nẽ?” he sór mũ. Ẽg tỹ: “venh jykre kórég han kỹ inh hỹn tóg Topẽ vĩ mranh,” he jé, hã jé Topẽ tóg Moisés mỹ ti tỹ ẽg jyvẽn ke ẽn nĩm ja nĩ, Jesus mur ke to hã. Abraão kósın tỹ Jesus mur ke tũg ki ke ja vė, Topẽ tỹ ẽg jyvẽn ja ẽn ti. Ti hã mỹ tóg vĩ há han sór ja nĩ, Topẽ ti, Jesus hã mỹ.

Topẽ tỹ Israel ag jyvẽn kỹ tóg ã tỹ jẽnẽ jafã ag mỹ tó ja nĩ. Kỹ Topẽ tỹ jẽnẽ jafã ag tóg Moisés mỹ tó ja nĩ, Moisés tỹ Israel ag mỹ kãmén jé. Topẽ tỹ ẽg jyvẽn jafã ti nĩ ja nĩ, Moisés ti. ²⁰ Topẽ jėgia kã jėg kỹ tóg Israel ag mỹ vĩ ja nĩgtĩ, Moisés ti, Topẽ tỹ Israel ag mré jykren kỹ. Kỹ Moisés tóg ag jyvẽn, ag tỹ Topẽ vĩ ki króm jé. Topẽ tỹ ẽg kren han kỹ tóg ge tũ nĩgtĩ. Ā pir mỹ tóg ẽg mỹ tó mũ, ti tỹ ẽg kren han sór mũ ti, Topẽ ti. Û tóg ti jagfy ẽg mré vĩ tũ nĩ sir.

Topẽ vỹ ẽg jyvẽn, ẽg tỹ ti vĩ ki kanhrãn jé

²¹ Isỹ tag tó kỹ Topẽ hỹn ājag mỹ tỹ ùn ón mé nĩ ve nĩ. “Topẽ tỹ ẽg jyvẽn mũ ra ẽg tóg ti vĩ mranh tĩ. Hã kỹ tóg ẽg vóg kónān ke mũ. Kỹ tóg ẽg kren han ke tũ nĩ,” he ājag hỹn tĩ. Vó, Topẽ pi(jé) ón tĩ. Hã ra Topẽ tỹ ẽg jyvẽn mũ ra ẽg tóg ki króm tũ nĩgtĩ, hã kỹ ti tỹ ẽg jyvẽn tag tóg ẽg kren han jãvãnh nĩ. Ti tỹ ẽg jyvẽn ẽn tỹ ẽg kren han mũ ra ẽg tóg ti tỹ ẽg jyvẽn tugrĩn jykre kuryj nỹtĩnh mũ vė. ²² Hã ra tag tóg rán kỹ nĩ, ha mẽ: “vėnh kar

vỹ Topě vỹ mranh kãn ja nĩgtĩ,” he ja tóg nĩ, Topě vỹ tỹ rán kỹ nĩ ki. Kỹ ãg tỹ Jesus ki ge hã kỹ ãg tóg krenkren ke mũ sir. Ủ tỹ ti ki ge kỹ nỹtĩ ag hã vỹ krenkren ke mũ.

²³ Kỹ, ãg tỹ Cristo ki rãnħ ke to hã ãg tóg Topě tỹ vãsỹ ãg jyvẽn mũ ěn krẽm nỹtĩ ja nĩgtĩ, kỹ tóg ãg kanhrãn tĩ ja nĩgtĩ. Ti tỹ ãg mrãnmrãn ri ke ja ti nĩgtĩ, ti vỹ ti. Krẽm ãg tóg sigse kỹ nỹtĩ ja nĩgtĩ. ãg tỹ Cristo ki ge kỹ ãg tóg kygvar kỹ nỹtĩ sir. Cristo mur to hã ke ja vỹ, Topě tỹ vãsỹ ãg jyvẽn ja ti. ²⁴ Kỹ tóg ãg jyvẽn ja nĩgtĩ, ãg tỹ Cristo ki rãnħ ke to jykrẽn jé. Cristo ki ge tigrĩn ãg tóg Topě mỹ tỹ ùn há nỹtĩ ha. ²⁵ Kỹ, ãg tỹ ti ki rã kar kỹ ãg tóg Topě tỹ vãsỹ ùn mỹ: ag jyvẽn nĩ, he mũ ěn krẽm ke tũ nỹtĩ ha.

²⁶ Topě krẽ vỹ tỹ ãg nỹtĩ ha, ãg tỹ Jesus Cristo ki ge kỹ. ²⁷ Ti jiji tó kỹ ãg kygpe kỹ nỹtĩ, kỹ ãg tóg ti ri ke nỹtĩ sir, tỹ ti hã ri ken hã vỹ. ²⁸ Hã kỹ ãg tóg tỹ jagnẽ hã nỹtĩ gé. Kỹ ãg tỹ ti ki ge kỹ Judeu ag vỹ fóg ag ri ke nỹtĩ, kỹ fóg ag vỹ kanhgág ag ri ke nỹtĩ gé. Ủ camarada ag vỹ ajag patrão ri ke nỹtĩ. Ag vỹ fag ri ke nỹtĩ gé. Nén ù pir vỹ tỹ ãg nỹtĩ, ãg tỹ Jesus Cristo ki ge kỹ nỹtĩn kỹ. ²⁹ Kỹ, ãg tỹ tỹ Cristo mré ke nỹtĩn kỹ ãg tóg tỹ Abraão krẽ'krẽ ag ri ke nỹtĩ gé sir, ãg kar, kỹ ãg venh ke mũ sir, Topě tỹ Abraão mỹ nén to mũ ěn ti.

4

¹ Sỹ ajag mỹ kãmén mãn ke vỹ, sỹ nén tó ja ěn ti. ùn rico kósin vỹ ti tũ mãn kãn ke mũ, ti mog kỹ. Ti tỹ ver sĩ nĩn kỹ tóg nén ù venh ke tũ nĩ ver. Ti panh camarada ri ke tóg nĩ ver, ti sĩ nĩn kỹ. Hã ra ti panh tỹ nén kar vỹ tỹ ti tũ nỹtĩnħ ke mũ. ² Ge ra ag tóg ver ti kanhrãn tĩ, ti sĩ nĩn kỹ. Kỹ ti kri ke ag ne ti tũ to jykrẽn tĩ'. Gen kỹ tóg kejẽn ti panh tỹ ti mỹ kurã nĩm ja ěn pětẽm ke mũ. ěn kã tóg ã tũ mãn kãn ke mũ sir. ³ Ge ti nĩgtĩ ãg mré, ãg tỹ tỹ Topě krẽ nỹtĩn kỹ. Jesus mur ke to hã ãg tóg gĩr ri ke nỹtĩ ja nĩgtĩ. Nén kar tãn kamẽg ja ãg tóg nĩgtĩ, krĩg tãn mré hã. ãg sigse ri ke han ja ag nĩgtĩ, nén tãn ag. ⁴ Kỹ, ti kurã tá krỹg kỹ Topě tóg ã kósin jẽnẽ. ěprã ke fi ki tóg mur. Moisés tỹ ãg jyvẽn tĩ ěn ki króm kãn ja tóg nĩgtĩ. ⁵ ãg kren han jé tóg mur, ti tỹ Moisés tỹ ãg jyvẽn ja ěn to ãg kygvãn jé sir, ãg tỹ vãhã tỹ Topě krẽ pẽ nỹtĩ jé sir. Tỹ ãg ti krẽ tũ ja nỹtĩgtĩ vỹ, hã ra Topě tóg ãg jẽ'jyn sór mũ ha sir.

⁶ Kỹ ãg tóg tỹ ti krẽ nỹtĩ sir. ãg tỹ tỹ ti krẽ nỹtĩn kỹ tóg ãg mỹ ã kuprĩg jẽnẽg mũ sir, ti tỹ tỹ ãg jagrẽ nĩ jé. Ti kósin kuprĩg ri ke ti nĩ, Topě kuprĩg ti. ãg jagrẽ tag tỹ ãg tóg sir Topě to: “ãg jóg mág,” he tĩ. ⁷ Hã kỹ ãg tóg tỹ ù camarada ri ke tũ nỹtĩ ha. Topě krẽ vỹ tỹ ãg nỹtĩ ha. Kỹ, ãg tỹ tỹ ti krẽ nỹtĩn kỹ ãg tóg ti tỹ nén mãn ke mũ gé sir, ti tỹ ãg mỹ nén nĩm ke ti. Topě tỹ ãg mỹ nén han hã vỹ.

Paulo tỹ krĩ kufy nĩ

⁸ Vãsỹ ajag tóg Topě ki kagtĩg ja nỹtĩgtĩ. Kỹ ajag tóg ón kỹ vẽnħ kãgrã hã to: “ãg Topě vỹ,” he ja nĩgtĩ. Vẽnħ kãgrã pi(jé) tỹ Topě nĩ'. Vẽnħ kãgrã hã nón mũn kỹ ajag tóg sigse kỹ nỹtĩ ja nĩgtĩ. ⁹ ùri ajag tóg Topě ki kanhró nỹtĩ jãvo. Hã ra tóg vãsỹ ajag ki kanhró nĩ ja nĩ vỹ, Topě ti, ha mẽ. Kỹ ajag tỹ ne jé tỹ nén kar tãn ag mré ke nỹtĩ mãn sór nẽ? Krój ti nỹtĩ, nén kar tãn ti, to ãg jagtar' he nỹtĩ ja nĩgtĩ, sigse kỹ ãg nỹtĩ ja nĩgtĩ, ãg tỹ tỹ ag mré ke ja nỹtĩn kỹ. Ajag mỹ sigse kỹ nỹtĩ mãn sór mũ'? ¹⁰ Kurã to ajag tóg jykrẽn sór mũ, kurã kórég to, kar kỹ kysã kórég to ke gé, prỹg kórég to ke gé. ¹¹ Inh kanẽ jur tóg tĩ, sỹ tag mẽ kỹ. Inh hỹn fagrĩnħ mỹ ag mỹ Jesus kãmén, he sóg tĩ, mỹr.

¹² Inh kanhkã, inh ri ke nỹtĩ sórmnĩ. Ajag mré ke vỹ tỹ inh nĩ, kỹ inh ri ke han sórmnĩ. Tag hã to sóg vỹ mũ, ajag mỹ. Ajag pi(jé) inh jũ han'. ¹³ Sỹ ajag ki jun vén mũ ěn mĩ ěkrẽ, sỹ ajag mỹ Topě vỹ tó vén mũ ti. ěn kã sóg kaga nỹ ja nĩgtĩ. ¹⁴ Kỹ tóg ajag mỹ e tĩ ja nĩgtĩ, ajag tỹ inh kaga ven kỹ. Ge ra ajag tóg iso é he ja tũ nĩgtĩ, ti pi(jé) ajag mỹ jẽgry ja nĩgtĩ', inh kaga ti. Inh mỹ vỹ há han ja ajag tóg nĩgtĩ, sỹ tỹ Topě tỹ jẽnẽ jafã nĩn kỹ, ajag mỹ. Ajag tỹ Jesus Cristo ki rĩr mũ ěn ri ke han ja ajag tóg nĩgtĩ isỹ. ¹⁵ ěn kã tóg ajag mỹ sér pẽ tĩ ja nĩgtĩ. Hã kỹ ajag tóg inh jagãgtãn ja nĩgtĩ. Isỹ ajag mỹ ajag kanẽ to vỹ ra ajag hỹn inh mỹ vin ke mũ vỹ. Kỹ ti tỹ ne jé ajag mỹ sér tũ tĩ nẽ, ùri? ¹⁶ Ajag mỹ sóg ki hã tó mũ. Inh mỹ tag tigrĩn ajag mỹ kórég nĩ ha'? Inh mỹ tóg e tĩ, tag ti.

¹⁷ Ū ag tóg ājag mý vī há han sór mū. Ag ón vē hā ra. Ag tỹ ājag tỹ inh kato tē han sór vē, hā kỹ ag tóg ón kỹ vī há han sór mū, ājag tỹ ag hā nón mū jé sir, isovānh kỹ. ¹⁸ Há ti nī vē, nén ū há tỹ ājag mý sér nīn kỹ. Isỹ ājag mré nīn kỹ nén ū há ěn tóg ājag mý sér nī ja nīgtī. Kỹ ājag tỹ tag tovānh tũ nī kỹ tóg há tī, inh mý. Kỹ nén ū há hā to tar nýtīmnī.

¹⁹ Inh krē', ājag mýnh ri ke vỹ tỹ inh nī. Ěg mýnh fi ne kaga tī', ěg tỹ fi ki mur ken kỹ. Fi kaga tag ri ke han mǎn inh, ājag to. Ājag tỹ Cristo hā ri ke nýtīn kỹ tóg há tī, sỹ tag hā ve sór vē, hā jé sóg ěg mýnh fi kaga ěn ri ke han mǎn mū, ājag tugrīn. ²⁰ Sỹ ājag mré nīnh há tóg tī, sỹ ājag mré vēmén jé, sỹ ājag mý kāmén há han jé sir. Sỹ komēr hā ājag mý kāmén há tóg tī. Hā ra sóg kanē jur mū, ājag to, hā kỹ sóg vī mū.

Agar fi mré Sara fag to vēnh jykre

²¹ Ājag kāmī ū tóg Moisés tỹ ěg jyvĕn ja ěn han sór mū. Ājag hỹn mē kǎn ja tũ nī, vāsỹ vēnh jykre ěn ti, hā kỹ ājag tóg han sór mū. Ājag tỹ mē há han kǎn ja nī ra ājag hỹn han sór ke tũ nī vē. Hā mē, vāsỹ vēnh jykre ěn ti, ājag tỹ nén han sór mū ěn ti. ²² Tag vỹ rán kỹ nī, ha mē. Abraão vỹ kósín régre nī ja nīgtī. Ū mýnh fi vỹ tỹ ti camarada fi nī, kỹ ū mýnh fi vỹ tỹ ti prũ pē fi nī. ²³ Kỹ Abraão tóg ā camarada fi mré nỹ ja nī, ti tỹ ver kófa tũ ra, kỹ ti kósín tóg fi ki mur mū sir. Hā ra tóg ā prũ pē fi ki (tóg) ā kófa ra kósín mū gé sir. Topē tỹ ti mý: “ā kófa nī ra ā tóg kósín ke mū,” he jan hā vē. ²⁴ Topē tóg tag han, ěg tỹ ti jykre ki kanhrǎn jé. Ti tỹ ěg mý comparação han hā vē, fag to, ha mē. Topē tỹ ěg mré jykren mū ri ke fag nýtī, Abraão prũ fag. Agar fi vỹ tỹ Abraão camarada ja nīgtī. Ti mré ke pē tũ fi vē. Kỹ fi tóg ri ke nī, Topē tỹ krī tỹ Sinai tá Moisés mý ti tỹ ěg jyvĕn ěn tó ja ti. Tag vỹ Agar fi ri ke nī, ti camarada fi ri ke. Ū tỹ vēnh jykre ěn han mū vỹ tỹ ū camarada ri ke nýtī, fi kóm. Tỹ ag tóg sir Topē mré ke tũ nýtī, ū tỹ Judeu jykre han mū ag. ²⁵ Kỹ Agar fi vỹ krī tỹ Sinai ri ke nī, ga tỹ Arábía tá. Hā ra fi tóg cidade tỹ Jerusalém ri ke nī gé, hā vỹ: Judeu ag jykre han mū ag kar, he mū, hā vỹ: Jerusalém, he mū. Tỹ ag Topē mré ke tũ nýtī, ū tỹ Judeu ag jykre han mū ag. ²⁶ Hā ra ěg jamā vỹ kanhkā tá nī, Jerusalém tǎg to ken hā vē, hā vỹ: kanhkā, he mū. Ěg mýnh ri ke vē sir, Abraão prũ pē fi ri ke vē sir, Jerusalém tǎg, he mū tag ti. ²⁷ Tag to tag tóg rán kỹ nī, ha mē: “kurī ā tóg nī, krĕg vānh ā tóg nī. Ge ra mý sér tīmnī, jamā há ra prĕrmnī, ā mý sér tīn kỹ, gīr ū tỹ ā ki mur ja tũ ra. Á krē vỹ e tǎvī nýtīnh mū, ūn krĕg mū fi krē e kǎfór ti nýtīnh mū, ā krē ti, ā mén tỹ ā fón mū ra. Ū tỹ fi mén mré tī mū fi krē kǎfór ti nýtīnh mū, ā krē ti,” he ja tóg nī, Topē vī tỹ rán kỹ nī ki.

²⁸ Kỹ ěg tóg Isaque ri ke nýtī. Topē tóg Isaque to Abraão mý: “ā kófa nī ra ā tóg kósín ke mū,” he ja nī. Kỹ ěg tóg Cristo ki ge kỹ nýtī kỹ tỹ Topē krē nýtī, Topē tỹ: “inh krē vỹ tỹ ājag nýtīnh mū,” hen kỹ. Topē vī tag tugrīn ěg tóg Isaque ri ke nýtī. ²⁹ Kỹ Abraão kósín ve vỹ ti prũ pē fi kósín vóg kónǎn ja nīgtī. Abraão vỹ ā kófa tũ ra ā kósín ve ěn han, hā ra tóg Topē kuprīg tugrīn ā prũ pē fi kósín han, ā kófa pē ra. Kỹ ti kósín ve vỹ ěgno vóg kónǎn mū. Hā kỹ ěg tóg tag vég tī gé, ūri. Judeu jykre han mū ag vỹ ěg vóg kónǎn sór tī gé ver. ³⁰ Kỹ Abraão krē ag to tag vỹ rán kỹ nī, ha mē: “ā camarada fi fón nī, fi kósín mré,” he ja tóg nī. “Ā camarada fi kósín pi(jé) ā prũ pē fi kósín mré ā tũ mǎn ke mū'. Ā pir mý ti mǎn ke mū, ā prũ pē fi kósín ti,” he ja tóg nīgtī, Topē vī tỹ rán kỹ nī ki, Abraão krē to. ³¹ Kỹ ěg tóg ti prũ pē fi kósín ri ke nýtī. Ěg pi(jé) tỹ ti camarada fi kósín ri ke nýtī, ěg tỹ Jesus ki ge kỹ nýtīn kỹ.

5

Jesus tỹ ěg kygvǎn ja

¹ Kỹ Jesus tóg ěg kygvǎ, vēnh jykre si to, ěg kygvar kỹ nýtī jé sir. Hā kỹ Judeu ag jykre ěn han sór tũg nī. Ū tỹ tag to ājag krīn sór mū ěn ag kato tĕmnī, ag nón mū sór tũg nī, ājag tỹ vēnh jykre ěn krĕm sigse kỹ nýtī mǎn tũ nīn jé sir.

² Hā kỹ sóg ājag mý kāmén mū, inh, hā vỹ: Paulo, he mū. Sỹ ājag mý nén tónh ken hā vē, ha mē: ājag tỹ ājag gré junun fár kym kỹ, ājag tỹ Judeu ag jykre han jé, kỹ Cristo vỹ ājag mý nén ū há han ke tũ nī. ³ Ha vé, sỹ tag tó mǎn ke vē gé, ha mē. Ājag tỹ ājag

fár kym ký ājag han kãn ke mü sir, Moisés tỹ ěg mỹ vĕnh jykre nĩm ja ěn ti. ⁴ Hã ra ājag tóg Cristo tovãnh ke mü, ājag tỹ Moisés tỹ ěg jyvĕn tĩ ěn han sór ký, ājag tỹ Moisés jykre tugrĩn Topĕ mỹ tỹ ũn há nỹtĩ sór ký. Topĕ vỹ ěg jagãgtãn sór mü. Ājag tỹ Moisés jykre han sór ký ājag tóg ti tỹ ěg jagãgtãn tag to é he mü sir. ⁵ Ājag jāvo ěg tóg ěg tỹ Jesus ki gen ký Topĕ mỹ tỹ ũn há nỹtĩnh mü. Ěg tỹ ti ki ge ký nỹtĩn ký ěg tóg Topĕ kuprĩg tỹ jagrĕ nỹtĩ. Ěg jagrĕ tag tugnĩn ěg tóg Topĕ mỹ tỹ ũn há nỹtĩ. ⁶ Ha vé, ěg tỹ Jesus Cristo ki ge ký nỹtĩn ký tóg tỹ nĕn ũ tũ tĩ sir, ũn gré junun fár kym ja ti, ũn tỹ kym ja tũ ti ke gé. Ti ki ge ký ěg tóg nỹtĩ, ký ěg tóg tỹ nĕn ũ pir nỹtĩ ha, jagnĕ to há ěg nỹtĩ ha.

⁷ Ha vé, mü há han ja ājag nĩgtĩ. Ājag tỹ ne jé tovãnh sór nĕ? Ājag tỹ ne jé vĕnh vĩ há kri nĩm sór tũ nĩ nĕ? ⁸ Topĕ tỹ ājag krĩn pijé'. Ti hã ne ājag jé prĕr ja nĩgtĩ'. ⁹ Tag to jykren: fermento sĩ vỹ ěg tỹ pão kujãgja ký kri rũm ke tĩ, ký tóg tỹ sónsón ke kãn tĩ, tỹ nĩ kãn tóg tĩ, pão ti. Topĕ vĩ kujãgja vỹ ge nĩ, ha mĕ. Ke tũg nĩ. ¹⁰ Ěg Senhor tũ vỹ tỹ ājag nỹtĩ. Hã ký sóg ājag to: “ag hỹn ti tovãnh ke tũ nĩ,” he tĩ, “ag hỹn ti japry, ti jamĩn jagma mü mãn ke mü,” he sóg tĩ. Ũ tỹ ājag krĩn mü ěn ne vĕsỹrĕnh ke mü', ājag krĩn kónãn ja tag to, ti tỹ tỹ pã'i nĩ ra.

¹¹ Inh pi(jé) ěg gré junun fár kym to: “ke ra,” he tĩ'. Isỹ ag mré tag tó ra ag hỹn inh vóg kónãn ke tũ nĩ vĕ. Isỹ ag mré tag tó ra ag hỹn iso jũnh ke tũ nĩ vĕ. Ěg tỹ ěg fár kym tugrĩn krenkren tĩ ra ěg tóg Jesus tỹ ka to sa ja ěn to krenkren ke tũ nĩ vĕ, ký tóg ag mỹ sér tĩ vĕ, isỹ vĕnh jykre si tó tĩ ra. Hã ra sóg tó tũ nĩgtĩ. ¹² Ũ tỹ tag tó mü ag jé ājag grãfy kym kãn, ũ tỹ ājag krĩn kónãn mü tag ag.

¹³ Hã ra Topĕ tóg ěg jé prĕr, ti tỹ ěg kygvãn jé. Ti tỹ ěg kygvãn ký ěg kygvar ký nỹtĩ ha. Ge ra ěg tóg ěg tỹ vĕsóg ki nĕn to jykren mü ěn han sór ke tũ nĩ, ti kórĕg nĩn ký. Ěg tũ hã han ke tũ ěg nĩ. Ěg tỹ jagnĕ to há nỹtĩ tag hã ne há nĩ'. Jagnĕ ki rĩr to ken hã vĕ. ¹⁴ Ha vé, Topĕ tỹ ěg jyvĕn e ěn ki króm kãn jé ěg tóg ke mü, ěg tỹ nĕn ũ pir han ký, hã vỹ: “ã régre ki rĩr há han nĩ, ã tỹ vĕnh ki rĩr há ri ke han nĩ, ã régre ki,” he mü. ¹⁵ Jãvo ājag tóg mĩg ri ke jagnĕ mãn sór mü, jagnĕ to jũn ký. Jagnĕ tỹ tũ' he jé ājag tóg ke mü, ge ký, ha vemnĩ.

Ěg tỹ ěg tỹ nĕn to ěn mü ěn han ke tũ

¹⁶ Hã ký sóg ājag mỹ: “Topĕ kuprĩg tỹ ājag mỹ nĕn tó mü ěn hã han nĩ,” he sór mü. Ký ājag tóg ājag tỹ nĕn to ěn mü ěn han ke tũ nĩ. ¹⁷ Ěg tỹ nĕn to ěn mü vỹ Topĕ kuprĩg tỹ ěg mỹ nĕn tó mü ěn kato tĕ nĩ, ký Topĕ kuprĩg vỹ ěg tỹ nĕn to ěn mü ěn kato tĕ nĩ gé. Jagnĕ to rará ag tóg tĩ, hã ký ěg tóg ěg tỹ nĕn han sór mü ěn han ke tũ nĩ. ¹⁸ Ěg tỹ hã ra Topĕ kuprĩg tỹ ěg mỹ nĕn tó mü ěn han kãn ký tóg ěg se mãn ke tũ nĩ sir, Topĕ tỹ vãsỹ ěg jyvĕn ja ěn ti.

¹⁹ Ěg tỹ vĕsóg ki nĕn to jykren mü ěn vỹ kórĕg nĩ, ký vĕnh kar vỹ ki kanhró nỹtĩ. Ěg tỹ vĕsóg ki nĕn to jykren to ken hã vĕ, hã vỹ: mén tũ mré nỹ, he mü, prũ tũ mré nỹ, he mü, nĕn ũ kavĕj han tĩ, he mü, ěg tỹ nĕn to ěn mü kar han tĩ, he mü, ²⁰ ěg tỹ vĕnh kãgrá to: Topĕ vĕ, he tĩ, he mü, kujá jykre han tĩ, he mü, curandĕiro jykre han tĩ, he mü, jagnĕ kato vãsãn tĩ, he mü, jagnĕ to ājag fe tỹ gỹm ke (ka)mĕ, he mü, jagnĕ tũ to jykren kónãn tĩ, he mü, vĕsỹ ũn mág han sór mü, he mü, vĕnh kãpãm ký nỹtĩ sór mü, he mü, jagnĕ vĩ kato tĕ mü, he mü, ²¹ jagnĕ tũ to ěn tĩ, he mü, kronkron tĩ, he mü, krĩn tũ, he mü, vĕnh jykre pãno han tĩ tỹ hĕn ri ke ke gé. Tag to sóg ājag jyvĕn huri, hã ra sóg tó mãn sór mü. Ũ tỹ tag han mü ag pi(jé) Topĕ tỹ tỹ ěg pã'i nĩ venh ke mü'.

²² Topĕ kuprĩg tỹ ěg kanhrãn mü vỹ tag ri ke tũ nĩ. Há kar ti nĩ. Ti tỹ ěg kanhrãn to ken hã vĕ, hã vỹ: jagnĕ to há, he mü, mỹ sér tĩ, he mü, krĩ kuprã, he mü, jagnĕ to fe há nỹtĩ, he mü, komĕr hã vĩ, he mü, jagnĕ jagãgtãn tĩ, he mü, jagnĕ mỹ ón vãnh, he mü, ²³ vĕsỹ ũn mág han sór tũ, he mü, vĕso jykren tĩ, he mü. Topĕ pi(jé) tag kato tĕ tĩ', ti tỹ vãsỹ ěg jyvĕn ti vỹ tag ri ke ja nĩgtĩ gé. ²⁴ Ěg tỹ tỹ Jesus Cristo tũ nỹtĩn ký, ký ěg tóg tỹ ti tỹ ka to sa ja ěn ri ke nỹtĩ. Hã ký ěg tóg ěg tỹ nĕn to ěn mü ěn han mãn sór ke tũ nĩ ha sir, ěg tỹ nĕn ki vĕ'ĩ mü ěn han mãn sór ke tũ ěg nĩ ha.

²⁵ Ěg tỹ Topĕ kuprĩg tỹ jagrĕ nỹtĩn ký, ký ěg tóg ti tỹ ěg mỹ nĕn tó mü ěn han kãn ke mü sir, ti kuprĩg tỹ ěg mỹ nĕn tó mü ěn ti. ²⁶ Ký ěg tóg sir tỹ ũn mág nỹtĩ sór ke tũ nĩ,

jagně jũ han mǎn sór ke tũ ěg nĩ, jagně tũ mǎn sór ke tũ ěg nĩ gé. Věnh jykre há hã han jé ěg tóg ke mũ.

6

Ěg tỹ jagně jagāgtān ke

¹ Inh kanhkā', kejĕn ājag kāmĩ ũ tóg kygnĕg tĩ, věnh vatánh tá. Kỹ ũ tỹ kygnĕg mũ ěn mỹ: "kygnĕ ā mỹr," hemnĩ, ājag tỹ Topĕ kuprĩg tỹ jagrĕ nỹtĩn kỹ. Komĕr hã ti mỹ tómnĩ, ti tỹ kygnĕg mũ ěn ti. Kỹ vēso jykrén há han nĩ gé, ājag tỹ ti tỹ kygnĕ ěn ri ke han tũ nĩ jé, ti kóm. ² Jagnĕ ajudar hemnĩ, ājag mrĕ ke ũ tỹ jagtar nĩn kỹ. Cristo tỹ ěg jyvĕn mũn hã vē. ³ Kejĕn ũ tóg vēsóg ki vēsỹ ũn mág han sór tĩ. Hã ra tóg tỹ nén ũ tũ nĩ. Kygnĕg ti tĩ, ũ tỹ tag to jykrén mũ ti. Věnh hã mỹ tóg ón mũ sir. ⁴ Ājag jykre tugnỹm nĩ. Ti há nĩn kỹ tóg há tĩ, kỹ tóg tỹ ũn há nĩ, ũ tỹ věnh jykre há han mũ ěn ti. Jagnĕ mỹ: inh jykre há vỹ ā jykre há kǎfór nĩ, he tũg nĩ. ⁵ Topĕ hã ne ěg ki ěg jykre há ěn vég tĩ', kar kỹ tóg ěg mrĕ ke ag jykre ki kanhró nĩ gé, Topĕ ti.

⁶ Kejĕn ũ tóg ājag mỹ Topĕ vĩ kāmén mũ. Ti mỹ ājag tỹ nén ũ nĩmnĩ, ti tỹ ājag mỹ kāmén mũ kaja ti.

⁷ Kygnĕ tũg nĩ, ěg tỹ Topĕ to é he kỹn pi(jé) há nĩ'. Ěg tỹ ón kỹ: věnh jykre há kǎgmĩ kỹ inh nĩ ha, hen kỹ tóg ěg kren han ke tũ nĩ. Topĕ vỹ ěg jykre ki kanhró nĩ. ⁸ Ge ti nĩgtĩ, ěg tỹ nén han mũn ti. Ěg tỹ ěg tỹ nén to é n mũ ěn han kỹ ěg tóg ter ke mũ sir. Kỹ tog ěg tỹ mandioca ko vǎnh krǎn kỹ ti nin ko kỹ ti tỹ ěg tén ěn ri ke nĩ sir. Ěg tỹ Topĕ kuprĩg tỹ ěg mỹ nén tó mũ ěn han kỹ ěg tóg rĩr krỹg ja tũ ěn venh ke mũ, kỹ tóg ěg jakré tỹ kanĕn há han kỹ ěg tỹ ko ěn ri ke nĩ sir. ⁹ Hã kỹ nén ũ há han to krónh ke tũg nĩ. Ve jé ěg tóg ke mũ, ti kanĕ há ěn ti, Topĕ tỹ ěg mỹ nén ũ há han ke ti, ěg tỹ Topĕ jykre há tovǎnh tũ nĩn kỹ. ¹⁰ Hã kỹ ěg tóg věnh kar jagāgtān ke mũ. Kỹ tóg há tǎvĩ nĩ, ěg tỹ ěg mrĕ Jesus ki ge kỹ nỹtĩ ag jagāgtān ti.

Paulo tỹ ag jyvĕn mǎn

¹¹ Ha vē, rá mág han sóg tĩ, sỹ vēsóg ki ājag mỹ rán kỹ.

¹² ũ ag tóg ājag kutān tĩ, ājag tỹ ājag grĕ junun fár kym jé. Ag tỹ věnh mỹ nén ũ há han sór vē, ha mẽ. Judeu ag tóg ěg vóg kónān tĩ, ěg tỹ fóg ag mỹ: "ājag grĕ junun fár kym nĩ," he tũ to. ũ tỹ ājag kutān mũ ag vỹ Judeu tỹ ag vóg kónān ěn ve sór tũ nĩ. Cristo tỹ cruz to sa ja ra ag vēsýrĕnh sór tũ nĩ, hã kỹ ag tóg ājag mỹ: "ha ājag fár kym nĩ," he mũ. Ag vỹ jĕmĕ tũg nĩ. ¹³ Ha vē, ag tỹ ājag grĕ junun fár kym ja ra ag tóg Topĕ tỹ vǎsỹ ěg jyvĕn tĩ ěn han kǎn ja tũ nĩgtĩ. Hã ra ag tóg ājag mỹ ājag tỹ věnh kym ke ti tó mũ, ag tỹ věnh kar mỹ ājag tỹ nén han mũ tó jé sir. Tag ki ag tóg tỹ ũn mág nỹtĩ sór mũ, vēsóg ki. ¹⁴ Ag jǎvo sóg tỹ ũn mág nĩ sór tũ nĩ. Nén pir tóg inh mỹ sér tĩ, hã vỹ: ěg pǎ'i tỹ Jesus Cristo tỹ cruz to sa ja ěn, he mũ. Kỹ ěprǎ ke jykre inh mỹ tũ tĩ ha. Jesus tỹ cruz to sa kỹ tóg inh mỹ tỹ tũ' he ja nĩ, ěprǎ ke jykre tỹ, Jesus ti. Kỹ sóg han sór tũ nĩ ha. Jǎvo sóg cruz to sa ri ke han kỹ nĩ gé, ěprǎ ke jykre mỹ sóg hur tũg. Sỹ han tũ to ken hã vē. ¹⁵ ũ ag tóg ājag fár kym tĩ, jǎvo ũ ag tóg kym tũ nĩ gé. Hã ra tóg tỹ nén ũ tũ nĩ gé. Topĕ mỹ ěg há nỹtĩ, ěg tỹ ti ki ge kỹ nỹtĩn kỹ. Topĕ vỹ ěg han mǎn, kỹ ěg tóg tỹ ũn tǎg nỹtĩ ha. Tag hã ne há nĩ'. ¹⁶ ũ tỹ věnh jykre tǎg tag han mũ ag krĩ kuprǎg ti tĩ, Topĕ ti, ũ tỹ ge jagāgtān ti tĩ. Topĕ tũ ag hã vē ha. Israel pĕ ag hã vē sir.

¹⁷ Kỹ inh kutān mǎn tũg nĩ, inh vēsýrĕnh han mǎn tũg nĩ. Jesus vēsýrĕnh ja ěn ri ke han inh mỹr, hã kỹ sóg ti ri kén kygven kỹ nĩ ha.

¹⁸ Inh kanhkā', ěg pǎ'i tỹ Jesus Cristo jé ājag tar han, ti jé ājag krĩ kuprǎg. Hã vē.

PAULO TỠ CARTA HAN: ÉFESO TÁ KE AG MỠ CARTA

¹ Paulo tỠ rá vĕ. IsỠ cidade tỠ Éfeso tá ke ag mỠ rán hă vĕ. Jesus Cristo vỠ inh fĕg', sỠ tỠ ti apóstolo jĕ jé, Topĕ tỠ isỠ apóstolo han kỠ. Hă kỠ sóg ājag mỠ carta tag rán mŭ. Topĕ tŭ vỠ tỠ ājag nỠtĭ, kỠ ājag tóg cidade tỠ Éfeso tá Jesus to vĕnhmăn tĭ. Jesus Cristo tovănh tŭ ājag tóg nỠtĭ. ² Ęg jóg tỠ Topĕ jé ājag tar han, ti jé ājag krĭ kuprăg, Ęg Senhor tỠ Jesus Cristo ti ke gé.

Cristo tỠ Ęg mỠ vĭ há han mŭ

³ Ęg kar jé Topĕ mỠ vĭ há han, Ęg jé ti mỠ agradecer hé, Ęg Senhor tỠ Jesus Cristo panh mỠ. Ęg tỠ Cristo ki ge kỠ nỠtĭn kỠ tóg Ęg mỠ kanhkă ti ven sór mŭ, Topĕ ti. Tá tóg Ęg mỠ nĕn (ŭ) há kar ven sór mŭ gé, kỠ nĕn ŭ tóg Ęg mỠ tŭ' henh ke tŭ pĕ nĭ, tá. Hă jé tóg Ęg mỠ ā kuprĭg jĕnĕ, Ęg tỠ ti tugrĭn nĕn (ŭ) há kar ve jé. ⁴ VăsỠ tóg Ęg kuprĕg ja nĭ, ā tỠ nĕn (ŭ) kar han ke to hă tóg Ęg kuprĕg ja nĭ, Topĕ ti, Ęg tỠ tỠ ti tŭ nỠtĭ jé, Cristo tugrĭn. Ęg tỠ ti ri ke nỠtĭ jé tóg Ęg kuprĕg, Ęg tỠ kygnĕg tŭ nĭ jé. Ti fe vỠ tỠ Ęg nỠtĭ. ⁵ Hă kỠ tóg Ęg kuprĕg, Ęg tỠ tỠ ti krĕ nỠtĭ jé, Jesus Cristo tugrĭn. Ti hă ne vĕsóg ki Ęg kuprĕg ke to jykrĕn ja nĭgtĭ. ⁶ Ęg tỠ ti mỠ vĭ há han jé tóg Ęg kuprĕg. Ũn mág vỠ tỠ ti nĭ, Ęg jagăgtăn tóg tĭ, hă kỠ tóg há tĭnh mŭ, Ęg tỠ ti mỠ agradecer hen kỠ. Ti kósĭn pir tugrĭn Ęg tóg tỠ ti fe pĕ nỠtĭ.

⁷ Ti hă ne Ęg kren han tĭ, ti kyvĕnh tỠ Ęg jagfy kăkutĕ ja nĭn kỠ. TỠ tóg Ęg tỠ Topĕ vĭ mranh ja ĕn tỠ tŭ' he ja nĭgtĭ, ā kyvĕnh tỠ. Topĕ tỠ Ęg mỠ nĕn ŭ há han hă vĕ. ⁸ Hă ra tóg tŭ' henh ke tŭ nĭ, ti tỠ Ęg mỠ nĕn nĭm ja tag tĭ. Krĭ há ti nĭ, nĕn kar to jykrĕn há han ti tĭ, Topĕ ti. ⁹ VăsỠ tóg to jykrĕn ja nĭgtĭ, kỠ tóg ũri Ęg mỠ tó mŭ sir, ti tỠ Cristo tugrĭn nĕn han sór mŭ ti. ¹⁰ Cristo tỠ tóg ũn mág han sór mŭ, vĕnh kar kri ke, kanhkă tăn ag kri ke, ga kri mŭ ag kri ke gé, kỠ vĕnh kar vỠ tỠ ti krĕm ke nỠtĭnh mŭ. Povo pir ri ke ag nỠtĭnh mŭ, kură ĕn kă. Ti kură ki tóg ti tỠ ũn mág han sór mŭ ha, Topĕ ti.

¹¹ Ęg tỠ Cristo ki ge kỠ nỠtĭ kỠ Ęg tóg venh ke mŭ gé, Topĕ tỠ ā tŭ ag mỠ nĕn ven ke mŭ ĕn ti. Ęg tỠ ĕn ve jé Topĕ tóg Ęg kuprĕg ja nĭ, ti tỠ Ęg kuprĕg to jykrĕn kỠ. Nĕn kar to tóg jykrĕn há han tĭ, vĕsóg ki, kỠ tóg Ęg kuprĕg to jykrĕn ja nĭ gé, ¹² Ęg tỠ Jesus hă pin kỠ ti ki ĕvănh jé. Ęg tỠ ti ki ĕvănh kar kỠ Ęg tóg văhă Topĕ mỠ vĭ há han ki kanhró nỠtĭ. Ti hă ki ĕvănh kỠ Ęg tóg Topĕ to: “ũn mág vỠ tỠ ti nĭ,” he' he tĭ sir.

¹³ Ti kăme mĕ ja ājag tóg nĭgtĭ gé, vĕnh vĭ há ĕn, ti tỠ Ęg krenkren han sór mŭ kăme. Ti kăme ĕn mĕ kỠ ājag tóg ti ki ge jĕg. KỠ Topĕ tóg ājag mỠ ā kuprĭg jĕnĕ. TỠ tóg ājag jagrĕn há han. Ti tỠ ājag nĭgjĕg hă vĕ, ā kuprĭg tỠ. ¹⁴ Ęg jagrĕ tugrĭn Ęg tóg ki kanhró nỠtĭ, ti tỠ Ęg mỠ ā tỠ Ęg mỠ nĕn tó ja ĕn ven kăn ke ti. Kejĕn Ęg tóg venh ke mŭ, ha vemnĭ, Ęg tỠ tỠ ti tŭ nỠtĭn kỠ, kỠ tóg Ęg mỠ sér tĭnh mŭ. KỠ Ęg tóg ti mỠ vĭ há han ke mŭ, ti tỠ tỠ ũn mág jĕn kỠ.

Paulo tỠ Topĕ mré vĭ mŭ

¹⁵ Ājag tỠ Ęg Senhor tỠ Jesus ki ge mĕ kỠ inh nĭ, ājag tỠ jagnĕ to há nỠtĭ ti ke gé, ājag tỠ ũ tỠ Jesus ki ge kỠ nỠtĭ ag kar to há nỠtĭ ti. ¹⁶ Hă kỠ sóg ājag to Topĕ mỠ: “há ti nĭ,” he tĭ. Ājag to ti mré vĕmĕn to krónh ke vănh inh nĭgtĭ. ¹⁷ Ęg Senhor tỠ Jesus Cristo panh mré sóg vĕmĕn tĭ, Ęg jóg mré, ũn mág pĕ ĕn mré. Ti mré vĕmĕn kỠ sóg ti mỠ: “ā kuprĭg tỠ ag krĭn nĭ,” he tĭ, “ā kuprĭg tỠ ag mỠ vĕnh kămĕn há han nĭ, ag tỠ ā ki kanhrăn há han jé,” he sóg tĭ. ¹⁸ “Ha ag mỠ krĭ há nĭm. Ha ag kanĕ tar han, ag tỠ ve há han jé. Ag kuprĕg ja ā tóg nĭ, ā tỠ ag mỠ nĭm jé, ā tỠ nĕn tó ja ĕn ti. Ag tỠ tỠ ā tŭ nỠtĭn kỠ ā tóg ag mỠ ā tŭ vin ke mŭ, ā tỠ nĕn tó mŭ ĕn ti, hă ra tóg e tăvĭ nỠtĭ, ā tỠ ag mỠ nĕn vin ke mŭ ĕn ti. ¹⁹ Tar tăvĭ ā tóg nĭ gé, kỠ ā tóg ag mỠ nĕn kar há han tĭ tag ki, tá ke gé, ag tỠ ā ki ge kỠ nỠtĭn kỠ. Ag mỠ tag kămĕn nĭ,” he sóg tĭ, Topĕ mỠ.

²⁰ Ti tar tăvĭ nĭn kỠ tóg Cristo ter kar kỠ ti rĭn măn ja nĭgtĭ gé. KỠ tóg ti mỠ: “ha inh pĕgja tá nĭ,” he ja nĭ gé, kanhkă tá. ²¹ Ti tỠ tóg pă'i mág han, kỠ tóg tỠ pă'i kar ag kri ke

jě, kanhkã tãn kar ag kri ke, ěg tỹ ũn vėg tũ kar ag kri ke, ũn tar ag, ũn mág ag. Tỹ tóg ag kri ke kar jě, Cristo ti, kỹ ti jiji vỹ vėnh kar ag jygi kãfór nĩ gé, ěg tỹ ũri ũn tó mũ ag jygy, ěg tỹ kar kỹ ũn tónh ke ag jygi mré hã. ²² Kỹ Topě tóg ti krēm vėnh kar vin kãn. Kỹ tóg tỹ vėnh kar kri ke jě sir, Cristo ti. Kỹ tóg tỹ ěg kri jě nĩ sir, ěg tỹ tỹ ti tũ nỹtĩn kỹ. ²³ Jãvo ěg tóg ti há ri ke nỹtĩ gé sir, kỹ ěg tóg tỹ ũn pir nỹtĩ jagně mré, Jesus ti mré ke gé. ěg há vỹ ã pir mỹ tỹ nén ũ tũ nĩ. ěg krĩ mré tóg tỹ nén ũ pir nĩ, ěg há ti. Ri ke ti nĩ, ěg tỹ Jesus mré tỹ ũn pir nỹtĩ ti. Ti hã vỹ nén kar rĩr han tĩ, Jesus ti.

2

Ti ki ge kỹ ěg rĩnrĩr nỹtĩ

¹ Vãsỹ ājag tóg nũgme ki vár ke mũ vė, ājag tỹ ti vĩ ki króm ja tũ nĩn kỹ, ājag tỹ ti vĩ mranh ja nĩn kỹ. ² Ěn kã ājag tóg ěprã ke ag jykre pãno jagma mũ ja nĩgtĩ, Nén-Kórég pã'i mág ěn tỹ ājag krĩn kỹ, ũ tỹ nén ũ ũ tãn ag kri pã'i ěn tỹ ājag krĩn kỹ. Tỹ ti krĩg tãn ag kri pã'i nĩ gé. Ěn vỹ tỹ ũ tỹ Topě vĩ mranh tĩ ag jagrě nĩ mỹr. ³ Vãsỹ ěg tóg tỹ ti tũ nỹtĩ ja nĩgtĩ gé, ti krě ag ri ke. Ěn kã ěg tóg ěg tỹ nén to ěn mũ ěn han ja nĩgtĩ, ěg tỹ nén to jykrén mũ kar ěn ti. Kỹ Topě tóg ěg vóg kónãn mũ vė, ti tỹ ag vóg kónãn ke ěn ri ke.

⁴ Hã ra Topě tóg ěg jagãgtãn pě han. Ěg to tóg há tãvĩ nĩ, kỹ ěg tóg tỹ ti fe nỹtĩ. ⁵ Ěg tỹ ti vĩ mranh ja nĩn kỹ ěg tóg vėser ri ke nỹtĩ ja nĩgtĩ, hã ra tóg ěg rĩnrĩn mãn ja nĩgtĩ, Cristo mré. Ti tỹ ěg jagãgtãn kỹ tóg ěg krenkren han ja nĩgtĩ. ⁶ Cristo mré tóg ěg rĩnrĩn mãn ja nĩgtĩ gé. Kanhkã tá tóg ěg tỹ ũn mág han ke mũ, Jesus Cristo mré hã. ⁷ Tag ve kỹ vėnh kar vỹ ki kanhró nỹtĩnh mũ, Topě tỹ Jesus Cristo tugrĩn ěg to há tãvĩ nĩn ki. Hã jé tóg ěg mỹ nén ũ há ěn ven ke mũ. Tũ' he jãvãnh ti nĩ, ti tỹ ěg mỹ nén ven ke ti. Ti tỹ Jesus Cristo to há nĩn kỹ tóg ěg mỹ nén ũ há kar ven ke mũ.

⁸ Ha vé, ti tỹ ěg jagãgtãn kỹ tóg ěg kren han ja nĩgtĩ, ěg tỹ ti ki ge kỹ nỹtĩn kỹ. Ěg tỹ vėsóg ki vėnh kren han pijé'. Topě tỹ ěg kren han ja vė mỹr. Kỹ tóg ti tỹ ěg mỹ presente han ri ke nĩ. ⁹ Ěg vãsãn pijé'. Ěg tỹ ěg vãsãn to kren tĩ ra ěg Topě mỹ: "há inh nĩ, vãsãn ja inh nĩ, hã kỹ sóg kren mũ," henh mũ vė. Hã ra ěg pi(jé) ěg vãsãn to kren ke mũ'. Ti tỹ ěg jagãgtãn vė mỹr. ¹⁰ Ti hã ne ěg han mãn ja nĩgtĩ'. Jesus Cristo tỹ tóg ěg han ja nĩgtĩ, ěg tỹ vėnh jykre há han jé. Topě vỹ ěg mỹ vėnh jykre há tag nĩm kãn, ěg tỹ vėnh jykre tag jagma mũ jé.

Ěg tỹ Cristo mré tỹ ũn pir nỹtĩ

¹¹ Ājag tỹ vãsỹ nén han tĩ ja ěn mĩ ěkré. Fóg vỹ tỹ ājag nỹtĩ, Judeu ag tỹ ũ to: "ũn gré junun fár kym ja tũ ag," he mũ ěn ag vỹ tỹ ājag nỹtĩ. Jãvo Judeu ag vỹ ājag gré junun fár kym tĩ. Hã ra ěg fár vỹ tỹ ěprã ke nĩ. ¹² Ũ tỹ kym tĩ ag jãvo ājag tóg vãsỹ Cristo ki kagtĩg ja nỹtĩgtĩ, kỹ ājag pi(jé) tỹ Israel ag mré ke nỹtĩ ja nĩgtĩ', vãsỹ. Topě tỹ Israel jóg'jóg ve ag mré nén ũ to jykrén mũ ěn ki kagtĩg ja ājag tóg nỹtĩ gé, Topě ki kagtĩg ja ājag tóg nỹtĩgtĩ gé, kỹ ājag tóg Topě tỹ ěg mỹ nén ven ke mũ tag ki kagtĩg ja nỹtĩgtĩ gé. ¹³ Ěn kã tóg ājag mỹ kuvar gy nĩ ja nĩgtĩ, Topě ti. Ũri tóg ājag mỹ kakó nĩ ha, Topě ti, ājag tỹ Jesus Cristo ki ge kỹ nỹtĩn kỹ. Ti tỹ ěg jagfy ã kyvėnh kujėn ja tugrĩn tóg ājag mỹ kakó nĩ ha.

¹⁴ Ũri ěg tóg tỹ povo pir ri ke nỹtĩ, Judeu ag, fóg ag, kanhgág ag. Topě hã ne ěg tỹ jagně to há nỹtĩ tag han'. Jagně fyn kỹ ěg tóg nỹtĩ ja nĩgtĩ, hã ra tóg vãfynyn ěn kókén, Jesus ter kỹ. Ěg tỹ tóg povo pir ri ke han, ěg tỹ jagně kato vãsãn mãn tũ nĩ jé. ¹⁵ Topě tỹ vãsỹ Judeu ag jyvėn tĩ ěn tỹ tũ' he ja tóg nĩgtĩ, ti tỹ ag jyvėn kar ěn tỹ. Ā ter tugrĩn tóg tỹ tũ' he ja nĩgtĩ, ti tỹ ěg mỹ ũ tãg nĩm jé sir. Nén ũ rėgre tỹ tóg ũn pir han ja nĩgtĩ, ũ tãg, ěg tỹ jagně kato vãsãn mãn tũ nĩ jé. Topě tỹ nén to jykrén mũn hã vė. Cristo tugrĩn tóg ěg tỹ ũn pir han, ěg tỹ tỹ vėnh kanhkã pir nỹtĩ jé. ¹⁶ Cristo vỹ ã ter kỹ Topě tỹ ěg kar to há nĩ han, Judeu mré Judeu tũ ag to. Ti tỹ cruz to sa kỹ tóg Topě tỹ ěg kato tẽ ěn tỹ tũ' he kãn ja nĩgtĩ.

¹⁷ Jesus tỹ nén han jan hã vė. Kỹ tóg Topě tỹ ěg to há nĩ tag tó ja nĩ, ājag mỹ, ājag tỹ tỹ Judeu tũ ra, ěg mỹ ke gé, ěg tỹ tỹ Judeu nỹtĩn mỹ. ¹⁸ Ti tugrĩn ěg tóg ěg jóg tỹ Topě mré

věmén tí ha, ājag, ājag tý tý Judeu tū ra, ěg ke gé, ěg tý tý Judeu nýtí ag ke gé. Ti kuprīg vỹ tý ũn pir nĩ, hã tý ěg kar tóg ti mré věmén tí.

¹⁹ Hã kỹ ājag kórég tū nýtí ha. Ājag pi(jé) tý ěmã ũ tá ke nýtí ha', ti mỹ, ājag tý tý fóg nýtí ra, ājag tý tý kanhgág nýtí ra ke gé. Ěg mré ke vỹ tý ājag nýtí ha, Topě tū vỹ tý ājag nýtí ha. Topě krě vỹ tý ājag nýtí ha. ²⁰ Topě jo ĩn ri ke vỹ tý ěg nýtí. Ti nūna runrur ri ke vỹ tý apóstolo nýtí, Topě vĩ tó tí ag mré. Ti nūna téj ri ke vỹ tý Jesus Cristo nĩ. Ti kuge ri ke vỹ tý ājag nýtí, ěg mré. ²¹ ĩn nūna tugrĩn ĩn tóg jě nĩ, kỹ tóg koměr hã kar kỹ jěnh mũ. Ti kar kỹ jě kỹ tóg tý ěg Senhor tū jě sir. ²² Cristo vỹ koměr hã ti han mũ, ĩn kar ri ke ti, hã vỹ: ěg, he mũ. Kỹ Topě kuprīg vỹ krēm ěmãn nĩ, ěg kãkã. ũ tý Jesus ki ge mũ ag to ken hã vē.

3

Paulo tý fóg mré kanhgág ag mỹ Jesus kãmén

¹ Hã kỹ sóg Topě mré vĩ tí, inh, hã vỹ: Paulo, he mũ. Se kỹ inh jé, Jesus Cristo tugrĩn. Isỹ ājag to há jěnh kỹ sóg se kỹ jě, isỹ ũ tý Judeu jykre han tū kar ag to há jěnh kỹ. ² Ājag hỹn tóg Topě tý isar han, mũ ěn mẽ. Isỹ ājag ki rĩr jé tóg isar han, isỹ ũ tý Judeu jykre han tū ag ki rĩr jé. ³ Topě ne inh mỹ ã tý vãsỹ nén to jykrén mũ ěn tó', hã ra ěg tóg ki kagtīg ja nýtīgті. Vãhã tóg inh mỹ tó mũ ha', hã kỹ sóg ājag mỹ kãmén sĩ han huri, Topě tý nén ũ tãg to jykrén mũ ěn ti. ⁴ Ājag tý inh věnh rán tag ve kỹ ājag tóg venh ke mũ sir, inh jykre ti. Cristo vỹ nén ũ tãg han jé kãtīg ja nĩ, ěn ki kanhró sóg nĩ. ⁵ Ti tý inh mỹ tag tó to hã ag tóg ki kagtīg ja nýtīgті, ěg jóg'jóg ag, ěprã ke kar ag. Ŭri tóg ěg mỹ tó mũ, Topě ti, ã kuprīg tý. Apóstolo ag mỹ tóg tó mũ ha, ũri, ti tū ag mỹ, ěg jyvěn tí ag mỹ ke gé. ⁶ Ti tý ěg mỹ nén ũ tãg tó mũn hã vē, ha mẽ. Vãsỹ Topě tóg Judeu ag hã mỹ vĩ há han ja nĩ. Ŭri tóg fóg ag mỹ, kanhgág ag mỹ vĩ há han mũ ha, Judeu ag mré. Ěg kar vỹ tý Jesus Cristo há ri ke nýtí ha, ěg tý ti ki ge kỹ nýtĩn kỹ. Topě tý Judeu ag mỹ nén tó mũ ěn, ěg tý Jesus Cristo tugrĩn nén venh ke mũ ěn ve kãn jé ag tóg ke mũ gé, ěg mré, fóg ag, kanhgág ag. Ŭ tý Jesus ki ge kỹ nýtí ag hã vỹ venh ke mũ.

⁷ Tag to Topě tóg inh mỹ: “ha fóg kar ag mỹ, kanhgág kar ag mỹ tónh tīg,” he ja nĩgtĩ, kỹ tóg tag to isar han. Ti tar nĩn kỹ tóg isar han, inh rãnrãj to. ⁸ Topě tū kãsir ag kar jakrēm inh nĩ, hã ra tóg isar han, sỹ fóg ag mỹ, kanhgág ag mỹ Cristo kãmén jé. Cristo tugrĩn tóg ěg mỹ nén (ũ) há tãvĩ han ke mũ, Topě ti. Hã tó sóg tí, věnh kar mỹ. ⁹ Věnh kar mỹ sóg kãmén tí, Topě tý nén han ke ti, ti tý ã tý vãsỹ nén to jykrén mũ tag han ke ti. Vãsỹ tóg to: “tag han jé sóg ke mũ,” he ja nĩgtĩ. Ti tý nén kar han tũg ki tóg to jykrén ja nĩgtĩ. Ti hã ne nén kar han'. Kỹ tóg, ã tý ěn han ke to jykrén mũ ra tóg ũ mỹ tó ja tū nĩ ver. ¹⁰ Ŭri tóg ve há tí ha, ti tý vãsỹ nén to jykrén mũ ěn ti. Kanhkã tãn ag mỹ tóg ve há tí ha, tá pã'i ag mỹ, Topě krĩ há tag vỹ ve há tí ha, ti jykre há pě ěn ti. Ag tý ũ tý Jesus ki ge kỹ nýtí ag ve kỹ ag tóg Topě jykre ki kanhró nýtí, kanhkã tãn ag.

¹¹ Vãsỹ tóg to jykrén, Topě ti, ti tý ěg pã'i tý Jesus Cristo tugrĩn nén (ũ) han sór mũ ěn ti. ¹² Ti hã ki ěg ge kỹ nýtí, hã kỹ ěg tóg jatun mỹ Topě mré věmén tí ha. Ěg kaně jun mãn ke tū ti nĩ ha, Topě ti. ¹³ Hã kỹ sóg ājag mỹ: “sỹ ājag jagfỹ jagtar nĩ tag to jykrén tũg nĩ,” he mũ. Inh jagtar mĩ ěkrén kỹ Jesus to krónh ke sór tũg nĩ gé. Ājag jagfỹ ke vē, isỹ nén věg mũ tag. Inh jagtar tag tugrĩn ājag tóg nén ũ há venh ke mũ, ha vemnĩ.

Cristo tý ěg to há nĩ

¹⁴ Hã jé sóg Topě mré věmén tí. Ěg jóg vē mỹr. ¹⁵ Ti tugrĩn ěg tóg rĩnrĩr nýtí, ěprã ke kar, kanhkã tá ke kar ke gé, kỹ tóg ěg ki rĩr tĩgtĩ. ¹⁶ Kỹ sóg ti hã mỹ to vĩ tí, ti tý ã jykre tý ājag tý tar' he jé, ti kuprīg tý. Nén ũ kar vỹ tý ti tū nýtí, tar ti jě gé, hã kỹ sóg ti hã mỹ to vĩ tí, ¹⁷ ti tý Cristo tý ājag ki ěmã han jé, ājag tý ti ki ge nýtĩn kỹ. Ti tý ěg to há nĩ vỹ tý ga ri ke nĩ, ěg tý ti ki jãrén jé, ka jãrén ri ke. Kỹ ěg tóg ti to tar nýtí sir. Hã jé sóg ti mỹ ājag tó tí gé. ¹⁸ Topě tý ěg kren han mũ vỹ ěg tý nén ve vãnh ri ke nĩ, ge ve ja tū ěg nĩgtĩ. Kỹ sóg Topě mré věmén tí, ti tý ājag mỹ tag kãmén kãn jé, ti tū kar ag mỹ ke gé. Nén (ũ) téj gy ri ke ti nĩ, nén (ũ) tãpér mág ri ke, kãgnó téj gy ri ke ti nĩ, nén (ũ) krỹg ja tū ri ke ti nĩ,

Topě tỹ ěg kren han mũ tĩ. Hã kỹ ěg tóg vėsóg ki to jykrén kãn ke tũ nĩ. ¹⁹ Cristo vỹ ěg to há tãvĩ nĩ, tag to jykrén kãn ke tũ ěg tóg nĩ gé. Kỹ sóg Topě mỹ: “ha ag mỹ tag kãmén,” he tĩ, ãjag tỹ ti há tỹ krĩn kỹ nỹtĩ jé.

²⁰ Ha vé, Topě hã ne tar tãvĩ nĩ'. Hã kỹ tóg ěg tỹ ti mỹ nén (ũ) to vĩn kỹ (tóg) ěg tỹ ti mỹ nén (ũ) to vĩ mũ ěn kãfór han ki kanhró nĩ. Kỹ tóg ěg tỹ nén (ũ) to jykrén mũ kãfór han ki kanhró nĩ gé. ²¹ Kỹ ěg tóg ti há mỹ vĩ há han ke mũ, ěg tỹ ti ki ge kỹ nỹtĩn kỹ, ěg tỹ Jesus Cristo ki ge kỹ nỹtĩn kỹ. Ěg tỹ ti mỹ vĩ há han vỹ tũ' henh ke tũ nĩ. Hã vễ.

4

Ěg tỹ Cristo mré tỹ ùn pir nỹtĩ

¹ Kỹ sóg ãjag jyvẽn sór mũ ha. Se kỹ inh jé nĩ, ěg Senhor tugrĩn, kỹ sóg ãjag jyvẽn sór mũ. Mũ há han sór mnĩ. Topě vỹ ãjag kuprĕg, kỹ ãjag tỹ vĕnh jykre há han ke hã to vãsãn nĩ. ² ãjag régre to: “ti kãfór vỹ tỹ inh nĩ,” he sór tũg nĩ. Jagnĕ mỹ komĕr hã vĩmnĩ. Jagnĕ to fe nỹtĩmnĩ. Jagnĕ to há nỹtĩmnĩ. Jagnĕ ajudar hemnĩ. ³ Topě kuprĩg vỹ tỹ ùn pir nĩ, kỹ tóg ãjag mỹ vĕnh jykre pir nĩm tĩ. Vãsãn nĩ, ãjag tỹ vĕnh jykre pir ěn hã han jé, ãjag tỹ krĩ kuprã nỹtĩn jé. ⁴ Topě kuprĩg pir ěn vỹ tỹ ěg kar jagrĕ nĩ, kỹ ěg kar vỹ tỹ Cristo há ri ke nỹtĩ, jãvo tóg tỹ ěg krĩ ri ke nĩ, Cristo ti. Ěg kar mỹ ti nén ù há han ke mũ, jagnĕ ri ke, ti tỹ ěg kuprĕg kỹ. ⁵ Kỹ ěg Senhor vỹ tỹ ùn pir nĩ gé. Ěg kar vỹ ti ki ge kỹ nỹtĩ. Ti jiji hã tỹ ěg kygpe kỹ nỹtĩ gé. ⁶ Ěg jóg tỹ Topě vỹ tỹ ùn pir nĩ gé, ěg kar jóg ti. Ti hã ne tỹ vĕnh kar krĩg mỹ ke nĩ'. Ěg kar tỹ tóg ã tỹ ùn han sór mũ ěn han tĩ, kỹ tóg ěg kãkã nĩ gé, ěg jóg ti.

⁷ Cristo vỹ ěg tar han tĩ gé, ěg kar, ti rãnrãj to. Û mỹ tóg vĕnh rãnrãj ù nĩm', nĩm' he tĩ. ⁸ Hã kỹ tag tóg rãn kỹ nĩ, ha mĕ: “ti tỹ kanhkã ra tãpry kỹ tóg ùn sigse kỹ nỹtĩ ěn ag tatĩn vyr. Kỹ tóg ěprã ke ag tar han mũ gé, ag tỹ ti rãnrãj han ke to,” he ja tóg nĩgtĩ, Tope vĩ rãn ki.

⁹ Ha vé, ti tãpry kỹ tóg ã tỹ kanhkã ra tĩg ke to hã tóg tére ja nĩ gé, ěprã. ¹⁰ Ûn tére mũ ěn vỹ tãpry mãn ja nĩ gé, kỹ tóg kanhkã pãtén kỹ tĩ mũ sir. Kanhkã pãtén kỹ tóg kanhkã kri nĩ nĩ sir. Kanhkã kri nĩn kỹ tóg nén (ũ) kar ki kanhró nĩ sir, ti tỹ ěmã kar vĕg nĩn kỹ. ¹¹ Ti hã ne ã rãnrãj kar to ěg tar han tĩ'. Û ag vin kỹ tóg ag tỹ apóstolo hyn han. Û tỹ tóg ti tỹ ěg jyvẽn tĩ nĩnh ke han. Û mỹ tóg: “ũ tỹ inh vĩ mĕ ja tũ ag mỹ inh vĩ tónh tĩg nĩ,” he mũ. Û tỹ tóg igreja krĕm pã'i han, ù mỹ tóg: “ũ tỹ igreja krĕm vĕnh mãn tĩ ag mỹ inh vĩ kãmén nĩ,” he mũ gé. ¹² Tag to tóg ěg tar han tĩ, ěg tỹ jagnĕ tar han jé sir, ti rãnrãj to, ěg tỹ tỹ ti jãvy nỹtĩn kỹ, ti ve fag ke gé. Ěg tỹ ěg rãnrãj tag ki króm kỹ Cristo há ěn vỹ tar pĕ nĩ ha, ěg tỹ tỹ ti há nỹtĩn kỹ. ¹³ Ti tỹ ěg kar tỹ vĕnh jykre pir han mũ ve sór vĕ, ěg tỹ ti ki ge kỹ nỹtĩn kỹ, ěg tỹ Topě kósĩn ki kanhró nỹtĩn kỹ. Kỹ ěg kar vỹ ěg rãnrãj to tar nỹtĩ sir, ěg tỹ jagnĕ mré tỹ ùn pir nỹtĩn kỹ. Kỹ ěg Cristo tỹ ěprã ke jykre kãfór nĩ ěn ri ke nỹtĩ sir, kỹ ěg tóg komĕr hã ti tỹ nén kar han mũ mré ti tỹ nén to jykrén mũ ki kanhrãn kãn ke mũ gé sir, kỹ ěg tóg ùn sanh há kanhró ri ke nỹtĩ sir.

¹⁴ Ěg tỹ gĩr ri ke nỹtĩn kỹ tóg ti mỹ há tũ nĩ. Gĩr ag ne ki kagtĩg nỹtĩ'. Kỹ ag tóg, ag tỹ nén ù mĕ kỹ ag tóg kãnhmar nén ù nón tĩ', nén ù nón tĩ', he' he tĩ. Ěg tỹ ti vĩ to gĩr tỹ ki kagtĩg ěn ri ke nỹtĩn kỹ tóg ěg tỹ ùn ón mũ vĩ kri nĩm ja há (tóg) tĩ, ěg tỹ ki kagtĩg nỹtĩn kỹ. Û ag tóg Topě vĩ to ón tĩ. Ag tỹ ěg tỹ ãjag mré kygnĕ han sór vĕ. Vĩ há nĩ ve ag tóg nỹtĩ, kỹ tóg ěg tỹ ag vĩ kri fi ja há tĩ sir. ¹⁵ Kỹ tóg há tĩnh mũ, ěg tỹ Topě tỹ ki hã tó mũ ěn hã han kỹ. Kỹ ěg tóg jagnĕ to há tãvĩ nỹtĩnh mũ gé. Hã tỹ ěg tar nỹtĩnh mũ. Ti ki mog ri ke vĕ sir, ti tỹ tỹ ěg kri nĩ nĩn kỹ, Cristo ti. ¹⁶ Ěg tỹ tỹ ti mré ke nỹtĩn kỹ ěg tóg tỹ ti há tỹ tỹ ùn pir ěn ri ke nỹtĩ. Ěg kar vỹ rãnrãj ke mũ, ěg tỹ ti jykre pir to tar nỹtĩ jé. Ěg kar vỹ tỹ jagnĕ mré ke nỹtĩ. Ěg kar tỹ Topě tỹ ěg mỹ nén nĩm ja ěn to vãsãnsãn kỹ ěg tóg ùn sanh há tar ri ke nỹtĩ sir. Mog jé ěg tóg ke mũ, ěg tỹ jagnĕ to há nỹtĩn kỹ.

Cristo tỹ ěg mỹ vĕnh jykre tãg nĩm

¹⁷ Kỹ sóg ãjag jyvẽn sór mũ, ěg Senhor tỹ inh mỹ: “ha ag jyvẽn,” hen kỹ. Hã kỹ sóg ãjag mỹ: “ũ tỹ Topě ki kagtĩg ag jykre han sór tũg nĩ,” he mũ. Kórég ti nỹ, ag jykre ti, mỹr. Ag

tỹ vėsóg ki nén to jykrén mü ěn hã han ag tóg tí. ¹⁸ Kutý mĩ ag mügtĩ, ki kagtĩg ag nỹtĩ. Hã ra ag tóg ki kanhrãn sór tũ nĩ gé. Hã kỹ ag tóg Topě tỹ ěg mỹ vėnh jykre nĩm ěn ki kagtĩg nỹtĩ. ¹⁹ Kỹ ag tóg vėnh jykre há to é he tí. Mỹ'ãg vãnh ag nỹtĩ. Ag vėnh kavėnh vỹ ag mỹ há tí. Vėnh jykre kórég tỹ ag kókég mü ra tóg ag mỹ sér tĩgtĩ, kỹ ag tóg to krónh ke jãvãnh nỹtĩ. Ke tũg nĩ, ag jãvo.

²⁰ Cristo jykre vỹ ge tũ nĩgtĩ, ki kanhró ãjag tóg nỹtĩ. ²¹ Ti kãme ki kanhró kar ãjag nỹtĩ ha, ti jykre ke gé. ãjag mỹ ag tóg kãmén kãn, Jesus jykre ti, ěg tỹ ti ki ge kỹ nỹtĩn kỹ nén han ke mü ěn ti. ²² Ti ki ge kỹ nỹtĩn kỹ ěg tóg ěg tỹ vãsỹ nén han ja ěn ri ke han mãn ke tũ nĩ ha. Tag mẽ ãjag huri. ãjag jykre si ěn tovãnh kãn jé ãjag tóg ke mü. ãjag tỹ ãjag jykre si jagma mũn kỹ ãjag tóg ãjag tỹ nén to ěn mü ěn hã han mü ja nĩgtĩ ver. Hã ra ěg tóg tag hã to ter ke mü. ²³ Kỹ Topě mỹ to vĩmnĩ, ti tỹ ãjag mỹ ãjag jykre kurynh kãn jé, ti tỹ ãjag fe jãnhkrig jé. ²⁴ Vėnh jykre tãg hã han sórmnĩ, Topě tỹ ěg mỹ vėnh jykre tãg nĩm mü ěn ti. Kỹ ěg tóg ti ri ke nỹtĩnh mü, kuryj ěg nỹtĩnh mü ha, há ěg nỹtĩnh mü, ti há ri ke. Kỹ ěg vėnh vĩ há hã han ke mü.

²⁵ Hã kỹ jagně mỹ ón mãn tũg nĩ. Ki hã tómnĩ, jagně mỹ. Jagně mré ke vỹ tỹ ěg nỹtĩ, ěg tỹ Cristo há ri ke nỹtĩn kỹ. ²⁶ ãjag fe tỹ gỹm ke mü ra Topě vĩ mranh tũg nĩ. ãjag tỹ jagně to jũ nỹtĩn kỹ kurã ũ jãvãnh sór tũg nĩ. Kutýg ke to hã tỹ há' hemnĩ. ²⁷ Japo tỹ ãjag krĩn sór mü ra ti vĩ jěmě tũg nĩ. ²⁸ Vãsỹ ãjag kãmĩ ũ vỹ ũ tỹ nén ũ pigju (ka)mě ja nĩgtĩ. Kỹ ěn han mãn tũg nĩ. ãjag rãnhraj nón ãjag mũnh ke mü ũri. ãjag nĩgě tỹ nén ũ há han nĩ, ãjag tỹ ãjag rãnhraj to nén (ũ) kar ve jé. To vãsãn nĩ, ti tỹ ãjag mỹ kén jé, ãjag tỹ ãjag tỹ nén ũ tỹ ũn jagãgtar ag jagãgtãn jé.

²⁹ Vėnh vĩ kórég tó sór tũg nĩ. Nén ũ há hã tỹ vėmėn nĩ, ãjag tỹ ãjag vĩ tỹ jagně tar han jé, ãjag tỹ jagně jykre kurynh jé.

³⁰ Topě kuprĩg fe kaj han sór tũg nĩ gé. Topě vỹ ěg mỹ ã kuprĩg jěně, ti tỹ hã tugrĩn ěg nĩgjęg jé, ěg krenkren ke to. Ti tỹ tỹ ěg jagrě nĩn kỹ ěg tóg ki kanhró nỹtĩ, ěg tỹ Topě tỹ ěg krenkren han ke kurã ěn tá krỹg mũn ki. ³¹ Jagně to jykrén kónãn tũg nĩ. Jagně to krĩ rỹ han tũg nĩ. ãjag fe tỹ gỹm ke (ka)mě nỹtĩ tũg nĩ. Fėfėn tũg nĩ. Jagně to vĩ kónãn tũg nĩ. Vėnh jykre pãno tovãnh kãn nĩ. ³² Jagně to vĩ há han nĩ. Jagně mỹ koměr hã vĩmnĩ. Jagně mỹ vėnh pãte fón nĩ, Topě tỹ Cristo tugrĩn ěg mỹ vėnh pãte fón ja ri kén.

5

Ěg jykre tãg

¹ Topě tỹ vėnh jykre han tí ěn hã han nĩ, ãjag tỹ tỹ ti fe nỹtĩn kỹ, ti krě. ² Jagně to há kar nỹtĩmnĩ, Cristo tỹ ěg to há nĩ ri ke. Ěg jagfy tóg vėnh fėg. Ěg tỹ Topě mỹ nén (ũ) pũn ri ke ti nĩ, ti tỹ ěg jagfy vėnh fėg mü ěn ti. Topě mỹ nén ger há pũr ri ke ti nĩ, kỹ tóg Topě mỹ há tí sir.

³ Topě tũ vỹ tỹ ãjag nỹtĩ. Hã kỹ vėnh jykre pãno tỹ vėmėn sór tũg nĩ, ãjag tỹ han sór tũ nĩ jé. Ěg prũ tũ mré nỹ, ěg mén tũ mré nỹ, tỹ vėmėn sór tũg nĩ, ãjag tỹ nén e hã tỹ vãsãn (ka)mě tỹ vėmėn sór tũg nĩ gé. ⁴ Kỹ jagně mỹ vĩ kónãn tũg nĩ, jagně to vĩ kónãn tũg nĩ gé. Fagrĩnh mỹ vĩ tũg nĩ gé. Nén ũ kavėj tỹ vėmėn tũg nĩ gé. Ěg tỹ tag tó kỹn pi(jé) há nĩ', ěg tỹ tỹ Topě krě nỹtĩn kỹ. Ěg tỹ nén tónh ken hã vė, ha mẽ: “ã tỹ inh mỹ nén jěněg mü kar tóg inh mỹ há nỹtĩ,” he jé ěg tóg ke mü, Topě mỹ agradecer hen kỹ. ⁵ Tag to jykrén, ha mẽ: ũ tỹ ã prũ tũ fi mré nỹ mü ěn, ũ fi tỹ ã mén tũ mré nỹ mü ěn fi pi(jé) Cristo tỹ tỹ ěg pã'i nĩ venh ke mü'. ũ tỹ ã tỹ nén e hã tỹ vãsãn mü ěn pi(jé) venh ke mü'. Ěg tỹ vėnh kãggrã to jãn ěn ri ke ti nĩ, ěg tỹ ěg tỹ nén e hã tỹ vãsãn mü ěn ti. ũ tỹ ge pi(jé) Cristo venh ke mü', Cristo tỹ tỹ ěg pã'i nĩ ěn ti.

⁶ ũ tóg ón kỹ ãjag mỹ vėnh vĩ há tó sór tí. ũ tỹ ge vĩ jěmě tũg nĩ, ke tũ nĩ mü ra Topě tóg ãjag to jũnh ke mü. Ti vĩ mranh vė mỹr, kỹ tóg ũ tỹ ge to jũnh ke mü. ⁷ Hã kỹ ag vĩ jěmě sór tũg nĩ. ⁸ Vãsỹ ãjag tóg vėnh jykre ki kutý hã han ja nĩgtĩ gé. Hã ra Topě tóg ãjag mỹ vėnh jykre ki kurã ěn nĩm, ãjag tỹ ti ki gen kỹ. Kỹ vėnh jykre ki kurã tag hã han sórmnĩ. ⁹ Ěg tỹ vėnh jykre ki kurã hã han kỹ ěg tóg jagně mỹ vĩ há han ke mü, vėnh jykre

kuryj. Ki hã tó jé ãg tóg ke mũ gé, jagně mý. ¹⁰ Věnh jykre tỹ ãg Senhor mý há nỹ ěn hã han sórmnĩ. Ěn hã to jykrén mág nĩ.

¹¹ Kejěň ãjag tóg ũ vég tĩ, hã ra tóg věnh jykre ki kuty han tĩ. Kỹ ti mré han sór tũg nĩ. Ti mý: “kórég ti nĩ, tovãnh nĩ,” hemnĩ. ¹² Věnh péju kỹ ag tóg han tĩ, věnh jykre kórég ti. Ěg mý'a tóg tĩ, ãg tỹ ag tỹ nén han tĩ ěn ve kỹ. ¹³ Kejěň tóg ag tỹ nén han mũ kri kurãg tĩ, kỹ tóg ve há tĩgtĩ, ag tỹ nén han mũ ti. Kurã ki ãg tóg ti kórég nĩ ěn vég tĩ. ¹⁴ Kỹ tóg há nĩ ha, ãg tỹ věnh jykre kórég to: kórég ti nĩ, hen kỹ. Kỹ ãg tóg tovãnh sór ke mũ. Hã kỹ ãg tóg tag tó tĩ, ha mẽ: “Topě vĩ mranh sór mãn tũg nĩ. Nũgme ki kutě sór mãn tũg nĩ. Kỹ Cristo vĩ ã mý jěngřě han ke mũ,” he ãg tóg tĩ, ãg jãn kỹ.

¹⁵ Ājag tỹ nén han mũ to jykrén nĩ. Krĩ tũ nĩ sór tũg nĩ, věnh jykre há ki věnh kanhrãn kỹ mũmnĩ. ¹⁶ Kurã kren tũg sórmnĩ. Nén ũ jagy ve jé ãg tóg ke mũ, hã kỹ tóg há tĩ, ãg tỹ kurã kren tũ nĩn kỹ. ¹⁷ Ěg Senhor vĩ ãg tỹ nén ũ há han mũ ve sór tĩ. Kỹ ti tỹ nén (ũ) ve sór mũ tag hã to jykrén nĩ, ãjag tỹ tag hã han jé.

¹⁸ Vinho tỹ vėsén tũg nĩ, tỹ věnh pėnmãn tũg nĩ. Věnh jykre kórég vė, ãg tỹ nén ũ fa tỹ vėsén mũ ti, tỹ věnh pėnmãn mũ ti. Tope kupřĩg tỹ ãg fãn tag hã ne há nĩ'. ¹⁹ Jagně mré vėmėn kỹ Topě tỹ jãn nĩ, ti jé tómnĩ, ãg Senhor jé ti. Ti kupřĩg vĩ ãg kanhrãn tĩ gé, ãg tỹ ãg Senhor mý nén tó sór mũ to, ãg tỹ ti tỹ jãn há han jé. Ěg tỹ ti mý: “há kar ti nĩ,” henh ke vė gé. ²⁰ Ěg jóg tỹ Topě mý ãg tóg tónh ke mũ, ti hã mý ãg tóg: “ã tỹ ãg mý nén ven mũ vĩ há kar nỹtĩ,” henh ke mũ, ãg tỹ ãg Senhor tỹ Jesus Cristo jyjy tón kỹ.

²¹ Ěg tỹ Cristo kaměg kỹ tóg há tĩ, kỹ tóg ãg tỹ jagně jykre mũ mũn kỹ (tóg) há tĩ gé, ãg tỹ tỹ ti mré ke nỹtĩn kỹ.

Ů tỹ jagně mré nỹtĩ fag jykre

²² Ůn týtá fag jé ãjag mén ag jykre mũ mũjěg. Fag mý tóg ãg Senhor ri ke nĩ, fag mén ti. ²³ Fi krĩ vė, fi mén ti. Cristo vĩ tỹ ti ki ge kỹ nỹtĩ kar ag kri ke nĩ, kỹ ãg tóg tỹ ti há ri ke nỹtĩ, ti tỹ ãg kren han kỹ. ²⁴ Hã kỹ ãg tóg tỹ ti krěm ke nỹtĩ, Cristo krěm ke. Ge ti nĩgtĩ, ũn týtá fag jykre ti. Fag mén krěm ke vĩ tỹ fag nỹtĩ, fag tỹ ãjag mén vĩ han jé.

²⁵ Kỹ sóg fag mén ag mý tag tó sór mũ gé. Ājag prũ to há tãvĩ nỹtĩmnĩ. Cristo vĩ ãg to há nĩ, ãg tỹ tỹ ti tũ nỹtĩn kỹ. Ěg jagfy tóg věnh fěg, ²⁶ ãg tỹ tỹ ti tũ nỹtĩ jé. Kỹ tóg ãg kycũnh, goj tỹ ãg kygpe kỹ, ti vĩ tỹ ke gé. ²⁷ Ti tỹ ãg há nỹtĩ ve sór vė, ãg tỹ věnhmý nỹtĩnh ke tũ vė, ãg kaga ri ke nỹtĩnh ke tũ vė, ãg kórég nỹtĩnh ke tũ vė gé, ãg sĩnvĩ tãvĩ nỹtĩnh ke vė, ãg tỹ tỹ ti tũ nỹtĩn kỹ. Cristo prũnh ke ri ke vĩ tỹ ãg nỹtĩ.

²⁸ Tag ri ke han nĩ, ãjag prũ tỹ. Fag to há nỹtĩmnĩ. “Inh há ri ke vĩ tỹ fi nĩ,” hemnĩ, fag to. Ů tỹ ã prũ fi to há nĩn kỹ tóg vėso há nĩ sir. ²⁹ Věnh ki rĩr há han ãg tóg tĩ, jěg ãg tóg tĩ, ãg tar nỹtĩ jé. Ěg pi(jé) věnh kókén sór tĩ'. Cristo vĩ ãg tỹ ge tĩ gé. Ěg ki rĩr há han tóg tĩ gé. ³⁰ Ti há vĩ tỹ ãg nỹtĩ, ãg kar, ãg tỹ ti ki ge kỹ nỹtĩn kỹ.

³¹ Tag vĩ rán kỹ nĩ, ha mẽ: “ũn gré tóg ã prũ fi to ã panh ré kỹ tĩ mũ, ã mýnh fi ré kỹ ke gé. Ā prũ fi mré tóg tĩnh mũ. Fi mré tóg tỹ ũn pir nĩ sir, ti prũ fi mré,” he ja tóg nĩgtĩ, Topě vĩ rán ki. ³² Tag vĩ tỹ nén ũ sĩnvĩ pě nĩ. Kỹ tóg Cristo to rán kỹ nĩ gé, ti tỹ ũ tỹ ti ki ge kỹ nỹtĩ ag mré tỹ ũn pir nĩn kỹ. ³³ Hã ra tóg ãg mý rán kỹ nĩ gé, ãg tỹ ãg prũ fag to há nỹtĩ jé, ãg tỹ věnh ki rĩr há han mũ tag ri ke. Kỹ tóg fag mý rán kỹ nĩ gé, fag tỹ ãjag mén vĩ kỹ jémėn jé.

6

Ěg han mũ fag to věnh jykre

¹ Kỹ sóg ãjag krě mý tag tó mũ, ha mẽ. “Ājag han mũ fag vĩ kri fimnĩ,” he sóg mũ, ag mý. Há ti nĩ, ãg Senhor jykren ha vė. ² Ājag han mũ fag kaměg nĩ. Topě tỹ ãg mý tag tó kỹ tóg ãg mý nén ũ há tó mũ gé, hã vĩ: ³ “ã han mũ fag kaměg nĩ, ã tỹ tĩg há han jé, ã tỹ ga kri tĩg mág han jé,” he ja tóg nĩ, Topě ti.

⁴ Kỹ sóg ũn sanh ag mý: “ãjag krě mý vĩ tar pě han tũg nĩ, ag tỹ ãjag to jũ tũ nĩ jé,” he mũ gé. Ājag krě jyvėn nĩ, ag mý ãg Senhor jykre kãmėn nĩ, ag tỹ mũ mũn jé.

Camarada ag tỹ ājag patrão mré nỹtĩ jykre

⁵ Ājag kāmĩ ũ ag tóg patrão krēm nỹtĩ gé, fagrĩnh mỹ ti mỹ ti rānhrāj han tĩn kỹ. Ājag patrão vĩ kri fimnĩ. Ti kamēg nĩ, ti to jũrn kemnĩ. Ti rānhrāj ki rĩr há han nĩ, ājag tỹ Cristo rānhrāj ki rĩr tĩ ěn ri ke. ⁶ Ū tóg kejěn ti patrão tỹ ti mỹ vĩ há han hā jé (tóg) ti patrão tũ ki rĩr tĩ, ón kỹ. Tag han tũg nĩ. Ājag patrão tũ ki rĩr pě han nĩ, ājag tỹ tỹ Cristo camarada nỹtĩn kỹ, Topě jykre tỹ ājag mỹ sér nĩn kỹ. ⁷ Ājag patrão rānhrāj ki rĩr kỹ mỹ sér nỹtĩmnĩ. Ājag tỹ ěg Senhor rānhrāj ki rĩr vě, ājag tỹ ājag patrão rānhrāj ki rĩr kỹ. ⁸ Ha vé, ěg tỹ něn ũ há han kỹ ěg tóg ti kaja venh ke mũ, kanhkā tá. ěg Senhor vỹ ěg mỹ ti kaja ven ke mũ, ti camarada ag mỹ, ag patrão mỹ ke gé, ti ki ge kỹ nỹtĩ kar ag mỹ.

⁹ Ājag kāmĩ ũ vỹ tỹ patrão nỹtĩ, kỹ ājag camarada vỹ nỹtĩ, ājag krēm. Ag to há nỹtĩmnĩ. Ag mỹ vĩ kónān tũg nĩ. ěg Senhor vỹ kanhkā tá nĩ. Ājag pā'i vě, ājag camarada pā'i vě gé hā ra, ũ tỹ kanhkā tá nĩ ti. Ti mỹ ěg tóg tỹ ũn pir nỹtĩ, tag ki ũn mág mré ũn kāsir ag.

Topě tỹ ěg tỹ Japo katō vāsānsān jafā vin sór

¹⁰ Kỹ sóg ājag mỹ tag tó sór mũ gé ver, ha mě. ěg Senhor ki ge kỹ nỹtĩ to tar nỹtĩmnĩ. Tar ti nĩ, kỹ tóg ěg tar han ki kanhró nĩ gé. ¹¹⁻¹² Tag ki ěg věnh génh han tĩ, ěg tỹ Japo kato vāsānsān kỹ nỹtĩn kỹ. Hā ra Topě tóg ěg mỹ ěg tỹ ti kato vāsānsān jafā nĩm tĩ. Kỹ mān nĩ, Topě tỹ ěg mỹ ti kato vāsānsān jafā nĩm mũ ěn ti, kỹ Japo tóg ěg tỹ hě ri kenh ke tũ nĩ. Tar jé ěg tóg ke mũ ha. ěg pi(jé) ěprā ke ag kato vāsānsān tĩ', ěg pi(jé) ěg mré ke ag kato vāsānsān tĩ'. Pā'i ag nỹtĩ, ũ tỹ ěg kato vāsānsān mũ ag, hā ra ěg tóg ag vég tũ nĩgtĩ. Kutỹ tān ag vě, ga to pā'i ag vě gé. Kanhkā krēm ag ěmā nỹtĩ gé. Kórég kar ag nỹtĩ. ¹³ Kỹ mān kān nĩ, Topě tỹ ěg mỹ něn tỹ ag kato vāsānsān jafā vin sór mũ ěn ti, ājag tỹ ag kato vāsānsān to tar nỹtĩ jé. Kejěn ag tóg ěg kato vāsān mág han ke mũ. Kurā ěn kā ag tóg ěg tỹ hě ri kenh ke tũ nĩ, Topě tỹ ěg tar han kỹ, ti tỹ ěg mỹ ěg tỹ ag kato vāsānsān jafā ěn vin kỹ.

¹⁴ Hā kỹ tar nỹtĩmnĩ. ěg Senhor vỹ ón vānh nĩ. Ti ón vānh vỹ ěg věsóg fĩn ja mág ri ke nĩ. Tỹ věsóg fĩn ri ke han nĩ, ti ón vānh ri ke han to ken hā vě. Věnh jykre kuryj vỹ tỹ soldado tỹ camisa tỹ ferro ri ke nĩ. ěn tu ri ke han nĩ, věnh jykre kuryj han to ken hā vě. ¹⁵ ěg tỹ Topě vĩ sér tó sór mũ vỹ ěg pěn né, ěg pěn to ró ri ke nĩ, ěg tỹ věnh kar mỹ Topě tỹ ěg krĩ kuprāg ke mũ tónh ke mũ tag ti. ěn rĩnh ri ke han nĩ, věnh kar mỹ Topě vĩ kāmén to ken hā vě. ¹⁶ ěg tỹ ti ki rā kỹ tóg soldado tỹ vějy ven jafā ma tĩ ěn ri ke nĩ. Satanás tỹ ěg kato vāsān kỹ tóg ti tỹ no tỹ ěg to pěg grug ri ke nĩ. ěg tỹ vějy ven jafā tỹ vějy ven kỹ tóg tỹ nhyn ke tĩ, ti no gru ěn tỹ. ěg tỹ Jesus ki rā to ken hā vě. ¹⁷ ěg kren han ke vỹ soldado sāpe ri ke nĩ, sāpe tỹ ferro ěn ri ke. Kỹ Topě vĩ vỹ rógro ri ke nĩ gé. Topě kuprĩg vỹ ěg mỹ kāmén tĩ', Topě vĩ ti. Topě tỹ ěg mỹ Japo kato vāsānsān jafā vin ke mũn hā vě. ¹⁸ Kỹ Topě mré věměn nĩ gé, ti mỹ něn kar to vĩmnĩ. Ti kuprĩg vỹ ěg jagfỹ vĩ tĩ gé. Topě mré vĩ to krónh ke tũg nĩ. ěg tỹ to krónh ken kỹ tóg ěg nũr ri ke nĩ sir. Ke tũg nĩ. ěg mré ti ki ge kỹ nỹtĩ kar to vĩmnĩ. ¹⁹ Kỹ inh jagfỹ ti mré věměn nĩ gé. Topě vĩ tó sóg tĩ. Kỹ inh mré to vĩmnĩ, sỹ tó há han jé, isỹ inh kato vāsānsān mũ ag kamēg tũ nĩ jé, isỹ věnh kar mỹ Topě tỹ něn han sór mũ ěn kāmén há han jé, věnh vĩ sér ěn. ²⁰ Topě vỹ inh mỹ tag nĩm ja nĩ, sỹ han jé, hā ra sóg ver se kỹ jě. Kỹ tóg sỹ ag kamēg tũ nĩnh há tĩ, sỹ Jesus kāmē tó kān jé, sỹ ti tỹ inh mỹ: “ha ag mỹ kāmén,” he mũ tag tó kān jé.

Paulo tỹ Tíquico jěněnh ke

²¹ Kỹ tóg inh mỹ há tĩ, ājag tỹ isỹ něn ve ja tag mě kān jé, isỹ něn han mũ mré hā. Hā jé sóg ājag mỹ Tíquico ti jěněnh ke mũ. ěg régre ũ vě gé, iso há tavĩ ti nĩ, Tíquico ti. ěg Senhor rānhrāj han ti tĩ, ti to krónh ke tũ ti nĩgtĩ. ²² Ti hā vỹ ājag mỹ inh kāmén ke mũ, ti tỹ ājag fe tỹ há' he jé. Hā jé sóg ti jěněnh ke mũ.

²³ ěg jóg tỹ Topě jé ājag krĩ kuprāg, ěg régre kar ag mré hā. Ti jé ājag tỹ jagně to há kar han. Ti jé ājag tỹ ti ki rā há han, ěg jóg tỹ Topě ti, ěg Senhor tỹ Jesus Cristo ti ke gé. ²⁴ Topě jé ājag tar han, ũ tỹ ěg Senhor tỹ Jesus Cristo to há nỹtĩ ag kar, kỹ tóg tũ' he jāvānh nĩ, ěg tỹ ti to há nỹtĩ ti.

ÉFESO 6:24

301

ÉFESO 6:24

Hã vĕ.

PAULO TỠ CARTA HAN: FILIPOS TÁ KE AG MỠ CARTA

¹ Paulo tỠ rá vĕ, inh. IsỠ cidade tỠ Filipos tá ke ag mỠ rán hă vĕ. KỠ Timóteo vỠ inh mré ājag mỠ jĕnĕg mŭ gé, vĕnh rá tag ti, inh mré Jesus Cristo mỠ rănhrăj tỠ tag ti. IsỠ ājag mỠ ti rá tag jĕnĕ vĕ, ājag tỠ tỠ Jesus Cristo ki ge kỠ nýtĭn kỠ. KỠ sóg ājag pă'i ag mỠ jĕnĕg mŭ gé, ũ tỠ ājag ki rĭr tỠ ag mỠ ke gé.

² Ęg jóg tỠ Topĕ jé ājag tar han, ti jé ājag krĭ kuprăg, Ęg Senhor tỠ Jesus Cristo ke gé.

Paulo tỠ Topĕ mré vĭ

³ Ājag to sóg Topĕ mré vĭ há han tỠ, sỠ ājag mĭ ěkrén kỠ. ⁴ SỠ ājag to Topĕ mré vĭ kỠ inh fe tóg mrin ke tỠ. Inh mỠ tóg sér tỠ, sỠ ājag mĭ ěkrén kỠ. ⁵ Ājag tỠ inh mré Jesus kămén kỠ tóg inh mỠ há tỠ, ājag tỠ inh mré ti to tar nýtĭn kỠ. KỠ sóg Topĕ mỠ vĭ há han tỠ, ājag to. IsỠ ājag mỠ ti vĭ tó vén kỠ ājag tóg kănhmar inh mré ti kămén ja nĭgtĭ, kỠ ājag tóg ũri ti vĭ tó há han tỠ gé. Tovănh tŭ ājag nĭ. KỠ tóg inh mỠ sér tỠ. ⁶ Tag ki kanhró sóg nĭ, ha mĕ. Topĕ vỠ ājag krĭn ră nĭ, komĕr hă, nĕn ũ há kar to. KỠ tóg ājag krĭn tĭgtĭ sir, ti tỠ komĕr hă ājag krĭn kăn jé, Jesus Cristo kătĭg măn ke kură to hă. Ti hă vỠ ājag krĭn ke mŭ, Topĕ ti. ⁷ Tag to sóg jykrén, sỠ ājag mĭ ěkrén kỠ. Hă ra tóg há nĭ. Inh fe vỠ tỠ ājag nýtĭ. Inh hă mré tóg ājag tar han tỠ, Ęg Senhor ti. Hă kỠ ājag tóg inh mré jagăgtar nýtĭ, inh se kỠ jĕ tag ti to. IsỠ văsỠ kavăr kỠ jĕ ja nĭn kỠ sóg ag mỠ Topĕ vĭ kămén ja nĭgtĭ, kỠ ājag tóg inh mré to tar nýtĭ ja nĭgtĭ gé, pă'i ag tỠ inh ki Jesus jĕmĕn kỠ ke gé. KỠ ājag tóg ũri inh mré ti to tar nýtĭ gé. ⁸ SỠ ājag kar venh há tóg tỠ, kỠ Topĕ vỠ ki kanhró nĭ. Inh mỠ ājag tóg tỠ inh fe pĕ nýtĭ, Ęg tỠ Jesus Cristo mỠ tỠ ti fe pĕ ĕn ri ke ājag nýtĭ, inh mỠ.

⁹ SỠ Topĕ mré vĭn kỠ sóg ti mỠ tag tó tỠ, ājag to, ha mĕ. “Jagnĕ to há ag nýtĭ,” he sóg tỠ, Topĕ mỠ. “Ag tỠ komĕr hă jagnĕ to há kar nýtĭ han nĭ,” he sóg tỠ ājag to, Topĕ mỠ. “Ag kanhrăn nĭ gé, ag tỠ komĕr hă ā jykre ki kanhrăn kăn jé, ag tỠ ki króm kăn jé,” he sóg tỠ, ājag to. ¹⁰ “Ā tỠ ag kanhrăn kỠ ag tóg nĕn (ŭ) há kar ki kanhró nýtĭnh ke mŭ. KỠ ag tóg to jykrén há han ke mŭ, ag tỠ nĕn ũ ve sór kỠ. “Tag vỠ há pe nĭ, tag vỠ há sĭ nĭ,” he jé ag tóg ke mŭ, ā tỠ ag kanhrăn kỠ,” he sóg tỠ ājag to, Topĕ mỠ. Ājag tỠ tag to jykrén há nýtĭn kỠ ājag tóg jănhkri nýtĭnh ke mŭ, kỠ ājag tóg mỠ'ăg măn ke tŭ nĭ, Cristo kătĭg măn ke kură ĕn kă. ¹¹ KỠ ājag tóg vĕnh jykre há han kăn ke mŭ sir, Jesus Cristo tỠ ājag mỠ ā jykre há ĕn nĭm kỠ. Hă jé sóg Topĕ mỠ ājag tó tỠ. Ti tỠ ājag krĭ kugrynh kỠ vĕnh kar tóg ti tỠ tỠ ũn mág nĭ venh ke mŭ. KỠ ag tóg ti mỠ vĭ há han ke mŭ gé sir.

Jesus tỠ inh jykre

¹² Inh kănhkă', inh jagtar mŭ ra Jesus kăme tóg vĕnh kar kri rŭm ke mŭ. Tag to jykrén. ¹³ Vĕnh kar tóg mĕ kăn, ti vĭ ti, polĭcia ag mré hă, ũ tỠ palăcio ki rĭr tỠ ag mré hă. Cristo tugrĭn sóg se kỠ jĕ, hă vĕg ag tóg mŭ. ¹⁴ KỠ Jesus mré ke tỠ hĕn ri ke ag vỠ fe tar nýtĭ gé sir, Ęg Senhor jykre to, inh se kỠ jĕ tag tugrĭn. Hă kỠ ag tóg Topĕ vĭ tó tỠ sir, ag tỠ to fe tar nýtĭn kỠ, ag mŭmĕg vănh nýtĭn kỠ. ¹⁵ Ũ ag tóg iso jŭ nýtĭ, ha kỠ ag tóg Jesus tó tỠ, ag tỠ inh ri ke han sórn kỠ. KỠ ũ ag tóg iso há nýtĭ, hă kỠ ag tóg ti tó tỠ sir. ¹⁶ Topĕ vĭ hă to sóg se kỠ jĕ, sỠ pă'i ag mỠ ti kămén jé. Topĕ tỠ inh mỠ vĕnh rănhrăj nĭm hă vĕ. Hă vĕg ag tóg tỠ, ũ tỠ iso há nýtĭ ag, kỠ ag tóg ti vĭ tó tỠ, ũ tỠ iso há nýtĭ ag. ¹⁷ Ũ ag tóg hă ra iso jŭ nýtĭ, hă kỠ ag tóg ón kỠ Cristo kămén tỠ, ag tỠ inh vĭ kăfór han sór kỠ. Ag tỠ inh kato tĕ mŭ ag tỠ iso jŭ han sór vĕgtĭ gé, ag tỠ inh se tỠ hĕn ri ke han sór vĕ. Hă jé ag tóg Cristo vĭ tó tỠ. ¹⁸ Hă ra sóg ag to vĕnh mỠ nĭ sór tŭ nĭ. Cristo tó ag tóg mŭ mỠr. Ũ tóg ón kỠ tó tỠ, jo ũ tóg tó há han tỠ. Ag kar vỠ ti tó tỠ, kỠ tóg há tỠ. Hă kỠ tóg inh mỠ sér tỠ, kỠ sóg inh mỠ sér tỠ tŭ' he sór tŭ nĭ.

¹⁹ Hă ra sóg kren ke mŭ gé, ha vemnĭ. Ki kanhró sóg nĭ. Ājag hă ne iso Topĕ mré vĭ tỠ', kỠ Jesus Cristo vỠ isar han tỠ gé, ā kuprĭg tỠ. Hă kỠ sóg kren ke mŭ. ²⁰ KỠ sóg tag jăvănh mŭ, ha mĕ. Hĕn ri ke mŭn ag tóg inh kyvăn ke mŭ, hĕn ri ke mŭn ag tóg isĕn ke mŭ. IsỠ tag to jykrén kónăn tŭ nĭ jé, hă jé sóg ti mré vĭ tỠ. Isar han jé tóg ke mŭ, sỠ nĕn ũ kamĕg

tũ nĩ jé, sỹ ti kavénh tũ nĩ jé, inh mĩ'äg tũ nĩ jé. Věnh kar tỹ isugrĩn Jesus tỹ tỹ ùn mág nĩ ven kỹ tóg inh mĩ sér tĩ. ²¹ Inh jykre hã vỹ tỹ Cristo ti nĩ, hã kỹ sóg iser kỹ ti venh tĩg ke mũ, kỹ tóg sér tĩ. ²² Kỹ sóg hã ra inh kren kỹ ti rãnhřaj hã han ke mũ. Hã kỹ sóg sỹ nén han sór mũ ki kagtĩg nĩ. ²³ Inh kren ke mĩ inh mĩ hán tĩ vỹ, iser ke vó? he sóg tĩ. Iser kỹ sóg Cristo mré nĩ nĩ, kỹ tag tóg inh mĩ há pẽ nĩ, isỹ ti venh há tĩn kỹ. ²⁴ Jãvo isỹ ajag mré nĩn kỹ sóg ajag tar han ke mũ, kỹ tag tóg inh mĩ há kãfór nĩ. ²⁵ Hã tóg inh mĩ ge nĩ. Kren jé sóg ke mũ, he sóg tĩ, kỹ sóg ajag kar mré nĩnh ke mũ. Ajag ve jé sóg ke mũ, ajag tỹ koměr hã inh vĩ mẽ kỹ ti vĩ kri fi kãn jé. Kỹ tóg ajag mĩ sér tĩnh mũ, ha vemnĩ. ²⁶ Isỹ ajag mré nĩ mãn ken kỹ tóg inh mĩ há tĩnh mũ. Kỹ ajag fe tóg mrin ke tãvĩ han ke mũ, ajag tỹ inh ve mãn kỹ. Ajag mĩ sóg tỹ ùn mág jẽ, Jesus Cristo tugrĩn.

²⁷ Ha vé, Cristo jykre hã han nĩ, tag hã to vãsãnsãn nĩ. Hěn ri ke mũn sóg ajag venh kãtĩg ke mũ, hěn ri ke mũn sóg ajag venh kãtĩg ke tũ nĩ. Inh kãtĩ tũ ra jagně mré vėnh jykre pir han kỹ nỹtĩmnĩ, Jesus kãme hã tómnĩ, ti ki ge kỹ nỹtĩmnĩ. Sỹ tag mēnh há tóg tĩ, ajag to. ²⁸ Ũ tỹ ěg kato vãsãnsãn mũ ag kaměg tũg nĩ, hã tugnĩn ag tóg ajag tỹ nũgme ki vár ke ki kanhró nỹtĩ, inferno ki. Hã tugnĩn ajag tóg ajag krenkren ke mũ ěn ki kanhró nỹtĩ gé sir. Topě vỹ ěg tar han ke mũ, ěg tỹ ag tỹ hěn ri ke jé gé, ũ tỹ ěg kato vãsãnsãn mũ ěn ag tỹ. ²⁹ Cristo ki ge kỹ ajag nỹtĩ, kỹ ajag tóg ti tugrĩn jagãgtar nỹtĩnh ke mũ gé. Hã jé tóg ajag kuprěg. ³⁰ Hã kỹ ajag tóg inh kóm ti jagy vėg tĩ gé. Ag tỹ vãsỹ inh kato vãsãnsãn ěn ve ja ajag tóg nĩgtĩ gé. Ũri sóg hã vėg tĩ ver. Kỹ inh kóm tar nỹtĩmnĩ.

2

Topě kósin tỹ tỹ ěprã ke nĩ

¹ Ha vé, sỹ ajag jyvěn sór mũ, ha mẽ. Ajag tỹ Jesus jykre han kỹ nỹtĩ tag vỹ ajag tar han tĩ. Ti tỹ ajag to há nĩ tag vỹ sér tĩ. Ti kuprĩg vỹ tỹ ajag jagrě nĩ. Kỹ ajag tóg jagně to há nỹtĩ gé, jagně jagãgtãn ajag tóg tĩ gé. ² Kỹ inh jagãgtãn nĩ gé, inh fe tỹ mrin kemnĩ gé, inh mĩ sér tĩ jé. Jagně mré vėnh jykre pir hã han nĩ, ha mẽ. Jagně to há tãvĩ nỹtĩmnĩ. Ajag tỹ nén ũ to jykrén kỹ jagně mré to jykrén nĩ, ajag tỹ vėnh jykre pir hã han jé. ³ Věsỹ ùn mág han sór tũg nĩ, jagně kãfór han sór tũg nĩ. “Tỹ inh ùn sĩ nĩ,” hemnĩ. Jagně to: “inh kãfór ti nĩ,” hemnĩ gé. ⁴ Ajag tỹ ajag tũ ki rĩr mré hã jagně tũn ki rĩrmnĩ gé. ⁵ Jesus Cristo kóm ti jykre han nĩ gé, jagně mĩ. Ti tỹ vėnh jykre han hã vė, ha mẽ.

⁶ Topě hã pẽ ja ti nĩ mỹr, Jesus ti, ti tỹ ti mré nĩn kỹ. Hã ra tóg tá nĩ kỹ: “isũ vė, kanhkã ti, hã kỹ sóg ěprã ke ag to tĩg ke tũ nĩ,” he ja tũ nĩ. ⁷ Kanhkã tá ã tỹ nén tovãnh kãn sór ja ti nĩ, kỹ tóg ěg ri ke nĩ jé kãtĩg sór ja nĩ, hã kỹ tóg kãtĩg ja nĩ. ěprã ke jagtar ri ke tóg nĩ, ti tỹ ěprã ke fi ki mur kỹ. ěg tỹ ěprã ti ve kỹ tóg tỹ ěg hã pẽ nĩ, ti tỹ kanhkã tá tỹ Topě hã pẽ ja ra. ⁸ Věsỹ ùn mág han ja tũ tóg nĩ, kỹ tóg ã jóg vĩ hã han ja nĩgtĩ. Ti vĩ han kỹ tóg ter ja nĩ, cruz to sa kỹ tóg ter ja nĩ, mỹr, ha mẽ. ⁹ Hã kỹ Topě tóg ti tỹ vėnh kar kãfór han sir, kỹ tóg ti jijin mũ sir, kỹ ti jygy tag tóg vėnh kar jygy kãfór nĩ. ¹⁰ ěg tỹ ti jygy mẽ kỹ vėnh kar ag tóg ti krēm mũgmũg ke kãn mũ sir, kanhkã tá ke kar ag, ěprã ke kar ag ke gé, vėnh kuprĩg kar ag ke gé. ¹¹ Kỹ vėnh kar ag tóg: “Jesus Cristo vỹ tỹ pã'i mág nĩ,” henh ke mũ sir. Tag hã tugrĩn ag tóg sir Topě to: “tỹ tóg ěg kãfór kar nĩ,” he mũ. Tag to jykrén nĩ, ajag tỹ ti kóm han jé, Jesus Cristo kóm.

Ěg tỹ ěprã ke ag mĩ jěngrě há han

¹² Inh kanhkã', ajag ki sóg fe nĩ. Inh vĩ han ajag tóg mũgtĩ, sỹ ajag mré nĩn kỹ, hã ra sóg ũri ajag mré nĩ tũ nĩ. Ge ra inh vĩ kri fi há han nĩ. Ajag krenkren ke vė, kỹ Topě jykre hã han nĩ. Topě kaměg nĩ, ajag fe tỹ jũrũn kemnĩ. “Ti mĩ ěg to jũnh ke tũ nĩ vỹ?” hemnĩ. Kỹ ti jykre hã han nĩ. ¹³ Ti hã ne tóg ajag krĩn há han tĩ', ti jykre tỹ ajag mĩ sér tĩn jé, ajag tỹ hã mĩ hã mũn jé.

¹⁴ Ajag tỹ ti jykre han kỹ ti jykre to vĩ vĩ he tũg nĩ, ti tỹ kejěn ajag mĩ jagy ra. Kỹ jagně mĩ jagně vĩ kafãn tũg nĩ gé, ti jykre to. ¹⁵ Hã tugnĩn ũ tóg ajag to jykrén kónãn ke tũ nĩ, ajag tỹ kygněg tũ nĩn kỹ. Kỹ ajag tóg jãnhkri nỹtĩ. Kỹ ajag tóg tỹ Topě krě nỹtĩ gé, ajag tỹ ti jykre há ri ke nỹtĩn kỹ. ěprã ke kar vỹ jykre pãno nỹtĩ, Topě vĩ mranh kỹ ag tóg nỹtĩ,

ājag t̄y ũn mré ga kri m̄u ag. K̄y ājag tóg ag m̄y jēngrē ri ke n̄ytī, ājag t̄y ag m̄y Topē vī kāmén k̄y, ũ t̄y ěg r̄nr̄r han m̄u ěn vī ti. ¹⁶ Ājag t̄y tag han k̄y sóg t̄y ũn mág jēnh ke m̄u gé, ājag t̄ygr̄n, Cristo k̄at̄ig m̄an ke kurā ěn k̄a. K̄y sóg ājag to: “inh pi(jé) fagr̄nh m̄y ag to vāsān', inh pi(jé) fagr̄nh m̄y ag m̄y Topē vī kāmén',” henh ke m̄u.

¹⁷ Hēn ri ke m̄un ag isén ke m̄u, k̄y inh kyvénh t̄y inh ki kutē k̄y tóg ěg t̄y Topē m̄y nén ũ p̄un ri ke n̄inh m̄u. Ājag t̄y ti ki ge k̄y n̄ytī t̄ygr̄n ke vē. Ge ra tóg inh m̄y sér t̄inh m̄u. Inh fe tóg m̄rin kenh ke m̄u, ājag kóm. ¹⁸ K̄y tóg inh m̄y ti t̄y ājag m̄y sér t̄inh há t̄i gé, iser ke ti.

Timóteo mré Epafrodito

¹⁹ S̄y ājag m̄y Timóteo jēnēnh há tóg t̄i, ěg Senhor t̄y to: “hej,” hen k̄y. S̄y ti jēnēnh ke vē, ti t̄y tá v̄yn ke k̄y inh m̄y ājag kāmén jé. K̄y inh kr̄i tóg ājag to k̄anhvy' henh ke m̄u sir, is̄y ājag vēmé há mēn k̄y. ²⁰ Ti h̄a ne tóg ājag m̄i ěkrén mág t̄i', Timóteo ti. Ũ tóg ti ri ke t̄u pe n̄i, ti t̄y ājag to há n̄in ki. ²¹ Ag kar v̄y: “inh r̄nhr̄aj v̄y inh kutān m̄u,” he k̄an m̄u. H̄a k̄y ag tóg Jesus r̄nhr̄aj han t̄u n̄igt̄i. ²² H̄a ra ājag tóg Timóteo ki kanhró n̄ytī. Inh kósin ri ke ti n̄i. ěg krē ag v̄y ěg mré ěg r̄nhr̄aj han t̄i. K̄y Timóteo v̄y inh mré Topē vī tó t̄y r̄nhr̄aj t̄igt̄i, ti t̄y t̄y inh kósin ri ke n̄in k̄y. ²³ Ti h̄a jēnē jé sóg ke m̄u, ājag to. H̄a ra sóg ver ag t̄y inh m̄y nén tónh ke jāvānh sór m̄u, ũ t̄y inh ség m̄u ag. Is̄y ag t̄y inh m̄y nén tó m̄u mē kar k̄y sóg v̄ah̄a ti jēnēnh ke m̄u. ²⁴ Hēn ri ke m̄un sóg k̄anhmar ājag venh t̄ig ke m̄u gé. ěg Senhor t̄y Jesus h̄a ne ki kanhró n̄i'.

²⁵ H̄a ra tóg s̄y vēs̄ymér ũ jēnēnh há t̄i, ājag to. H̄a k̄y sóg Epafrodito m̄y: “ha ag to v̄yn ké,” he m̄u. Ājag h̄a ne ti jēnē ja n̄igt̄i', ti t̄y inh ki r̄ir jé. K̄y tóg inh m̄y há t̄i. Inh mré tóg Topē r̄nhr̄aj han t̄i m̄y. K̄y tóg inh mré Topē vī to jagtar n̄i gé. ²⁶ H̄a ra tóg ājag m̄i ěkrég m̄u, Epafrodito ti. K̄y tóg ājag to kr̄i kufy jagy n̄i sir, ājag t̄y ti kaga mē ja ěn t̄ygr̄n. ²⁷ Kaga ja tóg n̄igt̄i m̄y, k̄y tóg ter kren ja n̄igt̄i. H̄a ra Topē tóg ti jagāgtān, k̄y tóg há' he m̄u sir. Ti ter ra sóg ijagtar tag kr̄ig m̄y vēs̄yrénh mág ke m̄u vē, h̄a ra Topē tóg ti jagāgtān, k̄y tóg inh jagāgtān gé. ²⁸ H̄a k̄y sóg ti m̄y: “ha t̄ig, ā t̄ig to f̄ūr̄un,” he m̄u sir, ājag fe t̄y m̄rin ke jé, ājag t̄y ti ve k̄y. H̄a k̄y inh jagtar tóg p̄agsi' henh m̄u gé sir. ²⁹ Ti jun k̄y ti to m̄y sér n̄ytim̄nī, ājag t̄y ti ve m̄an k̄y, ěg Senhor t̄y ti jy n̄igān k̄y. K̄y ti m̄y: “há tóg t̄i,” hem̄nī, ājag m̄y sér t̄in k̄y, ti k̄at̄ig k̄y. ³⁰ Cristo r̄nhr̄aj t̄ygr̄n tóg ter kren m̄y. H̄a ra tóg tovānh ja t̄u n̄i, ā ter kren m̄u ra. H̄a k̄y tóg inh ki r̄ir há han. Ājag jēgja k̄a jēg k̄y tóg inh ki r̄ir há han. Ũ t̄y ge m̄y vī há han n̄i.

3

Jesus t̄y ěg kurynh pē han

¹ Inh kanhk̄a', v̄ah̄a sóg ājag m̄y nén ũ tónh ke m̄u gé sir, ha mē. ěg Senhor ki ājag ge k̄y n̄ytī, h̄a k̄y m̄y sér n̄ytim̄nī. Tag rán inh huri, h̄a ra sóg rán m̄an m̄u. S̄y ājag m̄y tag tó to sóg krónh ke sór t̄u n̄i. Ājag m̄y tóg há t̄i, s̄y ti t̄y ājag m̄y sér n̄i to ājag jyvén k̄y.

² Vēnh ki r̄ir. Ōn k̄y Topē vī tó t̄i ag v̄y junjun ke m̄u, vēnh jykre p̄ano han m̄u ag, ha vem̄nī. Inh m̄y ag tóg cachorro ri ke n̄ytī. Ōn k̄y ag tóg ājag gré junun fár kym sór m̄u. H̄a k̄y vēnh ki r̄ir. ³ “ěg fár kym h̄a t̄ygr̄n ěg tóg t̄y Topē krē n̄ytī,” he ag tóg t̄i, ōn k̄y. H̄a t̄u vē. Topē kupr̄ig v̄y t̄y ěg jagrē n̄i, k̄y ěg tóg ěg jagrē tag t̄ygr̄n Topē m̄y vī há han t̄i. K̄y Jesus Cristo v̄y ěg m̄y t̄y ũn mág n̄i, ěg t̄y ti ki ge k̄y n̄ytin k̄y. H̄a t̄ygr̄n ěg tóg t̄y Topē krē pē n̄ytī. ěg t̄y ěg fár kym m̄u ra tóg t̄y nén ũ t̄u n̄i sir. ěg fár vē m̄y, k̄y tóg ěg kren han ke t̄u n̄i. ⁴ ěg fár t̄y ěg kren han ki kanhró n̄i ra sóg t̄y inh kren han sór m̄u vē. Moisés jykre h̄a t̄y ěg kren han ke ki kanhró n̄i ra sóg h̄a t̄y inh kren han sór m̄u vē. H̄a ra tóg ge t̄u n̄y. ⁵ Vās̄y inh jykre h̄a vē, ha mē. Is̄y kurā t̄y 8 (ke) han k̄y ag tóg inh gré junun fár kym, is̄y t̄y povo t̄y Israel krē n̄in k̄y, ěg jóg'jóg ve t̄y Benjamim krē'krē ag k̄a ũ. K̄y inh han m̄u fag v̄y t̄y Hebreu pē n̄ytī. Inh mog k̄y sóg t̄y Fariseu n̄i, h̄a ra Fariseu ag tóg Judeu ag jykre to tar tāvī n̄ytī. ⁶ S̄y ěg jykre to tar pē n̄in h̄a k̄y sóg Jesus ki ge k̄y n̄ytī ag vóg kónān. Topē t̄y Moisés m̄y vēnh jykre n̄im ja ěn ki króm k̄an ja sóg n̄igt̄i m̄y. Vēnh jykre ěn m̄ranh ja t̄u sóg n̄igt̄i, ěn k̄a sóg t̄y ũn kuryj ja n̄igt̄i. ⁷ H̄a k̄y sóg ag m̄y t̄y

ũn há pẽ ja nĩgtĩ. Hã ra sóg ũri tag kar to: “nén ũ tũ vễ, inh kókén jé tóg ke mũ,” he mũ sir. Sỹ Cristo ki rã kỹ sóg ẽn tovãnh kãn mũ sir. ⁸ Kỹ, hã vễ. Inh jykre si kar tóg inh mũ kórég nỹ, ũri, ti tỹ inh kókén kỹ. Nén pir hã ne há nỹ, hã vỹ: isỹ ẽg Senhor tỹ Jesus Cristo ki kanhró nĩ jé, he mũ. Ẽg tỹ nén ki kanhró kar kãfór ti nĩ, ẽg tỹ ti ki kanhró nĩ ti. Tag to sóg inh jykre si ẽn fón kãn. Inh mũ tóg vễnh jãgfa prénhpréj ẽn ri ke nỹ, inh jykre si ẽn ti, isỹ Cristo hã ki rã kỹ jẽn kỹ. ⁹ Kỹ sóg ti hã ki rã kỹ jẽ sir. ũri sóg Moisés jykre ki króm tigrĩn vễsỹ ũn mág han mãn sór tũ nĩ ha. Jesus ki rã hã tigrĩn sóg tỹ ũn mág jẽ ha. Hã tigrĩn Topẽ tóg iso: “há ti jẽ ha,” he mũ. Jesus ki rã tigrĩn ke vễ ha. ¹⁰ Sỹ ti ki kanhrãn kỹ jẽ tag hã tóg inh mũ há nỹ. Ti hã vỹ ã ter kar kỹ rĩr mãn, kỹ sóg ti mré rĩr mãn sór mũ gé. Hã jé sóg ti mré jagtar sór mũ gé, iser kỹ sóg ti ter ri ke han sór mũ gé. ¹¹ Sỹ rĩr mãn há tóg tĩ mỹr, iser kar kỹ. Hã jé sóg ti ri ke han sór tĩ.

Vẽnhvó to comparação

¹² Ver sóg ki kanhrãn kãn ja tũ nĩ, ver sóg tá krỹg ja tũ nĩ. Hã ra sóg vãsãn tĩ, sỹ komẽr hã ti ki kanhrãn kãn jé, ti tỹ inh ki kanhró nĩ ẽn ri ke, isỹ tỹ ti tũ jẽn kỹ, Cristo ti.

¹³ Inh kanhkã', ver sóg tá krỹg ja tũ nĩ. Hã ra sóg tag han mũ, ha mẽ. Vễsỹjãm sóg mĩ ẽkren mãn tũ nĩ ha, vãsãn mãn', vãsãn mãn', he jé sóg ke mũ ha, isỹ kejẽn tá krỹg jé. ¹⁴ Ag tỹ jagnẽ mré pêtẽ ri ke han sóg tĩ mỹr. Jagnẽ mré ag tóg pêtẽ tĩ, ù tóg ganhar he sór tĩ. Ẽn ri ke han sóg tĩ. Inh ganho vỹ tỹ isỹ rĩr krỹg ja tũ venh ke ti nĩ. Hã jé Topẽ tóg ẽg kuprẽg, Jesus Cristo tigrĩn.

¹⁵ ũ tỹ Jesus to sygsanh mũ ag jé inh kóm han kãn. ũ tỹ hã ra to: “hã tũ vễ,” hen kỹ Topẽ jé ti kanhrãn. ¹⁶ Kỹ ãjag tỹ ti jykre mẽg mũ tag hã jagma mũmnĩ, ãjag tỹ tá junjun jé.

¹⁷ Inh kanhkã', inh jykre hã han kãn nĩ. Kỹ ù tỹ inh jykre ri ke han mũ ẽn jykre tugnỹm nĩ gé, ãjag tỹ ag mré hã han jé. ¹⁸ ũ ag tóg ón kỹ Jesus Cristo ki ge kỹ nỹtĩ, hã ra ag tóg ti jykre kato vãsãnsãn mũ, Jesus tỹ ẽg jagfy cruz to ter mũ ra. Ag kãmén inh huri mỹr, ãjag mỹ. Tó tỹ hẽn ri ke han isóg huri. Hã ra sóg ãjag mỹ ag tó mãn ke mũ gé sir. Inh fe kaj tóg tĩ, kỹ sóg fỹ mũ sir, ag jykre to. ¹⁹ Nũgme ki ag tóg vár ke mũ, inferno ki, ha mẽ. Jẽn há tãvĩ han sór ag tóg mũ, tag hã tóg ag mỹ sér tĩ. Nén tỹ ẽg mỹ'a han tĩ tag hã tóg ag mỹ sér tĩ. Ẽg tỹ tag mĩ vég tĩ ẽn hã to ag tóg jykren sór tĩ. ²⁰ Ag jãvo ẽg jamã vỹ tỹ kanhkã ti nĩ. Kanhkã tá tóg kãtig ke mũ, ẽg kren han ke mũ ti, hã vỹ: ẽg Senhor tỹ Jesus Cristo, he mũ. Ti hã jãvãnh ẽg tóg nỹtĩ. ²¹ Ti hã ne tóg ẽg han mãn ke mũ', ã kãtig kỹ'. Ẽg tỹ ga kri mũn kỹ ẽg tóg ver krój nỹtĩ, ẽg tỹ tỹ ẽprã ke nỹtĩn kỹ. Ti tỹ ẽg han mãn kỹ, ti tỹ ẽg mỹ ẽg fár tãg han ken kỹ, kỹ ẽg tóg ti ri ke nỹtĩnh mũ, ti mág ri ke, ti tar ri ke, ti sĩnvĩ ẽn ri ke. Ti hã tóg ẽg tỹ ù tãg han mãn ke mũ, ti tỹ tỹ ũn tar nĩn kỹ. Ti tar tugnĩn tóg nén kar tỹ ã krẽm ke han mãn ke mũ gé.

4

Paulo tỹ ẽg jyvẽn

¹ Inh kanhkã', tỹ ãjag tóg inh mũ inh jãvy ri ke nỹtĩ, kỹ tóg sỹ ãjag venh há tĩgtĩ, sỹ ãjag to há nĩn kỹ. ãjag hã tugnĩn inh fe tóg mĩn ke tĩ, ãjag hã tigrĩn sóg tỹ ũn mág jẽ. ãjag to sóg há pẽ nĩ. Hã kỹ tar nỹtĩmnĩ, ẽg Senhor jykre to.

² Vãhã sóg Evódia fi jyvẽn sór mũ, Síntique fi ke gé, ha mẽ. “Jagnẽ mré vễnh jykre pir hã han nĩ,” he sóg mũ, ãjag mỹ. “Jesus mré ke vỹ tỹ ãjag nỹtĩ, kỹ jagnẽ kato vãsãn tũg nĩ,” he sóg tĩ. ³ Kỹ sóg ã mỹ ke mũ gé, vỹ. Inh ri kén ã tóg ẽg Senhor rãnrãj han tĩ. Kỹ fag jyvẽn nĩ, fag tỹ jagnẽ to há nỹtĩ jé. Inh mré fag tóg vễnh kar mỹ Jesus kãmén tĩ, kỹ fag tóg Clemente mré Topẽ vĩ ti tó tĩ gé, inh mré ti tó mũ kar ag mré ke gé. Fag jygyj vỹ rãnrãn kỹ nỹtĩ, Topẽ livron ki, hã kỹ fag tóg rĩr krỹg ja tũ venh ke mũ. Hã kỹ tóg tỹ ù nỹ, fag tỹ jagnẽ to jũ ti.

⁴ Ẽg Senhor mré ke vỹ tỹ ẽg nỹtĩ, kỹ mỹ sér nỹtĩmnĩ. Tag tó inh huri, hã ra sóg tó mãn ke mũ sir, ha mẽ. Mỹ sér nỹtĩmnĩ mỹr, ha mẽ.

⁵ Věnh kar to fe nýtímnĩ. Ěg Senhor kătĩg măn ke vỹ kakó tĩ ha, ha mẽ. ⁶ Krĩ kufy nýtĩ tũg nĩ. Nén kar tómnĩ, Topě mỹ, ti mré vĩn kỹ. Kỹ ti mỹ nén kar to vĩmnĩ gé, ājag tỹ nén ve sór mũ kar to. Kỹ ti mỹ nén kar to: “há ti nĩ,” hemnĩ gé, ājag tỹ ti mỹ agradecer hen kỹ. ⁷ Kỹ Topě vỹ ājag krĩ tỹ kuprã' henh ke mũ. Ěg tỹ nén kar to jykrén há ra ěg tóg vėsóg ki ěg krĩ kuprãg ki kagtĩg nýtĩ. Ti hã ne ěg fe tỹ há' he tĩ', ti hã ne ěg krĩ kuprãg tĩ', kỹ tóg kuprã pě nĩgtĩ sir, ti tỹ ěg krĩ tỹ kuprã' hen kỹ, ěg tỹ Jesus Cristo ki ge kỹ nýtĩn kỹ.

⁸ Inh kanhkã', vãhã sóg ājag mỹ nén ũ tó sór mũ gé. Nén ũ há hã to jykrén nĩ, hã vỹ: “ki hã tó,” he mũ. Ěg tỹ nén ũ to: “há ti nĩ,” he ěn hã to jykrén nĩ. Věnh jykre kuryj hã to jykrén nĩ, nén ũ jãnhkri hã to jykrén nĩ. Nén ũ sĩnvĩ kar to jykrén nĩ gé, ki hã ke kar to. Tag kar to ěg tóg: sér ti tĩ, he tĩ, hã kỹ to jykrén mág han nĩ. ⁹ Ājag kanhrãn mág sóg huri, sỹ ājag mỹ ti jykre kãmén kỹ. Kỹ ājag tóg inh jykre tugnỹm ja nĩ gé. Ājag tỹ isỹ nén han mũ ěn hã han nĩ. Kỹ ũ tỹ ěg krĩ kuprãg mũ ěn hã vỹ ājag tar han ke mũ, Topě ti.

Paulo tỹ ag mỹ agradecer he

¹⁰ Ha vé, inh fe tóg mrin ke mũ, ājag tỹ inh mỹ nén ũ jěnh kỹ. Kỹ sóg to Topě mré vĩ há han', vĩ há han' he mũ. Inh mĩ ājag tóg ěkrég mũgtĩ, hã kỹ ājag tóg inh mỹ nén ũ jěnh măn. Vãsỹ ājag tỹ inh mỹ ne jěnh kỹ ke tóg tũ tĩ, hã kỹ ājag tóg inh mỹ nén ũ jěnh ja tũ nĩgtĩ. Vãhã tóg jun, ājag tỹ inh mỹ nén jěnhg mũ ti. ¹¹ Hã ra sóg ājag mỹ isỹ nén ve sór mũ ěn ti tó ja tũ nĩ. Sỹ nén vėg mũ kar vỹ inh mỹ há nỹ. ¹² Isỹ nén ũ vėg tũ (hã) ra tóg inh mỹ há nỹgtĩ gé. Isỹ nén ũ e vėg mũ ra tóg inh mỹ há nỹgtĩ gé. Nén kar tag ve sóg huri. Kejěnh sóg tógã nĩgtĩ, kejěnh sóg kókĩr nĩgtĩ. Kejěnh sóg nén ũ kar vėg tĩ, kejěnh sóg nén ũ vėg tũ nĩgtĩ. ¹³ Nén kar to sóg tar nĩ, ěg Senhor tỹ isar han kỹ.

¹⁴ Hã ra tóg há nỹ, ājag tỹ inh jagãgtãn kỹ, ājag tỹ inh jagtar nĩ tag to jykrén kỹ. ¹⁵ Vãsỹ ājag tóg inh mỹ ũ nĩm ja nĩgtĩ gé, isỹ ājag mỹ Jesus kãmén vėn kỹ. Sỹ ga tỹ Macedônia ki kutě kỹ ājag hã tóg inh mỹ nén ũ jěnh ja nĩgtĩ, ājag pir mỹ, ājag, hã vỹ: Filipos tá ke ag, he mũ. Ũ pi(jé) ājag mré isỹ nén vėg mũ to jykrén ja nĩgtĩ', isỹ nén vėg tũ ěn to ke gé. Ājag pir mỹ ājag tóg inh mré to jykrén inh hã, tag ki kanhró ājag tóg nýtĩ. ¹⁶ Isỹ cidade tỹ Tessalônica tá nĩn kỹ ājag tóg inh mỹ nén ũ jěnh măn ja nĩgtĩ gé, kar kỹ ājag tóg ũ jěnh măn', ũ jěnh măn' he ja nĩgtĩ gé, ājag tỹ inh ki rĩr há han jé. ¹⁷ Hã ra sóg isỹ jãnkamy venh ke ěn to jykrén sór tũ nĩgtĩ. Ājag tũ mág nýtĩ kỹ tóg inh mỹ há tĩ. ¹⁸ Nén kar vỹ inh ki junjun há han, kỹ sóg ve kãn mũ, sỹ nén ve sór mũ ěn ve kãn inh huri. Epafrodito vỹ inh mỹ vin kãn, ājag tỹ inh mỹ nén jěnhg mũ ti. Topě mỹ nĩm ja vė, ājag tỹ inh mỹ nén nĩm ja ti, kỹ tóg ti mỹ sér tĩ sir. Ti mỹ tóg ājag tỹ ti mỹ nén ger há pũn ěn kri nĩ nĩ sir, ājag tỹ inh mỹ nén jěnhg mũ ěn ti. ¹⁹ Ěg jóg tỹ Topě vỹ ājag mỹ nĩm kãn ke mũ, ājag tỹ nén ve sór mũ ěn ti. Ti hã ne tóg nén kar tỹ tũ nĩ', kanhkã tá nĩ ěn ti', hã kỹ tóg ājag mỹ nén kar nĩm ke mũ, Jesus Cristo tugrĩn. ²⁰ Ěg kar jé ěg jóg tỹ Topě to: “tỹ ti ũn mág nĩ, tỹ ti ũn tar nĩ,” hé, kỹ ěg tỹ ti mỹ vĩ há han vỹ tũ' henh ke tũ nĩ. Hã vė.

Paulo tỹ ag mĩ ěkrén

²¹ Ũ tỹ Jesus Cristo ki ge kỹ nýtĩ kar ag mĩ sóg ěkrég tĩ. Ěg kanhkã tỹ tag ki inh mré nýtĩ ag vỹ ājag mĩ ěkrég tĩ gé. ²² Kar kỹ tag mĩ ũ tỹ Topě ki ge kỹ nýtĩ kar ag vỹ ājag mĩ ěkrég tĩ gé, pã'i tỹ imperador ĩn tỹ palácio krēm nýtĩ ag kar ke gé.

²³ Ěg pã'i tỹ Jesus Cristo jé ājag tar han. Hã vė.

PAULO TỠ CARTA HAN: COLOSSOS TÁ KE AG MỠ CARTA

¹ Paulo tỠ rá vĕ. Topĕ vỠ inh fĕg, sỠ tỠ Jesus Cristo apóstolo jĕ jé. Hă kỠ sóg ājag mỠ carta tag rán mŭ. KỠ ĕg régre tỠ Timóteo vỠ inh mré rán mŭ gé. ²Ēg tỠ cidade tỠ Colossos tá Topĕ tŭ ag mỠ rán hă vĕ, ĕg kanhkă ag mỠ, ũ tỠ Cristo ki ge tovănh tŭ ag mỠ. Ēg jóg tỠ Topĕ jé ājag tar han, ti jé ājag krĭ kuprăg.

Topĕ kuprĭg tỠ ĕg tar han

³Ēg Senhor tỠ Jesus Cristo panh mỠ sóg vĭ há han tĭ, ājag to, ti mỠ sóg agradecer he tĭ, kură kar ki, sỠ Topĕ mré vĕmén kỠ. ⁴Ājag tỠ Jesus Cristo ki ge tag mĕ inh, kỠ ājag tóg nĕji jagnĕ to há tăvĭ nýtĭ gé, Topĕ ki ge kỠ nýtĭ ag kar to ke gé. ⁵Topĕ tỠ kanhkă tá ĕg mỠ nén (ũ) ven ke mŭ ĕn hă to jykrén ājag tóg tĭ nĕji. Ti tỠ ĕg mỠ nén ũ ven ke mŭ mĕ ājag tóg huri. Ājag tỠ Cristo kăme sér ĕn mĕ kỠ ājag tóg tag mĕ gé. ⁶Ga kar mĭ tóg tĭ ha, vĕnh vĭ há tag, hă kỠ tóg ājag ki jun ja nĭ gé. Vĕnh vĭ há tag tóg Topĕ mỠ ĕkré kanĕ ri ke han tĭ, vĕnh kar tỠ ti ki ge kỠ. Hă kỠ ājag tóg ti ki ge gé, ājag tỠ ti vĭ mĕ vén kỠ. Ēn kă ājag tóg Topĕ tỠ ĕg jagăgtăn ki kanhrăn ja nĭ, kỠ ājag tóg ki kanhró nýtĭ ha. ⁷Ũ tỠ ājag mỠ tó vén mŭ vỠ tỠ Epafras nĭ. Jagnĕ to há tăvĭ ĕg nýtĭ, Epafras mré. Inh mré tóg Cristo rănrăj han tĭgtĭ. Ājag ki rĭr há han tóg tĭ, ājag mỠ ti vĭ kămén kỠ. To krónh ke tŭ ti nĭgtĭ. ⁸Ti hă vỠ inh mỠ ājag tỠ ĕg to há nýtĭ tag tó, Topĕ kuprĭg tỠ ājag tỠ ĕg to há nýtĭ han mŭ ĕn ti.

⁹Epafras vĭ mĕ kỠ sóg ājag jagfŷ Topĕ mré vĕmén tĭ sir. Ti mỠ sóg to vĭ tĭ, ājag tỠ ti tỠ ājag ki nén ve sór mŭ ĕn ki kanhrăn kăn jé, ti tỠ ājag mỠ krĭ há nĭm jé, ti tỠ ā kuprĭg tỠ ājag kanhrăn jé. ¹⁰KỠ ājag tóg ĕg mré ĕg Senhor jykre ki tỠ króm kenh ke ki kanhró nýtĭnh mŭ gé, ājag jykre tỠ ti mỠ há nĭn jé. Ēg tỠ vĕnh jykre há han kỠ ĕg tóg ti mỠ ĕkré kanĕ há ĕn ri ke han tĭ. Ājag tỠ tag han kỠ tóg há tĭ. KỠ ājag tóg Topĕ ki kanhrăn há han ke mŭ gé sir. ¹¹KỠ ājag tóg tỠ ũn tar nýtĭnh mŭ gé sir. Ti hă ne ājag tar han tĭ', ti tar nĭn kỠ. KỠ ājag tóg ti to krónh ke tŭ nĭgtĭ. Vĕnh kar to ājag fe nýtĭnh mŭ. ¹²KỠ tóg ājag mỠ sér tĭnh mŭ gé. KỠ ājag tóg ĕg jóg mỠ vĭ há han ke mŭ. Ti hă ne ājag tỠ há' he mŭ', ājag tỠ kanhkă ve jé. Ti tỠ ĕg krĭn ken kỠ ĕg tóg kură krĭg ja tŭ ĕn venh ke mŭ, kỠ ājag tóg venh ke mŭ gé, ĕg mré. ¹³Ēg kygva tóg huri, hă kỠ ĕg tóg tỠ kuty tăn ag krĕm ke tŭ nýtĭ ha. Topĕ kósĭn krĕm ke vỠ tỠ ĕg nýtĭ, ũri, Topĕ tỠ ũ to: inh fe, he mŭ ĕn krĕm. ¹⁴Ti hă ne ĕg kren han mŭ', ti hă tugrĭn Topĕ tóg ĕg mỠ vĕnh păte fón mŭ, ĕg tỠ ti vĭ mranh ja ti.

Jesus tugrĭn nén kar tóg vĕnh ven ke mŭ

¹⁵Topĕ ri ke pĕ ti nĭ, ti kósĭn ti. Ēg pi(jé) Topĕ vég tĭ'. Ēg tỠ ti kósĭn ve kỠ ĕg tóg Topĕ ki kanhró nýtĭ. Ā panh kósĭn ve vỠ tỠ ti nĭ. Topĕ tỠ nén (ũ) kar hyn han kỠ tóg ā panh mré nĭ nĭ, ti kósĭn ti. ¹⁶Ā kósĭn tugrĭn tóg ā tỠ nén (ũ) kar hyn han tĭ ĕn nĭm ja nĭgtĭ gé, Topĕ ti. Kanhkă tá ke ĕn hyn han kăn ja ti nĭgtĭ, Topĕ ti, ā kósĭn tugrĭn, ga kri ke kar hyn han ja ti nĭgtĭ gé, ĕg tỠ nén vég tĭ kar hyn han ja ti nĭgtĭ gé, ĕg tỠ nén ve vănh kar hyn han ja ti nĭgtĭ gé. Pă'i kar hyn han ja ti nĭgtĭ gé, ũn tar ag kar, ũn mág ag kar hyn han ja ti nĭgtĭ, ũn kăsir kar ag mré hă. Ā kósĭn tugrĭn tóg nén ũ kar hyn han ja nĭ, kỠ tóg ti hă mỠ hyn han kăn ja nĭ, nén (ũ) kar ti. ¹⁷Nén kar tỠ vĕnh ven tŭg ki tóg kă nĭ nĭ, Cristo ti. Ti tugrĭn nén kar tóg văhă vĕnh ven kăn tĭ. ¹⁸Ti ki ge kỠ nýtĭ kar ag krĭ ri ke ti nĭ, kỠ ĕg tóg ti há ri ke nýtĭ. ũn ve vỠ tỠ ti nĭ, kỠ tóg rĭr măn gé, ti ter kar kỠ, ĕg rĭr măn ken jo. Nén (ũ) kar kri ke vỠ tỠ ti nĭ. ¹⁹Topĕ mỠ tóg sér tĭ, ti kósĭn tỠ ti ri ke pĕ nĭn kỠ, ti tỠ tỠ ti ve pĕ nĭn kỠ. ²⁰KỠ tóg ti ter tugrĭn vĕnh kar to há nĭ ha, Topĕ ti, Jesus tỠ cruz to sa tugrĭn, ti kyvĕnh jamĕn kỠ. KỠ Topĕ tóg ĕg to jŭ tŭ nĭ ha, ũ tỠ ga kri mŭ ag to, kanhkă tăn ag to ke gé.

²¹Hă kỠ tóg ājag to há nĭ ha, ke gé. VăsỠ ājag tóg vĕnh jykre kórĕg hă han ja nĭgtĭ, hă kỠ ājag tóg Topĕ kato văsănsăn ja nýtĭgtĭ. ²²Hă ra ti kósĭn tóg ĕg ri ke mur ja nĭ, kỠ tóg ĕg jagfŷ ter ja nĭ, hă kỠ Topĕ tóg ājag to há nĭ ha, ājag tỠ tỠ ti tŭ nýtĭ jé, ājag tỠ há pĕ nýtĭ jé, kỠ ājag jykre si ĕn tóg tŭ tĭ ha. ²³Hă jé ti ki ge tovănh tŭg nĭ. Tar nýtĭmnĭ, ti to krónh ke tŭg nĭ. Ājag tỠ Jesus kăme sér ĕn mĕ kỠ ājag tóg Topĕ tỠ ĕg mỠ nén (ũ) vin ke mŭ ĕn

kāme mẽ ja nĩgtĩ gé. Tag hã mĩ êkrén nĩ, tovãnh tũg nĩ. Ga kri mũ kar ag vỹ mẽg mũ ha, Jesus kāme sér ên. Inh rãnhraj hã vễ, sỹ ag mỹ tónh ke ti, inh, hã vỹ: Paulo, he mũ.

Paulo tỹ vễsỹrénh mág ja

²⁴ Ājag jagfy sóg vễsỹrénh mũ. Hã ra tóg inh mỹ sér tĩ. Cristo vỹ vễsỹrénh mág, êg tỹ ti ki ge jé, kỹ êg tóg ti vễsỹrénh ên ri ke han ke mũ gé, ù tỹ hên ri ke ag tỹ êg tugrĩn ti vĩ ki króm sór jé. ²⁵ Topẽ ne inh mỹ: “ha vễnh kar mỹ inh vĩ ti tó,” he ja nĩgtĩ¹, sỹ ti rãnhraj ki rĩr jé, sỹ ājag mỹ tó jé gé, ti vĩ ti. Ti tỹ ājag mỹ vễnh vĩ jênẽ vễ. ²⁶ Topẽ tóg vẫsỹ ã tỹ nén han ke to jykrén ja nĩgtĩ, ã tỹ nén (ũ) kar hyn han tũg ki tóg to jykrén ja nĩgtĩ. Hã ra tóg ên kã ù mỹ tó ja tũ nĩ ver. Vãhã tóg ù tỹ ti ki ge mũ ên ag mỹ tó mũ, ti tỹ vẫsỹ nén to jykrén ja ên ti. ²⁷ Êg hã mỹ tóg tó mũ ha, ti tỹ povo kar mỹ nén ù há tãvĩ vin sór mũ ti, hã kỹ tóg to hã ù mỹ tó jã tũ nĩ ver, ti tỹ êg hã mỹ tó sór kỹ. Ti tỹ êg mỹ nén vin ken hã vễ, ha mẽ: Cristo vỹ ājag kãtã jamãn nĩ ha, hã kỹ ājag tóg êg tỹ kanhkã tá nén venh ke ên ti venh ke mũ gé sir, êg mré, ù tỹ ti ki ge kỹ nỹtĩ ag.

²⁸ Cristo jykre tag hã tó inh tĩ, vễnh kar mỹ. Vễnh kar kanhrãn há han sóg tĩ, Topẽ tỹ inh mỹ krĩ há nĩm jan tugrĩn. Kỹ sóg vễnh kar jyvẽn tĩ gé, ag tỹ ti ki ge há han jé, ag tỹ kygnẽ sór tũ nĩ jé. Kỹ ag tóg há pẽ nỹtĩnh mũ, ag tỹ Cristo ki ge kỹ. ²⁹ Hã to sóg vẫsãn tĩ, kỹ sóg to ron tĩ gé. Ti hã ne isar han tĩ¹, ti tar nĩn kỹ.

2

¹ Ha vé, ājag jagfy sóg vễnh rãnhraj mág pẽ to vẫsãn tĩ, Laodicea tá ke ag jagfy ke gé, ù tỹ inh ve ja tũ ag jagfy ke gé. Inh mỹ tóg há tĩ, ājag tỹ isỹ vẫsãn tag mẽn kỹ. ² “Ag tỹ tag mẽ kỹ ag hỹn tóg nén ù kamẽg ke tũ nĩ, kỹ ag hỹn jagnẽ to há kar nỹtĩnh mũ,” he sóg tĩ. Kỹ ājag tóg ki kanhrãn ke mũ gé, Topẽ tỹ nén to jykrén mũ ên ti. Inh mỹ tóg ājag tỹ tag ki kanhrãn kãn há tĩ, inh mỹ tóg ājag tỹ to krĩ há nỹtĩnh há tĩ. Topẽ tỹ nén to jykrén jan hã vỹ tỹ Cristo nĩ. ³ Êg tỹ ti ki kanhrãn kỹ êg tóg Topẽ ki kanhró nỹtĩnh ke mũ gé. Ti pãte êg tóg vễnh vĩ sér ù ve mãn ke tũ nĩ, ti hã tugrĩn êg tóg Topẽ ki kanhrãn kỹ nỹtĩ.

⁴ Tag kãmén sóg mũ ājag mỹ, ù tỹ ājag krĩn kónãn tũ nĩ jé. ù tỹ ājag krĩn kónãn sór mũ vĩ tóg há nĩ ve nĩ, hã ra tóg tỹ hã tũ nĩ. ⁵ Ājag vég tũ sóg nĩ. Hã ra sóg ājag ki êkrég tĩ, kỹ tóg sỹ ājag ve ên ri ke tĩ inh mỹ. Inh mỹ tóg sér tĩ, ājag tỹ Cristo ki ge tovãnh tũ nĩn kỹ, ājag tỹ ti to tar tãvĩ nỹtĩn kỹ.

Cristo jykre

⁶ Ha vé, Jesus Cristo ki ge kỹ ājag nỹtĩ, êg Senhor ki. Kỹ ti jykre hã han nĩ. ⁷ Ti hã vỹ êg mỹ ga ri ke nĩ. Ti ki jãre han nĩ, ka jãre ên ri ke han nĩ. Kỹ tóg êg mỹ ãn tỹ kri jẽ jafã ri ke nĩ gé, ãn nũna tỹ kri gunh kỹ fẽg ên ri ke ti nĩ gé. Ti ki ge tovãnh tũg nĩ. Tag hã mẽ ājag, ājag tỹ ti vĩ mẽ vén kỹ. Kỹ to tar nỹtĩmĩ, Topẽ mỹ vễnh vĩ há tó kỹ.

⁸ Ha vé, vễso jykrén. Inh mỹ tóg ù tỹ ón kỹ ājag krĩn kónãn sór ha mẽ tĩ. ù tóg krĩg tãn tó tĩ, ù tóg nén ù tãn tó tĩ gé. Nén kórég mré ke ag vễ, nén ù tãn kar ti. Kỹ ù tóg êprã ke jykre tó tĩ gé. Cristo jykre tũ vễ, êprã ke jykre kar ti. Hã kỹ ù tỹ ājag mỹ tag tó sór mũ ag vĩ jẽmẽ tũg nĩ. ⁹⁻¹⁰ Cristo vỹ tỹ nén (ũ) kar kri ke nĩ, pã'i kar kri ke vỹ tỹ ti nĩ. Ti fãr vỹ êg ri ke ja nĩgtĩ, ti tỹ ga kri tĩ mũn kỹ, hã ra tóg tỹ Topẽ jẽ nĩ, ti fãr kãkã ti jẽ nĩ, Topẽ ti. Topẽ pẽ hã vễ sir. Kỹ ājag tóg há nỹtĩ gé sir, ājag tỹ ti ki ge kỹ, há tãvĩ.

¹¹ Kỹ, êg tỹ êg gré junun fãr kym mũ vỹ ge nĩ, ha mẽ. Ti ki ge kỹ êg tóg êg jykre si tovãnh mũ sir. Judeu ag tóg ājag gré junun fãr kym ja nĩgtĩ, vễnh kar tỹ ag tỹ Topẽ jykre hã han mũ ên ki kanhró nỹtĩ jé. ùri êg tóg êg jykre si tovãnh mũ, vễnh kar tỹ êg tỹ Topẽ jykre han mũ ki kanhró nỹtĩ jé. Êg tỹ ti mré ter ri ke ti nĩ, êg tỹ êg jykre si tovãnh mũ ti, kỹ êg tóg êg tỹ nén ù to én mũ ên han mãn ke tũ nĩ. Êg tỹ Cristo mỹ vễnh fẽg to ken hã vễ. ¹² Ti mré ter ri ke han kỹ êg tóg vễnh kej kãkã nỹ ri ke han mũ gé, ti mré. Vễnh kype to ken hã vễ, batismo to ken hã vễ, hã vỹ: ti mré vễnh kej kãkã nỹ ri ke han mũ, he mũ. Kỹ êg tóg ti mré rĩr mãn ri ke han mũ gé sir, êg tỹ goj kãtã kãkutẽ kỹ. Êg jykre si tỹ tóg hur tũ¹ hé, kỹ êg rĩr mãn vễ sir. Topẽ vỹ Cristo rĩn mãn, ti ter kỹ. Êg tỹ ti ki ge kỹ tóg êg rĩn mãn mũ gé sir. ¹³ Vẫsỹ ājag tóg vễser ri ke nỹtĩ ja nĩgtĩ. Ājag tỹ ti vĩ mranh tugrĩn,

ājag tóg ājag kăgter ra mŭ ja nĭgtĭ, ājag gré junun făr kym tŭ ja tugrĭn. Hă ra tóg ājag rĭn măn ja nĭgtĭ, Cristo mré Topě ti. Ājag mŷ tóg hur vĕnh păte fón, ājag tŷ vĕnh jykre kórég han ja ěn ti tŷ. ¹⁴ Ěg név(e) rá ěn tŷ tóg tŭ' hé huri, ěg mŷ. Rán kŷ tóg nĭ ja nĭgtĭ, ěg név(e) ěn ti, hă vŷ: ěg tŷ ti vĭ mranh, he mŭ. Tag to tóg ěg to jŭ ja nĭ vĕ. Hă ra Cristo tóg tŷ tŭ' hé. Cruz to tóg ti sa, ěg név(e) ěn ti, kŷ tóg tŷ tŭ' hé. Kajăm kăn tóg huri. ¹⁵ Kŷ tóg Japo pă'i kar ag tŷ tŭ' he ja nĭgtĭ gé, ũn tar ja ěn ag tŷ. Cruz to sa kŷ tóg ag tar tŷ tŭ' hé, ũ tŷ ti kato văsănsăn mŭ ěn ag tŷ, kŷ ěg kar tóg ag venh ke mŭ, kŷ ěg tóg ag to é henh ke mŭ sir. Cristo tóg ag pan kar kŷ ag tatĭn tĭg kăn ke mŭ, nŭgme ki ag văm jé. Tag ve jé ěg tóg ke mŭ.

¹⁶ Kŷ ũ tŷ vĕjĕn há to ājag mŷ: “ă tŷ tag kon kŷ Topě tóg ă to jŭnh mŭ,” hen kŷ hă ra kri nĭm tŭg nĭ. Kură kórég tó sór ag tóg tĭ gé, festa kar, kysă tăg ke gé, vĕnh kăn ke kură ke gé. ¹⁷ Văsŷ ke ja vĕ, vĕnh jykre tag, Cristo kătĭg ke jo ke ja vĕ, tag. Cristo kătĭg kŷ ěg tóg vĕnh jykre tăg vĕg nŷtĭ ha, kŷ ěg ti si tovănh mŭ sir. ¹⁸ Ũ tóg ājag mŷ Topě tŷ jĕnĕ jafă ag tó sór mŭ gé. “Topě tŷ jĕnĕ jafă vĕg sóg tĭ, tag hă tóg inh mŷ sér tĭ,” he ag tóg tĭ. “Isŷ tŷ nĕn ũ tŷ (hă) ra sóg vĕg tĭ. Kŷ sóg kanhkă tăn tag ag mŷ jăn sór tĭ,” he ag tóg tĭ, ón kŷ. Hă ra ag tóg tag hă to (ag tóg) tŷ ũn mág nŷtĭ sór mŭ, ājag kăfór nŷtĭ sór ag tóg mŭ. ¹⁹ Ag pi(jé) Cristo jykre han sór mŭ! Cristo jykre hă tóg ă pir mŷ tar nĭ. Ěg krĭ ri ke ti nĭ, Cristo ti, kŷ ěg tóg ti há ri ke nŷtĭ, ěg tŷ ti ki ge kŷ nŷtĭn kŷ. Ěg krĭ vŷ ěg tŷ nĕn (ŭ) han sór mŭ ěn han tĭ, ěg kujej tŷ, ěg mó tŷ ke gé. Kŷ ěg há tóg mog mŭ sir, ti tŷ ěg krĭ mré vĕnh jykre pir han kŷ. Kŷ ěg tóg Cristo jykre han ke mŭ, ti tŷ ěg krĭ ri ke nĭn kŷ. Hă ra ag tóg tag han sór tŭ nĭ, ũ tŷ ājag krĭn kónăn tĭ ag.

Jesus mré ěg rĭnrĭr nŷtĭnh

²⁰ Hă kŷ ājag tóg Cristo mré ter ri ke han. Krĭg tăn kórég ag pi(jé) ājag tŷ hĕ ri ke măn mŭ ha', nĕn ũ ũ kar tăn kórég ag ke gé. Kŷ ag jykre ěn vŷ ājag mŷ tŭ' hé. Ājag tŷ ne jé han măn sór nĕ? Ke tŭg nĭ. Ājag pi(jé) tŷ ag mré ke nŷtĭ! Ājag tŷ ne jé ag tŷ ājag mŷ vĭ jĕmĕ sór nĕ, ag tŷ ón kŷ vĕjĕn há to: ²¹ “tag vóg tŭg nĭ, Topě mŷn kórég nĭ, tag ko tŭg nĭ, ěn vóg tŭg nĭ,” hen kŷ? Ag vĭ tag jĕmĕ tŭg nĭ. ²² Ěpră ke ag jykre vĕ, tag ti. Tag mĭ ke vĕ, ěg tŷ nĕn (ŭ) vóg mŭ ti. Tŭg kăn jé tóg ke mŭ, kejĕn, hă kŷ ěg tóg Topě vĭ hă jĕmĕg tĭ. ²³ Ag jykre vŷ há nŷ ve nĭ. Krĭ há nĭ ve ag nŷtĭ. Kanhkă tăn to ag há nŷtĭ, ag to ag jăn tĭ, kŷ ag tóg vĕsŷ vĕnh kar krĕm ke nŷtĭ sór ve nĭ gé, vĕsăvĭn vóg kónăn ag tóg tĭ gé. Tag hă to jykrĕn kŷ ag tóg vĕsŷ ũn mág han sór mŭ jăvo. Ājag tŷ nĕn to ěn mŭ ěn han ag tóg tĭ, vĕnh jykre tag han kŷ, hă kŷ ag vĭ jĕmĕ sór tŭg nĭ.

3

¹ Ha vé, Cristo mré ājag tóg rĭnrĭr măn. Hă kŷ ti jykre hă han sórmnĭ. Kanhkă tá tóg nĭ nĭ, Topě pĕgja tá ti nĭ, Cristo ti. Kŷ ti hă mĭ ěkrĕn nĭ, ājag tŷ ti mré tá junjun ti jé. ² Ũ tŷ kynhmŷ nĭ ěn jykre hă han sórmnĭ. Ěpră vĕnh jykre to jykrĕn tŭg nĭ. ³ Ter jé ěg tóg ke mŭ, ěg făr tag ti. Hă ra ěg tóg Cristo mré Topě ki vĕnh péju ri ke han. Ti tŷ ěg jy nĭgăn to ken hă vĕ, ěg ter pĕ han tŭ nĭ jé, ěg tŷ ti mré rĭnrĭr nŷtĭ jé. ⁴ Kejĕn tóg vĕnh ven ke mŭ, Cristo ti, ěg rĭnrĭr han mŭ ti. Kŷ vĕnh kar tóg venh ke mŭ, ěg tŷ ti mré rĭnrĭr nŷtĭ ti, ěg tŷ tŷ ũn mág nŷtĭ ti.

Ěg jykre si mré ěg jykre tăg

⁵ Ājag jykre si tovănh nĭ, ājag tŷ nĕn to ěn mŭ ěn mŷ vĕnh nenh nĭ. Ěg jykre si hă vĕ, ha mĕ: ěg prŭ tŭ mré nŷ, ěg mén tŭ mré nŷ, nĕn vĕnh mŷ kar han, Topě tŷ nĕn ũ to: “han tŭg nĭ,” he mŭ ra to ěn mŭ, ă tŷ nĕn e hă tŷ văsăn (ka)mĕ. Vĕnh kăgră to jăn ěn ri ke ti nĭ, ěg tŷ ěg tŷ nĕn e hă tŷ văsăn sór kŷ. ⁶ Tag tugrĭn Topě tóg ěg to jŭ mŭ, ti vĭ mranh hă vĕ. ⁷ Tag han ja ājag tóg nŷtĭgtĭ, văsŷ, ājag tŷ vĕnh jykre kórég tag mĭ mŭn kŷ. ⁸ Hă kŷ tag tovănh kăn.

Fe gŷv (ka)mĕ han tŭg nĭ. Jagnĕ to krĭ rŷ han tŭg nĭ. Ũ to jykrĕn kónăn tŭg nĭ. Ũ mŷ vĭ kónăn tŭg nĭ, ũ to vĭ kónăn tŭg nĭ gé. ⁹ Jagnĕ mŷ ón tŭg nĭ gé. Ājag jykre si ěn tovănh kăn nĭ, kŷ tóg ěg tŷ ěg kur si nŭnh ri ke nĭ. ¹⁰ Kŷ vĕnh jykre tăg hă han kăn nĭ gé, kŷ tóg ěg tŷ

kur tåg tu ri ke nĩ. Ęg tỹ tóg ũ tåg han sór mũ, Topẽ ti, Ęg tỹ tỹ ti kãnhvæg ri ke nỹtĩ jé, ũ tỹ Ęg han mũ kãnhmég ěn ri ke, Ęg tỹ ti ki kanhrãn pẽ han jé. ¹¹ Kỹ Ęg tóg tỹ ũn pir nỹtĩ ha, fóg ag, Judeu ag, ũ tỹ Judeu jykre han mũ ag, ũ tỹ ag jykre han tũ ag ke gé, kanhgág ag, kanhgág jũ ag, patrão krēm ke ag, ag patrão mré hã. Ęg tỹ Cristo ki ge kỹ Ęg tóg tỹ ũn pir nỹtĩ, kỹ Cristo hã vỹ tỹ Ęg kar krĩg mỹ ke nĩ.

¹² Topẽ vỹ ājag kupræg, ājag tỹ tỹ ti tũ nỹtĩ jé, ti tỹ ājag to há tãvĩ jẽn kỹ. Kỹ ti jykre hã han nĩ. Jagnẽ jagãgtãn nĩ. Jagnẽ mỹ vĩ há han nĩ. Vēsỹ ũn mág han sór tũg nĩ. Komẽr hã vĩmnĩ. Jagnẽ to fen mág nỹtĩmnĩ. ¹³ Jagnẽ to jũ tũg nĩ. Jagnẽ mỹ vẽn pãte fón nĩ, ũ tỹ ājag mỹ vĩ kórég han kỹ. Ęg Senhor vỹ Ęg mỹ vẽn pãte fón tĩ gé, kỹ jagnẽ mỹ vẽn pãte fón nĩ, ti ri kén. ¹⁴ Ājag tỹ jagnẽ fe ri ke nỹtĩn kỹ tóg há kar tĩ. Kỹ ājag tóg vẽn jykre pir han ke mũ. ¹⁵ Cristo jé ājag krĩ kupræg, kỹ ājag tóg krĩ kãnhvy nỹtĩnh mũ ha. Ęg krĩ kuprã nĩn kỹ Ęg tóg jatun mỹ jagnẽ mré nỹtĩnh mũ, Ęg tỹ Cristo há ri ke nỹtĩ jé. Hã jé tóg Ęg jé prẽr, Topẽ ti. Kỹ ti mỹ tag to agradecer hemnĩ. ¹⁶ Cristo vĩ hã tỹ jagnẽ mỹ tómnĩ, hã ki kanhrãn sórmnĩ. Tag tỹ jagnẽ jyvẽn nĩ, tag hã to krĩ há han nĩ. Kỹ Topẽ mỹ vĩ há han nĩ gé. Ti mỹ jãn nĩ, ti jé hã tómnĩ, ti kuprĩg tỹ ājag mỹ nén tó mũ ti. Ti hã mỹ vĩ há han nĩ, ti mỹ: “inh mỹ tóg há tĩ, ã tỹ inh mỹ nén han mũ ti,” hemnĩ. ¹⁷ Ājag tỹ nén ũ han kỹ Ęg Senhor mré vēmén kar kỹ han nĩ, ājag tỹ ti jykre hã han jé. Ājag tỹ nén ũ tó sór kỹ ti hã mỹ tó vén nĩ gé. Ęg Senhor tỹ Jesus jykre hã han jé Ęg tóg ke mũ, kỹ Ęg tóg ti hã tugrĩn (Ęg tóg) Ęg jóg tỹ Topẽ mỹ vẽn vĩ há tónh ke mũ gé sir, ti mỹ agradecer hen kỹ.

Ęg jykre tåg

¹⁸ Kỹ sóg ũn mén nỹtĩ fag jyvẽn sór mũ. Ājag mén jykre mĩ mũmnĩ. Ęg Senhor jykrén hã vẽ.

¹⁹ Ājag mén jyvẽn sór sóg mũ gé. Ājag prũ to há tãvĩ nỹtĩmnĩ. Fag mỹ vĩ tar han tũg nĩ.

²⁰ Kỹ sóg ājag krẽ mỹ tag tó sór mũ gé. Ājag han mũ fag vĩ jēmẽmnĩ. Ęg Senhor vỹ tag ve sór mũ, ājag ki.

²¹ Kỹ sóg ũn sanh ag mỹ: ājag krẽ mỹ vĩ tar pẽ han tũg nĩ, ag tỹ ājag to jũ tũ nĩ jé, he mũ gé. Krónh ke jé ag tóg ke mũ, ājag tỹ ag mỹ vĩ tar pẽ han kỹ.

²² Ājag kãmĩ ũ tóg patrão mỹ rãnrãj tĩ, fagrĩnh mỹ. Ājag jyvẽn kỹ sóg ājag mỹ: ājag patrão vĩ ki hã han nĩ, he mũ. ũ tóg kejẽn ã patrão tỹ ti mỹ vĩ há han hã jé tóg ã patrão tũ ki rĩr tĩ, ón kỹ. Tag han tũg nĩ. Ājag patrão tũ ki rĩr pẽ han nĩ, ājag tỹ Ęg Senhor kamæg kỹ. Vẽn jykre pir hã han nĩ, ājag patrão mỹ. ²³ Ti rãnrãj ki rĩr kỹ mỹ sér nỹtĩmnĩ. Ājag tỹ Ęg Senhor tỹ Jesus rãnrãj han ri ke ti nĩ, ājag patrão rãnrãj han mũ ti. ²⁴ Ęg Senhor vỹ ājag mỹ ājag rãnrãj kajãm ke mũ, ājag tỹ ti tũ kar ag mré tá junjun ken kỹ. Tá ti vin han kỹ nỹtĩ, ti tỹ ājag mỹ nén vin ke mũ ěn ti. Ājag patrão pẽ vỹ tỹ Ęg Senhor tỹ Cristo nĩ. Ti hã mỹ ājag tóg rãnrãj tĩ. ²⁵ ũ tỹ vẽn jykre pãno han mũ ěn vóg kónãn jé tóg ke mũ, Topẽ ti, ag tỹ tỹ ũn mág nỹtĩ (hã) ra. Topẽ mỹ Ęg tóg jagnẽ ri ke kar nỹtĩ, tag ki ũn mág ag mré ũn kãsir ag. Vẽn kar vóg kónãn jé tóg ke mũ, vẽn jykre pãno to, Topẽ ti.

4

¹ Ājag kãmĩ ũ vỹ tỹ patrão nỹtĩ, kỹ sóg patrão hã jyvẽn sór mũ ha. Ājag camarada ag vỹ ājag rãnrãj han tĩ. Kỹ ag mỹ vẽn jykre kuryj han nĩ. Ag ki rĩr há han nĩ. Patrão ũ vỹ tỹ ājag krĩg mỹ ke nĩ, hã vỹ: Ęg Senhor, he mũ, kanhkã tá nĩ ti. Tag to jykrén.

Paulo tỹ Ęg jyvẽn

² Topẽ mré vēmén tovãnh tũg nĩ. Ti mỹ: “inh mỹ tóg há tĩ,” hemnĩ gé. Mũmæg nĩ, ājag tỹ ti mré vēmén to krónh ke tũ nĩ jé. ³ Kỹ ti mré iso vēmén nĩ gé. Topẽ vĩ tó sóg tĩ. Kỹ ti mỹ to vĩmnĩ, ag tỹ inh vĩ mẽ há han jé, sỹ ag mỹ Cristo kãmén kỹ, sỹ ag mỹ Topẽ tỹ nén han sór mũ ěn kãmén kỹ. Tag tugrĩn sóg se kỹ jẽ. ⁴ Hã ra sóg tó há han sór mũ, Topẽ tỹ inh mỹ vẽn rãnrãj tag nĩm kỹ. Hã jé iso ti mré vēmén nĩ.

⁵ ũ tỹ Ęg jãvo Jesus ki ge tũ ag mỹ vĩ há han nĩ. Kurã kren tũg sórmnĩ. ⁶ Nén ũ há tỹ vēmén nĩ, vẽn kar mỹ sér tĩ jé, ag tỹ ājag vĩ mẽn kỹ. Kỹ ājag tóg vẽn kar mỹ kãmén há han ki kanhró nỹtĩnh mũ.

Paulo tỹ ag mĩ ěkrén

⁷ Sỹ ājag mỹ Tíquico jĕnĕ vĕ, ti tỹ ājag mỹ isỹ nĕn (ũ) vĕg mũ kāmĕn kĕn jĕ, isỹ nĕn (ũ) han mũ ti ke gé. Ěg régre vĕ, Tíquico ti. Ěg to há tĕvĩ ti nĩ. Ěg Senhor rĕnhřĕj han ti tĩ, to krónh ke tũ ti nĩgtĩ. ⁸ Ti hĕ vỹ sỹ nĕn vĕg mũ tó kĕn ke mũ, hĕ jĕ sóg ti jĕnĕg mũ, ti tỹ ājag fe tỹ mrin ke jĕ. ⁹ Ti mré sóg ājag mré ke tỹ Onésimo jĕnĕg mũ gé. Ěg régre vĕ gé, ěg to há ti nĩgtĩ gé, Topĕ ki rĕ to krónh ke tũ ti nĩgtĩ. Ag hĕ ne ājag mỹ tónh ke mũ', cidade tag ki nĕn kutĕ mũ ti.

¹⁰ Aristarco vỹ inh mré se kỹ jĕ gé. Ājag mĩ tóg ěkrég tĩ. Marcos vỹ ājag mĩ ěkrég tĩ gé, Barnabé kanhkĕ ěn ti. Marcos to sóg ājag mỹ vĕnh vĩ jĕnĕ huri, ājag tỹ ti mỹ: “ha kĕrĕ,” he jĕ, ti tỹ kejĕn ājag tá jun ti kỹ. ¹¹ Josué vỹ ājag mĩ ěkrég tĩ gé, ag tỹ ũ to: Justo, he mũ tag ti. Judeu ag vĕ, Aristarco mré Marcos mré Josué ti. Inh mré ag tóg rĕnhřĕj tĩ, Topĕ vĩ ki. Ag jĕvo Judeu ũ ag vỹ inh mré rĕnhřĕj jĕvĕnh nỹtĩ gé. Kỹ ũ tĕgtũ tag ag tóg inh fe tỹ mrin ke tĩ, ag tỹ inh mré rĕnhřĕj kỹ.

¹² Epafras vỹ ājag mĩ ěkrég tĩ gé, ājag mré ke tag ti. Jesus Cristo rĕnhřĕj han kỹ tóg jĕ nĩ. Ājag to tóg Topĕ mré vĕmĕn tĩ, to tóg vĕsĕn tĩ, to krónh ke tũ ti nĩgtĩ, ājag tỹ kygnĕg tũ nĩn jĕ, ājag tỹ Topĕ tỹ ěg ki nĕn ve sór mũ ěn hĕ han sór jĕ, ājag tỹ tag hĕ to tar nỹtĩ jĕ.

¹³ Ājag hĕ ki tóg ěkrég tĩ, tag vĕg sóg tĩ, kỹ tóg Laodicĕia tá ke ag mĩ ěkrég tĩ gé, Hierápolis tá ke ag mĩ ke gé. ¹⁴ Lucas vỹ ājag mĩ ěkrég tĩ gé, médoco ěn ti, ũ tỹ ěg to há tĕvĩ ěn ti, kar kỹ Demas ti ke gé.

¹⁵ Laodicĕia tá ěg régre ag mỹ tómnĩ, sỹ ag mĩ ěkrég mũ ti. Ninfa fi mĩ sóg ěkrég tĩ gé, fi ĩn tá vĕnh mĕn jĕfĕ ěn ki. ¹⁶ Ājag tỹ vĕnh rĕn tag to ke kar kỹ Laodicĕia tá Topĕ ki ge kỹ nỹtĩ ag mỹ jĕnĕmnĩ, kỹ tá ke ag tũ to kemnĩ gé, vĕnh kato, sỹ ag mỹ carta jĕnĕg mũ ti.

¹⁷ Kỹ Arquipo mỹ: ěg Senhor tỹ ĕ mỹ nĕn (ũ) tó mũ ěn han nĩ, to krónh ke tũg nĩ,” hemnĩ.

¹⁸ Vĕhĕ sóg vĕsóg ki ājag mỹ rĕn ke mũ ha', inh, hĕ vỹ: Paulo, he mũ. Isỹ se kỹ jĕ tag kĕ jatũ' he tũg nĩ. Topĕ jĕ ājag tar han tĩ. Hĕ vĕ.

PAULO TỠ CARTA HAN: TESSALÔNICA TÁ KE AG MỠ CARTA VE

¹ Paulo tỠ rá vĕ. IsỠ cidade tỠ Tessalônica tá ke ag mỠ rán hã vĕ. Tessalônica tá ajag tóg vĕnh măn tỠ, Topĕ vĠ mĕ jĕ. Topĕ tũ vỠ tỠ ajag nỠtỠ, ĕg jóg mág ti. Jesus Cristo tũ vỠ tỠ ajag nỠtỠ gé, ĕg Senhor ti. SỠ ajag mỠ vĕnh rá jĕnĕ vĕ, kỠ Silas vỠ jĕnĕg mũ gé inh mrĕ, Timóteo ke gé. Topĕ mỠ sóg to vĠ tỠ, ti tỠ ajag tar han jĕ, ti tỠ ajag mỠ vĕnh jykre kusa nĠm jĕ.

Vĕnh kar tỠ Tessalônica tá ke ag jykre vég tỠ

² Kurã kar ki sóg ajag to Topĕ mrĕ vĠ tỠ. Ti mỠ sóg: “há ti nĠ, ã tỠ ag krĠn há han kỠ,” he tỠ, kurã kar ki. ³ SỠ ti mrĕ vĠn kỠ sóg ajag mĠ ĕkrĕg tỠ. Ajag tỠ ti ki ge kỠ nỠtỠn kỠ ajag tóg nĕn ũ há kar han mĠgtỠ. Ajag tỠ ti to há nỠtỠn kỠ ajag tóg rãnrãj mág han mĠgtỠ. Ajag tỠ ĕg Senhor tỠ Jesus Cristo ve sór kỠ ajag tóg to krónh ke tũ nĠgtỠ. Tag mĠ sóg ĕkrĕg tỠ, kurã kar ki, sỠ Topĕ mrĕ vĠn kỠ, ĕg jóg mág mrĕ.

⁴ Inh kanhkã', tỠ ĕg tóg Topĕ fe nỠtỠ, ti tỠ ĕg kuprĕg ja nĠn kỠ. Tag ki kanhró ĕg tóg nỠtỠ. ⁵ SỠ ajag mrĕ nĠn kỠ sóg ajag mỠ Topĕ vĠ sér tó ja nĠgtỠ. Inh pi(jĕ) inh jykre tỠ vĕmĕn ja nĠgtỠ'. Topĕ jykre hã tỠ sóg vĕmĕn tỠ, Topĕ kuprĠg tỠ inh krĠn kỠ. Ti hã vỠ ĕg tar han tỠ. Ki hã tó sóg mũ ajag mỠ, tag ki kanhró ajag tóg nỠtỠ. IsỠ ajag mrĕ nĠn kỠ ajag tóg inh ve ja nĠgtỠ, hã kỠ ajag tóg inh jykre ki kanhró nỠtỠ. SỠ ajag to há nĠn kỠ, hã kỠ sóg ajag mỠ tó ja nĠ. ⁶ Inh ri ke han sór ajag tóg mũ, ĕg Senhor ri ke ke gé. SỠ ajag mỠ nĕn tó ja ĕn kri fig ajag tóg tỠ. KỠ ajag tóg to vĕsỠrĕnh jagy han tỠ, ũri, pã'i ag tỠ ajag to kórĕg nỠtỠn kỠ. Hã ra Topĕ kuprĠg vỠ tỠ ajag jagrĕ nĠ, hã kỠ ajag krĠ tóg kãnhvy' he mũ, ajag vĕsỠrĕnh mũ (hã) ra, ĕprã. ⁷ Hã kỠ vĕnh kar tóg ajag tỠ nĕn han mũ mĕg mũ sir, ga tỠ Macedônia tá, ga tỠ Grécia tá ke gé, ag tỠ ajag kóm han kãn jĕ sir, ũ tỠ Jesus ki ge kỠ nỠtỠ kar ag ke gé. ⁸ Vĕnh kar vỠ ajag tỠ nĕn han mũ mĕgmĕ kãn huri. Topĕ vĠ tó ajag tóg mũ, hã kỠ ag tóg ga tỠ Macedônia tá mĕgmĕ, ga tỠ Grécia tá ke gé, ĕmã kar mĠ hã. Ajag tỠ Topĕ ki ge mũ mĕgmĕ kãn ag tóg huri. IsỠ ag mỠ tó sór kỠ ag tóg: “mĕ ĕg huri,” he tỠ. ⁹ KỠ ag tóg inh mỠ kãmĕn mũ, sỠ ajag mỠ Topĕ vĠ tó ja ĕn ti. “Ã vĠ kri fig ag nĕji mũ, Tessalônica tá ke ag,” he ag tóg tỠ inh mỠ, ajag to. “Topĕ ki ge kỠ ag nĕji nỠtỠ, vĕnh kãggrã tỠ topĕ tovãnh kỠ, ag tỠ Topĕ vĠ há han jĕ sir, ũn rĠr mũ vĠ ti, hã vỠ: Topĕ pĕ, he mũ,” he ag tóg tỠ ajag to. ¹⁰ “Ti kósĠn nĕji vỠn kĕnh ke mũ, kanhkã tá. Ti kãtĠg jãvãnh ag nĕji mũ,” he ag tóg tỠ. “Topĕ nĕji ti rĠn măn, ti ter kar kỠ, Jesus ti. ĕn nĕji ĕg krenkren han mũ, ĕg tỠ Topĕ jũ vég tũ nĠ jĕ, Jesus kãtĠg jãvãnh ag nĕji mũ, Tessalônica tá ke ag,” he ag tóg tỠ ajag to.

2

Paulo tỠ ag mỠ Topĕ vĠ tó há han

¹ Inh kanhkã', inh ve ajag tóg, isỠ ajag mrĕ nĠ ja nĠn kã. IsỠ ajag mỠ Topĕ vĠ tó kỠ ajag tóg Topĕ ki rã. Tó há han ja sóg nĠ. ² Cidade tỠ Filipos tá ag tóg inh vóg kónãn ja nĠgtỠ. Tá ag tóg iso é he ja nĠgtỠ. Tá kãkutĕ kỠ sóg ajag tá jun ja nĠgtỠ. Tag ki kanhró ajag tóg nỠtỠ. Ge ra sóg ajag mỠ tó, Topĕ vĠ sér ti. Ajag kamĕg ja tũ sóg nĠ, Topĕ tỠ isar han kỠ, sỠ inh jagtar jagy ĕn ve ja ra. ³ SỠ ajag jyvĕn kỠ sóg ajag mỠ ki hã tó ja nĠgtỠ, kygnĕ ja tũ inh nĠ. Nĕn ũ vĕnhmỠ tó ja tũ sóg nĠgtỠ gé. Ajag tỠ nĕn ũ to ĕn ja tũ sóg nĠgtỠ gé. ⁴ Topĕ hã ne inh jykre ve kỠ inh mỠ: “há inh vĠ ti tó,” he ja nĠ'. Hã kỠ sóg tó mũ sir. ĕprã ke ag tỠ iso vĠ há han tũ ra tóg inh mỠ tỠ nĕn ũ tũ nỠ. Topĕ tỠ iso vĠ há han ke tag hã tóg inh mỠ há nĠ'. Hã jĕ sóg ti vĠ hã ki króm sór mũ. Ti hã ne ĕg jykre ve kỠ ĕg ki kanhró nĠ', Topĕ ti.

⁵ Hã kỠ sóg ajag mỠ ón kỠ: “há ajag tóg nỠtỠ,” he ja tũ nĠgtỠ. Tag ve ajag mỠr. Ajag tỠ nĕn ũ to ĕn ja tũ sóg nĠgtỠ gé. Ajag ki sóg ganho ve sór ja tũ nĠ gé. Topĕ hã ne tag vé'. ⁶ KỠ ĕprã ke ag tỠ iso vĠ há han tũ ra tóg inh mỠ tỠ nĕn ũ tũ nỠ mỠr. Ajag tỠ inh mỠ vĠ há han tũ ra tóg inh mỠ tỠ nĕn ũ tũ nỠ gé. ⁷ Cristo hã vỠ inh jĕnĕ ja nĠ, hã kỠ tóg, sỠ ajag mỠ vĠ tar han há tóg tỠ vĕ. Hã ra sóg ke ja tũ nĠ. Komĕr hã sóg vĠ ja nĠgtỠ. ĕg tỠ ĕg krĕ kãsir mrĕ

vĩ ri ke han ja sóg nĩgtĩ. Gĩr m̃nh fi t̃y kom̃r hã vĩ ên ri ke han ja sóg nĩgtĩ. ⁸ Ājag to sóg há tãvĩ nĩ, hã k̃y sóg ājag m̃y Top̃e vĩ sér tó kãn sór ja nĩgtĩ. K̃y tóg inh m̃y t̃y nén ũ tũ nĩ gé, s̃y ājag jagfy ter ke ti.

⁹ Inh kanhkã', inh rãnrãj to jykrén nĩ. Inh rãnrãj ṽy inh kutãn tĩ. Kuty ki sóg inh rãnrãj han tĩ, kurã ki ke gé, is̃y ṽjên comprar he jé. Hã k̃y sóg ājag j̃en ko ja tũ nĩgtĩ. Top̃e vĩ hã tó ja sóg nĩ, ājag kanhrãn k̃y. Tag to jykrén. ¹⁰ Is̃y nén han m̃u ve kãn ājag tóg, k̃y Top̃e ṽy inh vég tĩ gé. Top̃e jykre hã han isóg tĩ, ṽenh jykre kuryj ti, nén ũ ṽenhm̃y han ṽanh sóg nĩgtĩ. Ājag r̃inve sóg han, ājag t̃y Jesus ki ge k̃y ñytĩn k̃y. ¹¹ Gĩr panh ṽy ā kósĩn jyṽen tĩ, k̃y tóg kej̃en ti jyṽen tar han tĩ gé. K̃y tóg kej̃en vĩ há han tĩ gé, ti f̃yn k̃y. Ti ri ke han ja sóg m̃yr, ājag m̃y. ¹² Hã k̃y sóg ājag fe tar han. Ājag jyṽen ja sóg nĩgtĩ, k̃y sóg ājag jyṽen tar han ja nĩgtĩ gé kej̃en, k̃y sóg ājag fe t̃y há' he ja nĩgtĩ gé, s̃y ājag jyṽen tar han kar k̃y. Ājag t̃y Top̃e jykre ki króm jé, hã jé sóg ājag m̃y ke ja nĩgtĩ. Ti hã ne ājag kupr̃eg', ājag t̃y ti t̃y t̃y ěg pã'i nĩ ve jé, ājag t̃y ti jykre mág ve jé, ti jykre t̃y ěg kãfór nĩ ên ti. ¹³ Ājag t̃y Top̃e vĩ m̃e k̃y ājag tóg to: "hej," he ja nĩgtĩ. Ājag m̃y sóg tó, ti vĩ ti, k̃y tóg ājag m̃y há ja nĩgtĩ. Tag to sóg Top̃e m̃y: "ã hã ne tóg ag kr̃ĩn', k̃y tóg inh m̃y sér tĩ," he tĩ. Kurã kar ki sóg ti m̃y tó tĩ. Is̃y ājag m̃y Top̃e vĩ tó k̃y ājag tóg to: "Top̃e vĩ ṽe," he ja nĩgtĩ. Hã ra tóg ge nĩ. Hã k̃y tóg ājag jykre kugrynh m̃u sir, Top̃e vĩ ti, ājag t̃y ti vĩ kri fin k̃y.

¹⁴ Inh kanhkã', ga t̃y Judéia tá ke ag kóm ājag tóg ṽes̃yr̃en h m̃u. Tá ũ ag tóg ṽenh m̃an tĩ, Top̃e vĩ m̃e jé, ag t̃y Jesus Cristo ki ge k̃y ñytĩn k̃y. K̃y ag mr̃e ke ag tóg ag vóg kónãn tĩ, Israel ag. Ge ti nĩ gé, ājag mr̃e ke ag t̃y ājag vóg kónãn ti. Hã k̃y ājag tóg ag kóm ṽes̃yr̃en h m̃u gé. ¹⁵ Israel pã'i ag ṽy Jesus tén, ěg Senhor ti. Top̃e vĩ tó tĩ ag kãgt̃en ag tóg tĩ gé. K̃y ag tóg ěg vóg kónãn tĩ gé sir. Hã ki ag tóg Top̃e jũ han tĩ. Ēprã ke kar ag kato vãsãnsãn ag tóg tĩ. ¹⁶ Hã k̃y ag tóg inh m̃y: "ker fóg ag m̃y vĩ h̃e'," he tĩ. "Ker kanhgág ag m̃y Top̃e vĩ tó h̃e', ag krenkren tũ nĩ jé," he ag tóg tĩ inh m̃y. Hã ki ag tóg Top̃e vĩ mrynhmranh kãn tĩ. K̃y ag tóg ti vĩ mranh kãn k̃y ñytĩ ha. Hã k̃y Top̃e tóg ag to jũ m̃u sir. K̃y tóg ag vóg kónãn kãn ke m̃u gé sir, ṽenh kaja jé.

Paulo krĩ kufy

¹⁷ Inh kanhkã', is̃y ājag vég tũ ñin k̃y tóg inh m̃y e tĩ. Hã k̃y sóg fe kaj nĩ. Tãg ti tĩ ver, s̃y ājag ve ja ti. Hã ra inh pi(jé) ājag kã jatu' he m̃u'. Ājag ve sór tãvĩ inh nĩ, k̃y sóg ājag to kãtĩg kren. ¹⁸ Is̃y ājag to kãtĩg ke ṽe ṽe, hã ra Satanás ṽy inh kato t̃e. Kar k̃y sóg to jykrén m̃an, hã ra Satanás ṽy inh kato t̃e m̃an. Hã k̃y sóg ājag to jun ja tũ nĩ, inh, hã ṽy: Paulo, he m̃u. ¹⁹ Ājag hã to sóg jykrén m̃u, Jesus t̃y ājag hã ki inh jykre ve jé, ti kãtĩg m̃an k̃y, ěg Senhor ti. Ājag t̃y ti vĩ ki króm k̃y tóg vég m̃u, inh rãnrãj ti, Jesus ti. Ājag hã to inh fe tóg m̃rin ke m̃u, ājag hã ki sóg t̃y ũn mág ñinh m̃u, Jesus m̃y. Hã k̃y sóg ājag to jykrén tĩ. ²⁰ Ājag hã tugr̃ĩn sóg t̃y ũn mág nĩ, ājag hã tugr̃ĩn tóg inh m̃y sér tĩ.

3

¹ Ājag to jykrén mág sóg tĩ, hã k̃y sóg Timóteo j̃eñe ja nĩ, ti t̃y ājag ve jé, ěg t̃y cidade t̃y Atenas tá ñytĩn k̃y. Ti m̃y sóg: "ha inh ré k̃y t̃ig," he ja nĩ, "s̃y inh pir m̃y tag kã nĩ jé," he ja sóg nĩ. "Ag h̃yn ne han m̃u'? he sóg m̃u, k̃y ag venh t̃ig, inh m̃y," he ja sóg nĩ ti m̃y, is̃y ājag to krĩ kufy ja ñin k̃y. ² Timóteo ṽy t̃y Jesus mr̃e ke nĩ. Top̃e camarada ri ke tóg nĩ. Cristo kãmén ti t̃igtĩ, inh ri ke. K̃y tóg ājag tá jun k̃y ājag jyṽen ja nĩ, ājag fe t̃y há' he ja tóg nĩ, ājag t̃y Jesus ki rã tovãnh tũg jé. Hã jé sóg ti j̃eñe ja nĩ. ³ "H̃en ri ke m̃un ag h̃yn krĩ kufy ñytĩ, ag jagãgtar m̃un k̃y," he ja sóg nĩgtĩ ājag to. "Ag mr̃e ke ag ne tóg ag vóg kónãn m̃u', Top̃e jykre to'," he ja sóg nĩgtĩ. Hã ra sóg ājag m̃y tó ja nĩ, ěg jagãgtar ke ti, Top̃e jykre to. ⁴ Is̃y ājag mr̃e nĩ m̃u ên kã sóg ājag m̃y tó, ěg jagãgtar ke ti, ti tugr̃ĩn. Hã ra tóg ge nĩ. Hã to ājag tóg jagãgtar tĩ, ṽes̃yr̃en h tĩ sir. ⁵ Hã k̃y sóg Timóteo j̃eñe, is̃y ājag to krĩ kufy ja ñin k̃y. "Ag m̃y Top̃e tovãnh tũ nĩ ṽy?" he ja sóg nĩ. "Ēg kr̃ĩn kónãn tĩ ên m̃y ag kr̃ĩn tũ nĩ ṽy, Japo ti?" he ja sóg nĩ m̃yr. "Ti t̃y ag kr̃ĩn kónãn k̃y sóg tagr̃ĩnh m̃y ag m̃y tó ja nĩ m̃yr'," he ja sóg nĩ ājag to. Hã k̃y sóg Timóteo j̃eñe ja nĩ.

Timóteo t̃y Paulo krĩ kuprãg

⁶ Hã ra tóg sir inh ki jun mǎn mũ, Timóteo ti, ājag ve kar kǵ. Ūri tóg jun. Ājag kāmén tóg mũ, tó há han tóg mũ, kǵ inh fe tóg mrin ke mũ sir. “Jesus ki ge to tar ag nǵtǵi,” he tóg mũ. “Jagnē to há ag nǵtǵi, ā mǵ ěkrég ag tóg tǵi. Ā ve sór ag tóg tǵi. Ā tǵ ag ve sór ri ke han ag tóg tǵi,” he tóg mũ inh mǵ, Timóteo ti. ⁷ Kǵ inh krǵ tóg kǎnhvy' he mũ sir ājag to. Inh jagtar mũ ra inh fe tóg há' he mũ sir, ājag tǵ Jesus ki ge kǵ nǵtǵin kǵ. ⁸ Ājag tǵ ti to tar nǵtǵin kǵ tóg inh mǵ inh rǵr mǎn ri ke nǵ, kǵ sóg mrin ke ri ke han mũ sir. ⁹ Topē mǵ sóg vǵ há han mũ sir ājag to. Inh fe vǵ mrin ke mũ, sǵ ājag tǵ nén han mũ ěn mē kǵ. Hã kǵ sóg Topē mǵ vǵ há han mũ sir, ājag tǵ inh fe tǵ mrin ken kǵ. ¹⁰ Kutǵ kar ki sóg ti mré vēmén tǵi, kurā kar ki ke gé. Sǵ ājag ve sór nǵn kǵ sóg Topē mǵ isǵ ke to vǵ tǵi, sǵ ājag tar han sór kǵ, ājag tǵ ti ki rā to tar nǵtǵi jé.

¹¹ Topē tǵ kejēn inh mǵ: “ha ag venh tǵg,” hen kǵ tóg inh mǵ sér tǵnh mũ, ěg jóg mág tǵ inh mǵ tag tó kǵ, Jesus ti ke gé, ěg Senhor ti. ¹² ěg Senhor mǵ sóg to vǵ tǵi, ti tǵ ājag tǵ jagnē to há tǎvǵi han jé. Jagnē to há ājag nǵtǵi, kǵ sóg ti mǵ to vǵ tǵi, ti tǵ tag to ājag tar tǎvǵi han jé, ājag tǵ vēnh kar to há nǵtǵi to tar nǵtǵi jé gé, isǵ ājag to há nǵ ri ke. ¹³ Kǵ sóg ti mǵ to vǵ tǵi gé, ti tǵ vēnh jykre há to ājag tar han jé. Kejēn ěg Senhor tǵ Jesus vǵ kǎtǵg mǎn ke mũ, ā tǵ kar ag mré. ěg jóg tǵ Topē tǵ ūri ājag tar han kǵ ājag tóg kurā ěn kǎ ti rǵnǵa tá jǎnhkri nǵtǵnh mũ, ājag tǵ kygnē ja tǵ nǵn kǵ.

4

Jesus jykre mǵ ěg mǵnh ke mũ

¹ Inh kǎnhkǎ', vǎhǎ sóg ājag mǵ nén ū tó sór mũ gé. ěg Senhor tǵ Jesus rǵnve sóg ājag jyvēn sór mũ. Ājag mǵ sóg ti jykre tó huri, ājag tǵ ti japry jagma, ti jamǵn jagma mũ há han jé, ājag tǵ Topē mǵ há nǵtǵi jé. Tag han ājag tóg mǵgtǵi. Gemnǵ. To tar nǵtǵimnǵ. ² Tag kāmén sór isóg mũ ājag mǵ, ěg Senhor tǵ Jesus tǵ inh mǵ: “tag tómnǵi,” he ja nǵn kǵ. ³ Topē vǵ ājag to jykren, ājag tǵ ti jykre há han jé. Kǵ ājag prǵ tǵ fag mré nǵ tǵg nǵ, ājag mén tǵ ag mré nǵ tǵg nǵ gé. ⁴ Ājag tǵ ājag prǵ fi mré nǵ kǵ fi mré nǵ há han nǵ, Topē jykre han jé. Kǵ ěprǎ ke ag vǵ ājag to jykren kónǎn ke tǵ nǵ gé. Fi tǵ prǵg kónǎn tǵg nǵ. ⁵ Fi to ěn kónǎn tǵg nǵ gé, ājag prǵ fi to. Ū tǵ Jesus ki rǎ tǵ ag jykre han tǵg nǵ. Ū tǵ Topē jykre ki kǎgtǵg nǵtǵi ag jykre han tǵg nǵ, ājag prǵ fi to. Fi tǵ prǵg há han nǵ.

⁶ Ājag régre tǵ nén ū to ěn tǵg nǵ. Ti tǵ vē mǵr, kǵ ti tǵ ki Topē vǵ mranh tǵg nǵ. Topē hǎ ne tag to jǵ tǵi'. Kǵ ājag régre tǵ nén ū vóg tǵg nǵ. Ājag tǵ ti tǵ vóg kǵ Topē vǵ ājag vóg ke mũ gé, ti kajǎm jé. Tag tó sóg huri ājag mǵ, tag to sóg ājag mǵ vǵ tar han huri, hǎ ra sóg ājag mǵ tó mǎn mũ gé. ⁷ ěg tǵ vēnh kavénh kǵ ěg tóg Topē jykre han tǵ nǵgtǵi mǵr. Ti jykre vǵ kuryj nǵ. ěg tǵ tǵ ti tǵ nǵtǵi hǎ jé tóg ěg kuprēg. ⁸ ěprǎ ke vǵ pijé', sǵ ājag mǵ nén tó mũ tag ti'. Topē vǵ vē mǵr. Ājag tǵ inh vǵ tag han tǵ nǵn kǵ ājag tóg Topē vǵ mranh mũ. Ti hǎ ne tóg ā kuprǵg tǵ inh jagrē han ja nǵi', kǵ tóg tǵ ājag jagrē han ja nǵi gé.

⁹ Nén ū to ājag tar nǵtǵi, hǎ vǵ: jagnē to há, he mũ. Hã kǵ sóg tag to ājag mǵ rán mág han ke tǵ nǵ. Topē vǵ ājag kǎhrǎn, ājag tǵ jagnē jagǎgtǎn ken ki. Ki hǎ han ājag tóg tǵi. ¹⁰ Ga tǵ Macedônia tá ke kar ag to ājag há nǵtǵi, Jesus mré ke kar ag to ke gé. To tar nǵtǵimnǵi, to krónh ke tǵg nǵ, ājag tǵ tǵ Jesus mré ke nǵtǵin kǵ. Hã jé sóg ājag jyvēn mũ.

¹¹ Vǎsǎn nǵ, ājag tǵ jatun mǵ nǵtǵi jé, jatun mǵ ājag rǎnhraj hyn han jé. Ājag rǎnhraj pē ěn to tar nǵtǵimnǵi, hǎ jé sóg ājag jyvēn ja nǵ. Kǵ sóg to ājag jyvēn mǎn mũ, ājag rǎnhraj to. ¹² Kǵ nén ū vǵ ājag mǵ tǵi' henh ke tǵ pē nǵ. Hã ki vēnh kar tóg ěg jykre há ki kǎhró nǵtǵnh mũ. Ājag tǵ ājag rǎnhraj to nén ū kar ve kǵ tóg há tǵi, ū tǵ ājag mǵ nén ū nǵm tǵ nǵi jé, fagrǵnh mǵ.

Jesus mré ke ter kǵ fǵ mág tǵg nǵ

¹³ Inh kǎnhkǎ', sǵ nén ū ki ājag kǎhrǎn há tóg tǵi gé, ha mē. ěg mré ke ū ag tóg kǎgter kǵ nǵtǵi. Kǵ fǵ mág tǵg nǵ ag jé. Jesus ki ge tǵ ag ri ke han tǵg nǵ. Ag ter kǵ ag tóg nén ū há venh ke tǵ nǵ. Hã kǵ ag tóg fǵ mág tǵi, Jesus ki ge tǵ ag. Hã ra tóg ěg mǵ ge tǵ nǵ. ¹⁴ Jesus vǵ ter ja nǵ, kar kǵ tóg rǵr mǎn ja nǵ. Tag ki kǎhró ěg tóg nǵtǵi. Hã ri ke ti nǵ, Jesus ki ge mũ ag kǎgter ti. Topē vǵ ěg han mǎn ke mũ, Jesus tugrǵn, ěg tǵ ti mré nǵtǵi jé sir. ¹⁵ ěg

Senhor vỹ inh kanhrân, hã ky sóg tó mũ. Ti jênky ki tóg kutẽ, sỹ tónh ke tag ti, ha mẽ. Ver ãg rĩnrĩr nỹtĩ. Hẽn ri ke mũn ãg kãgter kãn ke tũ nĩ, ti kãtĩg ken jo. Kĩ ãg tóg ti kãtĩg venh mũ sir. Hã ra ãg tóg ùn kãgter mũ ag jo mũnh ke tũ nĩ. Ag hã mré ãg tóg mũnh ke mũ.

¹⁶ Ti kãtĩg vỹ ge nĩnh mũ, ha mẽ. Tére jé tóg ke mũ, ãg Senhor ti, kanhkã tá. Kĩ vẽn h vỹ tóg mẽ há tĩnh mũ. Topẽ tỹ jẽnẽ jafã ag pã'i mág vỹ prẽr ke mũ sir. Topẽ tỹ vãykn jafã vỹ mẽ há tĩnh mũ, trombeta ẽn ti. Kĩ ùn kãgter mũ ag vỹ rĩnrĩr mãn mũ sir, Jesus mré ke ag. ¹⁷ Kar kũ ãg tóg ag mré jãprynh mũ gé, ãg tỹ ti kãtĩg ke jo ter tũ hã ra. Ag mré ãg tóg jãprynh mũ, ùn rĩnrĩr mãn mũ ag mré. Kanhkã góg kãmĩ ãg tóg jãprynh mũ, kũ ãg tóg ãg Senhor kato tẽgtẽnh mũ sir, kanhkã krẽm. Hã kũ ãg tóg ti mré nỹtĩnh mũ sir, ãg Senhor mré, ãg tỹ kanhkã ra mũn kũ. Ti ré kũ ãg mũ mãn ke tũ nĩ sir. ¹⁸ Tag tómnĩ jagnẽ mỹ, ãjag krĩ tỹ kãnhvy' he jé, ùn kãgter mũ ag to.

5

Jesus tỹ kãnhmar kãtĩg mãn ke

¹ Inh kanhkã', ti kãtĩg ke ki kanhró ãg tóg nỹtĩ, hã ra ãg tóg ti kurã hã ki kãtĩg nỹtĩ, ti prỹg ke gé. Tag mẽ ãjag tóg huri, hã kũ sóg ãjag mỹ tó mág ke tũ nĩ ha. ² Vãhãn kãtĩg, ãg Senhor ti, hã ra tóg tỹ nén ù péju mé kãtĩg ri ke nĩnh mũ, ti kãtĩg ti. ãg vatãnh tá tóg ãg tũ mág tĩ, nén ù péju mé ti. Kũ tóg ge nĩnh mũ, ãg Senhor kãtĩg ti. ³ Ti to há tũ ag vỹ: "jatun mỹ ãg nỹtĩ," henh ke mũ. "Û vỹ ãg vóg ke tũ nĩ," he jé ag tóg ke mũ. Ag tỹ tag tó mũ ra tóg vãhã kãtĩ mũ, ãg Senhor ti. Kũ ag tóg nũgme ki vár mũ sir. Ag tỹ to jykrén tũ hã ra ti kãtĩg kũ ag tóg krenkren ke tũ pẽ nĩ, ha vemnĩ.

⁴ Inh kanhkã', ãjag hã ne tóg tỹ Jesus mré ke nỹtĩ'. Hã kũ tóg ãjag ki kuty tũ nĩ. Kũ ãjag tóg ki kanhró nỹtĩ, kũ ti kãtĩg vỹ ãjag mỹ nén ù péju mé kãtĩg ri ke tũ nĩ, ãjag tỹ ti ki kanhró nỹtĩnh kũ. ⁵ Ti krẽ vỹ tỹ ãjag nỹtĩ, hã kũ tóg ãjag ki kurã nĩ, ãjag tỹ ki kanhró nỹtĩnh kũ. Kuty tũ ti nĩ, ãg ki. Ti kãtĩg ke ki kanhró ãg tóg nỹtĩ, hã kũ tóg ãg ki kurã nĩ sir.

⁶ Kũ ti kãtĩg ke kã jatu ke tũg nĩ. Vẽso jykrén nĩ, ãjag tỹ ti kãtĩg ke to vẽn preparar ken jé, ãjag tỹ kã jatu ke tũ nĩ jé. ⁷ Ûn nũgnũr mũ ag vỹ kuty kũ nũgnũr tĩ, kũ ag tóg ti kãtĩg ke kã jatu nỹtĩ. Kũ ùn kronkron mũ ag vỹ kuty kũ pẽnmev nỹtĩ, kãgter ag nỹtĩ gé. Kũ ag tóg vẽn jykrén tũ nỹtĩ. Kuty tá vẽn jykrén hã vẽn. ⁸ ãg jé kurã tá vẽn jykre há ẽn ti han jãvo. ãg jé vẽn jykrén kũ ti ki rã to krónh ke tũg. ãg jé jagnẽ to há to krónh ke tũg gé.

Kũ ãg tóg vẽn génh jafã ag tar ri ke nỹtĩ. Kũ tóg ãg mỹ soldado kur ri ke nĩ sir, ti ki rã ti, jagnẽ to há ti ke gé. Soldado tỹ camisa tỹ ferro ri ke ti nĩ, ãg tỹ ti ki rã kũ jagnẽ to há to tar nỹtĩnh kũ. To tar nỹtĩnh kũ ãg krenkren ke mũ, nũgme ki vár ke tũ ãg nĩ. Tag mĩ ẽnkrén nĩ. Kũ tóg ãg mỹ soldado tỹ sãpe tỹ ferro ri ke nĩ sir, ãg tỹ ti ve sór mũ to tar nĩ ti. To tar nỹtĩnh kũ ãg tóg vẽn preparar ke kũ nỹtĩ, vẽn kãn kũ ãg nỹtĩ, ti kãtĩg ke to. ⁹ Topẽ vỹ ãg kuprẽg, ãg tỹ ti jũ vég tũ nĩ jé, ãg krenkren jé, ãg tỹ nũgme ki vár tũ nĩ jé, Jesus Cristo tugnĩn, ãg Senhor ti. ¹⁰ Ti hã ne ãg jagfy ter ja nĩ', ãg tỹ ti tugrĩn rĩnrĩr nỹtĩ jé, ti mré nỹtĩ jé sir. ãg tỹ ti kãtĩg ke jo kãgter mũ ra ãg tóg ti mré nỹtĩnh mũ, ti kãtĩg kũ. ãg kãgter tũ ra ãg tóg ti mré tá nỹtĩnh ke mũ gé, ti kãtĩg kũ. Jagnẽ ri ke ãg nỹtĩnh mũ. ¹¹ Tag tómnĩ jagnẽ mỹ. Tỹ jagnẽ krĩ tỹ kãnhvy' hemnĩ gé, ùn ter mũ to. Kũ tỹ jagnẽ jyvẽn nĩ gé, ãjag tar nỹtĩ jé. Tó ãjag tóg mũgtĩ, kũ tó há han nĩ.

Vẽn jykre há ti

¹² Inh kanhkã', nén ù tó jé sóg ke mũ gé. ãjag kãmĩ ù ag tóg tỹ ãjag pã'i nỹtĩ, igreja to, Jesus mré ke ù ag. ãjag jyvẽn ag tóg tĩ, ãjag to ag tóg vãsãn tĩ. ¹³ ẽn ag kamẽg nĩ. Ag mỹ vỹ há han nĩ, ag to há tãvĩ nỹtĩmnĩ, ag tỹ ãjag ki rĩr kũ. Jagnẽ krĩ rỹg tũg nĩ.

¹⁴ Inh kanhkã', tag ti tó jé sóg ke mũ gé, ha mẽ. Û tỹ vẽnhmỹ mẽ ag jyvẽn tar han nĩ. Û tỹ kãnhmar krónh ke tĩ ag mré komẽr vĩmnĩ. Ûn fe krónhkrój ag fe tỹ tar' hemnĩ. Vẽn kar mỹ komẽr hã vĩmnĩ. ¹⁵ Û tỹ ãjag mỹ nén ù kórég han mũ ra ti mỹ nén ù kórég han tũg nĩ jãvo, vẽn kajãm tũg nĩ. Nén ù há tãvĩ han nĩ jagnẽ mỹ, vẽn kar mỹ ke gé.

¹⁶ Kurã kar ki ãjag fe tỹ mrin kemnĩ. ¹⁷ Kurã kar ki ãg jóg mág mré vĩmnĩ, ãjag tỹ ti to krónh ke tũ nĩn jé. ¹⁸ Nén ù kar to ti mỹ: “inh mỹ tóg há tĩ,” hemnĩ gé. Topẽ jykren há vẽ. Jesus Cristo nón ãg tóg ti jykre han ke mũ. ãg tỹ nén ù vég mũ kar to ãg tóg: “inh mỹ tóg há nĩ,” henh ke mũ, Topẽ mỹ.

¹⁹ Topẽ kuprĩg tỹ ãjag krĩn sór kỹ ti mỹ: “vó,” he tũg nĩ. ²⁰ Kejẽn Topẽ kuprĩg tóg ù krĩn tĩ, kỹ tóg Topẽ vĩ tó mũ sir. Ën to é he tũg nĩ. ²¹ Û tỹ ãjag mỹ vĩn kỹ to: “vẽnh vĩ há mỹ’?” hemnĩ. Ti tỹ tỹ ãjag mỹ vẽn vĩ há nĩn kỹ jẽmẽmnĩ. ²² Ti há tũ nĩn kỹ jẽmẽ tũg nĩ, ãjag tỹ nén ù kórég han tũg jé. Nén ù kórég han sór tũg nĩ.

²³ Topẽ vỹ ãjag krĩ kuprãg tĩ. Ti mỹ sóg to vĩ tĩ, ti tỹ ãjag tar han jé, ãjag tỹ tỹ ti tũ nỹtĩ to tar nỹtĩ jé. Ti mỹ sóg to vĩ tĩ gé, ti tỹ ãjag tỹ kygnẽ kamẽg jé, ti tỹ ãjag jykre há han jé, ãjag fe ti ke gé, ãjag krĩ ti ke gé. ãg Senhor tỹ Jesus Cristo kãtĩg mãn kỹ tóg ãg jykre tũgnỹm ke mũ sir, há jé tóg ãg jykre há han sór mũ. ²⁴ Û tỹ ãg kuprẽg mũ vỹ ãg jykre há han sór mũ, há vỹ: Topẽ, he mũ. Fagrĩnh mỹ vỹ vanh ti nĩgtĩ.

²⁵ Inh kanhkã', iso Topẽ mré vĩmnĩ gé. ²⁶ Jagnẽ ki nhun ke ri ke han nĩ, Jesus mré ke kar ki, jagnẽ nĩgẽ kãgmĩ kỹ. ²⁷ ãg Senhor rĩnve sóg ãjag mỹ tag tó mũ, ha mẽ. “Jesus ki ge kỹ nỹtĩ kar ag tỹ isỹ nén rán mũ tag mẽ kãn ke vẽ,” he sóg mũ mỹr. Há kỹ sóg: “ag kar mỹ to kemnĩ,” he mũ. ²⁸ ãg Senhor tỹ Jesus Cristo mỹ sóg to vĩ tĩ, ti tỹ ãjag tar han jé.

Hã vẽ.

PAULO TỠ CARTA HAN: TESSALÔNICA TÁ KE AG MỠ CARTA Û

¹ Paulo tỠ rá vễ. IsỠ cidade tỠ Tessalônica t'a ke ag mỠ rán hã vễ. Tessalônica tá ajag tóg Topễ vớ mẽ jẻ vễnhmãn tỡ. Topễ tũ vỠ tỠ ajag nỠtỡ, ẻg jóg mág ti. Jesus Cristo tũ vỠ tỠ ajag nỠtỡ gẻ, ẻg Senhor ti. SỠ ajag mỠ vễnh rá jẻnẻ vễ. KỠ Silas vỠ jẻnẻg mũ gẻ inh mrẻ, Timóteo ke gẻ. ² ẻg jóg tỠ Topễ mỠ sóg to vớ tỡ, ti tỠ ajag tar han jẻ, ti tỠ ajag krỡ kuprẻg jẻ gẻ. ẻg Senhor tỠ Jesus Cristo mỠ sóg tag to vớ tỡ gẻ.

Cristo tỠ ù tỠ ẻg vóg kónãn mũ ag vóg kónãn ke

³ Inh kanhkỏ', isỠ kurỏ kar ki ajag to Topễ mrẻ vớ vễ, ajag to sóg ti mỠ vớ há han tỡ. Ajag jykre tóg inh mỠ sér tỡ. Ajag hã ne tóg ti vớ to tar tỏvớ nỠtỡ', kri fi kỠ. Jagnẻ mrẻ ajag tóg há tỏvớ nỠtỡ gẻ, ajag kar ti. Hã kỠ sóg Topễ mỠ vớ há han tỡ, ajag to. ⁴ Hã kỠ sóg Topễ tũ kar ag mỠ ajag tóg tỡ, ẻg vễnhmãn kỠ. “Ti vớ kri fi to ag tar nỠtỡ, ag tỠ ag vóg kónãn mũ ra,” he sóg tỡ ajag to. “Ag jagỏgtar mũ ra ag tóg ti to tar nỠtỡ,” he sóg tỡ. IsỠ tag tóg inh mỠ sér tỏvớ tỡ. ⁵ Hã tugrỡn ẻg tóg Topễ jykre kuryj ki kanhrỏ nỠtỡ, ajag tỠ ti tovỏnh tũ nỡn kỠ. KỠ ti tỠ nẻn han mũ vỠ kugryj kar nỠtỡ, ti tỠ nẻn tóg mũ kar ke gẻ. Jagtar ajag tóg mũ, hã ra ajag tóg ti tovỏnh tũ nỡgtỡ. Ti tỠ tỠ ẻg pỏ'i nỡ ve jẻ ajag tóg ke mũ, kanhkỏ tá krỠg he jẻ ajag tóg ke mũ, ti tugnỡn, ha vemnỡ. Hã kỠ ajag tóg sir ti tugrỡn jagtar mũ sir. ⁶ Ha vé, ù tỠ ajag jagỏgtar han mũ ẻn jagỏgtar han jẻ tóg ke mũ gẻ, vễnh kaja jẻ, Topễ ti. Hã ki ẻg tóg ti jykre kuryj ki kanhrỏn mũ sir. Tag to jykren. ⁷ Ag jỏvo tóg ajag tar han mũ sir, ajag jagtar mũ hã ra, kỠ tóg sir ajag jagỏgtar tỠ tũg' he mũ gẻ sir, ẻg kar mỠ, ẻg Senhor tỠ Jesus Cristo tỠ kanhkỏ tá kỏtỡg kỠ. Kanhkỏ tỏn ag mrẻ tóg kỏtỡg ke mũ, kỠ ẻg tóg ti venh mũ sir. ⁸ TỠ tóg pi gru ve kỏtỡg ke mũ. KỠ tóg ù tỠ Topễ ki kanhrỏn jỏvỏnh ag vóg kónãn ke mũ sir, vễnh kaja jẻ, ù tỠ ẻg Senhor tỠ Jesus vớ sér mranh mũ ẻn ag. ⁹ Ag vóg kónãn jẻ tóg ke mũ, kỠ ag vẻsỠrẻnh vỠ tũ' hẻnh ke tũ nỡ. ẻg Senhor mrẻ ag nỠtỡnh ke tũ nỡ sir. Ti jykre há ẻn venh ke tũ ag nỡ, ti tỠ tỠ pỏ'i mág pẻ nỡ ẻn ti, ùn mág tỏvớ ẻn.

¹⁰ ỏ kỏtỡg kỠ tóg ag vóg ag vóg kónãn ke mũ. KỠ tóg vỏhỏ ỏ tũ ag tỠ ùn mág han ke mũ sir. KỠ vễnh kar tóg ẻg tugrỡn ti jykre ve kỏn ke mũ, ẻg tỠ ti ki ge kỠ nỠtỡn kỠ. Ajag hã tóg inh vớ kri fi, sỠ ajag mỠ ti vớ tón kỠ. Hã kỠ ajag tóg kurỏ ẻn venh ke mũ. ¹¹ Hã jẻ sóg ajag to Topễ mrẻ vớ tỡ, kurỏ kar ki. Ti mỠ sóg: “ag tar han nỡ,” he tỡ. “Nẻn ù há han sỏr ag tóg mũ, ỏ ki ge kỠ nỠtỡ ag, ỏ jykre han sỏr ag tóg mũ, kỠ ag tar han nỡ, ag tỠ kygnẻg tũ nỡ jẻ. Ag kuprẻg ỏ tóg, ag tỠ kurỏ ẻn ve jẻ, kỠ ag tar han nỡ, ag tỠ kurỏ ẻn tá krỠg jẻ,” he sóg tỡ (mỠr), Topễ mỠ. ¹² Ti tỠ ajag kri tỠ ùn mág nỡ jẻ, hã jẻ sóg ti mỠ tóg mũ. Ti tỠ ẻg kri tỠ ùn mág nỡn kỠ tóg ẻg tỠ ùn mág han mũ gẻ. Topễ tỠ ẻg mỠ ỏ tỠ nẻn ù há nỡm ẻn hã vễ, ẻg Senhor tỠ Jesus Cristo tỠ ke gẻ.

2

Jesus kato tẻ mág mũ ẻn tỠ vễnh ke

¹ Inh kanhkỏ', sỠ ajag jyvẻn há tóg tỡ sir. Kỏnhmar ti kỏtỡg mũ, ẻg Senhor tỠ Jesus Cristo ti, kỠ ẻg tóg vễnh mỏn mũ, ti tỠ ẻg gẻ(g) tỡg jẻ sir. KỠ ẻg tóg ti mrẻ nỠtỡ. ² Ha ra tóg ver kỏr gy sỡ tỡ, kuvar gy sỡ ti nỡ ver. KỠ ù tỠ ajag mỠ: “Topễ kuprỡg tóg inh mỠ: ùri ke vễ, hẻ,” he mũ ra kri fi tũg nỡ, ajag fe tỠ jủrủn ke tũg nỡ. ù tỠ ajag mỠ: “Paulo vỠ inh mỠ tóg, kỠ tóg: ùri ke vễ, hẻ,” he mũ ra kri nỡm tũg nỡ gẻ. ù tỠ ajag mỠ vễnh rá ven mũ ra, to: “Paulo tỠ rá vễ mỠr,” he mũ ra kri fi tũg nỡ gẻ. ³ Ag jykre tugnỠm ra, ù tỠ ajag krỡn kónãn sỏr mũ ag. ùri ke tũ vẻ ver, ti kỏtỡg ke ti. ù tỠ hẻn ri ke ag vỠ ti tovỏnh ke mũ ver, ti kỏtỡg ke to hã. Ti kato tẻgtẻ jẻ ag tóg ke mũ ver. KỠ ù tóg ver vễnh ven ke mũ gẻ, hã vỠ: ù tỠ Topễ vớ mranh tỡ ẻn, he mũ, ù tỠ nủgme ki kutẻnh ke mũ ẻn ti, he mũ. ⁴ Ti ve pẻ vễ, Topễ vớ mranh mũ ti, hã kỠ Topễ vỠ nủgme ki ti fỏn ke mũ. ẻn vỠ tóg Topễ kato tẻnh ke mũ ver, vễnh kỏggrỏ tỠ topễ kato ke gẻ. Nẻn kar to: topễ, he mũ kar kato tóg tẻnh ke mũ ver. “Topễ kar kỏfỏr vỠ tỠ inh nỡ,” he jẻ tóg ke mũ. KỠ tóg vỏhỏ sir Jerusalem tá Topễ ìn krẻm

rãnh mũ, Topê nĩg ja ẽn tá tóg nĩnh mũ, kũ tóg v̄eso: “tỹ sóg Topê nĩ,” henh ke mũ, ỏn kũ.

⁵ Isỹ ăjag mr̄e nĩn kũ sóg ăjag mỹ tag tó ja nĩ. Mĩ êkr̄en nĩ, sỹ ăjag mỹ tó ja ẽn ti. ⁶ Mĩ êkr̄en kũ ăjag tóg ki kanhr̄ó nỹtĩ sir, ũ tỹ ver ti ki rĩr mũ ẽn ki. Ti kũ ti ki rĩr nĩn kũ tóg ver v̄enh ven tũ nĩ, ũ tỹ ỏn kũ: “tỹ sóg Topê nĩ,” he mũ ẽn ti. Ti kur̄a ki tóg v̄enh ven ke mũ sir v̄ahã. ⁷ Ũri ũ tỹ h̄en ri ke ag tóg v̄enh jykre p̄ano han mũgtĩ, Topê vĩ mranh kũ. Hã ra ag tóg ver v̄enh pigju kũ han tĩ, kũ ẽg tóg ve hã han tũ nĩ, ag jykre p̄ano ti. Kũ ũ tỹ ỏn kũ: “tỹ sóg Topê nĩ,” he mũ ẽn tóg v̄enh ven tũ nĩ gé ver. ũ tỹ ti ki rĩr nĩ ẽn tóg ver ti ki rĩr mũ, ti v̄enh ven tũ nĩ jé ver.

⁸ Ti tỹ ti ki rĩr tov̄anh kũ tóg v̄enh ven ke mũ sir v̄ahã, ũn jykre p̄ano ẽn ti. Hã ra ẽg Senhor tỹ Jesus vỹ ti tén ke mũ, ă j̄enger tỹ. Kũ tóg ti tỹ tũ' he mũ sir, ă v̄enh ven ti kũ, Jesus ti. Ă jun kũ tóg ti tỹ tũ' he mũ. ⁹ Hã ra ũn jykre p̄ano ẽn vỹ tóg Satanás jykre han mũ, Nén-Kórég tỹ ti kr̄ĩn kũ. Kũ tóg ỏn kũ v̄enh jykre tar hyn han mũ, ẽg tỹ n̄en han v̄anh ẽn (mỹr). Kujá ag jykre ri ke han jé tóg ke mũ. ¹⁰ V̄enh kar lograr he jé tóg ke mũ gé. Jykre kuryj nĩ ve tóg nĩnh mũ, hã ra tóg p̄ano nỹ. Kũ ũ tỹ nũgme ki v̄ar ke mũ ag vỹ ti vỹ kri fi k̄an ke mũ, ag tỹ Topê vĩ kri fig tũ nỹtĩn kũ. V̄enh vĩ há to ag tóg há tũ nỹtĩ, hã kũ ag tóg krenkren ke tũ nĩ. Hã kũ ag tóg ki rom ke mũ sir, nũgmen ki, infernon ki. ¹¹ Hã jé Topê tóg ag mỹ v̄enh ó j̄en̄enh ke mũ, ỏn kũ v̄enh jykre ẽn ti, ag tỹ v̄enh ó ẽn kri fi jé, ag tỹ kri nĩm sór nỹtĩn kũ. ¹² Topê tỹ ag jykre tugnỹm kũ tóg nũgme ki ag v̄am ke mũ. V̄enh vĩ há kri fi j̄av̄anh ag tóg nỹtĩ (mỹr). V̄enh jykre p̄ano há to ag tóg hã t̄avĩ nỹtĩ (mỹr), hã kũ tóg ag v̄am ke mũ, nũgme ki, Topê ti.

Topê tỹ ẽg kupr̄eg, ẽg krenkren jé

¹³ J̄avo sóg ăjag to Topê mr̄e vĩ há han tĩ, kur̄a kar ki (mỹr). Tỹ ăjag tóg Jesus mr̄e ke nỹtĩ, ẽg Senhor mr̄e ke ag. Kũ tóg ăjag to há t̄avĩ nĩ. Topê vỹ ăjag kupr̄eg, n̄en kar há(r) ven ki, ăjag krenkren jé, nũgme to, inferno to. Ă kupr̄ig tỹ tóg ăjag tỹ ă tũ han ja nĩ. Ăjag tỹ tag ve jé ăjag tóg ti vĩ kri fig mũ, v̄enh vĩ há ẽn kri. ¹⁴ Isỹ ăjag mỹ Jesus vĩ tón kũ Topê vỹ ăjag kupr̄eg, ăjag tỹ ẽg Senhor tỹ Jesus Cristo mr̄e tỹ ũn mág nỹtĩ jé.

¹⁵ Inh kanhk̄a', tar nỹtĩmnĩ, sỹ ăjag kanhr̄an to, ăjag kũ ti króm jé. Isỹ ăjag mỹ Jesus jykre tó mũ ẽn to tar nỹtĩmnĩ, sỹ ăjag mỹ n̄en rán mũ tag to ke gé. ¹⁶ Ẽg Senhor tỹ Jesus Cristo hã vỹ ẽg to há t̄avĩ nĩ, ẽg jóg tỹ Topê ke gé. Kũ tóg ẽg kr̄ĩ kupr̄ag mũ sir, ẽg tỹ to krónh ke tũ nĩn jé. Ti hã ne tóg ẽg mỹ ă tỹ n̄en ũ há ẽn ven ke mũ. Hã ve sór ẽg tóg mũ. ¹⁷ Ti mỹ sóg to vĩ tĩ, ti tỹ ăjag fe tỹ há' he jé, ti tỹ ăjag tỹ n̄en ũ há han jé, ăjag tỹ ki hã k̄am̄en jé ke gé.

3

Topê tỹ ẽg jy nĩḡan

¹ Inh kanhk̄a', v̄ahã sóg ăjag mỹ n̄en ũ to vĩ mũ gé. Iso Topê mr̄e vĩmnĩ, ẽg Senhor vỹ tỹ v̄enh kar kri r̄um ke jé, k̄anhmar (mỹr), v̄enh kar tỹ ti vĩ to há nỹtĩ jé ke gé, ti mỹ vĩ há han jé (mỹr), ag tỹ ăjag ri ke nỹtĩ jé. ² Ti mỹ to vĩmnĩ, ti tỹ iyy nĩḡan jé, v̄enh jykre p̄ano han mũ ag jo, ũn jykre p̄ano ag jo ke gé. ũ ag tóg Jesus ki ge j̄av̄anh nỹtĩ, hã kũ ag tóg iso kórég nỹtĩ sir.

³ Hã ra ẽg Senhor vỹ ă tỹ n̄en tó ja ẽn han ke mũ. Ăjag tar han jé tóg ke mũ. Ăjag jy nĩḡan jé tóg ke mũ gé, Japo jo, Nén-Kórég ẽn jo. ⁴ Ăjag h̄yn inh vĩ han ke mũ, kũ tóg inh mỹ há tĩ. Topê vỹ ăjag kr̄ĩn ke mũ, ăjag tỹ sỹ ăjag mỹ n̄en tó mũ ẽn ki króm jé. Ki króm ăjag tóg mũ (mỹr), kũ ăjag tóg to krónh kenh ke tũ nĩ sir. ⁵ Ẽg Senhor je ăjag kr̄ĩn, ăjag tỹ ti to há nỹtĩ jé, ti tỹ ẽg to há ri ke. Ti jé ăjag kr̄ĩn, ăjag tar nỹtĩ jé, ăjag jaḡagtar hã ra. Cristo vỹ ge ja nĩ gé. Kũ ti nón gemnĩ.

Ẽg tỹ v̄enh r̄anh̄r̄aj to tar nỹtĩnh ke

⁶ Inh kanhk̄a', v̄ahã sóg ăjag jyv̄en mũ gé sir, ăjag jyv̄en tar han sóg mũ gé. Ẽg Senhor tỹ Jesus Cristo jykre tỹ sóg ăjag mỹ tag tó mũ, ha mẽ: Jesus mr̄e ke ũ ag tóg v̄enhmỹ mẽ

han sór nýtí. Inh ví mranh sór ag nýtí, sý ājag mý nén tó ja ěn ti. Ěn mré ví mǎn tūg nǐ. ⁷ Sý ājag mré nǐn ký sóg vĕnhmý mĕ han ja tū nǐ. Tag ve ājag (mýr), ký ājag tóg inh kóm han ki kanhrǎn ke mǔ. ⁸ Fagrǐnh mý sóg ājag mré rǎgró ko ja tū nǐgtí (mýr). Kajǎm ja sóg nǐgtí (mýr), sý ājag mré nén ko ja ti. Kuty kar ki sóg rǎnrǎj ja nǐgtí, kurǎ kar ki ke gé. Ký sóg inh rǎnrǎj to ron mág ja nǐgtí. Sý ājag tū kagrǎg tū nǐ jé, hǎ jé sóg rǎnrǎj mág ja nǐgtí. Hǎ ve ājag mýr. ⁹ Sý ājag tū konh ke vĕ vĕ, hǎ ra sóg ājag tý nén han ke mǔ ěn han sór ja nǐgtí ājag mý, ājag tý to ki kanhrǎn jé, ājag tý inh kóm han jé sir inh nón. ¹⁰ Isý ver ājag mré nǐn ký sóg ājag mý tag tó ja nǐ gé, ha mĕ: “ǔn rǎnrǎj vǎnh ěn vý ne konh ke tū nǐ,” he ja sóg nǐgtí ājag mý. ¹¹ Ājag kǎmǐ ũ ag nĕji tag han vǎnh nýtí. Rǎnrǎj vǎnh ag nĕji nýtí, hǎ ra ag nĕji vĕnh kar to ví ví he tí. ¹² Ěn jyvĕn sór sóg nǐ, ěg Senhor tý Jesus Cristo jykre tý. Ag jyvĕn tar han jé sóg ke mǔ, ha mĕ: “rǎnrǎj ra, jatun mý. Ājag tū hǎ ko ra, ājag rǎgró ti. ũ jĕn ko tūg ra,” he sóg mǔ sir ājag mý.

¹³ Inh kanhkǎ', nén ũ há tǎví han kǎn sórmnǐ. To krónh ke tūg nǐ. ¹⁴ Hĕn ri ke mǔn ũ tóg isý rá tag kri finh ke tū nǐ. Ěn jykre vég nǐmnǐ, ký ti mré vĕmén tūg nǐ, ti mý'ǎg jé sir, ti tý to jykrén mǎn jé. ¹⁵ Hǎ ra ti kato vǎsǎn tūg nǐ, ti to kry nǐ tūg nǐ. Jesus mré ke vĕ mýr, ký ti jyvĕn nǐ, ti tý to jykrén mǎn jé.

¹⁶ Ha mĕ, ěg Senhor mý sóg to ví tí, ti tý ājag krǐ kuprǎg jé, ājag jagtar hǎ ra. Ti hǎ ne tóg ěg krǐ kuprǎg tí'. Ěg Senhor jé ājag mré nǐgtí.

¹⁷ Sý vǎhǎ vĕsóg ki ājag mý rán vĕ, ũ tý inh ví rán ja pǎte, inh hǎ vý Paulo nǐ. Isý rán mǔn hǎ vĕ. Ge inh nǐgtí, isý ũ mý vĕnh rá jĕnĕn ký.

¹⁸ Ěg Senhor tý Jesus Cristo mý sóg to ví tí, ti tý ājag tar han jé.
Hǎ vĕ.

PAULO TỠ CARTA HAN: TIMÓTEO MỠ CARTA VE

¹ Paulo tỠ rá vễ. Topễ ne inh kuprễg ja nỉ', ễg kren han tĩ ti. IsỠ tỠ Jesus Cristo apóstolo jễ jẻ tóg inh fễg ja nỉ. Ti hã ve sỏr ễg tóg mữ, Jesus Cristo ti.

² IsỠ inh kỏsin tỠ Timóteo mỠ rán hã vễ. TỠ ã inh kỏsin pễ ri ke nỉ, ã tỠ isugrĩn Topễ vỉ kri fin kỠ.

Ễg jóg tỠ Topễ mỠ sỏg to vỉ tĩ, ti tỠ ã tar han jẻ, ti tỠ ã jagãgtãn jẻ, ti tỠ ã krỉ kuprã han jẻ, ễg Senhor tỠ Jesus Cristo ti ke gẻ.

Ễg tỠ vừmỠ vễnh vỉ jễmẻ sỏr ke tữ

³ IsỠ cidade tỠ Éfeso tá kãkutẻ kỠ ga tỠ Macedônia ra tĩg kỠ sỏg ã mỠ to vỉ, ã tỠ ver Éfeso tá ke ag ki rỉr jẻ. ã mỠ sỏg tỏ, ã tỠ tá nỹtỉ ag jyvẻn jẻ. Ón kỠ ag tóg Topễ jykre kãmẻn sỏr tĩ. Tag to ag mỠ: “han tũg nỉ,” hemnỉ. ⁴ Topễ jykre tovãnh kỠ ag tóg vừmỠ nẻn ù ù to jykẻn sỏr mữ, hã vỠ: kanhkã tãn tỠ ó, he mữ, kar ag tóg gủã ag jiji tỏ sỏr mữ gẻ. Ag tỠ nẻn tỏ mữ ẻn tỏ kãn ke tữ ễg tóg nỉ. Tag to jagnẻ vỉ kafãn mữ vỠ kutẻ tĩ. Ễg pi(jẻ) tag tỠ Topễ jykre han tĩ'. Topễ jykẻn hã vễ, hã vỠ: vễnh kar tỠ ti ki rã, he mữ.

⁵ Ễg tỠ Topễ jykre han kỠ ễg tóg jagnẻ to há tãvỉ nỹtỉ, ễg fe kar tỠ, kỠ ễg tóg jagnẻ mỠ vễnh jykre pir han tĩ gẻ, ti ki rã há han jẻ ễg tóg ke mữ gẻ. ⁶ Tá ke ù ag tóg vễnh jykre há tag togvãnh, kỠ ag tóg vẻkẻ vẻmẻn mữ nỉ ha. Ag tỠ kygnẻn hã vễ. ⁷ Topễ tỠ vãsỠ ễg jyvẻn tĩ ẻn tỠ ag tóg ãjag kanhrãn sỏr tĩ, ag tỠ ki kagtĩg (hã) ra. Ón kỠ ag tóg tỏ tĩ, ag tỠ ki kagtĩg nỹtĩn kỠ. Topễ vỉ kãmẻn sỏr ag tóg tĩ, to ag tóg: “tag to ke vẻ,” he tĩ, ag tỠ ki kagtĩg nỹtĩn kỠ.

⁸ Ag jãvo ễg tóg ki kanhrỏ nỹtỉ, Topễ tỠ vãsỠ ễg jyvẻn tĩ ẻn há nỉ ti. Ễg tỠ to jykẻn há han kỠ ễg tóg ti há nỉ vẻg tĩ. ⁹ Topễ pi(jẻ) ù tỠ ti vỉ ki krỏm mữ ag tigrĩn ễg jyvẻn ja nĩgtỉ'. ù tỠ vễnh jykre kuryj han vãnh ẻn ag tugnỉn ken hã vễ, ù tỠ ti vỉ han sỏr tữ ag tigrĩn, ù tỠ Topễ to é he mữ ag tigrĩn, ù tỠ ti vỉ mranh mữ ag tigrĩn, ù tỠ ti ki kanhrãn sỏr vãnh ag tugnỉn, ù tỠ vễnh jykre pãno han mữ ag tigrĩn ke gẻ. ù tỠ ge ag vỠ ãjag panh tẻn tĩ, ãjag mỠnh tẻn ag tóg tĩ, jagnẻ kãgtẻn ag tóg tĩ, ¹⁰ ãjag prũ tũ fag mrẻ ag tóg nỹ tĩ, ãjag mẻn tũ ag mrẻ fag tóg nỹ tĩ, jagnẻ ki vỠn ke ag tóg tĩ, jagnẻ vẻne he ag tóg tĩ, jagnẻ mỠ ag tóg ón tĩ, jagnẻ to ag tóg ón tĩ gẻ, vễnh jykre pãno kar han ag tóg tĩ, Topễ tỠ nẻn ù to: “kỏrẻg ti nỉ,” he mữ ẻn han kãn ag tóg tĩ. ¹¹ ù tỠ tag han mữ tugnỉn tóg ễg jyvẻn ja nỉ, Topễ ti, ễg tỠ han tũg jẻ. Ti hã vỠ ễg mỠ vễnh vỉ sér tỏ ja nĩgtỉ', ti hã vỠ inh mỠ to: “ha vễnh kar mỠ tỏnh tĩg,” he ja nỉ'. Topễ hã ne ã pir mỠ há nỉ'. Jãvo ag tóg ti vỉ tag kato tẻ tĩ.

Topễ tỠ ễg jagãgtãn sỏr

¹² Ễg Senhor tỠ Jesus Cristo ne isar han tĩ', hã kỠ sỏg ti hã mỠ vỉ há han tĩ. Ti hã ne iso jykẻn kỠ inh kuprễg', sỠ ti rãnhrãj han jẻ, kỠ tóg vẻg mữ, sỠ to tar nỉ ti, ti tỠ isar han kỠ. ¹³ SỠ tá krỠg ke tũ vẻ vẻ, isỠ ti rãnhrãj han jẻ. VãsỠ sỏg ti mỠ vỉ kỏnãn ja nĩgtỉ, ti vóg kỏnãn ja sỏg nĩgtỉ, ti to jũ pẻ han ja sỏg nĩgtỉ gẻ. Hã ra sỏg ti ki kagtĩg nỉ ja nĩgtỉ, kỠ sỏg ti ki rã sỏr ja tũ nĩgtỉ gẻ. Hã kỠ tóg inh jagãgtãn, sỠ ti ki rã jẻ. ¹⁴ Inh jagãgtãn há tãvỉ han tóg, ễg Senhor ti, hã kỠ sỏg ti ki rã há han, kỠ sỏg ti to há tãvỉ nỉ gẻ, Jesus Cristo to.

¹⁵ Tag vỠ tỠ vễnh vỉ há nỉ, ha mẽ, kỠ vễnh kar tỠ tag to há nỹtỉ ran jẻ há tĩ vẻ, hã vỠ: Jesus Cristo vỠ ga kri mur, ti tỠ Topễ vỉ mranh tĩ ag kren han jẻ, he mữ. Topễ vỉ mranh tĩ ag kar kỏrẻg kãfỏr vỠ tỠ inh nỉ. ¹⁶ Hã kỠ tóg inh jagãgtãn ja nỉ gẻ. Jesus Cristo tỠ vễnh kar mỠ ven sỏr vẻ, ti tỠ Topễ vỉ mranh tĩ ag jagãgtãn sỏr mữ ti. Hã kỠ tóg inh jagãgtãn, sỠ ù tỠ ti vỉ mranh mữ ag kãfỏr han ja hã ra. KỠ vễnh kar tóg inh ve kỠ Topễ tỠ ag to há ki kanhrỏ nỹtĩn mữ. Vễnh kar vỠ ễg rỉr krỠg ja tũ venh ke mữ, ễg tỠ ti ki ge kỠ.

¹⁷ Topễ hã ne ã pir mỠ tỠ pã'i mág nỉ'. ã tỠ nẻn kar han to tóg nỉ nỉ, kỠ tóg ter ke tũ nỉ gẻ. Ti vẻg tũ ễg tóg nĩgtỉ. ã pir mỠ tóg tỠ Topễ nỉ. KỠ ễg tóg ti hã mỠ vỉ há han ke mữ, ti to ke gẻ. Ti mỠ vỉ há han ke tag tóg tũg' henh ke tũ nỉ gẻ. Amẻm.

Timóteo rãnrãj

¹⁸ Timóteo', inh kósin vỹ tỹ ã nĩ. Sỹ ã mỹ ã rãnrãj tag nĩm vễ. Vãsỹ ã tóg mẽ ja nĩ, Topẽ vỹ tó tĩ ag tỹ ã to nén tó ja ti. Kỹ ag vỹ mĩ êkré. Soldado tỹ ã rãnrãj to vãsã ri ke han kỹ ã jẽ nĩ, Topẽ vỹ tó kỹ. Topẽ vỹ tó tĩ ag vỹ ã tar han ke mũ, ã tỹ ã rãnrãj to vãsã há han jé. ¹⁹ Ti ki rã to krónh ke tũg nĩ. Æ fe kavénh sór tũg nĩ. Æ ag tóg ãjag fe kavénh ja nĩgtĩ. Hã ra ag tóg kykũnh sór ja tũ nĩgtĩ, ag fe kavéj ti. Hã kỹ ag tóg ti ki rã kỹ tĩ tovãnh tĩ, kỹ tóg êg barco tỹ goj ki pun ke ri ke nĩ. ²⁰ Ag kãmĩ ù vỹ tỹ Himeneu nĩ, Alexandre ti ke gé. Topẽ to é he ag tóg mũ ha ùri, hã kỹ sóg Satanás mỹ ag vin, ti tỹ ag vóg kónã jé. Satanás tỹ ag vóg kónã tigrĩn ag hỹn ki kanhrãn ke mũ, êg tỹ Topẽ to é henh ke tũ ti.

2

Igreja krêm vênh jykre

¹ Æ tỹ ã tũ ag jyvên kỹ ag mỹ ag tỹ Topẽ mré vémén ke hã tómnĩ. Ag mỹ: “Topẽ mré vémén e han nĩ,” hemnĩ. “Ti mỹ nén ù kar to vĩmnĩ, vênh kar jagfy vĩmnĩ, ti mré, ti mỹ nén ù kar to: “há ti nĩ,” hemnĩ gé,” hemnĩ ag mỹ. ² Pã'i mág ag jagfy Topẽ mré vĩmnĩ gé, pã'i kar ag to ke gé. Kỹ ag tóg jatu nỹtĩ. Kỹ êg tóg jatun mỹ ag krêm nỹtĩn kỹ êg rãnrãj nón mũnh ke mũ gé, êg tỹ Topẽ to há nỹtĩn kỹ, êg tỹ jagnẽ to há nỹtĩn kỹ ke gé. ³ Topẽ mỹ tóg há nĩ, tag ti, ù tỹ êg kren han tĩ ti mỹ, ti mỹ tóg sér tĩ. ⁴ Ti tỹ tag han sór vễ, ha mẽ: êprã ke ag krenkren han sór tóg mũ, vênh kar tỹ ti tỹ ki hã tó mũ tag mẽ han kãn jé. ⁵ Pir ti nĩ, Topẽ ti. Pir ti nĩ gé, ù tỹ Topẽ mré êg jagfy vỹ mũ ti, hã vỹ: êg mré ke tỹ Jesus Cristo, he mũ, ù tỹ êg ri ke mur ja ên ti. ⁶ Ti hã ne vênh fêg', ti tỹ vênh kar kygãm jé. Topẽ tỹ ti mỹ kurã nĩm ên kã ke ja vễ. Kỹ vênh kar vỹ mênh ke mũ, ù tỹ ve ja ag vỹ ti. ⁷ Hã kỹ tóg inh mỹ: “ha vênh kar mỹ tónh tũg,” he ja nĩ. Sỹ tỹ ti apóstolo jẽ jé tóg inh kuprêg, hã kỹ sóg tó mũ. Ki hã sóg tó mũ. Inh pi(jé) ón mũ'. Fóg ag to tóg inh jênẽ, kanhgág ag to ke gé, sỹ ag mỹ vênh vỹ há tó jé, ag tỹ Topẽ ki ge jé gé.

⁸ Kỹ tá Jesus ki ge kỹ nỹtĩ ag mỹ tómnĩ, ag kar tỹ igreja krêm Topẽ mré vémén jé. Hã ra tóg há tũ nĩ, ù tỹ ã jykre pãno tovãnh sór tũ nĩn kỹ, ti tỹ Topẽ mré vémén mũ (hã) ra. Ag tỹ Topẽ mré vémén kỹ ag tóg ãjag jũ tovãnh ke mũ, ag tỹ ùn kato tẽ mũ ag tovãnh jé ag tóg ke mũ gé. Tag tómnĩ ag mỹ.

⁹⁻¹⁰ Kỹ ùn tỹtã fag vỹ ge nỹtĩnh mũ gé, ãjag tỹ vênh mãn kỹ nỹtĩn kỹ. Fag sĩnvĩ han jafã vỹ tỹ fag jykre kuryj nĩ. Fag tũ hã vễ. Tag han kỹ êg tóg vég mũ, fag tỹ Topẽ to há nỹtĩ ti. Kur to mỹ'ãg tĩ ra rãnh ke tũ fag nĩ hã ra. Fag tỹ ãjag kur tỹ vễsĩ tãvĩ han tĩ to ken hã vễ, fag gãnh to ke gé. Pi(jé) há nĩ', fag tỹ brinco mág tỹ vễso vin kỹ, jãnka e tỹ vễso sa kỹ, kur kaja e tu kỹ, fag tỹ nén kar kaja e génh kỹ tóg há tũ nĩ, fag tỹ tỹ vễsĩ tãvĩ han kỹ. Fag kur há vỹ há nĩ, kur sĩnvĩ ti.

¹¹ Æjag tỹ vênh mãn kỹ nỹtĩn kỹ fag vỹ vĩnh ke tũ nĩ. Mẽ tãvĩ han jé fag tóg ke mũ, fag tỹ tỹ ag krêm ke nỹtĩn kỹ. ¹² Fag tỹ ag mỹ vênh jykre nĩm kỹ tóg há tũ nĩ. Fi tỹ fi mén krĩn sór nĩn kỹ tóg kórég nĩ gé. Fag tỹ êmẽ kã nỹtĩn kỹ tóg há tĩ. ¹³ Tag to jykren nĩ, ha mẽ. Topẽ tỹ ùn han vén mũ vỹ tỹ Adão nĩ, kar kỹ Eva fi. Ti tỹ tỹ fi kri ke to ken hã vễ. ¹⁴ Kỹ Japo tỹ ùn krĩn kónãn mũ fi vỹ tỹ fi nĩ ja nĩgtĩ. Adão pijé'. Fi hã ne Topẽ vỹ mranh vén', kỹ tóg fi nón mranh ja nĩgtĩ gé, Adão ti. Hã kỹ tóg há tũ nĩ, fag tỹ ag krĩn sór kỹ. ¹⁵ Hã ra fag krenkren ke mũ gé, fag krê mré hã. Kỹ tóg há nĩ, fag tỹ Jesus tovãnh sór tũ nỹtĩn kỹ, fag tỹ ti to há nỹtĩn kỹ, jagnẽ to há ke gé, fag tỹ tỹ ti tũ nỹtĩn kỹ. Fag krĩ há nỹtĩn kỹ tóg há tĩ.

3

Igreja to pã'i mág

¹ Sỹ ke há vễ, ha mẽ. Æ tỹ igreja to tỹ pã'i mág nĩ sór kỹ tóg vênh rãnrãj mág han ke mũ. ² Hã ra igreja to pã'i mág vỹ ge jênh mũ, sỹ ã mỹ ti jykre kãmén ke vễ, ha mẽ. Æ tỹ kygnẽ tũ vỹ há nĩ, ù tỹ prũ pir han kỹ nĩ, ù tỹ nén ù há to jykren mũ, ù tỹ vễso jykren mũ, ù tỹ kór há tá ke ag mỹ: “inh mré nĩnh kãtũg,” he tĩ, ù tỹ ag kanhrãn há han tĩ, ³ ù tỹ vinho kron (ka) mẽ tũ, ù tỹ ã fe tỹ gỹm ke vãnh, ù tỹ vênh kar mỹ komêr hã vỹ tĩ, ù tỹ

věnh kar krī kuprā nī ve sór tī, ũ tỹ rico nī sór vānh, ⁴ ũ tỹ ã ĩn krēm nỹtī fag ki rīr há han tī, ũ tỹ ã krē jyvěnh há han tī, ti krē ag tỹ ti kaměg jé. ⁵ ũ tỹ ã ĩn krēm nỹtī fag ki rīr há han tũ nī tóg igreja krēm ke ag ki rīr há han ke tũ nī gé. ⁶ ũ tỹ Jesus ki rā tǎg tóg tỹ pǎ'i jěnh ke tũ nī ver, ke tũ nī mũ ra tóg inh mỹ ti tỹ: “tỹ sóg ũn mág nī,” henh ha mẽ tī, kỹ tóg inh mỹ ti tỹ Japo jykre han ha mẽ tī, Japo tỹ ti krīn kỹ. Kỹ Topě tóg ti vóg kónān ke mũ. ⁷ Věnh kar tỹ igreja to pǎ'i to vī há han kỹ tóg há tī, ũ tỹ Jesus ki ge tũ ag mré hã. Kỹ tóg mỹ'ǎg ke tũ nī, ti tỹ kygněg tũ nīn kỹ. Kỹ tóg Japo jykre han mǎn sór ke tũ nī gé. Hã kỹ ũn há tǎvī vỹ tỹ pǎ'i jěnh mũ.

Igreja to pǎ'i kāsir

⁸ Kỹ igreja to pǎ'i kāsir ag vỹ nỹtī gé. ũ tỹ ge ag vỹ věnh jykre há han kỹ nỹtīnh mũ gé, věnh vī pir han kỹ nī, vinho kron mág tũ, nén ũ to én ke tũ, rico nỹtī sór ke tũ. ⁹ Topě vỹ ěg mỹ věnh vī jěně, ěg tỹ ti ki rǎ jé, ěg tỹ ti vī tag to krónh ke tũ nỹtī jé, ěg tỹ ěg fe kavěnh tũ nī jé gé. Ag tỹ ti vī tag to tar nỹtīnh ke vē, igreja to pǎ'i kāsir ag. ¹⁰ ũ tỹ Jesus ki rā tǎg nī kỹ tóg ver tỹ pǎ'i nīnh ke tũ nī, ěg tỹ ver ti jykre ven jé. Ti tỹ kygněg tũ nīn kỹ tóg há tī, ti tỹ tỹ pǎ'i nīnh ke ti.

¹¹ Kỹ ag prũ fag vỹ ge nỹtīnh mũ gé. Fag tỹ nén ũ há han kǎn kỹ tóg há tī. Kỹ tóg há tī gé, fag tỹ ũ mỹ vī kónān tũ nīn kỹ, fag tỹ nén ũ há kar to jykrén kỹ, fag tỹ fag rǎnhřaj ki rīr há han kỹ.

¹² Igreja to pǎ'i sī vỹ prũ pir han kỹ nīnh mũ gé, kỹ tóg ã krē kanhrǎn há han ke mũ gé, kỹ tóg ã ĩn krēm nỹtī fag ki rīr há han ke mũ gé. ¹³ ũ tỹ ã rǎnhřaj tag ki rīr há han kỹ tóg tỹ ũn mág jěnh mũ. Jesus Cristo ki rǎ kỹ tóg jěnh mũ, kỹ tóg Topě to kaně jur mǎn ke tũ nī, jatun mỹ tóg nīnh mũ.

Jesus kǎme

¹⁴ Ā mỹ sóg věnh rá tag han mũ, hã ra sóg kǎnhmar ã ve sór mũ. ¹⁵ Hã ra sóg hěn ri ke mũn kǎtīg vānh han ke mũ, kỹ ã tóg Topě jo ĩn krēm věnh jykre ki kanhró nīnh mũ. Hã jé sóg ã mỹ rǎn mũ. Topě vỹ rīr jě. Ti tũ vỹ tỹ ěg nỹtī, ũ tỹ ti ki ge kỹ nỹtī ag. ěg hã vỹ věnh vī há hã tó tī, Topě vī to, věnh kar tỹ mẽ jé. ĩn nũna tugrīn ĩn vỹ tar jě. Jǎvo ěg tugnīn věnh kar vỹ věnh vī há ěn mẽnh ke mũ. ¹⁶ Ha vé, Topě tỹ ũri ěg mỹ nén tó mũ tag vỹ tỹ nén ũ há tǎvī nī. Vǎsỹ ag tóg mẽ ja tũ nī, ěg tỹ ũri mẽg mũ tag ti. Ti jykren hã vē, ha mẽ: Jesus Cristo vỹ ěg ri ke mur, ga kri, kỹ Topě tóg ti tỹ ũn mág han, tá, ti tỹ jykre kuryj nīn kỹ.

Kỹ tóg ã tỹ jěgně jafǎ ag mỹ ti ven, kỹ ti mré mũ tī ag vỹ povo kar mỹ ti tó.

Hã kỹ ga kri mũ ag vỹ ti ki ge mũ, kỹ Topě tóg kanhkǎ tá ti tỹ ũn mág han.

Ěg tỹ Jesus kǎmén hã vē.

4

Ōn kỹ Topě kǎmén tī ág

¹ Ha vé, Topě kuprīg vỹ ěg mỹ nén ũ jagy tó tī, ha mẽ. Jesus kǎtīg mǎn ke tỹ kakó ěn kǎ ũ ag něji ti tovānh ke mũ, ag tỹ věnh ó hã ki rǎ jé, Nén-Kórég ag jykre ki, Japo tỹ ag kanhrǎn mũn ki. ² ũ tỹ Japo mré ke ag vỹ un'ón tī, hã ra ag tóg ag vī jěmě kỹ Jesus tovānh ke mũ. Jykre régre han ag tóg tī, Japo mré ke tag ag. Ājag fe kygvěnh ja ag nỹtīg tī, kỹ ag tóg ki kagtīg nỹtī ha, ag tỹ un'ón mũ ti. “Věnh vī há vē,” he ag tóg tī, věnh ó to. ³ “Prũg tũg ra, mén tũg ra,” he ag tóg tī. “Tag ko tũg ra,” he ag tóg tī gé, Topě tỹ nén han ja to. Ěg tỹ Cristo ki ge há han kỹ, ěg tỹ ti vī kri fi kỹ ěg tóg ti hã mỹ to vī há han ke mũ, vějěn to, kỹ ěg tóg nén kar konh ke mũ. ⁴ Topě tỹ nén han mũ kar vỹ há nī. Kỹ ěg tỹ ti mỹ: “há ti nī, ã tỹ ěg mỹ vějěn tag ven mũ ti,” hen kỹ ěg jatun mỹ konh ke mũ. “Tag konh ke tũ inh nī,” henh ke tũ ěg tóg nī. ⁵ Topě vī vỹ nén kar jǎnhkri han tī, kỹ ěg tóg to Topě mré vēmén tī gé, kỹ ěg tóg jatun mỹ konh ke mũ.

Ěg mré ke kar ag kanhrǎn nī

⁶ Tag kar tómní, ãg mré ke kar ag mý. Ag mý kāmén ký ã tóg Jesus Cristo rānhrāj han há han mū. Topē vī vỹ ã mý tỹ vējēn ri ke nīnh mū, ký ã tóg tỹ tar jē, ã tỹ ti jykre mī tīn ký. Ki kanhró ã tóg nī, Topē jykre ti, ãg tỹ ti ki rā ký nýtī ti. ⁷ Ū tóg vurmý nén ū to jykrén sór tī, tỹ vēnh ó han ký, Topē vī ki rán ký nī tū ēn. Tag jēmē sór tūg nī. Vēnh jykre kuryj hā mī tīg nī, tag hā to tar nīmni. ⁸ Kejēn ãg tóg vākrég tī. ãg tỹ vākre to tar nýtīn ký tóg há sī nī. ãg tỹ jāvo vēnh jykre kuryj kar to tar nýtī tag vỹ há tāvī nī sir. Tag to ãg tóg tag mī mū há han tī, kar ãg tóg tá mū há han ke mū gé. ⁹ Tag vỹ tỹ vēnh vī há nī, vēnh jykre kuryj ti. Vēnh jykre kuryj tỹ vēnh kar mý há nī ra tóg há tī vē. ¹⁰ Vēnh jykre kuryj ve jé sóg rānhrāj mū, tag ve jé sóg vāsān mū. Topē hā ki ãg tóg nén ū kar vэг tī, hā ký sóg ti hā to vāsān mū. Rīr ti nī, ãg jóg tỹ Topē ti. Ti hā ne ãg kren han tī', vēnh kar ag, ū tỹ ti ki ge ký nýtī ag.

¹¹ Tag kāmén nī, tag to vēnh kar mý: “tag han ra,” hemni. ¹² Kyrū ã tóg jē. Ū jé ã to é he tūg, ã kyrū jēn ký. Nén kar há ēn han nī, ag tỹ ve jé, ag tỹ ã kóm han sór jé, ã vī ri ke ēn ti, ã tỹ nén han mū ri ke, ã tỹ vēnh kar to há nī ri ke, ã tỹ Jesus ki rā ký jē ri ke, ã tỹ nén ū jānhkri han ja ri ke ke gé. ¹³ Inh kätig ke to hā ã tỹ nén han tī ēn han tīmnī ver. Ag mý Topē vī rán to kemni, ag jyvēn nī, ag kanhrān nī gé. ¹⁴ ãg jyvēn tī ag ne ã mý tó', Topē tỹ nén to ã tar han ke ti, Topē kuprīg tỹ ag krīn ký, igreja to pā'i ag tỹ ājag nīgē tỹ ã kri fi ja ēn kā. ¹⁵ Ag tỹ ã mý nén tó ja ēn tovānh tūg nī. To jykrén nī, to tar nīmni, vēnh kar tỹ ã tỹ to tar nī ēn ve jé. ¹⁶ Vēsō jykrén nī, ký ã tỹ Topē vī tỹ ag kanhrān ke ēn to jykrén nī gé, ã tỹ kygnē tūg jé. Tag to tar nīmni. ã tỹ tag han ký ã kren ke mū, ký ū tỹ ã vī mēg mū ag vỹ krenkren ke mū gé.

5

¹ Ūn si há ag mý vī tar han tūg nī. Komēr hā ag jyvēn nī, ãg tỹ ū tỹ ãg han mū ēn mré vī ri ke han nī, ã tỹ ūn si há ag mré vēmén ký. ã tỹ kyrū ag jyvēn ký ãg tỹ ãg jāvo ag jyvēn ri ke han nī. ² ã tỹ ūn si há fag jyvēn ký ãg tỹ ãg mýnh fi jyvēn ri ke han nī. ã tỹ tátāg fag jyvēn ký ãg tỹ ãg ve fi jyvēn ri ke han nī. ã tỹ fag jyvēn ký vēnh ki rīrmni, ã tỹ fag to én tū nī jé.

Ū tỹ hē nỹ ūn mén ter ja fag ki rīr ke mū

³ Ū fag mén vỹ ter, hā ra tóg tū tī, ū tỹ fag ki rīr ke ti. Ēn fag ki rīrmni. ⁴ Ūn mén ter ja ū fag krē vỹ nýtī, fag krē'krē mré hā. Ký fag krē hā vỹ fag ki rīr ke mū'. Ag tỹ ājag mré ke fag jagāgtān ký tóg há tī, ū tỹ ag han mū fag. Ag tỹ gīr nýtī kā fag tóg ag jē'lyn ja nīgtī, ký ag tóg vēnh kaja jé fag jē'lyn mū ha. Topē jykren hā vē, tag vỹ ti mý há nī. ⁵ Hā ra ūn mén ter ja ū fag vỹ krē tū nýtī, ký ū tỹ fag jē'lyn ke tóg tū tī gé. Ký Jesus ki ge mū kar ag vỹ fag jē'lyn ke mū, fag tỹ Topē hā ki nén ū kar ve sór ký, ti mré vēmén ký, ti hā mý nén ū kar to vī ký. Fag tỹ tag to krónh kenh ke tū vē, kurā mré hā, kuty mré hā ke gé. ⁶ Fag tỹ hā ra ag to kanhir sór ký fag tóg vēnh jykre pāno han mū, ký fag tóg mū kónān ke mū. ⁷ Tag tómnī, fag mý, fag tỹ tỹ prānh ke tū nī jé.

⁸ ã rānhrāj jafā tá ke ag kāmī ū tóg kejēn ã mré ke fag ki rīr tū nī, ã ĩn krēm nýtī fag. Ēn vỹ Jesus ki rā tovānh ja nī, ti tỹ fag ki rīr ja tū tūgrīn. Kórég tāvī ti nī, tag ti. Ū tỹ Jesus ki rā ja tū kórég kāfór ti nī.

Ū tỹ hē fag tỹ igreja ki rīr ke

⁹ Tá ūn mén ter ja fag vỹ ājag jiji ránrán sór mū, fag tỹ igreja ki rīr jé. Ūn si há fag jiji rán nī, ū tỹ 60 anos kāfór nýtī fag, ūn mén pir han ký nýtī ja fag. ¹⁰ Vēnh kar tỹ fi jykre há ki kanhró nýtīn ký fi jyjy rán nī, fi tỹ fi krē ki rīr há han ja nīn ký, fi tỹ kór há tá ke fag mý: “inh mré nīnh kätig,” he ja nīn ký, fi tỹ ã ĩn krēm Topē tū ag ki rīr há han ja nīn ký, fi tỹ vēnh kar jagāgtān ja nīn ký, ūn vēsýrēnh mū ag, fi tỹ nén ū há kar to tar ja nīn ký. Ū tỹ ge fi jiji rán nī.

¹¹ Ūn mén ter ja ū fag vỹ si há tū nýtī ver, ký fag jyjy rán tūg nī. Fag tỹ ū to én ký fag tóg Cristo tovānh ký mén sór mū. ¹² Ký tóg vēnhmý tīnh mū, fag tỹ fag jiji rán ja nīn ký, hā vỹ: “mén mān ke tū inh nī ha, sý Cristo tū hā ki rīr jé,” he mū. Fag mén sór ký fag tóg

fag vī tag mranh mū sir. ¹³ Kĩ fag tóg rānhrāj tū nýtĩn kĩ fag tóg ĩn kar mĩ pasa he sór mū, ha vemnĩ, kĩ fag tóg fagrĩnh mĩ vēmén ke mū gé sir. Vēnh kar tỹ nén han mū tỹ fag tóg vēmén sór mū, ha vemnĩ. Nén tó vānh tó jé fag tóg ke mū gé. Kĩ tóg há tū nĩnh mū. ¹⁴ Hā kĩ tóg há tĩnh mū, fag mén mǎn kĩ, ũn mén ter ja tỹ gĩr fag. Fag tỹ krē ve kĩ tóg há tĩ. Fag tỹ fag ĩn ki rĩr há han kĩ tóg há tĩ gé. Kĩ ũ tỹ ěg mĩ fag to vĩ sór mū ra tóg ag mĩ vēnhmĩ tĩnh mū, ha vemnĩ. ¹⁵ Ha vé, ũ fag vỹ Cristo tovānh huri, ũn mén ter ja tỹ gĩr ũ fag, kĩ fag tóg Satanás jykre han mū sir. Kĩ tóg kórég nĩ.

¹⁶ Tá ke fag kāmĩ ũ ĩn krēm ũn mén ter ja ũ fag vỹ nýtĩ. Fag hā vỹ fag jě'ỹn ke mū. Fag tỹ fag mĩ: “Jesus ki ge mū ag tỹ ā jě'ỹn kĩ tóg inh mĩ há tĩnh mū vē,” henh ke tū vē. Ke tū nĩ mū ra Jesus ki ge kĩ nýtĩ ag vỹ ũ tỹ hěn ri ke fag ki rĩr ke mū, kĩ fag jěn vỹ fag kǎ kyn kenh mū, fag tỹ e nýtĩn kĩ. Jesus ki ge mū ag vỹ ũn mén ter ja tỹ ge hā ki rĩr ke mū, hā vỹ: ũn kanhkā tū, ũn krē tū, he mū.

Jesus ki ge kĩ nýtĩ ag tỹ igreja to pǎ'i ag jě'ỹn ke

¹⁷ Tá ke ag kāmĩ ũ tóg tỹ pǎ'i nýtĩ, igreja to. Ag tỹ ag rānhrāj ki rĩr há han kĩ ag tóg ěg mĩ tỹ ũn mág tǎvĩ nýtĩ. Igreja to pǎ'i ag kāmĩ ũ tóg igreja ki ké ag kanhrān tĩ, Topě vĩ tỹ, kĩ ag tóg to krónh ke tū nĩgtĩ. Tag ag vỹ tỹ ěg mĩ ũn mág tǎvĩ nýtĩ. Ag tỹ igreja krēm ũn kanhrān tĩ ag jé ag mĩ kajām mág, ũ tỹ ag kanhrān tĩ ag mĩ. ¹⁸ Tag vỹ rán kĩ nĩ, ag to, ha mē: “monh tỹ ěkrē jānkre ki rānhrāj kĩ ti jěnky tógfĩn tũg nĩ, ti jěn kamēg tũg nĩ,” he ja tóg nĩ, Topě vĩ rán ki. Kĩ tag vỹ rán kĩ nĩ gé: “ũn rānhrāj mū ěn tóg ti kaja venh ke mū, ā rānhrāj kaja ti,” he ja tóg nĩ gé, Topě vĩ rá ki. Ti tỹ ěg tỹ Topě vĩ tó tĩ ag mĩ kajām to ken hā vē, ěg tỹ Jesus ki ge kĩ nýtĩn kĩ.

¹⁹ ũ tóg kejĕn ā mĩ igreja to pǎ'i jykre kórég tó sór mū. ũn régre ag tỹ ti jykre kórég ve ja nĩn kĩ ā mĩ tó kĩ ag vĩ jēmēmĩnĩ, ke tū nĩn kĩ ũn tǎgtū ag vĩ ti. ũn pĩr vĩ jēmē sór tũg nĩ. ²⁰ Pǎ'i ũ tỹ kygnē kĩ vēnh kar rĩnve ti jyvĕn nĩ, vēnh kar tỹ ti mré ěg tỹ kygnĕg tĩ ěn kamĕg jé.

²¹ Tag han ra, ha mē. Ker han tũg hĕ'. Topě vỹ ā tỹ nén han mū vég tĩ, Jesus Cristo ti ke gé, Topě tỹ jĕnĕ jafā ag ke gé, Topě tỹ ũn kuprĕg ja ag. Ti hĕn ā mĩ jagy nỹ, sỹ ā mĩ tó mū tag. Hā ra vēnh kar mĩ vēnh jykre pĩr han nĩ. ũ to: “ti tỹ iso há nĩn kĩ sóg ti mĩ vĩ tar han sór tū nĩ, ti tỹ kygnĕ ja ra,” he sór tũg nĩ. Ge ra ti jyvĕn tar han nĩ. ²² Kĩ kǎnhmar ũ kri ā nĩgé fi sór tũg nĩ gé. Ti tỹ ā tỹ Topě vĩ mranh ja ěn tovānh kǎn ja tū nĩn kĩ ā tóg ti mré mranh mū, ā tỹ ge ra ti kri ā nĩgé fi kĩ, ti vĩ mranh tỹ ver ti kǎkǎ nĩn kĩ. Kĩ vēso jykren nĩ gé, ā jǎnhkri kar jĕ jé.

²³ Goj tǎvĩ kron sór tũg nĩ. Sĩn kĩ vinho kron nĩ. Vēnh kagta vē ā mĩ, ā kaga nĩn kĩ, ā tỹ fe kórég (ka)mĕ nĩn kĩ.

²⁴ ũ ag tóg Topě vĩ mranh pĕ han tĩ, kĩ vēnh kar tóg ag vég tĩ. Topě vỹ ag vóg kónān ke mū, ag tỹ ti vĩ mranh pĕ han to. ũ ag tóg vēnh péju kĩ mranh tĩ. Ag tỹ Topě vĩ mranh mū ěn vỹ vēnh ven ke mū gé kejĕn, ha vemnĩ. ²⁵ Ge ti nĩ gé, vēnh jykre há mré. Vēnh kar vỹ vég mū, ũ tỹ vēnh jykre há han mū ti. Kejĕn ũ tóg nén ũ há han tĩ, hā ra tóg vēnh péju kĩ han tĩ. Vēnh ven jé tóg ke mū gé, ti tỹ han mū tag ti.

6

Patrão camarada jykre

¹ Tá ke ag kāmĩ ũ tóg tỹ patrão camarada nýtĩ. Kĩ ũ ag patrão vỹ Cristo ki kagtĩg nĩ. Ti camarada ag mĩ kemnĩ, ag tỹ ājag patrão kamĕg jé, ag tỹ ag patrão tū ki rĩr há han jé. Kĩ ũ tóg ěg to vĩnh ke tū nĩ, Topě to, ti vĩ to, ag tỹ vēnh jykre há han kĩ. ² ũ ag patrão vỹ Cristo ki rā ja nĩ. Ti camarada ag mĩ kemnĩ, ag tỹ ti to é he tũg jé. “Inh mré ke vỹ tỹ ti nĩ, inh patrão ti, ti tỹ Cristo ki rā kĩ. Kĩ inh hĕn ti vĩ han ke tū nĩ,” he tũg nĩ. Ti tỹ ěg mré Jesus ki rā kĩ Jesus vỹ ti to há nĩ. Kĩ tóg ũn vēsỹrĕnh mū ag jagāgtān tĩ, ag patrão ti. Kĩ tóg há tĩ, ti camarada ag tỹ ti tū ki rĩr há tǎvĩ han kĩ. Tag tómnĩ, vēnh kar mĩ. Tag tỹ ag jyvĕn nĩ.

Ón kĩ Topě kāmén tĩ ag

³ Ū ag tóg vurmỹ jykrén ký nén ū tó sór tí. Topě ví rán ký ní ěn tó sór tũ ag nĩgtĩ. Ěg Senhor tỹ Jesus Cristo tỹ nén tó mũ ěn tovãnh ký ag nỹtĩ ha, vėnh ví há ěn, Topě jykre ěn. ⁴ “Ūn mág vỹ tỹ ěg nỹtĩ,” he ag tóg tí. Hã ra ag tóg jykre tũ nỹtĩ. “Topě hỹn tóg tag tó sór mũ, ti tỹ ěn tó ký,” he ag tóg tí, ón ký, ag tỹ ū tỹ ag mỹ vėnh ví há tó mũ ag kato tẽ sór ký. Kaga ag nỹtĩ, krĩ vėnhmỹ ag nỹtĩ, hã ký ag tóg fagrĩnh mỹ ví mũgtĩ. Ag ví tugnĩn jagně tũ ki vė'ĩ vỹ kutě tí, jagně to jũ ke gé, jagně to ví kónãn, jagně to jykrén kónãn, ⁵ jagně to fėfėn ke gé. Krĩ tũ ní ve ag nỹtĩ. Vėnh ví há ki kagtĩg ag nỹtĩ. Ký ag tóg ón ký Topě kãmén to ricon sór nỹtĩ. ⁶ Hỹ, Topě to ěg rico nỹtĩnh mũ, ěg tỹ ěprã ricon sór tũ nỹtĩnh ký. ⁷ Ha vé, ěg mur ký ěg tóg tỹ nén ū tũ mur, ký ěg ter ken ký ěg tóg nén kar tovãnh ký tĩg mũ gé. ⁸ Ký tóg há tí, ěg tỹ ūri vėjėn mré ěg kur ven ký, tag tãvĩn. ⁹ Ěg tỹ rico nỹtĩ sór ký tóg inh mỹ ěg tỹ Topě ví mranh ha mẽ tí. Kãnhmar ěg tóg nén ū to én', nén ū to én' he tí, ký tag tóg inh mỹ ěg kókén ha mẽ tí. Ký ěg tag to nũgme ki vár ke mũ. Pi(jé) há ní'. ¹⁰ Ěg tỹ jãnkamy mág to én ký ěg tóg nén ū kórég kar han sór tí. Ka jãre kórég ri ke ti ní, ěg tỹ jãnkamy mág ve sór mũ ti. Vėnh jykre kórég vė. Tag to ū ag tóg Jesus ki rã tovãnh huri, ký ag tóg vėsýrėnh mũ ha, ag tỹ jãnkamy mág to há nỹtĩ tugnĩn.

Ă rãnhrãj ki rĩr há han nĩ

¹¹ Ag jãvo ã hã vỹ tỹ Topě tũ ní. Ký vėnh jykre kórég tag tovãnh kãn. Ă tỹ nén han ken hã vė, hã vỹ: vėnh jykre kuryj, he mũ, Topě kamėg mũ, he mũ, ti ki rã ký tí, he mũ, vėnh kar to há ní, he mũ, vėnh kar to fen ní, he mũ, koměr hã ví, he mũ gé. ¹² Ěg tỹ ti ki rã ký ěg tóg ti jykre to vãsãnsãn ke mũ, ěg tỹ ka kunũnh sór ký to vãsãn ri ke. To tar nĩmnĩ, ã tỹ ěg rĩr krỹg ja tũ ve jé. Tag hã to tóg ã jé prěr, Topě ti. Ký ã tóg vėnh kar mỹ tó ja ní gé, kurã ěn kã. Ūn e ag vỹ ã ví ěn mẽgmě. Ký to tar nĩmnĩ.

¹³ Sỹ ã jyvėn sór vė, ký Topě vỹ mẽnh mũ. Ti hã ne nén kar rĩnrĩr han tí', Topě ti. Ký Jesus Cristo vỹ inh ví mẽnh mũ gé. Ti hã ne vėnh kãmén há han', pã'i tỹ Põncio Pilatos ěn mỹ. ¹⁴ Sỹ tag tó sór vė, ã mỹ, ha mẽ: ã rãnhrãj ki rĩr há han nĩ. To krónh ke tũg ní, to kygně sór tũg ní gé. Tag han ký ěg Senhor tỹ Jesus Cristo tỹ vỹn ke ěn jãvãnh nĩ. ¹⁵ Ti kurã ki Topě vỹ ti mỹ: “ha tĩg,” henh ke mũ. Topě vỹ ã pir mỹ tỹ nén ū kar kri ke ní. Ký ěg tóg ti hã mỹ ví há han ke mũ. Pã'i kar kri tóg tỹ pã'i ní. Ūn mág kar kri tóg tỹ ūn mág ní. ¹⁶ Ti hã ne ã pir mỹ ter ke tũ ní'. Ti hã ne jėngrě kãkã ní ní', tá ěg jun ke tũ ní. Ěprã ke ū vỹ ti ve ja tũ ní gé, ký ěg tóg ti venh ke tũ ní gé, ěg tỹ tỹ ěprã ke nỹtĩnh ký. Ti hã ne tỹ ūn mág ní'. Ti hã ne tar ní'. Tũg' he jãvãnh ti ní, ti tỹ tỹ ūn mág ní ti. Amém.

Ěprã ūn rico ag

¹⁷ Ěprã ūn rico ag mỹ tómnĩ, ag tỹ vėso: “tỹ inh ūn rico mág ní,” he tũ ní jé. Ký tóg há tũ ní gé, ag tỹ: “isỹ nén ū kar tỹ tũ nĩn ký isóg nén ū jagy venh ke tũ ní,” henh ký. Ag rico vỹ kãnhmar tũg' henh mũ. Ag jé Topě hã ki nén ū kar ve sór. Ti hã vỹ ěg mỹ nén ū kar nĩm tí, ěg fe tỹ mrin ken jé. ¹⁸ Ūn rico ag jé vėnh jykre kuryj han, ag jé ãjag tũ tỹ vėnh kãpãm, ag jé ūn jagãgtar ag jagãgtãn to krónh ke tũg. ¹⁹ Ag tỹ nén ū há kar han ký ag tóg kanhkã tá rico nỹtĩnh mũ, kanhkã tá ag tóg vin han ke mũ, ãjag tũ ti. Ký ag tóg ěg rĩr krỹg ja tũ venh ke mũ gé. Ă tỹ ěprã ūn rico ag mỹ tónh ken hã vė.

²⁰ Timóteo', ã tỹ Topě ví mẽ ja ěn kã jatu tũg ní, ki króm ní, to jykrén ký. Ū ag tóg fagrĩnh mỹ vėmėn mág han sór tí, ón ký ví (ka)mě han ký. Ón ký ag tóg: “vėnh ví há vỹ jagně kato tẽ tí,” he tí, ký ag tóg Topě ví tỹ jagně kato tẽ ěn tó sór tí. Hã ra ag tóg fagrĩnh mỹ ví tí. Ag ví mẽ sór tũg ní. ²¹ “Ki kanhró ěg nỹtĩ,” he ag tóg tí, hã ra ag tóg Topě ki rã tovãnh huri. Kórég ag nỹtĩ.

Topě mỹ sóg to ví tí, ti tỹ ãjag tỹ ã to tar han jé.
Hã vė.

PAULO TỠ CARTA HAN: TIMÓTEO MỠ CARTA Û

¹ Paulo tỠ rá vễ. Topễ ne inh fễg', isỠ tỠ Jesus Cristo apóstolo jễ jẻ. Inh mỠ tóg tó, isỠ vễnh kar mỠ ễg tỠ Jesus Cristo tugrĩn rĩnrĩn nỹtĩnh ke tag tó jẻ. Topễ tỠ ễg mỠ nẻn han sỏr mũn hỏ vễ.

² IsỠ inh kỏsin tỠ Timóteo mỠ rán hỏ vễ, isỠ ù to há tỏvĩ nĩ ẻn mỠ. Ễg jóg tỠ Topễ mỠ sỏg to vĩ tĩ, ti tỠ ỏ tar han jẻ, ti tỠ ỏ jagỏgtỏn jẻ, ti tỠ ỏ krĩ kuprỏg jẻ ke gẻ. Ễg Senhor tỠ Jesus Cristo mỠ sỏg tag to vĩ tĩ gẻ.

Paulo tỠ Topễ mỠ vĩ há han

³ Topễ mỠ sỏg vĩ há han tĩ. Ti hỏ mỠ sỏg rỏnhrỏj tĩ, inh jóg'jóg ve ag ri kẻn. To kygnẻ sỏr vỏnh inh nĩgtĩ.

ỏ tó sỏg tĩ, sỠ Topễ mrẻ vẻmẻn kỠ. To krỏnh ke tũ inh nĩgtĩ, kurỏ kar ki, kuty ki ke gẻ.

⁴ Isĩg kỠ ỏ tóg fỠ ja nĩ. Hỏ mỠ sỏg ẻkrẻg tĩ, hỏ kỠ sỏg ỏ ve sỏr tỏvĩ nĩ, inh fe tỠ mrin ke jẻ.

⁵ Jesus ki rỏ há han ỏ tóg nĩ, ỏ fe kar tỠ, ỏ vỏvỏ tỠ Lỏide fi ri ke, ỏ mỠnh tỠ Eunice fi ri ke. Fag ri ke han kỠ ỏ tóg ti ki rỏ gẻ, ki kanhrỏ sỏg nĩ.

⁶ Hỏ kỠ sỏg ỏ jyvẻn sỏr mũ. Topễ vỠ ỏ mỠ vẻnh rỏnhrỏj nĩm, isỠ inh nĩgẻ tỠ ỏ kri fi ja nĩn kỠ. Ễn to tar nĩmnĩ. ⁷ Topễ vỠ ễg mỠ ỏ kuprỏg jẻnẻ, ễg kanẻ jur tũ nĩ jẻ, ễg tar nỹtĩ jẻ, ễg tỠ jagnẻ to há nỹtĩ jẻ, ễg tỠ vẻso jykrẻn jẻ.

⁸ Hỏ kỠ ễg Senhor to mỠ'ỏg tũg nĩ. Ti kỏmẻn nĩ, kỠ inh kỏmẻn nĩ gẻ, isỠ ti tugnĩn se kỠ jẻ tag ti. KỠ ỏ tỠ ti tugrĩn vẻsỠrẻnh ke tag kamẻg tũg nĩ gẻ inh mrẻ. Topễ vỠ to ễg vẻsỠrẻnh tĩ, hỏ ra Topễ tóg to ễg tar han tĩ gẻ. ⁹ Ti hỏ ne ễg kren han', ti hỏ ne ễg kuprẻg', ễg tỠ tỠ ti tũ nỹtĩ jẻ. Ễg tỠ vẻsỏg ki to vỏsỏn pijẻ'. Ti hỏ ne to jykrẻn', kỠ tóg ễg jagỏgtỏn kỠ ễg kuprẻg, Jesus Cristo tugnĩn. Ễg tỠ ti ri ke há nỹtĩ jẻ tóg ễg kuprẻg. Hỏ ra tóg nẻn kar han ke to hỏ tag to jykrẻn ja nĩgtĩ. ¹⁰ KỠ tóg ùri hỏ ễg mỠ tó, ễg kren han tĩ tỠ Jesus Cristo jẻnẻn kỏ. Ễn vỠ ễg ter ke tag tỠ tũg' hẻ, kỠ tóg ễg rĩnrĩn han mũ sir, ễg tỠ ễg rĩr krỠg ja tũ ve jẻ sir, ễg tỠ ti vĩ sẻr kri fi kỠ. ¹¹ KỠ tóg inh mỠ: "vẻnh kar mỠ inh vĩ tỏnh tĩg," he ja nĩ gẻ, sỠ tỠ ti apóstolo jẻ jẻ, sỠ ti vỹ tỠ vẻnh kar kanhrỏn jẻ. ¹² Hỏ kỠ sỏg se kỠ jẻ ha. Hỏ ra sỏg mỠ'ỏg ke tũ nĩ. Ti ki rỏ kỠ sỏg jẻ ha, ti ki kanhrỏ sỏg nĩ, sỠ ùn ki rỏ ja ẻn ti. Nẻn ù kar to tóg tar nĩ, hỏ kỠ tóg inh ki rĩr há han ki kanhrỏ nĩ gẻ, sỠ ti mỠ vẻnh fễg kỠ, isỠ kurỏ tỠ ẻgno pẻtẻm há han jẻ.

¹³ IsỠ nẻn tỠ ỏ kanhrỏn ja ẻn kỏ jatu tũg nĩ. Vẻnh vỹ há vễ, sỠ ỏ mỠ nẻn tó ja ti. Tag ki krỏm kỠ inh ri kẻn kỏmẻn nĩ. Ti ki rỏ to tar nĩmnĩ, vẻnh kar to há nĩmnĩ gẻ, Jesus Cristo tỠ nẻn han ja ẻn ri ke han nĩ. ¹⁴ Ti tỠ ỏ mỠ vẻnh rỏnhrỏj nĩm ja ẻn ki rĩr há han nĩ, ù tỠ Topễ vỹ tỠ ù han tũ nĩ jẻ. Topễ kuprỏg vỠ ễg kỏki jamỏ nĩ. Ễn vỠ ỏ tar han ke mũ, ỏ tỠ ti vỹ tó há han ke to.

¹⁵ Ha vẻ, ga tỠ ỏsỏ tỏ ke kar ag vỠ isỏvỏnh kỏn, Fẻgelo ke gẻ, Hermỏgenes ke gẻ. Tag mẽ ỏ hỠn huri. ¹⁶ Topễ mỠ sỏg to vỹ tĩ, ti tỠ Onesỏforo mrẻ ke fag jagỏgtỏn jẻ, ùn tũg mũ ẻn ti. Iso há tỏvĩ ti nĩ ja nĩgtĩ. Iso mỠ'ỏg tũ ja ti nĩgtĩ, ise kỠ jẻ (hỏ) ra. ¹⁷ Ti tỠ cidade tỠ Roma tag ki jun kỠ tóg inh jỏvỏnh tỏvĩ han ja nĩ, kỠ tóg kejẻn inh ve ja nĩ. ¹⁸ Ễg Senhor hỠn ti jagỏgtỏn ke mũ, ti tỠ kurỏ tỠ ẻgno ki ti kren han jẻ, kỠ tóg inh mỠ sẻr tĩnh mũ. Ki kanhrỏ ỏ tóg nĩ, ti tỠ ẻfeso tỏ inh ki rĩr há han ja ti. SỠ ỏ mỠ Onesỏforo jykre tỏn hỏ vễ.

2

Ễg vỏsỏn ke

¹ Inh kỏsin', Jesus Cristo ne ỏ tar han ke mũ', kỠ krỏnh ke tũg nĩ. ² Inh vỹ mẽ ỏ, sỠ ùn e ag kanhrỏnrỏn kỠ. Tag tỏmnĩ gẻ, ù ag mỠ. ù tỠ krỏnh ke tũ ag mỠ tỏmnĩ, ù tỠ ỏ kỏm ag kanhrỏn ke to jykre há nỹtĩ ag mỠ.

³ Ễg tỠ Jesus tugrĩn vẻsỠrẻnh ke to tar nĩmnĩ inh mrẻ, Timóteo'. Jesus Cristo soldado ri ke ễg nỹtĩ. ⁴ Soldado jykre tag to jykrẻn nĩ. Ag pi(jẻ) vyr mỠ jykrẻn tĩ', soldado ag. ỏjag

pã'i vī ki hã han ag tóg tĩ, ãjag pã'i tỹ ag to há nĩ jé. Hã kỹ ag tóg vyr mỹ ganho ve sór tũ nĩgtĩ. Soldado ag ri ke han nĩ gé, Timóteo'.

⁵ Kỹ ù ag tỹ corrida han mũ ag jykre to jykren nĩ gé. Ag corrida vỹ to vènh jykre nĩ. Corrida to vènh jykre ên hã han ag tĩ, ag tỹ ganhar ken jé. Û tỹ corrida han mũ ag ri ke han nĩ, Timóteo'.

⁶ Kỹ êpỹ ki rĩr tĩ ag vỹ rãnhraj mág han tĩ gé, hã kỹ ag tóg krãn kỹ ti kanẽ ko tĩ. Ag ri kén ã tóg venh ke mũ gé, ã tỹ nèn ve sór mũ ti, ã rãnhraj mág kỹ, ha vemnĩ.

⁷ Tag to jykren há han nĩ, sỹ ã mỹ tó mũ tag to. Kỹ êg Senhor vỹ ã tỹ to jykren há tãvĩ han ke mũ sir. ⁸ Jesus Cristo mĩ êkren nĩ. Ti ter kar kỹ tóg rĩr mãn. Ti jóg'jóg ve vỹ tỹ Davi ja nĩgtĩ. Hã tó sóg tĩ, ti kãmén kỹ. ⁹ Hã kỹ sóg se kỹ jẽ, ferro tỹ mỹr. "Ti hỹn tỹ ùn jykre pãno nĩ," he ag tóg tĩ iso, hã kỹ ag tóg ferro tỹ isé. Hã ra Topẽ vĩ pi(jé) se kỹ nĩ nĩ'. Tãmĩ tóg tĩ ha. ¹⁰ Hã kỹ sóg ise kỹ jẽ (hã) ra ti to tar nĩ, Topẽ tỹ ùn kuprêg mũ ag jagfỹ, ag krenkren jé, ag tỹ Jesus Cristo ki ge tugrĩn, ag tỹ ti tugnĩn kanhkã tá junjun jé. ¹¹ Vènh vĩ há vè, tag ti, ha mẽ: êg tỹ ti tugrĩn kãgter mũ ra êg tóg ti mré rĩnrĩr mãn ke mũ gé. ¹² Êg tỹ ti tugrĩn nèn ù jagy kar to tar nỹtĩn kỹ êg tóg ti mré tỹ ùn mág nỹtĩnh ke mũ gé. Êg tỹ ti tovãnh kỹ tóg êg tovãnh ke mũ gé. ¹³ Êg tỹ ti to krónh ke tĩ ra tóg êg to krónh kenh ke tũ nĩ jãvo. Ti pi(jé) ón tĩ', hã kỹ tóg êg to krónh kenh ke tũ nĩ gé, ti tỹ: "krónh ke tũ inh nĩ," hen kỹ.

Êg tỹ Topẽ rãnhraj han há han ke

¹⁴ Tag tómnĩ, vènh kar mỹ. Tỹ ag jyvèn nĩ, kỹ ag jyvèn tar han nĩ gé. Topẽ vỹ ã vĩ mènũ mũ. Ag mỹ: "êg kato tẽ mũ ag vĩ kafãn sór tũg nĩ," hemnĩ. "Jagnẽ vĩ kafãn pi(jé) êg tar han mũ'. Û tỹ tag mẽ kỹ tóg krónh ke sór mũ," hemnĩ ag mỹ. ¹⁵ Vãsãn ra, Topẽ tỹ ã rãnhraj to: "há ti nĩ," he jé, ã tỹ ã rãnhraj to mỹ'ag tũ nĩ jé. Topẽ vĩ to vãsãn nĩ, ã tỹ ki kanhrãn há han jé, ã tỹ vènh kar mỹ tó há han jé gé. ¹⁶ Û tỹ kanhir kỹ nèn ù kórég tó kỹ jẽmẽ sór tũg nĩ, ùn vĩ (ka)mẽ ên vĩ ti. Û tỹ tag tó mũ ag vỹ Topẽ to kórég tãvĩ nỹtĩ, kỹ ag vỹ vỹ ag kókén ke mũ, kỹ tóg ag jykre pãno pẽ han mũ. ¹⁷ Vènh vỹ tỹ ge vỹ êg kar kókén ke mũ, komêr hã, ti tỹ vènh kar kri rũm ken kỹ. Vènh kaga kórég tỹ vènh kar kri rũm ke ri ke ti nĩ.

Û tỹ vènh vỹ tỹ ge han mũ vỹ tỹ Himeneu nĩ gé, Fileto ke gé. ¹⁸ Tag ag vỹ un'ón tĩ, Topẽ vỹ to. "Rĩr mãn ri ke han êg huri, êg tỹ Cristo ki gen kỹ, hã kỹ êg rĩnrĩr mãn ke tũ nỹtĩ ha, êg ter kar kỹ, Jesus kãtĩg mãn kỹ," he ag tóg tĩ. Ag tỹ tag tó kỹ ag tóg ù ag tỹ Jesus to krónh ke han tĩ, kỹ ag tóg Cristo tovãnh mũ ha ag tugrĩn.

¹⁹ Êg tỹ ãn han kỹ êg tóg ti tỹ kri jẽ jafã ên tar han tĩ. Ên ri ke ti nĩ, Topẽ jykre ti. Jesus Cristo kãme vỹ há nĩ, kỹ tóg tũg' henh ke tũ nĩ, ù ag tỹ ón kỹ to vỹ mũ (hã) ra. Êg tỹ ti ki ge kỹ nỹtĩn kỹ tag vỹ êg to rán kỹ nĩ, ha mẽ: "êg Senhor vỹ ã tũ ag ki kanhró nĩ," he tóg mũ.

Kar kỹ tag vỹ rán kỹ nĩ gé, ha mẽ: "vènh jykre pãno tovãnh kãn ra, ãjag tỹ: inh Senhor vỹ tỹ ti nĩ, Jesus ti, he jé," he tóg mũ. Cristo jykre to ken hã vè. Ón vãnh ti nĩgtĩ.

²⁰ Ha vé, ãn mág krêm kukrũ vỹ e nỹtĩ. Û vỹ ouro tỹ há nỹtĩ, ù vỹ prata tỹ há nỹtĩ. Kỹ ù vỹ ka tỹ há nỹtĩ gé, ù vỹ go'or tỹ há nỹtĩ gé. Kukrũ há vỹ tỹ vèjẽn né nĩ, kỹ ùn kórég vỹ tỹ vãfãr né nĩ gé. ²¹ Kỹ tóg ge nĩ, ù tỹ kanhir kỹ nèn ù kórég tó (ka)mẽ ên ag. Kukrũ kórég ri ke ag nỹtĩ. Hã kỹ Topẽ tóg ag mỹ: "inh rãnhraj han ra," henh ke tũ nĩ sir. Êg tỹ ti kórég tovãnh kãn kỹ êg tóg kukrũ há ri ke nỹtĩ, kỹ Topẽ tóg êg mỹ: "inh rãnhraj han nĩ," henh ke mũ gé sir. Ti tũ vỹ tỹ êg nỹtĩnh mũ, kỹ tóg êg mỹ ã rãnhraj nĩm sór mũ, êg tỹ han jé. Kỹ êg tóg vèsỹmêr han sór mũ sir, ti tỹ êg mỹ tó kỹ, kỹ tóg Topẽ mỹ sér tĩ.

²² Kyrũ ag vỹ nèn ù kar to én (ka)mẽ nỹtĩ. Ên tovãnh kãn. Vènh jykre há hã mĩ tĩg sórmnĩ. Jesus ki rã hã to jykren nĩ, vènh kar to há nĩmĩ, krĩ kuprã nĩmĩ, ù tỹ êg Senhor mré ke ag to, ùn jãnhkri ag to, vènh kar to ke gé.

²³ Û ag tóg ón kỹ: "Topẽ hỹn tag tó sór mũ, ti tỹ ên tó kỹ," he sór ti. Topẽ tỹ nèn tó vãnh ên tó sór ag tóg tĩ. Tag tugrĩn jagnẽ to jũ tóg kutẽ tĩ, hã kỹ ag mré to jykren sór tũg nĩ. ²⁴ Û tỹ Topẽ mỹ rãnhraj tĩ jé vènh kar to há nĩ. Ti tỹ kãnhmar ag to jũn kỹ tóg tỹ ù nỹ.

Ti tỹ komẽr hã vĩ kỹ tóg há tĩ, ag kanhrãn jé, vẽnũ kar to fe há nĩn kỹ. ²⁵ Û tóg ti vĩ kafãn sór mũ. Ën mỹ tóg vĩ há han ke mũ. Komẽr hã tóg ag mỹ Topẽ vĩ tónh ke mũ, Topẽ tỹ ag jagãgtãn jé, ag tỹ ãjag jykre tovãnh kỹ, vẽnũ vĩ há hã nón mũ jé. ²⁶ Kỹ ag krĩ há nỹtĩnh mũ. Japo tũ vỹ tỹ ag nỹtĩ ja nĩgtĩ, ti tỹ ag se jan kỹ, ag tỹ ti rãnhraj han jé. Ag tỹ ti tovãnh kỹ Topẽ tóg ag krenkren han ke mũ. Kỹ tóg ag tỹ Japo jykre tag to vẽnũ nenh to ag tar han ke mũ, ãg ke gé. Kỹ tóg há tĩ.

3

Kurã tỹ ãgno to hã vẽnũ jykre

¹ Tag to jykren, ha mẽ. Ga tỹ tũ' henh ke to hã ãg tóg nén ù jagy ve kãn ke mũ. Vẽnũ kar tỹ vẽnũ jykre pãno han mũ ve jé ãg tóg ke mũ. ² ãjag jykre hã han sór jé ag tóg ke mũ. Nén ù kar to én jé ag tóg ke mũ, ag rico nỹtĩ jé. “Tỹ inh ùn mág nĩ, tag han inh tĩ, tag han inh tĩ,” he jé ag tóg ke mũ. Jagnẽ to vĩ kónãn jé ag tóg ke mũ. ãjag panh vĩ ki hã han ke tũ ag tóg nĩ. “Kórég ti nĩ,” he jé ag tóg ke mũ, ù tỹ ag mỹ nén ù há nĩm mũ ra. Topẽ to ag é henh ke mũ gé. ³ Jagnẽ to jykre kórég ag nỹtĩnh mũ, ãjag krẽ to ke gé. Jagnẽ mỹ vẽnũ pãte fón ke tũ ag nĩ gé. Jagnẽ to ag un'ón ke mũ. Vẽso jykren ke tũ ag tóg nĩ. Ag tỹ ù vóg kónãn kỹ tóg ag mỹ sér tĩnh mũ. Vẽnũ jykre há kato tẽ jé ag tóg ke mũ. ⁴ ãjag régre ag vatãnh tá ag tóg ag to vĩ kónãn ke mũ gé. Û tỹ ãjag jykre kórég to ag vóg kónãn ke tag kamẽg vãnh ag nỹtĩ. Vẽso ag tóg: “vẽnũ kar kãfór vỹ tỹ inh nĩ,” henh ke mũ gé. Ag tỹ Topẽ to há nỹtĩnh ke vẽ vẽ, hã ra ag tóg ãjag tỹ nén to én mũ ãn hã han sór ke mũ. ⁵ Òn kỹ ag tóg Topẽ to há nĩ ve nỹtĩnh mũ, hã ra ag tóg ti jykre han sór ke tũ nĩ, ti tỹ ãg tar han tĩ tag vỹ ag mỹ há tũ nĩnh mũ. Û tỹ ge ag tovãnh nĩ, vỹ.

⁶ Ag kãmĩ ù ag vỹ in kar mĩ mũnh mũ, kỹ ag tóg ùn tỹtã jykre tũ fag mré vẽnũ sór ke mũ, ù tỹ Topẽ vĩ mranh tĩ fag, ùn én sór (ka)mẽ fag. Ën fag mỹ ag tóg vĩnh mũ, fag tỹ ag vĩ ki han jé. ⁷ Òn kỹ fag tóg vẽnũ kanhrãn to tar nỹtĩnh mũ, hã ra fag tóg vẽnũ vĩ há ki kagtĩg nỹtĩ, hã kỹ fag tóg ag vĩ ki han mũ, ù tỹ fag mỹ ón mũ ag vĩn ki. ⁸ Û tỹ fag mré vẽnũ mũ ãn ag vỹ Topẽ vĩ kato tẽ nỹtĩ, vẽnũ vĩ há ãn kato. Vãsy Janes vỹ Moisés vĩ kato tẽ ja nĩgtĩ, Jambres ti ke gé. Ag ri ke ag nỹtĩ, Topẽ vĩ kato tẽ ag tóg tĩ, ù tỹ fag nón mũ ãn ag. Vẽnũ jykre pãno han (ka)mẽ ag tóg nỹtĩ, krĩ tũ ag nỹtĩ. Òn kỹ ag tóg Jesus ki ge nỹtĩ ve nĩ, ag tỹ ón kỹ ti vĩ tón kỹ. ⁹ Hã ra ùn e vỹ ag vĩ kri finh ke tũ nĩ, ha vemnĩ. Vẽnũ kar vỹ ag krĩ tũ tag venh ke mũ, ha vemnĩ. Janes mré Jambres ri ke han jé ag tóg ke mũ. Vẽnũ kar vỹ ag krĩ tũ ki kanhró ja nỹtĩgtĩ gé, Janes mré Jambres ti.

Ëg tỹ Topẽ to tar nỹtĩn kỹ ãg nén jagy vẽnũ ke mũ

¹⁰ Ag jãvo ã tóg inh vĩ kri fi há han tĩ, Timóteo'. Isỹ nén han mũ ãn ri ke han ã tóg tĩ gé. Isỹ nén ve sór mũ ãn ve sór ã tóg tĩ gé. Isỹ Jesus ki rã ri ke han ã tóg tĩ gé. Isỹ komẽr hã vĩ ri ke han ã tóg tĩ gé. Isỹ vẽnũ kar to há nĩ ri ke han ã tóg tĩ gé. ¹¹ Ag tỹ inh vóg kónãn ve ja ã nĩ gé, isỹ nén ù jagy végtĩ ãn ti. Inh vóg kónãn tỹ hẽn ri ke han ja ag tóg, Antioquia tá, Icônia tá, Listra tá ke gé. Ter kren pẽ han inh, tá. Hã ra ãg Senhor tóg inh jy nĩgãn. ¹² Ha vé, ãg tỹ Jesus Cristo jykre mĩ mũn kỹ ãg kar tóg ag tỹ ãg vóg kónãn venh mũ. ¹³ Ëg jãvo ùn jykre pãno ag vỹ komẽr hã vẽnũ jykre pãno han kãn kỹ nỹtĩ, ùn un'ón mũ ag ke gé. Û ag lograr ke ag tóg tĩ, hã ra ag tóg ag lograr ke tĩ gé, vẽnũ kato.

¹⁴ Ag jãvo isỹ ã mỹ nén tó ja ãn mĩ tĩg nĩ, ã tỹ nén mẽ ja kar ãn mĩ, ã tỹ ki rã kỹ jẽ ãn mĩ. Isỹ ã kanhrãn ja ãn to tar nĩmĩ. Inh jykre ki kanhró ã tóg nĩ. ¹⁵ ã sĩ kã ã tóg Topẽ vĩ mẽ, ã kónẽg kã. Ën kã ã tóg Topẽ vĩ tỹ rán kỹ nĩ ãn mẽ. Topẽ vĩ tỹ rán kỹ nĩ ãn to jãn kỹ ã tóg ki kanhrãn mũ, ãg tỹ Jesus Cristo ki rã tugnĩn krenkren ke mũ ti.

¹⁶ Û tỹ hẽn ri ke ag vỹ Topẽ vĩ ránrán ja nĩgtĩ. Hã ra Topẽ kuprĩg tóg ag mỹ tó ja nĩgtĩ, ag tỹ nén rán ke ti, hã kỹ ag tóg ránrán. Ti vĩ rán kỹ nĩ to ken kỹ ãg tóg vẽnũ vĩ há ki kanhrãn mũ, kỹ ãg tóg kãmén há han ke mũ gé. Ëg mỹ tóg ãg tỹ kygnẽ ja ãn ven tĩ, kỹ ãg tóg jagnẽ mỹ ven tĩ gé. Tỹ Topẽ tóg ãg jyvẽn mũ gé, ti vĩ rán kỹ nĩ ki, kỹ ãg tóg jagnẽ jyvẽn ke mũ gé. Kỹ ãg tóg vẽnũ jykre kuryj ki kanhrãn tĩ gé, ti vĩ rán kỹ nĩ ki, ãg tỹ jagnẽ

mỹ tóg jé. ¹⁷ Topě tũ vỹ tỹ ěg nýtĩ. Ti pi(jé) ěg tỹ vĕnh kygnĕ ve sór mũ'. Ěg tỹ kygnĕg tũ nýtĩn kỹ ěg tóg nĕn ũ kar há han to tar nýtĩ. Ti tỹ tag ve sór vĕ, há jé tóg ěg mỹ ã vỹ jĕnĕ ja nĩgtĩ.

4

¹ Inh kósín', sỹ ã jyvĕn ke vĕ, ha mĕ, kỹ Topě vỹ mĕnh mũ, Jesus Cristo ti ke gé, ũ tỹ vĕnh kar jykre tugnỹm ke mũ ěn ti, ũn rĩnrĩr nýtĩ ag jykre, ũn kãgtĕr nýtĩ ag jykre ke gé. Vỹn ke mãn jé tóg ke mũ, ha vemnĩ, kỹ tóg tỹ pã'i mág jĕnh mũ, ha vemnĩ. Ěg Senhor rĩnve sóg ã mỹ: ² "Topě vỹ kãmĕn ra," hĕnh mũ. Kejĕn ag tóg mĕ sór tĩ, kejĕn ag tóg mĕ sór tũ nĩgtĩ. Ge ra ag mỹ kãmĕn nĩ. Ag jyvĕn nĩ, ag mỹ ag tỹ vĕnh kygnĕ ja ěn tómnĩ, ag jyvĕn tar han nĩ, ag tỹ mĕ jãvãnh kỹ. Ag jyvĕn to krónh ke tũg nĩ, ag tỹ kejĕn Jesus ki rã sór jé. Topě vỹ tóg há han nĩ. ³ Kurã tỹ ěgno to há ag tóg jĕmĕ sór ke tũ pĕ nĩnh mũ, vĕnh vỹ há ti, ha vemnĩ. Kỹ ag tóg vĕnh vỹ kórĕg nón mũ sór mũ, ag tỹ nĕn to ěn mũ ěn ti. ũ tỹ ón kỹ ag mỹ tónh ke mũ ěn vỹ vĕme sér tónh ke mũ, kỹ tóg ag mỹ sér tĩnh mũ. ⁴ Vĕnh vỹ há jĕmĕnh ke tũ ag nĩ, há kỹ ag tóg vĕnh ó jĕmĕnh ke mũ sir.

⁵ Ag jãvo nĕn ũ kar to jykrĕn há han nĩ. Ā tỹ nĕn ũ jagy ve kỹ kato tar nĩmnĩ. Cristo to vĕme sér ěn kãmĕn nĩ, vĕnh kar mỹ. Ā rãnrãj ki rĩr há han nĩ gé.

⁶ Ag hỹn kãnhmar isĕn ke mũ, Jesus Cristo tugrĩn. Há ra tóg inh mỹ tỹ nĕn ũ tũ nĩ. Jesus tugnĩn ke vĕ, iser ke ti, há kỹ tóg inh mỹ tỹ nĕn ũ tũ nĩ. ⁷ Kejĕn ěg tóg rárã tĩ, kỹ ěg tóg vãsãn tĩ. Ěg tỹ rárã to vãsãn ri ke han inh, Topě rãnrãj han kỹ. Ěg tỹ carreira han kỹ ěg tóg vãsãn tãvĩ han tĩ gé, ěg tỹ ganhar he jé. Vĕnhvó tãvĩ han ěg tóg tĩgtĩ. Tag ri ke han inh, isỹ Topě rãnrãj han kỹ. Ti rãnrãj han kãn inh huri. Ti ki rã tovãnh ja tũ inh nĩgtĩ. ⁸ ũ tỹ carreira ki ganhar he mũ ěn vỹ ka féj tỹ coroa ganhar he tĩ. ěn ri ke nĩm jé tóg ke mũ inh mỹ, Topě ti, inh jykre kuryj to. Nĩm han kỹ tóg nĩ nĩ, Topě tỹ inh mỹ nĕn nĩm ke mũ ti, ag tỹ coroa vég mũ ěn ri ke ti. Kurã ěn kã tóg inh mỹ nĩm ke mũ, ěg Senhor ti. Vĕnh kar mỹ ti nĩm ke mũ gé, ũ tỹ ti kãtĩg jãvãnh kỹ nýtĩ ag kar mỹ.

Paulo tỹ nĕn ve ja

⁹ Kuri inh venh kãtĩg. ¹⁰ Demas vỹ isovãnh kỹ vyr. Ěprã vĕnh jykre han sór ti nĩ, há kỹ tóg isovãnh kỹ Tessalônica ra vyr. Crescente vỹ Galácia ra vyr, kỹ Tito vỹ Dalmácia ra vyr. ¹¹ Lucas vỹ inhhã inh mré nĩ nĩ. Marcos pére kãtĩg, ti tỹ inh rãnrãj han jé. Tag to tóg tar nĩ. ¹² Tíquico jĕnĕ inh, ti tỹ Ěfeso ra tĩg jé. ¹³ Kỹ, ã kãtĩg kỹ inh mỹ inh capa ma kãtĩg. Trôade tá ti nĩ, Carpo ĩn krĕm. Kỹ inh mỹ inh livro gé kãtĩg gé, livro grĩngrĩn kỹ nýtĩ ěn mré há, nĕn ũ fãr ki rãn kỹ nýtĩ ěn mré. Isỹ livro ěn venh há pĕ tóg tĩ.

¹⁴ Alexandre, ũ tỹ ferro tỹ nĕn ũ kar han tĩ ěn vỹ iso kórĕg tãvĩ nĩ. Ěg Senhor vỹ ti jykre kórĕg to ti vóg kónãn ke mũ. ¹⁵ Ti kamĕg ra. Inh vỹ kato tĕ mág han tóg.

¹⁶ Fóg tỹ pã'i vỹ inh ki inh jykre jĕmĕ pin huri. ěn kã ũ tóg inh mré ve ja tũ nĩ. Isovãnh kãn ag tóg. Topě mỹ sóg to vỹ tĩ, ti tỹ ag mỹ vĕnh pãte fón jé. ¹⁷ Ag jãvo ěg Senhor vỹ isar han, ti tỹ inh mré tag kã jĕ nĩn kỹ. Há kỹ vĕnh kar vỹ ti vỹ mĕ huri, isỹ ag mỹ kãmĕn kỹ. Povo kar ag vỹ hur mĕ kãn. Kỹ ěg Senhor tóg inh jy nĩgãn, ag tỹ mĩg mỹ inh fón tũ nĩ jé. ¹⁸ Inh jy nĩgãn mãn jé tóg ke mũ gé, Nĕn-Kórĕg tỹ isỹ hĕ ri ke tũ nĩ jé. Inh ki tóg rĩr há han ke mũ, sỹ kanhkã ra tĩg há han jé, ti nĩgja ra. Ti há mỹ ěg vỹ há han ke mũ'. Kỹ tóg tũg' hĕnh ke tũ nĩ, ěg tỹ ti mỹ vỹ há han ke ti. Amém.

¹⁹ Priscila fi mré fi mén tỹ Áquila mĩ sóg ěkrĕg tĩ, Onesíforo mré ke fag mĩ ke gé.

²⁰ Erasto vỹ Corinto tá nĩ nĩ. Jãvo Trófimo tóg Mileto tá kaga nỹ ja nĩ, isỹ tá kãtĩ mũn kã.

²¹ Kur kãtĩg mĕ han, prỹg tỹ kusa tá krỹg tũ ki. Ěubulo vỹ ã mĩ ěkrĕg tĩ, Prudente ti ke gé, Lino ti ke gé, Cláudia fi ke gé, ěg régre kar ag mré há. ěn ag vỹ ã mỹ abraços jĕnĕg tĩ.

²² Ěg Senhor mỹ sóg to vỹ tĩ, ti tỹ ã tar han jé, ti tỹ ãjag kar tar han jé gé.
Hã vĕ.

PAULO TỠ CARTA HAN: TITO MỠ CARTA

¹ Paulo tỡ rá vễ. Sỡ Tito mỡ rán hã vễ. Topễ mỡ sỏg rãnhrãj tỡgtỡ, kỡ Jesus Cristo vỡ inh fễg, sỡ tỡ ti apỏstolo jễ jẻ. Topễ tỏg ẻprã ke ỳ ag kuprẻg, ag tỡ ti ki ge jẻ. Kỡ tỏg inh mỡ: “ha isỡ ỳn kuprẻg ja ag mỡ tỏnh tỡg,” he ja nỡ. “Ag mỡ inh vỡ ti kãmẻn nỡ, sỡ ki hã tỏ mỡ ẻn ti, ag tỡ ả vỡ jẻmẻ kỡ inh ki ge hã han jẻ,” he ja tỏg nỡ. ² Topễ vỡ ẻg mỡ: “rỡr krỡg ja tỡ ve jẻ ảjag tỏg ke mỡ,” he ja nỡ. Hã ve sỏr ẻg tỏg mỡ. Topễ tỡ nẻn tỏn hã vễ, vãsỡ, hã ra tỏg ỏn tỡ nỡgtỡ. ³ Vãhã tỏg ẻg mỡ ả vỡ tag jẻnẻ ja nỡ, ti tỡ ẻg mỡ jẻnẻnh ke kurã ki. Jesus tỡ tỏg ẻg mỡ jẻnẻ ja nỡ. Hã to Topễ tỏg inh mỡ: “ha vẻnh kar mỡ tỏnh tỡg,” he ja nỡ, ẻg kren han tỡ ẻn ti.

⁴ Hã kỡ sỏg ả mỡ tỏ mỡ, Tito'. Inh kỏsin pẻ vỡ tỡ ả nỡ, ả tỡ inh mrẻ Jesus ki rã kỡ jẻn kỡ. ẻg jỏg tỡ Topễ mỡ sỏg to vỡ tỡ, ti tỡ ả tar han jẻ, ả krỡ kuprã nỡ jẻ ke gẻ. ẻg kren han tỡ tỡ Jesus Cristo mỡ sỏg tag to vỡ tỡ gẻ.

Tito tỡ Creta ki ke ag ki rỡr

⁵ ả mỡ sỏg: “ha ver goj vãso tỡ Creta tỏ jẻ,” he ja nỡgtỡ, ả tỡ tỏ isỡ nẻn han kãn ja tỡ ẻn han kãn jẻ. Hã kỡ sỏg ả mỡ: “cidade kar ki igreja to pã'i vin,” he ja nỡ. ả tỡ ỳ kuprẻg kỡ, ti tỡ tỡ pã'i jẻ jẻ, kỡ tag to jykrẻn nỡ, ha mẻ. ⁶ ỳn kãmẻ kỏrẻg tỡ jãvãnh jẻ ả tỏg ke mỡ, ỳn prỡ pir han kỡ nỡ ti. Ti krẻ tỡ Jesus ki rã kỡ tỏg hã tỡnh mỡ, ag tỡ nẻn ỳ vẻnhmỡ han tỡ nỡn kỡ, ảjag panh vỡ jẻmẻn kỡ.

⁷ Ha vé, ỳ tỡ tỡ igreja to pã'i jẻ sỏr kỡ tỏg tỡ ỳn jykre hỏ jẻnh mỡ, ỳ tỡ Topẻ tỡ ki rỡr hỏ han mỡnh ke mỡ ti. Ti tỡ ả mrẻ ke ag to: “ag kãfỏr vỡ tỡ inh nỡ,” hẻnh ke tỡ vễ. ỳn fe tỡ gỡm ke (ka)mẻ vỡ hỏ tỡ nỡ, ỳ tỡ vinho kron (ka)mẻ ti, ỳn jũ (ka)mẻ ti. Kỡ tỏg ả tỡ rico kẻnh ke hã to ẻn ke tỡ nỡ gẻ. ⁸ Ti tỡ ỳ tỡ kuvar hỏ tỏ kãmũ ag mỡ: “inh mrẻ jẻ,” hẻn kỡ tỏg hỏ tỡ, ti tỡ vẻnh jykre hỏ to hỏ nỡn kỡ, ti tỡ vẻso jykrẻn kỡ, vẻnh jykre kuryj han kỡ, Topẻ vỡ hã ki krỏm kỡ, ti tỡ vẻnh kanhrãn kỡ tỡg kỡ. ⁹ Topẻ vỡ mẻ ja tỏg nỡ. Kỡ ti tỡ tag kã jatũ tỡ nỡn kỡ tỏg hỏ tỡ gẻ. Kỡ tỏg ỳ tỡ ả vỡ mẻg mỡ ag kanhrãn hỏ han ke mỡ gẻ, ag jyvẻn hỏ han jẻ tỏg ke mỡ gẻ. ỳ tỡ ti vỡ kafãn mỡ mỡ tỏg tỏ hỏ han ke mỡ gẻ, ti tỡ kã jatũ tỡ nỡn kỡ.

¹⁰ Ha vé, ỳ tỡ hẻn ri ke ag tỏg mẻ jãvãnh nỡtỡ. Vẻkẻ ag tỏg ỏn kỡ vẻmẻn tỡ. Ag tỡ ỳ lograr he sỏr vễ. Judeu ag vỡ tag to tar nỡtỡ, ha mẻ. ¹¹ ẻg tỡ ag vỡ tỡ tũg' hẻnh ke vễ. Ha vé, ỳ fag ne ag vỡ kri fi sỏr mỡ', kỡ fag tỏg Topẻ vỡ tovãnh sỏr mỡ, fag mẻn mrẻ hã, fag krẻ mrẻ hã. Un'ỏn ag tỏg tỡ, ỳ tỡ fag kanhrãn sỏr mỡ ag. Hã ra ag tỏg hã to nẻn ỳ ve sỏr mỡ, jãnkamy ti, ag tỡ rico nỡtỡ jẻ. ¹² Ag kãmỡ ỳ vỡ ki hã tỏ ja nỡ, ag jyvẻn tỡ ỳ, ti tỡ ag kato tẻ kỡ tag tỏn kỡ, ha mẻ: “Creta tỏ ke ag vỡ tỡ ỳn ỏn mẻ nỡtỡ,” he ja tỏg nỡgtỡ. “Mỡg jũ ri ke ag nỡtỡ. Rãnhrãj vãnh ag nỡtỡ, hã ra ag tỏg jẻn mág tãvỡ han sỏr tỡ,” he ja tỏg nỡgtỡ. ¹³ Hã ra tỏg ge nỡ. Hã kỡ ag jyvẻn tar han nỡ, ag tỡ Topẻ ki rã to tar nỡtỡ jẻ. ¹⁴ Ag mỡ: “Judeu ag tỡ vẻnh ỏ tỏ mỡ jẻmẻ sỏr tũg nỡ,” hẻmnỡ. Kỡ ag tỏg ag mỡ ẻprã ke jykre tỏ sỏr mỡ gẻ, ỳ tỡ Topẻ vỡ hỏ mẻ vãnh ag. ẻg mrẻ ke ag mỡ kẻ, ag tỡ ỳ tỡ ge vỡ jẻmẻ tũg jẻ. ¹⁵ Ha vé, ỳ tỡ vẻnh jykre kuryj han mỡ mỡ tỏg kuryj kar tỡ, jãvo ỳ tỡ vẻnh jykre pãno han mỡ mỡ tỏg pãno kar tỡ gẻ, ỳ tỡ ti ki ge tỡ ag mỡ. Ag krỡ vỡ kỏrẻg nỡ, kỡ ag tỏg ảjag jykre pãno to: “hỏ ti nỡ,” he tỡ, jãvo ag tỏg vẻnh jykre hỏ to: “kỏrẻg ti nỡ,” he tỡ gẻ. ¹⁶ “Topẻ ki kanhrỏ ẻg tỏg nỡ,” he ag tỏg tỡ, ỏn kỡ. Hã ra ag tỏg ti jykre han vãnh nỡtỡ. Ag tỡ ti jykre han vãnh ki ẻg tỏg vẻg tỡ, ag ỏn mỡ ti. ỳ tỡ ge to ti kỏrẻg nỡ, Topẻ ti, ag tỡ ti vỡ ki krỏm sỏr tỡ pẻ nỡtỡn kỡ. Nẻn ỳ hỏ han ki kagtỡg ag nỡtỡ.

2

Vẻnh kar jyvẻn hỏ han nỡ

¹ Ag jãvo Topẻ vỡ kãmẻn hỏ han nỡ, ả tỡ ag jyvẻn kỡ, Tito'. ² Kỏfa ag mỡ: “nẻn ỳ hỏ hã to jykrẻn nỡ,” hẻmnỡ. “Goj fa kron sỏr tũg nỡ. Nẻn hỏ kar hã han sỏrmỡ. Vẻso jykrẻn nỡ.

Ti ki rã há han ký nýtĩmnĩ. Jagně to há nýtĩmnĩ. Ti tovãnh sór tũg nĩ,” hemnĩ, kófa ag mý.

³ Ký kófa fag jyvěn nĩ gé. “Věso jykrén nĩ,” hemnĩ fag mý. “Ů to ví kónãn tũg nĩ. Vinho to én sór tũg nĩ. Věnh jykre há hã han nĩ, věnh kar tỹ ve jé. ⁴ Ký ãjag tóg tátãg fag kanhrãn há han ke mũ,” hemnĩ fag mý. “Fag kanhrãn nĩ, fag tỹ ãjag mén to há nýtĩ jé, fag krě to, ⁵ fag tỹ věso jykrén jé, nén ũ věnhmý han sór tũg jé, fag tỹ ãjag ĩn ki rĩr há han jé, věnh kar mý ví há han jé, fag tỹ ãjag mén ví mranh sór tũg jé, hemnĩ, tátãg fag mý,” hemnĩ, kófa fag mý. Fag tỹ tag han ký ũ tóg Topě ví to é henh ke tũ nĩ, fag tigrĩn.

⁶ Kyrũ ag jyvěn nĩ gé. Ag mý: “nén ũ kar to jykrén há han nĩ, ãjag tỹ ěg tỹ nén to én tĩ ěn han tũ nĩ je,” hemnĩ. ⁷ Tag han nĩ gé, Tito', věnh kar tỹ ã jykre há tag ve ký ã kóm věnh jykre há han sór jé gé. Ā tỹ ag kanhrãn ký ki hã tómnĩ. Kanhir ký ví tũg nĩ. ⁸ Topě ví tó há han nĩ, ũ tỹ ã to: “kygně ti huri,” he tũ nĩ jé. Ký ũ tỹ ěg kato tẽ mũ ag vỹ nén ũ tónh ke tũ nĩ. Ký tóg ag mý'a tĩnh mũ, ag tỹ ón ký ěg kato ví ja nĩn ký.

⁹ Ŭ mý rãnrãj tĩ ag jyvěn nĩ gé. Ag mý: “ãjag patrão ví han nĩ,” hemnĩ. “Ti mý há ěn han nĩ, ti tỹ ãjag mý ví há han jé. Ti ví kafãn tũg nĩ. ¹⁰ Ti tũ péju(g) tũg nĩ. Ti tũ ki rĩr há han nĩ, ti tỹ ã to ví kónãn tũ nĩ jé. Ā tỹ ti tũ ki rĩr há han ký tóg Topě ví to ví há han ke mũ, ěg kren han tĩ ěn ví to, ã patrão ti, ti tỹ Topě ví mẽ ký,” hemnĩ, ũ mý rãnrãj tĩ ag mý.

¹¹ Topě tóg ěg jagãgtãn sór mũ, ěprã ke kar ag, ký tóg ěg kren han sór mũ. Hã jé Jesus tóg kãtĩg ja nĩ. ¹² Ký tóg ěg kanhrãn sór mũ gé, ěg tỹ ti kato tẽ tũ nĩ jé, ěg tỹ nén ũ to én sór tĩ ěn han tũ nĩ jé gé, ěg tỹ ga kri mũn ký. ěg kanhrãn sór tóg mũ, ěg tỹ věso jykrén jé, věnh jykre kuryj han jé, Topě jykre ti. ¹³ Ti kãtĩg ve sór ěg nýtĩ, hã ký tóg ěg mý sér tĩ. Tỹ ti pã'i mág tãví nĩ, Topě ti. Tar tãví ti nĩ, ěg kren han tĩ tỹ Jesus Cristo ti ke gé. Ti ve jé ěg tóg ke mũ, ký tóg sĩnvĩ tĩnh mũ, sér pẽ. Hã ký tóg há tĩ, ěg tỹ tag ki mũ há han ký. ¹⁴ ěg jagfy tóg ter ja nĩ, ti tỹ ěg jykre kórég ěn kókén jé. Ký tóg ěg kykũg mũ, ěg jãnhkri nýtĩ jé. Ký ěg tóg tỹ ti tũ nýtĩnh mũ sir, vyr mý. ěg pi(jé) tỹ ũ tũ nýtĩ ha'. Ti tũ vỹ tỹ ěg nýtĩ, ěg tỹ věnh jykre há to tar nýtĩ jé.

¹⁵ Tag kar tómnĩ, Tito'. Tỹ ag jyvěn tar han nĩ gé kejěn. Ā tũ vē mýr, ã tỹ ag jyvěn ke ti, ký ũ jé ã to é he tũg.

3

Topě jykre

¹ Ag mý: “governo ví jěměmnĩ, ěg pã'i ví ti,” hemnĩ. “Ag ví ki króm nĩ. Ag tỹ nén ũ há to: han nĩ, hen ký han sórmnĩ, věsýmér,” hemnĩ. ² “Ů to ví kónãn tũg nĩ,” hemnĩ ag mý. “Ů ví kafãn tũg nĩ. Věnh kar mý ví há han nĩ. Věnh kar mý koměr hã vĩmnĩ,” hemnĩ ag mý. ³ Ha vé, vãsý ěg tóg kórég nýtĩ ja nĩgtĩ gé. Ki kagtĩg nýtĩ ja ěg nĩgtĩ. Ti ví mranh ja ěg tóg nĩgtĩ gé. Vãgfor mũ ja ěg tóg nĩgtĩ, ký ěg tóg ũ tỹ ón ký ěg mý věnh jykre tó mũ ěn ví han ja nĩgtĩ gé. ěg tỹ nén to én mũ ěn han kãn ja ěg tóg nĩgtĩ, nén ũ věnhmý kar ěn ti. Věnh jykre pãno han ja ěg tóg nĩgtĩ. Jagně tũ to én ja ěg tóg nĩgtĩ. ěg jykre kórég tag vỹ věnh kar mý kórég nĩ ja nĩgtĩ. Jagně to jũgũ (ka)mě (pě) ja ěg tóg nýtĩgtĩ. ⁴ Vãhã ěg tóg ki kanhró nýtĩ, Topě tỹ ěg jagãgtãn ký, ěg kren han tĩ ti. Ti tỹ ěg to há nĩ mẽ ěg tóg vãhã. ⁵ ěg pi(jé) věnh jykre kuryj han ja nĩgtĩ'. Hã ra tóg ge ra ěg jagãgtãn ja nĩgtĩ, hã ký tóg ěg kren han mũ sir. ěg han mãn ja tóg nĩ, ěg kygpe ký nýtĩn ký. Ā kuprĩg tỹ tóg ěg han mãn, ký ěg tãg nýtĩ ha. ⁶ ěg mý tóg ã kuprĩg jěně, ti tỹ tỹ ěg jagrě nĩ jé. Jesus Cristo hã tigrĩn tóg ti jěně, ěg kren han tĩ ěn hã tigrĩn. ⁷ Hã ký tóg ěg mý věnh pãte fón mũ sir. Ti tỹ ěg jagãgtãn hã vē. Ký tóg ěg mý ã tũ tovãnh sór mũ. Hã tó ja ti nĩ. Rĩr krýg ja tũ ve jé ěg tóg ke mũ. ěg tỹ tag ve jé tóg ěg mý ã kuprĩg jěně.

⁸ Tag vỹ ki hã ke nĩ. Hã ký věnh kar mý tómnĩ, ag jyvěn to krónh ke tũg nĩ. Ŭ tỹ Topě ki ge mũ ag jyvěn há han nĩ, ag tỹ věnh jykre há hã han sór jé. Ký ag tóg tag hã to vãsãn ke mũ. Tag vỹ há nĩ. Ký tóg ěg mý nén ũ há han ke mũ gé, věnh jykre há ti.

⁹ Judeu ù ag tóg véké ón ký vēmén sór tí. Tag jēmē sór tūg nī. Ājag gufã ag jiji tó sór ag tóg tí. Jagnē vī kafã ag tóg tí. Ký ag tóg Topē tỹ vãsỹ ěg jyvĕn tĩ ěn to jagnē vī kafã mũ gé. Tag kar vỹ ěg mỹ nĕn ũ há han ke tũ nĩ. Nĕn ũ tũ vĕ, tag ti, hã ký jēmē sór tūg nī. ¹⁰ Ũ tỹ vȳrmỹ vĕnh jykre han sór ký ti mỹ: “ke tūg ra,” hemnĩ. “Ke tūg ra,” he régre han nĩ, ti tỹ kãnhmar ã vī jēmĕg tũ nĩn ký. Tag pãte ti tovãnh nĩ, ti tỹ mĕ jãvãnh nĩn ký. ¹¹ Ti jykre vỹ pãno tãvĩ nĩ. Topē vī mranh ti tí. Topē vỹ ũ tỹ ge to: “kórég ti nĩ,” he tí.

Tito tỹ ne han ke ti

¹² Kejĕn sóg ã mỹ Ártēmas jĕnĕ sór mũ, ke tũ nĩ ký Tíquico ti. Ti tỹ ã tá jun ký, vĕsỹmĕr inh kukãm kãtĩg, cidade tỹ Nicópolis ra. Tá sóg kusa fĩn rãm ke mũ.

¹³ Zenas ki rĩr há han nĩ gé, lei to estudo han tĩ ěn ti, kar ký Apolo ti ke gé. Ký, ag tỹ mũ mãn ken ký ag mỹ vin nĩ, jãnkamy tỹ ag mỹ tūg ke mũ ěn ti.

¹⁴ Ký, ěg mré ke kar ag jyvĕn há han nĩ, ag tỹ vĕnh rãnhřãj há to tar nỹtĩ jé. Ký ag tóg ũn jagtar ag mỹ vin ke mũ gé, ģjag tỹ nĕn ũ vĕnh kãpãm ký. Tag ne há nỹnh mũ'. ěg tỹ Topē jykre han to ken hã vĕ, ký tóg ěg tỹ Topē mỹ nĕn ũ kanĕ han ri ke nĩ sir.

¹⁵ Inh mré nỹtĩ kar ag vỹ ã mĩ ěkrég tí. Ký ěg mré Jesus ki ge mũ kar ag mỹ: “ãjag mĩ ti ěkrég tí, Paulo ti,” hemnĩ, ěg to há nỹtĩ kar ag mỹ.

Topē mỹ sóg to vī tí, ti tỹ ģjag kar tar han jé.

Hã vĕ.

PAULO TỠ CARTA HAN: FILEMOM MỠ CARTA

¹ Paulo tỡ rá vễ, inh, isỹ se kỡ jễ ra rá vễ. Kỡ ẽg rẻgre tỡ Timóteo vỹ inh mrẻ rỏn mũ gẻ. Isỹ Filemom mỡ rỏn hỏ vễ. ỏ to hỏ tỏvỡ sỏg nỡ, Filemom'. Inh mrẻ ỏ tỏg Cristo rỏnhrỏj han tỡ gẻ. ² Kỡ sỏg ẽg rẻgre tỡ ỏfia fi mỡ rỏn mũ gẻ, Arquipo mỡ ke gẻ, inh mrẻ Cristo rỏnhrỏj to vỏsỏn tỡ tag ti, kar kỡ sỏg ỡ tỡ Filemom ỡn krẻm vẻnh mỏn tỡ ag mỡ rỏn mũ gẻ, ỡ tỡ Topẻ vỡ mẻ jẻ vẻnh mỏn tỡ ag mỡ.

³ Ờg jỏg tỡ Topẻ mỡ sỏg to vỡ tỡ, ti tỡ ỏjag tar han jẻ, ti tỡ ỏjag krỡ kuprỏg jẻ, Ờg Senhor tỡ Jesus Cristo panh ẻn ti.

Filemom jykre

⁴ Isỹ Topẻ mrẻ vẻmẻn kỡ sỏg ỏ mỡ ẻkrẻg tỡ, Filemom', kỡ sỏg ỏ to Topẻ mỡ vỡ hỏ han tỡ. ⁵ Ờg Senhor tỡ Jesus ki rỏ hỏ han kỡ ỏ tỏg nẻji nỡ, hỏ kỡ ỏ tỏg nẻji Jesus ki ge kỡ nỹtỡ ag to hỏ tỏvỡ nỡ gẻ. Tag mẻ inh. ⁶ Hỏ kỡ sỏg Topẻ mỡ to vỡ tỡ, ti tỡ ỏ krỡn hỏ han jẻ, ỏ tỡ ti jykre hỏ mỡ tỡg ki kanhrỏ hỏ nỡ jẻ, ỏ tỡ Ờg mrẻ Cristo ki rỏ kỡ jẻn kỡ. Kỡ tỏg ỏ krỡ tỡ hỏ' henh ke mũ, ỏ tỡ komẻr hỏ ti vỡ ki krỏm ki kanhrỏn kỏn jẻ. Ờg tỡ Cristo ki ge kỡ nỹtỡn kỡ Ờg tỏg vẻnh jykre sẻr to tar nỹtỡ.

⁷ Jỏvy', inh fe tỡ mrin ke ja ỏ nỡ, inh fe tỡ hỏ' he ja ỏ nỡ, ỏ tỡ iso hỏ tỏvỡ nỡn kỡ. Kỡ Topẻ ki ge kỡ nỹtỡ kar ag vỹ ỏ jykre ki kanhrỏ kar nỹtỡ. Kỡ ag fe tỏg mrin ke mũ gẻ.

Paulo tỡ Onésimo jagfy vỡ

⁸ Kỡ sỏg ỏ mỡ: “tag han jẻ ỏ tỏg ke mũ,” henh ke mũ vẻ, ⁹ hỏ ra sỏg ỏ mỡ vỡ tar han sỏr tũ nỡ. Komẻr hỏ sỏg ỏ mỡ to vỡ sỏr mũ, ỏ tỡ iso hỏ nỡ tugrỡn tag han jẻ, sỹ ỏ mỡ nẻn to vỡ sỏr mũ tag ti. Ha vẻ, kỏfa inh nỡ ha, inh, hỏ vỹ: Paulo, he mũ. Jesus Cristo tugrỡn sỏg se kỡ jẻ ha. ¹⁰ ỏ mỡ sỏg inh kỏsin tỡ Onésimo jagfy vỡ sỏr mũ. Inh kỏsin ri ke ti nỡ ha, ti tỡ isugrỡn Cristo ki rỏ kỡ, isỹ tag kỏ se kỡ jẻ hỏ ra. ¹¹ Vỏsỹ tỏg ỏ tũ ki rỡr tỡ vẻ, hỏ ra tỏg ỏ mỡ nẻn ỡ hỏ han ja tũ nỹgtỡ. Ờri tỏg hỏ nỡ ha, kỡ tỏg ỏ tũ ki rỡr hỏ han ke mũ ha, ti tỡ inh ki rỡr hỏ han mũ tag ri ke.

¹² Sỹ ỏ mỡ ti jẻnẻnh ke vẻ. Inh fe vỹ tỡ ti nỡ. ¹³ Hỏ kỡ sỏg ti jẻnẻ sỏr ja tũ nỡ vẻ, ti tỡ ỏ jẻgja ki inh ki rỡr jẻ, isỹ Jesus kỏme sẻr tugrỡn se kỡ jẻn ki. ¹⁴ Hỏ ra sỏg ỏ mỡ ti jẻnẻnh ke mũ, isỹ ỏ mỡ: “mỡ hỏ, ti tỡ inh ki rỡr mũ tag ti?” he ja tũ nỡn kỡ. Isỹ ti tỡg kamẻg mũ ra tỏg ỏ tỡ inh ki rỡr mũ ri ke nỡ vẻ, hỏ ra ỏ tỏg ki kagtỡg nỡ vẻ, ỏ tỡ inh mỡ nẻn ỡ hỏ han mũ tag ti. Hỏ kỡ sỏg ỏ mỡ ti jẻnẻnh ke mũ, ỏ tỡ ỏ tỡ nẻn han sỏr mũ ẻn han jẻ, vẻnh jykre hỏ ẻn ti.

¹⁵ ỏ camarada ja vẻ, Onésimo ti, hỏ ra tỏg ỏ tovỏnh kỡ vẻnh pẻju kỡ vyr. Vẻnh pẻju sỡ han tỏg, hỏ ra tỏg ỏ to vỹn ke mỏn ke mũ ha, isỹ ti jẻnẻn kỡ. Tỡg mỏn ke tũ ti nỡ ha. ¹⁶ Ti tỡ vẻnh pẻju kỡ tỡ mũ ẻn kỏ tỏg tỡ ỏ camarada jẻ vẻ, hỏ ra tỏg tỡ ỏ jỏvy jẻ ha, ỡri. ỏ to hỏ tỏvỡ tỏg jẻ ha, ti tỡ Cristo ki rỏ kỡ jẻn kỡ. Ti to sỏg hỏ tỏvỡ nỡ gẻ, kỡ tỏg ỏ tỡ ti to hỏ nỡ jẻ hỏ tỡ gẻ. ỏ camarada vỹ tỡ ti nỡ, hỏ ra tỏg tỡ ỏ jỏvy nỡ gẻ, kỡ tỏg ỏ tỡ ti to hỏ pẻ nỡn kỡn hỏ tỡ.

¹⁷ Kỡ, ỏ tỡ iso hỏ nỡn kỡ ti mỡ komẻr hỏ vỡmnỡ, ỏ tỡ komẻr hỏ inh mỡ vỡ ẻn hỏ han nỡ, ti mỡ, ti tỡ inh jẻgja ki ỏ to jun kỡ. ¹⁸ Ti mỡ ỏ tỡ nẻn ỡ pẻju kỡ ma vyr'? Ti mỡ ỏ mỡ nẻv(e) jẻ'? Kajỏm jẻ sỏg ke mũ, ti jagfy. ¹⁹ Vẻsỏg ki sỏg ỏ mỡ rỏn mũ, inh, hỏ vỹ: Paulo, he mũ. Kajỏm jẻ sỏg ke mũ, ti nẻv(e) ti, ki hỏ sỏg tỏ mũ. Hỏ ra ỏ tỏg inh mỡ nẻv(e) jẻ gẻ, ỏ tỡ isugrỡn Jesus ki ra kỡ. ²⁰ Ha vẻ, jỏvy'. Inh fe tỡ mrin kemnỡ, inh mỡ han nỡ, sỹ ỏ mỡ nẻn to vỡ mũ tag ti, Ờg tỡ jagnẻ mrẻ Ờg Senhor ki ge kỡ nỹtỡn kỡ. Inh fe tỡ hỏ' hemnỡ, ỏ tỡ tỡ inh mrẻ ke nỡn kỡ, ỏ tỡ inh mrẻ Cristo ki rỏ kỡ jẻn kỡ.

²¹ Isỹ ỏ mỡ nẻn to vỡ mũ tag han jỏ ỏ tỏg ke mũ, ki kanhrỏ sỏg nỡ. Hỏ kỡ sỏg ỏ mỡ rỏn mũ. Isỹ ỏ mỡ nẻn to vỡ mũ tag kỏfỏr han jẻ ỏ tỏg ke mũ gẻ, ki kanhrỏ sỏg nỡ.

²² Kỡ inh jo inh nỡr jỏfỏ ti kỏn nỡ gẻ. Topẻ vỹ kỏnhmar ỏjag vỡ mẻnh ke mũ, hỏ kỡ sỏg ỏjag vẻnh kỏtỡg ke mũ, ha vemnỡ.

Ū tỹ Filemom tá ke ag mĩ ěkrég tĩ ag

²³ Epafras vỹ ājag mĩ ěkrég tĩgtĩ. Inh mré tóg se kỹ jě, Jesus Cristo tigrĩn. ²⁴ Marcos vỹ ājag mĩ ěkrég tĩ gé, Aristarco ti ke gé, Demas ti ke gé, Lucas ti ke gé. Inh mré ag tóg rānhrāj mũgtĩ, tag ag.

²⁵ Ěg Senhor tỹ Jesus Cristo jé ājag tar han kān. Hā vē.

HEBREU AG MỸ CARTA

Topě kósin

¹ Topě vỹ vāsỹ ěg jóg'jóg ve ag mré vēmén (ka)mě ja nĩgtĩ. Ag mỹ tóg tó mǎn', tó mǎn', he ja nĩgtĩ. Ti vỹ tó tĩ ag mỹ tóg tó ja nĩgtĩ, vāsỹ, ag tỹ vĕnh kar mỹ ti vỹ kǎmĕn jé. ² Ūri tóg kakó tĩ ha, kurǎ tỹ ěgno ti, kỹ tóg ūri ǎ kósin jĕnĕ, ti tỹ ěg mỹ Topě vỹ tó jé. Ti mré tóg nĕn ũ kar hyn han ja nĩgtĩ, Topě ti, ǎ kósin mré. Kỹ tóg ti mỹ nĕn ũ kar tag vin ke mũ gé. Ti hǎ mỹ tóg vin sór mũ, Topě ti, ǎ tũ kar ěn ti. ³ ěg tỹ Topě kósin ve kỹ ěg tóg Topě tỹ tỹ ũn mág nĩ ki kanhró nỹtĩ. Ti ri ke pĕ ti nĩ, ti hǎ pĕ, tỹ ti Topĕn hǎ ve nĩ, ti kósin ti. Ti vỹ vỹ tar nĩ, tỹ tóg ěg tỹ nĕn kar vĕg mũ tag ki rĩr tĩ, ǎ vỹ tỹ. Ti hǎ vỹ ěg tỹ Topě vỹ mranh ěn tỹ tũg' he tĩ, kỹ tóg ěg jǎnhkrig kỹ ěg fĕg ke mũ. ěg jagfy ter kar kỹ tóg Topě pĕgja tá nĩ nĩ, ũn tỹ vĕnh kar tar kǎfór nĩ ěn pĕgja tá, ti kósin ti.

Topě kósin tỹ Topě tỹ jĕgnĕ jafǎ ag kǎfór nĩ

⁴ Topě kósin vỹ Topě tỹ jĕgnĕ jafǎ ag kǎfór nĩ, kanhkǎ tǎn ag. Ti jiji vỹ ag jygy kǎfór nĩ gé. Hǎ kỹ ěg tóg vĕg tĩ, ti tỹ ag kǎfór nĩ ti. ⁵ Topě pi(jé) ǎ tỹ jĕnĕ jafǎ ag kǎ ũ mỹ: “inh kósin vỹ tỹ ǎ nĩ,” he ja nĩgtĩ'. “Ūri hǎ sóg ǎ mỹ: tỹ inh ǎ panh nĩ, he mũ,” he ja tũ ti nĩ, Topě ti, ǎ tỹ jĕgnĕ jafǎ ag kǎ ũ mỹ. Kỹ tóg ag kǎ ũ to: “ti panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tũ nĩ gé. ǎ kósin hǎ to tóg tag tó ja nĩ, Topě ti.

⁶ ǎ kósin ve ěn jĕnĕ ja ti nĩ, ěg to, Topě ti. ǎ tỹ ti jĕnĕn kỹ tóg tag tó gé, ha mĕ: “isỹ jĕgnĕ jafǎ ag vỹ ti krĕm mũg ke kǎn mũ, ha vemnĩ,” he ja ti nĩ, Topě ti.

⁷ Hǎ ra ti tỹ jĕgnĕ jafǎ ag to vĕnh jykre tag tóg rán kỹ nĩ, ha mĕ: “Topě vỹ ǎ tỹ jĕgnĕ jafǎ ag tỹ kǎka ri ke han, kỹ tóg ag tỹ pĩ gru ri ke han mũ gé, Topě ti,” he tóg mũ gé, Topě vỹ rán ki, kanhkǎ tǎn ag to.

⁸ Kỹ tóg ǎ kósin mỹ tag tó, ha mĕ: “Topě vỹ tỹ ǎ nĩ. ǎ tỹ tỹ pǎ'i mág nĩ vỹ tũg' henh ke tũ pĕ nĩ. Vĕnh jykre kuryj han ǎ tĩ, ǎ krĕm ke kar ag mỹ. ⁹ Vĕnh jykre kuryj to ǎ há nĩ. Vĕnh jykre pǎno to ǎ jũ nĩ. Hǎ kỹ sóg ǎ kuprĕg, isỹ tỹ Topě nĩn kỹ, isỹ tỹ ǎ pǎ'i nĩn kỹ. ǎ tỹ sóg ũn mág han, ǎ krĕm ke kar ag kǎfór ǎ tóg nĩ. ǎ tỹ tỹ pǎ'i mág nĩ tugrĩn ǎ fe tóg mrin kenh ke mũ, vĕnh kar fe tỹ mrin ke kǎfór,” he ja tóg nĩ gé, Topě ti, ǎ kósin ti mỹ.

¹⁰ Kỹ tóg ti mỹ tag tó gé, ha mĕ: “ěg tỹ nĕn (ũ) kar han ve ki ǎ tóg ga han, kanhkǎ ti ke gé, ǎ nĩgé tỹ. ¹¹ Tũg' he kǎn jé tóg ke mũ, ǎ tỹ nĕn han ja tag ti, jǎvo ǎ hǎ tóg tũg' henh ke tũ pĕ nĩ. ǎ tỹ nĕn han ja tóg ǎ sinsin kỹ kugnǎnh ke mũ, kur ri ke. ¹² Ti kǎnhpĕn jé ǎ tóg (ke) mũ, ěg tỹ kur kónhpĕn ri ke. ěg kur kunũg ěg tĩ, ěg tỹ ũ kǎra rǎg jé. Tag ri ke han jé ǎ tóg ke mũ, ǎ tỹ han ja kar tag ti tỹ, ǎ tỹn kókĕn kỹ. Hǎ ra ǎ hǎ tóg tũg' henh ke tũ nĩ. Sin ke tũ pĕ ǎ tóg nĩ jǎvo, kófǎn ke tũ pĕ a tóg nĩ jǎvo,” he ja tóg nĩ, Topě ti, ǎ kósin ti mỹ.

¹³ Hǎ ra Topě pi(jé) ǎ tỹ jĕgnĕ jafǎ ag mỹ: “inh pĕgja tá nĩ,” he ja nĩ'. “Nĩ ra ver, inh pĕgja tá, sỹ ǎ kato vỹ mũ ag tỹ ǎ krĕm vin jé, kỹ ag se vĕ sir,” he ja tũ ti nĩ, ti tỹ jĕgnĕ jafǎ ag mỹ. ǎ kósin hǎ mỹ tóg tag tó. ¹⁴ Topě tỹ jĕgnĕ jafǎ ag vỹ vĕnh kuprĩg ri ke nỹtĩ, hǎ ra ag tóg Topě rǎnhraj ti han tĩ. Topě vỹ ag jĕgnĕg tĩ, ag tỹ ti tũ ag jy nĩgǎn jé, ũn krenkren ke mũ ěn ag jy.

2

ěg tỹ Topě vỹ to é henh ke tũ

¹ Hǎ kỹ tóg há tĩ, ěg tỹ ti vỹ mĕ kỹ ti jykre hǎ han kỹ, ěg tỹ tỹ prǎnh ke tũ nĩ jé. ² Topě tỹ jĕgnĕ jafǎ ag vỹ vāsỹ Topě vỹ ma kǎmũ ja nĩgtĩ. Hǎ ra ag tóg ki hǎ tó ja nĩgtĩ. Ū tỹ ag vỹ ki krov tũ ěn vóg kónǎn ja ti nĩgtĩ, Topě ti. “Ū tỹ ag vỹ mĕ sór tũ ěn ag vóg kónǎn jé sóg ke mũ,” he ja ti nĩ, hǎ kỹ tóg hǎ ra ke ja nĩgtĩ. ³ Kỹ ěg tóg ūri kren ke tũ nĩ gé, ěg tỹ ti to é hen kỹ, ti tỹ ěg kren han sór mũ ra. Nĕn ũ mág pĕ vĕ mỹr, Topě tỹ ěg krenkren han sór mũ tag ti. ěg pǎ'i vỹ ǎ mré mũ tĩ ag mỹ tó vĕn, ti tỹ ěg kren han sór mũ tag ti. Ū tỹ ti vỹ mĕg mũ ag vỹ ěg mỹ tó ja nĩgtĩ gé, ti tỹ ěg kren han sór tag ti, hǎ kỹ ěg tóg ki kanhró

nýtī ha. ⁴ Kĩ Topē vỹ ù tỹ ěg mỹ ti vĩ tó mũ ěn ag vĩ to: “há ti nĩ,” he ja nĩ gé, hã kỹ tóg ag tar han, ag tỹ ěg tỹ nén ù han vãnh ěn hyn han jé, milagre ti, ěg tỹ vėsóg ki nén han ki kagtĩg ěn. Tag to ag tar nýtī, Topē tỹ ag tãn kỹ, ù tỹ ti vĩ tó tĩ ag. Kỹ tóg ag mỹ ã kuprĩg jĕnĕ gé. Ti hã ne to jykrĕn kỹ: “tag tar han jé sóg ke mũ, ěn to, kỹ sóg ù ěn tar han ke mũ, ù ù to,” he ja nĩ, ti vĩ tó tĩ ag to, Topē ti.

Topē kósin tỹ ěg tỹ ùn mág han ke

⁵ Topē vỹ nén (ù) kar ěn han mãn ke mũ, kỹ tóg tỹ ù tãg nýtĩnh mũ. ěn kri pã'i vỹ tỹ ěg nýtĩnh mũ, ěg tỹ tỹ ěprã ke nýtī ra. Ti tỹ jĕgnĕ jafã ag pi(jé) tỹ ga tãg kri pã'i nýtĩnh mũ'. ⁶ Hã kỹ ti vĩ tó tĩ ù vỹ tag rán ja nĩ, ti vĩ rán ki, ha mẽ. Topē mỹ tóg: “tỹ ěg tóg nén ù tũ nýtī vĕ, ěg tỹ tỹ ěprã ke nýtĩn kỹ, hã ra ã tóg ěg hã mĩ ěkrĕn kỹ nĩ nĩ,” he ja nĩ. “Tỹ ěg tóg nén ù tũ nýtī vĕ, ěg tỹ tỹ ěprã ke krĕ nýtĩn kỹ, hã ra ã tóg ěg ki rĩr tĩ. ⁷ Kỹ ã tóg prỹg pipir ki ã tóg ěg tỹ ùn kãsir han ja nĩ, kỹ ěg tóg ěn kã ã tỹ jĕgnĕ jafã ag krĕm nýtī. Tag pãte ã tóg ěg tỹ ùn mág han ke mũ, ùn tar, pã'i mág tỹ ùn há nĩ ěn ri ke, ěg tỹ vĕnh kar kri nýtī jé. ⁸ Kỹ ã tóg ěg krĕm nén (ù) kar vin kãn ke mũ,” he ja tóg nĩ, Topē mỹ, Topē vĩ tó tĩ ti.

Ha vé, Topē vỹ ěg krĕm nén (ù) kar vin ja nĩ, ěg tỹ tỹ nén (ù) kar pã'i nýtī jé. Kỹ nén (ù) kar vỹ ěg krĕm nýtī. ěg krĕm nýtī tũ vỹ tũ tĩ. Hã ra ěg tóg ver vĕg tũ nĩgtĩ, nén (ù) kar tỹ ěg krĕm nýtī ti. Ver tóg nén ù ù tỹ ěg tũ tũ nýtī ven nĩ. ⁹ Hã ra ěg tóg Jesus hã tỹ tỹ ùn mág nĩ ěn vĕg tĩ, ùri, ti tỹ tỹ ùn há nĩ ěn, pã'i mág ri ke. Prỹg pipir ki Jesus tóg Topē tỹ jĕgnĕ jafã ěn ag krĕm ke ja nĩ, kanhkã tãn ěn ag krĕm, kỹ tóg ěg kar jagfy ter ja nĩ, Topē tỹ ěg jagãgtãn kỹ. Kỹ tóg ùri tỹ ùn mág pĕ nĩ nĩ, ti tỹ ěg jagfy ter ja ěn tugrĩn.

¹⁰ Topē vỹ tỹ nén (ù) kar kri ke nĩ, kỹ nén (ù) kar vỹ ti tugrĩn rĩnrĩr nýtī. Hã kỹ tóg vĕnhmỹ tũ nĩ, Topē tỹ Jesus mỹ: “ã jagtar tugrĩn ã tóg tỹ ùn há tãvĩ nĩnh mũ,” hen kỹ. Hã jé Jesus tóg jagtar nĩ ja nĩgtĩ, ti tỹ tỹ ùn há tãvĩ nĩn jé. Kỹ tóg ùn e krenkren han mũ sir. ěg jo tóg tĩg mũ sir, Topē krĕ kar ag jo, ěg tỹ ti ri ke há nýtī jé gé, ěg tỹ Topē jamã sĩnvĩ ěn tá junjun jé, ti mré.

¹¹ Ha vé, Jesus vỹ ěg tar han tĩ, ěg tỹ Topē vĩ mranh mãn sór tũ nĩ jé. Kỹ ù tỹ ěg tar han mũ vỹ ěg mré jóg pir nĩ, Jesus ti. Hã kỹ tóg ěg to: “inh jãvy ag, inh ve fag,” he mũ. ěg to tóg mỹ'ãg tũ nĩ. ¹² ěg to tóg: “inh jãvy ag mỹ sóg ã jiji tónh ke mũ, jóg',” he ja nĩ. “Ag rĩnve sóg ã tỹ tỹ ùn há nĩ ěn kãmĕn ke mũ, ã jé tó jé sóg ke mũ, ag to sóg mỹ'ãg ke tũ nĩ,” he ja tóg nĩ, Jesus ti, ěg to. ¹³ Kỹ tóg: “Topē ki sóg rã kỹ jĕ,” he mũ gé. Kỹ tóg: “inh mré ke ag hã vĕ, Topē tỹ inh mỹ ùn vin mũ ag kar hã vĕ, fag ke gé,” he ja nĩ gé.

¹⁴ Jesus mré ke ěn ag hã vỹ tỹ ěprã ke ag nýtī, fag ke gé. Hã kỹ Jesus vỹ ag mré ke tỹ ěprã ke nĩ ja nĩ gé, hã kỹ tóg ěg jagfy ter ja nĩ. Ti tỹ Japo tũg ke vĕ, ã ter tugrĩn. Japo vỹ ěg tén sór to tar nĩ, hã ra Jesus vỹ ti tỹ tũ' henh ke mũ. ¹⁵ Kỹ tóg ěg krenkren han ke mũ, ěg tỹ ěg ter ke kamĕgmĕg kỹ. ěg ter ke tugrĩn ěg tóg nén (ù) tỹ ěg tén ke mũ kar kamĕg tĩ, nén (ù) tỹ ěg vóg kónãn tĩ kar ke gé. Hã ra Jesus tóg ěg krenkren han mũ, kỹ ěg tóg nén ù kamĕg mãn ke tũ nĩ ha. ¹⁶ Ti pi(jé) Topē tỹ jĕgnĕ jafã ag krenkren han mũ', kanhkã tãn ag'. Abraão krĕ ag hã krenkren han tóg mũ, ag jóg mré hã, hã kỹ tóg rán kỹ nĩ. ¹⁷ Hã jé tóg ã jãvy ag ri ke nĩ ja nĩgtĩ, Jesus ti. Tỹ tóg ěg hã pĕ ja nĩgtĩ. ěg tỹ nén (ù) kar han mũ ve kãn ja ti nĩgtĩ, ěg jagtar mré hã. Hã kỹ tóg ěg jagfy vĕnh fĕg, kỹ tóg ěg tỹ Topē vĩ mranh tỹ tũ' he ja nĩ. Topē tũ ki rĩr tĩ to pã'i mág tỹ vĕnh rãnrãj han mũ ěn ri ke han ja ti nĩ, Jesus ti. Ti tỹ ěg jagfy Topē tũ ki rĩr nĩn kỹ tóg ěg jagãgtãn tĩ. Ki rĩr há han tóg tĩ gé, ti tỹ ěg mré tỹ ěprã ke ja nĩn kỹ. ¹⁸ ěg mré tóg jagtar ja nĩgtĩ, Jesus ti. Japo vỹ ti tỹ Topē vĩ mranh han sór ja nĩgtĩ gé, ěg ri ke, hã ra tóg mranh ja tũ nĩ inhhã. Hã kỹ tóg ki kanhró nĩ, ěg tỹ nén (ù) vĕg mũ kar ki. Hã kỹ tóg tag kar to ěg tar han ki kanhró nĩ inhhã.

3

Jesus tỹ tỹ Moisés kri ke nĩ

¹ Inh kanhkã', Topē tũ vỹ tỹ ãjag nýtī. Kỹ tóg ãjag kuprĕg, ãjag tỹ kanhkã tá ve jé. Hã kỹ Jesus mĩ ěkrĕn nĩ. Topē vỹ ti fĕg. Kỹ tóg ěg mỹ Topē tũ ki rĩr tĩ to pã'i mág ěn ri ke nĩ,

ĕg tŷ ti ki rā kŷ. Ti hā kāmén ĕg tóg tŷ gé. ² Ū tŷ ti fĕg mŷ ĕn rānhrāj han tóg tŷ, Moisés ri ke. Moisés vŷ Topĕ tŷ kar ki rŷr há han ja nŷgtŷ gé, Topĕ povo kar ki, ti ĩn krĕm ke kar fag ki. ³ Hā ra Jesus vŷ Moisés káfór nŷ. Ū tŷ ĩn han tŷ vŷ ū tŷ ĩn ki rŷr tŷ ĕn káfór nŷ. Ri ke ti nŷ, Jesus tŷ Moisés káfór nŷ ti. Ĕprā ke vŷ tŷ ti nŷ, Moisés ti, kŷ Jesus vŷ ti káfór nŷ. ⁴ Gŷr kar vŷ panh nŷtŷ gé. Ū tŷ vĕnh kar han mŷ vŷ tŷ Topĕ ti nŷ. ⁵ Moisés vŷ Topĕ tŷ ag ki rŷr ja nŷgtŷ, kŷ tóg ki rŷr há han ja nŷgtŷ. Topĕ camarada vŷ tŷ ti nŷ ja nŷgtŷ, kŷ tóg Topĕ ĩn krĕm ke fag ki rŷr nŷ ja nŷgtŷ. Hā ra tóg Cristo tŷ nĕn han ke ĕn kāmén ja nŷ gé, Moisés ti. ⁶ Cristo vŷ tŷ Topĕ kósin nŷ, kŷ tóg Topĕ tŷ ag ki rŷr há han tŷ, hā ra ag tóg tŷ ti tŷ nŷtŷ, ti ĩn krĕm ke kar ĕn ag, ā tŷ ūn ki rŷr tŷ ag, fag ke gé. Ĕg hā vĕ, ti tŷ vŷ tŷ ĕg nŷtŷ, ti ĩn krĕm ke vŷ tŷ ĕg nŷtŷ, ĕg tŷ ti to tar nŷtŷn kŷ, ĕg tŷ ti kāmén há han kŷ, ti tŷ ĕg mŷ sér nŷn kŷ, ĕg tŷ tá nĕn venh ke ti.

Ĕg tŷ vĕnhkán ke

⁷ Tag tó tóg mŷ, Topĕ ti, ā kuprŷg tŷ, ha mĕ: “Ājag tŷ ūri inh vŷ mĕ kŷ vĕnh kutu han tŷg nŷ,” he tóg. ⁸ “Ājag jóg'jóg ve ag vŷ vĕnh kutu han ja nŷgtŷ, kŷ ag tóg inh kato vāsán ja nŷgtŷ, ag tŷ ga kórég ki nŷtŷn kŷ,” he tóg, Topĕ ti. ⁹ “En ká ag tóg iso vŷ pátigtén ja nŷgtŷ gé. “Ĕg tŷ ti vŷ mranh mŷ ra tóg ĕg vóg konán ke tŷ nŷ,” he ja ag tóg nŷgtŷ, ag tŷ isŷ nĕn han mŷ ĕn ve ja ra, isŷ prŷg tŷ 40 (ke) ĕn ki ag ki rŷr há han mŷ ra. ¹⁰ Hā kŷ sóg ag to jŷ ja nŷ. Ag to sóg: “kórég ag nŷtŷ,” hé. “Vĕnh jykre há to jykrén tŷ ag tóg nŷtŷgtŷ,” he sóg. “Inh japry ve sór ja tŷ ag tóg nŷtŷ, inh jamŷn ti,” he sóg. ¹¹ Kŷ sóg ag to jŷ nŷn kŷ (sóg) ag to vŷ jŷ han kŷ tag tó, ha mĕ. “Sŷ ag vĕnhkán han ke vĕ vĕ, hā ra ag tóg iso vŷ jŷ han ja nŷ, hā kŷ ag tóg vĕnhkán han ke tŷ nŷ ha. Hā kŷ ag ri ke han tŷg nŷ, ājag tŷ ūri inh vŷ mĕ kŷ, he sóg mŷ,” he tóg, Topĕ ti.

¹² Inh kanhkā, tag to jykrén, ājag tŷ Topĕ kato vāsán sór tŷ nŷ jé, ājag tŷ ti vŷ mranh sór tŷ nŷ jé gé, ājag tŷ Topĕ tovānh sór tŷ nŷ jé. Ti hā ne ĕg rŷnrŷr han ki kanhró nŷ, Topĕ ti. Hā kŷ ti tovānh tŷg nŷ. ¹³ Jagnĕ jyvĕn nŷ, kurā kar ki, ūri mŷr. Ājag tŷ jagnĕ jyvĕn to tar nŷtŷn kŷ ājag tóg Topĕ to tar nŷtŷnh ke mŷ gé, ha vemnŷ, kŷ ājag kāmŷ ū vŷ vĕnh kutu han ke tŷ nŷ. Ĕg tŷ ti vŷ mranh kŷ ĕg tóg kutu nŷtŷ, ha mĕ, ti vŷ mranh tŷ ĕg mŷ sŷnvŷ nŷn kŷ. ¹⁴ Ha mĕ, Cristo tŷ vŷ tŷ ĕg nŷtŷ, ĕg tŷ ti tovānh sór tŷ nŷtŷn kŷ. Ĕg tŷ ti ki rā ve ká ĕg tóg ti to tar nŷtŷ ja nŷgtŷ. Ĕg tŷ ĕn ri ke ti to tar nŷtŷn kŷ ĕg tóg tŷ ti tŷ nŷtŷ. ¹⁵ Hā kŷ tóg ĕg mŷ: “ājag tŷ ūri inh vŷ mĕ kŷ vĕnh kutu han tŷg nŷ,” he mŷ. Ājag jóg'jóg ve ag vŷ tóg vĕnh kutu hyn han' he ja nŷgtŷ, kŷ ag tóg inh kato vāsānsān, isŷ ag jykre ve sór ja nŷn kŷ. Ag ri ke han sór tŷg nŷ,” he tóg mŷ ĕg mŷ. ¹⁶ Ū tŷ hĕ nŷ hŷn ti vŷ mĕ kŷ ti kato vāsānsān ja nŷgtŷ? Ū tŷ ga tŷ Egito tá ká pa ja ĕn ag hā ja vĕ, ha mĕ, Moisés tŷ tá ag tatŷn kátŷg kŷ. ¹⁷ Kŷ Topĕ hŷn ū tŷ hĕ to jŷ ja nŷgtŷ, prŷg tŷ 40 (ke) ĕn ki? Ū tŷ ti vŷ mranh ja ĕn ag hā to tóg jŷ ja nŷ, hā kŷ ag tóg ga kórég ĕn ki tŷ' he kán. ¹⁸ Kŷ Topĕ hŷn ū tŷ hĕ to: “vĕnhkán ke tŷ ag nŷtŷ ha,” he ja nŷgtŷ? Ū tŷ ti vŷ han sór tŷ ĕn ag to ke ja vĕ, mŷr, ha mĕ. ¹⁹ Ag tŷ ti tovānh kŷ, hā kŷ ag tóg ag tŷ nĕn ve sór ja ĕn ve ja tŷ nŷ sir, mŷr, ha mĕ.

4

¹ Topĕ vŷ ĕg mŷ tag tó ja nŷgtŷ gé. Ti tŷ ĕg vĕnhkán han sór vĕ, kŷ ti vŷ to é he tŷg nŷ. Vĕnh ki rŷr há han nŷ, ājag tŷ to krónh ke tŷ nŷn jé. ² Mĕ ĕg huri, Topĕ tŷ ĕg mŷ nĕn han sór mŷ ĕn ti, ū tŷ ga kórég mŷ mŷ ĕn ag tŷ mĕ ri ke han ĕg tóg huri. Hā ra ag tóg véké mĕ ja nŷgtŷ, kri fi ja tŷ ag nŷtŷgtŷ, ag tŷ mĕg mŷ ra. Hā kŷ tóg ag mŷ nĕn ū há han ja tŷ nŷ, Topĕ vŷ ti. ³ Ĕg tŷ ti ki ge hā kŷ ĕg tóg vĕnhkánkán ke mŷ. Hā kŷ Topĕ vŷ tag tó, ha mĕ: “ag to jŷ nŷn kŷ sóg ag to vŷ jŷ han kŷ tag tó, ha mĕ. “Sŷ ag vĕnhkán han ke vĕ vĕ, hā ra ag tóg vĕnhkán ke tŷ nŷtŷ ha,” he ja ti nŷ. Topĕ vŷ vāsŷ vĕnhkán ja nŷgtŷ, ti tŷ nĕn (ŭ) kar pĕ han han ti kŷ. Kŷ nĕn (ŭ) kar vŷ hyn han kŷ nŷtŷ ha. ⁴ Hā kŷ kurā tŷ 7 (ke) ĕn to tag tóg rán kŷ nŷ, ha mĕ. Topĕ tŷ nĕn kar hyn han kán ja to tag tóg rán kŷ nŷ, ha mĕ: “kurā tŷ 7 (ke) ki Topĕ vŷ vĕnhkán, ā rānhrāj han kán kŷ,” he tóg mŷ, Topĕ vŷ rán ki. ⁵ Hā ra tóg Israel ū ag to tag tó ja nŷ gé, hā vŷ: “kŷ ag tóg vĕnhkánkán ke tŷ nŷtŷ ha,” he mŷ gé. ⁶ Hā kŷ ū ag tóg vĕnhkánkán ke mŷ. Vāsŷ Topĕ tóg ĕg jóg'jóg ve ag mŷ ag vĕnhkánkán ke tag

tó ja nĩgtĩ vĕ, hã ra ag tóg ti vĩ jĕmĕ ja tũ nĩgtĩ, hã kÿ ag tóg vĕnhkánkán ke tũ nÿtĩ ha. Kÿ Topĕ tóg ũ ag kuprĕg ja nĩgtĩ, kÿ tóg ag hã mÿ ag vĕnhkánkán ke ti nĩm mũ sir, ĕg hã mÿ. ⁷ Kurã tãg nĩm ja ti nĩ gé, ĕg vĕnhkán ke to, hã vÿ: “ũri,” he mũ. Hã kÿ Davi tóg kurã tãg tag to tag rán ja nĩ, ha mẽ. Ag tÿ ga kórég ĕn tá kãpa kar kÿ, ag tÿ ga há tá junjun kar kÿ Davi tóg tag rán ja nĩ gé, ha mẽ: “ãjag tÿ ũri ti vĩ mẽ kÿ vĕnh kutu han tũg nĩ,” he ja tóg nĩ. Kurã tãg to ken hã vĕ.

⁸ Josué vÿ Israel ag mré ga há ĕn ra tĩg ja nĩgtĩ. Hã ra ag tóg tá vĕnhkán pĕ han ja tũ nĩgtĩ ver, hã kÿ Davi vÿ ag mÿ kurã ũ tó ja nĩ, ag vĕnhkán pĕ han ke ĕn ti tó ja ti nĩgtĩ. ⁹ Ha mẽ, Topĕ povo vÿ vĕnhkán ke mũ, ha vemni, ti tÿ ag mÿ kurã nĩv ki. ¹⁰ Ũ tÿ vĕnhkán pĕ ĕn vĕg mũ vÿ ã rãnrãj ki vĕnhkán ke mũ, Topĕ tÿ ã rãnrãj ki vĕnhkán mũ ĕn ri ke, kurã tÿ 7 (ke) ĕn ki. ¹¹ Hã kÿ vãsãnsã, ãjag tÿ tÿ prãnh ke tũ nĩ jé, ãjag tÿ ga kórég kri mũ ja ĕn ag nón ti vĩ mranh tũ nĩ jé, ãjag tÿ ãjag vĕnhkán ke ĕn ve jé.

¹² Topĕ vĩ hã tugrĩn ĕg tóg rĩnrĩr nÿtĩ. Ā vĩ hã tÿ tóg nĕn kar hyn han tĩ. Rógro jã régre vÿ nĕn (ũ) kym há nÿgtĩ. Hã ra Topĕ vĩ vÿ ti tÿ nĕn (ũ) kym há kãfór han tĩ, kÿ ti vĩ tóg ĕg kãra rã tĩ, ĕg nĩ ti kãra, ĕg kukã ti kãra ke gé, ĕg krĩ ti kãra ke gé, ĕg kuprĩg ti kãra tóg rã tĩ gé. Kÿ tóg ĕg tÿ nĕn (ũ) to jykrĕn mũ kar ki kanhró nĩ, ĕg tÿ nĕn (ũ) han sór mũ ki kanhró kar ti nĩ gé, Topĕ ti. ¹³ Nĕn (ũ) kar ki kanhró tóg nĩ, Topĕ ti, ã tÿ nĕn han mũ kar ki kanhró tóg nĩ. Nĕn ũ tóg ti mÿ vĕnh péju kÿ nĩ tũ pĕ nĩ. Ũ tóg ti vatãnh tá nĕn ũ han ke tũ pĕ nĩ gé. Ki kanhró kar ti nĩ, ũ tÿ ĕg jykre tugnÿm ke mũ ĕn ti.

Jesus tÿ ĕg jagfy vĩnh ke

¹⁴ Ti to tar nÿtĩmnĩ, ha mẽ. Ti ki rã kÿ ãjag nÿtĩ, kÿ ti to tar nÿtĩmnĩ. ĕg jagfy Topĕ tũ ki rĩr tĩ to pã'i mág vÿ nĩ nĩ, hã vÿ: Jesus, he mũ, Topĕ kósin, he mũ. ĕn vÿ kanhkã tá jun huri. ¹⁵ Ti pi(jé) ĕg krój nÿtĩ tag ki kagtĩg nĩ'. Ki kanhró tóg nĩ mÿr. ĕg ri kĕn tóg jagtar nĩ ja nĩgtĩ gé, kÿ Japo vÿ ti tÿ Topĕ vĩ mranh han sór ja nĩgtĩ gé, hã ra tóg inhhã mranh ja tũ nĩgtĩ. ¹⁶ Hã kÿ ĕg tóg Topĕ mré vĕmĕn ke mũ, jatun mÿ. Mũmĕg vãnh nÿtĩ jé ĕg tóg ke mũ. ĕg jagãgtãn jé tóg ke mũ, Topĕ ti, kÿ tóg ĕg tar han ke mũ gé, ĕg krój nÿtĩn kÿ.

5

¹ Ĕprã ke tÿ Topĕ tũ ki rĩr tĩ to pã'i mág jykre vÿ ge nÿgtĩ, ha mẽ. Ā mré ke ag jagfy tóg vĩ tĩ, Topĕ mré, kÿ tóg ag jagfy Topĕ mÿ nĕn ũ pũn tĩ gé, kÿ tóg ag mĕg tãnh kÿ pũn tĩ gé, ag tÿ Topĕ vĩ mranh ja tugrĩn. ² Hã ra tóg tÿ ĕprã ke nĩ gé, ag mré, ag krój ri ke tóg nĩ gé, hã kÿ tóg ag krój nÿtĩ ra ag jagãgtãn há han tĩ, ũ tÿ Topĕ vĩ mranh sór tũ ra mranh mũ ĕn ag. ³ Mranh tóg tĩ gé, Topĕ tũ ki rĩr tĩ to pã'i mág ĕn ti, hã kÿ tóg ã tÿ mranh mũ ĕn to Topĕ mÿ tãnh kÿ pũn tĩ gé, ã mré ke ag tũ ĕn mré. ⁴ Hã ra tóg vĕso: “inh hÿn Topĕ tũ ki rĩr sór mũ, kÿ inh hÿn tÿ tag to pã'i mág nĩnh mũ,” hĕnh ke tũ pĕ nĩ. Topĕ hã ne ũ to: “isũ ki rĩr tĩ to pã'i mág vÿ tÿ ã nĩnh mũ,” he tĩ', ti tÿ vãsÿ Arão kuprĕg vĕn ĕn ri ke.

⁵ Hã kÿ Cristo vÿ vĕsóg ki tag to jykrĕn ja tũ nĩ gé. Ti pi(jé) vĕsÿ pã'i han ja nĩgtĩ', vĕsÿ Topĕ tũ ki rĩr tĩ ĕn to pã'i mág han sór ja tũ tóg nĩgtĩ'. Topĕ hã ne ti mÿ: “inh kósin vÿ tÿ ã nĩ,” he ja nĩ'. “Ũri sóg ã mÿ: tÿ inh ã panh nĩ, he mũ,” he ja ti nĩ, Topĕ ti, Jesus mÿ. ⁶ Kÿ tóg ti mÿ tag tóg gé, kÿ tóg rán kÿ nĩ gé, Topĕ vĩ tÿ rán kÿ nĩ ki, ha mẽ: “isũ ki rĩr jé ã tóg ke mũ. Tũ' hĕnh ke tũ ti nĩnh mũ, ã tÿ isũ ki rĩr nĩ ti, Melquisedeque tÿ isũ ki rĩr mũ ĕn ri ke,” he ja ti nĩ gé, Cristo mÿ, Topĕ ti.

⁷ Jesus vÿ, ã tÿ ga mĩ tĩg kÿ jagtar nĩn kÿ (tóg) Topĕ mÿ to vĩ', to vĩ' he ja nĩgtĩ, ti tÿ ti kren han jé, ti ter tũ nĩ jé. Kÿ tóg fÿ gé, Topĕ mré vĕmĕn kÿ. Vĕsÿrĕnh jagy han tóg. Kÿ Topĕ vÿ ti vĩ jĕmĕ ja nĩ, Jesus tÿ ti mÿ to vĩn kÿ. Topĕ mÿ tóg tÿ ũn há nĩ, Jesus ti, hã kÿ tóg ti vĩ jĕmĕ ja nĩ. ⁸ Topĕ kósin vÿ tÿ ti nĩ, Jesus ti, hã ra tóg ã jagtar tugrĩn (tóg) Topĕ tÿ nĕn tó mũ ki kanhrãn kãn ja nĩ, ti tÿ Topĕ vĩ hã han jé. ⁹ Ti tÿ vĕnh kanhrãn kãn kÿ tóg ĕg kren pĕ han ki kanhró nĩ ge sir. ĕg jagfy tóg ter ja nĩ, kÿ tóg ĕg kren han mũ, ĕg tÿ ti vĩ ki króm kÿ. ¹⁰ Topĕ vÿ ti mÿ: “inh mÿ isũ ag ki rĩrni, to pã'i mág vÿ tÿ ã nĩ, Melquisedeque ĕn ri ke,” he ja nĩ. Hã kÿ tóg tÿ pa'i nĩ, Jesus ti.

ĕg tÿ ti to krónh kĕnh ke tũ

¹¹ Sỹ ājag mỹ tag kāmén kân sór mũ ra tóg jagy tĩ. Tó jagy ti tĩ, tag ti. Kĩ ājag tóg mẽ há han tũ nĩgtĩ gé. Ājag pi(jé) krĩ há nỹtĩ ver'. ¹² Ājag tỹ ù ag kanhrân ke vễ vễ, ājag tỹ vāsỹ Topẽ vĩ mẽ ja nỹtĩn kỹ. Hã ra ājag tóg ver ki kagtĩg nỹtĩ. Ājag kã ù tỹ ājag mỹ Jesus kāmén vén ên tó măn kỹ tóg há nỹnh mũ vễ. Gĩr kāsir ri ke ājag nỹtĩ. Gĩr kāsir ag vỹ leite hã kron tĩ, ājag tỹ ver kāsir nỹtĩn kỹ. ¹³ Jãvo ùn sanh ag hã vỹ vễjên kufy ko tĩ'. Gĩr tỹ leite kron mũ ri ke ājag nỹtĩ, ājag tỹ Jesus kãme ên ki kanhrân kân tũ nỹtĩn kỹ ver. ¹⁴ Û tỹ to jykrén há han mũ ên vỹ ùn sanh há ri ke nĩ, kỹ tóg ki kanhró nĩ. “Tag vỹ há nĩ, tag vỹ há tũ nĩ, tag vỹ kuryj nĩ, jãvo tag vỹ kygnẽ kỹ nĩ,” he jé tóg ke mũ, ù tỹ ki kanhrân há han mũ ên.

6

¹ Ājag tỹ ver gĩr kāsir ri ke nỹtĩ ra sóg ājag mỹ Jesus kāmén vén ja ên tó sór tũ nĩ ha. Sỹ ājag mỹ ùn sanh ag tũ kāmén sór vễ ha, ājag tỹ ver to tar nỹtĩ tũ ra. Jesus kāmén vén jã ên hã vễ, gĩr tỹ ã pafa ja kron ên ri ken hã vễ, ha mẽ: vễnh jykre kórég tovãnh jé êg tóg ke mũ, êg tỹ nén to ter ke mũ ên tovãnh kân jé êg tóg ke mũ. Topẽ ki rã jé êg tóg ke mũ. ² Û tỹ ti ki rã mũ ên kype jé êg tóg ke mũ, kỹ êg tóg ti kri êg nĩgé finh ke mũ gé, ti tỹ êg mré Jesus ki rã kỹ jẽ jé. Kar kỹ êg tóg êg ter kar kỹ rĩr măn ên to jykrén ke mũ gé, Topẽ tỹ êg jykre tugnỹm ke ên to. Vễnh kãme tag kar vỹ gĩr tỹ ã pafa ja kron ên ri ke nĩ. ³ Tag tó măn sór tũ inh nĩ ha, ājag tỹ vāsỹ mẽ ja tag. Sỹ ājag mỹ tag pãte Jesus kāmén sór vễ, kỹ tóg ùn sanh tỹ vễjên kufy ko ên ri ke nĩ. Topẽ tỹ tag to isar han kỹ sóg ājag mỹ kāmén há han ke mũ.

⁴ Ha mẽ, êg kãmĩ ù ag tóg ag tỹ Topẽ ki rã kar kỹ (ag tóg) ti tovãnh pẽ han ja nĩgtĩ. Kỹ ag tóg ti ki ge măn ke tũ nỹtĩ ha. Êg tỹ Topẽ ki ge kỹ tóg êg kanhrân ke mũ, vễnh jykre há ki. Topẽ vỹ êg mỹ kanhkã tá vễnh jykre há ên nĩm mũ. Êg mỹ tóg ã kuprĩg jẽnẽg mũ gé. ⁵ Topẽ vĩ há nĩ ên vэг êg tóg tĩ. Êg tỹ kanhkã tá nén venh ke ên ve sĩ han êg tóg tĩ, êprã, êg tỹ Topẽ ki ge kỹ. ⁶ Û tỹ ti jykre tag ve kar kỹ ti tovãnh pẽ han kỹ tóg vễnhmỹ nĩ. Kỹ tóg ti ki rã măn ke tũ nĩ ha, ã jykre kórég tovãnh măn ke tũ ti nĩ ha, ù tỹ ti tovãnh pẽ han mũ ên ti. Ha vé, êg tỹ ti ki rã há han kar kỹ ti tovãnh kỹ êg tóg ti tỹ cruz to sa măn ri ke han măn mũ sir, Topẽ kósĩn ti. Êg tỹ vễnh kar tỹ ti to é he han măn vễ sir.

⁷ Êpỹ ri ke ti nĩ, ha mẽ. Ta tỹ ti kri kutẽ kỹ ga mrãn kỹ êg jakré tóg mog há han tĩ, êg tỹ ga há ki ti krãn ti kỹ. Êg tỹ êpỹ há ri ke nỹtĩn kỹ, êg tỹ Topẽ mỹ vễnh jykre há han kỹ tóg êg ve há han mũ, Topẽ ti. ⁸ Êpỹ ù tóg hã ra kórég nĩ. Kỹ sónh hã tóg ki munmur tĩ, vãnh ti ke gé, kỹ tóg mogmog kónãn tĩ sir, êg jakré ti. Êg tỹ êpỹ kórég ên ri ke nỹtĩn kỹ Topẽ vỹ êg tovãnh ke mũ sir, kỹ tóg êg mỹ vĩ kónãn han ke mũ, kỹ êg kejên pũr ke mũ, kurã ên kã.

⁹ Ha mẽ, vĩ tar han inh huri. Hã ra ājag tóg ti jagy tag venh ke tũ pẽ nĩ, ki kanhró inh nĩ. Ājag to sóg há nĩ. Krenkren jé ājag tóg ke mũ, ki kanhró inh nĩ. ¹⁰ Rãnhraj há han ājag tóg tĩ. Ti to ājag há tãvĩ nỹtĩ. Ti tũ ki rĩr há han ājag tóg tĩ gé. Topẽ vỹ tag vэг tĩ, ājag rãnhraj há tag. Ti pi(jé) kã jatu nĩgtĩ'. Vễnh jykre vễnhmỹ han tũ pẽ ti nĩgtĩ, Topẽ ti. ¹¹ Hã ra sóg ājag mỹ tag tó, ājag tỹ ti to tar tãvĩ nỹtĩ jé, ājag tỹ ti to krónh ke tũ nĩ jé. Kỹ ājag tóg venh ke mũ, ājag tỹ nén (ũ) ve sór mũ ên ti. ¹² Ājag tỹ ti to krónh ken kỹ tóg kórég nĩ. Û tóg êg jo Topẽ ki rã ja nĩgtĩ, hã ra ag tóg ti tovãnh ja tũ pẽ nĩgtĩ, kỹ ag tóg hur vé, Topẽ tỹ êg mỹ nén ven sór mũ ên ti. Tag ag ri ke han nĩ, ù tỹ êg jo ti tovãnh jãvãnh ên ag ri ke han nĩ.

Topẽ tỹ ã vĩ ên han kân ke

¹³⁻¹⁴ Topẽ vỹ Abraão mỹ: “ã to vĩ há han jé sóg ke mũ, ã krẽ e han jé sóg ke mũ,” he ja nĩ. Kỹ tóg ti mỹ: “ã pi(jé) tag venh ke tũ nĩ', inh hã vỹ ki kanhró nĩ',” he ja nĩ gé. Û tỹ ti kãfór nĩ ra tóg ên to: “ti hã vỹ ki kanhró nĩ,” henh ke vễ vễ. Hã ra ù tóg Topẽ kãfór nĩ tũ nĩ, hã kỹ tóg: “inh hã vỹ ki kanhró nĩ,” he ja nĩ, Topẽ ti. ¹⁵ Kỹ Abraão vỹ Topẽ tỹ ti mỹ nén tó ja tag to tar nĩ ja nĩgtĩ gé. Jatun mỹ tóg ã kósĩn ke ên jãvãnh ja nĩgtĩ, hã kỹ tóg kejên ti vé.

¹⁶ Ēprā ke ag vỹ, ag tỹ jagnē mỹ vỹ há han sór kỹ ag tóg jagnē mỹ: “inh kri nĩ ěn vỹ ki kanhró nĩ, sỹ ā mỹ nén han ke ti,” he tĩ. Tag tóg kỹ ag tóg jagnē jũ tỹ tũ' he tĩ. Ũ tỹ tag tóg kỹ ag tóg ki kanhró nỹtĩ, ti tỹ ki hā tóg ja ti. Ēprā ke ag jykre hā vē. ¹⁷ Věnh jykre tag han ja ti nĩ, Topě ti, ti tỹ ěg mỹ ā vỹ jěněn kỹ. Ti tỹ ěg mỹ nén tóg ja ěn ve jé ěg tóg ke mũ. Ěg tỹ tag ki kanhrān há han hā jé tóg ěg mỹ: “ki kanhró inh nĩ,” he ja nĩ. Tóg ũ han mǎn ke tũ ti nĩ ha. Ā tỹ tóg ja ěn hā han jé tóg ke mũ, ti tỹ: “ki kanhró inh nĩ,” hen kỹ. ¹⁸ Ti vỹ régre to ěg tóg ki kanhrān há han tĩ. Ěg mỹ tóg kar kỹ tóg: “ki kanhró inh nĩ,” he ja nĩ gé. Ti vỹ régre hā vē. Hā kỹ ěg tóg venh ke mũ, ti tỹ ěg mỹ nén tóg ja ti. Tóg ũ han mǎn ke tũ ti nĩ ha, hā ra tóg ón ja tũ nĩ gé, ti tỹ ón ki kagtĩg nĩn kỹ. Ti tỹ ěg mỹ nén tóg ja ěn ve sór ěg tóg mũ, hā vỹ: kanhkā, he mũ, hā kỹ tóg ěg hā mỹ tóg ja nĩ, Topě ti. ¹⁹ Ěg tỹ kanhkā ve sór kỹ ěg tóg to krónh ke tũ nĩgtĩ. Ěg tỹ kanhkā tá ũn ve sór mũ hā vỹ ěg tar han tĩ, ěg tỹ tỹ prǎnh ke tũ nĩ jé. Tá jun jé ěg tóg ke mũ, ha vemnĩ, Topě jamā tá. ²⁰ Jesus vỹ tá jun vén, ěg jo, kỹ tóg ěg mỹ Topě to ěpry ti han, Topě to ěmĩn ti. Ěg jagfy tóg tỹ Topě tũ ki rĩr tĩ to pǎ'i mág nĩ, Melquisedeque ěn ri ke. Kurā krỹg ja tũ ti nĩ, ti tỹ tỹ pǎ'i nĩ ti. Kỹ tóg ěg jo Topě rĩnja tá nĩ nĩ, ěg tỹ ti nón tá junjun jé gé.

7

Melquisedeque kǎme

¹ Melquisedeque ěn vỹ tỹ pǎ'i mág nĩ ja nĩgtĩ, cidade tỹ Salém kri, kỹ tóg Topě tũ ki rĩr nĩ ja nĩgtĩ gé, ũ tỹ věnh kar kri ke nĩ ěn tũ ki. Abraão vỹ pǎ'i tỹ 4 (ke) ěn mré věnh génh han ja nĩ. Ti tỹ ag kǎgtén kar kỹ Melquisedeque ěn vỹ ti kato tē, kỹ tóg ti mỹ: “Topě vỹ ā ve há han, kỹ tóg ā ve há han mǎn ke mũ gé,” he mũ. ² Kỹ Abraão vỹ ti mỹ dízimo ěn nĩm mũ sir, ā tũ tỹ 10 (ke) kar ki tóg ũn pir nĩm mũ sir, Melquisedeque mỹ, ti tỹ ũn kato tē mũ ěn ag tũ mǎn ja tỹ dízimo ěn ti. Ti jiji to ken hā vē, hā vỹ: věnh jykre kuryj to pǎ'i, he mũ, hā vỹ: Melquisedeque, he mũ. Kỹ tóg tỹ cidade tỹ Salém to pǎ'i nĩ, hā vỹ: ũn krĩ kuprā ěn ag pǎ'i, he mũ. ³ Panh tũ ti nĩ, mỹnh tũ ke gé, jóg'jóg ve tũ ti nĩ gé. Ũ ki mur já tũ ti nĩ, kỹ tóg ter ja tũ nĩ gé. Topě kósin ri ke ja ti nĩ. Topě tũ ki rĩr kỹ tóg nĩ nĩ, ti kurā vỹ krỹg ja tũ nĩ, Melquisedeque kurā ti.

⁴ Pǎ'i mág pē vē, Melquisedeque ti, hā kỹ Abraão vỹ ti mỹ ā tũ tỹ dízimo nĩm ja nĩ gé. Hā ki ěg tóg ki kanhró nỹtĩ, ti tỹ Abraão kǎfór nĩ ti, Melquisedeque ti. ⁵ Ũ tỹ Israel ag kǎmĩ dízimo mǎg tĩ ag vỹ tỹ Levi krē nỹtĩ, ũ tỹ Topě tũ ki rĩr tĩ ěn ag. Ājag mré ke ki ag tóg dízimo ěn mǎg tĩ, ag kar tỹ tỹ Abraão krē'krē nỹtĩ ra. ⁶ Hā ra Melquisedeque pi(jé) tỹ Abraão mré ke nĩ ja nĩgtĩ'. Ge ra Abraão tóg ti mỹ dízimo ěn nĩm ja nĩ, kỹ tóg ti mỹ: “Topě vỹ ā ve há han,” he mũ gé, Melquisedeque ti, Abraão mỹ, Topě tỹ Abraão mré vēmén kar kỹ, Topě tỹ ti mỹ: “ā kófa ra ā kósin ke mũ,” he kar kỹ. ⁷ Kỹ tóg Abraão kǎfór nĩ, Melquisedeque ti, ti tỹ ti mỹ: “Topě vỹ ā ve há han,” hen kỹ. Ti kri ke vỹ tỹ ti jē.

⁸ Levi krē'krē ěn vỹ tỹ ěprā ke nỹtĩ gé, ũ tỹ ājag mré ke ki dízimo mǎg tĩ ěn ag. Hā ra Melquisedeque vỹ ter ja tũ nĩ nēji, hā kỹ tóg rán kỹ nĩ, Topě vỹ tỹ rán kỹ nĩ ki. ũn ter tũ vỹ Abraão ki dízimo mǎn ja nĩ, hā vỹ: Melquisedeque, he mũ. ⁹ Kỹ, Abraão tỹ ti mỹ dízimo nĩm ěn kǎ tóg ā krē'krē kósin tỹ Levi jagfy ti mỹ dízimo nĩm ja nĩ gé, Melquisedeque mỹ. Hā kỹ Levi krē'krē ag vỹ ājag mré ke ag ki dízimo ve ja nĩgtĩ gé sir. ¹⁰ Abraão tỹ Melquisedeque mỹ dízimo nĩm ěn kǎ Levi vỹ mur ja tũ nĩ ver, hā kỹ ti jóg'jóg ve tỹ Abraão vỹ ti jagfy dízimo nĩm ja nĩ. Nĩm kar kỹ tóg kejēn Levi vovo han mũ sir, Abraão ti, Melquisedeque tỹ ti mré vēmén kar kỹ.

¹¹ Topě tỹ Levi krē'krē ag mỹ: “isũ ki rĩrmnĩ,” he ěn kǎ tóg ag mỹ tag to věnh jykre nĩm ja nĩgtĩ gé, ag tỹ ki rĩr ke to. Ag hā tỹ ki rĩr há han ke vē vē, hā ra ag tóg ki rĩr kǎn jā tũ nĩ, hā kỹ Topě tóg ũ tỹ ki rĩr ke mũ ũ jěně ja nĩ, ũ tỹ Melquisedeque ri ke ěn, hā vỹ: Jesus Cristo, he mũ. Ag tỹ ki rĩr há han ja nĩ ra Topě hỹn ti jěněnh ke tũ nĩ vē, kỹ Arão krē'krē ěn ag hā vỹ ki rĩr nỹtĩnh ke vē vē. ¹² Kỹ, Jesus tỹ Topě tũ ki rĩr kỹ Topě vỹ ti mỹ tag to věnh jykre tǎg han ja nĩ gé. ¹³⁻¹⁴ Hā kỹ tóg ki rĩr nĩ sir. Ti pi(jé) tỹ Levi krē'krē ag kǎ ũ nĩ', ěg Senhor tỹ Jesus ti. Judá krē'krē ag kǎ ũ vỹ tỹ ti nĩ. Ge ra tóg Topě tũ ki rĩr mũ. Judá

krě'krě ũ tóg Topě tũ ki rĩr ke tũ tĩ vĕ, ag tỹ Topě mỹ nĕn ũ pũn ke tũ vĕ vĕ. Ag rãnrãj tũ vĕ vĕ, tag, Judá krě'krě ag, kỹ Moisés tóg ag to nĕn ũ tó ja tũ nĩ gé, ti tỹ Topě tũ ki rĩr ke tag rán kỹ. Hã ra Jesus tóg Topě tũ ag ki rĩr jĕ, ti tỹ tỹ Judá krě'krě ag kã ũ nĩ ra. Topě tỹ ti mỹ vĕnh jykre tãg nĩm hã vĕ.

Jesus tỹ Melquisedeque ri ke nĩ

¹⁵ Levi krě'krě ag vỹ Topě rãnrãj han kãn ki kagtĩg ja nĩgtĩ. Hã kỹ Topě tóg ã tũ ki rĩr ke ũ jĕ prĕr, ũ tỹ Melquisedeque ri ke ĕn, hã vỹ: ĕg Senhor tỹ Jesus, he mũ. Hã ki ĕg tóg vég tĩ, Levi krě'krě ag tỹ ti rãnrãj han ki kagtĩg nỹtĩ ti. ¹⁶ Kỹ ĕg Senhor tỹ Jesus pi(jé) ĕprã ke ag jykre ri ke han kỹ Topě tũ ki rĩr mũ', kỹ ĕprã ke ũ vỹ: “ha ki rĩr,” he ja tũ nĩ gé. Topě tỹ ti mỹ nĕn tó jan hã vĕ. Ter mãn ke tũ ti nĩ ha, hã kỹ tóg ki rĩr há han mũ ha. ¹⁷ Ti to tag tóg rán kỹ nĩ, Topě vĩ tỹ rán kỹ nĩ ki, ha mẽ: “isũ ki rĩr jĕ ã tóg ke mũ. Tũ' henh ke tũ (pĕ) ti nĩ, ã tỹ isũ ki rĩr nĩ ti, Melquisedeque tỹ isũ ki rĩr nĩ ĕn ri ke,” he ja ti nĩ. ¹⁸ Tag tó kỹ tóg Moisés jykre ĕn tỹ tũ' he mũ, ti krój nĩn kỹ, ti tỹ ĕg há han mãn ki kagtĩg nĩn kỹ. ¹⁹ Hỹ, Moisés jykre ĕn vỹ ĕg tar han ki kagtĩg ja nĩgtĩ, ĕg tỹ Topě vĩ ki króm han ki kagtĩg ja tóg nĩgtĩ, kỹ ĕg ti jykre han sór mũ ra kanhkã tá jun ke tũ nĩ, ĕg tỹ Moisés jykre han mũ ra. Vãhã Topě tóg ĕg mỹ vĕnh jykre tãg nĩm ja nĩ, ũ tỹ Moisés jykre kãfór nĩ ĕn, hã vỹ: Jesus jykre, he mũ. Kỹ ĕg tóg Jesus tigrĩn Topě nĩgja tá junjun ke mũ.

²⁰ Tag to Topě tóg vĩ kãfór han ja nĩ. Moisés tỹ Levi krě'krě mỹ: “Topě tũ ki rĩrmnĩ,” hen kỹ tóg vĩ kãfór han ja tũ nĩ. ²¹ Hã ra Topě tóg Jesus mỹ tag tó. Ti mỹ tóg: “isũ ag ki rĩr jĕ ã tóg ke mũ,” he ja nĩ. “Tũg ke tũ ti nĩ, ã tỹ isũ ag ki rĩr tĩ ĕn ti. Vĩ kãfór han inh mỹr. Tó ũ han mãn ke tũ sóg nĩ, vĕnh jykre ũ han mãn ke tũ sóg nĩ,” he ja tóg nĩ, ĕg jóg mág ti, ã kósin mỹ. ²² Hã kỹ Jesus jykre vỹ Moisés jykre kãfór nĩ, Jesus tỹ ĕg mỹ vĕnh jykre tãg nĩm mũ ĕn. ²³ Nĕn ũ ki tóg sir Moisés jykre ri ke tũ nĩ, Jesus jykre ti, ha mẽ. Moisés jykre ki Topě tũ ki rĩr tĩ ag vỹ e ja nỹtĩgtĩ. Ājag kã ũ ter kỹ ag tóg jãgnĕ jĕgja kã ũ fĕg' he ja nĩgtĩ, ti tỹ Topě mỹ ti tũ ki rĩr jĕ. Hã kỹ ag tóg e ja nỹtĩgtĩ, Moisés jykre ki Topě tũ ki rĩr tĩ ag. ²⁴ Hã ra Jesus vỹ ter mãn ke tũ nĩ inhhã, Topě tũ ki rĩr tóg nĩ nĩ, ũ tóg ti jĕgja kã jĕnh ke tũ nĩ. ²⁵ Hã kỹ tóg ã tỹ ũn ki rĩr nĩ mũ ag kar krenkren han tĩ, ũ tỹ ti tigrĩn Topě jamã tá junjun ke mũ ĕn ag kar. Rĩr tóg nĩ nĩ, kỹ tóg ĕg jagfy Topě mrĕ vĕmĕn tĩ. Kurã krỹg ja tũ ti nĩ, Jesus ti.

²⁶ Ēg to ti há nĩ, Jesus ti, ti tỹ ĕg jagfy Topě tũ ki rĩr nĩn kỹ. Topě kósin vỹ tỹ ti nĩ. Kygnĕ ja tũ pĕ ti nĩ. Nĕn ũ kórĕg venh ke tũ ĕg nĩ, ti ki. Topě vĩ mranh tĩ ag mrĕ ke tũ vĕ. Kỹ tóg tỹ kanhkã tãn kar ag kri ke nĩ gé sir, ũri. ²⁷ Ēprã ke ag tỹ Topě tũ ki rĩr nỹtĩn kỹ ag tóg ājag tỹ Topě vĩ mranh ja tigrĩn Topě mỹ nĕn ũ pũn vén tĩ, kurã kar ki, kar kỹ ag tóg ājag mrĕ ke ag tỹ Topě vĩ mranh tigrĩn ag jagfy Topě mỹ nĕn ũ pũn tĩ gé sir. Jesus vỹ Topě vĩ mranh ja tũ nĩ inhhã. Hã kỹ tóg, ã tỹ vĕnh fĕg kỹ tóg ag tỹ Topě mỹ nĕn ũ pũn ri ke han. Vĕnh fĕg pir han tóg, kỹ tóg ã tỹ vĕnh fĕg pir ĕn ki ĕg tỹ Topě vĩ mranh e ja ĕn tỹ tũ' he kãn. ²⁸ Moisés tỹ ĕprã ke ag mỹ: “Topě tũ ki rĩr,” hen kỹ ag tóg ki rĩr mũ, hã ra ag tóg kygnĕ mág kỹ nỹtĩ ja nĩgtĩ gé, ag tỹ tỹ ĕprã ke nỹtĩn kỹ. Hã ra Topě tóg vĕnh jykre tãg han kỹ tóg ã kósin mỹ: “ki rĩr jĕ ã tóg ke mũ, tag to sóg vĩ kãfór han mũ,” he ja nĩ. Ũ tỹ kygnĕ ja tũ pĕ ĕn mỹ tóg tag tó ja nĩ, hã kỹ tóg kygnĕnh ke tũ pĕ nĩ gé.

8

Jesus hã tỹ ĕg jagfy Topě tũ ki rĩr

¹ Ha mẽ, sỹ ājag mỹ nĕn kãmĕn ja ti. Tag tó sór ja inh nĩ, ha mẽ. Ēg jagfy Topě tũ ki rĩr tĩ to pã'i mág hã vỹ nĩ nĩ. Topě pĕgja tá tóg nĩ nĩ, kanhkã tá. ² Topě nĩg jafã pĕ tá tóg ti tũ ki rĩr mũ. Topě nĩgja pĕ ĕn pi(jé) tỹ ĕprã ke ag tỹ há nĩ'. Topě hã tỹ há vĕ, ĕn ti. Ēn tá tóg nĩ nĩ, ĕg jagfy, Topě tũ ki rĩr nĩ ĕn ti.

³ Topě tũ ki rĩr tĩ to pã'i mág jykre hã vĕ, ha mẽ. Topě mỹ ag tóg nĕn ũ nĩ pũn tĩ, nĕn ũ ũ ke gé. Kỹ ũ tỹ ĕg jagfy Topě tũ ki rĩr tĩ to pã'i mág tag vỹ Topě mỹ nĕn (ũ) nĩm ke mũ gé, Jesus ti, hã vỹ: vĕnh fĕg, he mũ. ⁴ Ti tỹ ver tag mĩ ga kri mũ ag mrĕ ga kri tĩ ra Topě tóg ti mỹ vĕnh rãnrãj tag nĩm ke tũ nĩ vĕ, ti tỹ Topě tũ ki rĩr jĕ. Ēprã ũ tỹ Topě tũ ki rĩr

mũ ag vỹ nýtĩ ver, ù tỹ Judeu ag jykre ki Topẽ tũ ki rĩr mũ ù ag. ⁵ Topẽ jo ìn krẽm ag tóg nén ù nĩ pũn tĩ, Moisés tỹ ag mỹ vẽn h jykre nĩm kỹ. Topẽ vỹ Moisés mỹ tó ja nĩ, ti tỹ kur tỹ Topẽ jo ìn han jé. Ti mỹ tóg: “ã mỹ sóg ã tỹ nén han ke mũ ãn ti ven kãn huri,” he mũ. “Ã tỹ pãnónh kri nĩ ãn kã sóg ã mỹ ven kãn. Sỹ ã mỹ nén ven mũ ãn hã han nĩ,” he ja tóg nĩ, Topẽ ti, Moisés mỹ, hã kỹ tóg han. Ìn ãn krẽm ag tóg ùri nén ù ù pũn tĩ, Judeu ag jykre ki, Topẽ tũ ki rĩr tĩ ag. Hã ra tóg tỹ kanhkã tá vẽn h jykre tag hã pẽ tũ nĩ ver. Nén sĩ ki tóg ri ke nĩ, ag tỹ nén han mũ ti, kanhkã tá vẽn h jykre ri ke sĩ ti nĩ. Jesus hã vỹ kanhkã tá vẽn h jykre pẽ ãn han kãn mũ.

⁶ Hã kỹ Jesus rãnrãj vỹ ãprã ke ag rãnrãj kãfór nĩ. Topẽ vỹ ãg mỹ Jesus jẽnẽ, ti tỹ ãg mỹ vẽn h jykre tãg nĩm jé, kỹ tóg ti tỹ Moisés tỹ ãg mỹ vẽn h jykre há nĩm ãn há kãfór nĩ. Kỹ tóg ãg mỹ nén ù há tãvĩ han ke mũ, Topẽ ti, ti tỹ Jesus jẽnẽn kỹ. Hã kỹ Jesus rãnrãj vỹ Moisés rãnrãj kãfór nĩ, Jesus tỹ ãg mỹ vẽn h pãte fón ken kỹ. ⁷ Topẽ mỹ tóg pãgsĩ ja nĩ, ã tỹ Moisés mỹ vẽn h jykre nĩm ja ãn ti, hã kỹ tóg vẽn h jykre tãg han to jykren ja nĩ. ⁸ Æ povo jykre ve kỹ tóg ti mỹ kórég nĩ, hã kỹ tóg tag tó, ha mẽ. “Kãnhmar sóg povo tỹ Israel mỹ vẽn h jykre tãg nĩm ke mũ, Judá krẽ'krẽ ag mỹ ke gé,” he ja tóg nĩ, ãg jóg mág ti. ⁹ Vẽn h jykre tãg tag vỹ isỹ ag jóg'jóg ve ag mỹ vẽn h jykre nĩm ja ãn ri ke tũ nĩnh mũ. Ag jóg'jóg ve ag mỹ sóg vẽn h jykre ù nĩm ja nĩ gé, isỹ ga tỹ Egito tá ag kãpan kỹ. Ag nĩgé kãgmĩ kỹ sóg ag tatĩn kãtĩ mũ, ag ga pẽ ra. Hã ra ag tóg isỹ ag mỹ vẽn h jykre nĩm ja ãn mranh, hã kỹ sóg sir ag togvãnh ja nĩ,” he tóg, ãg jóg mág ti. ¹⁰ “Hã ra sóg vãhã ag mỹ vẽn h jykre tãg han sór mũ, povo tỹ Israel ag mỹ, ha mẽ,” he tóg, ãg jóg mág ti. “Ajag krĩ tỹ ag tóg isỹ ag jyvẽn mũ ãn ki kanhrãn ke mũ, kỹ ag tóg han sór ke mũ gé, ti tỹ ag fe kãkã nĩn kỹ. Ag Topẽ vỹ tỹ inh nĩnh mũ, kỹ ag tóg tỹ inh krẽ nýtĩnh ke mũ gé, ãn kã. ¹¹ Kỹ ù tóg ã mré ke ag kanhrãn mãn ke tũ nĩ ha. “Èg jóg mág vỹ ge nĩgtĩ, ge ti nĩgtĩ,” he mãn ke tũ ag nýtĩ ha, jagnẽ mỹ. Ag kar vỹ inh ki kanhró nýtĩnh mũ, ãn kã, ùn kãsir ag, ùn mág ag ke gé, ãn kã. ¹² Ag tỹ inh vĩ mranh mũ (hã) ra sóg ge ra ag jagãgtãn ke mũ. Vẽn h pãte fón jé sóg ke mũ, ag tỹ inh vĩ mranh ja ãn ti,” he ja tóg nĩ, Topẽ ti.

¹³ Kỹ, Topẽ tỹ vẽn h jykre tãg han kỹ vẽn h jykre ve ãn vỹ ti mỹ tỹ vẽn h jykre si nĩ sir. Hã ra nén (ũ) si kar ãn vỹ kejẽn tũ' henh ke mũ, kãnhmar.

9

Vãsy Topẽ jykre mré ùri Topẽ jykre

¹ Topẽ tỹ ag mỹ vẽn h jykre ve ãn nĩm kỹ tóg ag mỹ ag tỹ nén han ke ãn kãmén ja nĩ. Ag tỹ ti jo ìn han tó ja ti nĩ, kar kỹ tóg ag tỹ ti jo ìn krẽm ti mré vẽn h ke tó ja nĩ gé, ag tỹ ti mỹ nén (ũ) pũn ke ti ke gé. ² Kỹ ag tóg kur tỹ ìn ãn han, ti tỹ tỹ Topẽ jo ìn jẽ jé. Hã ra tóg vẽn h kãpãm kỹ nĩ, kur tỹ ke gé, kỹ ag tóg ìn vãfynyn ki jun vén mũ ãn to ag tóg: “Topẽ mré vĩ jafã,” he tĩ. ãn tá mesa kri vela tỹ kri vin jafã vỹ jẽ, kar kỹ mesa ti ke gé, mesa tỹ kri pão vin jafã ãn. ³ Tag pãte tóg kur nĩ, jãnkã tỹ kur, kỹ kur ãn pãte ìn vãfynyn ù vỹ nĩ gé, ùn sĩ. ãn to ag tóg: “Topẽ nĩg jafã,” he tĩ, ìn vãfynyn ãn to. ⁴ Tá tóg Topẽ mỹ kri nén (ũ) pũn jafã nĩ, ouro tỹ há ti. Kri ag tóg nén ù ger há pũn tĩ, ouro ãn kri. Kar kỹ Topẽ caixa vỹ tá nỹ gé. Ti to tĩr hã vỹ tỹ ouro nĩ. Caixa ãn kãkã ouro tỹ pẽnky vỹ nĩ, kỹ kanhkã tá vẽn h vỹ pẽnky ãn ki nĩ, Topẽ tỹ ag mỹ pão jẽnẽ ãn ti, ag tỹ ga kórég kri mũn kỹ. Kar kỹ Arão vãtó vỹ kã nỹ gé, ti kãtó ti, kãtó fėj mũ ãn ti. Caixa ãn kãkã tóg nỹ nĩ, vãtó ãn ti. Kar kỹ Topẽ tỹ Moisés mỹ vẽn hrã nĩm ja ãn vỹ kãki nýtĩ gé, caixa ãn kãki. Pó régre ki tóg rãnrãn ja nĩ, Moisés ti, Topẽ tỹ ãg jyvẽn mũ ãn ti. Pó régre ãn tóg caixa kãki nýtĩ gé. ⁵ Caixa ãn kri tóg nýtĩ, Topẽ tỹ jẽnẽ jafã régre ag kãggrã, querubim he mũ ãn, ù tỹ Topẽ rĩnja tá nýtĩ ãn. Fẽn ag nýtĩ, kỹ ag fẽn tóg krỹg he kỹ nýtĩ. Ag fẽn fẽnja krẽm Topẽ vỹ ãg mỹ vẽn h pãte fón tĩ, ãg tỹ ti vĩ mranh ja ti. Hã ra sóg tag kãmén kãn sór tũ nĩ ver.

⁶ Kỹ tóg vãfynyn régre nĩ, ìn tỹ kur ãn ti, Topẽ tũ ãn ti. Ti vãfynyn ve ki ag tóg kãra ge tĩ, Topẽ tũ ki rĩr tĩ ag, kurã kar ki. Tá ag tóg ajag rãnrãj ti han tĩ. ⁷ Ti vãfynyn ù ãn tá tóg kãra rã pin' he tĩ, prỹg kar ki, ag to pã'i mág ti, ti tãvĩ. Ag mẽg kyvẽn h ma tóg tĩ tĩ,

Topê mÿ ven jé, Topê tÿ ti mÿ vënh pãte fón jé, povo kar mÿ ke gé, ag tÿ Topê vÿ mranh ja ên ti, ag tÿ mranh sór tũ ra mranh ja ên ti.

⁸ Topê kuprÿg vÿ êg mÿ kãmén mũ, ùri, vënh jykre si ên ti. Kur tÿ ïn vãfynyn vÿ ge nÿ, ha mē. Ti vãfynyn ve ên tÿ ver ïn krēm nÿn kÿ êg tóg ti vãfynyn ù tá jun ke tũ nÿ ver, Topê nÿgjafã tá. ⁹ Êg tÿ ùri vég mũ tag ki kanhrãn jé, hã jé Topê tóg vënh jykre tag han ja nÿgtÿ, êg tÿ to comparação han jé. Topê jo ïn ên tá ag tóg Topê mÿ nén ù pũn tÿ, kÿ ag tóg ag mēg ti tãnh kÿ pũn tÿ gé. Ag tÿ Topê mÿ sÿnvÿ nÿtÿ sór vë, hã jé ag tóg ti mÿ nén (ũ) pũn tÿ. Hã ra ag tóg ti mÿ pũn mũ ra (ag tóg ti mÿ) sÿnvÿ tũ nÿtÿ, ag jykre tÿ ver kórég nÿn kÿ. ¹⁰ Kÿ, ag tÿ ti mÿ pũn há han jé ag tóg vënh jykre tÿ ge han tÿ gé, ha mē: vëjën to ag tóg jykren tÿ, kÿ ag tóg vëjën ù to: “tag konh ke tũ êg nÿ, tag kron ke tũ êg nÿ,” he tÿ, ti tÿ ag mÿ tó kÿ nÿn kÿ. Kÿ ag tóg goj tÿ vënh kygpe tÿ hën ri ke han han tÿ gé. Tag ki vënh jykre kar vë, êprã. Kÿ Topê tÿ vënh jykre tãg han kÿ ên vÿ tóg tũ' he mũ sir.

¹¹ Vãhã Cristo vÿ hur kãtÿg, kÿ tóg tÿ êg jagfy Topê tũ ki rÿr to pã'i mág nÿ ha, kÿ tóg êg kren pē han mũ. Ti tÿ Topê jo ïn kãra rã vÿ ïn si ên mág kãfór nÿ gé. Há tãvÿ ti nÿ, Jesus tÿ hē tá Topê tũ ki rÿr nÿ ên ti. Êprã ke tÿ ïn há pijé', tag ki ïn pijé', kanhkã tá ke vë. ¹² Kÿ, Jesus tÿ ên kãra rã kÿ tóg rã pir han, Topê nÿgjafã pē ên kãra, Topê tÿ êg mÿ vënh pãte fón jé. Kÿ tóg, ã tÿ kãra rã kÿ ti pi(jé) ag mēg kyvénh ma vyr', cabrito ên, monh tãgy ên. ã kyvénh hã tÿ tóg êg kren pē han, Jesus ti.

¹³ Û ter kÿ ù tÿ ti va mũ mũ ên ag vÿ, ag tÿ Topê jo ïn kã ra ge sór kÿ ag vÿ Topê tũ ki rÿr tÿ ag mÿ: “ha êg to tÿ kó kó hé, êg mēg kyvénh tÿ,” he tÿ. Ag tÿ ag to tÿ kó kó he kar kÿ ag tóg jãnhkri nÿtÿ sir, ag tÿ cabrito kyvénh tÿ ag to tÿ kó kó hen kÿ, ke tũ nÿn kÿ monh kyvénh tÿ, ke tũ nÿn kÿ monh fi pũr tÿ mrēj tÿ. Ag tÿ ag jãnhkri han jan hã vë. ¹⁴ Hã ra Cristo vÿ ã kyvénh hã tÿ êg jãnhkri pē han. Topê kuprÿg tÿ ti krÿn kÿ tóg Topê mÿ vënh fēg, Cristo ti. Kygnē ja tũ pē ti nÿ, hã kÿ tóg há kar nÿ, ti tÿ vënh fēg kÿ. Ti kyvénh vÿ êg jãnhkri pē han mũ, êg jykre mré tóg êg kuryj han mũ, kÿ êg tóg vënh jykre kórég han mãn ke tũ nÿ sir, êg tÿ êg jykre si tigrÿn ter ke mũ ên ti. Vãhã êg tóg Topê tũ han há nÿgtÿ, ùn rÿr nÿ ên tũ ti.

Cristo tÿ êg mÿ vënh jykre tãg ma kãtÿg

¹⁵ Hã kÿ Cristo vÿ êg mÿ vënh jykre tãg ma kãtÿg. Ter ja tóg nÿ, Topê tÿ êg mÿ vënh pãte fón jé, êg tÿ ti jykre ve mranh ên ti. Ti ter kar kÿ Topê tóg ù ag kuprēg huri, ag tÿ Topê tÿ kanhkã tá êg mÿ nén ven ke ên ki kanhrãn jé. Jesus tÿ êg mÿ han hã vë.

¹⁶ Kejën ù tóg ã ter ke to hã: “iser kar kÿ ên vÿ isũ tag mãn ke mũ, ù ên vÿ isũ ù mãn ke mũ gé,” he tÿ. Rãn tóg tÿ, tag, kÿ tóg tógfÿg tÿ, vënh rá ti. Kÿ ag tóg ag tÿ vënh rá ên ve sór mũ ra ag tóg ti ter kar kÿ hã vég tÿ. ¹⁷ Ti tÿ ver ter tũ nÿn kÿ ag tóg vënh rá ên venh ke tũ nÿ. “Iser kar kÿ,” he tóg, hã kÿ ù tóg ver ti tũ mág tũ nÿ, ti tÿ ver ter tũ nÿn kÿ, ù tÿ rãn mũ ên ti. ¹⁸ Ri ke ti nÿ, Topê tÿ êg mÿ vënh jykre nÿm ja ên ti, ti si mré hã. Ag mēg ter kar kÿ ke ja vë. ¹⁹ Hã kÿ Moisés vÿ povo kar mÿ Topê tÿ ti mÿ nén tó ja ên kãmén, Topê tÿ nén to ag jyvën mũ ên ti. Ti tÿ ag mÿ kãmén kar kÿ tóg monh tãgy tãnh kÿ ti kyvénh mãn ja nÿ, cabrito tãnh kÿ ke gé. Goj mãn kÿ tóg ki kujën ja nÿ gé, kÿ tóg tÿ kujãjãg mũ, goj mré tóg ti kujãjãg mũ sir, carneiro kyki kusüg mré hã tóg tÿ kujãjãg mũ sir, re no fej mré hã. Kÿ tóg livro kri tÿ kó he mũ, to tÿ krig ke tóg mũ gé, povo kar to tóg tÿ kó kó he mũ gé, ag tÿ jãnhkri kÿ nÿtÿ jé. ²⁰ Ag to tÿ krig ke kar kÿ tóg ag mÿ: “Topê tÿ êg mÿ nén han ke mũ to vënh kyvénh hã vë,” he mũ, “Topê tÿ êg mÿ vënh jykre nÿm mũ to vënh kyvénh hã vë,” he tóg mũ, Moisés ti. ²¹ Kar kÿ tóg ïn tÿ kur to tÿ krig ke mũ gé, pénky kar to tóg tÿ kó he mũ gé, ag tÿ Topê tũ han jafã kar to. Vënh kyvénh ên tÿ tóg kri tÿ kó he kãn mũ, ag kar jãnhkri nÿtÿ jé. ²² Ha vé, ag tÿ vãsÿ Topê jykre ên ki nén ù tÿ jãnhkri' he sór kÿ ag tóg nén ù kyvénh hã tÿ jagnē jãnhkri'g tÿ. Pir ti nÿ, ag tÿ nén ù kyvénh tũ ra tÿ jãnhkri' ke mũ ti. Hã kÿ êg tóg ki kanhró nÿtÿ. Êg tÿ Topê vÿ mranh kÿ tóg êg mÿ êg mēg ter hã tigrÿn vënh pãte fón ja nÿgtÿ, vãsÿ vënh jykre ên ki.

Cristo tÿ êg jagfy ter pir han

²³ Vēnh jykre ěn vỹ kanhkā tá vēnh jykre ri ke sī nĩ, hā kỹ vēnh mēg kyvénh vỹ nén kar ěn jānhkri han ja nĩgtĩ. Ěg tỹ hā ra kanhkā ve jé tóg há tũ nĩ, ěg mēg tỹ ěg jagfy ter mũ ti. Ěg mēg vỹ ěg tỹ kanhkā tá jun han ki kagtĩg nĩ. ²⁴ Cristo hā vỹ ěg tỹ tá jun han ke mũ. Kỹ tóg ěprā ke tỹ Topē jo ĩn kāra rā ja tũ nĩgtĩ gé, kanhkā jykre ri ke sī ěn kāra rā ja tũ ti nĩ. Kanhkā pē ra tóg vyr, kỹ tóg Topē rĩnja tá nĩ nĩ, Topē mré vēmén jé, ěg jagfy. ²⁵ Kỹ ěprā ke ěn tóg ěprā Topē tũ ki rĩr tĩ to pā'i mág ěn tóg prỹg kar ki ag tỹ ĩn vāfyryn to: Topē nĩgjafā, he mũ ěn kāra tóg rā tĩ, ag mēg kyvénh mán kỹ tóg ra rā tĩ. Hā ra Cristo vỹ vēnh fēg pir han. ²⁶ Ti tỹ prỹg kar ki vēnh fēg mũ ra tóg ter tỹ hēn ri ke han ke vē vē, Topē tỹ ga han kar kỹ. Hā ra tóg vāsỹ vēnh ven ja tũ nĩ. Ūri, kurā tỹ ěgno to hā tóg vēnh ven pir han, kỹ tóg vēnh fēg pir han, ěg tỹ Topē vĩ mranh ěn tỹ tũ' he jé, ā ter tugrĩn. ²⁷ Ěprā ke ag vỹ ter pir han tĩ gé. Ěg ter kar kỹ Topē vỹ ěg jykre tugnỹm ke mũ. ²⁸ Tag ri ke ti nĩ, Cristo tỹ vēnh fēg mũ ti. Vēnh fēg pir han tóg, ā tỹ ũn e tỹ Topē vĩ mranh tỹ tũ' he jé. Kejēn tóg kātĩg mán ke mũ. Hā ra tóg ěg tỹ Topē vĩ mranh ja tugrĩn ter mán ke tũ nĩ, ti kātĩg mán kỹ. Ěg jé prēr jé tóg kātĩg ke mũ, ti tỹ ũ tỹ ti kātĩg jāvānh mũ ag jé prēr jé.

10

¹ Ěg tỹ Judeu ag jykre ve kỹ ěg tóg ve sī han tĩ, Topē tỹ ěg mỹ nén han sór mũ ti. Prỹg kar ki ag tóg Topē mỹ tānh kỹ pũn', tānh kỹ pũn' he tĩ. Hā ra ag mēg tỹ ag jagfy ter mũ ra tóg ag jykre há han ki kagtĩg ja nĩgtĩ. ² Ag tỹ Topē mỹ nén (ũ) pũn mũ ra ag tóg Topē vĩ mranh mán', mranh mán' he tĩ. Ag tỹ mranh tũ nĩ ra ag tóg ti mỹ pũn mán ke tũ nĩ vē, ti tỹ ag mỹ vēnh pāte fón jé. Hā ra ag tóg ki kanhró nỹtĩ, ag tỹ ti vĩ mranh tĩ tag, hā kỹ ag tóg ti mỹ nén pũn tovānh tũ pē nĩgtĩ, ti tỹ ag mỹ vēnh pāte fón tovānh tũ nĩ jé. ³ Prỹg kar ki ag tóg Topē mỹ pũn tugrĩn (ag tóg) ag tỹ ti vĩ mranh ja ěn mĩ ěkrég tĩ. ⁴ Hỹ, monh kyvénh vỹ ěg tỹ Topē vĩ mranh tỹ tũg' henh ke tũ pē nĩ, cabrito tỹ ěg jagfy ter mũ ěn ti ke gé. ⁵ Hā kỹ Cristo tóg, ā tỹ ga kri mur ken kỹ (tóg) Topē mỹ: “ag tỹ ājag mēg tānh kỹ pũn mũ ra tóg tỹ nén ũ tũ nĩ ā mỹ,” he ja nĩ. “Ag tỹ ā mỹ nén ũ ũ pũn mũ ra tóg ā mỹ tỹ nén ũ tũ nĩ gé. Hā ra ā tóg inh mỹ inh fár ti nĩm, isỹ ag jagfy ter jé. ⁶ Ag tỹ ā mỹ ag mēg pũn mũ ra tóg ā mỹ sér tũ nĩ, ag tỹ ā mỹ nén ũ ũ pũn mũ ra. Ag tỹ ā vĩ mranh tag tỹ tũ' he ki kagtĩg tóg nĩ, ag tỹ ā mỹ nén pũn mũ tag. ⁷ Hā kỹ sóg ā mỹ: “ha vé, sỹ ā mỹ vēnh fēg ke vē,” he mũ, “isỹ ā tỹ inh ki nén ve sór mũ ěn tỹ ā mỹ han jé,” he sóg mũ. Hā kỹ tóg rán kỹ nĩ, iso, ā vĩ rá ki,” he tóg, Cristo ti, Topē mỹ.

⁸ Ti mỹ tóg tag tó vén, ha mẽ. “Ag tỹ ājag mēg tānh kỹ pũn mũ ra tóg tỹ nén ũ tũ nĩ ā mỹ. Ag tỹ ā mỹ ājag mēg pũn mũ ra tóg ā mỹ sér tũ nĩ, ag tỹ ā mỹ nén ũ ũ pũn mũ ra. Ag tỹ ā vĩ mranh tag tỹ tũg' he ki kagtĩg tóg nĩ, tag,” he vén tóg. Hā ra tóg rán kỹ nĩ, Judeu ag tỹ Topē mỹ tag pũn jé. Ge ra Jesus tóg tag to: “nén ũ tũ vē,” he ja nĩ. ⁹ Tag tó kar kỹ tóg Topē mỹ: “ha vé, sỹ ā mỹ vēnh fēg ke vē, isỹ ā tỹ inh ki nén ve sór mũ ěn tỹ ā mỹ han jé,” he mũ gé, Topē mỹ. Ā tỹ tag tó kỹ tóg vēnh jykre si ěn tỹ tũ' he mũ, ũn tåg han jé. ¹⁰ Jesus tỹ Topē vĩ ki króm ja tugrĩn ěg tóg ũri tỹ Topē krē nỹtĩ ha. Jesus Cristo vỹ ěg jagfy ter ja nĩ, vēnh fēg kỹ. Ti ter pir ki tóg ěg név(e) kajām kán, kỹ Topē tóg ěg mỹ vēnh pāte fón kán mũ sir.

¹¹ Ěprā ke ag tỹ Topē tũ ki rĩr tĩ ag vỹ kurā kar ki ājag rānhraj han tĩ, Topē tũ ki rĩr jé. Kurā kar ki ag tóg Topē mỹ ājag mēg tānh kỹ pũn tĩ, hā ra ag tỹ Topē mỹ nén pũn mũ ěn pi(jé) ag tỹ Topē vĩ mranh tỹ tũ' he ja nĩgtĩ. ¹² Ag jāvō Jesus Cristo vỹ vēnh fēg pir han, ā ter tugrĩn tóg ěg tỹ Topē vĩ mranh ěn tỹ tũ' he kán. Tag han kar kỹ tóg Topē pēgja tá nĩ nĩ. ¹³ Tá tóg nĩ nĩ. Topē vỹ ti kato vāsānsān mũ ag tỹ ti pēn krēm vin ke mũ. Ag sigse kỹ nỹtĩ to ken hā vē. Tag hā jāvānh tóg nĩ nĩ, Jesus ti. ¹⁴ Ti tỹ vēnh fēg pir ěn tugrĩn tóg Topē krē kar ag krenkren han kán huri, kỹ ěg Topē mỹ sĭnvĩ nỹtĩ. ¹⁵ Topē kuprĩg vỹ ěg mỹ tag tó tĩ gé. Tag tó tóg mũ, ha mẽ. ¹⁶ “Tag pāte sóg ag mỹ vēnh jykre tåg han ke mũ,” he tóg, ěg jóg mág ti. “Vēnh jykre tåg ěn hā vē, ha mẽ. Isỹ nén to ag jyvēn mũ ěn tỹ sóg ag fe kākā nĩm ke mũ, kỹ tóg sỹ ag krĩ ki rán ri ke nĩnh mũ sir, kỹ ag tóg han sór ke mũ,” he tóg. ¹⁷ Tag tó kar kỹ tóg tag tó gé, ha mẽ. “Ag tỹ inh vĩ mranh ja ěn mĩ ěkrén mán ke

tũ inh nĩ ha, ag jykre pãno ẽn mĩ êkrén mãn ke tũ pẽ inh nĩ ha,” he tóg mũ gé. ¹⁸ Ha vé, Topẽ tỹ ẽg mũ vẽn pãte fón kỹ ẽg tóg ti mũ nén ù pũn mãn ke tũ nĩ ha, ti tỹ ẽg mũ vẽn pãte fón kãn kỹ nĩn kỹ, ẽg tỹ ti vĩ mranh ja kar ẽn ti.

Èg tỹ Topẽ to krónh ke tũ

¹⁹ Inh kanhkã, Jesus tỹ ẽg jagfy ter tugrĩn ẽg tóg jatun mũ Topẽ nĩgafã tá jun ke mũ. ²⁰ Jesus tỹ ẽg jagfy ter ẽn tóg ti tỹ kur tỹ jãnkã ẽn fĩn rãm ri ke nĩ, ẽg tỹ ti nón fĩn rãm ri ke han jé, ẽg rĩnrĩr nỹtĩ jé. Topẽ jo ìn krẽm kur tỹ jãnkã nĩfe ẽn vỹ jaran ke kỹ sa nĩ, Jesus ter kỹ. Kỹ ẽg tóg rã genh há nỹtĩ ha. ²¹ Èg jagfy Topẽ tũ ki rĩr tĩ to pã'i mág vỹ nĩ nĩ, hã vỹ: Jesus, he mũ. Topẽ jamã tá ke ẽn ag kar kri ke vỹ tỹ ti nĩ. ²² Kỹ jatun mũ Topẽ mré vémén nĩ. Ti ki rã há han nĩ, ãjag fe tỹ ti ki gemnĩ, ãjag tỹ ti nĩgafã tá junjun jé. Òn kỹ ti ki ge sór tũg nĩ. Èg jãnhkri han tóg, ẽg jykre pãno kar tỹ tóg tũ' hé, ẽg tỹ to jykren mãn tũ nĩ jé. Èg tỹ jãnhkri han tóg, ẽg tỹ goj jãpri tỹ vẽn kype ẽn ri ke, kỹ ẽg há nỹtĩ. ²³ Ti tỹ ẽg mũ nén tó mũ ẽn mĩ êkrén nĩ, to krónh ke tũg nĩ, sỹ ãjag mũ nén tó mũ ẽn to. Ve jé ẽg tóg ke mũ, ti tỹ ẽg mũ nén tó mũ ẽn ti. Û tỹ ẽg mũ tó ja ẽn vỹ ón vãn nĩgtĩ, hã kỹ to krónh ke tũg nĩ.

²⁴ Jagnẽ mĩ êkrén nĩ, ãjag tỹ jagnẽ jyvẽn jé. “Vẽn kar to há nĩmnĩ,” hemnĩ jagnẽ mũ. “Nén ù há kar han nĩ,” hemnĩ gé jagnẽ mũ. ²⁵ Û ag tóg culto venh kãmũ vãn nỹtĩgtĩ. Tag han tũg nĩ. Culto venh kãmũmnĩ. Kỹ jagnẽ jyvẽn nĩ, ãjag tar nỹtĩ jé. Kakó ti nĩ, ti kãtig mãn ke kurã ti. Ve há ti tĩ ha, tag.

²⁶ Ha vé, Topẽ vĩ mẽ kãn ẽg huri. Èg tỹ ti ki rã kar kỹ culto venh kãtig tũ nĩ' hen kỹ, ẽg tỹ ge ra Topẽ vĩ mranh sór kỹ mranh tĩ kỹ tóg ù tỹ ẽg jagfy kajãm mãn ke tóg tũ ti. ²⁷ Hỹ, ẽg tỹ mranh sór kỹ mranh kỹ Topẽ vỹ ẽg vóg kónãn pẽ han ke mũ. Pĩ tỹ tóg ag tỹ tũ' henh ke mũ, Topẽ ti, ù tỹ ti kato vãsãnsãn mũ ag. ²⁸ Û tỹ Moisés tỹ ẽg jyvẽn mũ ẽn mẽ jãvãn nĩ ẽn tén ja ag tóg nĩgtĩ, Israel ag, ùn régre ag tỹ ti jykre pãno ve ja tag tugrĩn, ke tũ nĩn kỹ ùn tãgtũ ag. Ti jagãgtãn ja tũ ja ag nĩgtĩ, ùn jykre pãno ẽn. ²⁹ Hã ki ẽg tóg vэг mũ, Topẽ tỹ ẽg vóg kónãn pẽ han ke mũ ti, ẽg tỹ Topẽ kósin to é he kỹ, ẽg tỹ ti vĩ mranh sór kỹ. Èg tỹ mranh sór kỹ ẽg tóg ti kyvẽn to é he tĩ, ti jykre to. Ti tỹ ẽg jãnhkri han ja ẽn to é he ẽg tóg tĩ sir. Èg mũ tóg tỹ nén ù tũ nĩ sir, Topẽ kuprĩg tỹ ẽg jagãgtãn ja ẽn ti. Û tỹ tag han mũ vóg kónãn jé tóg ke mũ, Topẽ ti, ha vemnĩ. ³⁰ Hã kỹ tóg tag tó, ha mẽ: “ùn jykre pãno ag vóg kónãn jé sóg ke mũ, ag tỹ kajãm jé, ag tỹ nén ù kórég han mũ kar,” he tóg, Topẽ ti. Û tỹ tag tó mũ ki kanhró ẽg tóg nĩ mýr. Hã ra tóg tag tó gé, ha mẽ. “Ã mré ke ag jykre tugnỹm jé tóg ke mũ, ẽg jóg mág ti,” he ja tóg nĩ gé. ³¹ Rĩr ti nĩ, Topẽ ti. Ti tỹ ẽg to jũ nĩn kỹ tóg jagy tãvĩ tĩ, nén ù jagy kar kãfór ti nĩ.

Èg tỹ to tar nỹtĩnh ke

³² ãjag tỹ vãsỹ ti mũ vẽn fẽg vén ja ẽn kurã mĩ êkrén nĩ. Ẽn kã ag tóg ãjag kato vãsãnsãn mág, kỹ ãjag tóg ag to vèsýrénh, kysã tỹ hẽn ri ke ki, ãjag tỹ Topẽ vĩ mẽ vén ẽn kã. Hã ra ãjag tóg to krónh krónh ke ja tũ nĩgtĩ. ³³ ãjag kã ù to ag tóg vĩ kónãn mág' he ja nĩgtĩ, ẽn kã, Topẽ kato vãsãnsãn mũ ag, kỹ ag tóg ãjag vóg kónãn gé, hã ra vẽn kar vỹ vé, ag tỹ ãjag vóg kónãn ja ti. ãjag kã ù vóg kónãn ja ag tóg nĩgtĩ, kỹ tóg ãjag kar mũ jagy tĩ ja nĩgtĩ, ag mré, ãjag tỹ tỹ ag mré Jesus ki ge nỹtĩn kỹ. ³⁴ Kỹ ag tóg ãjag kã ù sigse ja nĩ gé. Kỹ ãjag tóg ùn sigse kỹ nỹtĩ ẽn ag jagãgtãn ja nĩgtĩ, ag tỹ ãjag mré Jesus ki ge kỹ nỹtĩ kỹ. Pã'i ag tỹ ãjag tỹ nén gég mũ ra tóg ãjag mũ sér nĩ ja nĩgtĩ. ãjag tỹ kanhkã tá nén ù há tãvĩ ẽn venh ke hã mĩ ãjag tóg êkrén ja nĩgtĩ, ag tỹ ãjag tỹ nén génh kỹ, Jesus tugrĩn. ãjag tỹ kanhkã tá nén venh ke ẽn vỹ tũ' henh ke tũ pẽ nĩ. ³⁵ Kỹ ùri to krónh ke tũg nĩ gé. ãjag tỹ ti to tar nỹtĩn kỹ ãjag tóg nén ù há tãvĩ venh ke mũ, ha mẽ. ãjag vèsýrénh ja ẽn kaja ri ke ve jé ãjag tóg ke mũ. ³⁶ Èg tỹ ti tũ han to tar nỹtĩnh ke vè, ẽg tỹ ti tovãnh ke tũ pẽ nỹtĩnh ke vè. Tag hã vỹ há nĩ. Kỹ ãjag tỹ Topẽ tỹ ẽg mũ nén tó mũ ẽn han kãn kỹ nỹtĩn kỹ ãjag tóg venh ke mũ, ti tỹ ẽg mũ nén (ù) ven ke mũ ẽn ti. ³⁷ Hã kỹ tag vỹ rán kỹ nĩ, Topẽ vĩ rán kí, ha mẽ: “kãnhtar pẽ ti jun ke mũ, ùn kãtig ke mũ ẽn ti. Kãtig mé han jé tóg ke mũ, ha vemnĩ. ³⁸ Kỹ ù tỹ inh ki ge kỹ nỹtĩ ẽn ag hã vỹ krenkren ke mũ, inh mré

ke ên ag, isÿ ùn mÿ vênh pãte fón mÿ ên ag. Jãvo ù tÿ isovãnh mÿ ên vÿ inh mÿ kórêg nÿnh mÿ,” he tóg, Topê ti. ³⁹ Ëg pi(jé) ti tovãnh ke mÿ', kÿ êg tóg ù tÿ ti tovãnh mÿ ên ag vãgfor ên ri ke han ke tÿ nÿ gé. Ti ki rã kÿ êg tóg nÿtÿ, hã kÿ êg krenkren ke mÿ.

11

Û tÿ êg jo Topê ki ge kÿ nÿtÿ ag

¹ Topê ki rã to ken hã vë, hã vÿ: ti tÿ êg mÿ nén tó mÿ ên kri nÿm, he mÿ. Ti tÿ nén ù to: “ve jé ãjag tóg ke mÿ,” he mÿ ên kri fi jé êg tóg ke mÿ, êg tÿ ver vég tÿ ra. ² Ti si ag vÿ kri nÿm kÿ ti ki ge ja nÿgtÿ gé. Hã kÿ ag tóg Topê mÿ tÿ ùn há ja nÿtÿgtÿ, vãsÿ ke ag, ha mÿ.

³ Ëg tÿ Topê ki rã kÿ êg tóg ki kanhró nÿtÿ, ti tÿ ã vÿ tÿ êg tÿ nén vég mÿ kar hyn han ja ti. Ti vÿ vég tÿ êg tóg nÿgtÿ, kÿ tóg êg tÿ nén vég tÿ tóg êg tÿ vég mÿ hyn han ja nÿgtÿ, Topê ti, ã vÿ tÿ tóg nén kar hyn han ja nÿgtÿ.

⁴ Kÿ Abel vÿ Topê ki rã kÿ nÿ ja nÿgtÿ gé, hã kÿ tóg Topê mÿ pÿn há han, ti tÿ ti mÿ ã mÿg pÿn kÿ. Jãvo ti kãke tÿ Caim vÿ ti ki rã ja tÿ nÿ, kÿ tóg Topê mÿ nén ù pÿn tÿ (hã) ra (tóg) ti mÿ pÿn kónãn. Abel tÿ Topê ki rã kÿ tóg Topê mÿ pÿn há han ja nÿ, Abel tÿ ti mÿ pÿn mÿ ên ti. Topê tÿ Abel to: “inh mÿ tóg tÿ ùn jykre kuryj nÿ,” he ja vë, hã kÿ ti tÿ tóg pÿr há han. Ter ti huri, Abel ti, hã ra êg tóg ti tÿ nén han ja tugrÿn Topê ki ge ki kanhrãn mÿ sir.

⁵ Enoque vÿ Topê ki rã kÿ nÿ ja nÿgtÿ gé, hã kÿ Topê vÿ ti jé prër, ti tÿ kanhkã ra tÿg jé, ti rÿr ra, ti ter tÿ ra. Ti ve mãn tÿ ag tóg, Topê tÿ ti jé prër kar kÿ, hã ra tóg ã ter tÿ ra kanhkã ra vyr. Topê tÿ ti jé prër to há tag vÿ ti to rán kÿ nÿ Topê vÿ tÿ rán kÿ nÿ ki, ha mÿ: “Topê tÿ ti jykre ve kÿ ti fe tóg mrin ke mÿ,” he ja ti nÿ, Enoque to. ⁶ Ëg tÿ Topê ki ge tÿ nÿtÿn kÿ tóg êg to há nÿnh ke tÿ nÿ, Topê ti. Ëg tÿ Topê ra mÿ sór kÿ êg tóg tag to jykren ke mÿ, ha mÿ. “Topê vÿ nÿ,” he jé êg tóg ke mÿ. Kÿ êg tóg ti to: “êg tÿ ti to mÿ kÿ tóg êg mÿ nén ù há ên nÿm ke mÿ, ti tÿ êg mÿ nén tó ja ên ti,” henh ke mÿ gé. Tag tó kÿ êg tóg ti to mÿnh ke mÿ, kÿ tóg êg mÿ han ke mÿ, ha vemnÿ.

⁷ Noé vÿ Topê ki rã kÿ nÿ ja nÿgtÿ gé, hã kÿ Topê vÿ ti mÿ tó ja nÿ, ag kar tÿ kar kÿ ti jagy venh ke ti, hã vÿ: ta kutë, he mÿ. Kÿ tóg Topê vÿ kri fi kÿ canoa mág ên han mÿ, kÿ tóg han kãn kar kÿ (tóg) ki rã kÿ (tóg) kren mÿ, ti prÿ fi mré, ti krë mré ke gé. Topê ki rã kÿ tóg ù tÿ Topê kato vãsãnsãn mÿ ag mré tÿg mãn ja tÿ nÿ. Hã kÿ Topê vÿ ti mÿ ùn jykre kuryj ag tÿ nén venh ke ên ven, ti tÿ ù tÿ ti ki rã kÿ nÿtÿ ag mÿ nén ven ke ên tÿ.

⁸ Abraão vÿ Topê ki rã kÿ nÿ ja nÿgtÿ gé, hã kÿ tóg Topê vÿ kri nÿm ja nÿgtÿ. Topê tóg ti mÿ: “ha tÿg,” he mÿ, kÿ tóg tÿg ja nÿ, ga ù ra, Topê tÿ ti mÿ ga nÿm ke mÿ ên ra. ã tÿ ki kagtÿg ra tóg ra tÿg ja nÿ. ã jamã tá kãkutë kÿ tóg ã tÿ ki kagtÿg ên ra vyr, Abraão ti. ⁹ Topê ki rã kÿ jé kÿ tóg ga ên mÿ tÿg ja nÿgtÿ. Topê tÿ ti mÿ ga ên nÿm sór ja vë, hã ra tóg tÿ ã tÿ tÿ ra tóg mÿ tÿg ja nÿgtÿ, tá. Kur tÿ ïn krëm êmãn kÿ tóg ga ên mÿ tÿg ja nÿgtÿ, ti kósin tÿ Isaque mré, Isaque kósin tÿ Jacó mré ke gé. Ti krë'krë ag vÿ ti mré ga ên venh ke ja nÿtÿ gé, hã kÿ Topê tóg Abraão mÿ tó ja nÿ, hã ra ag tóg ver vég tÿ nÿ. ¹⁰ Ge ra tóg tovãnh ja tÿ nÿgtÿ. Cidade tÿ Topê tÿ ên ve sór ja ti nÿ, ù tÿ tÿg ke tÿ pë ên. Topê hã vÿ cidade ên han. To jykren kÿ tóg han. Ti pi(jé) êprã ke ag cidade ri ke nÿ'. Ên ve sór kÿ tóg ti tovãnh ja tÿ pë nÿ, hã kÿ tóg vé, Abraão ti.

¹¹ Sara fi vÿ Topê ki rã kÿ nÿ ja nÿgtÿ gé, hã kÿ fi tóg ã kófa pë ra (fi tóg) kufyg ja nÿgtÿ, Topê tÿ fag tÿ tag to tar han kÿ, Sara fi, fi mén tÿ Abraão mré. Û tÿ fag mÿ: “kósin ve jé ãjag tóg ke mÿ,” he mÿ ên vÿ kri fi kÿ fag tóg ve ja nÿgtÿ. ¹² Hã kÿ ùn pir ên, ùn kófa pë ên krë'krë vÿ e tãvÿ nÿtÿ, krÿg e ên ri ke, goj fyr mÿ rÿnhryj e ên ri ke, goj kafã tÿ fyr ên mÿ rÿnhryj e ên ri ke.

¹³ Topê ki ge kÿ nÿtÿn kÿ ag kãgter, Abraão, Isaque, Jacó. Topê vÿ ag mÿ ga ên tó ja nÿ, hã ra ag tóg ve ja tÿ nÿ ver. ãjag tÿ ve pë han tÿ ra ag kãgter. Ve sÿ han ja ag tóg nÿtÿgtÿ, Topê tÿ ag mÿ ga tó ja ti, hã ra ag tóg ve pë han ja tÿ nÿ kÿ tóg ag mÿ êg tÿ kór há tá nén ù vég mÿ ri ke nÿ ja nÿgtÿ. Ag tÿ venh ke to tóg ag mÿ sér gy tÿ hã ra. “Tag ki, ga kri êg tóg ùn pygsa mÿ ên ri ke han tÿ, êg jamã vÿ tÿ tag ki ke tÿ nÿ,” he ag tóg tÿ. ¹⁴ Ag jamã pë

jävānh kŷ ag tóg ga kri mŷ ja nŷgtŷ, hā kŷ ag tóg: “ēg jamā pē tŷ vē, tag ki,” he ja nŷgtŷ.

¹⁵ Ag pi(jé) ājag jamā si ēn ra vŷn vŷn ke sór ja nŷgtŷ, hā kŷ ag tóg vŷn vŷn ke ja tŷ nŷ.

¹⁶ Ēmā há pē ēn ve sór ja ag tóg nŷgtŷ, kanhkā tá. Hā kŷ ag tóg Topē mŷ há ja nŷtŷ, ti pi(jé) ag to mŷ'āg ke mŷ'. Hā kŷ tóg vēso: “Abraão Topē, Isaque Topē, Jacó Topē vŷ tŷ inh nŷ,” he tŷ, Topē ti. Cidade han tóg, ag mŷ, kanhkā tá.

¹⁷ Abraão vŷ Topē ki rā kŷ nŷ ja nŷgtŷ gé, hā kŷ tóg Isaque nenh ja tŷ nŷgtŷ. Topē mŷ tóg ti fēg, Topē tŷ ti mŷ ti kósin to vŷn kŷ. Ti kósin pir ja vē, hā ra tóg ti tānh kren, Topē mŷ.

¹⁸ Topē tóg Abraão mŷ: “ā kósin tŷ Isaque krē vŷ e nŷtŷnh mŷ,” he ja nŷgtŷ. ¹⁹ Kŷ tóg, ti tŷ ti tānh kren kŷ tóg: “Topē hŷn ti rŷn mǎn ki kanhró nŷ, isŷ ti tén kŷ,” he mŷ. Hā kŷ tóg ti ve mǎn gé. Ti tŷ ti tānh kren kŷ tóg Topē mŷ ti tŷ ti tānh ri ke nŷ ja nŷgtŷ, hā ra tóg ti ve mǎn, Topē tŷ ti mŷ: “ti tānh tŷg ra,” hen kŷ.

²⁰ Isaque vŷ Topē ki rā kŷ nŷ ja nŷgtŷ gé, hā kŷ tóg Jacó mŷ vŷ há han, Esaú mŷ ke gé, ti tŷ ag mŷ ag tŷ nén venh ke ēn tó kŷ.

²¹ Jacó vŷ Topē ki rā kŷ nŷ ja nŷgtŷ gé, hā kŷ tóg ā ter ke to hā (tóg) José krē régre ēn ag mŷ vŷ há han gé. Kŷ tóg ā vátó to jē kŷ (tóg) Topē krēm mŷg ke mŷ, kŷ tóg Topē mŷ: “Topē vŷ tŷ ā nŷ,” he ja nŷ.

²² José vŷ Topē ki rā kŷ nŷ ja nŷgtŷ gé, hā kŷ tóg ā ter ke nŷ ra tóg ā ter ken jo (tóg) Israel ag mŷ kāmén ja nŷgtŷ, ag krē'krē ag tŷ ga tŷ Egito tá kǎpanh ke ēn ti. Kŷ tóg ag tŷ kǎpanh ke ēn tó kŷ (tóg) ag mŷ to vŷ ja nŷ, ag tŷ ti kuka gé kāmŷnh jé, ag kāmŷnh ken kŷ.

²³ Moisés han mŷ fag vŷ Topē ki ge kŷ nŷtŷ gé, hā kŷ fag tóg Moisés péju, ti mur kar kŷ, kysā tāgtŷ ki. Fag mŷ tóg sŷnvŷ nŷ ja nŷgtŷ, gŷr sŷ ti. Kŷ fag tóg pǎ'i mág kamēg sór ja tŷ nŷ, pǎ'i mág tŷ: “gŷr gré ag kǎgtén kǎn nŷ,” he mŷ ra.

²⁴ Moisés vŷ Topē ki rā kŷ nŷ ja nŷgtŷ gé, hā kŷ tóg, ā mog kar kŷ (tóg): “inh pi(jé) tŷ Faraó kósin fi kósin nŷ,” he ja nŷgtŷ. ²⁵ Ti tŷ Topē povo ag mré jagtar nŷ ra tóg ti mŷ tŷ nén ŷ tŷ nŷ ja nŷgtŷ. Hā ra tóg Egito tá ke ag mré rico nŷ sór ja tŷ nŷgtŷ. Topē vŷ mranh kŷ ag tóg ón kŷ rico nŷtŷ ja nŷgtŷ, Egito tá ke ag. ²⁶ Ēg tŷ Cristo tŷgrŷn jagtar nŷtŷ tag tóg ti mŷ ēg rico nŷtŷ tag há kǎfór nŷ ja nŷgtŷ, hā kŷ Egito tá ke ag rico tag tóg ti mŷ kórég ja nŷgtŷ, Moisés mŷ. Topē tŷ kanhkā tá ēg mŷ nén ŷ há nŷm ke ēn hā to tóg jykrén ja nŷgtŷ.

²⁷ Moisés vŷ Topē ki rā kŷ nŷ ja nŷgtŷ, hā kŷ tóg ga tŷ Egito tá kǎkutē ja nŷgtŷ, pǎ'i jŷ kamēg vānh nŷn kŷ. Topē vég tŷ ēg tóg nŷgtŷ, hā ra tóg Topē hā ki ēkrén kŷ nŷ ja nŷgtŷ. Ti vŷ tóg ti mŷ ti tŷ ti vég nŷ ri ke nŷ ja nŷgtŷ. Hā kŷ tóg krónh ke ja tŷ nŷgtŷ, Moisés ti.

²⁸ Moisés vŷ Topē ki rā kŷ nŷ ja nŷgtŷ, hā kŷ tóg Israel ag mŷ festa tŷ Páscoa ēn nŷm. Ag mŷ tóg: “ŷn jǎnkā to tŷn, ovelha kyvénh tŷ,” he mŷ, “Topē tŷ jēnē jafā tŷ ājag krē ve ag kǎgtén tŷ nŷ jé,” he ja tóg nŷgtŷ, Moisés ti, Israel ag mŷ. Hā kŷ ag tóg festa tŷ Páscoa ēn han tŷ, ŷri.

²⁹ Israel ag vŷ Topē ki ge kŷ nŷtŷ ja nŷgtŷ gé, hā kŷ ag tóg goj kusŷg he mŷ ēn kǎ rēgrēg há han inhhā, ēg tŷ ga kri mŷ ēn ri ke han ag tóg. Mrinmrér ja tŷ ag tóg nŷgtŷ. Egito tá ke ag tŷ ag nón kǎ rēgrēg sór mŷ ra tóg ag kri rŷm ke mŷ sir, goj ēn ti, kŷ ag tóg nŷgnŷr kŷ kǎgter kǎn mŷ sir.

³⁰ Israel ag vŷ Topē ki ge kŷ nŷtŷ ja nŷgtŷ gé, hā kŷ cidade tŷ Jericó jy ró ēn vŷ vēsóg ki kórég kǎn ja nŷgtŷ. Ag tŷ pénŷn mŷ tŷ 7 (ke) han kar kŷ tóg vēsóg ki kórég ja nŷ, ag tŷ kurā tŷ 7 (ke) ki pénŷn mŷ kar kŷ.

³¹ Raabe fi vŷ Topē ki rā kŷ nŷ ja nŷgtŷ gé. Ūn mén (ka)mē vŷ tŷ fi nŷ ja nŷgtŷ, hā ra fi tóg Topē ki rā. Hā kŷ fi tóg Israel ag mŷ: “ha kǎge jēg,” he ja nŷ, ŷ tŷ fi jamā venh kāmŷ mŷ ag. Hā kŷ ag tóg fi tén ja tŷ nŷ gé. Cidade tá ke kar kǎgtén ja ag tóg nŷgtŷ, ag tŷ Topē vŷ mē sór ja tŷ tŷgrŷn, hā ra fi tóg inhhā kren ja nŷgtŷ.

³² Inh hŷn ŷ tónh ke mŷ gé ver'. Isŷ ag tó kǎn sór mŷ ra tóg inh mŷ vēnhmŷ tŷ. E ag nŷtŷ, e tāvŷ, Gideão ti, Baraque ti, Sansão ti, Jefté ti, Davi ti, Samuel ti, Topē vŷ tó tŷ kar ag.

³³ Topē ki ge kǎn kŷ ag nŷtŷ, hā kŷ ag tóg pǎ'i ag mré vēnh génh han, hā ra ag tóg pǎ'i ēn ag tŷ hēn ri ke kǎn. Vēnh jykre kuryj han ag tóg tŷ, vēnh kar mŷ. Kŷ Topē tóg ag mŷ ā tŷ ag mŷ vēnh jykre há tó mŷ ēn tŷ ag mŷ ven mŷ sir. Mŷg tŷ ŷ mǎn sór mŷ ra tóg ti tŷ hē ri ke ja tŷ nŷgtŷ gé, mŷg ti. ³⁴ Pŷ gru jagy ēn vŷ ag tŷ hē ri ke ja tŷ nŷgtŷ gé, ŷ tŷ Topē ki ge kŷ

nýtĩ ag. Û tỹ rógro tỹ ag tén sór mũ ra tóg ag tỹ hẽ ri ke ja tũ nĩgtĩ gé. Ag krój nýtĩ ra ag tóg tar gy nýtĩ ja nĩgtĩ. Vẽnh génh han kỹ ag tóg rará há han, kỹ ag tóg ag kato vāsānsān mũ ag tỹ pětẽ han gé. ³⁵ Ûn týtá ù fag vỹ, ājag krẽ ter kar kỹ fag vỹ ag ve mǎn, ag tỹ ag rĩn mǎn kỹ, Topẽ ki ge kỹ nýtĩ ěn ag.

Hǎ ra ag kato vāsānsān mũ ag vỹ ag to jũ mág, kỹ ag tóg ag kāmĩ ù ag vóg kónān gé. Kỹ ag tóg ag kygrẽg gé, ù tỹ Topẽ ki ge kỹ nýtĩ ag, ag tỹ Topẽ to jũ kỹ, ù tỹ ag kygrẽg mũ ag. Ag mỹ ag tóg: “ājag tovānh jé ěg tóg ke mũ, ājag tỹ Topẽ tovānh kỹ,” he ja nĩgtĩ, hǎ ra ag tóg Topẽ tovānh sór ja tũ nĩ. Ag tỹ kanhkǎ tá rĩnrĩr nýtĩ sór ja vẽ, hǎ kỹ ag tóg Topẽ tovānh ja tũ nĩ. ³⁶ Ag kāmĩ ù ag to ag tóg é he mũ gé, kỹ ag tóg ag mrǎnmrǎn gé, ag sigse ag tóg, ke gé, kỹ ag tóg vese jafǎ kǎtá ag vǎm gé. ³⁷ Pó tỹ ag pin kỹ ag tóg ag kǎgtén gé, ránran jafǎ tỹ ag tóg ag ránran gé, serrote tỹ. Rógro tỹ ag tóg ag kǎgtén gé, Topẽ ki ge kỹ nýtĩ ag. Ag tỹ hẽ mĩ mũn kỹ ag tóg carneiro fár tỹ kur rĩnh ja nĩgtĩ, cabrito fár tỹ kur ke gé, ag tỹ Topẽ ki ge tugrĩn jagtar nýtĩn kỹ. Vějẽn ve ja tũ ag tóg nĩgtĩ kejẽn, jagǎgtar ag tóg nýtĩ, ag vóg kónān ja ag tóg nĩgtĩ gé. ³⁸ Ag mré ke ag vỹ kórég pẽ nýtĩ ja nĩgtĩ, hǎ kỹ ag tóg ùn há tag ag to kórég nýtĩ ja nĩgtĩ. Kỹ ag tóg ga kórég kri mũ ja nýtĩgtĩ, ag jo pětẽ kỹ, sór kri ag mũgtĩ, kỹ ag tóg pānónh nor kǎki nýtĩ ja nĩgtĩ gé, ga nor kǎki ke gé, ù tỹ Topẽ ki ge kỹ nýtĩ ag. Ěprǎ ke ag vỹ ag to jũ mág nýtĩ ja nĩgtĩ.

³⁹ Ag tỹ Topẽ ki ge kỹ nýtĩn kỹ tóg hǎ ra ag to há nĩ, Topẽ ti. Hǎ ra ag tóg tag ki ve ja tũ nĩ ver, ag tỹ nén ve sór mũ ěn ti, Topẽ tỹ ag mỹ nén tó ja ěn ti. ⁴⁰ Topẽ vỹ ěg to jykrén ja nĩ gé, hǎ kỹ tóg ver ag mỹ ven ja tũ nĩ. Ti tỹ ěg mré ag mỹ ven sór vẽ, ěg tỹ jagnẽ mré kanhkǎ tá junjun jé.

12

Topẽ tỹ ěg kanhrǎn sór mũ

¹ Ha vé, e tǎvĩ ag nýtĩ, ù tỹ ěg jo Topẽ tovānh tũ ag. Ěg pėnĩn ag e nýtĩ, ěg ve kỹ. Kỹ tóg há tĩ, ěg tỹ Topẽ japry jagma mũ há han ke ti, ti jamĩn jagma. Ěg tỹ corrida han ri ke ti nĩ. Ěg tỹ tỹ vaj kỹ corrida han ken kỹ ěg tóg vėnhkǎn há han ke mũ. “Sỹ tag han kỹ inh mỹ corrida to krónh kenh ke tũ nĩ vỹ?” he ěg tĩ. “Ne nỹ isar han mũ, corrida to?” he ěg tóg tĩ gé. Ěg tỹ nén han ke mũ ěn tovānh ěg tóg tĩ, ěg tỹ corrida to krónh ke tũ nĩ jé. Topẽ jykre ri ke ti nĩ, tag ti. “Tag mỹ Topẽ to isar han mũ vỹ?” hemnĩ, ājag tỹ nén han ke mũ ěn kar to. Ājag tỹ nén han ke mũ tugrĩn ti to tar nýtĩn kỹn há tĩ. Ājag tỹ nén han ke mũ ěn tugrĩn ti to krónh kenh ha mẽ tĩn kỹ han tũg nĩ, tovānh nĩ. Ti vĩ mranh sór tũg nĩ gé. Tag vỹ ěg kókén pẽ han tĩ. Ājag tỹ nén han tĩ tag kar tovānh kỹ ājag tóg ti jykre hǎ to krónh kenh ke tũ pẽ nĩ. ² Jesus hǎ mĩ ěkrén nĩ, ti jykre hǎ tỹ krĩn kỹ nýtĩmĩ. Ti hǎ vỹ ěg tỹ Topẽ ki rǎ han, kỹ tóg ěg tỹ ti tovānh ke tũ han ěn ki kanhró nĩ gé. Cruz to sa kỹ tóg ter mỹr, ag tỹ ti to é he mũ ra tóg ti mỹ tỹ nén ù tũ tĩ. Ti tỹ kar kỹ nén venh ke ěn mĩ tóg ěkrén ja nĩ, nén tỹ ti mỹ sér nĩnh ke ěn mĩ. Hǎ kỹ tóg ùri Topẽ pėgja tá nĩ nĩ.

³ Jesus mĩ ěkrén nĩ. Ěprǎ ke kar ag vỹ ti kato vĩ ja nĩgtĩ, ù tỹ Topẽ vĩ mranh mũgtĩ ěn ag, ge ra tóg Topẽ to krónh ke ja tũ nĩgtĩ, Jesus ti. Ti ki ěkrén kỹ to krónh krónh ke tũg nĩ, to: “ron inh mũ,” he tũg nĩ gé.

⁴ Ha vé, Topẽ vĩ mranh tũg nĩ. Ājag tỹ ti vĩ mranh sór mũ tag kato vāsānsān nĩ, ke tũ nĩ (mũ) ra ājag tóg to ter mũ. ⁵ Ājag mỹ Topẽ tỹ ěg jyvėn ěn kǎ jatu'? Ěg jyvėn kỹ tóg tag tó, ha mẽ. Ā krẽ mỹ tóg tag tó, Topẽ ti, ha mẽ: “inh kósin, isỹ ā vóg kónān kỹ inh mỹ vėnh nenh tũg nĩ,” he tóg. “Isỹ ā mỹ vĩ tar han mũ ra to krónh ke tũg nĩ. ⁶ Isỹ ā to há nĩn kỹ, hǎ kỹ sóg ā mỹ vĩ tar han tĩ. Ā kanhrǎn jé ke vẽ. Isỹ ā mỹ: “inh kósin vỹ tỹ ā nĩ,” hen kỹ sóg ā mrǎnmrǎn tĩ gé, ā kanhrǎn ti jé,” he tóg, Topẽ vỹ tỹ rán kỹ nĩ ki.

⁷ Hǎ kỹ ti tỹ ājag mrǎnmrǎn tag to tar nýtĩmĩ. Ājag kanhrǎn jé ke vẽ. Topẽ tỹ ājag mỹ: “inh krẽ,” he vẽ. Ěg panh vỹ ěg mrǎnmrǎn kỹ ěg kanhrǎn ja nĩgtĩ gé. Vẽnh kar jykrén hǎ vẽ. Topẽ vỹ ā krẽ kar mrǎnmrǎn kỹ ag kanhrǎn tĩ. ⁸ Kỹ, ti tỹ ājag mrǎnmrǎn tũ nĩ ra ājag pi(jé) tỹ ti krẽ pẽ nýtĩnh mũ vẽ'. ⁹ Ha vé, ěg han mũ fag vỹ ěg mrǎnmrǎn tĩ, ěg kanhrǎn jāvānh nĩn kỹ, kỹ ěg tóg fag kamėg tĩ. Kỹ ěg tóg Topẽ kamėg kǎfór han ke mũ, ù

tỹ ãg rĩnrĩr han mũ ti, ãg jóg mág ti. ¹⁰ Kĩ ù tỹ ãg han mũ tóg ãg to ã jykre fi ja nĩgtĩ. To jykrenĩ kĩ tóg ãg mrãnmrãn tĩ kejẽn, ãg sĩn kã. Kejẽn tóg ã tỹ kygnẽ kĩ nĩ ra ãg kanhrãn sór tĩ gé, ãg panh ti. Hã ra Topẽ tỹ ãg mrãnmrãn kĩ tóg to jykrenĩ há han tĩ inhhã. Ti tỹ ãg kãnrãn há han sór vẽ, ãg tỹ ti ri kén kygnég tũ nĩ jé, ãg tỹ ti ri kén há tãvĩ nỹtĩ jé. ¹¹ Ti tỹ ãg mrãnmrãn ãn kã tóg ãg mũ sér tũ nĩ ver. ãn kã tóg ãg mũ jagy tĩ. Kar kĩ ãg tóg vãhã vэг tĩ, ti há nĩ ja ti, ãg tỹ kanhrãn há han kar kĩ. Ti tỹ ãg mrãnmrãn hã kĩ ãg tóg vẽnĩ jykre há han ãn ki kanhrãn mũ sir, jagnẽ krĩ kuprãg ki ãg kanhrãn mũ gé sir.

Ëg tỹ jagnẽ tar han ke

¹² Krónh ke ve ãjag tóg nĩ, kĩ ãjag tóg tỹ ùn kaga tĩg kórég ãn ri ke nỹtĩ. To tar' he mãn nĩ, ãjag tỹ mũ há han mãn jé. ¹³ Topẽ japry kuryj hã jagma ãvãnh nĩ, kĩ ù tỹ ãjag mũ to krónh ke ha mẽ ãn ag vỹ ãjag mré to tar' he mãn mũ gé. Topẽ jykre tovãnh sór nĩ ve ãjag nỹtĩ, hã ra tóg ãjag tar han mãn sór mũ.

¹⁴ Vẽnĩ kar mré vẽnĩ jykre kuryj han sórmnĩ. Kĩ Topẽ vĩ ki króm kĩ kygnẽ sór tũg nĩ. Ëg tỹ tag to vãsan tũ nĩn kĩ ãg pi(jé) ãg jóg mág venh ke mũ'. ¹⁵ Vẽnĩ ki rĩr há han nĩ, ãjag kãmĩ ù tỹ Topẽ tỹ ãg jagãgtãn mũ tag to é he tũg jé. ãjag kãmĩ ùn pir tỹ vẽnĩ jykre kórég to tar nĩn kĩ tóg ãg mũ ti tỹ ùn e ag krĩn kónãn ha mẽ tĩ, ag tỹ ti jykre kórég ãn ri ke nỹtĩ jé. Kĩ tóg ãg jakré kãmĩ vãnh jagy ri ke nĩ. Ëg jakré kókég ti tĩ, vẽnĩ jykre kórég tỹ ãg kókén ri ke. ¹⁶ Vẽnĩ ki rĩr há han nĩ gé, ãjag kãmĩ ù tỹ Esáu jykre kórég ãn ri ke han tũ nĩ jé, ù tỹ Topẽ kato vãsan tũ nĩ jé. Esáu vỹ Topẽ to é he ja nĩgtĩ, kĩ tóg vějẽn tugrĩn ã panh tỹ ti mũ vĩ há han ke ãn kren. ã jãvy mũ tóg tovãnh, ti panh tỹ ti mũ vĩ há han ke ãn ti, ã jẽn ke pir tugrĩn mýr. Ti tỹ ã panh tỹ ti mũ vĩ há han ke ãn to é he hã vẽ. ¹⁷ Kar kĩ tóg mẽ sór ja nĩ, ti panh tỹ ti mũ vĩ há han ke ti, hã ra tóg mẽg tũ nĩ sir. Kĩ tóg fỹ ja nĩgtĩ, ti panh tỹ ti mũ vĩ há han jé, vãhã tóg ti mũ e nĩ ja nĩgtĩ, hã ra tóg sir rãké ja nỹ. Mẽg tũ tóg nĩ sir, ti panh tỹ ti mũ vĩ há han ke ti. Tag ri ke han sór tũg nĩ.

Topẽ jũ tỹ jagy pẽ

¹⁸ Vãsỹ Topẽ vỹ ãg jóg'jóg ve ag mũ ã jykre nĩm ja nĩgtĩ. Pãnónh tỹ Sinai tá ag tóg junjun ja nĩgtĩ. Pĩ ve ag tóg, tá, kĩ tóg tá kuty nĩ ja nĩgtĩ gé, kuty pẽ, kóho jũ ke gé. ¹⁹ Kĩ trombeta ãn vỹ kyr ja nĩgtĩ gé. Kĩ Topẽ vỹ ag mũ vĩ ja nĩ gé. Ag tỹ ti vĩ mẽ kĩ ag tóg jũrũn ke ja nĩgtĩ, kĩ ag tóg ti mũ to vĩ mũ, ti tỹ ag mũ vēmén tũ nĩ jé, ti tỹ ag kãnhmỹ Moisés hã mré vēmén jé, ãgno ki. ²⁰ Ag mũ tóg: “ãjag mẽg ù tỹ pãnónh tag rã hã jun kĩ ti tén nĩ,” he ja nĩ, “pó tỹ ti pin kĩ, ãjag krẽ ke gé, ãjag prũ fag ke gé, ãjag tỹ tá nén vэг mũ kar ãn ti. Ti tỹ pãnónh tag vóg tugrĩn ti tén nĩ,” he ja tóg nĩ, Topẽ ti. Hã tóg ag mũ e ja tĩgtĩ. ²¹ Topẽ tỹ ag mré vēmén kĩ tóg ag mũ e tãvĩ nĩ ja nĩgtĩ, Moisés mré hã, hã kĩ tóg: “jũrũn ke inh, mũmẽg kĩ,” he mũ gé, Moisés ti.

²² Hã ra tóg ag tỹ nén ve ja ãn ri ke tũ nĩ, ãg tỹ ùri Topẽ rĩnja tá jun ke ti. Pãnónh ãn ri ke tũ ti nĩ, ãg tỹ kanhkã tá nén venh ke ti. Ëg tỹ kanhkã tá jun ken kĩ ãg ter mãn ke tũ nĩ gé, ãg tỹ kanhkã tá pãnónh tỹ Sião he mũ ãn tá jun ken kĩ. Topẽ jamã tá ke vẽ, ùn rĩr mũ ãn jamã tá ke vẽ, hã vỹ: Jerusalém, he mũ, kanhkã tá cidade ãn ti. Topẽ tỹ jěgnẽ jafã ag vỹ tá nỹtĩ. E tãvĩ ag nỹtĩ, e tãvĩ, ti tỹ jěgnẽ jafã ag. Festa mág pẽ vẽ, tá. ²³ Kĩ Topẽ krẽ sanh kar ag vỹ tá nỹtĩnh ke mũ gé, ùn tỹ Jesus ki ge kĩ nỹtĩ ag kar. Ag jygjy vỹ kanhkã tá rán kĩ nỹtĩ. Kĩ Topẽ vỹ tá nĩ gé, ù tỹ vẽnĩ kar jykre tugnỹm ke ti. Kĩ ù tỹ ãg jo Topẽ ki ge kĩ nỹtĩ ag kuprĩg vỹ tá nỹtĩ gé, ù tỹ ãg jo tá junjun mũ ãn ag. ²⁴ Kĩ Jesus vỹ tá nĩ gé, ù tỹ ãg mũ vẽnĩ jykre tãg nĩm mũ ãn ti, ù tỹ ãg jagfy ter mũ ãn ti, kĩ ãg tóg ti kyvẽnĩ tugrĩn jãnhkri nỹtĩ, Topẽ tỹ ãg mũ vẽnĩ pãte fón ti kĩ. Topẽ tỹ Abel kyvẽnĩ ven kĩ tóg jũ mũ, ù tỹ ti tén ja ãn to. Topẽ tỹ Jesus kyvẽnĩ ven kĩ tóg jãvo ãg mũ vẽnĩ pãte fón mũ. Ëg tũn hã vẽ, Jesus tỹ ãg mũ vẽnĩ jykre nĩm jan hã vẽ, hã kĩ tóg Moisés jykre kãfór nĩ, Jesus ti.

²⁵ Hã kĩ jēmẽ há han nĩ. ù tỹ ãjag mũ Topẽ vĩ tó mũ ãn vĩ jēmẽ há han sórmnĩ. Ëg jóg'jóg ve ù ag vỹ Topẽ vĩ mẽ sór ja tũ nĩgtĩ, ti tỹ ag jyvẽn mũ ra. Hã kĩ ag krenkren ja tũ nĩ. Kĩ ãg krenkren ke tũ nĩ gé, ãg tỹ ù tỹ kanhkã tá nĩ ãn to ãg mré vēmén sór mũ ãn vĩ jēmẽ sór tũ nĩn kĩ, ti tỹ ãg jyvẽn mũ ti. ²⁶ Vãsỹ tóg, ã tỹ ãg jóg'jóg ve ag mré vēmén kĩ tóg ga tỹ ragra ke han ja nĩgtĩ. ùri tóg ãg mũ tag tó, ha mẽ. “Ga tỹ ragra ke pir han mãn

jé sóg ke mū,” he tóg. “Ēn kā kanhkā vỹ ragra ke mū gé, ha vemní,” he tóg. ²⁷ Ti tỹ: “ke pir han mǎn jé sóg ke mū,” hen kỹ ěg tóg ki kanhró nỹtĩ, ti tỹ ā tỹ nén han ja tag tỹ tũ' he sór mū ti, ti tỹ ga tỹ ragra kenh ken ki. Nén ũ tỹ ragra kenh ke tũ ěn hǎ tóg ninh ke mū inhhǎ, hǎ vỹ: “Topě jamǎ, he mū. ²⁸ Kỹ tóg há tĩ, ěg tỹ Topě mỹ: “há ti nĩ, ā tỹ ěg mỹ nén han mū ti,” hen kỹ. Ěg jamǎ tǎg vỹ inhhǎ ragra kenh ke tũ pě nĩ, ti tỹ ěg mỹ ěg jamǎ nĩm ke ěn ti. Kỹ tóg há ninh mū gé, ěg tỹ Topě rǎnhrǎj han há han kỹ, ti tỹ ti mỹ sér nĩ jé. Ti kaměg jé ěg tóg ke mū gé, ěg tỹ tóg jũrũn kenh mū. ²⁹ Topě vỹ pĩ tỹ nén ũ kar kugprũg mū ri ke nĩ.

13

Topě tỹ ěg jyvěn

¹ Jesus ki ge kỹ nỹtĩ ag tỹ jagně to há nỹtĩ to krónh ke tũg nĩ. ² ũ tỹ kuvar há tá ājag to pasa ken kỹ ti mỹ: “inh mré jě,” hemnĩ. Ěg jo ke ũ ag tóg, ag tỹ ũ ag to: “inh mré nỹtĩ,” hen kỹ (ag tóg) Topě tỹ jěně jafǎ ag mỹ: “inh mré nỹtĩ,” he ja nĩgtĩ, ag tỹ ag ki kagtĩg (hǎ) ra. Hǎ kỹ tag han nĩ. ³ ũn sigse kỹ nỹtĩ ag ki rĩrmnĩ. Ājag tỹ kejěn Jesus tugrĩn sigse kỹ nỹtĩnh ke tag mĩ ěkrén nĩ, hǎ kỹ jagně ki rĩr há han nĩ. Ag tỹ ũn vóg kónǎn mū ag ki rĩrmnĩ gé. Kejěn ag tóg ājag vóg kónǎn ke mū gé, Jesus tugrĩn, hǎ kỹ ag ki rĩr há han nĩ.

⁴ ũ prũ fi to én tũg nĩ, ũ mén to én tũg nĩ gé. Ājag prũ nỹtĩn kỹ ũ fi mré nỹ sór tũg nĩ, ājag mén nỹtĩn kỹ ũ mré nỹ sór tũg nĩ gé. Topě vỹ ũ tỹ věnh jykre kórég han (ka)mě ěn ag to jũnh ke mū, ũ tỹ fag mré nỹ sór (ka)mě ěn ag to, fag tỹ ag mré nỹ sór (ka)mě ěn fag to ke gé.

⁵ Rico nỹtĩ sór tũg nĩ gé. Ājag tỹ nén vég mū ěn vỹ há nĩ. Topě vỹ ěg mỹ tag tó, ha mē: “ājag kā jatu' henh ke tũ pě sóg nĩ, ājag ki sóg rĩr nĩ nĩ,” he tóg, Topě ti. ⁶ Hǎ kỹ tag tómnĩ, ha mē: “ěg jóg mág vỹ inh ki rĩr ke mū,” hemnĩ. “Ti hǎ kaměg isóg mū. Ěprǎ ke ũ vỹ inh vóg ke tũ pě nĩ, ti tỹ inh ki rĩr nĩn kỹ,” hemnĩ, Topě vĩ kri fi kỹ.

⁷ ũ tỹ ājag mỹ Topě vĩ tó vén mū ěn mĩ ěkrén nĩ. Ga kri mũn kỹ ag tóg Topě tovǎnh ja tũ pě nĩgtĩ, ājag tỹ ti tovǎnh tũ ra ag tóg kǎgter ja nĩ. Ag ri ke han sórmnĩ, ti ki rǎ ěn tovǎnh sór tũg nĩ gé, ag ri ke han nĩ. ⁸ Jesus Cristo hǎ vỹ ter tũ nĩ. Ti tỹ vǎsỹ nén to jykrén mū ěn hǎ han ti tĩ, ũri, kỹ tóg hǎ han mǎn ke mū gé. Tỹ ũ han ke tũ ti nĩ, kỹ tóg kurǎ krỹg ja tũ nĩ gé. ⁹ ũ tỹ ón kỹ ājag mỹ nén ũ ũ tó sór mū ěn vĩ jěmě tũg nĩ, ag tỹ ón kỹ Topě to nén ũ ũ tó mū ra. Ājag krĩn kónǎn jé ag tóg ke mū. Ājag tỹ tỹ prǎnh ke han sór jé ag tóg ke mū. Topě vỹ ājag tar han ki kanhró nĩ, ājag jagǎgtǎn kỹ. ũ tóg: “ā tỹ vějěn tag kon kỹ ā tóg Topě jykre to tar nĩ,” he tĩ. Ag ón vě. Vějěn vỹ ěg tỹ ti jykre to tar nĩ han ke tũ pě nĩ. Topě hǎ ne ěg tar han ki kanhró nĩ'.

¹⁰ Ha mē, Moisés jykre ki Topě mỹ nén ũ pũn tĩ ag pi(jé) ěg mré Jesus jamĩn ěn konh ke mū'. ¹¹ Ag tỹ Topě tũ ki rĩr tĩ to pǎ'i mág ěn vỹ ag měg ũ tǎnh kỹ ti kyvěnh ma tĩ tĩ, ag tỹ to: “Topě nĩgjafǎ,” he mū ěn ra. Ti tỹ ag měg kyvěnh ěn tỹ ěg tỹ Topě vĩ mranh mū tỹ tũg' he sór vě vě. Hǎ ra ag tóg ājag jamǎ jy ró pǎnĩ to ag tóg ājag měg tǎnh kỹ pũn tĩ. ¹² Hǎ kỹ Jesus tóg cidade jy ró ěn pǎnĩ to ter ja nĩ gé, ti tỹ ěg jagfỹ ter kỹ, ěg jǎnhkri han jé. ¹³ Kỹ ěg tóg ti jagtar ri ke han ke mū gé. ũ tỹ ti ki ge jǎvǎnh ag jykre han tũ ěg tóg nĩ, kỹ ěg tóg ag mré han ke tũ nĩ gé. Jesus tỹ cidade jy ró pǎnĩ to ter ja ěn mĩ ěg tóg ěkrén kỹ nỹtĩ, kỹ ěg tóg ũ tỹ ti ki ge tũ ag mré ag jykre han ke tũ pě nĩ. ¹⁴ Tag ki, ga kri ěg tóg ěg jamǎ pě venh ke tũ nĩ. Kanhkǎ tá ěg tóg ve sór mū, ěg jamǎ ti.

¹⁵ Ěg tỹ Jesus tugrĩn Topě mỹ vĩ há han kỹ tóg há tĩ. Ěg tỹ nén vég mū kar to ěg tóg ti mỹ: “ěg mỹ tóg há tĩ, ěg mỹ tóg sér tĩ,” henh ke mū. Ěg tỹ ti mỹ nén ũ pũn mū ri ke tóg nĩ, presente ri ke tóg nĩ, ěg vĩ tag. “Ěg jóg vě,” he jé ěg tóg ke mū gé, ti to. Ti mỹ vĩ há han ke to krónh ke tũg nĩ. ¹⁶ Jagně ki rĩrmnĩ gé, jagně mré nén kar han kỹ. Tag to krónh ke tũg nĩ gé. Ěg tỹ Topě mỹ nén ũ pũn ri ke ti nĩ, ěg tỹ ti mỹ presente han ri ke ti nĩ, ěg tỹ jagně ki rĩr tĩ ti, kỹ tóg ti mỹ sér tĩ.

¹⁷ ũ tỹ ājag kanhrǎn tĩ ěn ag vĩ jěměmnĩ, ag tỹ ājag mỹ nén tó mū ěn ki króm nĩ. Ājag ki rĩr ag tóg nĩgtĩ, ājag tỹ Topě tovǎnh tũ nĩ jé, kỹ Topě vỹ ag rǎnhrǎj tugnỹm ke mū. Ājag

tỹ ag vỹ jēmēn kỹ tóg ag mỹ kufy tũ nĩnh mũ, ag rãnhřaj ti, kỹ tóg ag mỹ sér tĩnh mũ. Ti tỹ ag mỹ kufy nĩn kỹ tóg há tũ nĩ gé, ãjag mỹ.

Ëg tỹ Topě mré vēmén ke

¹⁸ Inh jagfỹ Topě mré vēmén nĩ. Nén ũ kórég han ja tũ inh nĩ, ki kanhró sóg nĩ. Isỹ nén ũ kuryj han sór vė mỹr, tag há to sóg jykrén tĩ. ¹⁹ Kỹ inh jagfỹ Topě mré vēmén nĩ, Topě tỹ kãnhmar ãjag to inh jēnē mãn jé. Ti mỹ tag to vĩn kỹ krónh ke tũg nĩ.

²⁰ Topě mré sóg vēmén tĩ ãjag to. Ëg krĩ kuprãg ti tĩ. Kỹ tóg Jesus ti, ãg Senhor ti rĩn mãn ja (ti) nĩ gé, ti tỹ ãg jagfỹ ter kar kỹ. Ëg jagfỹ ter kỹ tóg ũ tỹ mé ki rĩr tĩ ěn ri ke nĩ, há ra tóg ěn kãfór nĩ gé, ti tỹ ãg ki rĩr há han nĩn kỹ. Ëg jagfỹ ter kỹ tóg ãg mỹ vėnh jykre tãg ěn nĩm ja nĩ, ũ tỹ tũ' he vãnh ěn. ²¹ Topě há mỹ sóg to vỹ mũ, ti tỹ ãjag tar han jé, ãjag tỹ nén (ũ) tỹ ti mỹ há nĩ ěn há han jé. Ti há vỹ Jesus Cristo mỹ: “ag tar han nĩ,” he ja nĩ. Ti há mỹ ãg tóg vỹ há han ke mũ, Jesus Cristo mỹ, kỹ tóg tũ' henh ke tũ nĩ, ãg tỹ ti mỹ vỹ há han ke ti. Amém.

²² Inh kanhkã, sỹ ãjag mỹ tag tó sór ja vė. Jatun mỹ mẽ sórmnĩ, sỹ ãjag jyvėn mũ tag. Inh pi(jé) vėnh rãnrãn mág han. Vėnh rãnrãn sĩ han sóg ãjag mỹ.

²³ Ha mẽ, ãg régre tỹ Timóteo vỹ se kỹ jē mãn tũ nĩ ha. Ti kava ag huri. Ti tỹ kãnhmar ki jun kỹ tóg inh mré ãjag venh kãtĩg ke mũ.

²⁴ ãjag pã'i kar ag mĩ sóg ěkrég tĩ, Topě ki ge kỹ nỹtĩ kar ag mĩ ke gé. Tag ki ke ag, ga tỹ Itãlia ki Topě ki ge kỹ nỹtĩ ag vỹ ãjag mĩ ěkrég tĩ gé.

²⁵ Topě jé ãjag tar han kãn.

Hã vė.

TIAGO TỠ CARTA

¹ Tiago tỹ rá vễ. Isỹ Israel ag mỹ rán hã vễ. Ęg povo tỹ 12 (ke) vỹ tỹ ăjag nỹtĩ. Povo kar mĩ ăjag tóg mũgtĩ, fóg ag kar mĩ, kanhgág ag mĩ ke gé. Sỹ ăjag mỹ vễnh rá jênê vễ. Tỹ sóg Topê mỹ rănhrăj tĩ nĩ, ęg Senhor tỹ Jesus Cristo mỹ. Hã kỹ sóg ăjag mỹ rán kỹ jênêg mũ sir. ăjag mĩ sóg ękrég tĩ.

Ęg tỹ Topê vĩ to: hỹ mỹ vỹ? henh ke tũ

² Inh kanhkã', ăjag tỹ Jesus tigrĩn nén ũ jagy ve kỹ to vễnhmỹ nỹtĩ tũg nĩ. Mỹ sér nỹtĩmnĩ hã ra. ³ Topê tỹ ăjag tỹ ti ki rã há han ja ve sór vễ, hã kỹ ăjag tóg tag kar végtĩ. Kỹ ti tovănh sór tũg nĩ, kỹ ăjag tóg ti to tar nỹtĩnh mũ, ăjag tỹ nén ũ jagy végtĩ mũ ra ti tovănh tũ nĩn kỹ. Tag to jykrén. ⁴ ăjag tỹ nén ũ jagy végtĩ mũ ra to tar nỹtĩmnĩ, ăjag tỹ komêr hã há nỹtĩ jé, Topê jykre ki króm há han kỹ. Komêr hã ăjag tóg kygnênh ke tũ nĩ, nén ũ kar ki, ăjag tỹ ti to krónh ke tũ nĩn kỹ.

⁵ ăjag tỹ nén ũ to jykrén tũ nĩn kỹ Topê mỹ to vĩmnĩ, ti tỹ ăjag kanhrăn jé. Ęg kanhrăn jé tóg ke mũ, Topê ti. To tóg: “han ke tũ inh nĩ,” henh ke tũ nĩ, vĩ tar han ke tũ ti nĩ, ęg tỹ ti mỹ nén ũ to vĩn kỹ. Ęg to tóg fe há nĩ, hã kỹ tóg ęg kanhrăn tag to há nĩ. ⁶ ăjag tỹ ti mỹ nén ũ to vĩn kỹ: “ęg mỹ tóg han tĩ, Topê ti,” hemnĩ. “Ti mỹ inh mỹ han mũ vỹ?” he tũg nĩ. ăjag tỹ: “ti mỹ inh mỹ han mũ vỹ?” hen kỹ ăjag tóg venh ke tũ nĩ, ăjag tỹ ti mỹ nén to vĩ mũ ęn ti. Kỹ ăjag tóg goj ri ke nỹtĩ. Goj tóg kejên fagrĩnh mỹ krém krém ke tĩ, kãka tỹ ti kã nĩ kỹ. Kỹ tóg ra tĩg, tá kãtig ke mũ. ęn ri ke tóg nĩ, ũ tỹ Topê vĩ kri fig tũ ęn ti. ⁷⁻⁸ Fagrĩnh mỹ tóg Topê mỹ nén ũ to vĩ tĩ, ti tỹ: “ti mỹ inh mỹ han mũ vỹ?” hen kỹ. Venh ke tũ tóg nĩ sir. Krĩ régre ti nĩ. Nén ũ to jykrén kỹ tóg kãnhmar nén ũ hã to jykrén măn mũ gé, vễnh jykre pir han vănh nĩn kỹ. Ki kagtĩg tóg nĩ, hã kỹ tóg venh ke tũ nĩ gé sir.

Ũn jagtar ag mré ũn rico ag jykre

⁹ Ęg Senhor tỹ Jesus mré ke ũ ag tóg jagăgtar nỹtĩ. Hã ra ag tóg ęg Senhor ki ge kỹ nỹtĩn kỹ ũn rico ri ke nỹtĩ, ag tỹ tỹ Topê krê nỹtĩn kỹ. Kỹ tag to jykrén nĩ, ăjag mỹ sér tĩ jé, ăjag jagtar nỹtĩn kỹ. ¹⁰ Kỹ ęg Senhor tỹ Jesus mré ke ũ ag tóg rico nỹtĩ hã ra. Ag tỹ ęg Senhor ki ge kỹ nỹtĩn kỹ ag tóg ũn jagăgtar ri ke nỹtĩ, Topê mỹ. “Ter jé ęg tóg ke mũ, kỹ tóg ęg mỹ há tĩ, Topê tỹ ęg jagăgtăn ken kỹ, ũn jagtar ag ri ke,” hemnĩ, ăjag rico nỹtĩn kỹ. Re fej ri ke ęg tóg nỹtĩ, ęg kar. ¹¹ Rã tỹ jun ke kỹ tóg rỹ jagy tĩ. Kỹ tóg tugtóg tĩ, re ti, kỹ ti fej tóg kógungun tĩ gé. Kỹ ti sĩnvĩ ęn tóg tũ' henh mũ sir. ęn kãgter ri ke ęg tóg nỹtĩ gé. Kỹ ũn rico ag tóg ke tĩ gé, kãgter kỹ. Kỹ ag há ęn tóg tũ' he mũ gé sir, ag rănhrăj tỹ ag mỹ sér nĩ ra.

Ęg tỹ Topê vĩ mranh sór mũ

¹² Kejên ũ tóg Jesus tigrĩn ęg to jũ nĩ. Ęg tỹ hã ra Topê tovănh tũ nĩn kỹ tóg há tĩ. Kỹ ęg Senhor tóg ęg mỹ ęg rĩr krỹg ja tũ ven ke mũ, ęg tỹ ęg jagăgtar mũ ra ti tovănh tũ nĩn kỹ. Kỹ tóg ęg tỹ carreira ki ka féj tỹ coroa ganhar he mũ ęn ri ke nĩ sir. Ęg Senhor vỹ ęg mỹ: “rĩr krỹg ja tũ ve jé ăjag tóg ke mũ, ăjag tỹ iso há nỹtĩn kỹ,” he ja nĩgtĩ, hã kỹ tóg ęg mỹ tỹ presente han ke mũ.

¹³ ăjag tỹ Topê vĩ mranh sór mũn kỹ to: “Topê vỹ inh krĩn, sỹ ti vĩ mranh jé,” he tũg nĩ. Topê pi(jé) vễnh jykre pãno han ja nĩgtĩ'. Kỹ ũ pi(jé) to Topê krĩn kónăn tĩ gé'. Kỹ tóg ęg krĩn kónăn tũ nĩgtĩ gé (mỹr), Topê ti. ¹⁴ Ęg tỹ Topê vĩ mranh sór kỹn ge nĩ, hã nỹ ve nĩ, kỹ ęg tóg to ęn tĩ. ¹⁵ Ęg tỹ to ęn kỹ ęg tóg to jykrén mág nĩ. Kỹ ęg tóg sir han sór mũ. Ęg tỹ han sór kỹ ęg tóg han mũ. Kỹ ęg tỹ ti vĩ mranh vễ sir. Kar kỹ ęg tóg mranh măn', mranh măn', he mũ gé, vễnh jykre pãno vễ sir. Hã ra ęg tóg to nũgme ki văr ke mũ, inferno ki.

¹⁶ Inh kanhkã', ăjag to sóg há tăvĩ nĩ. Hã kỹ sóg ăjag mỹ: “kygnê tũg nĩ, Topê to,” he mũ. ¹⁷ Topê hã ne ă pin kỹ ęg mỹ nén ũ há kar han tĩ'. Nén ũ há tăvĩ han tóg tĩ, Topê ti, ępră ke ag mỹ, hã vỹ: ęg, he mũ. Ti hã tóg jęngrê hyn han'. Rã tỹ ęg ki kupũn tũ nĩn kỹ

tóg fênja tí. Hã ra Topê tóg tag han tũ nĩgtĩ (mỹr). Ti pi(jé) kejên êg ki rĩr tũ nĩgtĩ'. Êg ki rĩr tóg nĩ nĩ hã ra. ¹⁸ Ti hã tóg êg han mãn', êg tỹ ti ki ge kỹ. Ti tỹ êg han mãn sór kỹ tóg êg han mãn. Êg to tóg ã vĩ há jênê. Vênh vĩ há tag tỹ tóg êg han mãn mũ sir. Ti tỹ êg han mãn kỹ êg tóg ti tỹ nén han mũ kar kri ke nỹtĩ, êg tỹ tỹ ti krê nỹtĩn kỹ.

Êg tỹ Topê vĩ ki króm ke

¹⁹ Inh kanhkã', tag to jykrén mág nĩ. Û tỹ nén ù há kãmén kỹ jêmê há han nĩ. Kãnhmar vĩ tũg nĩ. Kãnhmar jũ tũg nĩ gé. ²⁰ Êg jũ nỹtĩn kỹ êg tóg Topê jykre han tũ nĩgtĩ (mỹr), ti jykre kuryj ti. Hã kỹ jũ tũg nĩ. ²¹ Hã kỹ nén tỹ êg kavénh tĩ ên tovãnh kãn nĩ, vênh jykre pãno mré hã. Êg kókég tóg tĩ, êg fãn tóg tĩ, vênh jykre pãno ti. Tovãnh ra. Jatun mỹ Topê vĩ mêmni. Topê hã ne ã vĩ tỹ êg kanhrãn'. Êg tỹ kri fi kỹ êg tóg krenkren ke mũ. ²² Kỹ Topê vĩ han kỹ nỹtĩmni. Ājag tỹ mēg mũ (hã) ra ki króm tũ nĩn kỹ ājag tóg krenkren ke tũ nĩ. Ón kỹ ājag tóg: “kren jé sóg ke mũ,” henh ke mũ. ²³ Êg tỹ jêmēg mũ (hã) ra ki króm tũ nĩn kỹ êg tóg tag ri ke nỹtĩ, ha mẽ. Kejên ù tóg vênh vég mũ, ki vênh ve jafãn ki (mỹr, ha mẽ). Kỹ tóg ã kakã vég mũ sir. ²⁴ Ā kakã ve kar kỹ tóg to jykrén mãn tũ nĩ. Kỹ tóg ki kagtĩg' he mũ. Tĩg tóg mũ, kỹ tóg ã kakã ki kagtĩg' he mũ. Kỹ tóg fagrĩnh mỹ vênh ven ja nĩ sir. Ge êg nỹtĩ, êg tỹ Topê vĩ jêmēg mũ (hã) ra ki króm tũ nĩn kỹ. Kỹ êg tóg fagrĩnh mỹ mẽ ja nĩ sir. ²⁵ Êg tỹ ti vĩ to jykrén mág kỹ tóg hã ra êg mỹ sér tĩnh mũ. Topê vĩ vỹ há nĩ, ti jykre ti. Êg jykre pãno tỹ tũg' he tóg tĩ, êg tỹ han mãn tũ nĩn jé. Kỹ êg tóg êg tỹ ti vĩ jêmē kỹ nỹtĩn kỹ to jykrén ke mũ. Kã jatun ke tũ êg tóg nỹtĩ sir. Kỹ êg tỹ ki króm kỹ Topê tóg êg mỹ vĩ há han ke mũ sir, êg tỹ nén han mũ kar to.

²⁶ Û ag tóg Topê to: “ti to sóg há nĩ,” he tĩ. Hã ra ag tóg ù to vĩ kónãn tĩ, ājag vĩ to jykrén tũ nĩn kỹ. Kỹ ag tóg ón kỹ: “ti to sóg há nĩ,” he ja nĩgtĩ. Kygnêg êg tóg tĩ, êg tỹ gen kỹ. Hã kỹ êg tóg ón kỹ: “ti to sóg há nĩ,” he tĩ, êg tỹ ù to vĩ kónãn kỹ. ²⁷ Êg tỹ êg jóg tỹ Topê to há nỹtĩn kỹ, kỹ êg tóg tag han mũ, ha mẽ: ùn panh ter mũ kar jagãgtãn kãn êg tóg tĩ, ùn mén ter ja fag ke gé, ùn jagãgtar fag. Fag ki rĩr jé êg tóg ke mũ, fag mỹ há tĩ jé. Kỹ êg tóg nén ù vênhmỹ han ke tũ nĩ gé sir. Topê kato tẽ mũ ag jykre han ke tũ êg tóg nĩgtĩ gé. Hã kỹ êg tóg ti mỹ kavéj tũ nỹtĩ sir. Hã kỹ êg tóg ón kỹ: “Topê to sóg há nĩ,” he tũ nĩgtĩ gé.

2

Êg tỹ jagnê to vênh jykre pir han ke

¹ Inh kanhkã', êg Senhor tỹ Jesus Cristo ki ājag ge mũ mỹr. Pã'i kar kãfór vê (mỹr), êg Senhor tỹ Jesus Cristo ti. Ge ra ājag ne tóg ùn rico ag to há nỹtĩ', kỹ ùn jagãgtar ag tóg ājag mỹ tỹ nén ù tũ nỹtĩ. Ke tũg nĩ. ² Hên ri ke mũn ùn rico vỹ Topê vĩ jêmēnh kãtĩg mũ, ājag vênhmãn kỹ. Ti kur vỹ há tãvĩ nĩ, kỹ ti nĩgé kãnĩm ja vỹ tỹ ouro nĩ. Kỹ ùn jagtar vỹ kãtĩg ke mũ gé, kur kórég tu kỹ. ³ Kỹ ājag hỹn tóg ùn rico mỹ: “ha tag kã nĩ, vênh nĩg ja há kri,” he tĩ. Jó ùn jagtar mỹ ājag hỹn tóg: “ha tã tá jẽ,” he tĩ, ke tũ nĩn kỹ: “ha inh mré nĩ, hã ra êprã nĩ, gan kri,” he ājag hỹn tĩ. ⁴ Hã ki ājag tóg ùn rico to há nĩ ve nĩ, ti tũ tugrĩn. Jãvo ājag tóg ùn jagtar to é he mũ ve nĩ, ti jagtar nĩn kỹ. Ke tũg nĩ. Ājag tỹ jagnê ri ke nỹtĩ to jykrén nĩ, ke tũ nĩ mũ ra ājag tóg vênh jykre pãno han mũ.

⁵ Inh kanhkã', jêmê há han ra. Ājag to sóg há nĩ (mỹr), hã kỹ sóg ājag jyvên mũ. Topê vỹ ùn jagãgtar ag kuprêg, ag tỹ ti to ricon jé, ti ki ge kỹ. Ga mĩ mũn kỹ ag tóg jagãgtar nỹtĩ. Êg Senhor ki ge kỹ ag tóg há nỹtĩ jãvo. Topê tỹ tỹ êg pã'i nĩ ve jé ag tóg ke mũ, ag tỹ ti to há nỹtĩn kỹ. Topê hã ne tag tó ja nĩgtĩ', êg tỹ ti venh ke ti, kỹ tóg han ke mũ, ã tỹ tó ja ên ti. ⁶ Jãvo ājag tóg ùn jagãgtar ag to é he tĩ. Ûn rico ag to ājag tóg vĩ há han tĩ. Hã ra ùn rico ù ag tóg ājag to kórég nỹtĩ gé. Kỹ ag tóg ājag fóg mỹ ājag to vĩ kónãn tĩ, ājag fóg tỹ ājag jé prêr jé. Kỹ ājag tóg to jagtar nỹtĩ sir, ag tỹ ājag to vĩ kónãn tĩ ên to. Hã kỹ tóg sir vênhmỹ nỹ, ājag tỹ ùn jagãgtar to é he ti. ⁷ Kỹ ùn rico ù ag tóg êg Senhor to é he tĩ gé. Ti to ag tóg vĩ kónãn tĩ gé, hã ra êg tóg tỹ ti mré ke nỹtĩ. Hã kỹ ag tóg êg to vĩ kónãn mũ gé, ti to vĩ kónãn kỹ.

⁸ Topê tỹ vāsỹ ãg mỹ vãnh jykre nĩm ja ěn ki króm nĩ, hã vỹ: “ã régre to há nĩmnĩ, ã tỹ vĕso há nĩ ri ke nĩmnĩ, ã régre tỹ,” he ja tóg nĩgtĩ ãg mỹ, Topê ti. Kỹ tóg rán kỹ nĩ. Ājag tỹ tag han kỹ tóg há nĩ. ⁹ Ājag tỹ hã ra ũn rico to há nỹtĩn kỹ, ũn jagtar to kórég nỹtĩn kỹ, kỹ ājag tóg ti vĩ mranh mũ sir, ti tỹ ãg jyvĕn ja ti. Kỹ Topê tóg ājag to jykrĕn kónān mũ, ājag tỹ ti vĩ mranh kỹ.

¹⁰ Ha vé, hĕn ri ke mũn ãg kāmĩ ũ tóg Topê tỹ ãg mỹ vãnh jykre nĩm ja kar ki króm tĩ. Hã ra tóg sir nĕn pir ki ti vĩ mranh mũ. Kỹ ti tỹ ti vĩ mranh kãn vĕ sir, ti vĩ pir mranh kỹ. ¹¹ Topê tóg ãg mỹ: “ã prũ tũ fi mré nỹ tũg nĩ, kỹ ã mén tũ mré nỹ tũg nĩ gé,” he ja nĩgtĩ. Kỹ tóg ãg mỹ: “jagnĕ tĕn tũg nĩ,” he ja nĩgtĩ gé. Hĕn ri ke mũn ãg tóg ãg prũ tũ fag mré nỹ tũ nĩgtĩ. Ēg tỹ hã ra jagnĕ tĕn kỹ ãg tóg ti vĩ mranh kãn mũ, ti tỹ ãg jyvĕn ja ti. ¹² Kỹ tag to jykrĕn nĩ, ājag tỹ nĕn ũ han ke to jykrĕn kỹ. Ēg Senhor vỹ ãg jykre kar vég tĩ, ti tỹ ãg tỹ ti jykre ki króm mũ ve sór kỹ. Kỹ ājag jykre to jykrĕn nĩ, ājag vĩ to ke gé. ¹³ Ēg tỹ jagnĕ jagāgtān tũ nĩn kỹ tóg ãg jagāgtān ke tũ nĩ gé, ãg Senhor ti, ti tỹ ãg jykre tugnỹm ken kỹ, kurā ěn kã. Ēg tỹ hã ra jagnĕ jagāgtān kỹ tóg ãg jagāgtān ke mũ gé, ti tỹ ãg jykre tugnỹm ken kỹ. Kỹ ti pi(jé) ãg vóg kónān mũ sir'.

Ti ki rã há

¹⁴ Inh kanhkã', ũ tóg kejĕn: “ti ki sóg rã kỹ nĩ,” he tĩ, Topê to. Hã ra tóg ti vĩ han tũ nĩgtĩ. Kỹ tóg ón kỹ ti ki rã kỹ nĩ ja nĩ. Kren ke tũ tóg nĩ sir. ¹⁵ Kejĕn Jesus mré ke ũ tóg kur vég tũ nĩgtĩ, vĕjĕn vég tũ tóg nĩgtĩ gé, Jesus mré ke ũ fi ke gé. ¹⁶ Kỹ ājag kāmĩ ũ tóg hĕn ri ke mũn ti mỹ, fi mỹ tóg: “tág',” he mũ. “Ha tĩg, jatun mỹ. Ā jé kusa mĕg tũ nĩ, ã jé kókĩr tũ nĩ,” he tóg mũ. Hã ra tóg fag mỹ nĕn ũ nĩm tũ nĩ. Kỹ tóg fagrĩnh mỹ fag mỹ: “ã jé jagtar tũ nĩ,” he ja nĩ. ¹⁷ Ge ti nĩ, ãg tỹ ón kỹ: “ti ki rã kỹ sóg jĕ,” ěn kỹ. Ēg tỹ ti vĩ han tũ nĩ kỹ ãg tóg fagrĩnh mỹ: “ti ki sóg rã kỹ nĩ,” he mũ sir. Nĕn ũ tũ vĕ.

¹⁸ Ājag kāmĩ ũ tóg hĕn ri ke mũn: “ũ tóg Jesus ki rã kỹ nĩ, jãvo ũ tóg ti jykre han tĩ,” he sór mũ, ājag tỹ ti jykre han sór tũ nỹtĩn kỹ. Tag to sóg ājag mỹ: “inh hỹn ne tugrĩn ki kanhrān mũ, ã tỹ ti ki rã ja ti?” he mũ. “Ā tỹ ti jykre ki króm vānh kỹ sóg ki kagtĩg nĩ. “Ti mỹ Jesus ki rã kỹ jĕ nĩ vỹ?” he jé sóg ke mũ ã to. Ā jãvo sóg ti jykre han tĩ inhã. Hã to ã tóg ki kanhró nĩ, sỹ ti ki rã kỹ jĕ ti,” he jé sóg ke mũ, ājag tỹ inh ki jĕmĕn kỹ.

¹⁹ “Topê vỹ tỹ ũn pir nĩ,” he ājag tóg tĩ gé. Ājag tỹ ki hã tó vĕ. Kỹ Japo ag vỹ tag tó tĩ gé. “Pir tóg nĩ, Topê tĩ,” he ag tóg tĩ gé, Nĕn-Kórég ag. Ag tỹ ti pir ki kanhró (hã) ra ag tóg krenkren ke tũ nĩ, ag tỹ ti jykre han tũ nĩn kỹ. Hã kỹ ag tóg kamĕgmĕg kỹ jũrũn ke tĩ sir, ag tỹ Topê to jykrĕn kỹ, Japo ag. Hã kỹ ãg tóg ãg tỹ Topê kāmĕn há (hã) ra krenkren ke tũ nĩ gé, ãg tỹ ti jykre han tũ nĩn kỹ. ²⁰ Ājag tỹ tag to jykrĕn tũ nĩn kỹ ājag tóg krĩ tũ (pĕ) nỹtĩ (mỹr). Ēg tỹ ti vĩ ki króm tũ nĩn kỹ ãg tóg ón kỹ ti ki ge kỹ nỹtĩ. Nĕn ũ tũ vĕ sir, ãg tỹ ti ki ge kỹ nỹtĩ tag ti. Ēg mỹ tóg nĕn ũ há han ke tũ nĩ.

²¹ Ēg jóg'jóg ve tỹ Abraão to jykrĕn nĩ. Topê tóg ti mỹ: “ã kósĩn tỹ Isaque tānh kỹ pũn, inh mỹ,” he ja nĩ. Kỹ tóg ti mỹ: “hej,” he ja nĩ sir, Abraão ti. Hã kỹ tóg Topê mỹ há nĩ sir, Abraão ti, ti tỹ ti vĩ ki króm to há ja nĩn kỹ. Kỹ tóg ti to: “inh ki rã há han ja ti nĩ,” he mũ, Topê ti, Abraão to. ²² Ve ra ha. Ti tỹ Topê ki rã kỹ jĕn kỹ, hã kỹ tóg ti mỹ: “hej,” he ja nĩ, Abraão ti. Kỹ tóg, ti tỹ ti mỹ: “hej,” ěn kỹ (tóg) ti ki rã kỹ jĕ ěn to tar nĩ sir, Topê vĩ ki króm ke to. Ge ti nĩ (mỹr). ²³ Rán kỹ tóg nĩ gé, Abraão ti, kỹ tóg: “Topê vĩ kri tóg fi, Abraão ti,” he mũ, Topê vỹ tỹ rán kỹ nĩ ki. “Hã kỹ ãg jóg mág tóg ti to: “inh ki rã há han ja ti nĩ,” he ja nĩgtĩ. Kỹ Topê tóg ti to: “ũ tỹ iso há nĩ ěn,” he tĩ,” he tóg, Topê vỹ tỹ rán kỹ nĩ ki, Abraão to. ²⁴ Hã ki ājag tóg vég mũ. Ēg tỹ ti vĩ han kỹ tóg ãg to: “inh ki rã há han ja ti nĩ,” ěn ke mũ gé. Ēg tỹ ón kỹ ti ki rã kỹ nỹtĩn kỹ ãg tóg hã ra ti mỹ há tũ nỹtĩ, Topê mỹ, ãg tỹ ti vĩ ki króm tũ nĩn kỹ.

²⁵ Raabe fi to jykrĕn nĩ gé, ũn mén jafã ěn fi to. Ēg povo vỹ ũ ag jĕgnĕ ja nĩ, ag tỹ fi jamã ve jé, cidade mág ěn ti. Kỹ fi tóg ag mỹ: “kãge jĕg ra,” he ja nĩ. Kỹ fi tóg ag kanhrān ja nĩ sir, fi jamān ki, ag tỹ ĕpřy ũ mĩ kãpa jé, ĕmĩn ũ mĩ, ag kato tĕ ag tỹ ag vég tũ nĩ jé. Tag to fi tóg kren mũ (mỹr), fi tỹ tag han to. Kỹ Topê tóg fi to: “inh ki rã há han fi,” he ja nĩ sir, fi tỹ ti vĩ kri fi to.

²⁶ Ge ti nĩ gé, ěg mĩ. ěg tĩ ti ki ge kũ nĩtĩn kũ ěg tóg ti vĩ kri fig mũ, Raabe fi ri ke. ěg tĩ ti vĩ han tũ nĩn kũ tóg ěg mĩ nén ũ há han ke tũ nĩ gé, ěg tĩ ón kũ ti ki ge mũ tugrĩn, ěg fár tĩ kuprĩg tũ ra ter kũ nĩ ěn ri ke ti nĩ.

3

Ěg tĩ ěg nũnē tĩ Topē vĩ mranh ke tũ

¹ Inh kanhkā', kãnhmar jagnē mĩ: “sĩ ā kanhrãn há tóg tĩ, ā tĩ kygnē to,” he tũg nĩ. Ěg kar vỹ kygnēg tĩ. Kũ Topē vỹ ěg tĩ kygnē to ěg vóg kónãn mág mũ, ěg tĩ kãnhmar ěg mré Jesus ki ge kũ nĩtĩ ag kanhrãn sór kũ.

² Ěg kar vỹ kygnē (ka)mē nĩtĩ. Ũ tĩ ā vĩ ki kygnēg tũ pē nĩn kũ tóg kuryj kar nĩ sir. Ěg pi(jé) ne ki kygnēg tĩ', ěg tĩ ěg vĩ ki kygnēg tũ nĩn kũ. ³ Cavalo to jykrén nĩ. Freio tĩ ěg tóg ti jēn kãra fig tĩ. Kũ ěg tóg tĩ ti vóg tĩ sir, Cavalo ti, kũ tóg ā tĩg ke ěn ra tĩ mũ sir, ũ tĩ Cavalo kri nĩ ěn ti. ⁴ Kũ canoa mág to jykrén nĩ gé. Éhé tóg nỹ, há ra kãka vỹ ti tĩn tĩ. Kũ ag tóg ti vóg jafã tĩ ti vóg tĩ. Kũ tóg ag mĩ ki ke tĩ. Ti vóg mũ ag mũnh ke ra tóg tĩ mũ sir. Ti vóg jafã sĩ ra tóg ki ke mũ, canoa mág ti. ⁵ Ge tóg nĩ, ěg nũnē ti. Sĩ ti nĩ (mỹr), há ra ěg tóg tĩ vĩ mág han tĩ gé.

Pĩ ri ke tóg nĩ. Ti sĩ ra tóg kejēn vãnħ pũn tĩ (mỹr), nēn kar ti. ⁶ ěn ri ke tóg nĩ, ěg nũnē ti. Tĩ ěg tóg vēnh jykre pãno tó tĩ. Kũ ěg tóg ěg vĩ tag to kavéj kar nĩtĩ, ěg tĩ ěg vĩ tag to ti vĩ mranh kũ. Ěg kãsir nĩtĩ ra ěg tóg vēnh jykre pãno tó tĩ, ěg sanh há nĩtĩ ra ke gé, ěg kófa ra ke gé. Japo tĩ ěg krĩn há vē, ěg tĩ ěg vĩ ki Topē vĩ mranh jé.

⁷ Ha mē, bicho kar vỹ tĩ ěg mēg nĩtĩ. Ũ ag vỹ mĩg tĩ mēg nĩtĩ, kũ ũ ag vỹ sēsĩ tĩ mēg nĩtĩ, ũ ag vỹ pỹn tĩ mēg nĩtĩ, ũ ag vỹ goj ki ke kar tĩ mēg nĩtĩ gé. Ti kar kanhrãn ěg tóg tĩ mỹr, ha mē. ⁸ Há ra ěg pi(jé) ěg nũnē kanhrãn tĩ'. Ti kanhrãn ki kagtĩg ěg nĩtĩ. Vēnh jykre pãno tãvĩ tó sór ěg tóg tĩ. Kũ tóg veneno ri ke nĩ, ěg vĩ ti. Tĩ ěg tóg jagnē kãgtén ri ke han tĩ, ěg nũnē tĩ, jagnē mĩ vĩ kónãn kũ. ⁹ Tĩ ěg tóg Topē mĩ vĩ há han tĩ, ěg jóg mág mĩ, ěg nũnē tĩ. Kũ ěg tóg tĩ ěprã ke ag mĩ vĩ kónãn tĩ gé. Há ra Topē tóg ěg han, ěg tĩ ti ri ke nĩtĩ jé. Kũ ěg tĩ jagnē mĩ vĩ kónãn kũ ěg tĩ Topē mĩ vĩ kónãn ri ke vē sir. ¹⁰ Ěg jēn kãtã tóg kãkutē tĩ, ěg vĩ há ti, ěg vĩ kónãn ti ke gé. Pir ti nĩ, ěg jēnky ti, há ra ěg tóg tĩ vĩ régre han tĩ. Tag vỹ kórég tãvĩ nĩ, inh kanhkā'. ¹¹ Goj tĩ vēnh kanē to jykrén nĩ, ěganē to. Ti há nĩn kũ tóg há nĩ, goj ti. Ti kajã nĩn kũ tóg kajã nĩ. Ti pi(jé) tĩ goj régre nĩ', goj tĩ ěg kanē ti. Pir tóg nĩ. ¹² Kũ ka kanē to jykrén nĩ gé. Ka tĩ pēnva ki ěg tóg jymi vég tũ nĩgtĩ (mỹr). Kũ ěg tóg vãnħ tĩ jóhó ki pēnva vég tũ nĩgtĩ gé. Pir ti nĩ, ka kanē ti. Ge ti nĩ gé, goj ti. Ti kajã nĩn kũ tóg kajã nĩ gé. Kũ gemnĩ gé, ājag nũnē tĩ. Vĩ pir han nĩ.

Topē tĩ ěg mĩ krĩ há nĩm

¹³ Ājag mĩ krĩ há nĩtĩ'? Ājag mĩ Topē vĩ ki kanhró nĩtĩ'? Kũ tóg há tĩ. Kũ vēnh jykre há kar han kũ nĩtĩmĩ. Há ki vēnh kar vỹ ājag krĩ há venh ke mũ sir. Há ra tĩ vĩ mág han tũg nĩ. Tĩ vēnh kãfór han tũg nĩ gé.

¹⁴ Ājag tĩ ũ to fe kórég nĩn kũ tóg tĩ ũ nỹ jãvo, ājag tĩ jagnē kãfór nĩtĩ sór kũ, jagnē to jũ (ka)mē nĩtĩn kũ, ājag tĩ vēsỹ ũn mág han sór kũ. Ājag tĩ tag han kũ vēsõ: “krĩ há inh nĩ, Topē vĩ ki kanhró inh nĩ,” he tũg nĩ. Vēnh ó vē, tag ti. ¹⁵ Topē tĩ ěg kanhrãn ja pijé', ěg tĩ ũ to fe kórég nĩ ti, jagnē kãfór han sór mũ ti, jagnē to jũ (ka)mē ti ke gé. ěprã vēnh jykre vē (mỹr), Topē kato tē ti. Japo jykre vē (mỹr), ěg fe jũ tag ti. ¹⁶ Ěg tĩ jagnē kãfór han sór kũ ěg tóg jagnē kato tēgtē mũ sir, ěg tĩ vēsỹ ũn mág han sór kũ. Kũ ěg tóg vĩ mē han kũ jagnē to vēnh jykre pãno han kãn mũ sir.

¹⁷ Ěg tĩ há ra Topē tĩ ěg kanhrãn mũ han kũ ěg tóg tag han tĩ, ha mē: jãnhkri ěg nĩtĩ, kavéj tũ (mỹr). Jagnē to ěg tóg krĩ kusa nĩtĩ. Jagnē mĩ ěg tóg komēr há vĩ tĩ gé. Ũ tĩ ěg mré vĩn kũ ěg tóg ti vĩ mēnh mũ, ti vĩ há nĩn kũ. Jagnē jagãgtãn ěg tĩ sir. Nén kar há han ěg tĩ. Topē vĩ to ěg tar nĩtĩ. Jykre régre tũ ěg nĩtĩ. ¹⁸ Ěg tĩ ti jykre tag han kũ ěg tóg jagnē krĩ kuprãg mũ sir, ěg tĩ jykre kuryj nĩtĩ jé sir, ha mē.

4

Ĕg pi(jé) tỹ Topě kato tēgtě mũ ag mré ke nỹtĩ'

¹ Ājag hã ne tóg jagně to jũgũ nỹtĩ'. Hě ri ken kỹ hỹn'? Ājag tỹ nén ũ vėnhmỹ han sór nỹtĩn kỹ, hã kỹ ājag tóg jagně to krĩ rỹ nỹtĩ. Jykre pãno ājag tóg nỹtĩ (mỹr), kỹ ājag tóg vėnh jykre há kato tē nỹtĩ sir. ² Nén ũ to én mũ (hã) ra ājag tóg mãn sór mũ, hã kỹ ājag tóg vég tũ nĩ (mỹr). Hã kỹ ājag tóg jagně kãgtén sór mũ sir, jagně tỹ nén ũ mãn jé. Jagně tỹ nén ũ to én kỹ ājag tóg jagně kato tēgtě ti. Ājag tỹ Topě mỹ to vĩ tũ nĩn kỹ, hã kỹ ājag tóg vég tũ nĩgtĩ. ³ Ājag tỹ ti mỹ to vĩ mũ ra ājag tóg venh ke mũ vė, hã ra ājag tóg vĩ há han tũ nĩgtĩ gé, hã kỹ tóg ājag mỹ han tũ nĩgtĩ sir, Topě ti. Ti mỹ ājag tóg to vĩ mũ, ājag tỹ nén to én mũ ěn mãn jé. Hã ra tóg ti mỹ tỹ ũ nỹ, ājag tỹ nén to én mũ ěn ti. Hã kỹ tóg ājag mỹ han tũ nĩ sir, Topě ti.

⁴ Ĕg tỹ Topě ki rã kar kỹ vėnh jykre pãno to én kỹ ěg tóg ti kato tē mũ sir. Ũn tỹtã kórég fi ri ke ěg nỹtĩ, ěg tỹ ge kỹ. Ā mén kavėnh fi tóg tĩ, ũ to én kỹ. Ĕg tỹ ěprã vėnh jykre to én kỹ ěg tóg Topě kato tē mũ sir. Tag ki kanhrãn nĩ, to jykrén mág han nĩ. ⁵ Topě vĩ tag to jykrén nĩ, ũ tỹ vãsỹ rán kỹ nĩ ěn to, ha mẽ: “Topě kuprĩg vỹ tỹ ěg jagrě nĩ, Topě tỹ tỹ ěg jagrėn kỹ. Kỹ tóg ěg ki rĩr mũ sir. Kỹ ěg tỹ nén ũ vėnhmỹ to há nĩn kỹ tóg fe kaj nĩ, Topě kuprĩg ti,” he tóg, Topě vĩ rá ki. Ti pi(jé) véké tag tó ja nĩ'. Kỹ tag to jykrén nĩ. ⁶ Hã ra tóg ěg tar han tĩ, Topě kuprĩg ti, ěg tỹ nén ũ vėnhmỹ han sór tag kato tē jé. Ĕg jagãgtãn kỹ tóg ěg tar han tĩ. Kỹ tóg tag tó mũ sir, ha mẽ: “Topě vỹ ũ tỹ: “ũn mág vỹ tỹ inh nĩ,” he mũ ěn ag to kórég nĩ, hã ra tóg ũ tỹ: “nén ũ tũ vỹ tỹ inh nĩ,” he mũ ěn ag jagãgtãn tĩ,” he tóg, ti vĩ rá ki. ⁷ Hã kỹ Topě mỹ: “hej,” hemnĩ, ti tỹ ājag krĩn kỹ. Japo mỹ: “nejé,” hemnĩ, ti tỹ ājag krĩn sór kỹ. Kỹ tóg ājag tovãnh ke mũ sir, Japo ti, ājag tỹ ti mỹ: “nejé,” hen kỹ.

⁸ Topě mré vĩ kỹ nỹtĩmnĩ, kỹ tóg ājag to há nĩ sir, ājag mré ti nĩ nĩ gé, ěg jóg mág ti. Ti vĩ mranh tĩ vỹ tỹ ěg nỹtĩ. Kỹ ti vĩ mranh tovãnh nĩ. Jykre régre ěg nỹtĩ gé. Kỹ vėnh jykre pir han kỹ nỹtĩmnĩ, hã vỹ: Topě jykre, he mũ. ⁹ Ājag tỹ Topě vĩ mranh kỹ mỹ jagy nỹtĩmnĩ. Vėsỹrėnh nĩ, fỹmnĩ, ny mãn tũg nĩ. Fe kaj nỹtĩmnĩ. To krĩ kufy nỹtĩmnĩ. Mỹ sér tũ nỹtĩmnĩ, ājag tỹ Topě vĩ mranh kỹ. ¹⁰ Ĕg Senhor mỹ: “kórég inh nĩ, isỹ vėnh jykre pãno han kỹ,” hemnĩ. Kỹ ti hã vỹ ājag mỹ vĩ há han ke mũ sir, kỹ ājag fe vỹ mrin ke mũ sir.

Ĕg tỹ jagně to vĩ kónãn ke tũ

¹¹ Inh kanhkã', jagně to vĩ kónãn tũg nĩ. Ājag tỹ jagně to vĩ kónãn kỹ ājag tóg Topě jykre to vĩ kónãn mũ sir, kỹ ājag tóg to: “nén ũ tũ vė,” he mũ sir, Topě tỹ ěg mỹ vėnh jykre nĩm ja ěn to. Ājag tỹ hã ra ti jykre to vĩ kónãn kỹ ājag tóg ti ki króm ke tũ pė nĩ sir. ¹² Ũ tỹ ěg mỹ ā jykre nĩm ja ěn vỹ pir nĩ, kỹ tóg ěg jykre tugnỹm ke mũ gé sir. Ti hã tóg: “ěn vỹ kren ke mũ, ěn vỹ kren ke tũ nĩ,” henh ke mũ, ā pir mỹ, Topě ti. Hã kỹ tóg vėnhmỹ nỹ, ājag tỹ jagně to vĩ kónãn kỹ.

Ĕg tỹ vėsỹ ũn mág han sór ke tũ

¹³ Ājag kãmĩ ũ tóg vėsóg ki ājag tỹ nén han ke to jykrén sór tĩ, Topě ki jėmě sór tũ nĩn kỹ. “Hěn ri ke mũn sóg vaj kỹ ěn ra tĩ mũ, ke tũ nĩn kỹ vaj ũn kỹ,” he ājag tóg tĩ. “Cidade ěn ra sóg tĩg mũ, tá sóg nĩnh mũ. Tá sóg prỹg pir tũg' he mũ. Kỹ sóg negociar henh ke mũ, sỹ rico nĩ jé,” he ājag tóg tĩ (mỹr). ¹⁴ Hã ra ājag pi(jé) ājag tỹ nén venh ke ki kanhró nỹtĩ', ha mẽ. Ne ve jé ěg ke mũ, vaj kỹ? Ha'. Ki kagtĩg ěg nỹtĩ. Ĕg mỹ vaj kỹ ter ke tũ nĩ vỹ? Ha'. Krũj sĩ ri ke ěg nỹtĩ. Ve sĩ han ěg tĩ, krũj sĩ ti. Ĕg tỹ ki ěvãnh mãn mũ ra tóg tũ' he mũ sir. Ge ěg nỹtĩ. Kãnhmar ěg tóg tũg' he tĩ, ěg ter kỹ.

¹⁵ Ājag tỹ ājag tỹ nén han ke to jykrén kỹ Topě mĩ ěkrén nĩ, ũ tỹ ěg mỹ ěg ter ke kurã tónh ke ěn mĩ. “Ti mỹ sỹ nén han ke to há nĩ vỹ?” hemnĩ. ¹⁶ Hã ra ājag tóg vėsỹ ũn mág han sór mũ, ājag tỹ: “tag han jé sóg ke mũ,” hen kỹ. Há tũ ti nĩ, ěg tỹ vėsỹ ũn mág han sór kỹ.

¹⁷ Kĩ tag tóg vènhmỹ nỹ gé, sỹ tónh ke tag, ha mẽ. Kejèn ãg tóg nèn ù há to jykrén tí, ãg tỹ han jé. Hã ra ãg tóg han tũ nĩgtĩ. Kĩ ãg tỹ Topẽ vĩ mranh ù vè gé sir, ãg tỹ nèn ù há han sór mũ (hã) ra han tũ nĩn kỹ.

5

Ûn rico ag vèsýrénh ke

¹ Vãhã sóg ùn há ag to tag tó mũ sir, ùn rico ag to, ù tỹ Jesus ki ge jãvãnh ãn ag to, ha mẽ. Ag mẽ sóg: “ha mẽ,” he mũ. “Kygfỹ ra. Vèsýrénh mág han ra. Vènh jagtar jagy ve jé ãjag tóg ke mũ. ² ãjag tỹ nèn ù vỹ vag kãn ke mũ. ãjag kur sĩnvĩ ãn vỹ tãryj kãn ke mũ gé, ti ga tỹ kon kỹ. ³ Kĩ ãjag jãnkamy vỹ veso jãgfanh ke mũ. ãjag tỹ ùn jagãgtãn vãnh ja tugrĩn tóg veso jãgfanh ke mũ. Tag ve kỹ vènh kar vỹ ãjag jykre kórég venh ke mũ. Kĩ ãjag tóg to jagtar ke mũ, kỹ tóg pĩ tỹ ãg pũn ri ke nĩ, ãjag jagtar ke ti, ãjag vèsýrénh ke ti. ãjag hã ne tóg ãjag tỹ nèn ù génh mág¹, ãg tỹ kãnhmar kurã tỹ ãgno tá krỹg he mũ (hã) ra, Topẽ tỹ ãg jykre tugnỹm ke kurã ãn tá. ⁴ ãjag camarada ag vỹ ãjag jakré tá rãnhãj mũ, hã ra ãjag tóg ag mẽ kajãm tũ nĩgtĩ. Hã ra ãg Senhor vỹ vég tí. ãjag camarada vèsýrénh mẽ ti (mỹr). Vènh kar pã'i vè (mỹr), ãg Senhor ti, nèn kar pã'i vè gé. ⁵ ãjag tỹ nèn ve sór mũ kar ve ãjag huri, vèjèn mág, kur sĩnvĩ, ãjag tỹ nèn to én mũ kar ãn ti. Tag tãvĩ to ãjag tóg jykrén tí, ãjag tỹ ga kri mũn kỹ. Tãg gy ãjag nỹtĩgtĩ, ãg tỹ ãg mẽg jèn há han tí ri ke, ãg tỹ ti tãnh jé. Kakó ti nĩ, Topẽ tỹ ãjag tãnh ke ti, mẽr, ha mẽ. ⁶ Kĩ ãjag tóg ùn jykre kuryj ag vóg kónãn tí gé. Ag kãgtén ãjag tóg tí, hã ra ag tóg ãjag kato tẽ tũ nĩgtĩ, ãjag kato vĩ tũ ag tóg nĩgtĩ gé. Jykre kórég ãjag nỹtĩ,” he sóg mũ, ùn rico ag mẽ.

Ëg tỹ ãg Senhor kãtĩg mãn jãvãnh ke

⁷ Inh kãnhkã', ãg Senhor kãtĩg ke jãvãnh nĩ, jatun mẽ, ag jãvo. Ëg tỹ ãkrãn kar kỹ ãg tóg ti mog jãvãnh tĩgtĩ, jatun mẽ. Kỹ ta tóg kri kutẽ mũ, kỹ tóg kri kutẽ mãn mũ gé sir. Kĩ vãhã ãg tóg ti kãnẽ vég mũ. ⁸ Tag ri ke han nĩ, jatun mẽ ti kãtĩg jãvãnh nĩ, ãg Senhor ti. Ti jãvãnh to tar nỹtĩmĩ. Kãnhmar ti kãtĩ mũ, ãg Senhor ti, ha vemnĩ.

⁹ Inh kãnhkã', jagnẽ vĩ to vĩ vĩ he tũg nĩ. Ke tũ nĩ mũ ra ãg Senhor tóg ãjag jykre ve kỹ ãjag vóg kónãn ke mũ. Ha vé, vãhã ti vènh ven ke kãtĩg mũ kãnhmar, ù tỹ ãg jykre tugnỹm ke mũ ãn ti.

¹⁰ Vãsỹ Topẽ vĩ tó tí ag to jykrén. Topẽ vĩ tó ag tóg tí, kỹ ù tỹ mẽ jãvãnh ja ãn ag tóg ag vóg kónãn. Ge ra ag tóg jatun mẽ Topẽ vĩ tó ja nĩgtĩ, ag tỹ ag vóg kónãn mũ ra. Ag ri ke han nĩ, vãsỹ Topẽ vĩ tó tí ag ri ke. ¹¹ Ag jykre to jykrén nĩ. ãjag jagtar nỹtĩ ra ag tóg to krónh ke ja tũ nĩgtĩ gé. Hã kỹ Topẽ tóg ag mẽ vĩ há han mũ sir, ti vĩ tó tí ag mẽ.

Topẽ mré ke tỹ Jó kãme mẽ ãjag huri. ã jagtar ra tóg to krónh ke ja tũ nĩ gé. Kĩ vãhã Topẽ tóg ti ki rĩr há han mũ, ti jagtar kỹ. Hã ki ãjag tóg ãg Senhor jykre vég mũ sir. Ëg jagãgtãn tóg mũ, ti tỹ ãg jagtar nỹtĩ ven kỹ. Kỹ tóg sir ãg jagãgtãn tovãnh tũ nĩgtĩ.

¹² Inh kãnhkã', ón kỹ vĩ tũg nĩ. Ón kỹ: “hej,” he tũg nĩ. Ki hã tómnĩ, ãjag tỹ: “hej,” hen kỹ, Topẽ tỹ ãjag vóg kónãn tũ nĩ jé. Kỹ ón kỹ: “Topẽ vỹ ki kãnhró nĩ,” he tũg nĩ gé. Ón kỹ: “ù tỹ kãnhkã tá nĩ ãn vỹ ki kãnhró nĩ,” he tũg nĩ gé. Ón kỹ: “ù tỹ ga kri nĩ ãn vỹ ki kãnhró nĩ,” he tũg nĩ gé. Ki hã tómnĩ. Ón tũg nĩ, jagnẽ mẽ.

Ëg tỹ ùn kaga ag to Topẽ mré vĩnh ke

¹³ ãjag tỹ nèn ù jagy ven kỹ Topẽ mré vĩmĩ. ãjag mẽ sér tĩn kỹ Topẽ mẽ jãn nĩ, kỹ ti jé tómnĩ. ¹⁴ ãjag kaga nỹtĩn kỹ igreja to pã'i ag jé prẽrmnĩ, Jesus tũ ki rĩr tí ag. ãn ag vỹ ùn kaga to Topẽ mré vĩnh ke mũ, kỹ ag tóg azeite tỹ ùn kaga to tĩn ke mũ, ãg Senhor jiji tó kỹ. ¹⁵ Ag tỹ ãg Senhor mré vĩn kỹ tóg ùn kaga ãn tỹ há' henh ke mũ sir, ãg Senhor ti, ag tỹ ti tỹ há' henh ke to: “hỹ mẽ vỹ?” he tũ nĩn kỹ. ãg Senhor vỹ ti tỹ há' henh ke mũ sir. ùn kaga tỹ ti vĩ mranh kỹ Topẽ vỹ ti mẽ vènh pãte fón ke mũ gé sir. ¹⁶ Hã jé jagnẽ mẽ tó, ãjag tỹ Topẽ vĩ mranh ja ti. “Ti vĩ mranh inh, tag han kỹ,” hemnĩ jagnẽ mẽ. Kỹ jagnẽ to Topẽ mré vĩmĩ gé, ti tỹ ãjag tỹ há' he jé, ti tỹ ãjag kaga tỹ tũg' he jé. Ëg tỹ vènh jykre

kuryj han kÿ tóg ěg vĭ mẽ kÿ han mũ sir, Topě ti, ěg tÿ ti mÿ nén to vĭ', to vĭ' hen kÿ. Nén há kar ve jé ěg tóg ke mũ sir, ěg tÿ ti mÿ to vĭn kÿ, ěg Senhor mÿ.

¹⁷ Topě mré ke tÿ Elias mĭ ěkrén nĭ. Ěg mré tóg ěprã ke ja nĭgtĭ, Elias ti. Hã ra tóg Topě mré vĭ', vĭ' he ja nĭgtĭ, ta kutě tũ nĭ jé. Kÿ tóg kutě tũ ja nĭgtĭ, ta ti, prÿg tãgtũ kri kysã tÿ 6 ki. ¹⁸ Kÿ tóg Topě mré vĭ mãn ja nĭgtĭ, Elias ti, kÿ tóg kutě ja nĭ sir, ta ti. Kÿ nén kar tóg gan kri mur mãn ja nĭ, kÿ tóg kaněn mãn ja nĭgtĭ gé sir. Topě tÿ ti vĭ han hã vĕ. Tag mĭ ěkrén nĭ.

¹⁹ Inh kanhkã', kejĕn ěg mré ke ũ tóg prãnh ke tĭ, vĕnh vĭ há tovãnh kÿ. Kÿ ti jyvĕn nĭ, ti tÿ kygnĕ mãn tũ nĭ jé. ²⁰ Kÿ ũ tÿ ti mré vĭ mũ ěn tóg ti kren han mũ sir, nũgme to, ti tÿ ã jykre kygnĕ ja ěn tovãnh kÿ. Kÿ Topě vÿ ti tÿ ã vĭ mranh ja ěn tÿ vĕnh pãte fón mũ sir. Tag to jykrén nĭ.

Hã vĕ.

PEDRO TỠ CARTA HAN VÉN

¹ Pedro tỹ ãjag mỹ carta rán hã vễ, Jesus Cristo tỹ inh fễg hã vễ, sỹ tỹ ti apóstolo jẻ. Sỹ Topẻ tỹ ùn kuprẻg mũ ag mỹ rán hã vễ. Ẽg mrẻ ke tũ ag kãmĩ ãjag tóg mũgtĩ, ù tỹ Jesus ki ge tũ ag kãmĩ, Ponto tá, Galácia tá, Capadócia tá, Ásia tá, Bitínia tá ke gé. ² Topẻ vỹ ãjag kuprẻg. Vẫsỹ tóg to jykrẻn ja nĩ, ãjag kuprẻg ke to, ẻg jóg tỹ Topẻ ti. Ẽjag mỹ tóg ã kuprẻg jẻnẻ, hã kỹ ãjag tóg tỹ ti tũ nỹtĩ, ãjag tỹ Jesus Cristo vĩ kri fi jẻ, ti tỹ ã kyvẻnh tỹ ãjag kygpe jẻ, ãjag tỹ ti ri ke há nỹtĩ jẻ. Topẻ jẻ ãjag tar han mẫn', han mẫn' hẻ, kỹ ãjag jẻ krĩ kẫnhvy nỹtĩ.

Topẻ tỹ ẻg mỹ nẻn ù há ven ke

³ Topẻ mỹ sóg vĩ há han tĩ, ẻg Senhor tỹ Jesus Cristo panh mỹ. Ẽg jagẻgtẫn tẫvĩ han tóg tĩ. Jesus Cristo rĩn mẫn tóg, ti ter kar kỹ, kỹ tóg Jesus tugrĩn ẻg mur mẫn ri ke han tĩ gé. Kỹ tóg ẻg mỹ sér tĩ, ⁴ ẻg tỹ kanhkã mĩ ẻkrẻn kỹ. Tá ẻg tóg nẻn ù sĩnvĩ kar venh ke mũ. Tá ẻg tũ vỹ tũ' henh ke tũ pẻ nĩ. Kómóg ke tũ tóg nĩ, tá ẻg tũ ti, tá ù tóg ti kókẻn ke tũ nĩ gé. ⁵ Topẻ ki ãjag tóg ge kỹ nỹtĩ, kỹ tóg ãjag ki rĩr há han nĩ nĩ. Nẻn ù kar han há tóg nĩ, kỹ tóg ẻg ki rĩr há han tĩ gé, Topẻ ti. Ẽjag krenkren han jẻ tóg ke mũ, ãjag tỹ ti tỹ ẻg mỹ nẻn nĩm ke mũ ẻn ve jẻ. Nĩm han kỹ tóg nĩ nĩ, ti tỹ ẻg mỹ nẻn ven ke ẻn ti. Kurã tỹ ẻgno ki ẻg tóg ẻn venh ke mũ.

⁶⁻⁷ Ver tóg ãjag mỹ jagy tĩ. Ge ra mỹ sér nỹtĩmĩ. Kẫnhmar tóg tũ' henh ke mũ, nẻn tỹ ẻg mỹ jagy nĩ tag ti. Topẻ tỹ ẻg jykre ve sỏr vễ, hã kỹ ẻg tóg ver nẻn ù jagy ve vẻn tĩ. Ẽg tỹ ti jagy to tar nỹtĩn kỹ tóg vẻg mũ, ẻg tỹ ti ki rã há han kỹ nỹtĩ ti. Ha vé, ouro rỹg ẻg tóg tĩ, pĩ rỹ jagy ki, ẻg tỹ ti há nĩ ẻn ve jẻ. Ge ti nĩ, ẻg mrẻ. Tũ' he jẻ tóg ke mũ, ouro ti. Ouro kãfỏr ti nĩ, ẻg tỹ ti ki rã ti. Ẽg tỹ nẻn ù jagy ve to tar nỹtĩn kỹ tóg ve há tĩ, ẻg tỹ ti ki rã há han kỹ nỹtĩ ti. Kỹ tóg ẻg to vĩ há han ke mũ, Cristo ti. Ẽg tỹ tóg ùn mág han ke mũ, ùn tar, Jesus tỹ vẻnh kar mỹ vẻnh ven ke kurã ẻn kã. ⁸⁻⁹ Ti to há ãjag nỹtĩ, ãjag tỹ ti ve ja tũ (hã) ra. Ti ki ge kỹ ãjag nỹtĩ, ãjag tỹ ti vẻg tũ ra. Hã kỹ ãjag tóg krenkren ke mũ. Ẽjag krenkren ke ẻn hã tóg ãjag mỹ sér pẻ tĩnh mũ, sér gy ti tĩnh mũ, ha vemnĩ. Ẽjag fe tóg mrin ke tẫvĩ han ke mũ, kurã ẻn kã, ha vemnĩ.

¹⁰⁻¹¹ Topẻ vĩ tó tĩ ag tóg vẫsỹ tó ja nĩgtĩ, Topẻ tỹ ùri ẻg krenkren han mũ tag ti. Topẻ kuprẻg vỹ ag kanhrẫn ja nĩ. Ag mỹ tóg Cristo tỹ ẻg jagfy jagtar jagy han ke kãmẻn ja nĩ. Kỹ tóg ag mỹ ti tỹ kar kỹ tỹ ùn mág jẻnh ke tó ja nĩ gé, ti tỹ ẻg jagfy vẻsỹrẻnh kar kỹ tỹ ùn mág nĩnh ke ti. Kỹ ag tóg tag ve sỏr ja nĩgtĩ, vẫsỹ Topẻ vĩ tó tĩ ag. “Kurã tỹ hẻ kã kenh ke nẻ hỹn?” he ja ag tóg nĩgtĩ, Cristo jagtar ke to. “Ti tỹ hẻ ri kenh ke nẻ?” he ja ag tóg nĩgtĩ gé. Tag ve sỏr tẫvĩ ja ag tóg nỹtĩgtĩ. ¹² Hã ra Topẻ tóg ag mỹ: “inh pi(jẻ) ãjag hã mỹ tag ven ke mũ,” he ja nĩ. “Ẽjag nẻn ke ag hã mỹ ke vễ, ag hã ne ãjag tỹ nẻn tó mũ venh ke mũ,” he ja tóg nĩ, Topẻ ti, vẫsỹ ti vĩ tó tĩ ag mỹ. Ti tỹ ag mỹ ãjag tó jan hã vễ. Hã kỹ ãjag tóg hur mẽ, ti mrẻ ke ù ag tỹ ãjag mỹ Jesus kãmẻ sér kãmẻn kỹ. Topẻ kuprẻg vỹ ag tar han ja nĩ, Topẻ tỹ ag mỹ ã kuprẻg jẻnẻn kỹ, kanhkã tá, hã kỹ ag tóg ãjag mỹ ti kãmẻn kãmũ ja nĩ. Ha vé, Topẻ tỹ jẻnẻ jafã ag tỹ ki kanhrẫn há tóg tĩ, ãjag tỹ ti kãmẻ mẽg mũ tag ti, hã ra ag tóg ki kagtĩg nỹtĩ.

Ẽg tỹ Topẻ vĩ ki krỏm kẫn ke

¹³ Hã kỹ Topẻ tỹ ẻg mỹ nẻn tó mũ hã han sỏrmnĩ. Vẻnh ki ẻmẻmĩ, Jesus tỹ ẻg mỹ nẻn nĩm ke mũ ẻn hã mĩ ẻkrẻn nĩ. Jesus tỹ vẻnh ven ke kurã ẻn kã ẻg tóg venh ke mũ sir, ti tỹ ẻg mỹ nẻn nĩm ke mũ ẻn ti. ¹⁴ Vẫsỹ ãjag tóg ãjag tỹ nẻn to ẻn mũ ẻn han ja nĩgtĩ, ãjag tỹ Topẻ vĩ mẽ ja tũ nỹtĩn kỹ. Ẽri Topẻ vĩ hã ki krỏm nĩ, ãjag tỹ vẫsỹ nẻn han ja ẻn tovẫnh kẫn nĩ. ¹⁵ Topẻ jykre hã han nĩ, kỹ tóg vẻnh ven mũ, ãjag tỹ tỹ ti tũ nỹtĩn ti. Ẽjag tỹ ti jykre hã han jẻ Topẻ tóg ãjag kuprẻg. Há tẫvĩ ti nĩ, Topẻ ti, kỹ ti jykre ri ke han nĩ. ¹⁶ Tag tó ja ti nĩ, ha mẽ: “ủn há pẻ vỹ tỹ inh nĩ, kỹ inh ri ke nỹtĩ sỏrmnĩ, vẻnh jykre há hã han kỹ nỹtĩmĩ,” he ja tóg nĩ, Topẻ ti.

¹⁷ Ëg tỹ Topẽ mré vēmén kỹ ãg tóg ti mỹ: “ãg jóg,” he tĩ. Hã kỹ ãg tóg ti kamẽg ke mũ, ti tỹ tỹ ãg jóg nĩn kỹ. Ha vé, ãg kar tỹ nén han mũ vég ti nĩgtĩ, kỹ tóg vènh kar jykre ki kanhró kar nĩ, Topẽ ti, kỹ tóg vènh kar jykre tónh ke mũ. Ver ãg tóg ù tỹ ti ki kagtĩg ag kãmĩ mũgtĩ. Ëg tỹ ag kãmĩ mũn kỹ ãg tóg Topẽ vĩ ki króm há han ke mũ. ¹⁸ Kaja e to tóg ãg kygĩãm ja nĩ, ki kanhró ãgag tóg nỹtĩ. Ægag jo ke ag vỹ ãgag jo vènh jykre kórég han ja nĩgtĩ, ãgag tỹ ag nón han jé. Hã ra tóg kaja e to ãgag kygvãn ja nĩgtĩ, ãgag tỹ vènh jykre kórég ãn han mãn tũ nĩ jé. Kaja e to tóg ãg kygĩãm. Ouro to ke pijé', Prata to ke pijé', ti kaja ãn ti. Tũ' he jé tóg ke mũ, ouro mré prata ti. ¹⁹ Hã ra tóg ã kyvènh hã to ãg kygĩãm, kỹ tóg tũ' he jãvãnh nĩ, ti kyvènh ti. Nén ù kaja kãfór kar ti nĩ, ti kyvènh ti. Æn há tãvĩ vỹ tỹ ti nĩ, ù tỹ ã kyvènh tỹ ãg kygĩãm mũ ãn ti, hã vỹ: Cristo, he mũ. Kygnẽ ja tũ pe ti nĩ. Kỹ tóg ovelha hã tãvĩ ri ke nĩ, ti tỹ ãg jagfỹ ter kỹ. ²⁰ Topẽ vỹ ti kuprẽg, ti tỹ ãg jagfỹ ter jé. Æ tỹ nén ù kar han tũ ki tóg ti kuprẽg, vãsỹ. Hã ra tóg ùri ga kri mur ja nĩ, ãgag tỹ ti vĩ mẽ jé, kurã tỹ ãgno to hã. ²¹ Ti tugrĩn ãgag tóg Topẽ ki ge kỹ nỹtĩ. Ti rĩn mãn ja tóg nĩ, Topẽ ti, kỹ tóg ti tỹ ùn mág han ja nĩ gé, kanhkã tá. Kỹ Topẽ ki rã há han nĩ. Ægag krenkren han jé tóg ke mũ, ha vemnĩ.

²² Topẽ vĩ pẽ ki króm ãgag tóg tĩ, hã kỹ ãgag tóg jãnhkriq kỹ nỹtĩ ha, ùri. Ægag mré ke kar ag to ãgag tóg há tãvĩ nỹtĩ gé. Kỹ jagnẽ to há nỹtĩ to tar nỹtĩmĩ gé. Æn kỹ jagnẽ to há nỹtĩ tũg nĩ. ²³ Topẽ vỹ ãgag han mãn, kỹ tóg ãg mur mãn ri ke nĩ. Æ vỹ tỹ tóg ãg han mãn ja nĩ. Rĩr ti nĩ, ùn vĩ mũ ti, hã vỹ: Topẽ, he mũ. Tũ' henh ke tũ ti nĩ. Ti tỹ ãg han mãn kỹ tóg tỹ ãg panh pir nĩ, ùn ter ke tũ ãn ti. Ëg panh ter mũ ãn ri ke tũ ti nĩ. ²⁴ Hã kỹ tag tóg rán kỹ nĩ, ha mẽ: “ãprã ke ag vỹ re ri ke nỹtĩ, re fej sĩnvĩ ãn ri ke. Hã ra tóg kãnhmar tóg tĩ, re ti, kỹ ti fej tóg kãgter kãn tĩ. Kỹ ãprã ke ag tóg kãnhmar kãgter tĩ gé, re fej ri ke. ²⁵ Jãvo Topẽ vỹ vỹ tũ' henh ke tũ pẽ nĩ,” he tóg, Topẽ vỹ tỹ rán kỹ nĩ ki. Tag mẽ ãgag. Topẽ vỹ sér to ken hã vẽ.

2

Jesus tỹ pó há ri ke nĩ

¹ Hã kỹ ãgag jykre kórég tovãnh kãn nĩ. Æn mãn tũg nĩ. Æ lograr he mãn tũg nĩ. Æ tũ to é n mãn tũg nĩ. Æ to vĩ kónãn mãn tũg nĩ gé. ² Nẽnẽ vỹ leite kron (ka)mẽ nĩgtĩ. Topẽ vỹ vỹ ãg mỹ gĩr sĩ pafa mũ ãn ri ke nĩ. Kãnhmar vènh vĩ há ãn mẽ mãn', mẽ mãn' hemnĩ. Kỹ ãgag tóg mog há han ke mũ, ãgag krenkren jé. ³ Hã kỹ tag tóg ti to rán kỹ nĩ, ha mẽ: “ki kanhrãn sĩ han ãgag tóg huri, ãg Senhor tỹ tỹ ùn há tãvĩ nĩn ki,” he ja tóg nĩ, Topẽ vỹ rá ki.

⁴ Ëg Senhor to kãmũ jẽg. Pó ri ke ti nĩ, ãn han mũ ag tỹ pó fón mũ ãn ri ke ti nĩ. Hã ra tóg rĩr jẽ, ãg Senhor ti. Ag tỹ ti fón mũ ra tóg Topẽ mỹ há tãvĩ nĩ, pó kar ag há kãfór. ⁵ Kỹ ãg tóg pó ri ke nỹtĩ gé. Kỹ Topẽ kuprĩg vỹ ãg tỹ Topẽ jo ãn ri ke han ke mũ, pó tỹ ãn ãn ri ke. Kỹ ti tỹ ãgag mỹ nén han sór mũ ãn to ti mỹ vènh nenh tũg nĩ, ti mỹ: “hej,” hemnĩ. Jesus Cristo vỹ ãgag tar han sór mũ, ãgag tỹ ti tũ ki rĩr há han jé. Vãsỹ Topẽ tũ ki rĩr tĩ ag tỹ ti mỹ nén ù kar pũn ja ãn ri ke tóg nĩ sir, ãg tỹ Jesus tũ han kỹ. Ægag tỹ ti tũ ki rĩr há han kỹ tóg ti mỹ há tĩnh mũ. ⁶ Hã kỹ tag tóg rán kỹ nĩ, ha mẽ. “Pó há kuprẽg inh, kỹ sóg tỹ ãn nũna ri ke han, Sião tá. Æ tỹ ti ki rã kỹ tóg venh ke mũ, Topẽ tỹ nén tó mũ ãn ti,” he tóg, Topẽ vỹ rá ki.

⁷ Ægag hã to tóg rán kỹ nĩ, ti vỹ tag, ãgag tỹ ti ki ge kỹ nỹtĩn kỹ. Æ tỹ ti kato vãsãnsãn mũ ag to tag tóg rán kỹ nĩ gé, ha mẽ. Ag to tóg: “pó tỹ ãn han jafã fón ag tóg, pó tỹ ãn han tĩ ag,” he mũ. “Ag mỹ tóg kórég ja nĩ, pó ãn ti. Hã ra Topẽ tóg pó ãn hã tỹ ãn nũna han mũ,” he tóg, Topẽ vỹ rá ki. ⁸ Kỹ tag tóg rán kỹ nĩ gé, ha mẽ. “Pó ãn tỹ ag tóg krĩm ke tĩ. Pãró vẽ sir, pó ãn ti, kỹ ag tóg pãró tỹ krĩm krĩm ke kỹ vár mũ sir,” he tóg mũ gé, Topẽ vỹ rá ki. Æ tỹ Topẽ vỹ kri fi sór tũ ag hã vỹ tỹ krĩmkrĩm ke tĩ. Topẽ tỹ nén han hã vẽ gé.

⁹ Ægag hã kuprẽg tóg, Topẽ ti, ãgag tỹ tỹ pã'i mág nỹtĩ jé, ti tũ ki rĩr tĩ to, ãgag tỹ tỹ ti povo nỹtĩ jé, vyr mỹ. Ægag kuprẽg tóg, Topẽ ti, ãgag tỹ ti tỹ nén han mũ kãmén jé, ti jykre tar ti, ãgag tỹ tỹ ti tũ nỹtĩn kỹ. Vãsỹ ãgag tóg kuty mĩ mũ ja nĩgtĩ, hã ra tóg ãgag tatĩ kãtĩg,

ājag tỹ ũri kurã mĩ mũ jé, ti tỹ ājag mỹ jēngre nĩm kỹ. ¹⁰ Ājag pi(jé) vāsỹ tỹ ũ tũ ja nỹtĩgtĩ'. Ũri ājag tóg tỹ Topě povo nỹtĩ, ti tũ. Ājag pi(jé) vāsỹ Topě tỹ ājag jagãgtãn sór mũ tag mē ja nĩgtĩ'. Ũri tóg hã ra ājag jagãgtãn, Topě ti.

Jesus tỹ vēnh jykre pãno to ěg kygvãn

¹¹ Inh kanhkã', tag ki ěg tóg ěg mré ke tũ ag jamã mĩ mũgtĩ. ěg jamã pijé', ga tag ti'. Hã kỹ sóg ājag jyvēn mũ. Ājag tỹ nēn ũ to én mũ ěn han sór tũg nĩ. Ājag kókén jé tóg ke mũ, kỹ ājag tóg ěg Senhor tovãnh sór ke mũ, ha vemnĩ. ¹² Jesus ki ge kỹ nỹtĩ tũ ag kãmĩ ājag tóg nỹtĩ, hã kỹ vēnh jykre há tãvĩ han nĩ. Ājag to ón sór ag tóg tĩ, ājag to ag tóg: "jykre pãno ag nỹtĩ," he sór tĩ. Kỹ vēnh kar tỹ ājag jykre há ve kỹ ag ón ěn tóg ve há tĩnh mũ. Ājag jykre há ve kỹ ag tóg: "Topě jykre vỹ há nĩ," hēnh ke mũ, hēn ri ke mũn, Topě tỹ ag kutãn kỹ.

¹³ ěg Senhor to há ājag tóg nỹtĩ. Ti to há nỹtĩn kỹ ěprã ājag pã'i ag vĩ ki króm nĩ gé. Pã'i mág pē tỹ imperador ěn vĩ ki króm nĩ, vēnh kar ag mỹ tỹ ũn mág ěn vĩ ti. ¹⁴ Ti krēm pã'i ag vĩ ki króm nĩ gé, governador ag. Pã'i mág pē ěn tỹ vin mũ ag vē, governador ag, ag tỹ ũn jykre pãno ag vóg kónãn jé, ag tỹ ũn jykre há ag to vĩ há han jé gé. ¹⁵ Ũ tỹ ki kagtĩg ag vỹ ājag to vĩ kónãn tĩ. Kỹ nēn ũ há tãvĩ hã han nĩ, kỹ ag tỹ ājag kato ne tónh ke vỹ tũ tĩnh mũ, ha vemnĩ. Tag vỹ há nĩ, Topě mỹ. ¹⁶ Cristo vỹ ěg kygvã, vēnh jykre pãno to. Kỹ vēnh jykre pãno han mãn sór tũg nĩ. To: "inh kava ti huri, Cristo ti, hã kỹ sóg jatun mỹ han ke mũ, isỹ nēn to én mũ kar ti," he tũg nĩ. Topě tũ vỹ tỹ ěg nỹtĩ, kỹ ti jykre hã han nĩ. Hã jé tóg ěg kygvã, ěg tỹ tỹ ti tũ nỹtĩ jé. ¹⁷ ěprã ke ũ to é he tũg nĩ. ěg mré Jesus ki ge kỹ nỹtĩ ag kar to há nỹtĩmĩ. Topě kamēg nĩ. ěprã ke tỹ pã'i mág tỹ imperador ěn kamēg nĩ gé.

ěg tỹ Cristo ri kén jagtar nỹtĩnh ke

¹⁸ Ājag kãmĩ ũ ag tóg patrão mỹ rãnhraj tĩ, fagrĩnh mỹ. Ājag patrão vĩ ki króm nĩ, ag kamēg nĩ. Ājag kãmĩ ũ patrão vỹ há nĩ, komēr hã tóg vĩ tĩ, ājag to jykren há han tóg tĩ. Ājag tỹ ti to há nỹtĩn kỹ tóg há tĩ. Ājag kãmĩ ũ patrão tóg kórég nĩ. ěn to vĩ há han nĩ gé, ti kamēg nĩ gé. ¹⁹ Kejēn tóg fagrĩnh mỹ ājag to jũnh ke mũ, ājag patrão kórég ti. Ājag tỹ Topě jykre han sór mũ to tóg ājag to jũnh ke mũ. Ge ra ti to jũ tũg nĩ, kỹ Topě tóg ājag mỹ vĩ há han ke mũ. ²⁰ Kejēn ājag patrão tóg ājag tỹ kygnē to ājag mrãnmrãn tĩ. Tag vỹ tỹ nēn ũ tũ nĩ. Ti tỹ ājag jykre há to ājag mrãnmrãn kỹ Topě tóg ājag mỹ vĩ há han ke mũ. ²¹ Hã jé Topě tóg ājag kuprēg.

Cristo vỹ ěg jagfỹ vēsýrēnh gé, mýr, ha mē. Ti vēsýrēnh tugrĩn ěg tóg ti kóm tar nỹtĩnh mũ, ěg tỹ kejēn ti kóm jagtar nỹtĩnh ken kỹ. ²² Nēn ũ kórég han ja tũ ti nĩ. Ũ pi(jé) ti ón venh mũ', ti ón vãnh nĩn kỹ. ²³ Ag tỹ ti mỹ vĩ kónãn mũ ra tóg ag mỹ vĩ kónãn ja tũ nĩ. Ag tỹ ti vēsýrēnh han mũ ra tóg ag mỹ vĩ ja tũ nĩ gé. Topě hã mĩ tóg ěkren ja nĩgtĩ. "Ti hã ne ag jykre tugnỹm ke mũ', inh jykre ti ke gé," he ja ti nĩ. "Ti hã ne ag vóg kónãn ke mũ'," he ja ti nĩ, Cristo ti. ²⁴ Ha vé, Cristo vỹ ěg tỹ Topě vĩ mranh ja ěn kajãm ja nĩgtĩ, cruz to tóg ter ja nĩgtĩ. Hã tugrĩn ěg jykre si tóg tũ ti ha, ti tỹ ěg jykre si tỹ tũ' hen kỹ. Vēnh jykre há hã han jé ěg tóg vēnh fēg kỹ nỹtĩ. Ti vēsýrēnh tugrĩn ěg tóg tỹ ũn há nỹtĩ. ²⁵ Vāsỹ ěg tóg vēnh mēg tỹ carneiro vãgfor ri ke nỹtĩ ja nĩgtĩ. Hã ra tóg hur ěg tatĩn, ěg vãgfor ja ra, Jesus ti. Kỹ ěg tóg ti mré mũ mũ sir, carneiro fag tỹ pastor mré mũ ri ke. Ti hã ne ěg ki rĩr nĩ ha'.

3

Fag tỹ ag mré vēnh jykre há han ke

¹ Sỹ ũn týtã fag jyvēn hã vē, ha mē. Ājag mén vĩ han nĩ. Ājag kãmĩ ũ fag mén ag vỹ ver Topě ki rã sór ja tũ nĩ. Ge ra ti mré ti vĩ ki króm nĩ, ti tỹ tỹ ā mén nĩn kỹ. Ti tỹ ā jykre há ve kỹ tóg hēn ri ke mũn ti ki rã sór ke mũ, ā tỹ ti mỹ nēn ũ tó tũ ra. ² Topě kamēg kỹ ti jykre hã han nĩ, ājag jãnhkri nỹtĩ jé. Kỹ ājag mén ag vỹ ājag jykre há venh ke mũ. ³ Vēsĩnvĩ han sór tũg nĩ, ājag gãnh tỹ, pó sĩnvĩ kaja e tỹ ke gé, kur kaja e tỹ ke gé. ěg tỹ vēsĩnvĩ han sór ke tũ vē. ⁴ Ājag jykre hã sĩnvĩ han nĩ, hã vỹ: komēr hã vĩ, he mũ, vĩ mág

tũ, he mũ. Věnh jykre sĭnvĭ tag vỹ há nĩ, Topě mỹ, kỹ tóg tũ' henh ke tũ nĩ gé. ⁵ Gen kỹ fag tóg nỹtĩ ja nĩgtĩ gé, ěg mĭnh'mĭnh ve fag, Topě tũ fag, ũ tỹ Topě ve sór ja fag. Fag mĕn jykre há mĩ fag tóg mũ ja nĩgtĩ, ⁶ Sara fi ke gé. Abraão jykre mĩ fi tóg tĩ ja nĩgtĩ, há kỹ fi tóg ti to: “inh pã'i vē,” he ja nĩgtĩ. Kỹ věnh jykre há há han nĩ. Ũ tỹ ājag tỹ věnh jykre há han kamĕg mũ ra ge ra han nĩ. Kỹ ājag tóg tỹ Sara fi krĕ'krĕ fag ri ke nỹtĩ.

⁷ Kỹ sóg ag jyvĕn sór mũ gé. Ājag prũ fag ki rĩr há han nĩ, ha mĕ. Fag pi(jé) ājag tar ri ke nỹtĩ'. Hã ra Topě tóg fag mỹ rĩr krỹg ja tũ ěn nĩm ke mũ gé, ti tỹ ājag mỹ rĩr krỹg ja tũ nĩm ěn ri ke. Ājag tỹ ājag prũ fag ki rĩr há han kỹ ājag tóg jatun mỹ Topě mré vĕmĕn ke mũ.

Ěg tỹ kejĕn Cristo jykre to jagtar ke

⁸ Vãhã sóg ājag mỹ tag tó sór mũ, ha mĕ. Jagnĕ mré věnh jykre pir han nĩ. Ũ fỹ kỹ ti mré fỹmnĩ, ũ mỹ sér tĩn kỹ ti mré mỹ sér nỹtĩmnĩ. Jagnĕ to há tãvĩ nỹtĩmnĩ. Jagnĕ mré komĕr há vĩmnĩ. Jagnĕ kãfór han sór tũg nĩ. ⁹ Ũ tỹ ājag mỹ nĕn ũ kórĕg han mũ ra ti mỹ nĕn ũ kórĕg han tũg nĩ. Ũ tỹ ājag mỹ vĩ kónãn mũ ra ti mỹ vĩ kónãn tũg nĩ gé. Vĕnh kajãm sór tũg nĩ. Hỹ, věnh kar to Topě mỹ: “ag ve há han nĩ,” hemnĩ. Topě vỹ ājag ve há han sór mũ, há jé tóg ājag kuprĕg. ¹⁰ Hã kỹ tag tóg rán kỹ nĩ, ha mĕ: “ājag mỹ jatun mỹ nỹtĩ sór mũ', nĕn ũ kar tỹ ājag mỹ sér tĩ jé'? Kỹ vĩ kónãn mãn tũg nĩ. Őn mãn tũg nĩ gé. ¹¹ Vĕnh jykre pãno han mãn tũg nĩ, věnh jykre há há han nĩ, věnh kar krĩ tỹ kãnhvỹ' he sórnmĩ gé, tag há to vãsãn nĩ, ti tỹ ājag mỹ sér tĩ jé. ¹² Ěg Senhor vỹ ũ tỹ věnh jykre kuryj han mũ ag ki rĩr há han mũ. Ag tỹ ti mỹ nĕn ũ to vĩn kỹ tóg ag vĩ mĕg mũ, Topě ti. Hã ra tóg ũ tỹ věnh jykre pãno han mũ kato tĕ tĩ, Topě ti,” he tóg, Topě vĩ rá ki.

¹³ Ũ vỹ ājag mỹ nĕn ũ kórĕg han ke tũ nĩ, ājag tỹ věnh kar mỹ nĕn ũ há han sór kỹ. ¹⁴ Kejĕn ājag tóg há ra věnh jykre há tugrĩn vĕsỹrĕnh ke mũ, Topě vĩ tugrĩn. Kỹ mỹ sér jagy nỹtĩmnĩ. Ěprã ke ag kamĕg tũg nĩ. Ag vĩ jĕmĕ sór tũg nĩ, ag tỹ ājag tỹ ti tovãnh han sór mũ ra. ¹⁵ “Cristo vỹ tỹ inh pã'i nĩ, kỹ sóg ti há kamĕg nĩ,” hemnĩ. Tag há mĩ ěkrĕn nĩ. Kejĕn ũ tóg ājag mỹ: “ne to ke nĕ, há vỹ: Cristo ki rã, he mũ?” he tĩ. Ěn mỹ kãmĕn kãn nĩ. ¹⁶ Ũ tỹ ge mỹ komĕr há vĩmnĩ. Topě vỹ vĕg nĩ nĩ, ājag tỹ ti mỹ nĕn tó mũ ěn ti. Fe kavĕj nỹtĩ sór tũg nĩ. Kỹ ājag tóg ũ tỹ Cristo jykre to vĩ kónãn sór mũ ag vĩ tỹ tũ' henh ke mũ, ha vĕmnĩ. ¹⁷ Kejĕn ājag tóg věnh jykre há to jagtar ke mũ, Topě tỹ tag to jykren kỹ. Hã ra tóg há nĩ. Ājag tỹ věnh jykre kórĕg to jagtar nỹtĩn kỹ tóg kórĕg nĩ.

¹⁸ Cristo há to jykren nĩ, ha mĕ. Ter ja tóg nĩ, ěprã ke ag tỹ Topě mỹ név(e) nỹtĩ tugrĩn. Ā ter pir ki tóg kajãm kãn. Jykre kuryj tóg nĩ, Jesus ti, há ra tóg ũn jykre pãno ag jagfỹ ter ja nĩ. Ti tỹ Topě mỹ ěg tatĩn tĩg sór vē. Ti tĕn ja ag tóg nĩ, há ra Topě kuprĩg vỹ ti rĩn mãn. ¹⁹ Topě kuprĩg vỹ ti tar han, kỹ tóg věnh kuprĩg ag jamã ra vyr gé, ag mỹ Topě vĩ sér tó jé, věnh kuprĩg sigse kỹ nỹtĩ ag mỹ. ²⁰ Vãsỹ ag tóg ti vĩ mĕ sór ja tũ nỹtĩ, věnh kuprĩg sigse kỹ nỹtĩ ěn ag. Noé tỹ ga kri tĩg kỹ, ti tỹ barco mág han mũ ěn kã ke ja vē. Ěn kã Topě tóg ver ag to fe nĩ ja nĩ, kỹ tóg ag vóg kónãn jãvãnh ja nĩ ver. Noé tỹ barco han kãn ja ra tóg ag vóg kónãn mũ sir, Topě ti. Kỹ ũ tỹ 8 (ke) ag tãvĩ vỹ krenkren mũ, barco ěn kãki. Goj var kỹ barco tóg kri tĩ nĩ, kỹ tóg ag krenkren han, barco ti. ²¹ Goj tỹ ājag tóg kygpe kỹ nỹtĩ, ājag krenkren jé. Barco tỹ goj kri tĩg ri ken há vē, há vỹ: batismo, he mũ. Ājag mro pijé'. Vĕnh jykre to ken há vē. Topě tỹ ěg tỹ ěg fe kavĕj tỹ jãnhkri han to ken há vē. Ěg tỹ Topě mỹ věnh fĕg to ken há vē, há vỹ: batismo, he mũ. Topě vỹ Jesus Cristo rĩn mãn ja nĩ, há kỹ tóg ěg krenkren han ke mũ gé. ²² Kanhkã tá tóg nĩ nĩ, Jesus ti, kỹ tóg Topě pĕgja tá nĩ nĩ. Tá tóg tỹ ũn mág nĩ, Topě tỹ jĕgnĕ jafã ag kri, ũn tar kar ag kri, ěg tỹ kanhkã tá ũn vĕg tũ kar ěn ag mré há. Vĕnh kar kri ke vỹ tỹ ti nĩ, Jesus ti.

4

Vĕnh jykre tãg

¹ Ha vé, Cristo vỹ jagtar nĩ ja nĩ, vĕsỹrĕnh kỹ. Kỹ tag to tar nỹtĩmnĩ gé, ājag tỹ ti kóm jagtar nỹtĩn kỹ. Tag vỹ ki há ke mũ, ha mĕ: ũ tỹ ěprã jagtar kỹ tóg Topě vĩ mranh tũ nĩgtĩ.

² Hã kỹ ũri Topě vĩ há han sórnmĩ, ti vĩ tovãnh tũg nĩ, ājag tỹ ga kri mũn kỹ. Ājag tỹ nĕn

to én mü ěn han sór tũg nĩ. ³ Vāsỹ ājag tóg ũ tỹ Topě ki kagtĩg ag jykre han ja nĩgtĩ, prỹg tỹ ěn ri ke ki, mỹr, ha mẽ. ěn kã ājag tóg ājag prũ tũ fag to én (ka)mě han ja nĩgtĩ, ājag mén tũ ag to ke gé. Ājag tỹ nén to én mü ěn han ājag tóg nĩgtĩ. Kronkron mü ja ājag tóg nĩgtĩ, krĩ tũ ja ājag tóg nỹtĩgtĩ. Věnh mãn kỹ ājag tóg kronkron kỹ kãgter mü ja nỹtĩgtĩ gé, věnh kãggrá mỹ festa kórég ěn han ja ājag tóg nĩgtĩ gé. ⁴ Ŭri ājag tóg tag han mãn sór tũ nỹtĩ ha, hã kỹ tóg ag mỹ e tĩ, ũ tỹ věnh jykre kórég to tar nỹtĩ ag mỹ. Ag mỹ tóg e tĩ, ājag tỹ ag mré ag jykre pãno han mãn sór tũ nỹtĩn kỹ, ājag tỹ ag krĩ tũ jãvo krĩ há nỹtĩn kỹ. Hã kỹ ag tóg ājag to vĩ kónãn tĩ, ũri. ⁵ Hã ra Topě tóg ag jykre vég nĩ nĩ. Věnh kar jykre tugnỹm ti tĩ mỹr, kỹ tóg ag mỹ ag jykre to: “tag vỹ há nĩ, ěn vỹ kórég nĩ,” ěn ke mü, ũn rĩr mü ag jykre to, ũn kãgter mü ag jykre to ke gé.

⁶ Ŭ tỹ ěn ri ke ag tóg Jesus mur ke to hã kãgter ja nĩgtĩ. ěn ag mỹ tóg věnh vĩ sér tónh vyr gé, Cristo ti, věnh kuprĩg ag jamã ra, ag krenkren jé. Ag tỹ han ja to Topě tóg ag vóg kónãn, ag tỹ ājag tỹ ga kri mũgtĩ kã věnh jykre han mü ěn to. Hã ra Topě tóg ag rĩnrĩn mãn sór ja nĩ gé, hã kỹ tóg ag kãgter mü ra ag mỹ věnh vĩ jěněg mü gé, ag tỹ kanhkã tá junjun jé.

⁷ Kakó ti tĩ ha, ga tag tỹ tũg' ěn ke kurã ti. Věso jykren nĩ, krĩ há han nĩ, ājag tỹ Topě mré věmén há han jé. ⁸ Kỹ jagně to há tãvĩ nỹtĩmnĩ. Tag to krónh ke tũg nĩ. ěg tỹ jagně to há nỹtĩn kỹ ěg tóg jagně mỹ věnh pãte fón ke mü, ěg tỹ Topě vĩ mranh mü ti, ti e nỹtĩ hã ra. ⁹ Ŭ tỹ kuvar há tá ājag to pasa kỹ ti mỹ: “inh mré jě,” ěn nĩ. Ti to vĩ tũg nĩ, ti to mỹ sér nỹtĩmnĩ. ¹⁰ Kỹ, Topě vỹ ěg tar han tĩ. Ŭ tóg nén ũ to tar nĩ, jãvo ũ tóg něn ũ ũ to tar nĩgtĩ gé. ěn ki rĩrmnĩ, ājag tỹ nén ũ to tar nỹtĩ ěn hã ki rĩrmnĩ, věnh kar tỹ ājag tugrĩn tar nỹtĩ jé. ěg tỹ Topě tỹ nén to ěg tar han mü ěn ki rĩr há han ke vě, tag vỹ Topě mỹ há nĩ. ěg tar pě han ti tĩ, Tope ti. ¹¹ Ājag kãmĩ ũ věmén kỹ Topě vĩ hã tỹ věmén nĩ. Ŭ tóg Topě tũ ag ki rĩr tĩgtĩ, kỹn jé Topě mỹ to vĩ, ti tỹ to ti tar han jé. Ājag tỹ ājag rãnrãj tag ki rĩr há han kỹ Jesus ki ge kỹ nỹtĩ kar ag vỹ Topě mỹ vĩ há han ke mü. Jesus Cristo hã vỹ tỹ ũn mág nĩ, ti hã vỹ tar nĩ, kỹ tóg tũg' ěn ke tũ pě nĩ. Amém.

Ag tỹ Jesus tugrĩn ěg vóg kónãn ke

¹² Inh kanhkã', ājag to sóg há tãvĩ nĩ. Nén ũ jagy pě vég ājag tóg mü. Ge ti nỹgtĩ, kỹ to jykren tũg nĩ. ěg kar vỹ tag vég tĩ, Jesus tugrĩn. ¹³ Mỹ sér nỹtĩmnĩ. Ājag jagtar kỹ ājag tóg Cristo tỹ ěg jagfy jagtar mü ěn ri ke vég tĩ. Ājag tỹ ti ri ke jagtar kỹ ājag tóg ti mré tỹ ũn mág nỹtĩnh ke mü gé, ti tỹ tỹ ũn mág nĩnh ke kurã ěn kã. ěn kã tóg ājag mỹ sér gy tĩnh mü, ha vemnĩ. ¹⁴ Hỹ, tá tóg ājag mỹ sér tãvĩ tĩnh mü, ag tỹ ũri ājag mỹ vĩ kónãn han mü ra, ājag tỹ Cristo ki rã kỹ nỹtĩ tugrĩn. Ag tỹ ājag to vĩ kónãn tugrĩn ājag tóg ki kanhró nỹtĩnh ke mü, Topě kuprĩg tỹ tỹ ājag jagrě nĩ ti. Ti kuprĩg vỹ ājag tỹ ũn mág han ke mü, Topě tỹ tỹ ũn mág nĩ ěn ri ke. ¹⁵ Ŭ ag tóg ājag tỹ ũ tén tugrĩn jagtar nỹtĩ, ājag tỹ ũ tũ péju tugrĩn ke gé. Kỹ ũ ag tóg ājag tỹ crime han tugrĩn jagãgtar nỹtĩ gé, ājag tỹ věnh kar to vĩ tugrĩn ke gé. Ājag tỹ ag mré věnh jykre pãno tugrĩn jagtar kỹ tóg Topě mỹ há tũ nĩ. Ājag tỹ ti vĩ mranh ke tũ vě vě. ¹⁶ Ājag tỹ hã ra Cristo tugrĩn jagtar kỹ tóg ti mỹ há tĩ. Tag to mỹ'ãg tũg nĩ. Tag to Topě mỹ vĩ há han nĩ, ājag tỹ tỹ Cristo mré ke nỹtĩn kỹ.

¹⁷ Topě vỹ věnh kar jykre tugnỹm kãn ke mü, kurã kakó ki. Hã ra tóg ũ tỹ ti ki ge kỹ nỹtĩ ag jykre tugnỹm vén ke mü. Ti tỹ ěg jykre tugnỹm kỹ ěg tóg nén ũ jagy ve kren ke mü. Kỹ ũ tỹ ti ki ge tũ ag vỹ nén ũ jagy pě ěn ve kãn ke mü, ha vemnĩ, ũ tỹ ti vĩ kato tẽ mü ag. ¹⁸ Hã kỹ tag tóg rán kỹ nĩ, ha mẽ: “ũ tỹ Topě vĩ há han sór mü ag vỹ ter kren ke mü. Kỹ ũ tỹ ti vĩ mranh tĩ ag vỹ kren ke tũ pě nĩ, ũ tỹ ti kato tẽ mü ag,” he ja tóg nĩ, Topě vĩ tỹ rán kỹ nĩ ki. ¹⁹ Topě tỹ ěg to: “tag vỹ ti jagy venh ke mü,” ěn kỹ ěg tóg venh ke mü. Kỹ, ěg jagtar mü ra ěg věnh jykre há hã han kỹ nỹtĩnh ke mü. Ŭ tỹ ěg han mü ěn to jykren jé ěg tóg ke mü, Topě to. Ti pi(jé) ěg tovãnh ke mü'. ěg mré tóg nĩ nĩ.

¹ Vãhã sóg ù tỹ Jesus ki ge kỹ nỹtĩ ag to pã'i ag jyvẽn sór mũ, ha mẽ. Ājag ri ke inh nĩ, isỹ tỹ ājag kóm ù tỹ Jesus ki ge kỹ nỹtĩ ag to pã'i jẽn kỹ. Cristo jagtar ve ja inh nĩ gé hã ra. Ti vẽn ven mãn ke kurã ên kã sóg tỹ ùn mág jẽn ke mũ gé. ² Kỹ sóg ājag mỹ tag tó sór mũ, ha mẽ. Ājag krēm ke ag ki rĩr há han nĩ. Û tỹ carneiro ki rĩr tĩ ên tỹ ã męg ki rĩr há han tĩ ên ri ke han nĩ. Topẽ tỹ ājag mỹ vẽn rãnrãj nĩm jan hã vẽn. Ājag rãnrãj tỹ ājag mỹ sér tĩn kỹ tóg há tĩ. Ājag tỹ ājag rãnrãj han sór tũ nĩn kỹ tóg ù tĩ. Kỹ ājag ganho mĩ êkrén sór tũg nĩ gé. Topẽ tũ vẽn, ājag rãnrãj ti, hã kỹ ki rĩr há han sórmnĩ. ³ Kỹ ājag krēm ke ag ki rĩrmnĩ, ag mỹ koměr hã vĩmnĩ. Ag rĩnve vẽn jykre há hã han kỹ nỹtĩmnĩ, ag tỹ ājag jykre há ve kỹ ājag kóm han sór jé. ⁴ Kãnhmar ti kãtig mãn ke mũ, ěg pã'i mág ti, ěg ki rĩr tĩ ti. Kỹ tóg ājag tỹ ùn mág han ke mũ. Ājag mỹ tóg krĩ tógfĩ ri ke vin ke mũ, ājag tỹ tỹ ùn mág nỹtĩn kỹ, hã ra tóg kórég vãn nĩ, ěg krĩ tógfĩ ên ti.

⁵ Kỹ sóg kyrũ ag jyvẽn sór mũ. Ājag mỹ sóg: “ùn sanh tỹ ājag mỹ nén ù tó mũ ên han nĩ,” he sór mũ.

Kỹ sóg vẽn kar jyvẽn sór mũ gé. Vẽn kar mỹ sóg: “jagnẽ to é he tũg nĩ,” he mũ. “Jagnẽ ki rĩr há han nĩ, jagnẽ mỹ nén ù há kar han nĩ,” he sór mũ. Tag vỹ rán kỹ nĩ, Topẽ vĩ rá ki, ha mẽ. “Topẽ vỹ ù tỹ jagnẽ to é he mũ ag kato tẽ tĩ. Hã ra tóg ù tỹ: “ùn sí vỹ tỹ inh nĩ,” he mũ ên to há nĩ,” he tóg, Topẽ vĩ rá ki. Hã kỹ vēsỹ ùn mág han sór tũg nĩ. ⁶ Topẽ vỹ tar nĩ, kỹ tóg kejẽn ěg mỹ nén ù jagy jẽnẽg tĩ. Ti kato tẽ tũg nĩ hã ra, ti tovãnh sór tũg nĩ gé. Kỹ tóg ã kurã ki ājag tỹ ùn mág han mãn ke mũ, ha vemnĩ. ⁷ Ājag krĩ kufy nĩn kỹ ti hã mỹ tómnĩ, kỹ tóg ājag mỹ ājag krĩ kuprãg ke mũ. Ti hã vỹ ěg ki rĩr nĩgtĩ.

⁸ Vẽn ki rĩrmnĩ. Nũr ri ke han tũg nĩ. Ha vé, ěg kato vãsãn tĩ ên, Japo ên tóg ěg to vãjig tĩgtĩ. Mĩg kókĩr ri ke ti nĩ, ti tỹ ěg mãn sór kỹ. ⁹ Hã kỹ ti kato vãsãnsãn nĩ, Jesus Cristo ki rã tovãnh tũg nĩ gé, ù tỹ ājag tỹ ti tovãnh han sór mũ ra. Ha vé, ěg kanhkã kar ag vỹ jagtar tĩ, ājag kóm, ga kri ke kar ag. Ag mĩ êkrén kỹ tar nỹtĩmnĩ. ¹⁰ Kurã pipir ki ājag tóg jagtar tĩ. Kar kỹ Topẽ vỹ ājag tỹ ùn há tãvĩ han ke mũ, ājag tỹ kygnẽ mãn tũg jé. Ti hã vỹ ěg tar han tĩ, ěg tỹ ti to krónh ke tũ nĩ jé. Ti hã vỹ ājag tỹ ùn há han ke mũ gé, kỹ ājag tóg ti tovãnh ke tũ pẽ nĩ. ěg to há pẽ ti nĩ, Topẽ ti. ěg kuprẽg tóg mỹr, ěg tỹ Cristo tugrĩn kanhkã ve jé, ěmã sĩnvĩ pẽ ên ti, ù tũg vãn ěn ti. ¹¹ Topẽ hã vỹ ã pir mỹ tar nĩ'. Ti hã vỹ tũ' henh ke tũ nĩ'. Amém.

Pedro tỹ ag mĩ êkrén

¹² Tó sĩ han sóg ājag mỹ, kỹ Silas tóg inh mỹ ājag mỹ rán mũ, inh vĩ ti. ěg kanhkã vỹ tỹ ti nĩ, Silas ti, Jesus tovãnh jãvãn ti nĩgtĩ, kỹ tóg iso há nĩ gé. Isỹ ājag tar han sór vẽn, hã kỹ sóg ājag mỹ inh vĩ jẽnẽg mũ. Sỹ ājag mỹ: “Topẽ vỹ ěg tar han ke mũ mỹr,” he mũ gé. Ti to krónh ke tũg nĩ. ¹³ Cidade tỹ Babilônia tá ěg nỹtĩ, kỹ tag ki ù tỹ ājag mré Jesus ki ge kỹ nỹtĩ ag vỹ ājag mĩ êkrég tĩ. Ājag mré tóg ěg kuprẽg, Topẽ ti. Kỹ inh kósin tỹ Marcos vỹ ājag mĩ êkrég tĩ gé. ¹⁴ Jagnẽ ki nhun ke ri ke han nĩ, jagnẽ nĩgẽ kãgmĩ kỹ, ājag tỹ tỹ jagnẽ mré ke nỹtĩn kỹ.

Cristo mré ke vỹ tỹ ājag nỹtĩ. Topẽ jé ājag krĩ tỹ kãnhvy' hé. Hã vẽn.

PEDRO TỠ CARTA HAN MÃN

¹ Simão Pedro tỹ ãjag mỹ carta rán hã vễ. Jesus Cristo tỹ inh fễ vễ, sỹ ti rãnhrãj han jé, sỹ tỹ ti apóstolo jễ jé. Isỹ ù tỹ inh mré Jesus Cristo ki ge kỹ nỹtĩ kar ag mỹ rán hã vễ. Topễ vỹ ẽg kuprẽg, ùn jykre kuryj ẽn vỹ ẽg kuprẽg, ẽg tỹ ẽg krenkren han mũ tỹ Jesus Cristo ki ge jé. Nén ù sér vễ, ti ki ge mũ ti.

² ãjag to sóg Topễ mré vĩ tĩ, ãjag tỹ ẽg Senhor tỹ Jesus Cristo ki kanhrãn há han jé, Topễ ki ke gé, ãjag tỹ komẽr hã ti ki kanhrãn kãn jé. Kỹ tóg ãjag tar han ke mũ. Kỹ tóg ãjag krĩ tỹ kãnhvy' henh ke mũ gé.

Topễ tỹ ẽg kuprẽg

³ Topễ ki kanhró ẽg tóg nỹtĩ. Ẽg kuprẽg tóg, ti tỹ ẽg tar han jé, ti tar nĩ ẽn ri ke. Kỹ tóg ẽg tỹ ùn mág han ke mũ gé, ti tỹ tỹ ùn mág nĩ ẽn ri ke. Ẽg tỹ tag ki kanhró há han kỹ ẽg tóg ti to tar nỹtĩ, ẽg tỹ ti jykre jagma mũ há han jé. ⁴ Kỹ Topễ tóg ẽg mỹ nén ù há tó ja nĩgtĩ gé. Ẽ tóg ẽg mỹ vễnh vĩ há tỹ ge tónh ke tũ nĩ. Topễ tỹ ẽg mỹ vĩ há han ri ke venh ke tũ ẽg tóg nĩ. Tag tó ti ẽg mỹ, ha mẽ. Ẽprã ke kar vỹ nũgme ki vár ke mũ, ãjag tỹ nén to ẽn mũ ẽn han tugrĩn. Ag jãvo ẽg tóg krenkren ke mũ, kỹ ẽg tóg Topễ ri ke nỹtĩnh ke mũ, mỹr, ha mẽ. ⁵ Hã kỹ vãsãn, ãjag tỹ ti ki rã to tar nỹtĩ jé, ãjag tỹ ti ki rã tugrĩn vễnh jykre há hã han jé. Vễnh jykre há han kỹ vễnh kanhrãn kỹ mũmnĩ gé. ⁶ Vễnh kanhrãn kỹ mũ kỹ vễso jykrén nĩ gé. Vễso jykrén kỹ ti tovãnh tũg nĩ gé. Ti tovãnh tũ nĩn kỹ ti jykre hã mĩ mũmnĩ gé. ⁷ Ti jykre hã mĩ mũn kỹ jagnẽ to há tãvĩ nỹtĩmnĩ gé, ẽg kanhkã kar ag to. Ẽg kanhkã to há nỹtĩn kỹ ẽprã ke kar ag to há nỹtĩmnĩ gé. ⁸ ãjag tỹ tag han kãn kỹ tóg há tĩ. Kỹ ãjag tóg ẽg Senhor tỹ Jesus Cristo ki kanhrãn há han ke mũ gé, kỹ ãjag tóg vễnh jykre há to krónh ke tũ nĩ gé. Kỹ ãjag tóg komẽr hã ti ki kanhrãn kãn ke mũ, ha vemnĩ. ⁹ Ẽ tỹ vễnh jykre há han sór tũ nĩn kỹ tóg ùn kyvó ri ke nĩ, ùn ẽvãnh kórég, ùn kutu ri ke ti nĩ sir. Ẽn vỹ ẽg Senhor ki kagtĩg nĩ. Vãsỹ Topễ vỹ ti kykũnh ja nĩ, ti tỹ Topễ vĩ mranh ja ẽn to. Hã ra tóg kã jatun kỹ nĩ ha, hã kỹ tóg ti kórég han mãn sór mũ.

¹⁰ Inh kanhkã', Topễ vỹ ãjag kuprẽg. Kỹ vãsãnsãn, vễnh kar tỹ ãjag jykre há tugrĩn ki kanhró nỹtĩ jé, ti tỹ ãjag kuprẽg mũ ẽn ti. Kỹ ãjag tóg tỹ prãnh kenh ke tũ nĩ, ha vemnĩ. ¹¹ Kanhkã ve jé ãjag tóg ke mũ, ha vemnĩ, ẽg Senhor tỹ Jesus Cristo tũ ti, ẽg krenkren han tĩ ẽn tũ ti. Tũ' henh ke tũ ti nĩ, ti tỹ tá tỹ ùn mág nĩ ti.

¹² Hã kỹ sóg ãjag mỹ tó mãn', tó mãn' he mũ. Ki kanhró ãjag tóg nỹtĩ, vễnh vĩ há to tar ãjag tóg nỹtĩ, ãjag tỹ mẽg mũ ẽn to. ¹³ Ge ra sóg ãjag jyvẽn mãn sór mũ, ãjag tỹ kã jatun tũ nỹtĩ jé. Isỹ ãjag mré nĩ mũ ẽn kã sóg ãjag mỹ tag tó, ãjag jyvẽn mág inh. Kỹ kã jatun nỹtĩ tũg nĩ. ¹⁴ Ha vé, kãnhmar sóg iser kỹ inh fãr tovãnh kỹ tĩg ke mũ, ki kanhró sóg nĩ. Ẽg Senhor tỹ Jesus Cristo vỹ inh mỹ isỹ kãnhmar tĩg ke ti tó. ¹⁵ Hã kỹ sóg vễnh rán tag to fũrũn mũ, ãjag tỹ iser kar kỹ kã jatun tũ nỹtĩ jé.

Pedro tỹ Jesus ve ja

¹⁶ Ha vé, inh pi(jé) ãjag mỹ ón mũ', isỹ ãjag mỹ ẽg Senhor tỹ Jesus Cristo kãtĩg vén mũ ẽn tón kỹ, isỹ ti jykre tar tón kỹ. Ti ve inh, sỹ ãjag mỹ nén tó mũ ti. Ti ve inh, ti tỹ tỹ ùn mág pẽ nĩ ti. ¹⁷⁻¹⁸ Ti jóg tỹ Topễ vỹ ti tỹ ùn mág han. Ti tỹ tóg ùn tar han gé. Ẽg tỹ Jesus mré pãnónh kri nỹtĩ ẽn kã ẽg tóg kanhkã tá vễnh vĩ ẽn mẽg mũ, ẽprã nỹtĩn kỹ. Kỹ tóg ti to tag tó, ù tỹ vễnh kar kri ke ẽn ti, Topễ ti, ha mẽ. “Inh kósin pir hã vễ,” he ja tóg nĩ, Topễ ti, Jesus to. “Inh fe pẽ vễ,” he ja tóg nĩ. Topễ tỹ pãnónh ki kãtẻre mũ ẽn kri ke ja vễ. Ẽn tá sóg Jesus tỹ tỹ ùn mág jễ vé.

¹⁹ Hã kỹ ẽg tóg ù tỹ vãsỹ Topễ vĩ tó tĩ ag vĩ kri fig mũ, tovãnh tũ ẽg nỹtĩ. Kri nĩmnĩ gé, ãjag. Lampião grug ri ke ti nĩ ẽg mỹ, ag vĩ ti. Lampião grug vỹ ẽg mỹ kutu tá jẽngrẻ han ti. Kurã ke kãtã ẽg tóg lampião grug ve mãn sór tũ nĩgtĩ. Kurã ke kãtã krĩg mág hã vỹ ẽg fe tỹ mrin ke tĩ. Jesus to ken hã vễ, hã vỹ: krĩg mág, he mũ. ²⁰ Kỹ, ãjag tỹ Topễ vĩ rá to ken kỹ tag to jykrén nĩ, ha mẽ: ẽg pi(jé) vễsóg ki to jykrén ke mũ', Topễ vĩ rá to', Topễ tỹ

ã vī tó tī ag mý nén tó mū ěn to'. Topě hã ne to ěg krīn ke mū'. ²¹ Ký Topě vī tó tī ag pi(jé) vėsóg ki ājag krī ki to jykrén ký rán ja nĩgtĩ gé'. Topě kuprĩg tỹ ājag krīn mū ěn hã rán ja ag tóg nĩgtĩ, hã ký tóg tỹ Topě vī nĩ, vėnh rán ki.

2

Ón ký Topě vī tó tī ag

¹ Hã ra ũ ag tóg ón ký Topě vī tó ja nĩgtĩ gé, vãsỹ, Israel ũ ag. Tag ve jé ājag tóg ke mū gé. ũ ag tóg ón ký ājag mý Topě vī kãmén sór ke mū, ha vemnĩ. ěn ag vī vỹ ón ký ājag mý mẽ há tĩ mẽ tĩnh ke mū, hã ra tóg ājag kókén ke mū. ěg Senhor tovãnh jé ag tóg ke mū, ũ tỹ ěg kygjãm ja ěn ti. Hã ra Topě vỹ vãhã ag tỹ tũ' henh ke mū. ² Ge ra ũ tỹ hėn ri ke ag tóg ag jykre pãno han ke mū, ag mré. Ký ũ tỹ ag mré vėnh jykre pãno han mū ěn ag tugrĩn Topě jykre kato vī vī henh ke vė, tag tỹ mẽ há' henh ke vė sir, ti tỹ ki hã tó mū ra. ³ Ag tỹ jãnkamy mág ve sór vė, hã ký ag tóg ón ký vėme sĩnvĩ tó sór mū, ag tỹ ājag lograr he jé. Hã ra ũ tỹ ag vóg kónãn ke mū ěn tóg ag vėg tĩ. Ag tỹ tũ' he jé tóg ke mū, kãnhmar, ha vemnĩ.

⁴ Topě tỹ jėgnė jafã ũ ag vỹ Topě vī mranh. ěn ag vóg kónãn tóg huri, Topě ti. Ag pi(jé) krenkren'. Nũgme ki tóg hur ag vãm, Topě ti. Tá ag tóg sigse ký nỹtĩ, ferro tỹ corrente tỹ. Tá tóg kuty nỹ. Tá ag tóg Topě tỹ vėnh kar jykre tugnỹm ke kurã ěn jãvãnh nỹtĩ. ⁵ Ký Noé mré ke ag vỹ nỹtĩgtĩ gé. Topě vỹ ag vóg kónãn ja nĩ gé. Goj var tỹ tóg ũ tỹ ti vī mranh mū ag tỹ tũ' he kãn. Ag pi(jé) krenkren'. ũ tỹ 8 (ke) ag tãvĩ vỹ krenkren, ěn kã, hã vỹ: Noé, he mū, ũ tỹ vėnh kar mý: “Topě vī kri finnĩ,” he mū ěn ti, kar ký ti mré ke tỹ 7 (ke) ěn ag ke gé. Ti mré ga kri mū ũ ag vỹ tũ' he kãn. ⁶ Topě vỹ cidade tỹ Sodoma tá ke ag, cidade tỹ Gomorra tá ke ag vóg kónãn ja (tóg) nĩgtĩ gé, ký cidade ěn tá ĩn tóg kugpũr kãn ja nĩ. ěg tỹ tag ve ký ěg tóg Topě tỹ ũn jykre pãno ag vóg kónãn ke ěn ki kanhró nỹtĩ gé. ⁷ Cidade ěn tá ũn pir vỹ kren, hã vỹ: Ló, he mū. ěn vỹ jykre há nĩ ja nĩgtĩ, ký ti mré ke ag jykre kórég vỹ ti mý e nĩ ja nĩgtĩ, tag to tóg krī kufy han ja nĩgtĩ. ⁸ Kurã kar ki tóg ag kãmĩ ag jykre pãno ve ja nĩgtĩ, ký ti krī tóg kufy jagy nĩ ja nĩgtĩ, ti tỹ ag jykre kórég ve ký, ag vī kórég ke gé. ěn vỹ ã pir mý kren, Ló ti. ⁹ ũ tỹ Topě to: “ũn mág vỹ tỹ ti nĩ,” he mū ag krenkren han ki kanhró tóg nĩ, Topě ti. Hã ra tóg ũ tỹ vėnh jykre pãno han mū ag vóg kónãn ke mū, ti tỹ vėnh kar jykre tugnỹm ke kurã ěn kã. ¹⁰ ũ ag vóg kónãn mág pė han jé tóg ke mū, Topě ti, hã vỹ: ũ tỹ ājag tỹ nén to ěn mū han tĩ ěn ag, he mū, ũn vėnh kavėnh tĩ ag, he mū, ũ tỹ: “Topě pi(jé) tỹ ěg Senhor nĩ,” he mū ěn ag, he mū.

Ón ký Topě vī tó tī tag ag vỹ ěg vī kafãn tĩ. “Inh hã tóg ki kanhró nĩ,” he ag tóg tĩ. Ký ag tóg kanhkã tãn ag kamėg vãnh nỹtĩ gé. Ag to ag tóg vī kónãn tĩ, kanhkã tãn ag to, ón ký Topě vī tó tī ag. ¹¹ Topě tỹ jėgnė jafã ag vỹ tag han tũ nĩgtĩ, ha mẽ. Kanhkã tãn ag to ag tóg vī kónãn tũ nĩgtĩ, Topě rĩnve, Topě tỹ jėgnė jafã ag. Ag tỹ ũ tỹ ón ký Topě vī tó tī ag tar kãfór nỹtĩ ra ag tóg kanhkã tãn ag to vī tũ nĩgtĩ. ¹² Ag jãvo ũ tỹ ón ký Topě vī tó tī ěn ag vỹ krī tũ nỹtĩ, vãnh kãmĩ sė ag jykre tũ ri ke ag nỹtĩ. Vãnh kãmĩ tóg tĩgtĩ, sė ti, ěg tỹ ti to vãjig ký ti tén jé. Hã jé tóg mur tĩ. Tag ri ke ag nỹtĩ, ũ tỹ ón ký Topě vī tó tī ag. Ājag tỹ kanhkã tãn ag ki kagtĩg nỹtĩn ký ag tóg ag to vī kónãn tĩ. Hã ký Topě tóg ag tỹ tũ' henh ke mū, ěg tỹ sė tén tĩ ěn ri ke. ¹³ Ag tỹ ājag jykre pãno kajãm hã vė. Kurã ki ag tóg ag tỹ nén to ěn mū ěn han tĩ, mýr, ha mẽ. Ký ag tóg ājag mré jėg tĩ gé, ājag tỹ festa han ký. Ha ra ag tóg nén tỹ ěg mý'a han tĩ ěn hã han tĩ, ag tỹ ājag mré jėn ký. Ājag kavėnh ag tóg tĩ. Jykre régre ag nỹtĩ, ón ký ag há nĩ ve nỹtĩ. ¹⁴ ũn týtã fag kar to ěn ag tóg tĩ, fag ki ěvãnh ký. Topě vī mranh sór ag tóg tĩ, ti vī mranh to ag tóg krónh ke tũ nĩgtĩ. ũn krój ag krīn kónãn ag tóg tĩ, ag tỹ ag mré mranh jé. Ag topě vỹ tỹ jãnkamy nĩ. Topě vỹ ag vóg kónãn ke mū, ha vemnĩ. ¹⁵ Topě japry ti, ti jamĩn ti tovãnh ag tóg, vãgfor ký ag nỹtĩ. Beor kósĩn tỹ Balaão ěn ri ke han ag tóg tĩ. ěn vỹ jãnkamy to há tãvĩ nĩ ja nĩgtĩ. Hã ký tóg ã jykre kórég ěn to jãnkamy ve sór mág ja nĩ. ¹⁶ Hã ra Topě tóg ti mý vī tar han, ti tỹ ti vī mranh ký. Hã ký ti mėg fi tóg ã vī vãnh ra ti mý vī ja nĩgtĩ, ěg tỹ jagnė mré vėmėn ri ke han ja fi

tóg nĩgtĩ, ti mēg fi. Ti mĩ vĩ kĩ fi tóg ti tĩ vėnh jykre kórég han ke mũ ra tĩ tũ' he mũ, ti mĩ, ũ tĩ Topě vĩ tó tĩ ěn mĩ, ti tĩ ón kĩ Topě vĩ tó tĩ sór mũ ěn kã.

¹⁷ Ón kĩ Topě vĩ tó tĩ ag vỹ goj nĩhỹg ja ki goj tũ ěn ri ke nỹtĩ. Kanhkã góg ri ke ag tóg nỹtĩ gé, kãka tĩ vėjo kanhkã góg ag vóg kĩ tĩ tũ' he ěn ri ke ag nỹtĩ, ũ tĩ ón kĩ Topě vĩ tó tĩ ag. Topě vỹ kuty tãvĩ tá ag vin han ke mũ. ¹⁸ “Ũn mág vỹ tĩ inh nĩ,” he ag tóg tĩ, ón kĩ. Krĩ tũ ag nỹtĩ. Nén ũ vėnhmỹ kar to én ag tóg tĩ, nén ũ tĩ ěg kavėnh tĩ ěn to én ag tóg tĩ. Vėnh jykre pãno han kĩ ag tóg ũ tĩ ũri Topě ki ge sór mũ ag krĩn kónãn tĩ, ũ tĩ ũri ěg tĩ kygně kĩ han tĩ ěn tovãnh sór mũ ag. ¹⁹ “Jatun mĩ ěg tóg ěg tĩ nén han sór mũ ěn han kãn ke mũ,” he ag tóg tĩ, ón kĩ. “Topě vỹ ěg to jũnh ke tũ nĩ,” he ag tóg tĩ, ón kĩ. Hã ra ag tóg ěprã vėnh jykre hã mĩ mũgtĩ, nén tĩ ěg kavėnh tĩ ěn hã han ag tóg tĩ. Kĩ tóg tĩ ag jagrě nĩ, ěprã vėnh jykre ti. ěg tĩ nén ũ tovãnh sór mũ ra tovãnh ki kagtĩg nỹtĩ ěn vỹ tĩ ěg jagrě nĩ sir, mỹr, ha mẽ. ²⁰ ěg Senhor tĩ Jesus Cristo ki kanhró ja ag tóg nỹtĩ vė, ěg kren han mũ ěn ti. Ti tugrĩn ag tóg ěprã vėnh jykre kavėj kar tovãnh ja nĩgtĩ vė, ěg tĩ nén tugrĩn ter ke mũ tovãnh ja ag tóg nĩgtĩ vė. Hã ra ag tóg ājag tĩ nén tovãnh mũ ěn han mãn mũ, kĩ tóg tĩ ag jagrě nĩ mãn mũ sir. Kĩ tóg ũri kórég kãfór nĩ, ag mĩ. ²¹ Ag tĩ Topě japry ěn, ti jamĩn ěn sãn ja tũ nĩ ra tóg há tĩ vė. Hã ra ag tóg ti sãn sĩ han kar kĩ kyrãgrã mũ. Topě tĩ ag mĩ vėnh vĩ há jėnėg mũ ěn tovãnh ag tóg. ²² Ag to ěg tóg tag tó tĩ, ha mẽ: “cachorro vỹ ā tũgtũv ěn ko mãn tĩ,” he ěg tóg tĩ. “Porco tóg ā vėnh kype há han kĩ jė ra óré mĩ vėsĩn mãn tĩ, kĩ tóg vėnh kavėnh mãn tĩ,” he ěg tóg tĩ gé. ũ tĩ vėnh jykre kórég tovãnh kar kĩ han mãn tĩ ag to ken hã vė.

3

Jesus kãtĩg mãn

¹ Inh kanhkã', ājag to sóg há tãvĩ nĩ. Ājag mĩ sóg vėnh rá ũ han huri, kĩ sóg ājag mĩ rán mãn mũ ha. Inh vėnh rá kar ki sóg ājag jyvėn tĩ, ājag tĩ nén jãnhkri hã to jykren kĩ nỹtĩ jė, ājag tĩ tag kã jatu nỹtĩ tũ nĩ jė. ² Topě vĩ tó tĩ ag vỹ vãsỹ Topě vĩ tó ja nĩgtĩ. ěn mĩ ěkrén nĩ. Kĩ apóstolo ag vỹ ājag mĩ tó ja nĩgtĩ gé, ěg Senhor tĩ nén to ěg jyvėn mũ ti, ěg kren han tĩ ěn vĩ ti. ěn mĩ ěkrén nĩ gé. ³⁻⁴ Tag to jykren nĩ, ha mẽ. Kurã tĩ ěgno to hã ěprã ke ũ ag vỹ ājag to é henh ke mũ, ha vemnĩ. “Ti mĩ kãtĩg mãn mũ vỹ?” he jė ag tóg ke mũ. “Ti tĩ vãsỹ kãtĩg mãn ke vė vė, hã ra ěg jo ke ag vỹ vãsỹ tũg, ti tĩ ā kãtĩg mãn ke tó mũ ra ag tóg kãgter. Kãtĩg ke tũ ti nĩ. Ga vỹ nĩnh mũ, tũ' henh ke tũ ti nĩ, ga ti, ha vemnĩ,” he jė ag tóg ke mũ, ěg to é he kĩ, ha vemnĩ. Ũn jykre kórég ag vė, ũ tĩ tag tó mũ ag. Ājag tĩ nén to én mũ ěn hã han ag tóg tĩ. ⁵ Topě tĩ vãsỹ nén han mũ ěn ki kagtĩg ag tóg nỹtĩgtĩ, ag tĩ ki kanhrãn sór tũ nỹtĩn kĩ. Topě tĩ vãsỹ nén han jan hã vė, ha mẽ. Kanhkã han tóg, vãsỹ, ga ti ke gé. Ā vĩ tĩ tóg nén kar hyn han ja nĩgtĩ, Topě ti. Ga ěn vỹ goj tĩ vėnh kãpãm kĩ nỹ ja nĩ, kĩ ũ tóg goj kri nỹ ja nĩ gé. ⁶ Ga ěn kri ke kar ag vỹ hur tũg, goj tĩ, goj var mũ ěn tĩ. ⁷ Kĩ ěg tĩ ũri nén vėg mũ tag vỹ tũ' henh ke mũ gé, ha vemnĩ. Topě vỹ ti tĩ tũ' henh ke to kurã nĩm huri, kĩ tóg pĩ tĩ tĩ tũ' henh ke mũ, Topě tĩ: “tág’,” hen kĩ. Kurã ěn kã Topě vỹ ũ tĩ ti vĩ mranh mũ ag tĩ tũ' he kãn ke mũ gé. Ag vóg kónãn ke kurã vė sir.

⁸ Inh kanhkã', tag to jykren nĩ, ha mẽ. Topě kurã vỹ ěg kurã ri ke tũ nĩ. Kurã pir vỹ ti mĩ prỹg tĩ mil (ke) ri ke nĩ, kĩ prỹg tĩ mil (ke) vỹ ti mĩ kurã pir ri ke nỹtĩ gé. ⁹ Kĩ tóg ā tĩ ěg mĩ nén tó mũ ěn tovãnh ke tũ nĩ, Topě ti. ũ tóg: “han sór tũ ti nĩ, hã kĩ ěg tóg vėg tũ nĩgtĩ,” he tĩ, ón kĩ. Hã ra ag tóg hã tũ tó tĩ. Ti tĩ ver ěg to fe nĩ vė, hã kĩ tóg kãtĩg vãnh han. Ti pi(jė) ěg kãmĩ ũ tĩ nũgme ki kutě mũ ve sór mũ'. Hã kĩ tóg ver ěg mĩ kurã ũ nĩm mãn', kurã ũ nĩm mãn' he mũ, kĩ vėnh kar jė ājag jykre kórég tovãnh, ag krenkren jė.

¹⁰ Hã ra tóg kãtĩg mãn ke mũ, ha vemnĩ. Vãhã tóg kãtĩg ke mũ, kĩ tóg ũ tĩ ěg tũ péju(g) tĩ tĩ ěg vatãnh tá kãtĩg ri ke nĩnh ke mũ. ěn kã kanhkã tóg tov kĩ krėj ke kĩ var ke mũ. Kanhkã tá nén kar vỹ jonh ke kãn ke mũ gé, krĩg kar ag, pĩ ěn tĩ ag tĩ krėj ken kĩ. Kĩ vãhã ga vỹ tũ' henh ke mũ, ga kri ke kar ag ke gé. ¹¹ Ge kĩ nén (ũ) kar vỹ tũ' henh ke mũ. Hã mĩ ěkrén kĩ vėnh kãn sórmnĩ. Topě tĩ ěg mĩ nén tó mũ ěn hã han nĩ. Topě mĩ vėnh

vin nĩ. ¹² Topẽ kurã ên jãvãnh nĩ, Topẽ rãnhřaj to vãsãnsãn nĩ, ti kurã ên tỹ kãnhmar tá krỹg jé. Kurã ên kã kanhkã vỹ pũr ke mũ, kỹ kanhkã tá nén kar vỹ jonh ke kãn ke mũ gé, krĩg kar ag. ¹³ Topẽ vỹ ã tỹ ãg mũ nén tó mũ ên han kãn ke mũ. Kanhkã tãg han jé tóg ke mũ, ga tãg ke gé. Tá tóg vènh jykre kuryj tãvĩ nĩ. Ëg tỹ ga tãg tag, kanhkã tãg tag venh ha pẽ tóg tĩ.

¹⁴ Inh kanhkã', ãjag to sóg há tãvĩ nĩ. Topẽ kurã tag jãvãnh kỹ ãjag tóg nỹtĩ. Kỹ vãsãnsãn nĩ, ãjag tỹ kygnẽ tũg jé. Vãsãnsãn nĩ, ãjag tỹ Topẽ mũ jãnhkri nỹtĩ jé, ãjag tỹ ti há ri ke nỹtĩ jé. Kỹ ãjag tóg ti kato vãsãnsãn tũ nĩ. ¹⁵ Ha vé, ti tỹ ver ãg to fe nĩn hã kỹ ãg tóg ãg jykre kórég tovãnh kỹ krenkren ke mũ. Tag rán tóg huri ãjag mũ, ãg kanhkã tỹ Paulo ti. Ti to sóg há tãvĩ nĩ, Paulo to. Topẽ vỹ ti mũ krĩ há tãvĩ nĩm. ¹⁶ Kỹ tóg, ti tỹ ã mũ carta han kỹ tóg isỹ nén rán mũ tag ri ke han tĩ gé. Ti vỹ tóg inh vỹ ri ke pẽ nĩ. Carta e han tóg huri, Paulo ti, kỹ ti carta ã vỹ to jykrén jagy tĩ gé. Kỹ ã ag tóg ti carta to ke mũ ra ki kagtĩg nỹtĩn kỹ ti to vỹ kónãn sór mũ. Û tỹ ki kagtĩg ag vè, ãn krój ag vè, ã tỹ Paulo tỹ rá to vỹ kónãn mũ ag. Topẽ vỹ rá ã to ag tóg vỹ kónãn tĩ gé, ên ag. Tag tugrĩn ag tóg kãgter ke mũ, ha vemnĩ.

¹⁷ Inh kanhkã', ãjag mũ sóg rán kãn huri. Hã kỹ vènh ki rĩr há han nĩ. Ker ã tỹ ãjag mũ ón kỹ kri nĩm hẽ'. Ke tũ nĩ mũ ra ag tóg ãjag lograr henh ke mũ, ã tỹ ãjag fe kavènh sór mũ ag, ãn jykre pãno ag. ãjag tỹ ag vỹ kri fi tugrĩn ãjag tóg vãgfor ke mũ, ha vemnĩ. Ëg tỹ kãgnó ki tĩr ri ke han jé ãjag tóg ke mũ, ha vemnĩ. ¹⁸ Ëg Senhor ki kanhrãn ke hã to tar nỹtĩmĩ. Ti tỹ ãg tar han mũ tag hã ve sórmnĩ, ãg kren han tĩ tỹ Jesus Cristo ti. Ti hã mũ ãg tóg vỹ há han ke mũ, ãri, kar kỹ kanhkã tá ke gé, kỹ tóg tũ' henh ke tũ pẽ nĩ. Amém.

JOÃO TỠ CARTA HAN VÉN

Topě vř

¹ Topě tỠ ver nén kar han tůg ki tóg nř nř, Topě vř ti, hř vř: Jesus Cristo, he mũ. Topě tỠ Jesus mré nén ũ kar hyn han kỠ tóg rřr nř, Topě vř ti. SỠ ajag mỠ Jesus Cristo tag křmén ke vř. Mě inh, ti vř ti. Ti ve inh ke gé, inh kaně tỠ. Ti ki inh ěvřnh, ti vóg inh, inh nřgě tỠ. ² Ěg rřnrřn tř ěn vř vřnh ven, hř kỠ sóg ti vé. Ti hř tó sóg tř, hř kỠ sóg ajag mỠ ti křmén mũ. Ā tỠ nén kar han tůg ki tóg kř nř nř, ũ tỠ ti han ja tũ hř ra. Ěn kř tóg Ā panh mré nř ja nř sir. Hř ra tóg ěg mỠ vřnh ven. ³ KỠ sóg ti vé. Ti vř mẽ sóg ke gé. Hř kỠ sóg ajag mỠ ti křmén mũ ha, ajag tỠ inh mré ti ki kanhrřn jé. Ěg jóg tỠ Topě mré ke vř tỠ ěg nřtř, ti kósin tỠ Jesus Cristo mré ke ke gé, kỠ ěg tóg tỠ jagně mré ke nřtř gé. ⁴ Ājag mỠ sóg tag rán kỠ jěně sór mũ, ti tỠ ajag mỠ sér tř jé, ajag mỠ há třvř tř jé ke gé.

Topě vř jěngrě ri ke nř

⁵ Ha vé, ti tỠ ěg mỠ nén tó mũn hř vř, ha mẽ. Ti vř mẽ kỠ sóg ajag mỠ tó sór mũ, ha mẽ. Topě vř jykre kuryj nř, hř kỠ tóg kurř ri ke nř, jěngrě ri ke, ki kuty tũ pě ti nř, Topě ti.

⁶ KỠ, ěg tỠ: “ti mré ke vř tỠ inh nř,” hen kỠ ěg tóg kuty ki vřnh jykre kóreg ěn han ke tũ nř, ke tũ ra ěg ón kỠ: “ti mré ke vř tỠ inh nř,” he tř. Vřnh ó vř sir. KỠ ěg tóg ón kỠ nén ũ kar han tř gé. ⁷ Ěg tỠ ti kóm kurř ki vřnh jykre há ěn han kỠ ěg tóg jagně to há nřtř. Jagně mré ke vř tỠ ěg nřtř, ěg tỠ vřnh jykre há han kỠ. KỠ ti kósin tỠ Jesus vř ěg kỠkřnh ke mũ sir, Ā kyvénh tỠ, ěg tỠ ti vř mranh ja (hř) ra.

⁸ Ŭ tóg kejě: “inh pi(jé) Topě vř mranh tř,” he sór mũ. Ti ón vř. Hř ra tóg ti hř mỠ tỠ vřnh vř há mẽ tř, ti ón mũ ti. ⁹ Ěg tỠ Topě vř mranh kỠ ěg tóg ti mỠ tónh ke mũ. “Ā vř mranh inh, tag han kỠ,” he jé ěg tóg ke mũ. KỠ tóg ěg mỠ vřnh pãte fón ke mũ sir. Tag tó ja ti nř, kỠ tóg han ke mũ. Kuryj ti nř mỠr. KỠ tóg ěg kỠkřnh ke mũ sir, ěg jykre pãno tỠ tůg' he jé. ¹⁰ Ěg tỠ: “inh pi(jé) ti vř mranh ja nřgtř,” hen kỠ ěg tóg Topě to: “ti ón vř,” he mũ. KỠ ěg pi(jé) ti vř ki kanhrřn há nřtř'.

2

Jesus vř ěg tar han ke mũ

¹ Inh krě, sỠ tag rán vř ajag mỠ, ajag tỠ ti vř mranh sór tũ nř jé. Kejě ajag křmř ũ tóg Topě vř mranh tř hř ra. KỠ ũ tóg ti jagfy vřnh ke mũ ha, ěg jóg tỠ Topě mỠ, hř vř: Jesus Cristo, he mũ, ũn jykre kuryj jě ěn ti. ² Ti hř tóg ũ tỠ ti tén ke mũ ag mỠ vřnh fěg', ti tỠ ěg jagfy ter jé, ti tỠ ěg tỠ Topě vř mranh tỠ tũ' hen jé. Hř kỠ tóg ěg mỠ vřnh pãte fón sór mũ. Hř ra tóg ěg třvř mỠ vřnh pãte fón sór tũ nř. Ěprř ke kar mỠ ke vř, mỠr'.

³ Ha vé, ěg tỠ Topě vř kri fi kỠ ěg tóg vřso: “vřhř inh ti ki kanhró nř,” henh ke mũ. ⁴ Ŭ tóg kejě: “ti ki kanhró sóg nř,” he tř. Hř ra tóg ti tỠ ěg mỠ nén tó ja ěn han tũ nřgtř. Ti ón vř. Ti pi(jé) Topě tỠ ki hř tó mũ ki kanhró nř'. ⁵ Ěg tỠ hř ra Jesus vř kri fi kỠ ěg tóg Topě to há nřtř. KỠ ěg tóg ti to há třvř nřtř ha ke gé. Tag han kỠ ěg tóg ti ki kanhrřn mũ, kỠ ěg tóg ti ki ge kỠ nřtř ha, ha mẽ. ⁶ Ŭ tóg ti to: “ti ki sóg rř kỠ jě,” he tř. KỠ tóg ti jykre han křn mũ sir. Jesus Cristo tỠ nén han ja han křn tóg mũ. KỠ tóg ti ki rř kỠ jě sir.

Ěg tỠ jagně to há nřtřnh ke

⁷ Ājag to sóg há třvř nř. Inh pi(jé) ajag mỠ nén ũ tãg rán sór mũ'. Nén ũ si rán sór inh mũ, ha mẽ. VřsỠ Topě tóg ěg jyvěn ja nřgtř, ěg tỠ jagně to há nřtř jé. Cristo mur tůg ki tóg ěg mỠ tag tó ja nřgtř, kỠ ajag tóg vřsỠ mẽ ja nřgtř gé. ⁸ Hř ra tóg tãg nř gé, sỠ ajag mỠ rán mũ tag ti. Cristo vř ěg mỠ tó mřn ja nř, ěg tỠ jagně to há nřtř jé, kỠ tóg ki króm ja nř, kỠ ěg tóg ti nón ki króm sór mũ gé. Ki hř tó ja ti nř, kỠ tóg nén ũ tãg ri ke nř, Cristo tỠ Topě nón tó mřn kỠ. Ha vé, koměr hř tóg kurřg tř. Kurř křtřg kỠ ti kuty tỠ tůg' he tř, koměr hř. Jesus tỠ ěg mỠ: “jagně to há nřtřmřnř,” he to ken hř vř, hř vř: kurř, he mũ.

⁹ Ū tóg kejĕn: “inh hĕn kurā mĭ tĭg mŭ ha,” he tĭ, hā ra tóg ā régre to jŭ nĭ, ā irmāo to. Ĕn vĭ kuty mĭ tĭ nĭ ver. ¹⁰ Ū tĭ ā régre to há nĭ ĕn hā vĭ kurā mĭ tĭg ke mŭ. Ĕn vĭ ā régre tĭ prānh ke han ke tŭ pĕ nĭ. ¹¹ Ū tĭ ā régre to jŭ nĭ ĕn vĭ kuty mĭ tĭ mŭ. Kuty to vĕnh jykre han kĭ tóg jĕ nĭ ver. Kĭ tóg ā tĭ hĕ ra tĭg ke tag ki kagtĭg nĭ gé. Kyvó ri ke ti nĭ, ti tĭ kuty mĭ tĭn kĭ.

¹² Inh krĕ, sĭ ājag mĭ rán vĕ. Ājag tĭ Topĕ vĭ mranh ja ĕn vĭ vĕnh pāte fón kĭ nĭ nĭ, Jesus Cristo tugrĭn. ¹³ Ājag kāmĭ ke ũ vĭ sanh há nĕtĭ. Sĭ ājag mĭ rán vĕ gé. Ū tĭ ā tĭ nĕn kar han mŭ to hā kā nĭ ĕn ki kanhró ājag tóg nĕtĭ. Ājag kāmĭ ke ũ vĭ kyrŭ nĕtĭ. Sĭ ājag mĭ rán vĕ gé. Nĕn-Kórég vĭ ājag tĭ hĕ ri ke ja tŭ nĭgtĭ.

¹⁴ Inh krĕ, sĭ ājag mĭ rán vĕ. Ĕg jóg mág ki kanhró ājag tóg nĕtĭ. Ājag kāmĭ ke ũ vĭ sanh há nĕtĭ. Sĭ ājag mĭ rán vĕ. Ū tĭ ā tĭ nĕn kar han mŭ to hā kā nĭ ĕn ki kanhró ājag tóg nĕtĭ. Ājag kāmĭ ke ũ vĭ kyrŭ nĕtĭ. Sĭ ājag mĭ rán vĕ. Tar ājag nĕtĭ. Topĕ vĭ ki kanhró ājag tóg nĕtĭ. Nĕn-Kórég vĭ ājag tĭ hĕ ri ke ja tŭ nĭgtĭ.

¹⁵ Ĕg tĭ tag ki nĕn ũ kórég vĕg mŭ tag ki vĕ'ĭ sór tŭg nĭ, tag ki vĕnh jykre ki vĕ'ĭ sór tŭg nĭ gé. Ĕg tĭ tag to há nĕtĭn kĭ ĕg tóg ĕg jóg mág to há tŭ nĕtĭ. ¹⁶ Ĕprā vĕnh jykre pi(jé) tĭ Topĕ jykre nĭ'. Ĕprā vĕnh jykre hā vĕ, ha mĕ: nĕn ũ kar to ĕn ĕg tóg tĭ. Ĕg tĭ nĕn ũ ve kĭ ĕg tóg ĕn mǎn sór tĭ. Kĭ ĕg tóg: “ŭn mág vĭ tĭ inh nĭ, isŭ to, isĭ nĕn ũ kar to,” he tĭ gé. Topĕ jykre pijé'. Ĕprā vĕnh jykre hā vĕ. ¹⁷ Hā ra tóg kǎnhmar tŭ' hĕnh ke mŭ, ĕg tĭ nĕn vĕg mŭ tag ti, ti tŭg kĭ ĕg tĭ ne to ĕn ke tóg tŭ tĭ gé. Ū tĭ Topĕ vĭ han tĭ ĕn vĭ tŭ' hĕnh ke tŭ nĭ jāvó.

Ū tĭ Cristo kato tĕ

¹⁸ Inh krĕ', kurā tĭ ĕgno vĭ kakó tĭ ha. Kurā ĕn kakó nĭn kĭ Cristo kato tĕ pĕ ĕn vĕnh ven ke mŭ. Tag mĕ ājag huri. Hā ra ag tóg hur vĕnh vinven, ũ tĭ ti kato tĕ mŭ tĭ hĕn ri ke ag. Hā ki ĕg ki kanhró nĕtĭ, kurā tĭ ĕgno kakó nĭ ti. ¹⁹ Ĕg mré ke ag vĕ vĕ, ũ tĭ ti kato tĕ mŭ tag ag, hā ra ag tóg ón kĭ tĭ ĕg mré ke ja nĕtĭgtĭ. Ag tĭ tĭ ĕg mré ke pĕ nĕtĭ ra ag tóg ver ĕg mré mŭnh ke mŭ vĕ. Hā ra ag tóg ti tovānh kĭ ti kato tĕ mŭ ha. Hā ki tóg ve há tĭ, ag tĭ tĭ ĕg mré ke tŭ nĕtĭ ti.

²⁰ Ājag kar vĭ vĕnh vĭ há ki kanhró nĕtĭ. Jagrĕ ājag nĕtĭ, ũn jykre há ĕn kuprĭg tĭ, hā kĭ ājag tóg ki kanhró nĕtĭ. ²¹ Hā kĭ sóg ājag mĭ rán mŭ, ājag tĭ ki kanhró nĕtĭn kĭ. Ājag pi(jé) ki kagtĭg nĕtĭ'. Ū tĭ vĕnh vĭ há tó mŭ ĕn pi(jé) ón tĭ'.

²² Kĭ ũn nĭ hĕn ón tĭ'? Ū tĭ ge vĭ ón pĕ han tĭ, ha mĕ: ũ tóg Jesus to: “ti pi(jé) tĭ Cristo nĭ’,” he tĭ. “Topĕ tĭ ti jĕnĕ pijé', Topĕ kósin pijé',” he ag tóg tĭ gé, Jesus to. Ū tĭ Cristo kato tĕ mŭn hā vĕ. Ĕg jóg to ag tóg ón tĭ, ti kósin to ke gé. ²³ Ū tĭ Jesus to: “ti pi(jé) tĭ Topĕ kósin nĭ’,” ĕn kĭ tóg ĕg jóg mág ki kagtĭg nĭ gé. Kĭ ũ tĭ Jesus to: “Topĕ kósin vĭ tĭ ti nĭ,” ĕn kĭ tóg ĕg jóg mág ti ki kanhró nĭ gé.

²⁴ Vāsĭ ājag tóg ti vĭ mĕ vén. Ĕn kā jatu tŭg nĭ, ĕn hā mĭ ĕkrén nĭ. Ājag tĭ tag to tar nĕtĭn kĭ ājag tóg Topĕ kósin ki ge kĭ nĕtĭ, ti panh ki ke gé. Hā kĭ ājag tĭ nĕn mĕ vén ja ĕn tovānh tŭg nĭ. ²⁵ Ti hā vĭ ĕg mĭ tó ja nĭ, ĕg tĭ ĕg rĭr krĭg ja tŭ venh ke ti.

²⁶ Ū ag tóg ājag krĭn kónān sór mŭ, ājag mĭ ón kĭ, ti vĭ tó kĭ. Hā kĭ sóg ājag mĭ vĕnh rán tag han mŭ. ²⁷ Hā ra ājag tóg jagrĕ nĕtĭ, Topĕ kuprĭg tĭ. Kĭ tóg ājag kanhrān mŭ sir, Topĕ kuprĭg ti. Ti hā vĭ ĕg kanhrān tĭ, kĭ ũ vĭ ĕg kanhrān mǎn ke tŭ nĭ ha. Nĕn kar kāmĕn ti tĭ, ĕg mĭ, ĕg jagrĕ ti. Vĕnh vĭ há há tó ti tĭ. Ti pi(jé) ón tĭ'. Ti tĭ ājag mĭ tó mŭ ĕn hā mĭ mŭmnĭ, ti tĭ ājag mĭ: “Jesus hā ki ge kĭ nĕtĭmnĭ,” ĕn kĭ.

²⁸ Inh krĕ', ti ki ge kĭ nĕtĭmnĭ. Kĭ tóg há tĭ. Kǎnhmar ti kātĭg ke mŭ, kǎnhmar ti vĕnh ven ke mŭ. Kĭ ĕg tóg mĭ'āg ke tŭ nĭ, ti kātĭg kĭ, ĕg tĭ ti ki ge kĭ nĕtĭn kĭ. Ĕg mĭ'āg kĭ ĕg tóg ti kātĭg kĭ vĕnh pigju sór mŭ. Hā kĭ ke tŭg nĭ. ²⁹ Ti hā ne vĕnh jykre kuryj hā mĭ tĭg ja nĭgtĭ'. Kĭ ũ tĭ vĕnh jykre kuryj han mŭ vĭ tĭ ki kósin nĭ. Tag mĭ ĕkrén.

¹ Ha vé, ãg jóg mág tóg ãg to há täví nĩ, hã ký tóg ãg to: “inh krẽ,” he mũ sir. Ti krẽ vỹ tỹ ãg nỹtĩ, Jesus jãvy. Hã ký ãprã ke ù ag vỹ ãg jykre ki kagtĩg nỹtĩ. Ag pi(jé) Topẽ ki kanhró nỹtĩ', hã ký ag tóg ãg jykre ki kagtĩg nỹtĩ gé, ãg tỹ tỹ ti krẽ nỹtĩn ký. ² Ājag to inh há täví nĩ. Ūri ãg tóg tỹ Topẽ krẽ nỹtĩ. Kãnhmar ãg tóg ti mré nỹtĩnh mũnh mũ. Ký ãg hỹn hẽ ri ke nỹtĩnh mũ, kanhkã tá? Ha'. Kar ký ãg venh ke mũ, ti kãtĩg kar ký. Ēn kã ãg tóg tỹ ti hã pẽ nỹtĩnh mũ, ãg tỹ ãg kanẽ tỹ ti ve ký. Ti ve pẽ han jé ãg tóg (ke) mũ, kurã ěn kã. ³ Ēg tỹ tag hã ve sór vẽ. Hã ký ãg vẽn ĵãnhkriq ke mũ, ãg tỹ ti ĵãnhkri nĩ ěn ri ke nỹtĩ jé, vẽn jykre pãno tovãnh kã ký.

⁴ Ēg tỹ ti vĩ mranh ký ãg tóg mranh mũ sir, ti tỹ ãg mỹ nén tó ja ti. Hỹ, mranh ký ãg tóg mranh tĩ, ti tỹ ãg jyvẽn ja ti. ⁵ Hã ra Cristo vỹ kãtĩg ja nĩ, ti tỹ ãg tỹ ti vĩ mranh ja tỹ tũg' he jé. Tag ki kanhró ãg tóg nỹtĩ. Ti pi(jé) mranh ja nĩgtĩ', Topẽ vĩ ti, inhhã. ⁶ Ēg tỹ ti ki ge ký nỹtĩn ký ãg tóg mranh mãn sór tũ nĩ ha. Ū tỹ ver mranh mãn sór ký tóg ti ve ja tũ nĩ, ti ki kagtĩg nĩ sir.

⁷ Inh krẽ', ker ù vĩ jẽmẽ hẽ', ù tỹ ājag krĩn kónãn sór mũ vĩ ti. Ū tỹ vẽn jykre kuryj han mũ ěn hã vỹ kuryj nĩ, Topẽ kuryj nĩ ěn ri ke. ⁸ Ū tỹ Topẽ vĩ mranh mũ ěn vỹ tỹ Japo mré ke nĩ. Japo hã ne Topẽ vĩ mranh tĩgtĩ'. Topẽ tỹ nén ù kar han mũ ěn kã Japo ne ti vĩ mranh vén', ký tóg ūri ti vĩ mranh tĩ nĩ gé. Hã ra Topẽ kósin vỹ Japo tỹ nén han mũ kókén ja nĩ, hã jé tóg mur ja nĩ.

⁹ Ēg tỹ tỹ Topẽ krẽ nỹtĩn ký ãg tóg Topẽ vĩ mranh mãn sór vãnh nỹtĩ ha, ãg tỹ Topẽ kuprĩg tỹ jagrẽ nỹtĩn ký. Topẽ vĩ mranh mãn sór ke tũ ãg nĩ ha, ãg tỹ tỹ ti krẽ nỹtĩn ký. ¹⁰ Ēg tỹ ag jykre tugnỹm ký ãg tóg ù tỹ tỹ Topẽ krẽ mré Japo krẽ ki kanhró nỹtĩ. Ū tỹ vẽn jykre kuryj han jãvãnh ěn pi(jé) tỹ Topẽ krẽ nỹtĩ', ù tỹ ã régre to há tũ nĩ ěn pi(jé) tỹ Topẽ krẽ nỹtĩ gé'.

Ēg tỹ jagnẽ to há nỹtĩnh ke

¹¹ Tag mẽ ājag tóg, ājag tỹ Topẽ vĩ mẽ vén ký, hã vỹ: “jagnẽ to há nỹtĩmnĩ,” he mũ. ¹² Ēg pi(jé) Caim jykre han ke mũ'. Satanás mré ke ja vẽ, Caim ti, hã ký tóg ã jãvy tén. Ne nỹ hỹn ti jũ han, ký tóg ti tãnh? Jykre kórég ja ti nĩ, jãvo ti jãvy vỹ jykre há ja nĩ. Hã ký tóg ã jãvy tãnh, ti jykre há ěn to. Hã ký jagnẽ jykre véq mũ ra jagnẽ to jũ tũg nĩ.

¹³ Inh kanhkã', ù tỹ Topẽ ki rã tũ ag pi(jé) ãg to há nỹtĩnh mũ'. Tag jé ājag mỹ kórég nỹ tũg hã ra. ¹⁴ Ha vé, jykre tãg ãg nỹtĩ, ký ãg tóg ãg rĩr krỹg ja tũ venh ke mũ. Ēg jykre si tovãnh ãg huri. Tag ki kanhró ãg nỹtĩ, ãg tỹ ù tỹ ãg mré ti ki rã ký nỹtĩ kar ag to há nỹtĩn ký. Ū tỹ ãg mré Jesus ki rã mũ to há tũ nĩ ěn vỹ venh ke tũ nĩ, ãg rĩr krỹg ja tũ ti. ¹⁵ Ēg tỹ ù to kórég tĩ nĩn ký ãg ti tén ri ke han huri. Ký ãg tỹ ù tén ký ãg pi(jé) ãg rĩr krỹg ja tũ venh ke mũ', tag ki kanhró ājag nỹtĩ. ¹⁶ Cristo vỹ ãg tỹ jagnẽ to há nĩ tag tỹ ãg kanhrãn. Vẽn fẽg tóg, ù tỹ ti tén ke mũ ag mỹ, ti tỹ ãg jagfy ter jé. Hã ký ãg tóg ãg mré ke jagfy ter ke tag to tar nỹtĩnh ke mũ gé, ù tỹ ag jagfy ãg tén sór ký. ¹⁷ Ha vé, ù tóg tag ki nén ù mág véq tĩ. Jãvo ti mré Jesus ki rã ký nĩ ù tóg tỹ nén ù tũ nĩ. Hã ra tóg ti jagãgtãn sór tũ nĩ. Ēn vỹ Topẽ to há tũ nĩ gé.

Kanẽ jur ke tũ ãg nĩ

¹⁸ Inh krẽ', ājag vĩ täví tỹ jagnẽ to há nỹtĩ tũg nĩ, krĩg mỹ. Jagnẽ ki rĩrmnĩ. Jagnẽ to há täví nỹtĩ to ken hã vẽ. ¹⁹ Ký ãg tóg ki kanhró nỹtĩ, ãg tỹ tỹ ù tỹ ki hã tó mũ ěn krẽ nỹtĩn ký. Ký Topẽ tóg ãg kanẽ jun mãn ke tũ nĩ ha. Jatu ãg nỹtĩ ha, ãg tỹ jagnẽ to ha pẽ nỹtĩn ký. ²⁰ Kejẽn ãg tóg ãg kygnẽ ja to ěkrég tĩ. Hã ra Topẽ tóg ki kanhró kar nĩ. Ēg kãfór tóg nĩ, Topẽ ti, hã ký tóg kãnhmar ãg vóg kónãn ke tũ nĩ. ²¹ Inh krẽ', kejẽn ãg tóg Topẽ jykre ki króm há han tĩ. Ký ãg tóg: “inh hỹn kygnẽ ja tũ nĩ,” he tĩ. Ký ãg tóg jatun mỹ Topẽ mré vēmén tĩ sir. ²² Ký tóg ãg mỹ nĩm ke mũ, ãg tỹ ti mỹ nén to vĩ mũ ti. Ti tỹ ãg mỹ nén tó mũ ěn hã han ãg tóg tĩ, nén tỹ ti mỹ há nĩ hã ki króm ãg tóg tĩ, hã ký ãg tóg jatun mỹ ti mỹ nén ù to vĩ tĩ. ²³ Ti tỹ ãg mỹ nén tó mũn hã vẽ, ha mẽ: “inh kósin tỹ Jesus Cristo ki gemnĩ, ký jagnẽ to há nỹtĩmnĩ,” he ja ti nĩ ãg mỹ. Ēg tỹ tag han mũ hã ve sór ti mũ. ²⁴ Ēg

tỹ ti vĩ ki króm kỹ ẽg tóg sir ti ki ge kỹ nỹtĩ. Kỹ Topẽ tóg tỹ ẽg mré ke nĩ sir. Ẫ kuprĩg jẽnẽ ja tóg nĩ ẽg mỹ, kỹ ti kuprĩg tóg ẽg mỹ tó tĩ, Topẽ tỹ tỹ ẽg mré ke nĩ ti.

4

Topẽ kato tẽ mũ ag kuprĩg ti

¹ Ẫjag to há tãvĩ sóg nĩ, ha mẽ. Kãnhmar ù vĩ jẽmẽ sór tũg nĩ, ti tỹ: “Topẽ kuprĩg vĩ tỹ inh jagrẽ nĩ,” he mũ ra. Komẽr hã ti vĩ tugnỹm, ẵjag tỹ ve jé, ti tỹ Topẽ kuprĩg tỹ jagrẽ nĩ ti. Ón kỹ Topẽ vĩ tó tĩ ag vĩ mũ mũgtĩ, ù tỹ hẽn ri ke ag, ha mẽ. ² Û tỹ Topẽ kuprĩg tỹ jagrẽ nĩ ẽn vĩ tag tó tĩ, ha mẽ: “Jesus Cristo ti, Topẽ kósin ti vĩ ẽg ri ke han kỹ mur ja nĩ,” he ti tĩ, ù tỹ Topẽ ki rã kỹ jẽ ti. ³ Û tỹ Jesus to tag tó tũ nĩn kỹ tóg Topẽ kuprĩg tỹ jagrẽ tũ nĩ. Cristo kato tẽ tĩ ẽn kuprĩg tỹ tóg jagrẽ nĩ, ha mẽ. Ẽn vĩ vẽnh ven ke mũ, ù tỹ ti kato tẽ mũ ti. Tag mẽ ẵjag huri. Hã ra tóg hur jun, kỹ tóg mũ tĩ ha.

⁴ Inh krẽ', Topẽ tũ vĩ tỹ ẵjag nỹtĩ. Ón kỹ Topẽ vĩ tó tĩ ag fĩn rãm ẵjag huri. Ha vé, Topẽ kuprĩg tỹ ẽg jagrẽ vĩ ag jagrẽ kãfór nĩ. Hã kỹ ẽg tóg ẽg kato tẽ ag fĩn rãm kãn huri. ⁵ Topẽ ki rã tũ ag vẽ, hã kỹ ag tóg ù tỹ Topẽ ki ge tũ ag jykre tó tĩ, kỹ ù tỹ Topẽ ki ge tũ ag vĩ ag vĩ jẽmẽg tĩ. ⁶ Ag jãvo ẽg tóg tỹ Topẽ tũ nỹtĩ. Kỹ ù tỹ Topẽ ki kanhró nĩ ẽn vĩ ẽg vĩ mẽnh mũ. Ti tũ tũ ag vĩ ẽg vĩ mẽ sór tũ nỹtĩ. Hã ki ẽg tóg ki kanhró nỹtĩ, vẽnh jagrẽ tỹ vẽnh vĩ há tó mũ ti, vẽnh jagrẽ tỹ ag tỹ kygnẽ han tĩ ẽn ti ke gé.

Topẽ vĩ ẽg to há nĩ vén

⁷ Ẫjag to sóg há tãvĩ nĩ, ha mẽ. Jagnẽ to há nỹtĩmĩ. Ẽg tỹ jagnẽ to há nỹtĩn kỹ ẽg tóg Topẽ jykre han tĩ. Ti hã vĩ ẽg to há nĩ vén. Ẽg tỹ jagnẽ to há nỹtĩn kỹ ẽg tóg tỹ Topẽ krẽ nỹtĩ, Jesus jãvy, kỹ ẽg tóg Topẽ ki kanhró nỹtĩ gé. ⁸ Ẽg tỹ jagnẽ to há tũ nỹtĩn kỹ ẽg tóg Topẽ ki kagtĩg nỹtĩ, kỹ ẽg ti ki rã ja tũ nĩ. Topẽ jykre vẽ, hã vĩ: ẽg to há, he mũ, ti tỹ ẽg to há nĩ sór nĩn kỹ. Hã kỹ ẽg tóg jagnẽ to há nỹtĩnh ke mũ gé. ⁹ Tag to ẽg tóg ki kanhró nỹtĩ, Topẽ tỹ ẽg to há nĩn ki, ha mẽ: ẵ kósin pir jẽnẽ ja tóg nĩgtĩ, Topẽ ti, ti tỹ ga kri mur jé, ẽg tỹ ti kósin tugrĩn rĩr krỹg ja tũ ẽn ve jé. ¹⁰ Ẽg pi(jé) ti to há nỹtĩ ja nĩgtĩ'. Ti hã ne ẽg to há nĩ vén', hã kỹ tóg ẵ kósin jẽnẽ, ti tỹ ẽg jagfỹ ter jé, ti tỹ ẽg tỹ ti vĩ mranh tỹ tũg' he jé. Ti tỹ ẽg to há nĩn hã vẽ.

¹¹ Ha vé, inh krẽ', Topẽ vĩ ẽg to há tãvĩ nĩ. Hã kỹ tóg há nĩ gé, ẽg tỹ jagnẽ to há nỹtĩn kỹ. ¹² Û pi(jé) Topẽ vég tĩ'. Ẽg tỹ jagnẽ to há nỹtĩn kỹ tóg hã ra ẽg ki ẽmãn mũ ha, Topẽ ti. Kỹ ẽg tóg ti to há tãvĩ nỹtĩnh mũ gé sir, ẽg tỹ jagnẽ to há nỹtĩn kỹ.

¹³ Topẽ vĩ ẵ kuprĩg tỹ ẽg jagrẽ han. Ẽg jagrẽ tag to ẽg tóg ti tỹ ẽg ki ẽmãn mũ tag ki kanhró nỹtĩ, ẽg tỹ ti ki ge kỹ nỹtĩ tag ti ke gé. ¹⁴ Topẽ vĩ ẵ kósin jẽnẽ, ti tỹ ga kri mur jé, ti tỹ ẽg kren han jé. Tag ve sóg, hã kỹ sóg tó mũ. ¹⁵ Û tóg Jesus to: “Topẽ kósin vẽ,” he tĩ. Topẽ vĩ ti kãkã ẽmã nĩ, ù tỹ tag tó mũ ẽn kãkã, kỹ tóg Topẽ ki rã kỹ jẽ nĩ gé. ¹⁶ Topẽ vĩ ẽg to há nĩ, tag ki kanhró ẽg tóg nỹtĩ. Kỹ ẽg tóg ti vĩ kri fig mũ gé, ti tỹ ẽg mỹ: “ẵjag to sóg há nĩ,” hen kỹ.

Topẽ vĩ ẽg to há nĩ. Kỹ, ẽg tỹ ti to há nỹtĩn kỹ ẽg tóg ti ki ge kỹ nỹtĩ, kỹ Topẽ vĩ ẽg ki ẽmãn ha. ¹⁷ Topẽ vĩ ẽg tar han sór mũ, ẽg tỹ ti to há tãvĩ nỹtĩn jé. Ẽg tỹ ti to há nỹtĩ ki kygnẽg tũ nĩn kỹ ẽg tóg kurã ẽn kã kanẽ jur ke tũ nĩ, ti tỹ ẽg jykre tugnỹm ke kurã ẽn kã. Cristo tỹ ga kri tĩg kỹ nẽn han mũ ẽn ri ke han jé ẽg tóg (ke) mũ, hã kỹ ẽg tóg kanẽ jur ke tũ nĩ. ¹⁸ Ẽg tỹ Topẽ to há nỹtĩn kỹ ẽg kanẽ jur ke tũ pẽ nĩ. Ha vé, ẽg tỹ Topẽ to há nỹtĩn kỹ kygnẽg tũ nỹtĩn kỹ ẽg tóg mũmẽg ki kagtĩg nỹtĩ gé. Topẽ tỹ ẽg vóg kónãn ke to ẽg tóg ti kamẽg ke mũ. Ẽg mũmẽg vĩ ẽg vẽnỹrenh han mũ.

¹⁹ Ti hã vĩ ẽg to há nĩ vén inhhã, hã kỹ ẽg tóg ùri ti to há nỹtĩ ha. ²⁰ Û tóg kejẽn: “Topẽ to sóg há nĩ,” he tĩ. Hã ra tóg ù tỹ ẽg mré Jesus ki rã kỹ jẽ to kórég nĩ. Ti ón vẽ. Ẽg régre mré ẽg mũgtĩ, gan kri. Ẽg tỹ ẽg régre to há tũ nỹtĩn kỹ ẽg hỹn hẽ ri kenh ke mũ, ẽg tỹ Topẽ to há nỹtĩ jé, ẽg tỹ ùn vég tũ ẽn to? Ẽg tỹ ẽg régre to há tãvĩ nỹtĩn kỹ, hã kỹ ẽg tóg Topẽ to há nỹtĩ gé. ²¹ Tag tó ja tĩ nĩ, ẽg mỹ, ẽg tỹ ti vĩ ki króm jé, Topẽ ti, ha mẽ: “ẵjag tỹ Topẽ to há nĩ sór kỹ ẵjag régre to há nỹtĩmĩ gé,” he ja ti nĩ.

5

Û tỹ Jesus ki rã tũ ag jykre fĩn rãm ãg huri

¹ ãg tỹ Jesus to: “Cristo vỹ tỹ ti nĩ, Topẽ kósin vỹ tỹ ti nĩ,” hen kỹ ãg tóg tỹ ti jãvy nỹtĩ. Kỹ ãg tỹ ãg jóg mág to há nỹtĩn kỹ ãg tóg ti krẽ ù ag to há nỹtĩnh ke mũ gé, ù tỹ ãg mré ti ki ge kỹ nỹtĩ ag to. ² ãg hỹn hẽ ri kenh ke mũ, ãg tỹ Jesus jãvy ù ag to há nỹtĩ jé? Topẽ to ãg há nỹtĩnh mũ, kỹ ãg tóg ti vĩ ki króm ke mũ gé. Jagnẽ to há to ken hã vẽ. ³ ãg tỹ Topẽ to há nỹtĩ sór kỹ ãg tóg ti vĩ ki króm ke mũ gé. Ti to há nĩ to ken hã vẽ. Ti vĩ pi(jé) kufy nĩ', ãg tỹ nén ki króm ke ti. ⁴ Jesus jãvy ag ne ù tỹ ti ki ge tũ ag jykre fĩn rãm tí'. ãg hỹn hẽ ri kenh mũ, ãg tỹ ti ki ge tũ ag jykre fĩn rãm jé? Topẽ ki rã jé ãg tóg ke mũ. ãg tỹ ti ki rã kỹ ãg tóg hur fĩn rãm. ⁵ ãg tỹ Jesus to: “Topẽ kósin vỹ tỹ ti nĩ,” hen kỹ ãg tóg fĩn rãm ke mũ, ù tỹ ti ki ge tũ ag jykren fĩn.

Jesus vỹ tỹ Topẽ kósin nĩ

⁶ Jesus Cristo tỹ ga kri tĩg kỹ tóg goj tỹ vẽn h kype kỹ jẽ, kỹ ti kyvẽn h tóg ti ki kãkutẽ gé, ti ter kỹ. Kỹ tóg nén ù régre han ja nĩ. Nén ù pir pijé'. Ti vẽn h kype tãvĩ pijé'. Ti vẽn h kype vỹ nĩ, kar kỹ ti kyvẽn h ti ke gé, ti tỹ ãg jagfy ter tag ti. Kỹ Topẽ kuprĩg vỹ ãg mũ ti kãmén tí gé. Ti pi(jé) ón tí', Topẽ kuprĩg ti. ⁷ Kỹ ãg ù tãgtũ tigrĩn ti tỹ tỹ Topẽ kósin nĩ ki kanhró nỹtĩ, ⁸ Topẽ kuprĩg tigrĩn, kar kỹ ti vẽn h kype ja tigrĩn, kar kỹ ti kyvẽn h tigrĩn ke gé, ti tỹ ãg jagfy ter kỹ. Nén ù pir hã tó ag tí ti to, hã vỹ: “Topẽ kósin vỹ tỹ ti nĩ,” he mũ.

⁹ ãprã ke ag tỹ ãg mũ nén ù tó kỹ ãg tóg ag vĩ kri fig tí. Topẽ vỹ ãprã ke ag vĩ kãfór nĩ, kỹ ti vỹ ki hã ke tãvĩ nĩ gé. Kỹ ù tỹ ãg mũ Topẽ kósin tó mũ vỹ tỹ Topẽ ti nĩ, hã kỹ tóg tỹ vẽn h vĩ há nĩ. ¹⁰ ãg tỹ Topẽ kósin ki rã kỹ ãg tóg ti ki kanhró nỹtĩ. Ti ki rã kỹ ãg tóg to jykren há han ke mũ. Topẽ hã vỹ ã kósin kãmén tí. ãg tỹ ti vỹ to: “vẽn h vĩ há vẽ,” he sór tũ nĩn kỹ ãg tóg ti to: “ti ón vẽ,” he mũ sir, ãg tỹ ti vỹ kri fi sór tũ nĩn kỹ. ¹¹ Tag tó ti tí, Topẽ ti, ha mẽ. “ãg tỹ rĩr krỹg ja tũ venh ke han jé sóg ke mũ. Inh kósin ter ja to ãg tóg rĩr krỹg ja tũ venh ke mũ,” he tóg, Topẽ ti. ¹² ãg tỹ ti kósin ki ge kỹ ãg tóg ãg rĩr krỹg ja tũ venh ke mũ. ãg tỹ jãvo ti ki ge tũ nĩn kỹ ãg tóg rĩr krỹg ja tũ venh ke tũ nĩ.

Topẽ vỹ ãg vỹ jẽmẽg tí

¹³ ãg tỹ hã ne Topẽ kósin ki ge kỹ nỹtĩ'. Kỹ ãg tóg ãg rĩr krỹg ja tũ venh ke mũ. Sỹ tag tó sór vẽ, ãg tỹ mũ, hã kỹ sóg rãn mũ. ¹⁴ ãg tỹ ti mré vẽn h jykre pir han kỹ ãg tóg jatun mũ ti mré vẽn h ke mũ gé. Kỹ ãg tóg ti mũ nén ù kar to vỹ tí. Nén tỹ ti mũ há nĩ ãn hã to vỹ jé ãg tóg ke mũ. ãg tỹ ti mũ nén tỹ ti mũ há nĩ ãn hã to vỹ kỹ tóg ãg vỹ mẽnh ke mũ sir. ¹⁵ Ti tỹ ãg vỹ mẽ kỹ tóg ãg mũ han ke mũ gé sir. ãn kã ti pi(jé) han ke tũ nĩ', ãg tỹ ti mũ nén to vỹ mũ ti.

¹⁶ Kejẽn ãg tóg ãg mré Jesus ki rã kỹ jẽ ù vэг tí, hã ra tóg Topẽ vỹ mranh mũ. Hã ra tóg Topẽ tovãnh sór tũ nĩ. Topẽ tovãnh sór tũ ra tóg kygnẽ kỹ mranh mũ, Topẽ vỹ ti. Kỹ ãg tóg Topẽ mré vẽn h ke mũ, ti to, kỹ Topẽ vỹ ti krĩn ke mũ, ti tỹ ti jykre kórég tovãnh jé, ti tỹ ãg rĩr krỹg ja tũ ve jé. ãg kãmĩ ù tóg kejẽn Topẽ tovãnh pẽ han mũ. ãn to sóg ãg tỹ mũ: “ti to Topẽ mré vẽn h,” he sór tũ nĩ. ¹⁷ ãg tỹ vẽn h jykre vẽn hmỹ sĩ han kỹ ãg tóg ti vỹ mranh tí. ãg tỹ sĩn kỹ mranh mũ ra tóg kórég nĩ, kỹ tóg hã ra ãg mũ vẽn h pãte fón sór mũ, kỹ ãg tóg ti tovãnh pẽ han ke tũ nĩ. ãg tỹ ti tovãnh pẽ han kỹ ãg nũgme ki vár ke mũ, infernon ki.

¹⁸ ãg tỹ tỹ Jesus jãvy nỹtĩn kỹ ãg tóg ti vỹ mranh mãn sór tũ nĩ. ãg jy nĩgãn ti tí, Topẽ kósin ti, Satanás tỹ ãg vóg tũ nĩ jé. ¹⁹ ãg hã ne tỹ Jesus jãvy nỹtĩ'. Tag ki kanhró ãg tóg nỹtĩ. Jãvo ãprã ke ù ag vỹ tỹ Satanás krẽm ke kar nỹtĩ.

²⁰ Topẽ kósin vỹ kãtĩg ja nĩgtĩ. Tag ki kanhró ãg tóg nỹtĩ. ãg nĩgrẽg róm tóg, ãg tỹ Topẽ ki kanhrãn jé, Topẽ pẽ ti. Ti ki ge kỹ ãg nỹtĩ, ãg tỹ ti kósin tỹ Jesus Cristo ki ge kỹ nỹtĩn kỹ. Ti hã vỹ tỹ Topẽ pẽ nĩ, Jesus Cristo panh tí. Ti hã vỹ ãg tỹ ãg rĩr krỹg ja tũ venh ke han tí.

²¹Inh krě', věnh kăggrá tỹ topě jykre han sór tũg nĩ. Hă vễ, sỹ ăjag mỹ nén rán sór mũ ti.

JOÃO TỠ CARTA HAN MÃN

¹ João kófa tỹ rá vễ. Isỹ fi mỹ rán hã vễ, Topễ tỹ fi kuprễg kỹ, fi krễ mỹ ke gé, hã vỹ: Topễ ki ge kỹ nỹtĩ kar, he mũ. Ājag to sóg há tãvĩ nĩ, ha mẽ. Kỹ ù tỹ vễnh vĩ há kri fig mũ kar vỹ ājag to há nỹtĩ gé inh mré. ² Vễnh vĩ há vỹ ẽg kākā nĩ nĩ, tovãnh ke tũ pễ ẽg tóg nĩ. Hã kỹ ẽg tóg jagnễ to há nỹtĩ.

³ Ễg jóg tỹ Topễ mré sóg vễmẻn tĩ, ti tỹ ājag jagãgtãn jẻ, ti tỹ ājag tar han jẻ, ti tỹ ājag krĩ kuprãg jẻ ke gé. Jesus Cristo mỹ sóg tag to vĩ tĩ gé, ẽg jóg mág kósin mỹ. Ti vĩ kri fig ẽg tóg tĩ, vễnh vĩ há kri, kỹ ẽg tóg jagnễ to há nỹtĩ gé.

Ễg tỹ jagnễ to há nỹtĩnh ke

⁴ Ā krễ kãmĩ ù vỹ vễnh vĩ há nẻn mũ mũ, jỹ, kỹ tóg inh mỹ sér pễ tĩ, sỹ tag mẽ kỹ. Ễg jóg tỹ ẽg mỹ nẻn tó ja ẻn han kãn sór ag nẻji mũ. ⁵ Kỹ sóg ã mỹ rán mũ, jỹ. Ā mỹ sóg: “jagnễ to há nỹtĩmĩ,” he mũ. Nẻn ù tãg pijẻ', sỹ ã mỹ nẻn rán mũ tag ti. Vã sỹ ẽg tóg tag mẽ, ẽg tỹ ti ki rã vẻn kỹ. ⁶ Ễg tỹ Topễ to há nỹtĩnh kỹ ẽg tóg Jesus tỹ ẽg mỹ nẻn tó ja ẻn han kãn ke mũ sir. Ti tỹ ẽg mỹ nẻn tó vẻn hã vễ, hã vỹ: “jagnễ to há nỹtĩmĩ,” he mũ.

Ủ ag tóg Jesus to ón tĩ

⁷ Ủ tỹ hẻn ri ke ag vỹ mĩ mũgtĩ, hã ra ag tóg Jesus Cristo to ón tĩ. Ti to ag tóg: “ti pi(jẻ) ẽg ri ke mur ja nĩ', ẻprã ke fi kósin pijẻ',” he tĩ. Ag ón vễ. Cristo kato tẻ ag vễ. ⁸ Vễnh ki rĩrmnĩ, ājag tỹ ag vĩ kri fig tũ nĩ jẻ, ājag rãnhrãj tỹ ājag mỹ tũ' he tũ nĩ jẻ. Vã sãn nĩ, ājag tỹ tá ti kaja ve jẻ, Topễ tỹ ẽg mỹ nẻn nĩm sór mũ ti.

⁹ Ủ tóg Cristo kãme pãtẻn sór mũ, ti vễme pãte tóg ù tó sór mũ. Ti tovãnh to ken hã vễ. Ủ tỹ ge pi(jẻ) Topễ ki rã kỹ jẻ ha'. Ễg tỹ Jesus kãme mĩ mũn kỹ ẽg tóg ẽg jóg mág ki rã kỹ nỹtĩ, ti kósin ki ke gé. ¹⁰ Kejẻn ù tóg ājag tá jun tĩ, hã ra tóg tag tó tũ nĩgtĩ. Kỹ ti mỹ: “inh mrẻ nĩnh kãtĩg,” he sór tũg nĩ gé. Ti mỹ: “Topễ vỹ ã ve há han,” he tũg nĩ gé. ¹¹ Ễg tỹ ù tỹ ge mỹ: “Topễ vỹ ã ve há han,” hen kỹ ẽg tóg ti jykre to: “há ti nĩ,” he mũ gé. Kỹ tóg ẽg tỹ ti mrẻ ón mũ ri ke nĩ sir, ẽg tỹ ti mỹ vĩ há han kỹ.

¹² Sỹ ājag mỹ nẻn rán sór mũ vỹ ver e tĩ, hã ra sóg rán kỹ jẻnẻ sór tũ nĩ. Sỹ ājag ki jun sór vễ, kỹ sóg ājag mỹ tó sór mũ, ājag mrẻ vễmẻn sór isóg mũ, ẽg tỹ jagnễ fe tỹ mrin ke jẻ.

¹³ Ā rẻgre fi krễ vỹ ã mĩ ẻkrẻg tĩ. Topễ tỹ ùn kuprễg mũ fi vễ. Hã vễ, sỹ ājag mỹ nẻn rán sór mũ ti.

JOÃO TỠ CARTA Ữ HAN MÃN

¹ João kófa tỹ rá vễ. Sỹ inh mré ke tỹ Gaio mỹ rán hã vễ. ² Ầ to sóg há tãvĩ nĩ. Hỹ, há tãvĩ sóg nĩ, ầ to. Ầ to sóg Topễ mré vễmén tĩ, ti tỹ ầ mỹ nén há kar nĩm jé, ầ kaga tũ nĩ jé ke gé. Topễ to tar ầ tóg jễ, tag ki kanhró, sóg nĩ.

³ Ầ mré ke ag tóg inh ki junjun, kỹ ag tóg inh mỹ tó, ầ tỹ vễnh vĩ há nón tĩ mũ ti, ầ tỹ to tar nĩ ti. Kỹ tóg inh mỹ sér pễ ti. ⁴ Inh krễ tỹ vễnh vĩ há nón mũn kỹ tóg inh mỹ sér tãvĩ tĩ, nén ữ tỹ inh mỹ sér nĩ kar kãfór, hã kỹ tóg inh mỹ sér tĩ, ầ tỹ vễnh vĩ há nón tĩg kỹ.

⁵ Ầ to sóg há tãvĩ nĩ, Gaio'. Ềg mré ke ag ki rĩr há han ầ tóg nĩgtĩ, ữ tỹ kór há tá kãmũ mũ ag mré hã. ⁶ Tag tó ag tóg tag ki, igreja krêm, ầ mré ke ag. Ag to há tãvĩ ầ nễji nĩ. Ag ki rĩr mãn nĩ gé, ag tỹ ầ ki junjun kỹ, kỹ ag mỹ nĩm nĩ, nén ữ tỹ ag mỹ tũ ền ti. ⁷ Topễ rãnrhãj han ag tóg tĩ. Jesus Cristo jyjy tó kỹ ag tóg hên ra mũgtĩ, kỹ ag tóg ữ tỹ ti ki ge kỹ nỹtĩ tũ ag tũ mãn vãnh nĩgtĩ. ⁸ Hã kỹ tóg há tĩ, ềg tỹ ữ tỹ ge ki rĩr há han kỹ, ềg mré ke ag. Ềg tỹ ag ki rĩr há han kỹ tóg ềg tỹ ag mré Topễ vĩ há tó mũ ri ke nĩ sir.

⁹ Ầ jamã tá igreja krêm vễnh mãn tĩ ag mỹ sóg vễnh rá jễnễ, hã ra Diótrefes vỹ inh vĩ mễ jãvãnh nĩ. Ag kri tỹ ừn mág jễ sór ti nĩ, Diótrefes ti. ¹⁰ Isỹ tá jun kỹ sóg ti mỹ tónh ke mũ, ti jykre pãno ti, vễnh kar rĩnve. Ồn kỹ tóg iso fэфэн tĩ. Hã ra tóg nén ữ kórég ữ han tĩ gé, hã kỹ tóg ềg mré ke ag tỹ ầjag tã junjun kỹ tóg ag mỹ: “inh mré nĩnh kãmũ jễg,” he vãnh nĩgtĩ. Kỹ tóg ữ ag tỹ ag mỹ: “inh mré nĩnh kãmũ jễg,” he sór mũ ra tóg ag tỹ ag mỹ vĩ há han kamềg tĩ gé. Ag mỹ tóg: “igreja krêm ầjag tóg rã mãn ke tũ nĩ ha,” he tĩ, ag tỹ ềg mré ke ag mỹ vĩ há han sór kỹ. Jykre kórég tãvĩ ti nĩ, Diótrefes ti. Hã kỹ sóg ti kato tễnh ke mũ, ha vemnĩ.

¹¹ Ti jãvo sóg ầ to há tãvĩ nĩ, Gaio'. Ừ tỹ nén ữ kórég han mũ ra ti kóm han sór tũg nĩ. Nén ữ há hã han sórmnĩ. Ềg tỹ nén ữ há kar han kỹ ềg tóg tỹ Topễ krễ nỹtĩ gé. Ừ tỹ ti kórég han mũ vỹ Topễ ki kagtĩg nĩ.

¹² Demétrio vỹ tỹ ừn jykre há nĩ, hã ra. Vễnh kar vỹ ti to vĩ há han tĩ. Ki hã ag tóg tó tĩ, ag tỹ ti to vĩ há han kỹ, hã kỹ sóg ag mré tó mũ gé. Isỹ vễnh vĩ há hã tó mũ ki kanhró ầ tóg nĩ.

¹³ Sỹ ầ mỹ nén rán sór mũ vỹ ver e tĩ, hã ra sóg rán kỹ jễnễ sór tũ nĩ. ¹⁴ Kãnhmar sóg ầ venh ke kãtĩg mũ. Kỹ ềg tóg jagnễ mré vễmén ke mũ.

¹⁵ Ầ jé jatun mỹ nĩ nĩ. Tag ki inh mré ầ to há nỹtĩ ag vỹ ầ mĩ ềkrég tĩ. Kỹ ầ jamã tá inh mré ke kar mỹ: “ầjag mĩ tóg ềkrég tĩ,” hemnĩ iso. Vyrmỹ ag mỹ tómnĩ, sỹ ag mĩ ềkrég mũ ti.

Hã vễ, sỹ ầ mỹ nén rán sór mũ ti.

JUDAS TŶ CARTA

¹Judas tŷ rá vĕ, Tiago jăvy ti. Jesus Cristo mŷ sóg rănhrăj tĭgtĭ. Isŷ ũ tŷ ěg jóg tŷ Topĕ tŷ kuprĕg ja ag mŷ rán hă vĕ, ti tŷ ũ to há ag mŷ. Ti tŷ ājag kuprĕg kŷ tóg ājag jy nĭgăn tĭ gé, Jesus Cristo tigrĭn. ²Topĕ mré sóg vĕmĕn tĭ, ti tŷ ājag jagăgtăn pĕ han jé, ti tŷ ājag krĭ kupră pĕ han jé, ti tŷ ājag tŷ jagnĕ to há tăvĭ han jé ke gé.

Ŭ tŷ Topĕ to un'ón mŷ ag

³Inh krĕ', ājag mŷ sóg Topĕ tŷ ěg kar kren han tag tónh ke nĭ vĕ, inh vĕnh rá tag ti ki. Hă ra văhă ũ ag tóg ājag krĭn kónăn sór mŷ ha, hă kŷ sóg ājag mŷ: "Topĕ ki ră to tar nŷtĭmnĭ," he mŷ. Topĕ tŷ ěg mŷ nĕn tó mŷ vŷ pir nĭ, hă vŷ: Topĕ jykre to tar nĭ, he mŷ. Ā tŷ ag kar mŷ tóg tag tó ja nĭ. Ŭ tŷ tag kato vĭ kŷ ti vĭ jĕmĕ sór tŷg nĭ. ⁴Ha vé, ũ ag tóg Topĕ to un'ón tĭ, ājag krĭn kónăn jé. Ŭn jykre păno ag vĕ, hă ra ag tóg jykre há nĭ ve nŷtĭ, hă kŷ ājag tóg ag vĭ kri fi sór mŷ. Hă ra ag tóg ón kŷ: "ěg jóg tŷ Topĕ vŷ ěg jagăgtăn mŷ, hă kŷ ěg jatun mŷ vĕnh jykre vĕnhmŷ kar han ke mŷ," he tĭ, ũ tŷ ājag krĭn kónăn mŷ ag. ěg Senhor tŷ Jesus Cristo to ag tóg: "ti vĭ han ke tŷ ěg nĭ," he tĭ. Ti hă ne tŷ ěg kri ke nĭ', Jesus ti. Hă ra ũ tŷ ti vĭ han sór tŷ ag tóg rán kŷ nŷtĭ gé. Văšŷ ag tóg ag to rán ja nĭgtĭ, Topĕ vĭ rán tĭ ag, kŷ ag tóg Topĕ tŷ ũ tŷ ge ag vóg kónăn ke mŷ ěn tó ja nĭgtĭ.

⁵Ha vé, văšŷ ěg Senhor vŷ ga tŷ Egito tá ā povo tŷ Israel mré kăkutĕ ja nĭgtĭ, ag tŷ ājag ga ra mŷ jé. Hă ra ag kămĭ ũ ag tóg ti vĭ kri fi vănh ja nŷtĭgtĭ. Hă kŷ Topĕ vŷ ag tŷ tŷg' he kăn, ũ tŷ ti vĭ kri fi jăvănh ja ag. Tag mĕ ājag huri. Ki kanhró ājag nŷtĭ. Hă ra sóg rán măn sór mŷ, ājag tŷ mĭ ěkrĕn jé.

⁶Kŷ kanhkă tăn ag vŷ ge ja nĭgtĭ gé. Ag kămĭ ũ ag tóg Topĕ tŷ ag mŷ nĕn nĭm ja ěn tovănh. Ājag jamă tovănh ag tóg. Kŷ Topĕ vŷ ag sigsé, kŷ tóg ěmă kuty tá ag vin han. Ag se vŷ tŷg' henh ke tŷ nĭ. Topĕ tŷ ěg kar jykre tugnŷm ke kură ěn kă tóg ag jykre tugnŷm ke mŷ gé.

⁷Kar kŷ cidade tŷ Sodoma mĭ ěkrĕn nĭ gé, cidade tŷ Gomorra mĭ ke gé, ti pĕnĭn ěmă kăsir mĭ ke gé. ěn tá ke ag ne vĕnh jykre păno tăvĭ han tĭ ja nĭgtĭ', kanhkă tăn ag ri ke. Jagnĕ mré nŷ kónăn tăvĭ han ja ag tóg nĭgtĭ, kŷ ag tóg ũ ag to ěn ja nĭgtĭ gé, ag mré ke tŷ ag, ũn grĕ tŷ ũn grĕ ũ mré nŷ sór kŷ. Kŷ Topĕ vŷ pĭ nhyr vănh ki ag văm ja nĭgtĭ, ěg tŷ ag to jykren kŷ to ki kanhró nŷtĭ jé.

⁸Kŷ ũ tŷ Topĕ to ón mŷ ag vŷ vĕnh jykre kórég han mŷ ěn ag ri ke han tĭ gé. Topĕ vĭ mranh kŷ ag tóg nĭgtĭ. Ag vĕnh pĕti tóg ag mŷ sér tĭ. Hă ra ag tóg vĕnh kavĕnh tĭ, ājag jykre păno tigrĭn. "ěg pi(jé) tŷ ũ krĕm ke nŷtĭ'," he ag tóg tĭ. Kŷ ag tóg ěg tŷ ũn vĕg tŷ ag to vĭ kónăn tĭ gé, ũ tŷ kanhkă tá tŷ ũn mág nŷtĭ ag mŷ. ⁹Topĕ tŷ jĕnĕ jafă to pă'i tŷ Miguel vŷ tag han ja tŷ nĭgtĭ, ha mĕ. Satanás mré tóg rără, ti tŷ Moisés ter ma tĭg sór kŷ, Miguel ti. Hă ra tóg Satanás mŷ vĭ kónăn ja tŷ nĭgtĭ, ti tŷ tŷ pă'i nĭ ra. Ti mŷ tóg: "ěg Senhor jé ā vóg kónăn," he ja nĭgtĭ, Miguel ti. ¹⁰Hă ra ũn ón tĭ tag ag vŷ kanhkă tăn ag to vĭ kónăn tĭ, ag tŷ ag ki kagtĭg (hă) ra. Bicho ri ke ag nŷtĭ, ag tŷ ājag tŷ nĕn to ěn mŷ ěn han mŷn kŷ. Krĭ tŷ ag nŷtĭ, hă kŷ ag tóg nĕn ũ vĕnhmŷ kar han tĭ. Hă ra Topĕ vŷ ag vóg kónăn ke mŷ. ¹¹Ag ve kónăn ti tĭ, Topĕ ti. Caim tŷ Topĕ vĭ kato tĕ ja ěn ri ke han ag tóg mŷ. Ag tŷ rico nŷtĭ sór kŷ ag tóg vĕnh jykre kórég tó tĭ, Balaão tŷ vĕnh jykre kórég tó ja ěn ri ke. Coré ri ke ag tóg Topĕ kato tĕ tĭ, hă ra ag tóg tag to nŷgme ki văr ke mŷ. ¹²Ājag tŷ Jesus ki ge kŷ jagnĕ to há nŷtĭn kŷ ājag tóg igreja krĕm festa han tĭ. ěn kă ag tóg ājag mré jĕn tĭ gé, ũ tŷ Topĕ to ón tĭ ag. Hă ra ag tóg ki ājag kavĕnh tĭ gé. Jatun mŷ ag tóg jĕn mág tĭ. Mŷ'ăg vănh ag nŷtĭ. Ŭ to jykren vănh ag tóg nŷtĭ gé. Ājag jĕn mág hă mĭ ag tóg ěkrĕg tĭ. Kejĕn kăka tóg kanhkă góg tatĭn kătĭg mŷ, hă ra tóg kutĕ tŷ nĭgtĭ. Tag ri ke ag nŷtĭ, vĕké ag tóg vĭ tĭ. Ka ũ tóg kanĕn vănh nŷtĭ. ěn kunŷg ěg tóg tĭ, ti jăre mré hă, kŷ tóg kanĕn măn ke tŷ pĕ nĭ sir. Ter ti nĭ ha. Tag ri ke ag tóg nŷtĭ gé, ũ tŷ Topĕ to ón mŷ ag. ¹³Kejĕn goj kafă tŷ tóg krĕm ke mŷ, kŷ tóg jĕngĕj nĭ. Tag ri ke ag nŷtĭ gé. Ti jĕngĕj

vỹ tỹ ag jykre pãno nĩ. Vẽnh ven ti tĩ. Krĩg tĩ tĩ ri ke ag tóg nỹtĩ gé. Sĩnvĩ nĩ ve tóg nĩ, hã ra tóg ón kỹ tĩ tĩ, krĩg tĩ tĩ ti. Tag ri ke ag nỹtĩ. Topẽ vỹ kuty ki ag vãm ke mũ, kỹ ag tóg tá kãpa mãn ke tũ pẽ nĩ, ù tỹ Topẽ to ón mũ ag.

¹⁴ Ag hã to tóg rãn ja nĩ, Enoque ti. Adão krẽ tỹ ki krẽg mãn tỹ 7 (ke) vỹ tỹ ti nĩ, Enoque ti. Ti hã vỹ ag to: “ha vé, ãg Senhor vỹ jun ke mũ, ti tỹ jẽnẽ jafã ag mré hã,” he ja nĩ. “E tãvĩ ag nỹtĩ, ti tỹ jẽnẽ jafã ag. ¹⁵ Ti kãtĩg kỹ tóg ãprã ke ag jykre tugnỹm kãn ke mũ. Kỹ tóg ùn jykre pãno ag vóg kónãn ke mũ, ag jykre pãno to, ag tỹ Topẽ kato tẽ to, ag tỹ ti to vĩ kónãn to. Û tỹ ti vĩ mranh tĩ ag vỹ ti mỹ vĩ kónãn pẽ han tĩ, hã kỹ tóg ag vóg kónãn ke mũ,” he ja tóg nĩ, Enoque ti.

¹⁶ Topẽ to ón mũ ãn ag tỹ nén ù jagy ve kỹ tóg ag mỹ kórég nĩ, hã kỹ ag tóg: “Topẽ ne tóg jykre kórég nĩ,” he tĩ. Ajag tỹ nén to én mũ ãn hã han ag tóg tĩ. Hã ra ag tóg ón kỹ vĩ mág tĩ. Kỹ ag tóg vẽn h kar mỹ vĩ há han tĩ, ón kỹ, ag tỹ ajag vĩ há to nén ù ve jé, ag tỹ to rico nỹtĩ jé.

Ëg tỹ apóstolo ag vĩ jẽmẽn h ke

¹⁷ Ag jãvo apóstolo ag vĩ mĩ ãkrén nĩ, inh krẽ'. Ëg Senhor tỹ Jesus Cristo hã vỹ apóstolo ag vin ja nĩgtĩ, hã kỹ ag vĩ mĩ ãkrén há han nĩ. ¹⁸ “Kurã tỹ ãgno to hã ag tóg ajag to é henh ke mũ,” he ja ag tóg nĩgtĩ, apóstolo ag. “Ajag tỹ nén ù kórég to én mũ ãn hã han sór ag tóg mũgtĩ, ù tỹ ajag to é henh ke mũ ãn ag,” he ja ag tóg nĩgtĩ. Apóstolo ag tỹ tó jan hã vẽ. ¹⁹ Ag hã vẽ, sỹ ajag mỹ ùn tó mũ ag. Û tỹ Topẽ to ón mũ ãn ag hã vẽ. Ëg tỹ jagnẽ kato tẽ han sór ag tóg mũ. Ag tỹ nén ù to én mũ tag hã ne ag mỹ há tĩ'. Ag pi(jé) Topẽ kuprĩg tỹ jagrẽ nỹtĩ'.

²⁰ Ag jãvo ajag tóg Topẽ jykre ki ge kỹ nỹtĩ, Topẽ tũ ki, kỹ to jagnẽ tar han nĩ, inh krẽ'. Topẽ kuprĩg tỹ ajag krĩn kỹ Topẽ mré vẽnén nĩ. ²¹ Topẽ vỹ ajag to há tãvĩ nĩ. Ti tovãnh tũg nĩ. Ëg Senhor tỹ Jesus Cristo tỹ ajag jagãgtãn ke tag hã ve sórmnĩ, kỹ ajag tóg ãg rĩr krĩg ja tũ venh ke mũ.

²² Û ag tóg tag to tar tũ nỹtĩ ver, “hỹ mỹ vỹ?” he ag tóg tĩ. Tag ag jagãgtãn nĩ. ²³ Ag kren han nĩ, pĩ jo ag jy nĩgãn kỹ. Kỹ ù ag tóg ajag tỹ nén to én mũ kar ãn han tĩ. Ag jagãgtãn nĩ gé. Hã ra veso jykren nĩ gé, ajag tỹ ag jykre pãno nón mũ sór tũ nĩ jé. Kavéj ag nỹtĩ, ag jykre kórég to. Kỹ ag kavéj tag to én sór tũg nĩ. Veso jykren tãvĩ han nĩ.

Topẽ tỹ tỹ ùn mág nĩ

²⁴ Topẽ vỹ ãg tỹ prãnh ke tũ han ki kanhró nĩ. Kỹ tóg ãg tỹ ùn há tãvĩ han ki kanhró nĩ gé, ti tỹ kejẽn ãg jé prẽr ken kỹ, ãg tỹ ti rĩnja tá nỹtĩ jé. Tá tóg sĩnvĩ pẽ nĩ, sér pẽ. ²⁵ Pĩr ti nĩ, Topẽ ti, ãg kren han tĩ ti. Ëg Senhor tỹ Jesus Cristo tugrĩn tóg ãg kren han tĩ. Ti hã ne tóg tar nĩ', ti hã ne tóg tỹ ùn mág nĩ', ti hã ne tóg tỹ pã'i nĩ', ti hã ne tóg tỹ vẽn h kar kri ke nĩ'. Vãsỹ tóg kã nĩ nĩ, nén ù kar han tũg ki, ùri ke gé, hã ra tóg tũg' henh ke tũ pẽ nĩ gé, ti tỹ tỹ ùn mág jẽ ti.

Amém.

JOÃO TÏ ĚG TÏ NÉN VENH KE MÛ RÁ

¹ Topě vÏ Jesus Cristo mÏ nén (ũ) tÏ hěn ri ke ven, ěg tÏ kãnhmar nén venh ke mÛ ti, kÏ Jesus vÏ ěg mÏ ven, ěg tÏ tÏ ti camarada nÏtÏn kÏ. KÏ tóg ã tÏ jěně jafã jěně, ti tÏ ti camarada tÏ João mÏ tó jé gé. ² Ve kãn ja ti nÏ, João ti, Topě tÏ ti mÏ nén ven mÛ ti, Jesus Cristo tÏ ti mÏ nén ven mÛ ti ke gé. Ti tÏ ve kÏ tóg rán ja nÏ, João ti, hã vÏ nÏ. ³ Ũ tÏ vėnh rá tag to ke mÛ ag mÏ tóg vÏ há han ke mÛ, Topě ti, ũ tÏ vėnh vÏ tag měg mÛ ag mÏ ke gé. Topě tÏ tó mÛn hã vě, ěg tÏ ti vÏ ki króm jé. Kãnhmar ěg tóg tag ki rán kÏ nÏ tag ve kãn ke mÛ, kakó tãvÏ tóg tÏ ha.

João tÏ ěmã tÏ 7 (ke) tá Jesus mré ke ag mÏ ti vÏ tó

⁴ João tÏ rá hã vě. IsÏ ga tÏ Ásia tá Jesus mré ke ag mÏ rán hã vě, cidade tÏ 7 (ke) ki ke ag mÏ.

Topě jé ãjag tÏ tar' hé, kÏ ãjag jé krÏ kãnhvy nÏtÏ. Topě vÏ nÏgtÏ. VãšÏ tóg nÏ ja nÏgtÏ, kÏ tóg ũri nÏ nÏ, hã ra tóg kãtÏg ke mÛ gé. Ti kuprÏg vÏ ti mré nÏ gé, kÏ tóg tÏ ũ tÏ 7 (ke) ve nÏ, ti kuprÏg ti. Topě nÏgja tá tóg nÏtÏ, ti kuprÏg tÏ tÏ ũ tÏ 7 (ke) ve ěn ti. Ti kuprÏg ěn jé Topě mré ãjag krÏ tÏ kãnhvy' hé, ⁵ Jesus Cristo mré ke gé. Jesus vÏ Topě vÏ tó há han ja nÏgtÏ, to tóg krónh ke ja tÛ nÏgtÏ. KÏ tóg ã ter kar kÏ rÏr mãn vén ja nÏ. KÏ ěg rÏnrÏr mãn ke mÛ gé, ti nón. KÏ Jesus tóg ěprã pã'i ag kri tÏ ũn mág jě gé.

Ěg to há tãvÏ ti nÏ, Cristo ti. Ti kyvėnh tóg ěg jagfy ti ki kãkutě, tÏ tóg ěg krenkren han, ěg tÏ Topě vÏ mranh ja to. ⁶ KÏ tóg ěg tÏ pã'i han ke mÛ gé, ti krěm. Topě tÛ ki rÏr jé ěg tóg ke mÛ gé, ti jóg tÛ ki. Ti hã ne ã pir mÏ tÏ ũn mág nÏ', Jesus ti. Ti hã ne ã pir mÏ tar nÏ', ũri, kÏ tóg tÛ' henh ke tÛ nÏ, ti tar nÏn kÏ. Hã vě.

⁷ Ha vé, kãtÏg mãn jé tóg ke mÛ, kãnhkã góg kãmÏ. Vėnh kar vÏ ti venh ke mÛ, ěn kã, ũ tÏ ti kusón mÛ ag mré hã. KÏ povo kar vÏ ti tugrÏn jagtar kãn ke mÛ. Jagtar jé ag tóg ke mÛ, věšÏrėnh jé ag tóg ke mÛ, ha vemnÏ. Hã vě.

⁸ “Ũn ve vÏ tÏ inh nÏ, hã ra sóg tÏ ěgno nÏnh ke mÛ gé,” he tóg, ěg pã'i mág ti. VãšÏ tóg nÏgtÏ, kÏ tóg ver ũri nÏ gé, kÏ tóg kãtÏg ke mÛ gé, ũ tÏ nén (ũ) kar han ki kãnhmã mÛ ěn ti.

João tÏ Jesus ve

⁹ Ājag mré ke vÏ tÏ inh nÏ, inh, hã vÏ: João, he mÛ. Jesus mré ke vÏ tÏ inh nÏ, ãjag mré. Jagtar inh nÏ gé, ãjag jagãgtar ri ke inh nÏ gé, hã ra sóg ãjag kóm to krónh ke tÛ nÏgtÏ gé, kÏ sóg ãjag mré Topě tÏ tÏ ěg pã'i nÏ venh ke mÛ gé. Goj vãso tá inh nÏ nÏ, ti jÏjÏn hã vÏ: Patmos, he mÛ. Ki sóg se kÏ nÏ nÏ, isÏ Topě vÏ tó ja tugrÏn. Jesus vÏ ěg mÏ ki hã tó ja nÏ. Ti vÏ ěn tó ja inh nÏ, vėnh kar mÏ, hã tugrÏn isóg se kÏ jě.

¹⁰ Domingo ũ kã Topě kuprÏg tóg inh mÏ nén ně ven. Inh pãnÏ tá sóg jamã hár(a) vėnh vÏ mě, kÏ tóg trombeta kyr mě ja nÏ, vėnh vÏ ěn ti. ¹¹ KÏ tóg inh mÏ: “rán nÏ, ã tÏ nén věg mÛ tag ti,” he ja nÏ. “Livro ki rán nÏ. Inh mré ke ag mÏ livro tag jěněmnÏ, cidade tÏ Ěfeso ra, cidade tÏ Esmirna ra, cidade tÏ Pěrgamo ra, cidade tÏ Tiatira ra, cidade tÏ Sardes ra, cidade tÏ Filadělfia ra, cidade tÏ Laodicěia ra ke gé,” he ja tóg nÏ, inh pãnÏ tá inh mÏ vėnh vÏ tó mÛ ěn ti.

¹² KÏ sóg věšÏjãm ěvãnh, sÏ ũ tÏ inh mré vÏ mÛ ěn ve jé. IsÏ věšÏjãm ěvãnh kÏ sóg něj tÏ kri vin jafã tÏ 7 (ke) vé, vela tÏ kri vin jafã ěn, ouro tÏ tóg hÏn han kÏ nÏtÏ. ¹³ Něj tÏ kri vin jafã ag kuju kã ũ tóg jě nÏ, hã ra tóg tÏ ěprã ke nÏ ve nÏ. Kur těj tu kÏ tóg jě nÏ, ouro tÏ tóg věsóg fÏn kÏ jě nÏ gé, ti fe kri, ũ tÏ tÏ ěprã ke nÏ ve ěn ti. ¹⁴ Gãnh kupri pě tóg jě, vėnh měg tÏ carneiro kyki kupri ri ke tóg nÏ, ti gãnh ti, kukryr kó ri ke. Kaně gru tóg jě nÏ, pÏ gru ri ke. ¹⁵ Pěn jěngrě tóg jě nÏ, ouro jěngrě ri ke. Ěg tÏ pÏ ki ouro vãm kÏ ti tÏ jonh ke kÏ jěngrě sÏnvÏ han ěn ri ke ti nÏ, ti pěn ti. Ti vÏ vÏ goj krog tÏ óóh he ěn ri ke nÏ. ¹⁶ KrÏg tÏ 7 (ke) génh kÏ tóg jě nÏ. Ā pěgja tÏ tóg krÏg tÏ 7 (ke) génh kÏ jě nÏ. KÏ rógro jã vÏ ti

jĕnkā tá kākutē mū. Jā régre ti nī, rógro ti, jā há. Ti kakā vỹ kókov nī, rā tỹ ěg nĩno kã sa kỹ kókov ěn ri ke ti nī, ũ tỹ tỹ ěprã ke nĩ ve ěn kakã ti.

¹⁷ Sỹ ti ve kỹ sóg ti pĕn krĕm kutē mū, ga kri. Ter ve han inh. Hã ra tóg ã pĕgja tỹ inh mĕg mū, kỹ tóg inh mỹ: “inh kamĕg tũg nī,” he mū. “Ũn ve vỹ tỹ inh nī, ěgno ke gé. ¹⁸ Rĩr inh jĕ nī. Ter ja inh nī, hã ra sóg rĩr jĕ nī, kỹ sóg ter mãn ke tũ pĕ nī. Isỹ ũ mỹ: “ter jĕ ã tóg ke mū,” hen kỹ tóg ter ke mū. Isỹ ũ mỹ: “ter ke tũ ã tóg nī,” hen kỹ tóg ter ke tũ nĩ gé, kỹ tóg vĕser jamã venh ke tũ nĩ gé,” he tóg. ¹⁹ “Rãn nī, ã tỹ nĕn vĕg mū tag ti, ěprã ke ag tỹ ũri nĕn vĕg mū ti, ag tỹ kar kỹ nĕn venh ke mū ti ke gé,” he tóg. ²⁰ “Krĩg ag vĕg ã tóg jĕ nī, inh nĩgĕ kãki. Kỹ ã tóg nĕj tỹ kri vin jafã ag vĕg mū gé, ouro tỹ vela tỹ kri vin jafã tỹ 7 (ke) tag ag. Nhỹ ã mỹ kãmĕn, ã tỹ nĕn vĕg mū tag ti. Krĩg tỹ 7 (ke) tag ri ke ag nỹtĩ, Topĕ tỹ jĕgnĕ jafã ag. Inh ki ge kỹ nỹtĩ ag ki ag tóg rĩr tĩ, Topĕ tỹ jĕgnĕ jafã tag ag. Sỹ ã mỹ cidade tỹ 7 (ke) tó mū ěn tá ag nỹtĩ, inh mré ke ag, ag tỹ ũn ki rĩr mū ag. Kar kỹ nĕj tỹ kri vin jafã ri ke ti nỹtĩ, ũ tỹ inh ki ge kỹ nỹtĩ tag ag,” he tóg, ũ tỹ tỹ ěprã ke nĩ ve ěn ti.

2

Jesus tỹ Éfeso tá igreja tá ke ag mỹ ã vĩ jĕnĕ

¹ “Ũ tỹ cidade tỹ Éfeso tá inh mré ke ag ki rĩr mū ěn mỹ tag rãn nī, ha mĕ,” he tóg, ũ tỹ tỹ ěprã ke nĩ ve ěn ti. “Ũ tỹ ã mỹ vĕnh vĩ jĕnĕg mū vỹ krĩg tỹ 7 (ke) génh kỹ jĕ nī, ti pĕgja tá ti nĩgĕ kãki, hemnĩ. Kỹ tóg nĕj tỹ kri vin jafã tỹ 7 (ke) kãmĩ tĩ mū gé, hemnĩ. ² Ājag tỹ nĕn han mū ki kanhró sóg nī, he ti, hemnĩ iso. Vãsãn ājag tóg tĩ. Iso krónh ke tũ ājag tóg nỹtĩ. Ũn jykre pãno ag tóg ājag mỹ kórĕg nỹtĩ. Ājag kãmĩ ũ tóg ón kỹ: apóstolo vỹ tỹ ěg nỹtĩ, he ja nỹtĩ. Ag jykre tugnỹm kỹ ājag tóg ag ón mū tag to ag pan. ³ Iso tar ājag tóg nỹtĩ. Isugrĩn ājag tóg jagtar, ge ra ājag tóg iso krónh ke ja tũ nī.

⁴ Hã ra sóg nĕn ũ sĩ tó sór mū, ājag mỹ. Ājag tỹ nĕn han mū ũ tóg inh mỹ há tũ nī. Ājag tỹ inh ki ge vĕn kỹ ājag tóg iso há tãvĩ nỹtĩ ja nĩgtĩ, kỹ tóg há tĩ ja nī, hã ra ājag tóg ũri krónh ke mū. ⁵ Ājag tỹ vãsỹ iso tar ěn mĩ ěkrĕn nī. Ājag jykre kórĕg tovãnh nī. Ājag tỹ inh ki ge vĕn ěn ri ke han mãn nī, iso há tãvĩ nỹtĩ mãn nī. Ājag tỹ tag han sór tũ nỹtĩn kỹ sóg ājag ki jun kỹ (sóg) ājag tỹ nĕj tỹ kri vin jafã ěn ma tĩg ke mū, ha vemnĩ.

⁶ Nĕn ũ tóg hã ra há nī, ājag tỹ nĕn han mū ũ ti. Nicolaítas he mū ěn ag jykre to ājag tóg kórĕg tãvĩ nỹtĩ, isỹ ag jykre to kórĕg kóm, he tóg, hemnĩ, Éfeso tá ke ag mỹ, vĕnh rãn ki,” he tóg inh mỹ, ũ tỹ tỹ ěprã ke nĩ ve ěn ti.

⁷ “Ũ nĩgrĕg nỹtĩ ag tỹ tỹ jĕmĕ jĕ, Topĕ kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topĕ kuprĩg ti,” he tóg. “Ũ tỹ isovãnh tũ ěn vỹ ka kanĕ há konh ke mū, ka tỹ ěg rĩnrĩr han mū ěn kanĕ, Topĕ jakré ěn kanĕ,” he tóg, ũ tỹ tỹ ěprã ke nĩ ve ěn ti. Ti tỹ Éfeso tá ke ag mỹ vĕnh vĩ jĕnĕg mũn hã vĕ.

Jesus tỹ Esmirna tá igreja tá ke ag mỹ ã vĩ jĕnĕ

⁸ Kỹ tóg: “ũ tỹ cidade tỹ Esmirna tá inh ki ge kỹ nỹtĩ ag ki rĩr mū ěn mỹ tag rãn nī, ha mĕ,” he mū gé, ũ tỹ tỹ ěprã ke nĩ ve ěn ti. “Ũ tỹ ã mỹ vĕnh vĩ jĕnĕg mū vỹ tỹ ũn ve nī, hã ra tóg tỹ ěgno nĩ gé, hemnĩ. Ter ja ti nī, hã ra tóg rĩr mãn, hemnĩ iso. ⁹ Isugrĩn ag tóg ājag to kórĕg nỹtĩ, kỹ ājag tóg jagãgtar nỹtĩ. Ki kanhró sóg nī. Ge ra ājag tóg inhhã rico ri ke nỹtĩ. Ājag to ag tóg vĩ kónãn tĩ, ũ tỹ ón kỹ: “Judeu vỹ tỹ ěg nỹtĩ, Topĕ tũ vỹ tỹ ěg nỹtĩ,” he mū ag. Ag pi(jé) tỹ Topĕ tũ nỹtĩ¹. Satanás tũ vỹ tỹ ag nỹtĩ. ¹⁰ Ājag jagtar han jĕ ag tóg ke mū, isugrĩn. Mũmĕg tũg nī hã ra. Japo vỹ ājag kato vãsãn ke mū, kỹ ag tóg vĕseja kãtã ājag vãm ke mū. Japo tỹ ājag jykre ve sór hã vĕ. Kurã tỹ 10 (ke) ki ke vĕ, ag tỹ ājag vóg kónãn ke ti. Isovãnh tũg nī, ag tỹ ājag tén sór mū ra. Kỹ ājag tóg rĩr krỹg (ja) tũ venh ke mū, kỹ tóg ājag mỹ sér tĩnh mū, he tóg, hemnĩ, vĕnh rãn ki,” he tóg, ũ tỹ tỹ ěprã ke nĩ ve ěn ti, inh mỹ.

¹¹ “Ũ nĩgrĕg nỹtĩ ag tỹ tỹ jĕmĕ jĕ, Topĕ kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topĕ kuprĩg ti,” he tóg. “Ũ tỹ isovãnh tũ ěn vỹ nũgme ki vár ke tũ nī,” he tóg, ũ tỹ tỹ ěprã ke nĩ ve ěn ti. Ti tỹ Esmirna tá ke ag mỹ vĕnh vĩ jĕnĕg mũn hã vĕ.

Jesus tỹ Pérgamo tá igreja tá ke ag mỹ ã vỹ jěně

¹² Kỹ tóg: “ũ tỹ cidade tỹ Pérgamo tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé, ù tỹ tỹ ẽprã ke nĩ ve ẽn ti. “Ủ tỹ ã mỹ vãnh vỹ jěněg mũ vỹ rógro jã régre vyn kỹ jě nĩ, ùn jã há ẽn, hemnĩ iso. ¹³ Satanás nĩgja tá ãjag tóg ẽmã nỹtĩ, ki kanhró sóg nĩ. Iso tar ãjag tóg nỹtĩ. ãjag régre tỹ Antipas tén ja ag tóg nĩ, ti tỹ inh jyjy tó tugrĩn. Ge ra ãjag tóg iso: “ti ki kagtĩg sóg nĩ,” he ja tũ nĩ, ãjag tỹ Satanás jamã tá nỹtĩ ra.

¹⁴ Hã ra sóg nén ù tó sór mũ gé, ãjag mỹ, ti tỹ inh mỹ há tũ nĩn kỹ. ãjag kãmĩ ù ag tóg Balaão jykre han sór mũ. Balaão vỹ Balaque mỹ kãmén ja nĩ, ti tỹ Israel krẽ ag krĩn kónãn jé, Topẽ vỹ mranh ke to. Ti tỹ ag krĩn kónãn kỹ ag tóg vãnh kãggrá to festa ko ja nĩgtĩ. Ag tỹ ón kỹ vãnh kãggrá to: topẽ, he mũ ẽn mỹ festa ja vễ. Ẽn ko kỹ ag tóg ãjag prũ tũ fag mré nỹgnỹ' he ja nĩgtĩ gé. Tag han sór ag tóg mũ gé, Balaão kóm, ãjag kãmĩ ù ag, kỹ tóg inh mỹ kórég nỹ. ¹⁵ Kỹ ãjag kãmĩ ù ag tóg Nicolaítas he mũ ẽn ag jykre han sór mũ gé. ¹⁶ Tovãnh nĩ, ãjag jykre tag. Ke tũ nĩ mũ ra sóg ãjag ki jun ke mũ, sỹ ù tỹ vãnh jykre tag han mũ ag kato vãsãn jé, rógro tỹ inh jěnkã tá kãkutẽ mũ ẽn tỹ, hemnĩ, vãnh rán ki,” he tóg, inh mỹ, ù tỹ tỹ ẽprã ke nĩ ve ẽn ti.

¹⁷ “Ủ nĩgrẽg nỹtĩ ag tỹ tỹ jěmẽ jé, Topẽ kuprĩg vỹ ti. Ủ tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg.

“Ủ tỹ isovãnh tũ mỹ sóg kanhkã tá vễjẽn ẽn nĩm ke mũ, vễjẽn tỹ pēju kỹ nĩ ẽn. Ag mỹ sóg pó kupri nĩm ke mũ gé. Kri vãnh jyjy tãg tóg rán kỹ nĩ. Ủ pi(jé) vãnh jiji tag ki kanhró nĩnh mũ'. Ủ tỹ pó kupri ẽn mãg mũ ẽn hã tóg ki kanhró nĩnh mũ, ã pir mỹ, ti jyjy tãg ki, he tóg, hemnĩ,” he tóg, ù tỹ tỹ ẽprã ke nĩ ve ẽn ti. Ti tỹ cidade tỹ Pérgamo tá ke ag mỹ vãnh vỹ jěněg mũn hã vễ.

Jesus tỹ Tiatira tá igreja tá ke ag mỹ ã vỹ jěně

¹⁸ Kỹ tóg: “ũ tỹ cidade tỹ Tiatira tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé, ù tỹ tỹ ẽprã ke nĩ ve ẽn ti. “Ủ tỹ ã mỹ vãnh vỹ jěněg mũ vỹ tỹ Topẽ kósin nĩ, hemnĩ,” he tóg. “Ti kanẽ vỹ pĩ gru ri ke nĩ, ti pẽn vỹ ouro jěngrẽ ri ke nĩ gé, hemnĩ iso. ¹⁹ ãjag tỹ nén han mũ vэг sóg tĩ. Iso há tãvĩ ãjag tóg nỹtĩ, inh ki rã pẽ han kỹ ãjag tóg nỹtĩ. Inh rãnhraj han ãjag tóg mũgtĩ, to krónh ke tũ ãjag tóg nĩgtĩ. Vãsỹ ãjag tóg inh jykre to tar nỹtĩ ja nĩgtĩ, kỹ ãjag tóg ùri to tar kãfór nỹtĩ gé.

²⁰ Hã ra sóg nén ù sĩ tó sór mũ gé, ãjag mỹ, ti tỹ inh mỹ há tũ nĩn kỹ. Jezabel fi vỹ kamẽg ja tũ ãjag tóg nĩgtĩ, hã kỹ fi tóg ón kỹ vỹ tĩ nĩ. Inh camarada ag krĩn kónãn fi tóg tĩ, ag tỹ fi mré nỹ jé, ag tỹ vãnh kãggrá mỹ nén (ũ) nĩ pũn mũ ẽn ko jé gé. ²¹ Fi tovãnh isóg mũ vễ, fi tỹ ã jykre tugnỹm jé, hã ra fi tóg ã jykre kórég tovãnh sór tũ nĩ. ²² Fi kagãg jé sóg ke mũ. Ủ tỹ fi jykre han mũ ag vóg kónãn jé sóg ke mũ gé, ag tỹ fi jykre kórég tovãnh jãvãnh nỹtĩn kỹ. ²³ Fi krẽ kãgtén kãn jé sóg ke mũ gé. Kỹ inh ki ge kỹ nỹtĩ kar ag vỹ inh jykre ki kanhró nỹtĩnh mũ. Vãnh kar tỹ nén to jykrén mũ ẽn ve kãn sóg tĩ, vãnh kar tỹ nén han sór mũ ẽn ke gé. ãjag tỹ nén han mũ ẽn ri ke han jé sóg ke mũ, ãjag mỹ, ha vemnĩ.

²⁴ ãjag kãmĩ ù ag tóg hã ra fi jykre han ja tũ nĩgtĩ, ãjag tỹ Tiatira tá nỹtĩ ra. ãjag pi(jé) fi tỹ vãnh jykre han mũ han ja nĩ'. Ag tỹ nén to: “Satanás jykre jagy,” he mũ ẽn han sór ja tũ ãjag nĩgtĩ. Hã kỹ sóg ãjag mỹ nén ù jagy tónh ke tũ nĩ gé. ²⁵ ãjag tỹ nén han mũ to tar nỹtĩmnĩ, gen kỹ inh kãtĩg mãn ke tag jãvãnh nỹtĩmnĩ.

²⁶ Ủ tỹ isovãnh tũ ẽn ag tỹ sóg pã'i hyn han ke mũ, povo kar kri, ù tỹ inh vỹ ki króm mũ ag tỹ, ù tỹ iso krónh ke tũ ẽn ag tỹ ke gé. Inh panh vỹ isỹ pã'i han, hã kỹ sóg ãjag tỹ pã'i han ke mũ gé, inh kóm, ²⁷ ãjag tỹ inh kóm tỹ povo kri pã'i nỹtĩ jé. Kỹ ãjag tóg ag to vãsãn ke mũ, ferro tỹ ag mrãnmrãn kỹ, ẽg tỹ go'or tỹ kukrũ gãm mũ ẽn ri ke. ²⁸ Tar ãjag tóg nỹtĩnh mũ, kỹ sóg ãjag mỹ krĩg mág nĩm ke mũ gé, he tóg, hemnĩ, ag mỹ, vãnh rán ki,” he tóg, ù tỹ tỹ ẽprã ke nĩ ve ẽn ti.

²⁹ “Ủ nĩgrẽg nỹtĩ ag tỹ tỹ jěmẽ jé, Topẽ kuprĩg vỹ ti. Ủ tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg, ù tỹ tỹ ẽprã ke nĩ ve ẽn ti. Ti tỹ cidade tỹ Tiatira tá ke ag mỹ vãnh vỹ jěněg mũn hã vễ.

3

Jesus tỹ Sardes tá igreja tá ke ag mỹ ã vỹ jẽnẽ

¹ Kỹ tóg: “ũ tỹ cidade tỹ Sardes tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé. “Ũ tỹ ã mỹ vẽnĩ vỹ jẽnẽg mũ vỹ Topẽ kuprĩg tỹ jagrẽ nĩ, ti kuprĩg tỹ 7 (ke) nĩ ve ẽn tỹ, kỹ tóg krĩg tỹ 7 (ke) mãn kỹ jẽ nĩ gé, hemnĩ iso,” he tóg. “Ăjag tỹ nẽn han mũ ki kanhró sóg nĩ. Vẽnĩ kar vỹ ăjag to: “há ag nỹtĩ, tar ag nỹtĩ,” he tĩ, hã ra ăjag tóg iso krónh ke ja nĩ, hã kỹ ăjag tóg ùn kăgter mũ ri ke nỹtĩ. ² Nũr tovãnh nĩ, tar nỹtĩmĩ, ke tũ nĩ mũ ra ăjag kăgter pẽ han kãn ke mũ. Ăjag jykre tugnỹm inh, hã ra tóg há tũ nĩ ver. Topẽ vỹ ăjag tỹ nẽn han mũ to há tũ nĩ ver. ³ Vẽnĩ vỹ sér mẽ ăjag mỹr, kỹ to jykrén há han nĩ. To tar nỹtĩmĩ, to vãsãn nĩ. Ăjag nũgnũr kỹ sóg ăjag krĩg mỹ jun ke mũ, ù tỹ ẽg tỹ nẽn péju(g) tĩ tỹ ẽg nũr krĩg mỹ jun mũ ri ke han jé sóg ke mũ. Inh jun ke kurã ki kagtĩg ăjag tóg nỹtĩ mỹr.

⁴ Ăjag kãmĩ ù ag tóg hã ra vẽnĩ kavẽnĩ ja tũ nĩ, Sardes tá. Tag ag vỹ kur kupri ẽn rĩnh ke mũ, inh mré ag nỹtĩnh ke mũ. ⁵ Ũ tỹ isovãnh tũ ẽn ag vỹ kur kupri ẽn rĩnh kãn ke mũ. Ag jygy kykũnh ke tũ inh nĩ, inh livro ki. Ũn rĩnrĩr ke mũ ag jygi vỹ ki ránrán kỹ nỹtĩ, inh livro ẽn ki. Ẽn ag jygy tó jé sóg ke mũ, inh panh mỹ, ti tỹ jẽgnẽ jafã kar ag mỹ ke gé, he tóg, hemnĩ, vẽnĩ rán ki,” he tóg, inh mỹ, ù tỹ tỹ ẽprã ke nĩ ve ẽn ti.

⁶ “Ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vỹ ti. Ũ tỹ inh ki ge kỹ nỹtĩ ag hã mỹ tóg tónh ke mũ, Topẽ kuprĩg ti,” he tóg, ù tỹ tỹ ẽprã ke nĩ ve ẽn ti. Ti tỹ cidade tỹ Sardes tá ke ag mỹ vẽnĩ vỹ jẽnẽg mũn hã vẽ.

Jesus tỹ Filadélfia tá igreja tá ke ag mỹ ã vỹ jẽnẽ

⁷ Kỹ tóg: “ũ tỹ cidade tỹ Filadélfia tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé. “Ũ tỹ ã mỹ vẽnĩ vỹ jẽnẽg mũ vỹ tỹ ùn há pẽ nĩ, ùn tar tăvĩ, kỹ tóg ki hã tó tĩ, hemnĩ. Davi ẽn tỹ jãnkã róm jafã vyn kỹ tóg jẽ nĩ, jãnkã nón jafã ẽn ti, chave ẽn ti, hemnĩ. Ti tỹ jãnkã ù róm kỹ ù tóg nĩfẽnĩ mãn ke tũ nĩ, kỹ ti tỹ jãnkã ù nĩfẽnĩ kỹ ù tóg nón mãn ke tũ nĩ gé, hemnĩ, iso,” he tóg. ⁸ “Ăjag tỹ nẽn han mũ ki kanhró sóg nĩ. Tỹ nẽn mág tũ ăjag nỹtĩ. Hã ra ăjag tóg isỹ ăjag mỹ nẽn tó mũ ẽn ki króm kỹ nỹtĩgtĩ, isovãnh ja tũ ăjag tóg nĩgtĩ. Ăjag mỹ sóg ẽg tỹ jãnkã róm tĩ ẽn ri ke han, kỹ ù tỹ ăjag jo nĩfẽnĩ ke tóg tũ tĩ. ⁹ Ha mẽ, sỹ nẽn tónh ke ti. Ăjag mỹ sóg ù ag jẽgnẽnĩ mũ, Satanás mré ke ù ag. Ōn kỹ ag tóg: “Judeu vỹ tỹ ẽg nỹtĩ, Topẽ mré ke vỹ tỹ ẽg nỹtĩ,” henh ke mũ. Ag ón hã vẽ. Ag tỹ ke sór tũ ra ag tóg ăjag krẽm mũg kenh ke mũ, ăjag mỹ: “ẽg kãfór ăjag tóg nỹtĩ,” hen kỹ, ha vemnĩ. Ăjag to há tăvĩ sóg nĩ. Hã kỹ ăjag kato vãsãnsãn mũ ag vỹ tag venh ke mũ, ha vemnĩ. ¹⁰ Inh vỹ ki króm ăjag tóg mũ mỹr, sỹ ăjag mỹ: “isovãnh tũg nĩ,” hen kỹ. Hã kỹ sóg ăjag jy nĩgãn ke mũ, ga kri ke kar ag tỹ nẽn ù jagy venh ke kurã ẽn kã. Ti jagy tăvĩ ve jé ag tóg ke mũ, ẽprã ke kar ẽn ag, isỹ ag jykre tugnỹm ken kỹ. ¹¹ Kãnhmar inh kãtĩg ke mũ. Ăjag tỹ inh ki ge kỹ nỹtĩ tag tovãnh tũg nĩ, ke tũ nĩ mũ ra ù ag tóg ăjag jẽgia kã jẽ kỹ nẽn tỹ ăjag mỹ sér tĩnh ke mũ ẽn venh ke mũ inhhã. ¹² Ũ tỹ isovãnh tũ ẽn ag tỹ sóg ãn nũna ri ke han ke mũ, kãnhkã tá, Topẽ jo ãn ri ke ẽn tá. Tá ag pa mãn ke tũ nỹtĩ ha. Ag kri sóg Topẽ jiji rán ke mũ gé, Topẽ jamã jygy ti ke gé. Cidade tỹ Jerusalém tãg to ken hã vẽ. Kãnhkã tá tóg kãtėrenh kenh ke mũ, Topẽ tá, Jerusalém tãg tag ti. Kar kỹ sóg ag kri inh jiji tãg rán ke mũ gé, he tóg, hemnĩ, vẽnĩ rán ki,” he tóg inh mỹ, ù tỹ tỹ ẽprã ke nĩ ve ẽn ti.

¹³ “Ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vỹ ti, ù tỹ inh ki ge kỹ nỹtĩ ag hã mỹ tóg tónh ke mũ, Topẽ kuprĩg ti,” he tóg, ù tỹ tỹ ẽprã ke nĩ ve ẽn ti. Ti tỹ cidade tỹ Filadélfia tá ke ag mỹ vẽnĩ vỹ jẽnẽg mũn hã vẽ.

Jesus tỹ Laodicéia tá igreja tá ke ag mỹ ã vỹ jẽnẽ

¹⁴ Kỹ tóg: “ũ tỹ cidade tỹ Laodicéia tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé. “Ũ tỹ ã mỹ vẽnĩ vỹ jẽnẽg mũ jyjn hã vỹ: “ki hã tó mũn hã vẽ,” he mũ, hemnĩ,” he tóg. “Ki hã tóg tó tĩ, nẽn ù kar ki. Ōn vãnĩ ti nĩgtĩ, hemnĩ. Ti hã tugrĩn Topẽ tóg nẽn (ũ) kar han ja nĩgtĩ, hemnĩ iso,” he tóg. ¹⁵ “Ăjag tỹ nẽn han mũ ki kanhró

sóg nĩ. Ājag pi(jé) goj rỹ jagy ri ke nỹtĩ', kỹ ājag pi(jé) goj kusa ri ke nỹtĩ gé'. Ājag tỹ goj rỹ jagy ěn ri ke nỹtĩ ran há tĩnh mũ vễ, ājag tỹ goj kusa ěn ri ke nỹtĩ ran há tĩnh mũ gé vễ vễ. ¹⁶ Hã ra ājag tóg goj rỹ mẽ ri ke nỹtĩ, ājag tỹ iso krój nỹtĩn kỹ. Hã kỹ sóg ājag vãm sór mũ, ěg tỹ rěrĩr tá goj rỹ mẽ ěn pra kỹ kujẽn ěn ri ke han jé sóg ke mũ, ājag tỹ, ha vemnĩ. ¹⁷ Věso ājag tóg: “rico ěg nỹtĩ, há ěg nỹtĩ, nén ũ tóg ěg mỹ tũ' he tũ pẽ nĩ,” he tĩ. Hã tũ tóg ājag tóg tĩ. Jagāgtar ājag tóg nỹtĩ, mỹr, ha mẽ. Tỹ nén tũ ājag tóg nỹtĩ, jykre kórég ājag tóg nỹtĩ, kur tũ ājag tóg nỹtĩ, kyvó ājag tóg nỹtĩ, ājag tỹ há nỹtĩ ve ra. Hã ra ājag tóg ki kagtĩg nỹtĩ, ājag kórég nỹtĩ tag ki. ¹⁸ Hã kỹ sóg ājag mỹ: “inh ki mãn kãmũ jěg, ouro há ěn ti,” he sór mũ, ājag tỹ rico nỹtĩ jé. Kur kupri kajãm nĩ, ājag tỹ kator nỹtĩ tũ nĩ jé, ājag mỹ'ag tũ nĩ jé. Věnh kagta kajãm nĩ, ājag kaně mỹ, ājag tỹ ve há han mãn jé. ¹⁹ Isỹ ũ to há nĩ ěn mỹ sóg vĩ tar han tĩ, ti kanhrãn jé. Věso jykrén kỹ ājag jykre kórég togvãnh nĩ. ²⁰ Mẽ há han nĩ, sỹ ājag mỹ nén tóg mũ tag. Re tá inh jě nĩ, jãnkã tá, kỹ sóg tỹ tórón' tórón' ke mũ, tỹ tag' tag' ke sóg mũ. ũ tỹ inh vĩ mẽg mũ mỹ tóg há tĩ, kỹ tóg inh mỹ nón ke mũ, jãnkã ti, kỹ sóg ti ĩn kãra rãnh ke mũ. Kỹ sóg ti mré jẽn ke mũ, kỹ tóg inh mré jẽn ke mũ gé, ha mẽ. ²¹ ũ tỹ isovãnh tũ ěn mỹ sóg: “inh mré nĩ,” he sór mũ, kỹ tóg inh ri ke tỹ ũn mág nĩnh ke mũ. Inh panh mré sóg tỹ ũn mág nĩ ha, isỹ ti tovãnh ja tũ nĩn kỹ, kỹ tóg tá inh mré nĩnh ke mũ gé, he tóg, hemnĩ, vễnh rãn ki,” he tóg, ũ tỹ tỹ ěprã ke nĩ ve ěn ti.

²² “Ũ nĩgrěg nỹtĩ ag tỹ tỹ jěmẽ jé, Topě kuprĩg vĩ ti, ũ tỹ inh ki ge kỹ nỹtĩ ag hã mỹ tóg tónh ke mũ, Topě kuprĩg ti,” he tóg, ũ tỹ tỹ ěprã ke nĩ ve ěn ti. Ti tỹ cidade tỹ Laodicéia tá ke ag mỹ vễnh vĩ jěněg mũn hã vễ.

4

Ag tỹ kanhkã tá Topě mỹ vĩ há han

¹ Kỹ sóg kynhmỹ ěvãnh, kỹ sóg kanhkã jãnkã vé, hã ra tóg róm ke kỹ jě nĩ. Kỹ sóg vễnh vĩ ěn jěmẽ mãn, vễnh vĩ tỹ trombeta kyr ri ke ěn, kỹ tóg inh mỹ: “ha kãtãpry,” he mũ. “Ā mỹ sóg ven sór mũ, ājag tỹ kar kỹ nén venh ke mũ ti,” he tóg, vễnh vĩ ti.

² Kỹ vãhã Topě kuprĩg tóg inh krĩn mũ, kỹ sóg nén nẻn vẻg mũ. Kanhkã tá tóg nĩgja sĩnvĩ jě nĩ, kỹ ũ tóg kri nĩ nĩ. ³ Ti kakã tóg jẻngrẻ nĩ, póg sĩnvĩ jẻngrẻ ěn ri ke, póg tỹ jaspe jẻngrẻ ěn ri ke, póg tỹ sardônio jẻngrẻ ěn ri ke. Nĩgja sĩnvĩ ěn vỹ ta no ri ke nĩ, kỹ tóg jẻngrẻ jẻ gé, ta no ěn ti, póg tỹ esmeralda jẻngrẻ ěn ri ke. ⁴ Nĩgja sĩnvĩ ěn pẻnĩn nĩgja sĩnvĩ ũ tóg nỹtĩ gé, ũ tỹ 24 (ke) ti nỹtĩ. Nĩgja ěn kri kófa ag tóg nĩgnĩ kỹ nỹtĩ, kófa tỹ 24 (ke) ag. Kur kupri rĩnh kỹ ag tóg nỹtĩ, ouro tỹ krĩ tógfĩ rĩnh kỹ ag tóg nỹtĩ gé. ⁵ Nĩgja sĩnvĩ ěn tá ta tỹ kómkóm ke ri ke ěn tóg vễnh ven mũ, kỹ ta tỹ tỹrỹr he ri ke ěn tóg mẽ há tĩ gé, vễnh vĩ ke gé. Ti jo pĩ jónhkó gru tỹ 7 (ke) tóg nỹtĩ gé. Topě kuprĩg to ken hã vễ, ũ tỹ 7 (ke) nĩ ve ěn, hã vỹ: pĩ jónhkó gru tỹ 7 (ke), he mũ. ⁶ Nĩgja sĩnvĩ kakãm nén ũ tóg nỹ nĩ, kỹ tóg vidro tỹ goj nĩ ve nĩ, goj jãpri, goj kókov (pẽ).

Kỹ nĩgja sĩnvĩ ěn pẻnĩn ũ ag tóg nỹtĩ, ũ tỹ 4 (ke) ag, ũn kaně e tãvĩ ag. Ag kakã ki ag tóg kaně e nỹtĩ, kar kỹ ag pãnĩ tá ke gé. ⁷ Ag kãmĩ ũ tóg mĩg ve ri ke nĩ, kỹ ũ tóg monh tãg ve ri ke nĩ gé, kỹ ũ tóg ěg kakã ve ri ke nĩ, jãvo ũ tóg kónhkó mág tẻ tĩ ve ri ke nĩ. ⁸ Ag kar vỹ fẻr tỹ 6 (ke) nỹtĩ. Kỹ ag tóg ājag fẻr ki kaně e nỹtĩ gé, fẻr ven ja tá, ti kãtã ke gé. Kurã kar ki ag tóg jãn tĩ, kuty kar ki ke gé, jãn to krónh ke jãvãnh ag tóg nỹtĩ. Ag jãn hã vễ, ha mẽ: “ũn mág', mág', mág' vỹ tỹ ti nĩ, ěg jóg tỹ Topě ti, ũ tỹ nén kar han ki kanhró nĩ ěn ti. Vãsỹ tóg nĩ ja nĩgtĩ, kỹ tóg ũri nĩ gé, jãvo tóg kãtĩg ke mũ gé,” he ag tóg tĩ, jãn kỹ, nén nẻ tỹ 4 (ke) ěn ag. ⁹ Gen kỹ ag tóg Topě mỹ jãn tĩ, ti tỹ tỹ ũn mág nĩ ěn hã tỹ ag tóg jãn tĩ. Ti mỹ vĩ há han ag tóg tĩ. Ti mỹ ag tóg: “nén kar hyn han há ã tóg nĩ,” he tĩ. ũ tỹ nĩgja sĩnvĩ ěn kri nĩ mũ mỹ ag tóg jãn tĩ, ũn rĩr nĩ ěn mỹ. Ti rĩr nĩ vỹ tũg' henh ke tũ pẻ nĩ. ¹⁰ Ag tỹ ti mỹ jãn kỹ kófa tỹ 24 (ke) ěn ag vỹ mũgmũg ke tĩ, ũ tỹ nĩgja sĩnvĩ kri nĩ ěn krẻm. Mũgmũg ken kỹ ag tog ti mỹ: “Topě vỹ tỹ ã nĩ,” he tĩ, ũn rĩr nĩ ěn mỹ. Ti rĩr nĩ vỹ tũg' henh ke tũ pẻ nĩ. Kỹ ag tóg ājag krĩ tógfĩ ěn vin tĩ, nĩgja sĩnvĩ ěn krẻm. ¹¹ Ti mỹ ag tóg tag tóg tĩ, ha mẽ: “ěg Senhor vỹ tỹ ã nĩ, Topě vỹ tỹ ã nĩ. Nén ũ kar hyn han ja ã nĩgtĩ. To jykrén kỹ ã tóg nén ũ kar hyn han ja nĩgtĩ, hã kỹ tóg ki nỹtĩ, ã tỹ nén hyn han mũ kar

ën ti. Ā hã ne ã pir mÿ tá krÿg he mÿ', kÿ vënh kar vÿ ã mÿ vÿ há han ke mÿ, ã to: “ün mág vÿ tÿ ti nÿ,” hen kÿ, kÿ ag tóg ã vÿ ki króm tÿ gé,” he ag tóg tÿ, kófa ag, ù tÿ nÿgja sÿnvÿ kri nÿ ãn mÿ.

5

Jesus tÿ livro mãn

¹ Kÿ sóg livro vég mÿ, livro ën vÿ grÿn kÿ nÿ. Û tÿ nÿgja sÿnvÿ kri nÿ ãn vÿ livro ën mãn kÿ nÿ nÿ, ti pëgja tÿ. Kátá tóg rán kÿ nÿ, ti ven ja tá ke gé. Tógfÿn kÿ tóg nÿ nÿ, livro ti. Tógfÿn ja tÿ 7 (ke) tóg nÿ. Ti tógfÿn kri tóg go'or nÿ gé, ù tÿ kygväg tÿ nÿ jé. ² Kÿ sóg Topë tÿ jëñë jafã éhé tävÿ vég mÿ gé. Vÿ tóg mÿ, jamã hár(a), kÿ tóg: “ù nÿ hÿn tá krÿg mÿ, ti tógfÿn kavãn ti jé?” he mÿ.

³ Hã ra ag tóg ù tÿ tá krÿg mÿ vég tÿ nÿ, kanhkã tá, ëprã, vënh kuprÿg ag kãmÿ ke gé. Kÿ ù tÿ livro kavãn ke tóg tÿ tÿ, ti rá ve jé. ⁴ Kÿ sóg fÿ mÿ. Inh mÿ tóg e tÿ, ù tÿ livro kavãn ke tÿ tÿn kÿ, ëg tÿ ti rá ven jé. ⁵ Kÿ kófa ag kã ù tóg inh mÿ: “fÿ tÿg ra,” he mÿ. “Povo tÿ Judeu kãmÿ ün pir tóg mÿg tar ri ke nÿ, Davi krë'krë ag kã ün pir ën vÿ tóg vënh kar tÿ hën ri ke ja nÿ. Ën vÿ ti tógfÿn tÿ 7 (ke) ën kygvãn ki kanhró nÿ, kÿ tóg livro ki rá ën venh ke mÿ,” he tóg inh mÿ, kófa ti.

⁶ Kÿ sóg nÿgja sÿnvÿ ën jo cordeiro vég mÿ, mé krë ën ti. Nén në tÿ 4 (ke) ag vÿ ti pénÿn nÿtÿ, kófa ag ke gé, cordeiro ën pénÿn ag nÿtÿ. Kÿ tóg tÿ ag tÿ tãnh kÿ rÿr mãn ën ri ke jë. Nÿka tÿ 7 (ke) ti nÿ, kanë tÿ 7 (ke) ke gé, cordeiro ën ti. Topë kuprÿg to ken hã vë, ù tÿ 7 (ke) nÿ ve ën ti, hã vÿ: nÿka tÿ 7 (ke) mré kanë tÿ 7 (ke), he mÿ. Topë vÿ ti jëñë ja nÿ, ti tÿ ga kar mÿ tÿg jé, Topë kuprÿg ti. ⁷ Kÿ cordeiro ën vÿ ù tÿ nÿgja sÿnvÿ kri nÿ ãn tá jun mÿ, kÿ tóg ti ki livro ën mäg mÿ, ù tÿ ã pëgja tÿ livro mãn kÿ nÿ ãn ti ki. ⁸ Kÿ nén në tÿ 4 (ke) ën ag vÿ mügmüg ke kãn mÿ, kófa tÿ 24 (ke) ag ke gé, cordeiro ën krëm ag tóg mügmüg ke kãn mÿ sir. Kófa ag vÿ väkyn jafã tÿ harpa génh kÿ nÿtÿ. Pénky tÿ ouro génh kÿ ag nÿtÿ gé. Pénky ën kãki tóg fór nÿ, ti pÿn kÿ ger há han jafã ën tÿ, hã vÿ: ëg tÿ Topë mré vëmén tÿ, he mÿ. ⁹ Cordeiro ën mÿ ag tóg jãn mÿ, Jesus jé tag tó ag tóg mÿ, ha mÿ. “Ā hã ne tá krÿg mÿ,” he ag tóg mÿ. “Ā hã ne livro mãn kÿ ti tógfÿ kygväg mÿ ha'. Ā tén ja ag tóg, kÿ ã tóg ter kÿ ëprã ke ag kygÿm, Topë mÿ, pã'i ag kar krëm ke ag kãmÿ, vënh vÿ kar tó tÿ ag kãmÿ, nação kar ag kãmÿ, povo kar ag kãmÿ ã tóg ù ag kygÿm ja nÿgtÿ. ¹⁰ Ā tÿ ün kygÿm mÿ ag mÿ ã tóg vënh rãnhraj nÿm ja nÿ gé, ag tÿ ã mÿ ã tÿ ki rÿr jé, ag tÿ tÿ Topë camarada nÿtÿ jé. Kÿ ag tóg ëprã ke ag krÿg mÿ tÿ ün mág nÿtÿnh mÿ,” he ag tóg, kófa ag, jãnjan kÿ.

¹¹ Kÿ sóg Topë tÿ jëgnë jafã tÿ hën ri ke vég mÿ gé, mil tÿ mil tÿ hën ri ke. Ag e tävÿn ra ëg tóg ag nÿgkrén ke tÿ nÿ. Nÿgja sÿnvÿ ën jo ag tóg nÿtÿ, nén në tÿ 4 (ke) ën mré, kófa ag mré ke gé. ¹² Jãnjan kãn ag tóg mÿ gé, jamã hár(a), kÿ ag tóg: “cordeiro tag tén ja ag tóg nÿ, hã kÿ tóg ùri tÿ ün mág jë,” he mÿ. “Tÿ tóg vënh kar kri ke jë ha, rico tóg jë ha, ki kanhró tóg jë ha, tar tóg jë ha, tÿ tóg ün mág jë ha, sÿnvÿ tóg jë ha, vënh kar vÿ ti mÿ vÿ há han mÿ ha,” he ag tóg, Topë tÿ jëgnë jafã ag.

¹³ Kÿ vãhã kanhkã tãn kar ag vÿ jãnjan mÿ, ëprã ke kar ag ke gé, vënh kuprÿg kar ag ke gé, goj ki ke kar ag ke gé. Ag kar vÿ jãnjan mÿ ha, jamã hár(a), kÿ ag tóg: “ù tÿ nÿgja sÿnvÿ kri nÿ mÿ ãn mÿ ëg tóg vÿ há han ke mÿ ha, cordeiro ën mÿ ke gé,” he mÿ. “Ā jag pir mÿ ag tóg tÿ ün mág nÿtÿ, ā jag pir mÿ ag tóg sÿnvÿ nÿtÿ, vënh kar kri ke vÿ tÿ ag nÿtÿ, kÿ ag tóg tÿg' henh ke tÿ pë nÿ,” he ag tóg mÿ sir, vënh kar pë ti.

¹⁴ Kÿ nén në tÿ 4 (ke) ën ag vÿ tóg vÿ mÿ gé sir. “Hã vë,” he ag tóg mÿ. Kÿ kófa ag tóg mügmüg ke kãn mÿ sir, “Topë vÿ tÿ ã nÿ,” hen kÿ.

6

Jesus tÿ livro tógfÿ kygvãn

¹ Kÿ sóg cordeiro tÿ ti tógfÿ ve kavãn vég mÿ sir, ti tógfÿ tÿ 7 (ke) ën ag kã ün ve ën ti. Kÿ sóg nén në tÿ 4 (ke) ag kã ù vÿ mäg mÿ gé sir. Ti vÿ vÿ ta tÿ tÿrÿr he ri ke nÿ. “Tág',” he

tóg. ² Kÿ sóg vėsÿjãm êvãnh kÿ cavalo kupri vэг mÿ. Û tÿ kri nÿ vÿ vyj tÿ no rěr tÿ pэг jafã vÿn kÿ nÿ nÿ. Ti mÿ ag tóg krÿ tógfÿ jun mÿ, ti tÿ tÿ êprã ke kri ke jën kÿ. Kÿ tóg vënh kar ag tÿ ã krëm ke han ti mÿ.

³ Kÿ cordeiro vÿ ti tógfÿ ù kavãg mÿ gé. Ti tógfÿ régre tá krÿg vë sir. Kÿ nén në ag kãmÿ ù tóg: “tág’,” he mÿ gé. ⁴ Kÿ cavalo kusüg vÿ jun mÿ. Û tÿ kri nÿ mÿ ên mÿ ag tóg rógro tég jun mÿ, ti tÿ êprã ke ag tÿ jagnë kato vãsãnsãn han jé, êprã ke ag tÿ jagnë kãgtén jé sir.

⁵ Kÿ cordeiro ên tóg ti tógfÿ ù kavãg mÿ gé. Ti tógfÿ tãgtÿ tá krÿg vë sir. Kÿ nén në ag kãmÿ ù tóg: “tág’,” he mÿ gé. Kÿ sóg vėsÿjãm êvãnh kÿ cavalo sá vэг mÿ sir. Û tÿ kri nÿ ên vÿ êg tÿ nén ù kar kufyg jafã mãn kÿ nÿ nÿ, êg tÿ nén ù kar kãmÿn jafã ti. ⁶ Kÿ sóg nén në tÿ 4 (ke) ên kã vënh vÿ ù jëmëg mÿ gé, kÿ tóg: “trigo tÿ quilo pir mãn jé ag tóg ke mÿ, por dia kaja to,” he mÿ, “ke tÿ nÿn kÿ ag tóg cevada tÿ quilo tãgtÿ mãn ke mÿ, por dia kaja ên to. Azeite vóg tÿg nÿ hã ra, vinho vóg tÿg nÿ gé, ên vÿ kaja pir nÿnh mÿ,” he tóg mÿ, vënh vÿ ti.

⁷ Kÿ cordeiro ên tóg ti tógfÿ ù kavãg mÿ gé. Ti tógfÿ tÿ 4 (ke) tá krÿg vë sir. Kÿ nén në ag kãmÿ ù tóg: “tág’,” he mÿ gé. ⁸ Kÿ sóg cavalo ù vэг mÿ, hã ra tóg vëser jógtãnh ri ke nÿ. Û tÿ kri nÿ ên tóg êg tén tÿ, kÿ vënh kuprÿg ag vÿ ti nón kãmÿ mÿ gé, ti kãtig ên kã. Ag tÿ êprã ke ag tÿ vënh kãpóv tÿ 4 (ke) ag kã ti vënh kãpóv pir ag kãgtén ke vë, rógro tÿ, ag kókÿr tÿ ke gé, vënh kaga tÿ ke gé, mÿg tÿ ke gé.

⁹ Kÿ cordeiro vÿ ti tógfÿ ù kavãg mÿ gé. Ti tógfÿ tÿ 5 (ke) tá krÿg vë sir. Kÿ sóg nÿgja sÿnvÿ ên krëm êvãnh kÿ êprã ke ag kuprÿg vigvэг mÿ, ag tÿ Topë vÿ tugrÿn ùn kãgtén mÿ ag kar kuprÿg ti. Topë vÿ tó to krónh ke ja tÿ ag tóg nÿtÿ, hã kÿ ag tóg ag kãgtén ja nÿgtÿ, ù tÿ ag vÿ jëmë sór tÿ ên ag. ¹⁰ Ên ag vÿ jamã hár(a) tag tó mÿ, ha mÿ: “kake’,” he ag tóg mÿ. “Ûn mág vÿ tÿ ã nÿ. ã tÿ nén tó mÿ ên han ã tóg tÿ. Hã ra êg tóg hur ã tÿ nén han ke mÿ jãvãnh mág. ã mÿ kãnhmar êprã ke ag jÿkre tugnÿm sór tÿ, ã tÿ ag vóg kónãn jé, ag tÿ êg kãgtén ja tag tugrÿn?” he ag tóg mÿ, ag tÿ Jesus tugrÿn ùn kãgtén mÿ ên ag. ¹¹ Kÿ ag tóg ag mÿ kur kupri junjun mÿ sir, kÿ ag tóg ag mÿ: “toreg ver’,” he mÿ. “Û ag tóg nÿtÿ gé, ag tÿ ùn kãgtén mÿ ù ag. Ag tÿ ãjag kãgtén ja ri ke han ke vë, ãjag mré ke ù ên ag tÿ. Topë vÿ ag nÿgkré, kÿ tóg ki kanhró nÿ, ag tÿ ù tÿ hën ri ke kãgtén ke mÿn ki. Ag tÿ ãjag mré ke ên ag kãgtén kãn kar kÿ tóg ag jÿkre tugnÿm kãn ke mÿ, ha vemnÿ,” he tóg, ag tÿ ùn kãgtén mÿ ên ag mÿ.

¹² Kÿ sóg cordeiro ve mãn mÿ, kÿ tóg livro tógfÿ ù kavãg mÿ gé. Ti tógfÿ tÿ 6 (ke) tá krÿg vë sir. Kÿ ga tóg jÿrÿn ke mÿ ha. Rã vÿ kuty’ he mÿ, êg tÿ ù ter kÿ kur sá tu tÿ kuty ên ri ke. Kÿsã vÿ kusüg’ he mÿ gé. ¹³ Kÿ krÿg vÿ vár kãn ke mÿ gé. Kejën kãka tóg ka tÿ vÿryn vÿryn ke tÿ, kÿ ti kanë tóg vár kãn tÿ, ti tánh ra. Ge ti nÿgtÿ, krÿg vár kãn ke mÿ tag ti. ¹⁴ Kÿ kanhkã vÿ tÿg’ he mÿ gé, êg tÿ livro grÿn ên ri ke ti nÿ, kanhkã tÿg ti. Pãnónh vÿ tÿg kãn mÿ gé, goj vãso kar ke gé. ¹⁵ Êprã ke ag vÿ pãnónh nor krëm vënh pigjunh mÿ, pãró vãso krëm, pãnónh vãso krëm ke gé, pã’i ag, vënh kar kri ke ag, soldado ag pã’i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprã ke kar ag mÿr, ha mÿ. ¹⁶ Kÿ ag tóg pãnónh mÿ vÿ mÿ, pãró mÿ ke gé. “Ha êg kri vár, ha êg kri tÿ tam ké,” he ag tóg mÿ, ón kÿ, pãró mÿ. “Ha êg pigju. Cordeiro ên vÿ êg to jÿ mÿ, kÿ ù tÿ nÿgja sÿnvÿ kri nÿ ên vÿ êg ki êvãnh mÿ. Ag jo êg pigju,” he ag tóg mÿ ón kÿ, êprã ke kar ag, pãnónh kar mÿ. ¹⁷ “Ag tÿ êg to jÿnh ke vë. Pétëm ti huri, kurã kórég tag ti. Krenkren ke tÿ êg tóg nÿ,” he ag tóg mÿ, êprã ke kar ag, cordeiro ên jÿ kamëg kÿ.

7

Topë tÿ jënë jafã tÿ ùn e ag ránrán

¹ Kÿ sóg ga fyr mÿ êvãnh kÿ Topë tÿ jëgnë jafã tÿ 4 (ke) ag vigvэг mÿ. Ga péno tÿ 4 (ke) ki ag jëgÿg kÿ nÿtÿ. Kãka tÿ 4 (ke) vÿ tá nÿtÿ gé. Kÿ ag tóg kãka tÿ 4 (ke) ên ag ki rÿr nÿtÿ, kãka tÿ hë kãtã mÿ tÿ nÿ jé. Kÿ kãka tóg tÿ tÿ, ga kri, goj kri ke gé, ka kãmÿ ke gé. ² Rã jur ja tá sóg Topë tÿ jënë jafã ù kãtig vэг mÿ gé. Topë tÿ êg ránrán jafã ma tóg kãtÿ mÿ. Kÿ tóg kanhkã ra tãpÿry mÿ. Kÿ tóg Topë tÿ jëgnë jafã tÿ 4 (ke) ên ag mÿ vÿ mÿ. Topë vÿ ag

mỹ: “ga mré goj kókén nĩ,” he ja nĩ, ù tỹ 4 (ke) ên ag mỹ. ³ Kỹ ù tỹ vĕnh rán jafã ma kãtĩ mũ ên tóg ag mỹ: “toreg ver’,” he mũ. “Ga vóg tũg nĩ ver, goj ke gé, ka ke gé,” he tóg. “Ēg tỹ ver Topĕ camarada ag ránrán sór vĕ, vĕnh rán jafã tag ti tỹ, ag kakã ki,” he tóg, Topĕ tỹ jĕnĕ jafã ti, ù tỹ 4 (ke) ên ag mỹ. ⁴ Kỹ tóg ag rán tĩ mũ. Û tỹ 140 mil (ke) ag hã vĕ, fag mré hã, ti tỹ Israel krĕ'krĕ ag kar kãmĩ ùn ránrán mũ ag. Ti número mĕ inh. ⁵ Judã krĕ tỹ 12 mil (ke) tóg rán kỹ nỹtĩ, Rubem krĕ tỹ 12 mil (ke) ke gé, Gade krĕ tỹ 12 mil (ke) ke gé, ⁶ Aser krĕ tỹ 12 mil (ke) ke gé, Naftali krĕ tỹ 12 mil (ke) ke gé, Manassés krĕ tỹ 12 mil (ke) ke gé, ⁷ Simeão krĕ tỹ 12 mil (ke) ke gé, Levi krĕ tỹ 12 mil (ke) ke gé, Issacar krĕ tỹ 12 mil (ke) ke gé, ⁸ Zebulom krĕ tỹ 12 mil (ke) ke gé, José krĕ tỹ 12 mil (ke) ke gé, Benjamim krĕ tỹ 12 mil (ke) ke gé. Ēn ag ránrán kãn tóg mũ, Topĕ tỹ jĕnĕ jafã ti.

Ûn e tỹ Topĕ mỹ vĩ há han

⁹ Tag pãte sóg ùn tỹ hĕn ri ke ag vigvĕg mũ. E tãvĩn ag nỹtĩ, e tãvĩn, kỹ ù tỹ ag nĩgkrĕn ke tóg tũ tĩ. Tỹ ag ĕprã ke ja nỹtĩ. Nação kar kãmĩ ke ù ag vỹ tá nỹtĩ, pã'i kar krĕm ke ù ag ke gé, povo kar kãmĩ ù ag ke gé, vĕnh vĩ kar tó tĩ ag kãmĩ ù ag ke gé. Kur kupri rĩnh kỹ ag tóg nỹtĩ, ùn e ĕn ag. Nĩgja sĩnvĩ ĕn pĕnĩn ag tóg jĕgĕg kỹ nỹtĩ, cordeiro rĩnve tá, tãnh fĕj génh kỹ ag tóg nỹtĩ. ¹⁰ Ēn ag vỹ jamã hár(a): “Topĕ hã vỹ ĕg krenkren han mũ,” he mũ. “Û tỹ nĩgja sĩnvĩ kri nĩ ĕn vỹ ĕg krenkren han mũ, cordeiro ti ke gé,” he ag tóg mũ, jamã hár(a), ùn e ĕn ag.

¹¹ Topĕ tỹ jĕgnĕ jafã kar ag vỹ nĩgja sĩnvĩ ĕn pĕnĩn nỹtĩ gé, ùn e ĕn ag mré. Kófa ĕn ag pĕnĩn ag nỹtĩ, nĕn nĕ tỹ 4 (ke) ĕn ag pĕnĩn ke gé. Nĩgja sĩnvĩ ĕn krĕm ag tóg mũgmũg ke mũ, kỹ ag tóg ù tỹ kri nĩ ĕn mỹ: “Topĕ vỹ tỹ ã nĩ,” he mũ. ¹² Kỹ ag tóg: “ha vé, vĕnh kar jé Topĕ hã mỹ vĕnh vĩ há tó,” he mũ. “Topĕ hã vỹ sĩnvĩ jĕ, Topĕ hã vỹ ki kanhró nĩ, Topĕ hã mỹ ĕg tóg vĕnh vĩ há tó tĩ. Tỹ tóg ùn mág jĕ, vĕnh kar kri tóg jĕ, tar tóg jĕ, Topĕ ti, ùri, kỹ tóg tũ' hĕnh ke tũ nĩ gé. Hã vĕ,” he ag tóg mũ, Topĕ tỹ jĕgnĕ jafã ag.

¹³ Kỹ kófa ĕn ag kã ù tóg inh mỹ: “ag tỹ hĕ ri ke nĕ hỹn, hã kỹ ag tóg kur kupri rĩnh kỹ nỹtĩ?” he mũ. ¹⁴ Kỹ sóg ti mỹ: “inh pi(jé) ki kanhró nĩ,” he mũ. “Ā hỹn tóg ki kanhró nĩ,” he sóg ti mỹ. Kỹ tóg inh mỹ: “nĕn ù jagy mág pĕ ve ja ag tóg nỹtĩ, cordeiro tugrĩn,” he mũ. “Ag vóg kónãn jagy han ja ag tóg. Ag kur kygfa ag, cordeiro kyvĕnh tỹ, kỹ tóg kupri nỹtĩ, ag kur ti. ¹⁵ Kỹ ag tóg Topĕ nĩgja sĩnvĩ pĕnĩn nỹtĩ. Ti rãnrãj han ag tóg tĩ, kurã kar ki, kuty ki ke gé, ti ĩn krĕm. Û tỹ nĩgja sĩnvĩ kri nĩ ĕn vỹ ag jy nĩgãn mũ. ¹⁶ Ag pi(jé) kókir mãn ke mũ', ag pi(jé) og'og sór mãn mũ'. Rã vỹ ag ki hupũn mãn ke tũ nĩ ha, nĕn ù gru ke gé, ¹⁷ cordeiro tỹ ag ki rĩr kỹ, ù tỹ nĩgja sĩnvĩ tá jĕ ĕn ti. Ag tatĩ tĩg jé tóg ke mũ, goj nĩhỹg ja ra, goj tỹ ag rĩnrĩr han mũ ĕn ra tóg ag tatĩ tĩg ke mũ. Topĕ vỹ ag kygfỹ tỹ tũg' hĕnh ke mũ,” he tóg inh mỹ, kófa ti, ùn e ĕn ag to.

8

Jesus tỹ livro tógfĩ tỹ ĕgno kavãn

¹ Kỹ cordeiro vỹ livro tógfĩ tỹ ĕgno kavãg mũ. Ti tógfĩ tỹ 7 (ke) tá krỹg hã vĕ. Kỹ tóg katy' he mũ, kãnhkã tá, meia hora ki. ² Kỹ sóg Topĕ tỹ jĕgnĕ jafã tỹ 7 (ke) ag vég mũ. Ag mỹ ag tóg trombeta tỹ 7 (ke) junjun mũ. Topĕ nĩgja sĩnvĩ jo ag tóg nỹtĩ.

³ Kỹ Topĕ tỹ jĕnĕ jafã ù tóg tá jun mũ gé, kỹ tóg ouro tỹ pĕnky ma kãtĩ mũ, ĕg tỹ pĕnky ki Topĕ mỹ ti ger há pũn jafã ĕn ti. Nĩgja sĩnvĩ ĕn to tóg jĕ mũ, Topĕ tỹ jĕnĕ jafã ti. Kỹ ag tóg ti mỹ ka jĕnjo ger há tỹ hĕn ri ke jun mũ, ti tỹ Topĕ mỹ pũn jé, Topĕ nĩgja to jĕn kỹ. Ēprã ke tỹ Topĕ ki ge kỹ nỹtĩ kar ag tóg Topĕ mré vĕmĕn tĩ. Ag vĩ ja ĕn mré tóg ti ger há ĕn pũn sór mũ, Topĕ mỹ, Topĕ tỹ jĕnĕ jafã ti. ⁴ Kỹ tóg sir pũn mũ, Topĕ kato jĕn kỹ. Kỹ ti ger há ĕn tóg kynhmỹ tãpny mũ sir, Topĕ tũ ag tỹ ti mré vĕmĕn ja ĕn mré hã. ⁵ Kỹ Topĕ tỹ jĕnĕ jafã ĕn tóg pĕnky ĕn fãn mũ, prãnh gru tỹ. Topĕ mỹ nĕn ù kar pũn jafã tá tóg prãnh gru ĕn mág mũ, kỹ tóg pĕnky kãkã nĩm mũ. Kỹ tóg ga kri ti fón mũ sir, pĕnky ti, prãnh gru tỹ kãkã nĩn kỹ. Kỹ ta tóg kómkom ke kỹ tỹrỹr he mũ, jũ kỹ tóg mrãrãn ke mũ gé, ga kri. Kỹ ga tóg jũrũn ke mũ gé sir.

Ag tỹ trombeta kynkyn

⁶ Kĩ Topẽ tỹ jẽgnẽ jafã tỹ 7 (ke) ẽn ag tóg vẽnĩ kãn mũ sir, ag tỹ trombeta kynkyn jé. ⁷ Kĩ ùn tóg ã tũ kyn vén mũ. Kĩ nãfy tóg ẽprã ke ag kri vár mũ, pĩ mré hã, vẽnĩ kyvẽnĩ mré hã ke gé. Kĩ ka vẽnĩ kãpów tãgtũ ag kã ti vẽnĩ kãpów pir tóg kugpũr kãn mũ, ga vẽnĩ kãpów pir ke gé. Re vỹ pũr kãn pẽ han mũ sir.

⁸ Kĩ Topẽ tỹ jẽgnẽ jafã tỹ 7 (ke) ẽn ag kã ù tóg trombeta kyn mũ gé. Trombeta régre tá krỹg vẽnĩ sir. Kĩ nẽn ù tóg goj kafã tũ ki kutẽ mũ, hã ra tóg tỹ pãnónh gru nĩ ve nĩ, pãnónh mág tãvĩ. Kĩ goj vẽnĩ kãpów tãgtũ ag kã ti vẽnĩ kãpów pir tóg vẽnĩ kyvẽnĩ ri ke nĩ ha. ⁹ Goj ga vẽnĩ kãpów tãgtũ ag kã ti vẽnĩ kãpów pir tóg kãgter kãn mũ gé. Goj kri mũ mũ ẽn, barco ẽn vẽnĩ kãpów tãgtũ ag kã ti vẽnĩ kãpów pir tóg tũ' he kãn mũ gé, pãnónh ẽn tigrĩn.

¹⁰ Kĩ Topẽ tỹ jẽgnẽ jafã tỹ 7 (ke) ẽn ag kã ù tóg trombeta kyn mũ gé. Trombeta tãgtũ tá krỹg vẽnĩ sir. Kĩ krĩg mág pẽ tóg kanhkã tá kãtère mũ, hã ra tóg gru nĩ, pĩ gru ẽn ri ke. Kĩ tóg ẽganẽ vẽnĩ kãpów tãgtũ ag kã ti vẽnĩ kãpów pir kri kutẽ mũ, goj nĩhỹg vẽnĩ kãpów tãgtũ ag kã ti vẽnĩ kãpów pir kri ke gé. ¹¹ Krĩg ẽn jyjyn hã vỹ: “Fa,” he mũ. Kĩ goj ẽn tóg fa nĩ sir. Kĩ ẽprã ke tỹ hẽn ri ke ag kãgter mũ, goj kórég ẽn kron kỹ.

¹² Kĩ Topẽ tỹ jẽgnẽ jafã tỹ 7 (ke) ẽn ag kã ù tóg trombeta kyn mũ gé. Trombeta tỹ 4 (ke) tá krỹg vẽnĩ sir. Kĩ nẽn ù tóg rã kókég mũ, kỹ jẽngrẽ tóg sĩ' he mũ ha, kysã jẽngrẽ ti ke gé, krĩg kar jẽngrẽ ti ke gé. Jẽngrẽ vẽnĩ kãpów tãgtũ ag kã ùn pir tóg tũg' he mũ ha. Kĩ kurã tóg sĩ nỹ ha, jãvo kuty tóg kuty tãvĩ nỹ ha.

¹³ Kĩ sóg kónhkó mág vég mũ, ti tẽ tĩn kỹ, kynhmỹ. Ẽn vỹ jamã hár(a) prẽr mũ. “!..Jagy ti tĩnh mũ, jagy ti tĩnh mũ, jagy ti tĩnh mũ, ẽprã ke ag mỹ..! !..Topẽ tỹ jẽgnẽ jafã tãgtũ ù ag vỹ ãjag tũ ti kynkyn ke mũ ha, kỹ tóg kórég tãvĩ nỹnh mũ ha, ẽprã ke ag mỹ..!” he tóg mũ, kónhkó mág ti.

9

¹ Kĩ Topẽ tỹ jẽgnẽ jafã tỹ 7 (ke) ẽn ag kã ù tóg trombeta kyn mũ gé. Trombeta tỹ 5 (ke) tá krỹg vẽnĩ sir. Kĩ sóg krĩg vég mũ. Kanhkã tá tóg kãtère ja nĩ, ẽprã, krĩg ẽn ti. Kĩ ag tóg ti mỹ nũgme nón jafã fig mũ, chave ti, krĩg ẽn mỹ. ² Kĩ tóg róm mũ sir, nũgme ti, hã ra nĩja tóg tá tũmtũm ke mũ, nĩja tar pẽ. Kĩ rã tóg kuty' he mũ, nĩja ẽn to. Ga kri tóg kuty' he kãn mũ. ³ Nĩja ẽn kãtã tóg vãhã kãpa mũ, tỹ ópã tỹ hẽn ri ke nỹtĩ ve ti, hã ra tóg pỹn kakrã tar ri ke nỹtĩ, tỹ ópã nỹtĩ ve ẽn ti. ⁴ Ti pi(jé) re ko tĩ', ti pi(jé) ka féj ko tĩ', ti pi(jé) ẽkré ko tĩ gé'. Ti tỹ ẽprã ke ag mỹ vẽnĩ kaga han kãtĩg vẽnĩ. Ẽprã ke ù ag tóg tỹ Topẽ tỹ rágrã tũ nỹtĩ, ag kakã ki. Ẽn ag mỹ vẽnĩ kaga han jé ag junjun mũ, tỹ ópã nỹtĩ ve ẽn ag. ⁵ Ag pi(jé) ẽprã ke ag kãgtén mũ hã ra'. Kysã tỹ 5 (ke) ki ag tóg ẽprã ke ag mỹ vẽnĩ kaga nĩm mũ. Ag tỹ ag vóg kỹ tóg pỹn kakrã tỹ ẽg tugtãn ri ke nĩ, ti kaga ti. ⁶ Kĩ ẽprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tỹ 5 (ke) ẽn ki. Ag tỹ ter sór mũ ra ag tóg ter ke tũ pẽ nĩ.

⁷ Ópã ẽn tóg tỹ cavalo nỹtĩ ve nĩ, cavalo tỹ vẽnĩ génh mũnh ke ri ke tóg nỹtĩ. Ouro tỹ krĩ tógfĩ ag tóg nỹtĩ. Ag kakã vỹ ẽg kakã ri ke nĩ. ⁸ Ag gãnh vỹ fag gãnh téj ri ke nĩ gé. Ag jã vỹ mĩg jã ri ke nĩ. ⁹ Ag fe fár tóg ferro tỹ camisa ri ke nĩ. Ag fẽr tỹ rãnrãnh he tóg mẽ há tĩ, kỹ tóg cavalo tỹ hẽn ri ke tỹ carroça tỹ hẽn ri ke nỹgnỹn ri ke nĩ, ag tỹ vẽnĩ génh mũnh ken kỹ. ¹⁰ Ag my kã tóg nĩ, ag préj ti, pỹn kakrã préj ri ke ti. Ag my tỹ ag tóg ẽprã ke ag vóg kónãn tĩ, kysã tỹ 5 (ke) ki. ¹¹ Û tỹ nũgme ki rĩr tĩ ẽn, ù tỹ Topẽ tỹ jẽnẽ jafã ri ke nĩ ẽn vỹ tỹ ag pã'i mág nĩ, ópã ẽn ag pã'i mág. Hebreu ag vĩ ki ti jiji vỹ: Abadom, he mũ, kỹ tóg Grego ag vĩ ki: Apolião, he mũ, hã vỹ: nẽn ù kar kókég tĩ, he mũ, ẽg vĩ ki, hã vỹ: Apolião, he mũ.

¹² Nẽn jagy ve ve inh huri, sỹ nẽn jagy régre venh ke nẽ ha.

¹³ Kĩ Topẽ tỹ jẽgnẽ jafã tỹ 7 (ke) ẽn ag kã ù tóg trombeta kyn mũ gé. Trombeta tỹ 6 (ke) tá krỹg vẽnĩ sir. Kĩ sóg vẽnĩ vĩ mẽg mũ. Topẽ mỹ nẽn ù pũn jafã tỹ ouro tá tóg mẽ há tĩ, vẽnĩ vĩ ti. Mesa ẽn péno tỹ 4 (ke) ki, mesa tỹ Topẽ jo jẽ ẽn ki tóg mẽ há tĩ, vẽnĩ vĩ ti. ¹⁴ Vẽnĩ vĩ ẽn tóg ù tỹ ùri kyn mũ ẽn mỹ: “Topẽ tỹ jẽgnẽ jafã tỹ 4 (ke) ẽn kygvãn tĩg,”

he mũ. “Ũ tỹ goj mág tỹ Eufrates tá sigse kỹ nỹtĩ ên ag kygvãn tĩg,” he tóg. ¹⁵ Kỹ tóg ag kygvãn tĩ mũ, ù tỹ 4 (ke) ên ag. Tá ag tóg jãvãnh nỹtĩ ja nĩgtĩ, ag tỹ êprã ke tỹ hên ri ke ag kãgtén jé. Topẽ vỹ ag mỹ ag tỹ prỹg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mũ ên nĩm ja nĩ. Êprã ke vênh kãpóv tãgtũ ag kã ùn pir ag kãgtén kãn jé ag tóg ke mũ, Topẽ tỹ jëgnẽ jafã tỹ 4 (ke) ên ag. ¹⁶ Ag krêm soldado ag número mẽ inh, ù tỹ cavalo kri mũgtĩ ag. 200 mil (ke) ag nỹtĩ, ag krêm soldado ag. ¹⁷ Kỹ sóg ag vég mũ, soldado tỹ cavalo kri mũ mũ ag. Ferro tỹ camisa ag nỹtĩ, kỹ ù ag tóg kusũg nỹtĩ, pĩ kusũg ri ke, ù ag tóg tánh nỹtĩ, pó tỹ safir tánh ri ke, ù ag tóg māréro nỹtĩ, pó tỹ enxofre māréro ri ke. Cavalo krĩ vỹ mĩg krĩ ri ke nỹtĩ. Ag jënkã tá pĩ gru tóg kãkutẽ mũ, nĩja ke gé, pó tỹ enxofre nĩja ke gé, vãn pũr nĩja ri ke ên ti. ¹⁸ Tag tỹ ag tóg êprã ke ag kãgtén ke mũ, pĩ tỹ, nĩja tỹ, pó tỹ enxofre nĩja tỹ ke gé, cavalo ag. ¹⁹ Nén tỹ cavalo jënkã tá kãkutẽ mũ ên vỹ êprã ke ag kãgtén ke mũ, kỹ ag my vỹ ag kãgtén ke mũ gé. Ag my vỹ tỹ pỹn hã ve nĩ, pỹn krĩ. Ên tỹ ag tóg êprã ke ag kókén ke mũ gé, ag my tỹ.

²⁰ Êprã ke ù ag tóg hã ra krenkren ke mũ ver. Ag kãgtén kãn ke tũ ag tóg nĩ ver. Kỹ ùn krenkren mũ ag pi(jé) Nén-Kórég ag tovãnh mũ', vênh kãggrã tovãnh tũ ag nỹtĩ, ouro tỹ vênh kãggrã ên, prata tỹ vênh kãggrã ên, ferro kusũg tỹ vênh kãggrã ên, pó tỹ vênh kãggrã ên, ka tỹ vênh kãggrã ên ke gé. Ver ag tóg tag kar to: “Topẽ vỹ tỹ ti nĩ,” he tí gé. Ag tỹ vêsóg ki vênh kãggrã hyn han mũ ra tóg ag mỹ tỹ Topẽ nĩ ve nĩ, ti kanẽ tũ ra, ti nĩgrêg nor tũ ra, ti tỹ ã pên tỹ tĩg vãnh (hã) ra. ²¹ Ag pi(jé) ag jykre tovãnh sór mũ', êprã ke krenkren mũ ên ag. Jagnẽ kãgtén ag tóg mũgtĩ, kujã jykre han ag tóg mũgtĩ, curandeiro jykre ên ti. Ājag prũ tũ fag mré ag tóg nỹgnỹ mũgtĩ, ājag mén tũ ag mré fag tóg nỹgnỹ mũgtĩ gé, jagnẽ tỹ nén ù pigju(g) ag tóg mũgtĩ gé, êprã ke ag.

10

Livro sĩ

¹ Kỹ sóg Topẽ tỹ jënë jafã tar ù vég mũ. Kanhkã tá tóg kãtére mũ, êprã. Kanhkã góg vỹ ti kri rũm kỹ nỹ nĩ. Ti krĩ kri ta no tóg vênh ven mũ. Ti kakã vỹ rã ri ke nĩ, ti fa vỹ pĩ gru ri ke nỹtĩ, ti fa jëngrẽ ti. ² Livro sĩ mãn kỹ tóg jẽ nĩ, livro tỹ jén ke kỹ tóg ma jẽ nĩ. Ā pëgja tỹ tóg goj kafã tũ sãn mũ, kỹ tóg ã jakãnh tỹ ga sãn mũ. ³ Prër tóg mũ sir, jamã hár(a), kỹ tóg tỹ mĩg kyr mẽ tĩ, ti prër ti. Kỹ ta tỹ tỹrỹr he tỹ 7 (ke) vỹ ti vĩ kafãnh mũ, jamã hár(a). ⁴ Kỹ sóg ta tỹ tỹrỹr he mũ vĩ ên rán sór mũ. Hã ra ù tỹ kanhkã tá vĩ mũ tó inh mỹ: “rán tũg nĩ,” he mũ. “Ta tỹ tỹrỹr he mũ ên vĩ tó sór tũg nĩ, ù mỹ,” he tóg.

⁵ Kỹ Topẽ tỹ jënë jafã ên, ù tỹ goj mré ga kri jẽ mũ ên tóg ã nĩgé tỹ kanhkã ki ven mũ, ã pëgja tỹ. ⁶ Kỹ tóg: “sỹ ki hã tónh ke vẽ,” he mũ. “Topẽ vỹ ki kanhró nĩ, sỹ ki hã tó mũn ki,” he tóg. “Ũn rĩr nĩ ên vỹ ki kanhró nĩ, ùn ter vãnh ên vỹ ki kanhró nĩ, ù tỹ kanhkã han mũ ên vỹ ki kanhró nĩ, ù tỹ ga han mũ ên ti, ù tỹ goj han mũ ên ti, ù tỹ ùn rĩnrĩr nỹtĩ kar ag hyn han mũ ên ti. Ên hã vỹ isỹ ki hã tó mũ ki kanhró nĩ,” he tóg. “Ha vé, ã tỹ nén han ke mũ ên tovãnh mãn ke tũ ti nĩ ha, Topẽ ti. ⁷ Ti tỹ jëgnẽ jafã tỹ 7 (ke) ên ag kã ù vỹ trombeta kyn ke mũ, kỹ tóg ù tỹ 7 (ke) tá krỹg ke mũ. Ti tỹ kyn kỹ Topẽ vỹ ã tỹ nén han sór mũ ên han ke mũ ha, ã tỹ vãsỹ to jykren mũ ên ti. Hã tó ja ti nĩ, ti rãnhřãj han tĩ ag mỹ, ti vĩ tó tĩ ag mỹ ke gé, Topẽ ti,” he tóg, Topẽ tỹ jënë jafã ti.

⁸ Kỹ kanhkã tá ke ù tóg inh mré vëmén mãn mũ. Inh mỹ tóg: “ha tĩg,” he mũ. “Livro sĩ tỹ jén ke kỹ nĩ ên mãn tĩg,” he tóg. “Ũ tỹ goj mré ga sãn kỹ jẽ ên ki livro mãn tĩg,” he tóg, kanhkã tá ke ên ti. ⁹ Kỹ sóg ti ra tĩ mũ, kỹ sóg ti mỹ livro to vĩ mũ. Kỹ tóg inh mỹ: “té, ko ra,” he mũ. “Mỹg ri ke ti nĩ, ã tỹn kon kỹ. Ko kar kỹ tóg hã ra fa nĩnh mũ, ha vemnĩ,” he tóg. ¹⁰ Kỹ sóg livro sĩ ên mãn kỹ ko mũ. Kỹ tóg mỹg ri ke nĩ. Isỹn ko kar kỹ tóg fa nĩ sir.

¹¹ Kỹ ù tóg inh mỹ: “Topẽ tỹ nén hyn han ke mũ tó mãn jé ã tóg ke mũ,” he mũ. “Ti tỹ povo kar ag tỹ nén hyn han ke mũ tó jé ã tóg ke mũ, ti tỹ nação kar ag tỹ nén hyn han ke mũ ên ti, ti tỹ pã'i krêm ke kar ag tỹ nén hyn han ke mũ ên ti, ti tỹ pã'i kar ag tỹ nén hyn han ke mũ ên ti ke gé,” he tóg, vênh vĩ ti.

11

Û tỹ Topẽ vĩ tó tĩ ag

¹ Kỹ ag tóg inh mỹ vãn jun mũ, vãn tỹ nén ù kãmun jafã ti. Kỹ ù tóg inh mỹ: “tág’,” he mũ. “Topẽ jo ìn kãmun nĩ, Topẽ mỹ nén ù pũn jafã mré hã. Û tỹ krêm Topẽ mré vémén kỹ nỹtĩ ên ag nĩgrén nĩ gé. ² Topẽ jo ìn vãso ên kãmun tũg nĩ hã ra. Fóg ag tũ vễ, kỹ kãmun tũg nĩ. Kysã tỹ 42 (ke) ki fóg ag tóg cidade ên kókén ke mũ, Topẽ tỹ cidade ù to: isũ vễ, he mũ ên ti. ³ Û tỹ inh vĩ tó tĩ régre ag jěgně jé sóg ke mũ. Ęg tỹ nén ù tỹ ěg mỹ e nĩn kỹ kur kórég rĩg tĩ ên rĩnh jé ag tóg ke mũ, sacco ên, ùn régre ên ag. Isỹ ag mỹ nén tónh ke mũ ên tó jé ag tóg ke mũ, kurã tỹ 1260 (ke) ên ki,” he tóg inh mỹ, ag kãmĩ ù ti.

⁴ Topẽ vĩ tó tĩ régre ên ag vỹ Topẽ vĩ to tar nỹtĩ, ka tỹ oliveira tar nĩ ên ri ke ag nỹtĩ. Topẽ vĩ tó ag tóg tĩ, kỹ ag tóg néj gru ri ke nỹtĩ, néj tỹ kri fěg jafã ên kri nỹtĩn kỹ. Û tỹ ěprã ke ag kri ke ên rã hã ti nỹtĩ, vela tỹ kri fěg jafã régre ên ag. Tag ri ke ag nỹtĩ, Topẽ vĩ tó tĩ régre ên ag. ⁵ Û tỹ ag kato vãsãn kỹ ag tóg pĩ tỹ ag jěnkã tá kãkutě mũ ên tỹ ag tỹ tũ’ he tĩ, ù tỹ ag kato vãsãnsãn mũ ag tỹ. Hã kỹ ag kãgter kãn’ he tĩ, ù tỹ ag vóg kónãn sór mũ ag. ⁶ Ag tỹ Topẽ vĩ tón kỹ ag tóg ag tỹ ta kutě kaměg sór kỹ ti kutě kaměg tĩ, kỹ tóg kutě tũ nĩgtĩ. Kỹ, ag tỹ goj tỹ vễnh kyvénh ri ke han sór kỹ ag tóg tỹ vễnh kyvénh ri ke han tĩ gé. Ag tỹ ga kri ke ag vóg kónãn sór kỹ ag tóg ag vóg kónãn tĩ gé. Nén ù jagy tỹ hěn ri ke han ag tóg tĩ, Topẽ vĩ tó tĩ régre ên ag.

⁷ Kejěn ag tóg kãmén kãn mũ sir, Topẽ tỹ ag mỹ nén tó mũ ên ti. Kỹ nũgme tá mĩg tóg kãkutě mũ, kỹ tóg ag to rá ke mũ. Ag tỹ hě nỹ ri ken kỹ tóg ag kãgtén mũ, mĩg ên ti. ⁸ Ājag kãgter kỹ ag tóg cidade kuju tá vár kỹ nỹtĩ nĩ, ěg Senhor tỹ cidade tá ka to sa ja ên tá. Cidade ên tá ke ag jykre tóg cidade tỹ Sodoma tá ke ag jykre ri ke nĩ, ga tỹ Egito tá ke ag jykre ri ke ti nĩ gé. ⁹ Kurã tãgtũ mré kurã kuju ki ag tóg věser ên vĩgvég mũ. Vễnh kar ag vỹ ag vĩgvég mũ, povo kar ag, pã’i krêm ke kar ag, vễnh vĩ kar tó tĩ ag kar ke gé. Ag pi(jé) ga krêm ag pigjunh ke mũ’, věser ên ag. ¹⁰ Ęprã ke kar ag mỹ tóg sér tĩ, ag kãgter ti. Festa mág han ag tóg mũ. Jagně mỹ ag tóg presente jěgněg mũ. Topẽ vĩ tó tĩ tag ag vỹ ěprã ke ag vóg kónãn jagy han ja nĩgtĩ, hã kỹ ag kãgter tóg vễnh kar mỹ sér gy tĩ sir.

¹¹ Kurã tãgtũ kri kurã kuju tũg kỹ Topẽ tóg hã ra ag rĩn mãn mũ sir, ti kuprĩg tỹ. Kỹ vễnh kar ag tóg jũrũn ke pẽ han mũ sir. ¹² Kỹ kanhkã tá vễnh vĩ tóg ag mỹ mẽ há tĩ, Topẽ vĩ tó tĩ régre tag ag mỹ. Kỹ tóg ag mỹ: “kunĩg,” he mũ. Kỹ ag kato vãsãnsãn mũ ag vỹ ag tỹ kanhkã ra jãpry vég mũ sir, kanhkã góg kãmĩ. ¹³ Kỹ ga tóg jũrũn ke mũ sir. Cidade tá ìn kókég tóg mũ, ga tỹ jũrũn ke ti. Ìn vễnh kãpóv tỹ 10 (ke) ag kã ùn pir kókén kãn tóg mũ. Ęprã ke tỹ mil tỹ 7 (ke) vỹ kãgter mũ, ên kã. ùn kãgter tũ ag kaně tóg jur mũ. Ag mũměg vỹ ag kãgtén kren mũ. Kỹ ag tóg Topẽ to: “ùn mág vỹ tỹ ti nĩ,” he mũ vãhã. “Tar ti nĩ, ù tỹ kanhkã tãn ag kri nĩ ên ti,” he ag tóg mũ vãhã.

¹⁴ Nén jagy ù vỹ hur tũ’ hé. Nén jagy ù tóg ver kã nĩ nĩ.

Trombeta tỹ ěgno kyr

¹⁵ Kỹ Topẽ tỹ jěgně jafã tỹ 7 (ke) ên ag kã ù tóg trombeta kyn mũ gé sir. Trombeta tỹ 7 (ke) tá krỹg vễ. Kỹ kanhkã tá vễnh vĩ tỹ hěn ri ke tóg mẽ há nỹtĩ. “Vãhã tóg ěprã ke kar ag kri tỹ ùn mág jě, Topẽ ti, ěg Senhor ti ke gé,” he ag tóg, ù tỹ kanhkã tá vĩ mũ ag. “Vãhã ag tóg nén ù kar ki rĩr nỹtĩ ha, Topẽ ti, ã kósin mré, kỹ tóg tũ’ henh ke tũ nĩ, ag rãnrãj ti,” he ag tóg, ù tỹ kanhkã tá vĩ mũ ag.

¹⁶ Kỹ kófa tỹ 24 (ke) ên ag, ù tỹ Topẽ mré Ājag nĩgja kri nĩgnĩ kỹ nỹtĩ ên ag vỹ ti krêm mũgmũg ke kãn mũ. Kỹ ag tóg Topẽ mỹ: “Topẽ vỹ tỹ ã nĩ,” he mũ sir. ¹⁷ Jãn ag tóg mũ gé sir, ha mẽ. “Topẽ, pã’i mág, nén ù kar han há ã tóg nĩ,” he ag tóg mũ, jãn kỹ. “Vãsỹ ã tóg nĩ nĩ, kỹ ã tóg ùri nĩ nĩ gé. Ęg mỹ tóg sér tĩ, ã tỹ tỹ pã’i mág nĩn kỹ, ã tỹ vễnh kar ki rĩr kỹ tóg sér pẽ tĩ. Ā tar nĩ kỹ ã tóg pã’i ù ag pan kãn. ¹⁸ Ag to jũ jé ã tóg ke mũ ha. ùn kãgter ja ag jykre tugnỹm kãn jé ã tóg ke mũ ha. Povo kar vỹ ã kato vãsãnsãn ja nĩgtĩ, kỹ ã tóg ag kato vãsãn mũ ha. Ā kurã vỹ hur jun, kỹ ã tóg ã rãnrãj han tĩ ag mỹ ag rãnrãj kaja ti ven ke mũ, ã vĩ tó tĩ ag mỹ ke gé, ã tũ kar ag mỹ, ùn mág ag mỹ, ùn kãsir ag mỹ, ù tỹ ã

kamĕg nŷtŷ kar ag mŷ ă tóg ag rănhrăj kaja ven ke mŷ ha. Ă kură vŷ hur jun, kŷ ă tóg ũ tŷ ěpră ke ag kókén ja ěn ag kókén kăn ke mŷ ha,” he ag tóg mŷ, kófa tŷ 24 (ke) ěn ag.

¹⁹ Kŷ ũ tóg Topĕ jo ĩn nón mŷ, ĩn tŷ kanhkă tá jĕ ěn. Kŷ Topĕ jo ĩn jănkă róm kŷ jĕ kŷ Topĕ caixa ěn tóg ve há' he kŷ nŷ nŷ, Topĕ tŷ ă tŷ ag mré jykrén kŷ ag mŷ caixa fig mŷ ěn ri ke ti. Kŷ ta tóg kómkóm ke mŷ, tŷrŷr he ke gé. Ga vŷ ragra ke jagy han mŷ sir, kŷ năfy vŷ văr mŷ gé sir, năfy mág.

12

Mĭg fĕr kăme

¹ Kŷ kanhkă tá nĕn ũ vĕnh mŷ tóg vĕnh ven mŷ. Ũn tŷtă fi vŷ tóg vĕnh ven mŷ. Kŷ ră tóg fi mŷ tŷ fi kur nŷ. Kysă săn kŷ fi tóg jĕ nŷ. Fi krŷ tógfŷ vŷ krŷg tŷ há nŷ, krŷg tŷ 12 (ke) tŷ. ² Kufy fi tóg jĕ nŷ, hă ra fi tóg kaga mŷ, kŷ fi tóg jagtar nŷ sir.

³ Kŷ kanhkă tá nĕn ũ ũ tóg vĕnh ven mŷ gé. Mĭg fĕr kusŷg tóg vĕnh ven mŷ. Ă pir ra tóg krŷ tŷ 7 (ke) nŷ, nŷka tŷ 10 (ke) ti nŷ gé. Ti krŷ tógfŷ tóg nŷtŷ, ti krŷ tŷ 7 (ke) to. ⁴ Ă my tŷ tóg krŷg tŷ hĕn ri ke kókég mŷ, kŷ tóg ěpră văr mŷ, krŷg tŷ hĕn ri ke ti. Krŷg vĕnh kăpóv tăgtŷ ag kă ũn pir kókén kăn tóg mŷ. Kŷ tóg ũn tŷtă ěn fi jo tá jĕ nŷ, fi kósin tŷ mur ken kŷ, mĭg fĕr kusŷg ěn ti. Ti tŷ fi kósin măn sór vĕ, ti mur kŷ. ⁵ Kŷ tóg mur mŷ sir, fi kósin ti, hă ra tóg gré nŷ. Tŷ tóg pă'i mág pĕ jĕnh ke mŷ, ěpră ke kar kri. Ag kri jĕn kŷ tóg ag mŷ vŷ tar gy han ke mŷ. Ti mur kŷ ag tóg kanhkă ra ti va mŷ mŷ, Topĕ nĭgja sĭnvŷ ěn ra, mĭg fĕr jo. ⁶ Kŷ ũn tŷtă ěn fi tóg ga kórég ra vĕnhvăg tŷ mŷ, mĭg fĕr jo vĕnh péju kŷ. Tá Topĕ tóg fi mŷ fi tŷ ki vĕnh péjunh ke han ja nŷ. Tá ũ tóg fi mŷ vĕjĕn vin tŷ, kură tŷ 1260 (ke) ki.

⁷ Kŷ kanhkă tá vĕnh génh tóg kutĕ mŷ. Topĕ tŷ jĕgnĕ jăfă ag to pă'i mág tŷ Miguel vŷ mĭg fĕr ěn kato văsăn mŷ, ă krĕm ke ag mré. Kŷ mĭg fĕr ěn tóg ă krĕm ke ag mré Miguel to rără mŷ gé sir. ⁸ Hă ra ag tóg ti tŷ hĕn ri ke mŷ sir, kanhkă tá ke ag, mĭg fĕr ěn ti tŷ. Kŷ ag tóg kanhkă tá ti kutĕm mŷ, ti mré ke kar ag mré hă. ⁹ Mĭg fĕr ěn kutĕm ag tóg mŷ sir. Pŷn ve tŷ ũn ve fag krŷn kónăn ěn hă vĕ, Japon hă vĕ, Satanás hă vĕ, ěpră ke ag tŷ Topĕ kato văsănsăn han mŷ ěn hă vĕ, hă vŷ: mĭg fĕr, he mŷ. Ag tŷ kanhkă tá ti kutĕm kŷ ag tóg ga kri ti fón mŷ sir, ti krĕm ke kar ag mré hă. Kŷ ag tóg ga kri mŷgtŷ ha, Japo ag.

¹⁰ Kŷ sóg kanhkă tá vĕnh vŷ ũ mĕg mŷ gé. Jamă hăr(a) tóg vŷ mŷ, kŷ tóg: “tăg',” he mŷ. “Ěg krenkren han tóg huri, Topĕ ti. Văhă vĕnh kar tóg vé, Topĕ tŷ tŷ ũn mág pĕ nŷ ti. Văhă Cristo tóg vĕnh kar mŷ ă tŷ tŷ ũn tar nŷ ěn ven huri. Ag tŷ ũn kutĕm mŷ ěn tóg ěg mré ke ag kato vŷ kónăn ja nĭgtŷ, Topĕ mŷ, kură ki, kuty tá ke gé. Hă ra tóg kutĕm kŷ jĕ ha. ¹¹ Ěg mré ke ag vŷ ti tŷ hĕn ri ke ja nĭgtŷ, cordeiro kyvĕnh ěn tugrŷn, vĕnh vŷ há ěn tugrŷn, ag tŷ vĕnh kar mŷ Topĕ vŷ tó tŷ ěn tugrŷn. Ag kă ũ kăgtĕn ja ag tóg nĭgtŷ, hă ra tóg ag mŷ tŷ nĕn ũ tŷ nŷ ja nĭgtŷ, ag tŷ Jesus tugrŷn ag kăgtĕn mŷ ra. Hă kŷ ag tóg Japo tŷ hĕn ri ke ja nŷ. ¹² Ti kutĕm kŷ jĕn kŷ tóg kanhkă tăn kar mŷ sér tŷ ha. Hă ra tóg ga kri mŷ ag mŷ jagy tŷnh mŷ, goj kri mŷ ag mŷ ke gé. Japo vŷ ag mré jĕ ha, ga kri, ag tŷ kanhkă tá ti kutĕm kŷ. Kŷ tóg jŷ jagy han kŷ kănĕ tŷ. Ti kură vŷ kakó nŷ ha. Tag tugrŷn tóg jŷ jagy han kŷ kănĕ tŷ nŷ, Japo ti,” he tóg, ũ tŷ kanhkă tá vŷ mŷ ti.

¹³ Kŷ mĭg fĕr ěn tóg ěpră jĕ mŷ. Kŷ tóg ũn tŷtă ěn fi vóg kónăn sór mŷ, ũ tŷ gŷr vĕg mŷ ěn fi. ¹⁴ Kŷ ag tóg fi mŷ fĕr mág junjun mŷ, kónhkó mág fĕr ěn ri ke. Kŷ fi tóg tŷ ga kórég ěn ra tĕ tŷ mŷ. Tá fi tóg vĕnh péju kŷ nŷ nŷ, prŷg tăgtŷ kri prŷg kuju ki. Kŷ pŷn kórég ěn tóg tá fi vóg tŷ nŷ ha, fi vĕnh péju ja tá. ¹⁵ Kŷ tóg goj var ri ke han mŷ, pŷn ti. Ti jĕnkă tá tóg kăkutĕ mŷ, goj var ti. Ti tŷ ũn tŷtă ěn fi năr han sór vĕ. ¹⁶ Hă ra ga tóg fi mŷ goj ěn tŷ gym ke mŷ, goj tŷ mĭg fĕr jĕnkă tá kăkutĕ mŷ ěn tŷ, kŷ fi tóg ga tugrŷn kren mŷ sir. ¹⁷ Kŷ mĭg fĕr tóg jŷ kŷ tŷ mŷ, ũn tŷtă ěn fi tovănh kŷ. Kŷ tóg fi krĕ kato văsăn jĕ tŷ mŷ gé, hă vŷ: ũ tŷ Topĕ vŷ ki króm mŷ ag, he mŷ, fi krĕ ag, hă vŷ: ũ tŷ Jesus to krónh ke tŷ ag, he mŷ, ũn tŷtă ěn fi krĕ ag.

¹⁸ Kŷ mĭg fĕr ěn tóg goj fyr ra tŷ mŷ.

13

Mīg régre ag kãme

¹ Kÿ mīg ù tóg goj mág kãtã kãkutẽ mũ. Ā pir ra tóg krĩ tÿ 7 (ke) nĩ, nĩka tÿ 10 (ke) ti nĩ gé. Ti krĩ tógfĩ tóg ti nĩka kri nÿtĩ, kÿ ti jygi tóg ti krĩ kri rãnrãn kÿ nÿtĩ, ti tÿ tÿ pã'i mág nĩn kÿ, goj kãtã mīg ên ti. Hã ra Topẽ to vĩ kónãn vẽ sir, ti krĩ to rãnrãn kÿ nÿtĩ ên ti. ² Goj kãtã mīg ên tóg mīg rá ri ke nĩ. Ti pẽn tóg urso pẽn ri ke nÿtĩ. Ti jẽnky tóg mīg kusũg jẽnky ri ke nĩ. Kÿ mīg fẽr ên tóg goj kãtã mīg tÿ pã'i mág pẽ han mũ, ti tÿ ag nĩgja kri nĩ jé, ti tÿ ã jykre tar ên han jé ke gé, mīg fẽr jykre ên ti. ³ Ti krĩ ù fynh ja ag tóg nĩ, kÿ tóg ter kren, hã ra tóg há' he mãn, goj kãtã mīg ên ti. Ēprã ke kar ag vÿ ti vég mũ, kÿ tóg ag mÿ e kar tĩ. Ti vĩ kri fig ag tóg mũ. ⁴ Mīg fẽr ên to ag tóg: “Topẽ vẽ,” he tĩ, ěprã ke kar ag, ti jykre tar tugrĩn, ti tÿ goj kãtã mīg ên tar han ja tugrĩn. Goj kãtã mīg ên to ag tóg: “Topẽ vẽ,” he tĩ gé. “Û tóg ti ri ke tũ pẽ nĩgtĩ,” he ag tóg tĩ. “Û tóg ti tar kãfór tũ nĩ,” he ag tóg tĩ gé, ěprã ke ag, mīg ên to.

⁵ Goj kãtã mīg ên vÿ vĩ vẽnhmÿ han jẽ nĩ. Ā vĩ tÿ tóg Topẽ kato vãsãn mũ. Kysã tÿ 42 (ke) ki tóg tar jẽ nĩ, vẽn kar kri. ⁶ Kÿ tóg Topẽ to vĩ kónãn mũ, Topẽ jygy to ke gé, ti jo ãn to ke gé, kanhkã tân kar ag to tóg vĩ kónãn mũ gé. ⁷ Kÿ tóg Topẽ tÿ ùn kuprẽg mũ ag kãgtén to vãsãn mũ gé, kÿ tóg ag tÿ hẽn ri ke mũ gé sir, goj tân tÿ mīg ên ti. Hã ra Topẽ tóg ver ti to fen nĩ. Kÿ povo kar ag, nação kar ag, pã'i krẽm ke kar ag, ù tÿ vyr mÿ vĩ nÿtĩ ên ag kar vÿ mīg ên vĩ hã jẽmẽg mũ. ⁸ Ēprã ke kar ag vÿ ti to: “Topẽ vẽ,” he' he tĩ. Ag jãvo ù ag jygi tóg rãnrãn kÿ nÿtĩ, Topẽ livron ki. Û tÿ rĩr krÿg ja tũ venh ke mũ ên ag vÿ ki rãnrãn kÿ nÿtĩ. Topẽ tÿ nén ù kar han ke to hã tóg ag jygi rãnrãn ja nĩgtĩ, livro ên ki. Cordeiro tÿ ag jagfy ter ja ên tũ vẽ, livro ên ti. Û tÿ ki rãnrãn kÿ nÿtĩ ag vÿ mīg ên jykre han tũ nĩgtĩ.

⁹ Ûn nĩgrẽg nÿtĩ ag tÿ tÿ jẽmẽ jé. ¹⁰ Topẽ tÿ ã ki ge kÿ nÿtĩ ù ag to: “nĩgfénh kÿ ag nÿtĩnh mũ, isugrĩn,” hen kÿ ag tóg nĩgfénh kÿ nÿtĩnh mũ, cadeia ki. Ti tÿ ag to: “rógro tÿ ag tóg ag kãgtén ke mũ,” hen kÿ ag tóg rógro tÿ ag kãgtén ke mũ sir. Û tÿ Topẽ mÿ vẽn vin mũ ên ag jé to krónh ke tũg, ag jé Topẽ tovãnh tũg.

¹¹ Kÿ sóg mīg ù vég mũ gé. Ga kãtã tóg kãkutẽ mũ. Nĩka régre ti nĩ, cordeiro nĩka ri ke. Ti vĩ tóg hã ra mīg fẽr ên vĩ ri ke nĩ. ¹² Goj kãtã mīg ên rĩnve tóg ã tÿ han mũ kar hyn han tĩ, ã jykre tar ên ti, ga kãtã mīg ti. Kÿ tóg ěprã ke kar ag to vãsãn mũ, ag tÿ goj kãtã mīg ên to: “Topẽ vẽ,” he jé, ùn ter kren mũ ên to. ¹³ Ga kãtã mīg tag vÿ nén ve vãnh tÿ hẽn ri ke hyn han mũ. Pĩ tÿ kanhkã tá kãtére han tóg tĩ, ěprã ke kar ag rĩnve. ¹⁴ Ti tÿ ěg tÿ nén han vãnh tÿ hẽn ri ke hyn han kÿ tóg ěprã ke kar mÿ ón mũ, ag tÿ ti kamẽg jé. Goj kãtã mīg ên rĩnve tóg milagre tÿ hẽn ri ke hyn han mũ. Kÿ tóg ěprã ke ag mÿ ke mũ, ag tÿ goj kãtã mīg kãggrã han jé. Ag tÿ mīg ên fynh mũ ra tóg ter ja tũ nĩ, hã kÿ tóg vẽn kar mÿ: “ha ti kãggran,” he mũ, ga kãtã mīg ên ti. ¹⁵ Kÿ tóg goj kãtã mīg kãggrã ki hu he mũ, kÿ tóg rĩr mũ, ti kãggrã ti, kÿ tóg vĩ mũ gé. Kÿ tóg ù tÿ ti to: “Topẽ vẽ,” he jãvãnh ên ag kãgtén kãn mũ sir, ti kãggrã rĩr jẽ ên ti. ¹⁶ Ga kãtã mīg ên tóg tÿ ěprã ke kar ag kri ke nĩ, ùn mág ag kri, ùn kãsir ag kri ke gé, ùn rico ag kri ke gé, ùn jagãgtar ag kri ke gé, ù tÿ tÿ camarada nÿtĩ ag kri ke gé, ag patrão ag kri ke gé. Kÿ tóg ag kar to vãsãn mũ, ag tÿ ãjag pẽgja tá ãjag nĩgé pãnĩ ki ti jiji rãnrãn jé, ke tũ nĩ kÿ ti número ti. Ājag kakã ki ag tóg ti jygy rãnrãn mũ gé. ¹⁷ Û tÿ gen kÿ rãnrãn kÿ nÿtĩ ag hã tóg nén ù comprar he tĩ, nén ù vender he tĩ gé inhhã. Ûn rá tũ ag vÿ nén ù comprar he mãn ke tũ nÿtĩ ha. Vẽn rá tag vÿ tÿ ga kãtã mīg ên jygy nĩ, ke tũ nĩn kÿ ti número ti. Ti número vÿ ti jiji tó tĩ gé.

¹⁸ Ûn krĩ há ag hã tóg ti número to jykrén há han ke mũ. Ûn krĩ tũ ên ag pi(jé) to jykrén ke mũ', ti número to. Ēprã ke jygy vẽ, ti número ti, hã vÿ: 666, he mũ.

14

Ûn krenkren kÿ nÿtĩ ag jãn

¹ Kÿ sóg ki ěvãnh kÿ cordeiro ên ve mãn mũ. Pãnónh kri tóg jẽ nĩ, pãnónh tÿ Síao he mũ ên kri, cordeiro ên ti. Ûn e ag tóg ti mré tá nÿtĩ, ù tÿ 144 mil (ke) ag. Cordeiro ên jygy

tóg ag kakā ki rán kŷ nī, ũ tŷ ti mré tá nŷtī ag kakā ki. Cordeiro ěn jóg jiji vŷ ag ki rán kŷ nī gé. ² Kŷ sóg kanhkā tá nén ũ mĕg mŷ. Tŷ tóg sa krog mĕ tī, tŷ tóg ta tŷ tŷrŷr he ri ke tī gé. Kŷ tóg tŷ ag tŷ vākyn jafā tŷ harpa kyn ěn ri ke tī gé, ti kyr ti. ³ Vĕjān tǎg tó ag tóg mŷ gé, nén nĕ tŷ 4 (ke) ěn ag rĭnve, kófa ag rĭnve ke gé, nĭgja sĭnvī ěn tá. Ũ tŷ 144 mil (ke) ag vŷ Topĕ jé tǎg tag tó há nŷtī, ěn ag tǎvī. Ęprā ke ja ag vĕ, hā ra ag tóg krenkren kŷ nŷtī, ũ tŷ ti jān tǎg tó mŷ ěn ag. ⁴ Jānhkri ag nŷtī. Ag pi(jé) fag vóg ja nĭgtī¹, cordeiro mré mŷ ja ag tóg nĭgtī, ag tŷ tŷ ěprā ke ra. Ęprā ke ag kāmī tóg ag kygĵām ja nī, cordeiro ti. Kŷ ag tóg tŷ Topĕ tŷ nŷtī, cordeiro tŷ ke gé. Ag mŷ ag tóg há pĕ nŷtī. ⁵ Ag pi(jé) ũ mŷ ón ja nĭgtī¹. Kygnĕ ja tŷ pĕ ag tóg nĭgtī.

Topĕ tŷ jĕnĕ jafā tǎgtŷ ag

⁶ Kŷ sóg Topĕ tŷ jĕnĕ jafā ũ vég mŷ gé. Kanhkā krĕm tóg tĕ tī mŷ. Kŷ tóg Topĕ vī ma kātī mŷ, Topĕ vī ěn vŷ tŷg' henh ke tŷ nī. Ti tŷ ěprā ke kar ag mŷ Topĕ vī tónh ke vĕ, nação kar ag mŷ, povo kar mŷ ke gé, pǎ'i krĕm ke kar ag mŷ, vyr mŷ vī nŷtī kar ag mŷ ke gé. ⁷ Kŷ tóg prĕr mŷ sir. “Topĕ hā kamĕg nī, ti hā to: ũn mág vŷ tŷ ti nī, hemnī,” he tóg, Topĕ tŷ jĕnĕ jafā ěn ti. “Ti kurā vŷ hur jun. Ęprā ke ag jykre tugnŷm jé tóg ke mŷ ha. Ũ tŷ kanhkā han mŷ mŷ: “Topĕ vŷ tŷ ā nī,” hemnī, ũ tŷ ga han mŷ ěn mŷ, ũ tŷ goj han mŷ ěn mŷ, goj nĭhŷg mré hā. Ęn hā mŷ: “Topĕ vŷ tŷ ā nī,” hemnī,” he tóg, Topĕ tŷ jĕnĕ jafā ěn ti.

⁸ Ti nón Topĕ tŷ jĕnĕ jafā ũ tóg jun mŷ gé, kŷ tóg: “kókén kŷ tóg nŷ nī,” he mŷ. “Cidade tŷ Babilônia vŷ kókén kŷ nŷ ha,” he tóg. “Ęprā ke kar to tóg vāsān ja nī, Babilônia to pǎ'i ti, ag tŷ ti mré ājag prŷ tŷ fag mré nŷgnŷ jé, fag tŷ ti ri ke ājag mén tŷ ag mré nŷgnŷ jé, kŷ tóg vĕnh kar tŷ ti mré vinho fa pĕ kron ri ke nī,” he tóg, Topĕ tŷ jĕnĕ jafā ũ ěn ti.

⁹ Kŷ Topĕ tŷ jĕnĕ jafā ũ tóg ag nón kātī mŷ gé. Ęn vŷ prĕr kŷ: “!..ěprā ke ũ ag tóg mĭg to: topĕ vĕ, he ja nĭgte..!” he mŷ, prĕr kŷ. “!..Ti kǎggrá to ag tóg: topĕ vĕ, he ja nĭgte..! Ājag kakā ki ag tóg ti rá han ja nĭgte..! Ag nĭgé pānī ki ag tóg ránrán kŷ nŷtī gé..! ¹⁰ Ęn ag vŷ Topĕ tŷ ag to jŷ jagy han venh ke mŷ ha..! Kŷ tóg ag tŷ vinho kron ri ke nŷ nī ha..! Topĕ vŷ jŷ jagy han kŷ jĕ ha..! Kŷ ti tŷ ag to jŷnh ke tóg kar kŷ nŷ ha..! Kŷ tóg ěg tŷ vinho tŷ copo fān kŷ fĕg ěn ri ke nī ha..! ti tŷ ag to jŷnh ke ti..! Topĕ tŷ vĕnh kǎn kŷ jĕ to ken hā vĕ..! Ũ tŷ mĭg to: topĕ vĕ, he ja ěn ag vŷ jagāgtar mág venh ke mŷ ha..! cordeiro rĭnve..! Topĕ tŷ jĕgnĕ jafā ag kar rĭnve ag jagtar kǎn kŷ nŷtī ha..! Pī ki ag tóg jagāgtar ke mŷ ha..! pó tŷ enxofre pŷr nĭja ki ke gé, vān pŷr nĭja ri ke ěn ki..! ¹¹ Ag tŷ pī ki jagāgtar mŷ ěn nĭja tóg kanhkā to tǎpŷr mŷ ha..! Tŷg' henh ke tŷ ti nī, pī ěn ti..! Ũ tŷ mĭg to: topĕ vĕ, he mŷ ěn ag vŷ vĕnhkǎnkán ke tŷ pĕ nī..! ũ tŷ ti kǎggrá to: topĕ vĕ, he mŷ ěn ag kar ti..! ũ tŷ ti jŷjŷ tŷ ránrán kŷ nŷtī ěn ag kar ti..! Vĕnhkán ke tŷ ag nŷtī ha..! kurā ki, kuty mré hā..!” he tóg, prĕr kŷ, Topĕ tŷ jĕnĕ jafā ũ ěn ti.

¹² Ũ tŷ Topĕ ki ge kŷ nŷtī ag jé ti to krónh ke tŷg, ag jé Topĕ tovānh tŷg, ũ tŷ Topĕ vī kri fig mŷ ag, ũ tŷ Jesus to tar nŷtī ag.

¹³ Kŷ sóg kanhkā tá vĕnh vī ũ mĕg mŷ gé. Kŷ tóg: “tag rán nī, ha mĕ,” he mŷ, ũ tŷ kanhkā tá vī mŷ ti. “Ũ tóg ěg Senhor ki ge kŷ nŷtī, gen kŷ ag tóg kǎgter ja nī. Ęn ag mŷ tóg sér tǎvī tī ha,” he tóg, ũ tŷ kanhkā tá vī mŷ ti. Kŷ Topĕ kuprĭg tóg: “hŷ,” he mŷ gé. “Ag rānhŷrāj kaja vég ag tóg mŷgtī, kŷ ag tóg ag rānhŷrāj to vĕnhkán kŷ nŷtī ha,” he tóg, Topĕ kuprĭg ti, ũn kǎgter mŷ ag to, ũ tŷ ěg Senhor ki ge kŷ nŷtī ag to.

Topĕ tŷ jĕnĕ jafā ag tŷ ěprā ke ag vóg kónān

¹⁴ Kŷ sóg kanhkā góg kupri vég mŷ gé sir. Ũ tóg kanhkā góg ěn kri nī nī, tŷ tóg ěprā ke nī ve nī. Hā ra tóg krĭ tógfĭ tŷ ouro nī nī, kŷ tóg ěg tŷ tŷ trigo kre jafā vyn kŷ nī nī gé. Jukén kŷ tóg nŷ, trigo kre jafā ěn ti. ¹⁵ Kŷ Topĕ tŷ jĕnĕ jafā ũ tóg kātī mŷ gé, Topĕ jo ĭn kátá. Kŷ tóg ũ tŷ kanhkā góg kri nī ěn mŷ: “trigo kre jafā tŷ krenh tĭg nī,” he mŷ. “Tŷ ti krenh ke kurā vĕ. Vĕnh kǎn kŷ ag nŷtī nī, ěprā ke ag,” he tóg. ¹⁶ Kŷ ũ tŷ kanhkā góg kri nī ěn tóg trigo kre jafā ěn tŷ krenh tī mŷ.

¹⁷ Kŷ sóg Topĕ tŷ jĕnĕ jafā ũ vég mŷ gé. Topĕ jo ĭn kátá tóg kǎkutĕ mŷ. Uva kre jafā vyn kŷ tóg tá kǎkutĕ mŷ. ¹⁸ Kŷ Topĕ tŷ jĕnĕ jafā ũ tóg jun mǎn mŷ gé. Topĕ jo ĭn kátá

tóg kăkutē mŭ gé, Topē mŷ nén ũ pŭn jafă ên tá. Topē tŷ jĕnĕ jafă tag vŷ pŷ ki rŷr tŷgtŷ. Kŷ tóg ũ tŷ uva kre jafă văg mŭ ên mŷ: “uva kre jafă tŷ krenh tŷg,” he mŭ. “Ga kri ti nŷtŷ, uva kanĕ ti. Ên krenh tŷg. Ră há ti nŷtŷ ha,” he tóg. ¹⁹ Kŷ tóg tŷ mŭ, Topē tŷ jĕnĕ jafă ên ti. Uva kanĕ krég tóg mŭ sir. Kŷ tóg uva jĕgmŷ jafă ki ag văm mŭ, hă vŷ: Topē tŷ vĕnh kar to jŭ, he mŭ, hă vŷ: uva jĕgmŷ jafă, he mŭ. ²⁰ Cidade fyr tá tóg jĕ nŷ, uva jĕgmŷ jafă ên ti, kŷ ag tóg uva jĕgmŷ mŭ sir, Topē tŷ jĕnĕ jafă ên ag. Kŷ ag tóg tá ag kyvĕnh kujĕg mŭ, ĕpră ke ag kyvĕnh ti, kŷ tóg tăra tŷ mŭ, 300 (ke) quilômetros ra, ag kyvĕnh ti. Tŷ tóg goj mág nŷ ve nŷ, ag kyvĕnh ti. Cavalô tŷ kă jĕ ra tóg pun kenh ke mŭ vĕ.

15

Topē tŷ jĕnĕ jafă ag tŷ ĕpră ke ag vóg kónăn măn

¹ Kŷ sóg kanhkă tá nén ũ vĕg mŭ gé. Inh mŷ tóg e tŷ, isŷ nén nĕ ên ve kŷ, kŷ tóg inh kanĕ jun mŭ. Topē tŷ jĕnĕ jafă tŷ 7 (ke) ag vigve inh. Ga kri ke ag vóg kónăn jĕ ag tóg ke mŭ, vógvóg tŷ 7 (ke) ki. Ag tŷ ga kri ke ag vóg kónăn kar kŷ Topē tóg jŭ măn ke tŭ nŷ ha. ² Kŷ sóg goj tŷ vidro kăki pŷ gru vĕg mŭ. Kŷ sóg ũ ag vigvĕg mŭ gé, ũ tŷ mŷg ên kato văsănsăn mŭ ên ag. Ag pi(jĕ) ajag tŷ tŷ ĕpră ke nŷtŷ ra mŷg kăggră ên to há nŷtŷ ja nŷgtŷ', ag pi(jĕ) vĕnh ki ti número rán ja nŷgtŷ', ti jyjy ti'. Ag pi(jĕ) mŷg vŷ kri nŷm ja nŷgtŷ'. Hă kŷ ag vŷ goj tŷ vidro jo nŷtŷ, kŷ ag tóg văkyn jafă tŷ harpa vyn kŷ nŷtŷ nŷ, Topē tŷ ag mŷ harpa vin mŭ ên. ³ Kŷ ag tóg Topē mŷ rănhrăj tŷ tŷ Moisés tŷ jĕ ên tó mŭ, ti tŷ jăn ti. Cordeiro ên mŷ ag tóg jăn mŭ, ha mĕ: “Topē kósin vŷ tŷ ĕ nŷ, pă'i mág vŷ tŷ ĕ nŷ, vĕnh kar kri ke vŷ tŷ ĕ nŷ,” he ag tóg mŭ, cordeiro mŷ, jăn kŷ. “Nén ũ há tăvŷ han ja ĕ tóg nŷ, ge ve ja tŭ ĕg tóg nŷtŷ. Ā jykre vŷ kuryj tăvŷ nŷ, ki hă tó ĕ tóg tŷgtŷ. Povo kar kri ĕ tóg jĕ nŷ. ⁴ Vĕnh kar ag vŷ ĕ kamĕg tŷ, pă'i mág kar ag. Vĕnh kar ag vŷ ĕ jiji to: “ŭn mág vŷ tŷ ti nŷ,” he tŷ. Ā hă ne ĕ pir mŷ há nŷ'. Povo kar tóg ĕ tá junjun ke mŭ, kŷ ag tóg ĕ mŷ: “Topē vŷ tŷ ĕ nŷ,” hĕnh ke mŭ. Ā jykre kuryj ên ve kăn jĕ ag tóg ke mŭ, povo kar ag,” he ag tóg mŭ, jănjan kŷ, ũ tŷ mŷg kato văsănsăn mŭ ên ag.

⁵ Kar kŷ sóg kanhkă tá Topē jo ĩn vĕg mŭ. Ti jănkă nón ag tóg mŭ, kur tŷ ĩn ên róm kŷ, Topē nŷg jafă ên. ⁶ Kŷ Topē tŷ jĕgnĕ jafă tŷ 7 (ke) ên ag tóg tá kăpa mŭ, ũ tŷ ga vóg kónăn ke mŭ ên ag. Kur kupri jănhkri rŷnh kŷ ag tóg kămŭ mŭ, pyrfĕ tŷ kur rŷnh kŷ, kŷ ag tóg ouro tŷ vĕsógfŷn kŷ nŷtŷ gé, ajag fe kri. ⁷ Kŷ nén nĕ tŷ 4 (ke) ên ag kămŷ ũ tóg ag mŷ ouro tŷ pĕnky junjun mŭ, Topē tŷ jĕgnĕ tŷ 7 (ke) ên ag mŷ. Pĕnky tŷ 7 (ke) junjun ag tóg mŭ, ag mŷ. Fór ti nŷtŷ, pĕnky ti, Topē jŭ tŷ. Topē vŷ tŷ' hĕnh ke tŭ pĕ nŷ. Ti jŭ tŷ tóg fór nŷtŷ, pĕnky ti. ⁸ Kŷ Topē jo ĩn ên krĕm tóg nŷja nŷ. Topē tá tóg tŭmtŭm ke kătŷ mŭ, nŷja ên ti, Topē tŷ tŷ ŭn mág nŷn kŷ, ti tar nŷn kŷ. Topē tŷ jĕgnĕ jafă tŷ 7 (ke) ên ag tŷ ga vóg kónăn ke to hă ũ tóg Topē jo ĩn ên kăra rănkh ke tŭ nŷ.

16

Topē jŭ

¹ Kŷ sóg vĕnh vŷ ũ jĕmĕg mŭ, Topē jo ĩn ên kătă. Topē tŷ jĕgnĕ jafă tŷ 7 (ke) ên mŷ tóg vŷ mŭ, ŭn vŷ mŭ ên ti, kŷ tóg: “pĕnky tŷ funfór ên tŷ ga kri kujĕn mŷjĕg,” he mŭ.

² Kŷ Topē tŷ jĕnĕ jafă ũ tóg tŷ mŭ, ti pĕnky ki nŷ ên tŷ ga kri kujĕn jĕ. Kŷ ũ tŷ mŷg ên jiji tŷ rănran kŷ nŷtŷ ên ag kar vŷ fugfóm jagy han mŭ, kaga jagy. ũ tŷ mŷg kăggră to: “Topē vŷ tŷ ti nŷ,” he mŭ ag kar vŷ fugfóm kăn mŭ.

³ Kŷ Topē tŷ jĕnĕ jafă ũ tóg goj kafă tŷ ki ĕ pĕnky ki nŷ ên kujĕg mŭ gé. Kŷ goj tóg vĕnh kyvĕnh ri ke nŷ ha, ag tŷ ũ tănkh mŭ kyvĕnh ên ri ke. Kŷ goj kămŷ mŭ kar ag vŷ kăgter mŭ ha.

⁴ Kŷ Topē tŷ jĕnĕ jafă ũ tóg ĕ pĕnky ki nŷ ên kujĕg mŭ gé, pĕnky tăgtŷ vĕ sir. Goj mág mré goj kăsir kar ki tóg kujĕg mŭ, ti tŷ ti, goj nŷhŷg kar ki ke gé. Kŷ tóg vĕnh kyvĕnh kar nŷtŷ ha, goj kar ti. ⁵ Kŷ ũ tŷ goj ki rŷr tŷ ên tóg: “ŭn há vŷ tŷ ĕ nŷ,” he mŭ, Topē mŷ. “Văsŷ ĕ tóg nŷ ja nŷgtŷ, kŷ ĕ tóg ŭri nŷ nŷ gé,” he tóg mŭ, Topē mŷ. “Vĕnh jykre há han kŷ ĕ tóg nŷ nŷ. ⁶ ũ tŷ ĕ ki ge kŷ nŷtŷ ag kăgtĕn ag tóg, ũ tŷ ĕ vŷ tó tŷ ag mré hă. Kŷ ĕ tóg ag mŷ vĕnh

kato vėnh kyvėnh nĩm mũ sir, ag tỹ kron jé. Ag tỹ ag tỹ ag kãgtén kajãm hã vė,” he tóg, Topẽ mỹ, Topẽ tỹ jẽnẽ jafã ti.

⁷ Kỹ sóg vėnh vĩ ù jẽmẽg mũ gé. Topẽ mỹ nén ù pũn jafã tá tóg vĩ mũ, ùn vĩ mũ ti, kỹ tóg: “Topẽ vĩ tỹ ã nĩ, pã'i vĩ tỹ ã nĩ, vėnh kar kri ke vĩ tỹ ã nĩ,” he mũ. “Kuryj ti nĩ, ã jykre ti, kỹ ã tóg ki hã tóg tĩ, kỹ ã tóg ki hã ag vóg kónãn tĩ gé,” he tóg mũ, ùn vĩ mũ ẽn ti.

⁸ Kỹ Topẽ tỹ jẽnẽ jafã ù tóg ã pėnky ki nĩ ẽn kujẽg mũ gé. Pėnky tỹ 4 (ke) vė sir. Rã ki tóg ã tũ kujẽg mũ. Kỹ rã tóg vėnh kar kri hupũn jagy han mũ, kỹ ag jagtar mũ. ⁹ Kỹ ag tóg kugpũr mũ sir, vėnh kar, rỹ jagy tỹ. Kỹ ag tóg Topẽ to vĩ kónãn mũ sir, ti tỹ ag vóg kónãn tugrĩn. Ge ra ag tóg ajag jykre tovãnh sór tũ nỹtĩ, Topẽ mỹ ag tóg vėnh vin sór tũ nỹtĩ.

¹⁰ Kỹ Topẽ tỹ jẽnẽ jafã ù tóg ã tũ kujẽg mũ gé. Pėnky tỹ 5 (ke) vė sir. Mĩg ẽn nĩgja kri tóg ã tũ kujẽg mũ. Kỹ tóg kuty nỹ, mĩg ẽn krẽm ke kar ag mỹ. Kỹ tóg vėnh kar mỹ e tãvĩ tĩ. Kaga jagy han ag tóg mũ, ag fugfóm to. Ajag kaga jagy tugrĩn ag tóg ajag nũnẽ kyprãg mũ. ¹¹ Kỹ ag tóg Topẽ tỹ kanhkã tá nĩ ẽn mỹ vĩ kónãn mũ, ag kaga to, ag tỹ ti jagy vėg mũ kar to. Ge ra ag tóg ajag jykre kórég tovãnh sór tũ nỹtĩ.

¹² Kỹ Topẽ tỹ jẽnẽ jafã ù tóg ã tũ kujẽg mũ gé. Pėnky tỹ 6 (ke) vė sir. Goj tỹ Eufrates ki tóg ã tũ kujẽg mũ. Kỹ tóg tóg kãn mũ, goj tỹ Eufrates ti. Hã kỹ pã'i tỹ rã jur ja tá kãmũ ẽn ag tóg kãmũ mũ ha, kỹ goj tóg ja ẽn vĩ tỹ ag japry nỹ ha, ag jamĩn. ¹³ Kỹ sóg vėnh kuprĩg tãgtũ vėg mũ, hã ra tóg tỹ pėpo ve nỹtĩ, vėnh kuprĩg ag. ù tóg mĩg fěr ẽn jėnkã tá kãkutẽ mũ, ù tóg goj kãtã mĩg ẽn jėnkã tá kãkutẽ mũ, ù tóg ón kỹ Topẽ vĩ tóg tĩ ẽn jėnkã tá kãkutẽ mũ gé. ¹⁴ Japo ag vė, vėnh kuprĩg tỹ tỹ pėpo nỹtĩ ve ẽn ag, hã ra ag tóg ẽg tỹ nén han vãnh hyn han mũ. Kỹ ag tóg ẽprã ke to pã'i kar ag mré vėmėn mũ gé, ag tỹ vėnh gėnh ke to vėnh mãn jé, Topẽ tỹ ag mỹ kurã nĩv ẽn ki. Topẽ hã ne tỹ ùn mág nĩ'.

¹⁵ “Ha vé, ajag tỹ nén ù pėju(g) tĩ ẽn kãtĩg ri ke ti nĩnh mũ, inh kãtĩg mãn ke ti. Ajag nũgnũr tũ nỹtĩn kỹ tóg há tĩ, ajag kur kynkar kỹ nỹtĩn kỹ tóg há tĩ. Kỹ mỹ sér nỹtĩmnĩ. Kỹ ajag tóg kator nỹtĩnh ke tũ nĩ. Mỹ'ãg'ãg ke tũ ajag nỹtĩ, ù ag tỹ ajag vėg mũ ra,” he tóg, ẽg Senhor ti, ẽg mỹ.

¹⁶ Japo tag ag vĩ pã'i kar tỹ vėnh mãn han mũ, ẽmã tỹ Armagedom tá, Hebreu vĩ ki ẽmã ẽn jyjy vė.

¹⁷ Kỹ Topẽ tỹ jẽnẽ jafã ù tóg ã tũ kujẽg mũ gé. Pėnky tỹ 7 (ke) hã vė. Kanhkã krẽm tóg ã tũ kujẽg mũ. Kỹ nĩgja sĩnvĩ ẽn tá, Topẽ jo ìn kãkã nĩgja ẽn tá vėnh vĩ tóg mẽ há ti, kỹ tóg: “nén kar tóg kar kãn kỹ nỹ ha,” he mũ, vėnh vĩ ti. ¹⁸ Kỹ ta tóg kómkóm ke mũ, tỹrỹr he tóg mũ gé, kỹ ga vĩ ragra ke jagy han mũ gé. Ga tỹ ragra ke tỹ ge ve ja tũ ẽg tóg nỹtĩ. Ẽg tỹ ga mĩ mũn kã tóg ragra ke tỹ ge han ja tũ nĩ. ¹⁹ Cidade mág ẽn tóg vėnh kãpów kỹ nỹ ha, vėnh kãpów tãgtũ tỹ. Kỹ ga kar mĩ cidade tóg kókén kỹ nỹtĩ nĩ. Topẽ pi(jé) cidade tỹ Babilônia kã jatu ja nĩgtĩ'. Cidade ẽn ki ke ag to tóg jũ tãvĩ han mũ, Topẽ ti, ag to tóg fe gỹv han mũ. Hã kỹ tóg ag vóg kónãn jagy han mũ, kỹ tóg ẽg tỹ vinho kron ri ke nĩ. ²⁰ Kỹ goj vãso kar tóg tũ nỹtĩ ha ke gé, pãnónh kar tóg tũ nỹtĩ gé. ²¹ Kỹ nãfy tóg vár mũ gé. Ẽhé tãvĩ ti nĩ, nãfy ẽn ti, ùn pir tóg quilo tỹ hėn ri ke nĩ, kukryr tỹ nãfy ẽn. Ẽprã tóg vár mũ. Kỹ ẽprã ke ag tóg Topẽ mỹ vĩ kónãn mũ gé sir, nãfy tag to, ti jagy tãvĩ nĩn kỹ.

17

Ùn tỹtã kórég fi

¹ Kỹ Topẽ tỹ jẽnẽ jafã ù tóg inh ki jun mũ, ù tỹ pėnky mãn mũ ja ẽn ag kã ù. Kỹ tóg inh mỹ: “kunĩg,” he mũ. “Nhỹ ã mỹ cidade mág ti ven, cidade tỹ goj tỹ hėn ri ke tá nỹ ẽn ti. Cidade ẽn ki ke ag vĩ ùn mėn (ka)mẽ fi ri ke nỹtĩ, kỹ Topẽ vĩ ag vóg kónãn ke mũ, ùn mėn (ka)mẽ fi ri ke ẽn ag. ² Pã'i kar vĩ fi mré nỹ ja nĩgtĩ, ùn mėn (ka)mẽ ẽn fi mré. Ẽprã ke kar mỹ tóg sér tĩ, fi jykre ti, kỹ tóg ag tỹ kronkron kỹ kãgter ri ke nĩ, ag tỹ ùn mėn (ka)mẽ ẽn fi mré nỹ ti,” he tóg inh mỹ, Topẽ tỹ jẽnẽ jafã ti.

³ Kỹ Topẽ kuprĩg tóg inh krĩn mũ, kỹ sóg nén nẽ ve kỹ ga kórég ra tĩ mũ. Topẽ tỹ jẽnẽ jafã ẽn vĩ inh pėre tĩ mũ. Tá ùn tỹtã fi tóg nĩ nĩ. Fi mẽg tỹ mĩg kri fi tóg nĩ nĩ, hã ra tóg

kusüg jê, fi mēg ti. Vēnh jygyi tóg fi mēg kri ránrán ky nýtí, ky tóg vēnh kri tỹ rüm ke ky jê, vēnh jygyi rágrá tỹ. Vēnh jygyi ěn tóg Topě to ví kónān ky nýtí. Fi mēg vỹ ā pir ra krí tỹ 7 (ke) ní, níka tỹ 10 (ke) ti ní gé. ⁴ Ūn týtá ěn fi vỹ kur kusüg tu ky ní ní, kur kósóg pē. Ouro tu fi tóg ní gé, pó sínví, pérola. Ouro tỹ copo mán ky fi tóg ní ní. Hā ra tóg nén ū kórég kar tỹ fór jê, nén ū kavéj kar tỹ, copo ti. Fi tỹ vēnh jykre pāno han mū to ken hā vē. ⁵ Fi jiji vỹ fi kakā ki rán ky ní, ū tóg ā ví ki fi jygy tag mē ja tũ ní ver. Hā ra tóg: “Babilônia hā vē,” he mū, fi jiji ti. “Ūn mág vỹ tỹ inh ní,” he tóg. “Ūn mén (ka)mē kar fag mýnh vỹ tỹ inh ní, ū tỹ nén ū kavéj kar han tí ag mýnh vỹ tỹ inh ní, ěprā, ag tỹ inh jykre han ky,” he tóg mū, fi jygy ti. ⁶ Hā ra fi tóg kron ky ter ní, fi tỹ ū tỹ Topě ki ge ky nýtí ag kyvénh kron ky. Ū tỹ hēn ri ke ag kágtén ja ag tóg nígtí, Jesus tugrín, ag tỹ Jesus tovānh sór tũ tugrín, hā ra fi tóg ag kyvénh kron kán ja ní.

Inh mý tóg e tí, sỹ fi ve ky. ⁷ Ky Topě tỹ jēnē jafā tóg inh mý: “mý ā mý e?” he mū. “Nhỹ ā mý fi kāmén, fi mēg tỹ mīg ti ke gé, fi mēg krí tỹ 7 (ke) ěn, fi mēg níka tỹ 10 (ke) ěn, fi tỹ kri ní jafā ěn ti,” he tóg, Topě tỹ jēnē jafā ti. ⁸ “Fi mēg tag vỹ vāsỹ jê ja nígtí. Ūri tóg ki tũ ní, hā ra tóg kānhmar nūgme tá kākutēnh ke mū, Topě tỹ ti kókén pē han jé. Ky tóg ěprā ke ag mý e tĩnh mū, ag tỹ fi mēg tag venh ken ky, ūn jygy tỹ Topě livro ki rán ky nýtí tũ ag mý. Topě tỹ nén (ũ) kar han to hā tóg ag rán ja tũ ní, ky ag tóg rĩnrĩr ke tũ nýtí. ěn ag mý tóg e tĩnh mū, ag tỹ fi mēg tỹ mīg ven ky. Vāsỹ tóg ní ja nígtí, ky tóg ver ki tũ ní, hā ra tóg kejēn kätĩg mán ke mū ha.

⁹ Topě tỹ ūn kanhrān mū ěn ag hā vỹ fi mēg to jykrén ke mū. Ti krí tỹ 7 (ke) vỹ tỹ pānónh tỹ 7 (ke) nýtí. Pānónh ěn kri fi tóg ní ní, ūn týtá kórég ěn fi. Pā'i tỹ 7 (ke) to ke vē gé, hā ra, ti krí tỹ 7 (ke) ěn ti. ¹⁰ Pā'i tỹ 5 (ke) vỹ hur tũg, ūn pir vỹ ūri ní ní, ūn pir ū vỹ kar ky kätĩg ke mū gé. Ti kätĩg ken ky tóg níg sí pē han ke mū, ū tỹ ěgno ěn ti. ¹¹ Fi mēg tag, ū tỹ vāsỹ ní ja kar ky ūri ká ní tũ ěn vỹ tỹ pā'i ū ní gé. Pā'i tỹ 8 he mū vỹ tỹ ti ní. Pā'i tỹ 7 (ke) ěn mré ke vỹ tỹ ti ní gé. Topě vỹ ti tỹ tú' henh ke mū gé.

¹² Ti níka tỹ 10 (ke) vỹ tỹ pā'i tỹ 10 (ke) nýtí gé. ěn ag vỹ ver kāmū tũ nýtí. Fi mēg mré ag tóg tỹ pā'i nýtĩnh ke mū, hā ra ag tóg níg sí pē han ke mū gé. ¹³ Jagnē mré ag tóg vēnh jykre pir han ke mū, pā'i tag ag, fi mēg ěn mré. Fi mēg mý ag tóg vēnh vin ke mū. ¹⁴ Cordeiro ěn kato ag tóg vāsānsān ke mū. Hā ra cordeiro tóg ag tỹ hēn ri kēnh ke mū, ti mré ke ag mré, ū tỹ ti tovānh ja tũ ag mré, ūn kuprēg ky nýtí ag mré. Ky cordeiro ěn vỹ tỹ pā'i kar kri ke jê. Pā'i mág ag kar kri tỹ pā'i ti jē mýr,” he tóg inh mý, Topě tỹ jēnē jafā ti.

¹⁵ Ky tóg inh mý: “goj ve ja ā ní gé,” he mū. “Goj ěn tá fi tóg ní, ūn týtá kórég ěn fi. Povo kar to ken hā vē, hā vỹ: goj, he mū, ěprā ke kar to ken hā vē, nação kar to ken hā vē, vyrmý ví nýtí ag kar to ken hā vē gé, hā vỹ: goj, he mū,” he tóg. ¹⁶ “Ky fi mēg vỹ ti níka tỹ 10 (ke) ěn mré (tóg) fi to kórég tāví nýtĩnh ke mū. Fi tũ kunūnh kán jé ag tóg ke mū, fi kur mré hā, ky fi tóg kator nĩnh ke mū, ūn kórég ěn fi. Fi ní ko jé ag tóg ke mū gé, ky ag tóg fi pūn ke mū gé. ¹⁷ Ag tỹ ki kagtĩg ra Topě tóg ag krĩn tí, ag vatānh tá, ky ag tóg Topě tỹ ag mý fi to vēnh jykre nív ěn hā han tí. Topě tỹ ag krĩn ky ag tóg jagnē mré vēnh jykre pir hā han tí, ky ag tóg fi mēg mý vēnh vin tí gé, pā'i tỹ 10 (ke) ěn ag. Gen ky ag tóg nén kar kánkān ke mū ěn pétēm ke mū, Topě tỹ vāsỹ tó ja ěn kar ti,” he tóg, Topě tỹ jēnē jafā ti.

¹⁸ “Ky ūn týtá kórég ěn fi, ā tỹ ūn vég mū ěn fi vỹ tỹ cidade mág ěn ní. ěprā pā'i kri ke kar fi ní,” he tóg inh mý, Topě tỹ jēnē jafā ěn ti.

18

Babilônia tỹ tũ' he

¹ Kar ky sóg Topě tỹ jēnē jafā ū vég mū gé. Kanhkā tá tóg kátēre mū. Tar pē tóg jê, jēngřē tóg jê gé, ky ti jēngřē tóg kurā han mū, ěprā, Topě tỹ jēnē jafā ěn ti. ² ěn vỹ prēr mū. “!..Kókén ky ti nỹ ha..!” he tóg mū, prēr ky. “!..Babilônia vỹ kókén ky nỹ, cidade mág ěn ti..!” he tóg. “!..Japo ag, vēnh jagrē kórég ag vỹ tá ěmā nýtí ha..! Jēsĩ kavéj kar,

sēsī kórég kar vỹ tá nỹtī ha, cidade jy ró ěn kāmī..! ³ Ěprā ke kar vỹ cidade ěn jykre han ja nĩgte..! Kỹ tóg ag tỹ ũ mré nỹ kónān ěn ri ke ne..! Vinho kron mág ri ke ti ne..! cidade ěn jykre ti..! Ěprā pā'i ag vỹ tá vĕnh jykre han ja nĩgte..! Kỹ tóg ũn týtá kórég fi mré nỹ ri ke nĩ, ag jykre kórég ti..! Nén ũ vender he tĩ ag vỹ cidade ěn tugrĩn rico nỹtī ja nĩgte..! tá ke ag tỹ rico tāvĩ ja nỹtĩn ká..! Hā ra tóg kókén kỹ nỹ ha..!" he tóg, prĕr kỹ, Topĕ tỹ jĕnĕ jafā ti.

⁴ Kỹ sóg kanhkā tá vĕnh vĩ ũ mĕg mũ gé, ũ tỹ Topĕ ki ge kỹ nỹtī ag mỹ tóg: "mũ jé ha," he mũ, ũ tỹ kanhkā tá vĩ mũ ěn ti. "Cidade tá kāpamnĩ, ke tũ nĩ mũ ra ājag tóg ag mré Topĕ vĩ mranh ke mũ, kỹ Topĕ tóg ag mré ājag vóg kónān ke mũ gé, ti tỹ cidade kókén ken kỹ," he tóg, ũ tỹ kanhkā tá vĩ mũ ti, ũ tỹ Topĕ ki ge kỹ nỹtī ag mỹ. Cidade ěn kókén ke to hā tóg ag mỹ tó mũ. ⁵ "Topĕ vỹ ag jykre pāno ve kãn, kỹ tóg kã jatu tũ nĩ. Ag tỹ Topĕ vĩ mranh vỹ e tāvĩ nỹtī, kỹ ti pānfi tóg kanhkā pétĕm mũ, ag tỹ Topĕ vĩ mranh pānfi ti. ⁶ Ag tỹ ājag mỹ nĕn han ja ěn ri ke han nĩ, ag mỹ," he tóg, ũ tỹ Topĕ ki ge kỹ nỹtī ag mỹ. "Ag tỹ ājag mỹ ti kórég pir han kỹ ag mỹ ti kórég régre han nĩ, vĕnh kato. Ājag mỹ ag tóg ti kron jafā kórég ven ja nĩ. Ag mỹ ti kron jafā kórég ven régrég nĩ. ⁷ Sĩnvĩ ja ag nỹtī, tỹ nĕn ũ mág ja ag nỹtī. Ag jagtar han nĩ, ag sĩnvĩ tag to. Ag jagtar han nĩ, ag tỹ nĕn ũ mág tag to, ũ tỹ nĕn ũ mág tũ ag jagtar han nĩ gé, ag mré. "Ũn mág vỹ tỹ ěg nỹtī," he ag tóg mũ. "Ũ pí(jé) ěg jagtar han ke mũ'," he ag tóg mũ. ⁸ Hā ra ag tóg vāhā venh ke mũ, ag jagāgtar ke ti, ag vĕsýrĕnh ke ti, ag vānhprāg ti, kỹ tóg ag tỹ vĕnh kaga jagy han ri ke nĩ sir. Kurā pir ki ag tóg tag ve kãn ke mũ, kỹ ag tóg pĩ ki kāgter ke mũ. Topĕ hā vỹ ag vóg kónān ke mũ, pā'i mág ti. Tar pĕ ti jĕ nĩ mýr, Topĕ ti," he tóg, ũ tỹ kanhkā tá vĩ mũ ti, ũ tỹ Topĕ ki ge kỹ nỹtī ag mỹ.

⁹ Kỹ ěprā pā'i ag vỹ venh ke mũ, cidade nĩja ti. Cidade ki ke ag mré tóg ag mỹ sér nĩ ja nĩgtĩ. Ag mré ag tóg nĕn (ũ) kar vigve ja nĩgtĩ, kỹ tóg ag tỹ fag mré nỹ ri ke nĩ ja nĩ, ag tũ mág ěn ti. Cidade pũr nĩja ve jé ag tóg ke mũ ha, kỹ ag tóg fýnh mũ, jagtar ke mũ. ¹⁰ Kuvar há tá ag tóg nỹtĩnh ke mũ, ag kanĕ jur kỹ, ag tỹ cidade ki ke ag vānhprāg jagy mĕ kỹ. Kỹ ag tóg jagtar kỹ: "jagy tāvĩ tóg tĩ," hĕnh ke mũ sir, pā'i ag. "Ěhé tāvĩn ja ti nĩ, cidade tỹ Babilônia tag ti, tar pĕ ja ti nĩ. Hā ra ag tóg hora pir ki ti kókén kãn," he jé ag tóg ke mũ, pā'i ag.

¹¹ Kỹ nĕn (ũ) vender he nỹtĩgtĩ ag vỹ jagtar kỹ fýnh ke mũ gé, cidade tũ to. Tá ag tóg nĕn (ũ) tỹ hĕn ri ke ve ja nĩgtĩ, ¹² ouro ti, prata ti, pó sĩnvĩ ti, pérola ti, pyrfé tỹ kur ti, kur tỹ seda ti, kur kusũg ti, kur kusũg sá ti, ka kaja e ti, elefante jā tỹ nĕn han mũ ti, ka sĩnvĩ tỹ nĕn han mũ ti, ferro tỹ nĕn han mũ ti, ferro kusũg tỹ nĕn han mũ ti, pó tỹ mármore tỹ nĕn han mũ ti, ¹³ canela ti, vĕjĕn ger há ti, ka jĕnjo pũn kỹ ger há tỹ incenso ti, ka jĕnjo pũn kỹ ger há tỹ mirra ti, vĕnh mĩ tĩn jafā ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ũn gré ag, ũn týtá fag mré hā. Tag kar tỹ ag tóg negocio hyn han tĩ ja nĩgtĩ, vender he nỹtĩgtĩ ag, hā ra tóg tũ tĩ ha. ¹⁴ Kỹ nĕn ũ vender he nỹtĩgtĩ ag tóg jagtar kỹ tag tónh ke mũ, ha mĕ. "Nĕn kar ve ja ěg tóg nĩgtĩ, cidade tá, kỹ tóg ěg mỹ sér nĩ ja nĩgtĩ. Riqueza ěn tóg tũ' he kãn. ũ tóg nĕn kar ěn to ěn mãn ke tũ nĩ ha. Ve mãn ke tũ ěg tóg nĩ ha, nĕn (ũ) kar ěn ti," he jé ag tóg ke mũ, nĕn (ũ) vender he nỹtĩgtĩ ag. ¹⁵ Kỹ ag tóg kuvar há tá nỹtĩnh mũ. Cidade ěn tá negocio han to ag tóg vĕnh han ja nĩgtĩ, hā kỹ tóg ag mỹ e tĩ. Tātá nỹtĩn kỹ ag tóg jũrũn ke mũ, ag tỹ cidade tá ke ag jagāgtar ve kỹ. Fý jé ag tóg ke mũ, vĕsýrĕnh jé ag tóg ke mũ. ¹⁶ Kỹ ag tóg: "jagy tāvĩ tóg nĩ," hĕnh ke mũ. "Há tāvĩ ja ag nỹtĩ, cidade tag ki ke ja ag. Kur sĩnvĩ rĩnh ja ag tóg nỹtĩ, pyrfé tỹ kur, kur kusũg, kur kusũg sá. Ouro rĩnh ja ag tóg nỹtĩ, pó sĩnvĩ, pérola. ¹⁷ Hora pir ki ag tóg tũ' he kãn ja nĩ, ag tỹ nĕn (ũ) kar mré hā," he jé ag tóg ke mũ gé, nĕn ũ vender he nỹtĩgtĩ ag.

¹⁸ Kỹ barco to pā'i ag vỹ nỹtĩnh ke mũ gé, goj kri mũ mũ kar ag, barco ki rĩr tĩ kar ag, ũ tỹ goj kri rānhraj mũ kar ag ke gé. Tātá nỹtĩ kỹ ag tóg cidade nĩja ěn ve kỹ (ag tóg) prĕnprĕr mũ sir. "Cidade ěn ri ke ve mãn ke tũ ěg tóg nĩ ha," he jé ag tóg ke mũ. ¹⁹ Kỹ ag tóg ga funfur tỹ vĕnh kri vām ke mũ sir, ag mỹ e tĩn kỹ. Fý jé ag tóg ke mũ, vĕsýrĕnh jé

ag tóg ke mü. “Jagy täví tóg tí,” he jé ag tóg ke mü. “Há täví ja ag nýtí, cidade tag ki ke ja ag. Vēnh kar vỹ ag tú mǎn kỹ vēnh hyn han ja nĩgtĩ, ũ tỹ barco kǎmĩ goj kri mũgtĩ ag. Kỹ tóg jagy täví tí. Hora pir ki tóg tú' he kǎn ja nĩ,” he jé ag tóg ke mü gé, goj kri mũgtĩ ag.

²⁰ “Kanhkǎ tá nýtí kar'. Mỹ sér nýtĩmnĩ. Topě ki ge kỹ nýtí kar', mỹ sér nýtĩmnĩ. Apóstolo kar', Topě ví tó tí kar', mỹ sér nýtĩmnĩ. Tú' he kǎn ag huri, cidade ěn tá ke kar ag. Topě vỹ hur ag vóg kónǎn, ag tỹ ājag vóg kónǎn ja tugrĩn.”

²¹ Kỹ Topě tỹ jěně jafǎ tar ũ tóg pó mág vǎg mü. Kra tỹ pó ri ke ti nĩ, pó mág ěn ti. Kỹ tóg goj nig ki ti fón mü, jũ kỹ, kỹ tóg: “isỹ pó fón mü tag ri ke ti nĩnh mü, cidade tỹ Babilônia kókén ti,” he mü. “Kókén kǎn kỹ tóg nĩ. ũ tóg ti ve mǎn ke tú nĩ ha, cidade ti.

²² Kǎki ag tóg harpa kyn mǎn ke tú nýtí ha, tỹnh mǎn ke tú ag nĩ ha, vǎn tỹ vǎkyr ěn kyn mǎn ke tú ag nĩ ha, trombeta ti ke gé. Vǎkyr mẽ mǎn ke tú ěg nĩ ha, cidade tỹ Babilônia tá. ũ tóg ki rǎnhrǎj mǎn ke tú nĩ ha, ũ tóg ki nĩ mǎn ke tú nĩ ha. ũ tóg ki tynyn mǎn ke tú nĩ gé. ²³ ũ tóg ki lampiǎo grug mǎn ke tú nĩ ha. ũ tóg ki vēnh prũg to festa han mǎn ke tú nĩ gé. Há täví ja ag nýtí, tá nén (ũ) kar vender he nýtĩgtĩ ěn ag, kỹ vēnh kar vỹ ag vỹ jěmẽ ja nĩgtĩ. Povo kar krĩn kónǎn ja ag tóg nĩgtĩ, kujá tỹ ěg mỹ ón tí ěn ri ke han ja ag tóg nĩgtĩ. ²⁴ Topě ví tó tí ag kǎgtén ja ag tóg nĩgtĩ, cidade ěn tá ke ag, Topě ki ge kỹ nýtí ag kǎgtén ja ag tóg nĩgtĩ. ěn hǎ tá tóg vēnh ven ja nĩ, ag tỹ ũn kǎgtén mü kyvénh kar ti. Hǎ kỹ ag tóg ag kar kyvénh kajǎm kǎn ke mü,” he tóg mü, Topě tỹ jěně jafǎ tar ěn ti.

19

¹ Kỹ sóg kanhkǎ tá nén ũ mẽg mü gé sir, hǎ ra tóg ũ tỹ hěn ri ke ag jǎn mẽg nĩ. Jǎn kỹ ag tóg cidade ěn to tag tó mü, ha mẽ. “Topě mỹ ví há han nĩ. Topě ne ěg krenkren han ki kanhró nĩ'. Ti hǎ ne tỹ ũn mág nĩ'. Ti hǎ ne tar jě'. ² Ti tỹ nén han mü vỹ kuryj kar nỹ. ũn týtá kórég ěn fi vóg kónǎn tóg huri. Ēprǎ ke kar kókén ja fi tóg nĩ, fi jykre pǎno tỹ. Topě vỹ fi vóg kónǎn, fi tỹ ti rǎnhrǎj han tí ag kǎgtén ja nĩn kỹ,” he ag tóg, kanhkǎ tǎn ag, cidade tỹ Babilônia to.

³ Kỹ ag tóg jǎn mǎn kỹ tag tó mü gé, ha mẽ. “Topě mỹ ví há han nĩ. Cidade ěn pũr nĩja vỹ kanhkǎ ra tǎpny mü. Tú' henh ke tú ti nĩ, nĩja ěn,” he ag tóg mü gé, jǎn kỹ, kanhkǎ tǎn ěn ag. ⁴ Kỹ kófa tỹ 24 (ke) ěn ag tóg mũg ke kǎn mü, nén nẽ tỹ 4 (ke) ěn ag mré hǎ. Topě mỹ ag tóg: “Topě vỹ tỹ ā nĩ,” he mü, ũ tỹ nĩgia sĩnvĩ kri nĩ ěn mỹ. Kỹ ag tóg: “hǎ vē,” he mü gé. “Topě mỹ ví há han nĩ,” he ag tóg mü, jamǎ hár(a).

Cordeiro vēnh prũg

⁵ Kỹ nĩgia sĩnvĩ ěn tá vēnh ví tóg mẽ há tí gé. “Ũ tỹ Topě mỹ rǎnhrǎj tí’,” he tóg. “Ũ tỹ Topě kamẽg tí’,” he tóg. “Ũn mág’,” he tóg. “Ũn kǎsir’,” he tóg. “Topě mỹ ví há han, ājag kar,” he tóg, vēnh ví ěn ti.

⁶ Kỹ sóg ũ tỹ hěn ri ke ag jǎn mẽg mü gé. Tỹ tóg sa krog ví mẽ tí, tỹ tóg ta tỹ tỹrỹr he mẽ tí gé, ag jǎn ti. Jǎn kỹ ag tóg tag tó mü, ha mẽ. “Topě mỹ ví há han nĩ,” he ag tóg. “Ũ tỹ nén ũ kar han ki kanhró nĩ ěn tóg tỹ pǎ'i mág pẽ jě, ěg pǎ'i mág ti, Topě ti. ⁷ Kỹ tóg ěg mỹ sér täví tí. Ví sér han jé ěg tóg ke mü ha. “Tỹ ti ũn mág pẽ jě,” he jé ěg tóg ke mü gé. “Cordeiro tỹ vǎhǎ prũg ke nẽ ha. Ti prũnh ke fi vỹ vēnh kǎn huri. ⁸ Ā kur kupri ěn tu kỹ fi tóg jě nĩ, fi kur jěngrẽ ěn,” he ag tóg, ũn e ag, jǎnjǎn kỹ. Fi jykre tǎg to ken hǎ vē, hǎ vỹ: fi kur kupri jěngrẽ, he mü, fi tỹ Topě jykre há ěn han kỹ nĩ hǎ vē. ũ tỹ Topě ki ge kỹ nýtí kar ag to ken hǎ vē, hǎ vỹ: cordeiro prũnh ke, he mü.

⁹ Kỹ Topě tỹ jěně jafǎ tóg inh mỹ: “inh ví tag rǎn nĩ,” he mü. “Ũ tỹ hěn ri ke ag tóg cordeiro prũg tỹ festa konh ke mü. Topě vỹ ũ tỹ ti festa ko mü ag kar ve há han mü,” he tóg. Kỹ tóg: “Topě tỹ tón hǎ vē,” he mü gé. “Hǎ ra Topě tóg ón vǎnh nĩgtĩ,” he tóg, Topě tỹ jěně jafǎ ti.

¹⁰ Kỹ sóg ti krēm mũg ke mü, sỹ ti mỹ: “Topě vỹ tỹ ā nĩ,” he jé. Hǎ ra tóg inh mỹ: “ke tũg ra,” he mü, Topě tỹ jěně jafǎ ěn ti. “Topě mỹ rǎnhrǎj han jafǎ vỹ tỹ inh nĩ, ā ri ke, ā kanhkǎ ag ri ke, ũ tỹ Jesus tỹ ki hǎ tó mü ki króm mü ěn ag kar ri ke sóg nĩ, Topě rǎnhrǎj

han kÿ,” he tóg. “Topê hã mÿ: Topê vÿ tÿ ã nÿ, hemnÿ,” he tóg inh mÿ, Topê tÿ jênê jafã ên ti.

Topê vÿ tó tÿ ag vÿ Jesus tÿ ki hã tó mÿ ên hã kãmén tÿ.

Û tÿ cavalo kupri kri nÿ

¹¹ Kÿ sóg kanhkã róm kÿ nÿ vég mÿ. Cavalo kupri vÿ tá jê nÿ. Û tÿ ti kri nÿ jÿjyn hã vÿ: “Ûn ón vãnh,” he mÿ. “Û tÿ nén (Û) há to krónh ke vãnh,” he tóg mÿ gé, ti jiji ti. Ti hã vÿ jÿkre kuryj nÿ, Û tÿ cavalo kupri kri nÿ ên ti, kÿ tóg ki hã tó tÿ gé. Nén Û há hã to tóg vãsã ti gé. ¹² Ti kanê vÿ tÿ pÿ gru ve nÿ. Ti krÿ tógfÿ vÿ e nÿtÿ. Ti kri ti jÿjy tóg rán kÿ nÿ, hã ra Û pi(jé) ti jiji ki kanhró nÿtÿ. Ti hã vÿ ã pir mÿ ã jÿjy ki kanhró nÿ. ¹³ Ti kur vÿ kyvénh nÿ. Ti to ag tóg: “Topê vÿ,” he tÿ. ¹⁴ Kanhkã tá soldado ag tóg ti nón kãmÿ mÿ. Cavalo kupri kri ag tóg kãmÿ mÿ, kanhkã tân ag, ti soldado ag. Kur kupri rÿnh kÿ ag tóg kãmÿ mÿ. ¹⁵ Û tÿ ag jo tÿ mÿ ên jênkã tá rógro jã régre tóg kãkutê mÿ. Rógro tag tÿ tóg povo kar ag tÿ hên ri kenh ke mÿ. Tÿ ag kri jê kÿ tóg vênh jÿkre tar han ke mÿ, ag to. Uva jêgmÿ jafã tá tóg jêgmÿnh ke mÿ, uva ti, hã vÿ: Topê tÿ vênh kar to jÿ jagy han mÿ, he mÿ, hã vÿ: uva jêgmÿ, he mÿ. ¹⁶ Ti kur ki tag tóg rán kÿ nÿ, ha mÿ. “Pã'i kar ag kri pã'i,” he tóg, vênh rán ki. “Ûn mág kar ag kri ke,” he tóg mÿ gé, vênh rán ki. Ti kre ki tóg rán kÿ nÿ gé.

¹⁷ Kÿ sóg Topê tÿ jênê jafã Û vég mÿ gé. Rã kri tóg jê nÿ. Kÿ tóg sêsÿ kar jé prêr mÿ, jêsÿ tÿ kanhkã krêm têtê tÿ ag kar. Jamã hár(a) tóg ag mÿ: “!..kuneg..!” he mÿ. “!..Vênh mãn kãmÿ jeg..!” he tóg. “!..Topê tÿ festa konh kãmÿ jeg..!” ¹⁸ Pã'i kãgter konh kãmÿ jeg..! Soldado to pã'i ag, soldado ag, cavalo ag, Û tÿ cavalo kri mÿgtÿ ag, Û tÿ tÿ camarada nÿtÿ ag, ag patrão ag, Ûn mág ag, Ûn kãsir ag, êprã ke kar ag kãgter mÿ nÿ konh kãmÿ jeg..!” he tóg, Topê tÿ jênê jafã ti, sêsÿ ag kar jé prêr kÿ.

¹⁹ Kÿ sóg goj kãtã mÿg ên ve mãn mÿ gé, êprã pã'i kar ag ke gé, ag soldado ag mré hã. Vênh mãn kÿ ag tóg nÿtÿ, ag tÿ Û tÿ cavalo kupri kri nÿ ên kato vãsãnsã jé, ag tÿ ti krêm ke ag kato vãsãnsã mág han jé. ²⁰ Kÿ ag tóg mÿg ên ség mÿ, Û tÿ ón kÿ Topê vÿ tó tÿ ên ag mré hã, Û tÿ mÿg rÿnve nén ve vãnh tÿ hên ri ke hyn han ja ên ti. Ti tÿ milagre hyn han tugrÿn Û tÿ hên ri ke ag tóg ti vÿ kri nÿm ja nÿgtÿ. Ti tÿ ag krÿn kónã hã vê, Û tÿ ti rá tÿ ránrán kÿ nÿtÿ kar ag, Û tÿ ti kãggrá to: “Topê vê,” he mÿ kar ag. Kÿ Û tÿ mÿg ên ség mÿ ag tóg pÿ gru fir ki ti fón mÿ, pÿ mág pë ki, Û tÿ ón kÿ Topê vÿ tó tÿ ên mré hã. Ag rÿnrÿr hã ra ag tóg pÿ grug fir ên ki ag vãm mÿ, ag sigse kÿ. Pó tÿ enxofre pÿr nÿja ên ki ag tóg vãm mÿ, vãn pÿr nÿja ri ke ên ki. ²¹ Ag soldado ag kãgtén ag tóg mÿ gé sir, rógro tÿ, rógro tÿ Û tÿ cavalo kupri kri nÿ ên jênkã tá kãkutê mÿ ên ti. Kÿ jêsÿ kar ag tóg vênh fãn mÿ sir, Ûn kãgter mÿ ag nÿ kon kÿ.

20

Satanás tÿ prÿg tÿ mil (ke) ki se kÿ jê

¹ Kÿ sóg Topê tÿ jênê jafã Û vég mÿ gé sir. Kanhkã tá tóg kãtére mÿ, Topê tÿ jênê jafã ti. Nÿgme jãnkã nífénh jafã vyn kÿ tóg kãtére mÿ, ti chave ti. Ferro tÿ corrente vãg tóg mÿ gé. ² Ên vÿ mÿg fêr ên ség mÿ, hã vÿ: pÿn ve tÿ Ûn ve fag krÿn kónã mÿ, he mÿ, hã vÿ: Japo, he mÿ, hã vÿ: Satanás, he mÿ, mÿg fêr ên ti. Ên se kÿ tóg ferro tÿ ti mrÿnh mÿ sir. Kÿ tóg se kÿ jê nÿ, prÿg tÿ mil (ke) ki. ³ Nÿgme ki tóg ti fón mÿ sir, mÿg fêr ti tÿ, Topê tÿ jênê jafã ên ti, kÿ tóg nÿgme jãnkã nífénh há han mÿ sir, chave tÿ. Kÿ mÿg fêr ên tóg povo ag krÿn kónã mãn ke tÿ nÿ ha ver, prÿg tÿ mil (ke) ki. Prÿg tÿ mil (ke) tag tÿ tÿ' hen kÿ ag tóg ver ti kavã sÿ han mãn ke mÿ, mÿg fêr ti.

⁴ Kÿ sóg nÿgja sÿnvÿ tÿ hên ri ke vigvêg mÿ. Û tÿ kri nÿgnÿg kÿ nÿtÿ ag vÿ tÿ pã'i nÿtÿ, ag tÿ vênh kar jÿkre tugnÿm ke to pã'i. Kÿ sóg êprã ke kuprÿg tÿ hên ri ke ag vigvêg mÿ gé, ag tÿ Ûn kãgtén ja ên ag kuprÿg. Ag tÿ vênh kar mÿ Jesus kãmén ja tugrÿn ag tóg ag kãgtén ja nÿ, ag tÿ Topê vÿ tó tugrÿn. Mÿg ên to ag tóg: “Topê vê,” he ja tÿ nÿgtÿ, ti kãggrá to ke gé. Mÿg rá ên tÿ ag tóg vênh rán ja tÿ nÿ gé, ag kakã ki, ag nÿgé pãnÿ ki ke gé. Ên ag vÿ tÿ Cristo mré pã'i nÿtÿnh ha, prÿg tÿ mil (ke) ên ki. ⁵ Vêser Û ag vÿ ver rÿnrÿr mãn ke tÿ nÿ. Prÿg tÿ mil (ke) ên tÿ tÿ' hen kÿ ag tóg kejên rÿnrÿr mãn kãn ke mÿ. Û tÿ Cristo

mré tỹ pã'i nỹtĩ tag ag vỹ rĩnrĩr vén ke mũ. ⁶ Û tỹ rĩnrĩr vén mũ mỹ tóg vĩ há han ke mũ, Topẽ ti. Topẽ tũ vỹ tỹ ag nỹtĩ. Kãgter mãn ke tũ ag tóg nỹtĩ ha. Topẽ tũ ki rĩr jé ag tóg ke mũ, Cristo tũ ki ke gé. Prỹg tỹ mil (ke) ki ag tóg tỹ pã'i nỹtĩnh mũ, Cristo mré hã.

Satanás kutẽ

⁷ Kejẽn prỹg tỹ mil (ke) ẽn tóg tũ' he mũ. Kỹ ag tóg Satanás ẽn kavãn sĩ han mãn ke mũ. ⁸ Kỹ tóg tĩ mũ, povo tỹ Gogue ag mré Magogue ag krĩn kónãn jé, tãtã, ga fyr tá, Satanás ti. E tãvĩ ag nỹtĩ, goj fyr tá rỹnhryj ri ke ẽn ag, goj kafã tũ fyr tá rĩnrĩr ri ke ẽn ag. Ag vẽn h mãn kãn han jé tóg ke mũ, Satanás ti. ⁹ Kỹ ag tóg tá kãmũ mũ, ùn e tãvĩ ẽn ag. Û tỹ Topẽ ki ge kỹ nỹtĩ ag kato ag tóg kãmũ mũ, cidade ẽn kato, Topẽ tỹ cidade to há nĩ ẽn kato. Ag tỹ ag tỹ tũ' he kãn sór vẽ. Hã ra pĩ tóg kanhkã tá kãtẽre mũ, kỹ tóg ag kãgtén mũ. Û tỹ Topẽ ki ge kỹ nỹtĩ ag tỹ tũ' he sór mũ ẽn ag kãgtén tóg mũ, pĩ ti. ¹⁰ Japo ẽn, ù tỹ ag mỹ ón mũ ẽn fón pẽ han ag tóg mũ, pĩ grug fir ẽn ki, pĩ mág pẽ ẽn ki, pó tỹ enxofre pũr nĩja ẽn kãki, vãn pũr nĩja ri ke ẽn kãki. Goj kãtã mĩg ẽn vỹ tá nĩ ha, pĩ grug fir ẽn kãkã, kar kỹ ón kỹ Topẽ vĩ tó tĩ ẽn ti ke gé. Pĩ grug fir ẽn kãki ag tóg nỹtĩ, tá kãpa mãn ke tũ pẽ ag tóg nỹtĩ ha. Tá ag jagtar tãvĩ nỹtĩ ha.

Vẽn h kar jykre tugnỹm ke kurã

¹¹ Kỹ sóg nĩgja mág pẽ vég mũ gé, nĩgja kupri. Û tóg kri nĩ nĩ. Ti rĩnve ga tóg tũ' he mũ vãhã, kanhkã ti ke gé. Vẽn h ven mãn tũ tóg nỹtĩ ha, kanhkã mré ga ti. ¹² Kỹ sóg vẽser kar vigvég mũ, ùn mág ag, ùn kãsir ag ke gé. Nĩgja kupri ẽn jo ag tóg nỹtĩ. Kỹ livro vỹ tá nỹtĩ gé. Livro ẽn kygvãg ag tóg mũ. Vẽn h kar jykre vỹ livro ẽn ki rãnrán kỹ nỹtĩ. Kỹ livro ù vỹ tá nĩ gé, ẽn kavãg ag tóg mũ gé. Û tỹ rĩr krỹg ja tũ venh ke mũ ag jygyj vỹ livro ẽn ki rãnrán kỹ nỹtĩ. Kỹ Topẽ tóg vẽser kar jykre tugnỹm ke mũ, kỹ tóg ag mỹ ag tỹ nén venh ke mũ ti tónh ke mũ. Ag tỹ ãjag tỹ nén han ja kajãm ke vẽ, ag tỹ ãjag jykre tỹ livro ki rãnrán kỹ nỹtĩ ẽn kajãm kãn ke vẽ. ¹³ Û tỹ goj ki kãgter mũ ag vỹ tá nỹtĩ gé, ù tỹ vẽser jamã tá nỹtĩ ag kar ti. Vẽn h kar vỹ tá nỹtĩ. Ag tỹ nén han mũ kar kajãm kãn jé ag tóg ke mũ ha. ¹⁴ Kỹ ù vỹ ter mãn ke tũ nĩ ha. Ẽg ter ke tag vỹ hur tũg. Û tỹ pĩ grug fir ẽn kãki vãr ke tag ag vỹ kãgter ri ke han ke mũ, kỹ tóg ag kãgter pẽ han ri ke nĩ sir, ag tũg pẽ han tũ ra. ¹⁵ Kỹ ùn jygyj rãn kỹ nỹtĩ tũ ẽn ag vỹ pĩ grug fir ẽn kãki vãr kãn ke mũ, ùn jygyj tỹ Topẽ livro ki rãnrán kỹ nỹtĩ tũ ẽn ag.

21

Kanhkã tãg mré ga tãg

¹ Kỹ sóg kanhkã tãg vég mũ gé, ga tãg ke gé. Kanhkã ve ẽn tóg hur tũg, ga ve ẽn ke gé, goj ti ke gé. ² Kỹ sóg Topẽ tỹ cidade tag, Jerusalém tãg tag vég mũ gé. Kanhkã tá tóg kãtẽre mũ, Topẽ tá, cidade tãg tag ti. Cidade sĩnvĩ han ja ag tóg nĩgtĩ, kỹ tóg ag tỹ tá vẽn h prũg to festa han ke nĩ ve nĩ. Cidade sĩnvĩ tóg ùn prũnh ke fi sĩnvĩ ri ke nĩ, fi tỹ ã mén ke ti jãvãnh kỹ. ³ Nĩgja kupri ẽn tá vẽn h vĩ tóg mẽ há tĩ, kỹ tóg: “Topẽ jamãn hã vẽ,” he mũ. “Topẽ tỹ ẽprã ke ag mré ẽmãn hã vẽ,” he tóg. “Ag mré tóg nĩ nĩ ha, ti tũ vỹ tỹ ag nỹtĩnh ke mũ ha. Topẽ vỹ ag mré nĩnh mũ ha, kỹ tóg tỹ ag Topẽ nĩ sir. ⁴ Ag kanẽ var tỹ tũ' he kãn jé tóg ke mũ ha. Û tóg ter mãn ke tũ pẽ nĩ ha, hã kỹ ù tóg fe kaj nĩ mãn ke tũ nĩ gé, jagtar ke tũm, kaganh ke tũm. Tũg ti nĩ ha, vẽn h jykre si kar ti. Vẽn h ven mãn ke tũ ti nĩ ha, vẽn h jykre si ti,” he tóg, vẽn h vĩ ẽn ti.

⁵ Kỹ ù tỹ nĩgja kupri kri nĩ ẽn tóg: “nén (ũ) kar han mãn jé sóg ke mũ ha,” he mũ. Kỹ tóg inh mỹ: “inh vĩ tag rãn nĩ,” he mũ gé. “Sỹ ki hã tó vẽ. Vẽn h ven kãn jé tóg ke mũ, sỹ ã mỹ nén tó mũ tag ti,” he tóg. ⁶ Kỹ tóg: “hỹ, vẽn h ven kãn ti huri,” he mũ gé. “Ûn ve vỹ tỹ inh nĩ, kỹ sóg tỹ ẽgno nĩ gé. Isỹ nén (ũ) kar han to hã sóg nĩ nĩ, kỹ sóg nén (ũ) kar tũg mũ ra nĩnh mũ gé. Û tóg goj kron sór mũ. Ẽn mỹ sóg goj ven tĩ, kaja tũ ra. Isỹ ti mỹ goj ven mũ ẽn vỹ ti ter tũ han ke mũ. ⁷ Û tỹ isovãnh tũ ẽn mỹ sóg nĩm ke mũ, presente tag ti, ha mẽ: ti Topẽ vỹ tỹ inh nĩnh mũ, kỹ tóg tỹ inh kósin nĩnh mũ gé,” he tóg inh mỹ, ù tỹ nĩgja kupri kri nĩ ẽn ti.

⁸ Hã ra ù ag tóg pĩ grug fir kãki, pĩ mág pẽ ên kãki vár ke mũ, hã vỹ: ùn mũmẽg (ka)mẽ ag, he mũ, ù tỹ isovãnh mũ ag, he mũ, ù tỹ vãnh jykre pãno tỹ vãnh kavénh tĩ ag, he mũ, ù tỹ ù tén tĩ ag, he mũ, ù tỹ ã prũ tũ fag mré nýgnỹ mũ ag, he mũ, ù tỹ ã mén tũ mré nýgnỹ mũ fag, he mũ, kujá ag, he mũ, curandeiro ag, he mũ, ù tỹ vãnh kãggrá jykre mĩ mũ mũ ag, he mũ, ùn ón mũ ag, he mũ gé. Pĩ grug fir ên kãki tóg ag vãm kãn ke mũ, pó tỹ enxofre pũr nĩja ên kãki, vãn pũr nĩja ri ke ên kãki. Kỹ tóg ag kãgtén pẽ han ri ke nĩ sir,” he tóg, ù tỹ nĩgja kupri kri nĩ ên ti.

Jerusalém tãg

⁹ Kỹ Topẽ tỹ jẽnẽ jafã ù tóg inh ki jun mũ, ù tỹ pénky kãkã nĩ ên tỹ ga kri ke ag vóg kónãnh mũ ên ag kã ù. Inh mỹ tóg: “kunĩg,” he mũ. “Cordeiro prũnh ke fi venh kãtig,” he tóg inh mỹ.

¹⁰ Kỹ Topẽ kuprĩg tóg inh krĩn mũ sir, kỹ sóg nén nẽ vég mũ. Topẽ tỹ jẽnẽ jafã ên tóg inh pére tĩ mũ, pãnónh tėj (gy) kri. Pãnónh kri jẽ kỹ tóg inh mỹ Topẽ tỹ cidade tãg ven mũ sir, cidade tỹ Jerusalém, he mũ tag ti, ù tỹ kanhkã tá kãtére mũ tag ti, Topẽ tá. ¹¹ Sĩnvĩ pẽ tóg nĩ, Topẽ sĩnvĩ ên ri ke ti nĩ, kókov tóg nĩ gé, pó tỹ jaspe kókov ri ke. Pó tỹ tonh vỹ tỹ ti nĩ, jaspe ti, kỹ tóg pó kókov fĩn êváj ên ri ke nĩ. ¹² Cidade jy ró tóg tėj gy nỹ, vãnh ra hã tóg tėj gy jẽ gé. Ró ki jãnkã tỹ 12 (ke) vỹ nỹtĩ. Kỹ Topẽ tỹ jẽgnẽ jafã tỹ 12 (ke) ag vỹ ki rĩr nỹtĩ, jãnkã ki. Ki vãnh jygy tóg ránrán kỹ nỹtĩ, jãnkã ki, Israel jóg'jóg ve tỹ 12 (ke) ên ag jygy ti. ¹³ Rã jur ja kãtã tóg jãnkã tãgtũ nĩ. Rã pur ja kãtã tóg jãnkã tãgtũ ù nĩ gé, kanhkã tãpér kãtã tóg jãnkã tãgtũ ù nĩ gé, kanhkã tãpér ù kãtã tóg jãnkã tãgtũ ù nĩ gé. ¹⁴ Pó tỹ 12 (ke) kri tóg hyn han kỹ nĩ nĩ, cidade ti. Pó ên ki vãnh jygy tóg ránrán kỹ nỹtĩ gé, apóstolo tỹ 12 (ke) ên ag jygy ti, cordeiro tũ ên ag jygy ti.

¹⁵ Kỹ ù tỹ inh mré vĩ mũ ên, Topẽ tỹ jẽnẽ jafã ên tóg ti kãmun jafã vyn kỹ jẽ nĩ, ti kãmun jafã tỹ ouro ti. Kỹ tóg cidade kãmun sór mũ, cidade jy ró ti, ti jãnkã ti ke gé. ¹⁶ Péno tỹ 4 (ke) ti nĩ, cidade ti, kỹ ti tãpér vỹ ti tėj ri ke nĩ. Kỹ Topẽ tỹ jẽnẽ jafã ên vỹ kãmun mũ sir, cidade ti, ti kãmun jafã tỹ. Quilômetro tỹ 2 mil kri 200 (ke) ti nĩ, ti tỹ tėj e kỹ nỹ ki, ti tãpér ki ke gé, ti tỹ vãnh ra jẽn ke gé. Vãnh ri ke kar ti nĩ, ti kãmur ti. ¹⁷ Kỹ tóg cidade jy ró ên kãmun mũ gé. Ti tãpér vỹ metro tỹ 64 (ke) nĩ. Metro tag vỹ tỹ êprã ke ag kãmun jafã nĩ, hã ra Topẽ tỹ jẽnẽ jafã vỹ kãmun mũ, êprã ke ag kãmun jafã tỹ. ¹⁸ Ró vỹ pó tỹ tonh tỹ jaspe tỹ han kỹ nỹ. Kỹ cidade vỹ ouro tỹ han kỹ nĩ, hã ra tóg fĩn êváj nĩ, vidro fĩn êváj ri ke. ¹⁹ Cidade jy ró tóg pó tỹ tonh mág kri han kỹ nĩ. Pó ên to pó tỹ tonh ù tóg nỹtĩ gé, ùn e ag. Pó tỹ tonh mág ù tóg tỹ jaspe nĩ, kỹ ù tóg tỹ safira nĩ, kỹ ù tóg tỹ ágata nĩ, jo ù tóg tỹ esmeralda nĩ, ²⁰ jo ù tóg tỹ sardônio nĩ, jo ù tóg tỹ sárdio nĩ, ù tóg tỹ crisólito nĩ, ù tóg tỹ berilo nĩ, ù tóg tỹ topázio nĩ, ù tóg tỹ crisópraso nĩ, ù tóg tỹ jacinto nĩ, ù tóg tỹ ametista nĩ gé. 12 (ke) ti nỹtĩ, pó mág ti. ²¹ Kỹ ti jãnkã tỹ 12 (ke) vỹ pérola tỹ hyn han kỹ nỹtĩ. Jãnkã pir vỹ pérola pir nĩ mỹr, ha mẽ. Kỹ êpny mág ên, êmĩn mág ên vỹ ouro tỹ han kỹ sa, hã ra tóg fĩn êváj nĩ, vidro fĩn êváj ri ke.

²² Hã ra sóg Topẽ jo ìn vég tũ nĩ, cidade ên tá. Topẽ vỹ vãnh kar kri nĩ, kỹ tóg nén (ũ) kar han ki kanhró nĩ gé. Topẽ hã vỹ cidade ên tá êmã nĩ, cordeiro ti ke gé, hã kỹ tóg tá ag jo ìn tũ nĩ. ²³ Kỹ rã tóg tá tũ nĩ gé, kysã ke gé. Topẽ tỹ jẽngrẽ vỹ ki kurã han tĩ, kỹ tóg tá kutyg vãnh nĩ sir. Cordeiro ên vỹ cidade ên tá rã ri ke nĩ. ²⁴ Kỹ vãnh kar tóg Topẽ tỹ cidade ki jẽngrẽg ên tugrĩn êvãnh há han tĩ, povo kar ag. Êprã pã'i kar ag vỹ ãjag tỹ nén (ũ) kar gé kãmũnh mũ, ag tỹ tá vin han jé. ²⁵ Jãnkã vỹ nugnón kỹ nỹtĩ, kurã kar ki. Kutyg tũ nĩn kỹ ag tóg jãnkã nĩgfénh tũ nĩtĩ. ²⁶ Povo kar ag vỹ ãjag tỹ nén (ũ) gé kãmũnh ke mũ, cidade ên mĩ. ²⁷ Hã ra nén ù kórég vỹ kãrãnh ke tũ pẽ nĩ. ù tỹ vãnh jykre pãno han mũ ag vỹ rã genh ke tũ nĩ, ùn ón mũ ag ke gé. ùn jygy tỹ livro ki ránrán kỹ nỹtĩ ên ag hã vỹ ra genh ke mũ. ù tỹ rĩr krỹg ja tũ vég mũ ên ag jygy vỹ ránrán kỹ nỹtĩ, cordeiro tỹ livro ên ki.

22

¹ Kÿ Topê tÿ jênê jafã tóg inh mÿ goj mág ven mÿ. Goj ên vÿ êg rÿnrÿr han tÿ. Kómkóm ke ti tÿ, goj ên ti, pó kupri fÿn êváj tÿ kómkóm ke ên ri ke, goj ti. Goj ên nÿhÿg vÿ Topê nÿgja tá nÿ, cordeiro nÿgja ên tá. ² Kÿ tóg cidade kujú mÿ tÿ mÿ, êpÿrÿ mág jagma, êmÿn mág ên jagma, goj ti. Ti fyr tá ka tóg nÿtÿ, ti fyr ù tá ke gé. Ka kanê ên vÿ êg rÿnrÿr han tÿ gé. Ên vÿ prÿg pir ki kanê tÿ 12 (ke) han tÿ. Kysã kar ki tóg ã kanê hÿn han tÿ. Ti féj vÿ tÿ vênh kagta kar nÿ, vênh kaga kar tÿ tóg hághá' he kãn tÿ. ³ Topê tÿ nén ù to jÿ vÿ tá nÿnh ke tÿ pê nÿ, cidade ên tá.

Topê nÿgja vÿ cidade ên tá nÿ nÿ, cordeiro nÿgja ên ti, kÿ vênh kar vÿ ti to: “Topê vê,” henh ke mÿ, Topê rãnhrãj han tÿ ag kar. ⁴ Topê ve jé ag tóg ke mÿ, kÿ ti jiji vÿ ag kakã ki rán kÿ nÿnh mÿ. ⁵ Tá tóg kutÿg vãn h nÿgtÿ, hã kÿ ag tóg tá lampião grug ke tÿ nÿ. Rã vÿ tá tÿ nÿ gé. Topê vÿ ag mÿ tÿ jêngrê han tÿgtÿ, êg pã'i ti. Kÿ tá nÿtÿ ag tóg tÿ pã'i nÿtÿnh ke mÿ gé. Ag tÿ tÿ pã'i nÿtÿnh ke tag vÿ tÿ' henh ke tÿ nÿ.

Jesus kãtÿg mãn

⁶ Kÿ Topê tÿ jênê jafã ên tóg inh mÿ: “inh vÿ tÿ ki hã ke nÿ,” he mÿ. “Vênh ó pijé,” he tóg. “Êg jóg tÿ Topê vÿ ù tÿ ã vÿ tó tÿ ag mÿ ã kuprÿg jênê, ti tÿ ag kanhrãn jé. Hã kÿ tóg ã tÿ jênê jafã ag kã ù jênê, ti tÿ ti mÿ rãnhrãj tÿ ag mÿ tó jé, nén tÿ kãnmar kutênh ke mÿ ti,” he tóg, inh mÿ, Topê tÿ jênê jafã ti.

⁷ Jesus vÿ tag tó mÿ, ha mẽ. “Ha vé, inh kãtÿg mãn ke nê ha. Nén tÿ livro tag ki rán kÿ nÿ tag to jÿkrén há han nÿ, kÿ Topê tóg ãjag mÿ vÿ há han ke mÿ,” he tóg, Jesus ti.

⁸ Tag kar ve inh, mẽ inh ke gé, inh, hã vÿ: João, he mÿ. Isÿ ve kãn kar kÿ sóg ù tÿ inh mÿ tag ven mÿ ên krêm mÿg ke mÿ, sÿ ti mÿ: “Topê vÿ tÿ ã nÿ,” he jé. ⁹ Hã ra tóg inh mÿ: “ke tÿg nÿ,” he mÿ. “Ã ri ke sóg nÿ, isÿ Topê rãnhrãj han kÿ. Ã régre ag ri ke sóg nÿ, ù tÿ Topê vÿ tó tÿ ag ri ke sóg nÿ, ù tÿ livro tag ki nén rán kÿ nÿ mÿg mÿ ag ri ke sóg nÿ gé. Topê hã mÿ: “Topê vÿ tÿ ã nÿ,” hemnÿ,” he tóg, inh mÿ, Topê tÿ jênê jafã ti.

¹⁰ Kÿ Jesus vÿ tag tó mÿ gé, ha mẽ. “Livro tag ki nén rán kÿ nÿ tag péju sór tÿg nÿ,” he tóg, inh mÿ. “Kakó ti nÿ ha, ãjag tÿ nén tÿ ki rán kÿ nÿ tag venh ke mÿ ti. ¹¹ Û tÿ vênh jÿkre pãno han mÿ ên jé han kÿ nÿ nÿ. Û mÿn hÿn há tÿgtÿ, ti jÿkre kavéj ti. Ti jé ã jÿkre kórég hã mÿ tÿg. Û tóg vênh jÿkre kuryj han tÿ. Ti jé to tar nÿ. Û ag tóg tÿ Topê tÿ nÿtÿ. Ag jé ti to krónh ke tÿg,” he tóg, Jesus ti.

¹² “Ha vé, inh kãtÿg mãn ke nê ha. ãjag kaja ma sóg kãtÿg ke mÿ, ha vemnÿ. Vênh kar vÿ ve kãn ke mÿ, ag tÿ nén han mÿ kaja ti. ¹³ Topê vÿ kar han sóg tÿ. Ûn ve vÿ tÿ inh nÿ, ùn tÿ êgno vÿ tÿ inh nÿ gé. Isÿ nén kar han vén to hã sóg nÿ, kÿ sóg nén kar tÿ tÿ' he mÿ ra êgno kã nÿnh ke mÿ gé,” he tóg, Jesus ti.

¹⁴ “Û ag tóg ãjag jÿkre kugrynh sór tÿ, hã kÿ ag tóg êg tÿ êg kur kygfa ri ke han tÿ. Ên ag mÿ tóg vÿ há han ke mÿ, Topê ti. Ka kanê tÿ êg rÿnrÿr han tÿ ên ko jé ag tóg ke mÿ, kÿ ag tóg cidade ên jãnkã ra genh ke mÿ gé. ¹⁵ Hã ra ù ag tóg ên ra genh ke tÿ nÿ, hã vÿ: ù tÿ vênh jÿkre pãno tÿ vênh kavénh tÿ ag, he mÿ, kujá ag, he mÿ, curandeiro ag, he mÿ, ù tÿ ã prÿ tÿ fag mré nÿgnÿ mÿ ag, he mÿ, ù fag tÿ ãjag mén tÿ ag mré nÿgnÿ mÿ fag, he mÿ, ù tÿ ù tén mÿ ag, he mÿ, ù tÿ vênh kãggrá jÿkre mÿ mÿ mÿ ag, he mÿ, ùn ón mÿ ag, he mÿ, ù tÿ ù ag lograr he mÿ ag, he mÿ gé. Ên ag vÿ cidade ra genh ke tÿ pê nÿ,” he tóg, Jesus ti.

¹⁶ “Isÿ jênê jafã jênê inh, inh, hã vÿ: Jesus, he mÿ. Ti jênê inh, ti tÿ ãjag mÿ ãjag tÿ nén venh ke mÿ kar tó jé, ù tÿ inh vÿ jêmê jé vênh mãn tÿ ag kar mÿ. Davi krê'krê ag kã ù ên vÿ tÿ inh nÿ. Krÿg mág hã sóg nÿ,” he tóg, Jesus ti.

¹⁷ Kÿ Topê kuprÿg vÿ Jesus mÿ: “kur kãtÿg,” he mÿ. Û tÿ ti ki ge kÿ nÿtÿ kar ag vÿ ti mÿ tag tó tÿ gé, ag tÿ tÿ ti prÿnh ke fi ri ke nÿtÿnh kÿ. Û tÿ ag tÿ ti jé prêr mÿg mÿ ag jé ti mÿ: “kur kãtÿg,” he kãn.

Kÿ Jesus tóg: “ù tÿ goj kron sór mÿ ên jé iso kãtÿ,” he mÿ, “sÿ ti mÿ goj jun jé, fagrÿnh mÿ. Goj ên vÿ ti rÿr han ke mÿ, ha vemnÿ,” he tóg, Jesus ti.

João tÿ ve ja

¹⁸ Vãhã sóg tag tó sór mũ, inh, hã vỹ: João, he mũ, ha mẽ. Ủ tóg kejẽn isỹ nén rán mũ tag ve kỹ pãte ủ rán mãn sór ke mũ gé hẽn ri ke mũn. Ên vóg kónãn tãvĩ han jé tóg ke mũ, Topẽ ti, kỹ tóg sỹ nén ủ jagy tó mũ ên ve kãn ke mũ, ha mẽ. ¹⁹ Kejẽn ủ tóg hẽn ri ke mũn isỹ nén rán mũ ủ tỹ nén ủ tũ han sór mũ. Ên tũ mág tỹ tóg tũ' henh ke mũ gé, Topẽ ti, kỹ tóg ka kanẽ tỹ ẽg rĩnrĩr han mũ ên konh ke tũ nĩ. Topẽ tỹ cidade nĩv ên ra rãnh ke tũ tóg nĩ gé, sỹ cidade kãmén mũ ên ra.

²⁰ Ủ tỹ inh mũ tag kar ven mũ ên vỹ: “inh kãtĩg mãn ke nẽ ha, sỹ ki hã tó vẽ,” he mũ. Hỹ, kur kãtĩg, ẽg Senhor tỹ Jesus'.

²¹ Ẽg Senhor tỹ Jesus jé ãjag kar tar han. Hã vẽ.

Ẽg tỹ Topẽ vĩ rá venh ke

Ẽg tỹ Topẽ vĩ rá ve kỹ ki kanhrãn kỹ ki krov kỹ ẽg hã han ke mũ. Kurã kar ki ẽg tóg to sĩ han ke mũ, kỹ ẽg tóg kãnhmar fĩn rãm ke mũ. Kỹ tóg há tĩ gé, ẽg tỹ prỹg kar ki Novo Testamento tag fĩn rãm kỹ, ẽg tỹ tỹ vẽnh kanhrãn há han jé. Ẽg tỹ fĩn rãm jé ẽg tóg gen kỹ to kenh mũ, ha vé: